

D+S
M

PRÈCH
POU MÈS DIMANCH YO
Ané A - B - C

Monséyè Frantz Colimon
té préparé pou éspliké Paròl Bondié-a
dapré Misèl Romin-an

27 novanm 1989
27 novanm 2004

**Notre-Dame de la Médaille miraculeuse
16 avril 2005: Ste Bernadette Soubirous**

27 novanm 1989, Monségnè Frantz Colimon té ofri sou fòm daktilografié prèch li té préparé pou tout dimanch yo dépi ané 1986 rivé 1989 dapré Misèl Romin-an.

Tankou tout "oméli", prèch sa yo sé "aktualizasyon" Paròl Bondié-a nan yon tan, yon koté, pou kèk moun byin détèminé. Min paské sé "Bòn Nouvèl pou tout tan-an" (*Apokalips* 14,6) l-ap anonsé pou "tout nasion ak ras ak lang ak pèp", chak jénérasyon ap jouinn nouriti pou nanm li ladan-l.

Nan ané 2003-2004 gin yon group krétyin ki té ouè jan nouriti sa-a bon épi yo té vlé édé lòt moun gouté li tou. Sé pou sa yo té travay pou nimérisé tèks la pou yon lòt édisyon. Moun sa yo mérité rékonésans nou minm ki gin liv sa-a nan min nou:

Mme Farah Brunache Dorsainvil
Mme Merly Desrouleaux Liburd
Mme Vanda Jouissance
Mme Katia Nérette Apollon
Mme Sandra Nérette Pharel

Pou yo, pou nou ak pou Monséyè n-ap mandé Bondié gras pou nou ka viv Paròl la épi pou nou "vi-n gin plis odas, san nou pa pè pou nou palé Paròl la" (Cf. *Filipyin* 1,14).

Dépôt légal:
Bibliothèque nationale d'Haïti

ISBN 99935-54-02-2

© Mgr Frantz Colimon. Tous droits réservés.

Port-au-Prince, Haïti.
16 avril 2005
Sainte Bernadette Soubirous
28 avril 2005
Saint Louis Marie Grignon de Monfort

PRÉMIÉ DIMANCH LAVAN A

Lamès gin dé pati nòmalmàn, sèvis Parol la ak sérémoni sakrifis la. Tan lavan-an, yo t-a kapab konparé-l ak premié pati lamès la, épi tan karèm nan minm t-a pi sanblé ak dézièm pati-a. Gin rélation ant lavan ak Karèm, minm jan gin relation ant Parol Bondié-a ki vi-n tounin moun ak Sakrifis li fè sou Koua-a. Jézu-Kri sovè nou gras a Paròl li épi gras a san li. Sa-l té déklaré nan Paròl li-a, li signin-l ak San-l. Sé Rinmim Bondié Papa-a, mèvèy sakré sa-a li kaché pou savan yo, épi li dévoualé bay moun ki sinp yo.

Monfò di konsa: Malgré tout soupi zansèt yo té pousé nan lansyin Téstaman, pou yo té mandé Bondié pou-l désann, sé ti la Vièj Mari ki té rédi-l nan kè-l ki tou sinp. Vid rélé plin. Bondié gin tout pouvoua. Mari minm tou sinp. Tout tan lavan-an invité nou pou nou gadé sou li. Fèt Imakilé Konsépsion-an toujou tonbé nan kòmansman lavan-an. Anpil tèks lamès lavan yo fè nou sonjé konpòtman li ki sèvi modèl an fas Mèvèy sakré Parol Bondié-a ki vi-n tounin Moun nan. Li sé modèl nou pou nou aprann tann Granmèt la. Rin nou maré, lanp nou nan min nou.

Préfas fèt Notré-Dam nan di kijan li poté Sèl Pitit Bondié-a nan vant li, lè léspri Sin-an kouvri-l ak lonbraj li, épi, antan li toujou rété vièj, li anfanté Limière ki la dépi tout tan ak pou tout tan-an. Sé rabèsman Notré-Dam ki sèvi yon bon fon pou fè bèlté Jézu-Kri parèt.

N-ap mandé-l favè pou nou aprann éfasé nou pou nou kité Jézu-Kri kléré, pou nou évité mété tèt nou an-avan, fè logèy pou sa nou jouinn ak intélrijans nou, lévé tèt nou anlè lòt yo poutèt siksè nou.

Group moun yo ki ankadré Jézu k-ap fèt la, sé moun ki sinp, ki tèlman sinp yo mété Granmèt la alèz, pou-l kapab fè ouè-l. Avèk Mari, nan premié plas, ki toujou ap chèche okazion pou-l rann sèvis, antan li konsidé rézòt yo plis pasé li, nou jouinn Jozèf ki sin, li minm ki obéyisan, ki ré an silans, ki éfasé, ki gin charité, ki pa janm bouké pou-l réalize lòd Granmèt la. Li toujou ap véyé. Sé li minm vré ki pou té marié avèk Mari, ki toujou ap véyé, k-ap kalkilé nan kè-l tout tan paròl ak jès Granmèt la épi ki tout tan ap rédi premié oui li té di-a, sa-l pa-t janm dédi-a.

Jan-Batis, yon bèl figi nan tan lavan-an, li minm li okipé pou-l préparé Pèp Bondié-a pou-l rankontré Bondié-l. Li fè atansyon pou-l komansé fonsé nan dézè-a, nan yon novisia ki long, pou-l égzèsè pròp tèt li nan kalité rabèsman-an sa li gin pou-l égzijé lòt yo. "Mouin pa mérité pou-m défèt lasèt sapat li... Mouin pa Mésie marié-a, min sé zanmi-l mouin yé..., sé pou-l grandi,

épi pou-m vi-n pi piti... Sé Voua-a k-ap rélé nan savann nan, sé pa Paròl la mouin yé..." Sé pou voua-a tinyin pou Paròl la kapab fè yo konprann li. Sé lè Jan-Batis fini mision-l, lè yo arété-l la, Jézu komansé mision pa-l. Sé sa Granmèt la ap tann nan min nou, pou nou fi-n palé anpil avèk arogans, pou-l kapab plasé kèk mo.

Silans Jan-Batis la ki long nan, avèk zanmi li fè ak dézè-a, li éritié sa nan min papa-l ki té baba. Sé komsa tout profèt lansyin Téstanman yo té mété douèt sou bouch yo, lè ti Jan-Batis ap proché, li minm dènié ak pi gran nan profèt yo, silans sa-a nan tan ki pa-t gin profèt la, ki fè moun ki ékri touazièm liv Izayi-a té di: "Èské ou kapab pé bouch ou konsa pou-ou fè nou ront san rété?" (cf Is 64,11). Sé silans Bondié li minm ki invité nou pou kouté Paròl li k-ap palé nan silans. Gin dé bagay, sé nan silans sèlman yo kapab di yo. Anpil foua nou blésé, nou paré pou nou réaji. Sé silans la sèl ki yon pomad k-ap kalmé doulè-a, k-ap géri blésé yo. Silans la ki plonjé nou nan Granmèt la, li gin minm kalité ak rémèd. Tankou yon mouton y-ap kondui labatoua, li pa louvri bouch li.

Jan-Batis ap gin yon mouvman k-ap fè-l rékilé, lè Granmèt la ap proché koté-l pou-l fè-l batizé-l. Li di: "Sé mouin minm ki bézouin pou-ou batizé-m, épi sé ou minm k-ap vi-n koté-m!" (Mt 3,14). Manman-l té déjà gin minm réaksion sa-a dévan la Trè Sint Vièj Mari, ki té vi-n lakay li pou sèvi-l, li té di: "Kijan mouin fè gin chans sa-a pou Manman Granmèt mouin vi-n koté mouin!" (Lc 1,41).

Nou tèlman abitué avèk prezans Jézu-Kri nan sakréman Kò-l ak San-l, nou bliyé sé yon bagay ki dépasé nou, nou pa minm gin respè kèkfoua pou sakréman sa-a ki si tèlman gran-an. Sé pétèt moman pou nou gadé yon ti kras sou moun sa yo k-ap défilé dévan nou, pandan tan lavan-an, k-ap paré chémin pou Jézu-Kri vini, li minm n-ap di tout tan-an: "Vini, Granmèt Jézu" (Ap 22,20; Ac 3,20-21; 1 Co 15,23).

*

Sin Pòl di nou li lè pou nou soti nan dòmi (R 13,11). Ki kalité dòmi l-ap palé nou? Yo di dòmi sé ti frè lanmò. Ki kalité lanmò? Lanmò ki pa gin lavi dèyè-l la. Dòmi sa-a, sé sa Sin Pòl éspliké antan l-ap palé nou osijè aktivité fènoua yo, lè l-ap détayé: manjé dépasé mézi, bouè bouason ki fò, fè mové plézi tankou yon bagay ki òganizé, lagé kò-ou nan dévègondaj, tout lajounin ré ap fè diskision ki pa kapab fini, souflé difé jalouzi-a anndan kè nou, R 13,13, tou sa sé tandans kò-a k-ap mandé pou satisfè anvè égois li yo. Tou

sa, sé aktivité fènoua, tou sa sé bagay yo fè nannuit. Tou sa sé somèy ti frè vré lanmò-a.

Konsa sé pou nou rét ap véyé, jan lévanjil la mandé nou-an, pou dlo kout-tan-an pa ba nou kou-sézi, pou lanm nan pa anglouti nou san nou pa atann.

Noèl sé yon nuit tout moun gin abitud véyé. Sé gadyin mouton yo ki t-ap véyé nannuit, sé yo minm Anj Bondié yo té adrésé bòn nouvèl lapè-a, lè yo t-ap di: "Viv Bondié nan sièl-la, sou tè-a kè pozé pou moun li rinmin yo" (Lc 2,14). Dépi koulié-a nou paré pou nou chanté kantik sa-a yon fason spésial nan nuit Noèl la. Min Noèl la ap ba nou anpil kè kontan, sé nan mézi nou paré-l byin avèk yon bon lavan koté n-ap éfasé tout kras péché nan kè nou.

Ané 1983-a, ané Jibilé Rédanmsion-an, gin dé mo yo té kalkilé sou yo yon fason spésial, sé Rékonsiliation ak Pénitans. Té gin 200 Èvèk ki soti tout koté sou tè-a al a-Ròm, pandan tout yon moua, avèk Pap-la, yo t-ap kalkilé sou mo sa yo. Sé pa mo yo sèlman ki inpòtan, sé sitou sans yo, avèk réalsasyon program yo trasé-a. Sa rékonsiliation-an yé? Sé lagras Bondié poté pou nou, k-ap désann sot nan sièl la. Lagras sa-a gin yon non spésial, yo rélé-l rékonsiliation, paské nou té djè viré do bay Bondié nan fè péché. Lè Bondié, ki pa janm bliyé jan-l rinmin nou, rékomansé ba nou lagras li, sa mandé pou nou minm nou viré fas ba li, pou nou résévoua lagras la. Viré fas bay Bondié-a, sé pénitans la. Sé yon mo latin ki vlé di konvèsion. Pénitans la ak konvèsion-an sé minm bagay. Sé kondision pou résévoua rékonsiliation-an. Bondié t-a mèt ofri nou rékonsiliation-an dépi jodi-a jous démin, si nou pa louvri kè nou antan nou viré do bay péché, pou kité tout kòd péché ki té maré nou, pou nou fè konvèsion, pénitans, nou pa kapab résévoua rékonsiliation-an.

Tan lavan-an, sé yon tan pou nou réfléchi sou sa. Pap la ékri yon dokiman sou kèsion rékonsiliation ak pénitans nan mision légliz la, apré travay Èvèk yo té fè avèk li pandan yon moua-a. N-ap lapriyé pou sa kapab poté frui anpil sou tout tè-a, pou tout moun ki gin bòn volonté, pou moun yo louvri kè yo pou yo résévoua mèsaj rékonsiliation sa-a.

Ki koté pou nou résévoua-l pi byin? Gin yon moun Bondié pa-t janm kité okinn mak péché sal li dépi-l té nan vant manman-l, sé la Trè Sint Vièj Mari, Imakilé Konsépsion. Sin Monfò mandé nou pou fè lapriyé nou pasé nan kè-l, sé nan kè-l tou pou nou jouinn favè Bondié. Chémin Pitit Bondié-a té pran pou-l té vi-n rankontré nou-an, sé minm chémin sa-a tou pou nou pran pou-n al rankontré-l.

Li désann vi-n poté rékonsiliation-an pou nou nan kè Imakilé Mari. N-ap louveri kè nou pou nou résévoua-l avèk konvèsion, nan pénitans, antan nou konfié ti èfò nou yo bay Mari ki Sin, ki Vièj, ki Manman Bondié. Li pap mizé ak komision nou. Sé chemin rakousi li ye pou rankontré Granmèt la.

Résité chaplé nou nan fanmiy nou, nan katié nou, nan légliz nou, nan travay nou, nan jadin nou. Tou sa n-ap fè, sé pou nou fè-l avèk Mari. L-ap paré kè nou pou nou résévoua rékonsiliation Granmèt la. Gin yon ti imaj ki reprodui yon pòtré yo réle "L'Angelus de Millet", koté yo montré nou yon mesié ak yon madam kap ranmasé pom-tè nan jadin. Sé vè sizè di soua, lè lanjélus ap sonnin. Yo kité panié pom-tè yo atè-a, yo kanpé yo tou lè dé, y-ap résité lanjélus, y-ap salié Mari jan lanj la té fè-a lè-l té mandé-l konsantman-l pou-l vi-n Manman Bondié-a. Konsa tout aktivité nou pa doué anpéché lapriyé, rézèvé yon ti tan spésial pou sa, Bondié ap rimmèt nou sa.

Sé pou Bondié ba nou chaj bédiksion pou nou kòmansé nouvo tan ané litiji sa-a. Sé ané A ki rékomansé ankò, ané Sin Matié, ki insisté anpil sou légliz ak sou katéchis.

N-ap mandé la Trè Sint Vièj pou-l fè nou bliyé tout ti rayisans, tout ti tripotaj, tout ti mové tranzaksion yo té fè sou nou. Bondié padonnin nou, sé pou nou fè minm jan. Bondié rékonsilié nou avèk li, li konfié nou mésaj rékonsiliation-an (2 Co 5, 18).

*

"Rout légliz la pasé nan kè moun nan". Sé Pap Jan Pòl II ki di sa nan finisman lèt ansiklik sou Éspri Sin-an, "Dominum et vivificantem", li té ékri pou invité nou òganizé gran tan lavan sa-a ki t-ap préparé ané 2000 la. Pandan ané sa yo ki té rété nou-an pou nou té fété Gran fèt Jibilé sa-a, ki raplé nou 2000 ané dépi Jézu té fèt la, nou té gin pou nou paré chemin Granmèt la nan rout légliz la ki pasé nan kè nou ("Dominum et vivificantem" 67, ed Vatican 1986, p. 135.).

Pap la di, nan minm niméro sa-a (n 67), Éspri Sin-an sé gadyin lésépérans nan kè moun nan: éspérans tout moun Bondié kréyé, spésialman sa-k gin avaloua léspri-a, sa k-ap tann délivrans kò yo-a (ib, cf R 8,23). Yon tan lavan sé yon tan koté n-ap véyé. Sans vèy sa-a, sé dapré sa Sin Pòl di Romin yo nan 2èm lèktu lamès jodi-a, kinbé kò nou pròp antan nou évité manjé anpil, bouè bouason cho, fè mové plézi, libètinaj, kont, jalouzi, tou sa-l rélé travay fènoua yo (R 13, 11-14). Li mandé nou pou nou maché tankou gro lajounin, paské lannuit la prèské pati, jou-a ap proché, li lè pou nou lévé sot nan dòmi-an, délivrans nou-an pi pré pasé lè nou té fèk gin lafoua-a (ib).

Jézu bay konparézon délij la, nan lévanjil jodi-a, pou montré kijan Jou-a ap tonbé sou nou san nou pa prévoua (Mt 24, 37-44) pandan moun yo nan résépsion ak nòs. Li mandé nou pou nou véyé tankou moun kap véyé vòlè. Konsa tan lavan sa-a doué pran plis sans pou nou, antan non sèlman n-ap préparé fèt Noël k-ap rivé nan kèk sémèn nan, min antan n-ap sonjé préparé Jibilé ané 2 000 la dépi koulié-a.

La Trè Sint Vièj Mari té rinmèt kè-l nèt nan min léspri sin-an ki té déjà présèvé-l anba fot Adan ak Èv ki té pasé nan ras nou-an. Sé nòmral pou nou rasanblé nan kè sa-a, vré rout légliz la, koté léspri Sin-an kontinuyé ap paré manb Jézu-Kri yo pou fòmè Kò-l nan tout dimansion li doué ginyin-an. Profèt Izayi montré nan premié lèktu lamès jodi-a kijan nan dènié jou-a mòn kay Granmèt la ap paré anlè tout mòn yo, kijan tout nasion ap kouri vi-n jouinn li, kijan anpil pèp ap vini, pou yo aprann chémin Granmèt la, pou yo maché nan santié-l (Is 2, 1-5). "Rout légliz la pasé nan kè moun nan" (D.V. 67). Profèt Izayi insisté sou lapè ki fè moun yo chanjé mové santiman ki nan fon kè yo, antan yo fonn épé pou fè pikoua, yo fonn fouinn pou fè sèpèt (ib). Li montré kijan nasion pap lévé épé kont nasion ankò, kijan yo pap aprann fè lagè ankò (id). Li fini pasaj la antan-l mandé pou maché nan limiè Granmèt la (id). Lapè sé chémin limiè. Lagè sé santié fènoua. Léspri-Sin sé limiè. Satan sé fènoua. Psòm-répons la insisté sou pèlerinaj pèp yo k-ap monté Jérusalèm antan y-ap lapriyé pou mandé lapè, pou yo fè yon sèl fanmiy. Nou pa kapab rété indiféran sou kèsion sa-a. Nou doué raplé oriantasion Pap Jan-Pòl II té bay pou premié janvié ané lapè-a: "Lapè sé yon valé san frontiè". Nou doué sonjé tou konsign li té bay pou ané ki té vi-n apré-a: "Dévlopman ak solidarité klé lapè". Koté gin solidarité, pa gin frontiè. Nou travèsé bariè lang, bariè ras, bariè klas, bariè group, pou nou pran ka sa k-ap soufri, sa-k bézouin konkou. Bon Samaritin-an pa-t mandé Juif la ki nasion-l anvan-l poté-l sékou. Jézu di si sé ak fanmiy nou, ras nou, moun péyi nou sèlman nou gin bon rélasyon, ki sa nou fè pou nou avansé sou chémin sièl-la? (Mt 5, 46-47). Yon lè ap rivé pap gin frontiè ankò. Nou tout n-ap ouè klè kijan youn sé frè lòt, youn sé sè lòt, sé minm Papa-a nou ginyin, sé minm Manman-an nou ginyin, sé minm péyi sièl la nou ginyin. Sé dépi koulié-a pou nou komansé paré mòd lavi sa-a n-apral viv lòt bò-a. Léspri-Sin-an té rasanblé tout nasion jou lapankot la, li té fè yo konpran mèsaj Apot yo ki t-ap palé nan pròp lang pa yo. N-ap mandé la Trè Sint Vièj Mari, Manman légliz, Rèn lapè, pou-l fè nou palé langaj lacharité tout moun konprann.

Ané sa-a, sé lévanjil Sin Matié n-ap li chak dimanch (ané A). Sin Matié insisté anpil sou sa yo rélé: "universalité de l'Église". Légliz sé yon sèl kò-d

fanmiy. Li la pou tout moun, jan nou abitué di nan krédo-a. Gin divizion anndan légliz la, ki fè nou riské maché bankal, oubyin n-ap trinnin. Gin moun ki pran plézi ap fè ti group y-ap drésé kont lòt group oubyin y-ap drésé kon réponsab légliz yo. Travay divizion sa-a pa soti nan léspri-Sin. Liv lasajès la di léspri-Sin-an fè tout bagay fè yon sèl (Sg 1,7). Okontrè djab la li minm, travay pa-l sé divizé moun yo youn kont lòt, jan non-l di-a. Mo djab la sé yon mo ki soti nan lang grèk la – "dia-bolòs" - ki vlé di: travèsé nan tout sans pou gayé sa-k byin ranjé ("dia-ballô"). Sé pou sa nou doué fè sa yo rélé "discernement des esprits". Nou doué sondé léspri yo pou nou konnin koté yo soti, si sé nan léspri Sin-an, si sé nan mové léspri-a, jan Sin Pòl di Tésalonisyin yo (1 Th 5, 21). Nou pa doué kite ninpòt ki moun trinnin nou dèyè-l. Konsign Jézu-Kri ba nou yo klè nan lévanjil la. Sin Pòl di Timoté nan dézièm lèt li ékri-l tankou yon Téstaman, gin tan k-ap rivé, moun yo pap sipòté bon lansègnman-an ankò, min y-ap ranmasé yon pakèt profesé, dapré lanvi ki sot nan kè yo, antan yo souaf tandé sa k-ap fè zòrèy yo plézi, y-ap fèmin zòrèy yo pou yo pa kouté lavérité-a, pou yo louvri zòrèy yo bay istoua ki pa gin fondman (2 Th 4, 3-4).

Sé pou sa Pap Jan Pòl II mandé nan lèt ansiklik li ékri sou léspri Sin-an (Dominum et vivificantem) pou nou lapriyé pou Bondié ékaté péché kont léspri Sin-an, ki fè moun yo fèmin kè yo pou yo pa ouè koté péché-a fè nich li-a, épi ki fè yo pa aksépté prezans léspri Sin-an minm k-ap délivré yo-a (cf Dominum et vivificantem 46-48). Konsa nou doué lapriyé pou moun yo louvri kè yo bay léspri Sin-an k-ap pròpté-l pou rout légliz la pasé ladan-l san-l pa rankontré okinn bariè, okinn frontiè, pou préparé lapè ni nan légliz la, ni nan fanmiy yo, ni nan sosiété-a. "Rout légliz la pasé nan kè moun nan" (Dominum et vivificantem 67). Rout légliz, sé rout lapè, sé rout léspri Sin-an, k-ap fè nou tout fè yon sèl kò-d fanmiy. Sé rout sa-a n-ap préparé jan Profèt Izayi ap mandé nou pou tan lavan-an (Is 40, 1-11). N-ap paré-l pou gran lavan-an débouché sou Jibilé ané 2 000 la, ki raplé nou nésans Jézu-Kri, Roua lapè (Is 9, 5-6; 11, 6-9).

Viv Bondié nan sièl la, sou tè-a, lapè pou moun li rinmin yo (Lc 2, 14), sa-k gin bòn volonté yo.

*

* *

PRÉMIÉ DIMANCH LAVAN B

Jézu di-n véyé pa rét ap dòmi, l-ap vi-n kon vòlè, pinga nou rét ap dòmi. Jou batèm nou, Bondié fè nou vi-n pitit li. Li ba nou lafoua, lésperans ak lacharité pou nou patisipé nan lavi li. Jèm lavi sa-a li dépozé nan kè nou-an, li mandé nou pou nou dévlopé-l. Nou pa doué rété bra kouazé, tankou sèvitè-a ki té résévoua piès lajan-an, épi t-al séré-l anba tè-a, san-l pa fè-l rapòtè anyin-an. Nou abitié résité akdéfoua, akdésépans, akdécharité. Sé fòmil priyè nou di ak bouch nou, ki invité nou fè paròl yo pasé nan lavi nou.

Lè nou di "Bondié mouin kouè", sa édé nou fè akdéfoua-a tout bon vré, dévan bariè nou kapab rankontré sou chémin nou, nou réaji tankou Krétyin, ki konnin li gin zam k-ap protéjé-l. Nan lèt Sin Pòl ékri Éfézyin yo, li konparé lafoua-a avèk zam yo rélé boukliyé-a. Li di: "Nan tout sikonstans, sé pou nou pran boukliyé lafoua-a; sé avèk li nou kapab étinn tout flèch ki tou limin yo, sa démon-an lansé kont nou yo" (Ep 6,10). Boukliyé-a, sé zam pou paré kou. Sé tankou yon layo ki fèt avèk fè, ou pasé-l nan bra-ou, pou-ou protéjé léstommak ou ak figi-ou, koté lènmi-an ap vizé-ou pou-l touyé-ou la.

Jézu di-n véyé pa rét ap dòmi, l-ap vi-n kon vòlè, pinga nou rét ap dòmi. Sa fè sinksanzan dépi yo té planté Koua Jezu-Kri-a sou tè sa-a. Planté yo té planté Koua-a, sé yon pié boua vivan ki planté. Jès sa-a, sé yon sign lafoua li yé. Lè koulèv t-ap mòdè Pèp Bondié-a nan dezè-a, épi moun yo t-ap mouri-a, Moyiz té planté yon poto tankou Koua-a k-ap planté sou Gòlgota-a, li té fè yon pòtré koulèv avèk kuiv, li té pandié-l anro Koua-a. Tout moun ki té gadé nan diréksion sa-a avèk lafoua, yo té sovè (Nb 21,9; Jn 3,14; Sg 16,6). Jézu di-n véyé, pa rét ap dòmi, l-ap vi-n kon vòlè pinga nou rét ap dòmi. Sa fè sinksanzan dépi koua-a té planté sou tè nou-an. Sé yon pié boua vivan k-ap dévlopé, k-ap donnin frui. Pié boua Adan té touché-a bay frui lanmò. Pié boua lakoua-a bay frui lavi. Sin Pòl ékri Galat yo, li di yo gin dé kalité frui, yon kalité ki soti nan lachè, yon kalité ki soti nan léspri (Ga 5,13-26). Frui lachè yo, sé frui lanmò, sé frui somèy, y-ap angoudi nou: mové plézi, mové lidé, libètinaj, sipèstision, maji, rayisans, dézakò, jalouzi, vòlè, batay, divizion, moun-pa, lanvi, touyé moun, bouè bouason, manjé dépasé mézi. Tout kalité bagay sa yo, yo pa anba drapo lakoua-a. Jézu di-n véyé, pa rét ap dòmi, l-ap vi-n kon vòlè, pinga nou rét ap dòmi.

Lè santinèl ap véyé, sé batay l-ap batay kont somèy la. Zam lafoua nou ap fè nou batay kont mové tandans lachè yo k-ap angoudi nou nan somèy lanmò-a. Pié boua lakoua-a donnin frui, sé frui léspri Sin-an, k-ap batay

kont frui lachè yo: sé charité, kè kontan, lapè, pasians, kè sansib, bon jan, padonnin, dousè, lafoua, fè kò-ou tou piti, jinnin kò-ou, pa fè mové plézi (Ga 5,25). Sé dlo n-ap pasé nan figi nou pou nou rét jé klè tout nan nuit, pandan n-ap batay kont somèy la.

Jézu di-n véyé, pa rét ap dòmi, l-ap vi-n kon vòlè, pinga nou rét ap dòmi. Sa fè sinksanzan Koua-a planté sou tè sa-a, li donnin frui, frui léspri yo. Sa nou fè avèk yo?

Lacharité-a, sa nou fè avèk li? Èské nou pa abiyé-l ak rad madigra ki fè nou di "dépi nan Ginin nèg rayi nèg... chyin manjé chyin, chak koukoui kléré pou jé pa-l, zafè kabrit pa zafè mouton?"

Kè kontan-an, sa nou fè avèk li? Èské nou pa abiyé-l avèk rad madigra, ki fè nou konfonn li avèk tout kalité banbòch?

Lapè-a, sa nou fè avèk li? Èské nou pa abiyé-l avèk rad madigra, ki fè nou pran tranblé kon fèy boua, kon yon frizé chanté sou tèt kay nou, kon yon papiyon noua vòltijé anndan lakay nou asouè, kon gin yon maladi nou pa kapab konprann, kon Bondié pran tan pou-l réponn priyé nou, épi olié nou mété lapè lè gin kont ki éklaté, sé chofé n-ap chofé difé-a, ak tripotaj, ak kout-lang, ak manti, ak kòt-mal-tayé, ak anpil manèv?

Pasians la, sa nou fè avèk li? Èské nou pa abiyé-l ak rad madigra, ki fè nou toujou pi cho pasé lévé-dansé, pou-n réglé tout bagay anvan jé bat, kon-l cho l-kuit, koupé-klouré, anvan-l rèk li gin tan mi, ki fè nou bliyé sa Sin Jak di nou: "kòlè lèzòm pa réglé kòz Bondié" (Jc 1,20)?

Kè sansib la, sa nou fè avèk li? Èské nou pa abiyé-l ak rad madigra, ki fè nou fèmin jé nou, nou fèmin kè nou, nou fèmin min nou, lè nou ouè prochin nou nan ka nésésité, antan nou bliyé sa Jézu di nou nan lévanjil la dapré Sin Luk: "sé pou nou gin kè sansib minm jan Papa nou ki nan sièl la gin kè sansib" (Lc 6.36)?

Bon jan-an, sa nou fè avèk li? Èské nou pa abiyé-l ak rad madigra, ki fè figi nou maké vin juin, kat avril, ki fè fron nou plisé tè poua, tè mayi, ki fè yo bliyé pran mil prékasion pou yo proché koté nou, yo pa janm konnin kilè nou sou sa, ki fè sé ak pinsèt yo bliyé pran nou, tankou sé chabon difé y-ap pran sot nan brazié, tankou sé nich gèp y-ap flambé, tankou sé kazié mièl y-ap nétouayé?

Padonnin-an, sa nou fè avèk li? Èské nou pa abiyé-l ak rad madigra, ki fè nou adopté mantalité Lamèk la, ki di yo vanjé Kayin sèt foua, li minm sé sousandis foua sèt foua l-ap tiré vanjans (Gn 4,24; Mt 18,22)?

Douse-a, sa nou fè avèk li? Èské nou pa abiyé-l ak rad madigra, ki fè nou toujou ap voyé pié tankou milèt pòt, ki fè lè n-ap palé ak moun, se rélé n-ap rélé nan tèt yo, ki fè nou bliyé sa Sin Fransoua-d-Sal té di-a "Yo pran plis mouch avèk yon kuiyè mièl pasé avèk yon barik vinèg", ki fè nou pa sonjé Jézu tou dou, kè-l tou pòv (Mt 11,29), sé osijè-l Sin Jan-Batis ap di "Min mouton Bondié-a" (Jn 1,29.36), li minm ki pa kasé rozo ki félé-a, ki pa étinn mèch la k-ap fè lafimin-an, ki pa lévé voua-l nan lari (Is 42,2-3), ki kité yo kondui-l an silans, tankou yon mouton y-ap minnin labatoua (Is 53,7; Lc 23,9), li minm ki pa réponn yon mo lè yo akizé-l (Jn 19,9)?

Lafoua-a, sa nou fè avèk li? Èské nou pa abiyé-l ak rad madigra ki fè n-ap viv kòm si sé pou tè sa-a sèlman Bondié té kréyé nou, ki fè sé ak limiè intéljans nou sèlman n-ap anvizajé tout bagay, san nou pa bay Sajès Bondié-a prémié plas li mérité-a, san nou pa fè tankou Moyiz ki t-ap maché kòm si li té ouè Sila-a yo pa kapab ouè-a (He 11,27.3), san nou pa fè tankou Mari, ki té jouinn konpliman nan min Élizabèt ki té di-l "Sé chans pou sila-a ki kouè-a" (Lc 1,45), min antan nou rété ap di: "O oui, nèg mandé ouè", joutan nou bliyé sa Jézu té di Sin Toma-a "Sé chans pou sila yo ki pa ouè, min ki kouè" (Jn 20,29; 1,50)?

Fè kò-ou tou piti-a, sa nou fè avèk li? Èské nou pa abiyé-l ak rad madigra, ki fè nou toujou gonflé léstommak nou, pou nou pran pòz sé nou minm ki sipériè pasé pèsou, poutèt yon ti konésans ki nan lèspri nou, yon ti grad ki sou zépòl nou, yon ti richès ki nan min nou, jous nou bliyé sé nan yon trou ròch kot zannimo manjé, sé la Jézu fè ladésant, sé moun k-ap voyé filè sou bò lanmè, sé yo minm li chouazi kòm premié patizan-l, nan denié soupé-a li pasé yon sèvièt nan tay li, li lavé pié yo, pou-l montré yo kijan sa-k pi gran-an, sé pou-l konpòté kò-l tankou sa-k pi piti-a.(Mt 4,18-22; Jn 13,4-16; Mc 10,42-45; 9,33-34), sa-k gin premié plas la, sé pou-l vi-n tounin ésklav tout moun (Ph 2,6-8), paské moun ki lévé tèt, Bondié fè-l bésé-l; moun nan minm ki bésé tèt, Bondié fè-l lévé-l (Lc 1,52; Job 5,11; Ps 75,8; Lc 18,14), tankou li fè la Trè Sint Vièj Mari, pòv Sèvant li-a, vin tounin sèl Rèn nan sièl?

Jinnin kò-ou, sa nou fè avèk li? Èské nou pa abiyé-l ak rad madigra, ki fè nou bay kò nou tout plézi sans li souaf, ninpòt ki moman, san nou pa gadé si sé lavan, si sé karèm, ki fè nou bliyé Jézu té di: "Péyi roua sièl la, sé moun ki donté kò yo ki pran-l daso" (Lc 11,12), sé poua pou nou métrizé kò nou

(Mt 19,12; 1 Co 7,29-35.7-9), pou nou paré chémin Granmèt la, tankou Jan-Batis nan dézè-a, pou Bondié instalé ringn li nan kè nou?

Pa fè mové plézi-a, sa nou fè avek li? Èské nou pa abiyé-l ak rad madigra, ki fè nou pa kapab kontanté nou ak sa Bondié ba nou nan mariaj la, pou nou blijé al chèché déyò, tankou papiyon k-ap vòltijé sot sou flè al sou flè, san-l pa kapab satisfè, épi nou bliyé kò nou sé tanp léspri Sin-an, sé manb Jézu-Kri, pou nou pa sal li (1 Co 6,12-20), nou minm ki délivré gras a Koua-a ki té planté sou Gòlgota-a, Koua sa-a ki gin sinksanzan dépi yo té planté-l sou tè nou-an?

Sa nou fè avèk frui-l yo ki donnin-an? Frui Léspri Sin-an: charité-a, kè kontan-an, lapè-a, pasians la, kè sansib la, bon jan-an, padonnin-an, dousè-a, lafoua-a, fè kò-ou piti-a, jinnin kò-ou la, pa fè mové plézi-a? Èské nou pa abiyé yo ak rad madigra, antan nou défiguré yo? Jézu di-n véyé, pa rét ap dòmi, l-ap vi-n kon vòlè, pinga nou rét ap dòmi. Sé batay n-ap batay pou dòmi pa poté nou alé, sé tout tan n-ap pasé dlo nan figi nou pou nou répousé somèy la. N-ap sonjé la Trè Sint Vièj Mari, ki fèt nan vant san péché, li minm ki tankou madanm ki gin fòs la, sa liv Proverb la palé nou-an, k-ap véyé tout nan nuit, san lanp li pa janm étinn nan (Pr 31,18), li minm ki chémin Pitit Bondié-a chouazi pou désann vi-n jouinn nou, li minm ki tankou yon lavan k-ap préparé Noël, li minm ki dépi koulié-a ap fè nou voyé jé nou sou lan dé-mil, pou nou sonjé gran fèt nésans Jézu Kri-a. Pandan 9 ané (1984 - 1992) tout lamérik réfléchi sou jèm lavi Bondié dépozé nan kè nou, lafoua (1984 - 1986) léspérans (1987 -1989), lacharité (1990 - 1992). Sé yon "neuvaine d'années" nou fè pou nou abouti nan 1992 koté nou fété sinksanzan dépi Koua-a té planté sou tè lamérik-la. Pap Jan-Pòl II té rémèt chak Évèk Sin-Doming avèk Ayiti yon Koua pou diosèz yo. Antan l-ap rémèt yo li, li di l-ap lapriyé pou diosèz yo, li béni diosèz la. Koua sa-a pasé nan chak parouas, pou tout fidèl yo gin lokazion patisipé nan fason pa yo nan gran évènman sa-a ki fè sonjé sinksanzan dépi koua-a té planté sou tè sa-a, épi pou yo sonjé lafoua, léspérans ak lacharité Bondié té ba yo jou batèm yo-a, pou yo fè yo donnin frui, frui léspri-a k-ap batay kont frui lachè-a.

*

* *

PRÉMIÉ DIMANCH LAVAN C

= 2 pati nan lévanjil la: Prémié pati-a: sign yo k-ap parèt: vèsè 25-26, Dézièm pati-a: sé rékòmandasion pou véyé: vèsè 34-36.

Nan prémié pati-a (dépi nan vèsè 11 yo té palé sou sign sa yo déjà): gin yon invitasion pou lafoua-a édé sipòté soufrans pèsékision yo. Granmèt la ap ranpòté laviktoua sou tout tè-a. Pou sign katastròf yo = Jérèmi 4,23-26 té palé sou sa, ni Amòs 8,9; Miché 1,3-4; sitou Isayi 13, 9-10; 34,4.

Pitit moun nan nan niaj yo, Danièl 7,13-14 té montré l-ap monté al résévoua pouvoua. Koulié-a l-ap désann ak tout pouvoua-l. Travay Apot yo 1,9; Matié 28,18 1 Korintyin 15,23-28. Dimanch pasé sé té fèt Jézu-Kri Roua, dènié dimanch lané-a. Dimanch sa-a, n-ap tann Roua-a k-ap vini-an, prémié dimanch lané-a.

"Délivrans nou tou pré", Luk 21,28. Si nou konparé pasaj Luk avèk pa Mak 13,24-27 épi Matié 24,29-31, sé nan Luk sèlman n-ap jouinn fraz sa-a. Sé sèl koté mo sa-a vini nan lévanjil la. Nou jouinn li tou 7 foua nan lèt Pòl yo (Romin 3,24 8,23; 1 Korintyin 1,30 Éfézyin 1,7.14; 4, 30; Kolosyin 1,14) Sé Bondié ki pran fòs pouvoua-l pou-l délivré Pèp li-a ki nan mizè. Lidé sa-a tèlman inpòtan nan lévanjil Luk la, sé li minm litiji jodi-a pran, li mété kòm lidé-fòs, nan tèl léktu jodi-a: "délivrans nou-an tou pré". Sa vlé di sé sou lidé sa-a nou gin pou nou insisté sitou nan ésplikasion lévanjil la pou prémié dimanch lavan ané C-a.

Matié 24, 29-31

29 - minm lè aprè tray sa yo

solèy la ap tinyin,

Lali-n nan pap bay klètè-l

zétoual yo ap tonbé
sot nan sièl la

pouvoua yo ki nan sièl la
ap tranblé

Mak 13, 24-37

24 - Minm nan jou sa yo
aprè tray sa-a

solèy la ap nouasi

Lali-n nan pap bay klètè-l

25 - zétoual yo ap tonbé
sot nan sièl la

pouvoua yo ki nan sièl la,
y-ap tranblé

Luk 21,25-28

25 – ap gin sign nan solèy la

nan lali-n nan

ak nan zétoual yo

sou tè-a nasion yo
ap tranblé,
y-ap san pozision lè y-ap tandé
brui lanmè ak lanm li yo; souf
moun yo ap koupé tèlman
y-ap pè, pandan y-ap tann
sa k-ap rivé sou tout tè-a,
pouvoua yo minm nan sièl la,
y-ap tranblé.

30 - lè sa-a atò
sign Pitit moun nan ap parèt
nan sièl la.

lè sa -a tout fanmiy sou tè-a
ap sézi

y-ap ouè Pitit moun nan k-
ap rivè nan niaj yo,
nan sièl la

26 - lè sa-a atò,

y-ap ouè Pitit moun nan
k-ap vini nan niaj yo

lè sa-a atò

y-ap ouè Pitit moun nan
k-ap vini sou yon niaj,

ak pouvoua, ak anpil bèlté

avèk anpil pouvoua ak bèlté

avèk pouvoua
ak anpil bèlté

Lè bagay sa yo ap kòmansé
rivé, drésé kò nou,
lévé tèt nou, paské
DÉLIVRANS NOU-AN
AP PROCHE

31 - l-ap voyé Anj li yo ak 27- lè sa-a atò l-ap voyé anj
gran tronpèt; Anj li yo ap li yo, l-ap ranmasé moun yo
sanblé moun li yo li li chouazi yo sot nan kat
chouazi-a sot nan kat kouin diréksion van-an sot nan
dépi yon bout sièl la jous bout tè-a rivé jous nan bout
nan lòt bout la sièl la.

Nan dézièm pati lévanjil jodi-a (vèsè 34-36), sé invtasion pou véyé. Tout tan lavan-an, sé yon vèy, sé tankou vijil Noèl. Ansam ak gadyin mouton yo, ki t-ap véyé nan boua-a (Luk 2,8) nou minm tou n-ap véyé. Jézu di-n véyé, pa rèt ap dòmi. Dòmi-a, sé péché ak movèz mès k-ap angoudi kè nou (1 Tésalonisyin 5,4-7). Tout premié Lèt Tésalonisyin-an palé nou sou dènié tan sa-a, min spésialman nan chapit 4-5 la, épi dézièm Lèt Tésalonisyin yo tou ba nou plis présizyon ankò. Éfézyin chapit 5 éspliké nou kijan pou véyé, pou konbat mové tandans nou. Éfézyin 6, 18 di nou véyé-a alé ansanm ak lapriyè-a. Sé nan sans sa-a Jézu té fè Apot li yo rékòmansion pou yo véyé pou yo lapriyè, paské, léspri-a vif, min kò-a fèb (Luk 21,40.46; Matié 24,41)

Rékòmansion pou véyé, pou lapriyè-a, sé tout tan Sin Luk bay Li (v.36: lapriyè nan tout tan". Sé minm mèsaj Sin Pòl bay).

Ané C-a kòmansé jodi-a. Sé ané koté yo li lévanjil Sin Luk chak dimanch (ané B-a, sa ki sot pasé-a, sé lévanjil Sin Mak nou té li chak dimanch. Ané A-a ané pasé pi ro, sé lévanjil Sin Matié nou té li. Chak touazan nou rékòmansé mouvman-an. Lévanjil Sin Jan-an li minm sé nan finisman karèm nan ak tan Pak la yo li-l chak ané. Sin Luk sé lévanjil lapriyè. Luk toujou insisté sou lapriyè; lè-l rakonté minm évenman ak lòt lévanjil yo, li

konn fè santi insistans sa-a pafoua, parégzanp lè Batèm Jézu-a sé pandan l-ap lapriyè léspri-a désann sou li tankou pijon nan Luk 3,21 (konparé avèk Matié 3,13 épi Mak 1,9).

Lè-l fi-n gèri moun maladi lalèp la, li ralé kò-l nan savann pou-l lapriyè daprè Luk 3,16 (konparé avèk Matié 8,1; Mak 1,40).

Lè l-ap chouazi 12 apot yo, li pasé tout lannuit la-p lapriyè dapré Sin Luk 6,12 (konparé avèk Matié 10,1; Mak 3,13)

Lè Piè fè déklarasion lafoua-l la, Jézu t-ap lapriyè daprè Luk 9,18 (konparé avèk Matié 16, 13 épi Mak 8,27).

Jézu chanjé figi dévan toua Apòt li yo, li monté sou mòn nan pou-l lapriyè dapré Sin Luk 9,28 (konparé avèk Matié 17,1; épi Mak 9,2).

Lè patizan yo mandé Jézu pou-l aprann yo lapriyè-a, sé nan lapriyè li té yé li minm minm dapré Sin Luk 11,1 (konparé avèk Matié 6,9).

Lévanjil Sin Luk la n-ap li pandan tout ané C-a, sé lévanjil lapriyè. Travay Apòt yo tou, sa Sin Luk ékri-a gin anpil insistans sou lapriyè (konsilté 1,24; 6,6; 8,15; 9,11.40; 10, 9.30; 11, 5; 12,12; 13,3; 14,23; 16,25; 20,36 21,5; 22,17; 28,8).

Sin Luk sé vrè Élèv Sin Pòl nan sans sa-a. Sin Pòl palé anpil sou lapriyè (Romin 8,26; 1 Korintyin 11,4.5.13; 14,13; 14,15 Éfézyin 6,18; Filipyin 1,9; Kolosyin 1,3.9; 4,3; 1Tésalonisyin 5,17.25; 2Tésalonisyin 1,11; 1Timoté 2,8; Ébré 13,10)

Chak lévanjil gin karaktè pa-l, minm si sé apèprè minm bagay yo rakonté. Sé poua tan litiji-a gin toua ané (A= Matié, B= Mak, C= Luk). Chak ané yo li yon Évanjil lé dimanch. Mak gin karaktè pa-l. Li prezanté mèsaj lévanjil la avèk jé pa-l, dapré bezouin Pèp la tou koté li ta-p préché-a. Sé a Ròm li té ékri-l antan li té rakonté lansègman Sin Piè. Li vif, li fè chòk. Li prezanté bagay yo jan yo yé-a pou-l frapé léspri moun yo, pou yo boulvèsé santiman yo, pou yo réfléchi sou yo, pou yo chanjé konpòtman yo. An minm tan, lévanjil li-a sé tankou prémié anons Bòn Nouvèl la bay moun ki pa ko janm tandé anyin sou sa, ki gin pou aprann tout bagay sou Jézu (ané-B).

Matié minm sé sou légliz li insisté avèk sou lansègman katéchis. Li pran tan pou-l fè mèsaj la pasé tankou nan konn-gout, antan li bay avèk métòd, avèk sistèm, yon fason ki byin réglé, sè lansègman katéchis anndan légliz (ané A)

Luk minm adrésé bay chak moun yon fason pèsonèl épi li touché santiman fon kè-ou nan fason li prezanté mèsaj la, sé dòktè li té yé li sansib, li touché

sansibilité moun. N-a gin tan pandan tout ané sa-a (ané C-a) pou fè konésans avèk li chak dimanch yon fason pi alèz.

*

Nan tan lavan-an, gin toua figi sitou litiji-a prezanté dévan nou, pou édé tan Jézu k-ap vini-an: sé Jan-Batis, Jozèf, Mari.

Jan-Batis réprésanté tout lansyin Téstaman li sé dènié nan profèt yo. Dépi lontan profèt yo pa-t pale ankò. Yo té fè silans pou PARÒL ki t-ap rivé-a. Ogustin ki Sin di konsa: Papa Jan-Batis réprésanté silans profèt sa yo, antan li vi-n baba-a.

Sin Jozèf pa di yon mo nan lévanjil la. Silans li sé respè avèk obéyisans. Li respékté mèvèy sakré la Trè Sint Vièj Mari ap viv nan kè-l la. Li obéyi tout désizion Bondié yo san-l pa konprann yo. Sé li minm vré ki pou té akonpagné la Trè Sint Vièj Mari, Madanm sa-a ki vlopé Jézu avèk silans li tankou prémié kouchèt ti bébé-a.

Pandan gadyin mouton yo ap rakonté tou sa yo té ouè ak tou sa yo té tandé osijè ti pitit la, la Trè Sint Vièj Mari minm t-ap kakilé nan kè-l an silans sou tout paròl sa yo ak tou évenman sa yo. Jézu sé Paròl Bondié sé silans sèl ki pou akéyi-l. Sé pa nan tranbléman-tè, ni nan gro van, ni nan difé li rivé sou profèt Éli, min sé yon ti briz tou léjé (R 19) Profèt yo mandé pou fè silans dévan-l antan l-ap soti lakay li ki sin-an (Ha 2,20; So 1,7; Za 2,17; Ap 8,1).

Jézu invité pou nou veyé, lapriyé, fè atansyon. N-ap fè yon ti éfò pou méziré paròl nou, pou nou pa kité bouch nou palé mal, fè ti tripotaj okipé sa-k pa gadé nou, réponn trò vit, san nou pa pran tan pou kouté anvan, jan Sin Jak té di nou-an (Jc 3,1.12). Lang nou sé tankou yon ti difé. Li tou piti min li kapab mét difé nan yon rak boua. Sé tankou yon gouvènay batiman, li tou piti, min sé li minm ki bay batiman-an diréksyon-l. Ak minm lang nan nou kapab fè konpliman pou Bondié, épi an minm tan nou kapab kasé sik sou do prochin nou. Yon ti éfò pandan tan lavan-an sou pouin sa-a pap trò pi mal pasé sa. Sé ti sakrifis konsa ki fè Bondié plézi. Sé pa trò gro bagay tout moun ap ouè pou yo bat bravo pou nou.

Gin yon mésié ki té voyé bòn li al nan manché, li di-l konsa pou-l achté pi bon moso viann nan pot pou li. Bòn nan al nan manché, li poté yon moso lang. Nan landmin li voyé bòn nan al nan manché ankò, li di-l pou-l poté moso viann ki pi mové-a. Bòn nan al nan manché, li poté yon moso lang ankò. Li fè mésié-a konprann kijan ak lang nou nou kapab fè bon jan ak yon moun, ak minm lang sa-a tou nou kapab kondané-l dévan lòt yo.

Tan lavan-an sé tan pou frinnin lang nou, pou nou pa kité-l dévié sou mové chémin.

Moun k-ap palé anpil pou yo pa di anyin, sé tankou jijiri k-ap éklaté nan chodiè, sé tankou yon sak pistach ki louvri, k-ap dégringolé nan éskalié.

Gin moun, tou sa yo ouè fò yo palé époutan provèb la di: jé ouè bouch pé. Gin moun sé radio yo yé, si-ou bézouin konnin yon nouvèl, al jouinn yo. Sé tankou sé yon pasoua dépi-ou di yo yon paròl, apèn li antré nan zòrèy yo, li gin tan soti nan bouch yo. Lè konsa yo pa jouinn bon zanmi ki pou fè yo konfians.

Yon moun ki konn gadé sékrè, li konn fè zanmi. Pi bon zanmi l-ap ginyin, sé Jézu li minm minm. Lè la Trè Sint Vièj té parèt a Lourdes dévan Sint Bénadèt, li té konfié-l toua sékrè, Sint Bénadèt pati nan sièl avèk tou lè toua sékrè-l yo. Yo pa janm rési konnin yon ti apèsi sou yo, malgré tout pièj yo tann pou li. Époutan yo konn di "bouch fi pa gin dimanch". Pi bèl égzanp silans nou ginyin, sé yon fi ki ba nou-l: sé la Trè Sint Vièj Mari. Li réparé sa Èv té fè-a. Bouch Èv té tronpé-l, li té antré nan konvèsasion avèk Satan. Lè Dalila té vlé trayi Samson, li karésé-l, joustan li pran sékrè fòs li nan min-l. Samson vi-n fèb dévan bèlté ak karès Dalila, li louvri tout fon kè-l. Sé nan konsa li jouinn malè-l. Sé pou nou aprann résépté silans moun yo tou. Sé pa tout bagay yo kapab di. Lè yon moun pa réponn nou sou yon pouin, pa fòsé-l. Li gin rézon-l. Si sé yon sékrè yo konfié-l, li pa kapab vann li. Si sé yon bagay li aprann antan l-ap fè métié-l, li pa kapab dévoualé-l.

Lè yon moun bouch alèlè, pèsòn pa mét konfians sou ou. Pito-ou pèdi zanmi-ou poutèt ou réfizé ba-l sékrè-ou pasé pou-ou ap fè anpil kamarad antan-ou rakonté yo tout sékrè ou ginyin.

Tan lavan, sé yon rékéyman, sé yon tan koté lannuit pi long pasé lajounin nan péyi koté Granmèt la pran nésans nan kò-a. Lannuit sé yon tan silans, koté ou-ap véyé ki bò limiè Parol la ap lévé.

Roua Maj yo maché an silans, nan diréksion koté zétoual la t-ap gidé yo-a. Min lè yo antré nan Jérusalèm, yo kòmansé ap palé sou sa yo ouè, lè sa-a zétoual la disparèt. L-ap réparèt sèlman lè yo kité Jérusalèm, lè yo rékòmansé ap maché nan silans dézè-a, nan silans nannuit la, joustan yo rivé Bètléèm.

Tan lavan sé yon tan silans. Sé lè pou nou frinnin tout kalité anvi nou ginyin pou nou jijé prochin nou nan dézavantaj li. Sé yon tan pou nou sispann fè prosè nan fon kè nou sou konpòtman frè nou yo, ki pa gin minm fason pou yo aji avèk nou. Sé yon tan pou nou aprann ouè Jézu li minm nan yo tout,

san nou pa kondané yo pou yon ti krik yon ti krak. Sé yon tan pou nou aprann gin pasians pou nou sipòté défo lòt yo minm jan Bondié sipòté défo pa nou yo. Pa présé jijé, pa présé kondané. Sa-k anndan kè yanm sé ti kouto ki konnin-l. Tout tan moun pa dévoualé sa l-ap viv, sé pou bon tan ou-ap fè sipozision sou li, ou-ap intèprété aksion-l ak paròl li nan sans ou vlé.

Tan Lavan sé yon tan pou fè silans. Silans nan fason ou-ap sipòté mové jijman yo fè sou ou, mové paròl yo di kont ou, mové intèprétasyon yo fè sou aksion-ou ak paròl ou, san-ou pa chèché défann prop tèt ou, mouins ankò san-ou pa chèché tiré vanjans. Kité limiè Bondié-a kléré, l-ap chiré fènoua yo, l-ap mété tout bagay aklé. Mouins ou défann prop tèt ou, sé plis Bondié ap pran défans ou.

La Trè Sint Vièj Mari pa-t di anyin lè Sin Jozèf té gin lidé ranvouayé-l la, malgré li té inosan. Sé Bondié minm ki pran défans li. Mari, sè Mat la, pa-t di anyin lè sèl la tè fè-l lobsèvasion-an. Sé Jézu minm ki té pran défans li. Bondié pap janm kité moun ki kòrèk la ap balansé tout lasint jounin konsa san-l pa jouinn koté ki asiré pou-l pozé pié-l.

*

A pati jodi-a nou kòmansé léktu lévanjil Sin Luk pou tout ané-a. Nou fini avèk lévanjil Sin Mak nou té kòmansé dépi ané pasé-a (ané B). Nou travèsè nan ané C. Sin Luk ap bay yon mèsaj nou konn abitué tandé nan lévanjil Sin Matié (Ané A) ak nan lévanjil Sin Mak (Ané B). Min yo chak kòm bay lévanjil la yon koulè spésial, dapré tanpéraman yo ak dapré katégori foul y-ap anvizajé-a. Sin Matié insisté plis sou légliz ak lanségman katéchis. Sin Mak mété inpòtans sou évenman plis pasé sou paròl, pou fè chòk nan léspri moun yo k-ap tandé prèch la pou prémié foua-a, Sin Luk li minm touché plis santiman moun yo épi li invité yo bay yon répons pèsònèl.

Osiyé dènié tan yo, Sin Luk présizé SIGN k-ap parèt nan solèy la, lali-n nan ak zètoual yo (Lc 21, 25), sa vlé di bagay ki gin yon sans kaché, k-ap palé nan kè nou, li invité nou réfléchi sou yo, ouè ki sa yo vlé di pou nou pèsònèlman épi ki répons y-ap tann nan min nou. Li montré kijan sou tè-a nasyon yo ap dékontrolé, lè yo tandé brui lanmè ak tanpèt la. Souf moun yo ap koupé, tèlman y-ap pè, lè y-ap tann sa k-ap rivé sou tout fas tè-a, koté yo abité-a, (Lc 21 25-26). Li di lè bagay sa yo kòmansé rivé, sé pou nou drésé pou nou lévé tèt nou, paské délivrans nou tou pré (Lc 21,28). Min sans sign sa yo ginyin: Pou yon katégori moun sé chatiman yo santi k-ap rivé, sé pou sa y-ap tranblé, y-ap séché (Lc 21,25.26). Pou lòt katégori-a minm, sé délivrans la ki pré rivé, yo kanpé, yo lévé tèt yo byin douat, (Lc 21,28).

Jézu bay parabòl (Lc 21,29), li invité gadé sou boujon pié fig frans (Lc 21,29) k-ap indiké yo tan cho-a prèské rivé. Li di yo sé indikasion ki pou fè yo konprann, péyi koté Bondié Roua-a prèské rivé, (Lc 21, 31). Konsa gin dé bagay ki anvizajé; sé délivrans la (Lc 21,28), ak péyi koté Bondié Roua-a (Lc 21,31). Péyi koté Bondié Roua-a pa-t louin rivé, paské jénérasion Jézu té gin dévan-l nan té gin pou-l ouè-l (Lc 21,32; cf Mc 9,1). Délivrans la, minm si-l déjà rivé nan yon sans (Ep 1,7; Col 1,14), li t-ap tann toujou pou-l fi-n rivé nèt (Ep 4,30), jan Sin Pòl di-a, li tankou yon madanm ki an mal-danfan (R 8,23). Jézu di péyi koté Bondié Roua-a pa kité yo obsèvé fason l-ap vini-an (Lc 17,20). Li déjà nan mitan nou (Lc 17,21). Dépi Bòn Nouvèl la rivé nan zòrèy nou, li la (Lc 10,9). Sé travay léspri Sin-an (Jn 3,5). Sé Jézu li minm minm. Moun k-ap gadé dèyè pou-l ouè sa-l kité, li pa mérité-l (Lc 9,62). Sé tankou yon ti grinn zèb k-ap jèmin, san moun pa ouè kijan, joutan-l vi-n tounin yon gran pié boua (Mc 4,26ss,30ss). Sé légliz la li minm minm ki kòmansé tou piti épi k-ap dévlopé, san rété. Sé tankou ti moun piti pou nou résévoua-l (Lc18,17). Si nou kolé nan richès nou, l-ap difisil pou nou antré ladann-l (Lc 18,25). Li pa sanblé avèk péyi roua yo ki sou tè-a (Ac 1,3ss). Sé pa kozé palé anpil (1Co 4,20). Sé yon fòs (ib). Moun ki pa kòrèk pap posédé-l (1 Co 6,9); sa k-ap viv nan mové plézi, nan sèvis zidòl, nan adiltè, nan dézòd avèk fi parèy yo oubyin gason parèy yo, nan volè nan séré lajan, nan bouason, nan jouré, nan pran byin moun ak fòs (1 Co 6,9.10). Kò sa-a gin pou-l chanjé fòm pou-l éritié-l (1 Co 15,50), antan-l fini ak tout mové plézi, tou sa-k pa pròp, tout libètinaj, tout dévègondaj, tout sèvis zidòl, tout manti, tout rayisans, tout kont, tout jalouzi, tout kòlè, tout batay, tout séparasion, tout bann-apa, tout lanvi, tout krim, tout bouason k-ap fè moun sou, tout manjé dépasé mézi (Ga 5,20).

Sé tout tan nou blijé lapriyé Granmèt la pou yo rékonèt sé li ki Roua sou nou (Lc 11,2; Mt 6,10), avèk ringn sa-a ki pa instalé sou kozé manjé ak boué, min jistis ak kè pozé ak kè kontan nan léspri Sin-an (R 14,17) ringn sa-a ki pa janm fini-an (Lc 1,33; Ps 145,13). Sé li minm pou nou chèchè anvan. Tout rès la ap vin-n apré (Mt 6,33), Nou bézouin énéji pou nou antré ladan-l (Mt 11,12). Fò nou gin yon kè ki pòv (Lc 6,20; Rt 5,3). Li déjà la an kachèt, min li gin pou-l parèt klè yon jou, lè Jézu ap rivé nan niaj yo pou-l jijé ni moun k-ap viv ni moun ki mouri yo (Lc 21,27). Lè sa-a tou délivrans la ap parèt klè avèk sign yo k-ap ékri nan sièl la: solèy la, lali-n nan, zètoual yo (Lc 21,25). Sin Jan ba nou avaloua sign sa yo nan vizion Madanm ki vlopé nan solèy la, lali-n nan anba pié-l la, kouròn douz zètoual yo sou tèt li-a, l-ap anfanté Pitit li-a (Ap 12,1ss) tankou yon fi ki ansint, ki ouè délivrans li rivé (Jn 16,21).

Satan k-ap jinnin dévlopman Péyi koté Bondié Roua-a, Michèl ak lamé-l la jété-l anba ak tout bann li yo (Ap 12,4.7-9). Bondié té di-l li t-ap mété yon rayisans ant li minm ak Madanm nan, ant désandans li ak désandans Madanm nan, Madanm nan t-ap krazé tèt li Gn 3,15). Sé tout tan péyi koté Bondié Roua-a ap grandi, pouvoua Satan minm ap bésé. Lè-l ouè tan-l kout, li vomi tout raj kòlè-l pou-l chèchè fè mézi déga li kapab (Ap 12,13-17). Min Bondié ba-l bariè. Sin Piè avèti nou pou nou rézisté-l fèm nan lafoua (1 p. 5,9). Nan lévanjil jodi-a Jézu di nou véyé sou konduit nou (Lc 21,34), pou kè nou pa vi-n lou nan libètinaj, ak bouason ak okipasion lavi sa-a, pou jou gran jijman-an pa tonbé sou nou san nou pa paré. Li fini mèsaj jodi-a antan-l mandé nou pou nou véyé (Lc 21,36), antan n-ap lapriyé tout tan, pou nou chapé dévan danjé yo, pou nou kanpé dévan Granmèt la. Sé répons pèsonèl sa-a nou gin pou nou bay.

Tan k-ap préparé Noèl, sé tan pou nou véyé, pou nou lapriyé yon fason spésial. N-ap mandé la Trè Sint Vièj Mari pou-l aprann nou lapriyé nan tout sa n-ap fè, min pou-l ba nou pasians tou ak pèsévérans pou nou aksépté rézèvé kèk moman spésial pou nou kité léspri Sin-an palé nan kè nou, antan-l ap lapriyé pou nou ak mo nou pa kapab konprann.

Sin Luk insisté anpil sou lapriyé nan lévanjil li ak nan Travay Apot yo. Ané sa-a sé lévanjil Sin Luk n-ap li chak dimanch. N-ap sonjé li palé plis nan kè nou pou touché sansibilité nou, pou invité nou bay yon répons pèsonèl.

Jodi-a répons sa-a sé véyé, lapriyé.

*

Rédanmsion ("apolutrôsis"); Dn 4,32 (LXX); Lc 21,28; R 3,24; 8,23; 1Co 1,30; Ep 1,7.14; 4,30; Col 1,14; He 9, 15; 11,35.

Ringn Bondié: Ps 45,7; 145,11.12.13; Mt 6,10; Lc 1,33; 11,2; R 14,17; 2 Tm 4,1; Ap 11,17; 19,6.

Rouayom Bondié: 119 foua nan Nouvo Téstaman

Jou: 1.861 foua nan Lansyin Téstaman; 426 foua nan Nouvo Téstaman

Priyé: 153 foua nan Lansyin Téstaman; 137 foua nan Nouvo Téstaman.

Lapriyé: 144 foua nan Lansyin Tèstaman. 67 foua nan Nouvo Tèstaman.

*

* *

DÉZIÈM DIMANCH LAVAN A

Sin Jan-Batis mandé Juif yo pou yo paré chémin Granmèt la nan kè yo, antan yo louvri kè yo nan KONVÈSION, nan pénitans. Réyèlman vré sé yon batèm pénitans li t-ap préché, yon batèm KONVÈSION, yon batèm ki té sèvi kom sign yo rékonèt yo sé péchè. Yo t-ap déklaré péché yo. Jan minm t-ap batizé yo, sa vlé di t-ap plonjé yo nan dlo-a kòm sign Bondié ap pròpté yo. Sé poua dayè lè Jézu vi-n prezanté dévan-l pou-l batizé-l, Jan té réfizé, Jan té di konsa: ou pa gin péché, ou pa bézouin batizé, ou pa bézouin fè pénitans, ou pa bézouin fè KONVÈSION, paské chémin-ou yo déjà tou douat, ou pa bézouin paré yo, ou pa bézouin drésé santié-ou yo, kè-ou ak kè Bondié Papa-a sé yon sèl yo yé, sé yon sèl volonté nou ginyin, nan pouin distans ki séparé nou, pouki sa ou-ap vi-n batizé nan min-m? Sé mouin minm ki t-a bézouin pou-ou batizé-m (cf Mt 3, 13-14). Jézu ap fè-l konprann li vi-n résévoua batèm nan pou-l mété-l nan plas péchè yo, pou-l poté pinision-an pou yo, pou-l poté koua-a pou yo, pou-l pròpté yo ak vré batèm nan li gin pou-l résévoua tout bon vré-a nan lanmò sou koua-a (Mt 3,15; Mc 10,38;Lc 12,49).

Jan-Batis ap palé ak Juif yo pou-l mandé yo chanjé mantalité, sé sa KONVÈSION-an yé. Chanjé diréksion réfléksion-ou. Yo té konprann paské yo sé pitit Abraam nan yo gin doua fè sa yo pito, y-ap déjà sové, yo gin plas rézèvé nan Paradi-a. Jan-Batis di yo konsa: Bondié gin doua pran ròch sa yo atè-a, li fè yo tounin pitit Abraam si-l vlé. Kanta nou minm, si nou pa chanjé kè ròch nou-an, pou nou mété yon vré kè ki dosil nan plas li (cf Jer 31,33; Ez 36,26) ki pa rét ap fè ròklò, ap dézobéyi tout lasint jounin, ap fè Loui-Jan-Bojé, kòm si sé nou sèl ki konnin tout bagay, pèsòn pa gin doua pasé nou okinn lòd, n-ap jouinn sa-k paré pou Jérusalèm nan ki pa-t rékonèt pasaj Granmèt la, ki té vi-n poté lapè pou li-a (Lc 19, 41-44). Granmèt la ap pasé koté nou, nou pap rékonèt li, lè-l fin pasé, l-ap tro ta. Dépi avan-l pasé, sé pou nou pròpté jé kè nou, pou nou kapab ouè-l, pou nou kapab résévoua-l.

Tan Jan-Batis la fi-n pasé, sé vré. Jézu fi-n rivé, sé vré, Jérusalèm déjà pa rékonèt li, sé vré. Min, èské nan tan nap viv la, koté n-ap viv la, pa gin yon pasaj Jézu k-ap fèt yon fason spésial alokasion tèt prèch n-ap tandé? Sé yon fason éstraòdinè pou fè Jézu pasé nan mitan nou, pou-l vidé lagras li an kantité sou nou, spésialman antan n-ap préparé 2 000 ané dépi-l té vi-n sou tè-a.

Nou doué fè atansion pou nou pa kité Jézu pasé san nou pa fè tankou Abraam té fè lè-l té ouè toua Pèsouaj yo ki t-ap pasé koté-l la vè midi, nan dézè-a, li té rélé yo, li té invité yo antré lakay li, li té drésé kouvè pou yo, yo minm, yo té rékonpansé-l. Sé Toua Pèsòn la Sint Trinité yo, Papa-a, Pitit la,

ak léspri Sin-an (Gn 18, 1-15). Sonjé kijan Jézu té maché ansanm ak patizan Émayus yo san yo pa-t konnin sé té li, min sé lè-l fi-n alé yo ouè sé té li minm (Lc 24, 31). Koté yo pa résévoua Sin Pòl, li souké pou siè ki anba pié-l (Ac 13,51). Pa kité madichon sa-a rivé nou (Lc 10, 11-16; Mt 10,14). LOUVRI TOUT PÒT KÈ NOU POU JÉZU ANTRÉ, LOUVRI TOUT PLAT MIN NOU POU NOU PATAJÉ. Pa pran pòz nou déjà fi-n konnin tout bagay, sa prèch sa-a ap poté ba nou, oubyin nou byin trankil konsa, nou pa bézouin li vi-n déranjé program nou. Paròl Jézu-a sé yon ponya, li fèt pou-l déranjé nou minm. Fiansé-a nan liv Kantik dè kantik la di nan kè-l, lè-l tandé fiancé-a ap frapé-a: mouin déjà fi-n kouché, mouin fi-n lavé pié-m, m-ap pran lèz-kò-m, pinga pèsòn moun vi-n jinnin-m. Li rét ap dòmi, fiancé-a minm al fè rout li. Lè-l fi-n lévé li trò ta, li blijé fè pénitans, sa vlé di soti déyò, nan sérin-an, fè tout ron lavil la, anvan-l réisi jouinn fiancé-a. Min li rankontré kèk difikilté anvan-l jouinn li (Ct 5, 2-7).

Difé-a limin, l-ap gayé. Moun ki réfizé limiè-a ak chalè-a, sé yo minm k-ap mété tèt yo nan frédi. Noèl ap poté limiè lavérité-a ak chalè rinmin-an. Sin Jan-Batis di rach la déjà nan rasi-n pié boua-a. Si pié boua-a réfizé bay frui KONVÈSION, montré bon volonté li ginyin pou-l donnin, y-ap koupé-l, y-ap jété-l nan difé. Bon grinn blé yo, Grammèt la ap ranmasé yo nan glasi-l, min kanta pay la minm, l-ap jété-l nan difé (Mt 3,10-12). Lévanjil jodi-a sé yon désizyon li invité nou pran, sé yon kalfou n-ap travèsé, chyin gin kat pat, li pa kouri pa kat chémin. Moun ki pa avèk mouin, li kont mouin. Moun ki pap ranmasé, sé gayé l-ap gayé (Lc 11,23e)

N-ap mandé Manman Mari, Imakilé Konsépsion, pou-l louvri kè nou, pou nou kapab résévoua Jézu nan Paròl li n-ap tandé. Moun ki résévoua nou, sé mouin minm li résévoua; moun ki méprizé nou, sé mouin minm li méprizé (Mt 10, 40). Li vi-n lakay li, Bétléèm, moun lakay li pa résévoua-l (Jn 1, 11; Lc 2, 7). Nan mitan nou gin yon moun nou pa rékonèt (Jn 1, 26). N-ap mandé Manman Mari lafoua pou Paròl prèch la, nou résévoua-l tankou Paròl Bondié li minm, nou kité-l blésé kè nou, pou mové san-an soti, pou sé yon kè tou nèf ki vi-n nan plas li.

*

** *

DÉZIÈM DIMANCH LAVAN B

Jézu ap batizé nou nan léspri-Sin. Dimanch pasé, nou té ouè frui léspri Sin yo: lacharité, kè kontan, lapè, pasians, kè sansib, bon jan, padonnin, douse, lafoua, fè kè-ou piti, jinnin kò-ou, pa fè mové plézi. Nou té ouè kijan yo té sèvi tou kòm zam pou batay kont frui lachè yo k-ap éséyé andòmi nou. Nou té konstaté sé tankou dlo n-ap pasé nan jé nou pou nou rét jé klé. Nou té ouè sé koua Jézu-Kri-a té planté sou Gòlgota-a, ki té donnin frui sa yo. Nou té konstaté sé minm koua sa-a yo té planté sou tè lamérik la lè yo té fi-n dékouvri-l la. Nou té rémaké sa fè sinksanzan koua sa-a planté lakay nou, ki sa nou fè avèk frui-l yo? Nou té mandé èské nou pa-t maské yo ak rad madigra, antan nou défiguré yo? Nou té mandé pou nou évité rété bra kouazé tankou sèvitè-a ki té résévoua piès lajan-an épi ki t-al kaché-l anba tè-a. Nou té invité nou fè jèm lavi Bondié-a dévlopé nan nou, sa-l té dépozé nan batèm nan, lafoua, lésépérans ak lacharité-a. Nou té raplé "neuvaine d'années" yo ki té préparé pou fété 1992, ané yo té dékouvri lamérik la, yo té vi-n planté lafoua, lésépérans ak lacharité-a.

Yon névèn sé préparasion yon fèt. Sé tankou yon tan lavan. L-ap édé nou préparé ané dé-mil la tou, koté n-ap fété dé mil ané dépi Jézu té fèt. Dépi koulié-a nou antré nan lavan sa-a. Ki moun ki kapab édé nou fè préparasion sa-a si sé pa la Trè Sint Vièj Mari? Nan tan lavan k-ap préparé Noèl, fèt Imakilé Konsépsion-an parèt tankou yon zétoual k-ap kléré nan nuit ki fènoua anpil, épi k-ap dirijé chémin pèlérin ak vouayajè nan mové pa ak nan falèz.

Élizabèt té fè Mari konpliman pou lafoua li. Paròl Bondié-a pran chè nan vant, li abité pami nou. Élizabèt di-l konpliman pou ou nan pami tout fi, konpliman tou pou **FRUI** sa-a k-ap soti nan zantray ou-a. Pié boua-a donnin frui, frui léspri Sin-an, nan kè Mari an premié. Sé li minm ki vi-n pran plas Èv té pèdi-a, lè-l té gouté frui lanmò-a. Li ba nou frui lavi-a.

Jan-Batis mandé nou pou nou préparé santié Granmèt la byin douat. Koté santié Granmèt la pasé, sé nan kè nou. Sé sa nou gin pou nou débarasé ak tout frui lachè yo nou té ouè dimanch pasé-a: mové plézi, mové lidé, libètinaj, sipèstision, maji, rayisans, dézakò, jalouzi, kòlè, batay, divizion, moun-pa, lanvi, touyé moun, bouè bouason, manjé dépasé mézi..., tout bagay sa yo nou té di ki pa-t anba drapo lakoua-a. Préparé santié Granmèt la byin douat. Krazé mòn, konblé gòj, jan Profèt Izayi di nou-an. Li mandé nou pou nou ankourajé. Nou té résévoua bòn nouvèl lévanjil la gin sinksanzan. Nou kapab rét ap mandé nou: Ki progrè nou fè? Nou pa doué rét ap kalkilé sélman bagay ki pa réyisi. Gin anpil rézilta ki sòti, sé pou nou

apranng gadé yo pou nou di Bondié mèsi, pou nou jouinn ankourajman. Gin anpil Pè, Mè, Frè, k-ap dévoué tèt yo pou frè yo yon fason pòv, éfasé. Sé bèl flè ak bèl frui pié boua-a donnin. Gin anpil fanmi k-ap viv lévanjil la jan Granmèt la mandé-l la, k-ap bay pitit yo yon édikasion krétyin. Sa-a sé bèl flè ak bèl frui nan pié boua-a. Gin anpil moun ki kité chémin fènoua yo t-ap suiv la, yo fè yon chayman karé nan lavi yo pou yo antré nan fanmi Jézu-Kri-a san mélanj avèk tout égzijans li mandé. Sa-a tou sé bèl frui ak bèl flè pié boua-a donnin.

Koua-a ki pasé nan tout parouas yo doué raplé nou sa. Sin Piè di nou yon sèl jou kot Granmèt la sé tankou mil ané. Li pa mizé pou-l réalizé promès li yo, jan kèkzin prétann nan. Sé pasians l-ap pran pou-l bay tout moun tan pou yo jouinn lokasion fè konvèsion. Nou espéré pèlerinaj Koua-a fè-a ap pèmèt anpil moun rantré nan fon kè yo pou yo **PRÉPARÉ CHÉMIN GRANMÈT LA**, pou nouvo sièl ak nouvo tè n-ap tann nan, daprè promès la, réalizé dépi anba isit la, pou kè sansib la rankontré avèk vérité-a, pou jistis la anbrasé kè pozé-a.

Sé sa n-ap mandé Manman Mari, Imakilé Konsépsion.

*

* *

DÉZIÈM DIMANCH LAVAN C

Gin dé pati nan lévanjil jodi-a, v. 1-2 épi v. 3-6. Prémie pati-a pozé profèt Jan-Batis nan situason épòk koté l-ap viv la, minm jan yo konn fè pou prezanté profèt lansyin Téstaman yo, tankou Izayi (Is 1,1 "sou tan Ozias, Yotam, Akaz, Ézékias, roua Juda..."), Jérémi (Jer 1,2-3 "Joiakin, sou tan Jozias, pitit Amon, roua Juda jouskalafin onzièm ané Ézékias, pitit Jozias, roua Juda, jous nan égzil Jérusalèm, nan sinkièm moua-a..."), Ozé (Os 1,1 "sou tan Ozias, Yotam, Akaz ak Ézékias, roua Juda, épi sou tan Jéroboam, pitit Joas, roua Israèl...").

Konsa nan premie pati lévanjil jodi-a, Sin Luk pozé Jan-Batis nan tan li t-ap viv la, tankou pou byin montré nou profèt la ap vini pou dékouvri nou sans tan-an, sans istoua-a ki kaché nan sékrè plan délivrans Bondié-a. Sé poua nou tandé tout pakèt non sa yo nou pa abitué avèk yo-a. Sin Luk sé yon istoryin, li gin égzaktitud nan dat li, li gin présizyon nan non ak épòk moun yo k-ap kòmandé péyi-a. Li vlé montré nou tou gin yon roua k-ap vini. Ringn li anlè tout ringn sa yo, tankou liv profèt Danièl la té montré nou nan sémèn ki sot pasé yo.

Konsa Sin Luk kòmansé détayé pou nou: Ané kinz ringn Tibè Séza (= gran roua k-ap kòmandé a Ròm sou tout péyi-a), Pons Pilat té préfè lajudé (péyi koté délivrans la ap vi-n sot nan siél la avèk Jézu-Kri-a), Èròd té chèf ka péyi-a, Galilé (péyi-a koté Jézu ap pasé ti laj jous trantan-an épi koté l-ap kòmansé préché-a), Filip, tankou frè-l la té chèf ka péyi-a, Ituré ak Trankonitid (yo té séparé péyi Israèl la nan kat pòsion, tankou nan pié lakoua-a sòlda yo té séparé rad Jézu nan kat pòsion-an, Jan 19,23, min péyi Jézu ap ba nou-an, l-ap rasanblé sot nan kat diréksion pou fè yon sèl, Ézékièl 37,9, nan plas ringn yo ki té divizé yo, Danièl 2,29-45, pou-l pa janm chiré ankò, Jan 21,11 tankou lontan, 1 Roua 11,29-32, Lizanias té chèf ka péyi-a, Abilèn (sé dèniè pòsion-an. Tout péyi sa yo ki divizé yo, sé Jézu k-ap rasanblé yo. Profèt Danièl té prévoua sa déjà).

Lè Sin Luk fi-n prezanté nou moun k-ap kòmandé péyi-a, li montré nou prèt an chèf yo, (sé Jézu k-apral ranplasé yo tou). Sékè sé toua kalité klas moun ki té ginyin nan diréksion péyi-a, sé roua, prèt ak profèt yo. Profèt la té toujou la pou montré roua yo ak prèt yo ki chémin Bondié té vlé pou yo suiv. Sé poua kot chak roua té toujou gin profèt pou raplé bon chémin-an (Samuèl an fas Sayul, Natan an fas David, Éli an fas Akab, Izayi an fas Akaz, Jérémi an fas Sédésias...). An minm tan tou té toujou gin yon profèt k-ap di prèt yo, tèl rout pa fi-n sa nèt, sé pa konsa Granmèt la vlé pou nou

maché. Konsa dévan roua yo ak prèt yo, profèt la t-ap sèvi santinèl. Jodi-a, Sin Luk fi-n prezanté roua nan vèsè 1, li prezanté prèt atò nan vèsè 2: "sou tan A-n ak Kayif té prèt an chèf". Sé lè sa-a atò li prezanté Jan-Batis kòm profèt nan vèsè 2. Paròl Bondié-a palé ak Jan, pitit Zakari-a, nan savann nan, Jan-Batis ap gin pou-l fè ni roua ni prèt lobsèvasion. N-ap tandé koté l-ap fè roua Èròd répròch pou madanm frè-l la li té pran-an (Mak 6,17), sé konsa l-ap fè ras prèt yo lobsèvasion pou yo pi sinsè nan kè yo pou yo pa rét ap di yo sé pitit Abraam san yo pa fè pénitans (Matie 3,7).

Si Jan-Batis té nan savann nan, sé pou-l té préparé-l pou gran ròl sa-a li t-ap ginyin-an, pou-l sèvi Jézu-Kri kòm soukèt larouzé, pou fè chémin dévan-l. Li rasanblé mision tout profèt lansyin Téstaman yo.

Sé nan savann nan minm pèp la ap gin pou-l vi-n jouinn li, pou-l résévoua batèm, pou fè sonjé tan lontan lè pèp Bondié-a té fèk fèt la nan savann Sinayi-a, épi lè pèp Bondié-a té soti nan égzil Babilòn nan.

Dépi Jan té tou piti, li té pati nan savann nan (Luk 1,80 "Pitit la té rété nan savann yo jous jou li té gin pou-l parèt a klè dévan Israël"). Li t-ap préparé-l konsa nan silans, pandan Jézu li minm tou t-ap préparé-l nan lavi kaché Nazarèt la. Sé pa palé anpil, machouè gonflé k-ap réalizé mèvèy Granmèt la. Sé pran tan-ou rét kaché nan silans joutan Granmèt la li minm ba-ou paròl li pou-ou palé. Anvan loraj la éklaté, anvan-l fè zéklè, li ranmasé nan niaj ki noua. Apré sa li éklaté. Batri machin-n nan rét nan chaj yon bon moman. Apré sa, li fè motè-a pati. Trò présé pa fè jou louvri. Chofè machi-n nan ap pousé vitès: li kòmansé fè gaz, 20 kilomèt alè: li pran chanté "la vie est belle" (lavi-a bèl). Li pousé gaz pi rèd ankò, kontè-a monté sou 50 kilomèt alè: li pran chanté: "plus près de toi, mon Dieu" (pi pré-ou Bondié). Li pousé gaz pi plis toujou, li rivé sou 100 kilomèt alè, li pran chanté. "les Saints et les Anges" (Sin yo ak Mésajé Bondié yo). Li pousé gaz pi rèd ankò, ra planché. Zéguiy spidomèt la kolé sou 150 kilomèt alè, krak, krak, boum... Li té fèk kòmansé apral chanté: "Dans ton royaume" (Nan paradi). Sé sa yo kontinué chanté pou li... Trò présé pa fè jou louvri. Jan-Batis pran tan-l avan-l bay mésaj la ki gin anpil valè-a. Savann nan ak silans la édé-l kouté paròl Bondié-a, édé-l dijéré-l, édé-l fè-l pasé nan moual li, pou-l pa louvri bouch tankou yon jako-répèt ap rakonté tout kalité kozé ki pa gin tèt ni ké. Savann sa-a, tan lavan-an invité nou antré ladan-l pou nou kouté Paròl Bondié-a, nan Pitit li Jézu-Kri k-ap fè ladésant lakay nou. Nou tout nou sé profèt dépi nan batèm nan, antan nou patisipé nan ran Jézu-Kri sa-a. Konsa nou doué ofri-l silans kè nou, antré anndan fon konsians nou pou nou fè Paròl li-a pran rasi-n, pou sé pa dlo k-ap koulé sou plim kana.

Dézièm pati lévanjil jodi-a sé vèsè 3-6. Paròl Gramèt la rivé sou Jan, pitit Zakari-a. Sé yon konvèsasyon ki ginyin ant Bondié ak profèt la. Min sé Bondié ki kòmansé palé (Jérémi 1,1; Ozé 1,1; Miché 1,1; Ajé 1,1).

Mision Jan-Batis sanblé ak mision Jérémi. Yo tou lédé konsakré dépi nan vant (Luk 1,13; Jérémi 1,5), yo tou lédé ap anonsé jijman dènié tan-an (Luk 3,9.16; Jérémi 1;10), yo tou lédé ap anonsé bèlté Mési-a (Luk 1,14; 3,15; Jérémi 31), avèk nouvo kontra-a (Luk 7,18.23; Jérémi 31,31-34).

Jan-Batis ap préché yon batèm pou padonnnin péché. Profèt yo t-ap mandé pèp la pou-l lavé nanm li, pou-l pròpté sot nan péché-l. Sé nétouayaj sa-a ki sèvi Jan-Batis kòm fon pou-l préché batèm pou padon péché-a (Izayi 1,16; Jérémi 4,14; Ézékiél 36,25; Zakari 13,1).

Batèm sa-a sé sign yo chanjé santiman. Nan sans sa-a yo konvèti. Konvèti-a sé pa kite légliz katolik, al antré nan lòt rélijyon. Konvèti-a sé viré do bay péché, ou tounin sou chémin-an ki t-ap fè-ou al louin Granmèt la (Izayi 31,6; 53,7; Jérémi 18,8; Ézékiél 33,12; Ékléziastik 48,15. Sé sa konvèsion-an. Sé pou chanjman santiman sa-a Jan-Batis t-ap préché. Batèm Jan-Batis la sé pa li minm ki vré batèm nan, paské Jézu ap di apot yo konsa: "Jan té batizé nan dlo, min nou minm minm sé nan léspri Sin-an n-ap batizé nan kèk jou" (Travay apot yo 1,5), Jan-Batis li minm minm té di sa tou: "Mouin minm mouin batizé nou ak dlo, li minm minm l-ap batizé nou nan léspri-Sin ak difé" (Luk 3,16). Gin moun jous koulié-a toujou, sé batèm Jan-Batis yo adopté. Sé konsa batèm San Jézu-Kri sou koua-a pa gin sans pou yo (Travay Apot yo 19,1-7). Yo kòm vlé alignin batèm sa n-ap résévoua koulié-a avèk sa Jézu té résévoua nan min Jan-Batis la nan laj trantan-an. Épi yo di sé pou nou tann trantan pou nou batizé. Yo pa konprann, batèm sa-a sé yon lòt kalité batèm li té yé, sé batèm pèp lansyinTéstaman-an ki t-ap paré pou antré nan nouvo Téstaman-an. Tan sa-a fini. Sé pou sa Jézu di: "Mouin gin yon batèm pou-m résévoua. Sé pa ti kras anvi moun anvi résévoua-l, kè-m pa rét an plas joutan mouin résévoua-l". Li t-ap palé sou lanmò-l (Luk 12,50). Sé batèm sa-a tou li mandé Jak ak Jan si yo paré pou résévoua-a (Mak 10,36). Konsa pa mélé kozé yo. Nou pa nan batèm Jan-Batis ankò, pou nou t-a blijé tann trantan pou nou résévoua-l, tankou Jézu té fè ak Juif yo. Min sé batèm Jézu-a ki alamòd koulié-a, nan nouvo Téstaman-an, nan San-l ak nan léspri-l la. Nan ninpòt ki laj nou paré pou nou résévoua-l. Lafoua légliz la sèvi nou garanti pou li. Nou pa doué trayi angajman batèm nou té résévoua lè nou té tou piti, pou nou di "nou pa-t konnin". Lédikasyon paran nou té ba nou lè nou té tou piti-a tou, sé pou rénonse-l; lavi-a yo té ba nou-an tou sé pou nou rénonse-l; manjé-a yo té konn ba nou-an pou fè nou

grandi-a, lè nou pa-t ko kapab débrouyé pou kont kò nou-an, sé pou réné-sé-l tou!!! Sé pou nou réfléchi anvan nou pran désizyon k-ap kondané nou. Sé pa tout bagay nou tandé nan lari-a pou nou répété.

Paròl Jan-Batis yo fè sonjé kòmansman dézièm liv Izayi-a, chapit 40,3-5, koté li mandé pou paré rout Granmèt la. Granmèt la ap vi-n délivré pèp li sot nan légzil (Izayi 40-55), tankou nan savann Sinayi-a (Izayi 41,17-20;43, 1.14-24). Sé sa tou premié léktu jodi-a di nan liv profèt Baruk 5,1-9. Pèp la ap tounin, dapré sa Psòm répons jodi-a édé nou kal-kilé-a, Ps 125 (= 126). Tounin nou gin pou nou tounin jodi-a, sé pa ni sot Éjip, ni sot Babilòn, min sé sot nan péché. Nan tan Noèl la, paròl Mésajé-a di Jozèf la, sé pou nou: Ou-ap rélé non-l Jézu, paské sé li minm k-ap sové pèp li-a sot nan péché-l (Matié 1,21). Noèl, sé pa tan banbòch, fanal, péta, alimèt bingal, poupé, balon..., sé pa tan pou al péyé bòkò..., sé pa tan pou nou sonjé kijan ou-ap fè yon bon révéyon..., manjé paté cho..., Noèl sé pa jouèt, sé pa réklam n-ap tandé nan radio antan y-ap chanté kantik Noèl dépi moua novanm pou fè moun sonjé achté kado pou pitit yo. Noèl sé pa sa, sé yon tan préparasion pou résévoua Mési-a, ki vi-n lakay li, min moun lakay li pa résévoua li (Jan 1,11), atèl pouin sé nan trou ròch koté yo gadé zannimo li té fè ladésant, paské pa-t gin plas pou yo nan lotèl (Luk 2,7). Fò kè nou débarasé, ak tou sa-k fè-l sanblé ak yon lotèl koté moun rich fè ladésant, paské si-l trò ankonbré, pap gin plas pou Jézu ladan-l. Jézu té promèt li t-ap vi-n fè ladésant lakay yon moun, moun nan bati yon gro kay chanmòt an béton-amé, Jézu fè yon tranbléman tè rivé, li krazé kay la, moun nan di si sé konsa, l-ap bati yon ti kay bas an planch, Jézu fè difé pran nan kay la; moun nan di ébyin l-ap bati yon ti joupa ak pay. Lè minui Noèl ap sonnin douz kou: gong, gong, gong, gong, gong, gong, gong, gong, gong, gong, gong, gong, gong, lè sa-a yon gro van siklòn souflé, tout kay la gayé, yon ti touf pay ki rété atè-a, sé sou li Jézu désann, li di konsa: "Mouin pa vi-n lakay ou pou-m résévoua, min mouin vi-n lakay ou pou-m bay". Konsa sa-ou konprann ou ginyin-an, débarasé-ou ak li, sé nan yon kè pòv l-ap vi-n fè ladésant (1 Roua 19,11-13), Kè pòv tankou kè Mari ak Jozèf. Fèt limakilé-a toujou tonbé nan kòmansman tan lavan, pou préparé nou pou fèt Noèl la ansanm ak kè Mari ki pòv. Mari, Jozèf, Jan-Batis, sé toua bèl figi k-ap édé viv tan lavan-an, sé toua pòv Granmèt la ki gin kalité Bondié té bézouin pou pèp li-a té ginyin nan lansyin Téstaman pou li minm li té kapab fè ladésant la.

Sin Pòl mandé nou jodi-a, nan dézièm léktu-a, pou nou aprann distingé sa-k pi inpòtan (Filipyin 1,10). Sé konsa dènié priyé jodi-a mandé pou Bondié "apran nou pézé bagay tè-a avèk sajès, pou nou kolé kò nou sou afè sièl la".

- Jan-Batis:	N-ap réglé, paj	432
- Ou ki tou piti		396
- Pitit mouin		240
- Konsolé		302
- Ozana, Maranata		99
- Jézu vini non		487
- Pran kouraj		120
- Sièl, simin larouzé		163
- Tè sèk la va rouzé		381
- Vini, Jézu Granmèt		466

*

Yon voua rélé nan dézé-a: Préparé chémin Granmèt la (Is 40). Chémin Bondié yo sé chémin lézòm dapré sa Granmèt la di nou nan liv Profèt Izayi (Is 55). Chémin Bondié-a sé nan kè nou pou préparé-l. Krazé mòn, nivlé bafon. Sa vlé di: détrui logèy, konblé dékourajman. Dé défo sa yo fè chémin-an dévlopé an zigzag, fè monté-désann. Lògèy la sé mòn yo; dékourajman-an, sé trou yo. Ak tè ki sot nan mòn nan, y-ap konblé trou yo ki défonsé rout la.

Lè yon moun konté sou pròp tèt li, li kapab tonbé nan dé défo sa yo. Li trousé ponyèt li pou-l réalizé gran rézilta. Min li bliyé si Granmèt la pa bati kay la, sé pou bontan mason yo ap travay (Ps 127). Lè-l ouè tout éfò-l pa réyisi, li kapab dékourajé, li pa ozé angajé-l nan anyin ankò.

Sé Bondié ki ba nou fòs ansanm ak umilité. Dé kalité sa yo, youn konplété lòt. Fòs pou évité dékourajman, umilité pou konbat lògèy. Konsa krazé mòn lògèy la avèk umilité, konblé bafon dékourajman-an avèk fòs. Sé dé pié sa yo k-ap fè nou maché sou chémin Granmèt la, san nou pa bité.

Li jété jé-l sou sèvant li ki pòv (umilité). Li lévé sa ki pòv yo anlè (fòs).

*

Sin Luk rinmin bay présizyon sou tan, koté ak moun ki angajé nan évenman yo li rakonté-a. Sé yon fason pou-l montré kijan Pitit Bondié-a antré tout bon vré nan is-toua lézòm, nan péyi yo, nan ras yo. Sé sa yo rélé "incarnation". Nan kèk sémèn n-ap fété nésans Pitit Bondié-a sou tè-a. Tan lavan ap préparé nou pou sa, minm jan Sin Jan-Batis té préparé pèp la pou-l résévoua Mési-a.

Li té fè sa yon foua nan sikonstans Sin Luk rapòté nou avèk présizyon: sou kinzièm ané ringn Tibè Séza a Ròm, sou préfè Pilat nan lajidé, sou tan roua Éròd nan Galilé, nan épòk Filip nan litiré, nan moman Lizanias nan Abilèn (Lc 3,1). Tou sa sé chèf k-ap kòmandé péyi yo. Gin nan yo k-ap tranpé nan désizyon lanmò Jézu (Pilat ak Éròd). Min té gin prèt tou: Sé té A-n ak Kayif. Yo minm tou y-ap konplis nan lanmò Jézu (Lc 3,2). An fas CHÈF yo ak PRÈT yo, té gin pi gran nan Profèt yo: sé Jan-Batis, pitit Zakari (Lc 3,2) Nan tout réjion lariviè Joudin-an li parèt, l-ap préché pou moun yo chanjé konduit, pou péché yo éfasé (Lc 3,3). Sé nan sans sa-a l-ap batizé yo. Li mandé pou tout ravi-n ranpli, pou tout mòn ak bit tè kasé, pou chémin k-ap viré-tounin yo vi-n douat, pou rout ki défonsé yo vi-n plat (Lc 3,5), pou tout moun kapab ouè Bondié ki vi-n sovè nou (Lc 3,6).

Siméyon té rékonét li nan Tanp la, lè-l té kinbé-l sou bra-l, li té di: "Koulié-a, Granmèt, ou mèt kité sèvitè-ou la pati an-pè, paské jé-m ouè Sila-a k-ap sovè nou-an, li minm ou té paré pou tout pèp yo" (Lc 2,30). Sin Luk fini liv Travay Apot yo antan-l montré kijan Sin Pòl déklaré Juif yo sé bay payin yo Bondié voyé Sila-a k-ap sovè nou-an (Ac 28,28). Sin Luk insisté ni nan Évanjil li-a ni nan Travay Apot yo sou dimansion MISIONÈ lévanjil la. Sé pou tout pèp yo k-ap ouè Bondié ki vi-n sovè nou-an (3,6). Sé pou tout pèp yo Bondié té préparé sa (Lc 2,30). Sé bay payin yo l-apralé (Ac 28,28). Dépi Jézu kòmansé préché, nan kay-réyinion Nazarèt la, li déklaré: malgré tout vèv ki té nan péyi Israël, sé bay yon vèv nan péyi Sarépta Bondié té voyé Profèt Éli; malgré tout moun ki té gin maladi lalèp nan péyi Israël, sé bay yon malad nan péyi Siri yo té voyé Profèt Élizé (Lc 4,24-27). Sé yon fason li vlé éspliké kijan Mision Mési-a, sé yon mision ki konsèné tout pèp yo. Légliz gin kat kalité: li fè yon sèl, li sin, li la pou tout moun, sé sou Apot yo li bati.

Dépi nan kòmansman lavan nou déjà ap gadé nan diréksion lépifani. Limié Noël la ap kléré pou tout pèp. Roua Maj yo ap soti byin louin, nan diréksion solèy lévé, pou yo vi-n adoré Pitit Bondié-a, nan pak bèt la, Bètèleém. Jézu ap di Juif yo yon lè "Moun ap soti nan diréksion solèy lévé ak diréksion solèy kouché, y-ap atablé avèk Abraam, Izaak ak Jakòb", pandan soua-dizan pitit kay yo yo minm ap rét déyò (Mt 8,11). Sé lokazion pou fouyé konsians nou, pou nou ouè si nou pa kèkfoua tankou Juif sa yo k-ap gonflé pouatri-n yo paské yo gin promès yo, sikonsizyon-an avèk laloua-a ki sèvi yo kòm garanti (R 2,4), ki fè yo konprann sé yo minm ki sant tè-a, koté tout nasion yo gin pou yo vi-n adoré Bondié nan Tamp li, nan vil li (Is 2,2-3; Ps 87,5). Épi poutèt sa, yo pa fè éfò pou yo chanjé fason y-ap viv. Sin Jan-Batis ap di

yo pa rété ap di: "Nou gin Abraam pou papa nou", paské Bondié kapab fè ròch yo vi-n tounin pitit Abraam (Lc 3,8). Min sé pou yo bat léstonmak yo, rékonèt péché yo, pran rézolisyon pou chanjé mové konduit yo. Sé nan sans sa-a Sin Jan-Batis préché batèm nan.

Mésaj li ap kòné toujou tankou yon éko k-ap sonninan fon ravi-n yo, k-ap gayé nan savann nan, k-ap toubiyonnin anndan fon kè nou.

N-ap mandé Manman Mari pou-l louvri kè nou, pou nou pa fè rébèl nan mésaj konvèsion sa-a k-ap pasé-a, pou fèt Noèl la pa pèmèt nou fèmin pòt dévan Pitit Bon-dié-a k-ap fèt sou tè-a, tankou moun Bètléèm yo té fè-a: "Li vi-n lakay li, moun lakay li pa résévoua-l" (Jn 1,11; Lc 2,7).

délivrans ("sôtérieron" = "salut"): 136 foua nan lansyin Téstaman-an, 63 foua nan Nouvo Téstaman-an

Gn 49,18; Ex 15,2; Dt 32,15; 1Sm 11,13; 2 Sm 22,3.16.47; 23,5; 1Ch 16,23.35; 2 Ch 6,41; 20,17; Jdt 8,17; 10,15; 11,3; Est 4,14.17d; 8,12u; 1Mac 3,18; 10,83; 2 Mac 13,3; 14,3.9; Job 30,15; 40,14; Ps 3,3.9; 9,15; 12,6; 13,6; 14,7; 18,3.36.47; 20,6.7; 21,2.6; 24,5; 25,5; 27,1.9; 28,8; 35,3.9; 37,39; 38,23; 40,11.17; 42,6.12; 43,5; 50,23; 51,14.15; 53,7; 60,13; 61,2; 62,3.7.8; 65,6; 67,3; 68,20; 69,14.30; 70,5; 71,15; 78,22; 79,9; 85,5.8.10; 86,16; 88,2; 89,27; 91,16; 95,1; 96,2; 98,1.2.3; 106,4; 108,13; 116,13; 118,14.15.21.25.28; 119,41.81.123.155.166.174; 132,16; 140,8; 149,4; Sg 6,24; 10,6; 18,7; Si 4,8; 20,9; 39,18; Is 12,2a,b.3; 17,10; 25,9; 26,18; 30,15; 33,2; 45,8; 46,13 a.b; 49,6.8; 51,5.6.8; 52,7.10 56.1; 59,11.17; 60,18; 61,10; 62,1.11; Jer 3,23; Lam 3,26; Ba 4,22.24; Jon 2,10; Ha 3,2; Mt 5,47; Lc 1,69.77; 2,30; 3,6 19,9; Jn 4,22; 5,34; Ac 7,25; 11,14; 13,26.47; 16,17; 27,20.34; 28,28; R 1,16; 8,24; 10,10; 11,11; 13,11; 2 Co 1,6; 6,2a.b; Ep 1,13; 2,8; 6,17; Ph 1,19.28; 2,12; Col 4,18; 1 Th 2,16; 5,8.9; 2 Th 3,17; 2 Tm 2,10; 3,15; 4,21; Tit 2,11; 3,15; He 1,24; 2,3.10; 5,9; 6,9; 9,28; 1P1,5.9.10; 2,2; Jud 3; Ap 7,10; 19,1.

rout: 137 foua nan lansyin Téstaman, 42 foua nan Nouvo Téstaman

santié: 62 foua nan lansyin Téstaman, 4 foua nan nouvo Téstaman

chémin: 302 foua nan lansyin Téstaman, 63 foua nan nouvo Téstaman

ravi-n ("pharax"): 88 foua nan lansyin Téstaman, 1 foua nan nouvo Téstaman.

*

* *

TOUAZIÈM DIMANCH LAVAN A

Kat foua mo PASIANS la vini nan Lèt Sin Jak la (Jc 5, 7a.b.8.10) Dènié foua-a li kolé avèk mo "landirans" la. Pasiens sé yon fòm éspérans, kalité sa-a Bondié ba nou pou nou fè-l donnin frui spésialman nan tan lavan-an, paské tan lavan-an sé yon tan koté n-ap tann nésans Granmèt la. Moun k-ap tann blijé gin anpil pasians, paské li pa konnin ki lè moun l-ap tann-nan ap vini, min li sètèn l-ap vini kan minm. Avèk lafoua nou sètèn Granmèt la ap vini. Min kòm nou pa konnin ki lè, nou bézouin éspérans, pasians, landirans, pou nou tann san nou pa babié, san nou pa fè fo-jijman.

Mo pasians sa-a, sé yon konsign li yé pou tan lavan-an. Pap-Jan Pòl II palé nou osijè lané dé mil la, koté n-apral fété dézièm miléné nésans Granmèt nou-an. Dépi koulié-a fò nou komansé préparé-l spésialman avèk Manman Mari, antan n-ap sonjé nésans li ki té préparé nésans Granmèt la. Konsa nou gin sa kòm konsign. Pandan tan lavan sa-a, si nou gin yon ti sakrifis spésial pou nou fè, sé pasians la. Gin yon ti chanté ki kapab édé nou viv tan lavan sa-a, li di: "pran pasians". Mo pasians la nan labib Grèk la, sé yon mo ki gin dé pati ladan-l, yon prémié pati ki vlé di "longè" ("makro"), yon dézièm pati li vlé di "kolè" ("thumia"). Sa vlé di sé pou nou pran tan anvan nou fè kolè ("makro-thumia"). Sé kòm si Sin Jak di nou: pran tan anvan nou fè kolè (Jc 5,7 "makrothumèsaté"). Lè Moyiz té mandé Bondié non-l nan liv Égzòd la, Bondié té réponn li antan li té di-l konsa li mal pou faché, Ex 34, 6. Nou sé pitit Bondié, sé sou potré-l li fè nou, pou nou sanblé avèk li. Si li minm, li mal pou faché, nou minm tou sé pou nou pran tan anvan nou fè kolè. Jézu di nou konsa sé pou nou korèk nèt minm jan Papa nou ki nan sièl la li kòrèk nèt, Mt 5, 48. Bondié di nou pou nou sin minm jan li minm li sin, Lv 19,2. Yon pitit sanblé ak Papa-l. An tou ka, pa kité solèy kouché sou kolè nou, Ep 4,26; Ps 4,5.

Bondié pran pasians anpil pou-l kondui nou. Li pran pasians pou-l korijé défo nou, pou-l sipòté nou ak tout féblès nou. Sé yon sakrifis n-ap fè antan n-ap chèché sipòté lòt yo ak défo yo, si Bondié pran pasians ak nou, nou minm tou sé pou nou pran pasians ak défo lòt yo. Nou pa doué toujou prêt pou-n ap jijé yo, jan Sin Jak di nou nan Lèt li jodi-a, Jc 5,9. Bondié pa voyé Pitit li-a pou-l jijé nou, min pou-l sovè nou. Nou minm tou sé pou nou fè atansion pou nou pa rét ap gadé ti pay la nan jé frè nou yo, pandan nou gin yon gro bout boua nan jé pa nou. Bondié bon pou nou, nou minm tou sé pou nou bon pou frè nou yo. Landirans la sé sipòté ("pathias") inkonvénian ("kako"), dapré lang Grèk la koté Sin Jak ékri Lèt li-a (Jc 5,10 "kakopathias"). Pran pasians, pran pasians.

Pa rét ap trakasé pou démin, gadé zouazo yo ak flè yo Papa nou kréyé, Mt 6, 25. Lè lè-a rivé, l-ap aji vit san nou pa atann, Is, 60,22. Pran pasians, nou mèt ap travèsé sou lanmè, nan lannuit ak nan tanpèt, pran pasians, Jézu ap dòmi pandan l-ap gouvènin, pran pasians, Mt 14, 22; Mc 4, 38. Pran pasians lè nou fè tou sa nou kapab san nou pa ouè rézilta k-ap fléri, pran pasians, Sin Jak di nou pran modèl sou moun ki fi-n planté-a, li rét ap tann lapli-a, li pran pasians, Jc 5,7; Mc 4, 26. Pran pasians, nou mèt voyé sinn nan tout nannuit, nou pa ouè yon pouason ki pri, pran pasians, nan yon ti moman Jézu ap di yon sèl paròl, filè-a ap plin jous pou-l t-a chiré, pran pasians, Lc 5,5. Pran pasians yon jou pou li sé kon mil an, Ps 84, 11. Pran pasians, nou mèt santi tè-a ap glisé anba plant pié nou, sou li pou nou apuiyé tankou Sin Piè sou lanmè-a, lè-l t-ap maché épi li santi-l t-ap fonsé nan dlo-a; pran pasians, Jézu la tou pré nou, l-ap anpéché nou koulé, Mt 14, 30. Pran pasians, mové koutlang mèt dékontrolé nou ak jalouzi, ak rayisans, ak fèzè, ak tripotaj ki pa gin fondman, pa chèché pran défans pròp tèt nou, pran pasians, kité kòz nou nan min Granmèt la ki ba nou léspri-l pou-l ankourajé nou, Jn 14, 27. Pran pasians, pran pasians. Nou mèt pa jouinn koté pou nou pozé tèt nou, tout pòt kè tout moun fèmin pou nou, san nou pa jouinn zanmi pou nou konfié problèm nou, pran pasians, Jézu la, Ps 6, 31; nou mèt pa jouinn yon ti moso pin pou pasé grangou nou, yon ti gout dlo pou kalmé souaf nou, Jézu-Sajès Bondié ranjé kouvè pou nou, l-ap sèvi nou fré, pran pasians, Ps 23, 3; Pr, 9, 2; Si 24, 19; Is 55, 1. Pran pasians, rout la mèt long, anba plant pié nou fi-n chiré, sé bouaté n-ap bouaté, sé piété n-ap piété, Jézu sé rakousi nou, Jn 6, 21; 14, 6. Pran pasians, chaj la mèt lou sou zépòl nou, nou pa jouinn yon min pou édé nou poté, Jézu di nou chaj li-a léjé kon pay, lagé chaj nou sou Bondié, sé li minm ki pou soutni nou, Mt 11, 29; Ps 55, 23. Pran pasians. Lannuit mèt vlopé nou ak fènoua, nou pa ouè koté pou nou fè, zétoual Bétlèèm nan ap kléré nou Mt 2, 9, Jézu sé Limiè tè-a, pran pasians, Mt 27, 45; Jn 11, 10; 8, 12; 1,4. Pran pasians, yo mèt fè manti sou do nou, nou pa konn kijan pou nou fè, pou nou fè ouè vérité-a, pran pasians, Jézu sé Vérité-a, Jn 14, 6. Pran pasians, tout bariè, mèt bloké rout nou, anpéché nou antré nan jadin Paradi-a, Gn 3, 24, sonjé Jézu krazé tout bariè, Ep 2, 14. Pran pasians, nou mèt pou kont nou, san pèsòn pa vlé maché avèk nou, pran pasians, sonjé nan pié Koua-a Jézu rimmèt nou Manman-l. Pran pasians, Jn 19, 27. N-ap mandé-l pou-l ba nou pasians li, pou nou rét an SILANS, pou nou tann li mét tout bagay aklè. Sonjé litani "PRAN PASIANS" sa-a pou tan lavan-an.

Tan lavan-an sé yon tan lespérans. Lè yon moun nan prizon, l-ap tann kilè y-ap vi-n délivré-l.

Sé nòm al Jan-Batis voyé pozé Jézu késion sa-a si sé li ki gin pou-l vini-an oubyin si sé yon lòt pou yo tann. Jézu réponn li antan l-ap ranvouayé-l sign Profèt Izayi té bay pou fè yo rékonèt Mési-a, jan premié léktu jodia-a raplé-a (Is, 35, 1-10), pou ankourajé sa-k dékontrolé, pou soutni min ki fatigé, pou ranfòsé jénou k-ap tranblé. Dévan mèsajé Jan-Batis yo, li fè yon pakèt mirak, pou yo kapab al di-l sa yo tandé ak sa yo ouè: avèg ouè, moun ki bouaté maché, moun maladi lalèp géri, moun soud tandé, moun mouri lévé, pòv yo résévoua Bòn Nouvèl la. Psòm-répons jodi-a di: Grammèt la lagé moun ki nan chinn yo, li ouvri jé avèg yo, li drésé sa-k dékourajé yo (Ps 146=145). Nan dézièm léktu jodi-a Sin Jak invité nou pran pasians, tankou moun k-ap fè jadin ka-p tann rékolt la. Li invité nou pou nou pa plinyin youn kont lòt, pou Bondié pa jijé nou (Jc 5, 7-10). Sé lè nou pa gin pasians nou plinyin kont lòt yo, si nou pran tan anvan nou palé, n-ap ba yo tan pou yo réglé sa y-ap fè-a. Trò présé pa fè jou louvri. Chyin gin kat pat, li pa kouri pa kat chémin.

Yon moun kapab kalkilé yon travay pou-l fè. Min li bézouin tan pou-l réalizé-l, sitou si-l pa gin mouyain anba min-l. Lot moun yo k-ap gadé sou pa déyò, yo kapab pèdi pasians, y-ap mandé sa l-ap tann toujou pou-l réalizé sa-l té desidé-a. Époutan li minm li blijé fè atansyon paské sé pa moso ròch ni bout boua l-al déplasé. Sé intéljans ak volonté moun l-ap touché. Li blijé respékté libété yo. Li pa kapab aji tankou moun k-ap donté choual. Sé pa konsa Jézu aji avèk nou. Li pran pasians ak nou. Nou minm tou nou doué pran pasians ak lòt yo. Gin moun ki t-a vlé réglé tout bagay yon sèl kou, tankou Sin Jak ak Sin Jan ki té vlé difé tonbé sot nan sièl la sou Samaritin yo ki pa-t vlé résévoua yo-a. Jézu té fè yo chanjé davi (Lc 9, 54). Sé pa lè ou détrui yon moun ou kapab fè-l chanjé santiman. Konduit Jézu riské fè nou pran désépsion. Li avèti nou davans, jan-l fè nan lévanjil jodi-a, lè-l di: "Sé chans pou moun ki pa bité akoz mouin" (Mt 11, 6).

Tan lavan-an sé tan léspérans. Lè ou-ap espéré ou rivé yon moman ou bouké. Sé tankou lè ou-ap maché nan nuit, rivé yon lè, domi nan jé-ou, fatig nan kò-ou, grangou nan vant ou, souaf nan gòj ou. Ou-ap maché, min tanzantan ou blijé fèmin jé-ou, domi ap volè-ou. Ou-ap mandé-ou kilè ou-ap rivé; ou-ap kalkilé koté ou apral pozé tèt ou-a, ou pap ko prêt ap lévé-l. Ou tèlman fè éfò ak jé-ou pou-ou ouè koté ou-ap pozé pié-ou, ou mandé kilè jou-a va lévé. Lè gro zétoual matin-an lévé, ou kòmansé pran pasians. Min fatig déjà fi-n anvayi tout kò-ou, sé lè sa-a ou santi rout la pi long, ou ouè rout la pi troub. Lè ou pa gin moun kap maché avèk ou, kon-ou jouinn yon ti koté sou bò rout la, ou lagé kò ou atè, pou-ou pran yon ti répo. Pètèt minm apré sa, kò-ou pi krazé, san-ou pi frèt, ou-ap trinnin nèt atò. Lavi sé yon pèlerinaj. Nou pa fè-l pou kont nou. Nou gin moun k-ap akonpagné nou, Jan

Profèt Izayi di nan premié lèktu lamès jodi-a (Is 35, 3-4): "Soutni min k-ap fébli yo, asiré jénou k-ap tranblé yo, di kè ki boulvèsé yo: pran kouraj, pa pè, min Bondié nou-an".

Profèt Izayi té ajouté tou nan paròl konsolasyon yo pou ankourajé pèp la, nan minm pasaj sa-a: "sé VANJANS la k-ap vini, sé Bondié k-ap vi-n sovè nou" (Is 35, 1). Sé poua pèp la t-ap tann yon Mési k-ap vi-n tiré vanjans sou lènmi yo. Sin Jan-Batis nan prizon. Li ouè tout bagay frèt. Li pa ouè lonbraj vanjans sa-a li t-ap préché lè-l té di rach la té anba pié boua-a pou-l koupé sa-k pa bay bon frui yo (Mt 3, 10). Li blijé voyé fè Jézu ésplikasyon. Jézu ap rédrésé konsépsion lansyin Téstaman-an té ginyin osijè Mési-a. Sé poua li di minm si Jan-Batis sé pi gran pami tout Profèt yo, pami tout moun nan lansyin Téstaman, malgré sa, pi piti nan péyi Roua sièl la pi gran pasé-l (Mt 11, 11). Lansyin Téstaman t-ap tann Mési vanjans. Nouvo Tétaman prézanté Mouton-an y-ap kondui nan labatoua-a (Jn 1, 36; Is 53, 7; Ex 12 1ss; Gn 22, 7). Mésaj lansyin Téstaman-an sé té yon préparasyon. Osijè Jan-Batis, Jézu di: "Min m-ap voyé mèsajé-m nan an-anvan-ou, pou-l paré chémin-an dévan-ou" (Mt 11, 10; Mal 3, 1; Ex 23, 20). Profèt Malachi té prézanté "Anj kontra-a" tankou difé nan fòj, tankou savon lésiv (Mal 3, 2), pou-l chita tankou bès fojron k-ap bat fè, ak lésiviè k-ap simin kout batoua sou toual (Mal 3, 3). Lékòl Profèt Izayi-a té anonsé Mési-a k-ap vi-n poté Bòn Nouvèl la bay pòv yo, k-ap pansé kè ki krazé, k-ap anonsé libérasion pou ésklav yo, ak délivrans pou prizonié yo, k-ap déklaré yon ané gras sot nan Grammèt la (Is 61, 2). Min li té kontinuyé tou antan-l té di-l l-ap déklaré yon jou VANJANS pou Bondié nou-an (Is 61, 2). Sèlman lè Jézu ap sité pasaj sa-a, nan sinagòg Nazarèt la, pou-l montré li sé Mési, li rété jous nan koté ki di "yon ané gras ki sot nan Grammèt la" (Is 61, 2), li pa al pi louin. Li fèmin liv la, li rinnèt li bay moun ki t-ap sèvi nan litiji-a. Épi li komansé bay ésplikasyon pou-l montré sé osijè-l yo t-ap palé davans nan pasaj sa-a. Jézu évité abòdé kèsion vanjans-la (Lc 4, 18-19).

Lè yo vi-n arété Jézu nan jadin Oliv yo, Sin Piè té pran épé-l pou-l défann li, Jézu fè-l rinnèt épé-a nan fouo-l (Mt 26, 51-54). Li té déjà di Sin Piè, sé pa sèt foua sèlman pou-l padonnin, sé souasandis foua sèt foua (Mt 8, 21-22).

Nou gin pou nou mandé lagras pasians pou nou padonnin, pou nou rénonse lidé tiré vanjans. Ralé minnin kasé. Kozé vanjans la, sé yon problèm ki pa gin solision. Sé tout tan l-ap fè pitit... Moun ki simin van, li rékolté tanpèt (Os 8,7; 10, 13; Job 4, 8; Pr 22, 8; Ga 6,7) Nou pa nan lansyin Téstaman ankò, sé nan nouvo Téstaman nou yé, avèk kòmandman nouvo-a ki ranmasé Laloua-a ak Profèt yo (Jn 13, 34; R 13, 10; Ga 5, 14).

Mésaj Noël la sé lapè (Lc 2, 14). Jézu gin pou-l rétonnin. N-ap préparé chémin pou dézièm foua l-ap vini-an. Sé chémin lapè-a. Nap mandé

Manman Mari pou-l ba nou pasians sa-a Papa nou Sin Jozèf té ginyin lè-l pa-t konprann sa-k t-ap passé osijè-l la, épi li pa-t vlé ranvouayé-l nan lari, pou répitasyon-l pa-t sal. Bondié défèt kòd la ki té makonin-an, antan-l éspliké-l sékrè-a (Mt 1, 18-25).

Afè moun sé sékrè. Gin konduit yon moun ginyin, li pa déklaré nésésèman pou ki rézon li pran konpòtman sa-a. Nou pa bézouin fouyé zo nan kalalou. Réspékté sékrè-l. Sin Jozèf té réspékté sékrè la Trè Sint Vièj Mari.

Jan-Batis, Jozèf, Mari sé toua pèsonaj sa yo k-ap akonpagné nou sou chémin lavan-an, sou chémin pasians la, sou chémin éspérans la, k-ap débouché sou lapè Noël la.

*

* *

TOUAZIÈM DIMANCH LAVAN B

Jan té vini pou-l sèvi limiè-a témouin, pou tout moun té kapab **KOUÈ** pa lintèmediè-l.

Tan lavan sa-a ap pozé nou kèsion sou lafoua nou yon fason spésial. Nan mitan nou gin yon moun ki kanpé, nou pa konnin-l. Minm jan Farizyin yo ap pozé Jan-Batis kèsion pou mandé-l sa-l yé-a, sé konsa tou Juif yo konn abitué pozé Jézu kèsion pou mandé-l sa-l yé. Jézu pa réponn ni nan diksionè ni nan gramè. Li invité gadé sa-l fè. Sé aksion-l yo ki rann li témougnaj. An jénéral, li komansé aji anvan-l palé. Sé lè-l fi-n pozé yon aksion, yo pa konprann sa-l fè-a, yo mandé-l pou ki rézon li fè-l, li bay ésplikasion. Lè yo kolé tout ésplikasion yo ansanm, épi yo réfléchi sou yo, yo vi-n sézi sans aksion li té pozé yo, ak sa li minm li yé.

Si-l séparé sink ti pin pou sink mil moun, sé paské li sé pin k-ap bay lavi-a. Si-l louvri jé avèg la ki té fèt tou konsa-a, sé paské li sé limiè lavi-a, k-ap kléré tout moun sou tè-a. Si-l chasé machann yo sòt nan kay sakré-a, sé paské li sé Tanp la li minm minm. Si-l lévé Laza sòt nan kavo-a, sé paské li sé Réziréksion-an ak lavi-a. Si-l fè sis ja dlo yo vi-n tounin divin, sé paské sé li minm ki Mésié marié-a. Si-l mandé madanm Samaritèn nan ti gout dlo bò pui-a, sé paské sé li minm ki dlo lavi-a. Si-l lavé pié Apot yo, sé paské sé li minm ki Sèvitè k-ap soufri-a, Mouton Bondié-a ki ouété péché sou tè-a. Si-l fè mésié ki pa-t kapab maché-a lévé, pran kabann li, al fè rout li grò jou saba-a, sé paské li gin minm pouvoua ak Papa-a sou saba-a, kòm Pitit li, antan l-ap kontinuyé fè kréasion-an ansanm avèk li. Si-l géri pitit sòlda Romin-an, antan-l rèt byin louin, sé paské li sé Paròl lavi-a. Si-l maché sou dlo yo épi li fè batiman-an rivé koté-l t-apralé-a anvan jé bat, sé paské li gin pou-l tounin koté-l soti-a san pié-l pa touché tè, li minm ki Chémin-an an minm tan ki Pòt la tou.

Lè Apot yo mandé-l koté-l rété, li di yo "Vini n-a ouè". Lè-l fi-n mandé Apot yo ki sa Juif yo pansé osijè-l, épi yo di-l minm sa yo té pansé osijè Jan-Batis la, Éli, youn nan Profèt yo, épi li mandé yo sa yo minm yo di osijè-l, Sin Piè réponn li, li sé Kris la; lè sa-a li louvri jé yo pi plis sou aksion-l ak lansègnman-l pou yo fè progrè pi plis sou konésans li, pou yo dékouvri li pi plis pasé Kris la yo t-ap tann nan, li sé Pitit Bondié li minm minm; sèlman li pa vi-n fè okinn éstravagans, li vini tankou pòv. Sé moun ki kolé kò yo sou li k-ap dékouvri sa-l yé tout bon vré sou pa anndan. Aksion li fè yo sèvi-l témouin, Jan-Batis sèvi-l témouin, Paròl labib yo sèvi-l témouin nan sa Profèt yo té déklaré osijè-l dépi nan lansyin Téstaman-an. Papa-l minm sèvi-l témouin. Léspri Sin-an sèvi-l témouin. Apot yo gin pou yo sèvi-l

témouin. Témouagnaj sa yo, sé pou fè **LAFOUA**-a pran nésans nan kè lèzòm. Sin Jan di Jézu té réalisé anpil sign, min li chouazi kèkzin sèlman li rapòté nan lévanjil li-a, pou moun yo kapab **KOUÈ**, pou yo kapab gin lavi.

Nan mitann nou gin yon moun nou pa konnin.

Tan lavan-an sé yon chémin. Sé yon tan pou nou fè éfò, pou nou fè progrè nan konésans Jézu. Nou pansé nou konnin-l, avèk konésans nou jouinn nan diksionè ak nan gramè..., avèk léson n-ap aprann, n-ap répété..., avèk sa lòt moun di... sé **ÉSPÉRIANS** Jézu pou nou fè, pou nou konnin-l. "Vini, n-a ouè... pou nou minm pèsoneleman, sa-m yé?" Sé lavi nou ki pou vi-n tounnin yon témouagnaj, minm jan ak lavi Sin Jan-Batis ki t-ap préparé chémin Granmèt la. Sé pou nou vi-n tounin tankou yon glas koté y-ap gadé pòtré Jézu. Sé pou fron nou kléré tankou figi Moyiz ki désann sòt sou mòn Sinayi-a apré rankont li avèk Bondié. Sé pou nou viv lavi Jézu-Kri tout bon vré anndan fon kè nou, pou nou kapab sèvi-l témouin dévan lèzòm. Sé pa nan paròl nou sèlman pou sèvi-l témouin, min nan tout lavi nou, yon lavi ki chita sou lafoua, yon lafoua k-ap kléré tankou flanbo.

La Trè Sint Vièj Mari té di li sé sèvant Granmèt la, li réglé lavi-l sou Paròl li. Élizabèt fè-l konpliman poutèt li kouè. Li minm li invité sèvan yo nan nòs Kana-a pou yo fè tou sa Jézu di yo. Sin Jan fini lévanjil li-a antan-l montré nou Jézu k-ap di Sin Toma sé chans pou moun ki kouè san yo pa ouè. Sé favè sa-a n-ap mandé la Trè Sint Vièj Mari "Notre Dame de la Lumière", pou lafoua nou sèvi limiè Jézu-a témouin, antan n-ap maché nan fènoua, kòmsi nou ouè sila-a yo pa kapab ouè-a (He 11,27).

*

* *

TOUAZIÈM DIMANCH LAVAN C

Dimanch sa-a, yo rélé-l dimanch "gaudete", sa vlé di dimanch "kè kontan", paské sé sa ki vi-n nan réfrin pou antré-a, Filipyin 4,4 "Sé pou nou toujou nan kè kontan, paské Granmèt la tou prè".

Sé minm invitasion sa-a ki tounin nan premié léktu-a avèk Sofoni 3,14. Pasaj sa-a, sé profèt lansyin Téstaman-an kap adrésé-l bay pèp Israèl la ki nan kè séré, nan lapinn, nan tristès paské l-ap passé tray, li pa kapab apuiyé sou pèsòn pou poté-l sékou. Nan tan profèt Sofoni t-ap bay mésaj kè kontan sa-a, roua Jérusalèm nan (Ézékiás 716-687) té fèk sot pèdi 41 vil, antan roua Asiri-a (Sénakérib) té anvayi péyi-a (2 Roua 18,13), pèp la té tonbé anba min Ansiryin yo ni nan késion politik, ni nan késion rélijion (2 Roua 21,1-26). Roua Asiri-a anvayi ata Éjip ak Babilòn. Li sèl mèt.

Pitit roua Ézékiás la, Manasé (687-642), fè péyi-a tonbé nan sèvis zidòl nèt, ni pitit Manasé-a tou (642-640). Sé youn nan paj istoua ringn Israèl la ki pi noua sou aspè rélijyé-a. A tèl pouin minm liv laloua-a vi-n pèdi, oubyin an tou ka yo séré-l nan débri yo ki nan kay sakré-a. Prèch Izayi té konn préché lontan-an, li sélé (Izayi 8,16).

Vè 640-630, Sofoni pran préché yon ti kras anvan Jérémi, pou rémonté pèp la, l-ap préparé aktivité roua Jozias, pitit Amon, apral déplouayé pou chanjé situasion pèp la ni sou aspè politik ni sou aspè rélijyé (640-609). Ni li, ni Jérémi, ni roua Jozias, y-ap travay pou fè pèp la rémonté kouran-an. Nan ané 622 apéprè, y-ap jouinn liv laloua-a nan kay sakré-a, sa ap sèvi lokazion pou fè mision ofisièl tout koté, ak liv laloua sa-a (Détéronòm nan) k-ap vi-n sèvi laloua pèp la minm dévan léta. An-atandan, Sofoni déjà ap anonsé Jou sa-a k-ap rivé-a. Malgré pèp la nan fè noua sé pou kè-l kontan, jou Granmèt la tou pré.

Pasaj n-ap li jodi-a nan premie léktu-a (Sofoni 3,14-18), sé pou yo mété-l nan ansanm li (3,12-20) ki montré kijan sé yon "rès" k-ap joui frui délivrans la. Ti "rès" sa-a, sé tankou sòlda Jédéon yo. Bondié pa-t vlé sovè pèp li avèk anpil moun. Li té di Jédéon konsa: Tout moun ki fèk marié oubyin sa-k nan problèm, voyé yo tounin. Épi, sa k-ap suiv ou yo, fè yo travèsè lariviè-a, dlo-a ap ba yo jous nan kou; sa k-ap bouè dlo tankou chyin yo, pandan y-ap travèsè riviè-a, san yo pa rété, antan y-ap lanbé dlo-a ak lang yo, ou-a fè yo al nan lagè avèk ou, lòt yo, sa-k koupi bò dlo-a pou bouè alèz yo, voyé yo al fè rout yo (Jij 7,4-8).

Sé konsa nan Sofoni, profèt la adrésé bòn nouvèl kè kontan-an pou ti "rès" la, sa-k vré pèp Bondié-a. "Yon ti kominoté ki pòv sou késion byin latè, min sitou ki lib pa rapò a tout fòm richès ki anndan kè, yon kominoté ki konnin Bondié-l prézan anndan-l, ki gin jé-l kléré ak lafoua, atèl pouin tout bagay sanblé sign laviktoua Bondié, sé pòtré sa-a Sofoni trasé osijé Israël avèk éspoua-l. Pòtré sa-a, sé sa légliz la konnin li gin pou-l réalizé. Sé pou sa sé paròl Sofoni-a yo jouinn ki té mérité chanté dévan-jou nouvo Téstaman-an: "Fè kè-ou kontan, pitit fi Sion!" (3,14)... "Fè kè-ou kontan, Mari!" (Luk 1,28)... (GELIN A. Introduction à la Bible II, 1973, 393).

Anpil moun ki ékri sou labib, minm sa ki pa katolik, blijé rékonèt kijan Sin Luk pran minm mo Sofoni yo (3,14) pou-l montré nou, lè Mésajé-a adrésé bòn nouvèl kè kontan-an bay Mari, sé Mari minm ki réprézanté ti "rès" pèp lansyin Téstaman sa-a (LYONNET, S.; LAURENTIN, R.; DEISS, L.; THURIAN, M.). Max Thurian montré ròl la Trè Sint Vièj Mari ginyin kòm réprézantan tout pèp lansyin Téstaman-an k-ap résévoua nouvèl kè kontan-an. Stanilas Lyonnet palé sou sa nan liv ki gin kòm tit: "Chairé kécharitoménè" (Biblica 1939, 131-141). René Laurentin dévlopé sa nan yon gro liv li-a ki gin kòm tit "Structure et théologie de Luc I-II". Lucien Deiss palé sou sa nan liv li-a ki gin kòm tit "Marie, fille de Sion". Max Thurian palé sou sa nan liv li-a "Marie, Mère du Sauveur, figure de l'Église", koté li sité ata LUTHER, CALVIN, ZWINGLI, OECOLAMPADE, protéstan yo.

Bondié ap sové pèp li-a, gras a yon "rès" ki fi-n pasé nan pasoua. Rès sa-a, sé vré pèp la, pèp pòv yo. Li ranmasé nan Mari. Lè Mésajé-a di-l: "Fè kè-ou kontan, ou minm ki plin gras, ... pa pè, Mari" (Luk 1,28.30).

Konparé pasaj Luk la avèk pa Sofoni-an

Sofoni 3

v. 14 Fè kè-ou kontan, pitit fi Siyon
v. 16 Pa pè, Siyon
v. 17 Granmèt la Bondié-ou la anndan vant ou

Luk 1

v.28 Fè kè-ou kontan ou minm ki plin gras
v. 30 Pa pè, Mari
v. 31 Min ou-ap ansint anndan vant-ou

Konsa sé Mari ki pitit fi Siyon yo t-ap palé nan lansyin Téstaman-an, dapré jan Sin Luk dispozé paròl Mésajé-a kòm sitasion Sofoni chapit 3. Annik li ranplasé Siyon-an avèk non Mari. Li ranplasé "pitit fi Siyon-an" avèk "ou minm ki plin favè", non nouvo sa-a Bondié bay Mari.

"Pitit fi Siyon"-an, sé yon mo ki vlé di yon moun k-ap vini, k-ap réalizé kalité Bondié té vlé pou pèp li-a. Nou jouinn mo sa-a 22 foua apéprè nan

lansyin Téstaman-an avèk Miché 1,13; 4,8.13; Zakari 2,10; 9,9; Izayi 1,8; 10,32; 16,1; 37,22; 52,2; 62,11; Jérémi 6,2.23; Lamantasion 1,6; 2,1.4.8.10.13.18; 4,22.

Li réalisé nan Mari.

Psòm répons lamès jodi-a ki soti nan Izayi 12, si nou konparé-l avèk kantik Mari-a nan Magnifikat la, n-ap jouinn anpil pouin ki sanblé tou.

Izayi 12

v. 2 Bondié délivrans mouin... sé li ki sovè-m
v. 3 ak kè kontan
v. 6 pousé rèl kè kontan
v. 4. Fè louanj Granmèt la
v. 4 rélé non-l... fè sonjé kijan non-l gran
v. 6... Sin Israèl la
v. 4 Anonsé pèp yo mèvèy li yo
v. 5... li fè mèvèy.

Luk 1,46,55

v. 47 Bondié ki sovè-m nan
v.47 lèspri-m dansé ak kè kontan
v. 46 Nanm mouin ap fè louanj Granmèt la
v. 49 Non-l sin
v. 49 Li fè mèvèy pou mouin

Plas Mari inpòtan nan tan lavan-an. Plis Noël ap proché, sé plis Mari ap parèt pi pré tankou dévan-jou anvan solèy lévé. Li pa voualé Jézu. Okontrè, li fonn niaj yo ki anpéché nou ouè Solèy la k-ap lévé-a, li gayé brouya frèt yo k-ap anpéché réyon solèy la vi-n chofé nou-an.

Konsa dimanch jodi-a, sé dimanch kè kontan (dimanch ‘ ‘gaudete’ ‘). Invitasion sa-a Sin Pòl té fè nou nan réfrin pou antré nan lamès jodi-a avèk Filipyin 4,4 la, Sofoni fè-l bay pitit fi Siyon-an nan Sofoni 3,14 (prémié léktu lamès jodi-a), Izayi fè-l bay minm popilasion Siyon sa-a nan Izayi 12 (Psòm répons lamès jodi-a). Sé li minm tou ki vi-n nan dézièm léktu lamès jodi-a avèk minm Filipyin 4,4 nou té gin nan réfrin pou antré-a. Sin Pòl répété-l dé foua. Li di: mouin répété nou sa: sé pou nou gin kè kontan. Pa kité anyin trakasé nou, lapriyé sèlman pou fè Bondié konnin sa nou bézouin, épi rété kè pòpòz tankou moun k-ap péché pouason, ki fi-n pozé nas la (Psòm 5,4). Sin Pòl invité nou gin kè pozé ak kè kontan. Kè kontan-an sé yon sign sou pa déyò k-ap montré nou gin kè pozé sou pa anndan, yon kè pozé yo pa kapab imajiné.

Sé pòv Bondié yo ki jouinn kè kontan sa-a ak kè pozé sa-a. Sé pou yo lèspri Granmèt la voyé poté bòn nouvèl délivrans la.

Lévanjil jodi-a jouinn yon bèl kòmantè nan paròl Sint-Ogustin yo ki déklaré kijan Jan-Batis sé voua-a ki étinn nan zòrèy nou pou-l kité Paròl la pran rasi-n nan kè nou. Sé ras pòv sa yo tankou Jan-Batis, Jozèf, Mari, ki mérité

maché tou pré Jézu nan tan lavan-an. Jan-Batis pa kite lògèy monté tèt li, lè yo koué li sé Mési-a, oubyin Éli, oubyin Profèt la. Li sé lamp la, sé pa li minm ki Solèy la. Li sé zanmi marié-a, li pa mésié marié-a. Li pa mérité défèt lasèt sapat li. Sé pou Jézu grandi, pou li minm li disparèt. Jézu kòmansé sèvis mision-l, lè yo fi-n arété Jan-Batis. Tout kalité klas moun vi-n dévan Jan-Batis, li jouinn yon mo pou yo chak, ni sinp moun yo (fè lacharité), ni kolékte (pa fè tranzaksion), ni sòlda (pa fè profitè).

Jan-Batis pa mandé yo bagay ki trò ro pou yo. Sé bagay ki sinp, pou yo sinsè nan métié yo. Nan tout kalité métié, ou gin doua jouinn Bondié, yon foua ou fè-l byin. Gin métié ki éspozé-ou pi plis pou-ou fè sa-k mal. Sé pou-ou pran plis prékosion.

Jan-Batis anonsé batèm Jézu-a nan léspri-Sin ak difé.

Intèvansion léspri Sin-an sé pou tout aksion inpòtan: Jénèz 1,2; Jij 3,10; 11,29; 1 Samuèl 11,6; Jénèz 41,38-40; Nonb 11,17.25; 27,18; Izayi 42,1; 11,1 Difé-a sé lè Bondié ap vi-n sové moun nan: Lévitik 1,7; 6,2.6; Jénèz 15,17; Égzòd 3,1; 13,21; Nonb 14,14; Izayi 6; Ézékièl 1,4; Joèl 3,3. Bondié vi-n nan difé tou pou-l jijé, sa vlé di pou-l réalizé sa-l té promèt pou moun li chouazi yo épi pou-l ouété mal sot nan mitan yo: Nonb 31,23; Malachi 3,3.19.

Layo-a nan min-l pou-l pròpté, pou-l fè séparasion blé ak pay, sé tankou yon jijman: Izayi 29,5-6; 41,16; Jérèmi 15,7. Antan y-ap layé blé-a, yo voyé anlè, van broté pay la (Psòm 1,4), blé a rété nan layo-a. Yo boulé pay la nan difé ki pap janm étinn, Izayi 66,24 (dènié vèsè liv Izayi-a), Mak 9,43.

Prèch Jan-Batis byin sinp. Paròl li dirèk. Sé yon misionè. Li pap pèdi tan ap fè bèl fraz. Tan-an kout. Granmèt la tou pré. Li prèské ap frapé pòt la. Sa-l gin pou-l di-a, fò-l di-l vit, san ménajman, paròl li filé tankou yon kouto (Izayi 49,2, Prèmié léktu mès Sin Jan-Batis la, 24 juin).

Sa fè dé dimanch dépi y-ap palé sou Jan-Batis (dézièm dimanch lavan-an ak touazièm dimanch la). Nan katriyèm la, sé sou la Trè Sint Vièj Mari y-ap palé, nan mision 1-al fè kay Élizabèt la (Luk 1,39-45). Y-ap palé sou Jan-Batis ankò démin si Dié vlé, nan lanmès lindi 3èm sémèn lavan-an (Matié 21,23.27), ni madi 3èm sémèn lavan (Matié 21,28-32), ni mèkrédi 3èm sémèn lavan (Luk 7,18-23) ni jédi 3èm sémèn lavan (Luk 7,24-30), ni vandrédi 3èm sémèn lavan (Jan 5,33-36). Konsa sé tout sémèn nan y-ap palé sou Jan-Batis dépi lindi jous vandrédi (apati 17 désanb sé yon lòt séri mès pou 8 jou ki vi-n anvan Noèl la). Déjà sémèn pasé, 2èm sémèn lavan, yo té palé sou Jan-Batis nan jédi 2èm sémèn lavan (Matié 11,11-15), vandrédi

2èm sémèn lavan (Matié 11,16-19) ak samdi 2èm sémèn lavan (Matié 17,10-13). Jan-Batis = nouvo Éli.

Lè Jan-Batis nan prizon-an l-ap voyé mandé Jézu si sé li minm k-ap vini-an oubyin si sé yon lòt pou yo tann.

Pètèt Jézu pa-t déplouayé tout fòs yo t-ap tann nan nan lansyin Téstaman-an. Li vi-n tankou yon Mési tou dou. Sé pa konsa yo t-ap tann li. Prèch Jan-Batis la montré sa. Layo-a, rach la (Matié 3,10), difé-a. Jézu minm parèt an chat pint. Jan-Batis voyé fè-l éplikasion. Li voyé réponn li an parabòl, avèk ouè, moun bouaté maché, moun maladi lalèp géri, moun soud tandé, pòv yo jouinn bòn nouvèl la (Izayi 35; réfrin pou kominion nan lanmès jodi-a = Matié 11,5). Jézu ajouté: Sé chans pou moun ki pa jinnin o sijè konduit li. Jan-Batis réfléchi sou paròl sa yo. Sé yon éplikasion ki poté limiè nan fènoua prizon-l nan. Sé Jézu ki sèl klé éplikasion labib. Minm Jan-Batis sé nan pa-pòt la li kanpé. Li minm minm li di sa (Jan 3,29). Li minm tou li gin pou-l kouté voua Jézu, pou-l pran léson nan min-l. Li rékonèt minm si nan lansyin Téstaman-an sé li ki pi gran, nan Nouvo Téstaman sé li ki pi piti (Matié 11,11). Li té gin okazion pou-l dékourajé tankou Jérémi (Jérémi 15,10), oubyin Éli (1 Roua 19,4) oubyin Jonas (Jonas 4,1-11) oubyin Sèvitè Granmèt la (Izayi 49,4) oubyin tout Profèt yo nan moman lavi yo, lè yo pa ouè sa y-ap défann ankò. Sin Jan-d-la-koua di konsa: Bondié ap kléré chémin nou avèk yon réyon fènoua, sé pa avèk réyon limiè. Lafoua-a fè noua, malgré sa, li gin asirans. Jan-Batis t-ap viv nan lafoua tankou tout moun, minm si-l té profèt, li pa-t ouè klè, minm si-l t-ap kité léspri-a kondui-l. Yon moman, li voyé mandé limiè. Jézu voyé asirans ba li. Sé sa sèlman li té bézouin. Li pa mandé plis. Li rantré nan silans li. Jézu li minm té di: Bondié mouin pouki sa ou lagé-m? Sé yon Psòm li t-ap sité, sé vré (Psòm 22,2 = Matié 27,46), min sa montré nan ki éta nanm li té yé. Li minm minm li di nanm li troublé, li mandé Papa-a pou-l ouèté "lè" sa-a louin-l (Jan 12,27), pou-l ouèté kalis la louin (Luk 22,42; Matié 26,38.39; Mak 14,33-34). Min li soumèt li anba volonté Papa-a.

Sé konsa sin Pòl di kè-l kontan nan mitan tout tray li (2 Korintyin 7,4; 12,10; Kolosyin 1,24). Sé pou sa tou li invité nou jodi-a pou nou gin kè kontan.

- Kè kontan:	N-ap réglé paj.	250
- Pa pè, Mari		568
- Pran kouraj		120

Dimanch jodi-a, yo rélé-l dimanch "gaudete", sa vlé di "fè kè-ou kontan". Sé mèsaj sa-a minm lakanj Gabriyèl té adrésé la Trè Sint Vièj Mari nan Lc 1,28: "Fè kè-ou kontan, ou minm ki plin gras". Sé mèsaj sa-a profèt yo dépi lontan t-ap adrésé pèp Bondié-a, pou di-l Granmèt la ap vini nan li, pou-l sovè-l.

Sèlman kontantman sa-a pa-t ko kapab fi-n plin nèt, paské Granmèt la pa-t ko fi-n vini nèt, épi paské pèp la pa-t ko fi-n pròpté nèt pou-l résévoua Granmèt la, nan mitan-l.

Réyèlman vré sé yon sèl lapinn nou kapab ginyin, sé lè prezans Granmèt la pa fi-n nan nou nèt pou-l anvayi dèniè ti kouin fè noua anndan fon kè nou, pou-l mété limiè-l.

Yon sèl malè ki kapab fè nou chagrin, sé péché-a.

Nan kè la Trè Sint Vièj, pa gin péché sé poua gin kè kontan an plin.

Sin Pòl di nou pou nou pa kité anyin dékontrolé nou, sé pou nou gin kè kontan ak kè pozé, antan n-ap prezanté Bondié lapriyé nou, avèk konfians.

Yon moun ki asiré nan Bondié, li pa pran tèt chajé pou anyin, van mèt ap souflé, tanpèt ménasé, Jézu ap dòmi nan kannòt la, min sé li minm ki nan plas gouvènay la, sé li minm k-ap kondui bato-a, li pa échoué sou résif.

Tan lavan-an, sé pa yon tan pénitans ki pou fè nou pran chagrin, sé pa tankou tan karèm nan k-ap fè nou sonjé lanmò Jézu, tan lavan sé nésans Jézu l-ap tann, sé yon lakòz pou kè nou kontan. Sé pa rézon sètènman pou fè banbòch jan moun yo ap préparé pou Noël la, min kè nou doué kontan sou pa anndan ansanm avèk la Trè Sint Vièj Mari, ki résévoua bèl favè sa-a pou-l vi-n Manman Bondié.

*

Sin Luk insisté sou répons **pèsonèl** moun yo gin pou bay mèsaj lévanjil la. Sé poua li montré kijan divès katégori moun vi-n prezanté dévan Sin Jan-Batis. Épi yo chak gin yon répons spésial sou késion yo mandé-l: "ki sa pou nou fè"? Sé tou dabò gro mas foul la k-ap pozé-l késion sou konduit pou-l adopté (Lc 3,10). Li mandé yo patajé sa yo ginyin antré yo (Lc 3,11), ni rad, ni manjé. Aprè sa sé koléktè yo, moun k-ap travay pou Romin yo, pou lèvé inpo sou pèp Bondié-a, yo minm laloua ap konsidéré kòm péchè piblik yo, épi ki vi-n mandé batèm ak konsign ki adapté pou yo parapò a travay y-ap fè-a (Lc 3,12). Li di yo pou yo pa fè égzaksion, pou yo pa fè moun yo péyé plis pasé sa kontribision-an égzijé-a (Lc 3,13). Anfin sé sòlda yo ki vi-n mandé nan ki lign pou yo maché (Lc 3,14). Li di yo pou yo pa maltré

pèsòn, pou yo pa dénonse moun, pou yo kontanté yo ak lajan léta péyé yo-a (Lc 3,14). Chak katégori moun jouinn mèsaj pa-l apa. Sa pèmèt chak moun bay yon répons pèsònèl. Sin Luk kite nou sipozé kijan Sin Jan-Batis t-ap déléyé mèsaj la pou-l touché kè pèp la, pou-l fè sansibilité moun yo frissonn (Lc 3,18). Minm prèch la touché tout moun k-ap kouté-l. Min chak moun résévoua-l yon fason diféran, dapré préokipasyon pa-l, dapré difikilté li rankontré sou rout li. Foul yo jouinn mèsaj **lacharité** (Lc 3,11). Koléktè yo jouinn mèsaj **lajistis** (Lc 3,13). Sòlda yo jouinn mèsaj **lapè** (Lc 3,14).

Jézu vini pou tout moun, pou tout katégori moun. Li vlé pou tout moun sové, pou yo rivé nan konésans lavérité-a (1 Tm 2,4). Sé pa yon sèl pèsion ki gin doua kouté mèsaj lévanjil la, épi résévoua konsign ki adapté pou li. Sé tout moun, sé chak moun. Sé dévoua misionè-a sa. Li bliyé tout tan ap fè atansyon pou-l ouè si pa gin yon bò k-ap rédi-l, ki fè-l bliyé yon lòt pati. Sin Luk insisté anpil sou karaktè sa-a légliz la ginyin **li la pou tout moun**, jan nou konn di nan "Mouin koué gin yon sèl Bondié-a". Nan sans sa-a, légliz la **misionè**. Tout tan nou bliyé ap mandé nou èské nou pa pèdi sans mision nan légliz la? Lè Jézu fi-n chouazi Douz Apòt yo, li voyé yo an mision (Mt 10,5; Mc 6,7-13). Nan yon prémié tan, sé kòt Juif yo sèlman li té mandé yo pou y-alé. Moun ki réfizé kouté yo, yo souké pousiè soulié yo dévan yo. Épi y-al préché dèt koté. Sé konsa lè Jézu voyé Apot yo anvan-l monté nan sièl la, li trasé rout yo, antan-l mandé yo pou yo kòmansé sèvi-l témouin nan Jérusalèm avèk lajudé ak lasamari, après sa jous nan bout tè-a (Ac 1,8). Nikodèm ap vi-n chèché mèsaj nan min-l kòm réprézantan moun Jérusalèm (Jn 3,1-21). Apré sa nan lajudé Jézu ap fè mision, lè Sin Jan-Batis ap rann li témouagnaj la (Jn 3,22-36). Apré sa sé réjion Samari-a k-ap jouinn pèsion vérité pa-l nan konvèsasyon Jézu avèk madanm Samari-a sou bò pui-a (Jn 4,1-42). Anfin sé kapitèn Romin-an ki réprézanté moun ki soti nan bout tè-a, k-ap résévoua mèsaj pa-l (Jn 4,43-54). Tou sa sé kandida lafoua ki soti nan diféran réjion, ki gin préokipasyon spésial, k-ap tann répons pèsònèl nan kèsion ki intéresé yo épi ki gin pou bay répons pèsònèl pa yo tou.

Léspri-Sin té mandé pou mété Pòl ak Banabé apa pou mision li té rézèvé pou yo-a (Ac 13,3ss). Sin Pòl ap toujou kòmansé préché Juif yo. Apré sa l-ap viré nan diréksyon payin yo, lè-l jouinn bariè kot moun pròp ras pa-l. Li vi-n lakay li. Moun lakay li pa résévoua-l (Jn 1,11). Échèk nou kapab jouinn nan travay misionè nou, sé lokasyon pou-n al pi louin. Sé yon fason pou nou pa rété chita minm koté-a, pou-n al gayé bòn nouvèl lévanjil la tout koté. Paròl Bondié-a pap tounin koté-l vid, san rézilta, san-l pa réyisi mision-l (Is 55,11).

N-ap mandé Manman Mari pou-l ba nou fòs pou nou gin kouraj sèvi Jézu témouin tou patou, dévan tout katégori moun, antan nou konnin sé pa nou minm k-ap palé min sé léspri Sin-an k-ap palé nan kè nou (Mt 10,20; Mc 13,11; Lc 12,12; Jn 14,26; 15,26).

*

mission: 9 fous nan lansyin Téstaman, 7 fous nan Nouvo Téstaman.

Jos 14,11; 1 Sm 21,3; Jdt 3,8; Est 4,5; 1 Mc 7,26; Is 55,11; Jer 39,13; 40,14; Ag 1,12; Mt 10,5; Mc 6,7; Ac 13,3.4; 26,12; Ap 5,6; 11,6.

préché: 4 fous nan lansyin Téstaman, 40 fous nan Nouvo Téstaman.

Dt 13,6; Jer 28,16; 29,32; Jon 3,4; Mt 3,1; 4,17; 11,1; Mc 1,38.39; 3,14; 6,12; 16,20; 4,44; 8,1; Ac 9,20.27.28; 11,19; 16,21; 20,20; 21,28; 26,20; R 1,5; 2,21; 10,8.15; 16,25; 1 Co 15,11.12; 2 Co 1,19; 4,5; 11,4a.b; Gal 1,8; 2,2; 5,11; Ph 1,15; Col 1,23; 1Th 2,2.4.16; 1 p. 1,12; 3,19.

prédikasion: 10 fous nan Nouvo Téstaman

Ac 14,3; R 10,10.17a.b; Gal 3,2.5; Ep 4,21; Col 4,3; 1 Tm 4,15; He 2,5.

prédicatè: 3 fous nan Nouvo Téstaman.

Ac 15,21; R 10,14; 2 Tm 4,5.

Evanjil: 80 fous nan Nouvo Téstaman.

Mt 26,13; Mc 1,1.14.15; 8,35; 10,29; 13,10; 14,9; 16,15; Ac 20,24; R 1,1.9.15.16; 2,16; 11,28; 15,16.10; 16,25; 1 Co 1,17; 4,15; 9,12.14a.b.16a.b.18a.b.c.23; 15,1; 2 Co 2,12; 4,3.4; 8,18; 9,13; 10,14.16; 11,4.7; Ga 1,6.7.6.9.11; 2,2.5.6.14; Ep 1,13; 3,6.7; 6,15.19; Ph 1,5.7.12.16.27.a.b; 2,22; 4,3.15; Col 1,5.23; 1Th 1,9; 2,2.4.8.9; 3,2; 2 Th 1,8; 2, 14; 1 Tm 1,11; 2 Tm 1, 11; 2 Tm 1, 8.10; 2,8; 4,5; Phm 13; 1 p. 1, 12.

*

* *

KATRIYÈM DIMANCH LAVAN A

Lévanjil la di: "Jozèf PITIT DAVID, pa pè résévoua Mari, madanm ou-an; sèké sa-k fèt nan li-a, sé nan Éspri Sin-an li soti". Sé konsa Sin Pòl insisté nan dézièm lèktu-a, nan lèt li ékri Romin yo, antan l-ap palé osijè Jézu, Pitit Bondié-a ki vi-n fèt sot nan RAS DAVID la dapré chè-a. Kanta Izayi minm, nan premié lèktu-a, li fè roua Akaz repròch, antan-l di: "Kouté, KAY DAVID, éské sa pa kont pou n-ap fatigé lèzòm, pou nou rivé fatigé ata Bondié li minm?" Pitit David, ras David, kay David. Sé yon Mési ki pitit David, ki sot nan ras David, ki nan kay David, sé li minm pèp Bondié-a t-ap tann vi-n sovè-l. Sé poua Anj yo di gadyin mouton yo: "Jodi-a yon Sovè fèt pou nou, sé Kris Granmèt la nan VIL DAVID la" (Lc 2, 11).

Roua Joziás t-ap éseyé sovè pèp la, antan-l réprann tout péyi David la nan min pèp Asiryin yo. Sèlman sé pa nan sans sa-a Bondié té vlé sovè pèp li-a, jan Profèt Jérèmi fè konstaté-a. Ringn li anndan fon kè nou. Lè Jézu ap antré Jérèko, avèg yo té di: "Jézu, Pitit David, pitié pou nou". Lè-l ap antré Jérusalèm ti moun yo té pran rélé byin fò: "Ozana, Pitit David la. Konpliman pou sila-a k-ap vini o non Granmèt la". Jous lè l-ap monté nan sièl, Apot yo ap mandé-l si sé nan tan sa-a l-ap vi-n réfè ringn Israël la. Apré Jézu té fi-n bay 5 000 moun yo manjé nan savann nan, yo t-ap chèché-l pou yo fè-l roua. Li sovè kò-l pou kont li nan mòn nan.

Jézu Roua, sé vré. Min li vlé montré nou sé pa paské li soti nan ras David la l-ap sovè nou. Minm jan Sin Jan-Batis té fè Juif yo konprann sé pa paské yo sot nan ras Abraam nan y-ap sovè pou sa. Jézu di yo anpil moun ap vi-n sot nan diréksion solèy lévé (tankou roua Maj yo) ak nan diréksion solèy kouché (tankou santurion-an), y-ap chita atab avèk Abraam, Izaak ak Jakob, pandan Juif yo minm ap rét déyò. Vré pèp Bondié-a, sé yon "ti rès", sa vlé di group moun yo ki fi-n propté sot nan prétansyon yo ginyin ki fè yo pa konté tit ak non. Ti rès sa-a sé pov Bondié yo. Yo sot nan tout ras, nan tout lang, nan tout nasion. Yo fè yon sèl kò-d fanmiy. Yo pa ni Juif, ni Grèk, ni ésklav, ni moun lib. Yo sé pitit Bondié. Sila-a K-ap sovè yo-a, sé pitit David la, sé vré, min antan li rénonse apuiyé sou tit li, sou non li, antan li aksépté vi-n tounin ésklav, joutan li mouri sou Koua-a. Sé lè-l sou fotèy tribinal Pilat la li deklaré li sé Roua. Anlè Koua-a yo ékri li sé roua Juif yo nan tou lè toua lang yo té konn palé nan péyi-a, latin, ébré, grèk. Sé lè-l sou Koua-a tankou yon ésklav, li rasanblé tout pèp yo vi-n jouinn li, li roua sou yo tout, li fè yo tout fè yon sèl pèp, antan l-ap krazé tout bariè rayisans.

Noèl sé fèt lapè. Lapè sa-a Profèt Izayi té anonse pou péyi roua David la (Is 9, 5-6; 11, 6-9). Lè-l té di yon ti pitit fèt pou nou, yon ti gason yo ba nou, yo

rélé-l pitit roua kè pozé... tout péyi-a nan kè pozé jous nan bout frontiè yo. Min avèk Jézu sé pa péyi roua David la sèlman ki nan kè pozé, sé tout nasion, ak tout pèp, ak tout ras, ak tout lang. Nasion yo ap fonn épé pou yo fè sèpèt, y-ap fonn bayonèt pou yo fè pikoua (Is 2, 4). Lapè sa-a gin konsékans jous sou lavi bèt yo ak plant yo. Ti bébé ap lonjé min sou trou koulèv méchan, lou ap abité avèk mouton (Is 11, 6-8) Sézon pap bay traka ankò (Gn 8, 11). Pijon-an poté ramo oliv la tou fré nan bèk li. Min Jérusalèm pa-t rékonèt tan yo té vi-n vizité-l la pou yo poté mèsaj lapè-a ba li-a Li kité chans li-a pasé (Lc 19, 42).

Nan nuit Noël la, Anj yo pran chanté: "Viv Bondié nan sièl la sou tè-a kè pozé pou moun li rinmin yo" (Lc 2, 14). Noël invité nou voyé jé nou lòt bò frontiè péyi nou, pou nou pa konsidéré lòt nasion tankou lènmi, tankou pèp k-ap fè nou konkirans. Bondié nou pran nésans nan yon péyi, nan yon pèp, nan yon ras. Sé nan sikonstans sa yo n-ap chèche viv lavi batèm nou, sé vré. Min pa bliyé légliz Bondié-a pa gin fontie, li pa gin koulè, li pa gin limit. Nou tout sé frè. Lè nou parèt dévan Bondié, sé sou lacharité l-ap jijé nou. Li pap mandé nou si nou té Ayisyin, si nou té Afrikin, si nou té Éspagnòl. L-ap mandé nou si nou té viv kòm Krétyin an Ayiti, an Afrik, an Éspagn.

N-ap mandé Manman Mari, "Reine de la Paix", favè sa-a pou nou pa gadé lòt pèp yo kòm lènmi, pou nou konsidéré tout moun kom frè, pou nou sonjé rékòmandasion Sin Pòl ak Sin Jak nan lign liv Détéronom nan, pou nou gin atansyon spésial pou étranjé yo. Bétlèm pa-t louvri pòt li bay Jézu, Mari, Jozèf, paské yo té étranjé. Li pèdi chans li. Granmèt la rivé lakay li, moun lakay li pa résévoua-l. Limiè-a kléré nan fènoua, fènoua pa rivé résévoua-l. Sin Pòl di nou nou pa étranjé ak moun vini ankò, min nou sé situayin sièl la ansanm ak tout Sin yo. Pap Jan Pòl II té insisté anpil sou la "Communion des Saints", pandan ané Jibilé Rédanmsion-an. Légliz la "catholique" sa vlé di li gayé sou tout fas tè-a. An minm tan tou, li fè yon sèl kò-d fanmiy ak tout Sin yo ki nan sièl la ak tout nanm yo k-ap soufri nan Pigatoua-a.

Yon sèl Granmèt, yon sèl lafoua-a, yon sèl batèm nan, yon sèl Bondié ak Papa-a. Yon sèl Kò-a, yon sèl éspri-a, yon sèl éspérans-la. Sé poua antan nou fè kò nou tou piti, antan nou pozé san nou, pou nou gin bon jan, pou nou tou dou, antan nou pran pasians, sé pou nou chèche fè yon sèl nan Éspri-a, gras a kòd kè pozé-a (Ep 4, 2-6). Tout ti difikilté nou kapab ginyin ki fè youn jinnin ak lòt, youn ap palé lòt mal, youn ap chèche tiré vanjans sou lòt, sé pou nou dépozé sa tou dousman, san brui, san kont, nan pié Krèch la. Sé Jézu, roua lapè, k-ap kalmé ti kont nou ginyin antré nou. Pa kité sa travèsè lari, pa kité sa fè pil, pa kité sa vi-n tounin yon boukan difé. Bliyé sa. Nou pa bézouin ap fè prosè pou yon ti krik, yon ti krak. Sé kòm si nou di Jézu sé pou granmési li té vi-n nan nuit Noël la pot mèsaj kè pozé-a pou

nou-an. Li sé Kè pozé nou ak Rékonsiliation nou. Sé pa mèsaj la sèlman li pot ba nou, sé li minm minm ki kè pozé nou. Nan mézi nou viv ansam ak li, li fè youn avèk nou tout bon vré, nan mézi sa-a n-ap kapab padonnin tou sa yo fè nou, san nou pa rét ap kinbé pèsòn moun nan kè nou. Si nou kinbé moun nan kè nou, kè nou anbarasé, pap gin plas pou Jézu antré. Débarasé kè nou, ranjé krèch la pou Jézu vini.

Noèl la tou pré. Tout moun ki gin kont dépi lontan, ki réfizé adrésé lòt la paròl, sé pou nou RÉKONSILIE. Rékonsiliation-an sipozé éfo pénitans la pou résévoua délivrans-la Jézu vi-n anonsé-a. Antan n-ap sonjé davans gran Jibilé ané 2 000 la, n-ap fè èfò pou nou lagé tout moun nou té kimbé ésklav nan kè nou, paské nan ané Jibilé, yo té konn abitué lagé tout ésklav nan lansyin Téstaman. Jézu lagé chinn nan ki té mare nou-an. Nou minm tou sé pou nou fè minm jan, pou nou pa jouinn repròch sèvitè sa-a ki té doué mèl li 10 000 goud la. Mèt la fè-l kado-l. Min li minm li rankontré ak yon lòt ki té doué 100 goud, li mété-l nan prizon (Mt 18, 23-25). Bondié padonnin nou, nou minm tou sé pou nou padonnin.

Sé pou nou débléyé kè nou, nètouayé fon nanm nou, dékrasé-l ak tout mové rayisans kaché, ki t-ap nouazi dépi lontan, débloké tout séri, grésé tout jouinti, pou pòt kè nou kapab louvri byin laj, tou lé dé batan, pou Jézu antré, ansanm ak prochin nou ki té rét ap tann déyò-a, ap frapé dépi konbyin tan, pou nou fè-l lacharité rékonsiliation-an (Ap 3, 20).

Rékonsiliation sipozé éfò pénitans. Pòt ki té fèmin dépi lontan, louvri pou Roua-a ki plin pouvoua-a (cf Ps 24, 7). "Aperite portas Domini". Louvri tout pot kè nou pou Jézu antré, louvri tout plat min nou pou nou patajé. Sé pou nou fè yon ti éfo pénitans kòm chémin rékonsiliation.

*

Jozèf réalizé mariaj jistis ak charité. Li sé yon moun ki kòrèk, ki respékté jistis, min an minm tan li pa vlé dénonse Mari nan lari, li ménajé charité (Mt 1, 19). Mariaj jistis ak charité bay ékilib, paské youn konplété lòt. Sé travay léspri Sin-an.

Gin bagay ki pa sanblé yo alé ansanm. Époutan sé tankou yon dévoua nou ginyin pou nou fè yo kan ninm. Mari té pran angajman pou-l rété vièj. Bondié mandé-l pou-l aksépté vi-n manman; li pa ouè kijan dé bagay sa yo kapab alé ansanm. Sé travay léspri Sin-an (Lc 1, 28-38). Abraam té fi-n vié, li té gin katrévindizan (Gn 17, 1.24). Madanm li Sara, té vié tou, épi li pa-t janm kapab fè pitit, li jouinn favè anfanté Izaak, malgré li té déjà gin katrévindiznèvan (Gn 17, 17; 18, 9-15; 21, 1-7). Rivé yon lè Bondié mandé Abraam pou-l sakrifé Izaak (Gn 22). Abraam pa ouè kijan promès Bondié té fè-l la t-ap réalizé, pou-l vi-n papa yon pakèt nasion, pandan-l gin pou

sakrifyé sèl pitit li fè nan viyéès li-a (Cn 17,4). Li bay lafoua-l. Bondié pa kite-l touyé ti pitit la. Liv lasajès di léspri Sin kinbé tout bagay ansam (Sg 1, 7).

Nan lavi nanm nou, gin kalité yo rélé: "vertus morales-cardinales". Sé tankou kat gon pot: "prudence, justice, force, tempérance". Pridans la frinnin jistis la pou-l méziré intèvansion-l. Tanpérans la frinnin fòs la pou-l pa krazé-brizé. Kat kalité sa yo, nou bézouin yo sitou nan aksion nou. Konsa aksion nou gin ékilib. Nou gin dòt kalité tou yo rélé: "vertus théologiques". Sé "foi, éspérance, charité". Yo konsèné rélasyon nou ak Bondié dé fason dirèk. Yo fè ékilib ak kat lòt yo, ki sèvi yo kom mouayin. Sèt kado Éspri Sin yo réalizé ékilib sa-a, antan don intélijans la alé ak lafoua-a, don sians la alé ak léspérans la, don sajàs la alé ak charité-a, pou "contemplation"-an; épi don konsèy la alé ak pridans la, don piété-a alé ak jistis la, don fòs la alé ak fòs la, don krint la alé ak tanpérans la, pou "action"-an.

Tout ékilib sé travay léspri Sin. Sé pou rézon sa-a nou pa doué pè angajé nou nan chémin koté Bondié mété nou, minm si nou pa ouè ni dévan, ni dèyè. Jozèf angajé. Mari angajé. Lespri Sin kondui yo.

Nan kominoté nou, nou kapab rankontré karaktè ki pa sanblé yo alé ansanm. Sé pa yon rézon pou nou réfizé travay nan minm chantié-a. Youn konplété lot. Sé tout kominoté-a ki réprézanté kò-a. Sin Pòl pa-t gin minm tanpéraman ak Sin Luk. Min youn té konplété lòt nan mision-an, atèl pouin nan dènié lèt Sin Pòl ékri antan-l nan prizon a-Ròm, li di sé Luk sèl ki avèk li, tout lòt yo pati kité-l (2 Tm 4, 11). Nan prémié mision Sin Pòl la, Sin Mak té abandoné-l. Pòl pa-t vlé travay avèk li ankò. Min lè Sin Pòl a-Ròm, li mandé Timoté pou-l vini avèk Mak, paské li té di Mak nésèsè anpil pou li pou mission-an (2 Tm 4, 11; cf Ac 15, 37-40; 13,13). Dapré tandans nou, karaktè nou, fòmasyon nou, nou kapab orienté pi plis nan diréksion tèl group moun. Yon lòt kapab santi panchan pou-l okipé tèl lòt group. Min sé minm léspri Sin-an k-ap travay. Sin Pòl di kò-a gin anpil manb, yo chak pa gin minm ròl (R 12, 4). Konsa nan Kò Jézu-Kri-a nou chak nou tankou yon manb pou lòt yo (ib). Ginyin k-ap prévoua sa-k gin pou-l rivé, ginyin k-ap sèvi, ginyin k-ap bay lansègnman, ginyin k-ap ankourajé (ib; cf 1 Co 12, 12ss; Ep 4, 7ss). Yon sèl douèt pa konn manjé kalalou. Gin moun ki vlé fè tout bagay pou kont yo, komsa minm moun nan alafoua chofè, mékanisyin, propriété, kontrolè, pasajé. Lè y-ap fè yon machin-n nan yon izi-n, chak piès gin tèl kalité group travayé ki abitué fè-l. Sé yo tout ansanm ki réyisi fè machi-n nan. Pèsòn pa kapab di sé li pou kont kò-l ki fè machi-n nan. Boulanjé bézouin kòdonié, ni youn ni lòt bézouin kouafè, yo tout bézouin doktè, tout sa yo bézouin tayè, tout bézouin kòdonié. Nou blijé réfléchi sou fason youn konplété lòt pou nou konprann kijan Bondié fè fanmiy,

kominoté, sosiété, légliz, pou nou fè yon sèl malgré nou gin diférans youn ak lòt. Yon vré lapè pa chita nésèsèman sou baz minm tanpéraman, minm préokipasyon, minm fòmasyon. Si tout moun chita sou minm bò kannòt la, l-ap chaviré. Sé pou nou aksépté diférans nou. Lè pié goch la lévé, pié douat la pozé. Sé konsa nou kapab maché. Si nou lévé tou dé ansanm, n-ap tonbé. Sé pa paské chak moun ouè réalité-a yon fason diféran ki fè nou ènmi pou sa. Matié té koléktè kontribisyon, li t-ap travay pou Romin yo. Simon "le zéloté" té gin panchan pou bann k-ap batay an kachèt kont Romin yo. Sa pa anpéché ni youn ni lòt travay nan minm ékip Douz Apot yo kòm patizan Jézu-Kri.

Lapè sé yon valè ki pa gin frontiè. Ni frontiè ras, ni frontiè tanpéraman, ni frontiè préokipasyon, ni frontiè fòmasyon. Sé nan lafoua pou nou abòde-l. Tan Mési-a sé yon tan koté sa-k kontrè yo gin pou rékonsilié: charité avèk vérité, jistis avèk lapè (Ps 85, 11), lou ak mouton, tig ak kabrit, bèf ak lion (Is 11, 8). Moyiz sou mòn, l-ap lapriyé, Jozué nan laplinn, l-ap batay. Sé yo tou lé dé ki protéjé pèp la (Ex 17, 8-16). Mat ap travay, Mari ap kouté Jézu. Sé kòm fanmiy yo jouinn ékilib (Lc 10, 36-42).

Mari fèt nan vant san mak péché; Jozèf sot nan ras David. Pitit Bondié-a, Pitit David la, sé nan fanmiy sa-a li parèt sou tè-a.

N-ap mandé Manman Mari pou nou pa ézité fè kominoté avèk moun nou pa fi-n konprann. Sa-k anndan kè yanm sé kouto ki konnin-l. Sa-k anndan kè moun, sé Bondié ki konnin-l. Ékilib la, sé o-nivo léspri Sin-an l-ap fèt.

*

**

KATRIYÈM DIMANCH LAVAN B

Mèvèy sakré-a, yo dévoualé-l bay nasion yo, pou yo kapab obéyi **LAFOUA**-a (Rm 16,26). Sé konsa Sin Pòl fini lèt Romin yo. Sé konsa tou li té kòmansé Lèt li-a antan-l té fè sonjé gras ak mision Apot li té résévoua pou-l té fè tout nasion yo **obéyi lafoua**-a (Rm 1,5). Lafoua sé obéyisans, "lobéyisans lafoua pou tout pèp yo, lobéyisans lafoua pou tout moun".

Lanj Gabriyèl parèt dévan la **Trè Sint Vièj**, li pot Bòn Nouvèl la; li mandé-l pou-l Manman Pitit Bondié-a; Mari réponn li vlé (Lc 1,26-38). Jézu parèt sou bò lanmè Galilé, li rélé **Apot** yo, li mandé yo suiv li, la minm yo kité filè, bato, papa (Mc 1,16-20). Profèt Éli touché zépòl **Élizé** li fè-l sign pou-l suiv li; Élizé minm té vlé anbrasé papa-l; Éli pa minm ba-l tan (1 R 19,19-21; Lc 9,62). **Moyiz** pa-t aksépté Granmèt la voyé-l; li fè viré-tounin. Li chèché kont prêtèks pou-l débarasé; Granmèt la kinbé fèm (Ex 3,7-4,17). **Izayi** minm pa-t tann Granmèt la voyé-l; li prezanté ba li, Granmèt la té déjà nètouayé-l pou sa; pou-l fè-l konprann mision-l (Is 6,1-8). Kanta pou **Jérémi**, li plinyin kont kò-l; li di li trò piti; Granmèt la pa gadé, ni rotè, ni laj, sé li minm k-ap travay (Jer 1,6; 1 Sam 16,7; Ph 2,13).

"Lobéyisans lafoua pou tout pèp yo; lobéyisans lafoua pou tout moun: (Rm1,5; 16,26). Chak moun obéyi nan fason pa-l. Ginyin ki obéyi tout-suit, gin dèt ki pran tan. Lévanjil jodia-a montré nou kijan la Trè Sint Vièj Mari obéyi tout-suit. Min li pasé nan toua mach-éskalié. Nan premié mach la kè-l soté lè lanj la salié-l la antan-l ba-l mision-l avèk non nouvo li ba li-a: "Sé pou kè-ou kontan, ou minm ki plin gras, Granmèt la avèk ou, ou béni pami tout fi". Li troublé, l-ap kalkilé anndan fon kè-l ki kalité mòd jan salié sa-a, sa sa vlé di, ki sa Granmèt la ap mandé-l la-a o-jis. Nan dézièm mach-éskalié-a, lè lanj la fi-n rasiré-l la, li mandé kijan sa ap fèt paské li pa gin konésans lèzòm. Sèké lanj la ba-l mésaj la pi klè antan-l di-l l-apral vi-n ansint, l-ap anfanté yon ti pitit gason, l-ap rélé non-l Jézu; Jézu ap gran, y-ap rélé-l Pitit Sila-a ki anro nèt la, Granmèt Bondié ap ba-l fotèy David papa-l, l-ap komandé kòm Roua nan kay Jakòb la pou tout tan, ringn li pap janm fini. Lanj la té déjà fi-n di-l pa pè, li jouinn gras kòt Bondié. Koulié-a tout mésaj sa-a lanj la dévlo pé ba li-a fè-l blijé mandé nan ki fason sa ap fèt. Si-l mandé nan ki fason, sa vlé di li déjà aksépté nan kè-l pou-l bay Bondié konkou-l nan lafoua-l. Sèlman li té déjà fè vé pou-l rété vièj pou Bondié. Li mandé ésplikasion, kijan Bondié fè kapab fè bagay sa-a fèt antan-l réspékté vé-l la. Sé touazièm mach-éskalié-a. Lanj la ba-l ésplikasion, sé léspri Sin-an k-ap aji ak fòs Sila-a ki anro nèt la k-ap kouvri-l ak lonbraj li.

Sé pou sa Sila-a k-ap fèt nan li-a ap sin, y-ap rélé-l Pitit Bondié. Lanj la ba-l yon sign san-l pa minm mandé: sé Elizabèt, kouzi-n li-a ki ansint nan viyéyè li-a malgré li pa-t kapab fè pitit nan tout lavi-l, paské anyin pa imposib pou Bondié. Sé lè sa-a Mari déklaré lafoua-l nèt alé: "Min Sèvant Granmèt la; sé pou sa fèt pou mouin dapré paròl ou-a".

"Lobéyisans lafoua pou tout pèp yo, lobéyisans lafoua pou tout moun". Lafoua sé obéyisans. Gin moun ki obéyi tout-suit, gin dèt ki pran tan pou obéyi. Nikodèm té fè kont ti viré-tounin-l, lè Jézu t-ap palé-l sou nouvo nésans la (Jn 3, 1-21). Li minm tou li té monté toua mach-éskalié. Nan prémié mach la, li té mété lafoua-l sou sign yo Jézu t-ap réalizé yo (Jn 3,1-3). Sé lè sa-a Jézu té éséyé fè-l monté pi ro, antan-l té dévoualé-l mèvèy sakré nouvo nésans la. Sé tankou yon révélation ki voualé, ki nan fènoua, nan mitan lannuit a-minuit (Jn 3, 3). Nan dézièm mach la, Nikodèm mandé si sé pou moun nan antré nan vant manman-l ankò pou-l fèt, malgré li vié-a (Jn3,4). Sé lè sa-a Jézu pasé nan yon dézièm mòd révélation, li vidé yon filè limiè tankou dévan-jou k-ap pésé vè kat-sinkè dimatin, li palé-l sou nésans nan dlo ak léspri Sin (Jn 3, 5-8). Nikodèm apral travèsé nan yon touazièm mach antan-l mandé kijan pou tout bagay sa yo fè fèt (Jn 3,9). Sé lè sa-a Jézu pasé nan touazièm révélation-an, tankou gro solèy ki vidé limiè-l a-midi (Jn 3,10-21), pou-l montré-l mèvèy sakré Sajès Pitit Bondié-a ki désann sot nan sièl épi k-ap rémonté minm koté li soti-a (Jn 3,13), antan-l pasé nan lanmò sou lakoua (Jn 3,14) pou tout moun ki **kouè** yo jouinn lavi (Jn 3,15) yo pa sibi kondanasion (Jn 3, 18).

Jézu pa ba nou yon kat ak yon bousòl épi li lagé nou sou chémin, min sé nan chak kalfou li ba nou yon diréksion, tankou Bondié té fè pou Profèt Éli li té voyé Bètèl, apré sa Jériko, apré sa nan Joudin-an, jous li lévé-l nan sièl la (2 R 2,1-18). Bondié éplé non-l lèt pa lèt. Lè Jézu té louvri jé avèg Bétsayid la, sé pa yon sèl kou jé-l té louvri nèt; li té komansé ouè tankou sé pié boua k-ap déplásé, apré sèlman li vi-n ouè tout bagay klè (Mc 8,22-26). Sé tankou lè y-ap dévoualé Koua-a Vandrédi-Sin-an, tèt la, bra douat la, épi tout kò-a. Juif yo pa konprann parabòl bon Gadyin-an (Jn 10, 1-6). Jézu bay ésplikasion (Jn 10, 7-18). Vi-n gin brouyay (Jn 10, 19-21). Sé nan touazièm tan Jézu palé klè (Jn 10, 22-30).

N-ap mandé manman Mari pou-n pran pasians nan lafoua-a pou nou obéyi nan fènoua, k-ap vi-n tounin dévan-jou, k-ap vi-n tounin klèté gro midi.

Sin Monfò gin yon kantik sou léspérans, koté-l di léspérans la pèmèt nou tann favè ak rékonpans Granmèt la, gras a mérit Sila-a ki sovè nou-an (C 7,1 OC 897). Li konparé-l ak yon lank batiman ki solid, ki byin chita, ki fè batiman-an rét an plas, malgré kouran-an, vag yo ak van-an (ib 2). Li di sé yon kolòn yo pa kapab souké, ki soutni tou sa-k pou fè nou vi-n sin. Li di richès li sé nan fidéлитé Bondié kinbé parapò a promès li té fè. Lè nou trublé, lè n-ap soufri, lè kè nou blésé, lè nou fèb, lè n-ap tranblé, lè tanpèt ap malminnin nou, nou konté sou sékou Bondié. Bondié té promèt l-ap voyé Mési-a nan ras Roua David la. Sé baz tout éspérans. Patizan Émayus yo ak Apot yo té konté sou promès sa-a. Yo t-ap di: "Nou t-ap tann sé li minn ki t-ap délivré Israël" (Lc 24,21). Yo di Jézu "Èské sé nan moman sa-a ou-ap réfè péyi roua Israël-la?" (Ac 1,6).

Éspérans Juif yo té yon ti jan rét sou plan tè sa-a. Jézu mandé yo pou yo gadé pi ro. Ringn li pa sou tè sa-a. Li déklaré Pilat sa (Jn 18,16). Li mandé Apot yo pou yo sèvi-l témouin jous nan bout tè-a (Ac 1,8). Éspérans Juif yo t-ap viv la, sé té pou Mési-a ki t-ap vini-an. Li vini, yo pa rékonèt li. Yo t-ap tann yon lion, sé yon mouton ki rivé. Yo t-ap tann yon Roua, sé yon ésklav ki parèt. Yo t-ap tann yon jénéral, sé yon prizonié yo ouè. Bondié konblé éspérans nou, min sé pa nésèsèman nan fòm nou t-ap tann nan. Sé poua priyè nou doué réglé sou Volonté Bondié. Sé pou Volonté-ou fèt sou tè-a tankou nan Sièl la. Jan-Batis di Juif yo: "Nan mitan nou gin yon Pèsonaj nou pa rékonèt". Jézu di nou Rouayòm Bondié-a nan mitan nou. L-ap dévlopé san nou pa rémaké sa. Tan n-ap viv la riské fè nou pansé Bondié louin nou. Li vini Bètléèm sou fòm yon ti bébé. L-ap tounin chak moman, l-ap parèt devan nou nan tout sikonstans lavi nou, san nou pa fè atansion.

N-ap mandé Manman Mari pou-l aprann nou louvri jé kè nou pou nou rékonèt prezans Jézu nan tout moun ak tout évenman, pou nou louvri pòt nou ba-l antré, antan n-ap chèché sans rankont sa-a li fè avèk nou-an, tankou la Trè Sint Vièj ki réponn lanj la: "Sé pou sa fèt pou mouin dapré Paròl ou-a".

Pou nou rékonèt Jézu, fò nou tann li, fò nou éspéré-l. Sé abitud lapriyè-a k-ap tankou boua difé ki pou chofé léspérans la. Sin Toma Dakin di: "La prière est l'interprète de l'espérance" (S.Th. Ila Ilae, q 17, a 2 ad 2; a 4, ad 3). Plis nou pran abitud lapriyè, plis n-ap éspéré promès Bondié fè nou-an, nou pap trouvé tan-an long. Sin Jak mandé nou pou nou pran pasians tankou moun ki fi-n planté-a, k-ap tann plant la donnin (Jc 5,7). Yon moun ki pran abitud lapriyè, li poté provizion pou nourri éspérans li. Tan ki vi-n

anvan Noèl la, sé tan léspérans. Pap Jan-Pol II konsidéré ané 2000 la tankou yon gran tan lavan. Sé pou sa li té déklaré ané 1987 - 1988 la ANÉ MARIAL, pou fè sonjé 2000 ané depi la Trè Sint Vièj Mari té fèt, k-ap préparé 2000 ané dépi Jézu té fèt, tankou zétoual dévan-jou-a k-ap anonsé Solèy la k-apral lévé-a (Rédemptoris Mater, 3, p. 7). Avèk la Trè Sint Vièj n-ap insisté anpil sou léspérans la, antan nou dosil nan min léspri Sin-an, k-ap lapriyè anndan kè nou, ak mo nou pa konprann, antan l-ap mandé sa-l konnin ki korésponn ak volonté Bondié (R 8,26-27).

*

* *

KATRIYÈM DIMANCH LAVAN C

Jou Noèl la tou pré, 4èm dimanch la toujou tonbé anndan sémèn spésial ki vi-n anvan Noèl la, koté gin mès spésial yo dépi 17 désann nan.

Réfrin pou antré-a mandé pou sièl la fè larouzé tonbé, Izayi 45,8. Sièl la té fèmin, Izayi 63,19 té mandé Bondié pou-l chiré sièl la, pou-l désann (= Mak 1,10). Kouliè-a li mandé pou niaj yo fè lapli tonbé. Dépi péché-a, tè-a té sèk. Sé suè moun nan ki té konn rouzé-l, Jénèz 3, 17-19. Sovè-a ap désann tankou lapli sou zèb fré, Psòm 72, 6, 8. Li minm ki korèk, ki vi-n éfasé péché-a. Sé tankou yon aksion jistis l-ap fè, lè-l sovè nou, paské sé li minm ki té promèt sa. Li kinbé paròl li pou-l montré jan-l fidèl nan dévoua jistis la. Sé nan sans sa-a jistis Bondié-a sé délivrans li poté-a. Izayi 45,8 di: Fè sila-a ki kòrèk la (= Jistis la) désann, tè-a ap jèmin Sovè-a.

Priyè nan kòmansman lanmès la réprann priyè nou konn résité apré lanjélus la. Li fè sonjé mèsaj Anj Gabriyèl la anonsé la Trè Sint Vièj Mari-a.

Plis n-ap proche nan jou Noèl la, sé plis n-ap viv nan rélasyon séré avèk mèvèy sakré Mari-a. Sé yon mèvèy éstraòdinè. Yon fi ki anfantè Bondié. Bagay yo pa-t janm ouè, bagay yo pap janm ouè.

Prémié léktu-a soti nan profèt Miché ki t-ap fè anons sa-a dépi vè 742-686 anvan Jézu-Kri (sitou 714-701), nan épòk roua Yotam (742-735), Akaz (735-715), ak Ézékias (715-687) (= Miché 1,1). Li té préché nan minm épòk avèk Izayi, aprè Amòs avèk Ozé, anvan Sofoni nou té li dimanch pasé-a.

Miché préché tankou Amòs pou jistis sosiété-a, li ataké moun k-ap fè profitè, li dénonse jès rélijion ki pa koréponn avèk fon kè. Épòk l-ap préché-a, péyi Asiri-a té anvayi péyi Juda-a (avèk roua Sénakérib 701). Prèch Miché-a ap édé roua Ézékias chanjé situasion rélijion péyi-a (Jérémi 26,18; 2 Roua 18,4). Dépi lontan déjà Asiri t-ap ménasé péyi-a avèk roua Tiglat Pilésar III ki té anvayi Siri (732), épi Samari (722) nan nò péyi Juda-a. Apré sa li té okipé péyi Juda-a sou roua Akaz ki té pasé kontra avèk li (Izayi 7). Pitit Akaz la (Ézékias) révòlté kont Asiri. Li profité pou débléyé péyi-a ak tout zidòl Asiri té minnin ladan-l. Sé nan ankadréman épòk sa-a minm Miché ap préché pou-l ankourajé mouvman indépandans k-ap fèt sou aspè rélijyé-a (évidaman an minm tan tou sou aspé politik, tou lé dé té alé ansanm nan lansyin Téstaman, Miché 5,4). Sèlman jan nou té ouè dimanch pasé, sé pa ak gran lamé Bondié ap sovè pèp li-a, sé ak yon "rès". Miché di konsa: Bètlém sé li minm ki pi piti nan tout vil Juda yo, époutan sé nan li chèf la ap soti pou kòmandé. Miché 5,2 di "rès" frè-l yo ap tounin kot pitit

Israèl yo. Nou té palé sou "rès" la déjà dimanch pasé (nan Miché nou jouinn li nan 2,12; 4,7; 5,2.6.7).

Vil Bètéléem nan, sé yon mo ébré ki vlé di "kay-pin". Pin ki sot nan sièl la, sé Jézu ki vi-n pou-l nourri nou. Yo rélé Bètéléem Éfrata tou (Jozué 15,59; Rut 4,11; =Matié 2,5-6). Matié di sé pa Bètéléem ki pi piti, paské sé nan li Granmèt la sòti. Sin Pòl di sé sa-k fèb Granmèt la chouazi pou-l fè sa-k fò yo ront.

Nan kòmansman liv Rut la, té gin grangou nan Bètéléem, Kay-pin-an, Rut 1,1. Sé poua Noémi té pati kité Bètéléem; lè-l tounin, Rut, zansèt roua David, fè kay la vi-n plin ak blé, nan fason li rankontré avèk Élimélèk, zansèt David, ki t-ap fè rékòlt blé. Sa invité nou li liv Rut la nan épòk sa-a.

Matié 5,3 di l-ap kè pozé. Roua kè pozé-a (= Psòm 72,7; 85,11) sé Jézu Bètéléem. Lè-l fèt la, Mésajé yo pran chanté nan sièl la viv Bondié nan sièl la, sou tè-a kè pozé pou moun li rinmin yo, Luk 2,14 (Miché 5,9); éspliké kè pozé-a, lagè-a ap sispann= Iszayi 2,4; 9,5.6; 11,6-9; Zakari 9,10: Noèl sé tan kè pozé, sé épòk sièl la ak tè-a rankontré, sé lè Bondié ak moun rékonsilié. Sé lokazion pou tou sa-k kinbé ti ranku-n nan kè yo, yo vidé-l, pou fè plas bay ti Jézu Bètéléem nan k-ap poté mésaj kè pozé-a, pou-l pa di nou sa-l té di Jérusalèm nan: "Si jodi-a ou té kapab konprann ou minm tou mésaj kè pozé-a! Min non, li rété kaché nan jé-ou..." (Luk 19,42).

Psòm répons la (Sòm79 = 80), sé yon Psòm ki gin anpil inpòtans nan tan lavan-an, minm jan Psòm 25 la ak Psòm 51-an gin anpil inpòtans nan tan karèm nan.

Psòm répons jodi-a mandé Bondié pou-l kondui pèp li-a tankou yon gadyin ap kondui bann mouton-l yo. Sé sa minm premié léktu-a té di nan Miché 5,3. Sé ròl roua-a sa, pou-l kondui pèp li-a tankou yon gadyin kondui bann mouton-l.

Psòm nan mandé pou Bondié voyé limiè-l ak fòs li. Jézu fèt nan fènoua, li tou fèb sou pay, nan trou ròch la, koté zannimo yo manjé-a. Min sé nan fènoua sa-a féblès sa-a minm, li sèvi nou limiè ak fòs.

Lèt Ébré yo di kijan Bondié fòmé yon kò pou pitit li-a vi-n fè volonté-l. Sé nouvo Téstaman-an ki kòmansé. Lansyin-an fini ak ansyin sakrifis yo. Sé sakrifis volonté -a k-ap fè Bondié plézi.

Sé nan minm sans sa-a Alélouya-a (Luk 1,38) fè Mari di: Mouin sé sèvant Granmèt la, sé pou sa fèt pou mouin dapré paròl ou-a.

Sé pasé pran-m, m-ap pasé rélé-ou.

Lévanjil la montré kijan Mari ap poté nouvèl kay Élizabèt (Luk 1,39-45), épi kijan li plin kay la ak léspri Sin-an ki té sou li-a, atèl pouin Jan-Batis dansé nan vant manman-l ak kè kontan, Élizabèt plin ak léspri Sin, Zakari ap vi-n plin ak léspri Sin-an tou.

Élizabèt rékonèt Mari sé Manman Granmèt la, Manman Bondié, li fè konpliman pou li paské li té kouè (li sonjé kijan Zakari, mari-l, té fè dout jous li vi-n baba). Li di Mari: ou béni pasé tout fi, frui vant ou-a béni tou. Sé yon mélanj paròl yo té di Yaèl, Madam sa-a ki té krazé tèt lènmi-an, Sizra (= Jij 5,24) ak sa yo té di Judit, Madam sa-a ki té koupé tèt lòt lènmi sa-a yo té rélé Olofèn nan (= Judit 13,10). Mari krazé tèt Satan, jénéral lènmi pèp Bondié-a ak lafoua li, dapré sa Bondié té promèt nan Jénèz 3,15. Madichon-an lévé sot sou tè-a. Paròl sa yo Élizabèt di Mari-a, sé paròl ki nan priyè "Mari, sé pou-ou kontan-an".

Priyè sou kado yo mandé pou Granmèt la voyé minm léspri sa-a Mari kominiké bay Jan-Batis, Élizabèt ak Zakari-a, minm léspri sa-a ki té fè zantray li donnin frui nouvo-a, Jézu, pou-l fè kado nou ofri yo vi-n Sin.

Réfrin pou kominion-an pran déklarasion Izayi 7,14 (= Matié 1,23) ki té fèt dépi vè ané 734 anvan Jézu-Kri. Sé sign Bondié ap bay pou-l montré nou li avèk nou pou-l défann nou. Sé sa non Émanuèl la vlé di. Lè yo pran dènié bout ki nan finisman non sa-a (Éma-nuèl), li fè "Nuèl", = Noèl. Donk Noèl, sa vlé di Émanuèl, Bondié avèk nou.

Dènié priyè-a mandé Bondié pou-l fè nou pi cho nan sèvis li antan fèt Noèl la ap rivé-a. Sé pa libètinaj pou nou sonjé, sé pa plézi, sé pa banbòch, sé sèvis Granmèt la.

Noèl ap proché. La Trè Sint Vièj Mari poté yon avaloua kòm zétrinn bay Élizabèt antan li vi-n lakay li avèk prézans Jézu nan vant li. Jézu fè Jan-Batis vi-n sin nan vant maman-l Élizabèt. Jan-Batis souké kò-l nan vant manman-l, pou-l montré jan-l kontan. Élizabèt vi-n plin ak léspri Sin-an, li té fè déklarasion profèt nan bouch li, nou tandé paròl nou abitué di nan chaplé nou: "Ou béni pasé tout fi, frui ki soti nan vant ou-a, li béni tou". Lè la Trè Sint Vièj vi-n lakay nou, sé toujou avèk Jézu, épi pou poté gras pou nou, si nou akéyi-l avèk lafoua.

*

Élizabèt di yon paròl roua David té déjà di apropro Ach dalians la (2 Sm 6,10): "Kijan Manman Granmèt mouin-an fè vi-n lakay mouin?" (Lc 1,43).

David té di: kijan pou Ach la fè monté lakay mouin" (2 Sm 6,9). David té dansé dévan Ach la, tankou ti Jan-Batis dansé anndan vant manman-l, lè la Trè Sint Vièj vi-n antré (Lc 1,41; 2 Sm 6,14). Ach la té béni tout moun lakay Obèd-Édòm moun Gat la (2 Sm 6,12). Konsa tou la Trè Sint Vièj béni tout moun lakay Élizabèt, ni Jan-Batis, ni Élizabèt, ni Zakari k-ap vi-n rékòmansé palé. Mari rété 3 moua kay Élizabèt (Lc 1,56), tankou Ach la té rété 3 moua kay Obèd-Édòm (2 Sm 6,11). Koté la Trè Sint Vièj Mari yé, Jézu la, avèk tout favè-l. Prèmié moun ki té bénéfisié favè-l, sé té Manman-l. Manman-l pa gadé yo pou li sèl, li sé "médiatrice de toutes grâces". Li sé yon kanal koté dlo lagras la pasé, l-ap koulé san rété an kantité.

Avèk la Trè Sint Vièj, sé pou nou rantré nan fon kè nou, pou nou fè dènié préparasion tan lavan-an, k-ap édé nou résévoua Jézu pi byin pou fèt Noël la. Yon fèt vo préparasion-l. Si-l byin préparé, l-ap byin fété. Sé pa nan dènié moman pou pran brid sou kou, pou nou préparé krèch ak lanmès minui ak révéyon ak kèk ti kado pou pòv yo. Sé pa sa. Noël mandé pou nou préparé-l dépi lontan, pandan tout lavan-an. Plis l-ap proche, plis nou doué viv kolé avèk la Trè Sint Vièj Mari, pou-l ba nou santiman-l, pou nou sèvi Jézu kòm bèso nan kè nou.

*

Noël tou pré. Nan dènié dimanch lavan-an, litiji-a fiksé limiè-a sou figi la Trè Sint Vièj Mari. Sé li minm k-ap édé nou préparé kè nou tankou yon krèch pou nou résévoua vizit Pitit li Jézu-Kri.

Lè-l salué kouzi-n li Élizabèt, pitit Élizabèt la souké kò-l nan vant manman-l a fòs li kontan (Lc 1,41). Li fè tankou dé ti jimo yo, Ézayu ak Jakòb, ki té pran dansé nan vant manman yo, Rébéka, ki pa-t kapab fè pitit la (Gn 25,22). Élizabèt tou pa-t kapab fè pitit. Lè-l ansint, min pitit la pran dansé nan vant li, alokasion vizit la Trè Sint Vièj Mari, ki poté Jézu-Kri nan vant pa-l. Sé yon sign kè kontan, dévan délivrans la k-ap rivé-a. Psòm nan di: mòn yo t-ap dansé tankou ti kabrit dévan fas Granmèt la k-ap vini-an (Ps 114,4.6). Tou sa-k pa-t kapab produi lavi, y-ap donnin. Péché-a, ki té koz lavi-a t-ap maché o-ralanti-a, Mési-a vi-n pou-l détrui-l. Profèt Malachi di solèy jistis la ap lévé, antan l-ap poté gérizon nan réyon-l yo, n-ap soti, n-ap dansé tankou ti bèf nan pak zèb (Mal 3,20). Jézu di nou pou nou dansé ak kè kontan lè yo rayi nou, yo réjté nou, yo jouré nou, yo éskominié nou akoz li, paské rékonpans nou gran nan Sièl la (Lc 6, 22). Lè la Trè Sint Vièj Mari ak Sin Jozèf t-al frapé pòt kay moun Bètlèèm yo, yo doué té tandé anpil mové répons, poutan kè yo té kontan, paské Jézu té pré rivé sou tè-a. Sé yo minm ki t-apral ofri-l bay lézòm, lévanjil jodi-a montré nou la Trè Sint Vièj Mari

k-a pral frapé pòt yon kay k-ap résévoua-l, ni li minm ni Pitit ki nan vant li-a, sé kay kouzi-n li Sint Élizabèt.

Vizit la Trè Sint Vièj Mari-a, sé yon vizit misionè. Li poté kè kontan lakay Élizabèt la. Profèt Izayi di: Ala bèl yo bèl sou mòn yo, pié misionè yo k-ap poté bòn nouvèl la, k-ap anonsé kè pozé, k-ap poté délivrans (Is 52,7). La Trè Sint Vièj Mari bay égzanp yon vré misionè doué suiv. Apèn lanj Gabriyèl fi-n palé avèk li, fi-n ba-l nouvèl kouzi-n li Sint Élizabèt, la minm li lévé, li pati byin vit, l-al nan mòn yo pou-l poté Bòn Nouvèl la bay Élizabèt, pou-l fè-l patisipé nan gras li-a (Jc 1,39).

Li lévé. Li pati. Li fè vit. L-al nan mòn.

Yon misionè pa doué rété chita. Sé pou-l lévé kanpé, nan pozision vouayajé, nan pozision sèvitè, ki toujou prèt pou rann sèvis koté yo bézouin-l, ninpòt ki lè yo mandé-l, pou ninpòt ki sa yo vlé-l fè.

Yon misionè pa doué rét yon sèl koté. Sé pou-l toujou aksépté déplasé, sot yon koté al yon lòt koté, minm si yo té résévoua-l byin koté-l rivé-a. Yon lè rivé, li blijé siyé dlo nan jé-l, maré senti-l, di o-révoua, minm si-l gin pou-l tounin minm koté-a ankò. Gin dé kòd ou blijé koupé, si-ou pa vlé pou-ou pran rasi-n yon sèl koté, pou Bondié kapab sèvi avèk ou koté-l vlé, koté ou minm pa t-a vlé. Gin atachman ki difisil pou-ou koupé, ou mèt mété tout ènèji volonté-ou pou-ou défèt yo, san-ou pa konnin kijan, yo kolé pi rèd. Sin Pòl té gin lapènn lè-l t-ap di légliz Éfèz la orévoua (Ac 20,17-38). Min li té blijé rézignin-l, yo minm tou té blijé séché dlo nan jé yo, aksépté kité-l kotinué rout li. Yon Misionè doué toujou ap pati, sot yon koté al yon lòt koté, kité yon group, minm si-l intéréсан anpil, pou-l poté Bòn Nouvèl la bay yon lòt group k-ap tann, minm si-l gin mouins atirans.

Yon misionè pa doué trinnin nan aktivité-l. Li doué fè vit pou-l réalizé mision-l. Li pa doué rét ap fè disèt mil viré-tounin, pou-l fè tan passé. Travay la présé. La Trè Sint Vièj Mari maché vit sou rout li. Lè la Trè Sint Vièj Mari té konn parèt a-Loud dévan Sint Bènadèt épi li té konn voyé-l fè komision kot Kiré-a, Sint Bènadèt té présé byin vit; li té konn di: "Mouin pa-t janm mizé ak komision la Trè Sint Vièj yo". Nou minm tou nou pa doué trinnin ap fè lè, ap fè rébèl, ap fè ti kout Jonas nou. Sé pou nou aksépté mision nou nan lafoua, minm si nou pa oué klè koté sa ap débouché. Nan késion sa-a, ou pa kapab méziré ni pézé résilta travay la, sé aktivité léspri-Sin. Sé li minm k-ap pousé nou, pou nou fè vit nan travay nou.

Yon misionè pa doué chouazi sèlman téréin plat ak lavi-l pou-l al préché. Sé pou-l fè tankou Abraam, li aksépté al nan mòn (Gn 12,8; 13,12). La Trè Sint Vièj Mari pati al nan mòn Juda yo (Lc 1,39). Profèt Izayi gin rézon di: "Ala bèl yo bèl sou tèt mòn yo, pié Mésajé Bòn Nouvèl la!" (cf Is 52,7).

N-ap mandé la Trè Sint Vièj Mari pou nou gin kouraj: lévé, pati, fè vit, al nan mòn (Lc 1,39), pou n-al poté mésaj kè kontan-an ak kè pozé-a, pou moun yo péché-a té fi-n finnin-an, yo pran kouraj, fléri, jèmin, donnin bèl frui. Avèk Sint Élizabèt, n-ap bay la Trè Sint Vièj Mari répons nan mésaj li poté ba nou-an lè-l salué nou-an, tankou yon "o-chan" n-ap égzékité pou li, n-ap di-l nan "Je vous salue Marie"-a: "Ou béni pasé tout fi, Frui ki soti nan vant ou-a béni tou". Sé Frui sa-a pié boua nouvo Paradi-a donnin pou nou. Nou pa kinbé-l pou nou sèl. N-ap poté-l bay lòt yo gouté tou.

*

krèch: 2 foua nan lansyin Téstaman; 4 foua nan Nouvo Téstaman.
Job 39,9; Is 1,1; Lc 2,7.12.16; 13,15.

vizit: 11 foua nan lansyin Téstaman; 4 foua nan Nouvo Téstaman.
Ex 32,34; 2 Ch 22,7; Ps 30,6; Sg 3,7.9.13; 4,15; 14,11; Si 16,18; 18,20; Jer 6,6; 1 Co 16,17; 2 Co 12,21; Ga 1,18; 1 p. 2,12.

vizité: 60 foua nan lansyin Téstaman; 10 foua nan Nouvo Téstaman.
Gn 20,3; 21,1; 31,24; 50,24.25; Ex 3,16; 4,31; 13,19; Rt 1,6; 1 Sm 2, 21; 1 R 22,2; 2 R 8,29; 9,16; 2 Ch 18,2; 22,6; Jdt 4,15; 8,33; Job 5,24; Ps 8,5; 17,3; 39,6; 65,10; 80,15; 89,33; 106,4; Sg 2,20; Si 2,14; 46,14; 49,15; Is 23,17; 24,21.22; 26,14; 29,6; Jer 6,15; 8,12; 9,24; 11,22; 15, 15; 23,34; 25,12; 27,8.22; 29,10; 32,5; 4,13a.b.29; 46,25; 50,18a.b; 51, 44.47.52; So 1,8.9.12; 3,7; Za 10,3; Mt 25,36.43; 28,1; Lc 1,68.78; 19, 44; Ac 7,23; 15,36; Jc 1,27;

salué: 2 foua nan lansyin Téstaman; 59 foua nan Nouvo Téstaman.
Gn 43,27; 47,7.10; Jg 18,15; 1 Sm 10,4; 13,10; 25,5.14; 2 Sm 8,10; 2 R 4, 29a.b; 10,13.15; 1 Ch 18,10; Tob 5,10; 7,1a.b; 9,6; Jdt 15,8; 1 Mac 7, 29.23; 12,17; Si 41,21; Mt 10,12; 28,9; Mc 9,15; 15,18; Lc 1,40; 10,4; Ac 18,22; 21,7.19; 25,13; R 16,3.5a.b.6.7.8.9.10a.b.12a.b.13.14.15. 16a.b. 21.22.23a.b; 1 Co 16,19a.b.20a.b; 2 Co 13,12a.b; Ph 4,21a.b.22; Col 4,10. 11.12.15; 1 Th 5,26; 2 Th 4,19; Tit 3,15; He 5,10; 11,13; 13,24a.b; 1 p. 2,13.14; 2 Jn 10,11.13; 3 Jn 15a.b.

salutasion: 1 foua nan lansyin Téstaman; 10 foua nan Nouvo Téstaman.
1 Mc 11,6; Mt 23,7; Mc 12,38; Lc 1,29.41.44; 11,43; 20,46; 1 Co 16,21; Col 4,14; Phm 23.

*

"Antiennes" pou "Laudes" ak "Vêpres" nan sémèn anvan Noël la:

17 déc: L: konnin péyi koté Bondié roua-a pré, an vérité mouin di nou li pap mizé. V: Sajès ki soti nan bouch Sila-a ki anro nèt la, ki touché sot nan yon bout rivé jous nan lòt bout la, ki ranjé tout bagay avèk fòs, avèk dousè, vini pou-ou aprann nou chémin jistis la.

18 déc. L: Vyé nan kè nou, Granmèt Bondié nou-an tou pré

V: Adonayi, Chèf kay Israèl la, ki té parèt dévan Moyiz nan difé flanm tou rouj la, épi ki té ba-l lafoua Sinayi-a, vini pou-ou délivré nou ak bra-ou ki déplouayé-a.

19 déc. L: Sila ki sovè tè-a, li lévé tankou Solèy, li désann nan vant Vièj la, tankou larouzé sou gazon, alélouya.

V: Rasi-n Jésé, ki kanpé kòm sign pèp yo, ou minm roua yo blijé fèmin bouch osijè-ou la, ou minm nasion yo ap lapriyè-a; vi-n délivré nou, pa tann ankò.

20 déc. L: Yo voyé lanj Gabiyèl koté Mari ki Vièj, ki fiancé ak Jozèf.

V: Klé David, baton kòmandman kay Israèl: ou minm ki louvri, san pèsòn pa kapab fèmin, ou minm ki fèmin san pèsòn pa kapab louvri, vini, sovè prizoniè-a sot nan kacho-a, sa-k chita nan fènoua ak lonbraj lanmò-a.

21 déc. L: Pa pè, sèké nan sink jou Granmèt nou-an ap vi-n jouinn nou.

V: Solèy k-ap lévé, bèlté limiè ki pap janm fini-an, Solèy jistis la: vini, kléré: sa-k chita nan fènoua ak lonbraj lanmò yo:

22 déc. L: Kon voua-ou rivé nan zòrèy mouin, lè-ou salué-m nan, minm lè-a ti pitit la dansé ak kè kontan anndan vant mouin, alélouya.

V: Roua nasion yo, ou minm yo anvi-a, ròch kouin-an, ou minm ki fè tou lédé vi-n fè yon sèl la: vini sovè moun nan ou té fòmé ak tè-a.

23 déc. L: Min tout bagay réalizé, sa Bondié té di la Vièj Mari pa lintèmédiè lanj la.

V: Émanuèl, roua nou, ou minm ki fè laloua pou nou, ou minm nasion yo ap tann nan, ou minm ki sovè yo-a: vini pou-ou sovè nou, Granmèt Bondié nou.

24 déc. L: Jou yo rivé bout yo, pou Mari té anfanté pitit li-a, sa-l bay nésans kòm prémié pitit la.

*

* *

NÉSANS GRANMÈT LA

Nan lévanjil Noèl vijil la (Mt 1,1-25) gin 5 non fi nan lis ras Jézu-Kri-a. Yo chak gin inpòtans yo. Prémie-a sé **Tama** (v. 3) ki rivé lè promès la ap travèsè nan ras **Juda** (youn nan 12 pitit Jakòb yo = Jénèz 38). Dézièm nan sé **Raab** (v. 5) ki rivé lè promès la ap antré nan péyi **Palésti-n** nan avèk pèp la ki sot nan dézè-a (Jozué 2,1-21; 6,22-23). Touazièm nan sé **Rut** (v. 5) ki rivé lè promès la ap pasé nan fanmiy **roua** David (Rt 4,10-23). Katriyèm nan sé **madanm Uri-a** (v. 6) ki rivé lè promès la ap pran koulè **Sajès** ak Salomon (2 Samuèl 12,24-25). Sinkièm nan sé **MARI** (v. 16) ki rivé lè promès la réalizé pou **tout moun**. Promès la sé Sovè-a Bondié té promèt tout tè-a dépi péché Adan-an (Jénèz 3,15). Tout kat fi yo anvan Mari, yo bay konkou yo, lè sitiasion-an bloké nan min lézòm, lè gin yon pasaj inpòtan. Mari li minm sé pa yon gason li bay konkou-l, sé instriman nan min léspri Sin-an minm k-ap réfè kréasion-an.

Izayi 62,1-5 (prémie léktu-a) chanté fréchè délivrans la ki rivé tankou yon flè k-ap boujonnin nan dévan-jou, tankou klètè k-ap parèt anvan solèy. Madichon-an pasé. Tè chèch la vi-n donnin, madanm yo té divosé ak li-a vi-n tounin lakay la; sa Bondié pa-t vlé ouè poutèt péché-a, li jouinn plézi-l nan li, li ba-l yon non nouvo, non gras la. Noèl sé fèt, paské Bondié rékonsilié avèk lézòm, sièl la touché tè-a.

Psòm 88 (= 89) la (Psòm-répons la) gin kòm réfrin "Kè sansib ou, Granmèt, sé tout tan m-ap chanté-l" (v. 2). N-ap sonjé sé avèk fraz sa-a Tèrez de lanfan Jézu ki sin té komansé ékri nan kayé-a koté li rakonté lavi-l la. Sèké sé jou Noèl la li té jouinn pi gran favè Bondié té fè-l, pou-l sispann kriyé tankou ti moun piti pou ninpòt ki ti rézon, pou-l gadé lavi-a an fas, pou-l aksépté batay la jan-l vini-an.

Psòm sa-a palé sou David ak pitit li k-ap rélé Bondié Papa (v. 27). Pitit pitit David yo ak tout roua yo sé pitit adoptif Bondié (2 Samuèl 7,14; Ps 2,7; Is 9,5). Min Jézu minm sé vré Pitit Bondié-a. Nan li nou vi-n tounin pitit adoptif, nou roua ansanm avèk li.

Dézièm léktu-a (Travay Apot yo 13,16-17.22-25) palé sou roua David toujou, li sité Psòm 88 (= 89) la "Mouin jouinn David pitit Jésé-a, yon moun k-ap fè tout volonté-m yo" (Travay Apot yo 13,22 = Psòm 89,21). Sé poua nan tè lévanjil vijil la (Mt 1,1-25) litiji-a prezanté kòm fraz pou atiré latansion nou "Ras Jézu-Kri, pitit **David**". Nou t-a kapab di tèks yo yon ti jan santré sou ròl roua-a. Sèké sé roua-a ki té gin mision pou-l sovè pèp la. Jézu roua pou-l sovè nou. Sa roua yo, pitit David yo, pa-t kapab fè yo, sé li

minm k-ap vi-n fè-l. Li pap pran minm mouyain avèk yo, choual ak kavalié, zam pou tiré flèch avèk kontra ak lòt péyi (Is 7,14; 2,4; Miché 4,3; Zakari 9,9), l-ap vi-n tankou yon pòv, nannuit, sou pay, yon ti bébé san fòs. Sé pou bontan roua Érdòd ap chèché-l kont (Mt 2,1-18). Ringn li pa sot sou tè sa-a (Jn 18,36).

Prémié léktu vijil la (Is 62,1-5) di: "ou-ap vi-n tounin yon kouròn bèlté nan min Granmèt la, yon **kouròn roua** nan min Bondié-ou la" (Is 62,3). Nan lévanjil la Mésajé-a palé ak Jozèf kòm pitit David: "Jozèf, pitit **David**, pa pè résevoua Mari, madanm ou" (Mt 1,20). Sé Jozèf k-ap bay pitit la non, l-ap fè-l antré nan fanmiy roua David la, antan-l kouché non-l sou réjis nan résansman-an. Sé roua sa-a k-ap sové pèp li-a, non pa sot anba min lènmi-l yo, Romin yo, k-ap fè résansman-an pou konnin konbyin sèvitè yo ginyin, pou montré doua yo ginyin sou yo nan plas Bondié (Lc 2,1-4), non pa tankou David ki t-ap fè résansman tou (2 Samuèl 24,1-25) pou-l konnin ak ki fòs li kapab ataké lènmi-l yo, min Granmèt la ki roua-a ap vi-n sové nou sot anba péché nou (Mt 1,21), kont sèl lènmi ki mérité non sa-a vré: Satan (mo "Satan"-an nan langaj ébré-a vlé di lènmi).

*

"Gloire à Dieu au plus haut des cieux, sur terre Paix aux hommes de bonne volonté" (Lc 2,14).

Lè Sin Jan t-ap ékri lévanjil li-a, nan finisman prémié sièk apré Jézu-Kri-a, nan vil Éfèz nan lazi minè, mo ki té alamòd nan pami filozòf Grèk yo, sé té "Logos", Paròl.

Vè dizuitièm sièk apré Jézu-Kri, sitou an-Éròp, mo ki nan bouch tout filozòf, sé mo "Raison".

Vè diznévièm sièk apré Jézu-Kri, apéprè tout koté nan Nò sou tè-a, mo ki pi alapaj, sé "évolution, vie".

Anfin nan vintièm sièk apré Jézu-Kri, koté n-ap viv la, tou patou sou tè-a mo ki gin siksè, sé "science, unité communion PAIX" (Journée de la Paix, 1968, p. 11).

Tout moun anvi lapè.

Tout moun gin kè séré antan y-ap chèché lapè.

Ané sa-a minm, yo déklaré-l ané lapè, malgré anpil koté sé brui lagè n-ap tandé.

Gloire à Dieu au plus haut des cieux, sur terre **Paix** aux hommes de bonne volonté.

Pou nou jouinn lapè, fò nou gin **bòn volonté**.

Minm fòs, an prinsip, fèt pou sèvi koz lapè, antan-ou montré fòs la pou-ou fè respèkté doua-a, san-ou pa bézouin sèvi ak fòs la pou sa. Sé sa yo rélé "conduites dissuasives" (cf GUITTON J. ib 11).

Sint-Ogustin di: "Pax est tranquillitas ordinis", "La paix est la tranquillité de l'ordre". Lòd la, sé frui lapè-a, an minm tan li préparé lapè-a, li fè ouè lapè-a yon fason sansib tankou nan yon pòtré.

Min, san libèté, pa kapab gin lapè. Lòd la sipozé libèté. Bondié fè nou lib. Libèté-a fè pati nannan moun nan. Li fè yon sèl avèk volonté-l.

Sé poua yo rélé lapè-a tou "une tranquille liberté" (Cic., Phil. II, 44), cit P. Pie XII, "Fulgens Corona", cf DU MANOIR H., Maria III, Paris, Beauchesne 1964, 720).

Lè Jézu fèt Bétléèm, pa-t gin **libèté** nan péyi-a. Sé anba lòd Romin yo Juif yo té yé. Sé poua yo té blijé déplasé al inskri koté yo té fèt la. Sé konsa Jozèf blijé kité Nazarèt pou-l al jous Bétléèm, plis pasé désan kilomèt.

A lokasion résansman sa yo toujou gin troub ki éklaté nan péyi-a, paské résansman-an sé yon fason pou Romin yo asiré otorité yo sou Juif yo. Minm roua Israèl yo pa-t gin doua fè résansman, paské sé Bondié sèl ki Roua tout bon vré. David pran gro pinision pou kozé résansman sa-a (2 Ch 21). Sé poua Juif yo pa-t kapab dakò avèk résansman Séza Ogus la ni okinn lòt résansman Romin yo ap fè. Lè sa-a, toujou gin révòlt (Ac 5,35), tankou révòlt Tédas la ak pa Juda, moun Galilé-a. Romin yo té maté révòlt sa yo. Tout katsan moun ki té suiv Tédas yo, soua yo té mouri ansanm avèk li, soua yo gayé (Ac 5,36). Juda, moun Galilé-a tou, yo touyé-l, yo gayé bann li-a (Ac 5,37).

Sé nan moman boulvès sa-a Jézu vi-n fèt.

Éròd minm pap tann lontan pou-l limin pèsékision kont otorité Jézu li minm minm, antan-l fè touyé tout ti moun ki pa ko dépasé dézan, pou-l sètèn Jézu ap pasé tou (Mt 2).

Lènmi déyò ap pézé Juif yo, lènmi anndan ap toufé yo.

Sé nan kondision sa-a Jézu fèt.

Lanj yo di: "Gloire à Dieu au plus haut des cieux, Sur terre **Paix** aux hommes de bonne volonté".

Jézu sé Roua lapè Profèt Izayi té anonsé-a, lè-l té di: "Un enfant nous est né, un fils nous a été donné, il a reçu le pouvoir sur ses épaules, on lui a donné ce nom ... **PRINCE DE LA PAIX**, pour que s'étende le pouvoir dans une paix sans fin" (Is 9,5-6).

Yon roua fèt pou asiré lapè. Sé pa lapè simitiè, sé lapè vivan. Lapè-a, li pa "statique", li "dynamique". Li pa kanpé, l-ap maché. Sé pa nan "institutions" avèk kontra pou-l ajisté, sé yon mouvman "amour" k-ap kouri alé-vini nan tout kè, pou fè youn dépasé diférans ak inkonpréansion li jouinn nan lòt la.

Sé poua lapè-a ak lòd la, sé tout tan pou y-ap bati-l, antan moun k-ap travay pou li-a, li blijé bliyé pròp tèt pa-l.

Nan sans sa-a Jézu di: "Heureux les artisans de paix" (Mt 5,9), sa vlé di moun k-ap **travay** pou lapè, sé pa moun ki répozé bra kouazé. Sé tout tan pou-ou ap réfléchi pou-ou ap réajisté rélasyon ant moun yo pou lapè-a kapab diré, pou-l kapab dévloché. Sé ròl yon chèf.

Sé sa Jézu, pitit roua David, vi-n poté sou tè-a: "Gloire à Dieu au plus haut des cieus, sur terre **PAIX aux hommes de bonne volonté**.

Lapè sé pa sign yon moun bay démisyon-l, li lach, li pè (ib.18).

Sé sou lanmè kaptinn nan yé, lannuit, nan van, l-ap dirijé batiman-l, jé-l fiksé sou zétoual lapè-a, k-ap tranblé nan sièl la, min k-ap kondui-l drèt nan larad la, koté tanpèt la pap jouinn priz sou voual yo ankò (cf ib 19).

Nan Litani la Trè Sint Vièj yo, gin yon koté nou rivé, nou di: "Étoile du matin, priez pour nous". Nou fini Litani yo, antan nou di: "Reine de la PAIX, priez pour nous".

N-ap mandé Nòtré-Dam pou-l sèvi nou kòm zétoual sa-a k-ap gidé nou sou rout lapè-a.

N-ap sonjé déklarasyon Pap Pòl VI té fè dépi lè-l té louvri jounin lapè pou premié foua-a nan ané 1968 la, lè-l té di: La paix élève "son étendard qui doit guider le navire de la civilisation à travers les inévitables tempêtes de l'histoire, au point de ses plus hautes destinées" (ib). Li té invité nou pou nou **chanjé kè nou**, pou chémin lapè-a kapab pasé. Li té di dévan réprézantan tout nasion yo a l'ONU: L'édifice de la Paix "repose avant tout sur nos consciences. Oui, le moment est venu de la **conversion**, de la transformation personnelle, du renouvellement intérieur. Nous devons nous habituer à penser l'homme d'une manière nouvelle, d'une manière nouvelle

aussi la vie en commun des hommes, d'une manière nouvelle enfin les chemins de l'histoire, les destins du monde, selon la parole de St. Paul: "Revêtez l'homme nouveau créé selon Dieu dans la justice et la sainteté de la vérité" (ib 30).

Li té konsidéré kè-a tankou koté batay la maré pi rèd pou koz lapè-a, sa-l rélé le "point stratégique" de la paix, koté pou yo dérasinin anbision, rayisans, égoyis, ki kondui nan méchansté (ib 31). Sé mouvman sa-a minm Noël invité nou fè: **dépasé frontiè movèz volonté** nou, pou nou jouinn lapè "promise aux hommes de **bonne volonté**".

Gloire à Dieu au plus haut des cieux, sur terre paix aux hommes de bonne volonté.

Pòl VI té di a l'ONU an 1968: "C'est vers ce dépassement d'idées inhumaines, d'instincts orgueilleux et de passions beliqueuses qu'est orientée la "Journée de la Paix". Et c'est à la formation de cœurs forts et bons que tend notre effort pour la victoire de la paix des cœurs qui comprennent que **tout homme est un frère, que la vie humaine est sacrée, que la magnanimité du pardon et la capacité à se reconcilier sont un grand art social et politique** (ib 32).

Sa pral fè vintan dépi Pòl VI té louvri jounin lapè-a. Ané sa-a, sé ané lapè. Nou lapriyè pou lapè pandan tout ané-a alokasion pèlerinaj Nòtré-Dam-de-lapè-a, nan douz parouas diosèz la. Jou 8 désanb nan, nou plasé statu Nòtré-Dam "Reine de la Paix" nan fasad Katédral la. Nan finisman pèlerinaj sa-a n-ap sonjé sé yon konsign Pap la té ba nou lè-l té mandé nou pou nou lapriyè pou lapè-a. Li té di: "Nous disposons d'une arme particulière pour la Paix, c'est la **prière**, avec ses énergies merveilleuses pour nous tonifier du point de vue moral et pour obtenir les facteurs transcendants et divins d'innovations spirituelles et politiques; la prière avec sa possibilité qu'elle offre de s'interroger individuellement et sincèrement sur les racines de la rancune et de la violence, qui peuvent éventuellement se trouver dans le cœur de chacun" (ib 47). Sé avèk invtasion pou prié pou lapè-a li té fini mésaj la. Invtasion sa-a kontinuyé ap kòné nan kè nou nan chak mès, paské li té fini antan-l té di: "**DONA NOBIS PACEM**". Sé yon Mouton k-ap pot lapè-a, sé pa yon toro. Jézu tou pòv atè-a sou pay la. Sé konsa li pot lapè-a, sé pa an "Loui-jan-Bojé".

Sé favè sa-a n-ap mandé-l dévan Krèch la: pou nou gin yon kè ki **pòv** pou nou kapab vi-n tounin "**artisans de paix**".

Nan dézè-a Pèp Bondié-a té fè pèlérinaj nan diréksion Péyi Bondié té promèt li-a. Yon kolòn Limiè t-ap kondui-l nan nuit.

Noèl sé fèt **Limiè**, ki kléré nan nuit, k-ap kondui **rout** nou.

Noèl raplé nou nou pa fèt pou instalé, min sé sou rout nou yé. Sé pa Nazarèt la Trè Sint Vièj Mari anfanté Jézu, sé sou rout. Sé pa anndan yon kay li anfanté-l, sé nan yon trou ròch, kot zannimo yo bloti kò yo nan nuit. Jézu ap di li pa minm gin koté pou-l pozé tèt li. Tout lavi-l, sé sou rout l-ap pasé-l. Mouin sé yon pòv k-ap trinnin tou patou, koté-m pasé m-sé étranjé; min mouin sètin lè m-a janbé lòt bò, m-a jouinn koté pou-m répozé.

Tout tan nou sou tè sa-a sé an pèlérinaj nou yé, pèlérinaj sot nan fènoua al nan limiè, pèlérinaj sot nan mansonj al nan lavérite, pèlérinaj sot nan rayisans al nan rinmin, pèlérinaj sot nan kè soté al nan kè pozé, pèlérinaj sot nan lanmò al nan lavi. Noèl sé fèt Limiè ki kléré nan nuit, k-ap kondui rout nou. Pèp ki t-ap maché nan fènoua-a, li ouè yon gran **Limiè**. Lè moun ap maché nan nuit, lè pa gin lali-n, lè niaj yo bouché zétoual yo, yo bézouin yon fannal, yon flach, yon flanbo, pou yo ouè koté y-ap pozé pié yo, pou yo pa viré an ron, pou yo pa rétounin pliziè foua nan koté yo soti-a. Limiè nou sé Jézu-Kri. Li di li sé Limiè lavi-a, moun k-ap suiv li pap maché nan fènoua. Sé li minm ki rout la, koté n-ap maché-a. Si nou gadé sou li, nou pap pèdi chémin. Noèl sé fèt Limiè ki kléré nan fènoua, k-ap kondui rout nou.

Dépi lanj la té fi-n mandé la Trè Sint Vièj Mari konsantman-l pou-l aksépté vi-n Manman Pitit Bondié-a, la Trè Sint Vièj Mari té kòmansé yon pèlérinaj spésial avèk "oui" li té di-a. Li sou rout al kay Élizabèt. Li sou rout Bétlèèm. Min li plis sou rout ankò anndan fon kè yo. Li kité Bondié kondui-l, lè-l blijé pati al Éjip pou-l sové lavi ti Pitit la. Sa Bondié paré pou nou, anyin pa gin doua pran-l. Lavi nou kapab sanblé sé yon échèk li yé, min anndan fon kè nou, Bondié la avèk nou, **ÉMANUÈL**. Nou kapab pèdi zanmi nou, moun ki té gin konfians nan nou, moun ki t-ap défann minm kòz ak nou, min anndan fon kè nou, Bondié la avèk nou, **ÉMANUÈL**.

Noèl sé fèt Limiè ki kléré nan nuit, k-ap kondui rout nou. Moyiz t-ap maché kòm si-l t-ap fiksé jé-l sou sa yo pa kapab ouè-a (Mc 11,27). Noèl invité nou dépasé sa nou ouè ak jé nou, ki troulé nou, ki riské dékourajé nou. Pèp ki t-ap maché nan fènoua, li ouè yon gran Limiè, Moun yo ki té chita nan fènoua lonbraj lanmò-a, yon Limiè kléré sou yo (Mt 4,16; Is 9,1; Jn 8,12). Sé Jézu, **ÉMANUÈL**, Bondié avèk nou. Li tou piti, li kouché sou pay, sé

pòv ki antouré-l, Mari, Jozèf, gadyin mouton yo. Lè gadyin mouton yo rakonté sa lanj yo di yo-a, Mari kinbé tou sa, l-ap kalkilé-l nan fon kè-l (Lc 2,19). Min Limiè k-ap kléré-l sou rout li. Sa Bondié promèt la, l-ap réalizé-l. Sèlman, ki fason Bondié chouazi, li pa konnin. Sé nan lafoua l-ap fè pèlerinaj li-a. Limiè lafoua kléré anndan fon kè-l.

Noèl sé fèt Limiè ki kléré nan nuit, k-ap kondui rout nou. Mouin sé yon pòv k-ap trinnin tou patou, koté-m pasé m-sé étranjé, min mouin sètin lè m-a janbé lòt bò, m-a jouinn koté pou-m répozé. Sa-k fè nou gin kè soté, sa-k fè nou boulvèsé, sa-k fè nou trakasé? Sé paské nou vlé instalé, olié nou kontinué maché sou rout la nan nuit la, avèk Limiè Jézu k-ap kléré nou-an. Nou konté sou pròp tèt pa nou, nou pran désépsion. Nou réfizé rékonèt nou tronpé. Nou mét Bondié akoté pou nou bati kay la. Nou sézi, lè nou ouè li pa kapab fini (Ps 127,1; cf Gn 11,1-9). Nou mét Bondié akoté pou nou défann vil la, nou sézi lè nou ouè nou pèdi batay la (Ps 127,1). Si Bondié pou nou, kilès ki kapab kont nou? (R 8,31; Is 50,7-9). Nou vo kichòy nan mézi nou rébondi apré chak échèk nou résévoua. Yon échèk pa doué krazé nou. Li doué fè nou maché, pou nou vòltijé pi louin. Sou tè sa-a sé pasé n-ap pasé. Vré kay nou sé nan Sièl la. Pitit Bondié-a désann vi-n montré nou vré chémin sa-a. Li sèvi nou Limiè. Li di nou tou nou sé Limiè tè-a. Sé pou édé frè ak sè nou yo pou yo pa instalé, pou yo déplasé sou rout la, nan pèlerinaj sot nan fènoua al nan Limiè, nan pèlerinaj sot nan mansanj al nan lavérité-a, nan pèlerinaj sot nan rayisans al nan rinmin-an, nan pèlerinaj sot nan kè soté al nan kè pozé-a, nan pèlerinaj sot nan lanmò al nan lavi-a.

Noèl sé fèt Limiè ki kléré nan fènoua, k-ap kondui rout nou. Nan nuit Noèl apré mès minuit, Sint Tèrèz lanfan Jézu t-al gadé nan soulié-l pou-l ouè sa Ti Jézu té poté pou li. Pandan l-ap désann éskalié-a, li rankontré sè-l, Séli-n, ki di-l: "Pa désann". Sèké papa yo té faché anpil. Li té di: Laj Tèrèz rivé-a, pou-l kouè nan bagay konsa toujou! Li di sé dènié ané li mét kichòy nan soulié Tèrèz pou Noèl. Séli-n pa-t vlé kité Tèrèz ouè kontrariété papa-l, pou révéyon-an pa-t gaté. Li konn abitud Tèrèz, ki rinmin kriyé pou yon ti krik yon ti krak. Tèrèz santi dlo ap monté nan jé-l. Min li valé kontrariété-l. Li pran pòz inosan-l. Li fè kòm si li pa rémaké si papa-l faché. Li désann byin trankil, li pran kado yo nan soulié-l. Li anbrasé papa-l ak kè kontan. Dépi lè sa-a vi-n gin yon chanjman ki fèt anndan fon kè-l. Li kité abitud kriyé li té ginyin-an. Li vi-n tounin yon lòt moun. Li rélé sa "gras Noèl" li, **fòs** sa-a Bondié té ba li-a. Sé gras sa-a nou minm tou nou souété résévoua, dévan désépsion nou kapab rankontré, fòs anndan fon kè nou, pou nou pa kité ninpòt ki réaksion dékontré nou, pou nou kontinué maché nan pèlerinaj

lafoua nou, san nou pa troublé, épi sitou san nou pa pèdi tras rout lacharité-a, ni nan paròl nou, ni nan aksion nou.

Noèl sé fèt Limiè ki kléré nan fènoua, k-ap kondui rout nou. Gras Noèl sa-a Tèrèz té résévoua-a, sé té tankou yon kòmansman pèlérinaj li t-ap fè nan tout lavi-a, pèlérinaj **lafoua**, ki fè-l dépasé aparans sansib k-ap jinnin égzèsis volonté-l. Gras sa-a, sé ti Jézu nan Krèch la ki té ba li-l, ti Jézu ki tou fèb la, tou pòv la, tou piti-a. Sin Pòl di: "Lè-m fèb, sé lè sa-a mouin fò, paské fòs Bondié déplouayé nan féblès" (cf 2 Co 11,10.9). Noèl sé fòs Bondié nan féblès lézòm. Pouvoua Bondié tèlman gran, lè-l touché nou nou santi nou fèb kon-on pay. Limiè Bondié tèlman kléré, lè l-ap kondui nou, nou tankou chòv-sourit ki avéglé dévan-l. Sajès Bondié tèlman rich, lè-l avèk nou nou tou pòv dévan-l. Noèl, ÉMANUËL, Bondié avèk nou, sé mèvèy sakré sa-a, koté Bondié rankontré moun.

Noèl sé fèt Limiè ki kléré nan fènoua, k-ap kondui rout nou, nan pèlérinaj lafoua-a. Sé la Trè Sint Vièj Mari ki té viv mèvèy sakré sa-a an premié, sou rout, nan trou ròch, tankou pèlérin ak étranjé (cf 1 p. 2,11). Mouin sé yon pòv k-ap trinnin tou patou, koté-m pasé, m-sé étranjé, min mouin sètèn lè m-a janbé lòt bò, m-a jouinn koté pou-m répozé.

Noèl sé fèt Limiè ki kléré nan nuit, k-ap kondui rout nou. **Limiè, Rout.** Jézu sé Limiè, Jézu sé Rout. N-ap mandé "Notre-Dame de la Lumière, Notre-Dame de la Route", pou nou suiv Jézu-Limiè, Jézu-Rout, nan tout sikonstans lavi nou, minm si nou pa ouè klè.

*

"Ouvrez les **Portes** au Rédempteur". "Il n'y avait pas de place pour eux à l'hôtellerie" (Lc 2,7). Ouvrez les Portes au Rédempteur. Nan nuit Noèl la, pa-t gin plas pou Jézu, Mari ak Jozèf nan lotèl Bétléèm. Tout pòt rét fèmin. "Il est venu chez lui et les siens ne l'ont pas reçu" (Jn 1,11). "Je suis à la porte et je frappe. Si quelqu'un m'ouvre, j'entrerai chez lui, je souperai avec lui en tête à tête" (Ap 3,20). Ouvrez les Portes au Rédempteur. Ki pòt? Pòt lafoua-a, pòt léspérans la, pòt lacharité-a, pòt lakontrision-an. Chak soua anvan nou dòmi, lè nou fi-n fèmin pòt chanm nou, nou ajénou nan pié kabann nou, nou louvri tou lé kat pòt sa yo nan lapriyè di-soua nou fè, antan nou résité akt-de-foua, akt-déspérans, akt-de-charité-, akt-de-kontrision. Nou louvri pòt lafoua-a, nou louvri pòt léspérans la, nou louvri pòt lacharité-a, nou louvri pòt lakontrision-an. Ouvrez les Portes au Rédempteur. Kat pòt sa yo, yo bay sou kat panno kay kè nou. Yo ranmasé tou lé kat dimansion lanségman katéchis nou: lafoua, léspérans, lacharité,

lakontrision. Pòt lafoua-a louvri sou lanségnman Krédo-a. Pòt léspérans la louvri sou lanségnman Nòtré-Pè-a. Pòt lacharité-a louvri sou lanségnman dis Kòmandman Bondié yo. Pòt lakontrision-an louvri sou lanségnman Sakréman yo ak légliz la. Ouvrez les Portes au Rédempteur. Chak soua anvan nou kouché, lè nou fi-n fèmin pòt chanm nou, nou louvri kat pòt kè nou nan akt dé foua, nan akt désépérans, nan akt de charité, nan akt de kontrision.

Nou louvri pòt **lafoua**-a nan Bondié, ki gin tout pouvoua-a, ki kréyé sièl la ak tè-a, nan Jézu-Kri, sèl Pitit li-a, Grammèt nou-an, ki pran nésans nan vant gras a léspri Sin, li minm la Trè Sint Vièj Mari anfanté, sa n-ap kalkilé yon fason spésial nan mès Noèl la, li minm ki soufri sou Pons Pilat, ki mouri sou Koua-a, ki antéré, ki désann koté mò yo t-ap tann nan, ki lévé sou toua jou, ki monté nan sièl, ki chita adouat Bondié Papa-a ki gin tout pouvoua-a, koté l-ap vi-n pou-l jijé ni moun k-ap viv, ni moun ki mouri yo. Minm pòt lafoua sa-a, nou louvri-l tou nan léspri Sin-an, nan légliz katolik la ki sin-an, nan tout Sin yo ki fè yon sèl kò-d-fanmiy nan, nan padon pou péché yo, nan Kò yo k-ap lévé sot nan lanmò-a, nan lavi ki pap janm fini-an. Pòt lafoua sa-a nou louvri-a, nan Krédo-a, kòm nou konstaté, sé plis sou fasad Jézu-Kri l-ap gadé. Sé pi fò osijè Jézu-Kri yo palé nan Krédo-a.

Nou louvri dézièm pòt la nan **akt-désépérans** la sou Nòtré-Pè-a. pòt sa li minm, sé plis sou fasad Papa-a li gadé, li minm ki nan sièl la, nou espéré pou yo réspékté non-l, pou yo rékonèt sé li ki Roua, pou volonté-l fèt sou tè-a tankou nan sièl la. Nou espéré l-ap ba nou pin nou bézouin chak jou-a jodi-a minm, nou épéré l-ap padonnin péché nou tankou nou minm nou padonnin moun ki fè nou kichòy. Nou espéré li pap kité nou pran nan pièj, min l-ap délivré nou ak sa ki mal.

Nou fi-n louvri pòt lafoua-a sou Krédo-a lè nou fi-n résité akt de foua nou, anvan nou kouché nan kabann nou, antan nou gadé pi fò sou fasad Jézu-Kri. Nou fi-n louvri pòt léspérans la nan Nòtré-Pè-a, lè nou fi-n résité akt désépérans nou, anvan nou kouché nan kabann nou, antan nou gadé pi fò sou fasad Bondié Papa-a. Nou louvri touazièm pòt la nan akt de **charité**-a, sou dis Kòmandman Bondié yo (R 13,8-10; cf Lv 19,8; Ex 20,13ss; Dt 5,17) ki rasanblé nan lacharité-a Pòt sa-a gadé pi fò sou fasad léspri Sin-an, léspri rinmin-an. Nou pran désizyon pou nou sèvi yon sèl Bondié, pou nou pa pran-l non-l pou jouèt, pou nou réspékté jou dimanch, pou nou réspékté papa nou ak manman nou, pou nou pa touyé, pou nou pa fè mové plézi, pou nou pa vòlè, pou nou pa sèvi témouin-manti, pou nou pa mét lidé nou sou madanm moun, pou nou pa anvri byin prochin nou.

Nou fi-n louvri pòt lafoua-a nan Krédo-a ki bay pi fò sou fasad Jézu-Kri, anvan nou kouché nan kabann nou, antan nou résité akt de foua-a. Nou fi-n louvri pòt léspérans la nan Nòtré-Pè-a ki bay pi fò sou fasad Bondié Papa-a, anvan nou kouché nan kabann nou, antan nou résité akt déspérans la. Nou fi-n louvri pòt lacharité-a nan dis Kòmandman Bondié yo, ki bay pi fò sou fasad léspri Sin-an, anvan nou kouché nan kabann nou, antan nou résité akt de charité-a. Nou louvri katriyèm pòt la nan akt de **Kontrision**-an, ki pèmèt lagras la vidé nan kè nou, nan sèt kanal sakréman yo anndan légliz la. Bondié vlé rékonsilié nou avèk li. L-ap vidé kè sansib li sou nou. Nou té viré do ba li, nou régrèt, nou rékonèt nou sé péchè. Sèt sous lavi-l yo éklaté, yo binyin nou ak lavi, ak fòs, ak manjé, ak padon, ak konsolasion, ak mision, ak ankourajman, nan batèm nan, nan konfirmasion-an, nan lékaristia, nan lapénitans la, nan éstrèm onksion-an, nan lòd la, ak nan mariaj la. Tou sa, anndan légliz la, ki yon Manman pou nou. Tout sous sa yo éklaté nan kè Jézu, lè-l sou Koua-a. Ni sakréman yo, ni légliz soti nan kòt li, tankou Èv té soti nan kòt Adan. Li té fèk fi-n di: "Madanm, min pitit ou... Min Manman-ou" (Jn 19,26-27).

Konsa, nou louvri pòt lafoua-a nan Krédo-a, ki bay pi fò sou fasad Jézu-Kri, anvan nou kouché nan kabann nou, nan akt de foua-a. Nou louvri pòt léspérans la nan Nòtré-Pè-a, ki bay pi fò sou fasad Bondié Papa-a, anvan nou kouché nan kabann nou, nan akt déspérans la. Nou louvri pòt lacharité-a nan dis Kòmandman Bondié yo, ki bay pi fò sou fasad léspri Sin-an, anvan nou kouché nan kabann nou, nan akt de charité-a. Kanta pou katriyèm pòt la, lakontrision-an, nou louvri-l nan sèt Sakréman yo, nan légliz la, anvan nou kouché nan kabann nou, nan akt de kontrision-an. Li bay yon fason spésial sou fasad Mari, Manman légliz la, Manman légliz Bondié-a, "Médiatrice de toutes grâces". Katriyèm pòt sa-a, nou doué fè atansion pou-l rét louvri byin laj, pou lagras kè sansib Bondié-a antré ak tout fòs li. Kondision li bézouin, sé pou nou gin lakontrision, sé pou nou régrèt mové chémin nou té pran, sé pou nou fè pénitans, sé pou nou fè konvèsion. Kè sansib rékonsiliasion Bondié-a ap pasé nan katriyèm pòt sa-a sitou. Manman Mari, "Mère de Miséricorde", la pou-l kinbé pòt la louvri byin laj pou nou. Sé li minm ki té premié louvri pòt kè-l pou Misérikòd Bondié désann sou tè-a nan sèl Pitit li-a. Sé li minm ki té anfanté-l nan nuit Noèl la, nan Krèch Bétlèèm nan. Sé li minm ki té fè-l louvri pòt mirak li yo nan nòs Kana-a avèk divin kòm sign pòt kè-l ki t-ap louvri sou Koua-a pou-l vidé san-l ba nou. Ouvrez les Portes au Rédempteur. Pa fè tankou moun Bétlèèm yo, ki pa-t louvri pou Jézu, Mari ak Jozèf. Ouvrez les Portes au Rédempteur. Louvri pòt lafoua-a ki bay sou Krédo-a. Louvri pòt léspérans

la ki bay sou Nòtré-Pè-a. Louvri pòt lacharité-a ki bay sou dis Kòmandman Bondié yo. Louvri pòt lakontrision-an ki bay sou sèt Sakréman yo ak légliz la. Ouvrez les Portes au Rédempteur. Louvri pòt lafoua-a ki bay sou Krédo-a pi fò nan fasad Jézu-Kri-a. Louvri pòt léspérans la ki bay sou Nòtré-Pè-a pi fò nan fasad Bondié Papa-a. Louvri pòt lacharité-a ki bay sou dis Kòmandman yo pi fò nan fasad léspri Sin-an. Louvri pòt lakontrision-an ki bay sou sèt Sakréman yo ak légliz la yon fason spésial nan fasad Manman Mari.

Ouvrez les Portes au Rédempteur. Louvri, anvan nou kouché, nan akt de foua, nan akt désépérans, nan akt de charité, nan akt de kontrision. Ouvrez les Portes au Rédempteur. Pa fè tankou épouz du Cantique des cantiques, ki di li fi-n kouché, li pap lévé pou-l sal pié-l, pou-l al louvri. Fiansé-a kontinuyé chémin-l. Madanm nan pèdi chans li (Ct 5,2-8). Ouvrez les Portes au Rédempteur. Gin anpil mouyain légliz mété ala dispozision nou pou-l fè sous lagras la débòde pou nou. Sé pou nou louvri pòt kè nou nan la pénitans, nan la konvèsion, nan la kontrision, pou nou pèmèt lagras sa-a antré. Pòt légliz yo louvri pou nou. Pa fèmin pòt kè nou. Ouvrez les Portes au Rédempteur. Louvri pòt lafoua-a, louvri pòt léspérans la, louvri pòt lacharité-a, louvri pòt lakontrision-an. Louvri pòt lafoua-a nan Krédo-a, louvri pòt léspérans la nan Nòtré-Pè-a, louvri pòt lacharité-a nan dis Kòmandman Bondié yo, louvri pòt lakontrision-an nan sèt Sakréman yo ak légliz la. Louvri pòt kè nou pou Jézu antré, louvri tout plat min nou pou nou patajé. Noèl: "Misérikind Bondié anbrasé mizè lézòm. Noèl: pòt lagras Bondié louvri pou-l antré nan pòt kè lézòm. Noèl: Rékonsiliasion Bondié lonjé min bay Pénitans lézòm.

*

"**Kè pozé** pou moun yo ki gin bòn volonté-a". Sé méyaj Noèl la sa. Sé konsa lévanjil mès minui-an fini (Lc 2,14). Sé kè pozé-a tou réfrin pou antré-a déklaré: Jodi-a vré **kè-pozé**-a désann pou nou sot nan sièl la. "Chè **kè pozé**, sé dènié non yo bay ti pitit la ki fèt la nan nuit sa-a, dapré premié léktu lamès minui-an (Is 9,6). Li kontinuyé, li di: "**Kè-pozé**-a pap gin finisman".

Kè kontan-an, sé sign sou pa déyò k-ap montré kè pozé nou gin sou pa anndan-an. Sé pou sa réfrin pou antré-a invité nou gin kè kontan, li di: "Sé pou nou fè **kè nou kontan** nan Grammèt la". Sé konsa tou premié priyè-a di: "Fè nou joui minm **kè kontan** avèk li nan sièl la". Premié léktu-a bay minm méyaj sa-a avèk Izayi 9,2 "ou pa-t fè **kè kontan**-an vi-n anpil. Y-ap **kontan** dévan-ou, tankou moun ki kontan nan rékòlt..." Kanta Psòm répons la (Psòm 95 = 96), li invité tout kréasion-an fè kè-l kontan, li di nan vèsè 11 la:

"Sé pou sièl yo kontan, pou tè-a dansé", épi nan vèsè 12 la "jadin yo ap kontan..." Priyè apré kominion-an di "**Kè nou kontan**".

Limie kléré nan fè noua-a. Noël sé fèt limiè. Sé dènié jou nan ané-a koté nannuit la pi long la nan péyi koté Jézu té fèt la (yo rélé sa "solstice d'hiver"). Apré sa, solèy la ap remonté (dapré fason nou konn palé-a), jounin yo ap vi-n pi long, lannuit yo ap rakousi. Jézu-Kri sé li minm ki kléré nan fènoua péché-a. Sé konsa prémié priyè-a di: "Bondié, nuit sa-a, sé yon nuit ki sakré. Ou fè-l **kléré** avèk vré **limiè**-a. Prémié léktu-a (Is 9,1) di: "Pèp la ki t-ap maché nan fènoua-a, li ouè yon gran **limiè**; moun yo ki abité nan réjion lonbraj lanmò-a, yon **limiè** lèvé sou yo". Dézièm léktu-a di: "Jézu-Kri k-ap vini nan **bèlté**-l la" (Tit 2,13). Nan lévanjil la, nou tandé Sin Luk di nou: "**Klété** Bondié-a vlopé yo (gadyin yo)" (Lc 2,9). Réfrin pou kominion-an di: "Nou ouè **bèlté**-l" (Jn 1,14). Préfas la di: "Lè Paròl la tounin moun, sé **limiè**-ou la minm ki vi-n **kléré** nou...".

Sovè-a rivé. Réfrin pou antré-a di-l: "Sila-a ki **sovè** nou-an, li fèt sou tè-a". Sé li minm ki limiè-a, k-ap ba nou kè pozé ak kè kontan-an. Réfrin Psòm répons la ki soti nan Luk 2,11 di: "Jodi-a yon **Sovè** fèt pou nou...". Psòm sa-a (95 = 96) di nan vèsè 2 "Anonsé jou an jou **délivrans** la". Dènié léktu-a di "Favè Bondié **Sovè** nou-an parèt dévan tout moun... Bondié **Sovè** nou Jézu-Kri..." (Tit 2,11.13). Vèsè nan alélouya-a di "Jodi-a yon **Sovè** fèt pou nou" (minm jan ak réfrin Psòm répons la = Luk 2,11). Sé minm sa nou jouinn nan lévanjil la (Lc 2,11). Priyè apré kominion-an di: "Li vi-n **délivré** nou".

Noël sé -- kè pozé
 -- kè kontan
 -- limiè
 -- délivrans

Gadyin yo travèsé jous Bétléèm pou yo ouè PARÒL la ki rivé-a (Mès matin), Paròl sa-a Mari té kinbé nan kè-l ap kalkilé-a (Lc 2,15.19). Sé Jézu-Kri li minm minm. Pandan tout moun ap palé, ap chanté, ap fè brui, Mari minm rét an silans (= Luk 2,51; 8,21; 11,28). Sé silans li ki vlopé ti Jézu nan krèch la. Sé silans ki pi adapté avèk Paròl Bondié-a (1 Roua 19,12; Abakuk 2,20; Sofoni 1,7; Zakari 2,17; Apokalips 8,1). Li bézouin silans pou fè tandé-l. Sajès 18,14 di konsa: "Sé lè yon silans byin kalm té vlopé tout bagay, lè lannuit la té rivé nan mitan kous li-a, sé lè sa-a Paròl ou ki gin tout pouvoua-a té désann sot nan sièl la..." (= réfrin pou antré dézièm dimanch apré Noël). Atitud Mari-a, sé atitud moun k-ap adoré an silans. Mèvèy sakré sa-a tèlman gran, sé mét douèt sou bouch ou, pou-ou

konsidéré-l. Jodi-a nan "Mouin kouè gin yon sèl Bondié"-a, yo mét ajénou, lè yo rivé koté ki di: "Sé pa pouvoua léspri Sin-an kò li vi-n fèt nan vant Mari ki Vièj, é li tounin yon moun". Sonjé silans Mari-a, k-ap adoré Jézu.

Noèl sé tan banbòch, révéyon. Nan matin, pa gin anpil moun nan mès. Y-ap dòmi. Krétyin doué gin yon atitud ki blijé lòt moun yo réfléchi. Antré nan fin-fon sans mèvèy sakré sa-a. Sé konsa limiè nou ap kléré nan fènoua tè-a.

Kòmansman lévanjil Jan-an (= mès lajounin), yo té konn li-l lontan alafin chak mès, tèlman li inpòtan. Yo té konn mét ajénou, lè yo rivé koté ki di: "Paròl la vi-n tounin chè, li abité nan mitan nou". Lévanjil sa-a montré kijan Jézu-Kri sé limiè lavi-a. N-ap sonjé kijan "li vi-n lakay li, min moun lakay li pa résévoua-l" (Jn 1,11). Pa-t gin plas pou yo nan lotèl, yo té trò pòv (= Luk 2,7).

Moun yo té trò vlopé nan préokipation tè-a, nan égoïsis yo, yo pa-t rékonèt vizit Grammèt la, "Chak kouikouiy kléré pou grinn jé-l", sé sa yo té adopté kòm prinsip. Lè limiè-a vi-n kléré yo-a, yo pito ti limiè kouikouiy yo-a pasé limiè solèy la. Yo fi-n abitué ak fènoua. Sin Jan di "nou ouè bèlté-l" (Jan 1,14). Sé konsa prémié léktu-a di "Tout limit tè-a ap ouè délivrans Bondié nou-an (Is 52,10). Minm sa réfrin Psòm répons la di (Psòm 97 = 98, vèsè 3c). Sé sa réfrin kominion-an di tou avèk minm Psòm 97 la (= 98) vèsè 3.

Sèlman pou nou rékonèt li, sé pou nou aksépté konsidéré tout moun kòm moun, kòm égal avèk nou, ki gin minm doua avèk nou, okontrè minm ki sipériè pasé nou (= Filipyin 2,3). Dènié plas la Jézu pran-l pou-l lévé tout moun anlè. Fèt Noèl la, sé fèt pòv yo. Gin koté yo fè résépsion pou pòv yo, jou sa-a. Sé yon fason pou montré nou rékonèt Jézu-Kri nan yo. "Noèl lakay pòv".

*

"Gloire à Dieu au plus haut des cieux, sur terre **PAIX** aux hommes qu'il aime" (Lc 2,14).

Sint Tèrèz lanfan Jézu té di yon lè: "Bondié pa mété nou kòm "juges de paix", li mété nou kòm "Anges de paix". Sa vlé di li pa mandé nou pou n-ap chèché sa-k gin rézon, sa-k gin tò; li mandé nou pou nou anonsé lapè, pou nou chèché mété lapè; pou nou vi-n tounin "artisans de paix" (Mt 5,9).

Chèché konnin koté rézon-an yé-a, ak koté tò-a yé-a, sé youn. Chèché mété lapè ant sa-k gin rézon-an ak sa-k gin tò-a, sé dé. "Juges de paix" sé youn, "Anges de paix" sé dé. Daprè ròl ou chouazi-a, ou-ap sèvi ak mouyain diféran. "Juge" ap chèché konnin. "Ange" ap poté nouvèl. Chèché konnin

pa minnin byin louin. Poté nouvèl rivé jous nan bout tè-a. Chèché konnin fè: "chat konnin, rat konnin, barik mayi-a rété intak". Poté nouvèl fè moun ki pa-t kapab antann yo tankou chyin ak chat, yo vi-n fè yon sèl kò-d-fanmiy, pou lou abité avèk mouton, pou tig kouché bò kot kabrit, pou bèf manjé ansanm ak lion, pou ti moun piti joué ak gro koulèv méchan (Is 11,6-8). "Juge de paix" sé youn. "Ange de paix" sé dé.

Gin moun, métié yo sé pran pòz jij nan tout bagay, sé chèché fouyé zo nan kalalou, pou drésé tout moun ak tout katégori moun youn kont lòt. Sé travay Satan-an sa, jan non-l vlé di-a: "diabolòs", sa vlé di sila-a k-ap divizé-a. Sé poua yo rélé-l "djab". Métié yo sé gaté tout zanmi ki ginyin, sé simin zizani tout koté, sé mété dout nan kè tout moun. Sé kòm si sé sèl, pouav ak piman y-ap vidé san rété, pou éksité moun batay, sé poua-graté y-ap soufflé pou fè moun éksité, sé chalè y-ap bay pou fè kòk yo bay kout zépon pi cho. Sé nan sa djab la jouinn plézi-l. Sé la li alèz. Sé travay li y-ap fè pou li. Époutan nan prémié nuit Noël la, Bondié voyé "Ange de paix" anonsé Bòn Nouvèl la tè-a t-ap tann dépi konbyin tan-an: "Gloire à Dieu au plus haut des cieux, sur terre **paix** aux hommes qu'il aime" (Lc 2,14). Bondié sé rinmin (1 Jn 4,8). Sé poua li anonsé lapè, lapè koté ki té gin lagè. Sé poua Jézu di: Sé chans pou moun yo k-ap chèché mété lapè tout koté, y-ap rélé yo piti Bondié (Mt 5,9). Li di Mésajé-l yo: koté yo rivé, sé pou yo di: "Lapè pou kay sa-a" (Lc 10,5). Pouki gin moun k-ap travay pou simayé divizion, pou éksité kòlè, pou soufflé difé vanjans, sou prêtèks sé doua moun yo y-ap chèché fè yo konnin, fè yo réklamé, fè yo pran ak fòs? Nan ki pasaj lévanjil la nou ouè sa? Èské sé yon lòt lévanjil yo invanté (Ga 1,6-9; 2 Co 11,4)? Époutan Jézu li minm di: "Nou té tandé yo di jé pou jé, dan pou dan, ébyin mouin minm mouin di nou: pa rézisté méchan-an; min si yon moun frapé-ou sou bò machoua douat ou, prézanté lòt bò-a ba li tou; moun ki vlé fè-ou prosè pou-l pran chémiz ou, kité ata palto-a ba li; ninpòt ki moun ki vlé fòsé-ou fè yon kilomèt, fè dé avèk li. Moun ki mandé-ou, ba li; moun ki vlé pran nan min-ou ak fòs, pa évité-l" (Mt 5,38-42). Si nou rété ap lonnin tout ti doua nou ginyin, ak yon lonn ki méziré égzak, san nou pa lagé yon santimèt, koté ak ki lè lapè sa-a Jézu-Kri mouri-résisité kité pou nou-an ap bay rézilta-l?

"Juge de paix" sé youn. "Ange de paix" sé dé. Jézu voyé nou kòm Mésajé lapè. Sin Pòl di: "Kité yo rékonsilié nou ak Bondié" (2 Co 5,20). Li voyé déklaré lapè pou sa-k té louin yo ak lapè pou sa-k té pré yo (Ep 2,17). Li fè tout moun vi-n fè yon sèl, antan-l krazé miray rayisans la (Ep 2,14.16) ak san-l li vidé sou Koua-a. Nan li pa gin ni Grèk, ni Juif, ni piti Abraam ak sa-k pa piti Abraam, ni ignoran ni savan, ni ésklav ni moun lib... ni gason

ni fi (Col 3,11; Ga 3,28; cf R 10,12; 1 Co 12,13). Nou pa gin pou n-ap insisté sou diférans ant moun ak klas moun ak ras moun. Nou tout nou fè yon sèl nan Jézu-Kri. Dépi premié nuit Noël la li poté lapè ba nou. L-ap signin mèsaj lapè sa-a sou Koua-a. Lapè pou sa-k louin, lapè pou sa-k pré; lapè pou sa-k pòv, lapè pou sa-k rich; lapè pou sa-k piti, lapè pou sa-k gran; lapè pou sa-k déyò, lapè pou sa-k anndan. Pou premié janvié 1986 la, Pap Jan-Pòl II té chouazi kòm konsign jounin lapè-a: "**LA PAIX EST UNE VALEUR SANS FRONTIERES**". Li té invité nou gadé nan kat diréksion: Nò ak Sid, Ès ak Ouès, pou yo rasanblé nan yon sèl lapè. Nò ak Sid, sé tèt ak pié Koua-a. Ès ak Ouès, sé bra goch ak bra douat Koua-a. Lapè sé yon valè ki pa gin frontiè. Sé yon sèl lapè ki ginyin. Pa gin lapè anndan tèl blòk sèlman oubyin anndan chak blòk yon fason séparé. "Nord-Sud, Est-Ouest, une seule paix". Sé fraz sa-a yo té kléronnin tout koté pou jounin premié janvié 1986 la, pou édé nou réfléchi sou mèsaj Pap Jan-Pòl II té ba nou-an: "La paix est une valeur sans frontières". Pa doué gin frontiè parapò a lapè-a ant Nò ki réprézanté péyi rich yo ak Sid ki réprézanté péyi pòv yo. Pa doué gin frontiè parapò a lapè-a ant Ès ki poté étikèt péyi sosialis yo ak Ouès ki poté étikèt péyi kapitalis yo. "La paix est une valeur sans frontières".

Lapè-a sé tankou yon dlo k-ap koulé anba tè, san yo pa ouè-l, ki travèsè divès réjion, divès propriété, ki gin divès mèt ki instalé sou yo. La paix est une valeur sans frontières. Sé li minm k-ap fè tout moun fè yon sèl. Sé li minm k-ap fè péché-a ki té divizé nou-an sédé plas bay lagras ki vi-n rékonsilié nou-an. Nan premié nuit Noël la, "Ange de paix" yo déklaré: "Gloire à Dieu au plus haut des cieux. Sur terre PAIX aux hommes qu'Il aime" (Lc 2,14).

N-ap mandé Manman Mari, "Notre-Dame de la Paix", pou-l fè nou sispann défann intèrè nou tankou chyin k-ap défann zo ki nan bouch yo. Sé pou nou aprann patajé. La paix est une valeur sans frontières. Nord-Sud, Est-Ouest: une seule paix. Gloire à Dieu au plus haut des cieux, sur terre Paix aux hommes qu'Il aime.

*

Rékonsilié: 5 fous nan lansyin Téstaman, 10 fous nan Nouvo Téstaman: 2 Mac 1,5; 7,33; 8,29; Job 22,21; Pr 16,7; Mt 5,24; R 5,10a,b; 1 Co 7,11; 2 Co 5,18.19.20; Ep 2,16; Col 1,20.22

Rékonsiliation: 3 fous nan lansyin Téstaman, 4 fous nan Nouvo Téstaman: 2 Mac 5,20; 13,23; Si 22,22; R 5,11; 11,15; 2 Co 5,18.19.

*

* *

FANMI JÉZU, MARI AK JOZÈF KI SIN-AN A

Lapè sé plis pasé anpéché lagè, sé yon chanjman mantalite. Sous li sé nan kè-a li yé, ki pou sansib, ki pou bon, ki pou pòv, ki pou dou, ki pou gin pasians, ki pou konn sipòté lòt, ki pou padonnin minm si-l gin rézon pou-l fè répròch: tou sa kòm baz rinmin-an, ki pou fè nou fè yon sèl FANMIY (Col 3, 12-13). Chanjman mantalite sa-a li invité nou, dapré sa Pap Pòl VI té di nan priyè pou lapè-a, pou nou: "remplacer la haine par l'amour, la méfiance par la compréhension, l'indifférence par la solidarité". (Journée de la Paix 1968, p. 66). Mo solidarité sa-a li tankou yon krochèt ki pèmèt nou fè raprochman avèk konsign Pap Jan Pòl II té ba nou pou jounin lapè 1987 la: "Développement et solidarité: clés de la Paix". Alokazion fèt lasint Famiy la, sé nomal pou nou insisté sou solidarité-a.

Dépi ané 1950 nan ané sint la, Mgr Baldelli té òganizé yon mouvman yo rélé: "lampe mondiale de la Fraternité" (ib 67-68). Sé ansyin sòlda lagè ak fanmiy moun ki mouri nan lagè yo ki té okipé sa. Yo anbéli simitiè lagè yo, yo pran souin manman moun ki mouri nan lagè yo, ni vèv yo, ni ofélin yo. Lè Pap Pòl VI té louvri jounin lapè-a nan finisman ané 1967 la, té gin déjà plis pasé 20 nasion sou tout tè-a ki té patisipé nan mouvman sa-a. Kòm sign yo gin yon lanp ki toujou limin. Lanp sa-a yo té déjà poté-l nan plis pasé 160 simitiè lagè. Épi alokasion premié déklarasion Pap Pòl VI la, pou jounin lapè an 1968 yo depozé-l sou tonbo Sin Bénoua ak Sint Skolastik, ki sèvi kòm lotèl prinsipal nan légliz Monastè Mont-Cassin-an, monastè sa-a bonb yo té détrui pandan lagè-a. Sé yon fason yo vlé montré solidarité ak tout moun ki soufri ravaj lagè, pou yo kontinuyé fè tandé paròl Pap Pòl VI té di dévan réprézantan tout nasion yo a l'ONU: "Plus jamais, jamais la guerre". Anvan n-al chèché siprimé lagè ant nasion yo, anvan n-al chèché siprimé batay ant group yo, sé pou nou komansé mété solidarité antré nou avèk moun ki soufri onivo òganizasion byin, òganizasion sosisiété, òganizasion politik.

An 1971, Pap Pòl VI té bay kòm konsign pou jounin lapè-a: "Tout homme est mon FRÈRE" (cf Mt 23, 8). Gin yon kalité solidarité, olié-l dévlopté lapè, sé lagè l-ap limin. Yo rélé sa "solidarité close": (cf Journée de la Paix 1971, VIII). Moun yo fèmin sou pròp nasion yo, sou pròp ras yo, sou pròp group pèp yo. Diférans yo ouè ak lòt yo, sé sou sa yo insisté; yo toujou tankou kòk ki paré pou batay. Yo pè trayi group yo, si yo aji tankou frè ak ènmi fanmiy yo, ènmi ras yo, ènmi pèp yo. Yo gin inpréson lè yon moun rékonsilié li manké fidélté. Yo triyé moun. Yo mété pasoua pou rélasyon yo pasé. Gin-yin ki pa réyisi travèsé nan griy la, akoz koulè, oubyin katégori pèp yo. Gin

moun ki pa gin koté pou yo rété yon fason fiks, sé déplasé y-ap déplasé tout tan. Gin dèt k-ap travay nan péyi étranjé. Yo pa rékonèt yo, yo éksplouaté yo. Ginyin sé onivo sosiété-a, onivo mòd lavi yo, onivo rélijion-an, yo pa jouinn plas yo. Ginyin sé osijè késion politik. Poutèt yo nan tèl pati, tèl oriantasion lidé, yo pa kapab palé fran ni fè zanmi ak lòt. Sé komsa sou késion sa-a pa gin tolérans. Minm anndan légliz yo jouinn séparasion sa yo. O non minm lévanjil la yon katolik kondané yon lòt. Yo prétann yo alèz ak tout moun. Min yo jinnin ak katolik parèy yo poutèt yo sou tèl bò. Sé pa dé ni toua dèt séparasion konsa nou t-a kapab détayé ankò (cf Journée de la Paix 1971, IX-X).

Époutan nou fè yon sèl FANMIY, paské nou gin yon sèl PAPA (Ep 4, 6; Mt 23, 9). Lanp Fratènitè-a doué limin nan kè nou tout pou nou gin solidarité ak sa lavi-a dézavantajé yo. Sa pa kont pou n-ap défann intèrè yo. Sé pou nou patisipé nan kondision yo. Sé lè sa-a n-ap konprann tout bon vré ki sa yo anvi, ki sa yo bézouin. Otréman nou riské pran lidé pa nou pou lidé pa yo; nou riské mété préokipasion pa nou, nan plas préokipasion pa yo. Nou pa konblé vid la ki rété nan fon kè yo-a. Nou déklase yo. Nou fè yo mété soulié ki trò piti oubyin ki trò gran nan pié yo, paské nou vlé yo sanblé ak nou, olié nou chèché sanblé ak yo pou nou akonpagné yo sou chémin yo-a. Gin moun ki trò présé pou fè sosiété-a chanjé antan yo sèvi ak mouayin brital olié yo sèvi ak fratènitè-a, ak solidarité-a. Pap Pòl VI di nan prèch li té fè pou premié janvié 1971 nan légliz "San Felice da Cantalice" a Rom: "Nous sommes depuis très longtemps intoxiqués par l'idée que c'est seulement par la violence, seulement par les voies de fait qu'on réussit à obtenir quelque chose. Si on ne va pas vers les actes extrêmes, on n'obtient rien. C'est une mentalité qui doit être dépassée" (ib 19). Li bay vré solision problèm nan, antan-l di: "La grande voie à suivre est dans celle que le Seigneur a enseignée au monde. Si nous suivons les commandements d'amour du Divin Maître, nous parviendrons à voir dans les hommes non des antagonistes, ni des ennemis, ni des rivaux, ni des concurrents, mais des frères" (ib). Li invité nou padonin pou nou mérité padon Granmèt la (ib), jan Sin Pòl mandé Kolosyin yo nan lèktu lamès Sint Famiy la (Col 3, 13). Minm si sé yon moun ki pèdi bon sans li, k-ap palé anpil, k-ap fè bagay dròl akoz laj li oubyin maladi nan tèt, sé pou nou gin konpréansyon pou li, pou nou pa méprizé-l, jan Sirasid di nou nan premié lèktu lamès jodi-a (Si 3, 13). Si nou anfas moun ki pa nan péyi yo, nou doué trété yo avèk respè, délikatès, pou nou pa fè yo chagrin paské yo louin famiy yo ak pèp yo, ak abitud péyi yo. Okontrè sé pou fè yo santi koté yo yé-a, sé nan famiy yo ak nan pèp yo ak nan péyi yo yo yé, antan nou sonjé lévanjil la ki montré nou Sint Famiy la, Jézu, Mari, Jozèf, ki blijé pati an-égzil jous nan Éjip akoz pèsékision Éròd la (Mt 2, 13-23).

Si nou komansé chanjé kè nou, lapè-a ap rivé nan sosiyété-a ak nan pèp yo. Pap la di: "Commençons par notre coeur, pour le rendre bon, fort, miséricordieux, capable de voir les besoins et les misères d'autrui, capable de secourir les autres, capable de donner la main à qui est plus faible, à qui est tombé, avec un sens de fraternité et de miséricorde. Et vous verrez que les choses s'amélioreront et un jour la paix triomphera au nom du Christ et au nom de la civilisation"(ib 20).

N-ap mandé Manman Mari favè sa-a pou nou chanjé kè nou, pou nou ouè Frè nou nan tout moun.

*

1968: 1er janvier: Journée mondiale de la Paix; le prix de la Paix;

1969: La promotion des droits de l'homme, chemin de la Paix;

1970: S'éduquer à la Paix à travers la réconciliation;

1971: Tout homme est mon frère;

1972: Si tu veux la Paix, agis pour la justice;

1973: La Paix est possible;

1974: La Paix dépend aussi de toi;

1975: La réconciliation, chemin vers la Paix;

1976: Les vraies armes de la Paix;

1977: Si tu veux la Paix, défends la vie;

1978: Non à la violence, oui à la Paix;

1979: Pour parvenir à la Paix, éduquer à la Paix;

1980: La vérité, force de la Paix;

1981: Pour servir la Paix, respecte la liberté;

1982: La Paix, don de Dieu confié aux hommes;

1983: Le dialogue pour la Paix, un défi pour notre temps;

1984: D'un coeur nouveau naît la Paix;

1985: La Paix et les jeunes marchent ensemble;

1986: La Paix, valeur sans frontières;

1987: Développement et SOLIDARITÉ, deux clés pour la Paix;

1988: La liberté religieuse, condition pour vivre ensemble la Paix;

1989: Pour construire la Paix, respecter les minorités;

1990: La Paix avec Dieu créateur, la Paix avec toute la création;

1991: Si tu veux la Paix, respecte la conscience de tout homme;

1992: Croyants: tous unis pour la construction de la Paix;

1993: Si tu cherches la Paix, va à la rencontre des pauvres;

1994: De la famille naît la Paix de la famille humaine;

1995: La femme éducatrice de Paix;

1996: Donnons aux enfants un avenir de Paix;

- 1997: Offre le pardon, reçois la Paix;
 1998: De la justice de chacun naît la Paix pour tous;
 1999: Le secret de la Paix véritable réside dans le respect des droits humains;
 2000: Paix sur terre aux hommes que Dieu aime;
 2001: Dialogue entre les cultures pour une civilisation de l'amour et de la Paix;
 2002: Il n'y a pas de Paix sans justice; il n'y a pas de justice sans pardon;
 2003: Pacem in terris un engagement permanent;
 2004: Un engagement toujours actuel: éduquer à la Paix;
 2005: Ne te laisse pas vaincre par le mal, mais sois vainqueur du mal par le bien;

*

Gin yon flè yo rélé églanti-n. Li gin 5 "pétales": youn sé yon ti moun 7 an, yon lòt sé yon jèn jan 15 an, yon touazièm sé yon moun 20 an, yon katriyèm sé yon mésié 30 an, yon sinkièm sé yon pèsonaj 40 an. Nou mandé ti moun 7 an-an sa-l ouè nan mariaj la, li di youn ap travay, lòt la ap fè pitit. Nou mandé jèn jan 15 an-an sa-l ouè nan mariaj la, li di: Plézi. Nou mandé moun 20 an-an sa-l ouè nan mariaj la. Li di: Amitié. Nou mandé mésié 30 an-an sa-l ouè nan mariaj la. Li di: Fanmiy. Nou mandé pèsonaj 40 an-an sa-l ouè nan mariaj la. Li di: Ouvètu. 7 an: Mariaj la sé youn ap travay lòt la ap fè pitit. Sa vlé di sé youn konplété lòt. Yo pa manjé kalalou ak yon sèl douèt 15 an: mariaj la sé plézi, sa vlé di sé yon fason pou moun nan jouinn bonè li. 20 an: mariaj la sé amitié. Sa vlé di sé kominoté ki pèmèt dé santiman ran-kontré pou akòdé ansanm tankou nòt mizik k-ap akonpagné kantik. 30 an: mariaj la sé FANMIY: sa vlé di sé mouayin pou yo fè pitit, pou yo édiké yo. 40 an: mariaj la sé ouvètu. Sa vlé di sé posibilite pou dévlopé sosisié-a, pou édé lavi ak mision légliz la réyisi. Konplémantarité, plézi, amitié, fanmiy, ouvètu. Sé sink "pétales" flè yo rélé églanti-n nan.

Lè dé moun ap marié, yo nan laj touazièm "pétale" la. Amitié-a. Dé moun ki ouè "bon-anj" yo kapab alé ansanm, ki ouè sa-k anndan kè yanm sé ti kouto ki konnin-l, ki ouè gin posibilite pou youn palé ak lòt sou tout kalité kèsion, ki ouè youn respèkté lòt, ki ouè youn chouazi lòt antan-l ouété lidé-l sou tout lòt yo, ki ouè yo desidé rété fidèl jous nan bout, minm jan Jézu-Kri fidèl pou légliz li. Y-ap rivé yon lè, y-ap nan laj katriyèm pétal la, sé FANMIY nan y-ap konsidéré: pitit yo y-ap fè yo, y-ap édiké yo. Liv Provèb yo di konsa: "Kouròn gran papa ak grann, sé pitit pitit yo" (Pr 17, 6). Sa pa kont pou yo fè pitit, sé pou yo édiké yo tou. Premié édikaté sé papa ak manman. Lè yo aprann ti moun yo lapriyé, sa rété yo pandan tout lavi yo. Ti moun yo gadé

sa papa ak manman yo fè, pou yo pran modèl. Gin yon ti moun tou piti, yon lè ki pran yon manchèt ki té dèyè pòt kay la, l-al nan lakou-a, li koupé yon kalbas, li kòmansé fann li, li nètouayé-l, li mété-l séché, épi l-al séré-l byin louin. Papa-l ak manman-l mandé-l konsa: "Pouki sa ou fè sa-a?" Li di: "Mouin ouè chak foua yo drésé kouvè sou tab la, nou tout nou manjé sou tab, min mouin ouè gran papa-m ak grann mouin, sé nan koui y-ap manjé. Mouin fè yon ti koui tou pou-m séré, pou lè n-a vié granmoun pou-m ba nou manjé ladan-l".

Moun ki marié yo pap rét nan laj touazièm pétal la, amitié-a; y-ap dépasé laj katriyèm pétal la, fanmiy nan. Sé nan pélérijaj yo yé. Y-ap rivé laj sinkiyèm pétal la: ouvètu-a, koté y-ap gin préokipasion pou rankontré dèt fanmiy, pou yo antré nan dimansion sosisété-a ak légliz la, pou yo akéyi yo, pou yo sèvi yo, pou yo gin solidarité ak yo, pou ansanm ak yo yo transfomé sosisété-a, yo défann doua yo, yo anpéché yo sèvi ak yo tankou machandiz, pou yo montré sé yo minm ki résponsab kantité pitit yo vlé ginyin, pou yo pa kité okinn propagann chaviré léspri yo, pou yo sèvi lafoua yo témouin, pou yo fidèl nan lapriyé yo, nan lamès yo, k-ap ba yo fòs pou yo réalizé dévoua yo.

Ouvètu sa-a ap fè yo dékouvri vré sans rinmin-an sé Bondié. Mariaj la sé sign rinmin Jézu-Kri gin pou légliz la. Tout tè-a an mal danfan, l-ap plinn antan l-ap tann révélation-an fi-n parèt klè nèt (R 8, 19; Ap 22, 1-1) nan nòs ki pap janm fini yo, Jérusalèm anrò-a k-ap désann tankou yon bèl madanm marié ki paré pou-l al rankontré mari-l (Ap 21, 2; Ct 8, 5-7; Is 54, 10; 62, 4-5; 61, 10; Os 2, 21; Jer 31, 21; Jn 3, 29; 2 Co 11, 2; Ep 5, 32; Jn 2, 1-11). Kouròn gran papa ak grann sé pitit pitit yo. Sé bénédiksion Bondié té bay Adan ak Èv: "Dévelopé, fè anpil pitit, plin tè-a, réglé fòs li" (Gn 1, 28). Kouròn gran papa ak grann sé pitit pitit yo. Péché-a té séparé nou. Rédanmsion-an rasanblé nou. Ti moun rasamblé paran yo. Fanmiy yo rasamblé nan légliz la pou fè pèp Bondié-a. Gin yon Psòm yo chanté pou mariaj ki di konsa: "Comme des plants d'oliviers à l'entour de la table du Seigneur, ainsi les enfants de l'Église" (Pr 128, 3). Kouròn gran papa ak grann sé pitit pitit yo. Églanti-n nan gin sink pétal: Konplémantarité, plézi, amitié, fanmiy, ouvètu. 7 an, 15 an, 20 an, 30 an, 40 an. Min, kouron gran papa ak grann sé pitit yo. Gran papa-a ak grann nan dépasé laj 40 an, laj ouvètu-a.

Lè y-ap gadé kouròn nan, flè sink pétal yo pa kont yo, yo bézouin yon lòt flè, pasé églanti-n nan pou yo fè kouròn nan, yon flè ki gin pétal sou pétal tankou roz konsa, sé yon kouròn roz gran papa ak grann bézouin, yon flè ki dépasé konplémantarité, plézi, amitié, fanmiy, ouvètu. Jou premié mès yon jèn Pè, manman Pè-a t-ap palé ak yon misionè, li montré-l chaplè-l, chaplè-a té vié anpil. Li di misionè-a konsa: "Ou ouè chaplè sa-a, si-l rivé nan éta sa-a, sé paské sé pa ti kras lapriyé mouin lapriyé avèk li, pou pitit mouin-an té

kapab rivé Pè jodi-a". Kouròn gran papa ak grann sé pitit pitit yo. Sé kouròn roz ki DÉPASÉ sink pétal églanti-n nan. Nou té mandé ti pitit 7 an-an sa mariaj yé, li té ouè Konplémantarité. Nou té mandé jèn 15 an-an sa mariaj yé, li té ouè Plézi. Nou té mandé moun 20 an-an sa mariaj yé, li té ouè Amitié. Nou té mandé mesié 30 an-an sa mariaj yé, li té ouè Fanmiy. Nou té mandé pèsonaj 40 an-an sa mariaj yé. Li té ouè Ouvètu. Sé sink pétal églanti-n yo. Konplémantarité, plézi, amitié, fanmiy, ouvètu. Min gin pi louin toujou, sé "noces éternelles" la. Sé kouròn roz la. Bon édikasion ann-dan yon fanmiy fè jèm vokasion kapab dévlopé byin. Pitit la ap tandé voua Bondié, l-ap réponn li, l-ap chouazi pou-l sèvi sosiété-a ak légliz la nan yon ouvètu ki dépasé ouvètu odinè yo (Lc 1, 38; 1 Sm 3, 10). Yon jou l-ap rété konsa l-ap di: "Papa, manman, mouin vlé fè Pè, mouin vlé fè Frè, mouin vlé fè Sè". Vokasion yon ti moun sé nan kè papa-l ak manman-l li komansé. Manman Sint Térèz lanfan Jézu té vlé fè Mè, li pa-t réyisi. Papa-l té vlé fè Moua-n, li pa-t réyisi. Yo tou lé dé bay Bondié tout pitit yo. Yo tout vi-n tounin rélijjèz.

Vokasion yon ti moun sé nan kè yon manman ak yon papa sa pran nésans. Jou batèm ti moun nan, yo konn prezanté-l bay la trè Sint Vièj Mari. Se Rèn Fouayé-a. Yo rélé protéksion Sin Jozèf sou li yon fason tou spésial. Sé Patron tout Fouayé. Vokasion yon ti moun, sé nan kè yon manman li pran nésans, dépi nan kè la Trè Sint Vièj, Manman nou tout, dépi nan kè Sin Jozèf, Patron nou tout.

Konplémantarité, Plézi, Amitié, Fanmiy, Ouvètu, min tou dépasman. Églanti-n nan di Roz la: "JODI-A POU MOUIN, DÉMIN POU OU"...

FANMI JÉZU, MARI AK JOZÈF KI SIN-AN B

Nan Lèt ansiklik Pap Jan-Pòl II té ékri pou Ané marial la, li di: lè la Trè Sint Vièj Mari ofri Jézu nan Tanp la, li résévoua yon **dézièm anons**: sa Siméyon déklaré-l la. Mari rénouvlé konsantman-l.

Pap la di: "Ce que dit Syméon apparaît comme **une seconde annonce faite à Marie**, car il lui montre la dimension historique concrète dans laquelle son Fils accomplira sa mission: dans l'incompréhension et dans la souffrance. Si, d'une part, une telle annonce confirme sa foi dans l'accomplissement des promesses divines du salut, d'autre part, elle lui révèle aussi qu'elle devra vivre l'obéissance de la foi dans la souffrance aux côtés du Sauveur souffrant, et que sa maternité sera obscure et douloureuse" (Redemptoris mater 16).

Mari sou rout, nan pélérijaj lafoua-l la. Li fi-n di anj la oui "an gro". L-ap rénouvlé "oui" sa-a "an détay", nan chak kalfou lavi-a. Sa-l pa-t prévoua nan premié "oui"-a, lè-l ouè-l klè li aksépté-l, minm si-l vlopé ak soufrans. Dépi Bètlèèm, lè pèsou pa-t vlé louvri pòt pou li-a, lè-l té blijé anfanté Pitit la nan trou ròch la, koté bèt yo manjé-a, li té gin doua mandé ki kalité mòd Roua sa-a anj la té anonsé-l la. Li té gin doua mandé si sé pa yon rèv li té fè, li té gin doua mandé si-l té byin konprann mèsaj la. Roua Maj yo ap rasiré-l ak lò-a, ki reprézanté pouvoua Roua-a; ak lansan-an, ki reprézanté pouvoua Bondié-a; min gin lamir nan tou, ki anonsé lonbraj lanmò-a.

Mari té kinbé tout bagay sa yo, li t-ap kalkilé yo nan kè-l. Ofi-amézi y-ap déroulé dévan-l, l-ap rénouvlé konsantman-l ak **ofrann** li. Pap la di: "Les paroles de Syméon mettent dans une nouvelle lumière l'annonce que Marie a entendu de l'ange: Jésus est le Sauveur, il est **lumière** pour éclairer les hommes. N'est-ce pas cela qui a été manifesté, en quelque sorte, la nuit de Noël, quand **les bergers** sont venus à l'étable? (cf Lc 2, 8-20). N'est-ce pas cela qui devait être manifesté davantage encore lorsque vinrent des **Mages d'Orient** (cf Mt 2,1-12)? Cependant, dès le début de sa vie, le Fils de Marie et sa Mère avec lui, éprouveront aussi eux-mêmes la vérité des autres paroles de Syméon: "un signe en butte à la contradiction" (Lc 2,34; RM 16).

Réyéلمان vré Mari ap blijé sové nan Éjip (Mt 2,13), l-ap travèsè "lannuit lafoua" sa-a Sin Jan-d-la-Koua palé-a (cf Montée du Carmel, 1. II, ch. 3,4-6; RM 17). Lè-l tounin, pandan ané "lavi kaché" Jézu Nazarèt la, lavi pa-l ap kaché tou ansanm ak Jézu-Kri nan Bondié (Col 3,3) nan lafoua (cf RM 17), nan lonbraj niaj la ki voualé prézans Bondié-a (Lc 1,35; Ex 24,16; 40,34-35; 1R 8,10-12). Li minm Bondié dévoualé mèvèy sakré Pitit li-a an premié (Mt

11,25.27; 1 Co 2,11), sé nan lafoua l-ap viv révélation sa-a, atèl pouin li pap konprann sa Jézu ap di-l, lè-l jouinn li nan Tanp la: "Pouki sa nou t-ap chèché-m nan? Èské nou pa-t konnin sé nan afè Papa-m pou-m té yé? (Lc 2,48-50). Jous nan pié lakoua-a l-ap rénovlé "oui" li té di-a (Jn 19,25). Koua-a t-a gin doua parèt tankou yon "démanti" paròl anj la (RM 18), ki té déklaré ringn Jézu-a pa t-ap janm fini-an (Lc 1,32-33).

Tout moun méprizé-l, yo abandoné-l, li tankou fini (Is 53,3-5). Mari rédi "oui", antan-l vidé tou sa-k nan li ki t-a anpéché-l di "oui" sa-a (Ph 2,5-8). Li konnin sa Bondié desidé, yo pa kapab sondé yo (R 11,33; cf RM 18). Pap la di: nan pié lakoua-a, sé la li té pozé pi gran akt-dé-foua-a ki vidé moun nan nèt, nan istoua ras lèzòm: "C'est là, sans doute **la "kénose" de la foi** la plus profonde dans l'histoire de l'humanité" (RM 18).

Sé lafoua sa-a n-ap mandé-l, pou nou rénovlé angajman nou fi-n bay la, chak foua nou rankontré bariè ki anpéché nou kontinué rout pèlerinaj lafoua nou.

*

* *

FANMIY JÉZU, MARI AK JOZÈF KI SIN-AN C

Apré toua jou yo jouinn Jézu nan kay sakré-a. Li gin pou-l di, lè l-ap gin trantan: "Krazé kay sakré sa-a; apré toua jou, m-ap drésé-l" (Jan 2,19. Sé té jou fèt Pak la li té di sa tou. Sé lanmò-l li vlé montré davans déjà dépi-l gin douzan. Y-a konprann apré. Mari ap kalkilé tou sa nan kè-l. Li sou katriyèm stasion chémin-Koua-l. Tout manman nan lavi-a ap maché sou chémin-Koua akoz pitit yo. Lavi fanmiy nan, sé yon lavi k-ap monté mòn Kalvè. Mari ak Jozèf pa jouinn Jézu ni nan pami fanmiy, ni nan pami zanmi, min sé kay Granmèt la. Tout fanmiy sé yon machéskalié pou monté nan étaj anlè-a, sètadi nan gran fanmiy légliz la. Tout lavi-a, sé yon pélérijaj nan diréksion Jérusalèm anro-a, pélérijaj sa-a n-ap fè ansanm nan, an fanmiy. Min lè ti moun yo rivé yon laj pou yo fè chémin yo, koté Bondié rélé yo-a, paran yo pa doué ba yo bariè. Lè paran yo pa konpran konpòtman yo paské Bondié mandé yo pou yo suiv li pi pré, pa jinnin chémin yo. Sa pa anpéché pou aprann ti moun yo obéyi paran yo, pou paran yo pa dékourajé yo nan mòd jan lédikasyon y-ap ba yo-a, pou papa trété manman avèk délikatès, pou pa séré kè ti moun yo, pou madanm réspékté mari pou pa ba-l lokazion al pran fréchè lòt koté...

Pa bliyé: "Le linge sale se lave en famille". Pa kité moun déyò konnin afè nou. Diskision roy-roy, déblozay k-ap mét tout katié-a an boulvès. Padonnin, bliyé sa, jou alé, jou vini. Solèy kouché, Solèy lévé. Aprann lapriyé ansanm. Lapriyé-a sé yon gonm k-ap éfasé tout ti kont. Sinòd évèk yo a Ròm an 1980 sé sou FANMIY li té dévloé. Ané 1979 la sé ané ti moun. Fè ti éfò pou nou sanblé ak Jézu, Mari, Jozèf. Sonjé ti priyé yo té konn fè ti moun yo résité chak soua nan pié kabann yo, anvan yo dòmi:

Jézu, Mari Jozèf, mouin rinmèt nou kè-m, nanm mouin, léspri-m ak lavi-m.

Jézu, Mari, Jozèf, asistè-m nan dènié moman lavi-m.

Jézu, Mari, Jozèf, fè-m mouri nan prézans nou ki sin-an.

Sonjé tou Jozèf ki sin sé patron tout fanmiy. Lè nou résité litani li, nou rivé yon koté ki di: "Soutyin fanmiy yo, lapriyé pou nou". Bènadèt ki sin di nou konsa: "Lè nou pa kapab lapriyé, lapriyé Jozèf ki sin". Papa ak manman, lagé kò nou ak tout problèm nou nan kòlèt Jozèf ki sin. L-ap réglé afè nou fin pou nou. Li pa konn mizé nan rout ak komision pitit Bondié ki gin lafoua yo. Fè-l konfians.

An 1975, sé té ané médanm yo, an 1979 sé ané ti moun yo; min nou gin pou nou sonjé moun ki gin anpil laj yo tou jan premié léktu lamès jodi-a di nou-an: "Pitit mouin, sipoté viyéyès papa-ou; pa fè-l lapinn nan lavi-l; épi si lés-

pri-l fébli, padonnin-l, pa méprizé-l, nan fòs ou-a". Nou sonjé mesiè sa-a ak madanm li-a ki té konn bay papa yo manjé nan kouiy, pandan yo minm yo t-ap manjé sou tab ak pitit yo. Gin yon ti pitit ki ouè sa, l-al chèché yon kalbas, li kòmansé vidé-l, li pran kouto-l, l-ap fè dé kouiy avèk li. Papa-l ak manman-l mandé-l: "Sa ou-ap fè la-a?" Li di: "M-ap paré kouiy, pou-m ba nou manjé, lè n-a vié granmoun"... Rinmin gin délikatès.

Sèl divizion ki kapab ginyin nan yon FANMIY, sé osijè désizyon pou suiv konsign Jézu-Kri. Nan sans sa-a Jézu di: "N-ap gin pròp moun nan fanmiy nou pou lènmi nou" (Mt 10,36). Apa sa, rékòmandasion nou jouinn, sé gin respè pou pròp fanmiy nou (1 Tm 5,4). Lè délij la tè fi-n détrui tout ras moun sou tè-a, sé yon sèl fanmiy ki té rété, nan kay-batiman-an, sé fanmiy Noé-a (He 11,7), uit moun sèlman ki té nan fanmiy sa-a (1 p. 3,20 Gn 7,1). Péché ap divizé fanmiy nan joutan moun yo ap gayé nan divès ras ak divès lang (Gn 11,1ss). Abraam ap gin mision pou-l ranmasé yo tout nan yon sèl fanmiy (Gn 17,1ss). Min pròp fanmiy pa-l pap réyisi viv an-pè. Izaak ak Ismaèl yo chak fè yon bò (Gn 21, 8-21). Ézayu ak Jakòb yo chak pran yon diréksion (Gn 27-28). Pitit Jakòb yo vann pròp frè yo, Jozèf (Gn 37). Min gin yon tan pou-ou faché, gin yon tan pou-ou rékonsilié (Qo 3,3.7.8). Ézayu anbrasé Jakòb apré plis pasé katòz ané séparasion (Gn 33). Jozèf padonnin frè-l yo, yo rékonsilié apré anpil ané divizion (Gn 45,50,17).

*

Kòlè pa fèt pou diré. Sé difé pay. Yon lè li monté, paské pay la anpil, van-an souflé fò. Min Sin Pòl di pa kitè solèy kouché sou kòlè nou. Pa bay djab priz sou nou (Ep 4,26 cf Ps 4,5). Bondié fè nou sou pòtrè li (Gn 1,27). Li sé Bondié ki abitué padonnin (Ne 9,17; Ps 86,5; 99,8; 103,3; 130,4; Si 18,12; Is 55,7). Sé poua li mandé nou padonnin jouska souasandis foua sèt foua (Mt 18,21ss). Jézu ba nou égzanp nan dènié paròl li déklaré sou Koua-a: "Papa, padonnin yo, yo pa konn sa y-ap fè" (Lc 23,34). Nou tout nou fè yon sèl kò-d-fanmiy nan San Jézu-Kri ki vidé sou Koua-a, ki rasanblé tout moun nan kè-l (Jn 12,32). Sé poua nou doué youn padonnin lòt (Ep 4,32), minm si sé yon afron piblik yon moun fè nou oubyin fè tout yon kominoté (2 Co 2,5-11). Jézu padonnin nou tout péché nou (Col 2,13; 1 Jn 1,9). Sé poua nou doué youn padonnin lòt (Col 3,13). Tout jis-pri Abraam té fè avèk Bondié pou-l ouè si Bondié t-a padonnin Sodòm ak Gomò, Bondié té dakò (Gn 18,24ss) sé Abraam ki rété nan chémin. Pasians Bondié pa gin limit. Sé sou li pou nou pran modèl. Miriam ak Aaron té révòlté kont pròp frè yo, Moyiz. Moyiz lapriyè pou yo pou Bondié padonnin yo, (Nb 12,1-16). Jézu mouri pou-l rasanblé tout pèp, tout ras fè yon sèl fanmiy (Lc 11,52).

Lavèy jou li mouri, li lapriyè Bondié Papa-a pou nou tout fè yon sèl (Jn 17,23). Nou fè yon sèl kò, minm si nou gin anpil manb (R 12,4). Divès oriantasyon nou pa doué vi-n tounin bariè k-ap détrui léspri fanmiy nou. Léspri-Sin pa gin frontiè (Ep 4,3).

Lavi fanmiy sé pa yon lavi ki fasil. Sèké gin moman sa-k rèsponsab la doué fè kèk répròch (2 Mac 2,6). Moun k-ap fè arogan kapab fèmin kè yo dévan répròch yo (Pr 13,1; 29,1). Min sa-k gin sajès yo ap profité (Pr 17, 10). Min tou, moun ki gin rèsponsabilité fanmiy, kominoté, légliz, yo blijé fè atansyon pou yo pa krazé lòt yo avèk répròch ki pa nésésè, si moun nan déjà korijé (Si 8,5). Sé poua yo blijé réfléchi anvan yo fè lòt lobsèvasyon (Si 11,7). Sé pa ninpòt kilè yon moun dipozé pou résevoua lobsèvasyon (Si 20,1). Gin yon tan pou sa, pou moun nan pa gin inprésion sé véyé sèlman ou-ap véyé-l tout tan. Sèlman pito-m rélé pasé-m toufé. Pito nou dégajé kè nou antan nou fè lobsèvasyon-an, minm si nou pran tan, nou chouazi moman, pasé pou nou kinbé-l, kité-l sèvi plak nan kè nou, ki fè nou pa alèz avèk moun nan chak foua nou rankontré-l, nou pa gin rélasyon fran avèk li, n-ap viré lang nou sèt foua chak foua nou gin pou nou adrésé-l laparòl (Si 20,2).

Nou doué fè atansyon tou pou nou pa kité avantaj sèvi kadna sou bouch nou, pou nou pa fè lobsèvasyon-an, paské nou jouinn intèrè kèlkonk nan min moun nan, soua kado, soua rélasyon zanmi nou pè gaté (Si 20,29). Gin dé foua sa blijé nou fè yon désizyon pou nou chouazi, aksèpté ouè tout zanmi nou viré do ba nou tankou bann zouazo nou voyé ròch dèyè yo, lè nou fè zanmi nou lobsèvasyon yo mérité (Si 22,20). Léspri fanmiy nou doué chita sou lavérité, pou kè yo chofé nan lacharité. Sètènman nou doué évité fè moun nan ront dévan lòt yo, sitou si yon lè gin fèt, gin bouason ki chofé tèt li (Si 31,31). Min pa poté péché-l; si-l an-tò, pran tan-ou, rélé-l a-dé, apa, épi yon lè li trankil, li dispozé pou-l kouté, fè dévoua-ou ak tout délikatès ou kapab min tou avèk tout san-foua-ou. Sin Fransoua-d-Sal di: ou pran plis mouch ak yon kuyè mièl pasé ak yon barik vinèg.

N-ap mandé Manman Mari pou-l fè nou gin pasians nan rélasyon nou gin ak lézòt yo, pou nou fè yon sèl fanmiy ki pa chita sou aparans, min ki pran rasi-n nan rinmin Bondié Papa-a ak Pitit la ak léspri Sin-an, ki pran modèl sou Sint Fanmiy Nazarèt la, koté Jézu, Mari ak Jozèf fè sièl la désann sou tè-a.

*

fanmiy: 268 foua nan lansyin Téstaman, 10 foua nan Nouvo Téstaman. Gn 7,1; 20,13; 24,38.40.41; 34,19; 35,2; 41,51; 42,19.33; 43,7; 45, 11. 18; 46,26.27.31a.b; 47,12.24; 50,8a.b.22; Ex 1,1; 6,14.25; 12,3.21.37;

Lv 25,45.47.49; Nb 1,2.4.18.20.24.27.28.30.32.34.36.38.40.42.44.45; 2,2.32.34; 3,15.20; 4,2.22.29.34.38.40.42.46; 7,2; 11,10; 16,32; 17,17a.b.18.21; 25,14.15; 26,2; 31,26; 32,28; 34,14a.b; 36,1a.b; Dt 11,6; 25,5; Jos 2,18; 7,14a.b.17.18; 14,1; 19,51; 21,1a.b; 22,14a.b; 24,15; Jg 6,27; 1 Sm 1,21; 2,36; 9,21; 18,18; 22,1.11.15.16; 24,22; 27,3; 2 Sm 2,3; 3,29; 6,11.12; 9,1.2.3.9.10; 14,9; 15,16; 16,3.5; 19,19.29.42; 21,1.4; 24,17; 1 R 2,31; 14,10.11.13; 16,4.11; 18,18; 21,21.24; 2 R 8,1.2.27a.b; 9,7.8a.b.9; 10,10.17; 1 Ch 4,38; 5,13.15.24a.b; 38,12; Esd 1,5; 2,59.68; 3,12; 4,2.3; 8,1.29; 10,16; Ne 4,7; 7,4.41.69.70; 8,13; 10,35; 11,13; 12,12.13.14.15.16; 12,17a.b.18.19a.b.20a.b.21a.b.22.23; Tob 5,9.11.14; 6,18; Jdt 8,2.18; Est 4,17m; 9,28; 1 Mac 3,32; Job 31,34; Ps 22,28; 68,11; 96,7; 107,41; Jer 1,15; 2,4; 3,14; 10,25; 25,9; 31,1; 33,24; 38,17; Dan 1,3; Am 3,1.2; Za 14,17.18; Mt 10,36; Ac 3,25; 4,6; 11,14; 1 Co 1,16; 1 Tm 5,4; 2 Tm 1,16; 4,19; Tit 1,11; He 11,7.

padon: 14 fous nan lansyin Téstaman.

Ne 9,17; Ps 86,5; 99,8; 130,4; Sg 18,2; 21,1; 45,23; Is 55,7; Dn 9,9

padonnin: 77 fous nan lansyin Téstaman, 18 fous nan Nouvo Téstaman.

Gn 18,24.26; 50,17a.b; Ex 10,17; 23,21; 32,32; 34,9; Lv 4,20.26.31.35; 5,10.13.16.18.26; 19,22; Nb 14,19.20; 15,25.26.28; Dt 21,8a.b; 29,19; 1 Sam 15,25; 25,28; 2 Sam 12,13; 24,10; 1 R 8,30.34.36.39.50; 2 R 5,18a.b; 24,4; 1 Ch 21,8; 2 Ch 6,21.25.27.30.39; 7,14; Ne 3,17; Tob 13,2; 2 Mac 12,42; Ps 25,11; 32,5; 10,3; Sg 6,6; Si 5,6; 16,7; 20,28; 27,21; 28,2.5; 34,19; Is 6,7; 22,14; 27,9; Jer 5,1.7; 18,23; 31,34; 33,8; 36,3; 50,20; Lm 3,42; Ez 16,63; Dn 9,19; Os 1,6; Am 7,2.8; 8,2; Mi 7,18; Mt 18,21.35; Mc 4,12; Lc 23,34; Ac 8,22; 2 Co 2,7.10a.b.c; 12,13; Ep 4,32a.b; Col 2,13; 3,13a.b; He 8,12; 1 Jn 1,9.

unité: 4 fous nan Nouvo Téstaman-an:

Jn 11,52; 17,23; R 12,4; Ep 4,3.

lapè:

Si 36,18: Granmèt, moun ki konté sou ou yo, ba yo lapè

Jer 29,11: Pansé-m yo, sé pansé lapè sé pa pansé malè

Is 2,2-5: Nasion pap lévé épé kont nasion ankò

Is 9, 1-7: Péyi koté-l roua-a gran, nan yon lapè ki pap fini

Is 57, 15-21: Lapè pou sa ki louin, lapè pou sa ki pré

Ba 5,1-9: Bondié ap rélé-ou pou tout tan: Lapè, travay jistis la

Ps 72,7: Nan jou-l yo jistis ap fléri, ak gran lapè pou tout tan

Ep 2,12-18: Sé li minm lapè nou; sé pou fè yon sèl nan léspri-a gras a kòd lapè-a

Ph 4,4-9: Lapè Bondié-a ap kinbé kè nou ak pansé nou nan Jézu Kri

Jc 3,15-18: Yo simin yon frui lapè jistis nan lapè pou moun ki donnin lapè yo

Jn 14,27: Mouin kité lapè pou nou, mouin ba nou lapè-m nan

Mt 5,9: Sé chans pou moun k-ap travay pou lapè yo

Mt 5,38-48: Mouin di nou pou nou pa rézisté méchan-an

Jn 20,19-20: Lapè avèk nou

Ps 28,11: Bondié béni pèp li-a nan lapè

Ps 33,15: Rénonse mal la, fè byin-an, rapousuiv lapè pou tou tan

Si 4,1-11: Doua pòv la, moun y-ap maltrété-a, vèv la ak òfélin-an

Ps 84,9: Sa Granmè la di, sé lapè pou pèp li-a

Col 3,9-15: Anlè tout bagay sé lacharité-a, koté nou rivé vi-n kòrèk nèt la

Lc 10,25-37: Rinmin Bondié ak prochin-an: Bon Samaritin-an

Is 11,1-9: Roua ki kòrèk la, k-ap fè lapè-a, l-ap vini

Jn 13,1-17: Nou minm tou sé pou nou yon lavé pié lòt

1 Tm 1,28: Lagras pou nou, ak kè sansib ak lapè sot nan Bondié Papa-a ak Granmèt Jézu-Kri

Ga 1,3-5: Favè pou nou ak lapè sot nan Bondié Papa nou ak Granmèt Jézu ki rinmèt tèt li pou péché nou yo

Ex 22,22-36: Réspè pou étranjé-a, vèv la ak òfélin-an; sé pou yo prété ak bon kè; sé pou yo rinmèt sa yo pran kòm gaj la

Is 58,1-12: Jén ki fè Granmèt la plézi, sé fè sa ki kòrèk avèk lacharité

Mi 4,1-4: Ringn lapè Bondié nan Siyon

Za 9,9-10: Roua-Mési-a ap kòmandé an pè

*

* *

ÉPIFANI GRANMÈT LA

Épifani, sé fèt **Rout**, sé fèt **Limière**, sé fèt **Misionè**, sé fèt **lobéyisans lafoua**. **Épifani, sé fèt Rout** (Mt 2,1ss; Is 9,1ss). Lè nou té nan péché, **fènoua** té vlopé nou, nou pa-t ouè koté n-ap maché; Zétoual la kléré chemin nou nan lafoua. Fènoua péché-a té kinbé nou nan ésklavaj, chinn yo tonbé sot nan min nou ak nan pié nou (Ac 12,1-19; 16,16-40; Ex 13,17-14,31). Anj la ap kondui nou nan nuit. Épifani sé fè Rout. Solèy la mèt kaché fas li, lali-n nan mèt tou pal, Zétoual yo mèt pa parèt, nou pa konn koté n-apralé; n-ap maché nan nuit, min sé anndan fon nan nuit la Zétoual la kléré (Mt 2,13.23; Ap 22,5; Is 60,19). Épifani sé fèt Rout. **Rout** la mèt long anba pié nou, falèz tou pré nou, frédi ap glasé nou, n-ap maché nan nuit tou noua-a, nou sétin n-ap rivé, paské Zétoual la sé nan fè noua li kléré (2 Co 11,23-29; Gn 15,12; 28,10.22; Ex 2,1-10). Épifani sé fèt rout. Nou mèt kité tout **travay** nou, ni asirans nou san nou pa poté ti gout dlo, nou gin éspoua n-ap **konblé** (Jn 6,1-21; Mc 8,14-21; Ex 15,22-17,7; Jn 4,1-15; Lc 9,53-56), Zétoual la ap kondui nou tou douat. Épifani sé fèt Rout. Nou pa jouinn yon paròl moun pou **konsolé** nou, tèt nou chajé ak lapinn, sé pou nou louvri kè nou dé batan, sou rout n-ap maché nan nuit la, Zétoual la ap kondui nou (Lc 22, 39-46; Is 40,1ss; Mt 26,36-46; 11,28-30; Lc 2,34-35; Jn 19,4; 7,37-39). Épifani sé fèt Rout. **Dlo nan jé** mèt binyin nou, sé pou nou pozé tèt nou sou kè Manman nou, pou nou dòmi trankil, kon Jézu nan batiman-an pandan tanpèt la, nou pa doué pè, Zétoual la ap kondui nou jous nan bout, malgré lannuit la mèt byin long, n-ap ouè limière, min anndan fon lannuit la, antan nou sou rout la (Lc 7,36-50; Ps 42,4; 131,2; Mc 4,38; Ps 1,6; 4,9; Is 30,15; Lc 19,41; Jn 11,35; Lm 1.2.9.12.16; 2,11.18; 3,48). Épifani sé fèt Rout. Tout lavi nou sé yon rout k-ap pasé nan fè noua, sé yon ti Zétoual lafoua-a k-ap kléré nou tankou Roua Maj yo. Épi sé lè nou bézouin, li parèt. Lè nou konté sou moun, li disparèt. Sé antan n-ap maché li parèt; lè nou instalé, li disparèt. Kon Roua maj yo ap chèché asirans koté Éród ak profesè labib yo Jérusalèm, Zétoual la disparèt. Lè yo répati sou rout la, nan nuit la, Zétoual la réparèt.

Épifani, sé fèt Limière. Li kléré tout moun, li kléré anndan kè-n, klété-l chasé fènoua péché-a (Is 9,1; 60,1-3; Jn 8,12; 1,9). **Roua Maj** yo rékonèt limière sa-a, yo ofri-l lò tankou yon roua, yo ofri-l lansan tankou Bondié, yo ofri-l lamir tankou moun ki mouri yo anbomé kò-l (Mt 2,1,12; Is 60,6; Ps 72,10). Jézu roua, Jézu Bondié, Jézu sé moun k-ap mouri pou nou. Épifani déjà montré tou sa davans, nan langaj sign l-ap anlouayé yo. Épifani, sé fèt limière. **Jan-Batis** mété Jézu nan limière. Li rékonèt li sé Mouton Bondié-

a. Sièl la chiré pandan batèm li, pou révélasion-an parèt, an-atandan voual Tanp la chiré pou Révélasion-an rivé nan bout li (Mc1,9-11; Jn 1,29). Épifani sé fèt Limiè. **Mari** mété Jézu nan limiè, lè-l mandé-l divin nan nòs Kana-a; sé Sajès Bondié ki té déklaré li drésé tab li, pou nou vini, pou nou bouè divin (Jn 2,1.11; Pr 9,1-6). Épifani, sé fèt Limiè. **Simon-Piè** mété Jézu nan limiè, lè-l mandé pou-l drésé toua tonnèl: youn pou Jézu, youn pou Moyiz, ak youn pou Éli. Jézu parèt kòm klé laloua avèk Profèt yo. Sé li minm ki bay tout lansyin Téstaman sans li. Li vi-n réalizé laloua ak Profèt yo (Lc 9,28-36; Mt 17,1ss). Épifani, sé fèt Limiè. **Apot** yo mét Jézu nan limiè. Lè y-ap préché jou la Pantkot la, yo fè ouè sé Jézu sèl ki vré Roua-a k-ap bay kè pozé-a, k-ap fè tout nasion yo fè yon sèl tout bon vré, yo tout konprann nan lang pa yo sa Apot yo ap préché-a. Konsa yo tout fè yon sèl (Ac 2,1.11; Is 9,5; 2,4; 11,6-9). Épifani, sé fèt Limiè. **Chak krétyin** mété Jézu nan limiè, nan mézi li viv spiritualité batèm li kòrèk. Lè-l té plonjé nan dlo-a, sé ak Koua Granmèt la li té maké. Aktivité-l sèvi-l témouin, li déklaré klè sé Sovè-l ki délivré-l (Mt 28,20; Ez 9,4; Ap 9,4; R 6,1.11). Épifani sé fèt Rout; Épifani sé fèt Limiè.

Épifani sé fèt Misionè. Sé **tou patou** Jézu voyé nou pou préché, san kondision nou doué louvri kè nou pou nou réponn tankou Nòtré-Dam, tankou ti Samuèl (Lc 1,35; 1 Sm 3,9). Rékòlt la anpil, travayé yo pa asé, sé pou nou louvri kè nou pou nou di-l li mèt voyé nou (Lc 10,2). Épifani sé fèt Misionè. Sé **kon pòv** Granmèt la voyé nou. Li di nou yo ba nou gratis, sé pou nou bay gratis. Li pa pèmèt nou chèché okinn asirans, sé pou nou louvri kè nou pou nou di "min mouin", tankou nan lofètoua lamès la (Lc 10,4; Mt 10,8). Épifani, sé fèt Misionè. Sé **lapè** Jézu voyé nou poté, koté nou pasé. Sé pa kont li voyé nou al réglé, minm si lapè nou poté-a difisil pou fè chémin-l, n-ap vi-n tounin "artisan de paix", moun k-ap travay pou lapè, sé premiè ròl misionè. Nan ninpòt ki kay li antré sé pou-l di: lapè avèk nou". Yon misionè pa gin doua chofé difé. Sé lapè Jézu-a l-ap poté. Pou sa, fò nou gin anpil pasians, pou nou pa dékourajé (Lc 10,5; 2 Tm 4,2). Épifani sé fèt Misionè. **Plan tout prèch** misionè, Jézu trasè-l pou li nan kat pouin: Tan yo rivé. Ringn Bondié-a la. Chanjé fason n-ap viv. Kouè nan Bòn Nouvèl la (Mc 1,15). Sé pou nou louvri kè nou, pou nou di: "min mouin". Épifani sé fèt Misionè. Jézu premiè misionè, **pa minm gin von ròch** pou pozé tèt li, tankou Jakòb sou bò rout la nan nuit (L 9,58; Gn 28,31). Nou pa doué ap chèché instalé nou alèz. Sé pou nou louvri kè nou, pou nou di "min mouin". Épifani sé fèt Misionè. Dépi kay Élizabèt, Nòtré-Dam té réalizé ròl misionè-l nan **sèvis**. Nan kè tout moun, sé li minm k-ap mét dévouman,

pou yo aksépté maché tout koté, poté Bòn Nouvèl la bay pòv yo (Lc 1,39.56). Épifani, sé fèt Rout; Épifani, sé fèt Limiè; Épifani, sé fèt Misionè.

Épifani, sé fèt lobéyisans lafoua. Sin Pòl di nan kòmansman ak nan finisman Épít Romin yo: mision pa-l, sé fè nasyon yo obéyi lafoua-a (R 1,5; 16,26). **Mari** obéyi tout-suit, osito apré li fi-n ouè klè sou fason matènitè-l ap réalizé-a (Lc 1,26-38). Épifani, sé fèt obéyisans lafoua. Lè Jézu rélé Apot yo sou lanmè-a, minm lè-a yo kitè ni batiman, ni filè, ni papa yo, ni travay yo, yo suiv Jézu. Épifani, sé fèt lobéyisans lafoua. Apèn Profèt Éli pozé manto-l sou do **Élizé**, Élizé konprann minm lè-a, min li mandé Éli pou-l anbrasé moun lakay li. Éli pa ba-l tan sa-a. Li fè-l suiv li la minm (1 R 19,19-21; Lc 9,62). Épifani, sé fèt lobéyisans lafoua. **Moyiz** té gin anpil difikilté anvan-l aksépté rénonse sa l-ap fè-a. Bondié kinbé paròl li. Moyiz kinbé pozision-l. Sé kòm si li t-ap chèché débarasé-l ak Granmèt la (Ex 3,7; 4,17). Bondié kinbé fèm, malgré sa, joustann Moyiz aksépté. Épifani, sé fèt lobéyisans lafoua. Izayi bay yon bèl égzanp antan-l pa tann Bondié mandé-l konkou-l pèsonèlman. Sé li minm ki prezanté tèt li bay Granmèt la pou-l al fè komision-l (Is 6,1-8). Épifani, sé fèt lobéyisans lafoua. **Jérémi** té fè tankou Moyiz, min Bondié kinbé fèm, paské sé li minm ki fè tout bagay, ni sa nou vlé-a, ni sa nou réalizé-a (Ph 2,13). Konsa nou pa doué bay tèt nou tròp inpòtans; min an minm tan tou nou pa doué dékourajé dévan okinn difikilté. Nou doué tankou yon vit k-ap kitè réyon solèy pasé (Jer 1,6; 1 Sm 16,7). Épifani, sé fèt Rout; Épifani, sé fèt Limiè; Épifani, sé fèt Misionè; Épifani, sé fèt Lobéyisans Lafoua.

Rout, Limiè, Misionè, Lobéyisans lafoua. N-ap maché sou rout Jézu-Kri. N-ap kitè limiè Zétoual la kléré nou. N-ap asiré mision-an Granmèt la konfié nou-an. N-a aji dapré lobéyisans lafoua-a.

Mari sou rout Éjip nan nuit: li sé "Notre-Dame de la Route". Mari té vlopé ak limiè solèy, lali-n, zétoual: li sé "Notre-Dame de la Lumière". Mari pot Bòn Nouvèl la bay Élizabèt; li orianté lafoua patizan yo: li sé "Reine des Apôtres". Mari obéyi Paròl Bondié-a: li sé "Servante du Seigneur".

"Un enfant nous est né; un Fils nous est donné" (Is 9,5). Fèt Épifani-a, sé jou ki té rézèvé pou "ti moun yo" nan ané Jibilé Rédanmsion-an. Té gin gran rasanbléman ti moun a-Ròm. Pap la té béni yo yon fason spésial. Bénédiksion-l nan ak priyé-l té konsèné tou tout ti moun sou tout tè-a. Roua Maj yo té chèché ti Jézu, yo té maché lontan, anvan yo jouinn li. Lè yo jouinn li, yo mét ajénou dévan-l pou adoré-l. Yo rékonèt li sé Roua; antan

yo ofri-l lò; yo rékonèt li sé Bondié, antan yo ofri-l lansan; yo rékonèt li sé Moun ki gin pou-l mouri; antan yo ofri-l lamir.

Lè Samuèl t-ap sakré David kòm roua, li maché lontan, li rivé kay Jésé, papa David, li fè tout pitit Jésé yo pasé. Pi gran-an vi-n pasé dévan-l an premié, yo té rélé-l Éliab (1 Sm 16,6). Li té gin bèl préstans, li té ro, li té gin fòs. Samuèl pansé nan fon kè-l sé li minm Granmèt la chouazi. Époutan Bondié di Samuèl sé pa li. Fason lézòm pansé, sé pa fason sa-a Bondié pansé. Jijman Bondié dépasé jijman lézòm tankou sièl la dépasé tè-a. Lè tout pitit Jésé yo fi-n pasé sé lè sa-a Samuèl ouè Bondié pa chouazi okinn nan yo. Li mandé Jésé èské li pa gin yon lòt pitit ki pa ko pasé dévan-l. Jésé vi-n sonjé té gin ti David ki t-ap gadiyin mouton nan savann nan. Jésé té bliyé-l, tèlman li té piti. Samuèl fè-l vini. Sé li minm Bondié té chouazi. Samuèl sakré-l roua nan mitan tout frè-l yo (1 Sm 16,1,13). Sa-k pi piti-a, sé li minm Bondié chouazi. Nan pami tout pitit Jakòb yo, sé ti Binjamin papa-a té rinmin (Gn 44,20). Sé li minm ki té pi piti. Nan Ézayu ak Jakòb, sé Jakòb ki jouinn éritaj la, paské li té pi piti (Gn 25,23). Nan Kayin ak Abèl, sé Abèl ki jouinn favè-a paské li pa-t apuyé sou fòs li (Gn 4,4). Jézu di: "Kité ti moun piti yo vi-n jouinn mouin, sé pou yo péyi roua sièl la yé" (Mc 10,14). Jézu mandé nou pou nou fè kò nou vi-n tankou yon ti moun tou piti.

Nan fèt Lépipani-an, koté grandè Jézu parèt nan fòm ti bébé li pran-an, n-ap sonjé mandé la Trè Sint Vièj Mari pou nou gin minm santiman avèk li, pou nou fè kò nou tou piti, tankou yon ti bébé, pou nou aprann résité lapriyé Magnifikat li-a, koté li di: "Granmèt la voyé jé-l sou Sèvant li ki tou piti-a" (Lc 1,48). Roua Maj yo fè yon bèl jès. Yo bliyé grandè yo. Yo mét ajénou dévan yon ti bébé. Avèk lafoua, yo rékonèt sé Bondié ki rabésé tèt li konsa. Ki sa yo minm yo yé pou yo pa bésé atè-a, plouayé jénou yo dévan-l nan? Jézu ba nou égzanp pou nou suiv li. Égal li égal ak Bondié-a, li pa konsidéré sa kòm okinn avantaj pou-l kinbé séré; okontrè li désann nan ran lézòm, li vi-n pi ba minm pasé yo, antan-l aksépté mouri lanmò yon ésklav. N-ap sonjé, nan rapò nou ginyin ak prochin nou, pou nou pa konsidéré tit nou, ran nou, sipériorité nou, pou nou konnin, jan Sin Pòl di Filipyin yo, si gin yon santiman pou nou chèché ginyin, pou amélioré rélasyon kominoté nou, sé minm santiman Jézu-Kri-a, sé umilité, ki kondision lacharité, pou chak moun konsidéré lòt la kòm sipériè-l, san nou pa défann pròp intèrè nou (Ph 2,1-11).

Gin toua pèsonaj sitou pou nou fiksé jé nou sou yo yon fason pi spésial nan fèt lépipani-a: sé Roua Maj yo, sé Jan-Batis, sé Mari. Tou lé toua ba nou égzanp umilité. Roua Maj yo sot byin louin vi-n mét ajénou dévan ti bébé-

a. Jan-Batis déklaré li pa minm mérité défèt lasèt sapat li, sé pou-l grandi, pou li minm minm li bésé (Jn 1,27; 3,30). Mari di li sé Sèvant Granmèt la, li voyé jé sou Sèvant li-a ki tou pòv la. Toua pèsonaj sa yo, sé kòm toua pòt ki louvri sou fasad fèt lépifani-a. **Roua Maj** yo, sé sa nou rélé Lépifani-a. **Jan-Batis**, sé Batèm Jézu-a. Mari, sé Nòs Kana-a. Ni Lépifani-an, ni Batèm Jézu-a, ni Nòs Kana-a, sé maniféstasion yo yé osijè sa Jézu yé tout bon-an, dapré sa réfrin Vèp fèt Lépifani-a di-a: "Nap fété toua mirak ki dékoré jou sa-a ki sin-an: jodi-a, zétoual la kondui Maj yo nan Krèch la; jodi-a, dlo tounin divin nan Nòs la, jodi-a, Jézu-Kri té aksépté pou-l résévoua Batèm nan min Jan, pou-l sové nou". (Tribus miraculis ornatun diem sanctum colimus: hodie stella magos duxit ad praeseptum, hodie vinum ex aqua factum est ad nuptias; hodie in Jordane a Ioanne Christus baptisari voluit, ut salvaret nos, alleluia" (cf Liturgia Horanum IV Vatican 1974, 485).

Granmèt, kè-m pa gonflé, léspri-m pa gin prétansion, mouin pa chèché rotè, ni chémin ki dépasé-m, okontrè mouin rabésé léspri-m, mouin fè kò-m tou piti, tankou yon ti bébé ki pozé sou bra manman-l (Ps 131,2-3), ti Jézu nan Krèch la, ti Jézu Lépifani-an.

Zétoual k-ap kondui Roua Maj yo nan nuit la jous Bètlèèm nan, sé **Zétoual lapè-a**. Lapè pou sa-k louin, lapè pou sa-k pré; lapè pou sa-k pòv, lapè pou sa-k rich; lapè pou sa-k déyò, lapè pou sa-k anndan; lapè pou sa-k piti, lapè pou sa-k gran. Zétoual lapè sa-a, sé nan fon **Kè** nou li yé; Zétoual lapè sa-a, l-ap **déplásé** avèk nou; Zétoual lapè sa-a sé **rinmin**.

Zétoual lapè-a, sé nan fon kè nou li yé. Zétoual lapè-a, sé **anndan fon kè nou** pou-l limin. Pap Pòl VI té di: "La paix doit être **dans les âmes**, où nichent l'égoïsme l'orgueil, le rêve de puissance et de domination, l'idéologie de l'exclusivisme, de la violence, de la rébellion avec la soif de vengeance et de sang" (Journée de la paix 1968, p. 161). Dézièm Lèt Sin Piè-a di nou sé **nan kè nou** zétoual la kléré (2 p. 1,19), pou fè nou ouè sa paròl Profèt yo té konn ap anonsé tankou yon lanp ki t-ap bay yon ti limiè tou pal nan yon koté ki fè noua-a. Li di: "Nous tenons plus ferme la parole prophétique; vous faites bien de la regarder comme une lampe qui brille dans un lieu obscur, jusqu'à ce que le jour commence à poindre et que **l'astre du matin se lève dans vos cœurs**" (cf Gn 27,17; Ap 2,28; 22,14). Lanp Fratènitè-a ki limin nan kè nou-an, sé Zétoual lapè-a. Anvan nou chèché-l déyò, sé anndan fon kè nou pou nou chèché-l. Sin Fransoua Dasiz di: "Seigneur, fais de moi un instrument de **paix**; là où se touvent les ténèbres, que je mette la **lumière!**". Anvan nou mété limiè-a déyò, sé anndan fon kè nou pou nou limin-l. Sa mandé pou nou chanjé konsians nou. Pap Pòl VI té di pou premié janvié 1969: "La Paix n'est pas une fleur qui pousse spontanément sur notre terre

aride, privée d'amour et baignée de sang. La Paix est le fruit d'une **transformation morale de l'humanité**. Elle exige une culture conceptuelle, éthique, psychologique, pédagogique, juridique. On n'impose pas une vraie paix, on ne maintient pas une paix imposée par l'oppression ou par la crainte ou par des structures juridiques iniques ou aujourd'hui inadmissibles. La paix doit être humaine, et donc libre, juste, heureuse!" (Journée de la paix, 1968, p. 45). Konsa, pou nou mét lapè nan sosisyè-a, fò nou déjà ginyin-l nan kè nou. Sé nan sans sa-a Pap Jan XXIII té di: "Il n'y aura de paix dans la société que si chacun a la paix chez soi". Vré lapè-a, n-ap viv li nan kè nou ak **LAFOUA**.

Zétoual lapè-a, l-ap déplásé ak nou. Si zétoual lapè-a nan fon kè nou, li pa fiksé yon sèl koté, li an mouvman, sé tout tan l-ap kondui nou sou rout lapè-a. Pap Pòl VI té di: "Nous ne serons jamais en possession de la paix, nous devons la construire chaque jour". Nan lanjélu 11 novanm 1968, li té di: "La Paix est lente, précisément parce qu'elle suppose une **évolution** spirituelle, une éducation supérieure, une vision nouvelle de l'Histoire humaine" (ib 247). Zétoual lapè-a pa kité nou fiksé yon sèl koté, kòm si nou t-a déjà fini pèlerinaj lapè-a. Pèlerinaj lapè-a pa fini. "**Artisan** de la Paix" sé moun ki toujou ap travay pou bati lapè. Li pa janm rété. Lapè, sé bout chemin **léspérans** la li yé. Pap Pòl VI té di: "L'idée et même la réalité de la paix n'est pas chose statique, mais **dynamique**, elle ne veut pas rendre paresseux et endormis les individus et les communautés, mais être **active** et se tourner **progressivement** vers le développement des principes humains et juridiques sur lesquels la paix doit se fonder; elle veut s'exprimer dans un désarmement **graduel** et dans des services d'intérêt commun, elle veut se consolider, dans des institutions internationales et supranationales toujours plus aptes à prévenir, à contenir, à résoudre les disputes **sans cesse renaissantes** de la société humaine. La paix est **en devenir** "in fieri" – elle est **progressive**; elle a son histoire. Paix et histoire devraient finalement s'identifier. Chacun voit que cette conception est à la fois logique et ardue; naturelle et **encore lointaine**; belle et trop belle pour les hommes que nous sommes encore: égoïstes, violents, particularistes, et souvent contraints à nous défendre, non **avec des moyens pacifiques**, mais avec les moyens imposés par la légitime défense, et comme nous sommes tentés, aujourd'hui encore, de croire qu'héroïsme et violence s'équivalent, alors que ce devrait être notre étude attentive, surtout dans le drame contemporain de la vie des jeunes, de distinguer l'un et l'autre: il y a un héroïsme, il y a un courage, il y a un martyr, il y a un sacrifice de l'homme fort et grand, "rebelle par amour", qui ne vise pas à attaquer autrui et qui **fuit la violence intention-**

nelle" (ib 45). Lapè-a tèlman yon bagay pou toujou ap chèché, Pap Pòl VI pa-t pè mété-l an konparézon avèk dévlopman. Pou prémié janvié 1969, li té di alokasion prèch li té fè nan légliz "Ara coeli" a-Ròm: **Le développement des peuples est aujourd'hui le nouveau nom de la paix**" (ib 47). Li té répété sa-l té déjà di nan "Populorum progressio". Li té konstaté nou pa kapab gin yon véritab lapè toutotan dévlopman sa-a pa rivé nan nivo ki satisfè tout moun. Li di: "L'évolution de l'homme vers sa plénitude a encore besoin d'un énorme **développement**; et **tant que ce développement n'aura pas obtenu sa mesure suffisante, nous n'aurons pas une paix véritable dans le monde**" (ib 47). Sé lidé sa-a Pap Jan-Pòl II fouyé ki fè-l té bay kòm konsign pou prémié janvié 1987 la: "**Développement et solidarité: clés de la paix**". Li rémaké si dévlopman-an pa donnin mézi pou-l t-a doué bay déjà, sé paské yo pa fè-l avèk asé **solidarité**. **Solidarité**-a tou sé tout tan pou n-ap **renouvlé-l** nan tout pouin ni sou késion **byin**, ni sou késion **sosiyété**, ni sou késion **politik**, tankou toua ròch difé pou kinbé chodiè-a an-ékilib. Vrè lapè-a, nou dévlopé-l nan **LÉSPÉRANS**.

Zétoual lapè-a, sé rinmin. Finalman pou yon moun gin lapè, fò-l konn **rinmin**, paské rinmin-an alafoua nan **fon kè nou**, épi sé tout tan l-ap **dévelopé**. Pap Pòl VI té fini prèch li-a, antan-l té sité Sint-Ogustin ki di: (Pacem) hoc est habere, quod amare; avoir la **paix**, c'est **aimer** (Sermo 35,7 PL 39, 15, 82; cf ib). Li té dévlopé lidé sa-a, nan prèch li té fè Genève pou 10 juin 1969, lè-l té di: "La Paix n'est pas une faiblesse, mais une force, une puissance, elle est un ordre de l'amour" ordo amoris, une harmonie suprême, une constante victoire de **l'amour** sur les passions et les désirs contrastants qui habitent le cœur de l'homme. La Justice peut préparer et conditionner la Paix, mais elle ne peut à elle seule la créer, seule la force unitative de **l'Amour** peut créer la Paix (ib 51). Li té di tou nan minm prèch sa-a: "**L'amour** construit, mais la haine détruit. A certains moments, du fait qu'elle libère des forces jusque là convergentes, la haine peut paraître la plus forte. Mais c'est une illusion. La haine et la violence détruisent et se détruisent. Elles tombent au néant. C'est **l'amour** qui est fort et qui est le plus fort" (ib 147). Sa mandé nou pou nou évité tout kalité madigra lapè, tankou parégzanp distans youn pran parapò a lòt, ki fè vi-n gin indiférans akòz séparation nan rapò ak intèrè (cf Pap Pòl VI, 1-1-69,ib 44); yon lòt filalang lapè ankò, sé sa yo kapab rélé: "trêve précaire des conflits" (ib), difé-a frèt yon moman pandan y-ap préparé fouayé-a. Yon lòt lonbraj lapè ankò sé lè chak pati gin minm kantité fòs, yo fè ékilib, paské yo chak paré pou yo fonsé soua nan atak, soua nan défans (ib). Yon lòt simagri lapè ankò, sé lè yon pòsion fè kontra antré yo pou yo fè blòk ansanm (ib). Yon lòt fo-lapè

ankò sè lè tout moun gin kè soté, yo pa ozé ataké, paské yo anvizajé konsé-kans lagè-a k-ap okazioné gran katastròf (ib). Vré lapè-a, nou fè-l donnin frui nan **LACHARITÉ**.

Zétoual lapè-a kléré **nan fon kè nou**, zétoual lapè-a ap kondui nan **pélerinaj** la, zétoual lapè-a sé **rinmin**. Gin sinkzanzan zétoual lapè-a té kondui Misionè yo nan lamérik an 1492. N-ap sonjé 5^{em} santnè Évanjélizasyon nou nan **lafoua**, nan **lépérans**, nan **lacharité**. A lokazion Lépipani-an nou raplé sa paské Lépipani sé fèt **Misionè**. Zétoual lapè-a nan fon kè nou ak **lafoua**, l-ap déplasé ak **léspérans**, li sé rinmin ak **charité**. N-ap mandé Manman Mari pou-l édé nou réalizé konsign ak égzijans zétoual lapè-a. Lapè pou sa-k louin, lapè pou sa-k pré, lapè pou sa-k pòv, lapè pou sa-k rich; lapè pou sa-k déyò, lapè pou sa-k anndan; lapè pou sa-k piti, lapè pou sa-k gran.

Nan lèt ansiklik Pap Jan-Pòl II té ékri osijè ané Marial la, li palé sou Mari nan lavi légliz la k-ap maché-a, ki nan pélerinaj lafoua-a (RM 5, p. 9).

Roua Maj yo té fè pélerinaj lafoua sa-a, antan limiè zétoual la t-ap kléré yo nan nuit la. Pap la di Mari sé zétoual dévan jou-a k-ap anonsé Solèy la ki prèt pou-l lévé-a (RM 3, p. 7).

Avèk Roua Maj yo, n-ap suiv zétoual sa-a nan pélerinaj lafoua nou-an, nan nuit. Gin dé foua limiè zétoual la ap disparèt. Sé lè nou antré Jérusalèm, n-ap chèché asirans kot Èròd, sa vlé di lè nou apuiyé sou pouvoua ak otorité lézòm, lè nou antré koté nou instalé, lè nou sispann maché nan dézè-a, nan nuit la.

Min lè nou rékòmansé pran rout la, nan nuit, nan savann nan, lè nou pou kont nou, lè nou pa gin pèsòn pou ba nou asirans, lè sa-a Zétoual la ap parèt ankò, l-ap gidé nou, pou nou rivé Bètléèm, kot Jézu ap tann nou.

Tout lavi nou sé yon pélerinaj lafoua. Lè nou sispann maché, lè nou instalé, nou pa nan ròl nou.

N-ap mandé Manman Mari, "Étoile du matin", pou-l gidé nou sou rout la, antan nou sonjé paròl Pap Jan-Pòl II ékri nan kòmansman lèt Ansiklik li-a, "Redemptoris Mater": "Si donc les années qui nous séparent de la conclusion du deuxième millénaire peuvent être rapprochées de cette attente historique du Sauveur, il devient pleinement compréhensible que nous désirons nous tourner spécialement, en cette période vers celle qui, dans la nuit" où était attendu l'Avènement, commença à resplendir comme une véritable "**étoile du matin**" (Stella matutina). En effet, comme cette étoile, en même temps que l' "aurore", précède le lever du soleil, de même Marie, dès sa

conception immaculée, a précédé la venue du Sauveur, le lever du "Soleil de justice" dans l'histoire du genre humain" (RM 3, p. 7).

Zétoual la kléré dévan-jou,
Solèy la tou prèt pou-l lévé.

Tout moun ki paré pou-l pati nan vouyaj,
Li lè pou-l lévé, pou-l kanpé, pou-l maché.

Lannuit la déjà bay signal li fébli,
kòk la fi-n chanté, tout konsians révéyé.

Baton nou nan min nou, sandal nou nan pié-n,
Sinti nou nan tay nou, éspoua nou nan kè-n

Minm si nou pou kont nou, nou pap pè maché,
Manman nou avèk nou, nou pap pèdi rout.

Valè témouagnaj pa bézouin kantité,
Sé poua-l yo pézé sou balans kalité.

Dépi Abraam sé maché n-ap maché,
Péyi pou-n pozé-a, sé li n-ap chèché.

Lò-a sé yon fason pou rékonèt Jézu sé **Roua**. Sé ak lò yo fè kouròn roua. Lansan-an sé yon fason pou rékonèt li sé **Bondié**. Sé lansan yo ofri pou sérémoni koté y-ap adoré Bondié: "Sé pou priyé-m nan monté dévan fas ou tankou lansan" (Ps 141,2). Lamir nan sé yon fason pou rékonèt li sé **moun** k-ap mouri. Sé ak lamir yo konn anbomé mò yo, tankou Nikodèm ap fè pou Jézu (Jn 19,39). Lépipani sé fèt Misionè. Payin yo vi-n rékonèt Jézu. Jézu sé Limiè. Zétoual la kléré li kondui Roua Maj yo nan fènoua-a tankou kolòn limiè-a t-ap kondui Pèp Israèl la nan savann (Ex 19,14; 40,36-38). Sé limiè ki kléré sou Pèp ki té chita nan lonbraj lanmò-a (Is 9,1). Krétyin yo jouinn Limiè Jézu-Kri nan batèm nan. Gin anpil nan yo ki fèmin jé yo tankou Èròd pou yo pa oué Limiè-a. Yo rét nan fènoua pou sa y-ap fè ki pa bon-an pa parèt klè (Jn 3,21). Yo bouché jé yo tankou Juif yo (Jn 9,39) dévan sign klè Jézu ap fè yo (Jn 8,12; 12,35-46), li minm ki Limiè lavi-a (Jn 1,4; Ps 36,10). Gin anpil moun k-ap chèché limiè nan maji, nan rèv, nan oroskòp, nan sign ki rivé paraza (niméro machi-n ki fè aksidan pou konn ki niméro bòlèt k-ap soti, tchala). Tou sa sé jouèt ti moun. Sin Jan-d-la-Koua di sé yon afron pou Bondié ki ba nou tout révélasion-l nan Pitit li-a, ki fi-n di nou tou sa-l té gin pou-l té di nou nan li. Sé la tout Limiè-a yé. Nou pa doué

chèché okinn lòt koté pou nou pa pèdi tan nou, pou nou pa riské plonjé nan fènoua pi fon toujou, épi pou tout tan.

Lépifani sé fèt limiè ki parèt sou tè-a. Moun k-ap suiv li pap maché nan fènoua, min l-ap gin limiè lavi ki pap janm fini-an. Nou kapab konté sou pròp limiè pa nou, min lè sa-a, limiè pa-l la kaché. Sé sa-k rivé roua Maj yo lè yo antré Jérusalèm, y-al konsilté roua Éròd avèk savan yo; pandan tan sa-a, zétoual la ki t-ap gidé yo-a, li disparèt.

Sé lè yo kité Jérusalèm, zétoual la parèt, l-ap kondui yo ankò sou rout la. Limiè Bondié jalou, li pa aksépté konkirans.

Lè roua Maj yo rivé Bètlèèm, Bondié fè yo ouè Pitit li-a ansanm avèk Manman-l. Yo ofri-l lò, lansan avèk lamir. Sa lò-a vlé di? Lò-a sé yon matiè ki sèvi pou yo fè kouròn pou roua. Konsa, lò-a fè rékonèt Jézu-Kri sé Roua. Sa lansan-an vlé di? Lansan-an, sé yon pafin yo konn boulé antan y-ap fè lapriyè monté dévan Bondié. Konsa, lansan-an, fè ouè Jézu-Kri sé Bondié. Sa lamir-an vlé di? Lamir-an sé losion ki konn sèvi pou anbomé moun ki mouri, pou kò-a pa gaté. Konsa, lamir-an anonsé davans Jézu-Kri gin pou-l mouri, pou-l lévé byin vivan.

Min limiè ki kléré roua maj yo, ki fè rékonèt sa Jézu-Kri yé: Jézu-Kri sé roua, Jézu-Kri sé Bondié, Jézu-Kri sé yon moun k-ap mouri, kap lévé byin vivan pou tout tan.

Sèlman lè Roua Maj yo rivé, yo ouè Pitit la ansann avèk Manman-l. Pitit la té trò piti pou yo té ofri-l tout kado sa yo, antan li kouché sou pay la, nan krèch la. Bay kilès yo ofri kado sa yo? Sètènman sé nan min la Trè Sint Vièj yo kité kado sa yo. Sin Monfò di nou si nou vlé Jézu résévoua kado nou yo, sé pou nou fè yo pasé nan min Manman-l ki san tach. Minm Roua Maj yo, sé sa yo fè. Monfò pran égzanp péyizan-an avèk pòm li-an ki tou gaté-a, sa-l prezanté rèn nan, rèn nan minm ranjé pòm nan byin ranjé nan yon kabaré avèk flè, li ouété koté ki gaté-a, li prezanté pòm nan bay roua-a, roua kontan, paské sé rèn nan ki lonjé-l ba li. Si sé té péyizan-an minm ki té ozé prezanté tèt li, yo t-ap fè-l mank déga.

Nou minm nou pa gin lò pou nou ofri bay Jézu-Kri ki roua, nou pa gin lansan pou nou prezanté ba li kòm Bondié, nou pa gin lamir pou fè-l kado kòm moun k-ap mouri, k-ap lévé vivan, min sa nou ginyin-an sé li minm minm nou bay, sé pròp kè nou ki plis pasé lò, ki plis pasé lansan, ki plis pasé lamir. Épi an minm tan n-ap ofri tèt nou ba li, pa lintèmédiè Manman Mari, n-ap ofri li minm minm tou bay Bondié Papa-a, jan la Trè Sint Vièj Mari ap fè 2 févrié-a, fèt la Limiè, fèt Lachandlè-a, nan lign fèt Lépifani-an, pròp Jézu-

Kri li minm minm, vré sakrifis la ki gin lò-a kòm sign, ki gin lansan-an kòm sign, ki gin lamir-an kòm sign. Sé pa sign nan ankò nou ofri, sé réalité-a ki anba sign nan. Konsa Maj yo ofri sign nan, nou minm nou ofri réalité-a.

N-ap mandé la Trè Sint Vièj Mari pou nou ofri pròp tèt nou ansanm avèk réalité sa-a: Jézu-Kri Roua, Jézu-Kri Bondié, Jézu-Kri k-ap mouri pou-l lévé byin vivan.

Payin yo soti byin louin, vi-n adoré Jézu-Kri kòm Roua, antan yo ofri-l lò; kòm Bondié, antan yo ofri-l lasan; kòm moun k-ap mouri, antan yo ofri-l lamir. Psòm yo té prévoua kijan tout payin yo t-ap svi-l (Ps 72,11; 86,9). Siméyon ap di Jézu sé limiè pou kléré nasion yo (Lc 2,32; cf Is 42,6; 49,6; Ac 13,47; 26,23). Nasion yo gin pou yo maché nan limiè-l (Ap 21,24). Sé moun ki soti nan tout pèp, ras ak nasion (Ap 5,9) k-ap profité délivrans Jézu-Kri bay nan San-l nan. Y-ap vi-n sot nan tout kouin tè-a, pou yo rasanblé nan yon sèl fanmiy. Sin Pòl té ouè nan vil Atèn kijan moun yo té bati yon tanp pou Bondié yo pa-t konnin-an (Ac 17,23). Sé minm mouvman sa-a ki té pousé moun Babèl yo bati yon kay ro pou monté jous nan sièl la al chèché Bondié sa-a ki kaché-a (Gn 11,1ss).

Yo pa-t réyisi. Yo chanjé taktik. Yo bati yon kay pou li, paské yo rékonèt yo pa kapab al chèché-l koté-l li yé-a. Pèp Bondié-a li minm minm té toujou ap di: "Kilès ki janm monté nan sièl la épi ki désann pou-l vi-n di nou ki koté-l yé?" (Pr 30,4; cf Sg 9,16; Ba 3,15. 29; Job 28,12.20; Si 1,6).

Sé Jézu k-ap réponn késion sa-a nan konvèsasion l-ap ginyin avèk Nikodèm nan (Jn 3,13). Sé li minm Sajès sa-a yo t-ap chèché tout koté, yo pa-t ko kapab jouinn nan. Pèp payin yo t-ap chèché Sajès, vré Sajès la. Chémin yo té pran-an pa-t ko kapab minnin yo ladan-l. Sé Jézu ki vré Sajès sa-a. Yo pa dékouvri-l avèk pròp fòs yo; yo pa ouè-l avèk pròp kapasité intéljans yo. Sé li minm ki pou dévoualé tèt li ba yo. Sé sa li vi-n fè sou tè-a: montré tout moun k-ap chèché-l yo ki sa-l yé.

Anpil pèp kontinué ap chèché Sajès toujou. Yo pa pran mouayin ki kondui nan pran diréksion-l. Sé zidòl y-ap adoré. Fèt Lépipani-an raplé mouvman sa-a koté y-ap chèché vré Bondié-a nan nuit, kòm si sé taté y-ap taté adouat-agoch, al chèché kléré chandèl isit oubyin la, al chèché konnin sa k-ap rivé. Époutan Limiè-a la, li rivé déjà, l-ap kléré nan fon kè tout moun ki ba-l lafoua. Sé lafoua sa-a Roua Maj yo ba li, jan Profèt Izayi di-a: "Nasion yo ap maché nan limiè-ou" (Is 60,3).

Yo vi-n poté lò ki réprézanté richès péyi yo (Ps 72,15), pou rékonèt otorité Jézu-Sajès sou tout tè-a, kòm sèl vré Roua, minm si yo pa ouè klè ki kalité

mòd Roua sa-a. Sé fason pou yo montré tout bagay sé pou li (Ag 2,8). Yo ofri-l lansan, ki réprézanté rélijion péyi yo, paské yo rékonèt li sé Bondié, minm si yo pa fi-n konprann ki kalité mòd Bondié sa-a ki kouché sou pay la. Sé fason pou yo fè priyè yo monté tankou lansan dévan fas li (Ps 141,2; Lc1,9-11; Sg 18,21). Yo ofri-l lamir, ki réprézanté lantèman péyi yo, paské yo rékonèt li gin pou-l mouri kòm moun, minm si yo pa trò konprann ki kalité mòd lanmò. Sé yon fason pou montré davans kijan y-ap anbomé kò-l (Jn 19,39). Sé nan nuit yo t-ap maché. Zétoual la t-ap gidé yo. Limiè-a té fèb. Yo pa-t fi-n ouè trò klè. Sé yon avaloua yo té jouinn, ki avèti davans kijan bèl Zétoual dévan-jou-a gin pou-l kléré yon lè (Ap 22,16). Tout fason, yo dévan yon mèvèy éstraòdinè yo rékonèt ki dépasé yo. O non tout payin yo k-ap chèché vré Sajès la, yo vi-n adoré-l (Ps 86,9; cf R 16,25; Ps 98,2). Yo maché nan limiè-l, nan diréksion klètè-a (Ba 4,2). Yo réprézanté pèp sa-a k-ap maché nan lafoua sou tè sa-a, joutan-l débouché nan limiè sièl la (1 Jn 3,2).

Sé moun ki gin kè yo sinp Bondié dévoualé tèt li ba yo (R 10,20). Sé pa moun k-ap pozé-l késion tout lasint jounin pou yo mété-l nan pòch yo, pou yo fè-l fè kat volonté yo. Sé moun ki kouè san yo pa bézouin sign, jan Jézu fè rémaké osijè kapitèn Romin-an, lè-l di: "Minm nan Israèl li pa jouinn kalité lafoua sa-a" (Lc 7,9). Sé nan sans sa-a li di: "Moun yo ap soti nan diréksion solèy lévé ak solèy kouché, y-ap vi-n atablé avèk Abraam, Izaak ak Jakòb, pandan sa yo té chouazi yo minm y-ap rét déyò (Mt 8,11; cf 1 R 10,4). Li bay égzanp Rèn Saba-a ki soti jous péyi diréksion solèy lévé, pou-l vi-n kouté sajès Salomon (Lc 11,31). Sé nan péyi sa yo Roua Maj yo soti (Ps 72,10-15; Is 60,6). Sé Sajès yo t-ap chèché, jan non yo vlé di-a "Maj", minm si sa fè sonjé "majisyin" tou. Yo t-ap chèché Sila-a k-ap dirijé tout bagay la, li minm moun pa-t rékonèt, pa-t réyisi jouinn avèk pròp sajès pa yo-a (R 1,21; Job 32,13). Zétoual k-ap kléré granmatin-an vi-n vizité nou, pou poté Sajès sa-a ba nou (Lc 1,78; Nb 24,17). Li té lévé yon lè pou Roua Maj yo. Li gin pou-l lévé nan fon kè nou (2 p. 1,19). An-atandan n-ap fiksé jé sou Mésaj Jézu-Kri dévoualé nou-an, tankou yon lanp k-ap kléré nan fènoua, joutan vré Solèy la lévé. N-ap mandé Manman Mari "Notre-Dame de la Lumière", pou-l ba nou Limiè sa-a k-ap kléré nan fon kè nou avèk lafoua, pou-l dirijé nou nan fènoua chémin n-ap suiv sou tè sa-a jous nan vizion limiè ki pap janm fini-an.

Pavin: 58 foua nan lansyin Téstaman, 79 foua nan Nouvo Téstaman.

2 Sm 22,50; 1 Ch 16,31.35; Tob 1,10.11; Jdt 4,12; 1 Mac 3,10.48; 4,7.45.54.58; 5,21.38.43; 6,18; 2 Mac 6,4; 8,16; 14,14.15; 15,8.10; Ps 9,6.16.18.20.21; 10,16; 18,50; 47,9; 59,6.9; 72,11.17; 78,55; 79,1.6.10a.b;

86,9; 96,3.10; 98,2; 102,16; 105,44; 106,27.35.41.47; 115,2; 118,10; 126,2; 135,10.15; Jer 14,22; Lm 1,10; 2,9; Ba 6,3; Mt 5,47; 6,7.32; 10, 5.18; 18,17; 20,19; Mc 10,33; Lc 12,30; 18,32; 21,24a.b; Ac 10,45; 11, 1.18; 13,46.48; 14,2.5.27; 15,3a.b.7.12.14.19; 18,6; 21,11.19.21.25; 22, 21; 26,20; 28,28; R 1,5.13; 2,14; 3,29a.b; 9,24.30; 11,11.12.13a.b.25; 15,16a.b.18.27; 1 Co 1,23; 5,1; 12,2; 2 Co 11,26; Ga 1,16; 2,2.8.9.12. 14a.b.15; 3,8.14; Ep 2,11; 3,1.6.8; 4,17; Col 1,27; 1Th 2,16; 4,5; 1 Tm 2,2; 3,16; 2 Tm 4,17; 1 p. 4,3; 3 Jn 7; Ap 11,2; 15,4; 19,15; 22,2; cf 1 Mac 1,13; Ac 4,27; 9,15; 26,17.23.

Nasion: 632 foua nan lansyin Téstaman, 79 foua nan Nouvo Téstaman

Lò: 519 foua nan lansyin Téstaman, 41 foua nan Nouvo Téstaman

Lansan: 114 foua nan lansyin Téstaman, 5 foua nan Nouvo Téstaman

Lamir: 13 foua nan lansyin Téstaman, 4 foua nan Nouvo Téstaman

Zétoual: 42 foua nan lansyin Téstaman, 19 foua nan Nouvo Téstaman

Astre: 10 foua nan lansyin Téstaman, 11 foua nan Nouvo Téstaman

Maj: 2 foua nan lansyin Téstaman, 4 foua nan Nouvo Téstaman

Adoré: 49 foua nan lansyin Téstaman, 40 foua nan Nouvo Téstaman

Révélasion: 7 foua nan lansyin Téstaman, 18 foua nan Nouvo Téstaman

Splendeur: 47 foua nan lansyin Téstaman, 2 foua nan Nouvo Téstaman

Maniféstation: 5 foua nan lansyin Téstaman, 7 foua nan Nouvo Téstaman

Lafoua: 36 foua nan lansyin Téstaman, 276 foua nan Nouvo Téstaman

Sajès: 255 foua nan lansyin Téstaman, 64 foua nan Nouvo Téstaman

*

* *

BATÈM GRANMÈT LA A

Pijon-an ki vi-n pozé sou tèt Jézu nan lariviè Joudin-an (Mt 3, 16) fè sonjé pijon sa-a ki té vi-n poté ramo oliv tou fré nan bèk li-a nan arch Noé-a apré délij la, pou montré Bondié té RÉKONSILJÉ avèk tè-a antan-l anonsé lapè (Gn 8, 11). Sin Piè di nan dézièm léktu lamès jodi-a, nan Travay Apot yo: "Il a envoyé la Parole aux fils d'Israël, pour leur annoncer la PAIX par Jésus Christ" (Ac 10, 36). Réfrin Psòm-répons la di: "Dieu bénit son peuple dans la Paix" (Ps 28=29). Prémie léktu-a di: Léspri Sin-an pozé sou Mési-a, li pap rélé byin fò, li pap lévé voua-l, yo pap tandé voua-l nan lari, li pap krazé rozo ki féfé-a, li pap étinn mèch ki fébli-a (Is 42, 1-3).

Lapè-a sé tout moun ki anvi-l. Min sé yon kado Bondié konfié lèzom (Pape Jean Paul II, 1^{er} janvier 1982). Sé nòmral pou nou mandé-l nan lapriyé nou. Sé pa sou tè-a li soti (Jn 14, 27). Pou moun yo jouinn lapè antré yo, fò dabò yo rékonsilié ak Bondié. Lè moun yo t-ap bati kay yo ro Babèl la, non sèlman yo mét Bondié akoté, min sé kont Bondié minm yo té fè bann pou yo détroné-l. Li gayé langaj yo. Youn pa konprann lòt (Gn 11, 1-9). Nasion yo vi-n lenmi yon kon lòt atò (cf Is 2, 4). Sé lapankot k-ap korijé inkonpréansion sa-a, lè léspri Sin-an désann sou patizan yo, li fè yo palé nan lang yo, tout nasion ki té Jérusalem lè sa-a, yo konprann (Ac 2, 1-13; cf Is 11, 1-9). Lévanjil jodi-a (Mt 3, 13-17) montré nou kijan Jézu rabésé tèt li pou-l mandé Jan-Batis batèm, tankou tout moun ki vi-n batizé antan y-ap konfésé péché yo. Époutan Jézu pa gin péché. Li di: "Qui d'entre vous me convaincra de péché?" (Jn 8, 46). Jès li fè-a, sé yon jès SOLIDARITÉ avèk péchè yo, li minm ki vi-n pran péché tè-a sou zépol-li, jan Sin Jan-Batis di-a: "Min Mouton Bondié-a ki ouété péché sou tè-a" (Jn 1, 29; cf Is 53, 7). Lékòl Profèt Izayi-a insisté sou solidarité Mési-a avèk péchè yo antan-l di: Li kité yo mété-l nan ran kriminèl, li minm ki t-ap poté péché pakèt foul moun yo" (Is 53, 12; cf Mt 27, 38). Jézu gin solidarité avèk péchè yo. Sé poua li manjé sou minm tab ak yo, jan-l fè kay Matié-a (Mt 9, 10ss), li fè ladésant lakay yo, jan-l fè kay Zaché-a (Lc 19, 1-10).

Pou ané 1987 la, Pap Jan-Pòl II té bay kòm konsign: "Développement et solidarité:clés de la Paix". Gin anpil fòm solidarité. Solidarité ak péchè yo, sé li minm ki pi konsékan pasé tout lòt yo. Sint Tèrèz lanfan Jézu té tèlman dékouvri vokasion-l nan fòm solidarité sa-a, li té di: "Je suis assise à la table des pécheurs, mangeant le pain sec de l'incrédulité". Réyéلمان vré li té gin anpil tantasion onivo lafoua. Gin défoua nou jouinn désépsion nan rélasyon zanmi nou. Nou t-ap tann konpréansion, sé répròch (Is 5, 7) san nou pa konn pou ki rézon (Mi 6, 3; Jn 16, 25; Ps 35, 19; 69, 5). Sa pèmèt nou asosyé pi

plis ak kondision Jézu li minm, lè tout patizan-l yo té abandoné-la (Mt 26, 56), lè tout zanmi-l té kanpé louin-l nan (Lc 23, 49). Sé pa paské nou fè ki-chòy ki mal nésésèman ki fè nou rankontré bariè sou rout nou (Jn 9, 2-3). Bondié pèmèt nou fè espérianans sa yo rélé "corrédemption-an", jan Sin Pòl di Kolosyin yo: "Je complète en ma chair ce qui manque aux souffrances du Christ pour son Corps qui est l'Église". (Col 1, 24). Nan pié lakoua-a, la Trè Sint Vièj Mari té kanpé, kè-l t-ap déchiré (Jn 19, 25-27; Lc 2, 34-35). Li té asosié nan soufrans Pitit li-a ki té poté solidarité ak péchè yo jous nan lanmò lakoua-a. Solidarité sa-a sé baz tout solidarité. Yon solidarité ki pa trésé ak kòd sa-a, li pa solid.

Sèkè gin sètèn fòm solidarité ki fè blòk, pou drésé klas moun kont lòt klas, ras moun kont lòt ras, péyi moun kont lòt péyi. Li pa solidarité tout bon vré. Éròd té fè solidarité ak Pilat (Lc 23, 12), min sé kont Jézu (Ac 5, 27). Sé pa sou baz sa-a rélasyon yo t-a kapab vi-n solid. Juif yo ak Romin yo ap tèlman rété lénmi, nan ané 70 jénéral Romin Titus ap vi-n détrui vil Jérusalèm. Solidarité ki pa pozé sou fondasyon Jézu-a, li pa kinbé. Sé yon kay ki bati sou sab (Mt 7, 26). Pap Pòl VI té di: "Parmi les diverses voies vers une juste régénération sociale, nous ne pouvons choisir ni celle du marxisme athée, ni celle de la révolte systématique, encore moins celle du sang ou de l'anarchie. Distinguons nos responsabilités de ceux qui font de la violence un noble idéal, un glorieux héroïsme, une complaisante théologie. Pour réparer les erreurs du passé et pour guérir les maux présents, ne commettons pas de nouvelles erreurs" ("Les voies d'une juste régénération sociale", discours à l'épiscopat latino-américain à Bogota, cf Journée de la Paix, 1969, p. 241).

Nan dènié soupé-a, Jézu lavé pié patizan-l yo (Jn 13, 7-15). Minm jan nan kòmansman lavi piblik Jézu, Jan-Batis pa-t konprann fòm solidarité li té chouazi ak péchè yo antan-l té mandé batèm nan (Mt 3, 14), konsa tou nan finisman lavi piblik li, Sin Piè pa konprann fòm solidarité li aksépté-a pou-l patajé kondision ésklav yo (Jn 13, 6-8). Sin Pòl di Éfézyin yo: "humilité" sé kondision lacharité (Ph 2, 1-11). Nou mèt gin otorité, sé pou nou gin solidarité ak moun nou réponsab yo, antan nou konsidéré nou sé minm ak yo: sé kondision lapè. Sin Piè di pou réponsab fidèl yo pa aji ak yo tankou prins, min sé modèl pou nou sèvi pou yo: sé kondision lapè (1 p. 5, 3). N-ap mandé Manman Mari pou-l fè nou travay pou lapè-a avèk solidarité Jézu-a.

*

**

BATÈM GRANMÈT LA B

Zétoual la té montré Roua Maj yo sa Jézu yé.

Jan-Batis montré nan Batèm nan sa Jézu yé.

Mari nan nòs Kana-a montré sa Jézu yé.

Tou sa sé Épifani

Sé tankou yon limiè ki kléré pou fè ouè sa Jézu yé.

Roua Maj yo té ofri-l lò, kòm Roua, lansan, kom Bondié; lamir, kòm moun ki gin pou-l mouri, pou anbomé-l.

Jan-Batis lonjé douèt nan diréksion-l, antan-l di li sé Mouton Bondié-a, ki gin pou-l souffri, pou yo kondui-l labatoua san-l pa di yon mo, pou-l délivré lèzòm anba péché yo, tankou Mouton Pak la, tankou Mouton ki té ranplasé sakrifis Izaak la.

Li aksépté mision sa-a antan-l plonjé nan dlo lariviè Joudin-an pou-l nouayé péché tout pèp la, pou-l antéré-l nan lanmò-l, pou-l lévé vivan avèk Pèp la.

Mari sèvi intèmediè pou-l fè premié mirak li-a nan nòs Kana-a, tankou Mésié marié-a, ki kinbé bon divin-an jouska lafin.

Jézu sé Roua, li sé Bondié, li sé moun ki gin pou-l mouri. Li sé Mouton Bondié-a, li sé Mésié marié-a ki marié ak tout légliz la. Léspri-Sin pozé sou li pou-l kondui-l nan mision-l. Sièl la chiré minm jan voual Tanp la ap chiré dé mouatié, lè Jézu ap mouri sou Koua-a (Mc 1,10; 19,38).

Lékòl Profèt Izayi-a té mandé Bondié: "Si-ou té kapab chiré sièl yo pou-ou désann, dévan fas ou mòn yo t-a fònn" (Is 63,19).

Sièl la chiré vré, mòn yo fònn, jan Sin Jan-Batis t-ap anonsé-a, pou mòn yo krazé, pou bafon yo konblé, pou paré rout nan savann nan pou Sila-a ki t-ap vini-an (Lc 3,5; Is 40,3ss).

Rout sa-a sé nan kè nou li pasé.

Sé koréspondans avèk volonté Bondié-a.

Sé nan kè Jézu rout Bondié ak rout lèzòm rankontré, paské li sé Bondié, li sé moun tout bon vré.

Sé nan kè-l pou nou mét kè nou, pou rout nou korésponn ak rout Bondié-a.

Ané marial la ba nou lokazion fè sa Pap Jan-Pòl II rélé pèlerinaj lafoua-a.

Sé Mari ki té pi pré Pitit li, nan pèlerinaj sa-a.

N-ap mandé-l pou-l akonpagné rout nou, pou nou suiv Jézu sou rout sa-a, ki minnin lakay Bondié Papa-a, antan nou fidèl ap fè volonté-l, minm si nou pa fi-n ouè klè pou nou kònnin sa-l mandé nou fè nan chak sikònstans lavi nou.

BATÈM GRANMÈT LA C

Sans batèm Jézu résevoua nan min Jan-an, sé konsékration ofisièl mision li ginyin pou-l sovè lézòm ak pròp lanmò-l. Plonjé nan dlo lariviè Joudin-an sé aksépté plonjé davans nan lanmò, pou-l lévé ankò. Sé apati lè sa-a Jézu kòmansé mision-l. Vré batèm nan l-ap gin pou-l résevoua-a, sé lanmò-l. Li di sa nan Luk 12,50: "Mouin gin pou-m résevoua yon batèm, kè-m séré toutotan li pa ko fi-n réalizé". L-ap mandé Jak ak Jan si yo paré pou résevoua batèm lanmò sa-a tou nan Mak 10,39. Batèm nan mouin gin pou-m résevoua-a èské nou kapab résevoua-l? Sé nan minm Lariviè Joudin sa-a Naaman té géri sot nan maladi lalèp li-a, antan-l té bingin ladan-l 7 foua, sou lòt Profèt Élizé (2 Roua 5,10). Sé nan Lariviè sa-a pèp Israèl la té pasé sou dirèksion Jozué, pou antré nan péyi Palésti-n nan (Jozué 3, 14-4, 18). Jézu sé nouvo Jozué, li pran tèt kolòn pèp la pou-l fè-l antré nan vré péyi Bondié promèt la, nan sièl la, antan-l pasé an premié nan lanmò, pou-l travèsé nan lavi-a avèk tout pèp la.

Nan délij la, sèl batiman Noé-a t-ap floté anlè dlo-a. Pijon-an té vi-n pozé sou li avèk you ramo oliv nan bèk li (Jénèz 8,11). Léspri-a vi-n pozé sou Jézu sou fòm pijon sa-a. Li poté rékonsiliation pou tout moun nan Jézu-Kri ki lavé tout mak péché. Psòm répons lanmès jodi-a fè sonjé délij la (Psòm 28=29, vèsè 10: "Granmèt la abité anlè délij la"). Piè ki sin di konsa nan premié lèt li-a délij la sé sign batèm nan, 1 Piè 3, 20-21.

*

Lavi piblik Jézu ankadré ant dé batèm: batèm li résevoua nan min Jan-Batis la nan lariviè Joudin-an, sé youn; épi batèm lanmò-l la, sé lòt la. Batèm Jan-Batis la, sé tankou yon sign l-ap aksépté batèm lanmò-a. Sièl la chiré, lè Jan-Batis ap batizé-l la. Lè-l mouri-a, sé voual Tanp la ki chiré. Lè Jan-Batis ap batizé-l la, yon voua sot nan sièl la, li di: "Sé pitit mouin ou yé". Lè-l mouri-a, kapitèn nan ki t-ap sivyé-l la di: "Réyéلمان vré, Sila-a sé Pitit Bondié" (Mc 15,38-39).

Lavi piblik Jézu ankadré ant dé batèm: batèm Jan-Batis sou bò joudin-an, épi batèm lanmò-a sou mòn kalvè-a. Réyéلمان vré, yon lè Jézu di konsa: "Mouin gin yon batèm pou-m résevoua, sé pa ti kras kè séré mouin ginyin, joutan m-ap résevoua-l". Épi lè Jak avèk Jan mandé-l yon plas la, youn adouat li, épi lòt la agoch li, li mandé yo konsa: "Batèm nan mouin gin pou-m résevoua-a, èské nou kapab résevoua-l?" Li t-ap palé osijè lanmò-l. Sou bò joudin-an, pou-l kòmansé lavi piblik li Jézu batizé, pou-l montré désizyon-l pou-l suiv plan Papa-l té trasé davans pou li-a: kondui Pèp li-a, nan vré péyi li té promèt la, antan-l pasé avèk li nan lanmò-a pou-l travèsé nan

Rézirèksion-an. Sé sans batèm Jézu-a sa. Nan lansyin Téstaman-an (Is 63-64), Pèp Israël la t-ap di Bondié konsa: "Si-ou té chiré sièl la, épi si-ou té désann!" (cf Is 63-19). Sièl la chiré tout bon vré. Pèp la t-ap di tou nan minm pasaj la: "Sé ou minm ki Papa nou, èské ou kapab rét an silans konsa pandan tout tan-an?" (cf Is 64,11). Silans Bondié-a jouinn finisman, antan li réponn Pèp li-a ki rasanblé nan Jézu, k-ap pasé nan lanmò-l, k-ap plonjé nan lanmò-l, pou-l lévé nan lavi-l ki pap janm fini-an.

Nan chak mision li té konn préché, Sin Monfò té konn fè moun yo réfè angajman promès batèm yo, pou-l kapab gin yon sans krétyin tout bon vré. Épi pou yo té kapab fidèl nan dévoua sa-a, Sin Monfò té konn fè yo viv angajman batèm sa-a pa lintèmédiè la Trè Sint Vièj Mari, li minm ki san tach, ki pa janm anba pouvoua péché ni Satan. N-ap mandé-l pou-l fè nou viv angajman batèm nou nan kè-l.

*

Apré fèt Noël la, gin toua dimanch koté litiji-a montré nou sa Jézu yé: dimanch lépifani-a, dimanch Batèm nan, épi dézièm dimanch òdinè-a (nòs Kana). Dimanch lépifani-an, sé té dévan Roua Maj yo; dimanch Batèm nan sé dévan Sin Jan-Batis; dézièm dimanch òdinè-a (nòs Kana) sé dévan la Trè Sint Vièj Mari. Dimanch lépifani-an, Jézu té fè ouè li sé Roua ak lò Maj yo té ofri-l, li té fè ouè li Bondié ak lansan yo té ofri-l; li té fè ouè li moun k-ap mouri, ak lamir yo té ofri-l. Dimanch Batèm nan, li fè ouè li sé Pitit Bondié, ak Voua-a k-ap déklaré sa nan Sièl la. Dézièm dimanch òdinè-a (nòs Kana), l-ap fè ouè li sé Mésié marié-a ki vi-n marié avèk légliz la, antan sé li minm k-ap bay divin nan nòs la (Jn 2,1-11).

Konsa nan Batèm nan, Jézu sé pitit Bondié. Avèk li nou minm tou nou sé pitit Bondié. N-ap sonjé li té di: "Sé chans pou moun k-ap travay pou LAPÈ, y-ap rélé yo pitit Bondié" (Mt 5,9). Pijon-an ki parèt sou tèl li anlè dlo-a, sé tankou pijon sa-a Noè té lagé anlè dlo yo lè délij la, épi ki té tounin vi-n jouinn li-an, avèk yon ramo oliv nan bèk li (Gn 8,11). "Sé chans pou moun k-ap travay pou lapè, y-ap rélé yo Pitit Bondié". Lapè sa-a sé sou koua-a Jézu ap signin-l nan san-l, lè Kapitèn nan ap di: "Réyèlman vré Sila-a sé Pitit Bondié" (Mc 15,39). "Sé chans pou moun k-ap travay pou lapè, y-ap rélé yo pitit Bondié" Dépi nan Batèm nan, Jézu ba nou yon avaloua ak yon sign lapè sa-a. Batèm nan, sé chémin lakoua-a, sé sign lanmò-a, sé bingn lapè-a. Jézu ap di yon lè: li gin pou-l résévoua yon batèm sé pa ti kras anvi li anvi résévoua-l (Lc 12,50). Lè sa-a li t-ap palé osijè lanmò-l. Li té prézanté-l tankou yon batèm; Batèm nan sé chémin lakoua-a, sé sign lanmò-a, sé bingn lapè-a. Sé nan sans sa-a Jézu té mandé Jak avèk Jan si yo paré pou yo résé-

voua batèm li gin pou-l résévoua-a (Mc 10,38). Batèm nan sé chémin la-koua-a, sé sign lanmò-a, sé bingn lapè-a. Sans batèm Jézu résévoua nan min Jan-Batis la, sé lanmò-l li aksépté davans, pou-l résisité apré sa, pou-l kapab sové nou, pou-l ba nou lapè. Sé mision li ginyin kòm Sèvitè Granmèt la, jan prémié léktu lamès Batèm nan raplé-a (Is 42,1-7; cf Is 49,1ss; 50,1ss; 52,13-53,12). Batèm nan, sé chémin lakoua-a, sé sign lanmò-a, sé bingn lapè-a. Sikonstans ki ankadré batèm Jézu-a, yo rétownin nan lanmò-l; sièl la louvri nan batèm li (Lc 3,21; cf Mc 1,19); voual Tanp-la chiré nan lanmò-l (Mc 15,38). Papa-a déklaré li sé Pitit li nan batèm li (Lc 3,22); kapitèn nan déklaré li sé Pitit Bondié nan lanmò-l (Mc 15,40). Batèm nan sé chémin koua-a, sé sign lanmò-a, sé bingn lapè-a.

Jézu ap plonjé nan lanmò tankou-l plonjé nan dlo batèm nan. l-ap rémonté sot nan lanmò-a tankou-l rémonté nan lariviè Joudin-an (cf Is 63,11). Lè sa-a sé nou tout k-ap vi-n tounin pitit Bondié tout bon vré. Lè Jézu plonjé nan dlo lariviè Joudin-an, li réprézanté tout Pèp la ki t-ap travésé lanmè rouj la (cf 1 Co 10,2), tout Pèp la ki té déklaré Bondié sé Papa-l, épi ki t-ap tann répons nan min Bondié-a, ki t-ap plinyin poutèt Bondié té fè silans la (Is 63,16; 64,11), ki té mandé pou-l chiré sièl la, pou-l désann (Is 63,19). Bondié vi-n réponn Pèp la nan répons li bay Pitit li Jézu-Kri nan batèm nan, lè sièl la déchiré-a: "Ou sé Pitit mouin mouin rinmin-an, nan ou mouin jouinn plézi mouin" (Lc 22). Nan batèm nou, nou antéré avèk Jézu-kri, pou nou lévé vi-n yon lòt moun tou nèf nan yon lòt lavi (R 6,4; Col 2,12). Pijon-an ki té désann vi-n pozé sou tèt Jézu-a fè nou sonjé sa-a Noé té lagé lè délij la épi ki té vi-n pozé sou tèt kay-batiman-an avèk ramo oliv tou fré nan bèk li-a, pou montré sé lapè ki tounin ant Bondié ak lèzòm (Gn 8,9ss). Jézu tankou arch Noé-a sou dlo-a. Léspri-Sin-an sou li tankou toutrèl la. Tan lapè-a tounin. Sé poua lè tanpèt la, li t-ap dòmi nan batiman Sin Piè-a (Mt 8,24). Tan lapè-a tounin Bondié rékonsilié avèk lèzòm. Avèk Batèm Jézu-a, sé tan Noël ki fini. Tout mèsaj tan Noël la sé lapè ak rékonsiliation. Tan lapè-a tounin. Léspri-Sin ki désann sou Jézu sou fòm pijon-an, li vi-n poté lapè pou lèzòm tankou pijon-an ki té poté ramo pié oliv la nan bèk li-a. N-ap préparé nou pandan tout lavan-an pou nou résévoua mèsaj lapè sa-a. Nou résévoua-l pou Noël avèk déklarasion Anj yo: "Viv Bondié nan sièl la, lapè sou tè-a pou moun li rinmin yo" (Lc 2,14). N-ap sonjé konsign Pap Jan-Pòl II té bay pou prémié janvié 1986 la: "La paix, une valeur sans frontières, avèk kat diréksion li invité nou gadé ak jé lapè-a: "Nord-Sud, Est-Ouest: Une seule paix". Nou fiksé-l pou-l fèt Batèm nan, antan n-ap gadé pijon-an ki réprézanté lés-pri-Sin-an sou tèt Jézu ki fèk sot batizé nan lariviè Joudin-an. Tan lapè-a tounin. Sa invité nou, nou minm tou, pou nou lonjé ramo oliv la bay frè ak

sè nou yo nan jès rékonsiliation. Bondié rékonsiliè avèk nou nan Jézu-Kri. Li invité nou rékonsilé tou avèk prochin nou. Ki sa nou fè pou sa?

Nan fèt Batèm Jézu-Kri-a sé pou nou foyé konsians nou tankou Juif yo t-ap fè, lè yo té vi-n prézanté dévan Sin Jan-Batis pou résévoua batèm nan (Lc 3,10-14). Jézu pa-t gin anyin pou-l té reproché pròp tèt li, min sé péché pa nou yo li té pran sou do-l pou-l té lavé nou. Sou Koua-a li t-ap di: "Papa, padonnin yo, yo pa konn ki sa y-ap fè" (Lc 23,34). Dépi jou batèm nou, li té déjà di sa nan kè-l. Batèm nan sé chemin lakoua-a, sé sign lanmò-a, sé sign lapè-a. Sé lokazion pou nou sonjé pròp batèm nou, pou nou rénovlé angajman nou té pran jou batèm nou pa lintèmédiè parinn nou ak marin nou. Angajman sa-a mandé nou pou nou viv kòm Pitit Bondié. Sé chans pou moun k-ap travay pou lapè, y-ap rélé yo "Pitit Bondié" (Mt 5,9). Min nou pa kapab fè lapè fasil, san nou pa pran abitud lapriyé, pou mandé lapè sa-a, paské sé yon kado ki soti nan Bondié, sé pa mòd lapè tè-a bay la (Jn 14,27). Sé pandan Jézu t-ap lapriyé. Léspri-Sin-an té désann sou li sou fòm pijonan. Lapriyé-a fè nou padonnin avèk kè Jézu-Kri, koté dlo-ap koulé-a (Jn 19, 34), tankou nan kontréfò douat Tanp la (Ez 47,1ss), tankou nan vil Jérusalem nan (Za 14,8). Batèm nan fè nou jouinn yon nouvo nésans nan dlo ak nan léspri-Sin-an (Jn 3,5). Nou fini ak moun ansyin-an, nou abiyé ak moun nouvo-a (2 Co 5,17; Col 3,9; R 6, 4). N-ap mandé Manman Mari pou nou konsékan ak léspri batèm nan, épi pou nou sonjé lapè-a sé yon valè ki san frontiè: Nò-Sid, Ès-Ouès: yon sèl lapè. Anvan nou gadé byin louin, sé pou nou kòmansé nan koté n-ap viv la, pou si gin kichòy ki jinnin nou antré nou, nou lonjé ramo oliv la, nou bliyé sa-k pasé, nou réprann tout bagay a-nèf. Jan-Batis ap indiké nou: "Min Mouton Bondié-a ki ouété péché sou tè-a" nou di-l: "Aprann nou byin viv ansanm".

*

Jézu rivé dévan Jan-Batis, li madé-l batizé-l; Jan-Batis minm pa vlé batizé-l; Jézu minm li insisté: Min Mouton Bondié-a. Antan-l monté sot nan dlo-a minm, li ouè sièl la chiré, léspri Bondié vi-n pozé sou li tankou fòs yon ti pijon: Min Mouton Bondié-a. Yon voua soti anro nan sièl la: "Sé Pitit mouin ou yé, sé pa ti kras rinmin mouin rinmin-ou, sé nan ou mouin jouinn plézi-m": Min Mouton Bondié-a. Tankou mouton k-apral labatoua, li pa minm louveri bouch, sé tout péché-n l-ap poté sou do-l, pou-l plongé yo nan lanmò-l: Min Mouton Bondié-a. Min vré Mouton nan plas Izaak, Vré Mouton fèt Pak la, sé li-k ouété péché sou tè-a, nan Batèm li li montré-l: Min Mouton Bondié-a. Tankou voual Tanp la k-ap déchiré, nou ouè sa Jézu

yé: dévan Roua Maj yo, nan dlo Joudin, ak nan nòs nan bouk Kana: Min Mouton Bondié, ki ouété péché sou té-a, aprann nou byin viv ansanm.

Avèk Sin Fransoua Daziz n-ap di: "Seigneur fais de nous des artisans de paix: quand domine la haine, que nous annonçons l'amour; quand blesse l'offense, que nous offrons le pardon; quand sévit la discorde, que nous bâ-tissons la paix"

pasaj lapè: Si 36, 18; Jer 29, 11; Is 2, 2-5; 9,1-7; 57, 15-21; Ba 5, 1-9; Ps 72,7; Ep 2, 12-18; Ph 4, 4-9; Jc 3, 15-18; Jn 14, 27; Mt 5, 9.38-48; Jn 20, 19-20; Ps 28, 11; 33, 15; Si 4,1-11; Ps 84, 9; Col 3, 9-15; Lc 10, 25-37; Is 11, 1-9; Jn 13, 1-17; 1Tm 1, 28; Ga 1, 3-5; Ex 22, 2-36; Is 58,1-12; Mi 4, 1-4; Za 9, 9-10.

Batèm: 26 fous nan Nouvo Téstaman

Mt 3, 7; 21-25; Mc 1,4; 10,38-39; 11,30; Lc 3,3; 7,29; 12, 50; 20,4; Ac 1, 22; 8,13; 10,37.47; 13,24;16,33;18,25; 19, 3a.b.4; 22, 16; R 6,4; Ep 4,5; Col 2, 12; He 6, 2; 1P 3, 21

Batizé: 67 fous nan Nouvo Téstaman

Mt 3,611a.b.13.14.16; 28,19; Mc 1,5.8.9; 10,38.39a.b; 16, 35; Lc 3,7.12. 16.21a.b; 7,29.30; 12,50; Jn1,25.26.28.31.33.a.b; 3,22.23a.b.26; 4, 1. 2; 10, 40; Ac 1,5a.b; 2,36.41; 8,12.16.36.38; 9,18; 10,48; 11,16a.b; 16,15; 18,8; 19,4.5; R 6,3a; 1Co1,13.14.15.16a.b.17; 10,2;12,13; 15,29a.b; Col 3,27.

Pijon: 20 fous nan Lansyin Téstaman, 10 fous nan Nouvo Téstaman

Gn 8,8.9.10.11.12; Ps 55,7; 68,14; Ct 1,15; 2,14; 4,1; 5,2.12; 6,9; Is 38,14; 59,11; 60,8; Ez 7,16; Os 7,11; 11,11; Na 2,8; Mt 3,16; 10,16; 21,12; Mc 1,10; 11,15; Lc 2,24; 3,22; Jn 1,32; 2,14.16.

Jan-Batis: 15 fous nan Nouvo Téstaman

Mt 3,1; 11,11.12; 14,2.8; 16,14; 17,13; Mc 1,4; 6,14.24.25; 8,28; Lc,30.31; 9,19

Joudin: 195 fous nan lansyin Téstaman, 12 fous nan Nouvo Téstaman

Éspri-Sin: 24 fous nan lansyin Téstaman, 231 fous nan Nouvo Téstaman

Difé: 440 fous nan lansyin Téstaman, 63 fous nan Nouvo Téstaman

Priyé: 153 fous nan lansyin Téstaman, 137 fous nan Nouvo Téstaman

Lapriyé: 144 fous nan lansyin Téstaman, 67 fous nan Nouvo Téstaman

Dlo: 589 fous nan lansyin Téstaman, 84 fous nan Nouvo Téstaman

Pitit (Bondié): 8 fous nan lansyin Téstaman, 202 fous nan Nouvo Téstaman

*

* *

DÉZIÈM DIMANCH ÒDINÈ A

"Min Mouton Bondié ki ouété péché sou tè-a". Mouton Izaak la, Mouton Pak la, Mouton Sèvitè Granmèt la.

Mouton Izaak la: Lè Abraam t-al ofri Izaak sou mòn Moriya-a, antan-l ap monté sou mòn nan, Izaak té ouè kouto-a, ak difé-a, nan min papa-l. Li minm minm sé chaj boua-a li ta-p poté sou do-l, tankou chaj Koua-a Jézu té gin pou-l poté sou zépòl li sou mòn Kalvè-a. Li mandé papa-l Abraam: "Papa". Papa-a di-l: "Oui, pitit mouin". Li di: "Mouin ouè kouto-a ak difé-a, épi boua-a. Min koté mouton-an n-ap ofri kòm sakrifis la?" (Gn 22, 7). Abraam di: "Sé Granmèt la k-ap prévoua sa" (Gn 22, 8). Yo kontinué maché sou mòn nan. Lè Abraam rivé anlè tèt mòn nan, li maré pitit li Izaak sou chaj boua-a, li pran kouto pou-l touyé-l, pou-l ofri-l kòm sakrifis, jan Granmèt la té mandé-l la. Min anj Bondié-a kinbé min Abraam, li ouè lafoua-l té gran. Abraam ofri youn bélié ki té makònin nan liann yo nan plas pitit li-a. Min vré Mouton sakrifis la, sé Jézu, dapré répons Jan-Batis bay pou késion Izaak la ki pa-t ko jouinn répons la: "Granmèt la ap prévoua sa". Min Mouton Bondié-a ki ouété péché sou tè-a. Mouton Izaak la.

Mouton Pak la: Juif yo té délivré sot nan éskavaj Éjip la, kòm sign pèp krétyin-an t-ap délivré anba péché ak anba pouvoua Satan. Sé yon mouton yo té pran, yo té touyé nan nuit la, yo té maké pòt yo ak san-l. Anj la té passé, li té touyé tout prémié pitit Éjipsyin yo, li té soté anlè kay pitit Israël yo (Ex 12, 3ss). Mak la, sé Koua Jézu-a. San-an, sé san Nouvo Kontra-a. Min Mouton Bondié-a ki ouété péché sou tè-a. Mouton Pak-la.

Mouton Sèvitè Granmèt la: Profèt Izayi té ouè youn pèsonaj ki t-ap vini, ki t-ap bay lavi-l pou sovè pèp li-a, ki t-ap tankou youn mouton y-ap minnin labatoua. Li pap louvri bouch li dévan moun yo k-ap koupé linn li-a (Is 53, 7). Sé Granmèt la minm, ki t-ap mouri-lévé pou Pèp li-a. Li minm ki vini tankou yon Sèvitè, ki bay lavi-l pou tout foul moun yo. Min Mouton Bondié- a ki ouété péché sou tè-a.

Mouton Izaak la, Mouton Pak-la, Mouton Sèvitè Granmèt la: Sé li minm n-ap kalkilé nan dézièm dimanch òdinè-a, nan Ané A-a, avan nou kontinué ak léktu lévanjil Sin Matié-a n-ap li bout pa bout chak dimanch nan ané-a. Nan chak mès, avan nou kominié, Pè-a lévé kò Jézu-Kri, li présenté-l dévan fidèl yo, li di: Min Mouton Bondié-a ki ouété péché sou tè-a. Nou réponn: "Granmèt, mouin pa mérité pou-ou antré lakay mouin, min di youn paròl sèlman, é nanm mouin va géri". N-ap mandé Manman Mari pou nou louvri kè nou, pou Granmèt la géri nanm nou, avèk Paròl li, pou-l antré lakay nou, pou-l soupé avèk nou tèt a tèt (Ap 3, 20).

Min Mouton Bondié-a ki ouété péché sou tè-a. Mouton Izaak la, Mouton Pak-la, Mouton Sèvitè Granmèt la. Koté mouton-an pou sakrifis la? Se Granmèt la k-ap prévoua sa. Mouton Izaak la. Min Mouton Bondié-a ki ouété péché sou tè-a. Mouton Pak-la. Min Mouton Bondié-a ki ouété péché sou tè-a, k-ap délivré nou sot nan ésklavaj péché-a. Sèvitè Granmèt la k-ap souffri, ki rété an silans pandan y-ap maltrété-l, pou nou kapab sové. Min Mouton Bondié-a ki ouété péché sou tè-a. Mouton Izaak la, Mouton Pak-la, Mouton Sèvitè Granmèt la. N-ap mandé Manman Mari, "Refuge des Pécheurs", pou-l fè nou louvri kè nou, pou nou délivré anba péché-a, pou nou réservoua rédanmsion-an, pou nou aksépté kouté Voua Mouton k-ap invité nou nan rékonsiliation ak Pénitans la. Min Mouton Bondié-a ki ouété péché sou tè-a.

Lévanjil la montré nou Jézu kòm Mouton Bondié. Jan Batis té anonsé-l kòm yon rach ki nan pié boua-a, k-ap tann moman pou koupé-l (Mt 3, 12). Sé sa pèp Juif la t-ap tann tou, yon Mési k-ap vi-n réglé tout bagay ak kòlè, ak vanjans (Is 35, 4; 61, 2). Min yo té konprann kòlè-a ak vanjans la, sé kont lènmi pèp la (Dt 7, 6). Jan-Batis té montré kòlè-a ak vanjans la, sé kont tout moun ki nan péché (cf Am 5, 18; 6, 3; 8, 9). Jan-Batis nan prizon-l, t-ap tann mòd Mési sa-a toujou, k-ap vi-n délivré pèp li-a ak fòs ponyèt li (Lc 7, 19; cf Ac 1, 6). Min dépi nan batèm Jézu-a, li té jouinn révélation spésial sou sa Jézu yé tout bon vré: Mouton Bondié. Li di li pa-t konnin-l, Sé Bondié ki devoualé sa ba li (Jn 1, 31), yon mouton ki réprézanté sila-a ki kòrèk la, y-ap pèsékité-a (Jer 11, 19), ki rété an silans, pandan y-ap minnin-l labatoua-a (Mt 26, 63; Jn 19, 9; Lc 23, 9; Is 53, 7; 1P 2, 22). Juif yo t-ap tann yon lion ki soti nan ras Juda-a (Ap 5, 5; cf 7, 14; 19, 7). Yo dévan yon mouton (Ac 8, 31). Sin Piè té ralé épé-l, pou-l pran défans Jézu, lè yo té vi-n arété-l la; Jézu invité-l rimmèt épé-a nan fourou-l (Mt 26, 51ss). Min Mouton Bondié-a. Sé kòm mouton l-ap kondui pèp li (Ap 7, 17), l-ap fè nòs ki pap janm fini-an (Ap 19, 7). Min Mouton Bondié-a.

Sa invité nou konsidéré kijan Rédanmsion-an, sé yon travay rinmin, sé pa yon laviktoua ki apuiyé sou fòs brital. Min Mouton Bondié-a. Gin yon konvèsion ki pou fèt nan mantalité Juif yo, k-ap tann Mési-a. Gin yon konvèsion ki pou fèt tou nan pròp mantalité pa nou, ki abitué konté sou fòs pou réglé tout kèsion, ki abitué chofé difé rayisans la anndan fon kè nou, ki abitué krazé mal la, antan nou sèvi ak sa-k mal tou kòm instriman. Min Mouton Bondié-a.

Ané 1984 la, pou jounin la pè-a, premié janvié-a, Pap Jan-Pòl II té voyé yon lèt koté li té trété kèsion chanjé kè nou pou lapè pran nésans: "D'un cœur nouveau naît la paix". Sé pa fènoua ak ménas sèlman pou nou gadé, sé pou nou ouè tou posibilité rinmin ak éspoua (Message de Paix 1984, 1). Min

Mouton Bondié-a. Tè-a sanblé séparé en kat pati, yon bò sé "l'Est", kap bay kont "l'Ouest", avèk dé kalité filozofi, lòt bò-a sé "Nord", k-ap goumin ak "Sud", avèk dé kalité kondision sosyal. Sa fè youn ap chèché intèrè-l kont lòt la, antan sé nan lagè sèlman yo mété konfians yo. Min Mouton Bondié-a, Mouton ki ouété péché rayisans, rasi-n tout lòt kalité péché yo. Min Mouton Bondié-a. Sé nan kè lèzòm lagè-a kòmansé. Apré sa li li sèvi ak épé oubyin ak "Missile", pou-l réalizé désizion-l (Message de Paix 1984, 2). Sé kè-a ki pou chanjé. Min Mouton Bondié-a. Pap la di nan Mésaj lapè-a: "Le fait de recourir à la violence et à la guerre vient donc en définitive du péché de l'homme, de l'aveuglement de son esprit et du dérèglement de son cœur, qui invoquent le motif de l'injustice pour développer ou durcir la tension ou le conflit" (Message de Paix 1984, 2). Si gin rayisans, brutalité, lagè, sé paské "kè moun nan pa chanjé tout bon vré" (Jer 17, 9). Min Mouton Bondié-a. Koté lèzòm ap di: "Il faut gagner la guerre", krétyin ap déklaré: "Il faut gagner la paix" (Message de Paix 1984, 4). Min Mouton Bondié-a.

Anvan nou résévoua lakominion, nou konn abitué di: "Agneau de Dieu qui enlève le péché du monde, donne-nous la Paix". Yon kè ki fè chanjman mantalite (Ez 36, 26; Jer 31, 33) vi-n tounin "artisan de paix" (Mt 5, 8), l-ap travay pou lapè-a, san-l pa anplouayé mouayin lagè. Li pap sédé bay dékou-rajman. "Si tu veux la paix, prépare non la guerre, mais la paix". Min Mouton Bondié-a. "Agneau de Dieu qui enlève le péché du monde, donne-nous la paix".

N-ap sonjé bèl paròl kantik "Marie, ô Reine de la Paix"-a ki di: "Répandez sur eux vos bienfaits, sur les cœurs tentés par la haine. Enchaînez-les dans votre chaîne". Chinn rinmin-an, padon-an, rékonsiliation-an.

*

Chak ané, pandan yon sèmèn, dépi 18 janvié jous 25 janvié, sé sèmèn la-priyé pou tout légliz la fè yon sèl. Jan-Batis té di, lè-l ouè Jézu ap vi-n mandé-l batèm: "Min Mouton Bondié-a, ki ouété péché sou tè-a" (Jn 1, 29). Mouton sa sé Sèvitè Grammèt la (Is 53, 7), sa Profèt Izayi di osijè-l la nan premié léktu-a: mision-l sé pa sèlman réfè pèp Israèl la, min sé sèvi limiè pou tout nasyon yo, (Is 49, 6). Tankou yon mouton y-ap kondui labatoua, li rét an silans (Is 53, 7). Pinision péché tout moun (Is 53, 6a.b.c.12) tonbé sou li, pou-l fè yo jouinn lapè (Is 53, 5). Sé mouton fèt Pak la, sa pitit Ébré yo té sakrifé nan nuit la, nuit sa-a yo tap sové kité Éjip la (Ex 12, 5). Sé mouton Abraam té ofri nan plas pitit li-a sou mòn Moriya-a (Gn 22, 7-8.13). Izaak té pozé papa-l kèsion, li té di-l: "Min difé-a avèk boua-a; sèlman koté mouton-an pou sakrifis la?" (Gn 22, 7). Abraam té réponn: Sé Bondié k-ap okipé

kozé mouton-an pou sakrifis la (Gn 22, 8). Bondié pa-t kité Abraam touyé pitit-la. Abraam té ouè yon bélié ki té anpétré nan liann yo ak kòn li, li pran-l, li touyé-l nan plas pitit la (Gn 22, 13).

Sèlman sa-a sé té yon sign; vré mouton-an pa-t ko rivé. Sé Jan-Batis k-ap réponn késion Izaak la, lè-l di: "Min Mouton Bondié-a" (Jn 1, 29). Ki sign Mouton sa-a aprann nou rémaké? Moun k-ap sèvi intèmediè pou-l rasanblé lòt yo, li doué konpòté kò-l tankou yon mouton, sa vlé di tou dou, san-l pa fè arogan, san-l pa sèvi ak fòs tankou lion k-ap fè moun kouri, k-ap fè moun pè. Moun kap sèvi intèmediè pou fè lòt yo fè yon sèl, sé pou-l pran dènié plas nan group moun yo, tankou pouint bèk yon antonoua, ki pi ba pasé tout rèss antonoua-a pou pèmèt siro-a tonbé anndan bouch boutèy la. Moun k-ap sévi intèmediè pou fè lòt yo fè yon sèl, sé pou-l tankou yon pon ki pèmèt yo kapab pasé sot nan yon bò lariviè-a al sou lòt bò-a. Sé poua Prèt an chèf la, yo rélé-l "Pontife". Jézu sé pon sa-a. Li Bondié, li moun; li fè pon ant Bondié ak moun yo. "Nature humaine" li pa fèmin sou li nan légzistans la. Li rét louvri, sé "personne divine" li ki fèmin-l. Konsa li louvri pou kominiké ak tout lèzòm. Li fè yo vi-n tounin yon sèl nan li anba pouvoua Bondié.

Li té di: lè y-a lévé-l anlè, sot sou tè-a, l-ap rasanblé tout moun vi-n jouinn li (Jn 12, 32). Lè yo klouré-l sou Koua-a, yo séparé rad li, san yo pa chiré manto-l la, ki té fèt san koutu-a (Jn 19, 1). Lè-l lévé vivan sot nan pami mò yo, li té fè Apot yo fè yon kout lapèch, yo pran 153 gro pouason. Malgré kantité sa-a, filè-a pa chiré (Jn 21, 11). Sé sign légliz la fè yon sèl. Minm jan sòlda yo pa chiré manto Jézu-a (cf 1 R 11, 30), minm jan kantité pouason yo pa chiré filè Sin Piè-a. Konsa légliz la pa kapab chiré non plis tou, malgré y-ap rédi-l nan tout sans, avèk tout kalité kontrariété li kapab rankontré, avèk tout kalité divèsité li ginyin tou. Moun ki té konn panché sou lavi plant yo ak bèt yo, sa yo rélé "botaniste" yo, yo té konnin 153 èspès pouason. Chif 153-a montré kijan, minm si légliz la fè yon sèl, gin plas pou anpil divès kalité aktivité; youn pa jinnin lòt, youn doué respèkté lòt.

Légliz péyi "l'Est" té gin kèk difikilté pou akòdé avèk fason légliz péyi "l'Ouest" t-ap kondui nan sèvis minm Bondié-a, minm Kris la. Vè ané 177 apré Jézu-Kri, Sint-Iréné, Évèk Lyon, té travay anpil pou insisté sou sa-k fè dé légliz yo sanblé. Sèké li té sot nan "l'Est" (Asie mineure), épi li t-ap travay nan "l'Ouest" (Lyon); li té kapab sèvi kòm pon, fasil, ant yo dé-a. Li té suiv lansègnman Sin Polikap, ki té nan lékòl Sin Jan. Li té o-kouran premié difikilté légliz té rankontré dépi sou tan Sin Jak ak Sin Pòl, akoz moun yo ki pa-t mété inpòtans sou réalité lavi Jézu sou tè-a. Yo té rélé moun sa yo "gnostique". Pou yo, sa sèlman ki té konté, sé "idée" yo, "connaissance" yo,

min sé pa "personne" Jézu-a avèk "histoire" li. Sé pa lidé ni konésans ki sovè nou, sé Jézu, moun Nazarèt la, ak tout istoua li.

Èvèk lavil Lyon-an gin doua rémonté mach éskalié yo jouska Sint-Iréné, jouska Sin Polikap, jouska Sin Jan, jouska Jézu-Kri. Épi tout lign sa-a gin anpil branch ki soti nan li, ki bay dot branch, branch sa yo ki bay dèt branch tou. Yo tout monté jouska Sint-Iréné, jouska Sin Polikap, jouska Sint Jan, jouska Jézu-Kri. Sin Pòl di Timoté: "Ce que tu as appris de moi, sur l'attestation de nombreux témoins, confie-le à des hommes sûrs, capables à leur tour d'en instruire d'autres" (2 Tm 2, 2). Sé yon sèl légliz ki ginyin. Sé "tradition"-an ki transmèt lansègnman-an, sé "hiérarchie"-a ki transmèt gouvènman-an. Légliz gin lansègnman ki ranmasé nan "Krédo"-a. Légliz gin chèf nan pèsòn Pap la avèk Èvèk yo ki an-akò avèk li. Sin Pòl di Timoté ak Tit pou yo fè atansyon mové lansègnman k-ap glisé nan légliz la, pou défèt ékilib li. Li di chèf légliz Éfèz yo fè atansyon moun k-ap glisé kò yo tankou lou nan pak mouton yo (Ac 20, 29). Sin Jan mandé fidèl yo pou yo pa mét konfians yo nan ninpòt ki moun. Li di pou égzaminé mèsaj yo, paské gin anpil fo-profèt, yo gin léspri anti-Kris la. Sé "lidé" y-ap préché, yo pa bazé sou "pèsòn" Jézu-Kri-a, Pitit Bondié, ki vi-n tounin moun nan vant Mari ki Vièj nan vil Nazarèt la (Jn 4, 1-3).

Divès oriantasion légliz pa vlé di divès légliz ki séparé youn ak lòt. Sin Pòl té mandé Romin yo pou yo lapriyé pou légliz Jérusalèm nan té aksépté kado légliz lazi-a, kòm sign ki montré sé pa dé légliz ki ginyin, min sé yon sèl, minm si yon bò okipé plis Juif yo, lòt bò-a okipé plis payin yo (R 15, 30-31). N-ap mandé Manman Mari pou nou insisté sou sa-k fè nou sanblé plis pasé sou sa-k fè nou gin diférans antré nou. N-ap mandé-l tou pou nou santré oriantasion nou sou chèf légliz Jézu-Kri-a ki a-Ròm sou fotèy Sin Piè-a. Sou tan Sint-Iréné, lè-l t-ap fè démonstration fondasion légliz la, li té sité non tout Pap yo ki té pasé a-Ròm apré Sin Piè. Li té rivé sou niméro 12. Li té konté: Lin, Anaclet, Clément, Évariste, Alexandre, Xyste, Télesphore, Hygin, Pie, Anicet, Soter, Éleuthère (Adversus Haereses III, 3, 2.3; cf Missi No 482, p. 190; 6, 1986, juin-juillet).

Sé kot Éleuthère ninm légliz lazi-a té voyé Sint-Iréné, pou mandé-l pou-l pa bay légliz "l'Est" yo pinision poutèt gin nan yo ki kontinué fété Pak la yon jou fiks, nan dat 14 nisan. Tout légliz yo gadé sou légliz Ròm nan. Nou t-a gin doua kontinué lis la jous jodi-a, jous nou rivé nan Pap Pie XII, Jean XXIII, Paul VI, Jean-Paul 1^{er}, Jean-Paul II. Sé yon lign ki pa janm kasé. Sé avèk lign sa-a tout légliz yo doué akòdé.

Nan asouè Jédi-Sin-an Jézu té di: "Sé pou yo tout fè yon sèl, tankou ou minm Papa ou nan mouin épi mouin nan ou" (Jn 17, 21).

*

* *

DÉZIÈM DIMANCH ÒDINÈ B

Ané sa-a, sé ané koté yo li lévanjil Sin Mak chak dimanch, sé ané B (Ané A, sé Sin Matié, ané pasé; Ané C, sé Sin Luk, ané prochèn si Bondié vlé). Sèlman, nan dézièm dimanch òdinè-a sé yon pasaj nan lévanjil Sin Jan-an yo li: chapit 1, vèsè 35 a 42. Pasaj sa-a, li louvri aktivité Jézu ap minnin apré batèm li. Li tou louvri tan òdinè-a tou, apré dimanch Batèm Jézu-a (dimanch pasé).

Premié mo ki soti nan bouch Jézu, sé: "ki sa n-ap **CHÈCHÉ?**" (Jn 1,38). Sa raplé nou mo ki té soti nan bouch li, lè-l té gin douzan, lè Mari ak Jozèf té jouinn li nan kay sakré-a, li té di: "Poukisa n-ap **CHÈCHÉ-M?**" (Lc 2,49; cf Jn 1,38). Sa raplé tou premié mo k-ap soti nan bouch li, lè-l lévé vivan sot nan pami mò yo: "Madam pouki sa ou-ap kriyé? Ki moun ou-ap **CHÈ-CHÉ?**" (Jn 20,15).

Chèché Jézu sé yon bagay ki inpòtan anpil. Sèké Jézu sé Sajès Bondié. Sajès la di konsa: Moun k-ap chèché-l dépi granmatin avan solèy lévé, li pap rankontré difikilté pou jouinn li (Sg 6,14). Sajès la di pou chèché Granmèt la toutotan nou gin tan (Is 55,6), pou trò ta pa baré nou (Am 8,12). Min sé pou nou chèché-l avèk kè nou tou sinp, san nou pa pran divès détou, san nou pa fè dout (Sg 1,1); sé nan chémin lafoua pou nou chèché-l; sé pa pou nou chèché-l ak dé kè, antan n-ap ézité (Jc 1,5-8). Sé pou nou chèché-l ak tout intélijans nou, ak tout volonté nou. Sé pou nou antré nan fon kè nou pou nou chèché-l koté Tanp Bondié-a yé-a, jan Sin Pòl di nou nan premié léktu-a, lè-l di nou manb nou sé kay sakré léspri Sin-an, antan li palé nou osijè mové plézi pou nou évité (1Co 6,13-20).

Sèlman nou pa t-a kapab chèché Jézu, si li minm li pa-t déjà vi-n chèché nou. Liv Ékléziastik la di: Sajès la pròminnin tout koté ap chèché moun ki mérité jouinn li (Si 24,7ss). Li di: moun ki chèché-l bonè ap jouinn li chita nan papòt lakay li (Sg 6,14). Lè Natanaël vi-n koté Jézu, Jézu di-l: "Anvan Filip té rélé-ou la, lè-ou té anba pié fig la, mouin té ouè-ou" (Jn 1,50), sa vlé di: mouin té déjà pozé jé-m sou ou, mouin té rélé-ou. Sé konsa Bondié di Jérémi: "dépi anvan-m té fòmé-ou nan vant manman-ou, mouin té konsakré-ou: (Jer 1,5). Sin Jan di: Sé pa nou minm ki rinmin Bondié an premié, sé li minm ki rinmin nou an premié (1Jn 4,10), nou minm sé réponn nou réponn li. Jézu té di Sint-Ogustin konsa: "ou pa t-a chèché-m, si-ou pa-t déjà jouinn mouin ". Plis nou jouinn li, plis n-ap chèché-l, paské sé plis li ba nou gou pou nou jouinn li pi plis (Si 24,21).

Gin divès fason Bondié rélé yon moun. Nan lévanjil la, nou ouè kijan sé André ki minnin Piè bay Jézu, minm jan Filip ap minnin Natanaël ba li. Li té déjà rélé Piè, min li sèvi avèk frè-l la André pou-l fè-l tandé voua-l yon fason pi sansib, minm jan Jan-Batis ap fè dé patizan-l yo, André ak Jan lévanjélis, rékonèt Jézu kòm Mouton Bondié-a pou yo suiv li. Nan premié léktu-a, nou ouè kijan ti Samuèl té nan tanp la, li tandé voua Bondié k-ap rélé-l pandan toua foua, li pa konn koté pou-l dirijé, l-al jouinn prêt Éli. Chak foua Éli voyé-l kouché. Li pa pèdi pasians. Alafin Bondié fè Éli konprann sé li minm ki t-ap rélé ti Samuèl (1Sm 3,3-19). Bondié gin divès fason pou-l rélé yon moun. Li rélé Sin Pòl antan-l chaviré-l gro midi, pandan Sin Pòl té nan raj kòlè-l, pandan li t-apral arété krétyin yo Damas. Li avéglé jé-l antan-l fè zéklè parèt dévan-l. Sé sou toua jou Pòl vi-n ouè klè (Ac 9,1-19). Sin Pòl kinbé minm tanpéraman cho-l la. Min li mété-l nan sèvis Bondié, apré li fin-n chanjé rout la. Jézu rélé Sin Jan, jan nou ouè nan lévanjil la, vè katrè lapré-midi, nan fréchè bò larivié Joudin-an. Sin Jan pasé tout nuit la, ap kouté méyaj Jézu. Tout lévanjil li-a poté mak fabrik premié rankont sa-a, sé tankou dlo larivié Joudin-an k-ap koulé tou dousman, nan fréchè lapré-midi. Chak moun gin fason pa-l Bondié rélé-l. Gin moun k-ap chèché répons nan problèm yo rankontré. Bondié profité pran yo la minm. Li montré yo sé li minm ki vré répons problèm yo-a. Nan pouin yon chémin nou pasé nou pa rankontré Bondié. Li sé "Alfa" ak "Oméga", Kòmansman ak Finisman. Lè nou pèdi rankont li nan yon kalfou, li pi dévan, l-ap tann nou toujou. Sèké li tout koté, li la tout tan. Konsa li pa janm trò ta pou nou jouinn Bondié. Sé tout tan pou n-ap chèché Bondié. Lè nou konprann nou fi-n jouinn li, sé lè sa-a pou nou kontinué chèché-l pi plis toujou, paské dèyè mòn sé mòn (cf: Si 24,21).

Ki sa n-ap chèché? Apot yo té jouinn Jézu. Min Jézu té rivé yon lè, li té mandé yo sa-l yé pou yo (Mc 8,29). Sèké yo té patajé kouayans Juif yo ki t-ap tann yon Mési k-ap vini tankou yon jénéral ki ranpòté laviktoua, k-ap tiré vanjans sou lènmi-l yo. Jous Jézu ap monté nan sièl, Apot yo kontinué ap mandé-l: "Èské sé nan tan sa-a ou-ap réfè ringn Israël la?" (Ac 1,6). Sin Jan-Batis li minm ki té di "Min Mouton Bondié-a", lè-l té nan prizon-l nan li té voyé mandé Jézu si sé li minm ki gin pou-l vini-an oubyin si sé yon lòt Mési pou yo tann (Mt 11,3). Jézu vini tou dou, tou pòv (Mt 11,29). Lè-l ap antré Jérusalèm, sé sou yon ti bourik li monté, pou-l montré li pa vi-n fè lagé (Mt 21,5; cf Za 9,9). Li roua, min sé pa tankou roua yo sou tè-a (Mc 10,42-45; Jn 18,36).

Psòm répons la di: "Min m-ap vini, Granmèt, pou-m fè volonté-ou" (Ps 40,8-9). Sé konsa Jézu té di: "sé pa volonté pa-m ki pou fèt, min sé volonté

pa-ou" (Mt 26,42); minm jan ti Samuèl té di: "Ou mèt palé, Granmèt, sèvitè-ou la ap kouté: (1Sm 3,10); sé konsa la Trè Sint Vièj Mari ap di: "Min Sèvant Granmèt la, sé pou sa fèt pou mouin dapré paròl ou-a" (Lc 1,38). Sé sa ki pòv ki jouinn Sajès Bondié-a, ki kontinué ap chèché-l tout tan. N-ap mandé Manman Mari "Notre Dame de la Sagesse", favè sa-a pou kè nou pòv, pou nou toujou ap chèché Jézu, pou nou toujou ap mandé tèt nou: ki sa n-ap chèché? (Jn 1,38). Ki moun n-ap chèché? (Jn 20,15). Poukisa n-ap chèché-l? (Lc 2,49). Ki sa n-ap chèché, tankou dé premié Apot yo, André ak Jan, yo palé nou nan lévanjil la. Ki moun n-ap chèché, tankou Mari-Madlèn nan kavo-a nan matin jou dimanch Pak la. Pouki sa n-ap chèché-l, tankou Mari ak Jozèf nan Tanp la, lè Jézu té gin douzan-an. Sa vlé di: Sa Jézu yé? Sa-l yé pou nou? Sa l-ap fè pou nou? Sé konsa n-ap chèché Jézu-Sajès-Bondié-a. **MIN MOUTON BONDIÉ-A** (Jn1,29.36; cf Gn 22,7ss; Ex 12,3; Is 53,7; Jer 11,19; Ap 5,6-14).

*

Jan-Batis bay Jézu pròp patizan pa-l yo: Jan avèk André. André suiv jès Jan-Batis la. Li minnin frè-l la, Simon bay Jézu. Li aksépté frè-l la pasé devan-l. Sé André Jézu té rélé anvan. Min sé Piè li fè chèf légliz la. Sin Piè di Ansyin yo, ki réponsab légliz yo, pou yo pa pran pòz otorité yo, kòm si sé yo minm sèl ki mèt éritaj la, min sé pou yo konpòté tèt yo yon fason pou yo sèvi modèl pou moun yo réponsab yo (1P 3,1-4).

Sé konsa Jan-Batis té sèvi modèl pou patizan-l yo. Yo suiv tras li. Li pa-t konsidéré yo tankou pròp propriété pa-l. Li rinmèt yo bay Jézu. Li di li pa mérité défèt lasèt sapat Jézu (Jn 1,27). Li di sé sinp zanmi Mésié marié-a li yé, sé pa li minm ki Mésié marié-a (Jn 3,28-29). Li di sé sinp voua-a li yé, k-ap poté Paròl la, sé pa li minm ki Paròl la (Jn 1,23). Li di sé pou Jézu grandi, pou li minm minm li vi-n tou piti (Jn 3,30).

Prèt Éli konprann Bondié rélé Samuèl. Li aksépté dirijé Samuèl bay Bondié, pou Bondié palé ak Samuèl, pou Samuèl pran pròp plas pa-l. Li pa fè jalouzi. Okontrè li montré Samuèl kijan pou-l réponn Bondié. Bondié ba nou réponsabilité, min sé pa pou nou minm sèl. Li lib pou-l ranplasé nou jan-l vlé. Nou doué fè tankou sèvitè ki pa sèvi anyin-an, ki aksépté fi-n fè travay li, san-l pa résvoua rékonpans (Lc 17,10). Nou doué kité Bondié mété moun li vlé pou kontinué travay li ba nou fè-a.

N-ap mandé Manman Mari pou-l fè nou tankou yon balé yo déposé dèyè pòt, lè-l fi-n travay, jan Sint Bènadèt té di osijè pròp tèt pa-l la, pou nou kité Bondié palé ak moun li vlé, jan-l vlé; san nou pa jinnin-l, okontrè pou nou fè tankou Jan-Batis, pou nou montré diréksion-l: "Min Mouton Bondié-a", pou nou fè tankou Prèt Éli, pou nou montré kijan pou réponn li: "Ou mèt palé, Granmèt, sèvitè-ou ap kouté" (1Sm 3,9).

*

* *

DÉZIÈM DIMANCH ÒDINÈ C

Koté la Trè Sint Vièj Mari yé, yo ouè divin-an manké. Lè-l pa la, yo pa oué sa. Lè nou invité-l nan kè nou, k-ap marié avèk Jézu, li ouè sa-k manké, li palé ak Jézu pou nou, li abiyé nanm nou pròp pou nou résévoua-l.

Lafoua la Trè Sint Vièj Mari ap fè Jézu kòmansé séri mirak li yo nan nòs Kana-a. Min Jézu kòm bay Manman-l randé-vou nan pié lakoua; lè-l pa ko rivé pou-l montré tou sa-l yé: lè lè-a ap rivé Mari ap la, Réyéلمان vré, la Trè Sint Vièj Mari disparèt nan lavi piblik Jézu (nan lévanjil Sin Jan-an) pou-l parèt ankò nan pié Koua-a. Lè sa-a Jézu ap di: "Madanm, min pitit ou". Apati lè sa-a patizan-an ap pran-l lakay li (Jn 19, 25-27). Sé lè-l k-ap rivé ansanm ak lè Jézu. Madanm nan k-ap akouché-a nan lapinn paské lè-l rivé (Jn 16, 21). Lè Mari-a nan rélasyon avèk lè Jézu-a. Nan nòs Kana-a lè Jézu pa-t ko rivé, lè Mari pa-t ko rivé tou: "Sa sa yé pou ou minm ak mouin minm, lè-m pa ko rivé" (Jn 2,4). Donk lè-ou tou pa ko rivé lè nou tou lé dé-a pa ko rivé. Nan pié lakoua-a lè nou tou lè dé-a ap rivé. An-atandan, sé kòmansman sign yo k-ap dérapé (Jn 2,11), sé klé pòt sign yo k-ap louvri, sign sa yo k-ap plin lévanjil la, k-ap tankou machéskalié k-ap minnin nan pi gran sign ki ginyin-an, sign lakoua-a. Sé sign Kana-a k-ap bay sans tout lòt sign yo, k-ap dévoualé sans sign lakoua-a.

Nan plas divin Jézu sèvi nan nòs Kana-a y-ap ba-l vinèg, sou kabann nòs lakoua-a min li minm l-ap gin tan fè divin-an vi-n tounin pròp san-l dépi nan jédi-sin, premié lanmès li fè avèk Apot li yo. Vré Mésié marié-a, sé li minm. Sé Mésié marié-a ki té konn bay divin-an. Sé poua chèf kanbiz la al jouinn mésié marié-a, li té konpran sé li minm ki té bay bon divin-an jouskalafin. Nan mèvèy sakré soufrans ak lanmò Jézu-a, Sin Jan di nou li té rinmin moun li yo, li rinmin yo jouskalafin (Jn 13, 1). Lè-l fi-n bay Manman-l, l-ap ouè tout bagay rivé jouskalafin (Jn 19,28), l-ap boué vinèg-la, l-ap di: "Tout bagay rivé jouskalafin (Jn19,30). Li boué ingratitid lézòm, ki ba-l vinèg kòm répons pou rinmin li ba yo. Sé kantik pié rézin-an ki pou té bay bon frui-a, épi ki bay grin-n rabi-a (Is 5,2).

*

"Ninpòt ki sa li di nou, sé pou nou fè-l" (Jn 2,5). Sé dénié paròl la Trè Sint Vièj Mari nou tandé nan lévanjil yo. Sé tankou yon téstaman li kité pou nou, k-ap kònnin nan zòrèy nou, tankou yon éko: "Tou sa li di nou, sé pou nou fè-l"

Lavi nanm nou, sé fè yon sèl avèk Jézu- Kri, Pitit Bondié-a, nan sa nou yé ak nan sa n-ap fè. "Tou sa li di nou, sé pou nou fè-l." Jézu sèvi nou modèl

nan sans sa-a. Volonté-l fè yon sèl avèk volonté Papa-l. Lavi-l ankadré ant dè jès ak paròl ki montré nou sa. Lè l-ap antré sou tè-a, dapré sa Psòm nan di-a (Ps 40, 7,9) cf He 10,5-7), li di konsa: "Ou pa-t vlé ni sakrifis ni kado, ou ban-m yon kò, mouin minm mouin di min m-ap vini, nan roulo liv la, yo ékri osijè-m pou-m fè volonté-ou" Épi lè l-ap pati kité tè-a, li di nan jadin Jétsémani-an: "Papa, sé pa volonté pa-m ki pou fèt, min sé volonté pa-ou" (Lc 22, 43). Konsa lavi Jézu ankadré ant dé jès ak paròl ki montré tout lavi-l sé fè volonté Papa-a, joutan li rivé di: "Tout bagay fi-n réalisé nèt" (Jn 19,30). Sé poua lè Apot yo vi-n pot manjé ba li, li di yo: "Manjé-m sé fè volonté Sila-a ki youé -m nan" (Jn 4, 14).

Si la Trè Sint Vièj Mari kapab di invité yo nan nòs Kana-a: "Ninpòt ki sa-l di nou, sé pou nou fè-l" sé paské li minm tou li té akòdé tout volonté-l sou pa Granmèt la. Li ba nou paròl sa-a kòm téstaman-l, kòm dènié paròl li, kòm "novissima verba". Sé nan minm lign sa-a li té kòmansé li minm tou, lè Mé-sajé Bondié-a lakanj Gabriyèl, té mandé-l konsantman-l nan, li té di: "Sé pou sa fèt pou mouin dapré Paròl ou-a" (Lc 1,38). Sé youn nan premié paròl nou tandé ki soti nan bouch la Trè Sint Vièj Mari. Sé nan minm lign sa-a li kontinué, sé nan minm lign sa-a li fini.

Koté granmoun yé, kay pa pran difé. Koté la Trè Sint Vièj Mari yé, nòs pa gaté. Bon divin-an rété jouskalafin. Gin dé foua nou konn kòmansé byin ak Granmèt la, min rivé yon lè, nou fébli, nou fè tankou Sin Piè k-ap maché sou dlo-a pou-l al rankontré Jézu, li kòmansé maché byin pròp, min lè-l oué kijan lanm lanmè-a ap monté, li gin vètij, li pè, li kòmansé koulé, joutan Jézu pran min-l. Li fi-n di li pa gin doua janm trayi, minm si tout moun pati kité Jézu, l-ap rété pou kont li avèk li, min apèn yo dévizajé-l, li kòmansé nié, joutan li fè sèman toua foua; érézman apré sa, li régrèt, li kriyé san. Sé féblès li pa-t prévoua-a ki fè fos li dévié. Sin Monfò di nou konsa, lavi nanm nou avèk tout kalité Bondié mét ladan-l sé nan vèsò frajil n-ap poté-l. Sé pou nou rinmèt li nan min Manman Mari, pou djab la pa ba nou yon pakala, pou-l pa jété-l atè, pou nou pa pèdi ni sak ni krab. "Ninpòt ki sa li di nou sé pou nou fè-l".

*

* *

TOUAZIÈM DIMANCH ÒDINÈ A

Ané sa-a, ané A, sé lévanjil Sin Matié-a nou li chak dimanch, moso pa moso. Sé pou sa yo komansé avèk premié mision Jézu nan péyi Zabulon, Néftali, Transjordani, kalfou nasion payin yo. Sé moun péyi sa yo ki té pati an égzil an premié nan péyi Asiri. Sé yo minm ki résévoua Bòn Nouvèl la an premié tou lè Jézu-Kri komansé préché. Pèp nan Nò-a té séparé ak pèp nan Sid la sou tan roua Roboam, pitit Salomon. Jérобоam té pran dis dépatman nan Nò yo. Roboam té rété ak Juda sèlman nan Sid la (1 R 11, 26-39). Lévit yo pa-t gin okinn pòsion pou yo, sé nan sèvis Granmèt la yo té yé. Sé Granmèt la ki té sèl pòsion yo (Ps 16, 5; Dt 18, 1-2). Sé yo minm ki té gin possibilité asiré solidarité ant pèp nan Nò ak pèp nan Sid la. Pèp nan No-a, yo té rélé-l Israël; pèp nan Sid la, yo té rélé-l Juda.

Dé rouayom sa yo – Juda ak Israël -, yo té séparé malgré sé minm pèp la, pitit Abraam yo, pèp Bondié chouazi-a, pou sèvi limiè pou tout nasion yo. Ézékièl té anonsé yon jou t-ap rivé, yo t-ap rasanblé ankò vi-n fè yon sèl pèp (Ez 17, 15-28), lè-l pran dé baton, li ékri non yo chak sou yon baton, épi li kolé dé baton yo nan min-l, pou yo fè yon sèl la. Sé san Jézu sou Koua-a k-ap fè sign sa-a vi-n tounin réalité, lè, non sèlman l-ap rékonsilié Juda avèk Israël min l-ap rasanblé ni Juif yo ni payin yo, pou yo vi-n tounin yon sèl fanmiy nan (Jn 11, 52; Is 49, 5-6; Ep 2, 14; Jn 12, 32; Ep 2, 14; 2 Co 5, 18). An-atanan, nan dé rouayom sa yo, gin youn ki pati an égzil anvan, sé rouayom nan Nò-a, rouayom Israël la: sé roua Asiri-a, Salmanaza, ki égzilé-l. Li ranplasé-l ak dèt pèp li pran sot nan dèt péyi (2 R 18, 9). Lontan apré, pèp nan Sid la, Juda, pati al nan égzil tou; min li minm sé Nabukodonozò, roua Babilòn, ki égzilé-l. Li kité yon ti pòsion sèlman nan péyi-a. Konsa, pèp la gayé nèt (2 R 24, 10-20; 25, 21). Lè-l tounin sot nan égzil, dékourajman anpéché-l réfè "unité"-l yon fason solid, paské toujou gin rayisans ant moun nan Nò ak moun nan Sid, ant Samaritin nan Nò yo ak Juif nan Sid yo (Jn 4, 9; Esd 4, 4; Ag 2, 13s). Sé sa-k fè lè Jézu t-apral Jérusalèm li t-ap pasé nan lasamari, Samaritin yo pa-t vlé résévoua-l si byin Jan ak André té mandé Jézu pou difé sièl la désann sou yo pou-l boulé yo; Jézu té fè yo korijé langaj yo (Lc 9, 51-56). Sou bò pui-a, li té blijé fè anpil palé ak madanm Samari-a, anvan-l rivé konvink li sé pa dé pèp ki ginyin, sé yon sèl (Jn 4, -26).

Sou tan Ézékiás, roua Juda, Lévit nan Nò yo té sovè kò yo nan Sid, lè roua Salmanaza t-ap égzilé pèp Israël la nan Asiri-a (721). Yo té vini avèk liv Déteronom nan, ki té insisté anpil sou "unité", sou "centralisation", pou ké-sion rélijion (Dt 12, 5). Liv la té vi-n anfouyé nan Tanp la. Yo rivé jouinn li sou roua Jozias an 622 (2 R 22, 8). Jozias éseyé fè-l sèvi tankou baz réfòm

pou fè pèp la fè yon sèl ni nan rélijion, ni nan politik. Mouayin li té chouazi yo, sé té fòs. Jérèmi insisté pou fè konprann sé yon travay ki pou fèt anndan kè. Yo pa fòsé moun fè yon sèl. Yo mété yo nan kondision pou sa (Jer 31, 21).

Dézièm léktu a montré kijan Sin Pòl ap réproché Korintyin yo poutèt yo divizé antré yo, antan yon pòsion ap di yo pou li, yon lòt pòsion ap di yo pou Apòlòs, yon lòt pòsion ap di yo pou Séfas, yon lòt pòsion ap di yo pou Kris la (1 Co 1, 10-12); li mandé éské Kris la divizé? (1 Co 1, 13).

Sé pousa nou doué lapriyé pou tout légliz la fè yon sèl. N-ap sonjé lapriyé pou kalité mak divizion sa yo kapab éfasé sot nan légliz la.

Lévanjil la montré vokasion kat Apot yo: Simon Piè avèk André, épi Jak avèk Jan (Mt 4, 18-22). Dé premié yo, Simon-Piè avèk André, réprézanté dé kouran nan légliz la, kouran légliz Lati-n nan avèk Sin Piè, épi kouran légliz Grèk la avèk Sint-André. Lè Pap Pòl VI t-al vizité Jérusalèm, pou fè rékonsiliasion légliz "catholique" la avèk légliz "orthodoxe" la, li té anbrasé chèf légliz "orthodoxe" la Aténagoras, sou mòn Olivié yo. Aténagoras té ofri-l yon "icône", ki réprésanté dé frè yo: Simon-Piè avèk André, youn ap anbrasé lòt. Nan priyé asouè Jédi sin-an, Jézu té mandé Papa-l pou tout krétyin yo fè yon sèl, minm jan Papa-a ak li minm yo fè yon sèl la (Jn 17, 23).

"Unité" sa-a sé alantou yon chèf pou-l fèt, yon fason yo kapab ouè. Si légliz la gin yon "unité" sou pa anndan, gras a travay léspri Sin-an nan kè tout moun, li gin yon "unité" sou pa déyò tou, dapré karaktè vizib li, ki fèt an-akò avèk chèf légliz Ròm nan ki sou fotèy Sin Piè-a, li minm Jézu té rinmèt klé rouayom sièl la avèk tout pouvoua sou tè-a, ki anrèjistré nan sièl la (Mt 16, 18-19).

N-ap mandé Manman Mari pou résponsab légliz yo sèvi intèmediè pou fè krétyin yo fè yon sèl, antan yo minm yo gadé nan diréksion Pap la, sou fotèy Sin Piè-a, chèf tout légliz la.

Jous nan utièm dimanch òdinè-a, nan ané A-a, n-ap li premié lèt Korintyin yo kòm dézièm lèktu nan mès dimanch yo (1 Co 1, 26-31= 4èm dim òd A; 1 Co 2, 1-5= 5èm dim òd A; 1 Co 2, 6-10=6 èm dim òd A; 1 Co 3, 16-23= 7èm dim òd A; 1 Co 4, 1-5=8èm dim òd A). Antan n-ap réfléchi sou premié lèt Korintyin yo, n-ap sonjé jan Sin Pòl insisté pou fè nou konprann sé yon sèl kò ki ginyin, minm si gin anpil manb (1 Co 12). Li di nou gin divès kado léspri-a, min sé minm léspri-a; gin divès sèvis, min sé minm Granmèt la; gin divès aktivité, min sé minm Bondié-a ki fè tout bagay nan tout moun (1 Co 12, 6). Li di ni pié, ni zorèy, yo fè pati kò-a, min yo chak gin plas yo (1 Co 12, 15ss). Sé pou sa li mandé pou nou rézèvé yon plas apa pou lacharité-a, paské ninpòt kisa nou kapab fè si nou pa gin lacharité, sa pap sèvi anyin (1 Co 13, 1-13). Sé léspri-Sin k-ap fè nou tout vi-n fè yon sèl. Ané 1986 la Pap

Jan-Pòl II té ékri yon lèt Ansiklik sou léspri Sin-an, "Dominum et vivificantem". Nan finisman Lèt la, li té montré rélasion la Trè Sint Vièj Mari avèk léspri Sin-an, lè-l sité Apokalips Sin Jan-an ki di: "L'Esprit et l'Épouse disent: Viens!" (Ap 22, 17; Dominum et vivificantem, no 66). Pou prémié janvié 1987 la, Pap Jan-Pol II té déklaré yon ANÉ MARIAL, ki té louvri pou lapankot, 7 juin 1987. Li té éspliké sé yon fason pou préparé ané 2 000 la, k-ap fè sonjé nésans Jézu-Kri.

Bondié té préparé Mari, "Étoile du matin", dépi pliziè ané davans, pandan tè-a té vlopé toujou nan fènoua nannuit la. Antan n-ap fikse jé nou sou réyon klété-l k-ap fè zéklè, nan pèlerinaj nou an, n-a jouinn ankourajman, n-a jouinn sékou pi plis pou lafoua ak lacharité nou, n-a préparé pou nou résé-voua gras délivrans Sovè-a ki anlè nèt la, "Soleil de Justice" la ki déjà ap kléré byin kléré nan istoua lèzòm pou tout tan.

Sé pou Mari, Manman légliz la, "Reine de la Paix", fè tout krétyin yo fè yon sèl, pou yon nouvo souf léspri Sin souflé sou légliz-la, pou-l balé divizion, pou-l mété l' "unité", la "fraternité", la "solidarité", antan yo sonjé sé yon sèl Kò Bondié ba nou, sé Jézu-Kri.

*

* *

TOUAZIÈM DIMANCH ÒDINÈ B

Dimanch pasé, nou té tandé vokasion André ak Jan, ak Simon-Piè, bò lariviè Joudin-an, apré batèm Jan-Batis la. Nou té ouè kijan André ak Jan té pasé nuit la bò kot Jézu pou tandé paròl li, épi kijan nan matin, André té minnin Piè, frè-l la, bay Jézu, Jézu té di-l li rélé-l Séfas, sa vlé di Ròch solid koté l-ap bati légliz li-a. Jodi-a, nan lévanjil Sin Mak la (Mc 1,14-20), sé nan Galilé, bò lanmè Jénézarèt la, nou rankontré minm ékip la, avèk youn an plis, sé Jak, frè Jan-an. Sé dé fanmiy ki asosié nan travay lapèch pouason, fanmiy André ak Simon-an, épi fanmiy Jak ak Jan-an.

Jézu pasé bò koté yo, antan yo té lapèch. Li fè yo kité tout bagay pou yo suiv li. Dé premié yo André ak Simon, t-ap voyé filè yo nan dlo-a. Dé lòt yo, Jak ak Jan, t-ap rapiésé filè yo, ansanm ak papa yo ak anplouayé yo. André ak Simon kité filè yo la minm; Jak ak Jan kité papa yo ak anplouayé yo la minm. Vokasion pa aksépté réta. Nan pouin késion "M-apral anbrasé papa-m anvan, m-apral okipé moun lakay mouin anvan, m-apral rann dènié ti sèvis y-ap tann nan min-m...", tankou jénòm nan nan lévanjil la avèk Élizé, lè Éli té rélé-l la (Lc 9, 58-62; 1 R 19,20). Bondié pa aksépté nou viré-tounin, pou nou fè lè. Sé yon késion konfians pou nou fè-l. Sé pou nou okipé afè pa-l; li minm l-ap okipé afè pa nou. Sé pou nou kòmansé chèché péyi koté Bondié Roua-a avèk jistis li; tout rès la, y-a ba nou-l apré (Mt 6,33).

Moyiz t-ap fè lè, antan li t-ap bay Bondié divès rézon, youn pa vo lòt (Ex 3,1-4,17). Jérémi té prétann li trò piti, li pa konn palé (Jer 1,4-10), kòm si Bondié pa-t konn sa anvan-l chouazi-l. Ézékiel té gin pou-l monté mòn dévan tout difikilté li t-apral rankontré ak Juif yo (Ez 2-3). Sé Bondié ki t-ap sèvi-l kòm fòs. Lè nou fèb, sé atò nou pi fò (2 Co 12,11). Izayi pa minm kité Bondié mandé-l sèvis yon fason klè, li tandé Bondié ap palé an parabòl: "Kilès m-ap voyé?", li di: "Min mouin, voyé-m", jan-l yé-a (Is 6,8). Ni Piè ni André, ni Jak ni Jan, yo kité tout ti sa ki té sèvi yo asirans pou lavi yo, yo suiv Jézu la minm. Jonas, yo palé nan premié léktu-a (Jn 3,1-12), té pè al jous Niniv, péyi ki té lènmi pèp Israèl la, ki té fè dis pòsion nan ras la pati al nan légzil la. Bondié blijé fè yon gro pouason valé Jonas, pou kondui-l koté li minm li voyé-l la. Lè Bondié chouazi nou, li kòmansé fè nou ouè kijan nou pa gin anyin nan nou minm ki pou t-a mérité fè nou réyisi mision nou-an. Tou sa, sé pou nou kapab lagé dé gidon nan min-l. Sé pa nou minm k-ap palé, sé léspri Papa nou k-ap palé nan nou (Mt 10,20).

Jézu bézouin mésajé pou-l voyé anonsé Bòn Nouvèl Ringn li-a, pou moun yo kapab kouè, jan nou tandé nan lévanjil la. Sé prémié prèch Jézu; li di: "Tan-an rivé, Ringn Bondié-a proché; chanjé fason n-ap viv, sé pou nou **KOUÈ** nan lévanjil la" (Mc 1,15). Konsa tou nou konstaté apré prèch Jonas la, moun Niniv yo **KOUÈ** nan Bondié (Jn 3,10). Sin Pòl di kijan pou moun yo fè **KOUÈ**, si pa gin mésajé (Rm 10,14s). Si Bondié chouazi nou pou nou sèvi Pitit li-a témouin nan paròl nou ak nan konduit nou, nou pa doué pansé nou pa alarotè mision sa-a li konfié nou-an. Nou doué sèvi-l kòm instriman pou fè moun yo chanjé sot nan mové chémin yo, jan prémié léktu-a di nou-an osijè prèch Jonas la (Jn 3,10), jan Psòm répons la di-a (Ps 25,8): "l-ap aprann moun ki nan péché yo chémin-an", jan lévanjil la di-a: "chanjé fason n-ap viv" (Mc 1,15). Rékòlt la gran, travayè yo pa kont (Lc 10,2). Époutan, "tan-an kout", jan dézièm léktu-a di-a (1Co 7,29), "tan-an rivé", jan lévanjil la di-a (Mc 1,15). Sin Pòl invité moun ki marié pou yo viv kòm si yo pa marié; moun ki gin byin pou yo viv kòm si yo pa posédé; moun k-ap sèvi avèk tè sa-a pou yo viv kòm si yo pap sèvi avèk li, paské figi tè sa-a ap pasé. Sé yon fason pou nou sonjé égzijans vokasyon nou. Pou moun yo chanjé fason y-ap viv, sé pou nou minm déja nou aksépté chanjé fason n-ap viv, antan nou montré sé pa pou tè sa-a n-ap viv, sé pa pou lapéti richès li n-ap travay, sé pa pou plézi lachè kè nou ap bat; sé pou nou sèvi lévanjil la témouin, pou nou vin tounin tankou yon lévanjil ki vivan, k-ap pozé tout moun kèsion sou konduit yo. Sin Pòl di Timoté nan dènié lèt li ékri nan lavi-l, ki sèvi tankou téstaman-l, pou-l prèché paròl la avèk insistans, ni nan bon moman, ni nan mové moman, kit sa fè moun plézi, kit sa kontrarié yo, paské gin yon lè k-ap rivé, moun yo pap sipòté lansègnman lavérité-a ankò, min sé dapré pròp lanvi pa yo y-apral chèché mèt k-ap flaté zorèy yo ak bagay ki fè yo plézi, ki alé nan sans mové panchan yo, y-ap viré zorèy yo pou yo pa kouté bon lansègnman lavérité-a, pou yo okipé bagay ki pa vré. Sé lè sa-a pou nou kinbé pi fèm (2 Tm 4,2-5).

Pandan toua ané (1984, 1985, 1986), nou té kalkilé sou lafoua sitou, anndan névèn ané ki t-ap préparé sinkièm santnè évanjélizasyon lamérik la. N-ap mandé Manman Mari lafoua pou nou aksépté suiv Jézu jan nou yé-a, san asirans, tout koté li vlé, nan nuit ak nan savann, san nou pa pè; ak tout féblès nou, antan nou konté sou Sajès li pou nou konnin ki sa pou nou di, ki sa pou nou fè, pou nou paré chémin dévan-l, pou nou voyé filè-a tout koté, pou nou aksépté pèdi zanmi nou pou li, pou nou suiv li ak tout tanpéraman nou, pou nou sètin li toujou ap akonpagné nou, pou nou konnin rékonpans nou koté-l, sé pa tan nou n-ap pèdi.

Tan-an kout; nou pa gin tan pou nou pèdi. Tan-an rivé, nou pa doué rét ap fè lè. Tankou Apot yo, sé pou nou suiv Jézu la minm, san gadé dèyè. Épi sé chak jou pou nou toujou rékomansé ap suiv li, paské nou toujou gin kichòy ki séré, pou nou lagé bali. Minm si nou fi-n lagé-l, nou réprann li ankò. Nou toujou gin yon détachman pou nou fè. Anvan nou préché lèt moun yo pou yo chanjé konpòtman, pou yo réglé lavi yo dapré égzijans lévanjil la, sé pou nou fouyé konsians nou, pou nou ouè nan ki mézi nou minm nou sèvi lévanjil la paravan, nou sèvi-l miray, nou sèvi-l bariè, nou anpéché-l pasé, nou anpéché réyon-l yo kléré. N-ap mandé Manman Mari pou-l nétouayé vit kè nou, pou réyon solèy lévanjil la travèsè pi fasil, pou-l kléré ni chémin nou, ni chémin prochin nou.

*

Prémié prèch Jézu-a gin kat pati: 1.- Tan yo rivé bout yo; 2.- Péyi koté Bondié Roua-a tou pré; 3.- Chanjé fason n-ap viv; 4.- Kouè nan Bòn Nouvèl la. Dé prémié pati yo konsènè program Bondié. Dé dènié pati yo konsènè program moun yo. Program Bondié-a sé: tan yo ki rivé bout yo ak Péyi koté-l Roua-a ki tou pré. Program moun yo sé: chanjé fason y-ap viv, pou yo kouè nan Bòn Nouvèl la.

Konsa Jonas préché Niniv, li bay program Bondié-a: tan yo k-ap rivé bout yo nan karant jou pou vil Niniv la détrui. San Jonas pa bay moun yo program pa yo, moun yo kité ménas la touché kè yo, yo chanjé fason y-ap viv, yo kouè nan bon kè Bondié; Bondié padonnin yo. Sin Pòl di nan dézièm léktu-a tan-an kout, figi tè sa-a ap disparèt. Li invité nou gadé pi ro, pou nou sèvi ak byin k-ap pasé yo san nou pa ésklav yo. Sé nan mézi nou minm nou viv tankou dènié tan-an fi-n rivé, n-ap sèvi sign pou moun yo gadé pi ro. N-ap tankou yon prèch vivan pou yo. San nou pa bezouin palé, y-ap tandé mé-saj nou vlé bay la. Tan yo fi-n rivé bout yo. Péyi koté Bondié Roua-a tou pré. Chanjé fason n-ap viv. Kouè nan Bon Nouvèl la. Sé sa yo di nou, lè yo vidé sann sou tèt nou jou mèkrédi sin-an.

Sint Térèz lanfan Jézu fe konvèsion sa-a; antan-l chanjé pou-l vi-n tankou yon ti bébé parapò a Bondié (Mt 18,3). Sé tout tan nou gin chanjman sa-a pou nou fè nan fon kè nou. Nou toujou gin kichòy nan nou pou chanjé. N-ap mandé Manman Mari pou nou aji tankou kat prémié Apot yo, pou nou kité avantaj pèsònèl nou, pou nou suiv Jézu tou pòv, pou nou fè tankou Jonas, pou nou aksépté kité trankilité nou pou sèvis Grammèt la, pou nou fè sa Sin Pòl mandé Korintyin yo, pou nou sèvi ak byin k-ap pasé yo, san nou pa kité yo dékontrolé nou.

*

* *

TOUAZIÈM DIMANCH ÒDINÈ C

Jézu sé Profèt, sé li minm sèl ki gin klé k-ap dévoualé sans labib la. Minm jan li déroulè liv la, sé konsa li déroulè sans mèsaj la ki té vlopé tankou yon plèt fil. Tout lansyin Téstaman-an sé tankou yon liv fèmin, dapré sa Profèt Izayi di (Is 8,16; 29,11). Sé Jézu sèl ki gin pouvoua pou-l louvri liv la ki sélé-a (Ap 5,2), sa vlé di pou-l dékouvri sans Paròl la ki kaché nan Èkriti-a (Dan 12,4), sa yo sélé-a (Hab 2,2; Is 8,1; 30,8; Jer 30,2). Prèt Ésdras té li nan liv laloua-a, li té éspliké moun yo sans labib la, tankou prèch yo fè nan lamès. Li té monté sou yon éstrad ki ro pou-l préché. Li palé klè, tout moun konprann; paròl la si tèlman antré nan kè yo, yo kriyé; sèké li pénétré nan fin-fon nanm yo, li apliké nan sitiason y-ap viv la .

Gin moun ki konn sa-k nan labib, min yo pa konnin sa labib vlé di. Y-ap sité vèsè labib la pa-kè, min sa pa antré anndan zantray yo, sé intérésan y-ap fè ak Paròl Bondié-a, pou moun kapab di yo savan. Sé pa pou sa labib fèt. Gin yon lòt pòsion minm k-ap itilizé vèsè labib la pou yo fè diskision ki pa kapab fini; lè yo kolé yon koté, yo kité-ou la, y-al chèché yon lòt vèsè ki pa gin sans ditou ak premié konvèsasion-an; sé palé anpil sa yo Sin Pòl défann Timoté fè (2 Tim 2,14,16; 1 Tim 6,4-5; Tit 1,10-11). Yo fè tankou jako-répèt, k-ap répété kèk vèsè yo fi-n aprann pa-kè, san yo pa konn sa yo vlé di. Sé pa sa labib. Paròl Bondié pa fèt pou défann drapo tèl oubyin tèl légliz; li fèt pou mété linion, lacharité, bòn-antant. Sé sign sa yo k-ap fè ouè si réyèlman vré, yon moun k-ap préché, sé nan Jézu-Kri Granmèt la li résévoua mision-l (1 Tim 6,3). Paròl Bondié-a, sé matério pou bati kay, sé pa boulèt kannon pou démoli vil. Sé dapré frui yo pou yo jijé yo (Mat 7,16).

Sin Pòl di nan dézièm léktu-a: gin moun Bondié bay favè pou intèprété sans mèsaj ki kaché-a. Sé nan lèspri Sin-an kado spésial sa-a soti. Sa l-ap chèché, sé mété linion nan manb kò-a, sé pa divizion. Divizion-an sé nan djab la li soti (mo "djab" la vlé di: "Sila-a k-ap divizé-a, k-ap séparé-a, k-ap mété zizani-an": sé métié-l sa). Lè Paròl la fi-n antré anndan san nou, li réproché nou, li fè nou chanjé santiman; minm si nou té tris, n-ap vi-n gin kè kontan ak soulajman, jan premié léktu-a ak Psòm répons la di nou-an.

Jodi-a nou kòmansé léktu lévanjil Sin Luk la yon fason k-ap kontinué ala-suit, chak dimanch. Dimanch prochin si Bondié vlé (Katriyèm dimanch òdinè C-a), sé chapit 4,21-30. Nou mèt kòmansé paré-l pandan sémèn nan, pou ba-l tan pénétré anndan kè nou, tankou yon tè n-ap viré, pou nou planté mayi ladan-l. Konsa, lè n-ap rivé nan kominoté-a, dimanch si Bondié vlé, n-ap déjà gin yon ti lidé, nou pap bayé, nou pap anvi dòmi, nou pap sòti pandan prèch la pou-n al achté yon ti pistach, pou-n al pran bon jan van, nou

pap trouvé prèch la trò long, paské l-ap intéresé nou, si nou déjà préparé-l bò koté pa nou. Sonjé Luk 4,21-30 pou dimanch k-ap vini-an si Bondié vlé. [Lòt dimanch apré-a, sinkièm dimanch òdinè C-a, sé Luk 5,1-11; épi sizièm dimanch òdinè C-a, sé Luk 6,17-20-26].

Sonjé finisman lévanjil la, kijan tout jé fiksé sou Jézu, pandan li t-ap palé. Lè yon Misionè ap préché, sé Jézu li minm k-ap palé. Pa fèmin zòrèy nou. Jézu ap pasé. Li gin kichòy inpòtan pou-l di nou. Chak moun yon fason pèsonèl; sa-k frapé intèl nan prèch la, sé pa sa k-ap frapé yon lòt, paské, li pa gin minm problèm ak lòt la, sé yon sèl kò min sé anpil manb, chak manb gin rélasyon spésial pa-l avèk Granmèt la nan lèspri Sin-an, dapré sa Sin Pòl di nou nan dézièm léktu-a.

*

Ané sa-a, ané C, sé ané Sin Luk; sé pou sa chak dimanch sé lévanjil Sin Luk la y-ap li, Dimanch pasé, yo té fè yon éksépsion, antan yo té li pasaj nòs Kana-a, nan Sin Jan chapit 2,1-12. Ni ané A, ni ané B, ni ané C, dézièm dimanch apré Batèm Jézu-Kri-a, yo li Sin Jan (Jan 1,29-34 pou ané-a A, Jan 1,35-42 pou ané B, Jan 2,1-12 pou ané C. Apré sa, yo anbaké nan lévanjil y-ap li pandan tout ané-a, soua Sin Matié pou ané A, soua Sin Mak pou ané B, soua Sin Luk pou ané C, sa vlé di ané koté nou yé koulié-a. Sé pou sa, nan dimanch jodi-a, yo kòmansé karéman avèk kòmansman lévanjil Sin Luk la, chapit premié (Luk 1,1-4), ni kòmansman lavi bibliik Jézu (Luk 4,14-21). Nan tou lé dé pasaj sa yo, nou ouè sé yon kèsion L I V: Liv Sin Luk konpozé apré anpil moun té éseyé konpozé liv pou rakonté bagay ki rivé osijè Jézu-Kri (Luk 1,1-4), épi Liv Profèt Izayi-a Jézu déroulé nan kay réyinion-an jou saba-a pou-l fè léktu-a, épi pou-l éspliké kijan Paròl la réalizé nan zòrèy moun yo pròp jou sa-a minm (Luk 4,14-21).

Nan premié Léktu-a sé Liv Laloua Prèt Ésdras li pou pèp la, yon fason ofisièl, lè-l vi-n tounin sot nan légzil la, épi li anonsé-l nan lang pou pèp la konprann li (Néémi 8,2-4a.5.6.8-10). Li palé klè, pou tout moun tandé, li té monté sou yon éstrad yo té fè éspré pou tout moun té kapab ouè-l. Tout moun t-ap fè atansyon, yo té drésé zòrèy yo nan diréksyon liv la. Dépi Ésdras louvri liv la, tout moun kanpé, pou montré respè yo ginyin pou paròl Bondié-a. Ésdras li nan Liv la dépi matin jous asouè; lè-l fè konpliman pou Bondié, tout moun réponn: "Amèn, Amèn", yo adoré Bondié plat atè. Yo fè anpil éfò ni pou yo li, pou yo éspliké sa-k nan liv la, ni pou yo chèché konprann Léktu-a avèk ésplikasyon-an. Sé yon égzanp pou nou, nan fason pou préparé Léktu-a, avèk ésplikasyon-l, nan fason tou nou chèché konprann Léktu-a avèk ésplikasyon-an, pou nou adapté-l nan lavi nou.

Paròl Bondié-a gin fòs nan li minm, sé pa ninpòt ki liv. Sé yon liv sakré, sé Bondié minm ki soufflé moun nan ki ékri-l la sa pou-l mété ladan-l (2 Tm 3,16). Konsa sé yon konsign pèsonèl Bondié ba nou, pa sèlman pou moun ki t-ap viv lè yo t-ap ékri Paròl la, nan tan égzil la, apré tan égzil la, lè Pèp la té tounin Jérusalèm nan, nan tan Jézu-Kri-a, nan tan Apot yo, min sé yon paròl ki gin pouvoua pou-l palé avèk nou nan sa n-ap viv, chak jou. Sé premié dévoua yon Prèt, sé préché Paròl Bondié-a ki ékri nan labib la. Sé yon dévoua inpòtan pou fidèl la, pou-l fè atansyon nan sa Prèt la ap di-a. Gin moun ki pa vlé tandé prèch. Dépi prèch la kòmansé yo bayé, oubyin yo soti légliz la, si yo pa rivé apré prèch la minm. Sa pap ankourajé moun k-ap préché-a pou-l préparé prèch li byin, si-l konnin nou pap kouté. Prèch pa kapab trò long. Sint-Ogustin té konn préché lontan, tout moun té rét kanpé, li minm sèl ki té konn chita. Koulié-a minm tout moun chita, sé Pè-a sèl ki kanpé. Sé li ki t-a gin doua fatigé, époutan sé lékontrè ki rivé. Apré tout préparasyon Pè-a fi-n fè pou-l bay prèch la, gin dé foua sé voua k-ap préché nan dézè. Gin yon éfò pou nou fè pou nou kouté, pou nou kapab chanjé. Sin Pòl di konsa lafoua-a sé nan prèch la li soti ("Fides ex auditu": Romin 10,14-21).

Psòm-répons la, Psòm 18 la (= Psòm 19) gin kòm réfrin pasaj yo pran nan Jan 6,64b: "Paròl ou yo, Granmèt, sé léspri ak lavi". Vèsè 8.9.15 yo tiré nan Psòm nan raplé kalité Laloua Granmèt la, Témouagnaj li, kòmandman-l, jijman-l. Tout mo sa yo sé divès fason pou palé osijè Paròl Granmèt la ki konsignin nan labib la.

Dézièm Léktu-a (1 Korintyin 12,12-30), ki palé sou divèsitè manb kò légliz la, fini antan-l di konsa: "èské tout moun kapab bay sans Paròl yo?" (1 Korintyin 12,30). Réyèlman vré gin moun Bondié chouazi ésprè pou sa. Premiè ròl yon Prèt sé sa minm li yé, li gin pou-l préché, kélkésoua fason yo résé-voua mèsaj li-a, dapré sa Sin Pòl di Timoté nan dézièm Lèt li ékri Timoté-a (2 Timoté 4,2): "prèché Paròl la, insisté, vlé pa vlé, korijé, ménasé, ankourajé, avèk pasians san limit, épi antan ou-ap éséyé instrui". Sin Pòl di gin yon lè moun yo pap sipòtè lanségnman lavérité-a ankò; okontrè, antan y-ap suiv mové panchan yo, zòrèy yo ap graté yo, y-ap chouazi anpil kantité mèt, y-ap viré zòrèy yo sot nan diréksyon lavérité-a, pou yo viré yo nan diréksyon istoua ki pa vré, tankou kont moun ap tiré pou fè ti moun dòmi (2 Timoté 4,3-4e). Sin Pòl di Timoté pou-l fè atansyon nan tout bagay, pou-l sipòtè tray la, pou-l fè dévoua-l ki mandé-l préché lévanjil la ak tout kè-l (2 Timoté 4,5). Sé dènié konsign Sin Pòl kite pou Timoté, nan dènié Lèt li ékri anvan-l mourir. Li di-l sa yon fason ofisièl; épi dèyè Timoté, sé bay tout moun ki gin dévoua préché lévanjil la l-ap adrésé mèsaj sa-a.

N-ap mandé la Trè Sint Vièj Mari pou-l ba nou yon kè ki louvri byin gran pou résévoua Paròl Granmèt la, pou nou konfòmé lavi nou sou li, n-ap mandé-l tou pou-l ba nou kouraj pou nou gin lodas anonsé Bòn Nouvèl la, tout koté, nan tout sikonstans, san nou pa janm fébli, san nou pa chèché intèrè pèsonèl nou, ni avantaj, ni siksè, min pou nou fè tankou sèvitè sa-a nan lévanjil la, dapré sa Jézu di nou-an, ki fi-n fè travay li, ki pa tann yo di-l mèsi, ki di nan kè-l: "Sé sèvitè ki pa vo anyin mouin yé, sé dévoua-m sèlman mouin fè" (Lc 17,10).

*

* *

KATRIYÈM DIMANCH ÒDINÈ A

Sé chans pou moun ki pòv nan léspri-a, paské sé pou yo péyi Roua sièl yo yé.

Lè la Trè Sint Vièj Mari té parèt a Loud dévan Sint Bènadèt, Sint Bènadèt té di konsa: "Si la Trè Sint Vièj té jouinn yon moun ki pi pòv nan Loud, sé li minm li t-a chouazi pou-l parèt dévan-l".

Sé chans pou moun ki pòv nan léspri-a, paské sé pou yo péyi Roua sièl yo yé. Lè la Trè Sint Vièj t-al kay kouzi-n li Sint Élizabèt, pou-l rann li sèvis, li té chanté louanj Bondié, li té di: "Li voyé jé sou sèvant li ki pòv". Profèt Sofoni di nan premié Léktu-a: "Sé yon Pèp ki pòv, ki maléré m-ap kité nan mitan-ou, y-ap éspéré sou Granmèt la" (So 3, 12). Povreté-a, sé bouch antonoua léspérans. Nou abitué ak lafoua-a, ni ak lacharité-a. Min li pi difisil pou nou, pou nou antré nan kad lépérans la. Léspérans la, sé kalité Bondié ba nou ansanm ak lafoua-a ak lacharité-a, dépi nan batèm nou. Nou palé anpil sou lafoua, nou palé anpil sou lacharité, min nou pa palé asé sou léspérans. Pitit ki pa kriyé, li pa bézouin tété. Léspérans la fè nou tou pòv dévan Bondié. Lè n-ap résité lapriyé Notré-Pè-a, nou an plin nan léspérans la. Tout priyé nou kapab fè mété nou nan kad léspérans la. Tou sa n-ap mandé Bondié, sé léspérans la ki soutni démann nou-an. Yon nanm pòv, sé yon nanm ki louveri. Sé nan ouvètu sa-a minm Bondié pasé pou-l konblé kè-n k-ap éspéré sou li-a. Lapriyé-a sé réspiration nanm nan. N-ap réspiré Bondié, tankou poumon nou ap réspiré lè-a. Plis poumon nou vid, plis li aspiré byin. Plis kè nou pòv, plis Bondié konblé-l. "Li konblé sa ki pòv yo ak byin". "Sé chans pou moun ki pòv yo nan léspri-a, paské péyi Roua sièl yo, sé pou yo li yé" (Mt 5, 3).

Sé premié paròl Jézu di, lè-l komansé bay lansègnman sou mòn nan. Lè sa-a, nan dézè-a, foul la li té gin dévan-l nan, sé té moun ki té suiv li. Yo té kité lakay yo. Yo té souaf Paròl Bondié-a pou yo té jouinn yon diréksion ladan-l pou conduit yo. Yo pa-t gin prétansion. Yo pa-t fèmin kè yo, tankou Fariyin yo ki té konprann yo plis pasé lòt, akoz konésans yo té ginyin sou rélijion-an. Yo té tankou ti moun piti. Sé pousa Jézu di: "Si nou pa vi-n tankou ti moun piti, nou pap antré nan péyi Roua ki nan sièl la (Mt 18, 2). Povreté-a sé fè kè ou tankou ti moun piti. Sé pousa Jézu di: "Kité ti moun yo vi-n jouinn mouin paské sé pou yo péyi Roua sièl la yé". (Mt 19, 14). Som nan di konsa: "Granmèt kè-m pa gonflé, léspri-m pa gin prétansion, mouin pa pran chemin grandè ni mèvèy k-ap dépasé-m; okontrè, mouin rété tou dou an silans tankou yon ti bébé sou bra manman-l" (Ps 131, 1-2).

Si gin yon moun ki kapab aprann nou pou nou viv pòv, sé la Trè Sint Vièj Mari. Kè-l tou pòv. Li té ranmasé tout éspérans pèp Israèl la. Li t-ap tann Grammèt la. Li té souaf li. Bondié konblé kè-l ki tou pòv la. N-ap mandé-l pou-l fè kè nou tou piti dévan Bondié, pou nou pa pran pòz nou pi plis pasé yon lòt, pou nou louvri kè nou pou Jézu antré, pou nou kapab louvri min nou pou nou patajé. "Sé chans pou moun ki pòv yo nan léspri-a, péyi Roua sièl yo, sé pou yo li yé" (Mt 5, 3).

*

Lè Jézu kòmansé prêché, li di: "Sé chans pou moun ki p. Ò V nan léspri-a" (Mt 5, 3). Premié léktu-a di: "Moun ki gin kè yo tou pòv sou tè-a pou yo chèché Grammèt la (So 2, 3). Grammèt la di sé yon pèp ki gin kè-l tou pòv, tou dou, l-ap kité nan péyi-a (So 3, 12). Sin Pòl di nan dézièm Léktu-a: "Sé sa-k fèb sou tè-a Bondié chouazi pou nou pa lévé tèt nou dévan Grammèt la (1 Co 1 27 ss).

Té rivé yon lè, nan kominoté Sin Fransoua Dasiz té fòmé-a, "Frères mineures" yo, léspri lévanjil-la té komansé bésé. Té gin 3 000 Frè konsa ki rasanblé nan gran réyinion yo rélé "chapître" la, gin anpil nan yo ki té vlé chanjé oriantasion Fransoua Dasiz té bay la. Sin Fransoua kanpé nan mitan yo li di: "L'Évangile n'a pas besoin d'être justifiée". Li viré do-l, li pati, l-al nan mòn nan avèk Frè Léon, pou-l al jouinn toua lòt Frè ki t-ap viv pòv tankou-l, ki té rét fidèl nan léspri lévanjil la, - Bernard, Rufin, Sylvestre – [cf LECLERC, E., Sagesse d'un pauvre, Paris 1959, 17]. Li té konstaté épi li té déklaré gin tròp moun nan kominoté-a (an tou yo té yon 6 000 konsa). Yo té réprann ak min goch sa yo té fi-n bay ak min douat la. Fransoua fè silans, li lapriyé. Li kité Frè Éli pran diréksion kominoté-a, dapré sa Kadinal Hugolin té konséyé. Li minm li pati, l-al nan mòn. Frè Éli pran pòz gran roua nan tèt kominoté-a. Mové égzanp ak division fè kominoté-a pèdi répitasion-l, dévan lòt yo. Kot tou sa té soti? Léspri lévanjil la yo té kité tonbé: Kòmansman premié prèch Jézu-Kri-a: "Sé chans pou moun ki PÒV nan léspri-a" (Mt 5, 3). Sin Fransoua té insité anpil sou pouin sa-a, ni nan paròl li, ni nan égzanp li. Tout moun pa-t santi minm souf sa-a nan kè yo. Gin anpil nan yo, yo té vlé gadé sou sa k-ap pasé déyò, pou yo gin minm ran ak lòt yo. Yo té vi-n pèdi ròl yo.

Nan lévanjil la, Jézu di: "Sé chans pou moun k-ap travay pou lapè yo" (Mt 5, 9). Lè-l voyé patizan-l yo nan mision, li di yo nan ninpot ki kay yo antré, pou yo di: "Lapè pou kay sa-a". (Lc 10, 5). Sèlman mésajé lapè sa yo, li voyé yo tou pòv, tou dou, tankou mouton nan mitan lou, (Lc 10, 3), san bous, san sak, san sandal, san zanmi (Lc 10, 4). Pou-ou poté lapè, fò-ou pòv. Lè ou gin yon bagay ki rélé-ou "chè-mèt chè-mètrès", ou gin tandans

défann li an fas lòt moun yo. Konpòtman sa-a jinnin lapè-a. Plis ou pòv, ou rénonse ékri non ou sou sa ou ginyin, ou kitè-l nan sèvis tout moun, plis ou sèvi lapè-a pi byin. Sin Fransoua Dasiz konstaté konbyin li difisil pou-ou posédé kichòy pou ou pèsonèlman épi pou-ou rét zanmi tout moun ak zanmi Jézu-Kri. Li té di Évèk Aziz la sa: "Si nous avons quelques possessions, il nous faudrait des armes pour les défendre" (ib 41).

Yon pòv sé pa sèlman moun ki pa gin byin. Si ou pèdi zanmi-ou, ou pi pòv ankò, ou pa gin pèsòn pou-ou konfié panchan kè-ou. Ou pou kont ou. Sa-a tou sé yon "atou" nan min-ou pou-ou fè zèl-kat lapè-a koupé tout "las" dézakò ki ginyin. Kòm ou pa gin zanmi spésial pou-ou konfié santiman-ou, ou pa gin moun-pa, ou kapab pi fasil sèvi intèmediè yon fason dézintéré ant dé oubyin pliziè moun, pliziè group moun. Sé yon kè ki pòv ki kapab pètè lapè. Sin Fransoua Dasiz té konté sou Frè Rufin ki té rété fidèl nan léspri fondasion kominoté-a. Min Frè Rufin viré do-l yon moman, li ralé kò-l pou kont li, li abandoné Sin Fransoua. Lè-ou pèdi pi bon zanmi-ou, pètèt sé lè sa-a Bondié vlé sèvi avèk ou pi byin pou-ou mét lapè koté gin divizion, paské pètèt ou t-a kapab gin tandans konfié zanmi-ou nan sa-k pa maché byin; sa t-a kapab vi-n tounin tripotaj, sot nan bouch al nan zorèy, sa t-a kapab mété plis dézakò ankò nan kominoté yo. Ou blijé kinbé tout bagay nan kè-ou, ou konfié yo bay Granmèt la, nan sakrifis Jézu sou Koua-a, koté tout zanmi-l yo té kitè-l la (Mc 14, 50). Minm si yo té tounin, yo té rét kanpé louin (Lc 23, 49). Li minm minm li apab rivé yon pouin li gin inpréson Bondié rété louin-l (Ps 88, 15). Avèk Jézu-Kri sou Koua-a l-ap di: "Bondié mouin, Bondié mouin, pouki sa ou lagé mouin?" (Mt 27, 46; Ps 22, 2). Jézu té di: lè ya isé-l anlè, l-ap rédi tout moun ak tout bagay vi-n jouinn li (Jn 12, 32). Si grinn blé-a ki tonbé nan tè-a pa mouri, l-ap rét pou kont li; si-l mouri, l-ap donnin anpil frui (Jn 12, 24). Silans, priyè ak soufrans Sin Fransoua Dasiz té sèvi lokasion pou Frè Rufin tounin vi-n jouinn li, pou kominoté-l la pousé bèl flè nan jadin lévanjil la ankò. Fransoua Dasiz gin kòm prinsip sé pa antan ou-ap batay, ou-ap frapé, ou-ap jouré, ou kapab mété lòd ak lapè, sé antan ou-ap viv avèk simplisité sa lévanjil la mandé ou-la, tankou yon p. Ò V. Sé minm souf léspri lévanjil sa-a ki té nan kè Sint Tèrèz lafan Jézu. Légliz "orthodoxe" an Rusi gin dé Sin légliz "catholique" yo konsidéré anpil: Sé Sin Fransoua Dasiz ak Sint Tèrèz lanfan Jézu, malgré légliz sa-a séparé lontan ak légliz katolik. Sé yon prèv kijan sa-k tou pov yo, sé yo minm ki kapab sèvi intèmediè pi byin pou group ki gin dézakò yo rivé rankontré yon jou. Sé chans pou moun ki pòv yo (Mt 5, 3). Sé chans pou moun k-ap travay pou lapè yo (Mt 5, 9).

Yon moun ki pòv pa rapò a léspri-a, li viv léspérans la byin. 1987, 1988, 1989, sé pou léspérans la nou insisté nan lamérik lati-n nan, pou kontinué

"neuvaines d'années" sa-a nou té komansé dépi an 1984 la avèk lafoua-a (1984, 1985, 1986), anvan nou travèsé sou toua dènié ané yo sou lacharité-a (1990, 1991, 1992), pou préparé fèt 500 ané évanjélizasyon-an. Lamérik latin nan invité nou fiksé jé nou sou pòv yo. Sé pòv ki gin konsidérasyon pou pòv pi byin. Lamérik latin nan invité nou viv nan léspérans. Éspérans, sé kalité vré pòv, pòv nan léspri-a. Lè l-ap louvri "neuvaine d'années"-a 12 oktòb 1984 nan vil Sin-Doming, Pap Jan-Pòl II té di: "L'Amérique est le continent de l'espérance".

Pou nou pòv nan léspri-a, nou blijé fè kèk rénonisman. Sin Jan-de-la-Koua désiné pòtré yon santié sou yon kat ki réprézanté mòn Karmèl, koté pou nou antré pou nou al rankontré Bondié-Sajès, avèk yon kè ki pòv nèt. Li pozé sink jalon koté li ékri: "Anyin" chak foua. Ofi-amézi ou-ap monté, ou blijé fè rénonisman adouat-agoch, joutan ou rivé fè yon sèl avèk Granmèt la. Li di sé pou nou dégajé nou anba tou sa-k pa Bondié, pou nou rivé fè yon sèl ak Bondié. ("L'âme doit donc se dégager de tout ce qui n'est pas Dieu pour s'unir à Dieu", Montée du Carmel, liv III, ch VI, cf p. Marie-Eugène de l'Enfant Jésus, Je veux voir Dieu, Tarascon, 1949, 829). Li sité Lèt Ébré yo ki di: éspérans la sé sa nou pa posédé (He 11, 1). Li bay kòm konsign: "Pour arriver à goûter tout, veillez à n'avoir goût pour rien. Pour arriver à savoir tout, veillez à ne rien savoir de rien. Pour arriver à posséder tout, veillez à ne posséder quoi que ce soit de rien. Pour arriver à être tout, veillez à n'être rien en rien. Pour arriver à ce que vous ne goûtez pas, vous devez passer par ce que vous ne goûter pas. Pour arriver à ce que vous ne savez pas, vous devez passer par où vous ne savez pas. Pour arriver à ce que vous ne possédez pas, vous devez passer par ce que vous ne possédez pas. Pour arriver à ce que vous n'êtes pas, vous devez passer par ce que vous n'êtes pas. Quand vous vous arrêtez à quelque chose, vous cessez de vous abandonner au tout. Car pour venir du tout au tout, il faut se renoncer du tout au tout. Et quand vous viendrez à avoir tout, il faut l'avoir sans rien vouloir. Car si vous voulez avoir quelque chose en tout, vous n'avez pas purement en Dieu votre trésor" (Montée du Carmel, liv I, ch XIII, cf ib 601).

Avèk la Trè Sint Vièj Mari n-a kapab di: "Li voyé jé-l sou Sèvant li ki pòv" (Lc 1, 48).

*

* *

KATRIYÈM DIMANCH ÒDINÈ B

Lévanjil la di: "Ki kalité lansènman NOUVO sa-a?" Sèké Jézu vini kòm **PROFÈT** la Moyiz té anonsé-a, sa premié léktu-a palé nou-an nan liv Détéronòm nan (Dt 18,15-20), lè-l di: "Granmèt Bondié-ou la ap fè yon profèt lévé pou ou sot nan ras ou ak nan frè-ou yo tankou mouin minm; sé pou-ou kouté-l (Dt 18,15).

Lévanjil la di: Jézu t-ap ba yo lansènman tankou moun ki gin **POUVOU**, sé pa tankou profesè yo: (Mc 1,22). Lè yo sakré yon Évèk, lè yo sakré yon Pè, yo ba-l toua pouvoua: premié-a sé pou-l anségné, dézièm nan sé pou-l fè moun vi-n sin spésyalman nan sakreman yo, touazièm nan sé pou-l dirijé yo. Toua pouvoua sa yo: lansènman, sanktifikasyon, gouvènman, yo fè sonjé sa Jézu té di Apot li yo, lè-l t-ap monté nan sièl la: "alé, anségné tout nasyon yo, batizé yo o non Papa-a ak Pitit la ak Léspri Sin-an, apranng yo fè tou sam té komandé" (Mt 28,19-20). Lansènman-an, sé "anségné" sanktifikasyon-an, sé "batizé yo". Gouvènman-an sé "apranng yo fè tou sam té komandé". Toua pouvoua sa yo, Évèk la tou ginyin yo an plin; Prèt yo asosié avèk li, nan sèvis li-a. Yo t-a kapab pansé sé gouvènman-an ki premié pouvoua-a, oubyin sé sanktifikasyon-an ki premié pouvoua-a. Époutan sé pa sa. Dokiman Konsil Vatican II yo ki palé sou Évèk yo ("Christus Dominus") avèk sa ki palé sou Prèt yo ("Presbyterorum ordinis"), yo insisté sou inpòtans premié plas sa-a lansènman an ginyin nan sèvis sakré Évèk la avèk Prèt la.

Lansènman Jézu vi-n bay nan kay réyinion Kafanaòm nan, sé yon lansènman nouvo. Li palé avèk otorité, li pa bay lansènman tankou profesè yo, k-ap résité léson yo aprann nan min lòt, pou yo fè ouè sa yo konnin. Otorité-l la, sé pa nan lèzòm li sòti, sé pa nan sians li aprann nan liv, sé pouvoua Papa-l ba li. Konsa tou lè yon Évèk oubyin yon Prèt oubyin yon diak ap préché, sé yon sèvis sakré l-ap fè, antan-l posédé yon pouvoua ak yon otorité ki sòti nan Bondié, sa Jézu li minm té bay Apot yo, lè-l t-ap monté nan sièl la. Jézu té di Apot yo: "sé pa nou minm k-ap palé, sé léspri Papa-m k-ap palé nan bouch nou". Konsa lè Évèk la, Prèt la, Diak la, ap préché, sé pa paròl pa-l l-ap palé, sé paròl Bondié minm, ki vi-n tounin moun, ki kontinué ap pozé nou késion pou fouyé konsians nou, pou montré nou bon chemin-an.

Jézu té di Apot li yo: "Moun ki kouté nou, sé mouin minm li kouté" (Mt 10,40; Lc 10,16). Liv Détéronòm nan di nan premié léktu-a: "M-ap mété paròl mouin yo nan bouch li, l-ap palé avèk yo tou sa m-ap komandé-ou yo"

(Dt 18,18). Prèch Èvèk la, Prèt la, Diak la fè-a, vi-n tounin tankou yon jijman. Si-l pa préché, paské li pè kontradiksyon, sé li minm Bondié ap mandé kont, jan-l avèti Profèt Ézékièl la (Ez 3,18; 33,8). Si-l préché san-l pa jouinn rézilta, sé moun ki réfizé kouté-a Bondié ap mandé kont. Premyé léktu-a di konsa: "Moun ki réfizé kouté paròl li yo, sa-l palé o non-m nan, sé mouin minm k-ap kanpé pou-m pini-l" (Dt 18,19). Prèch la sé yon bagay ki sakré. Sé pa paròl moun, sé paròl Bondié. Premyé léktu-a fè nou ouè inpòtans dévoua moun k-ap préché-a. Minm jan moun yo gin dévoua pou yo kouté-l, li minm tou li gin dévoua pou sé paròl Bondié li palé, min sé pa lòt kozé pou-l ap déklaré. Liv Détéronòm nan di "kanta yon Profèt ki t-a kité arogans dégradé-l, pou-l t-a vlé palé o non-m, pou-l t-a di bagay mouin pa komandé-l, oubyin ki t-a palé o non dié étranjé yo, l-ap mouri" (Dt 18,20; Ap 22,18s). Prèch la sé yon mision spésyal Bondié konfié bay moun li sakré pou sa. Sé pou moun nan gin konfians nan pouvoua ak otorité ki soti nan Bondié-a, épi sé nan lign sakré sa-a li gin pou-l fè déklarasyon-l.

Psòm-répons la (Ps 94/95) mandé pou nou kouté voua Granmèt la jodi-a minm, voua-l di: "Pa fèmin kè nou" (Ps 95,8). Psòm nan di Pèp Isarèl té fè rébèl, li té fè kou-l rèd nan savann Mériba-a. Li té éséyé Granmèt la, li té chèché-l kont, malgré tout aktivité Granmèt la té fè dévan-l. Plis nou fèmin kè nou, sé plis nou vi-n avèg, sé plis nou vi-n soud, sé plis nou vi-n manké sansibilité parapò a Bondié ki si tèlman gin délikatès pou nou. Nan nòs Kana-a, la Trè Sint Vièj Mari té panché sou moun k-ap sèvi yo, li té di yo: "Ninpòt ki sa-l di nou, sé pou nou fè-l" (Jn 2,5). Sé tankou yon éko voua Papa-a ki té déklaré osijè Jézu "Sila-a sé Pitit mouin-an, sa-m rinmin-an, nan li mouin jouinn plézi mouin, kouté li" (Lc 9,35). Lafoua sé obéyisans; lafoua-a antré nan kè nou gras a prèch Paròl Bondié-a, dapré sa Sin Pòl di Romin yo (Rom 10,17). Chak dimanch litiji-a gin yon mésaj spésyal li bay sou tèl kèsyon ki gin anpil inpòtans pou lavi nou. Jou dimanch la, sé jou Granmèt la. Sé yon jou spésyal. Antan n-ap kouté prèch la k-ap pozé nou kèsyon sou lavi nou, k-ap fè nou foyé konsians nou, k-ap montré nou chémim pou nou suiv, nou antré nan orientasyon lèt Ébré yo di-a antan l-ap fè komantè Psòm-répons la (Ps 95; cf: He 3,7ss), nou fè ouè sé pou nou Bondié ap palé pròp jou jodi-a, minm si sé yon paròl ki té palé dépi lontan épi ki fikse nan labib. Li vo pou nou jodi-a. Nou pa doué néglijé kouté-l. Èvèk yo, Prèt yo, Diak yo, pa doué néglijé transmèt li, minm si yo pa ouè tout-suit ki son l-ap sonninanndan kè nou, minm si nou pa ouè tout suit ki sa l-ap chanjé nan lavi nou. Tèl paròl nan lanmès la kapab vo pou tèl moun, tèl lòt paròl kapab blésé fon kè tèl lòt moun ki kaché nan fon légliz la, tèl

lòt paròl kapab poté limiè pou tèl lòt moun ki té bézouin-l dépi lontan. Sé Bondié sèl ki konnin nan ki kouch térin l-ap simin sémans li.

Nan dézièm léktu-a (1 Co 7, 32-35), sé Sin Pòl k-ap palé pou Korintyin yo. L-ap mandé yo pou yo pa pran tèt chajé avèk késion tè-a, pou yo mété tout aktivité yo pou yo okipé afè Granmèt la, paské tan-an kout, jan-l té déjà di dimanch pasé, lè-l té mandé pou moun ki marié-a viv kòm si li pa-t marié-a; moun ki gin byin, pou-l viv kòm si li pa-t ginyin-an, paské figi tè sa-a ap pasé-a. Jodi-a, Sin Pòl éspliké pi klè ki avantaj ki ginyin nan kondision moun ki réfizé pran plézi lachè, sé pou-l kapab lapriyé Granmèt la (1 Co 7,35), sé pou-l kapab kalkilé bagay ki konsènè Granmèt la pi byin, sé pou-l kapab okipé kijan pou-l fè Bondié plézi (1Co 7,32), sé pou kè-l pa séparé an dé (1 Co 7,33), yon mòso yon bò, yon lòt mòso lòt bò. Sin Pòl di sé pou avantaj nou li di bagay sa-a, sé pa pou-l pran nou nan pièj, sé pou bagay ki onèt, ki ofri avantaj, san nou pa jouinn anpéchman pou nou lapriyé Granmèt la (1Co 7,35). Vèsè pou alélouya anvan lévanjil la montré kijan Pèp la ki té chita nan fènoua yo, li ouè yon gran limiè, sou moun ki chita nan réjion lonbraj lanmò-a yon limiè lévé pou yo (Mt 4,16).

Mésaj Sin Pòl bay la, sé yon **limiè** ki montré grandè ak sipériorité kondision moun ki rézèvé kò-l pou Bondié, poutèt ringn Bondié-a tou pré. N-ap sonjé lapriyé yon fason spésial pou tout jèn fi ak tout jèn jan ki vlé konsakré tèt yo bay Bondié nan lavi rélijijèz, pou okinn mové konsèy zanmi ak fanmiy pa sèvi yo bariè sou chémin désizyon yo fi-n pran-an. N-ap mandé Manman Mari pou-l ankourajé Prèt yo nan sèvis prèch yo, pou yo vidé bèl limiè lansègnman lévanjil la sou késion sa-a ki délika anpil la, min ki konsékan pi plis toujou-a, spésialman pou jèn yo, pou anpil nan yo profité mésaj sa-a pou konsolidé désizyon yo fi-n pran pou suiv Granmèt la nèt san gadé dèyè-a, pou yo sonjé figi tè sa-a, sé pasé l-ap pasé, sé sou rout nou yé pou nou rivé nan péyi Bondié promèt nou-an.

Pi bèl pòsion, Mari chouazi-l, yo pa gin doua ouété-l nan min-l. Yon sièl nouvo, yon tè nouvo, Jézu vini, tout bagay nouvo. Ki kalité lansègnman Nouvo sa-a, sé Nouvo Téstaman-an, sé nouvo kontra-a. Bondié signin-l ak san Jézu, Pitit li, sou kabann nòs la, lakoua-a. Si jodi-a, nou té kapab kouté voua Granmèt la: "pa fèmin kè nou!". N-ap sonjé lachandlè, ki raplé nou ofrann la Trè Sint Vièj Mari fè ak Jézu sou bra-l kòm limiè Bondié. N-ap ofri kè nou nan min-l pou nou véyé ak Limiè nou limin tankou Vièj ki saj yo "**OU-AP VÉYÉ AK LIMIÈ-OU NAN FON KÈ-OU**".

*

* *

KATRIYÈM DIMANCH ÒDINÈ C

Lévanjil la prezanté nou Jézu, moun Nazarèt, yo pa résevoua lakay li (Lc 4,21-30). Prològ Sin-Jan-an di: Li vi-n lakay li, moun lakay li pa résevoua-l (Jn 1,11). Yo rékonèt papa adotif li, Jozèf; min yo pa konn koté-l soti tout bon (Lc 22; Jn 6,42). Yo jalou pou mèvèy li fè nan lòt péyi, li pa fè lakay yo (Lc 4,23). Mision-l sé minm mision avèk Profèt yo (Éli, Élizé), limiè pou tout nasion (Is 42,6; 49,6; Lc 2,32), yo pèsékité-l pou sa (Is 53,6.12). Lè y-a lèwè-l sou koua-a, l-a rasanblé tout moun vi-n jouinn li (Jn 12,32).

Prémié Léktu-a montré Jérèmi kòm Profèt pou nasion yo (Jer 1,4.5). Moun lakay li ap pèsékité-l tou, nan péyi Juif yo. Min Granmèt la ap délivré-l (Jer 1,17.19).

Psòm-répons la ap kalkilé sou kè séré Profèt la, éspérans nan Granmèt la (Ps 70= 71).

Dézièm Léktu-a di: minm si nou t-a gin konésans Profèt ak tout lòt favè spésial, san lacharité, sé van n-ap souflé ak bouch nou nan prèch nou (1 Cor 12,31-13,13).

*

Prèch Jézu-a bay lokasziyon pèsékité-l. Okinn Profèt pa jouinn konsidèrasion nan fanmiy li (Lc 4,24). Nou té sonjé dimanch pasé kijan Jézu té kòmansé fè prémié prèch li avèk roulo liv Profèt Izayi-a li té déroulé, lè-l té tonbé sou pasaj Izayi chapit 61-an: "léspri Granmèt la sou mouin, li sakré-m, li voyé-m anonsé Bòn Nouvèl la bay pòv yo" (Lc 4,18). Jézu té di pasaj labib la apliké jodi-a minm nan zòrèy nou. Jodi-a, nou tandé Jézu ap bay ésplikasion pasaj sa-a, nan ki sans li apliké pou moun k-ap kouté-l la. Nou sonjé ané sa-a, sé ané n-ap li lévanjil Sin Luk chak dimanch nan lamès la, nan ané C-a. Sin Luk sé évanjélist pòv yo, li sansib anpil pou pòv yo, tout Évanjil li-a gin yon plas apa pou pòv yo. Dépi nan prémié prèch Jézu, nou tandé kijan li insisté sou sa.

Kilès ki pòv sa yo? Jézu éspliké Juif yo k-ap kouté-l yo, li di konsa: nan tan Profèt Éli, té gin anpil vèv nan Israèl, min sé pa bay okinn nan yo yo té voyé Profèt Éli, sé bay yon pòv vèv nan péyi Sarépta, nan zòn payin, bò Sidon. Minm jan tou té gin anpil moun ki té gin maladi lalèp nan péyi Israèl, min sé pa bay okinn nan yo yo té voyé Profèt Élizé, sé bay yon moun péyi Siri, yo rélé Naaman, péyi payin toujou, péyi sa yo Pèp Israèl té konsidé ré kòm madichonnin-an.

Jézu pa vi-n pou moun ki konprann yo an santé, li vi-n pou moun ki gin konviksion yo malad, yo bézouin doktè (Mc 2,17). Sé yo minm ki pòv la. Jézu di konsa li vi-n pou yon jijman, pou moun ki konprann yo ouè klè pou yo vi-n avèg, épi pou sa ki rékonèt yo avèg yo yo kapab vi-n ouè klè (Jn 9,39-41). Li éspliké Juif yo konsa: "Si nou té avèg, nou pa t-a gin péché, min nou di: "nou ouè", "péché nou-an rété" (Jn 9,41). Juif yo té konprann kòm sé nan ras yo Mési-a t-ap soti, kòm sé ak zansèt yo Bondié té palé pou-l ba yo mésaj ak promès li-a, sé yo minm ki gin konsidérasion, ki té mérité tout favè Bondié. Lòt pèp yo pa-t mérité konsidérasion. Jézu vini, li démontré yo tout moun sé moun, sé pitit Bondié. Sé poua Sin Jan-Batis, lè-l kòmansé préché, li di Juif yo konsa: Nou rété ap di Abraam sé papa nou, ébyin Bondié kapab fè pitit soti pou Abraam ata nan ròch sa yo nou ouè la-a, atè-a (cf Mt 3,9).

Sin Luk sé évanjélis pòv yo, sé évanjélis payin yo, sèké sé ak Sin Pòl li t-ap maché fè mision nan péyi ki pa-t ko tandé palé osijè Bondié. Sé poua li insisté anpil sou mision pou al pòté Bòn Nouvèl la koté yo pa ko tandé palé osijè vré Bondié-a. Li montré sé poua minm Jézu vini, épi chak foua nan Travay Apot yo Sin Pòl rivé yon koté, li kòmansé préché nan sinagòg la, nan kay réyinion Juif yo; lè yo pa résévoua mésaj li-a, li pati l-al préché bay lòt moun yo ki pa nan Pèp Juif la. Konsa Sin Luk montré nan Évanjil li-a sa k-ap rivé Sin Pòl la, li déjà rivé Jézu dépi li t-ap préché prèch li-a nan pròp vil li-a Nazarèt.

Moun Nazarèk yo fè konplo pou yo touyé Jézu, yo éséyé jété-l nan falèz, min li sovè kò-l paské lè-l pa ko rivé (Lc 4,28.30). Sé konsa davans Jérèmi té pasé kont tray li ak Pèp Juif la, dapré sa prémié Léktu-a avèti nou nan Jérèmi chapit prémié, vèsè 4-5 épi vèsè 17-19. Bondié avèti Profèt Jérèmi, li di-l konsa: li mété-l kòm yon kolòn fè ak yon miray an kuiv, y-ap batay kont li, min yo pap rési ranpòté laviktoua sou li, paské Granmèt la avèk li. Tou sa Bondié kòmandé-l, Bondié mandé-l pou-l di-l kan minm, minm si-l jouinn difikilté nan moun yo k-ap kouté-l yo.

Psòm-répons la mandé pou Bondié sèvi nou tankou yon sitadèl k-ap protéjé nou, yon kay byin protéjé, pou-l sovè nou (Ps 70= 71), vèsè 3). Psòm nan bay kòm réfrin: "Bouch mouin ap anonsé délivrans ou-a, Granmèt", dapré vèsè 15a.

Sin Pòl ba nou léson sou lacharité nan dézièm Léktu-a (1 Korintyin 12,31.13,13). Li di minm si-l t-a gin konésans profèt ak tout kalité sians, si-l pa gin lacharité, l-ap tankou yon klòch k-ap sonnin, yon bout fè k-ap fè brui. Sé poua nan prèch nou, nou doué fè atansion, pou nou respèkté lacharité-a,

kèlkésoua grandè vérité-a n-ap anonsé-a, pou nou pa bay lokazion déréspékté Paròl Bondié-a. Si yo rayi nou malgré tout prékosion nou pran, n-a di avèk Jézu nan lévanjil la: "Yo rayi-m san rézon" (Jn 15,25).

N-ap mandé la Trè Sint Vièj Mari, pou-l ba nou fòs ak kouraj pou nou préché mèsaj lévanjil la avèk yon kè ki douat, san nou pa profité pozision nou pou n-ap voyé pouint, pou nou réglé ti kont nou té ginyin, pou n-ap fè légliz la vi-n tounin tribinal sivil. Paròl Bondié-a sakré. Li gin fòs nan li minm. Antan nou bay li jan-l vini-an, l-ap vizé jis, l-ap frapé douat. Sé pa pròp tèt nou n-ap défann lè n-ap préché. Bondié okipé kèsion défann nou-an. Sé pa kozé ki gadé nou sa. L-ap ba nou yon bouch ak sa jès ki fè pèsòn pa kapab kanpé an fas nou pou kontrédi nou (Lc 21,15). Nou pap bay pèsòn lokazion pou yo bité, dapré sa Sin Pòl di nou; okontrè, li fè-l Juif avèk Juif yo, Grèk avèk Grèk yo, san loua avèk sa-k san loua yo, pou-l éspéré sovè kèkzin tout fason, jan-l kapab (1 Co 9,19-23).

Jézu di: léspri Granmèt la sou li, li sakré-l, li voyé-l anonsé Bòn Nouvèl la bay pòv yo (Lc 4,18). Pòv yo nan tout kan. Sé pa yon katégori apa nan klas lasosiété-a. Égzanp Jézu bay nan lévanjil jodi-a, li pran yo nan Profèt Éli kal okipé yon vèv Sarépta (cf 1 R 17,8-24), vèv sa-a té pòv dapré ran lasosiété. Jézu pran égzanp tou nan Profèt Élizé ki okipé Naaman, jénéral lamé Siri-a (2 R 5,1-19), jénéral sa-a té rich nan klas lasosiété; min tou lé dé té pòv nan katégori Bondié. Yo rénonsé pròp volonté yo pou yo obéyi lòd Profèt yo. Sé pa nou minm ki pou mét etikèt sou moun Bondié voyé nou anonsé Bòn Nouvèl la ba yo. Bondié vlé tout moun sovè, pou yo rivé nan konésans lavérité-a (1 Tim 2,4). Sé moun yo minm ki mété tèt yo nan ran pòv, antan yo louvri kè yo, oubyin nan ran rich, antan yo fèmin kè yo. "Sé chans pou moun ki pòv yo, péyi Roua sièl yo, sé pou yo li yé" (Mt 5,3; Cf Lc 6,20).

*

* *

SINKIÈM DIMANCH ÒDINÈ A

Lévanjil la nan Sin Matié di nou: "Nou sé Limiè tè-a" (Mt 5, 14). Prèmié Léktu-a nan Profèt Izayi di nou: "Limiè-m ap éklaté tankou dévan-jou" (Is 58, 8). Psòm ki réponn li-an di: "Limiè pou moun ki korèk yo, li lévé nan fènoua yo" (Ps 111, 4 = 112, 4). Alélouya ki vi-n anvan lévanjil la di: "Mouin sé Limiè tè-a" (Jn 8, 12). Sé yon invitasion litiji-a fè nou pou nou réfléchi sou Limiè-a.

Prèmié bagay Bondié kréyé sé Limiè (Gn 1, 3). Lè Pitit li vi-n sou tè-a, li vi-n kòm Limiè tè-a (Jn 8, 12), dapré sa Sin Jan di nou: "Paròl la té vré Limiè-a ki kléré tout moun sou tè sa-a (Jn 1, 9). Lè la Trè Sint Vièj Mari ofri Jézu nan Tanp la, Siméyon di: "Limiè pou kléré nasion yo, ak bèlté pèp ou Israèl" (Lc 2, 32). Limiè-a fèt pou kléré. Li pa fèt pou kaché.

N-ap sonjé lapriyè yon fason spésial pou tout Pè yo. Jézu chouazi yo pou sèvi yon fason spésial kòm Limiè pou tè-a. Li rélé yo, li sakré yo, li voyé yo. Chak Jédi-Sin nan Mès Sin-Krèm nan nou raplé sa. Yon Pè, sé yon moun Bondié chouazi, li maké-l ak yon mak ki pa kapab éfasé. Li ba-l pouvoua pou-l aji o non Jézu-Kri, nan pèsion Jézu-Kri. Lè Pè-a fè lamès, li prononsé minm paròl Jézu té di sou Pin-an: "Sa-a sé kò mouin". Minm lè-a, pin-an vi-n tounin Kò Jézu-Kri tout bon vré. Li déklaré minm paròl Jézu-Kri té di sou divin-an: "Sa-a sé San mouin". Minm lè-a, divin-an vi-n tounin San Jézu-Kri tout bon vré. Sé pa pin ak divin ankò ki sou lotèl la. Sé Kò ak San Jézu-Kri. Sé yon gran mèvèy Bondié fè, pou Pitit li Jézu-Kri rété konsa nan pami nou tout tan, jous tè-a rivé nan dènié bout kous li.

Sin Kuré d'Ars, Sin Jan Mari Viané té di konsa: "Si m-ap maché nan lari, mouin ouè yon Anj ak yon Prèt, m-ap salué Prèt la anvan, m-ap salué Anj la apré". Prèt la sé yon lòt Kris. Sé Jézu-Kri minm ki prézan nan mitan nou. Sé pou nou gin anpil respè pou Prèt yo, paské yo sakré yon fason spésial. Jézu di: "Moun ki résévoua nou, sé mouin minm li résévoua. Moun ki réjété nou, sé mouin minm li réjété" (Mt 10, 40; Lc 10, 16). Sin Kuré d'Ars té di ankò: "Kité yon parouas vintan san Prèt, sé bèt y-ap adoré". Sèké chak moun gin yon sans nan li ki fè-l rékonèt li gin dévoua pou-l adoré Bondié, pou-l sèvi-l. Min li pa toujou konnin ki chémin pou-l pran. Si-l pa jouinn yon Prèt k-ap montré-l vré chémin Bondié-a, sé chémin zidòl l-ap pran. L-ap ofri sakrifis bèt. Min tout sakrifis sa yo, Bondié pa vlé yo (Ps 40, 7-8). Sé pròp Pitit li-a Jézu-Kri ki té ofri tèt li kòm sakrifis yon foua pou tout, sou Koua-a, jou Vandrédi Sin-an. Sé sakrifis sa-a ki fè Bondié plézi. Sé li minm ckak Pè kontinué ofri sou lotèl nan chak Mès l-ap fè. Sé yon gran mèvèy pouvoua sa-a Jézu bay Pè yo.

Konsa sé pou nou lapriyè anpil pou Pè yo, pou yo pran konsians ròl sakré yo ginyin nan légliz la avèk sou tè-a, pou yo fè afè Bondié pasé anvan afè pa yo, pou yo pa janm dékourajé nan sèvis yo, pou yo aksépté pèdi tan dévan Bondié nan lapriyè, pou yo aksépté pasé anpil tan ap préparé prèch yo, pou yo aksépté pasé anpil tan ap konfésé fidèl yo pou yo lavé nanm yo, pou yo pran tan yo fè lamès yo avèk souin, pou yo dévoué nan sèvis malad yo, pou yo bay fidèl yo égzanp tankou gadyin k-ap kondui mouton yo.

Yon Prèt, sé yon mèvèy Jézu fè pou nou, pou-l kapab rété prézan nan pami nou tout tan.

Sint Térèz lanfan Jézu pasé tout lavi-l ap lapriyè pou Pè yo. Lè-l té malad, li té konn fè èfò pou-l déplasé sot nan chanm li al nan yon lòt sal, pou-l chèchè yon médikaman, li té konn ofri sakrifis sa-a pou Pè yo gin kouraj maché nan mòn yo al préché, al batizé, al konfésé, al fè lamès, malgré tout difikilté yo kapab rankontré. N-ap suiv égzanp li, n-ap ofri ti sakrifis nou tou pou Pè yo. N-ap lapriyè la Trè Sint Vièj, Rèn Apot yo, pou-l protéjé LIMIÈ sa-a Jézu limin pou kléré nou-an. N-ap mandé Bondié plis fòs tou pou moun li rélé vi-n nan sèvis li yo, pou yo gin kouraj réponn li, san yo pa tounin gadé dèyè (Lc 9, 52; Ph 3, 13; 1 R 19, 19-21).

*

Limiè sa-a lévanjil la mandé pou kléré-a, sé aksion lacharité nou fè; li di pou moun yo kapab ouè "bon aksion" nou (Mt 5, 16). Sé nan sans sa-a Profèt Izayi palé, lè-l di pou nou séparé pin nou ak moun ki grangou-a; pou nou pran pòv la ki pa gin kay la, pou nou fè-l fè ladésant anndan lakay nou; pou nou abiyé moun ki pa gin rad la; pou nou pa fofilé kò nou sot dévan-l (Is 58, 7). Profèt la di: lè sa-a, limiè nou ap éklaté tankou dévan-jou (Is 58, 8). Li di: si nou pran nan manjé nou pou nou bay moun ki grangou-a; si sa y-ap fè pasé tray la, nou ba-l manjé pou-l jouinn satisfaksion; limiè nou ap lévé nan fènoua, fènoua ap tankou gro lajounin pou nou (Is 58, 10; cf. Ps 139,12).

Sé konsa Psòm-répòns (Ps 111=112) la di: moun k-ap okipé bay pòv lacharité (Ps 112, 9), li lévé nan fènoua, limiè pou kè ki douat (Ps 112, 4). Sin Jan dí: Bondié sé Limiè (1 Jn 1, 5). Li di lè nou maché nan limiè nou gin bòn-antant antré nou (1 Jn 1, 7). Li dí: moun ki rinmin frè-l, li nan limiè (1 Jn 2, 10); sa-k rayi frè-l la, li nan fènoua (1 Jn 2, 11). Kòmandman rinmin-an, sé yon kòmandman nouvo, paské fènoua yo pati, vré limiè-a komansé kléré déjà (1 Jn 2, 8). Bondié ki Limiè-a, li sé Rinmin (1 Jn 4, 8.10). Sin Jak di sé pa moun k-ap di yo gin lafoua ki kòrèk dévan Bondié, sé moun ki bay prèv lafoua yo (Jc 2, 14-26). Li mandé pou respékté pòv yo (Jc 2, 1-13). Li di si yon moun pa gin ni rad, ni manjé, épi nou voyé-l alé antan nou di-l

chofé kò-ou, manjé vant plin, san nou pa ba-l sa-k nésèsè pou kò-l, sa sa ap sèvi-l? (Jc 2, 15-16).

Dimanch pasé lévanjil la té di: "Sé chans pou moun ki pov" Mt 5, 3). Jodi-a sé invitasion pou fè lacharité. Pou nou okipé pòv yo, jan sa doué fèt, fò nou minm tou nou gin yon kè ki pòv. Nou pa doué fè lacharité avèk arogans, antan n-ap reproché moun yo ti sa n-ap ba yo-a, antan n-ap di yo pou y-al travay; nou pa doué fè lacharité pou nou débarasé nou ak prezans yo k-ap jinnin nou, k-ap fatigé zorèy nou; nou pa doué fè lacharité antan nou bay sa nou pa bézouin. Pòv la pa bouat fatra. Avèk sa n-ap bay la, sé pròp kè nou pou nou bay. Nan sans sa-a Sin Pòl di chèf légliz Éfèz yo nan travay Apot yo, antan l-ap sité paròl Jézu-Kri: "Gin plis plézi pou bay pasé pou résévoua" (Ac 20, 35). Sa invité nou pou nou gin solidarité ak pòv yo. Sin Pòl di Korintyin yo: "Bondié rinmin moun ki bay ak kè kontan" (2 Co 9, 7 = Pr 22, 8). Nou pa doué bay ak dé kè. Ofrann nou pa doué séparé ak sakrifis la. Limiè-a nou réprésanté-a, sé yon chandèl k-ap boulé. Pou-l bay limiè, lasi-a blijé fonn. Plis l-ap bay limiè, sé plis l-ap bésé. Jézu sé Limiè tè-a. Li étinn jou Vandrédi-Sin-an, antan-l fè kado-a vi-n tounin sakrifis nè. Pou jou Pak la, Limiè-a kléré ankò. Li pap janm étinn ankò. Limiè pa nou mèt étinn, sé Granmèt la li minm k-ap kléré nou (Ap 22, 5; Is 60, 19).

Anba pié boua-d-chèn Manbré-a, Abraam ouè toua Pèsonaj k-ap pasé koté-l gro midi. Li invité yo manjé. Li préparé pou yo, li sèvi yo. Sé Bondié minm li té résévoua. Bondié promèt li yon pitit, malgré li gin santan déjà. Bondié kinbé paròl li. Nou pa doué pè fè lacharité sou pratèks n-ap vi-n pòv (Gn 18). Pov vèv Sarépta-a té résévoua Profèt Éli; li té nourri-l ak dènié ti rès fari-n ak luil li té ginyin nan fon ja-a ak nan fon boutèy la. Li pa janm manké anyin joustan Bondié voyé lapli ankò sou tè-a (1 R 17). Jou fèt lachandèl, fèt Limiè, légliz sonjé ofrann la Trè Sint Vièj Mari té fè bay Bondié, antan-l prezanté Pitit li-a Jézu, nan Tanp la. Kado sa-a té fè yon sèl ak sakrifis la. Siméyon té fè Mari sonjé sa, antan-l di-l yon épé t-ap travèsé nanm li (Lc 2, 35). Lè nou fè yon kado, nou ouété kichòy sot nan sa nou posédé. Kado nou an vi-n tounin sakrifis. Nou pa bay sa nou pa bézouin, sa-k ankonbré nou, jan Profèt Malachi di Pèp Israël la (Mal 1, 13-14). Tout dézièm Lèt Sin Pòl ékri Korintyin yo santré sou kèsion ofrann nan [2 Co 1-7 = apostola Pòl; 8-9 = òganizasion kèt la; 10-13 = apostola Pòl]. Li mandé pou yo mété aktivité nan kèsion ranmasé kèt la, pou yo kapab voyé-l bay légliz Jérusalèm ki nan bézouin (cf Rom 15, 30-31). Sé yon kèsion solidarité ant divès légliz yo, lè yon kominoté aksépté patajé sa-l ginyin avèk yon lòt. Gin anpil légliz ki fè sa yo rélé "jumelage". Yo konsidéré tèl légliz nan tèl lòt péyi tankou sé pròp sè yo li yé. Fidèl yon légliz patisipé nan rélasyon, amitié, priyé, mòd lavi, byin fidèl yon lòt légliz. Sa fè anpil frontiè disparèt.

Sèké gin kantité bariè, sé nan lidé nou sèlman yo rété, sé nou minm ki imajiné yo, san yo pa gin okinn fondman nan réalité-a. Lè-ou bay prèv lacharité, yo pa bézouin anpil ésplikasion pou fè aksépté fratènitè-a. Nou tout, nou sé manb yon sèl Kò, nou fè pati yon sèl fanmiy, nou gin yon sèl Papa, yon sèl Manman; nou fòmé yon sèl Pèp. Bondié rélé nou sot nan fènoua pou nou travèsé nan bèl Limiè-l la (1 p. 2, 9).

Réfrin anvan lévanjil la di: "Mouin sé Limiè tè-a, moun ki maché dèyè-m, l-ap gin limiè lavi-a" (Jn 8, 12). Sé Kolòn Limiè-a ki t-ap kondui Pèp Israèl la nan dézè-a (Ex 13, 21-22; 40, 36-38). Limiè sa-a n-ap fiksé-a, sé Jézu-Kri, ki vi-n tounin moun pou nou, antan-l montré nou kijan-l rinmin nou joutan li bay lavi-l pou nou, li mandé nou pou nou minm tou nou rinmin prochin nou tankou li minm li fè-a (Jn 13, 34). Gin yon kalité mòd jan lacharité ki gin moun-pa. Ak yon min moun nan ap fè lacharité pou yon ti posion group moun. Ak lot min-an l-ap toufé tout yon pakèt foul moun, l-ap palé yo mal, l-ap ba yo kout lang, ki pi piké pasé kout ponya, pou-l sal répitasion yo, pou-l fè yo pèdi préstij yo, pou-l dékontrolé yo, pou fè yo pa jouinn plas ankò nan sosiété koté yo yé-a, paské prezans yo jinnin mové oriantasion pa-la. Lè sa-a soua-dizan lacharité moun nan ap fè-a, sé yon sinp propagann pou apuiyé konduit li, pou prezanté sanblan rézon ki sipozé défann fòm présans li avèk lign aktivité-l. Lacharité pa kapab kaché tranzaksion. Tout bagay gin pou parèt aklè yon jou nan LIMIÈ (1 Co 4, 5).

Ané marial la, ki té komansé pou jou lapankot 7 juin 1987 la épi ki té fini pou 15 out 1988 la, li té pèmet nou fiksé jé nou sou "Zétoual matin-an, ki anonse Solèy Jistis la". Zétoual la bay ti limiè nan nuit la. Li soutni lafoua nou ak lacharité nou, pou nou kontinué maché nan léspérans, antan n-ap tann Solèy la k-ap kléré ak gran Limiè gro lajounin...

Gin 2 000 an déjà, Limiè Zétoual sa-a té parèt. Sé li minm nou té fété dépi jou lapankot 7 juin 1987 la jous lasonmsion 15 out 1988 la, pandan tout ané marial la, an-atandan nou fété 2 000 ané dépi Solèy la té parèt la: "Année Sainte" la, ané 2 000 la. Zétoual la dévan. N-ap suiv li pou-l kondui nou nan diréksion Limiè Solèy la k-apral lévé-a, pou, jan Profèt Izayi di nan premié Léktu-a (Is 58, 8.10), Limiè nou éklaté tankou dévan-jou, pou Limiè nou lévé nan fènoua, pou fènoua vi-n tankou gro lajounin pou nou", cf. Ps 139,12.

*

* *

SINKIÈM DIMANCH ÒDINÈ B

"Li géri anpil moun ki té trakasé avèk anpil kalité maladi" (Mc 1,34). Sé sa lévanjil la deklaré osijé Jézu, ki vi-n montré nou fon kè Bondié Papa-a, ki sansib pou moun k-ap soufri, dapré sa Psòm-répons prémié léktu-a di nou (Ps 146=147,3): "Granmèt la géri kè ki krazé yo, li pansé blès yo".

Nou ouè nan samdi soua, apré yon jounin byin chajé nan kay-réyinion Kafanaòm nan, koté tout lajounin-an li t-ap préché, li t-ap chasé démon, li rivé kay bèl-mè Simon-Piè, ki té kouché ak lafièv, apèn yo palé-l osijé malad la, li proché sou pouint pié, li soulvé-l avèk délikatès, li kinbé min-l; épi minm lè-a lafièv la pati (Mc 1,30-31). Nan fason Jézu soulvé bèl-mè Simon-an, li montré nou, dapré sa Sin Matié di nou (Mt 8,17): "li pran maladi nou yo, li poté féblès nou yo", tankou sèvitè Granmèt la (Is 53,4), k-ap poté péché tè-a (Jn 1,29). Liv Jòb la nou li kòm prémié léktu-a (Job 7,1-7) montré nou doulè moun ki malad la, ki pa minm kapab dòmi, k-ap mandé kilè jou ap rivé pou-l lévé, épi pandan lajounin-an l-ap mandé pou asoué rivé, tout kò-l sé doulè jous fènoua rivé, li tankou yon anplouayé k-ap mandé kilè pou travay li fini, pou-l touché pri y-ap péyé-l la, li tankou yon moun k-ap travay nan solèy, ki anvi lonbraj pou-l jouinn yon ti fréchè, li tankou yon sòlda k-ap fè pòs, k-ap tann kilè y-ap vi-n lévé-l, moua ap kouri sou moua, li pa rékòlté anyin, nuit ap ranplasé nuit, sé doulè ki plin yo. Li pa ouè sou ki sa lavi-l ap débouché, sé tankou moun k-ap filé koton, bout fil la pa sòti sou anyin, li gin inpréson sé van l-ap rékòlté, san okinn éspoua, li ouè byin yo ap disparèt dévan jé-l, li pa éspéré jé-l ap louvri pou-l ouè yo ankò.

Sa-a sé késion moun malad la pozé tèt li. Min répons la sé nan Bondié li sòti, nan sous Sajès li ki pa gin limit, sa lèzòm pa kapab sondé-a. Jòb blijé mét min sou bouch li, lè-l ouè li pa konprann, min li pa gin doua akizé Bondié. Répons la, sé Psòm-répons la ki bay li: "Sé Bondié ki géri kè ki krazé yo, ki pansé blès yo" (Ps 147,3).

Bondié sé kè sansib (Ps 103,3). Jézu kriyé sou Laza, anvan-l fè-l lévé sot nan tonbo-a (Jn 11,33). Li pran pitié pou vèv Nayim nan, li touché sèkèy la, li fè jènòm nan lévé, li rinmèt li bay manman-an (Lc 7,13ss). Li sansib pou Mari-Madlèn k-ap karésé pié-l, k-ap kriyé nan pié-l, k-ap binyin yo ak losion, k-ap siyé yo ak chévé tèt li (Lc 7,37s; cf Jn 20,15). Li sé bon Gadyin-an k-al chèché mouton-an ki pèdi nan rak boua-a, épi ki poté-l sou pròp zépòl li (Lc 15, 8ss; Jn 10,11; Ez 34,11). Li sansib pou foul la ki sòti byin louin, ki pasé toua jou nan savann nan avèk li, épi ki pa gin anyin pou-l

manjé (Jn 6,5). Li délika pou ti moun yo y-ap vi-n prezanté ba li, minm si yo déranjé-l (Mt 18,13). Li pran pitié pou Malkus sèvitè prèt an chèf la, sa Sin Piè té koupé zorèy li-a, li touché-l, li géri-l (Lc 22,51). Jézu sé kè sansib Papa-a li vi-n montré nou, dapré sa lèt ansiklik Pap Jan-Pòl II té déstayé-a, nan "Dives in Misericordia" ("Li rich nan kè sansib"). Mo "kè sansib" la, yo rélé-l "miséricorde", sa vlé di: "li bay maléré yo kè-l" (miseris cor dare). Sou Koua-a yo pèsé kè Jézu, san ak dlo sòti (Jn 19,34). Li bay tou sa-l té ginyin.

Lè yo kolé nan kò nou pou yon sèvis, épi nou pa kapab ankò, souf nou rété yon pouin pou-l koupé, nou réponn nou pa kapab fè san sot nan ròch. Époutan, lè nou sonjé san k-ap koulé sot nan kè Jézu sou Koua-a, n-a fè yon ti éfò pou nou fè san Jézu-a koulé anndan kè ròch nou-an. Rélation nou ginyin avèk lòt moun yo, sitou sa-k fèb yo, sa-k malad yo, sa-k nan traka yo, li doué inbibé ak délikatès. Sé pa tout tan nou kapab soulajé yo. Min sé tout tan nou kapab ba yo yon ti tan nou, yon ti atansion nou, yon ti lapriyé nou. Gin dé foua sé konsa sèlman nou kapab édé yo poté koua yo. Konsa yon jou Jézu ap déklaré nou: "Mouin té grangou, nou té ban-m manjé; mouin té souaf, nou té ban-m dlo, mouin té bouké, nou té fè-m pozé; mouin pa-t konn rout, nou té dirijé-m, mouin té ni-kò, nou té abiyé-m; mouin té malad, nou té okipé-m; mouin té fèmin, nou té vizité-m; mouin pa-t gin kay, nou té résévoua-m; mouin té tonbé, nou té fè-m lévé, mouin té sal, nou té nètouayé-m; mouin té chagrin nou té konsolé-m; mouin pa-t ouè klè, nou té konsyé-m; mouin té pot chaj, nou té ban-m konkou; mouin t-apral louin, nou té vin-n avè-m; mouin t-ap trinnin, nou té poté-m; mouin pa-t gin fòs, nou té ban-m kouraj; mouin t-ap tranblé, nou té rasiré-m, mouin té tronpé, nou té rédrésé-m; mouin t-ap chèché nou, nou té vi-n koté-m; mouin pa-t louvri, nou té fè-m sòti; mouin té pati, nou té fè-m tounin; mouin té tou sal, nou té rét avè-m; mouin té tou frèt, nou té réchofé-m; mouin pa-t gin non, nou té ban-m Papa nou; mouin té glisé, nou té ratrapé-m; mouin té tou ront, nou té ban-m konfians; mouin té koupab, nou té padonnin-m; mouin pa-t gin lòd, nou té ban-m léspri nou; mouin t-ap dòmi, nou té révéyé-m; mouin té pèdi, nou té rétrouvé-m; mouin té mouri, nou té ban-m lavi; mouin pa-t gin ras, nou té ban-m Manman nou". **Ou ban-m manjé, ou ban-m mouin bouè, ou fè-m antré lakay Papa-m.** Tou sa nou fè pou youn nan pi piti frè-m sa yo, sé pou mouin minm nou fè-l (cf Mt 25,31-46).

Lè Sin Pòl t-ap pèsékité Krétyin yo, Jézu parèt dévan-l sou rout Damas la, li mandé-l pouki sa l-ap pèsékité-l (Ac 9,4). Lè Sin Martin té koupé manto-l an dé, li té bay pòv la mouatié-a pou-l pa-t mouri ak frédi-a, Jézu parèt

dévan-l nan nuit, li di-l mèsi poutèt li té kouvri-l ak pròp manto-l la. Tou sa nou fè pou youn nan pi piti nan frè-m sa yo, sé pou mouin minm nou fè-l.

Kè sansib Jézu pa limité pou yon sel katégori moun, pou yon sèl kouin tè-a, li pou tout moun, li pou tout réjion. Lè nou jouinn yon moun oubyin yon katégori moun oubyin yon réjion ki adopté nou, konprann nou tankou moun ki antré anndan fanmiy yo, nou gin tandans rezèvé bon-jan nou pou moun sa yo, pou group moun sa yo, pou zòn sa-a, pou fè nou bliyé tout désépsion nou konn abitué jouinn nan min lòt moun, nan min lòt katégori moun, nan lòt koté. Époutan, finisman lévanjil jodi-a montré nou, lè Sin Piè avèk moun lakay li ap chèche Jézu, épi yo jouinn li ap lapriyé yon koté li té pou kont li, yo mandé-l pou-l al jouinn moun yo Kafanaòm paské tout lavil la ap chèche-l, li réponn yo sé pou tout moun li sòti, sé pa pou Kafanaòm sèl (Mc 1,35-39). Réyéلمان vré, li pati, l-al préché nan tout lòt vil yo, minm si li konnin li pap jouinn minm kalité ankourajman sa-a. Sajès la gin kè sansib pou tout kréyatu. Li pa fè régadan minm si yo pa résévoua-l byin yon koté. Sin Pòl di nou nan dézièm Léktu-a madichon pou li, si-l pa préché lévanjil la (1 Co 9,16). Sé pa yon tit louanj sa yé pou li sé yon nésésité ki tonbé sou li. Sé pa ak pròp volonté-l l-ap fè-l (1 Co, 9,17) pou-l chèché jouinn yon ti rékonpans, sé yon sèvis Bondié konfié-l (1Co 9,17), san-l pa chèché okinn intèrè nan li, san-l pa fè profitè sou pouvoua li ginyin nan lévanjil la. Li adapté-l ak tout moun pou-l kapab sovè yo tout poutèt lévanjil la, antan-l vin fèb avèk moun ki fèb, pou-l édé Jézu poté féblès moun yo (1Co 9,22; Mt 8,17), sé fason pa-l pou-l sèvi tout moun pou-l kapab pran tèt anpil moun (1Co 9,19).

Nan dimanch matin, byin bonè, lontan anvan solèy lévé, Jézu té lévé, li t-al lapriyé pou kont li nan yon koté ki apa, apré tout siksè li té fi-n ginyin lavèy, nan vil Kafanaòm nan (Mc 1,35 cf Sg 6,14; 16,28; Si 6,36). Sa montré nou nan sèvis apostola nou, sé pou nou rezèvé prémié moman lajounin nou pou nou di Bondié mèsi pou siksè li ranpòté gras a aktivité nou, épi pou nou rinmèt jounin nou nan min-l, pou nou pa sèvi moun yo yon bariè ant li minm ak yo minm, pou yo pa kolé sou nou tròp, kòm si sé nan nou sous mèvèy chanjman kè yo té sòti. Lè yo vlé kinbé nou tròp yon koté, sé pou nou chapé, minm si nou gin pou nou tounin ankò, yo lòt moman. Yon vré misionè pa chita an plas. Mésaj li ak kè sansib li pou tout kalité moun, pou tout réjion, pou tout moun Bondié mété sou rout li. Si-l rété koté ki fasil sèlman, Bòn Nouvèl la pap préché bay sa ki nan fènoua yo, ki bézouin limiè yo. Minm si-l prévoua difikilté, sé pou-l alé kan minm.

N-ap mandé Manman Mari, "Mère de Miséricorde", favè sa-a, pou-l fè nou préché Bòn Nouvèl la bay tout créatu (Mc 16,15; Mt 28,19), pou nou pa gin moun-pa, ni group pa nou, ni zòn pa nou, pou nou misionè tout moun, tout group moun, tout zòn.

*

* *

SINKIÈM DIMANCH ÒDINÈ C

Lévanjil la montré Jézu chita nan batiman Sin Piè-a tou pré tè-a. Sé prémié tan-an. Li fè-l rékilé yon ti kras. Sé dézièm tan-an. Li fè-l al nan fon lanmè-a. Sé touazièm tan-an. Nan prémié tan-an, yo t-ap lavé filè yo. Nan dézièm tan-an, Jézu t-ap bay lansègnman. Nan touazièm tan-an, yo voyé filè yo pou lapèch la. Prémié tan-an, sé sa yo rélé "la voie purgative", koté n-ap lavé défo nou yo, ak Piè k-ap lavé filè yo. Dézièm tan-an sé sa yo rélé "la voie illuminative", koté n-ap résévoua limiè Jézu nan lansègnman l-ap bay foul la. Touazièm tan-an, sé sa yo rélé "la voie unitive", koté nou fè tèlman youn ak Jézu, sé pa aksion nou ankò ki konté, sé li minm k-ap aji nan nou, pou lapèch la. Malgré Piè gin péché, Jézu sèvi avèk li, paské sé Jézu k-ap aji, sé li minm k-ap pròpté-l (Lc 5,1.11).

Prémié Léktu-a montré nou Izayi ki rékonèt li gin péché, épi Bondié parèt dévan-l kan minm. Bondié pròpté-l, Bondié voyé-l (Is 6,1-2a.3-8).

Psòm-répons la mandé nou fè louanj Bondié dévan Mésajé-l yo tankou Izayi. Li mandé Bondié pou sé li minm ki kontinué travay li té kòmansé-a (Ps 137= 138).

Dézièm Léktu-a fè nou ouè kijan Jézu parèt dévan tout Apot yo, avèk dévan Pòl, malgré Pòl rékonèt li fè anpil péché (1 Cor 15,1.11).

Konsa ni Izayi, ni Piè, ni Pòl, Bondié voyé yo; min sé Bondié k-ap palé. ("Bondié voyé-m pou-m témouagné", "Min mouin").

*

Ni lévanjil la (Lc 5,1-11), ni prémié Léktu-a (Is 6,1-2a.3-8), yo palé nou sou késion vokasion: vokasion Piè (avèk Jak, Jan, André) nan lévanjil la; épi vokasion Izayi nan prémié Léktu-a. Tou lé dé istoua vokasion yo prezanté apéprè minm jan. Piè sézi poutèt prezans Jézu-Kri li dékouvri kòm yon pèsouaj ki dépasé pouvoua òdinè. Izayi sézi dévan prezans Bondié nan kay sakré-a ki anvayi ak bèlté, ki fè gon yo tranblé. Tou lé dé, ni Piè, ni Izayi, Bondié voyé yo an mision.

Tout vokasion, sé konsa. Moun nan Bondié rélé-a, li pa jouinn rézon ki fè Bondié chouazi-l la nan li minm minm; okontrè, lè-l gadé byin anndan fon kè-l, li ouè sé yon péchè li yé, li pa mérité pou-l parèt dévan Bondié. Bondié minm fè éspré, li chouazi sa-k pa anyin-an, pou pèsòn pa jouinn lokasion vanté tèt li dévan Bondié (1 Cor 1,28.29), antan l-ap fè konparézon avèk lòt moun, l-ap di si Bondié chouazi-l, sé paské li gin tèl mérit, li gin tèl kalité.

Sint Bènadèt té di konsa: Si la Trè Sint Vièj té jouinn yon moun ki pi pòv nan Loud, sé li minm li t-a chouazi.

Tout nannuit, Piè avèk André, avèk Jak, avèk Jan té voyé sinn yo, yo pa-pran okinn pouason. Sé sou paròl Jézu-a yo pran yon kantité si tèlman gran, filè yo t-ap chiré. San Jézu nou pa kapab fè anyin (Jn 15,5). Ak yon sèl mo li kréyé sièl la ak tè-a (Ps 33,9); sé poua liétnan-an ki té gin pitit li-a malad la té di Jézu konsa: "Mouin pa mérité pou-ou antré nan lakay mouin, min di yon paròl sèlman, pitit mouin-an ap géri" (Mt 8,8). Lè Bondié rélé nou, paròl li gin pouvoua pou-l chanjé oriantasion nou, alakondision nou pa rédi sot nan min-l. Lè-l té rélé Adan, Adan té kaché (Gn 3,30). Li té rélé Moyiz, Moyiz té fè-l latiti-n bèti-n, li viré-l tounin-l, li ba-l yon pakèt éskiz, joutan li di non karéman, a tèt pouin Bondié blijé vi-n faché, li montré Moyiz sé li minm k-ap avèk li nan mision-l (Ex 3,4-4,17). Li rélé Samuèl, min ti Samuèl réponn la minm, dépi nan premié kout rèl Bondié ba li-a. Okontrè minm ti Samuèl tèlman présé, li pa konn koté pou-l alé, li kouri al jouinn Prèt Éli, li di-l konsa: "Min mouin, puiské ou rélé-m". Prèt Éli t-ap dòmi, li té konprann Samuèl t-ap révé, paské Samuèl t-ap véyé nan kay sakré-a. Limiè k-ap boulé dévan lach la t-ap kléré nan kè-l, san-l pa konnin. Pandan toua foua Bondié rélé ti Samuèl konsa. Toua foua ti Samuèl al jouinn Prèt Éli, li di-l minm bagay. Sou touazièm foua-a, prèt Éli blijé di ti Samuèl Konsa "Si-ou tandé yo rélé-ou ankò, ou-a di: 'Ou mét palé, Granmèt, sèvitè-ou ap kouté". Sèké sou touzièm foua-a, prèt Éli té vi-n rékonèt sé Granmèt la ki t-ap rélé ti Samuèl. Réyèlman vré, lè Granmèt la rélé ti Samuèl ankò, li réponn jan prèt la té di-a (1 Sam 3,1-10). Sé konsa la Trè Sint Vièj Mari ap di, lè lanj la poté méyaj Granmèt la ba li-a, l-ap di: "Mouin sé Sèvant Granmèt la, sé pou sa fèt pou mouin daprè Paròl ou-a" (Lc 1,38).

Bondié rélé tout jan, tout maniè. Moun nan réponn tout jan, tout fason. Pa gin dé vokasion ki sanblé. Piè té sou bò dlo-a avèk Jan, avèk Jak, avèk André, yo té nan okipasyon yo byin pròp. Jézu rélé yo. Yo kite tout bagay, yo suiv li la pou la (Mc 1,16-20). Sé konsa Lévi ap fé tou, bò biro kontribision-an. L-ap pati minm lè-a (Mc 2,13-17). Gin moun ki pran plis tan. Gin moun tou sé nan chémin ki mové yo té yé, lè Bondié rélé yo-a, tankou Sin Pòl ki t-ap pèsékité légliz la, jan-l di nou nan dézièm Léktu-a (1 Cor 15,9; cf Ac 9,1-19). Bondié rélé-l, li vi-n Apot nan minm doua avèk lòt yo. Gin moun Bondié rélé yo dépi yo tou piti, tankou Sint Térèz lanfan Jézu. Gin dòt minm sé tèt sikonstans nan lavi-a ki fè yo pran konsians Bondié té rélé yo. Gin moun ki ouè klè tou suit. Gin dòt, yo blijé chèché anpil, tankou ti Samuèl. Tout fason yon moun pa janm fi-n sètin nèt si atirans li pa t-a kapab tronpé-l, fò réponsab légliz yo panché sou sa-a pou di-l konsa sé vré

sé Bondié ki rélé-l tout bon vré. Samuèl té blijé tounin kot prèt Éli pandan toua foua. Lè yon moun di li vlé fè pè, sé pa tankou yon grinn mayi yo planté, k-ap donnin la minm apré premié lapli-a. Sa pi konpliké pasé sa, sé yon bagay ki tèlman konsékan, ou blijé viré-l sou tout fas, paské djab la tou konn troupé moun sou késion sa-a, li fè-ou pran yon chémin ki pa fèt pou ou, ou troupé tèt ou, ou troupé lòt moun yo tou, ou fè anpil moun kapab pèdi rout akoz ou. Gin dèt moun Bondié rélé yo, sé vré, min jouisans lavi-a dékontrolé yo (Mt 4,19), minm si yo fi-n fè yon ti éséyaj, yo balansé difikilté y-ap rankontré yo avèk plézi lavi-a, épi yo fè bak. Ti jénòm nan ki té gin anpil richès la, lè Jézu di-l konsa: "Sé yon sèl bagay ki manké-ou, pou-ou kapab vi-n kòrèk nèt, alé, vann tou sa-ou ginyin, bay pòv yo, ou-a gin yon trézò nan sièl, épi vini, suiv mouin", li minm minm li pati, li viré do-l tou chagrin, paské li té gin anpil byin (Mt 19,16-22). Pou-ou suiv Jézu, ou pa doué ap trinnin yon pakèt bataklan, ou pa doué tablé sou richès. Kiré d'Ars, Sin Jan Mari Viané, paton tout Kiré yo, li té pòv anpil, sé yon mamit ponm-tè li té konn kuit pou yon sémèn, sé sa-k té konn sèvi-l kòm manjé. Lè yon moun réponn Jézu ki rélé-l, sé pa avantaj li vi-n chèché, sé pa djòb li vi-n fè, sé pa dèyè yon apouintman li vini, pito-l al fè dèt kalité travay, travay sa-a pa gin pri lajan, sé nanm yo n-ap délivré, yo minm Jézu fi-n péyé pou yo ak san-l. Lavi yo kouté trò chè, pou nou t-a nan machandé sou késion sa-a. Sé pousa premié bagay Jézu égzijé lè-l rélé yon moun sé aksépté viv pòv (Lc 9,58; 10,4).

Sé yon fason dayè pou moun yo gin konfians nan ou, lè yo ouè ou pa dèyè yon intèrè k-ap pasé, dapré sa Sin Piè di nan premié lèt li-a: "Pa okipé mouton yo pou yon intèrè k-ap fè nou ront, pa fè otorité nou pézé sou yo, min sé pou nou sèvi yo kòm modèl" (1 p. 5,2-3). Sin Pòl bay bèl konsèy pou résponsab légliz Éfèz yo nan sans sa-a tou (Ac 20,28-35). Li kité kèk konsèy inpòtan nan sans sa-a tou pou Timoté ak Tit (1 Tm 3,1-7; Tit 1,5-9). Li insisté anpil sou késion lajan-an. Moun Bondié chouazi nan sèvis li pa doué mété lidé yo sou lajan, sa fè moun yo pa gin konfians nan nou. Sé pa machandiz n-ap vann, sé yon sèvis sakré n-ap réalizé.

Lè Naaman té fi-n jouinn gérizon osijè lalèp li-a nan min Profèt Élizé, li té vlé péyé profèt la, Élizé réfizé katégorikman (2 R 5,15-19). Min Élizé té gin yon sèvitè yo té rélé Géazi, lè Géazi ouè mèt li réfizé pran lajan-an, li kouri dèyè Naaman, li bay yon manti, li di konsa: "Mèt mouin voyé di-ou, li régrèt li té réfizé, sèkè san-l pa atann, gin dé étranjé ki vi-n koté-l, yo fèk rivé, li pa gin anyin pou-l ba yo, ou mèt voyé sa-ou té gin lidé bay la". Géazi minm lè-l ouè Naaman bay kantité richès, li pa konn koté pou-l mété yo, okontrè minm Naaman voyé yon moun poté yo pou Géazi. Lè Géazi prèské rivé kot Élizé,

li pran richès yo, l-al kaché yo, épi li kanpé dévan Élizé. Élizé di-l konsa: "Koté-ou té yé?" Li di: "Mouin pa-t déplasé ditou". Élizé di-l: "Èské nanm mouin pa t-ap suiv ou, lè-ou t-ap kouri dèyè Naaman-an? Ébyin kouliè-a avèk tout lajan sa-a ou ginyin-an, ou mèt al fè rout ou, sèlman, lalèp la ki soti nan Naaman-an, l-ap kolé sou ou nèt, sé li minm ou t-al achté-a". Minm lè-a Géazi pati kité-l, tou blanch kon koton avèk lalèp (cf 2 R 5,20-27).

Sé pa komès Bondié rélé nou vi-n fè, pito n-al voyé ròch nan lanmè kasé tèt pouason. Bondié bézouin moun ki lib, ki léjé pou suiv Pitit li-a, dé bra balan, pou yo pati koté-l minnin yo. "Yo kité filè yo, la minm, yo suiv li". Bagay sa-a konsékan anpil, li mérité yo réfléchi anpil sou li, pou chanjé oriantasion ki mandé chanjé, pou Bondié okipé nou avèk plis fasilité, pou nou pi dégajé nan sèvis li. Sé sou fason n-ap aji, anpil moun ap gadé pou yo ouè si pou yo antré, si pou yo pa antré. Tou sa nou gin sé Bondié ki ba nou-l, sé pa pou nou ézité rimmèt li-l. Sé lè filè yo plin pouason, Piè avèk Jak, Jan, André, kité métié yo-a pou yo suiv Jézu.

Gin yon Kongrè ki té fèt a-Ròm sou vokasion yo, yo té voyé yon dokiman ki rich ak konsèy yo bay sou kèsion sa-a.

N-ap mandé Manman Mari pou-l fè nou aprann di tankou Profèt Izayi: "Min mouin, voyé-m" (Is 6,8), lè nou tandé Bondié ap di "Kilès m-ap voyé? ki moun k-apralé pou nou?" (ib). Sé kòm si sé lacharité Bondié ap mandé nou. Nou pa douè fè-l tann tròp. Profèt Jérémi té pè anpil, li té di konsa: li pa konn palé, sé yon ti moun li yé. Bondié té di-l li pa bézouin pè, sé li mimm k-ap mété paròl li nan bouch li (Jer 1,6-10). Konsa Jézu di Apot yo yo pa bézouin pè, l-ap ba yo yon bouch ak yon sajès okinn lénmi pa kapab kontrédi (Lc 21,25). Sé pa nou minm k-ap palé, sé léspri Papa nou k-ap palé nan nou (Mt 10,19-29).

*

* *

SIZIÈM DIMANCH ÒDINÈ A

Té gin toua tranch nan lansyin Téstaman: Laloua, Profèt yo ak Sajès. Laloua-a té gadé nan diréksion Pasé-a. Profèt yo té gadé nan diréksion sa k-ap vini-an. Sajès la té gadé nan diréksion Prézan-an.

Laloua-a té éspliké istoua Pèp Israèl la, li té montré kijan Bondié té chouazi-l, Bondié té ba-l kòmandman-l avèk kondision ki akonpagné kòmandman sa yo: si pèp la obsèvé kòmandman yo, l-ap jouinn bénédiksion; si-l pa obéyi yo, l-ap jouinn pinision. Profèt yo té fè konstatacion sou sa-k rivé Pèp Israèl la poutèt li pa-t obsèvé kòmandman Bondié yo. Yo té invité Pèp la gadé nan diréksion sa k-ap vini-an, antan Bondié ba yo posibilite pou yo chanjé konduit. Min kòm kè moun yo mové, sé yon lòt kè tou nèf Bondié ap mété nan yo pou yo obéyi lòd li yo (Jer 31, 33; Ez 36, 26). Sé pròp Pitit Bondié-a k-ap vini pou-l réalizé sa zansèt yo pa-t kapab obsèvé-a. Sajès la montré kijan dépi nan tan moun yo ap viv la, dépi koulié-a, yo kapab jouinn promès Bondié yo. Min vrè Sajès la, sé Jézu li minm minm ki vi-n réalizé laloua-a ak Profèt yo (Mt 5, 17; Lc 9, 28-36).

Laloua-a orianté sou lafoua. Profèt yo invité viv léspérans. Sajès la bay léson LACHARITÉ.

Nan la Transfigurasion, Moyiz réprésanté laloua, Éli réprésanté Profèt yo, Jézu sé Sajès la. Laloua ak Profèt yo disparèt, Sajès la rété (Lc 9, 36). Lafoua-a ap disparèt, éspérans la ap disparèt, Charité-a ap toujou rété.

Jézu mandé nou pou nou rinmin minm jan li rinmin nou. Sé kòmandman nouvo-a (Jn 13, 34). Lansyin Téstaman té di pou nou rinmin prochin nou tankou nou minm (Lc 10, 27). Jézu minm di pou nou rinmin minm jan li minm li rinmin nou (Jn 13, 34), sa vlé di antan li rinmèt lavi li pou nou, pou nou prèt pou fè minm jan pou prochin nou. Prochin-an sé tout moun, sé pa sèlman moun minm ras.

N-ap mandé Maman Mari favè sa-a pou nou réalizé laloua-a ak Profèt yo nan lacharité-a.

*

"Si ou-ap ofri kado-ou dévan lotèl la, épi ou sonjé frè-ou gin kichòy kont ou, kité kado-ou la dévan lotèl la; al rékonsilié ak frè-ou la anvan; apré sa ou-a vi-n pou-ou ofri kado-ou la". (Mt 5, 23s; cf antienne 1èrs vêpres 6^e d.o. A). Pou 13 mé 1981, Pap Jan Pòl II té rivé sou plas Sin-Piè-a, yo té tiré bal sou li. Li pasé pliziè jou lopital. Li gin konvikcion sé intèvansion Bondié ki fè-l chapé, gras a sékou Maman Mari yo fété pròp jou 13 mé-a, sou non Notré-Dam de Fatima. Sé poussa, yon ané apré, minm jou 13 mé-a ankò, l-al fè

pélerinaj Pòtital, nan koté la Trè Sint Vièj Mari té parèt la, Fatima. Li t-al di-l mèsi pou favè sa-a. Moun ki té tiré sou li-a, yo arété-l, yo mété-l nan prizon. Pap la al nan kacho-a, li pasé yon bon moman avèk li, li padonnin-l. Jès li fè-a, sé tankou yon signati li mét anba yon lèt ki té déjà ékri dépi lontan. Réyèlman vré dépi-l té réprann konésans li, nan lopital la, li té déjà padonnin-l, é li té ékri sa nan lèt li té voyé bay tout Évèk ki sou tè-a.

Réfrin Magnifikat pou premié vèp bèm dimanch òdinè-a ba nou lign pou orianté réfléksion nou, lapriyé nou ak konduit nou, antan-l réprann paròl ki nan mitan pasaj lévanjil sizièm dimanch òdinè A-a, ki di: "Si ou-ap ofri kado-ou dévan lotèl la, épi ou sonjé frè-ou gin kichòy kont ou, kité kado-ou la dévan lotèl la; al rékonsilié ak frè-ou la anvan; apré sa ou-a vini pou-ou ofri kado-ou la". Si sé nou minm ki gin kichòy kont lòt moun, li nòmàl pou nou fè démach rékonsiliation sa-a, pou nou alèz sou chémin ki minnin kot Bondié-a. Min si sé lòt moun nan ki fè nou kichòy, éské sé nou minm tou ki pou fè premié pa pou rékonsiliation-an? Lévanjil la mandé nou sa. Pouki rézon? Ébyin sé paské nou doué mét lòt la alèz, nou doué ofri-l posibilite dégajé konsians li sot nan kòd rayisans la ki maré-l la. Min si nou pa ouè rézon ki fè-l faché kont nou-an, ki sa pou nou fè? Nou doué fè démach la kan minm, pou évité-l monté mòn ki trò rèd pou li. Sé yon lokazion an plis nou ginyin pou nou fè yon jès charité. Sé nan sans sa-a nou réalizé laloua-a jous nan bout, antan nou dépasé sa sinp bon sans la mandé. Sajès lévanjil la dépasé rézonman lèzòm kalkilé.

Nan premié janvié 1975, Pap Pòl VI té santré méyaj lapè-a sou késion RÉKONSILIASION-an. Tit méyaj la sé té: "La Réconciliation, chemin vers la Paix". Nan méyaj sa-a li té di: "La paix doit être faite, elle doit être continuellement engendrée et produite; elle résulte d'un équilibre instable que seul le mouvement peut assurer et qui est proportionnel à la vitesse de ce mouvement" (cf Journée de la Paix, 1975, p. 7). Sé yon késion ékilib. Zouazo-a nan sièl la, si-l pa bat zèl li pou-l volé, l-ap tonbé. Yon avion nan sièl la, plis l-ap fè vitès, sé plis l-ap rét anlè. Min si-l ralanti motè-a, l-ap bésé; si motè-a étinn, l-ap tonbé. Yon ròch ou voyé, plis l-alé vit, sé plis l-ap rété anlè. Lè-l pèdi vitès, li tonbé. Sé konsa pou lapè-a. Sé tout tan pou-ou ap grésé-séré avèk li. Ou pa kapab rété yon lè bra kouazé, pou-ou di ou anpè. Lariviè-a ap désann, ou-ap éseyé rémonté kouran-an; si ou sispan najé l-ap broté-ou nan lanbouchi. Pap Pòl VI di lapè-a, li doué "dynamique... progressive". Sé yon mouvman, li toujou ap maché. Sé pou rézon sa-a, si yon grinn sab jinnin mouvman angrénaj yo, sé pou-ou démonté motè-a, pou-ou chèché kot grinn sab sa-a yé, pou-ou ouété-l; apré sa motè-a ap maché byin.

Gin dé fous, yon moun rété konsa li sispann palé avèk ou, oubyin li maré mi-n li sou ou, oubyin l-ap voyé pouint, oubyin karéman li pran jouré-ou, san-ou pa konnin ki sa-ou fè-l. Yon sinp jès oubyin yon sinp paròl ou doué di oubyin yo doué répété-l, épi li intèprété-l mal, san ou minm ou pa gin anyin kont li. Ou fè yon sinp démach koté-l, san-ou pa bézouin fè-l éplikasyon nésésèman pou-ou pa jinnin-l, sa kont pafoua pou-ou drésé machin nan sot nan kannal la, pou-l rékòmansé maché sou rout la san traka. Kalité mòd jan démach sa yo difisil, sé vré, min Koua Jézu-a té pi lou. Sou bò pui Jakòb la, Jézu lonjé min-l bay madanm Samari-a, pou-l montré-l li vi-n poté lapè (Jn 4, 7). Madanm nan répousé jès li-a, antan-l fè sonjé Juif pa gin rélasyon ak Samaritin. Jézu fè-l konprann nan pouin késion Juif ankò ni Samaritin ankò, sé pitit Bondié sèlman ki égzisté. Sin Pòl ap di pa gin ni Juif ni Grèk, ni gason ni fi, ni moun lib ni ésklav, nou tout sé frè ak sè. Sé san Jézu-Kri-a ki lavé nou, ki fè nou vi-n tounin yon sèl fanmiy (Gal 3, 28; Col 3, 11).

Lapè-a sé pa yon résif koté batiman jété lank pou lanm lanmè pa broté-l. Lapè-a sé yon batiman k-ap vouayajé jan Pap Pòl VI di nan mésaj premié janvié 1975 la. Sé tout tan ou-ap dékouvri péyi. Sèké moun yo ap chanjé, réalité ki ankadré yo ap chanjé tou. Konsa toujou gin dèt késion k-ap pozé nan rélasyon ak moun yo. Sa vlé di konsa lapè-a toujou ap pozé dèt késion. Ou pa réponn késion sa yo yon fous pou tout. Sé pou rézon sa-a ou pa kapab rét ap dòmi byin instalé. Minm si ou pa gin kont ak pèsòn, ou blijé tout tan ap rafréchi kondision rélasyon-ou avèk yo, pou jouin yo pa déséré, pou séri-a pa rouyé, pou planch pòt yo pa pouri. Sé lapè sèl ki kapab fè lapè, dapré sa Pap Pòl VI di (1-1-75). Lè tout tan ou-ap rafréchi rélasyon-ou konsa avèk lòt yo, vi-n gin konfians antré nou. Youn pap intèprété jès lòt la mal. Gin anpil bagay nou pa minm bézouin fè éplikasyon sou yo pou yo konprann yo. Pap Pòl VI di: "Elle ne suffit pas pour associer les hommes entre eux, l'identité de leur nature; encore faut-il leur enseigner à parler un même langage, c'est-à-dire, à se comprendre, à posséder une culture commune, à partager les mêmes sentiments; autrement l'homme aimera mieux se trouver avec son chien qu'avec un homme étranger" (cf St Augustin, De Civitate Dei, XIX, VII, PL 41, 634; Journée de la Paix 1-1-75, p. 10). Gin moun réyéman vré ki pi alèz avèk chyin yo, pasé avèk étranjé, jan Sint-Ogustin di-a, paské manké konfians nan rélasyon yo. Sé pou rézon sa-a, si nou réspiré lévanjil la vréman, nou doué chèché fè démach pou débloké frin sa-a k-ap anpéché machi-n nan déplásé-a.

Gin moun, sou prêtèks jistis, y-ap éksité léspri vanjans, kòm si jistis t-a kapab lénmi lapè, jan Pap Pòl VI di antan l-ap sité Sint-Ogustin-an. Li di: "Le monde marche vers son unité, alors que d'un autre côté, se font plus

nombreuses les hypothèses terrifiantes qui laissent prévoir comme plus possibles et plus périlleux des affrontements fatals considérés, sous certains aspects, comme inévitables et nécessaires, voire mêmes réclamées par la justice. Faut-il qu'un jour la justice ne soit plus sœur de la paix mais de la guerre" (ib p. 11-12). Nou pa doué pè fè demach rékonsiliasion, minm si moun nan gin mové karaktè. Anndan fon kè-l gin yon sansibilité k-ap fikse sémans la nou dépozé-a, paské moun nan, li fèt sou pòtré Bondié. Lè Bondié fi-n fè moun nan, li ouè sa té bon anpil, daprè sa Liv lajéne la di (Gn 1, 31). Pap Pòl VI di: "Nous croyons en la bonté fondamentale des hommes et des peuples. Dieu a fait salutaires les créatures (Sg 1, 14). L'effort intelligent et persévérant pour la compréhension mutuelle des hommes, des classes sociales, des cités, des peuples, des civilisations, n'est pas stérile" (ib 13).

Sèlman, pou demach rékonsiliasion sa-a donnin frui, fò-l déjà gin rasi-n li plonjé nan rékonsiliasion avèk Bondié. Pap Pòl VI di: "La première et indispensable réconciliation à réaliser est la réconciliation avec Dieu. Il ne peut y avoir pour nous croyants d'autres chemins que celui-là; bien plus, dans la définition de notre salut, la réconciliation avec Dieu et notre paix coïncident, sont causes, l'un de l'autre. C'est l'œuvre du Christ. Il a réparé la rupture que le péché opère dans nos rapports vitaux avec Dieu. Souvenons-nous, parmi beaucoup d'autres, d'une parole de Saint Paul à ce propos: 'et le tout vient de Dieu qui nous a réconciliés avec lui par le Christ' (2 Co 5, 18)".

Pou nou chèché rékonsilié avèk lot légliz yo (unité de l'Église: "recomposition œcuménique de l'unité entre tous les chrétiens", cf "Unitatis Redintegratio", décret sur l'œcuménisme) sé pou nou komansé rékonsilié antré nou anndan légliz pa nou-an tou (unité dans l'Église: "communion mystique constitutive", cf 1 Co 1, 10; 12, 12-27; cf Journée de la Paix 1-1-75, p. 16).

Konsa, si nou pa rékonsilié ak Bondié, nou pa kapab rékonsilié antré nou; si nou pa rékonsilié antré nou, nou pa kapab rékonsilié avèk lòt légliz yo. Tou sa sé travay lésprî Sin-an (Ga 5, 22; cf Journée de la Paix 1-1-75, p16). Sa mandé pou nou fè atansion pou nou pa rét ap kritiké légliz la ak Résponsab li yo, sa fè nou pèdi pié, sa pa sèvi bon témouagnaj pou demach rékonsiliasion nan diréksion lòt légliz yo (cf Journée de la Paix 1-1-75, 16). Pap Pòl VI té ékri yon mèsaj nan minm ané 1975 sa-a sou kèsion "La réconciliation à l'intérieur de l'Église". Li té mandé pou évité "les positions contestataires face à [l']Église" (cf ib 16). Li mandé pou sonjé lapriyé Jézu té fè jou Jédi-Sin-an, lè-l té di: "Que tous soient parfaitement un, et que le monde sache que tu m'a envoyé". (Jn 17, 22; cf ib 16). Li minm minm li té fè demach dépi alafin Konsil la, li t-al jous Jérusalèm pou-l rankontré

Patriarch Aténagoras, kòm sign rékonsiliation avèk légliz Grèk la, ki té séparé avèk légliz Rom nan dépi sièk tan. Konsa tou, minm si sé pa nou minm ki maré faché-a, sé pou nou pran modèl sou bon Gadyin-an ki kité katrévindiznèf mouton yo nan pak la, l-al chèche sa-k fè mové san-an, ki viré do-l li pati-a...(cf Lc 15, 4ss).

N-ap mandé Manman Mari pou-l aprann nou rabésé lògèy nou, pou nou ofri rékonsiliation bay frè nou ki gin kichòy kont nou.

*

* *

SIZIÈM DIMANCH ÒDINÈ B

Lévanjil la montré nou Jézu ki géri yon moun ki té gin maladi lalèp (Mc 1,40-45). Prémie léktu-a déstayé kondision moun ki gin lalèp la, ki règléman pou-l suiv parapò a sosité-a: sé pou kont li pou-l rété andéyò bouk la, nan savann. Lè l-ap maché, sé pou-l rélé byin fò, pou-l di li pa pròp, pou moun pa proche koté-l (Lv 13, 1-2.44-46). Sa fè nou sonjé kijan Profèt Izayi té déklaré li pa pròp, lè-l dévan Granmèt la nan tanp la (Is 6,5). Tout moun dévan Bondié, yo tankou moun ki gin lalèp (Ps 51,9; Jn 19,29). Lalèp la sé sign péché. Bondié té fè yon lanj pran yon pinsèt chabon difé, li té fè-l pozé-l sou bouch Profèt Izayi, li té di-l péché-l éfasé. Psòm-répons la déklaré sé chans pou moun yo padonnin fot li, yo kouvri péché-l, sé chans pou moun Granmèt la pa konsidéré kòm koupab (Ps 32,2). Moun nan ki fè Psòm nan, li di: "Mouin fè-ou konnin péché-m nan, mouin pa kaché fòt mouin-an, mouin di: "m-ap déklaré fot mouin-an dévan Granmèt la", ou minm ou padonnin fot péché-m nan (Ps 32,5). Sé nan déklarasion péché-a, péché-a vi-n éfasé.

Lè Jézu fi-n géri malad lalèp la, li voyé-l al prezanté dévan prèt la pou-l ofri sakrifis laloua-a té mandé kòm témouagnaj, li minm l-al déklaré nouvèl la tou patou. Sé Jézu atò ki blijé pran plas moun ki té gin maladi lalèp, antan sé li minm ki blijé rété nan savann, li pa kapab parèt aklè pou-l antré nan yon vil. Li vi-n pran kondision moun ki gin maladi lalèp. Sé péché nou li poté sou do-l, jan Profèt, Izayi té di-a (Is 53,3-4).

Karèm ap proche, sé moman pou nou sonjé fouyé konsians nou, pou nou ouè nan ki mézi nou pa gin kichòy ki anpéché nou proche kot Granmèt la, ki anpéché nou asosié tout bon vré avèk manb légliz la. Sé moman pou nou rékonèt kondision nou ginyin kòm péchè, sé moman pou nou déstayé sa nou fè ki mal nan yon bon konfésion, pou fèt Pak la pa jouinn nou an réta sou pouin sa-a. Dokiman Pap Jan Pòl II té ékri sou konfésion-an - "Réconciliation et Pénitence" -, li montré klè nésésité konfésion nan min yon Pè, lè nou gin péché mòtèl sou konsians nou (n.31). Pap la di sakréman Pénitans la, sé mouayin òdinè pou résévoua padon pou péché grav nou fè apré batèm. Li di si légliz mété yon souf nouvo nan sérémoni sakréman-an, sé pou nou kapab pran yon lòt élan pou nou chanjé konpòtman nan nou, pou nou konprann sakréman-an pi byin, pou nou résévoua-l avèk plis lafoua, san kè soté, avèk tout konfians nou, pou nou frékanté-l pi souvan, paské nou konnin l-ap débodé avèk rinmin kè sansib Granmèt la (n. 31). Li fè sonjé péché mòtèl la, sé yon aksion moun nan fè avèk tout libèté-l, avèk tout

konsians li, antan-l réfizé Bondié, laloua Bondié-a, Kontra rinmin-an Bondié prezanté dévan-l nan, épi li pito viré nan pròp diréksion pa-l, nan diréksion yon kréati ki gin limit, nan diréksion kichòy ki alé nan sans kontrè volonté Bondié ("aversio a Deo, conversio ad creaturam", n.17). Li raplé tou kijan nan tan sa-a nou pèdi sans péché-a, minm jan nou pèdi sans Bondié (n.18). Li sité paròl Pap Pi Douz té déklaré yon lè-a: "Péché tan sa-a sèké li pèdi sans péché-a" (Radiomessage Congrès catéchistique national des États-Unis à Boston, 26 Octobre 1946, Discorsi e Radio-messagi, VIII, 1946, 288). Si nou pèdi sans péché-a, sans Bondié-a sé paské konsians nou sibi défòmasyon, li angoudi, li tankou moun yo andòmi pou yo fè-l opérasion (Réconciliation et Pénitence, n.18).

Tou sa, paské n-ap viv yon tan koté sa-k konté, sé aksion, sé randman, sé sèvi ak byin yo, sé plézi, san nou pa fè atansyon danjé ki ginyin pou nou pèdi nanm nou, nou pa okipé Bondié. Sèl sa-k péché pou nou, sé lè yo touché yon moun (n.18). Moun pa kapab bati tè-a san Bondié, paské tè-a ap viré kont li (cf Redemptor hominis, n.15, Réconciliation et Pénitence, n.18). Sé Bondié ki sous ak dènié finisman moun nan; si nou pèdi sans péché nou fè kont Bondié, nou pa kapab gin vré sans péché nou fè kont moun nan (Réconciliation et Pénitence, n.18). Yon lòt bagay ki fè nou pèdi sans péché-a ankò nan tan sa-a, sèké n-ap pran prékosion pou nou pa frinnin libèté moun, pou-l pa santi li koupab nan aksion li pozé; tout fot moun nan fè, nou lagé-l sou do sosisyè-a, nou déklaré moun nan inosan, nou chèché ésplikasyon fòt la nan kondision moun nan ap viv la, nan tout sa-k té pasé, ki aji sou li (n.18). Sans péché-a disparèt fasilman tou, poutèt nou gin tandans pa rékonèt valè fèm, total, laloua moral la, atèl pouin nou pansé péché-a égzisté, min nou pa konnin kilès ki komèt li (n.18). Nou pèdi sans péché-a tou, poutèt nou konprann sé lè nou santi nou koupab sèlman nou fè péché, oubyin poutèt nou konprann péché-a sé sèlman dézobéyi laloua-a (n.18). Moun yo ap viv kòmsi Bondié pa-t égzisté; sèl koté yo ouè péché, sé nan bagay ki konsènè sosisyè-a (n.18). Yo pa konsidéré Bondié tankou yon Papa, ni yon Mèt.

Poutèt lontan yo té konn sansib tròp pou péché, koulié-a yo réaji yon fason pou yo pa distingé péché-a okinn koté (n.18). Poutèt lontan yo té konn insisté tròp sou lanfè, koulié-a yo fè kòmsi Bondié tèlman rinmin nou, li pap pini okinn fot péché-a mérité (n.18). Poutèt lontan yo té konn korijé déviasyon konsians yo yon fason sévè, koulié-a yo tèlman respékté konsians la, yo pa ozé di lavérité-a (n.18). Anpil fidèl tandé divès son klòch osijè kèsion grav, kèsion délika moral krétyin-an, kèsion plézi lachè; sa fè yo pèdi véritab sans péché-a (n.18). Gin moun ki konsidéré konfèsion-a tankou yon

bagay pèsonèl sèlman; gin dòt, sé kominoté-a sèlman yo ouè; gin dòt ankò sé abitud sèlman ki fè yo proché nan konfésion (n.18). Sé pou nou chèchè vi-n jouinn vré sans péché-a, pou nou batay kont gro difikilté k-ap pézé sou nanm nou-an.

Moun ki té gin maladi lalèp la té vi-n lagé kò-l ajénou dévan Jézu, li té di-l: "si-ou vlé, ou kapab géri-m". Jézu té pran pitié pou li, li té lonjé min-l, li té touché-l, li té di-l: "mouin vlé, sé pou-ou géri". Kontak sansib sa-a Jézu ginyin ak moun nan, sa fè nou konstaté si-l désann sou tè-a, sé pou-l kapab rankontré lèzòm yon fason sansib. Sakréman yo sé sign sansib lagras la. Lè Jézu ap monté nan sièl, li bay Apot yo pouvoua pou yo padonnin péché o-non-l (Jn 20,22-23). Sé pou-l té kapab konsèvé kontak sansib la avèk nou-an. Konsa nou pa doué kontanté nou avèk sa nou rélé "konfésion a Dié", "konfésion spirituel". Si nou gin péché mòtèl, sé pou nou proché nan konfésion sakramantèl; otréman nou pa gin doua fè kominion sakramantèl, sé kominion spirituèl sèlman nou kapab fè. Nou pa doué mété divin nouvo nan véso ansyin; otréman véso yo ap éklaté, divin-an ap pédi. Juda té manjé, li té bouè pròp kondanasion-l, vant li té éklaté, tout zantray li té sot déyò (Ac1,18; Jn 13,26s). Mandé Bondié padon pou yon bagay konsa pa rivé nou, antan nou fè kominion sakrilèj, sa vlé di ak gro péché sou konsians nou. Sin Pòl mandé nou pou nou fè atansion nan sa n-ap fè, lè nou résévoua Kò ak San Granmèt la, pou nou distingé-l byin, pou nou pa sal prezans li ak péché grav ki nan konsians nou (1Co 11,27-31).

Nan dézièm léktu-a, Sin Pòl di nou soua n-ap manjé, soua n-ap bouè, sé pou bèlté Bondié parèt (1Co 10,31). Yon moun ki manjé Kò Granmèt la, ki bouè San-l, avèk yon konsians sal, li pa fè bèlté Bondié parèt; okontrè, li sèvi bariè pou légliz Bondié-a, jan dézièm léktu-a di-a, li sèvi bariè tou pou pròp tèt pa-l, paské li fè yon dézièm péché pi grav ankò pasé sa-l té déjà gin nan kè-l la, li fè yon sakrilèj.

N-ap mandé Manman Mari, pou-l aprann nou fouyé konsians nou, avan nou proché kominié, pou tan Karèm k-ap vini-an fè nou jouinn lokazion profité fè yon bon konfésion, pou minm jan yo boulé madigra, nou boulé tou sa-k sal anndan konsians nou, pou nou kapab di avèk Psòm nan: "Sé chans pou moun yo padonnin fot li, yo kouvri péché-l, sé chans pou moun Granmèt la pa konsidéré kòm koupab... **mouin fè-ou konnin péché-m nan, mouin pa kaché fot mouin-an; mouin di: m'ap déklaré fot mouin-an dévan Granmèt la; ou minm ou padonnin fot péché-m nan**" (Ps 32,1-2.5). Psòm sa-a, Ps 32, sé dézièm nan nan sèt Psòm Pénitans yo. Prémii-a, sé Ps

6; dézièm nan sé Ps 32; touazièm nan sé Ps 38; katriyèm nan sé Ps 51; sinkièm nan sé Ps 102; sizièm nan sé Ps 130; épi sétièm nan sé Ps 143.

*

* *

SIZIÈM DIMANCH ÒDINÈ C

Lévanjil la prezanté dé kalité séri: yon pòsion sé bédiksyon; lòt la madichon. Bédiksyon pou moun k-ap fè volonté Bondié, madichon pou lòt yo (Lc 6,17.20.26). Prèmié Léktu-a prezanté madichon yon bò, bédiksyon lòt bò. Sa-k fè mal, l-ap boulé nan savann; sa-k fè byin-an l-ap bouè dlo fré, bò lariviè (Jer 17,5-8). Psòm-répons la bay bédiksyon tou yon koté pou moun k-ap suiv laloua Granmèt la, madichon yon lòt bò pou lòt yo. Youn sé pié boua bò lariviè, lòt la sé pousiè nan van (Ps 1). Dézièm Léktu-a montré sé sou Jézu vivan lafoua nou anrasinin (1 Cor 15,12.16-20).

Sé pou nou réfléchi sou Paròl Bondié-a, pou nou fè sa-l mandé: "Sé chans pou moun yo ki planté nan kè yo paròl Bondié-a pou yo fè-l donnin... Ala chans pou yon moun ki gadé paròl Bondié-a nan kè li".

*

"Sé chans pou nou minm ki pòv yo" (Lc 6,20). Sé lasajès Bondié k-ap palé, li fè déklarasyon nan sans kontrè abitud lézòm. Pou yo, sé lè yon moun gin tou sa-l bézouin sou tè-a, li gin chans, li pa manké anyin. Époutan, sou tè sa-a sé pasé n-ap pasé, sé pou yon tan nou la, sé pa la nou gin pou nou rété. Vré kay nou sé nan sièl la. Si "nou bati ak lò, ak lajan, ak bijou, ak boua, ak zèb, ak pay" (1 Cor 3,12), difé-a ap dévoualé ki solidité travay nou-an ginyin. Sèl fondman-an sé Jézu-Kri (1 Co 3,11). Prèmié louvri li louvri bouch li pou-l préché, li di: "Sé chans pou moun ki pòv yo" (Mt 5,3; cf Lc 6,20), paské péyi Roua sièl la sé pou yo li yé. Nan pouin bagay ki fè moun dépalé konsa pasé lajan. Yo di chémin lajan pa gin pikan. Épi tout moun ap kouri ladan-l, y-ap glisé nan falèz (Mt 7,13), tankou rich sa-a ki t-ap fè gran banbòch la, min ki té kité pòv Laza-a nan papòt li-a, ata chyin yo t-ap vi-n niché-l; sèlman lè-l mouri, li ouè Laza sou léstomak Abraam nan sièl la, pandan li minm li tonbé nan lanfè, ata ti gout dlo li pa-t kapab jouinn pou rafréchi lang li. Malgré li mandé Abraam pou-l voyé Laza, Abraam d-il konsa gin yon falèz ant sièl la ak lanfè-a yo pa kapab travèsè sot nan youn al nan lòt. Li mandé pou Abraam voyé Laza sou tè-a, al avèti frè-l yo, Abraam réponn li konsa: si yo pa kouè Profèt yo, minm si yon moun t-a lévé vivan sot nan pami mò yo, yo pa t-ap kouè-l (Lc 16,19-33).

Sin Pòl di nou nan dézièm Léktu-a: "Si Jézu-Kri pa lévé vivan, sot nan pami mò yo, lafoua nou pa vo anyin" (1 Cor 15,17). Sé sou li nou mét lafoua nou, sé sa ki fè nou kapab viv dapré prinsip li ba nou kòm Sajès Bondié ki mandé pou nou chouazi chémin povreté-a, malgré tout pakèt bann moun yo ap

chouazi chémin richès la, chémin k-ap désann byin laj la nan lanfè-a (Mt 7,13.14).

Lè la Trè Sint Vièj Mari té fi-n parèt dévan Sint Bénadèt a-Loud la, anpil moun té vi-n chèché ouè-l, pou yo té konnin kijan sa té pasé; li épliké yo sa byin simpléman. Sèlman li pa janm vlé aksépté yo ba-l lajan, li toujou réfizé yon fason karé. Yon jou, gin yon moun ki mété yon valè lajan nan min-l. Li lagé-l atè, li di konsa: "Ou-ap boulé-m". Sèlman li té gin yon ti frè, ki pa-t fi-n gin minm santiman nèt avèk li. Ti frè-a kité yon moun ba-l lajan, li pran-l. Lè-l tounin fi-n al kondui moun nan déyò, li antré lakay la, Sint Bénadèt ouè li gin min-l fèmin, li di-l konsa: "Louvri min-ou". Lè-l louvri-l, Sint Bénadèt ouè lajan-an, li bay ti frè-l la yon bèl tap nan figi, li di-l konsa: "Poté lajan sa-a tounin tout-suit". Sé li minm tou ki ékri yon ti frè-l ki té vlé fè Pè. Li di-l konsa: "Si-ou konprann ou-ap fè Pè pou-ou gin lajan, ou mèt rété koté-ou yé-a". Sé chans pou moun ki pòv yo. La Trè Sint Vièj Mari té di Sint Bénadèt konsa: "Mouin pa promèt ou pou-m fè-ou jouinn satisfaksion sou tè sa-a, min nan sièl la". Sé chans pou moun ki pòv yo, péyi Roua sièl la sé pou yo li yé.

Sé chans pou moun ki mét konfians nan Granmèt la, dapré sa Profèt Jérémi di nou nan prémié Léktu-a (Jer 17,5-8). Moun ki konté sou richès li, li pa mét konfians sou Bondié, dapré sa Psòm nan di (Ps 49,7ss). Moun ki konté sou Granmèt la sé yon pié boua ki planté sou bò dlo, dapré Profèt Jérémi (Jer 17,5-8). Sé sa Psòm-répons la kalkilé: prémié Psòm labib la: "Sé chans pou moun ki mét Granmèt la kòm éspoua li" (Ps 1,2). Sonjé tan Karèm nan k-ap vini-an, pou nou kalkilé volonté Bondié lajounin kon lannuit, pou nou pa bliyé fè jèn mèkrédi sin-an ak vandrédi sin-an, sé yon fason pou nou sonjé nou sé pòv; sonjé fè lacharité tou pandan tan Karèm nan, pou nou montré solidarité nou avèk pòv yo; épi sonjé lapriyé pi plis, pou kè nou pòv an fas Bondié. N-ap sonjé Bondié voyé jé sou Sèvant li ki pòv, tout jénérasyon ap di li gin chans (Lc 1,48). Sé chans pou moun ki pòv yo.

*

* *

SÉTIÈM DIMANCH ÒDINÈ A

Ni lévanjil la, ni prémié léktu-a, ni dézièm léktu-a, yo palé sou LACHARITÉ. Lévanjil la mandé pou nou pa tiré vanjans (Mt 5, 38-48); prémié léktu-a mandé pou pa rayi prochin-ou (Lv 19, 1-2.17-18); dézièm léktu-a mandé pou pa gin divizion nan légliz la (1 Co 3, 16-29). Sé toua fason pou palé sou minm bagay la: rinmin-an. Psòm-répons la montré rasi-n rinmin-an sé nan Bondié li yé (Ps 103, 8); minm jan sièl la ro anlè tè-a, konsa kè sansib li pou moun ki respékté-l yo (Ps 103, 11). Tankou papa sansib pou pitit konsa Granmèt la sansib pou moun ki respékté-l-yo (Ps 103, 13). Kè sansib li sòti dépi nan sièk tan pou moun ki respékté-l yo (Ps 103, 17). N-ap mandé Manman Mari pou ant lévanjil la ak lavi nou, pa gin dèt diférans pasé sa-k ginyin ant yon mizik ki ékri ak minm mizik la ki chanté.

*

"Lapriyè pou moun k-ap pèsékité nou, k-ap di manti sou nou, pou nou kapab pitit Papa nou ki nan sièl la" (antienne à Magnificat, 1ères vèpres 7èm d.o). Nan dènié soupé-a, Jézu té di Apot yo, li té kité yon kòmandman nouvo pou yo, pou youn rinmin lòt tankou li minm li té rinmin yo-a (Jn 13, 34). Si-l di kòmandman sa-a nouvo, sé parapò a lansyin Téstaman. Prémié Léktu-a montré nou kijan Liv Lévitik la té déjà mandé pou rinmin prochin-an (Lv 19, 1-2.17-18). Sèlman lè sa-a mo "prochin"-an pa-t gin sans la Jézu t-ap ba li-a, lè-l montré "prochin"-an sé tout moun, minm lénmi nou (Lc 10, 29-37). Jézu ap ofri tèt li kòm modèl, lè-l sou lakoua, li lapriyè pou Papa-a padonnin bouro yo. Li sèvi yo minm kòm Avoka, antan-l éskizé yo, li chèché prêtèks pou défann kòz yo, li di yo pa konn sa y-ap fè (Lc 23, 34). Sèké liv Lévitik la té di pou rinmin prochin-an, sé vré; min lè sa-a "prochin"-an sé té sèlman moun ki nan minm fanmiy (Lv 19, 16), nan minm péyi (Lv 19, 17), nan minm pèp (Lv 19, 18). Sé nan sans sa-a liv Lévitik la di sé pou-ou rinmin prochin-ou tankou ou minm (Lv 19, 11). Minm la-a ankò, gin yon lòt limit nan rinmin-an. Sé pou-ou rinmin-l tankou ou minm, min pa plis pasé ou minm. Jézu minm li di sé pou-ou rinmin-l tankou li minm li rinmin nou: sa vlé di pi plis pasé ou minm ou rinmin pròp tèt pa-ou. Li rinmin nou jous li mouri pou nou (Jn 13, 34). Sé poua li di: pi bèl prèv yon moun kapab bay li rinmin tout bon vré, sé lè-l bay lavi-l pou moun li rinmin-an (Jn 15, 13). Sin Maksimilyin Kolbe té montré kijan li té konprann égzijans rinmin sa-a, lè-l pran plas kondané-a-mò yo t-apral kondui-a. Pap Jan-Pòl II té insisté sou pouin sa-a nan prèch li té fè pou yo té déklaré Maksimilyin Kolbe sin-an.

Nan premié prèch Jézu fè-a, li montré li minm lasajès, li vi-n réalizé laloua ak Profèt yo, antan li dévoualé sa-k té rét kaché nan fason yo té konprann yo (Mt 5, 38.39). Dé dimansion sa yo té kaché pou lansyin Téstaman: ni longè-a – rinmin tout moun, minm lènmi-an – ni lajè-a – rinmin pi plis pasé pròp tèt pa-ou -. Sin Pòl répété Romin yo konsign Jézu bay la, antan-l di yo pou yo béni moun k-ap pèsékité yo, pou yo béni san yo pa bay madichon (R 12, 14; cf Lc 6, 27-28). Li mandé pou pa rinmèt mal pou mal (R 12, 17), pou pa tiré vanjans (R 12, 19; cf Lv 19, 18). Li di sé pa nou minm ki pou ran tèt nou jistis; sé Bondié ki pou okipé sa (R 12, 19; cf Dt 30, 35; He 10, 30; Gn 50, 19; Pr20, 22; 1 Th 5, 15; Col 3, 12-13). Okontrè nou minm sé charité pou nou ginyin vizavi moun k-ap chèché fè nou sa-k mal. Li sité liv Provèb yo ki di: "Si lénmi-ou grangou, ba-l manjé; si-l souaf, ba-l bouè" (R 12, 20 = Pr 25, 21). Sé yon fason pou fè-l antré anndan fon kè-l, pou-l régrèt sa-l té fè-a. Sé poua liv Provèb yo di sé tankou sé chabon difé ou ranmasé mét sou tèt li (Pr 25, 22), sa vlé di li vi-n tèlman régrèt sa-l fè-a, tèt li vi-n cho, jous li pa kapab sipoté ankò. Lè yon moun ouè ou rinmèt li byin nan plas mal, sa travay konsians li. Li pa kapab rét indiféran. Sa troublé-l. Li blijé chanjé fason l-ap viv kan minm. Konsa nou pa doué kité mal ranpòté laviktoua sou nou. Sé nou minm ki pou ranpoté laviktoua sou mal la, gras a byin nou fè (R 12, 21).

Sé pou sa Jézu di Sin-Piè, sé pa sèt foua pou-l padonnin, sé souasandis foua sèt foua (Mt 18, 21; cf Gn 4, 24). Dènié paròl ki soti nan bouch Sin-Étièn, avan-l mouri anba kout ròch Juif yo, sé: "Granmèt, pa mété péché sa-a sou kont yo" (Ac 7, 60; cf Lc 23, 34). Sin Pòl di Galat yo sé rinmin-an ki ranmasé laloua-a ak Profèt yo (Ga 5, 14; cf Jc 2, 8). Minm Ézayu té rékonsilié ak Jakòb. Li té promèt li lanmò (Gn 27, 41). Lè Jakòb tounin nan péyi-a, apré plis pasé katòzan, li konprann Ézayu té kinbé-l nan kè toujou. Li fè tout kalité démach pou-l ofri-l mouton ak chamo ak dèt kado (Gn 32, 4-22), pou-l kalmé-l. Min li sézi lè-l ouè Ézayu bliyé tou bagay. Yo anbrasé, yo kriyé (Gn 33, 4). Ki moun ki kapab li pasaj lansyin Téstaman sa-a, san-l pa kriyé li minm tou? Lè nou sonjé rankont Jozèf avèk frè-l yo (Gn 42-45), lè nou ouè kijan-l anbrasé yo, kijan-l kriyé (Gn 45, 2.14-15), kijan dépi anvan sa, li t-al kaché pou-l kriyé, anvan-l té kité yo rékonèt li-a (Gn 43, 32), éské zantray nou kapab rété san yo pa tréyayi ak minm kouran éléktrik sa-a ki sot nan zantray Bondié, lè-l rankontré pitit li ki té pati byin louin-l (Lc 15, 20; Jer 31, 20; Os 11, 8; Is 49, 15; 54 7s)? Frè Jozèf yo tou té pè pou Jozèf pa-t tiré vanjans sou yo. Jozèf pran kriyé, lè-l aprann sa (Gn 50, 17) li di li pap pran plas Bondié pou-l rann tèt li jistis; li padonnin (Gn 50, 19-21). Minm David pa kité Abisayi tiré vanjans pou li sou Siméyi ki t-ap madichonnin-l (2 Sm

16, 9). Li aksépté sa, pou Bondié fè sa tounin bénédiksion pou li (2 Sam 16, 10-12).

Moun ki fè kè-l di, pou-l réfizé rékonsiliation-an, pou-l souflé difé vanjans la, sé konsèy Satan li pran, sé démon-an li kité instalé nan kè-l. Sé tout tan pou-n ap chasé-l, paské l-ap toujou chèché tounin. Kon nou fèmin yon pòt, li éséyé antré nan yon fénèt. Sé pou rézon sa-a pou nou lapriyè pou moun ki fè nou kichoy, pou nou kapab alèz, lè n-ap résité lapriyè Jézu té montré nou-an: "Papa nou ki nan sièl la..., padonnin nou sa nou fè-ou, tankou nou padonnin moun ki fè nou kichoy" (Mt 6, 12).

N-ap mandé Manman Mari pou-l aprann nou "lapriyè pou moun k-ap pèsé-kité nou, pou nou kapab pitit Papa nou ki nan sièl la" (Mt 3, 12-43).

*

* *

SÉTIÈM DIMANCH ÒDINÈ B

Ni lévanjil la (Mc 2,1-12), ni premié Léktu-a (Is 43,18-25), ni Psòm-répons la (Ps 41=40), montré kijan Bondié toujou prèt pou-l padonnin péché nou.

Mirak Jézu ap fè-a, sé kòm sign li padonnin péché moun nan ki pa-t kapab maché-a. Sé yon favè Bondié fè nou, lè-l padonnin péché nou, paské péché-a sé yon dèt anyin sou tè-a pa kapab éfasé. Sé kont Bondié li dirijé. Sé Bondié sèl ki kapab éfasé-l. Sé pousa premié léktu-a fini antan-l di: sé akoz mouin minm minm mouin padonnin-ou pou révòlt ou yo; mouin pa vlé sonjé péché-ou yo ankò (Is 43,25).

Sèlman, moun nan doué louvri kè-l pou-l résévoua padon sa-a. Sé pou-l rékonèt li sé péchè, li fè péché, jan Psòm-répons la di-a (Ps 41=40): géri nanm mouin, Granmèt, paské mouin fè péché kont ou. Péché-a se yon maladi ki fè nou vi-n fèb, jan Psòm 41-an di-a. Sé Granmèt la ki kapab géri nou.

N-ap mandé Manman Mari pou-l ba nou sans péché-a, pou nou kapab gin sans Bondié, paské dé bagay sa yo alé ansanm (cf Pape Jean-Paul II: Réconciliation et Pénitence). Plis nou pèdi sans péché-a, sé plis nou pèdi sans Bondié. Sé pou nou aprann viv an prezans Bondié, pou nou évité péché k-ap fè-l lapinn, k-ap fè nou pran distans an fas li.

*

* *

SÉTIÈM DIMANCH ÒDINÈ C

Lè Jézu ap mouri sou Koua-a, youn nan dènié paròl li di, sé "Papa, padonnin yo, yo pa konnin sa y-ap fè" (Lc 23,34). Sé konsa tou Étièn lapriyè, antan l-ap mouri anba kout ròch Juif yo (Ac 7,60). Sé dènié paròl Étièn. Non sèlman Jézu padonnin bouro yo, min li éskizé yo, li sèvi yo Avoka: "Paské yo pa konn sa y-ap fè".

Sé Bondié sèl ki kapab padonnin péché. Jézu mandé nou pou nou sanblé ak Bondié, paské sé pitit li nou yé, li fè nou pòtrè ak li.

David padonnin Sayul, jan prémié Léktu-a di-a (1 Sm 26,2-23), malgré li té gin avantaj sou Sayul, ki t-ap rapousuiv li, li minm ki té inosan-an. Jozèf padonnin frè-l yo ki té vann li yo (Gn 45,4ss). Li réfizé pran plas Bondié pou-l jijé (Gn 50,19).

Sin Jak di kòlè lèzòm pa réglé jistis Bondié (Jc 1,20).

Psòm-répons la (Ps 103= 102) di Bondié padonnin tout fot nou, li pa aji aléga nou dapré fot nou yo, li pa trété nou dapré péché nou yo; okontrè li sansib pou nou tankou yon papa fè pou pitit li.

Lè nou sonjé jan Bondié rinmin nou, jan-l toujou prèt pou-l éfasé fot nou, jan-l voyé Pitit li vi-n sové nou antan-l pasé nan lanmò lakoua, n-a blijé fè yon ti èfò tou pou nou padonnin moun ki fè nou kichòy.

N-ap mandé Manman Mari pou nou obsèvé konsign lévanjil la (Lc 6,27-38), pou nou rinmin lènmi nou, pou moun ki rayi nou yo, nou fè yo dibyin, minm si sa difisil, minm si nou tandé lòt son klòch nan sosiété-a, pou moun k-ap palé nou mal yo, nou souété yo dibyin, pou nou lapriyè pou moun k-ap di manti sou nou yo.

Sin Luk rivé di minm nan lévanjil la pou nou pa réklamé nan min moun ki vòlè nou (Lc 6,30). Gin yon jistis ki sipérié pasé tout jistis, sé jistis Rinmin-an.

Nou pa doué gin yon "Solidarité close", sé pou kè sansib nou-an dépasé frontiè ras, fanmiy, group. Jézu di nou si nou rinmin moun ki rinmin nou sèlman, ki rékonpans nou mérité? Moun ki pa rékonèt vré Bondié-a, yo fè sa. Si sé moun ki fè nou dibyin nou fè dibyin tou, sa sa ap sèvi nou sou chémin sièl la? Si sé moun k-ap rinmèt nou sèlman nou prété, ki sa nou fè ki éstraòdinè? Lévanjil égzijé dépasman. Sé pou nou dépasé mantalilé koridò

sa-a k-ap toufé rélation nou ginyin avèk prochin nou yo, lévin sa-a ki pou fè pat la gonflé.

N-ap mandé Manman Mari pou-l fè nou sèvi lévin sa-a nan koté n-ap viv la, pou nou bliyé moun k-ap obsèvé nou yo chanjé pròp konsépsion pa yo, antan yo konfòmé pi byin ak sa Jézu mandé nan lévanjil la, pou avèk Sin Pòl nou kapab di: nou pa gin okinn dèt aléga pèsòn, sof dèt rinmin-an, ki akonpli laloua-a (R 13,8-10).

*

* *

UITIÈM DIMANCH ÒDINÈ A

Jézu ba nou léson sou laprovidans, li di nou pou nou pa pran tèt chajé ap kalkilé pou démin ki sa n-ap manjé, ki sa n-ap bouè, ki sa n-ap mété sou nou. Li invité nou gadé flè jadin yo kijan yo byin bèl san yo pa fè toual, ni zouazo sièl yo kijan yo jouinn sa yo bézouin pou yo viv malgré yo pa simin, yo pa fè jadin. Konsa nou pa doué ap viv avèk tròp préokipasion k-ap jinnin rélasyon nou doué ginyin avèk Bondié. Sé nan sans sa-a lévanjil Sin Matié-a palé nou pou uitièm dimanch òdinè A-a (Mt 6, 24-34). Sé péyi koté Bondié Roua-a pou nou chèché anvan, rès la ap vini apré (Mt 6, 33). Sé konsa Jézu té di Sint Mat pou-l pa trakasé tròp pou bagay k-ap pasé yo, sé yon sèl ki nésésè, sé Mari, sè Mat la, ki chouazi pi bèl posion-an, yo pa gin doua ouété-l nan min-l (Lc 10, 40ss).

Prémié léktu-a di nou kijan Siyon t-ap plinyin, antan li t-ap kalkilé kijan Granmèt la bliyé-l, époutan Bondié di minm si yon manman t-a bliyé pitit li, li minm li pa gin doua janm bliyé-l (Is 49, 14-15). Lamou Bondié gin pou nou ap diré tout tan gin tan. Minm si yon manman t-a bliyé pitit li, mouin minm Granmèt la mouin pap janm bliyé-ou. Bondié sé yon papa. Li di konsa si yon pitit mandé papa-l yon zé, papa-a pap ba-l yon skòpion; si pitit la mandé papa-a yon pouason, papa-a pap ba-l yon koulèv. Si yon papa sansib pou pitit li, Bondié pi sansib ankò pou nou (Lc 11, 11ss). Si nou mandé-l pin, li pap ba nou ròch (Lc 11, 11). Gin yon jij ki pa-t pè ni Bondié, ni lè-zòm, li ouè yon pòv vèv k-ap vi-n kasé tèt li chak jou ak yon késion jijman pou-l fè pou li, li pa okipé vèv la, min yon jou li di nan kè-l: pito-l fè jijman-an pou li, pou vèv sa-a sispann vi-n ap palé anpil nan tèt li. Jézu pran égzanp sa-a pou montré nou kijan pèsévérans sou tè-a avèk lòt moun parèy nou rivé réglé afè nou. Li ajouté: Bondié Papa-a pap tann nou kasé tèt li pou okipé afè nou pou nou. Sé yon léson sou lapriyé (Lc 18, 1-8).

Lapriyé mandé pasians: Pran pasians, pran pasians. Bondié Granmèt mouin, sou ou m-ap gadé, sou ou mouin konté, sou ou mouin mizé. Lè m-ap trakasé pou démin, ou di mouin pou-m viv jodi-a, pou-m gadé zouazo avèk flè yo Papa-ou fè. Lè m-ap travèsé sou lanmè, gro vag avèk van ap souké-m, ou proche koté-m, ou di mouin sé ou, pa pè. Bondié pa bliyé nou, Bondié pa lagé nou. Bondié sansib pou nou. Li konn tout problèm nou. Nou doué fè-l konfians. Pi bèl pòsion, Mari chouazi-l, yo pa gin doua ouété-l nan min-l. Pi bèl pòsion, Mari chouazi-l, yo pa gin doua janm ouété li nan min-l.

Psòm-Répons la (Ps 61 = 62) di nou: "sé nan Bondié sèlman pou-ou répozé, nanm mouin" (Ps 62, 2). Bondié sé kachèt, sé délivrans, sé protékcion, nou pa gin doua souké. Sé nan li pou nou répozé, sé nan li pasians nou yé, sékou nou, fòs nou, éspérans nou. Sé pou nou vidé kè nou dévan-l.

ÉSPÉRANS, sé kalité ki inpòtan pou lapriyè. Gin yon kantik yo rélé "Éspérans", ki fè divès sikonstans lavi nou déroulé dévan jé nou: Granmèt, tanpri vi-n poté mouin sékou, sé ou minm sèl ki kapab délivré-m, nan tout danjé k-ap vi-n ménasé-m. Sé koté-ou m-ap gadé, lè grangou maltrété-m; sé koté-ou m-ap gadé, lè souaf dékonpozé-m; sé koté-ou m-ap gadé, sé koté-ou m-ap rélé, sé koté-ou, sé koté-ou, sé koté-ou (cf Lc 12, 29). Lè Jézu t-ap lapriyè pou kont li yon koté, patizan-l yo té kité-l fi-n lapriyè; apré sa yo té mandé-l pou-l aprann yo lapriyè; sé lè sa-a Jézu té aprann yo lapriyè "Notre Père" la (Lc 11, 1ss): "Pin nou bézouin chak jou-a, ba nou li jodi-a" (Lc 11, 3), ni pin pou nanm nan, ni pin pou kò-a. Jézu di nou si yon moun nan kabann li, épi yon zanmi-l vi-n mandé-l toua pin pou-l bay yon moun ki fèk soti nan vouayaj, minm si li santi li pa t-a lévé pou-l ba li yo, l-ap lévé kan minm, pou zanmi-an pa kontinué ap frapé pòt la, pou-l pa révéyé tout moun nan kay la. Jézu di: Papa nou ki nan sièl la pap okipé tout konsidérasion sa yo pou-l ba nou sa nou mandé-l la (Lc 11, 5-8). Mandé, n-a jouinn; frapé, y-a louvri ba nou; si lafoua-ou gro tankou yon grinn zèb, ou-a ouè bèl mèvèy bouch pa kapab palé. Sé pou nou lapriyè avèk pèsévérans. Pèsévérans la sipozé lafoua.

Sé lafoua la Trè Sint Vièj ki fè li té jouinn sa-l té mandé nan nòs Kana-a. Jézu té ba-l yon répons ki t-a kapab dékourajé yon moun ki pa gin lafoua: "Sa sa-a yé pou ou minm ak mouin minm, Madanm, lè-m pa ko rivé" (Jn 2, 4). La Trè Sint Vièj viré kot patizan yo avèk lafoua: "Ninpòt ki sa li di nou, sé pou nou fè-l" (Jn 2, 5; cf 2, 1-11). Madanm nan ki té gin pitit fi-l la démon té kinbé-a nan réjion Tir ak Sidon-an, Jézu té ba-l répons ki pou té dékourajé-l si-l pa-t gin lafoua: "Yo pa doué jété pin pitit kay la bay ti chyin" (Mt 15, 26; Mc 7, 27). Li réponn: "Ti chyin kontanté yo manjé miyèt k-ap tonbé sot sou tab ti moun yo" (Mt 15, 27; Mc 7, 28). Jézu ba-l satisfaksion la minm. Madanm nan ki t-ap pèdi san dépi douzan-an, li proche dèyè Jézu, li touché ti pouint rad li avèk lafoua; la minm san-an tari (Lc 8, 43). Si nou gin lafoua grosè yon ti grinn zèb, n-a di mòn sa-a: déplasé, al jété-ou nan lanmè, l-ap obéyi nou. Sou lanmè-a, dlo ak van t-ap souké batiman Sin Piè-a; Apot yo pè, yo révéyé Granmèt la ki t-ap dòmi nan plas moun ki pou dirijé batiman-an, bò gouvènay la, sou kousin-nan. Jézu mandé yo koté lafoua yo yé. La minm li kòmandé ni van, ni lanmè, yo obéyi-l. Minm si l-ap dòmi, sé li minm k-ap dirijé batiman-an (Lc 8, 22-25). L-ap dòmi, min kè-l ap véyé (Ct 5, 2). Nou pa doué pè, nou pa doué ap di tankou nan premié léktu-a: "Granmèt la lagé-m" (Is 49, 14). Sé éséyé l-ap éséyé lafoua nou. Sint Térèz lanfan Jézu di sa: Bondié ap gadé jous nan ki pouin nou kapab rivé. Kapitèn nan ki té voyé chèché Jézu pou ti pitit la ki té malad la, li voyé moun dévan Jézu pou di-l li mèt di yon sèl paròl koté-l yé-a minm, ti pitit la ap géri. Jézu di li

pa janm jouinn yon lafoua kalité konsa nan Israèl. Lè moun yo tounin, yo jouinn ti pitit la géri (Lc 7, 10).

N-ap mandé Manman Mari pou-l ba nou konfians nan lapriyè nou, pou nanm nou pozé sou Granmèt la (Ps 62, 2). "Pin nou bézouin chak jou-a, ba nou li jodi-a". Pran pasians, pran pasians. Pi bèl pòsion, Mari chouazi-l, yo pa gin doua ouété-l nan min-l. Lamou Bondié gin pou nou ap diré tout tan gin tan. Granmèt, tanpri, vi-n poté mouin sékou. Mandé, n-a jouinn.

*

"Kòmansé chèché Ringn Bondié-a ak jistis li; tout bagay sa yo ap vi-n rivé pou nou an plis" (Mt 6,33; antienne 1^{ères} vèpres 8^{ème} d.o.).

Lè yon moun pou kont li, li chèché débrouyé-l. Li konnin li pa kapab konté sou pèsou. Li di nan kè-l: tout moun bliyé-l, minm moun ki résponsab li. Sa ba-l kè séré. Chak jou, lè-l lévé, premié lidé ki vi-n nan tèt li sé: kijan l-ap pasé jounin-an. Lévanjil la (Mt 6, 24-34) di nou pou nou komansé chèché Ringn Bondié-a ak jistis li, épi tout bagay sa yo ap rivé pou nou an plis (Mt 6, 33).

Lè Jézu té fè ladésant Bétani-an, Mat té résévoua-l, li t-ap trakasé kò-l pou-l konnin ki sa l-ap sèvi a-tab. Mari, sè Mat la, té chita byin trankil nan pié Jézu, li t-ap kouté paròl li. Mat di Jézu pou-l fè Mari ba-l yon kout-min. Jézu réponn li Mari chouazi pi bèl pòsion-an, yo pap ouété-l sot nan min-l (Lc 10, 31-42). Lè Pèp Israèl la té sot légzil, moun yo kòmansé rébati kay yo, yo pa okipé Tanp la ki té krazé-a; rajé t-ap pousé ladan-l. Bondié voyé Profèt Ajé avèk Zakari pou souké yo. Li fè yo lobsèvasion, poutèt chak moun té rét chita nan lakay li, ki byin bèl la, épi Kay Bondié-a vi-n tounin dépo fatra (Ag 1, 4). Li di yo sé pousa minm ki fè li pa voyé bénédiksion pou yo (Ag 1, 6). Li di yo Kay li-a krazé, épi chak moun ap okipé kay pa-l (Ag 1, 9). Li di yo sé pousa minm lapli-a pa tonbé, tè-a pa donnin (Ag 1, 10), séchrès kouvri tout péyi-a (Ag 1, 11).

Tout tè-a sé pou Bondié. Yo rézèvé yon éspas sakré yo rélé Tanp pou raplé sa. Sé pousa sé koté sa-a yo doué okipé anbéli anvan chak moun okipé pròp lakay pa-l. Tout tan-an sé pou Bondié. Yo rézèvé yon jou spésial yo rélé jou Granmèt la, pou fè sonjé sa. Sé pousa jou dimanch la sé pou yo respékté-l, tankou yo té konn respékté saba-a lontan. Léspas la pou Bondié, tan-an pou Bondié. Tanp la raplé léspas la, jou Granmèt la raplé tan-an. Dé dimansion sa yo ankadré légzistans nou. Yo raplé nou tout bagay sé pou Bondié. Sé li minm pou nou kòmansé sèvi an premié. Lè Sin Monfò té konn al fè mision yon koté, premié bagay li té konn fè, sé nétouyé chapèl la oubyin légliz la, pou rafreché sans sakré fidèl yo, pou-l raplé yo Bondié nan mitan yo, pou yo sonjé sa. Li té konn insisté tou pou yo respékté jou dimanch la. Koté-k té gin

maché jou sa-a, li fè yo sispann sa, li montré yo pou yo okipé afè Bondié anvan; Bondié a okipé afè pa yo. David té régrèt li té fi-n bati palè-l anvan-l sonjé bati yon Tanp pou Bondié. Li rélé Profèt Natan pou-l fè èskiz. Bondié pa fè régadan ak sa (2 Sm 7, 2ss). Bondié di-l sé pitit li Salomon k-ap okipé sa. Salomon bati Tanp la réyèlman vré, Kay lapriyè-a (1 R 8, 1-29; Lc 19, 46). Lè Mari ak Jozèf té pèdi Jézu-a, pandan toua jou, yo té chèché-l; yo té vi-n jouinn li nan Tanp la. Li té di yo pouki sa yo t-ap chèché-l la, si yo pa-konnin sé lakay Papa-l pou-l yé, sé afè Papa-l pou-l té okipé (Lc 2, 49). Profèt Malachi réproché moun yo poutèt yo vi-n poté sa yo pa bézouin bay Granmèt la (Mal 1, 8-14). Liv Lévitik ak Détéronom mandé pou yo ofri "prémices" yo bay Bondié, sa vlé di premié zépi blé-a, premié pòté mouton-an... Sé nan minm sans sa Égzòd ak Nonb palé tou (Dt 26, 2; Ex 13, 11s; 22, 28; 23, 19; 34, 26; Lv 2, 12.14; 23, 10.17; Dt 18, 4; Nb 18, 12; Ez 44, 30), paské tout bagay sé pou Bondié. Sé poua lévanjil la di pou komansé chèché Ringn Bondié ak Jistis li, épi tout bagay sa yo ap rivé pou nou an plis (Mt 6, 33).

Dòdinè nou pa okipé afè Bondié anvan, antan nou konprann sa ap jinnin afè pa nou. Okontrè sé lè sa-a afè pa nou ap maché pi byin. Bondié ouè nou fè-l konfians, antan nou okipé afè pa-l anvan. Li montré nou sa fè-l plézi antan-l okipé afè pa nou li minm minm. Épi li okipé-l pi byin pasé nou t-a kapab okipé-l nou minm minm. Bondié di nou nan premié Léktu-a li tankou yon manman ki pa kapab bliyé ti pitit ki sot nan zantray li (Is 49, 14-15). Lè tout Pèp la t-ap plinyin konsa, li t-ap di Bondié pa ouè démach li (Is 40, 27), Bondié réponn li sé pou yon ti moman tou kout li té kaché fas li, min kè-l sansib anpil pou li, mòn yo mèt rékilé, tè-a mèt tranblé, rinmin-l gin pou li-a pa gin doua souké (Is 54, 7-10).

Sou Koua-a Jézu di: "Bondié mouin, Bondié mouin, poukisa ou lagé mouin?" (Mt 27, 46; Ps 22, 2). Min tout-suit apré li di: "Papa, sé nan min-ou mouin rinnèt léspri-m" (Lc 23, 46; Ps 31, 6; cf Ac 7, 59). Dé paròl sa yo, sé lapriyè Psòm li t-ap résité nan sitiasion li t-ap viv la. Lè nou kouè Bondié lagé nou, nou résité Psòm ki kadré ak santiman sa yo ki nan kè nou-an. An mim tan nou doué pran Psòm konfians yo tou pou rémonté kouran-an. Psòm nan di: "Si papa-m ak manman-m abandoné-m, Granmèt la ap résévoua-m (Ps 27, 10; cf Jer 31, 20; Os 11, 8). Bondié gin zantray manman pou nou. Profèt Éli té rivé yon lè, li té dékourajé, li té minm mandé lanmò; li fi-n maché tout yon jounin ak tout yon nuit, nan yon savann, pou-l al nan diréksion mòn Sinayi. Li bouké, li grangou, li souaf, li kouché, li domi. Yon Anj révéyé-l, li ouè yon pin bò tèt li, ak yon krich dlo. Li manjé, li bouè, li domi. Lanj la révéyé-l ankò, li fè-l manjé, li fè-l bouè; apré sa li maché pandan karant jou ak karant nuit san-l pa bouké, jous li rivé nan mòn Sinayi (1 R 19,

1-8). Sé konsa Profèt la di: "Mouin té konprann sé pou granmési mouin t-ap fatigé kòm, sé pou van mouin t-ap déplouayé fòs mouin, époutan doua-m té kot Granmèt la, rékonpans mouin té kot Bondié-m" (Is 49, 4). Li di tou: jèn-jan yo bouké, yo pèdi fòs, yo bité, min moun ki konté sou Granmèt la, yo réfè fòs yo, yo volé tankou malfini, yo kouri san fòs yo pa fébli, yo maché san yo pa bouké (Ps 40, 10).

Jézu té ouè Apot yo té fatigé ap péché pouason tout nan nuit, san yo pa pran anyin. Li minm minm, li paré manjé pou yo, li invité yo vi-n manjé (Jn 21, 22). Li ouè y-ap ramé tout nan nuit san yo pa kapab avansé. Li proché, sou lanmè-a, li fè komsi l-ap dépasé yo, li fè yo rivé koté yo t-apralé-a (Jn 6, 21). Li ouè yo fi-n travay nan mision, yo tounin byin fatigé. Li invité yo répozé yon koté pou pèsòn pa déranjé yo (Mc 6, 31). Jézu okipé nou, paské li sansib pou nou (Mt 9, 36).

Dènié priyè litani laprovidans la di: "Bondié ki égzisté dépi tout tan é pou tout tan, ou minm ki pa réfizé voyé jé ou ki ouè tout bagay davans pou-ou kondui nou, malgré nou pa mérité sa, tanpri, fè nou favè, pou nou rinnèt ou kòz nou nèt, pandan n-ap viv sou tè-a k-ap pasé-a, pou nou kapab rivé jous nan byin sièl yo ki pap janm fini yo".

N-ap mandé Manman Mari pou-l ba nou konfians nan Bondié k-ap okipé tout ti détay lavi nou, pou nou minm nou kòmansé okipé Ringn li ak Jistis li, jan nou di nan lapriyè Pitit li-a té montré nou-an: "Sé pou yo rékonèt sé ou ki Roua" (Mt 6, 10), ni nan léspas la, ni nan tan-an, antan nou réspékté éspas sakré-a (légliz la), ak tan sakré-a (dimanch la).

*

* *

UITIÈM DIMANCH ÒDINÈ B

Rinmin-an fè lalou-a vi-n nouvo (Mc 2,18-22). Sé léspri laloua-a ki konté, sé pa lèt la, ki fèt pou mét konsians nou an-règ yon fason sou pa déyò. Sé anndan fon kè nou laloua-a ékri avèk léspri Bondié-a (2 Co 3,1-6; Jer 31,31ss; Ez 36,26ss).

Sé rinmin Bondié-a ki chanjé nou (Os 2,16-22), malgré nou minm nou infidèl, Bondié rété fidèl paské li pa kapab rénié pròp tèt pa-l (2 Tm 2,13). Li sé Rinmin ak kè sansib, li toujou prèt pou-l padonnin, tankou papa fè pou pitit li (Ps 103 = 102).

Laloua-a fèt pou moun nan, sé pa moun nan ki fèt pou laloua-a.

Sa mandé pou nou gin konfians nan Bondié, malgré tout mové chémin nou kapab pran, l-ap tann nou nan kalfou pi dévan. L-ap frapé nan pòt kè nou, joutan nou louvri (Ap 3,20; Ct 5,2; 2,10).

N-ap mandé Manman Mari pou nou gin konfians sa-a nan Bondié, pou nou dosil aléga léspri Sin-an, k-ap chanjé kè nou tou nèf.

*

* *

UITIÈM DIMANCH ÒDINÈ C

Nou pa douè présé jijé (Lc 6,39-45). Sé pou nou kitè kozé-a pasé nan pasoua (Si 27,4-7). Sé pou nou tann pié boua-a donnin frui pou nou ouè kalité-l (Ps 92= 91). Psòm-répons la di jous li vié, pié boua-a ap donnin frui toujou nan jadin Grammèt la.

Sin Pòl di pou nou tann Grammèt la k-ap mét sékrè yo déyò (1 Co 4,5).

Sé paròl moun nan k-ap sèvi balans jijman (Lc 6,45; Si 27,7), paské sé sa-k nan kè-l k-ap sot nan bouch li.

Nan mézi kè-a pròp paròl la ap kòrèk.

N-ap mandé Manman Mari pou nou kitè kè Grammèt la bat anndan fon kè nou, pou sé léspri-l ki palé nan bouch nou (Lc 21,15; Ac 5,10; Mc 13,10).

Nan lapriyè "Je vous salue, Marie"-a, nou di: "le fruit de vos entrailles est béni" (Lc 1,42). La Trè Sint Vièj Mari, sé pié boua-a. Jézu sé frui-a. Sin Monfò di si nou vlé konnin pié boua-a, sé pou nou égzaminé frui-l. Si nou vlé konnin la Trè Sint Vièj Mari, sé pou nou konsidéré Jézu avèk atansion.

N-ap mandé Manman Mari pou nou minm tou, nou donnin bèl frui sa-a, antan nou réalizé sa Sin Pòl di Galat yo, lè l-ap palé osijè frui léspri-a (Ga 5,22s): charité, kè kontan, kè pozé, pasians, sèvis, bon kè, konfians youn nan lòt, bon jan, réglé santiman nou.

*

* *

NÉVIÈM DIMANCH ÒDINÈ A

Lévanjil la palé sou kòmandman Granmèt la pou nou réalizé (Mt 7, 21-27). Tout kòmandman yo rasanblé nan yon sèl; sé rinmin-an (Rom 13, 8-10). Sé sou minm sijè kòmandman yo premié Léktu-a palé (Dt 11, 18.26-28), antan li mandé nou pou nou mété yo nan kè nou, nan nanm nou, pou nou pandié yo nan min nou, pou nou kolé yo sou fron nou. Sèlman, liv Détéronom nan di sa pa kont; sé pou nou réalizé sa yo mandé nou fè-a, pou nou jouinn bénédikcion-an; si nou pa réalizé-l, sé madichon k-ap rivé sou nou. Sé nan sans sa-a tou lévanjil la palé, lè Jézu di sé pa moun k-ap di-l "Granmèt, Granmèt", k-ap rivé nan péyi Roua sièl yo, sé moun ki fè volonté Papa-l (Mt 7, 22). Nan lapriyé "Notré Pè-a", nou di: "Sé pou volonté-ou fèt sou tè-a, tankou nan sièl la" (Mt 8, 10). Moun ki réalizé sa paròl Jézu yo déklaré-a, sé moun ki gin sajès, ki konn kijan ak ki koté l-ap bati kay li (Mt 7, 24). Sajès la bati kay li sou ròch (Pr 9, 1). Lapli mèt tonbé, lariviè mèt désann, van mèt souflé, fondasion-an solid. Psòm-répons la (Ps 30 = 31) palé osijè Ròch sa-a ki sèvi fondasion kay la, lè-l di nan réfrin-an: "Sé pou-ou sèvi-m yon RÒCH kachèt, Granmèt" (v. 3).

Palé sé youn, aji sé dé. Nou kapab tout lasint jounin ap préché paròl Granmèt la, tankou Jézu di nou nan lévanjil la (Mt 7, 22), san nou pa mété-l an-aplikasion. "Anpil moun ap di-m jou sa-a: "Granmèt, Granmèt, èské sé pa o non-ou nou té fè travay profèt, èské sé pa o non-ou nou té chasé démon, èské sé pa o non-ou nou té fè anpil mèvèy?" Lè sa-a m-ap déklaré yo: Mouin pa janm konnin nou; ralé kò nou sot sou mouin, nou minm k-ap fè péché-a" (Mt 7, 22-23). Yon Krétyin sé pa nésésèman yon moun ki konn sa ki nan labib, sé yon moun ki réalizé sa Granmèt la mandé. Ou kapab konnin tou sa k nan labib, ou kapab résité tout vèsè yo youn dèyè lòt, min ou-ap sèvi avèk yo pou-ou jouré lòt moun, époutan labib la minm di pou nou pa jouré (Mt 5, 22). Sa montré paròl Granmèt la rét nan léspri nou, li pa désann nan kè nou. La Trè Sint Vièj Mari té di lanj la konsa: "Sé pou sa fèt pou mouin jan ou déklaré-m nan" (Lc 1, 38). Minm lè-a l-al rann kouzi-n li Élizabèt sèvis an minm tan li vi-n poté Bon Nouvèl la ba li-a (Lc 1, 39ss). Sint Élizabèt di la Trè Sint Vièj Mari konsa: "Ou béni pasé tout fi, frui ki soti nan vant ou-a, li béni tou" (Lc 1, 42). Li fè sonjé sa liv Détéronòm nan té di (Dt 28, 1-4): "Si-ou obéyi lòd Granmèt la, Bondié-ou la, antan-ou obsèvé kòmandman-l yo mouin pasé-ou lòd jodi-a... ou-ap béni..., pitit ki soti nan vant ou-a ap béni...". Sin Pòl di l-ap maté kò-l, l-ap fè-l tounin ésklav, pou-l donté mové tandans li, pou lè-l fi-n préché lòt moun yo, li fi-n mété yo sou bon rout la, pou li minm minm li pa mérité yo mété-l déyò nan kous la, poutèt l-ap trin-

nin sou rout la. Sa fè nou sonjé pou nou lapriyé pou tout misionè k-ap préché Bòn Nouvèl la, pou yo kòmansé réalizé, yo minm an premié, sa y-ap aprann lòt moun yo sou paròl yo, pou yo pa mérité répròch Jézu té fè Farizyin yo: "Fè sa yo di; min pa fè sa yo fè" (Mt 23, 3).

Lè Jézu di: "Mouin pa janm konnin nou"-an (Mt 7, 23), sa fè nou ouè gin dé fason pou konnin yon moun: ou konnin-l avèk intéljans ou, ou konnin-l avèk kè-ou. Jézu konnin yo avèk intéljans li, min yo pa antré nan kè-l, akoz mové aksion y-ap fè, yo pa kadré konduit yo nan lòd Granmèt la, yo pa réglé lavi yo sou kòmandman-l yo. Sin Pòl di Korintyin yo: aktivité chak moun ap parèt klè nan jijman-an; li mandé pou nou fè atansyon sou ki fondasyon n-ap bati, si sé sou lajan, sou lò, sou bijou, sou boua, sou pay, sou fèy sèch (1 Co 3, 12), li di sé difé k-ap sèvi tankou pasoua pou ouè sa travay la ginyin kòm rézistans (1 Co 3, 13). Yon sèl fondasyon ki ginyin li di sé Jézu-Kri (1 Co 3, 11). Sé RÒCH sa-a ki solid, sa bès mason yo té jété yon koté-a, sé li minm ki asiré solidité tout kay la (1 p. 2, 7). Sé pa siksè aktivité nou ki parèt dévan jé lèzom Bondié anrèjistré sou kont nou nésèsèman. "Èské sé pa o non-ou nou té palé kòm profèt? Èské sé pa o non-ou nou té chasé démon? Èské sé pa o non-ou nou té fè mirak?" (Mt 7, 22). Sé pa sou sa Granmèt la ap jijé nou, sé sou kòmandman lacharité-a, sé sou réyalizasyon kòmandman-l yo nan kè nou (Mt 24, 31-46). Nou pa kapab répozé sou siksè nou, pou nou rété ap fè sa-k mal, épi pou nou konprann n-ap sovè kan minm: "Ralé kò nou sot sou mouin, nou minm k-ap fè sa-k mal la" (Mt 7, 23). Konsa nou pa kapab ap prezanté nou kòm patizan Granmèt la ak témouin-l sou pa déyò pou n-ap réglé dòt bagay sou pa anndan. Granmèt la pa dakò ak moun ki tièd (Ap 3, 18), l-ap réjété yo sot nan bouch li. Nou pa kapab sèvi dé mèt alafoua (Mt 6, 21; Lc 16, 13).

Gin pliziè kalité téréin koté paròl Bondié-a tonbé: gin bò rout la koté pié pilé-l, koté zouazo manjé-l; gin sou glasi-a, koté solèy séché-l; gin nan rajé-a, koté liann toufé-l; anfin gin nan bon tè-a, koté li donnin san mamit pou youn (Mc 4, 1-20). Bon tè-a sé paradi kè la Trè Sint Vièj ki té di: "Sé pou sa fèt pou mouin dapré paròl ou-a" (Lc 1, 38). Li pa kontanté di-l, li réglé konduit li sou paròl la minm, antan l-al rann Élizabèt sèvis, épi tout lavi-l vi-n tounin sèvis, sèvis nan nòs Kana (Jn 2, 1-11), sèvis pou Apot yo (Ac 1, 14), sèvis ki lou avèk chaj Koua-a (Jn 19, 25-27; Lc 2, 35). Li pran dènié plas la: "Granmèt la voyé jé-l sou sèvant li ki pòv" (Lc 1, 48).

Kantik Magnifikat la montré bédiksion ak malédiksion ki séparé pou dé kalité moun: sa-k aji byin yo ("li lévé sa ki pòv yo, li plin sa-k grangou yo ak byin" Lc 1, 52-53), épi sa-k aji mal yo ("li gayé sa k-ap gonflé kè yo, li jété profitè yo sot sou fotèy yo, li ranvouayé rich yo min vid" Lc 1, 51.52.53). Sé bédiksion ak malédiksion liv Détéronòm nan té palé nan

premié léktu lamès la (Dt 11, 26-28). Gin dé chémin: youn ap grinpé, sé sa k-ap minnin nan paradi-a; lòt la ap désann, sé sa k-ap kondui nan lanfè-a. Sé chémin difisil, ki séré-a, pou nou chouazi (Mt 7, 13-14).

Sé chémin Sajès la. N-ap mandé la Trè Sint Vièj Mari, Notré-Dam de la Sajès, pou-l kondui nou sou rout la, pou nou pa kouté avantaj kò nou ap mandé, pou nou aksépté fè-l tounin ésklav tankou Sin Pòl té fè, pou lè nou fi-n mété moun yo sou bon chémin, nou pa rét trinnin sou bò rout la, jous pou yo t-a mété nou déyò nan pèsion k-ap antré koté Bondié Roua-a (1 Co 9, 27).

*

* *

NÉVIÈM DIMANCH ÒDINÈ B

Laloua-a fèt pou moun, sé pa moun ki fèt pou laloua-a.

Jézu vi-n déklaré yon "année sabbatique" (Lc 4,19), sa vlé di yon tan koté Bondié fè favè (Is 49,8; 2 Co 6,2). Sé vré Saba-a sa, Répo Bondié, favè Bondié-a. Saba lansyin Téstaman-an sé yon sign vré Saba sa-a, jan Lèt Ébré yo éspliké-a.

Nou pa doué pi cho pasé Bondié pou défann laloua-a ki nan sèvis moun nan. Sé léspri Sin-an ki vré laloua-a. Sé Réziréksion Jézu-Kri-a ki vré Saba-a.

Sé li minm nou fété yon fason spésial chak dimanch, Jou Granmèt la, antan nou sispann fè gro travay, pou nou kapab "résipiré Bondié anndan Bondié" (Sin-Jan-d-la-Koua) pi byin, antan n-ap fè aprantisaj lavi sièl la dépi anba isit la, antan nou bay mouvman kè nou plis libèté pou-l réglé kadans li sou Kè Bondié li minm k-ap bat anndan kè nou, nan lapriyé nou.

N-ap mandé Manman Mari favè sa-a pou nou fè plis éfò Jou Dimanch pou nou aprann réspiré Bondié alèz.

*

* *

NÉVIÈM DIMANCH ÒDINÈ C

Chak foua n-ap konminié, paròl kapitèn Romin-an nou tandé nan lévanjil la monté nan bouch nou: "Granmèt, mouin pa mérité pou-ou antré lakay mouin, min di yon sèl paròl é nanm mouin va géri" (Lc 7,6; cf 7,7). Juif yo té fèk sot plédé kòz li kot Jézu, yo té di Jézu; "li mérité pou-ou fè-l favè-l sa-a (cf Mc 7,4), paské sé li minm ki bati kay-réyinion nou-an pou nou, li rinmin nasion nou-an" (ib). Époutan li minm sé pa sou sa-l fè li apuiyé pou-l égzijé Jézu fè-l favè-a. Yon favè toujou rété favè; otréman sé yon doua. Si nou fè bagay ki bon, sé pa achté nou achté lagras Bondié, sé dispozision nou mété nan kè nou pou résévoua favè Bondié-a pi byin. Bondié pa doué nou anyin. Nou sé pòv. Sé pou nou pran konsians sé pòv nou yé. Lè sa-a Bondié ap ba nou plis pasé sa nou mandé-l la.

Kapitèn Romin-an pa mét éspoua-l sou sa-l fè, min sou bon kè Jézu. Sé lafoua-l ki touché kè Jézu. Jézu di Juif yo: minm nan Israèl li pa jouinn kalité lafoua sa-a. Sé pousa dépi préské dé mil ané sé paròl kapitèn Romin sa-a n-ap di chak foua n-apral kominié, pou nou ralimin brèz difé lafoua nan kè nou. Kay-réyinion-an li té bati pou Juif yo, sé pou yo té kapab lapriyé Bondié ladan-l. Poutan li minm sé étranjé li yé. Romin yo voyé-l nan vil Kafanaòm pou-l fè lapolis, pou-l sivéyé lòd. Li minm olié li sèvi ak épé-l, ak zam pou touyé moun, pou-l domajé moun, pou fè moun pè, pou fè moun réspekté-l, sé ak pròp byin pa-l li sèvi pou-l bati kay-réyinion-an pou yo. Li pran ròl chèf li o-sérié. Li pa vi-n pou-l détrui, li vi-n pou-l bati. Ni sé pa ninpòt ki bagay li bati. Sé yon kay koté moun yo ap rankontré Bondié, koté youn ap rankontré lòt nan lansègman sakré ak nan lapriyé (cf Ac 2,42). Nan sans sa-a kapitèn Romin-an, sé yon vré pitit Abraam li yé (Mt 3,9), pitit lafoua papa nou Abraam. Bati youn sosiété pa fasil. Ou kapab sèvi ak anpil divès kalité mouayin, dapré sa-ou vlé pou sosiété-a réprézanté dévan jé-ou. Moun yo ki bati kay-ro Babèl la, yo pa-t bati-l pou lapriyé Bondié, okontré yo té bati-l pou yo té monté nan minm roté ak Bondié. Bondié défèt plan yo, li gayé langaj yo, kay la pa fini (Gn 11,1-9). Si Granmèt la pa bati kay la, sé pou bontan mason yo ap travay (Ps 127,1; cf Jn 1,3; 15,5; 21,3). Kapitèn Romin-an ki payin, li bati kay-réyinion, pou Juif yo kapab lapriyé Bondié Abraam nan, li pa sonjé intèrè pa-l, li pa sonjé intèrè péyi-l, li pa sonjé intèrè rélijion-l, li sonjé pa lòt yo. Ésklav li malad. Li voyé komision bay Jézu, pou Jézu vi-n géri-l, épi li voyé di-l li pa bézouin déplasé, li konnin ak lafoua-l Jézu kapab fè mirak sa-a antan-l byin louin. Sé pa minm pou pitit li oubyin pou fanmiy li oubyin pou moun ki sot nan minm ras, nan minm péyi avèk li li lapriyé Jézu-a, sé pou ésklav li. Sa montré kijan Kapitèn sa-a té gin bon

kè vré. Non sèlman li fè bati kay-réyinion pou Juif yo, min li fè kont démach pou-l ouè si l-a fè ésklav li vi-n jouinn santé.

Sé pa métié yon moun ap fè ki bon oubyin ki mové, sé nan kè chak moun bon santiman ak mové santiman kapab jèmin. Dévoua nou, sé raché mové zèb ki vlé pousé nan jadin kè nou, pou nou pa kité yo toufé bon sémans la-gras lavi Bondié Batèm nan dépozé nan nanm nou-an. Ninpòt ki plas ou-ap okipé nan sosiété-a, ou kapab fè dévoua-ou yon fason pou-l sèvi-ou machéskalié pou-ou monté nan sièl. Nan pouin étikèt yo kapab mété sou tèl métié oubyin sou tèl lòt. Chak moun gin plas nan sosiété-a. Chak moun avèk mouayin pa-l gin dévoua pou fè sosiété-a dévlopé nan sans pou péyi koté Bondié Roua-a instalé ladan-l. Ou gin moun ki nan sèvis ou, dévoua-ou sé trété-l yon fason pou-l ouè kè Bondié k-ap bat anndan fon kè-ou, nan ninpòt ki plas ou yé nan sosiété-a, ou té mèt gin zam léta nan min-ou pou-ou dé-fann lòd piblik. Kapitèn Romin-an trété ésklav la tankou pròp pitit li. Sin Pòl té voyé yon ti biyé bay Filémon pou Filémon té kapab fè ouété ésklav li-a li té mété nan prizon-an, sa yo té rélé Onézim nan (Phm 8,21). Sé pa paské sé ésklav li yé pou yo fè-l sibi pinision ki sévè. Pa gin pinision ki sèvi pou tiré vanjans ("peines vindicatives"). Ròl yon pinision sé pou korijé ("peines médicinales"; cf Is 40,2; 54,7ss; Os 2,8-9.16; 11,9; Ez 18,23.32; Sg 1,13s). Si moun nan déjà fi-n korijé, pa gin nésésité pou ap fè-l sibi pinision-an toujou, minm si yo té kalkilé yon tan ki pi long pou pinision sa-a.

Nan lapriyé kapitèn Romin-an fè-a, li pa kité mo "ésklav" la soti nan bouch li, lè l-ap palé osijè sèvitè-l ki malad la (Lc 7,7), li di: "di yon sèl paròl, **PITIT** mouin-an ap géri" (ὁ παῖς, "puer"). Sin Pòl té di Filémon pou-l té trété Onézim, ésklav li-a, tankou pròp pitit li. Lè Sin Pòl t-ap palé ak Filémon osijè Onézim, li di sé pròp kè-l Onézim yé (Phm 12). Konsa lè nou di "Granmèt, mouin pa mérité pou-ou antré lakay mouin, min di yon sèl paròl é nanm mouin va géri", nou sonjé ésklav kapitèn Romin-an, ki pròp Kè-l, pròp nanm li, pròp pitit li. Si mo "ésklav" la soti nan bouch li, lè l-ap voyé komision bay Jézu, sé pa antan l-ap palé sou sèvitè-l ki malad la, min sé lè l-ap fè konparézon an jénéral, pou-l montré pouvoua-l (Lc 7,8; δοῦλος -"servus"). Otréman sé anba plim Sin Luk k-ap rakonté istoua-a (Lc 7,2.3.10) nou konnin sé yon ésklav kapitèn Romin-an té ginyin ki malad. Tout ti détay sa yo montré nou dékalitès ki nan kè kapitèn Romin-an, tankou yon bèl flè roz ki fèk kòmansé ap louvri nan dévan-jou moua-d-mé, apré yon bon ti fréchè larouzé.

Gin fason pou trété moun, nan paròl ak nan aksion, ki montré bon santiman ou ginyin pou moun nan, ki fè moun nan alèz avèk ou, épi avèk pròp tèt pa-

l, li kapab lévé tèt li byin ro, malgré plas li ginyin nan sosiété-a. Li pa jinnin ni avèk lòt moun, ni avèk pròp tèt pa-l. Li ouè ou rékonèt ran-l kòm moun, sa yo rélé "**droits de l'homme**". Pou-n respékté doua moun nan ginyin kòm moun, fò-n rékonèt li sé pitit Bondié, sou minm ran avèk nou, sé frè-n ak sèn li yé, nou pa doué fè-l sa nou pa t-a vlé yo fè moun pa nou, ak nou minm (Mt 7,12; cf Pape Paul VI; "Les droits de l'Homme et la Paix", message pour la Journée de la Paix 1^{er} janvier 1969).

Si kapitèn Romin-an gin charité konsa, sé paské li gin umilité. Sin Pòl di Filipyin yo umilité-a sèvi kondision lacharité-a (Ph 2,2-3). Li mandé yo pou yo gin yon sèl amou, yon sèl nanm, yon sèl santiman, pou chak moun rékonèt lòt la sipériè pasé-l. Kapitèn Romin-an tèlman gin umilité, li pa sèlman di Jézu li pa mérité pou-l antré lakay li (Lc 7,6), min li ajouté li pa minm mérité pou-l al rankontré Jézu (Lc 7,7). Sé poutèt sa li voyé komision ba li. Otréman li t-a déplasé li minm pou-l al rankontré-l, si sé sèlman pou Jézu pa-t bézouin déranjé kò-l vi-n koté-l. Umilité sé kondision lacharité. Si kapitèn Romin-an gin tout kalité lacharité sa-a, sé paské li gin umilité. Li pa pran tèt li pou anyin, malgré grad ki sou zépòl li-a ak pouvoua ki nan min-nan, ak richès li ginyin yo, ak moun ki anba lòd li yo.

Otorité sé sèvis, sé pa néchèl monté dépasé rotè. Jodi-a sé ou, démin sé pétèt yon lòt. Baton kapab chanjé bout. Okinn grad pa doué dékontrolé nou. Sosiété-a pa kapab maché san chèf. Chèf la fèt pou-l pran dévan, li pa fèt pou-l monté anlè. Fò-l kondui sosiété-a, fò-l pa krazé-l. Èsklav kapitèn Romin-an té préské mouri. Nou konprann démach kapitèn nan, si-l té rinmin-l anpil, jan Sin Luk di-a (Lc 7,2). Lè gin moun nan sèvis nou, nou doué chèché sékou pou yo, pou kèsion santé yo. Nou pa doué bliyé tou, avèk kò-a ki bézouin santé-a, gin léspri-a ki bézouin édikasion, pou yo aprann li, ékri, aprann métié, pou yo kapab débouyé yo pita nan lavi-a, épi tou sitou gin nanm nan ki bézouin nouriti ak rémèd, sé pou nou ba yo tan ak okazion pou y-al lamès, pou y-al résévoua sakréman, pou y-al tandé prèch k-ap chanjé fon kè yo. Yo pa la pou fè tout kalité kòvé, minm jou dimanch. Fò nanm yo kapab réspiré tou. Vré Tanp Bondié-a sé nan kè yo li yé. Nou pa doué krazé Tanp sa-a, antan nou mété yo nan okazion fè péché (1 Co 6,19; 3,16).

Moun kapitèn Romin-an té voyé komision kot Jézu-a, sé zanmi-l yo té yé (Lc 7,6). Malgré li gin otorité, li gin zanmi. Dòdinè, lè yon moun rivé chèf, li pèdi tout zanmi-l, yo pa gin konfians nan li ankò, yo pa konsidéré-l tankou égal-égo avèk yo, yo pè pou-l pa trayi yo, pou-l pa travèsé nan lòt kan-an, paské anpil moun konprann gin dé kan: yon kan chèf ak yon kan moun ki pa chèf. Sé yon mové kalkil. Sé pa rélasyon fòs ki pou kontrolé mach yon so-

siété. Yon moun ki gin otorité doué gin zanmi ki kapab di-l lavérité, pou fè-l maché pi douat si l-ap pran chémin ki trò long oubyin ki trò rèd, oubyin si l-ap maché trò vit pou ésoouflé rès group la, ki pa gin minm kadans ak li (Gn 33,13; Is 40,11). Sé zanmi-l yo ki kapab édé-l rét chèf jan pou-l yé-a. Otréman pap gin rélasion onèt ankò ant li minm ak rès foul la. Tèt la ap fè yon bò, kò-a ap fè yon lòt bò.

Kapitèn Romin-an pa-t nan minm ras ak Juif yo. Époutan Juif yo té zanmi-l. Vré lapè-a pa gin frontiè. Li rinmin nasion Juif yo (Lc 7,5). Gin moun, sé péyi yo sèlman yo konnin. Époutan jou lapankot la, Léspri-Sin té fè tout nasion yo konprann langaj Apot yo (Ac 2,6). Péché Babèl la korijé (Gn 11,9). Lè Roua Salomon té bati Tanp la, li té lapriyé pou étranjé yo té kapab rékonèt non Bondié pou yo vi-n lapriyé-l nan Tanp la, pou-l réponn priyé yo, jan nou tandé nan premié Léktu-a (1 R 8,41-43). Nan lévanjil la nou ouè démann sa-a réalizé. Pa gin ni Juif, ni Grèk, ni ésklav, ni moun lib ankò, sé lafoua ki fè tout moun vi-n pitit Abraam (Gn 3,28; R 10,12; 1 Co 12,13; Col 3,11). Sé lévanjil sa-a minm Sin Pòl maché préché tou patou. Nan dézièm léktu-a, li raplé Galat yo sa. Sé pa sa nou fè an-règ avèk laloua Juif la ki pou pézé nan balans la. Sé lafoua-a ki konté. Li trouvé dròl Galat yo gin tan lagé lévanjil sa-a li té préché ba yo-a, pou yo kité fo-profèt ap vi-n troublé nanm yo (Ga 1,1-10). Li mandé yo pou yo fè atansion fo-profèt yo. N-ap mandé Manman Mari pou-l aprann nou mét konfians nou nan lagras Bondié, nan bon kè-l, pou nou pa apuiyé sou sa nou fè kòm yon doua n-ap mét dévan pou Bondié fè kat volonté nou, min pou nou louvri kè nou, pou nou rékonèt nou pa anyin ni dévan Bondié, ni dévan lézòm, pou nou plin ak charité, pou nou chèché ouè sa lòt yo bézouin, pou nou édé yo, pou nou bliyé intèrè pa nou, intèrè group nou, intèrè sèl péyi nou, pou nou gadé nan kat diréksion koté tout moun sé frè ak sè nou, nan ninpòt ki kondision sosyal li yé, nan ninpòt ki péyi li soti, nan ninpòt ki rélijion li yé.

Kè Jézu louvri pou-l montré fon kè Papa-a (Jn 19,34; cf 14,9). Kè Mari louvri ak épé sa-a Siméyon té anonsé-l la dépi lè-l t-ap ofri Jézu nan Tanp la (Lc 2,35). Jézu palé ak vèv Nayim nan, pou konsolé-l. Li di-l: "**Pa kriyé**" (Lc 7,13), tankou Bondié t-ap konsolé pèp an-égzil la (Is 51,12; 40,1; 54,8-10; 43,1-7), li t-ap di-l: "Pa kriyé, siyé dlo nan jé-ou (Jer 31,16). Sin Piè té kriyé apré fot li-a (Lc 22,62). Jézu vi-n konsolé-l apré rézireksion-an (Jn 21,15-17). Nan pouin péché ki trò lou pou Bondié. Li chajé tout sou do Pitit li-a nan Koua-a, tankou Abraam té chajé pakèt boua-a sou do pitit li Izaak la (Gn 22,6; Jn 19,17). N-ap mandé Manman Mari pou-l ba nou konfians nan Kè pitit li Jézu, ki louvri tankou pòt sièl la, ki fè ouè fon kè Papa-l: kè sansib, pitié, padon, rinmin (cf Gn 3,24; Is 60,11; Ac 21,25). N-ap mandé-l pou

nou minm tou nou louvri kè nou tou gran, pou nou sansib nan soufrans frè
ak sè nou, pou nou konsolé yo nan lapinn yo, pou nou édé yo nan tout bé-
zouin yo.

*

* *

PRÉMIÉ DIMANCH KARÈM A

Karèm louvri. Sé tan fò nan ané-a. An 1984, Pap Jan-Pòl II té voyé yon lèt sou tout fas tè-a sou sans Soufrans Krétyin-an. Sé akoz péché-a soufrans la rivé sou tè-a avèk lanmò-a. Soufrans la propté nou, an minm tan tout soufrans la réalizé nan kò nou sa-k manké nan soufrans Jézu-Kri yo pou Kò li ki légliz la, dapré sa Sin Pòl di-a (Col 1, 24). Lè n-ap souffri nou pa doué koué nésésèman sé paské nou fè kichòy n-ap péyé, tankou Apot yo té mandé Jézu osijè avèg la, si sé li minm ki fè péché oubyin paran-l yo ki fè li fèt tou avèg la (Jn 9, 2). Jòb té inosan. Malgré sa li té ouè kijan li t-ap souffri. Li pa-t kapab jouinn éplikasion sou sa. Nan istoua Révélation-an nan labib la, sé byin ta pèp Israèl la vi-n jouinn sans soufrans la. Sé lè pèp la nan égzil péyi Babilòn Profèt yo montré-l Sèvitè Granmèt la k-ap souffri pou lòt moun (Is 52, 13-53, 12). Jézu bay égzanp. Tout soufrans nou sé nan sakrifis pa-l la y-ap monté kot Bondié, pou Bondié aksépté yo kòm sakrifis ki gin valè. Soufrans nou kapab sèvi pénitans pou nou, yo kapab sèvi tou kòm priyé pou dèt moun ki byin bézouin, soua yo sou tè-a, soua yo déjà mourir. Konsa nou pa doué babiè lè n-ap souffri antan nou konprann sé Bondié k-ap maltréte nou. Bondié pa-t fè soufrans. Sé péché-a ki lakoz soufrans ak lanmò, akoz lanvi diab la (Sg 2, 23s). Nou minm n-ap fè sa sèvi tankou baro néchèl pou nou monté kot Granmèt la, ni nou minm, ni dèt moun.

Jézu kòmansé lavi piblik li, antan li pasé karant jou san-l pa manjé, san-l pa bouè; li t-ap préparé mision-l nan dézè-a, paské sé pèp Israèl la li vi-n ranplasé, pèp sa-a ki té pasé karantan nan savann nan ap éséyé Granmèt la (Ps 95, 10), ap mandé manjé dapré giz li-a, ap plinyin pou dlo-a ki té anmè-a, ap sèvi zidòl, pandan Moyiz ki t-ap kondui-l la té monté sou mòn Sinayi-a al lapriyé pandan karant jou ak karant nuit, minm jan Jézu fè-a (cf Ex 15, 22; 17, 7; 32, 1-34, 35). Jézu sé nouvo Pèp Israèl la. Sé li minm ki réalizé vré mision pèp la. Osito apré batèm li nan dlo Joudin-an li plonjé nan dézè-a, minm jan pèp Israèl la osito apré pasaj nan lanmè Rouj la té plonjé nan dézè-a pou karantan jous li antré nan péyi Bondié té promèt la. Jézu ap antré nan vré péyi Bondié promèt la, nan paradi-a, l-ap di bon laron-an: "Jodi-a minm ou-ap avèk mouin nan Paradi-a" (Lc 23, 43). Lè-l antré, sé nou tout li fè antré avèk li. Dépi jou nou batizé nou vi-n tounin manb kò li. Sé poussa chak nuit Pak nou réfè déklarasion promès batèm nou. Nou rénonse diab la, nou chouazi Bondié, nou déklaré lafoua nou nan la Trinité, nan linkanasion, nan larédanmsion, nan légliz, antan nou répasé tout mèvèy sakré ki ranmasé nan vérité Krédo-a.

Karèm nan sé tan pou nou kòmansé préparé bèl jès sa-a n-ap réfè nan nuit Pak la, ki gin tankou dé fas: yon fas ki bay sou lanvè-a, sé rénonné Satan-an, épi yon fas ki bay sou landouat la: sé chouazi Bondié. Sèké nou pa kapab sèvi dé mèt alafoua. Tan karèm nan ap raplé nou souvan kijan nou doué batay sou rout la, nou pa doué instalé, djab la tou pré, l-ap fè lavironn pou-l chèché kilès l-ap dévoré. Sé pou nou rézizté-l fèm nan lafoua (1 p. 5, 8s). Li pousé lodas li jous pou-l al éseyé Jézu nan tantasion nan dézè-a, sé pa nou minm li pa t-a tanté. Épi lè Jézu fi-n pousé-l alé, li tounin nan nuit Jétsémani-an ankò, lè tan fènoua yo rivé (Lc 4, 13). Konsa sé tout tan nou blijé ap véyé, paské Satan pati lè nou rézizté-l, min sé fòs li l-al réfè pou-l tounin pi bandi pasé nan kòmansman (Mt 12, 43ss; Lc 11, 24ss). Li sèvi ak anpil taktik. Li karésé, li ménasé, li promèt, li fè pè. Sé nou minm ki pou véyé. Prémié léktu-a montré kijan dépi nan kòmansman li sé papa manti (Jn 8, 44), jan-l pran Èv nan pièj la (Gn 3, 5). Li pa janm di bagay yo jan yo yé-a. Li té byin konnin sé yon sèl kalité pié boua Bondié té défann Adan ak Èv manjé, nan tout pié boua yo. Min li vlé antré nan konvèsasion avèk Èv, sé pou sa li ba-l yon manti, li di konsa: pouki sa Bondié défann li manjé nan tout pié boua yo ki nan jadin-an. Èv antré nan palé avèk li pou-l di bagay la jan-l yé-a. Sé sa minm pou Èv pa-t fè. Sé méprizé pou-ou méprizé Satan, pa joué avèk tantasion l-ap prézanté nou, pa joué avèk imajinasion nou, lè-l prézanté pòtré dévan jé nou pou nou kapab tonbé nan péché. Lè nou tandé moun k-ap palé mové konvèsasion, pa rét koté yo, kité group moun yo. Pa rét ap fè plézantri ki gin doub sans, pa ri nan plézantri ki sal. Mo yo antré nan zorèy nou, yo rét chita sou kè nou, apré sa, lè nou pou kont nou, y-ap tounin ankò fè nou sonjé yo la, mandé nou sa n-ap fè avèk yo. Pa pèdi tan nou ap kalkilé bagay konsa. Sonjé prézans Bondié nan nanm nou. Sin Pòl di nou kò nou sé Tanp léspri Sin-an. Moun ki sal kay Bondié-a, l-ap péyé sa (1 Co 5, 19; 1 Th 4, 6). Fè atansion pou nou pa fè ti moun piti tonbé nan péché avèk konduit nou, avèk paròl nou, avèk jès nou (Mt 18, 5ss). Kè yo sé yon ti flè ki frajil; pa kité gro van défréchi-l. Sé yon ti flanm difé ki fèk limin; pa kité tanpèt étinn li; okontrè, sé pou nou protéjé-l.

Tan karèm nan invité nou fè yon ti éfò nan rélasyon nou ginyin avèk lòt moun yo, pou nou montré plis charité. Charité-a tou sé yon fòm pénitans li yé. Tout moun pa gin minm karaktè. Ginyin ki éklaté tankou yon alimèt k-ap froté sou bouat alimèt. Ginyin ki sonninn tankou kòd gita ou touché ak yon ti douèt. Gin dòt ki siséptib, lè ou-ap palé fò ou fè atansion ki fason ou-ap adrésé-ou avèk yo, ki sa ou-ap di. Ginyin yo pa konn kouté, sé palé sèlman tout tan y-ap palé, sa fè tankou dé moun soud k-ap palé san youn pa konprann sa lòt ap di. Ti Yòt ak Nana, dé moun soud ki rankontré: Ti Yòt gin yon panié mango sou tèt li; Nana di-l konsa: "Bonjou Ti Yòt". Li réponn:

"Toua pou dis". Nana di: "É kò-a?". Li réponn: "Dé pou sink". Nana di: "Malé oui". Li réponn: "Fò-m t-a fou". Ti Yòt té konprann Nana t-ap mandé-l achté mango yo, épi li t-ap fè jis pri. Sé konsa nan rélasyon nou avèk prochin yo, gin anpil kont ki kapab déklaré akoz tripotaj, yon pakèt "yo di" ki pa gin okinn fondman, sé tankou pòs radio k-ap joué, épi gin loraj nan lè-a, radio-a ap fè krak krak ap anpéché nou pran nouvèl avèk mizik la. Sé pou nou sonjé Jézu-Kri vi-n mété lapè nan tout nasion ak nan tout moun. Rékonsiliation-an avèk pénitans la, fò nou sonjé-l pandan tan Karèm nan yon fason spésial. N-a fè yon ti éfò pou nou sipòté lòt yo avèk tout défo yo, minm jan Jézu sipòté nou avèk tout défo nou. Sèké nou minm tou, lòt yo blijé sipòté nou.

Avèk tou sa, pénitans la épi rékonsiliation-an, sé pou nou ajouté lapriyé. Tan Karèm nan sé yon tan ki rézèvé pou lapriyé pi plis pasé lòt tan yo, pou nou rankontré Bondié nan fon kè nou, pou nou préparé rankont Pak la.

Pénitans, charité, lapriyé, pa bliyé toua pouin sa yo. N-ap mandé Manman Mari pou-l drésé yo tankou toua ròch difé, pou-l pozé bonb nan: Pénitans, rékonsiliation, lapriyé.

Lapriyé fè nou santi plis égzijans dévoua nou vizavi Bondié. Lacharité fè nou santi pi plis égzijans dévoua nou vizavi prochin nou. Lapénitans fè nou santi pi plis égzijans dévoua nou vizavi nou minm. Sé nan jouinti rélasyon sa yo n-ap fè yon "grésé-séré" yon fason spésial pandan tan Karèm nan.

*

"Sé pa ak pin sèlman moun viv, min ak tout paròl ki soti nan bouch Bondié" (Mt 4,4: antienne 1ères vêpres 1^{er} dim car). Nan éplikasion Psòm yo, Sint Ogustin profité montré kijan nan Jézu-Kri sé nou tout ki sibi tantasion-an, min tou sé nou tout ki ranpòté laviktoua-a (Expl. Ps 60, 2-3: CCL 39, 766; cf Liturgia Horaru, II, Vatican 1974, 66-68). Li di nou Jézu chanjé nou nan li minm, lè-l té vlé Satan éséyé-l la. Nan li sé nou minm Satan t-ap éséyé, paské Jézu-Kri pran chè nou, nou minm nou jouinn délivrans nan li; li pran lanmò nou, nou jouinn lavi nan li, li pran afron nou, nou minm nou jouinn konsidération nan li; konsa li pran tantasion nou, nou minm nou jouinn laviktoua nan li. Si djab la éséyé nou nan li, nan li nou ranpòté laviktoua sou djab la. Sint Ogustin di nou nou konsidéré kijan djab la éséyé Jézu, sé vré; min nou pa fè atansyon kijan Jézu ranpòté laviktoua-a.

Minm jan nou konnin nou sibi tantasion nan li-a, konsa tou nou doué konnin nou ranpòté laviktoua nan li. Li di Jézu t-a kapab anpéché djab la tanté-l. Min, si-l pa-t kite-l tanté-l, li pa t-ap aprann nou ranpòté laviktoua sou li, lè-l tanté nou. Gin yon chanté nou abitué chanté nan finisman chémin-d-Koua, sé: "Victoire, tu règneras, ô Croix, tu nous sauveras!". Lakoua-a sé pa yon échèk, sé yon viktoua. Tout karèm nan, sé yon: "marche victorieuse".

Nan lavi spirituèl nou, yo palé dé "ascèse": sé yon batay koté n-ap mét disiplin nan sans nou pou nou sivéyé atak lènmi-an. Réfrin Magnifikat dézièm vèp prémié dimanch karèm nan di: "Véyé sou nou, ou minm ki égzisté tout tan, ki sové nou, pou sila-a ki gin riz la, k-ap éséyé nou-an li pa mét min sou nou, paské sé ou minm k-ap poté nou sékou tout tan". Sin Pòl ba nou konsign sou zam k-ap sèvi nou nan batay sa-a, pou nou rézisté manèv djab la (Ep 6, 11). Li di sé pa kont moun nou gin pou nou batay (Ep 6, 12), sé kont pouvoua k-ap kòmandé nan fènoua yo, kont léspri Mal yo ki abité nan lè-a. Li di nou pou nou mété zam Bondié sou nou pou nou rézisté, épi lè nou fi-n instalé tout bagay an plas, sé pou nou rété fèm (Ep 6, 13). Konsa li di nou fò nou rété kanpé avèk Vérité-a tankou yon sinti nan tay nou (Ep 6, 14), jistis la tankou yon chémiz an kui pou protéjé pouatri-n nou (Ep 6,14), aktivité pou simin lévanjil lapè-a tankou sandal nan pié nou (Ep 6, 15), lafoua-a tankou zam pou paré kou nan min nou, pou nou étinn flann difé Satan ap voyé kont nou (Ep 6, 16), kask délivrans la nan tèt nou, épé léspri-a, sa vlé di Paròl Bondié-a nan bouch nou (Ep 6, 17). Sé zam nou sa pou batay la. Laviktoua-a déjà fi-n réalizé nan Tèt la, Jézu-Kri, dépi jou Vandrédi-Sin-an. Nou minm ki manb yo, sé pou nou batay pou nou jouinn pòsion pa nou nan laviktoua sa-a. Sé poua tan karèm nan la. Dépi nan dènié soupé-a, asouè Jédi-Sin-an, Jézu té di Apot yo: "Kouraj, mouin ranpòté laviktoua sou tè-a" (Jn 16, 33). Jijman tè-a déjà fèt; Chèf tè-a, yo jété-l déyo (Jn 12, 31). Jézu té ouè Satan ap tonbé sot nan sièl tankou zéklè (Lc 10, 18). Dépi-l té komansé ap chasé démon yo, yo té konn ap plinyin: "Pouki sa ou vi-n pou-ou maltrété nou anvan tan-an?" (Mt 8, 29). Liv Apokalips montré kijan Akanj Michèl avèk Anj li yo chaviré Satan avèk Anj pa-l yo sou tè-a (Ap 14, 9). Sin Jan ouè kijan Anj la pran yon gro chinn nan min-l, li donté djab la sou fòm dragon-an, Sèpan lontan-an, Satan-an, li mété-l nan chinn, li jété-l nan trou-a, li fèmin-l ak klé, li pozé sélé sou li (Ap 20, 1-3). Jézu té di sé ak douèt Bondié, ak léspri Bondié, li chasé démon yo (Mt 12, 28; Lc 11, 20). Dépi nan prémié tansion Satan té fè lèzom sibi-a, Bondié té déklaré-l Manman nan ak Pitit li t-ap ranpòté laviktoua sou li, antan yo t-ap krazé tèt li (Gn 3, 15). Chèf tè sa-a pa gin okinn pouvoua sou Jézu (Jn 14, 30). Minm jan Jézu té fi-n ranpòté laviktoua sou Satan-an, konsa tou, nou minm nou ranpòté laviktoua sou li. Sin Jan di: "Mouin ékri nou, jèn jan, paské nou fò, Paròl Bondié-a abité nan nou, nou ranpòté laviktoua sou Sila-a ki Mové-a" (1 Jn 2, 14).

Sèlman toutotan n-ap viv sou tè sa-a, nou gin pou nou suiv konsign Sin Piè ba nou-an, li di nou Satan ap fè lavironn nou tankou yon lion k-ap chèchè dévoré (1 p. 5, 8; cf Lc 22, 31-38). Li mandé nou pou nou rézisté-l fèm nan lafoua (1 p. 5, 9). Liv Tobi-a montré nou kijan Akanj Rafayèl pran démon-an, li maré-l, pou-l fè-l sispansé Sara (Tob 8, 3). Lanj la té fè Tobi

mété fous pouason-an sou brèz difé lansan-an (Tob 8, 2). Sant la toufé démon-an, li sovè. Légliz gin anpil fòm lapriyè ak sa yo rélé "sacramentaux", pou chasé démon. Yon sinp sign dé Koua fè-l pati byin louin. Dlo bénit chasé-l. Lansan béni mété-l déyò. Chandèl béni fè-l pa kapab proché. Priyè an silans yo rélé "oraison" fè-l kouri. Li gin abitud fè konmsi li pa la, pou-l kapab trakasé moun pi byin, antan-l aji nan fènoua. Yon Krétyin pa doué pè-l, paské Jézu-Kri déjà fi-n ranpòtè laviktoua sou li, kòm Tèt légliz la. Nou minm ki manb yo, nou gin pou nou patisipé nan laviktoua sa-a. Dépi mèkrédi-sann jous Vandrédi-Sin, sé tankou yon chémin-d-Koua n-ap fè, yon "marche victorieuse", pou nou kontinuyé fè-l fi-n bay téréin-an nèt. Li kontinuyé ap tanté Jézu toujou nan manb li yo, ak minm tantasion sa yo li té tanté-l la: "Fè ròch sa yo vi-n tounin pin" (Mt 4, 3). Jézu té réponn li: moun pa viv sèlman ak pin min ak tout paròl ki soti nan bouch Bondié (Mt 4, 4). Sé konsa Jézu té di Apot yo: "Mouin gin pou-m manjé yon manjé nou pa konnin... Manjé-m sé fè volonté Sila-a ki voyé-m nan, épi pou-m fi-n réalizé travay li-a nèt (Jn 4, 32.34). Nou kapab gin tantasion chèché travay pou manjé k-ap gaté-a, tankou fowl la nan dézè-a, ki té tandé Jézu di-l: "Pa travay pou manjé k-ap gaté-a, min travay pou manjé k-ap diré pou lavi ki pap janm fini-an" (Jn 6, 27). Jézu té vlé fè yo sonjé istoua Pèp la nan savann nan, lè-l t-ap trakasé Moyiz pou lama-n nan (Ex 16, 20). Profèt Izayi té déjà amòsé lansègman sa-a, lè-l té di pou nou achté gratis pin k-ap pasé grangou, antan nou kouté Granmèt la pou nou kapab manjé sa ki bon-an (Is 51, 2). Sé konsa liv Provèb yo di: "Vi-n manjé pin-m nan" (Pr 9, 3). Konsa tou liv Ékléziastik la di: "Moun ki manjé-m ap anvi-m ankò" (Si 24, 21).

Nou kapab gin tandans travay pou bati yon sosisété sou baz frajil, paské nou bliyé sou tè sa-a, sé pasé n-ap pasé (1 Co 7, 31), nou pa gin kay ki rélé nou chè-mèt, chè-mètrès (Lc 9, 58). Vré prinsip yo sé lévanjil la ki ba nou yo ak léktu lévanjil la légliz la fè pou nou apati lansègman Apòt yo té transmèt li épi li minm li kinbé byin fidèl nan Tradision-l.

N-ap mandé Manman Mari pou nou rézisté mòd kalité tantasion sa yo k-ap ménasé nou, minm jan yo té déjà flaté Adan ak Èv, yo té chèché éséyé Jézu-Kri, y-ap kontinuyé pran chans pou fè nou glisé. Jézu fi-n ranpòtè LAVIKTOUA. N-ap maché avèk li nan trionf li.

*

* *

PRÉMIÉ DIMANCH KARÈM B

Apré lapli, lè-ou gadé sièl la, gin dé fousa ou ouè yon ak-an-sièl. Yon "ak"; sé yon zam ki sèvi pou tiré flèch. Époutan, ak-an-sièl la, Bondié mété-l kòm sign **lapè**. Sé sign **kontra** li pasé ak Noé.

Kontra sa-a, sé rékonsiliation avèk tout tè-a minm jan tout tè-a té nan lapè nan paradi-a. Adan t-ap viv nan mitan tout bèt sovaj yo, san okinn méchansté ni kè soté pa-t prezanté (Gn 1,19s; Is 11,6ss). Sé konsa, Jézu nan savann nan, pandan karant jou, ap viv ansanm ak bèt sovaj yo (Mc 1,13), rékonsiliation kontra-a réfèt gras a Jézu, nouvo Adan-an.

Gin pliziè kalité fòm kontra Bondié té pasé, min sa k-ap pi inpòtan nan yo tout la, sé kontra batèm nan. Chak fousa Bondié ap pasé kontra avèk nou, li pran yon moun ki sèvi-l intèmediè. Sé Adan, sé Noé, sé Abraam, sé Moyiz, épi finalman sé Jézu-Kri li minm minm, pròp Pitit li-a. Avèk Adan, sé lòd Bondié pasé-l pou-l pa manjé nan pié boua konésans byin ak mal la, épi nan pié boua lavi-a (Gn 2,17; 3,22). Avèk Noé, sé ak-an-sièl la Bondié montré-l kòm sign kontra-a pou rékonsilié tout bagay la, jan nou li nan prémié léktu-a (Gn 9,8-15). Avèk Abraam sé sikonsizion-an ki sèvi sign kontra-a pou montré Bondié chouazi pèp li-a (Gn 17,10). Avèk Moyiz sé Mouton Pak la k-ap sign kontra-a pou délivrans pèp la (Ex 12,1-14). Avèk Jézu-Kri li minm, sign kontra-a avèk kontra sa-a minm, li pap dèt bagay pasé **BATÈM** nan li minm minm.

Tout karèm nan ap invité nou réfléchi sou Batèm sa-a, nouvo kontra-a. Si yo palé nou sou délij la jodi-a, sé yon amòs, pou kòmansé fè nou sonjé kontra nou ginyin kòm Pitit Bondié, gras a batèm nan ki nétouayé fèt nou. Sin Piè sot di nou, nan dézièm léktu-a (1 p. 3,18-22), délij la avèk ach Noé-a réprézanté Batèm nan. Sé lè Jézu fi-n batizé, lè-l fi-n tandé voua Papa-a di-l "Ou sé Pitit mouin-an, sa-m rinmin-an, nan ou mouin jouinn plézi mouin" (Mc 1,11), paròl rékonsiliation sa yo Bondié Papa-a di Jézu pou nou tout la, sé lè sa-a, Jézu pati nan savann nan, sou diréksion léspri Sin-an pandan karant jou. Papa-a palé, Pitit la kouté; léspri-a pousé-l. Sé toua Pèsòn ki yon sèl Bondié-a. Nou batizé o non Papa-a ak Pitit la ak léspri Sin-an. Lè Jézu fi-n pasé karant jou sa yo nan savann nan, l-apral travèsé lariviè Joudin-an ankò, pou-l antré nan péyi Lapalésti-n nan. Sé lè sa-a l-apral komansé préché, jan nou li nan lévanjil la (Mc 1,12-15): "Tan-an rivé. Péyi koté Bondié Roua-a tout pré. Chanjé konduit, sé pou nou kouè nan Bon Nouvèl la". Lariviè Joudin-an li sot travèsé-a, sé minm jès Jozué té fè, pou-l té fè pèp Bondié-a antré nan Tè Promiz la apré karantan li té sot pasé nan savann nan. Lè sa-a Jozué té réfè sikonsizion pou tout pèp la. Sé Jézu, nouvo Jozué-a,

k-ap kondui nou pou-l fè nou antré nan vré péyi Bondié té promèt la, nan sièl la. Sikonsizion l-ap réfè pou nou-an, sé sikonsizion kè-a, pou nou louvri anvlop kè nou (Dt 10,16; 30,6; Jer 4,4; 9,25; 31,33), pou nou pa fèmin kè nou di (Ps 95,8; He 3,7), pou nou chanjé santiman, pou nou fè yon konvèsion. Sé invitasion Karèm nan, pou nou kapab viv lagras batèm nou-an pi byin. Batèm nan, sé kòmansman chémin lakoua-a. Lè Jézu fi-n batizé, li kòmansé maché jous li rivé sou Gòlgota. Yon fouinn pèsè kè-l. Dlo ak san koulé (Jn 19,34). Sakréman Batèm ak sakréman Kò ak San Jézu-Kri-a. Sé pou nou kité anvlop kè nou chiré tou pou nou vi-n tounin yon moun nouvo. Jézu invité nou fè yon konvèsion, yon chanjman santiman, pou lagras Batèm nou-an kapab donnin frui pou nou, pou kontra Bondié pasé avèk nou-an antan li sé Papa, nou sé Pitit, pou kontra sa-a kapab dévlo pé. Si kontra Batèm nou-an sou-dévol pé, sé paské nou pa pratiké sa yo rélé sikonsizion kè-a, sa vlé di konvèsion-an. Sé nou tout ki bézouin konvèsion. Toujou gin kichòy nan nou ki pa fi-n trò bon. Chak moun gin yon grinn zanno kay òfèv. Sé tout tan pou n-ap pasé katapoli nan jouinti kontra batèm nan, pou angrénaj yo pa fi-n bloké, pou lè nou gin pou-n monté mòn sièl la, bièl pa koulé, diféran sièl pa kasé, pou chaf la pa fè klòdòp, klòdòp, grrrr..... (tout moun désann machi-n nan). Sé tout tan pou n-ap vidé gazoli-n nan tank kontra batèm nan, pou motè-a pa rivé yon lè li pran pann sèch, pou Tè Bondié té promèt la pa fè nou filalang tankou sa té rivé Moyiz poutèt lafaoua li té manké-a. Granmèt la monté avèk Moyiz sou tèt mòn Nebo-a. Li montré Tè Promiz la dé louin. Épi li di-l konsa: "Gadé, ou ouè tè sa-a. Ébyin, ouè ou-a ouè. Ou pap antré ladan-l" (Dt 34,4).

Lafoua-a sé katapoli pou jouinti kontra Batèm nan. Lafoua-a, sé luil pou motè kontra batèm nan. Lafoua-a sé gazoli-n pou tank kontra Batèm nan. Si nou gin lafoua grosè yon ti grinn jijiri, n-ap di mòn nan déplasé, l-ap déplasé vré (Mc 11,22), anyin pa kap fè nou ditò. Sé nan Jézu-Kri pou nou rézisté djab la k-ap chèché kasé élan nou-an (1P 5,9). Li éséyé Jézu, jan-l té éséyé Adan-an. Adan tonbé, nou tout nou tonbé ansanm avèk li (Gn 3,1-24). Jézu kanpé, nou tout nou kanpé ansanm avèk li. Okontrè, sé Satan ki tonbé (Lc 10,18). Lè tout kolòn Satan yo vi-n proche kòt Jézu, Jézu mandé "Ki moun n-ap chèché?" Yo réponn "Jézu moun Nazarèt la". Kon Jézu di "sé mouin", la minm yo tout rékilé, yo tonbé sou do (Jn 18,6). Nan Apokalilis 12,7-12, nou ouè kijan yo dégringolé tankou fèy boua nan tanpèt. A Lourd, yon ti kout-jé la Trè Sint Vièj Mari ba yo, yo kouri anba tè-a al kaché, antan yo plonjé nan lariviè Gav la. Yo minm yo fè déklarasion bay Sin Dominik ki t-ap fè yon "exorcisme" pou-l chasé yo sot nan yon moun, yo di: "Tout Sin nan sièl yo ansanm t-a mèt kanpé dévan nou, yo pap fè nou pè.

Min kanta pou sa-a yo rélé "Marièt" la (yo pè nònmin non "Marie", l-ap boulé po bouch yo), yon ti kout-jé li bay, yon ti souf li, sa fè tout lanfè-a tranblé" (cf Secret admirable du Très Saint Rosaire, 104: OC p. 350-351). Mari sé yon madanm ki gin lafoua; Mari sé kay-batiman nouvo kontra-a; Mari sé sézisman démon yo. Mari sé li minm k-ap édé nou viv kontra Batèm nan nan lafoua, pou nou rézisté dévan ménas Satan. "L-ap krazé tèt ou" (Gn 3,15), sé sa Bondié té di Satan nan paradi-a. "Ou béni pasé tout fi, épi frui zantray ou-a béni tou" (Lc 1,42), sé sa Élizabèt di la Trè Sint Vièj Mari, apré viktoua lafoua-l la sou Satan-an. Élizabèt ajouté: "Sé chans pou sila-a ki té koué sa Granmèt la té di-l la t-ap réalizé vré" (Lc 1,45). Viktoua lafoua. "Ou béni plis pasé tout fi", sé konpliman sa-a yo té fè pou Yaèl, madanm sa-a ki té krazé tèt roua Sizra ki té réprésanté chèf lènmi pèp Bondié-a (Jg 5,24). "L-ap krazé tèt ou". Viktoua lafoua. "Ou béni plis pasé tout fi, konpliman tou pou Granmèt la ki voyé-ou pou krazé tèt chèf lènmi nou yo" (Jdt 13,18). Sé konpliman sa-a yo fè pou Judit, madanm sa-a ki té sot koupé tèt jénéral Olofèn nan ki té réprésanté chèf lènmi pèp Bondié-a "L-ap krazé tèt ou". Viktoua lafoua. "Ou-ap béni..., frui ki sot nan vant ou-a ap béni tou..." (Dt 28,3-4). Sé bédiksyon sa-a ki nan chapit vintuit liv Détéronòm nan pou moun ki respékté kontra Granmèt la, avèk lafoua. Kilès moun sa-a? Ou béni plis pasé tout fi épi frui zantray ou-a béni tou". Mari, madanm ki gin lafoua. Mari, kay-batiman nouvo kontra-a; Mari sézisman démon yo. Sé kontra lafoua-a ki krazé tèt Satan. "Rézisté-l fèm nan lafoua" (1 p. 5,9).

"Konpliman pou ou nan pami tout fi, épi konpliman tou pou frui zantray ou-a, Jézu". Minm bédiksyon-an pou manman-an ak pou Pitit la, paské yo ranpòté minm viktoua-a kont Satan, minm jan Adan ak Èv té sibi minm défèt la anba zépon Satan-an. Nouvo Adan-an ak Nouvo Èv la patispé nan minm viktoua kont Satan ak léspri Mal yo. Lè Satan ap éséyé nou, pou-l fè nou fébli nan lafoua-a, pou machi-n kontra batèm nou-an kalé, sonjé sa Sin Bèna té di "Respice Stellam, voca Mariam... Gadé zétoual la, rélé Mari". Lè Satan ap invité nou pilé kontra Batèm nan, pou nou sèvi-l, pou-l souadizan géri nou, pou-l souadizan fè nou jouinn yon plas oubyin kinbé plas nou, pou-l souadizan fè nou gin plis lajan, plis pouvoua, plis jouisans, "Respice Stellam, voca Mariam.. fiksé zétoual la, rélé Mari". Lè Satan ap invité nou kité rélijyon kontra Batèm nou-an, pou nou pran ambasad kont mové zè, pou nou kité yon souadizan sipèstision pou tonbé nan yon lòt, "Respice Stellam, voca Mariam...konsidéré zétoual la, rélé Mari". Nòtre-Dam, Rèn dé la Pè, sé pou-l fè nou viv kontra batèm nou-an ak kè pozé. Kontra kè pozé. Koté ki gin kè soté, sé Satan k-ap chèché troublé nou, pou-l toudi nou, pou-l tòdié

kou nou, pou-l kap valé nou pi byin, paské sé nan dlo sal, l-al lapèch. Si Jézu té guin kè séré, sé pou nou kapab gin kè laché. Si Jézu pran lanmò nou, sé pou-l té kapab ba nou lavi li. Sonjé nou sé manb Kò Jézu-Kri. Sé kontra Batèm nou-an. Kontra **lafoua**. Ak-an-sièl la nan niaj la, sé rékonsiliation ant Bondié ak nou minm. Sé kontra batèm nou-an. Kontra **kè-pozé**. **Lafoua** kontra Batèm nou-an. Sé li minm k-ap fè nou maché sou chemin karèm nan avèk **kè-pozé** kontra Batèm nou-an. Sé **kè-pozé** sa-a pou Granmèt la ba nou nan tout problèm nou! Min, koté kabouèt la kolé nan labou-a lè manké **lafoua** sonjé non bèf yo: "Respice Stellam, voca Mariam...gadé Zétoual la byin, rélé **MARI**".

*

"Léspri-a pousé-l nan savann nan" (Mc 1,12). Tankou yon batiman sou lanmè, ki pa kapab rézisté fòs van-an, sé konsa Jézu al nan savann nan ak fòs léspri Sin-an. L-al batay kont léspri Satan. Dépi yon moun konfirmé, ou lagé nan batay. Léspri ou résévoua-a pa kapab toléré prezans mové léspri-a koté-l jouinn li, fò-l chasé-l. É sé ak ou l-ap sèvi pou sa. Nan yon tanpèt sou lanmè, batiman koté Sin Pòl té yé-a pa-t kapab rézisté fòs van yo, li t-ap glisé sou dlo-a, san yo pa kapab kontrolé-l (Ac 27,15-17), konsa lè léspri Sin-an sézi yon moun, li fè sa-l vlé avèk ou, yon foua ou pa ba-l bariè (Ac 16,6-7). Kado yo li mété nan nanm nou-an, sé tankou antèn pou fè nou vi-n pi sansib nan afè Bondié. Li kòm akòdé nou ak Bondié, ak travay Bondié. Li ba nou sèt kado: sé Sajès-intélijans, fòs-konsèy, sians-piété, krint Granmèt la. Sèt kado sa yo sé tankou landouat rad la. Paské gin sèt péché kapito ki nan rasi-n pié boua nou-an, k-ap éséyé kòmandé nou pou nou aji kont lintansion Bondié. Sèt kado sa yo ap batay kont yo. Sin Monfò di nou konsa nou gin logèy tankou bèt yo rélé "paon"-an. Sin Fransoua-d-Sal minm di nou konsa : Lè "paon"-an ap fè lògèy li louvri ké-l tankou yon évantay, épi li dézabiyé prop tèt li. Sé prémié péché kapito-a, logèy. Sin Monfò di nou nou rinmin kolé kò nou sou lajan tankou kalmason ki kolé kò-l sou tè-a. Sé dézièm péché kapito-a, lavariss. Sin Monfò di nou konsa: Nou gin mové panchan nan sans kò nou tankou bouk kabrit k-ap chèché fè plézi lachè-a sèlman tout tan: sé touazièm péché kapito-a la lukzur. Sin Monfò di nou gin lanvi tankou krapo k-ap gonflé pou-l vi-n grosè yon bèf, joutan-l éklaté: sé katriyèm péché kapito-a: lanvi. Sin Monfò di nou nou gin lidé sou manjé tankou kochon, k-ap manjé tou sa-k pi pa pròp, yon foua li kontanté plin vant li: sé sinkiyèm péché kapito-a: la goumandiz. Sin Monfò di nou: nou tout tan ap fè kòlè tankou tig ki toujou prèt pou-l lonjé grif li sou ou, minm si-l pa grangou, minm si-ou pa fè-l

anyin. Sé pikan rouj k-ap vòltijé sou ou kon solèy cho, apèn ou pasé koté-l: sé sizièm péché kapito-a: la kolè. Sin Monfò di nou: nou parésé tankou tòti, k-ap chofé solèy, k-ap déplasé ti pa, ti pa: sé sètièm péché kapito-a: la parès.

Dévan katalog péché sa yo (Rom 1, 29-31; Gal 5,20-21) ki fè nou vi-n tou-nin tankou bèt yo, gin sèt kado léspri Sin-an k-ap fè nou lévé nanm nou roté sièl la, pou nou pran alignman sou fason Bondié aji li minm (Gal 5,22-26; Eph 5,9; 2Co 6,6; 1Tim 4,12; 2P 1,5-7; 2Co 13,4-7). Lè n-ap aji sé Bondié k-ap aji nan nou. Sé kado Sajès: prémié kado-a; intéljans: dézièm kado-a; konsèy: touazièm kado-a; Fòs: katyèm kado-a; Sians: sinkièm kado-a; Piété: sizièm kado-a; Krint Bondié: sètièm kado-a. Gin yon batay ant sèt kado sa yo ak sèt péché kapito yo. Sin Pòl di nou konsa: Mouin ouè sa pou-m fè, min mouin pa fè-l. Mouin ouè sa pou-m pa fè, min mouin fè-l. Ala malè pou mouin, kilès ki t-a délivré-m sot anban kò lanmò sa-a? (Rom 7,14-15). Sin Pòl di gin tankou yon pikan ki kolé nan pié-l, yon anj Satan ki t-ap souflété-l. Toua foua li mandé Granmèt la pou-l délivré-l anba pikan sa-a. Granmèt la di-l konsa: Favè-m kont ou. Paské fòs mouin sé nan féblès li déplouayé-l (2 Cor 12,7-9). Sin Pòl aksépté batay la. Yon krétyin sé yon moun ki aksépté batay pou-l donté pròp mové tandans li. Sé pa kont lòt moun yo pou-l batay min sé kont li minm minm (Ep 6,12). Sin Pòl di konsa: Mouin fè kò-m tounin ésklav pou-m aprann li batay, pou lè-m fi-n bay lòt yo bon konsèy, mouin pa pédi batay la bò koté pa-m (1 Cor 9,27; cf Ph 3,13). Sin Pòl pasé kont ti mizè-l. Sou lanmè li manké nouayé konbyin foua. Yo arété-l, yo bat li. Li grangou, li manké rad, li pa konn sa k-ap tann li nan landmin. Malgré tou sa li kinbé fèm san-l pa chèché mét asirans li sou lèzòm min nan Bondié sèl (2Cor 11,23-29). Li di: M-ap réalizé nan kò-m sa-k manké nan soufrans Jézu-Kri yo pou Kò li ki légliz la (Col 1,24).

Tan karèm nan invité nou fè pénitans, réalizé nan kò nou sa-k manké nan soufrans Jézu-Kri pou Kò li ki légliz la. An 1982 Pap Jan-Pòl II té voyé yon mèsaj Karèm ba nou koté li té di nou tan karèm nan sé yon tan spésyal pou chanjé fason n-ap viv, pou nou fè pénitans, pou nou aprann séparé sa nou ginyin ak lòt moun yo, ni sa-k pré nou ni sa-k louin nou, minm si nou pa gin anpil, pou nou bay. Bay piti pa chich. An 1989 li insisté pi plis ankò sou sa, antan li mandé nou pou mét tèt nou ansanm pou dérasinin koz "grangou sou tè-a". Li dévlopé prémié démann dézièm pati "Notre-Pè-a" ki di "pin nou bézouin chak jou-a, ba nou li jodi-a", li di sé vré sé pa ak pin sèlman moun viv min ak paròl ki soti nan bouch Bondié, min Jézu té bay pin nan dézè-a, paské li nésésè sou tè-a pou viv, sé pou nou panché sou bézouin lòt yo. Gin moun ki fè lapriyè sa-a ak trankilité, ak konfians, min gin lòt sé nan rèl kè séré ak soufrans, gin réjion sou tè-a chak sètèn périòd fiks gran-

gou rétonnin tankou bagay k-ap fè lavironn; sou tè-a gin anpil progrè ki fèt nan lasians, min li t-a bon tou pou solidarité ant lèzom fè progrè an minn tan, non sèlman pou nou bay moun ki bézouin yo konkou nou, min tou pou nou édé yo jouinn indépandans yo sou plan sa-a nan sa yo rélé "autosuffisance alimentaire", an-atandan sé pou nou laji tab nou pou nou invité sa-k pi piti yo ak sa-k pi fèb yo, pou yon jou nou tout kapab patisipé nan résépsion Sièl la. Tan Karèm nan sé yon tan pou nou sispann ap chèché batay ak lòt moun, antan n-ap insisté tròp sou réfléksion, sou déklarasion, sou protèstasion. Sa inpotan, sé vré, min sé pou nou dépasé nivo sa-a, pou nou vi-n pòv ak moun ki pòv la, égzilé ak moun ki égzilé-a, pou nou soufri injistis ak moun k-ap soufri injistis la, pou nou vi-n tounin moun vini ansanm ak moun vini-an. Konsa, n-ap vi-n pi pré moun k-ap soufri yo, tankou Bon Samaritin-an ki panché sou li atè-a pou-l ranmasé-l. Pap Jan-Pòl II té louvri pòt sa-a pou nou an 1982. Li té di nou: vré Samaritin sa-a, sé Jézu-Kri li minn minn. Sé li minn ki rabésé tèt li, antan-l pa kinbé égalité li té ginyin ak Bondié Papa-a, li vi-n tankou yon moun, li mouri kon yon ésklav sou Koua-a. Pap la té mandé nou pou nou kité égozis nou, pou nou kité tandans nou nou ginyin pou nou kolé kò nou tròp sou byin nou yo, pou nou aprann séparé. Li té di nou sé vré chémin sa-a k-ap libéré nou tout bon. Lòt libérasion yo, sé anpil paròl nan bouch, yo pa réalisé anyin ki profon. Sé lavé min, siyé atè.

Pénitans, konvèsion, sé pa yon chémin ki tris, min sé yon chémin k-ap libéré nou tout bon vré nan tan Karèm nan. Léspri Sin-an fè nou vi-n lib. Sin Pòl té ésklav léspri Sin-an. Sé pou sa li té lib parapò a tout kalité bariè li té kapab rankontré sou rout li (1 Th 2,4). Gin moun ki soua dizan ap chèché libérasion. Min chémin yo pran-an, sé chémin ki bloké yo, paské sé chémin lagè, sé chémin rayisans, sé chémin divizion. Sé travay djab la y-ap fè. Sé pa travay léspri Sin-an. Mo djab la, sé yon mo grèk ki vlé di séparé, divizé, katiyé. Léspri Sin-an sé léspri **kè-pozé**. Jézu di: Sé chans pou moun k-ap chèché fè ringn kè pozé-a rivé, paské y-ap rélé yo pitit Bondié. Apré lakonfimasion, lè nou fi-n maké ak mak léspri Sin-an, lè nou fi-n résévoua kado Bondié-a (Jn 4,10), yo anbrasé nou, yo di nou "**Kè-pozé** Jézu-Kri avèk nou", nou réponn: amèn. Sé tout yon program sa yé nan lavi nou. Koté léspri Sin-an yé, la sé rinmin ak kè pozé, sé fréchè, sé konsolasion, sé limiè. Sé pou nou aprann viv byin ak tout moun, minn sa k-ap chèché fè nou lapinn. Sé pou nou pa chèché tiré vanjans sou lòt, pou sa yo fè nou. Pran modèl sou Jézu. Li padonnin, nou minn tou sé pou nou aprann padonnin (1 p. 2,21-24). Sou Koua-a li di: "Papa padonnin yo, paské yo pa konnin sa y-ap fè" (Lc 23,24). Non sèlman li mandé padon pou yo, min li chèché éskizé

yo: "yo pa konnin sa y-ap fè" (Aelred, Speculo caritatis, 3,5 PL 195, 582). Li viré kot asasin-an ki té mandé-l yon ti plas nan péyi koté l-ap Roua-a: "Jodi-a minm ou-ap avèk mouin nan Paradi-a" (Lc 23,42). Sé li minm ki té komansé séri prèch li yo antan-l té di: "Moman-an rivé bout yo, Ringn Bondié-a la, chanjé fason n-ap viv, kouè nan lévanjil la" (Mc 1,15).

Lafoua-a gin égzijans. Égzijans li, sé rinmin. Si lafoua-a pa kondui nan rinmin (Gal 5,6), sé yon pié boua ki pa donnin frui. Sin Jak di nou konsa: Nan lanfè-a démon yo kouè, min y-ap tranblé. Lafoua yo-a chèch, li pa donnin lacharité (Jc 2,14-26). Lafoua-a gin égzijans. Égzijans lafoua-a sé **rinmin**. Rinmin-an li minm tou li plin ak éspoua. Sin Pòl di nou: rinmin-an kouè tout bagay, li sipòté tout bagay, li éspéré tout bagay (1 Co 13,7). Lafoua-a apiyé sou sa-k pasé déja: Jézu-Kri ki lévé byin vivan. Lésperans la ap gadé sou sa-k gin pou-l vini-an: Ringn Bondié-a. Lacharité-a okipé sa-k prézan la-a: Rinmin Bondié-a, rinmin frè nou.

Sé sou lacharité-a Bondié ap jijé nou. Mouin té grangou, nou té ban-m manjé; mouin té souaf, nou té ban-m bouè; mouin té nan prizon, nou té vizité-m; mouin té malad, nou té vi-n pran souin-m; mouin té ni-kò, nou té abiyé-m; mouin té étranjé, nou té résévoua-m (cf Mt 25,31-46). Moun k-ap préché rayisans, sé lènmi lévanjil la yo yé, sé yon lòt lévanjil y-ap préché (Gal 1,6). Sin Pòl di nou konsa: sé pou chak moun fè atansyon nan fason l-ap bati, si-l bati sou pay, sou zèb, sou lajan, sou lò, travay li ap parèt klè nan dènié jou-a. Difé-a ap fè ouè ki rézistans travay la ginyin, li minm l-ap sové, min sé tankou antan l-ap pasé nan difé (1 Cor 3,10-15). Nou pa bézouin tann dènié jou-a pou nou nétouayé santiman nou. Nou pa bézouin tann sé difé Pigatoua-a ki pou pròpté nou. Karèm nan sé yon tan favè spécial pou nou fè nétouayaj sa-a. Sé tan pou nou libéré anba tout léspri divizion. Sé tan pou nou chèché fè plis sèvis lacharité. Pran modèl sou la Trè Sint Vièj Mari. Apen li tandé palé sou kouzi-n li Élizabet ki gin si moua grosès, li pati byin vit al édé-l joustan Jan-Batis fèt (Lc 1,36-56). Léspri Sin-an ki té nan kè-l la té ba-l fòs pou-l sèvi-l témouin (Lc 1,35). Nou minm tou nou résévoua fòs léspri Sin-an, sé pou-l fè nou sèvi-l témouin, antan yo ouè kijan lacharité-l la ap souflé nou tout fason pou nou aji avèk frè nou yo, pou nou pa bézouin tann yo mandé nou yon sèvis anvan nou fè-l, min pou nou toujou paré pou rann yo sèvis kon nou ouè bézouin yo, tankou la Trè Sint Vièj nan nòs Kana (Jn 2,1-5). Li ouè pa gin divin ankò, li di Jézu: yo pa gin divin. Sé lafoua-l ki fè Jézu fè mirak la, paské Jézu té fi-n di yo lè-l pa ko rivé.

Lévanjil la (Mc 1,12-15) di nou: "Jézu rivé nan Galilé, l-ap **préché** lévanjil Bondié-a, l-ap di: "Moman-an rivé; Ringn Bondié-a proché: fè pénitans, kouè nan lévanjil la" (Mc 1,14-15). Sin Piè di nou nan prémié Léktu-a: apré Jézu fi-n mouri sou Koua-a, li té désann al préché léspri yo ki té nan prizon yo, yo minm ki té réfizé **kouè** lontan, lè moun yo t-ap tann pasians Bondié nan tan Noé-a, lè-l t-ap bati ach la (1P 3,18-22). Li éspliké nou: lè sa-a sé yon ti kras moun ki té sovè nan dlo-a, an tou uit moun sèlman; li di: délij sa-a, sé sign Batèm nan, k-ap pròpté konsians nou gras a Réziréksion Jézu-Kri-a. Nou antré nan karèm nan. Mo karèm nan, sa vlé di "karant". Pandan karant jou, n-ap réviv pèlerinaj Pèp Bondié-a té fè nan savann nan pandan karantan-an. N-ap sonjé karant jou Jézu té pasé nan savann nan, n-ap raplé nou karant jou ak karant nuit dlo sièl la t-ap tonbé sou tè-a sou tan Noé-a, ki raplé nou **BATÈM** nan. Pandan tout tan Karèm nan, n-ap rafréchi lansègnman Batèm nan, joutan nan nuit Pak la, nou réfè promès Batèm nou dévan Kiré parouas nou, avèk chandèl nou limin nan min nou. Prémié léktu-a palé nou sou sign kontra Bondié ékri nan sièl la, ak-an-sièl la, apré délij la (Gn 9,8-25). Batèm nan sé yon kontra Bondié pasé avèk nou, antan-l plonjé nou nan lanmò ak réziréksion Pitit li Jézu-Kri sé yon kontra k-ap diré pou tout tan. Ak-an-sièl la nan niaj la, sé tankou yon avan-gou kolòn difé-a nan niaj la k-ap kondui Pèp Bondié-a, apré pasaj lanmè rouj la, nan savann nan. Sé sign prézans spésial Bondié.

Nan prémié dimanch Karèm sa-a, nou ouè Jézu nan mitan bèt sovaj yo nan savann nan (Mc 1,13), tankou Noé nan ach la té avèk bèt sovaj yo (Gn 7,8), tankou Adan nan Paradi-a té avèk bèt sovaj yo (Gn 2,19), tankou Profèt Izayi di nou osijè Mési-a nan dènié tan-an (Is 11,6ss), koté ti moun ap mét min sou trou koulèv méchan, koté yon ti gason ap kondui ni bèf ni lion an-sanm, koté sé lapè ki ginyin, nan yon nouvo kréyasyon. Min lapè Jézu vi-n poté pou tout tè-a, sé nan san-l l-ap signin-l, sou Koua-a, pou-l rékonsilié sièl la ak tè-a. An-atandan, nou ouè-l nan savann nan, pandan karant jou ak karant nuit, ap sibi pèsékision Satan, k-ap éséyé-l sou tout fòm. Min an minm tan tou, nou ouè Anj Bondié yo k-ap sèvi-l. Sé toujou konsa: pandan Satan ap dékòdé, Bon-anj yo ap kòdé. Légliz la ap avansé nan pèlerinaj li-a nan pami pèsékision tè-a ak konsolasion Bondié yo (St Augustin, De Civitate Dei, XVIII, 51: CCL 48, 650, cf Redemptoris Mater 25, edition Vatican 1987, page 52). Sé pou rézon sa-a nou pa doué pè atak Satan, paské jan Psòm nan di-a, Granmèt la pasé Mésajé-l yo lòd pou yo poté-ou sou bra, pou pié-ou pa frapé sou okinn ròch nan chémin (Ps 91,11 = 90,11). Sin Pòl di: si Bondié pou nou, kilès ki kapab kont nou (Rm 8,31).

Nan dézè-a Jézu t-ap préparé mision-l, minm jan nan Karèm nan, n-ap préparé Pak. Karèm nan, sé tan **PÉNITANS**. Nou tandé nan prèch Jézu fè-a, li di: "Moman-an rivé, Ringn Bondié-a proche, fè **pénitans**, kouè nan lévanjil la" (Mc 1,15). Mo "pénitans" la fè nou pè, paské nou konsidéré anpil aksion ki mandé gro éfò, ki kapab jinnin santé nou, k-ap frinnin libèté nou, k-ap mét bariè sou chémin nou san nou pa ouè pouki rézon, paské nou pa anvizajé sa ti pénitans nou kapab ajouté sou sakrifis Jézu fi-n ofri bay Papa-l sou Koua-a yon foua pou tout déja. Époutan, Jézu sé Tèt Légliz la, nou minm nou sé Kò-a. Sé pou manb yo konplété nan yo minm sa-k manké nan souffrans Jézu pou Kò-l, pou Légliz la, dapré sa Sin Pòl di Kolosyin yo (Col 1,24). Sé pa kichòy nou ajouté an plis tankou ki soti nan yon lòt sakrifis, min sé anndan minm sakrifis Jézu kontinuyé ap ofri Papa-l la nou mété ti pa nou-an, nou glisé-l tou dousman avèk délikatès (cf Jn 4,38: εἰσεληλύθατε), pou nou kapab résévoua bénéfis mérit pa-l yo pi byin. Sé nan sans sa-a légliz invité nou fè sakrifis pandan tan Karèm nan. Gin dé jou sèlman nou blijé fè jèn épi pa manjé viann: sé mèkrédi sann avèk vandrédi-sin. Lòt jou yo, sé chak moun ki konnin nan ki fason la fè kichòy ki mandé-l yon ti éfò, pou donté mové panchan kò-l pi plis. Gin moun sé nan palé-a y-ap blijé fè plis éfò; sèké gin moun ki rinmin palé anpil; gin moun ki fézè-d-kont, gin moun ki rinmin fè ti tripotaj; tou sa k-ap pasé, fò yo chèché konnin, fo yo chèché rapòte; y-ap antré nan tou sa-k pa gadé yo kòm si san yo anyin pa kapab maché. Y-ap gin yon ti éfò pou yo fè sou pouin sa-a. An minm tan y-ap fè éfò sa-a pou yo fè pénitans, y-ap fè yon ak-dé-charité tou pou prochinan-an y-ap kité trankil la, y-ap sispann kasé sik sou do-l la, y-ap sispann sal répitasyon-l la. Tout pénitans nou fè, sé lanvè yon rad, ki gin landouat li; landouat la, sé lacharité-a. Minm jan lè nou fè sakrifis antan nou sispann fimin kèk pòch sigarèt pandan tout tan karèm nan, nou fè yo éfò sou tandans nou nou donté, min an minm tan, lajan nou mét akoté-a ki pou t-a achté sigarèt sa yo, nou kapab séparé-l ak moun ki nan bézouin yo. Tout pénitans dirijé nan sans lacharité. Épi gin yon lòt dimansion tou nan pénitans la, sé lapriyé. Lè nou fè éfò pou nou donté mové panchan nou, nou vi-n pi lib pou nou kité nanm nou réspiré Bondié anndan Bondié (cf Sin Jan-d-la-Koua: Lapriye = aspirer Dieu en Dieu) yon fason pi alèz, san nou pa jinnin réspirasion sa-a antan n-ap étènié, n-ap touselé, n-ap bayé... Nou tankou yon ti bébé ki pozé sou léstomak manman-l, jan Psòm nan di-a (Ps 131,2). Konsa tan Karèm nan, sé tan **pénitans**, sé tan **lacharité**, sé tan **lapriyé**. Pénitans parapò a nou minm pou donté mové panchan nou yo; lacharité parapò a prochinan-an pou nou séparé sa nou rézèvé-a avèk li; lapriyé parapò a Bondié pou nou réspiré-l pi byin, pou nou kouté-l pi alèz, pou nou obéyi-l pi fran. Nan toua sa yo: pénitans la, lacharité-a, lapriyé-a, sé pénitans la ki

nan mitan, k-ap dirijé lòt yo, k-ap asoupli mouvman yo. Pénitans la fè la-charité-a vi-n pi fasil, l-ap paré chémin pou lapriyè-a. Jézu di nan lévanjil la: "Fè pénitans" minm jan Jonas té pati préché nan vil Niniv: "Si nou pa fè pénitans, nan karant jou Niniv ap détoui" (Jon 3,4). Pénitans la sé konvè-sion, sé diréksion chémin-an pou nou ajisté, pou nou rédrésé, pou nou korrijé. Moun Niniv yo té kouté Jonas, yo fè pénitans, yo chanjé konpòtman, yo viré do bay mal yo t-ap fè-a, yo régrèt. Bondié padonin yo. An 1985, Pap Jan-Pòl II té ékri yon dokiman pou invité nou rétrouvé sans péché-a ak sans lakonfésion: sé "Réconciliation et Pénitence". Li té montré divès kalité rézon ki té fè sans péché-a vi-n fèb. Pandan tout tan karèm nan, nou t-a doué réfléchi pi plis toujou sou Dokiman sa-a ki konsékan anpil. Dépi 1982, pandan touazan Pap la t-ap palé sou késion sa-a. Évèk yo té réyini a-Rom pou yo té égzaminé-l avèk li afon. Sé frui travay yo-a ki té soti an 1985, antan Pap Jan-Pòl II té montré sé li minm ak tout Évèk sou tè-a ki mété ansanm pou yo ba nou lansègnman sa-a ki inpòtan anpil la.

Tan karèm nan, sé yon tan pou nou aprofondi lansègnman légliz la. Sé pandan tan sa-a Évèk yo abitué ékri sa yo rélé Lèt pastoral pou diozèz yo, pou raplé pouin inpòtan nan lansègnman légliz la, pou bay konsèy sou kondui krétyin doué ginyin, pou yo konsolidé lafoua fidèl yo, pou yo amélioré konpòtman yo, sa yo rélé "la foi et les moeurs". Lévanjil la montré nou Jézu ki rivé nan Galilé, l-ap **préché** (Mc 1,14). Konsa nou tandé dézièm léktu-a di nou kijan li té désann al **préché** léspri yo ki nan prizon-an (1 p. 3,19), yo minm ki té réfizé kouè lontan, lè moun yo t-ap tann pasians Bondié-a nan tan Noé-a. Chak tan karèm, Évèk yo gin pou rafréchi mémoua fidèl yo sou lansègnman lafoua-a yon fason spésial pou yo édé yo kouè pi byin, sé dévoua konsians yo, yon dévoua ki grav. Pè yo ki asosié nan sèvis sakré Évèk la, yo bay fidèl parouas yo yon pi gro dòz prèch tou pandan tan karèm nan. Sé poua yo konn mandé lòt Pè vi-n ba yo konkou antan yo oganizé sa yo rélé "quarante heures" ak rétrèt paskal pou gason, pou fi, pou maké tan fò sa-a pandan ané-a. Minm moun ki té konn réfizé kouè lontan yo, y-a jouin yon lòt chans pi dévan konsa, pou yo pa rét sou rout. Gadyin mouton yo pa gin doua kité mouton-l yo pèdi, paské yo pa suiv kadans group la (cf Is 40,11; Gn 33,14; Lc 15,4ss). Yo blijé fè sa yo kapab pou ratrapé yo. Vèsè anvan lévanjil la avèk vèsè lakominion-an di: "sé pa ak pin sèlman moun viv, min ak tout paròl ki soti nan bouch Bondié" (Mt 4,4). Karèm nan sé yon tan koté Paròl sa-a ap koulé tankou lariviè, sé yon tan spésial koté Bondié paré pou-l fè favè pou moun ki aksépté kouté paròl li, nan yon kè byin dosil.

Dimanch k-ap vini-an si Bondie vlé, sé sou Transfigirasion-an y-ap palé nou, ki fè nou sonjé ròb blanch batèm nan (Mc 9,1-9), ki raplé nou kijan Batèm nan sé yon limiè ki fè figi nou kléré minm jan ak figi Jézu-Kri, ki montré nou Batèm nan sé yon rézireksion, tankou liv lajénèz la ap fè nou sonjé avèk istoua Izaak Abraam t-apral sakrifé sou pil boua-a sou mòn Moriya-a (Gn 22,1-18). Nan touazièm dimanch karèm nan, sé Sin Jan k-ap raplé nou lè Jézu té nètouayé Tanp la antan-l té chasé moun yo ki t-ap vann ladann nan (Jn 2,13-25) tankou yon sign li gin pou-l mouri, pou-l lévé toua jou apré. Sa fè nou sonjé kè nou sé Tanp Bondié, sé pou nou profité tan Karèm nan pou nou pròpté li. Jou sa-a, liv Égzod la fè sonjé laloua-a Bondié bay pa lintèmediè Moyiz (Ex 20,1-17). Sé kontra Bondié ékri-a. Batèm nan doué fè nou sonjé kontra sa-a, ki pa ékri sou ròch ankò, min ki ékri nan kè nou avèk san Jézu-Kri (2 Co 3,3; cf Jer 31,33; Ez 36,26). Katriyèm dimanch karèm nan déja vidé limiè Koua-a avèk konvèsasion Jézu ginyin ak Nikodèm nan (Jn 3,14-21) lè l-ap fè-l sonjé koulèv la Moyiz té pandié sou boua-a nan savann nan pou moun ki kouè yo jouinn lavi. Liv Kronik la montré pèp Bondié-a égzilé, min li tounin nan péyi-l gras a bon kè Bondié (2 Ch 36, 14-23). Batèm nan sé yon lanmò pou yon rézireksion. Li mandé lafoua. Pèp la t-ap fè rebèl, Bondié té égzilé-l. Sé nan égzil la li rétrouvé lafoua batèm nan. Moun ki gadé koulèv la avèk lafoua, yo sovè. Y-ap gadé sila-a yo pèsè-a (Jn 19,37; cf Nb 21,8). Avèk sinkièm dimanch karèm nan, sé payin yo k-ap résévoua mèsaj Jézu-a osijè grinn blé-a k-ap tonbé nan tè-a pou-l donnin anpil frui-a (Jn 12, 20-33). Lanmò Jézu-a tou pré, dimanch k-ap vi-n apré-a sé déja dimanch Ramo, k-ap palé osijè lapasion sèlon Sin Mak (Mc 14, 1-15,47). An-atandan sinkièm dimanch la raplé nou kontra batèm nou avèk déklarasion Profèt Jérèmi-an (Jer 31,31-34) ki di Bondié ap mété laloua-l la nan kè nou, pou-l Bondié nou, pou nou pèp li. Tout tan Karèm nan, sé tankou yon chémin n-ap suiv nan savann nan, pandan Litiji-a ap détayé nouriti Paròl Bondié-a ba nou chak dimanch sitou. Pandan karant jou n-ap maché nan savann nan, gin sink sous dlo koté n-ap chita anba lonbraj pou nou fè yon ti poz, pou réfè fòs nou, sé divès pouin sa yo, koté n-ap résévoua tèl aspè spésial lansègnman lafoua-a.

N-ap mandé Manman Mari, Manman légliz, pou-l akonpagné nou sou rout la, pou-l louvri kè nou, pou nou dosil nan mèsaj n-ap résévoua-a, ki gin ki-chòy pou-l di chak moun yon fason spésial, paské Jézu sé Bon Gadyin-an ki rélé chak mouton-l sou non-l (Jn 10,3).

*

* *

PRÉMIÉ DIMANCH KARÈM C

Finisman lévanjil la di: "Lè tout kalité mòd jan tantasion fini, djab la pati kité-l pou moman-an" (Lc 4,13). Moman sa-a sé Jétsémani, lè Jézu ap di Piè: "Simon, Simon, min Satan réklamé nou pou-l pasé nou nan pasoua tan-kou blé. Min mouin lapriyé pou ou, pou lafoua-ou pa fébli. Ou minm, lè-ou tounin, asiré lafoua fré-ou yo" (Lc 22,32). Satan pa kapab fè anyin kont Jézu, l-ap ataké-l nan patizan-l yo. L-ap éséyé koulé batiman Piè-a avèk tout Apot yo ak Jézu k-ap dòmi ladan-l, pou-l nouayé légliz la, li pap réyisi. Jézu ap lévé l-ap fè yon sign, l-ap di yon mo, tout bagay ap rantré nan lòd, tankou nan kòmansman kréasion-an (Mt 8,23-27; cf Ps 33,9). Sé avèk lafoua nou chasé atak démon-an (1 p. 5,9). Lè Piè kòmansé fè dout, li pran koulé (Mt 14,29-31). Psòm-répons la di: Sou koulèv méchan yo, sa yo rélé aspik ak bazilik la, ou-ap maché, ou-ap foulé lion ak dragon anba pié-ou" (Ps 91,13=90,13). Sé konsa Bondié té madichonnin Satan dépi nan kòmansman kréasion-an. Lè té di koulèv la "Madanm nan ak Pitit li ap krazé-ou anba pié yo, ou minm ou-ap ataké yo nan talon" (Gn 3,15; cf Ap 12,1-17).

Dézièm léktu-a di: "Sé paròl lafoua, sa n-ap préché-a... Si-ou kouè, ou-ap sové; ak kè-ou ou kouè pou jistis la... Tout moun ki kouè nan li, yo pap ront" (Rom 10,8-13). Lafoua sa-a ki jèmin nan kè-a, li fèt pou déklaré nan bouch; sé sa Sin Pòl di nan minm Lèt Romin-an: "Ak kè-ou ou kouè nan jistis la; ak bouch ou, ou fè déklarasion pou délivrans la... Si-ou rékonèt ak bouch ou Jézu sé Granmèt la, épi nan kè-ou si-ou ou kouè Bondié lévé-l sot nan pami mò yo, ou-ap sové". Konsa paròl la alafoua nan kè-a épi li nan bouch la. Sé konsa minm dézièm Léktu-a kòmansé: Paròl-la tou pré nan bouch ou ak nan kè-ou" (R 10,8; cf Dt 30,14).

Déklarasion lafoua-a, prémié léktu-a prezanté-l nan Détéronòm 26,4-10. Pasaj sa-a sé "Krédo" Pèp Israèl la. Sé istoua délivrans la li déroulé dévan jé-l. Pasaj sa-a fini minm jan li kòmansé-a, avèk ofrann prémié frui rékòlt la.

Kòmansman: Dt 26,4

- a) Prèt la ap résévoua prémié frui yo nan min-ou
- b) L-ap pozé yo dévan lotèl Granmèt Bondié-ou la
- c) Ou-a di dévan fas Granmèt la Bondié-ou la

Finisman: Dt 26,10

- Konsa kouliè-a m-ap ofri prémié frui tè-a
- Ou-a kité yo dévan fas Granmèt Bondié-ou la
- Ou-a adoré Granmèt Bondié-ou la

Déklarasion lafoua sé yon adorasion. Chak foua nou déklaré lafoua nou, sé Bondié minm nou adoré. Sé konsa Jézu di djab: "Sé Granmèt Bondié-ou pou-ou adoré, sé li minm sèl pou-ou sèvi"..

Gin moun ki kite djab la kontrolé yo. Yo pè deklaré lafoua yo. Sé zam sa-a poutan ki pou chase-l (Ep 6, 10-17), Sin Pòl di sé pou nou toujou gin zam défans lafoua-a nan min nou (Ep 6, 16). Li di sé gras a zam sa-a n-ap kapab étinn tout flèch difé Satan ap voyé sou nou yo (ib).

Karèm nan sé yon tan ki santré sou lafoua, sé yon pèlerinaj lafoua. Sé pandan karant jou n-ap réfè pèlerinaj lafoua Pèp Israèl la té fè pandan karantan nan savann nan, apré Batèm lanmè Rouj la ki té délivré-l sot nan Éjip la (1 Co 10,2), tè péché-a, pou-l travèsé larivière Joudin-an ki fè-l antré nan Tè Bondié té promèt la, ki réprésanté sièl la. Tout lavi nou, sé pèlerinaj n-ap fè. Min nan karèm nou refléchi plis sou li. Jézu pasé karant jou san manjé, san bouè. Li konté sou Bondié Papa-a ki voyé lama-n bay pèp Israèl la nan savann (Ex 16,13), ki té fè dlo sot nan ròch pou li (Ex 17,6). Min pèp sa-a té rébèl dapré sa Psòm 95 la di: Pandan karantan ras sa-a dégouté-m, ap fè lagoon-lago, yo pa fiksé nan chémin-m yo; sé pousa yo pap antré nan répo-m (Ps 95,10-11; 106,32; cf He 3,7ss).

(Moun pa viv ak pin sèlman: M-ap réglé 242; Yon pòv mizérab 490; Sé koté-ou m-ap gadé tout tan 386; Pèp la travèsé 253; Sé sou ou-m konté 21; Granmèt sé ou-k pou kaché-m 71; Al fè rout ou Satan, min sa-k ékri 420; Ki sa-ou vlé-m fè, Granmèt o 546; Kouraj, mézanmi 281; Mandé, ou-a jouinn 317; Nou sé pèp Bondié 284).

Gin toua kalité tantasion djab prézanté dévan Jézu: Prémié-a konsèné rélation moun nan parapò a pròp tèt pa-l; Dézièm nan konsèné rélation moun nan parapò a lòt yo; Touazièm nan konsèné rélation moun nan parapò a Bondié. Parapò a pròp tèt pa-l, moun nan bézouin satisfè anvi li ginyin pou-l manjé. Parapò a lòt yo, moun nan bézouin satisfè anvi li ginyin pou-l posédé. Parapò a Bondié, moun nan bézouin satisfè anvi li ginyin pou-l kòmandé. Dépi prémié dimanch karèm nan légliz prézanté nou Jézu kòm modèl pou nou aprann répousé toua jan tantasion sa yo: manjé, posédé, kòmandé. Sé pousa dépi mèkredi sann litiji-a indiké nou rémèd kont toua mové tandans sa yo: Parapò a nou minm li mandé nou pou nou fè jèn, parapò a prochin-an, li mandé nou fè lacharité, parapò a Bondié, li mandé nou lapriyé. Jèn nan korijé anvi nou ginyin pou kontanté vant nou ak manjé, charité-a korijé anvi nou ginyin pou posédé byin lòt moun; lapriyé-a korijé anvi nou ginyin pou nou kòmandé Bondié obéyi kapis nou. Sa pa vlé di nou pa gin doua manjé, nou pa gin doua posédé, nou pa gin doua mandé Bondié anyin. Sa vlé di gin limit nan satisfaksion n-ap bay kò nou, gin limit nan posésion byin nou, gin limit nan sa n-ap mandé Bondié.

Tantasion djab la mét dévan Jézu, sé fè ròch yo tounin pin, sa vlé di pou-l kontanté anvi li jan-l pito, paské sé pa dé ròch ki ginyin nan dézè-a. Tantasion djab la mét dévan Jézu ankò sé ba-l tout péyi ki sou tè-a, ak tout richès yo, sé pa dé péyi ki gin sou tè-a. Tantasion djab la mét dévan Jézu anfin, sé voltijé disèt rotè pou Bondié fè mirak ba li jan-l vlé; sé pa dé kapris yon moun ginyin k-ap pasé nan lidé-l. Kò nou gin anvi pou kontanté-l avèk ékilib. Nou bézouin richès ak propriété, san nou pa bézouin déplasé bòn térin nou, pou nou grandi koté nou abité-a sou kont lòt maléré yo n-ap chasé sot sou tè yo. Nou bézouin sékou Bondié pou édé nou travèsé mové pa yo, san nou pa bézouin fè éspré lagé tèt nou nan mové pa sa yo, antan nou di Bondié bon, l-ap toujou délivré nou", kòm si Bondié sé yon doub diféransièl n-ap pasé pou nou travèsé tout kalité labou.

Djab la pèdi batay dévan Jézu, min li pati, l-al fè bann, l-al chèché sèt lòt démon ki pi fò pasé-l, pou-l tounin nan moman fiksé-a, sa vlé di nan nuit jédi-vandrédi-Sin-an (Lc 4,13 22,31; cf 11,24-26). Sin Piè di nou véyé san rété, paské djab la ap fè lavironn nou tankou yon lion k-ap chèché dévoré (1 p. 5,8). Sé pou nou rézisté-l fèm nan lafoua. Nou kapab jouinn yon kalmi yon moman pa konprann lapè-a fi-n rivé nèt pou sa. Satan pi malin pasé nou kouè. L-ap sivéyé moman n-ap dòmi byin alèz (Mt 13,25) pou-l ataké pi rèd, ni nan rélasyon parapò a pròp tèt pa nou, ni nan rélasyon parapò a prochin-an, ni nan rélasyon parapò a Bondié, jèn, charité, lapriyé, sé miray ak kontréfò k-ap protéjé nou (Is 26,1). Jèn parapò a nou minm, charité parapò a prochin-an, lapriyé parapò a Bondié.

Nan jèn sé pa késion manjé sèlman ki konté, sé tout kalité satisfaksion nou abitué bay kò nou, tankou palé anpil parégzanp, louvri jé nou gadé sa k-ap troublé konsians nou, kouté mové paròl, alé koté nou pa doué, kité mové lidé galopé nan tèt nou, kité mové sansasion gayé nan kò nou. Parapò a tou sa, nou gin pou frinnin sans nou yon fason spésial nan tan karèm nan. Nan charité-a sé pa sèlman lagé yon ti lajan nan min pòv an pasan. Sé konsidéré moun nan tankou moun tout bon vré, pòtré Bondié, avèk tout doua li ginyin, ki mandé pou nou respékté yo, pou nou défann yo, Sé gadé-l tankou frè nou tout bon vré. Sé bliyé tèt nou pou nou okipé-l, pou nou sèvi-l, pou nou rinmin-l. Sé padonnnin sa-l fè nou ki mal, olié pou n-ap chèché kijan nou kapab tiré vanjans sou li. Karèm nan mandé nou pou nou dépasé tout kalité frontiè sa yo. Nan lapriyé-a sé pa avantaj nou pou n-ap mandé Bondié avèk égzijans, kòm si li doué nou tou sa nou anvi, minm si sa pa gin okinn sans. Sé mété nou nan min Bondié okontrè pou-l fè sa-l vlé avèk nou, kòm Papa nou ak Mèt nou.

Sé nan léspri sa-a n-ap maché sou rout Karèm nan k-ap kondui nou jous nan Dimanch Pak la. N-ap mandé Manman Mari pou-l kinbé min nou pou-l dirijé chémin nou.

Lè-l fi-n éséyé tout fòm tantasion, djab la pati kité Jézu, pou-l tounin nan moman ki fiksé-a (Lc 4,13). Kilès moman sa-a? Sé nan jadin Jétsémani-an, lè Jézu ap di: "Papa, si kalis sa-a té kapab pasé san pou-m pa bouè-l, min sé pou volonté-ou fèt" (Lc 22,42). Konsa lavi piblik Jézu ankadré ant dé tantasion: tantasion karant jou dézè-a, avèk tantasion nuit Jétsémani-an. Djab la té prezanté Jézu toua tantasion nan dézè-a apré Batèm nan. Jézu répousé yo. Yo tout sé pou té fè-l pran yon diréksion ki alé nan sans kontrè avèk chémin Bondié Papa-a trasé-l la. Nan nuit Jétsémani-an, djab la tounin pou-l joué dènié zél kat la, fè Jézu rénonsé mision Sèvitè k-ap soufri-a, pou-l chouazi lign Mési k-ap antré tankou chèf ki fi-n ranpòté laviktou-a. Jézu té déjà chouazi chémin k-ap désann nan lanmò-a, jou Batèm li-an. Sé minm oriantasion sa-a li kinbé anvan Batèm San-an (Mc 10,38; Lc 12,50) l-apral résévoua sou koua-a. Pandan tout lavi piblik li, Juif yo té éséyé kontinué tanté-l nan minm lign avèk Satan. Li té toujou rézisté yo. Sèké Satan pa tanté moun yon sèl foua, dé foua, toua foua. Li tounin, l-alé, li rétounin, joustan li fatigé moun nan, li rann li fèb, li fè-l di oui, antan volonté-l pa gin asé fòs pou-l rézisté. Sé poua Karèm nan sé yon tan antrénman, tankou yo fè antréman foutbòl, sou térin pou aprann jouè yo gin rézistans, konsa tou n-ap fè antrénman pou nou dékouvri taktik Satan-an k-ap éséyé kabré nou, détounin atansion nou, pou-l ouè si-l kapab antré kèk gòl nan kan nou. Ki sa pou nou fè? Jézu invité nou véyé, lapriyé, pou nou pa tonbé nan pièj. Li di nou: "Léspri-a vif, sé vré, min chè-a minm li fèb kon pay" (cf Mt 26, 41). Sin Piè fi-n di li pap abandoné Jézu, minm si tout lòt moun yo kité-l. Apèn kèk moman fi-n pasé, li bliyé sa-l té di-a, li nié pandan tou foua (Lc 22,33; 54-62).

Satan pa kontanté-l ataké yon foua, dé foua min l-al jous nan bout kous li, jous toua foua sa vlé di: toutotan li pa fè moun nan mòdè pousiè, li pap rété, li pap satisfè (Job 1,13-2,13), Sin Piè di nou rézisté Satan fèm nan lafoua (1 p. 5,9). Sé konsa Sin Pòl di nou nan Romin 10,8-13 ki vi-n kòm dézièm léktu-a: "sé paròl lafoua sa-a n-ap préché. Sèké, si-ou rékonèt ak bouch ou Jézu sé Granmèt la, épi nan kè-ou si-ou kouè Bondié lévé-l sot nan pami mò yo ou-ap sové. Ak kè-ou, ou kouè pou jistis la, ak bouch ou minm ou fè déklarasion pou délivrans la. Sèké labib la di "Tout moun ki KOUÈ nan li, yo pap ront". Konsa, toua foua mo "kouè"-a tounin nan léktu sa-a, avèk yon katriyèm foua nan mo "lafoua"-a. Insistans sou lafoua-a, nou jouinn li nan prémié léktu-a, nan Détronòm 26,4-10, koté nou tandé déklarasion pèp Granmèt la, tankou yon "krédo" nan lamès la apré lévanjil la ak prèch la.

Sé dayè lidé sa-a yo rasanblé nan ti fraz la yo mété nan kòmansman léktu-a tankou yon tèt chapit: "Déklarasion lafoua pèp ki chouazi-a". Prémié léktu-a mandé pou pèp la prezanté prémié zépi blé-l bay Granmèt la kòm sakrifis pou montré li rékonèt sé Granmèt la ki béni jadin-l. Konsa tantasion djab la prezanté dévan Jézu-a, sé tout pakèt tantasion pèp la té déjà ginyin lè-l té konprann sé ak fòs ponyèt li, li té jouinn manjé-a. Si Bondié mandé pou-l ofri prémié zépi-a, sé pou-l sonjé sé Granmèt la ki kontinué ap nourri-l tan-kou lè-l té nan savann nan, lè-l té konn ap résévoua lama-n sot nan sièl la.

Nou minm tou nou toujou gin fòm tantasion sa-a pou nou pran indépandans nou vizavi Granmèt la, pou nou konprann tou sa nou fè ki réyisi, sé ak fòs ponyèt nou nou fè-l. Gin anpil kamionèt k-ap fè trafik, yo ékri "Dieu a voulu" oubyin "Mèsi Granmèt", yon pakèt lòt ti pansé konsa pou fè sonjé "si Granmèt la pa bati kay la, sé pou bontan mason yo ap travay", tankou nan la tour de Babèl (Gn 11,1-9; Ps 127,1; Jn 1,3; 15, 21,3). Sèlman malgré tou sa, gin yon kamionèt yon lè ki ékri: "Tèl moun a voulu" Èské sé yon fason pou montré li pran indépandans li vizavi sa lòt yo konn abitué ékri-a parapò a Bondié? An tou ka, li bay fòs ponyèt li plis inpòtans passé intèvansyon Bondié nan lavi-l. Sètman nou doué aji kòm si tout bagay dépann dé aktivité nou pou nou pa fè parès, rét ap di tou lasint jounin "Bondié bon", san nou pa fè anyin minm; sèlman nou pa doué bliyé dapré sa Sin Pòl di nou nan Lèt Filipyin yo, chapit 2 vèsè 13: Bondié la sé li minm ki réalizé ni sa nou vlé-a, ni sa n-ap fè-a, li réalizé yo nan nou pou avantaj plan bòn volonté-l yo". Konsa Bondié aji, min li ba nou inpréssion sé nou minm k-ap aji. Sé pa dé fòs k-ap déplouayé kòt-a-kòt nan minm diréksyon-an, sé pa non plis chyin ak chat k-ap batay youn kont lòt nan dé sans kontrè. Min Bondié sé fòs prinsipal la, nou minm minm sé fòs ki sèvi Bondié tankou yon instriman pou-l aji. Moun nan k-ap ékri-a, sé li minm k-ap ékri tout bon vré, sèlman kréyon-an nan min-l ap ékri tou minm bagay la. Konsa nou doué akòdè ak volonté-l tankou yon gita nan min mizisyin-an, pou nou pa bay fos-nòt.

Toua foua djab la tanté Jézu, toua foua Jézu répousé-l. toua foua djab la ap tanté Sin Piè chèf légliz la, Jézu té déjà avèti Piè: "Simon, Simon, min Satan réklamé nou, pou-l passé nou nan layo tankou blé min mouin lapriyé pou ou, pou lafoua-ou pa fébli, min ou minm, lè ou-a tounin, rafèmi frè-ou yo" (Lc 22,31-32). Piè ap nié toua foua. Min apré sa Jézu ap gadé-l nan jé, l-ap sonjé sa Jézu té di-l la; l-ap kriyé san (Lc 22,62). Tantasion djab la, sé ak fint li fè yo. Sé pousa sé minm Sin Piè-a ki di nou "Métrizé kò nou, véyé. Lènmi nou-an Djab la, ap fè lavironn alé-vini, tankou yon lion k-ap rélé, k-ap chèché kilès pou-l dévoré. Rézisté-l fèm nan lafoua" (1 p. 5,8-9; Gn 4,7). Toua foua Jézu ap fè Sin Piè lavé fot li-a antan-l fè-l déklaré toua foua li rinmin-l

plis pasé lòt yo, li rinmin-l, li sansib pou li (Jn 21,15-17). Prémié so pa so; sé bité, pa tonbé; sé tonbé, pa rét atè-a. Prémié répons Jézu té bay djab la (Lc 4,4), li té pran-l nan Détéronom 8,3; "Sé pa ak pin sèlman moun yo viv, min ak tout paròl Bondié". Lè lanj Gabriyèl té vi-n mandé la Trè Sint Vièj Mari konsantman-l nan, la Trè Sint Vièj Mari réponn li: Mouin sé sèvant Granmèt la, sé pou sa fèt pou mouin dapré PARÒL ou-a" (Lc 1,33). La Trè Sint Vièj konfòmé lavi-l sou Paròl Bondié-a ki baz lafoua nou, ki pèmèt nou rézisté djab la ak lafoua ki fèm. Sé pa sou paròl moun pou nou apuiyé sé pa pou fè moun plézi, n-ap aji, sé Bondié sèl k-ap gidé nou, dapré sa liv Détéronòm nan di nan chapit 32, vèsè 12, ki vi-n kòm chan-dantré nan lanmès Sint Tèrèz Prémié oktòb).

Aji pou fè moun plézi pou alignin sou lézòt, pou yo pa lonjé douèt sou ou, sé ésklavaj Satan. Yon krétyin doué gin pèsonalité. Li doué aksépté sèvi Bondié sèl, minm si-l pèdi tout zanmi-l yo. Djab la té pran Jézu, li té monté-l sou tèt kay sakré-a, pou-l fè-l fè égzibision. Jézu pa nan "fè-ouè", li konnin "fè-ouè pa diré". Li pa vlé ap fè yon pakèt bagay éstraòdinè, pou atiré atansyon, pou fè moun bat bravo pou li, pou fè rélé: "Sansasionèl, sansasionèl". Sé Bondié avèk Anj li yo avèk Sin-l yo ki pou bat bravo pou nou, antan n-ap ranpòtè viktoua sou Satan avèk sa k-ap sèvi-l koté pou-l apuiyé yo. Laviktoua sa-a sé ak lafoua nou ranpòté-l. Yon krétyin doué aksépté maché, minm si li pou kont li, sou rout Bondié montré-l la. Li pa doué rét ap plédé ézité, ap di "ki sa un tèl ap pansé?" Pito-ou mandé "Ki sa Jézu ap pansé?" Sé sa sèlman ki pou sèvi rézon aksion nou."Ki sa Jézu ap pansé?" Sé sa ki doué kalmé kè nou. répozé-l nan tout boulvès li, ba nou asirans nan tout tèt chajé nou. Nan pouin késion fè égzibision pou nou mété nou alapaj alamòd, pou nou tankou tout moun, pou yo pa di nou nou sé vié granmoun ti tay, nou fi-n dépasé, nou pap gin pèsòn k-ap maché avèk nou. Sin yo sou tè-a pa-t janm gin pèsòn ki alé nèt nan lidé yo, ki suiv yo nèt sou chémin yo. Sin Jan-d-la-Koua di konsa sé tankou yon zouazo yo rélé "Le passereau solitaire", sé pou kont li "volé, li volé byin ro, li toujou nan sans kontrè van-an k-ap vanté-a, li chanté klè, koulè-l gri". Li volé pou kont li: li aksépté suiv Bondié tou sèl. Li volé byin ro, li dépasé tout kondision tèratè, antan-l gadé tou bagay nan jé Bondié, vré sous la ak dènié pouint koté n-apralé-a. Li volé nan sans kontrè van-an ap vanté-a: li pa okipé difikilté k-ap kontrarié-l, kontrè plis li jouinn, sé plis l-ap chèché kontré yo pou-l maché kan minm, pou-l ranpòtè laviktoua, li pa kité van trinnin-l. Li chanté klè, voua-l pa anroué nan louanj Bondié, li karé nan konpòtman-l, li pa gin atitid k-ap fè yo kouè l-ap koupé dé bò tankou kouto famasi, sé sa oubyin sé pa sa, si-ou vlé, maché si-ou pa vlé,

mouin pa rélé-ou, al fè rout ou. Li gin koulè gri: li pa gin koulè vif, li aladis-pozision sa Bondié vlé ba li, alé nan sans Bondié vlé voyé-l.

Karèm nan sé yon tan pou viv dézè-a, sa vlé di viv pou Bondié sèl, kité sèl Bondié dirijé nou, san nou pa rét ap pèdi tan fè égzibision, pou atiré zanmi k-ap bat bravo pou nou. Sé pa match foutbòl n-ap joué avèk manb minm ékip avèk nou pou pasé balon-an ba yo pou yo chak fè yon chout, pou bay gòl, pou rélé viktoua, monté drapo. Patizan Jézu-Kri, sé pa kò-bòy; sé moun ki aksépté pèdi répitasion yo, kité yo di yo pa gin nin nan figi yo. Patizan Jézu-Kri pa bézouin réklam. Sé Jézu-Kri sèl ki gin patizan, nou pa bézouin patizan k-ap rélé "mouin pou Piè, mouin pou Apolòs, mouin pou Pòl" (cf 1 Co 1,11-12). Konsa késion égzibision-an, bliyé sa: pou-ou ap monté sou tèt kay sakré-a, avansé nan kouin-an, pou tout moun ouè ou-ap voyé kò-ou atè, san okinn malè pa rivé-ou. Sé pa mòd Mési majisyin sa yo nou bézouin. Tan sa-a dépasé, sé pou lansyin Téstaman, lè pa-t ko gin asé lafoua. Sèl sign nou ginyin kouliè-a, sé sign Jonas la (Mt 12,39), Jézu ki mouri, ki lévé byin vivan. Nou pa bézouin dèt ankò, Égzibision-an, bliyé sa, "Fè-ouè" pa diré.

Lè Pilat ap jijé Jézu, li mété-l chita sou pròp fotèy gouvèman-l, li mandé si-l roua; Jézu kòmansé fè silans, li pa réponn anyin, paské li konnin sé pa yon jijman tout bon vré, sé yon simagri, min apré sa li mété tout bagay nan plas yo, pou pa gin dout sou mision-l, li di: péyi koté li Roua-a, li pa sou tè-a, si-l té sou tè-a, Bondié Papa-a t-a déjà voyé kantité kolòn Mésajé-l pou yo déli-vré-l, min péyi koté li Roua-a li pa sou tè-a, é sé lè-l gin tèt li trésé ak kouròn pikan, sé lè sa minm li fè gran déklarasion di li sé Roua tout bon vré, bagay li pa-t vlé fè ouè pandan tout tan li t-ap viv avèk foul la. Djab la minm té kòmansé pran dévan pou di li: m-ap ba-ou tout pouvoua sa-a ak bèlté yo, paské sé mouin minm yo rémèt yo, épi sé moun mouin vlé mouin bay yo. Ou minm, si ou adoré-m, yo tout ap pou ou" (Lc 4,6). Min Jézu pa bézouin pran dévan volonté Papa-a. Apré li fi-n lévé byin vivan, l-ap di Apot yo: "Yo rinmèt mouin tout pouvoua nan sièl la ak sou tè-a,"(Mt 28,18). Lè Pilat t-ap késion-l la, li té déjà Roua, min yo pa-t ko ouè sa-l yé, ni li pa-t ko trò présé fè ouè sa-l yé (Jn 18,36). Sou koua-a Pilat ap fè ékri "Jézu moun Nazarèt la, Roua Juif yo," (Jn 19,19). Jézu pa-t aksépté parèt kòm Roua nan lavi piblik li. Lè-l té fi-n bay sink mil moun yo manjé ak sink ti pin épi dé ti pouason-an, yo té vlé fè-l roua, li té sovè kò-l pou kont li nan mòn nan (Jn 6,15).

Gin moun ki toujou vlé ap pran pòz chèf pou yo kòmandé, pou yo krazé volonté lòt yo, pou yo fè yo fè sa-k nan lidé yo, tankou yon chat k-ap joué ak yon sourit. Sé pa konsa Jézu invité nou aji avèk frè nou yo. Li korijé dé-

mand Jak ak Jan ki vlé yon plas adouat li ak yon plas agòch li (Mc 10,35-40). Li té pran yon sèvièt, li té pasé nan tay li pou-l té sèvi Apot yo atab (Jn 13,4-15), paské li té konnin yo t-ap chèché kilès nan yo ki gin plis otorité (Mc 9,33-37), sé poua li mandé pou yo konpòté tèt yo tankou ti moun piti, tankou moun k-ap sèvi (Mc 9,35-36). Sin Piè mandé nou pou nou pa pran pòz chèf nou aléga bann mouton yo, min pou nou sèvi kòm modèl nan fason n-ap aji (1 p. 5,1-4). Sé éfasé kò-ou; otorité sé yon sèvis; si-ou pa aksépté pran ròl réponsab ou pou-ou kapab sèvi, minm si yo fè-ou tout kalité mank-déga, viré do-ou, bay démission-ou, plas ou pa la, dèyè Jézu-Kri k-ap poté koua-l nan tan Karèm nan, ou pèdi chémin. Sé lévanjil la tou kri, li pa gin siro ladan-l, pou fè bliyé gou anmè-l la. Lakoua-a, yo pa kapab retiré-l sot nan lavi nou; li gin plas li, sé pa nou ki mété-l, sé pa nou ki kapab ouété-l. Gin moun ki trò sansib pou ti konsidérasion yo, pou ki sa y-ap di osijè yo, pou ti kritik y-ap fè sou yo, épi yo dékontrolé pou yon ti krik, yon ti krak, sé pou tout moun t-a flaté yo, entouré yo avèk onè, bat bravo dévan yo. Lévanjil la pa nan sa. Sa sé tantasion lògèy Satan. Apot yo té jouinn tantasion sa-a, pandan tan yo t-ap viv avèk Jézu. Koté yo kasé pié-a, sé la minm Jézu té konn abitué rédrésé yo, fè yo sonjé mision Sèvitè soufran-an (Is 52,13-33.12; prémié léktu Vandrédi-Sin-an). Yo té méprizé-l, min sé soufrans nou yo li t-ap poté, sé doulè nou yo ki té chajé-l, nou té konprann sé Bondié ki pini-l, ki té frapé-l, ki té rabésé-l, min sé poutèt krim nou yo té pèsé kè-l, sé poutèt fot nou yo li té krazé, chatiman ki ban nou kè pozé-a, sé sou li li yé, sé nan koté-l blésé yo nou jouinn gérizon... Yo maltré-l, li bésé tèt li, li pa di anyin tankou mouton y-ap minnin labatoua... Tout moun té méprizé-l, yo té lagé-l, yo pa-t okipé-l... Yo té sézi-l san-l pa atann, yo té kondui-l nan tribinal... Min apré soufrans li yo, l-ap ouè limiè, l-ap jouinn satisfaksion (Is 53,3-11 passim). Chapit 53 liv Izayi-a, yo rélé-l Sinkièm Évanjil, tèlman li rich avèk léspri Nouvo Téstaman-an. Sé pasaj sa-a Sin Piè ap kalkilé, lè-l di pou nou suiv Jézu ki té soufri pou nou, antan li kité yon modèl pou nou, pou nou suiv tras li yo, li minm ki pa-t fè péché, pa-t gin manti nan bouch li, yo jouré-l li pa tiré vanjans, li soufri san-l pa fè ménas, li rinmèt tèt li bay Sila-a k-ap jijé avèk jistis la, li minm ki poté fot nou yo nan kò-l sou boua-a, pou nou mouri sot nan péché nou yo, pou nou viv pou jistis la, li minm ki géri nou gras a koté-l blésé yo (1 p. 2,21-24).

Nan touazièm kantik Sèvitè soufran-an (Is 50,4-9 = Prémié léktu Mèkrédi Sin-an), Profèt la di nou li prézanté do-l bay moun k-ap frapé-l yo, li lonjé figi-l bay sa k-ap raché bab li yo, li pa ralé figi-l dévan mové trétman ak kraché (Is 50,6). Kòlè lèzòm pa réglé jistis Bondié, dapré sa Sin Jak di nan lèt li-a, chapit 1 vèsé 20. Sèvitè soufran-an pran pasians, li konprann sé pou

bontan li t-ap pasé tray, sé pou granmési, pou van li t-ap déplouayé fòs li, époutan doua-l té avèk Granmèt la, rékonpans li té avèk Bondié li (Is 49,4 = dézièm Kantik Sèvitè-a, = Prémié Léktu Madi-Sin-an). Sé pou sa li pa fè tandé voua-l nan lari, li pa krazé rozo ki félé-a, li pa étinn mèch k-ap fè la-fimin-an, li pa rélé fò li pa lévé voua li (Is 42,2-3 = prémié Kantik Sèvitè soufran-an, = prémié Léktu Lindi-Sin-an).

Tou sa, Jézu prézanté nou li nan modèl li kité pou nou, nou minm tou sé pou nou sèvi lòt yo modèl, dapré sa Sin Piè di nou, ni Sin Pòl tou (1 Th 2,4-12). Konsa kozé otorité k-ap krazé-a, mòd kòmandé tankou roua yo sou tè-a, antan n-ap chèché lagloua k-ap pasé-a, bliyé sa.

Tan Karèm nan mandé nou pou nou panché tout bon vré sou fason Jézu konpòtè tèt li, épi sou fason li mandé nou pou nou minm tou nou konpòtè tèt nou, antan n-ap suiv li, sou rout li yo. Sé yon sèl rout ki minnin nou nan sièl la; sé rout Kalvè-a. Pa gin lòt koté pou-ou pasé pou-ou pran paspò-ou. Chémin ki laj la, k-ap désann nan, sé nan lanfè li minnin.

Épi sé pa yon sèl moman pou n-ap rézisté Satan, apré sa nou konprann nou trankil. Sé tout tan pou n-ap véyé, paské chak instan l-ap chanjé taktik, lè-l ouè yo dékouvri pièj li yo. L-ap tounin nan tan fiksé-a, lè-l fi-n sèvi ak tout kalkil mòd jan pou éséyé nou-an (Lc 4,13). Li pati al chèché sèt lòt démon ki pi méchan pasé-l pou vi-n instalé pou-l chèché pran kè nou daso. Rézisté-l fèm nan lafoua. Sé sa n-ap mandé Manman Mari, Manman lafoua nou.

40 jou: 20 fous nan lansyin Téstaman, 4 fous nan Nouvo Téstaman. Gn 1,4.12.17; 8,6; 50,3; Ex 24,18; 34,28; Nb 13,25; 14,34; Dt 9,9.11.13.25; 10,10; 1 Sm 17,16; 1 R 19,8; Tob 1,21; 2 Mac 3,2; Ez 4,6; Jon 3,4; Mt 4,2; Mc 1,13; Lc 4,2 Ac 1,3.

40 an: 33 fous nan lansyin Téstaman, 8 fous nan Nouvo Téstaman. Gn 25,20; 26,34; Ex 16,35; Nb 14,33.34; 32,13; Dt 2,7; 8,2.4; 29,4; Jos 5,6; 14,7; Jg 3,11; 5,31; 8,28; 13,1; 1 Sm 4,18; 2 Sm 2,10; 5,4; 1 R 2,11; 11,42; 2 R 12,2; 1 Ch 26,31; 29,27; 2 Ch 9,30; 24,1; Ne 9,21; Ps 95,10; Ez 29,11.12.13; Am 2,10; 2,25; Ac 4,22; 7,30.36.42; 13,18.21; He 3,10.17.

grangou: 44 fous nan lansyin Téstaman, 24 fous nan Nouvo Téstaman. Gn 41,55; 47, 13; Ex 16,3; Dt 8,3; 28,48; 32,34; Rt 2,18; 2 Sm 17,29; 2 Ch 32,11; Ne 9,15; Tob 4,16; Joël 7,14; 1 Mac 13,49; Job 18,12; 27,14; Ps 50,12; 78,18; 107,5; Pr 6,30; 13,4a.b; 19,15; 25,16.21; Si 4,2; 16,27; 24,21; 37,20; Is 9,19; 14,30; 44,12; 49,10; 65,33; Jer 14,18; 38,9; Lam 2,19; 4,9; 5,10; Ez 6,12; 18,7.16; Am 8,11a.b; Ag 1,6; Rt 4,2; 12,1.3; 21,18; 25.35.42;

Mc 2,25; 11,12; Lc 4,2; 6,3.21.25; 15,17; Jn 6,35; 12,20; 1 Co 4,11; 11,21.34; 2 Co 11,27; Ph 4,12; Ap 6,8; 7,16.

Djab (διάβολος): **22 fous nan lansyin Téstaman, 36 fous nan Nouvo Téstaman:** 1 Ch 21,1; Est 7,4; 8,1; Job 1,6.7a.b.9.12a.b.2,1-2a.b; 3.4.6.7; Ps 109,6; Sg 2,24; Za 3,1.2.3; 1 Mac 1,36; Mt 4,1.5.3.11; 13,39; 25,41; Lc 4,2.3.6.13; 8,12; Jn 6,70; 8,44; 13,2; Ac 10,38; 13,10; Ep 4,27; 6,11; 1 Tm 3,6.7.11; 2 Tm 2, 26; 3,3; Tit 2,3; He 2,14; Jc 4,7; 1 p. 5,8; 1 Jn 3,8a.b.10; Jud 9; Ap 2,10; 12,9.12; 20,2.10.

*

* *

DÉZIÈM DIMANCH KARÈM A

Dimanch jodi-a palé nou sou "Transfiguration" (Mt 17, 1-9). Jézu chanjé figi dévan Apot yo, fas li vi-n kléré kon solèy, rad li vi-n blan kon lanèj. Epi Moyiz avèk Éli ap palé avèk li osijè "Égzòd" (cf Lc 9, 31) li t-apral fè Jérusalem nan. Sa "Égzòd" sa-a yé? Nou konn tandé palé di gin anpil moun k-ap pati kité péyi yo pou yo alé nan yon lòt péyi, yo konn rélé sa "Égzòd démografik", sa vlé di yon bon valè pèp la k-ap déplasé alé yon lòt koté. "Égzòd" la sa vlé di déplasman. Jézu gin pou-l déplasé kité yon koté al yon lòt koté. Ki koté? Sé sot sou tè sa-a al nan sièl la. Sé sa "Égzòd" la yé. Dépi nan premié Léktu-a, yo montré nou kijan Bondié mandé Abraam fè yon égzòd, pati kité ras li ak péyi-l, pou-l alé koté Granmèt la ap montré-l la (Gn 12, 1-4a). Pèp Bondié-a avèk Moyiz té fè "égzòd" kité Éjip, travèsé lanmè Rouj ak dézè-a pou y-al antré nan péyi Palésti-n nan sou diréksion Jozué ki gin minm non avèk Jézu.

Tout tan Karèm nan sé yon tan "égzòd", sa pa vlé di nésèsèman nou gin pou nou kité péyi nou ak ras nou pou nou alé viv yon lòt koté, min sa vlé di pou nou kité yon mové abitud avèk mové kondision ki lokasion péché òdinè, pou nou antré nan lòt kondision ki kadré pi plis avèk favè Bondié yo nou gin pou nou résévoua-a. Kité péché pou lagras alapas, sé sa égzòd la nou gin pou nou viv yon fason spésial nan tan Karèm sa-a. Nan nuit Pak la n-ap raplé bèl èvènman égzòd Pèp Israël la. Min sé pa yon istoua n-ap raplé tankou jou y-ap fété indépandans yon nasion, sé yon sitiasion ki doué palé pou chak moun nan nou. Nou konn abitué di légliz sé nou, nou sé légliz. Sé pou nou apliké sa nan sans tou sa-k rivé pèp Bondié-a, nan labib la, sé nou minm sa konséné. Pèp Israël la sé nou minm (1 Co 10, 11; Ga 4, 21-31). Sé nou minm ki pou fè éfò sispann instalé nan péché-a ak nan kondision péché-a. Minm si sa fè anpil ané dépi nou pa-t janm proché koté yon Pè pou nou konfésé, sé pou nou fè yon ti éfò, anvan fèt Pak la, pou sa, pou fè "égzòd sur place" sa-a.

Lévanjil la palé sou "Transfiguration" Jézu (Mt 17, 1-9). Transfigirasion sé chanjé figi, jan mo-a di-a, pasé sot nan yon figi al nan yon lòt. Chak Krétyin, jou BATÈM li, fè yon "transfigirasion", li chanjé figi, li kité figi tè-a, pou-l pran figi sièl la. Li kòmansé ap viv dépi koulié-a lavi li gin pou-l viv nan sièl la. Si gin yon frontiè nan légzistans nou sé pa lanmò a ki trasé-l, sé Batèm nan ki maké-l, chanjman, ki fèt nan légzistans nou, sé nan Batèm nan li fèt, sé pa nan lanmò-a. Dépi jou Batèm nou, nou viv yon lavi "transfiguré". Sé pou sa pandan chak Karèm yo raplé nou Batèm nou, joutan nan nuit Pak la, yo fè nou réfè promès nou té fè jou Batèm nou, antan nou rénonse démon ak tout okasion péché, antan nou kouè nan Granmèt la ki kréyé tout bagay, ki

fè Pitit li vi-n tounin moun pou-l délivré nou sot nan péché-a. Fas Jézu vi-n kléré tankou solèy, rad li vi-n blan kon lanèj, tankou sa té pasé jou dimanch matin, lè-l té lévé byin vivan sot nan pami mò yo.

Transfigirasion-an fè nou sonjé Réziréksion-an. Batèm nan sé yon transfigirasion, Batèm nan sé yon réziréksion. Dépi anvan Jézu mouri sou lakoua, li fè Apot yo ouè davans ki kondision k-ap tann li, pou yo pa dékourajé jou Vandrédi-Sin-an, li té vlé éspliké yo Koua-a sé yon pon koté l-ap pasé lòt bò lariviè-a. Konsa tou nan "égzòd" n-ap fè-a, spésyalman pandan tan Karèm sa-a, sé pou nou sonjé Koua-a n-ap réfléchi sou li-a, sé yon pasaj ki minn nou nan Réziréksion-an. Lavi yon Krétyin sé yon lavi résisité. Tou tan k-ap vi-n apré Pak la jous lapankot sitou, n-ap réfléchi pandan karant jou sou mè-vèy sakré réziréksion-an. Batèm nan sé yon "égzòd", batèm nan sé yon "transfigirasion", batèm nan sé yon "réziréksion".

N-ap mandé Manman Mari pou nou viv tan égzòd sa-a pi fon, pou nou kite péché pou nou travèsé nan lagras, n-ap mandé-l tou pou lavi nou vi-n tounin yon transfigirasion, pou gin yon chanjman an byin koté fas Jézu-Kri ap fè limiè-l kléré sou rout nou, pou tankou Moyiz ki té désann sot sou mòn Sinayi-a, figi nou vi-n kléré kon solèy; dépi yon moun pran abitud fikse jé-l sou fas Granmèt la, figi nanm ou kléré; fè noua-a sé péché; limiè-a sé lagras la, sé kite péché pou lagras alapas. N-ap mandé Manman Mari pou nou viv tankou moun ki résisité, lanmò-a réprézanté sitiasion yon moun k-ap viv nan péché, sé péché-a ki té lokazion lanmò antré sou tè-a, Jézu vi-n délivré nou sot nan péché-a ak nan lanmò-a. Sé kite péché pou lagras alapas, jan nou konn abitié chanté nan kantik la ki di: "Min lamision rivé-a."

Voua Papa-a sot nan sièl la, li di: "Sila-a sé Pitit mouin-an, sa-m rinmin-an, nan li mouin jouinn plézi-m" (Mt 17, 5). Nan Batèm nou sé sa Bondié Papa-a di nou tou. Nou vi-n pitit li rinmin-an, koté li jouinn plézi-l la. Sèké Batèm nan fè nou vi-n fè yon sèl avèk Jézu, sé pa nou minm k-ap viv ankò, sé Jézu-Kri k-ap viv nan nanm nou. Nou vi-n tounin manb kò Jézu-Kri. Batèm nan asosié nou avèk li. Lè Jézu té fèk fèt la, la Trè Sint Vièj Mari avèk Sin Jozèf té blijé pati Éjip avèk li. Lè Èròd mouri, lanj la avèti Sin Jozèf, li fè-l tounin avèk Jézu épi la Trè Sin Vièj Mari. Sé pèp Israèl Bondié fè vi-n sot Éjip, sot nan légzil, fè yon égzòd. Sé konsa Sin Matié éspliké sa, lè-l fè sonjé sa Bondié té di osijè Israèl lè-l desidé fè-l fè égzòd la: "Mouin rélé Pitit mouin-an sot légjip" (Mt 2, 15; Os 11, 1; Gn 4, 23). Sé sèl Pitit Bondié-a ki fè égzòd, sé sèl Pitit Bondié-a ki "transfigiré", sé sèl Pitit Bondié-a ki "résisité". Sé antan nou asosié avèk li, nou fè yon sèl avèk li, nou vi-n tounin manb kò-l nan batèm nan, nou minm tou n-ap fè égzòd li fè-a, n-ap chanjé fas nan transfigirasion-l nan, n-ap jouinn yon lòt lavi nan réziréksion-l nan. "Limière souvé nou Jézu-Kri détrui lanmò-a, li kléré lavi-a" (2 Tm 1, 10).

(Mapé chanjé figi, Pitit mouin, rinmin mouin, plézi mouin. Abraam, Abraam, kité péyi ou-a).

*

"Min yon voua sot nan sièl la, l-ap di: "Sa-a sé Pitit mouin-an mouin rinmin-an, nan li mouin jouinn plézi-m, kouté-l" (Mt 17, 5: = antienne à Magnificat, 1ères vêpres 2^e dim car).

Sin Léon Le Gran éspliké sans lévanjil la, ki montré nou kijan Jézu-Kri chanjé figi-a. Li di sé tankou "avaloua" rézireksion-l nan li té vlé bay Apòt yo, pou-l montré yo davans plas soufrans ak lanmò-a sou rout lavi ki pap janm fini-an (Sermo 51, 3-4.8:PL 54, 310- 311.313; cf Liturgia Horarum II, Vatican, 1974, 117-118, office de lecture 2^e dim car). Li fè sonjé paròl Sin Pòl di Romin yo ak Korintyin yo: soufrans tan sa-a pa anyin dévan bèlté-a ki gin pou-l dévoualé nan nou-an (Rom 8, 18), paské ti traka n-ap sibi pandan yon ti moman-an, l-ap préparé yon foul bèlté ki pap janm fini, k-ap dépasé tou sa nou t-a kapab imajiné (2 Co 4, 17). Minm jan Sint Ogustin té di nan prémié Dimanch Karèm nan: Jézu kité Satan éséyé-l, pou-l aprann nou ranpòtè laviktoua sou li-a (Ps 60, 2-3; CEL 39, 766; Liturgia Horarum II, 66-68), konsa tou Sin Léon le Gran montré nou soufrans la, sé yon sinp jalon sou rout bèlté-a. Tan Karèm nan gin pou-l débouché nan tan Pak. Fènoua gin pou-l sédé plas bay Limiè-a. Sé sans lévanjil tranfigirasion-an. Sé pou rézon sa-a dépi nan dézièm Dimanch Karèm nan yo prezanté nou li. Karèm nan sé pa soufri pou péyé fot. Sé maché nan dézè pou nou rivé nan péyi koté lèt ak mièl ap koulé. Sin Léon le Gran sité pasaj lèt koté Sin Pòl di Kolosyin yo: nou mouri, lavi nou kaché avèk Jézu-Kri nan Bondié, lè Jézu-Kri a parèt, li minm ki lavi nou, lè sa-a nou minm tou n-a parèt ansanm avèk li, plin bèlté (Gal 3, 3-4). Lavi n-ap viv nan sièl la, sé dépi koulié-a n-ap viv li, sof li pa ko parèt klè, toutotan anvlòp kò-a pa ko chiré. Lè tan-an ap rivé, moun ki korèk yo ap kléré tankou solèy nan péyi koté Papa yo Roua-a (Mt 13, 43; cf Dn 12, 3). Si Sin Léon sité pasaj sa-a ki nan finisman parabòl bon sémans la ak mové zèb la, sé yon inviasion li fè nou pou nou chèché konprann sans Karèm nan apati parabòl sa-a.

Gin pèsékision ki dékontrolé nou. N-ap mandé si sé pa yon échèk nou sibi. Pou dépi tan n-ap travay la, n-ap dépanse kò nou ak tan nou pou sèvis lòt yo, épi nan plas louanj, sé kritiké y-ap kritiké nou. Dézièm Dimanch Karèm nan indiké pou nou pa bliyé sa Mési Soufran-an té pasé, dapré paròl lékòl Profèt Izayi fè nou kalkilé: Mouin t-ap di: "sé pou bontan mouin trakasé kò-m, sé pou anyin, pou van mouin dépanse fòs mouin". Époutan doua-m té avèk Granmèt la, rékonpans mouin té avèk Bondié-m nan (Is 49, 4; cf 1 Th 2, 1; 3, 5; Ph 2, 16; Ga 2, 2; 2 Co 6, 1). Nou kòmansé rout Karèm nan, Chémin-d-

Koua-a, Égzòd la. Nou pa doué dékourajé. Tout difikilté nou rankontré sé pou nou konsidéré yo tankou sinp bariè sou rout la. Si nou pa kapab voltijé yo, n-a pasé anba, dapré konsign Sint Tèrèz lanfan Jézu ba nou, lè-l fè sonjé kijan-l té pasé anba vant choual la ki té kanpé an travè pötay jadin-an. Granmoun yo té blijé fè tout tou-a. Ti moun yo minm glisé kò yo tou sinp anba vant li, yo travèsé alèz. Nan pouin difikilté ki pou frinnin rout nou. Yo kapab fè nou pèdi tan, pran réta. Min n-ap kontinuyé kan minm. Soufrans ak lanmò sé pa garaj, sé pasaj. Nou gin mòn pou nou monté. Dèyè mòn sé mòn, min apré dènié mòn nan, sé limiè Granmèt la k-ap kléré fas nou. Épi plis n-ap monté, sé plis l-ap fè figi nou pi kléré (2 Co 3, 18; Ps 84, 8).

Préfas lamès Transfigirasion-an avèk Dézièm Dimanch Karèm nan insisté sou ròl soufrans ak lanmò-a k-ap kondui nan bèlté-a. Sé lansègman Sin Léon le Gran ki di: "Nan Transfigirasion sa-a, sa [Jézu-Kri] vlé fè sitou, sé ouété bariè lakoua-a nan kè patizan yo, pou rabèsman soufrans li aksépté ak tout volonté-l la pa-t troublé lafoua yo, yo minm li té gin pou-l té dévoualé roté ran-l ki kaché-a" (ib). Min gin yon lòt bagay tou Sin Léon Le Gran ajouté, épi ki pa gin mouins valè pasé sa-a, jan-l fè konstaté-a: sèké Jézu-Kri sé Tèt la, légliz la sé Kò-a. Bèlté ki nan Tèt la, sé garanti bèlté Kò-a ap ginyin tou. Sé poua Jézu montré-l davans. Sé sa Sin Léon Le Gran ajouté apré premié ésplikasion-an. Voua nan sièl la di: "Sa-a sé Pitit mouin-an, sa-m rinmin-an. Nan li mouin jouinn tout plézi-m, kouté-l" (Mt 17, 5). Dépi nan Batèm nan sièl la té déchiré, Kolonb la té parèt sou tèt Jézu, Voua Papa-a té di: "Sa-a sé Pitit mouin mouin rinmin-an, ki gin tout favè-m: (Mt 3, 17; cf Mc 1, 11; Lc 3, 22). Sé tout pèp la ki pitit Bondié (Is 63, 16.19). Li déklaré Bondié sé Papa-l nan lansyin Téstaman. L-ap tann Bondié réponn li li minm sé pitit li li yé (Is 64, 11). Li mandé pou-l chiré sièl la pou sa, pou-l désann (Is 63, 19). Sé nan Jézu-Kri Bondié bay pèp la répons sa-a, jou batèm nan, sign lanmò-a, lè sièl la chiré-a (Mc 1, 10), minm jan voual Tanp la ap chiré jou Vandrédi-Sin-an (Mc 16, 38). Nan Tranfigirasion-an, sign Réziréksion-an, apèprè minm paròl sa yo répété, pou montré sa-k konsèné Tèt la, li konsèné Kò-a tou. Minm jan nou patisipé nan soufrans li ak lanmò-l la, sé konsa tou n-ap patisipé nan Réziréksion-l nan (1 Tm 2, 11). Sé poua dépi koulié-a nou déjà nan bèlté-a avèk li kòm manb Kò-l. Sa nou yé-a kaché, yo pa ouè-l. Li gin pou-l parèt klè yon lè.

Moyiz avèk Éli ki ankadré Jézu nan Transfigirasion-an, sé moun dézè yo yé. Moyiz pasé karant jou ak karant nuit nan mon Sinayi-a, "en quarantaine" (Ex 34, 28). Éli maché karant jou ak karant nuit nan dézè-a pou-l rivé sou minm mòn sa-a (1 R 19, 8). Jézu pasé karant jou ak karant nuit nan dézè-a (Mt 4, 2). "Quarantaine" sa-a, sé silans ki vlopé nou, pou pèmèt nou kouté Bondié pi byin. Karèm nan, sé tan spésial pou lansègman Krétyin. Sé nan

èpòk sa-a sitou Chèf légliz yo bay fidèl yo lansègman ki solid, tankou konsign Karèm Pap la voyé, Lèt pastoral Èvèk yo adrésé, rétrèt paskal kiré yo fè, "quarante heures" Pè yo préché nan parouas yo...Karèm nan gin karant jou. Sé yon chif ki vlé di yon tan ki plin nèt. Sé minm tan sa-a ki prezanté dévan nou, pou ofri nou lagras la, tan favè-a, jan Sin Pòl di nou (2 Co 6, 2), antan l-ap sité Profèt Izayi (Is 49, 8): "Nan moman favè-a, mouin kouté-ou, jou délivrans la mouin poté-ou sékou".

N-ap mandé Manman Mari pou-l fè nou pa résévoua favè sa-a pou bon tan (2 Co 6, 1), pou-l raplé nou sa-l té di moun yo ki t-ap sèvi nan nòs Kana-a: "Ninpòt ki sa [Jézu] di nou, sé pou nou fè-l" (Jn 2, 5), antan l-ap fè paròl Papa-a kontinyé sonnin nan zòrèy nou: "Sa-a sé Pitit mouin-an, sa-m rinmin-an, nan li mouin jouinn plézi-m, KOUTÉ-L" (Mt 17, 5). Nan mézi nou kouté-l tout bon vré, nou obéyi-l, fas nou ap chanjé, figi nou ap kléré, jan Psòm nan di-a: "Moun k-ap gadé nan diréksion-l, limiè ap kléré fas li" (Ps 34, 6). Transfigirasion sé yon chanjman sot nan yon mòd lavi pasé nan yon lòt. Sé pou Karèm nan fè chanjman sa-a pou nou, sé pou-l transfomé nou, pou-l "transfigiré" nou, pou nou kapab chanté ak tout kè nou: "M-apé chanjé figi...M-apé chanjé chémin...M-apé chanjé lidé..."

transfigurer: Mt 17, 2; Mc 9, 2; Ph 3, 21

transformer: Jdt 10, 7; 2 Mac 9, 14; Jer 4, 7; 37,15; Ez 21, 31; 35, 3; R 12, 2; 1 Co 15, 51.52; 2 Co 3, 18

transformation: Ep 4, 23

briller: 2 Sm 22, 15; 2 R 3, 22; 2 Ch 4, 20; Est 10, 3c; 1 Mac 4, 30; 6, 39; 12, 29; 2 Mac 1, 22; Job 3, 4; 8, 6; 18, 5; 22, 28; 29, 3; 33, 30; Pr 23, 31; Sg 5, 6; 17, 6; Si 26, 17; 32, 16; 38, 34; 42, 16; 43, 8; 50, 7; Ba 3, 34.35; 6, 59.66; Mal 3, 20; Mt 5, 15.16; 24, 27; Ac 27, 30; 2 Co 4, 4.6; Ph 2, 15; 2 p. 1, 19; 1 Jn 2, 8; Ap 1, 16; 18, 23.

*

* *

DÉZIÈM DIMANCH KARÈM B

Dimanch pasé, yo té louvri karant jou Karèm yo avèk karant jou délij la, ki té édé nou sonjé BATÈM nou. Tout tan Karèm nan ap fè nou sonjé Batèm sa-a, spésialman chak dimanch, jous nou rivé nan Dimanch Pak la. Jodi-a yo fè nou sonjé nou sé Pitit Bondié nan Jézu-Kri, sèl Pitit li-a. Bondié Papa-a di: "Sila sé **PITIT** mouin-an, sa mouin rinmin-an kouté li" (Mc 9,7; cf Ex 23,21; Dt 18,15).

Vré Pitit Bondié-a, sé Jézu-Kri. **Roua** yo nan lansyin Téstaman-an, **ni saj** yo, ni **tout pèp Israël** la, yo té rélé yo pitit Bondié. Bondié voyé di Faraon konsa: "Kité Israël, premié pitit mouin-an, pati al nan dézè-a pou-l fè yon sèvis sakré pou mouin" (Ex 2,22-23). Bondié sé Roua-a jou y-ap sakré-l la: "Ou sé pitit mouin, jodi-a minm mouin anfanté-ou" (Ps 2,7). Sé li minm minm ki di osijè Salomon, pitit roua David la: "M-ap yon Papa pou li, l-ap pitit mouin" (2 Sam 7,14). Épi li di pou tout désandan roua David yo: "L-ap rélé-m Papa, m-ap rélé-l pitit mouin" (Ps 89,27s). Osijè saj la y-ap fè pasé tray la, yo di konsa: "Sé pou Granmèt la délivré-l, si-l rinmin-l. Li prétann Bondié sé Papa-l" (Sg 2,16; cf Si 23,1). Tout pèp Israël lapriyé Bondié nan égzil li, li di: "Abraam pa rékonèt nou... Sé ou minm ki Papa nou" (Is 63,16; 64,7).

Tou sa sé té yon fason pou yo palé. Sé kòm si Bondié té adopté pèp Israël la, saj la, roua-a. Jézu minm sé Pitit Bondié-a tout bon vré, li minm ki vi-n pran plas pèp Israël la, li minm ki vré saj la, li minm ki vré roua-a. Li plis pasé yon sinp moun Bondié adopté. Li vi-n poté yon mèsaj ba nou pou nou obéyi-l nan lafoua, pou nou kapab fè yon sèl avèk sa-l yé kòm pitit Bondié-a, antan nou résévoua batèm nou kòm sign lafoua nou. Yo rélé nou pitit Bondié; épi sé sa nou yé vré, sé Sin Jan ki di nou sa (1 Jn 3,1).

Min Bondié kòmansé réalizé sa Abraam pa-t réyisi fè-a (Gn 17,4; 22,1-19). Bondié rinmèt sèl Pitit li-a nan lanmò lakoua, pou nou tout nou kapab vi-n tounin pitit li vré (Rom 8,32). La Trè Sint Vièj Mari, nan pié lakoua-a, pran plas Abraam, zansèt li nan lafoua ak lobéyisans. Li té déjà ofri Jézu nan kay sakré-a; lè Siméyon té anonsé-l yon épé t-ap chiré kè-l la (Lc 2,22-35). Lè sa-a, la Trè Sint Vièj Mari té kanpé minm koté Abraam té ofri prop pitit li-a dépi konbyin sièk tan-an. Sou mòn nan péyi Moriya sa-a, koté kay sakré-a té vi-n bati-a. Sou lanplasman koté Abraam té lonjé min-l pou-l té sakrifyé pitit li-a, sé la minm tou la Trè Sint Vièj Mari ofri Jézu-Kri (Gn 22,2= 2 Chr 3,1; 1 Chr 21,15). Lè Abraam t-ap monté mòn nan avèk Izaak pitit li-a, ti pitit la té di-l: "Papa, min kouto-a, min boua-a, min difé-a, ébyin koté mouton-an pou sakrifis la?" Abraam té réponn li: "Sé Granmèt la k-ap okipé

késion mouton-an" (cf Gn 22,7-8). Ébyin Sin Jan Batis réponn késion ti Izaak la, lè-l ouè Jézu ap pasé bò larivière Joudin-an, li di: "Min Mouton Bondié-a" (Jn 1,29). Lè sa-a Jézu té sot nan batèm dlo Joudin-an. Li té gin yon lòt batèm pou-l té résévoua ankò (Mc 10,38; Lc 12,50). Sé batèm la-koua-a, Koua sa-a li té poté sou do-l la minm jan ti Izaak té poté boua-a pou sakrifis la (Jn 19,17). Jézu sé Prèt la, sé lotèl la, sé sakrifis la.

Lè l-ap mouri, l-ap kité Téstaman-l nan min Manman-l, Mari, l-ap di: "Min pitit ou...minm Manman-ou" (Jn 19,26-27). Minm jan Bondié té rékonpansé lafoua ak lobéyisans Abraam antan-l fè-l papa yon kantité nasion, épi li fè désandans li ranpòté laviktoua sou lènmi-l yo, konsa tou li béni la Trè Sint Vièj Mari, antan li fè-l vi-n Manman tout moun, li fè-l ranpòté laviktoua sou Satan gras a lobéyisans lafoua-l. Mari pa ézité. Tout Apot yo té pati. Sé apré Jézu fi-n lévé vivan y-ap sonjé sa-k té pasé nan Transfigirasyon-an (cf Jn 2,22; 14,26; 12,16; Lc 24,32; Jn 20,9). La Trè Sint Vièj Mari kinbé flanbo lafoua-a byin limin. Li pa réprann paròl li. Li té fi-n di: "Sé pou sa fèt pou mouin jan-ou vlé-a" (Lc 1,38). Li alé jous nan bout chémin-an. Nou bézouin-l pou-l édé nou kinbé fèm nan lafaoua ak lobéyisans nou doué Bondié kòm Pitit li, pou nou préparé gran angajman nuit Pak la, koté n-ap réfè promès angajman Batèm nou-an. Li sé Manman nou, li sé Mèt nou; n-ap pasé pa lintemédiè-l pou nou chouazi Bondié pou Papa nou, pou Mèt nou, pou nou pitit li, pou nou ésklav li. Sé li minm k-ap di sa-l té di sèvan yo nan nòs Kana-a: "Ninpòt kisa-l di nou, sé pou nou fè-l" (Jn 2,5). Sé davans li akòdé voua-l ak voua Papa-a k-ap di: "Sila-a sé Pitit mouin-an, sa-m rinmin-an, kouté-l" (Mc 9,7; cf: Mt 17,5; Lc 9,35). Sa té pasé sou mòn Tabò-a. Kilès mòn sa-a? Sin Monfò di nou, ni mòn Tabò sa-a, koté Papa-a palé-a, ni mòn Gòlgota koté Pitit la mouri-a, ni mòn Siyon-an koté Mari té déjà ofri Jézu nan kay sakré-a, mòn sa-a ki pa dèt pasé minm mòn péyi Moriya koté Abraam té ofri pitit li Izaak la, tout mòn sa yo, sé Mari yo réprézanté, mòn sa-a ki ro anlè tout mòn yo (Is 2,2-3); 4,5; Ps 87,1; cf Prière Embrasée 25; Oeuvres complètes 684), koté Bondié prézan, koté nou bézouin kouté lanségnman Karèm sa-a sou Batèm nan, pou nou viv angajman Batèm nou pi byin. N-ap préparé nou nan lobéyisans ak lafoua Manman nou Mari, vré Pitit Abraam nan (Lc 1,55), pou nou fè yon sèl ak Jézu-Kri nan lanmò li sibi sou Koua-a pou-l lévé byin vivan-an. Sé Batèm nou ki plonjé nou nan lanmò-l pou-l lévé nou nan lavi-l. Konsa n-a pitit Papa-a tout bon vré. Sa-l di Jézu-a, l-a pou nou tout: "Sila-a sé Pitit mouin-an, sa-m rinmin-an, Kouté-l" (Mc 9,7).

Jézu pran Piè, Jak avèk Jan, li minnin yo **pou kont yo** avèk li sou yon mòn ki **yon koté apa**. Lè vizion-an ap fi-n pasé, lè Moyiz ak Éli ap fi-n pati, y-ap ouè Jézu **pou kont li** avèk yo ankò. Min **Moyiz** avèk **Éli**, sé moun ki abitué viv nan **dézè**, pou kont yo. Moyiz té pasé karant jou ak karant nuit sou mòn Sinayi-a, lè-l t-ap résévoua laloua-a nan min Bondié, épi li té pasé karant ané nan dézè-a pou-l kondui Pèp Bondié-a nan péyi Bondié té promèt la (Ex 24,18; 34,28; Ps 95,10). Éli té pasé karant jou ak karant nuit ap maché nan dézè-a pou-l fè pèlerinaj jous sou mòn Sinayi, nan yon moman li t-ap travèsè difikilté ak pèsékision pou rélijion zanzèt li yo (1 R 19,8). Sé yo dé-a ki ankadré Jézu sou mòn nan.

Dimanch pasé nou té tandé dlo délij la té fi-n tonbé karant jou ak karant nuit sou tè-a épi Bondié té fè ak-an-sièl parèt pou montré li signin kontra avèk lèzom pou-l pa janm pini tè-a anko jan-l té fè-a. Nou té konstaté sé sign kontra Batèm nan, dapré sa Sin Piè té di nou nan premié Lèt li-a (1 p. 3,20-21). Jodi-a, antan Jézu bingnin ak limiè épi rad li vi-n blan kon koton, nou sonjé limiè Batèm nan avèk rad blan yo dépozé sou moun ki fèk batizé-a, pou fè nou pran konsians Batèm nan fè nou antré nan chémin limiè antan nou fini ak travay fènoua, li fè figi nou kléré minm jan lè Moyiz té désann sot sou mòn Sinayi-a, apré konvèsasion li té ginyin ak Bondié pandan karant jou ak karant nuit la (Ex 34,29; cf 2 Co 3,7; 4,6; Ps 34,6; 36,10; 84,8). Batèm nan tou fè nou chanjé rad. Nou kité rad dèy la (Is 25,7), rad péché-a (Za 3,3), sa-k té vlopé Adan ak Èv la, lè yo té chasé yo sot nan Paradi-a (Gn3,7.21; cf Is 60,20). Li abiyé nou ak rad Jézu. Sé yon sign nou chanjé mantalité nan yon konvèsion ki sinsè, jan nou abitué chanté nan kantik la ki di: "M-apé chanjé figi, m-apé chanjé chémin, m-apé chanjé lidé...".

Karèm nan sé yon tan ki fè nou antré nan yon séri chanjman ki fon. Sé yon tan pou nou chita yon koté apa, pou kont nou avèk Jézu, pou n-ap kalkilé ki mové chémin nou té pran, ki sa pou nou fè pou nou chanjé (Os 2,9.16; Lc 15,17-18), pou nou pa tonbé nan falèz. Sé moman pou nou chanjé lidé, pou nou ouè ki mové lidé nou té ginyin ki t-ap fè nou paré kèk mové kou pou nou fè prochin nou, pou nou tiré vanjans sou li, pou nou chèché intèrè, avantaj sou li, pou nou fè profitè sou li. Tou sa, nou gin pou nou fè yon chanjman. Sé vré jèn sa-a lékòl Profèt Izayi-a di ki fè Bondié plézi (Is 58,1-12). Dimanch jodi-a, sé dimanch ki mété insistans sou Transfigirason. Batèm nan sé yon transfigirason. Lè-ou chanjé figi, ou fè yon transfigirason. Sèlman, sé pa sou déyò sèlman chanjman-an fèt, sé chanjman anndan-an ki parèt sou pa déyò. Yon moun ki chanjé tout bon vré anndan kè-l, l-ap montré déyò nan fason l-ap viv sé pa li minm ankò k-ap

viv, sé Jézu k-ap viv nan nanm li. Moyiz pa-t kapab anpéché limiè figi-l kléré (2 Co 3,3; Ex 34,29). Prézans lagras nan kè la Trè Sint Vièj Mari parèt, lè-l rivé nan kay Élizabèt. Li vi-n pou-l sèvi. Léspri ki nan kè-l la travèsè sou Élizabèt, sou Jan-Batis, sou Zakari (Lc 1,39-79). Lè-l rivé nan nòs Kana, li tèlman abitué okipé afè Bondié nan fon kè-l, li ouè bézouin lézòm sou déyò, li rémaké yo manké divin, li fè démach kot Jézu pou-l ba yo divin (Jn 2,1-11), an minm tan pou-l fè yo jouinn lokazion mét lafoua nan sa Jézu yé tout bon vré-a: Mési-a (Redemptoris Mater, 21, édition polyglotte cf vaticane 1987, p. 43ss).

Yon moun ki "**solitaire**", sé yon moun ki "**solidaire**". Si-l ralé kò-l yon koté apa pou kont li avèk Jézu, sé pou-l kapab konstaté pi byin ki sa-k jinnin-l ki fè li pa ko kapab sèvi Granmèt la pi byin pasé sa kòm instriman pou délivrans frè-l yo. An fèt, sa-k jinnin-l, sé rasi-n péché-a. Li gin pou-l batay kont pròp tèt li, pou-l vi-n gin plis souplès nan min Bondié. Karèm nan sé yon tan ki rézèvè pou sa. Sa pa vlé di sé nan dézè pou nou rét tout tan. Sin Piè té tèlman santi li alèz lè-l oue Moyiz ak Éli ankadré Jézu sou mòn nan, li mandé Jézu pou yo drése toua tant, youn pou li, youn pou Moyiz, youn pou Éli. Li pa-t konnin sa-l t-ap di. An tou ka li pa-t konnin ki sa pou-l té di. Li di kichòy kan minm. Époutan l-ap gin pou-l désann. Jézu té déjà fè-l konnin si-l vlé suiv li, pou-l rivé nan koté l-ap alèz nèt la, sé pou-l komansé aksépté difikilté k-ap jinnin chémin-l nan Koua-a l-ap poté chak jou-a (Lc 9,53). Sin Piè té palé san-l pa-t konnin ki sa pou-l di. Min Bondié Papa pran laparòl, li di sé kouté pou nou **kouté** Pitit li-a, sa-l rinmin-an (Mc 9,7).

Tan Karèm nan sé yon tan pou nou rantré nan fon kè nou, pou nou aprann kouté Granmèt la k-ap palé avèk nou. Sé yon tan pou nou mét kadna sou bouch nou (Ps 141,3), pou nou pa trò présé palé, pou nou pa trò présé jijé, pou nou pa trò présé kondané (1Co 4,5), pou nou gin pasians, pou nou kité limiè Granmèt la rivé, pou-l mét tout bagay nan gran jou (R 2,16; Lc 12,2). Kòlè lèzòm pa réglé jistis Bondié (Jc 1,20). Jézu bay Apot yo konsign silans sou sa yo ouè ak jé yo ak sou sa yo tandé ak zorèy yo sou mòn nan, joutan li lévé vivan. Sa vlé di pandan tan Karèm nan jous jou Pak la, nou t-a doué suiv konsign silans sa-a chak moun dapré fason pa-l. Si nou trò présé pou nou kominiké yon nouvèl ki kapab tann, pran tan nou avan nou déklaré-l. Sé yon fòm sakrifis pèsòn pap ouè. Papa nou ki nan sièl la ouè nan fon kè nou, l-ap rinnèt nou sa (Mt 6,4.6.18).

Tan karèm nan sé yon tan pou nou sakrifé bay Bondié sa nou pi rinmin-an. Si Bondié Papa-a di "Sa-a sé Pitit mouin-an, sa-m rinmin anpil la" li vlé fè

sonjé sa-l té di Abraam osijè Izaak la, lè-l té mandé-l pou-l té sakrifié-l ba li-a, li té di-l: "Pran **pitit ou-a, sèl pitit ou-a, sa- ou rinmin anpil la**, Izaak, al nan péyi Moriya-a, ou-a ofri-l ban mouin laba-a sou mòn nan m-a montré-ou la" (Gn 22,2; cf Jn 3,16). Sé sou mòn Kalvè-a Bondié Papa-a ofri sèl Pitit li-a, sa-l rinmin anpil la. Li té déjà ofri-l nan Tanp la, sou mòn sa-a ki raplé koté Abraam te ofri pitit li Izaak la. Min Bondié pa-t kité Abraam fé sakrifis sa-a; li té ranplase-l avèk yon bélié. Izaak té mandé: "koté mouton pou sakrifis la?" Abraam té di "Sé Granmèt la k-ap okipé sa, pitit mouin" (Gn 22,8). Jan-Batis ap di: "Min Mouton Bondié-a ki ouété péché sou tè-a" (Jn 1,29); sé Jézu li minm. Sin Pòl di "Sèl Pitit Bondié-a, li pa ménajé-l pou nou, li ofri-l pou nou" (Rm 8,31-34). Sin Jan di: "Bondié si tèlman rinmin nou, li bay sèl Pitit li-a pou nou" (Jn 3,16).

Tan Karèm nan mandé nou pou nou pran agajman Batèm nou osérié. Si nou fè youn tout bon vré avèk Jézu-Kri, sé pa sèlman sou mòn Transfigirasion-an pou nou drésé toua tant koté nou santi nou alèz la, min sé pou nou aksépté pasé nan lanmò-l pou nou lévé nan rézirkéksion-l. Sin Pòl di sé chak jou pou n-ap mouri avèk Jézu-Kri nan tout sikonstans, pou nou kapab asosié nan bèlté lévé vivan-l nan (1Co 15,31; 2Tm 2,11). Si nou sou mòn Tabò avèk li nan Transfigirasion-an, sé pou nou aksépté tou pou nou rété Golgota ansanm avèk li nan pié lakoua-a. Jodi-a Litiji-a palé nou osijè Transfigirasion-an, dépi nan dézièm dimanch karèm nan, pou raplé nou tan karèm nan ap débouché sou dimanch Pak. Sé poussa tou Jézu té chanjé figi dévan Apot yo. Sé toua minm Apot yo k-ap akonpagné-l sou mòn Olivie-a nan asouè Jédi-Sin-an (Mc 14,33; cf 9,2), lè l-ap batay ak lanmò-a, lè l-ap di: "Papa, si kalis sa-a té kapab pasé san pou-m pa bouè-l, min sé volonté-ou ki pou fèt" (Mc 14,37). Li té vlé montré yo davans li t-ap lévé sot nan pami mò yo, pou yo pa-t dékourajé lè yo té komansé ouè l-ap pasé mizè ak souffrans, jan Préfas Transfigirasion-an di-a. Gin défoua nou kité intéré nou palé nan plas dévouman-an, lè Bondié ap fè nou sign pou-l mandé nou yon bagay ki gin anpil inpòtans pou nou. Sé la li vlé ouè si nou rinmin-l tout bon vré. Sé pa sa nou pa bézouin pou nou ba li (Mal 1,8-14). Pòv vèv la té mété tout ti lajan-l nan kèt la. Jézu té di li bay pi plis pasé tout moun rich yo ki vidé gro lajan yo, paské sé nan sal bézouin-an li bay, tou sa-l té ginyin pou-l viv la (Lc 21,1-4), minm jan ak pòv vèv Sarépta-a, ki té bay Profèt Éli dènié ti moso pin li té fi-n kuit la (1 R 17,7-24). La Trè Sint Vièj bay tou sa-l ginyin kòm Sèvant Granmèt la, li asosié nan ofran Jézu ap fè sou koua-a. Minm épé-a travèsè kè-l (Lc 2,35). Minm jan Bondié té béni Abraam pou jès lafoua-l la, antan-l promèt li pou-l vi-n papa tout pakèt ras yo (Gn 22,16-18), konsa nan pié Koua-a, antan la Trè Sint Vièj Mari ap ofri

Sèl Pitit li-a Jézu-Kri, li vi-n Manman tout pakèt pèp yo. Bénédiksion Abraam nan réalizé nan li (Lc 1,55). Moun ki simin ak dlo nan jé, yo rékolté ak kè kontan (Ps 126,5; 2 Co 9,6; Pr 11,24s). Si grinn blé-a ki tonbé nan tè-a pa mouri, li rété pou kont li, si-l mouri, l-ap donnin frui san foua plis (Jn 12,24).

Niaj la kouvri Apot yo, minm jan léspri Sin-an té kouvri la Trè Sint Vièj Mari ak lonbraj li (Lc 1,35). Sa vlé di sé nan fènoua pou nou ouè diréksion chémin volonté Bondié. Sin Jan-d-la-Koua di sé ak réyon "fènoua" Bondié ap kondui nou. Lè Bondié gin yon bagay pou-l déklaré nou, li komansé angoudi nou (Gn 15,12; cf 2,21), pou nou pa konprann sé ak fòs ponyèt nou nou jouinn intèvansion-l.

Déklarasion Papa-a fè-a: "Sila-a sé Pitit mouin-an, sa-m rinmin anpil la kouté-l!", sa fè nou sonjé sa la Trè Sint Vièj Mari té di sèvan yo nan nòs Kana-a: "Ninpòt sa-l di nou, sé pou nou fè-l" (Jn 2,5). La Trè Sint Vièj Mari, sé "éko" voua Papa-a. Apot yo désann sot sou mòn nan, yo kinbé paròl la nan kè yo; konsa la Trè Sint Vièj Mari té kinbé Paròl yo ak évènman yo nan kè-l, li t-ap kalkilé sou yo (Lc 2,19.51; cf 11,28). Karèm nan sé tan pou nou kalkilé sou paròl Bondié-a, pou nou réglé konpòtman nou sou li. Sa nésésité pou nou jouinn yon moman pou nou ralé kò nou yon koté pou kont nou avèk Jézu. Sint Bènadèt té ékri nan kanè rétrèt li kòm konsign: "mouin louvri jé-m, mouin ouè Jézu tou sèl". Sa vlé di nan tout moun ak nan tout sikonstans, nou doué chèché ouè **FIGI JÉZU K-AP KLÉRÉ**. Gin de foua Bondié mandé nou sa-l fi-n ba nou. Li fè tankou-l té fè pou Abraam ak pou Jòb, l-ap éseyé lafoua nou. Sé pou nou chèché ouè **FIGI JÉZU K-AP KLÉRÉ**. Okontrè lè konsa sé pou nou fè priyè Sint-Ogustin-an: "Granmèt, ban-m sa ou vlé mandé-m nan, épi apré sa ou mèt mandé-m sa ou vlé" ["da quod jubes, et jube quod vis"]. Gin dé foua, nou éseyé òganizé nou avèk pròp mouayin nou, antan nou mété Bondié ant parantèz (Gn 11,1-9; Ps 127,1; Jn 1,3b; 15,5), nou pasé tout kalité mak savon pou pròpté nou, antan nou bliyé dlo Batèm nan té déjà fi-n lavé nou, li déjà fi-n abiyé nou ak rad Jézu, ki kléré tou blanch tankou lanèj, tèlman pa gin okinn savon ki kapab fè rad vi-n blanch konsa sou tè-a. Plis n-ap froté ak mak savon sa yo, oubysin ak dèt kalité fèy..., sé plis rad blanch Batèm nou-an ap gin tach. Sé pou nou chèché ouè **FIGI JÉZU K-AP KLÉRÉ**. Gin dé foua malgré tout bòn volonté nou, fisèl la maré yon fason nou pa kapab défèt né-a. Nou viré problèm yo nan tout sans, san nou pa jouinn satisfaksion, tankou Apot yo ki kinbé paròl yo nan kè yo, y-ap chèché sa sa vlé di: "lè l-a lévé soti nan pami mò yo", tankou la Trè Sint Vièj Mari ki pa-t konprann répons Jézu té ba li,

lè-l té jouinn li apré toua jou nan Tanp la, min li té kinbé-l nan kè-l, li t-ap kalkilé-l (Lc 2,51). Sé pou nou chèché ouè **FIGI JÉZU K-AP KLÉRÉ**.

Tan karèm nan, n-ap kalkilé sou sa sa vlé di: "l-ap lévé vivan sot nan pami mò yo". Sé lévé-a ki inpòtan. Min pou gin lévé-a, fò gin mouri. Chak jou nan tout sikonstans n-ap mouri parapò a nou minm, pou nou lévé avèk Jézu, antan n-ap rénonse tout intèrè ak égoïs nou, pou nou koulé orientasion lés-pri nou ak panchan volonté nou nan moul Jézu. Si gin lévé, fò gin mouri, min pa gin mouri san lévé. Pa gin Vandrédi-Sin san Dimanch Pak. Pa gin tan karèm san tan paskal. Pa gin nannuit san lajounin. Psòm nan di: "**Sé nan limiè-ou nou ouè limiè**" (Ps 36,10). N-ap mandé Manman Mari, Nòtré-Dam de la Limiè, pou-l maché avèk nou nan nuit Karèm sa-a, nan dirék-sion dévan jou Dimanch Pak la (cf Redemptoris Mater 27), koté n-ap réfè promès Batèm nou, avèk chandèl nou limin nan min nou. M-apé chanjé figi, m-apé chanjé lidé, m-apé chanjé chémin".

*

* *

DÉZIÈM DIMANCH KARÈM C

Gn 15,5-18

Bondié kondui
Abraam déyò

yon fènoua épè ak yon
founèz k-ap fè lafimin

yon dòmi lou tonbé
sou Abraam

yon gro sézisman Ki moun ki pou fè-m
fènoua anvayi-l pè? dévan ki moun
pou-m tranblé

yon flanbo difé pasé Granmèt la sé limiè-
nan mitan bèt yo ki té m, chèché fas li, sé
séparé yo fas ou, Granmèt m-ap
chèché, pa viré fas ou
louin-m

sé konsa désandans ou
ap yé... Granmèt la
pasé yon kontra avèk
Abraam

lévé jé-ou gadé sièl la

Abraam kouè nan Mouin kouè m-ap ouè
Bondié byin Granmèt la sou
tè vivan yo

Tann Granmèt la

Ph 3,17-4,1

Jézu pran Piè, Jak ak
Jan li monté sou môn
nan

gin yon niaj ki rivé, li
kouvri yo

Piè minm ansanb ak
sila yo ki té avèk li-a,
yo té lou ak dòmi

Yo vi-n pè, antan y-
ap antré nan niaj la

l-ap réfè kò féblès aparans figi-l vi-n
nou-an, pou-l fè-l chanjé, rad li vi-n
sanblé ak kò bèlté-l blan, vi-n kléré... sé
la... Yo mété bèlté té Moyiz ak Éli ki
yo nan laront yo parèt nan bèlté-a

Sila-a sé Pitit mouin

sé nan sièl la péyi yo t-ap palé osijè
nou yé sòti-l la

Sé la n-ap tann Sila-a
k-ap vi-n sovè nou-
an

Kontra Bondié té pasé avèk Abraam nan, sé li minm sèl ki pran angajman ladan-l. Kanta Abraam, sé lafoua li té bay. Abraam t-ap dòmi ak yon dòmi di ki t-ap pézé byin lou sou li tankou Adan (Gn 15,12; cf 3,21), lè Bondié ap pasé-a (Job 4,13). Bondié angajé pou kont li nan kontra-a. Malgré péché pèp la, Bondié ap toujou rét fidèl, minm si nou minm nou infidèl, paské li pa kapab rénié pròp tèt pa-l (2 Tm 2,13). Sèlman pitit Abraam yo ap gin obligasyon pou yo angajé pròp tèt yo (Dt 29,11), pou yo pasé nan kontra-a, koté sé Bondié sèl ki té pasé lè Abraam t-ap dòmi-an (Gn 15,17). Mìn yo pa-t ré

fidèl nan kontra-a koté yo té pasé pou yo té angajé pròp tèt pa yo-a (Jer 34,13).

Bondié voyé pròp Pitit li-a, pou-l réparé mank sa-a. Li vi-n pran plas Israèl, pèp sa-a ki té pitit Bondié-a (Ex 4,22). Laloua-a (Moyiz) avèk profèt yo (Éli) sèvi-l témouin (Mt 5,17) nan Transfigirasion-an (Lc 9,30), lè niaj ak lonbarj ki té sou mòn kontra Sinayi-a vi-n vlopé-l la (Lc 9,34 = Ex 24,1-18). Sé li minm k-ap réalizé kontra obéyisans Pitit parapò a Papa-a (Lc 9,35). Sé nouvo Moyiz (Is 63,11) k-ap kondui pèp la pou-l fè-l soti sou tè péché-a (Lc 9,31).

Piè ak sa-k té avèk li yo gin yon gro dòmi lou ki t-ap pézé sou yo, minm jan avèk Abraam (Lc 9,32) Tankou Abraam, ki té mété lafoua nan Bondié ki té angajé nan kontra sa-a pou kont li-a, Piè ak sila yo ki té avèk li-a, yo gin pou yo obéyi Jézu, antan yo kouté-l (Lc 9,35), li minm sèl k-ap réalizé kontra-a ak san-l nan.

Moyiz ak Éli réprézanté moun ki an karantèn yo, sètadi ki té pasé karant jou sou mòn Sinayi-a (Moyiz: Ex 24,28; 34,28) oubyin ki té maché pandan karant jou jous sou minm Mòn sa-a (Éli = 1 R 19,8). Sé karant jou Karèm yo koté Bondié invité nou viv pi zanmi avèk li, pou-l aprann nou volonté-l pi pré. Lè voua-a fi-n palé Piè ak Jak ak Jan pa ouè pèsòn ankò, sof Jézu pou kont li (Lc 9,36), laloua-a (Moyiz) avèk profèt yo (Éli) disparèt. Jézu vi-n réalizé laloua-a ak profèt yo, antan l-a dépasé yo (Mt 5,17).

Dévan prézans Bondié sé nòmal pou gin sézisman (Lc 9,34 = Gn 15,12; Job 5,14; Dn 10,16; Lc 5,9; Is 6,5), akòz féblès lèzòm dévan pouvoua Bondié. Min Jézu vi-n transfòmé kò mizé nou-an pou-l ba-l minm fòm avèk kò bèlté-l la avèk fòs sa-a, li gin pou-l mété tout bagay anba lòd li-a (Ph 3,21). Davans anvan tan fènoua lakoua-a rivé Jézu té vlé montré Apot yo li té gin pou-l lévé nan bèlté-a (préfas Transfigirasion: mès 6 out), pou yo pa kité dékourajman anparé yo, sé poua li chanjé figi dévan yo sou mòn nan (Lc 9,28), pandan Moyiz ak Éli ap palé osijè "sòti" li t-apral réalizé Jérusalèm nan (Lc 9,31).

Granmèt, aprann nou lapriyè (Lc 11,1). Sé Apot yo ki té mandé Jézu sa, lè yo ouè kijan l-ap lapriyè. Yo té mandé-l aprann yo lapriyè tankou Jan-Batis té aprann patizan-l yo lapriyè. Jézu té aprann yo "Notre-Père" la. Lapriyè, sé pitit k-ap palé ak "Papa". Bondié Papa-a di Apot yo: "Sila-a sé Pitit mouin-an" (Lc 9,35). Lapriyè sé Pitit k-ap di: "Papa". Sé Papa k-ap réponn: "Pitit" (Is 63,16; Mc 1,11). Tan Karèm konsakré yon fason spésial pou lapriyè. Nan lapriyè-a, sé Jézu-Kri k-ap lapriyè nan nou tankou tèt nou, sé li minm n-ap lapriyè tankou Bondié nou, sé li minm k-ap lapriyè pou nou tankou Prèt nou,

dapré sa Sint-Ogustin di nou. Lapriyè sé pa palé anpil, sé rinmin anpil dapré sa Sint Tèrèz davila di nou. Sé pandan Jézu ap lapriyè (Lc 9,28-29), figi-l chanjé aparans rad li vi-n blan kon koton, Moyiz ak Éli parèt bò koté-l. Moyiz sé té yon moun lapriyè. Li té pasé karant jou ak karant nuit sou mòn Sinayi-a ap lapriyè. Lè-l désann sot nan mòn nan figi-l chanjé aparans tou, sé tankou réyon limiè k-ap kléré nan fas li atèl pouin pèp Israèl pa-t kapab fikse jé yo sou li. Moyiz té blijé mété yon voual sou figi-l lè-l ap palé avèk yo (Ex 33-34). Éli sé té yon moun lapriyè tou. Li té maché pandan karant jou ak karant nuit nan dézè-a jous li rivé sou minm mòn Sinayi-a, koté Bondié té dévan Moyiz la, li antré nan trou ròch la. Bondié avèti l-ap vi-n pasé, antan li voyé siklòn, tranbléman-tè, difé. Épi sé nan silans Bondié rivé (1 R 19,8-13). Lapriyè sé pa palé anpil, sé rinmin anpil. Gin dé foua nou pa konn sa pou nou di Bondié nan lapriyè nou. Min nou toujou kapab rinmin-l. Sint Tèrèz lanfan Jézu té malad, li té kouché, yo mandé-l si l-ap lapriyè. Li di oui. Yo mandé-l sa l-ap di Bondié konsa-a. Li réponn: "Mouin pa di-l anyin, mouin rinmin-l". Lapriyè sé pa palé anpil sé rinmin anpil, dapré sa Sint Tèrèz d-Avila di.

Bondié prézan tout koté (Gn 28,17; Ps 139,8; 25,4; 16,8; Dn 13,23). Li prézan yon fason spésial lè dé ou toua moun ransanblé o non-l (Mt 18,19; Jn 17,22). Li prézan nan nou, antan l-ap soutni nou nan légzistans la (Ac 17,28). Li prézan nan nanm nou, akòz lagras Batèm nan (Lc 17,21; 2 Co 6,16; 1 Co 3,16; 7,19; 6,19; Jn 14,23). Li prézan nan légliz, ki kay lapriyè (Mt 21,13; 1 R 8,32). Li prézan ak Kò, ak San, ak Nanm, ak Divinité Pitit li Jézu-Kri nan Tabènak la (Ap 21,3). Tout priyè doué kòmansé avèk yon akt dé foua nan prézans sa-a.

Lapriyè montré nou rabésé tèt nou dévan Bondié (Gn 18,27), pou nou rékonèt nou pa anyin (Pr 3,34; Lc 18,14), nou sé pòv péchè (Ps 32,5; 51,3-7). Sé mérit Jézu Kri ki fè nou kapab parèt dévan papa-l pou nou ofri-l priyè nou. Nou fè kò nou tou piti, lè nou ouè jan mèvèy li dépasé nou, jan kalité-l yo gran, Jan kòmandman-l yo égzijan. Nou régrèt nou pa fè sa yo mandé. Nou louvri kè nou pou nou résévoua favè yo, nou mété min nou nan min Granmèt la. Nou mandé pou-l fè nou maché sou chémin li trasé. Nou mandé konkou Sin yo. Nou répasé nan kè nou sa Granmèt la fè pou nou. Nou di-l mési. Nou ofri-l tou sa nou yé. Nou rélé Manman Mari. Sé konsa ti moun piti lapriyè.

Bondié té di Abraam: "Maché dévan-m, ou-a kòrèk nèt" (Gn 17,1).

Lapriyè Jézu fè jou jédi-Sin-an, li fè-l pou li (Jn 17,1-9), pou Apot yo (Jn 17,6-19), ak pou tout légliz (Jn 17,20-22; cf Esd 6,20; Lv 16,17). Nou bezouin konfians nan lapriyè nou (Mt 15,28; 21,22), pou nou konnin sé Pitit Bondié-a minm k-ap lapriyè nan nou. Tou sa-l mandé Papa-a, l-ap jouinn li. Sé nòm al pou nou kolé kò nou kot Manman Mari nan lapriyè nou (Ac 1,14; 2,3-4), pou nou mandé souf lavi léspri Sin-an, souf fòs léspri Sin-an, sous limié léspri Sin-an.

Lapriyè nou doué pran modèl pèsévérans A-n, manman Samuèl (1 Sm 1,10), vèv la k-ap mandé jij la plédé kòz li-a (Lc 18,3), Mat ak Mari k-ap fè Granmèt la sonjé Laza, frè yo (Jn 11,3), épi sitou Manman Mari ki fè Jézu bay divin nan nòs Kana-a (Jn 2,4). Lapriyè-a ap sèvi nou tankou néchèl Jakòb la, koté n-ap monté al chèché konsign nan min Bondié, épi n-ap désann pou nou réalizé-l nan aktivité nou (Jn 1,51; Gn 28,12). Sitou nou pa doué bliyé sé antan n-ap kouté Bondié n-ap aprann palé avèk li. Sé antan n-ap lapriyè n-ap aprann lapriyè. Nou gin anpil sikonstans ki prezanté dévan nou pou nou lapriyè, tankou: lanjélus matin, midi, asouè; chaplè avan lanmès; priyè avan manjé, apré manjé, pou di Bondié mèsi; chak foua lè-a sonnin; lè nou antré nan chanm nou; avann nou kòmansé travay... Nou gin mouayin légliz la mété pou soutni lapriyè nou tankou: dlo bénit, imaj, rélik, méday, indiljans... Sé pou nou aprann lapriyè pou prochin nou, pou moun ki résponsab nou, pou nanm yo k-ap soufri nan Pigatoua-a, pou légliz... Chak ti moman nou kapab fè sa yo rélé "oraison jaculatoire", sa vlé di yon ti paròl tou kout nou lansé nan diréksion Bondié, ki prézan nan fon kè nou. Sint-Ogustin éspliké nou kijan Sin Pòl invité nou lapriyè tout tan san rété-a (1 Th 5,17). Sé antan nou pa lagé anvè nou ginyin pou nou lapriyè-a. Toutotan nou kinbé anvè sa-a, lapriyè nou-an ap flanbé tankou yon boukan anndan fon kè nou, san nou pa konnin. Sé pou nou pran abitud gadé Bondié avèk sinplisité, avèk trankilté. Konsa tou sa n-ap fè, n-ap fè-l avèk lapriyè. Sé favè sa-a n-ap mandé Manman Mari pou tan Karèm nan.

Sin Luk sé Évanjélist lapriyè. Dépi nan kòmansman lévanjil jodi-a, nou tandé li di nou: Jézu té monté sou mòn nan pou-l LAPRIYÉ (Lc 9,28s). Lévanjil li-a kòmansé épi li fini ak késion lapriyè (Lc 1,10; 24,53). Nan Batèm Jan-Batis la sé antan Jézu ap lapriyè kolonb la parèt sou tèt li (Lc 3,21). Lè l-ap chouazi Douz Apot yo, li pasé tout lannuit l-ap lapriyè (Lc 6,12). Sin Luk toujou profité pou-l insisté sou lapriyè-a, jan Sin Pòl abitué fè.

Dimanch pasé sé té késion jèn. Jézu t-al nan dézè-a pou-l fè jèn. Jodi-a nou ouè li soti l-al nan mòn nan pou-l fè lapriyè (Lc 9,28). jèn, lapriyè, lacharité sé toua bagay tan Karèm nan insisté anpil sou yo, tankou nou kapab déjà

konstaté nan lanmès mèkrédi sann nan. Jèn nan pròpté rélasion nou ginyin avèk pròp tèt nou, lacharité-a pròpté rélasion nou ginyin avèk prochin nou, lapriyè-a pròpté rélasion nou ginyin avèk Bondié. Karèm nan tou sé yon tan ki mandé pou nou antré anndan fon kè nou; sé pou sa dépi mèkrédi sann li-tiji-a invité nou pou jèn nan n-ap fè-a, nou fè-l yon fason pou moun pa ouè, pou lacharité-a n-ap fè-a, nou fè-l yon fason pou moun pa ouè, pou lapriyè-a n-ap fè-a, nou fè-l yon fason pou moun pa ouè (Mt 6, 4.6.18); sa pa vlé di moun pa doué ouè sa n-ap fè (Mt 5, 16; Jn 3, 21; 15, 8; 1 Co 10, 31); min sa vlé di sé pa sa pou nou chèché an prémié. Sé nan dézè-a Jézu pati pou-l al fè jèn; si-l té vlé chèché fè moun ouè sa l-ap fè-a, li t-a al chita sou laplas kay sakrè-a, a tè-a ap fè jèn, pou fè moun gadé, pou yo di "Ala yon ti sin, gadé dépi konbyin jou li pa manjé". Sé sou mòn li ralé kò-l pou-l lapriyè, si-l té vlé fè sa pou moun kapab obsèvé-l pou yo di: "Ala moun pré Bondié, sé tou tan l-ap lapriyè", li t-a fè tankou Farizyin-an ki bonbé léstomak li nan prémié ranjé ban kay sakrè-a, pou-l ap palé byin fò, di Bondié tou sa-l fè ki bon (Lc 18,9-14). Karèm sé yon tan pou nou antré anndan fon kè nou, pou nou amélioré rélasion nou ginyin ant nou minm ak Bondié nan lapriyè, ant nou minm ak prochin nan lacharité, ant nou minm ak tèt nou nan jèn.

Konsa dimanch jodi-a nou ouè Jézu ki monté sou mòn nan pou-l lapriyè. Sin Luk sé évanjélist ki insisté anpil sou lapriyè. Dépi Jézu ap monté sot nan larivière Joudin-an apré Batèm li-an, sé pandan l-ap lapriyè-a léspri-a vi-n désann sou li sou fòm Pijon-an, dapré sa Sin Luk di nou (Lc 3,21). Lè l-ap chouazi Douz Apot yo, li pasé lannuit la l-ap lapriyè (Lc 6,12). Avan Piè té fè prémié déklarasyon lafoua-l la, Jézu té yon koté apa li t-ap lapriyè (Lc 9,18). Jodi-a nou ouè nan lévanjil la li monté sou mòn pou-l lapriyè (Lc 9,28), joustan figi-l chanjé (Lc 9,29). Lè l-ap bay lansègnman sou fason pou lapriyè, sé lè-l fi-n lapriyè patizan-l yo mandé-l pou-l aprann yo lapriyè tankou Jan-Batis té aprann patizan pa-l yo lapriyè (Lc 11,1). Lè-l nan jadin Jét-sémani-an, l-ap siyé gro gout san, l-ap lapriyè avèk insistans, l-ap répété minm bagay yo dévan Papa-l: "Si Kalis sa-a té kapab pasé san pou-m pa bouè-l, min sé volonté pa-ou ki pou fèt, sé pa pa-m nan" (Lc 22,41-45).

Sin Luk sé Évanjélist lapriyè. Li montré Jézu k-ap lapriyè. Jézu sé modèl pou fidèl yo. Li trasé chémin pou nou. Sé konsa Sin Luk montré nou minm tou sé nan minm souf sa-a pou nou pran réspirasyon nou. Dépi nan kòmmsman lévanjil li-a, li montré tout pèp la k-ap lapriyè, antan y-ap fè ofrann lansan-an nan asouè nan kay sakrè-a, lè lanj la té parèt dévan Zakari-a (Lc 1,10), sé tankou lapriyè Vèp. Toua foua pa jou spésyalman asouè, matin avèk midi, nou gin pou nou fè yon poz pou nou palé ak Bondié, dapré sa Psòm 55,18

di nou, ni Danièl 6,11. Liv Apokalips la montré kijan avan yo ofri lasan nan asouè, yo pran démi-èd-tan pou yo rété an silans (Ap 8,1), silans sa-a ki tan-kou zèl van-an ki sèvi Bondié chémin pou-l volé vi-n jouinn nou (Hab 2,20; So 1,7; Za 2,17; Sg 18,14), silans sa- ki sèvi Jézu kòm bèso nan kè la Trè Sint Vièj Mari (Lc 2,19.51). Sé zèl van-an ki sèvi Bondié pou-l vouayajé (1 R 19,9; Ps 104,4; Gn 3,8).

Sin Luk rapoté nou kijan Jézu mandé pou nou toujou lapriyè, san nou pa dékourajé (Lc 18,1) tankou vèv sa-a ki t-apral mandé jij la pou okipé kòz li-a, malgré jij la réfizé pandan anpil tan, alafin jij la blijé aksépté kan minm, pou madanm nan pa kasé tèt li. Jézu di nou Bondié pap tann nou kasé tèt li avann-l réponn nou, li sé Papa, kè-l sansib pou pitit li. Si yo mandé Papa yon pin, li pa bay yon ròch si yo mandé-l yon zé, li pa bay yon skòpion. Si yon papa sou tè-a gin kè sansib konsa pou pitit li, nou pa bézouin mandé pou Bondié, li mimm ki sous koté tout papa jouinn sansibilité pou pitit li yo (cf Ep 3,15).

Piblikin-an t-ap lapriyè nan kay sakré-a (Lc 18,13), avèk kè-l tou pòv, sé poua Bondié té kouté-l. Nan Akt-dèz-Apot, Sin Luk montré nou kijan chak tan-fò nan jounin-an pou nou lapriyè. Vè touazè-d-laprémidi, nou ouè Sin Jan ak Sin Piè k-ap monté nan kay sakré-a pou y-al lapriyè (Ac 3,1), lè yo géri mésié-a ki t-ap bouaté-a. Sé minm lè tou nou ouè Kònèy ap lapriyè, vè touazè, atèl pouin li vi-n gin yon vizion (Ac 10,3). Vè midi nou ouè Sin Piè k-ap lapriyè sou téras la (Ac 10,9), atèl pouin li vi-n gin yon vizion. É sé yo tou lè dé k-apral rankontré ansanm, ni li minm ni Kònèy. Malgré yo tou lé dé té nan dé kan, youn sou bò Juif (Sin Piè), lòt la sou bò payin (Kònèy), dé kan sa yo pa-t konn rankontré, tankou lénmi, chyin ak chat (Eph 2,14). Lapriyè anilé distans ki séparé moun yo. Minm si youn pa konprann lòt, minm si gin rayisans avèk inkonpréansyon ki séparé nou. Si chak moun ap lapriyè sou bò pa-l, tankou Sin Piè ak Kònèy. Bondié ap fè yo rankontré kan minm. Si-ou gin kont avèk yon moun épi ou anvi fè-l ésplikasyon, kòmansé rété yon bon moman an silans dévan Sin Sakréman-an nan légliz la, apré sa ou mèt lévé pou al fè-l ésplikasyon-an, si-ou sonjé sa toujou, paské laplipa di-tan ou-ap gin tan bliyé moun nan té fè-ou kichòy ki mal. Bliyé sa. Sé pa ou minm ki bliyé, sé Granmèt la ki anndan kè-ou, ki pran volonté-ou ak intéli-jans ou.ak sans ou, ki transfòmé yo, ki kalmé yo ki fè yon transfigirasyon pou ou anndan kè-ou, minm jan nan lévanjil jodi-a, nou ouè Jézu transfigiré pandan l-ap lapriyè-a. Lapriyè transfigiré nou, li fè nou chanjé mantalité, li fè nou ouè avèk dòt jé avèk jé Jézu-Kri. Gin yon mantalité vanjans k-ap an-rasinin anndan fon kè nou, pi fon pasé sa nou ta kouè, tankou parazit yo rélé

lamitié-a oubyin bab panyòl ki makònin nan branch boua-a, k-ap sousé tout fèy li yo, tout bon aksion nou-an poté tach mové défo sa-a, sé tout tan pou n-ap chèché éliminé tandans sa-a avèk lapriyé-a, paské nan lapriyé, sé Jézu li minm minm ki pran réaksion nou. Jan Sin Pòl di-a, sé pa mouin minm minm ankò k-ap viv, sé Jézu-Kri minm k-ap viv nan mouin (Ga 2,20). Sou lakoua-a Jézu-Kri ap lapriyé, l-ap di: "Papa, padonnin yo, yo pa konn sa y-ap fè" (Lc 23,34). Sé lè l-ap ofri tèt li an sakrifis la, vè touazè-d-laprémidi, lè yo té ofri sakrifis lansan-an (Si 50,5).

Jézu invité nou pou nou rét kanpé, ap véyé, ap lapriyé, minm nan nuit (Lc 22,46). Sé konsa Psòm nan di: "Sèt foua pa jou, m-ap fè louanj ou" (Ps 119,164), épi mouin pran dévan, anvan premié réyon solèy la lévé, anvan-l voyé premié signal l-ap vini, pou-m lapriyé ak tout kè-m" (Ps 119,147). Liv lasajès la montré kijan pèp la nan dézè-a té konn pati byin bonè, granmatin pou y-al chèché lama-n; si yo té konn kité solèy lévé anvan yo ramasé lama-n, lama-n nan té konn fonn dépi nan premié kontak avèk réyon solèy la. Liv lasajès la di Bondié té konn aji konsa pou-l aprann pitit li yo pou yo lévé anvan solèy pou yo vi-n lapriyé-l (Sg 16,28).

Konsa Jézu-Kri lapriyé, épi li invité krétyin yo pou yo suiv li. Lapriyé sa li fè-a épi li invité nou fè-a, sé yon lapriyé **LOUANJ**, tankou lè y-ap résité bréviè, pou maké divès moman lajounin-an ak lannuit la, yon lapriyé ki pa gin anyin dirèk pou-l mandé, min ki fè konpliman pou Bondié paské sé Bondié ki kréyé tout bagay, sé yon lapriyé gratis.

Gin yon dézièm fòm lapriyé tou, sa-a tout moun abitué avèk li, paské sé li minm dépi nou tou piti nou aprann, sé lapriyé **DÉMANN**. Nou ouè kijan Jézu avèti Piè, di-l konsa li lapriyé pou li (Lc 22,32), lè Satan fi-n réklamé Apot yo pou-l pasé yo nan tami tankou blé-a: Jézu lapriyé Papa-a pou-l fè démann pou li, pou lafoua-l pa fébli. Dépi nan kòmansman lévanjil Sin Luk la (Lc 1,13), lanj Gabriyèl anonsé Zakari kijan lapriyé-l la rivé nan zòrèy Bondié, Bondié réponn démann li-a, li ba-l yon pitit, y-ap rélé-l Jan, yon mo ki vlé di "Bondié kouté", li réponn, li bay favè-l, li bay gras li, Profètès A-n pasé konbyin tan Kay sakrè-a, l-ap fè jèn, l-ap lapriyé pou-l mandé Bondié fè Mési-a vini (Lc 2,37). Bondié kouté lapriyé-l. Mésiè ki gin maladi lalèp la lapriyé Granmèt la, li di-l: "Granmèt, si-ou vlé, ou kapab pròpté-m". Lapriyé-l, sé yon démann li fè avèk foua, épi l-ap tann (Lc 5,12), tankou Psòm nan ki di: "Nan matin mouin paré tout bagay pou ou épi mouin rété ap tann" (Ps 5,4), tankou moun ki fi-n tann nas pou pran pouason, oubyin ki fi-n lonjé lign nan avèk zin-an, oubyin ki fi-n drésé pèlin-an, épi y-ap tann pouason mòdé, oubyin zouazo-a pozé. Lapriyé démann la, sé kolé volonté-ou ak

volonté Bondié; si sa-ou mandé-a kadré avèk intansion-l, l-ap ba ou-l, sé poua nou bézouin akòdé ak léspri-Sin-an ki konnin volonté Papa-a, sé yon sèl volonté li gin ansanm ak Papa-a (R 8,27). Sin Monfò invité nou pou fè lapriyè nou pasé nan min avèk nan kè la Trè Sint Vièj Mari, paské li minm li konnin sa-k fè Bondié plézi antan-l plin ak léspri-Sin-an (Lc 1,35), épi lè Granmèt la ouè Manman-l mandé kichòy, li pap réfizi-l. Sé sa Sint Tèrèz lanfan Jézu té konn fè tou, li di la Sint Vièj Mari konnin si pou-l fè démann mouin-an pasé oubyin si pou-l kité-l yon ti koté, li konn sa-m bézouin, li konn intansion Bondié. Patizan Jan-Batis yo té konn lapriyè anpil ap fè démann pou mandé Bondié voyé Mési-a. Bondié kouté yo vré (Lc 5,33). Nan "Papa nou ki nan sièl la", Jézu aprann nou fè démann ki koréponn avèk volonté Papa-a (Mt 6,10). Léspri-Sin-an toujou ap lapriyè nan kè nou (R 8,26), sé poua nou doué antré nan kè nou pou nou akòdé avèk priyè-l, sitou nan tan Karèm nan, ki yon tan pou rénouvlé insistans lapriyè nou. Minm démon ap lapriyè pou mandé Jézu pou-l pa toumanté yo (Lc 8,28). Sé pa tou tan Bondié réponn priyè démann nou nan sans nou t-a vlé-a, paské lè moun ki té gin léjion démon yo fi-n délivré (Lc 8,30), li mandé Jézu pou akonpagné-l, min Jézu di-l pou rété lakay li, pou-l sèvi-l témouin. Lapriyè-a fè-l ouè ki volonté Jézu sou li, minm si sé pa sa-l mandé-a Jézu ba li. Sé poua nou toujou doué lapriyè, minm si nou pa sètin si démann nou koréponn ak volonté Granmèt la. La Trè Sint Vièj Mari di Jézu moun yo pa gin divin (Jn 2,3). Jézu di-l lè-l pa ko rivé (Jn 2,4), min Jézu fè yon mirak ki dépasé tou sa nou t-a kapab tann (Jn 2,6-11). Kondision lapriyè sé lafoua. Mari bay li. Papa ti pitit la ki té gin maladi tonbé-a, li lapriyè Jézu pou-l voyé jé sou pitit li-a, paské sé sèl pitit li (Lc 9,38). Anvan Jézu fè mirak la, li mandé lafoua (Lc 9,41; cf Jn 4,48; 11,25-26), dayè sé sa-l di Apot yo, lè-l pou kont li avèk yo (Mc 9,29), li asosié lapriyè avèk lafoua. Li té fi-n fè moun yo répròch, paské papa-a té di-l konsa: "Mouin minnin ti pitit la bay patizan-ou yo, yo pa kapab délivré-l" (Lc 9,46). Jézu fè yo rémaké yo pa gin lafoua (Lc 9,41). Min lè-l antré lakay la pou kont li avèk patizan-l yo, li di yo konsa: "éspès démon sa-a, sé ak lapriyè yo chasé-l" (Mc 9,29). Lapriyè bazé sou lafoua, lapriyè filé lafoua tankou yon mèl k-ap filé yon kouto. Plis ou lapriyè, sé plis ou gin lafoua. Plis ou lapriyè sé plis lapriyè-ou akòdé ak volonté Bondié, épi sa-ou mandé-l, l-ap ba ou-l, paské sé sa-k fè-l plézi ou gin chans mandé. Sint Tèrèz lanfan Jézu di li pa sonjé Bondié réfizé li anyin dépi li té gin laj katran, konsa tou Bondié pa réfizé-l anyin. Pri rinmin-an sé rinmin. Jézu minm invité Apot li yo pou yo lapriyè, pou yo mandé Granmèt la pou-l voyé travayè nan jadin-l nan (Lc 10,2). Bondié gin lidé voyé missionè, min li vlé pou nou mandé-l. Sint Tèrèz lanfan Jézu di nou konsa: lè Bondié vlé ba nou kichòy, li fè nou mandé-l li. Sé kòmsi lapli ap tonbé li fè

nou mét véso déyò pou yo plin. Lapriyè, sé prezanté anvi nou bay Bondié pou nou mété nou nan dispozision pou nou résévoua. Nan dènié prèch li fè, Jézu invité nou pou lapriyè tout tan (Lc 21,36), pou nou chapé anba boulvès k-ap détrui tout bagay la.

Konsa, avèk lapriyè louanj la, gin lapriyè démann. Min gin touazièm fòm lapriyè ankò, li minm nou pa tèlman alèz avèk li, époutan li mérité yo insisté sou li, sé sèl lapriyè la Trè Sint Vièj nou konnin yon fason dirèk, ki dévloé, sé lapriyè **RÉMÈSIMAN**. Nou tandé la Trè Sint Vièj Mari nan Magifikat la, kay Élizabèt, li pa sispans ap di Bondié mèsì pou mèvèy li fè pou li. Nou sonjé fè louanj pou Bondié, nou sonjé sitou fè démann kot Bondié, min nou pa fasil sonjé di-l mèsì. Lè Jézu fè mirak pou-l nourì sink mil moun yo ak sink ti pin-an, li kòmansé di Bondié Papa-a mèsì davans, antan l-ap béni pin yo (Lc 9,16; Jn 6,1). Lè n-ap manjé anvan nou kòmansé manjé, nou di Bondié mèsì davans; lè nou fi-n manjé tou, nou di mèsì karéman. Lè-ou di yon moun mèsì davans pandan ou-ap mandé-l yon sèvis, jé ront jé, li kòm santi-l obligé rann sèvis la ou mandé-l la. Sé konsa nan laplipa Psòm démann yo, anndan Psòm nan, gin yon fòm lapriyè rémèsiman ki glisé, kòm si moun nan k-ap lapriyè-a té konnin davans li déjà résévoua sa-l mandé-a sé sa-k fè Jézu di nou nan lévanjil la, lè n-ap mandé Bondié yon bagay, sé pou nou koué nou déjà résévoua-l, épi bagay la ap réalizé vré pou nou (Mc 11,24). Lè Jézu antré nan kay la avèk patizan Émayus yo, li di priyè sou pin-an pou di Bondié Papa-a mèsì davans (Lc 24,30; cf Jn 11,41). Dayè apré sa, lè-l fi-n kasé pin-an, yo rékonèt li, li disparèt (Lc 24,31). Tou sa nou ginyin sé Bondié ki ba nou-l, san nou pa konnin. Sé pousa nou doué tout tan ap di Bondié mèsì davans; paské apré nou fi-n résévoua favè-a, nou pa konn pran tan pou nou di Bondié mèsì, nou sonjé Bondié, sé lè nou nan bézouin, min lè bézouin nou-an satisfè, nou pa ouè nésésité pou nou sonjé Bondié ankò, si nou pa pran abitud gadé-l nan tout sikonstans avèk lafoua. Gin yon kantik nou abitudé chanté, lè lanmès la fini, nou di: "Anvan nou rétonnin lakay ansanm avèk tout frè nou yo, nou vlé pran tan pou nou di ou mèsì". Sèlman pandan moun yo ap chanté kantik sa-a, yo gin tan pran chémin pòt légliz la lontan, sé konsa yo pa fè atansyon sans paròl yo y-ap prononsé-a, yo pa pran tan pou yo di Bondié mèsì vré. Nou sonjé, mandé, nou sonjé fè louanj, min nou pa sonjé di MÈSI fasil. Jou Jédi-Sin-an, Jézu fè premié lanmès li, sèl lanmès la dayè, k-ap kontinuyé toujou chak jou sou lotèl épi ki té passé vandrédi-Sin sou lakoua-a. Nan lanmès sa-a (Lc 22,17.19; 1 Co 11,24), Jézu fè lapriyè rémèsiman apré premié kalis la, épi apré pin-an, atèl pouin lanmès la, yo rélé-l sakrifis "ékaristik", mo ékaristi-a vlé di rémèsiman, "action de grâces". Sé pi bèl priyè ki ginyin, sé lanmès la li minm. Sé pousa priyè rémèsiman

inpòtan anpil. Pa pè pèdi tan antan n-ap di Bondié mèsi. Zakari fè konpliman pou Bondié antan l-ap di-l mèsi pou tout mèvèy li fè ak tout favè li fè-l, lè-l rèsévoua léspri-Sin-an, bouch li louvri, lang li lagé (Lc 1,54). Siméyon fè konpliman pou Bondié pou-l di-l mèsi poutèt Mési-a li voyé pou pèp la (Lc 2,28). Apot nan Tanp la ap fè konpliman pou Bondié pou di-l mèsi apré Jézu fi-n monté nan sièl la (Lc 24,53). La Trè Sint Vièj Mari té prézan kot Zakari, la Trè Sint Vièj Mari té prézan kot Siméyon. La Trè Vièj Mari té prézan kot Apot yo apré lasansion-an. Koté la Trè Vièj Mari yé, la gin lapriyé rémèsiman: Magnificat (Lc 1,46-79; 2,22-23; Ac 2,14). Jézu sézi paské sou dis moun li fi-n géri sot nan maladi lalèp sé yon sèl ki tounin vi-n di-l mèsi (Lc 17,16), é yon sèl sa-a sé yon étranjé, yon Samaritin.

Gin moman fiks nou lapriyé nan sikonstans spésial, tankou Apot yo k-ap mandé Bondié yon ranplasan pou Juda (Ac 14,23), tankou lè y-ap sakré Banabé ak Sòl (Ac 13,3), tankou lè y-ap fè òdinasion prèt yo (Ac 14,23) tankou lè Piè ak Jan ap pozé min sou moun Samari yo ki té fi-n batizé yo, pou lés-pri-Sin-an désann sou yo-a (Ac 8,15), tankou lè Anani pozé min sou Sòl pou-l k-ap ouè klè-a (Ac 9,11), tankou lè Sin Piè ap mandé Bondié pou rési-sité Tabita-a (Ac 9,40), tankou lè Piè ap lapriyé sou téras la (Ac 10,30) lè-l gin vizion-an, tankou lè Piè t-ap rakonté ki jan Bondié té fè-l ouè pou-l al préché payin yo tou (Ac 11,5), tankou lè légliz Jérusalèm nan ap lapriyé kay manman Jan-Mak pou Bondié fè Piè soti nan prizon-an (Ac 12,12), tankou lè Pòl ak Silas ap lapriyé nan prizon-an a minuit joustan tranbléman-tè-a kasé chinn yo-a (Ac 16,25), tankou Pòl ap lapriyé nan Tanp la, lè Bondié avèti-l nan mision li konsakré pou payin yo (Ac 22,17), tankou lè Pòl ap lapriyé sou Papa Publiuyus nan zilé Malt la koté batiman-an té échoué-a, pou-l géri malad la (Ac 28,8).

Min lapriyé-a sé pa sèlman nan moman fiks pou fè-l, alokasion sikonstans spésial. Sé yon abitid pou yo pran. Krétyin té fidèl ap lapriyé tankou yon abitud nan Tanp la avèk la Trè Sint Vièj Mari (Ac 1,14; Lc 24,53). Yo té pran abitud rèt fidèl nan lanségman Apot yo, nan charité youn gin pou lòt tankou frè, nan séparasion pin-an, nan lapriyé yo (Ac 2,42). Konsa sé tou tan y-ap lapriyé, jan Jézu mandé-a (Lc 18,1). Apot yo té tèlman santi bézouin sa-a, yo chouazi sèt diak pou okipé afè distribué manjé avèk lòt bagay konsa sou késion òganizasyon, pou yo minm yo konsakré tèt yo nan lapriyé ak sè-vis Paròl la (Ac 6,4). Donk sé pa yon bagay yo fè an pasan, sé yon abitud yo pran, sé yon réspirasyon li yé pou nanm yo, otréman nanm yo t-a toufé, si-l pa-t kapab réspiré konsa nan lè lés-pri Bondié-a, pou yo kapab souflé-l pou-l rénouvélé lè kominoté-a. Otréman sé minm kiyè boua-a y-ap viré nan chodié mayi moulin-an tout tan an ron, san yo pa janm drésé manjé-a. Sin Luk di

Mari chouazi pi bon pòsion-an, yo pap janm ouété-l nan min-l (Lc 10,42). Sé ansanm ak Sin Pòl Sin Luk té konn fè mision (2 Phm 4,11; Col 4,14; Phm 24; 2 Co 8,18), sé ansanm ak Sin Pòl li konn fè mision, sé minn léspri sa-a Sin Pòl té ginyin lè-l di nou nan Romin 12,12 pou nou kolé kò nou sou lapriyè san rété, lè-l di nou nan Kolosyin 4,2 pou nou rété fidèl nan abitud lapriyè-a, tankou moun k-ap véyé antan y-ap di Bondié mèsi. Sin Luk ak Sin Pòl, dé zanmi sa yo pa-t séparé fasil, Jous nan prizon-an Sin Luk té avèk Sin Pòl (2 Tm 4,11). Dé tanpéraman opozé, otan Luk tou dou, otan Pòl vif, si yo pa-t konn lapriyè konsa antan y-ap réspiré Bondié ansanm, tankou Piè ak Kònèy, yo pa t-ap janm kapab fè kominoté ki soudé nan rinmin-an jouskala-fin (Ac 16,9ss). Minm si youn pa konprann lòt, pran abitud lapriyè ansanm, n-a konprann nou, nan Bondié. Nan Ac 3,1 yo montré nou Apot yo k-ap monté nan Tanp la pou yo lapriyè jan yo konn abitié fè chak jou vè touazè laprémidi. Yon aksion nou pran abitud répété tou tan vi-n tounin tankou yon chémin ki trasé pou nou. Nan Ac 10,4 lanj la di Kònèy: "Priyè ou abitié fè yo ak lacharité-ou yo monté kòt Bondié, li sonjé-ou". Sa vlé di Kònèy té gin abitud lapriyè tou tan. Sa fè Bondié plézi. Tout aksion n-ap fè, soua n-ap manjé, soua n-ap bouè, soua n-ap travay, tou sa doué vi-n tounin lapriyè, dapré sa Sin Pòl di nou (1 Co 10,31; Col 3,17; 1 p. 4,11). Sé san rété lapriyè légliz la t-ap monté pou Piè lè-l té nan prizon-an (Ac 12,5). Lè Sin Pòl rivé Filip, l-al bò yon laiviè koté yo konn gin abitud rasanblé pou lapriyè (Ac 16,13). Sé abitud aksion-an ki fè-ou vi-n pran pli-a. Sé antan ou-ap lapriyè ou aprann lapriyè, ou vi-n gin réflèks lapriyè, ou vi-n gin réaksion lapriyè, nan tout sikonstans. Fò-ou jété kò-ou nan dlo pou-ou aprann najé. Pa gin téknik spésial pou sa. Fò-ou pran abitud pozé jès privé dapré yon sètèn mouvman régilié, k-ap rivé déklanché réaksion spésialis lapriyè.

Sin Luk sé Évanjélist léspri Sin. Tout Ak-dè-zapot la, sé souf léspri Sin-an k-ap kondui-l. Tout lévanjil li-a maké ak léspri Sin. Sé léspri Sin-an k-ap lapriyè nan nou pou-l mandé sa nou pa konnin, nan langaj nou pa konprann, an-akò avèk volonté Bondié Papa-a (Rm 8,26-27). N-ap lapriyè la Trè Sint Vièj Mari pou-l fè nou jouinn minm léspri ki nan kè-l la, pou-l aprann nou lapriyè fè LOUANJ Bondié, prezanté Bondié DÉMANN nou di Bondié MÈSI, ni nan moman ak sikonstans spésial, ni nan youn fason abituèl.

Privé: 1 Sm 1,12; 2,1; 2 Sm 7,27; 1 R 3,28.29.38.45.54; 9,3; 2 R 6,17; 19,4.15.20; 20,2.5; 2 Ch 6,19a.b.20.29.35.39.40; 7,12.15; 30,27; 33,18.19; Est 10,1; Ne 1,6.11a.b; 11,17; Tob 3,1.16; 12,8.12; Jud 9,12; 10,1; 12,6; 13,3; Est 4,17h; 1 Mac 3,44.46; 7,37.40; 12,11; 2 Mac 1,5.6.23.24; 9,13; 10,16.27;12,42; 15,26; Job 6,8; 16,17; 22,27; 24,12; Ps 4,2; 6,10; 17a.b; 28,2.6; 31,23; 35,13; 39, 13; 42,9; 54,4; 55,2; 61,2; 65,3; 66,19.20; 69,14;

72,20; 80,5; 84,9; 86,1.6; 88,3.14; 90,1; 102,1.2.18a.b; 109,4.7; 116,1; 119,170; 130,2; 140,7; 141,1; 142,1; 143,1; Pr 15,8.29; 28,9; Sg 18,21; Si 3,5; 7,10.14; 21,5; 28,2; 34,26; 35,17; 36,16; 38,34; 39,5.6; 50,19; 51,9.11.13; Is 1,15; 26,16; 37,4.15.21; 38,2.5; 56,7a.b; Jer 7,16; 11,14; 32,16; 37,3; Lm 3,3.44.56; Ba 2,14; Dn 6,8.13.14.20.21; Jon 2,8; 4,2; Ha 3,1; Mt 6,5.7; 21,13.22; 26,39; Mc 9,29; 11,17.25; 12,40; Lc 1,10; 2,37; 3,21; 5,33; 19,46; 20,47; 22,45; Ac 1,14.23; 2,42; 3,1; 6,4; 9,38; 10,4.30.31; 11,15; 12,5; 14,23; 16,9.13.15.16.25; R 1,10; 12,12; 15,30; 1Co 7,5; 14,14; 2 Co 1,11; 9,14; 13,9; Ep 1,16; 6,18; Ph 1,4a.b.9.19; 4,6; Ga 1,1; 4,2.12; 1 Tm 1,2; 4,5; 5,5; 2 Tm 1,3; Phm 4,22; Jc 5,15; 1 p. 3,7.12; 4,7; 2 p. 3,11; Ap 5,8; 8,3.4.

Silans: Gn 24,21; 34,5; Dt 27,19; Jg 3,19; 2 R 2,3.5; 18,36; Ne 5,8; 1 Mac 11,5; Job 4,2.16; 13,5.12.19; 33,33; Ps 4,5; 22,3; 28,1; 31,19; 39,3; 83,2; 94,17; 107,29; 115,17; 131,2; Sg 18,14; Si 20,1; Is 36,21; 41,1; 42,14; 47,5; 48,2; Jer 8,14a.b; 25,37; 47,3; 48,2; Lm 2,10; 3,26; Ez 16,63; 24,17; Dn 8,26.27; Am 6,10; 8,3; Ha 1,13; 2,20; So 1,7; Za 2,17; Mt 20,31; Mc 4,39; 10,48; Lc 1,20; 9,36; 20,26; Ac 15,12; 21,40; 22,2; R 16,25; 1 Tm 2,11.12; Ap 8,1.

Moïse, Élie, Pierre, gloire, tente, nuée, ombre, montagne, tente du rendez-vous...

*

* *

TOUAZIÈM DIMANCH KARÈM A

Jodi-a ankò, sé sou BATÈM nan lanmès la palé, tankou tout dimanch Karèm yo, k-ap préparé nuit Pak la koté n-ap réfè promès Batèm nou. Finisman lévanjil la (Jn 4, 5-42) montré nou kijan Samaritin yo déklaré lafoua yo nan Jézu kòm Sovè tè-a, minm jan jou Batèm nou, nou minm oubyin papa ak manman nou, parinn ak marinn nou déklaré Lafoua-a pou nou (Jn 4, 42). Prémie léktu-a (Ex 17, 3-7) montré nou kijan Pèp Israël la t-ap tanté Granmèt la nan dézè-a, li pa-t vlé ba-l lafoua-l, li t-ap mandé éské Granmèt la nan mitan-l oui ou non (Ex 17, 7). Sé lafoua sa-a minm Psòm-répons la mandé antan-l di: "Si jodi-a nou té kapab kouté voua Granmèt la: "Pa fèmin kè nou!" (Ps 94 = 95, 8). Sin Pòl di nou nan dézièm Léktu-a (R 5, 1-2.5-8) sé gras a lafoua-a nou vi-n kòrèk, épi nou gin possibilité proché nan favè-a. Moyiz té frapé ròch la, li té fè dlo soti. Jézu promèt Samaritèn nan: moun ki kouè nan li, l-ap fè yon sous dlo éklaté nan kè-l. Dlo Jézu ap bay la, sé Paròl li, sé léspri-l. Jézu té chita sou bò pui-a ak fatig apéprè vè midi, minm lè sa-a, yo té klouré-l sou Koua-a. Madanm Samari-a vi-n ap tiré dlo dòmi, Jézu promèt li dlo k-ap kouri. Dlo dòmi-an, sé lafoua-a, dlo k-ap kouri-a sé léspri-a (Jn 7, 37-39). Sé avèk lafoua yo kapab tiré-l.

Lè Jézu mandé madanm nan dlo-a, li di "ban-m bouè"-a, sé pi plis nanm li mandé-l. Sou Koua-a tou l-ap di: "Mouin souaf" (Jn 19, 28; cf 4, 7). Lè sa-a sé vinèg y-ap proché bò bouch li (Jn 19, 29). Min sé pi plis nanm nou yo li té souaf. Épi l-ap kontinué souaf konsa toujou joutan tè-a rivé nan dènié bout kous li, jan Pascal di-a (Pascal: Mystère de Jésus, 8, division lafoua, cit in FEUILLET A., L'Agonie de Gétsemani, Paris, Gabalda, 1977, 267) Sé nou minm li anvi. Profèt Éli té ouè yon lè yon vèv nan vil Sarépta, ki tapral chèché dé ti bout boua pou-l fè difé, pou-l fè manjé pou li minm ak pitit li. Éli té mandé-l ti gout dlo. Li pa-t fè mové jan tankou Samaritèn nan. Li t-al chèché dlo-a minm lè-a, antan-l kite sa-l t-apral fè-a. Lè Profèt Éli ouè bon jan-l, Profèt Éli mandé-l pi plis pasé dlo-a, li di-l poté yon ti moso pin pou li tou. Sé lè sa-a madanm nan di-l sé yon ti ponyin fari-n li rété ak yon ti gout luil, épi gin grangou nan péyi-a, sé dènié ti moso marinad l-apral fè anvan-l mouri. Éli di-l sèvi-l anvan, apré sa l-a jouinn pou li ak pou pitit li-a. Li obéyi. Réyèlman fari-n pa janm manké nan kay sa-a, ni luil tou, joutan Bondié voyé lapli (1 R 18, 7-16).

Lafoua mandé pou nou viv sou kont Bondié, pou nou rinmèt li tout asirans nou. Gin anpil moun k-ap chèché asirans nan zidòl, nan lajan, nan plézi, nan pouvoua. Gin yon rénonnman pou nou fè, pou nou chouazi Bondié sèl, ki kréyé ni sa nou ouè, ni sa nou pa ouè, li minm ki voyé Pitit li-a vi-n pran chè sou tè-a, vi-n mouri-lévé pou délivré nou anba péché ak Satan. Tout moun ki

bouè nan dlo sa-a, l-ap souaf ankò. Sa vlé di, tout moun k-ap konté sou zidòl, sou lajan, sou plézi, sou pouvoua, sé dlo dòmi y-ap tiré, y-ap souaf zidòl, lajan, plézi, pouvoua tout tan pi plis. Yo pap janm satisfè. Yo toujou konprann sa-a sé dènié sèvis y-ap fè-a, apré sa, y-ap délivré, époutan sé fonsé y-ap fonsé nan labou pi plis. Sé lafoua nan Granmèt Jézu-Kri ki pou délivré yo sot nan fon labou sa-a, k-ap valé yo moso pa moso-a.

Pitit ki pa kriyé pa bézouin tété. Si-ou té konnin ki moun k-ap di-ou: "ban-m bouè-a", sé ou minm ki t-a mandé-l, li t-a ba-ou dlo vivan" (Jn 10). Sin Pòl té ouè moun Atèn yo té bati anpil tanp pou zidòl, li di konsa li rémaké ata yon tanp pou Bondié yo pa konnin-an yo bati tou, pou yo sètin yo sèvi vrè Bondié-a. Ébyin Bondié sa-a yo pa-t konnin-an, Sin Pòl di yo li vini pou-l fè yo rankontré-l nan lafoua (Ac 16, 23ss). Samaritèn nan t-ap chèché dlo, min Jézu promèt li dlo vivan-an. Sé konsa, moun k-ap kouri dèyè zidòl, dèyè lajan, dèyè plézi, dèyè pouvoua, sé dlo y-ap chèché, min yo pa pran bon chemin-an (Am 5, 5s; 8, 11s). Jézu vini pou-l ba yo satisfaksion, min li mandé yo lafoua. Sèlman Jézu pa gin dékoua pou-l tiré dlo. Sa vlé di, pòt kè nou fèmin, klé-a sou pa anndan, kè nou byin fèmin, sé nou minm ki pou louvri ba li (Pr 23,26). Li rét nan papòt la l-ap frapé (Ap 3, 20; Ct 5, 2). Louvri tout pòt kè nou pou Jézu antré. Sé nou minm ki pou louvri ba li. Li pap fòsé pòt la. Li réspékté libèté-a li té ba nou-an.

Jézu té souaf, li pa bouè dlo. Sèké madanm nan, lè-l ouè Jézu rakonté-l tou sa-l fè, li kité krich li-a sou bò pui-a, li kouri al rélé Samaritin yo pou yo vi-n ouè yon moun ki di-l tou sa-l fè, li di yo gin lè sé li minm ki Kris la. Disip Jézu yo minm t-al nan maché pou y-al achté manjé. Lè yo rivé, yo ofri Jézu manjé (Jn 4, 31; cf Mt 4, 3ss); min Jézu pa manjé, li di manjé-l, sé fè volonté Sa-a ki voyé-l la pou-l réalizé travay li-a. Konsa, ni li pa bouè, ni li pa manjé; époutan, li té souaf, li té grangou, li té bouké, li té sot maché dépi Galilé, épi li t-apral jous Jérusalèm. Sé fatig la minm ki fè-l té chita sou bò pui-a (cf Lc 9, 58; Gn 28, 11). Pèp la travèsé, dlo lanmè-a dèyè-l, sab la cho anba pié-l, paradi-a byin louin-l. Souaf ap touyé-l, li mandé dlo pou-l bouè, grangou fè-l mal, li mandé pou-l manjé, fatig fébli-l, li mandé répozé. Dlo-a anmè (Ex 15, 23); sa nou bay Jézu-a, sa nou pa vlé-a, sé li minm nou ba li (Mal 1, 6-14); kòman pou-l fè bouè-l, sé vinèg nou mété bò bouch li (Mt 27, 48; Lc 23, 36; Jn 19, 29; Ps 69, 22), li minm vrè Israèl la. Manjé-a fad (Nb 21, 5), sa nou bay Jézu-a, sé sa nou pa bézouin-an, sé li minm nou ouè ki bon pou li; li pa kapab manjé-l; nou pa cho, nou pa frèt, nou tièd, li pap gadé nou nan bouch li (Ap 3, 15s), sé pou nou rénouvlé atachman nou nan li, sa nou té déklaré nan lafoua Batèm nou-an. Répo-a kout, sa nou ofri Jézu-a (Ap 3, 21), sa pap réfè fòs li; apèn l-ap fè yon ti dòmi nan kè nou tankou nan batiman Sin Piè-a (Mt 8, 25), minm lè-a nou rélé nan tèt li, pou nou révéyé-

l, yon ti krik, yon ti krak, tankou yon ti pitit gaté ki pa vlé ouè manman-l fè yon ti sòti. Tout tan nou vlé pou nou ouè (Jn 1, 50; 3, 23ss; 4, 29; 20, 29), pou nou gouté, pou nou santi, nou pa gin lafoua nan prezans Grammèt la nan kè nou, paskè li pa tonbé anba min nou (Jn 20, 25), anba jé nou, anba zòrèy nou (Lc 24, 25ss; Mc 16, 11). Sé lafoua Batèm nou pou nou rénouvlé souvan, pou nou préparé nou nan bèl déklarasion lafoua sa-a n-apral réfè nan nuit Pak la.

N-ap mandé Manman Mari favè sa-a pou nou bay Jézu dlo li mandé nou-an, manjé li mandé nou-an, répo li mandé nou-an, nan lafoua Batèm nou-an n-ap viv nan chak ti sikonstans lavi nou.

(Pèp la travèsé; Mouin souaf, min sé vinèg yo ban-m; Pèp mouin, ki sa-m fè ou?).

*

Grammèt la di: "Si yon moun bouè nan dlo m-ap ba li-a, li pap janm souaf ankò" (Jn 4, 14; antienne 2^{ème} vèpres, 3^e d. car). Lè yon moun ap vouyajé, li rivé yon koté, li fè yon pòz, sitou si sé nan yon dézè, vè midi, bò yon sous DLO. Dépi mèkrédi sann, nou kòmansé rout la, k-ap minnin nou sou mòn Kalvè-a, pou nou débouché nan gran fèt Pak la. Jodi-a, bò pui Jakòb la, n-ap fè yon ti pòz, pou nou égzaminé chémin nou fi-n fè ak sa ki rété nou. Premié dimanch la, sé té Tantasion Jézu nan dézè-a (Mt 4, 1-11; Gn 2, 7-9; 3, 1-7; Ps 50; R 5, 14-19). Dézièm dimanch la, sé té Transfigirasion-l sou mòn nan (Mt 17, 1-9; Gn 12, 1-4; Ps 32; 2 Tm 1, 3-10) Touazièm dimanch la, jodi-a, sé DLO vivan li promèt bò pui Jakòb la (Jn 4, 5-42; Ex 17, 3-7; Ps 94; R 5, 1-8). Katriyèm dimanch la, sé Limie li fè avèg la ouè nan Tanp la (Jn 9, 1-41; 1 Sam 16, 1-3; Ps 22; Ap 5, 8-14). Sinkièm dimanch la, sé Rézirèksion-l nan li bay Laza sot nan tonbo-a (Jn 11, 1-45; Ez 37, 12-14; Ps 129; R 8, 8-11). Dimanch Ramo yo, sé Gloua li li montré ki vlopé nan Soufrans la (Mt 21, 1-11; 26, 14-27; 66; Is 50, 4-7; Ps 21; Ph 2, 6-11). Tout tan Karèm nan, sé yon préparasion pou Vyéyè Pak la, koté yo santré atansyon nou sou sans BATÈM nou. Mésaj dimanch jodi-a, sé yon jalon sou rout sa-a, avèk DLO vivan-an Jézu promèt Madanm Samari-a, ki fè nou sonjé dlo Batèm nan.

Dépi premié dimanch Karèm nan déjà, avèk Tantasion Jézu nan dézè-a, li-tiji-a amosé orientasion Batèm nan, koté nou rénonse Satan pou nou chouazi Jézu-Kri, Paròl ki soti nan bouch Bondié. Avèk dézièm dimanch Karèm nan, gin kòm yon invitasyon pou fè sonjé rad blan sa-a yo té mété sou nou, nan sérémoni Batèm nan, pou raplé nou kijan lavi nou pasé nan yon Transfigirasion, tankou rad Jézu té vi-n kléré tou blan kon lanèj la. Katriyèm dimanch Karèm nan dirijé réflèksyon nou sou Limie-a avèg la ouè-a, pou indiké nou kijan, lè nou fi-n lavé nan dlo Batèm nan, tankou avèg la té lavé kò-l nan

basin Siloé-a, Limiè Jézu kléré nou. Pou sinkièm dimanch Karèm nan, rézi-réksion Laza-a dévoualé nou kijan Batèm nan fè nou patisipé nan lanmò Jézu-Kri, pou nou résisité ansanm avèk li. Dimanch Ramo-a déjà montré davans Gloua Jézu-Kri kòm Pitit Bondié, ki Profèt, ki Roua, ki Prèt. Sé sa Batèm nan fè nou vi-n tounin. Konsa jodi-a, touazièm dimanch Karèm nan, nou fè yon pòz bò pui Jakòb la, pou nou réfléchi sou sans Batèm nou, ré-fléksion nou té kòmansé déjà nan premié sémèn Karèm nan, épi n-ap kontinué-l jous nan finisman Karèm nan, pou préparé rénouvèlman promès Batèm nou nan nuit Pak la, anvan Pè-a voyé dlo li fi-n béni-a sou nou anndan légliz la.

Sint-Ogustin éspliké lévanjil jodi-a nan liv lansègnman-l yo (Tract. 15, 10-12.16-17: CEL 36, 154-156; cf Liturgia Horarum II, Vatican 1974, 167-168). Li di: Madanm Samari-a, sé pòtré légliz la, ki pa-t ko antré nan fanmiy Jézu-Kri-a. Samaritin yo sé étranjé pa rapò a Juif yo. Anvan Batèm nan, nou étranjé pa rapò a Jézu-Kri, nou payin, nou moun-déyò. Sint-Ogustin di: Madanm Samari-a réprézanté nou minm. Li bay Jézu lafoua-l. Konsa nou minm tou nou kouè. Sint-Ogustin di: Dlo sa-a Jézu té mandé Madanm Samari-a, sé lafoua-l. Jézu té souaf lafoua Madanm Samari-a. Sé konsa l-ap di: "Mouin souaf" (Jn 19, 28). Sint Tèrèz lanfan Jézu di: sé pa dlo Jézu té souaf, sé nanm nou li souaf. Sa Jézu gin pou-l bay la, sé léspri Sin-an, Kado Bondié-a, Sous dlo vivan-an. Sint-Ogustin fè sonjé Psòm nan ki di: "Koté-ou sé sous lavi-a" (Ps 36, 10). Li di: Kòman pou yo t-a kapab fè souaf ankò, moun sa yo ki satisfè avèk bon manjé gra lakay Bondié-a, sa-l pasé souaf yo nan lari-viè plézi-l la! jan Psòm nan di-a (Ps 36, 9). Sint-Ogustin raplé nou paròl Jézu, ki mandé pou nou vi-n jouinn li, nou tout k-ap pasé tray, k-ap rédi anba gro chaj, l-ap réfè fòs nou (cf Mt 11, 28).

Sé konsa dènié jou fèt Joupa yo, Jézu té di foul nan Tanp la: "Si yon moun souaf, sé pou-l vi-n jouinn mouin, moun ki kouè nan mouin, sé yon gran lariviè dlo vivan k-ap koulé sot nan kè-l". Li t-ap palé osijè Éspri Sin-an moun ki kouè yo yo t-ap résévoua (Jn 7, 37-39; cf Jn 19, 34; 1 Co 10, 4; Ap 22, 17; Is 41, 18; 35, 6s; 43, 20; 44, 3; 48, 21; 30, 25; 12, 3; Ps 114, 8; 78, 16; 46, 5; 36, 9; 44, 2s; 63, 1; Ez 36, 25; 47, 1; Za 13, 1; 14, 3; Joël 4, 18; Ex 17, 6). Tan Karèm nan, sé yon tan ki fè nou fè yon ti pòz bò pui dlo Jakòb la, pou nou égzaminé ki kalité dlo nou souaf (Pr 9, 17; 5, 15; Ct 4, 15; Jer 2, 13; Nb 21, 17s), pou nou bay Jézu lafoua nou, pou-l kapab pasé souaf nou tout bon, gras a Éspri Sin-an l-ap ba nou-an. N-ap mandé Manman Mari pou nou aprann fè yon ti pòz konsa tanzantan, pou nou rénouvle angajman Batèm nou dévan Granmèt nou, pou-n fè sa yo rélé "profession de foi" tankou madanm Samari-a (Jn 4, 29) ak pèp Samari-a (Jn 4, 42), tankou avèk la (Jn 9, 38), tankou Mat sè Laza-a (Jn 11, 27), tankou foul yo ki t-ap akonpagné

Jézu lè-l t-ap antré Jérusalèm nan (Mt 21, 11) ak solda-a nan pié Koua-a (Mt 27, 55), sitou tankou li minm minm (Lc 1,38). Sin Monfò konséyé nou ré-nouvle promès Batèm nou nan min Manman Mari, pou Jézu aksépté yo pi fasil, pou nou rété pi fidèl. Li di nou pou nou fè sa yon fason solanèl nan fèt lanonsiasion (25 mas) ak Imakilé Konsépsion (8 désanb). Koté la Trè Sint Vièj Mari yé, léspri Sin toujou la. N-ap mandé-l pou-l fè nou jouinn dlo vivan sa-a, pou nou souaf li toutotan n-ap fè pèlerinaj Égzòd nou sou tè sa-a, pou nou chanté avèk Psòm nan: "Tankou yon mouton ap plinn apré dlo vivan, konsa nanm mouin ap plinn koté-ou, Bondié". Nanm mouin souaf Bondié, Bondié ki vivan-an. Kilè m-a v-alé pou-m ouè fas Bondié?" (Ps 44, 2-3). Nan dézè Karèm nan nou fè yon ti pòz bò pui Jakòb la, antan n-ap kalkilé Psòm nan ki di: "Bondié, sé Bondié-m ou yé, m-ap chèché-ou, nanm mouin souaf ou, sé koté-ou chè-m ap plinn. Nan tè ki dézè-a, ki sèk la, ki san dlo-a, konsa nan koté ki Sin-an, mouin parèt dévan-ou, pou-m ouè pouvoua-ou ak gloua-a" (Ps 63, 2-3).

*

Sichem: Gn 12, 6; 33, 18.19; 34, 2.4.6.8.11.13.18.24.26a.b; 35, 4; 37, 12.13.14; 48, 22; Jos 17, 7; 20, 7; 21, 21; 24, 1.25.32 a.b; Jg 8, 31; 9, 1.2.3.6 a.b.7.18.20 a.b.23 a.b.25.26 a.b.28.31.34.39.41.57; 21, 19; 1R 12, 1 a.b.25; 1 Ch 6, 52; 7, 19.28; 2 Ch 10, 1 a.b; Ps 60, 8; 108, 8; Si 50, 26; Jer 41, 5; Os 6, 9; Ac 7, 16 a.b.

*

* *

TOUAZIÈM DIMANCH KARÈM B

"Détoui kay sakré sa-a, nan toua jou m-ap mété-l kanpé" (Jn 2,9). Vré kay sakré-a, sé kò Jézu-Kri. Sé la yo adoré Papa-a, gras a Pitit la. Sé sa Jézu gin pou-l di madanm Samari-a yon fason ki voualé. Moun yo Papa-a rinmin-an, sé sa-k adoré-l nan léspri ak la vérité-a, sa vlé di nan Éspri Sin-an ak nan Jézu-Kri ki vérité-a (Jn 4, 23-24). Sèlman pou tout moun kapab adoré Bondié nan Kò sa-a, sé lè Kò sa-a ap vi-n tounin yon Kò éspri (1 Co 15,44) lè-l fi-n mouri pou-l résisité. Kado ki fè Bondié plézi, sé pa bèf, mouton, lajan, sé yon kè ki sakrifé-l nè, ki akòdé ak volonté Papa-a, jous li aksépté lanmò: "Sé pa volonté-m ki pou fèt, sé volonté pa ou (Lc 22,42; Jn 12,27; Mc 14,36; Mt 26,39; Ps 40,7-9; 10, 5-7; Is 50,5; Ps 50, 7-15; 51,18-19; 69,31-32; 1Sm 15,22; Os 6,6; Am 5,21-25). Ansyin tanp la gin pou-l détoui (Jer 7,1-15; Ag 2,3; cf 1 R 8,10). Sé yon lòt tanp Bondié bati pou-l ba nou randé-vou, sé pròp Pitit li-a, ki pa vini avèk san mouton ak bèf, min avèk pròp san pa-l, yon fous pou tout (Mt 26,28; He 10,1-14; cf Ps 40, 7-9; 50,7-15; 51,18-19; 69,32). Lè-l té gin douzan, Mari ak Jozèf té jouinn li nan tanp la, apré toua jou. Li té éspriké yo: "Pouki sa n-ap chèché-m? Èské nou pa konnin sé nan Lakay Papa-m pou-m yé?" Yo pa-t komprann sa-l t-ap di yo-a. Mari t-ap kalkilé tou sa nan kè-l (Lc 2, 42-52). Toua jou sa yo, yo té pèdi Jézu nan Tanp la, sé toua jou li té gin pou-l té pasé anba tè-a, dapré sa li minm l-ap di Juif yo: "Jénérasion sa-a ap mandé sign. Yo pap ba-l dèt sign pasé sign Profèt Jonas la. Minm jan Jonas té pasé toua jou nan vant labalèn nan, sé konsa tou Pitit moun nan ap pasé toua jou anba tè-a (Mt 12,39-40; cf Os 6,2).

Juif yo toujou ap mandé sign (Jn 7, 31; 2,23). Krétyin pa fèt pou ap mandé Bondié sign tout tan. Sa sé sipèstision: kasé mové pié, ouè papiyon noua ki antré nan kay asouè, tandé frizé sou tè kay. Krétyin fèt pou gidé sou lafoua, sou lafoua san mélanj. Mari pa-t mandé sign. Sé Bondié minm ki té ba li, san-l pa-t mandé (Lc 1,36; cf 2,12; Is 7,14; Jg 6,17; Ex 4,1; 33,16; Lc 1,18-20; 1 Sm 14,10), pou-l té kapab maché nan lafoua (Gn 17, 11; 15,8). Sin Pòl di "Juif yo ap mandé sign, Grèk yo ap chèché sajès filozofi, nou minm krétyin n-ap préché Jézu yo klouré sou Koua" (1 Co 1, 22-24).

Réyèlman, moun yo ki pa vlé kite sipèstision dirijé lavi yo, yo kapab tonbé nan yon lòt pièj: sé réglé tout bagay dapré rézon yo sèlman. Min fò yo pa bliyé plas Bondié k-ap dirijé tout évenman, minm si-l pa fè ouè sa klè. Lakoua-a sé yon mistè yo pa kapab konprann. San lafoua yo pa kapab antré nan mistè sa-a. Jòb ap soufri. Min li vlé fè rézònman pou-l chèché kon-

prann pouki sa l-ap soufri konsa-a, l-ap kèsioné Bondié, l-ap fè filozofi avèk li. Li pa kapab jouinn sans évenman yo nan bout rézonman-l yo. Sé Bondié sèl ki pou ba-l répons (Job 28,1-28; Sg 9,1-18; Pr 30,4; Si 1,1-10; Ba 3, 9-4,4; Qo 7,23; Job 11, 7; Dt 20, 11; R 10,6; Is 40, 12-26; Ep 3,18; 4,10; Jn 3, 13). Sé minm bagay ki rivé Profèt Abakuk. Li pa komprann kòman fè sé injistis k-ap kòmandé. Li kèsioné Bondié: Pouki sa Asiri ap britalizé tout pèp yo, ap krazé pèp yo-a? (Ha 1,1-4). Bondié di-l: "Pasians. Épi Bondié fè-l ouè gin yon lòt pèp k-ap vini, sé Babilonyin yo, pou yo krazé pouvoua Asiri-a (Ha 1, 5-11). Min lòt pèp sa-a vi-n fè minm bagay avèk Asiri tou. Abakuk pozé kèsion ankò kot Granmèt la. Li di: "ou fi-n ban-m satisfaksion yon premié foua; épi sé kouri pou lapli pou-m tonbé nan larivière (Ha 1, 12-17). Granmèt la di: Pasians, ékri sa-m montré-ou la; lè vizion-an ap réalizé, ou-a vérifié: moun ki kòrèk la, sé nan lafoua li viv (Ha 2,4; cf R 1,17; Ga 3,11; He 10, 38). Pèp Bondié-a ki anba min Babilonyin yo, li gin pou-l dé-livré yo. Bondié sé Mèt istoua-a. Yon lòt pèp ap vi-n krazé Babilonyin yo, sé Sirus, roua Pèrs yo, pou-l dé-livré Pèp Bondié-a. Min finalman sé Jézu sèl Pitit Bondié-a, ki Klé istoua-a (Ap 1,8). Sé nan li minm sèl répons tout problèm nou jouinn sans li.

Nou pa gin pou nou kléré chandèl kay bòkò, pou nou konnin ki moun k-ap fè nou soufri, ki koté malè-a ap sòti. Dèstiné lèzòm sé yon problèm ki rèd vré, k-ap krazé nou, minm si Bondié fè nou pou nou kòmandé sou tou sa-k égzisté (Gn 1, 26; Ps 8,7; 1 Co 15,27; Ep 1,22; 1 Co 6,2), nou tou piti dévan fòs natirèl sou tè-a. Sé sa-k fè nou pran dé pozision parapò a yo: oubyin n-ap éséyé mété dig, ranjé kabann nou anvan dòmi nan jé nou, antan n-ap chèché sans ak répons nan pròp fòs nou, oubyin nou kité yo dékontrolé nou épi n-ap chèché sovè kò nou antan n-ap balizé rout nou ak sign. Sèl sign Bondié ba nou, sé Jézu-Kri ki klouré sou Koua-a (1 Co 1,23; Mt 12, 38s; Jn 2 18s). Si sign lakoua, sé sign lafoua, sé nan lafoua pou nou rankontré plan Bondié sou nou ak sou tout moun. Sé nan lafoua pou nou ouè sans évenman ki rivé. Sé nan lafoua pou nou ouè douèt Bondié k-ap ékri douat avèk lign ki krochi. Jou BATEM nou, yo té maké nou ak sign lakoua. Sign sa-a sé li minm k-ap dirijé lafoua nou. Tout lavi nou, sé yon Chémin-Koua. Sé yon pasaj nou gin pou nou fè nan soufrans ak lanmò Jézu-Kri, pou nou débouché sou Lavi Limiè-l la k-ap kléré tout tan-an.

Jès Jézu pozé, antan-l pran fouèt, li chasé machann yo sot nan Tanp la, sé yon **sign** li yé; minm jan lè-l té fè dlo-a vi-n tounin divin-an, sé yon sign li té yé tou. Tou lé dé sign sa yo vizé minm évenman-an; mistè Koua-a ak Ré-ziréksion-an.

Lè Jézu té gin douzan, Manman-l ak Papa-l té pèdi-l Jérusalèm. Sé apré toua jou yo vi-n jouinn li. Li té mandé yo pouki sa yo t-ap chèché-l, èské yo pa konnin li té gin pou-l té nan afè Papa-l ak lakay Papa-l (Lc 2, 41-52). Yo pa-t konprann sa-l té vlé di-a. Manman-l té kinbé bagay sa yo nan kè-l. Konsa tou disip li yo pa-t konprann sa-l té vlé di lè-l té di: "Krazé kay sa-a, nan toua jou m-ap mété-l kampé ankò". Sé lè Jézu fi-n résisité nan pami mò yo, yo vi-n konprann sé osijè lanmò-l ak Rézéréksion-l ti t-ap palé.

Sé lakay Papa-l yo gin pou jouinn li apré toua jou. Tanp la, nouvo Tanp la, vré Tanp la, sé pròp Kò-l. Nan Jérusalèm anro-a, pa gin Tanp ankò, paské sé Mouton-an ki ouété péché tè-a ki vré Tanp la (Ap 21,22).

Juif yo ap mandé sign, dapré sa Sin Pòl di nou nan premié Lèt li ékri moun Korint yo (1 Co 1,22) ki vini kòm dézièm Léktu nan lanmès la, min sé sign lakoua-a Sin Pòl di l-ap préché. Li di tou Grèk yo ap mandé sajès, min sé Sajès Koua-a l-ap préché. Salomon té réprézanté lasajès (1 R 3,12; Si 47,14s) li té bati Tanp la an premié (1 R 6,1-9,9). Li pa-t pi zanmi Bondié pasé sa (Si 47,19). Jézu di gin plis pasé Salomon isit la (Mt 12,42). Juif yo té konsidé laloua-a tankou yon bijou; yo pa-t pi obsèvé sans li pasé sa (Ga 3,10). Sé lèt la yo té suiv, yo pa-t kité éspri-a gidé yo (Ga 5,5; R 2,17-24; 8,2). Vré Sajès la, vré Tanp la, vré laloua-a, sé Jézu li minm minm. L-ap fè yon nètouayaj, jan Profèt Ézékièl té promèt la (Ez 36, 23-26), dapré sa litiji-a di nan réfrin ki vini pou antré-a nan lanmès la. Sé yon dlo pròp l-ap vidé sou nou, pou-l pròpté nou sot nan tou sa ki sal nou, pou-l ba nou yon éspri nouvo.

Premié priyé Lanmès la di kijan Bondié montré rémèd péché yo nan **jèn, privè ak charité**. Dépi mèkrédi sann, litiji-a té fè nou antré nan sans tan Karèm nan, li invité nou pou nou antré nan fon kè nou, pou nou pa fè aksion ki parèt pou lézòm sèlman, paské n-ap déjà gin rékompans nou sou tè sa-a. Sé yon jan pou mandé nou antré nan éspri-a, san nou pa rété nan lèt la. Vré jèn nan, lékol Izayi di nou nan ki sa li rété tout bon vré (Is 58, 3-12), sé pa rété tout lasint jounin atè-a vant ba pou tout moun ouè n-ap fè jèn, pou yo di nou sé ti sin. Sé Bondié Papa-a ki pou konnin sa. Vré jèn nan sé défèt kòd ki maré prochin nou-an, ki ampéché-l dévlopé nan nanm li ak nan kò-l. Sé rénonse injistis nou abitué fè. Profèt Izayi di nou lavé min nou ki plin san-an avan nou vi-n jouinn Bondié (Is 1,16). Li mandé nou pou nou pa viré do pou nou pa ouè nésésité prochin nou. Nou pa doué ginyin yon konpòtman Farizyin. Tan Karèm nan sé yon tan nètouayaj. Sé pou nou nètouayé konsépsion nou ginyin osijè jèn nan, osijè priyé-a, osijè charité-a. Sé pa pou moun n-ap fè jèn, sé pa pou moun n-ap lapriyé, sé pa pou moun n-ap fè la-

charité. Sé pou Bondié. Si min nou sal avèk tranzaksion nou blijé lavé yo pou Bondié pa viré figi-l, lè nou lonjé yo dévan-l (Is 1,15). Si nou gin kont avèk prochin nou, fò nou padonnin, fò nou rékonsilié, pou padon Bondié-a ak rékonsiliation Bondié-a kapab antré nan kè nou (Mt 5,33s; 6,12).

Prémié Léktu-a détayé laloua-a ba nou, sa Bondié té bay Moyiz sou mòn Sinayi-a (Ex 20, 1-17): dis kòmandman yo, Sin Pòl di nou yo ranmasé nan charité-a. Moun ki rimin prochin-l, li réalizé laloua-a (R 13, 8-10). Sin Jan di nou yo bay laloua-a pa lintèmediè Moyiz, min lagras la ak vérité-a sé pa lintèmediè Jézu-Kri li rivé (Jn 1,17). Laloua-a fèt pou sèvi moun nan, sé pa moun nan ki fèt pou sèvi laloua-a (Mc 2,27). Sé poua nou pa doué trò sévè vizavi pèsòn. Si Bondié padonnin, kilès k-ap akizé? (R 8,32-34; Jn 8,11). Pi gran frè-a pa-t vlé antré nan kay la, lè-l ouè jan Papa-a résévoua pi piti-a ki té pati al fè banbòch ak lisans lè-l té fi-n gaspiyé tou ti éritaj la (Lc 15,38). Jézu fè nou konprann si Bondié padonnin, nou pa gin doua ap défann laloua-a pi plis pasé-l. Laloua-a fèt pou moun nan, sé pa moun nan ki fèt pou laloua-a. Gin yon fason pou apliké laloua-a nan chak sikonstans, parapò a chak moun, pa gin dé ka ki sanblé. Bondié sé pa yon jij. Jistis Bondié sé jistis ki vi-n sovè nou "justice salvafique", sé pa jistis ki vi-n kondané nou. Tan Karèm nan la pou raplé nou sa. Sé kè sansib Bondié vlé plis pasé sakrifis (Os 6,6). Bondié pa souaf san. Bondié souaf rinmin. Sou Koua-a, avan Jézu di dènié paròl li-a "Tout bagay fi-n réalizé" (Jn 13,30), li di: "Mouin souaf" (Jn 19,28). Sa-l té souaf la, sé kè nou. Kè-l louvri (Jn 19,34) san ak dlo soti. Sign Kana-a ak sign Tanp la réalizé. Li té bay la Trè Sint Vièj Mari randé-vou nan pié Koua-a lè-l té di-l: "Madanm, sa-k gin ant mouin minm ak ou minm nan, lè-m pa ko rivé" (Jn 2,4). Lè lè-l rivé (Jn 13, 1), sa vlé di lè Koua-a (Jn 12, 23,27; 17,1) lè sa-a lè la Trè Sint Vièj rivé tou (Jn 16,21): "Madanm nan k-apral anfanté-a chagrin paské lè-l rivé". Dépi lè sa-a patizan-an pran-l lakay li (Jn 19,27). Sign Kana-a réalizé nan sign Koua-a, sign Sajès la réalizé nan sign Koua-a. Konsa tou sign Tanp la réalizé nan sign Koua-a. Profèt Ézékièl té prévoua yon lariviè dlo k-ap sòti nan kontrefò douat Tanp la (Ez 47,1). Kè Jézu pèsé sou Koua-a, san ak dlo sòti (Jn 19,34), dapré sa-l té promèt li minm minm jou fèt Tanp yo (Jn 7,37), lè-l té di si yon moun souaf, sé pou-l vi-n jouinn li, nan kè-l ap gin yon sous dlo k-ap koulé pou tout tan. Sou bò pui Samari-a, Jézu té palé an parabòl ak Samaritèn nan, li té promèt li sa tou lè-l té mandé-l dlo pou-l bouè-a, li té promèt li dlo lavi (Jn 4,14). Madanm nan té késioné-l sou koté pou adoré Bondié, li té di-l sé nan Éspri-a ak vérité-a (Jn 4,23). Jézu sé vré Tanp la.

Sin Pòl di nou, nou sé Tanp Éspri Sin-an. Li mandé nou pou nou pa kite pèsòn sal kò nou (1 Co 6,19). Sé poua li di nou pou nou évité fè mové ak-

sion ki dézonèt avèk kò nou, pou nou respékté-l paské sé kay Éspri Sin-an. Karèm nan sé moman pou nou sonjé fè yon bon konfésion, pou nou pran rézolisyon fini ak tout mové libètinaj. Sé péché nou ki fè Jézu soufri sou Koua-a. Chak vandrédi Karèm nan Chémin-Koua-a, lè nou rivé nan station ki montré fi Jérusalèm yo k-ap kriyé sou Jézu-a, nou tandé mèsaj Jézu ba nou nan okazion sa-a koté li mandé nou pou nou kriyé sou pròp péché nou, ki vré koz soufrans li (Lc 23, 28-31). Sé konsa pou nou sonjé réfè jès li té fè-a lè-l té nétouayé Tanp la avèk yon fouèt pou-l chasé machann yo. Sé pou nétouayé fon kè nou tou avèk yon bon kontrision. Gin anpil mouton ak bèf, ak piès monnin, ak pijon... ki mérité sòti nan Tamp Kè nou. Ginyin ki la lontan, k-ap tann tan Karèm nan pou yo sòti. Yon bon konfésion ap raplé nou Batèm nou ak profésion-d-foua n-ap fè nan nuit Dimanch Pak la. Tou sa ki ankonbré fon kè nou, sé pou nou gin kouraj mété yo déyò, nan yon bon konfésion. Pak Juif yo té tou pré. Vré Pak la tou pré nou. Krazé vié Tanp la pou Jézu réfè yon Kay tou nèf nan plas li. Dézabiyé nou ak ansyin Adanan, pou nou abiyé nou ak yon moun tou nouvo (Ep 4,24; Col 3,10), Jézu-Kri li minm, pou sé pa nou minm k-ap viv ankò, pou sé li minm k-ap viv nan nanm nou (Ga 2,20). Kité-l ouété kè ròch la anndan nou pou-l mété yon kè tou nouvo, sa vlé di pròp kè pa-l (Jer 31,33; Ez 36,26) avèk nouvo laloua-a, laloua rinmin-an, laloua Éspri-a, ki gravé nouvo kontra-a, kontra Batèm nan.

Pandan fèt Pak Jérusalèm nan, anpil Juif vi-n kouè nan Jézu poutèt yo ouè sign ak prodij (Jn 2,24; cf 4,48). Min vré lafoua-a pa chita sou sign. Sin Pòl insisté pou-l di kijan sé lafoua-a ki doué réglé konpòtman rélasyon Juif yo parapò a Bondié, nou minm sé lafoua-a ki doué réglé konpòtman rélasyon nou avèk Bondié. La Trè Sint Vièj té bay Bondié lafoua-l san-l pa-t bézouin ouè sign (Lc 1,38). Sint Élizabèt té fè konpliman pou li poutèt sa (Lc 1,45), lè-l té di: "Ala kontantman pou sa ki kouè san yo pa ouè!" (Jn 20,29). La-foua-a sé kondision Batèm nou. Sé pou nou rénovlé lafoua nou pou nou rénovlé promès Batèm nou avèk sinsérité. Chak dimanch nou toujou résité Krédo-a, apré prèch la. Sé pou nou konnin-l pa-kè, sé pou nou réfléchi sou li souvan, sitou alokasion Karèm nan, paské Karèm nan sé yon tan pou nou aprofondi anségnman lafoua-a.

N-ap mandé Manman Mari pou-l soutni lafoua nou, pou minm si chémin Karèm nan pa minm gin yon ti zéklè ladan-l, nou asiré l-ap débouché nan Limiè Pak la.

Sonjé répasé dis kòmandman yo ki vi-n kòm premié Léktu jodi-a, sé yon fason pou nou foyé konsians nou pi byin, pou nou ouè koté nou manké pa

rapò a Bondié, pa rapò a prochin-an, pa rapò a nou minm, ki sa pou nou fè pou nou korijé.

Jézu nétouayé Tanp la. Sé yon invtasyon pou pandan Karèm nan nou nétouayé fon kè nou, ki **Tanp Èspri Sin-an**.

*
* *

TOUAZIÈM DIMANCH KARÈM C

"Mouin ouè pèp mouin pasé tray nan Éjip, mouin tandé rèl li, anba kou chèr travay yo, mouin konnin soufrans li". Sé sa premié Léktu-a di nan Égzòd 3,1-5. Ki sans soufrans sa-a? Èské sé pinision Bondié ap lagé sou do pèp la? "Évanjil la ap bay répons jodi-a (Lc 13,1-9). Moun yo Pilat té fè masakré-a, sé pa paské yo té gin plis péché pasé tout Galiléyin yo ki fè sa té rivé yo. Moun yo aksidan kay la té touyé-a, sé pa krim yo yo t-ap péyé (cf Jn 9,2; Jb 11,6). Jézu profité pou-l fè sa sèvi léson kan minm, tankou yon invasiyon pou nou fè pénitans. Sé konsa dézièm Léktu-a di nou (1 Co 10,1-12): tou sak té pasé nan tan Ansyin Téstaman-an, sé léson sa doué sèvi nou. Sin Pòl prezanté istoua sòti Éjip la. Li di nou: Bagay sa yo té destiné pou sèvi nou égzanp pou nou pa mét lidé nou sou sa-k mal

Bondié pa vlé ouè soufrans. Sé pa li minm ki mété soufrans sou tè-a. Sé lanvi djab la ki fè péché rivé sou tè-a ak konsékans péché-a: soufrans, lanmò (Sg 2,23-3.9). Kanta Bondié li minm, li gin bon kè, li gin pasians, li toujou pré pou-l padonnin, dapré sa Psòm-répons la di nou (Ps 103,8; 102,9; cf Ps 86,15; 145,8; Ex 34,6). Sé sa tou finisman Évanjil té vlé montré, lè-l di: pran pasians toujou, minm si apré touazan pié fig la pa donnin, kité-l yon ané ankò, ba-l yon dènié chans minm si yo pa-t prévoua sa nan program nan. M-ap mété fimié, m-a souin-l pi plis. Mision Jézu, sé mision Sèvitè Granmèt la: li pap étinn mèch la k-ap fè lafimin-an, li pap kasé rozo-a ki féfé-a, li pa palé fò (Is 42,2-5: premié Kantik Sèvitè-a premié Léktu Lindi-Sin). Pandan touazan l-ap tann frui nan pié figié-a, pandan touazan l-ap préché dévan tout moun, pèp la pa mét lafoua nan li, sé kòm si sé tan-l l-ap pèdi (Is 49,4, = Dézièm Kantik Sèvitè-a: premié Léktu Madi-Sin). Li souin pié figié-a nan jadin rézin-l nan (Os 9,10; Is 5,1-7; Joël 1,7; Ct 1,6; 8,11-12). Nan pouin anyin pou-l té fè pou li li pa-t fè (Mi 6,1-5). Movèz foua pèp la ap kondané-l (1 Co 10,10; Lc 13,7; Mc 11,12-14; Mt 21,18-22). Min Jézu ap kité pòt kè sansib li louvri jous nan bout, lè yo pèsé-l sou Koua-a (Jn 19,34). chatiman pèp la, li pran-l sou do-l kòm Sèvitè-a (Is 50,4-8; = 3^{ème} kantik Sèvitè-a: premié léktu Mèkredi-Sin). Sans soufrans Job la, sé li minm k-ap bay li (Is 52,12-53,13; = katriyèm Kantik Sèvitè Granmèt la: Vandrédi-Sin). Soufrans pèp Israèl la nan Éjip la, li fè pou pròpté pèp la (Is 40,2; 52,1; Ba 3,10; Za 3,3-5; Tob 13,5ss). Judit di sé yon avètisman tou Bondié bay moun ki touché-l tou pré, sé pa yon pinision (Jdt 8,27). Soufrans Jézu yo minm sé yon mouayin pou délivré pèp la ki pa kapab péyé ak sèl fòs pa-l. Nou gin pou nou chanjé mantalité parapò a sans soufrans la. Sé sa n-ap mandé Manman

Mari a lokazion tan Karèm nan. N-a sonjé réfléchi sou bèl lèt Pap Jan-Pòl II té voyé sou sans soufrans la: "Salvifici Doloris".

Tan Karèm nan, sé tan PÉNITANS, sa vlé konvèsion. Fè pénitans, sa vlé di chajé konduit ki té mové, pou pran rout ki douat. Sa mandé yon tan pou moun nan antré anndan fon kè-l, pou-l égzaminé konsians li dévan limié Paròl Bondié-a ak Éspri Sin-an. Sé pa yon bagay yon moun fè yon foua an pasan. Sé tout tan nou blijé rékòmansé, paské sé tout tan nou gin tandans réprann sa nou fi-n bay la, sé tout tan nou gin tandans glisé nan falèz. Nou gin tout tan pou n-ap rédrésé chémin nou. Prémie prèch Jézu fè, lè-l sot nan dézè-a, li mandé pou chanjé mové konduit, pou nou kouè nan Bòn Nouvèl la (Mc 1,15). Bondié pa vlé lanmò méchan-an, li mandé pou-l chanjé mové konduit pou-l viv (Ez 33,11).

Lè yon moun gin yon lajan nan min-l, li pa kapab sèvi avèk li, soua paské sé gro biyé, soua paské, sé lajan étranjé, li fè chanjé lajan-an. Lè-l gin yon piès tè oubyin zannimo, li bézouin achté dèt bagay, li vann yo pou-l jouinn lajan, sé kòmsi li chanjé-l, pou yo ba-l lajan nan plas yo (Dt 14,25). Sé konsa lè konsians nou anbarasé nou, lè-l trò lou pou nou, lè chaj l-ap poté-a ap ankonbré nou, lè-l anpétre pié nou, lè-l anpéché nou déplasé avèk fasilité, nou gin pou nou chanjé-l, pou nou pi léjé, pou nou pi alèz nan mouvman nou. Sèlman, chanjé konduit la, sé pa nan nou sous li soti sé nan Bondié, sé yon favè li fè nou, nou doué louvri kè nou pou nou résévoua (1 R 18,37; Dt 30,6; Jer 32,40; 31,33). Si nou fèmin kè nou gras la pap pasé (Ac 28,27). Tan Karèm nan sé tan gras spésial, koté Bondié ap fè travay sa-a pou nou (2 Cor 5,2; Is 49,8).

Évanjil la ba nou yon konparézon pou fè nou konprann pasians Bondié, ki ba nou tan pou nou fè pénitans (cf 2 p. 3,9; Sg 12,2-10). Malgré tan li té bay pié boua-a pou-l donnin frui-a fi-n pasé, li ba-l yon dégi ankò pou-l kapab pèmèt li bay yon ti randman. Sé tankou yon profésé ki ouè élèv la pa kapab pasé, li fè tou sa-l kapab pou-l pozé-l kèsion ki fasil pou-l ouè si-l kapab sové-l. Bondié sé Papa. Jistis li dépasé mézi. Li débòdè nan rinmin. Tout liv Jij la montré kijan chak foua pèp Israèl té fi-n fè péché, malè té tonbé sou li, li régrèt, li chanjé konduit, Bondié padonnin-l. Padon Bondié pa gin limit. Yon foua nou chanjé konduit, nou travèsé frontiè ki séparé nou avèk li-a sé padon sa-a minm n-ap préché (2 Co 5,18,20), pou invité tout moun louvri kè yo pou yo résévoua-l (Jer 36,6-7; Joël 2,13; Jon 3,9; 4,2; p. 116,5; 103,8; 86,15; 145,8; Ex 34,6). Sin Pòl té fè moun Korint yo rémak ki sévè, pou-l té

blijé yo rantré nan fon konsians yo, pou yo régrèt mové konduit yo. Sa té fè yo chagrin. Min santiman sa-a sé té chémin ki minnin chanjman-an (2 Co 7,9). Gin rémak sévè nou blijé fè ki lakoz moun yo gin chagrin. Sa pèmèt yo chanjé konpòtémán pou yo jouinn padon Bondié. Gin dòt fason tou nou chèché fè moun chanjé konduit, sé montré yo pouvoua Bondié-a nan mèvèy li réalizé lakay yo, Ginyin ki sansib nan langaj sa-a. Yo kité-l touché kè yo. Gin dòt ki fèmin jé yo, ki bouché kè yo (Mt 11,21; 12, 41). Pa gin bon moun yon bò, mové moun yon lòt bò. Yo tout mélé. Sé poussa nou blijé palé pou tout moun ansanm, minm si sa n-ap di nan tèl sikonstans pa vizé tout moun alafoua. Ginyin ki bézouin tèl paròl pou yo, gin dòt sé tèl lòt paròl k-ap frapé yo. Sé dévoua nou pou préché pénitans la pou lèzòm, an minm tan ak pasians Bondié ki fè favè nan kè sabsib li-a. Sé konsa Akab chanjé mové konduit li, lè Profèt Éli abòdè-l (1 R 21,17-29). Sé konsa David chanjé mové konduit li, lè Profèt Natan akosté-l (2 Sm 12,1-25), lè Profèt Gad réproché-l (1 Chr 21,7-17). Sé konsa kolèkté-yo ak fi movèy vi yo chanjé konduit yo, lè Jan Baptis préché yo (Mt 21,32). Sé konsa moun Niniv yo chanjé konduit yo, lè Jonas avèti yo (Jon 3,1-10). Min Kayin fèmin kè-l, li fè kòm si li pa konprann répròch Bondié ap fè-l la (Gn 4,9) Adan kaché kò-l, lè-l tandé Bondié ap proche vi-n fè-l obsèvasion (Gn 3,8). Sèl prézans Jézu, ki fè ladésant kay Zaché, kont pou-l boulvèsè kè-l (Lc 19,8). Prézans Jézu nan vil koté Mari-Madlèn té yé-a, kont pou fè-l régrèt fot li (L 7,37ss). Ti pitit la ki té pati louin lakay li-a ak tout richès li-a, sé lè-l pèdi zanmi-l yo, li ouè li té louin Bondié, vré zanmi-l (Lc 15,17). Bondié chouazi divès fason pou-l fè nou rantré nan fon konsians nou, pou nou pran chémin k-ap fè nou tounin lakay li-a. N-ap mandé Manman Mari pou-l kinbé min nou sou rout sa-a.

Tan Karèm nan sé tan pénitans, sé tan pasians: tan pénitans sou bò lèzòm, tan pasians sou bò Bondié. Évanjil la montré nou kijan Jézu invité nou fè pénitans antan l-ap éspliké sans évènman ki rivé nan Galilé-a: Pilat ki masakré Juif yo pandan yo t-ap ofri sakrifis la minm. Jézu profité pou di nou sé pa yon madichon ki tonbé sou moun sa yo ki fè yo mouri konsa-a, sé pa Bondié ki pini yo, sé pa poutèt péché yo té fè chatiman tonbé sou yo, sé pa paské malè tonbé sou you moun pou-ou konprann di sé krim li l-ap péyé. Min Jézu profité sitiasion sa-a pou-l bay avètisman fè pénitans. Li di: "si nou pa fè pénitans nou tout ap péri minm jan". Jézu kontinuyé, li profité bay yon parabòl sou sans pasians Bondié dévan lèzòm k-ap fè pénitans. Li bay égzanp pié figié-a ki pa-t kapab donnin joustan mèt jadin-an té gin lidé raché-l pou-l pa gaspiyé tè-a. Jéran-an mandé yon ti pasians pou-l ouè si pandan yon ané ankò li kapab okipé-l pou-l tiré kichòy nan li. Tan sa-a jéran-an ap travay pié figié-a, sé tan pasians parapò a mèt jadin-an, min tou

sé tan pénitans parapò a pié figié-a. Otréman di, sé yon tan koté pié figié-a ap chanjé konpòtman; si-l pa-t janm bay okinn frui dépi touazan mèl li t-ap vi-n chèché-a, koulié-a yo ba-l yon dènié chans, pou-l fè yon èfò, pou-l chanjé fason li abitué fè, pou-l fè pénitans. Sé sa pénitans la yé, sé yon chanjman konpòtman. Dé tan sa yo alé ansanm, ni tan pasians la ni tan pénitans la. Sé paské Bondié gin pasians, li ba nou tan pou nou fè pénitans, sa vlé di pou nou chanjé fason n-ap viv. Tan Karèm nan la pou sa. Sé tan pasians parapò a Bondié (2 Co 6,2; Is 49,8; R 3,26), sé tan pénitans parapò a lèzòm (Mc 1,14; Jon 3,5; Joël 1,13ss).

Gin yon mésié ki té bouké ak lavi-a, li désidé pou-l touyé tèt li. Li monté sou yon pon, anlè yon gran riviè ki fon anpil. Li voyé kò-l nan dlo-a, li mouri. Madanm li al jouinn Kiré d-Ars, Sin Jan-Mari-Viané, ki té gin gras Bondié ba li pou-l li sa k-ap pasé nan konsians moun yo. Madanm nan di-l konsa "Mari-m sot touyé tèt li, mouin konnin mouin pa bézouin priyé pou li, li dané", Kiré d-Ars di-l konsa: "Non, pa di sa: Bondié ba-l posibilite régrèt aksion li fè-a, nan ti moman-tan ki séparé pon-an ak dlo-a, li gin tan mandé Bondié padon". Chak samdi mésié sa-a té konn gin abitud al nan jadin-l kéyi yon flè roz, bay Madann li al dépozé-l dévan statu la Trè Sint Vièj Mari, malgré li pa-t fidèl nan lavi-l. Sé yon ti jès ki pa sanblé anyin, Bondié pran sa an konsidèrasion kòm Papa kè sansib, ki gin pasians, ki mal pou faché. Pou Bondié yon jou sé tankou mil-an, mil-an sé tankou yon jou (2 p. 3,8; Ps 90,4). Nan tan Noé Bondié té pran pasians, sé moun yo ki méprizé pasians sa-a (1 p. 3,20). Gin moun ki pran tan anvan yo désidé fè yon chanjman nan lavi yo; min lè yo chanjé-a tou, yo chanjé nèt. Sé pa sou aparans pou nou gadé. Minm nan dènié moman lavi nou, Bondié ba nou dènié chans, paské sé Papa li yé, li pa vlé ouè travay li gaspiyé. Sé sa Psòm-répons la di (Ps 103 = 102): Granmèt la pran pitié, li sansib". Vèsè 8 la di: "Li pran PASIANNS, li gin anpil kè sansib". Gin yon misionè ki t-apral vouayajé nan péyi koté yo té voyé-l al préché-a: anvan-l pati, li mandé lòt misionè yo ki té abitué travay nan péyi koté li t-apralé-a: ki kalité pou yon misionè ginyin?" Yo réponn li: "Sé toua kalité sitou pou-ou ginyin: Prémie-a sé pasians, dézièm nan sé pasians, touazièm nan sé pasians". Sé yon fason pou di kijan pasians la in-pòtan. Provèb la di konsa: "Ak pasians ou-ap ouè trip fronmi". Lè Moyiz té mandé Bondié non-l nan (Ex 3,13; Prémie Léktu-a). Bondié té ba-l yon prémié répons antan-l té di konsa "Mouin sé Sila-a ki toujou la-a" (Ex 3,14). Min Moyiz té rékòmansé pozé-l kèsion ankò sou sa, paské li pa-t satisfè. Nan Égzòd 33,18, Moyiz di-l: "Fè-m ouè ki sa-ou yé tout bon vré sou pa anndan-an, nan fon kè-ou". Sé lè sa-a Bondié dévoualé-l fon kè-l, li montré-l

li sé rinmin, li gin kè sansib, li bon, li gin PASIANS, li mal pou faché (Ex 33,19; 34,6; Ps 86,15; 103,8; 145,8), a tèl pouin lè Sin Jan bézouin di nou non Bondié, li di: "Bondié sé rinmin" (1 Jn 4,8). Li éspliké nou sé pa nou minm ki té rinmin Bondié an premié, min sé Bondié ki té rinmin nou an premié, épi ki ba nou posibilité pou nou réponn li. Konsa sé pa paské nou fè pénitans ki fè Bondié pran pasians avèk nou, min sé paské Bondié gin pasians, ki fè li ba nou tan fè pénitans. Sé pasians li ki sipòtè nou, ki fè nou kapab régrèt sa n-ap fè-a (1 Jn 4,10).

Té gin yon profèsè nan séminè, ki t-ap sivéyé dòtousa koté séminaris yo kouché. Li rémaké pliziè soua dé suit, gin sink kabann ki vid. Li mandé nan kè-l koté mésié sa yo alé konsa. Li suiv yo yon asouè, li ouè yo té konn pran abitud désann nan yon kav koté barik divin yo té yé-a, épi lè yo rivé la, yo bouè kont divin yo, apré sa, yo rémonté nan néchèl la, yo tounin vi-n kouché nan kabann yo. Li pa di anyin, li kalkilé kijan l-ap fè pou-l kinbé yo nan plat min. Yon asouè li pran dévan bann nan, li dégizé, li abiyé minm jan ak yo, li fè kòm si sé yon séminaris li yé li minm tou; épi pandan y-ap désann nan kav la koté barik divin yo té yé-a; li glisé kò-l nan mitan yo, li désann avèk yo; kòm sé té nan nuit, yo pa rémaké prézans li. Lè yo rivé anba-a, yo kòmansé bouè, jan yo konn abitué fè-a. Li kité yo bouè kont kò yo. Lè yo fi-n bouè jous yo sou, yo désidé rémonté nan néchèl la. Lè sa-a, profèsè-a pran dévan, li kòmansé mét pié-l sou premié baro néchèl la; min kòm li pa-t fi-n gin tròp ladrès nan monté néchèl, li fè yon fo-pa. Séminaris ki té dèyè-l la, li té konprann sé youn nan Séminaris parèy li yo ki té dévan-an: li pasé-l yon bèl tap sou bò dèyè-l; li di-l konsa "Ou pa kapab fè atansyon? épi monté pi vit, sé sou mouin ou manké tonbé la-a". Profèsè-a pa di anyin. Li kinbé baro néchèl yo ti pa, ti pa, joutan li rivé anro bouch kav la. Lè-l rivé, li kanpé nan papòt éskalié-a; chak Séminaris ki vi-n ap pasé dévan-l, li limin yon grinn alimèt pou-l ouè figi-l. Chak foua li fi-n pasé alimèt la, li étinn li byin vit. Konsa li gin tan ouè figi tou lé sink mésié yo. Nou pa bézouin mandé kijan lèzòm yo sézi youn apré lòt, lè yo ouè sa-k rivé yo. Jou sa-a, yo désoulé la minm kòm si yon douch dlo frèt ki té tonbé sou tèt yo. Youn apré lòt y-al nan kabann yo; min nannuit sa-a, dòmi kité jé yo. Y-ap kalkilé sa k-apral rivé yo nan landmin. Lè jou klè, yo tout ranjé afè yo, y-ap tann Pè sipériè-a vi-n chèché yo pou mété yo déyò. Yo pa minm pran chans al lékòl. Lè yo gadé, li dizè dimatin, pèsòn pa di yo anyin, yo pi sézi toujou; midi rivé, pèsòn moun pa okipé yo, asouè, pèsòn pa gadé yo si yo chyin, si yo chat; yo di nan kè yo: "Yo gin lè voyé chèché moun lakay nou pou vi-n chèché nou, minmin nou alé"; dé jou pasé, toua jou, yon sémèn: anyin. Yo fè réfléksion, yo di:

"Gin lè pa gin okazion, yo doué ap tann sémèn prochèn". Dé sémèn pasé, anyin, yon moua pasé, pèsòn pa janm palé sou anyin. Yo pa konn ki sa pou yo pansé, yo di: "Gin lè y-ap tann ti vakans rivé, pou mété nou déyò". Ti vakans rivé, anyin; gran vakans rivé, yo pa minm ékri anyin dròl nan kanè lékòl yo. Lòt ané rivé, yo tounin san pèsòn pa mété yo déyò. Yo pasé tout rès tan séminè yo konsa, ap kalkilé si sé pa yon rèv yo té fè. Sa-k ginyin: Pè-a ki té ouè yo-a, li pa-t janm palé sou sa ak pèsòn, minm pa avèk Pè ki rèsponsab an chèf nan kay la. Si tèlman sé li minm sèl ki konn bagay la, li pa minm di mésié yo anyin ni fè yo okinn répròch, ni maké yo mal viv, sé sa-k fè yo pi sézi toujou. Dépi lè sa-a yo maché "ès-ès", yo konnin yo gin grinn zanno yo kay òfèv. Yo minm ki té pi dézòd nan pami tout moun sé yo minm ki blijé ap bay égzanp, yo maché sou pinga, yo santi kijan Pè sa-a té bon, li pa dénoncé yo. Sa fè yo ouè kijan Bondié bon. Épi yo rété nan séminè-a joutan yo rivé Prèt. Sa montré kijan Sin Fransoua-d-Sal gin rézon lè-l di konsa: "Ou pran plis mouch ak yon kuiyè mièl pasé avèk yon barik vinèg".

An 1983, té gin yon Sinòd a-Ròm pou Évèk yo, sou késion Rékonsiliation ak PÉNITANS nan mision Égliz la. Yo té déjà voyé davans yon séri késion pou nou té réfléchi sou yo, pou nou té voyé répons bay Évèk yo, pou yo té étidié kijan Égliz la t-ap fè pou-l bay lèzòm plis posibilite pou yo jouinn avantaj sakréman rékonsiliation-an, sa nou rélé "konfésion"-an, pou yo rétrouvé sans pénitans la. Apré sa, Pap la té voyé dènié dokiman-an: "Réconciliation et pénitence dans la mission de l'Église". Lè nou palé osijè lakonfésion, nou di sakréman Rékonsiliation, pou nou insisté sou rélasyon nou avèk Bondié nou rétrouvé nan sakréman-an; min nou di tou an palan osijè lakonfésion-an: sakréman lapénitans pou nou fè sonjé démach lèzòm, ki gin yon mouvman pou yo fè, antan yo kite yon mové diréksion pou yo viré do bay péché, pou yo viré fas bay Bondié. Sé pasians Bondié ki pèmèt nou rékonsilié avèk li, ki ba nou posibilite chanjé konpòtman, fè pénitans, kasé tèt tounin vi-n jouinn li. Tout sans Karèm nan la. Sé parabòl ti pitit ki té pati kite papa-a, l-al gadiyin kochon, tèlman li té vi-n manké tou sa-l bézouin pou-l viv; lè-l tounin li vi-n rékonsilié ak papa-a, li té kouè papa-a ap pini-l, sé lékontrè ki rivé, papa-a tèlman kontan jouinn li, li fè touyé bèf, li fè gran résépsion, li abiyé pitit la tou nèf, li mét bag nan douèt li, bèl soulié nan pié-l, joutan pi gran fré-a fè jalouzi (Lc 15,11-32). Travayè ki rivé pou kòmansé travay jous vè sinkè lapré midi yo, yo touché minm pri avèk premié yo ki anplouayé dépi granmatin yo, paské mèt jadin-an té vlé fè yon jès pou yo (Mt 20,1-16). Avèk pasians li té soti chak moman pou-l pa kite

pèson ré t ap drivé san yo pa fè anyin (Mt 20, 3.5.6). Jézu di li la nan papòt la ap frapé joutan yo louvri ba li (Ap 3,20).

Vèsè anvan lévanjil la di nou nan Matié 4,17; "FÈ PÉNITANS, déklarasion Granmèt la; Ringn sièl yo tou pré". Pénitans la, sé pa mét rad sak, ap pronminnin tout koté fè pèlérinaj avèk kòdon nan sinti, pou bay madichon; sé pa fè yon pakèt sakrifis ki rèd, pou tout moun ouè. Sé nan fon kè nou sitou sa ap pasé, koté Papa nou ki ouè sa-k kaché nan sékrè-a ap rinmèt nou sa-a (Mt 6,16-18). Sé yon kè ki krazé, ki pilonnin, ki boulvèsé, sé li minm ki fè Bondié plézi, Bondié pa méprizé-l (Ps 51,19; 34,19; Mt 11,29-30; Is 57,15; 66,2; Dn 3,39; Mi 6,7-8; Os 6,6).

Dézièm Léktu-a montré nou istoua pèp Israèl la ki sèvi nou kòm modèl, kòm égzanp, ou nou fè pénitans (1 Co 10,1-12), yo ékri sa pou lédikasion nou. Minm jan istoua moun yo ki té mouri anba min Pilat la sèvi nou avètisman pou nou fè pénitans (Lc 13,1-5), konsa tou moun yo ki mouri nan dézè-a, sé yon avètisman pou nou fè pénitans. Lè la Trè Sint Vièj Mari parèt a-Loud dévan ti Bènadèt, li di-l konsa: "Pénitans, pénitans, pénitans". Lè sa-a sé nan Karèm yo té yé. La Trè Sint Vièj té di Sint Bènadèt tou: "Lapriyé pou konvèsion péchè yo". Lè Sint Bènadèt ap mouri, antan l-ap résité "Je vous salue, Marie", li rivé nan koté ki di: "Priez pour nous, pauvres pécheurs", li di: "Priez pour moi, pauvre pécheresse, pauvre pécheresse, pauvre pécheresse", épi souf li koupé, sé sou dènié mo sa yo li mouri, li travèsé nan sièl la, li fini konsa, tankou yon plak k-ap joué mizik épi ki bloké, sou minm mo sa yo, k-ap répété yo joutan yo dékolé-l. Nou tout nou sé péchè (R 3,10; Ps 14,1), tan Karèm nan doué fè nou pran plis konsians sou sa, pou nou chanjé fason n-ap aji ki pa kòrèk. Sé sa pénitans la yé. Bondié minm toujou gin kè sansib ak pasians, li mal pou faché, l-ap tann, tankou mèt jadin rézin-an, koté pié fig frans la té planté-a, sa fè touazan l-ap vi-n chèché frui, li pa jouinn, l-ap espéré ankò yon lòt ané (Lc 13,6-9). Sa vlé di pasians Bondié pa gin limit. Min sèlman nou pa doué méprizé pasians Bondié (Jn 12,36.48; Pr 1,24-32; Is 65,2.12; 66,4; Ct 5,2; Jer 7,13ss; Ps 107,11). Sé pa pou nou pran plézi ap fè péché ki fè Bondié gin pasians, sé pou-l kapab ba nou posibilité fè pénitans, tounin vi-n jouinn li, dapré sa-l di nan liv Profèt Ozé-a 2,16: M-ap pran-l sou plan, m-ap kondui-l nan dézè-a, m-ap palé nan kè-l" épi nan Ozé 2,19; "l-ap di: m-ap tounin pou-m al jouin premié mari-m nan" (cf Lc 15,18). Dènié fraz nan dézièm Léktu-a di nou konsa: "Moun ki konprann li kanpé, sé pou-l fè atansyon pou-l pa tonbé (1 Co 10,12). Sé yon avètisman pou moun ki konprann yo pa bézouin pénitans yo, tankou Farizyin yo. Sé bagay sa-a ki té fè Jézu lapinn anpil la, sé kòm si yo di yo pa

bézouin padon Bondié, yo pa bézouin rékonsiliation Bondié. Sé poussa Jézu té bay parabòl Farizyin-an avèk piblikin-an, ki té monté al lapriyé nan kay sakré-a, Farizyin-an bonbé léstomak li, kòm si li pa gin anyin pou-l réproché tèt li, sé louanj sèlman l-ap fè pou pròp tèt li, kanta piblikin-an minm li rékonèt li sé pòv péché. Sé poussa sé li minm ki tounin lakay li an règ avèk Bondié. Min Farizyin-an rèt avèk tout péché-l yo (Lc 18,9-14). Lè nou vi-n konfésé sé pa louanj pròp tèt nou pou-n ap fè, pou-n n-ap rankonté sa nou fè ki bon oubyin pou-n ap di sa lòt moun fè nou. Sé pou nou rékonèt nou piti anpil dévan Bondié, nou tankou yon ti pòv ki vi-n mandé-l lacharité padon-l, pasians li ak kè sansib li. Moun ki konprann li kanpé, sé pou-l fè atansyon pou-l pa tonbé (1 Co 18,12). Sé tankou kay ro Siloé-a ki té kanpé byin douat, li pa-t konnin si-l t-ap tonbé konsa, san-l pa atann joutan pou-l touyé dizuit moun yo, jan lévanjil la rakonté-a (Lc 13,1-5). Jézu éspliké nou sé pa yon chatiman ki rivé moun sa yo poutèt péché yo. Min li invité nou sèvi ak égzanp sa-a pou si nou konprann nou kanpé fèm, pou nou fè atansyon pou nou pa tonbé (cf Gal 6,1). Judit 8,27 di nou kijan nan sikonstans sa yo, sé pa yon vanjans Bondié tiré sou nou, min pito yon avètisman Granmèt la bay moun ki tou pré-l yo. Li invité nou li sign tan yo. Pandan touazan mèt jadin rézin-an ap vi-n chèché frui nan pié fig Frans la, li pa jouinn, pandan touazan Jézu ap maché préché nan lajudé, Juif yo fèmin zòrèy yo, joutan yo klouré-l sou Koua-a. Pié fig Frans la séché jous nan rasi-n (Mc 11,20). Jan Batis té déjà avèti Juif yo dépi nan Kòmansman prèch li (Mt 3,10): "Rach la déjà nan pié boua-a; konsa tout pié boua ki pa donnin bon frui y-ap koupé-l, y-ap jété-l nan difé". N-ap mandé Manman Mari pou nou pran avètisman sa-a o-sérié pou nou fè **PÉNITANS** (konvèsion) pandan tan **PASIANS** Granmèt la.

Conversion: Si 44,16; Is 30,15; Ez 33,11; Ac 15,3.

Convertir: Dt 14,25; 1R 13,33; 18,37; 2R 17,13; 2Chr 6,24; Tob 14,6; Pr 1,23; Si 17,25; 21,6; 48,15; 49,2; Is 6,10; 19,22; Jer 5,3; 8,5; 18,8; 34,15; 36,7; 44,5; Ez 3,19; 18,30; 33,9a.b.11; Za 1,6; Mt 13,15; Mc 4,12; Jn 12,40; Ac 3,19; (9,35; 11,21; 15,19; 28,27; 2Co 3,16; 2Tm 2,25.

Converti: 1Tm 3,6.

Repentir: Sg 12,10. 19; Si 18,21; Am 7,3.6; Mt 3,8.11; Mc 1,4; Lc 3,3.8; 5,32; 15,7; 24,47; R 2,4; 2Co 7,9.10; He 6,1; 2P 3,9.

Se repentir: Gn 6,6.7; Ex 13,17; 1Sm 15,11.25a.b.35; 2 Sm 24,16; 1 R 8,35.47; 1 Ch 21,15; 2Ch 6,26.37; 7,14; 1Mc 11,10; Sg 11,23; Si 12,12; 17,24; 32,19; Jer 4,28; 18,8.10; 26,3.13.19; 31,19; 42,10; Jon 3,9.10; 4,2; Mt

3,2; 4,17; 11,21; 12,41; Mc 1,15; 6,12; Lc 10,13; 11,32; 13,3.5; 15,7.10; 16,30; 17,3.4; Ac 2,38; 3,19; 8,22; 17,30; 20,21; 21,20a.b; 2 Co 12,21; He 7,21; Ap 2,5a.b.16.21a.b.22; 3,3.19; 16,9.11.

Repentance: Ac 5,31; 11,18; 13,24; 19,4; R 11,29.

Repentant: Si 8,5

Pénitence: Dn 10,1; Mt 11,20; He 6,6

cf Souffrance

*

* *

KATRIYÈM DIMANCH KARÈM A

Batèm sé yon "illumination". Bondié fè limiè ki sou fas Pitit li-a kléré nou (2 Co 3,18; Sg 7,25; Ep 5,8ss). Sé poua jou Batèm nan, yo rimmèt nou oubyin yo rimmèt papa, manman, parinn, marinn, yon chandèl. Jou Pak la, chandèl Pak la limin dépi nan nuit, pou fè sonjé Jézu té lévé vivan sot nan tonbo-a tankou zéklè ki kléré. Avèg la té fèt tou konsa (Jn 9,1-41). Jézu pran labou, li froté jé-l, li voyé-l al lavé jé-l nan basin Siloé-a. Avèg la al lavé jé-l; lè-l tounin, li ouè klè. Lakanj Rafaèl té fè Tobi froté jé papa-l avèk fièl pouason-an li té péché nan lariviè-a, papa-a vi-n ouè klè la minm (Tob 11,7-8). Nan kòmansman kréasion-an sé ak labou Bondié té fòmé premié moun nan (Gn2,7). Sé labou tou Jézu pran, li froté sou jé avèg la (Jn 9,6). Batèm nan sé yon nouvo kréasion. Fènoua réprézanté ringn péché ak Satan (cf Jn 13,30). Satan sé "prince des ténèbres". Lafoua nou déklaré nan Batèm nou-an, li fè nou ouè klè sou pa anndan, minm si avèk limiè rézonman nou nou pa ouè profondè mèvèy sakré yo. Nan dézièm Léktu-a (Ep 5,8-14), Sin Pòl di Éfézyin yo: lontan nou té fènoua, kouliè-a minm sé limiè nan Granmèt la, li mandé nou pou nou maché kòm pitit limiè. Li raplé nou frui limiè-a li nan tout kalité sa ki bon, sé jistis ak vérité. Li mandé nou pou nou chèché fè sa-k fè Bondié plézi, pou nou pa patisipé nan aksion fènoua yo ki pa donnin frui yo min pou nou réproché yo. Li di nou bagay moun yo ap fè an kachèt, sé bagay ki fè yo ront minm nonmin non bagay sa yo. Bagay sa yo sé fènoua yo rélé, paské sé nan fènoua yo fè yo. Jézu té di Nikodèm konsa moun k-ap fè sa ki mal, li ront vi-n nan limiè pou yo pa ouè sa-l fè yo mové, pou yo pa fè-l répròch sou sa (Jn 3,20). Sin Pòl di lè yo dénonse bagay sa yo, sé nan limiè yo parèt klè. Li mandé nou pou nou lévé, nou minm k-ap dòmi-an, pou nou lévé sot nan pami mò yo, paské Jézu-Kri a kléré nou (Ep 5,14). Jézu di nou li sé Limiè. Moun k-ap suiv li, li pap maché nan fènoua, min l-ap gin limiè ki pap janm fini-an (Jn 8,12; 19,5; 1,9; 3,19; 12,46).

Nan premié dimanch karèm nan, nou té ouè tantasion Jézu té sibi nan dézè-a, lè Satan t-ap éséyé-l la. Li té répousé Satan nan toua foua, minm jan lè-l nan jadin Jétsémani-an, l-ap di toua foua: "Papa, si kalis sa-a pa kapab pasé san pou-m pa bouè li, sé pou volonté-ou fèt" la. Antan li répousé Satan, sa té raplé nou jou Batèm nou, nou gin pou nou rénonse Satan avèk tout okazion péché l-ap glisé dévan nou pou fè nou tonbé nan pièj. Sé lapriyé Nòtré-Pè-a nou konn résite nan finisman Batèm nan pou nou té sonjé kijan sitou jou premié dimanch Karèm nan, antan nou mandé Bondié pou-l ba-nou pin nou bézouin chak jou-a, san nou pa al chèché fè ròch tounin pin nan konpagni Satan, nan minm priyé Nòtré-Pè-a toujou nou mandé pou Bondié pa kité nou pran nan pièj, pou nou rézisté anba atirans Satan, pou-l délivré nou anba sa

ki mal la. Konsa premié dimanch Karèm nan, sé rénonisman Satan, tankou nan kòmansman sérémoni Batèm nan. Nan dézièm dimanch Karèm nan, sé té Transfigirasion Jézu-Kri-a, tankou yon Égzòd, nan Batèm nan nou chanjé figi, nou chanjé rad, nou chanjé lidé, nou chanjé chémin, nou viré do bay péché, pou lagras alapas, pou fè konvèsion. Réyéلمان vré nan sérémoni Batèm nan yo ba nou yon lòt rad tou blan pou montré lagras la ki abiyé nou tou bèl, ki transfigiré nou. Batèm nan sé rénonse Satan, Batèm nan sé chanjman mantalite, konvèsion, égzòd. Nan touazièm dimanch Karèm nan nou té ouè Jézu k-ap promèt Samaritèn nan dlo lavi-a. Batèm nan sé dlo lavi. Lè Pè-a batizé pitit la, li vidé dlo sou tèt li, li ba-l lavi Papa-a ak Pitit la ak léspri Sin-an. Batèm nan sé rénonse Satan (premié dimanch Karèm), sé égzòd, chanjman, konvèsion, transfigirasion, rad nèf (dézièm dimanch Karèm), sé dlo lavi (touazièm dimanch Karèm). Batèm nan tou sé limiè. Sé sa minm nou ouè nan katriyèm dimanch Karèm nan avèk avèg la Jézu voyé lavé jé-l nan basin-an épi ki tounin, ki ouè klè. Avèg la fè "profession de foi" tankou nou fè nan Batèm nou, li di: "Mouin kouè" (Jn 9,38), lè Jézu mandé-l si-l kouè nan Pitit Bondié-a. Sé konsa nan sérémoni Batèm nan nou di: "Mouin kouè", lè Pè-a pozé nou kèsion osijè vérité yo ki nan "Credo"-a. Tout dimanch sa yo ki vi-n anvan Pak la, sé préparé y-ap préparé gran sérémoni nuit Pak la, koté n-apral rénouvlé promès Batèm nou-an

Nan chak mision Sin Monfò té konn préché, li té konn fè moun yo réfè angajman Batèm yo, Sé konsa nan mision yo nou préché yo, alafin chak mision nou fè fidèl yo réfè angajman Batèm yo, pou yo rénonse Satan, pou yo kolé kò yo sou Bondié Papa-a, ak Pitit la, ak léspri Sin-an. Nan finisman sérémoni Batèm nan, yo rinmèt nou yon chandèl, sé sign lafoua krétyin nou. Nou gin pou nou maché tankou pitit limiè, pou nou pa fè aksion ki dézonèt, sa yo pa minm kapab prononse non yo nan bouch nou, tèlman mo yo sal. Kè nou sé Tanp léspri Sin-an, nou pa gin doua sal li ak anyin ki dézonèt. Premié léktu-a (1 Sm 16,1 b.6-7.10-13a) montré nou kijan Samuèl sakré roua David. Nan Batèm nan, lè Pè-a maké nou avèk luil Sin Krèm nan, apré li fi-n vidé dlo-a sou fron nou-an, li gin yon priyè li di ki raplé nou nou vi-n sakré pou nou patisipé nan aktivité Jézu-Kri yo kòm prèt, kòm roua, kòm profèt.

Psòm-répons la (Ps 22 = 23) di nou kijan Granmèt la anbomé tèt nou ak lousion (Ps 23,5). Batèm nan sakré nou.

Tan Karèm nan doué fè nou raplé Batèm nou, nou doué réfléchi anpil sou Batèm nan, ki konsékan anpil, nou pa doué ap di Batèm nan ouété choul nan tèt ti moun nan, li ba-l yon nanm. Sé pa sa, Batèm nan fè nou vi-n tounin pitit Bondié, pitit limiè (1 Th 5,5). Nou doué gin yon konpòtman pitit limiè. N-ap mandé Manman Mari favè sa-a pou nou konpòtè nou tankou

pitit limiè nan tout lavi nou, pou nou sonjé nou sakré, nou maké ak luil Sin Krèm nan, sé pa nou k-ap viv ankò. sé Jézu-kri k-ap viv nan nanm nou. Sé poua nou doué gin kè kontan, jan lékòl Profèt Izayi-a di nou poutèt luil kè kontan-an ki sakré nou-an tankou Prèt (Is 61,3.6), jan Psòm nan di nou-an, poutèt minm luil kè kontan sa-a ki sakré nou tankou Roua-a (Ps 45,8), jan Sin Luk di nou-an, poutèt léspri Sin-an ki sakré nou ak kè kontan kòm Profèt la (Lc 1,14-15. 28. 35. 41. 44.47; 11,21). Katriyèm Dimanch Karèm nan, sé dimanch "kè kontan", dimanch "Laetare", dimanch "mi-carème", sé mouatié tan Karèm nan, koté yo ralé yon ti souf nan pénitans la, koté yo gin posibilite mété ònéman litiji yo avèk koulè roz nan plas violèt la. Kantik ki louvri lamès la raplé sa antan li mandé nou pou nou gin kè kontan (Is 66,10-11): "Fè kè nou kontan avèk Jérusalem, dansé poutèt li" nou tout ki rinmin-l, avèk li sé pou kè nou débòdé ak kontantman, nou tout ki té pran dèy pou li! Konsa n-a manjé kont kò nou, n-a konblé ak kè kontan-l k-ap débòdé-a". [M-abiyé ak lavi Bondié; Limiè-a rivé sou tè-a, li kléré anndan fènoua; Limiè kléré tout nasion, limiè kléré tou patou; Yon limiè kléré nou, Granmèt la sovè nou, péché éfasé sou tè-a; Limiè Bondié anvayi tou patou, Limiè Jézu-Kri kléré nou, limiè Jézu-Kri sovè nou].

*

Lè nou fi-n batizé, Pè-a fè nou kinbé yon chandèl limin nan min nou. Si nou trò piti, li mété-l nan min papa. manman, parinn, marinn nou. Li mandé nou pou nou véyé pou-l pa étinn, paské. nou vi-n tounin pitit Limiè (1 Th 5,5). Li di nou pou nou kinbé-l, joutan n-al rankontré Granmèt nou nan papòt Sièl la. Jézu bay parabòl Vièj ki gin léspri yo, ki kinbé lanp yo limin nan min yo, pou yo rankontré mésié ki fèk marié-a k-ap vi-n sot nan nòs la (Mt 25,1ss). Fi-a ki fiancé-a, nan liv Kantik dè kantik la, li di: "M-ap dòmi, min kè-m ap véyé; mouin tandé fiancé-m nan k-ap frapé, k-ap mandé-m pou-m louvri pou li" (Ct 5,2). Dézièm Léktu-a di: Lontan sé fènoua sèlman nou té yé; kouliè-a, nan Granmèt la; nou vi-n tounin limiè, sé pou nou viv tankou pitit Limiè, antan nou bon, nou kòrèk, nou vré. Sé pou nou chèché rékonèt sa-k kapab fè Granmèt la plézi (Ep 5,8ss). Satan dégizé kòm anj limiè. Min ofon sé chèf fènoua li yé (2 Co 11,14). Sin Pòl di nou nou pa bézouin sézi si sèvitè-l yo dégizé kòm moun k-ap sèvi kòz lajistis (2 Co 11,15), min finisman yo ap réglé dapré aksion yo (ib). Jézu di nou nou sé limiè tè-a. Sa n-ap fè pa kapab kaché anba mamit. Sé pou-l sou étajè, pou tout moun ouè-l, pou-l kléré yo (Mt 5,14ss). Nan sans sa-a nou sé témouin Jézu chouazi. Nou pa fè anyin anba chal, konduit nou doué klè, san ipokrizi. Nou pa gin dé bouch, ni dé kè. Oui sé oui, non sé non (Mt 5,37; 2 Co 1,17; Jc 5,12). Nou pa gin pou nou ménajé zanmi avèk intèrè. Sin Pòl di nou, nan dézièm Léktu-a, pou

nou pa patisipé nan aktivité fènoua yo, yo pa réalizé anyin ki bon. Okontré sé pou nou démaské yo (Ep 5,11). Li di sa moun yo ap fè an kachèt la, yo ront di yo dévan tout moun. Min lè y-a fi-n démaské yo, y-a parèt klè nan limiè (Ep 5,12). Dézièm Léktu-a fini avèk réfrin-an ki di: "Révéyé-ou, ou minm k-ap dòmi-an, lévé sot nan pami mò yo, pou Jézu-Kri kléré-ou (Ep 5,14).

Adan té kaché, lè-l té fi-n fè péché-a. Li té ront parèt nan limiè. Époutan, Bondié té rélé-l (Gn 3,8). Si nou fè yon bagay ki lèd, nou pa doué rété nan fènoua, kouché ap dòmi nan pami mò yo. Sé pou nou lévé, pou nou parèt nan limiè-a, dévan Granmèt la, sa vlé di aksépté rékonèt fot nou, pou Granmèt la padonnin nou. Tan Karèm nan fè nou fouyé konsians nou, tankou yon moun ki limin yon lanp nan nuit, l-ap chèché kichòy ki tonbé atè-a nan chanm nan. Li déplasé chèz, tab, kabann, mèb, tou sa-l jouinn (Lc 15,8). Konsa nou gin pou nou égzaminé konsians nou afon pandan tan Karèm nan, pou nou pa fè lago-lago ak Bondié. Sé yon tan favè k-ap passé (2 Co 6,2- Is 49,8).

Nan nuit Pak la, premié bagay Pè-a ap fè, sé difé-a l-ap béni, épi l-ap limin chandèl Pak la ladan-l, l-ap antré nan légliz la avèk limiè sa-a, ofi-a-mézi l-ap avansé, l-ap limin chandèl moun yo sou pasaj li, joutan tout légliz la fi-n kléré nèt. Pak sé fèt **limiè**. Katriyèm Dimanch Karèm nan ba nou yon avaloua sou fèt Pak la. Sé youn nan jalon sérémoni Batèm nan. Batèm nan sé limiè.

Jézu té voyé avèg la al lavé jé-l nan basin Siloé-a. Li tounin, li ouè klè, jan lévanjil la montré nou-an nan katriyèm dimanch Karèm nan (Jn 9,7). Batèm nan fè nou sot nan fènoua. Konduit nou, nan pami moun yo k-ap viv alantou nou-an, sé yon conduit ki doué réglé sou sa ki bon, sa ki kòrèk, sa ki vré, jan Sin Pòl di nou nan dézièm Léktu-a, antan l-ap palé ak Éfézyin yo (Eph 5,9). Nou pa doué nan fè riz, nan fè tranzaksion, nan fè chémin krochi, pou nou réglé bagay ki pa klè. Jézu voyé nou tankou mouton nan pami lou (Lc 10,3). Sé li minm k-ap pran défans nou. Li mandé nou pou nou sinp tankou pijon (Mt 10,16). Li di nou tou pou nou malin tankou koulèv (Mt 10,16). Sèlman sé parapò a koulèv lontan-an djab la, satan-an, ki malin, papa manti-a, k-ap chèché tronpé-a (Jn 8,44, Ap 12,9) Fason pa nou pou nou malin, sé chèché rékonèt sa-k fè Bondié plézi, jan Sin Pòl di nou nan lèt Éfézyin yo (Ep 5,10). Pou sa, nou bézouin sajès, vré sajès la, sa-k pa réglé sou conduit sa-a, min ki jouinn prinsip li nan lévanjil la légliz la éspliké nou, avèk limiè Apot yo transmèt li-a. Konsa n-a kapab kléré kon flanbo sou tè-a (Ph 2,15).

N-ap sèvi Jézu témouin ak limiè léspri Sin-an vidé sou nou, tankou flanm difé li té vidé sou Apot yo jou lapankot la (Ac 2,3). N-a sèvi-l témouin tankou Sèvitè Granmèt la ki vi-n sèvi, limiè pou kléré tout nasion, antan mi-

sion-l dépasé sèl ti koté li yé-a, sèl group koté l-ap travay la, koté-l pa ouè sa l-ap réglé-a, koté-l gin inpréssion sé pou bon tan l-ap dépané fòs li-a (Is 49,6; Lc 2, 32). N-ap sèvi-l témouin tankou lanp ki sou étajè, k-ap kléré tout moun k-ap antré nan kay la (Mt 5,14), malgré nou t-a pito kaché kò nou anba kaban, bloti kò nou tankou kaptinn dèyè pòt (Lc 17,10), pou tròp jé pa fiksé sou nou. Sé pa afè pa nou n-ap réglé, sé afè Granmèt la. N-ap sèvi-l témouin tankou sèvitè k-ap tann mèt yo k-ap tounin sot nan nòs, minm si sa fè lontan n-ap tann, san nou pa ouè si travay nou kòmansé-a ap réyisi fè chémin-l (Lc 12,35; Pr 31,18). N-ap sèvi-l témouin tankou prémié sa-l té kréyé-a pou séparé lajounin avèk lannuit la (Gn 1,3s). N-ap sèvi-l témouin, tankou zétoual la k-ap dirijé rout roua Maj yo (Mt 2,2). N-ap sèvi-l témouin, tankou pròp Paròl li fènoua pa kayab toufé (Jn 1,5). N-ap sèvi-l témouin tankou kolòn limiè-a ki vlopé anndan niaj noua-a, minm si yo pa ouè sa n-ap réglé sou déyò (Ex 40, 34; Jn 8,12), paské bèlté pitit fi Roua-a, sé anndan fon kè-l li yé (Ps 45,15vg). N-ap sèvi-l témouin, tankou Manman Mari nan pié Koua-a, ki kinbé véyé la limin anndan fon kè-l ou jous dimanch Pak, malgré fènoua vlopé tout tè-a dépi Vandrédi-Sin (Mt 27,45). N-ap sèvi-l témouin, tankou Anj yo ki abiyé ak limiè jou Dimanch Pak la, nan Kavò ki vid la, lè Ringn Limiè-a chaviré ringn fènoua-a (Mt 29,2). N-ap sèvi-l témouin, tankou réyon k-ap soti nan figi Jézu sou mòn Transfigirasion-an, k-ap montré lonbraj la, sé yon pasaj ki gin pou-l débouché sou Ringn Limiè-a (Lc 9,29; cf Ex 34,29; 2 Co 3,18). N-ap sèvi-l témouin, tankou moun ki kité aksion fènoua ki vlopé ak mal, épi ki aksépté répròch Limiè-a ap fè (Jn 3,19ss). N-ap sèvi-l témouin, tankou paròl Profèt Éli k-ap kléré tankou flanbo (Si. 48,1). N-ap sèvi-l témouin, tankou solèy, lali-n ak zétoual ki vlopé Manman Mari k-ap monté nan Sièl al nan Ringn Limiè (Ap 12,1). N-ap sèvi-l témouin, tankou Jérusalèm tou nèf la ki pa bézouin limiè solèy ak lali-n ankò, paské Mouton-an anndan-l, l-ap kléré-l, antan-l sèvi-l kòm flanbo (Ap 21,23 Is 60,19; 9,1).

N-ap mandé Manman Mari pou-l fè nou sèvi Jézu témouin nou sé pitit Limiè tout bon vré (Jn 12,36), sé nan lajounin n-ap maché, pou nou pa bité (Jn 11,9), dèyè Jézu ki Limiè tè-a (Jn 9,5). N-ap mandé-l pou konpòtman nou, sé konpòtman ki bazé sou lafoua Batèm nou, minm jan avèg la fè "profession dè foi" li-a, antan-l déklaré lafoua-l, kòm répons késion Jézu té pozé-l la. Késion sa-a fè nou

sonjé konvèsasion Pè-a ginyin avèk nou nan sérémoni Batèm nan; si nou trò piti, sé avèk parinn nou, marinn nou, papa nou, manman nou, li ginyin-l. Jézu di avèg la: "Èské-ou kouè nan Pitit moun nan?" (Jn 9,35). Avèg la réponn avèk yon késion li minm tou li pozé Jézu: "Kilès li yé?" (Jn 9,36). Jézu mété-l alèz, antan-l louvri pòt la byin gran: "Ou ouè-l, sé li minm k-ap palé

avèk ou-a" (Jn 9,37). Lè sa-a atò, avèg la di karéman; "Mouin kouè, Granmèt" (Jn 9,38). La minm li ajénou, li adoré-l (ib).

Batèm nan sé limiè. Kondision Batèm nan sé lafoua. Madanm Samari-a té fè "profession de foi"-l (Jn 4,29), minm si-l té ézité. Mat ap fè "profession de foi"-l (Jn 11, 27), minm si-l pa kò kapab fi-n réponn tout késion-an nèt (cf 5èm dim Karèm A). Kaptinn Romin-an ap fè "profession de foi"-l (Mc 15,39). Lè sa-a voual lanp la ap déjà fi-n déchiré (Mc 15,38: dimanch Ramo). Tan Karèm nan sé yon chémin lafoua, k-ap monté mach-éskalié; l-ap ézité, l-ap chèche, l-ap fè progrè, joutan li fi-n kòrèk nèt. Sé lafoua sa-a k-ap sèvi kòm limiè anndan fon kè nou, pou nou réglé konpòtman nou dévan évenman yo avèk moun yo n-ap rankontré sou rout nou, pou nou chèche plas Jézu nan yo, pou nou kontinué maché avèk li, san nou pa rét nan chémin, minm si nou fè kèk ézitasion tanzantan, minm si nou ouè troub pafoua, minm si nou rivé dévan pòt ki fèmin ak séri ki bloké yon lè. Kouraj, dèyè mòn sé mòn. Granmèt la ap kondui nou sot nan limiè al nan limiè (2 Co 3,13; Ps 34), jous li fè nou travèsé nan Rouayom Limiè-a ki pap janm fini-an, pou nou ouè-l fas a fas.

Toua ané 1984, 1985, 1986 té santré sou lafoua, pou préparé fèt sinksan ané Évanjélizasyon lamérik la an 1992 la. Nou pap bliyé toujou rétonnin sou baz sa-a, ki sèvi nou kòm "antenne" pou nou antré an kontak avèk Bondié (Mt 5,28), pou nou tankou Moyiz, pou n-ap maché konmsi nou té ouè sa yo pa kapab ouè ak jé-a (He 11,21), antan nou konnin lafoua-a sé garanti byin n-ap éspéré yo, prezans réalité yo pa ouè yo (He 11,1). Avèk la Trè Sint Vièj Mari, n-ap di: "Mouin sé Sèvant Granmèt la, sé pou sa fèt pou mouin dapré Paròl ou" (Lc 1,38), minm si nou té déjà troublé (Lc 1,29), min si nou té pozé késion paské nou pa-t ouè klè (Lc 1,34), tankou avèg la nan lévanjil katriyèm dimanch Karèm nan (Jn 9,36). Psòm nan di: Bondié pap kité moun ki kòrèk la balansé tout tan san-l pa jouinn pozision ki asiré (Ps 55,23). Paròl li sé yon lanp pou koté n-ap pozé pié nou; sé yon limiè sou rout nou (Ps 119,105).

*

* *

KATRIYÈM DIMANCH KARÈM B

Dimanch sa-a, sé Dimanch yo rélé Dimanch "Laetare", sa vlé di dimanch "kè kontan" paské sé konsa lanmès la kòmansé avèk yon invtasion lékòl Profèt Izayi adrésé Juif yo ki té nan péyi Balilòn nan: "Fè kè nou kontan pou Jérusalem, nou tout ki rinmin-l; fè fèt ak kè kontan, nou tout ki té pran dèy sou li, paské n-ap satisfè ak richès k-ap konsolé nou" (Is 65, 10-11).

Tout krétyin, sou tè sa-a, k-ap pasé-a, nan yon sans, sé nan Babilòn li yé, antan l-ap tann lè pou-l tounin nan péyi Bondié té promèt li-a, nan Paradi sa-a li té pèdi akoz péché-l yo. Invtasion lékòl Profèt Izayi-a adrésé nou-an, li pou nou tou ki abitué chanté nan "Salve Regina-a": "Ad te clamamus, exules filii Évae, ad te suspiramus, gementes et flentes in hac lacrimarum vallae" "Koté-ou n-ap plinn, n-ap kriyé, n-ap rélé nan bafon dlo jé sa-a, nou minm, pitit Èv yo ki égzilé sou tè mizè sa-a". Si Psòm 137 la (= 136) sanblé yon chanté tris, ka-p kalkilé prémié Léktu katriyèm dimanch Karèm B-a (2 Chr 36, 14-16.19-23), sé paské péché pèp Bondié-a pa-t ko fi-n éfasé: "Sou bò riviè Babilòn nan nou chita n-ap kriyé, antan n-ap sonjé Siyon" (Ps 137,1). Sé yon sèl sitiason ki doué fè nou nan lapinn: sé distans péché-a mété ant nou minm ak Bondié.

Gin yon moun nan kòmansman nouvo Téstaman-an k-ap résévoua invtasion sa-a o non tout pèp Bondié-a pou-l fè kè-l kontan, sé la Trè Sint Vièj Mari: Mésajé Bondié-a ap di-l: "Sé pou kè-ou kontan, ou minm ki plin lagras, Granmèt la avèk ou" (Lc 1,28; Soph 3,14). Nan li malédikcion ras lèzòm nan fi-n aboli. Nan li, favè Bondié-a tounin pou pèp li-a. Nan li, pòt Paradi-a ki té fèmin dépi sièk tan-an, li louvri. Avèk li n-ap fè kè nou kontan nan katriyèm dimanch Karèm nan, sa yo rélé "Dimanch laetare-a", sa vlé di Dimanch "kè kontan-an". Lè n-ap pasé nan yon savann, gin yon koté nan mitan savann nan nou jouinn yon ti sous dlo, li rafréchi kè nou. Sa fè kat dimanch n-ap maché nan savann ki fè nou sot Éjip pou n-al nan péyi Bondié promèt la. Nan mitan savann sa-a, katriyèm dimanch la, nou rankontré yon ti sous ki rafréchi kè nou. Sé déjà yon ti avaloua kè kontan Pak la. Sé kòm si yon ti soudi-n nou mété nan rèl pénitans n-ap pousé-a. A tèl pouin lamès katriyèm Dimanch Karèm sa-a, yo kapab fè-l an roz, nan plas koulè violet la. Fè kè nou kontan pou Jérusalem, nou tout ki rinmin-l. Fè fèt ak kè kontan, nou tout ki té pran dèy sou li, paské n-ap satisfè ak richès k-ap konsolé nou (Is 65,10-11).

Ébyin pou ki sa légliz la invité nou fè kè nou kontan-an nan dimanch sa-a ki réprézanté mitan tan Karèm nan? Sé byin sinp, gin yon fason pou nou fè pénitans ki fè Bondié plézi: sé éspérans. Éspérans la sé yon limiè k-ap kléré

nan fènoua, tankou yon ti brèz difé anba sann. Difé-a pa fi-n mouri. Nou sètèn l-ap limin ankò. Solèy la fi-n kouché, nou sètèn l-ap lèvé. Bondié promèt l-ap **konsolé** nou. Sé konsolasion sa-a ki fè nou gin doua gin kè kontan dépi kouliè-a. Sin Pòl di: "Kè-m kontan nan mitan tout tray m-ap pasé" (2 Co 7,4; 12,10; Col 1,24; Qo 7,4). Li di tou: "Soufrans sou tè sa-a pa anyin dévan kantité bèlté k-ap paré tann nou nan sièl la" (2 Co 4,17). Lavi nou sou tè-a, sé yon savann, sé pa yon koté nou instalé. Tout koté nou yé. Nou mèt natif-natal yon koté, sé étranjé nou yé la parapò a koté nou gin pou nou abité tout tan-an: sa vlé di nan sièl la (Lc 9,58). Tan Karèm nan spésialman raplé nou sa. Nou pa fèt pou nou instalé. Prémie Léktu-a nan 2 Kronik 36 montré nou istoua pèp Bondié-a ki té égzilé Babilòn épi ki té résévoua kè kontan nan éspoua Sirius, roua Pès yo, t-ap fè-l tounin nan péyi Bondié té promèt la (2 Chr 36,14-16.19-23). Vré sans évenman sa-a sé Jézu-Kri ki bay li. Vré konsolasion-an, sé li minm ki poté-l. Nou louin péyi nou, sé lè nou nan péché. Sé sa ki mété vré distans ant péyi Bondié promèt nou-an avèk nou minm, péyi sa-a nou déjà ginyin dépi jou nou batizé-a. É sé tout tan Granmèt la ap raplé nou tounin vi-n jouinn li nan yon konvèsion ki sinsè (cf Jer 31,21; 3,12.14). Chanjé fason n-ap viv; péyi koté Bondié Roua-a, li tou pré (Mc 1,15).

Sèlman si gin san pa pou fèt, Granmèt la fè katrévindisnèf pa, épi minm santièm pa-a, sé li minm ki édé nou fè-l. Pitit la fi-n mandé papa-a tout byin-l, li pati l-al nan vagabon. Lè-l fi-n dépansé tout ti richès li, li mandé tounin, dapré sa Sin Luk di nou (Lc 15,18). Min sé papa-a ki fè pi bèl démach la, dapré sa Profèt Ozé té déjà rakonté: "M-ap pran-l nan pièj, m-ap kondui-l nan savann nan, m-ap palé nan kè-l. Lè sa-a l-a- tounin vi-n jouinn mouin, l-ap di: Mouin té pi alèz lontan kay premié mari-m nan" (cf Os 2, 8.16). Nou pèdi zanmi nou, nou pèdi prestij nou, nou pèdi plas nou, nou pèdi avantaj nou, nou pèdi asirans nou, nou pèdi santé nou, tou sa sé vid Bondié vlopé nou, sé nan savann li minnin nou, pou nou tou sèl avèk li, pou-l fè nou tandé voua-l, pou nou réponn li, pou nou chanjé fason n-ap viv, pou nou tounin sou rout nou, pou nou rankontré-l tout bon vré.

Rékonsiliasion-an tou rivé. Dépi premié jou nou aksépté antré anndan fon kè nou, pou nou égzaminé sou konduit nou ki pa fi-n trò bon, nou déjà sou rout pou nou rankontré Granmèt la, li minm li déjà touché kè nou. Sé poua nan premié priyè-a, nan katriyèm dimanch Karèm nan, yo di: "Gras a paròl ou, ou rékonsilié ras moun yo yon fason éstraòdinè", gras a paròl ou: sa vlé di chak foua paròl Bondié ap préché, chak foua nou aksépté kité-l touché fon kè nou, pou nou vi-n tounin yon moun nouvo, Paròl sa-a ki tankou yon kouto dé bò k-ap antré nan tout jouinti kè nou, anndan fin-fon konsians nou

(He 4,12). Lè sa-a sé nòmral pou Bondié invité nou gin kè kontan. Papa-a té di lòt pitit li-a: "Sé pou nou fè fèt ak kè kontan paské pitit mouin-an té pèdi, mouin jouinn li; li té mouri, li rékòmansé ap viv" (Lc 15,32). Péché pa doué janm dékontrólé nou. Nou pa doué janm kouè péché nou trò lou, Bondié pa kapab gadé yo an fas, yo fè tròp pil, Bondié fi-n vidé rézèv kè sansib li.... Kè sansib Bondié pa gin limit (Ps 103,11). Sint Tèrèz lanfan Jézu di konsa: Minm si mouin t-a gin tout péché sou tè-a, sou konsians mouin, mouin t-ap éspéré toujou nan kè sansib Bondié gin pou-l panché sou féblès nou. Psòm 103-a di: "Sé li minm ki fè nou, li konnin nou sé poussiè" (Ps 103,14), sé nan sa-k pa bon n-ap tombé tout tan, li toujou paré gòm li pou-l éfasé péché nou. Yo di kréyon Bondié pa gin gòm. Sé pa vré ditou, okontrè sé gòm Bondié ki pa gin kréyon. Bondié pa voyé Pitit li-a pou kondané tè-a min pou-l sovè tè-a. Laprèv, sèl Pitit li rinmin-an, li bay li. Sé sa lévanjil katriyèm dimanch Karèm B-a di nou (Jn 3, 14-21). Dènié chapit liv kantik dè kantik la di konsa: "Rinmin-an fò tankou lanmò; kè sansib la pa chanjé tankou koté Mò yo yé-a; flèch li sé flèch difé, yon flanm Granmèt la, tankou difé, yon difé anyin pa kapab étinn (cf Ct 8,6) difé sa-a Moyiz té ouè ki t-ap flanbé san-l pa-t kapab étinn nan (Ex 3,2), difé rinmin-an Kantik dè kantik la di: "Gran dlo yo (= péché nou yo) pa kapab étinn li" (Ct 8,6). Ti Tèrèz kalkilé sou pasaj sa-a épi li di: Tout péché nou yo ansanm sé yon ti gout dlo nan brazie difé Rinmin Bondié-a kap flanbé nan kè Pitit li-a. Bondié rich ak pitie (cf Pape Jean-Paul II: lettre encyclique "Dives in misericordia"). Sin Pòl anonsé nou sa nan dézièm léktu katriyèm dimanch Karèm B-a (Ep 2, 4-10). Richès favè-l dépasé mézi. Sé nou minm k-ap méziré nan ti godé. Bondié pa konn méziré favè-l (Jn 3,34). Tout kè kontan-l sé bay san rété. Sé nou minm ki pa mét dispozision pou nou résévoua.

Pi bèl dispozision nou kapab mété, sé rimmèt nanm nou nan min la Trè Sint Vièj Mari, Imakilé Konsépsion, k-ap lapriyè pou nou tout tan. Sé pou nou sonjé rimmèt li kè nou, pou-l aprann nou résévoua favè Bondié-a, jan-l té di moun yo ki t-ap sèvi nan nòs Kana-a: "Ninpòt ki sa Jézu di nou, sé pou nou fè-l" (Jn 2,5). La Trè Sint Vièj Mari, sé kachèt moun ki nan péché yo. Nat nou t-a mèt fi-n tann nan lanfè, l-ap ralé nou monté pou nou pa tonbé nan difé sa-a, si nou aprann gadé-l avèk konfians, minm lè péché ki pi lèd la fi-n vlopé tout kò nou ak tout nanm nou. Sé ti éspoua sa-a ki fè nou gin doua gin **kè kontan**. **Konsolé**, konsolé, pèp mouin-an, sé Granmèt la ki di sa nan Izayi 40, 1-2, palé ak kè Jérusalem, déklaré byin fò ba li, di-l: péché-l yo éfasé. Sé ak kè-l pou nou palé, koté ki pi sansib nan moun nan. M-ap kondui-l nan savann nan, m-ap palé nan kè-l. Sé sa Granmèt la di nou nan Ozé 2,16. Sé yon kè tou nèf Bondié ap ba nou, yon lòt kè nèf, kè pròp Pitit li-a

ki chire sou Koua-a pou lavé péché nou, pou résévoua nou tout. Yon kè tou nèf, yon lèspri tou nèf. Sé sa Ézékièl di nou (Ez 36, 26; 11,19) apré Jérémi ki di nou Bondié ap pasé yon lòt kontra avèk nou, sé li minm k-ap mété kòmandman-l anndan kè nou, pou nou obéyi-l (Jer 31, 31-34). N-ap mandé Manman Mari, Rèn kè nou, pou-l fè nou dosil nan min Bondié pou nou gin minm KÈ KONTAN pa-l la, koté chagrin péché-a pa angoudi rélasyon nou avèk Bondié. Nan prémié Lèt Pap Jan-Pòl II té ékri pou tout légliz la, (Redemptor Hominis), li té fini avèk yon bèl pasaj sou la Trè Sint Viej Mari. Li té ba-l kòm tit: "la Mère de notre espérance", Manman épérans nou. Li fini Lèt ansiklik li ékri osijè la Trè Sint Vièj Mari-a (Redemptoris Mater), antan-l fè tandé lòt bèl son klòch éspérans sa-a nan kantik "Alma Redemptoris Mater" (la Sainte Mère du Rédempteur): pèp k-ap tonbé-a, k-ap chèché lévè-a, poté-l sékou (R. M. 51-52).

*

Bondié pa voyé Pitit li-a pou-l kondané tè-a, min pou-l sovè-l (Jn 3,16). Sin Pòl di nou nan dézièm Léktu-a, nan Lèt li ékri Krétyin Éfèz yo: Bondié **rich ak kè sansib** (Ep 2,4). Sa fè nou sonjé bèl lèt ansiklik Pap Jan-Pòl II té ékri sou kèsion kè sansib Bondié-a, li té ba-l kòm tit: "Dives in misericordia", sa vlé di Bondié rich ak kè sansib. Sé lokasion pou nou réli bèl Lèt sa-a pou nou antré pi fon nan lidé lanmès katriyèm dimanch Karèm nan. Prémié Léktu-a montré nou ki jan pèp Israèl té égzilé nan péyi Babilòn sou règn roua Sédésias poutèt péché li té fè kont kontra-a Bondié té pasé avèk li-a, li viré do bay Bondié, li adoré zidòl, li pasé kontra avèk dòt nasion ki fè-l lagé kò-l nan sipèstision ak maji. Roua Nabikodono zò ki sot nan péyi Babilòn rivé, li boulé lavil Jérusalèm, li boulé Tanp roua Salomon té bati-a, li égzilé pèp la, ki rété Babilòn pandan sousandizan (2 R 25, 8-30).

Sèlman pinision sa-a sé pa yon chatiman ki sèvi pou tiré vanjans, sé yon **léson** Bondié vlé fè pèp la pran (Jdt 8,27); paské Bondié **rich nan kè sansib** (Ep 2,4). Sin Jan rédi nou sa nan lévanjil katriyèm dimanch Karèm B-a (Jn 3, 14-21), lè-l montré nou Jézu k-ap palé ak Nikodèm, ki di-l Bondié tèlman rinmin moun yo sou tè-a li bay Sèl Pitit li-a pou tout moun ki kouè jouinn lavi ki pap janm fini-an, pou-l pa péri (Jn 3,16). Sèl bagay, Limiè-a rivé sou tè-a, min gin moun ki viré do bay Limiè-a, yo pito rété nan fènoua pou yo pa ouè aksion malonèt y-ap fè yo (Jn 3,19). Yo fèmin jé yo tankou Kayin ki fi-n touyé frè-l Abèl, ki pa régrèt fot li. Yo fè tankou Adan ki fi-n fè péché épi k-al kaché pou jé yo pa tonbé dévan jé Bondié (Gn 3,8; 4,14). Yo fè tankou Jida ki gin rémò, min ki pa gin kontrision, ki pa gin répanti (Mt 23,3; Ac 1,18). Sin Piè fi-n gin yon ti féblès, li fi-n di li pa janm rékonèt Jézu, sé vré;

min apré sa, kòm sé nan limiè li té yé, li t-ap chofé kò-l bò brazié difé-a, jé-l tonbé nan jé Jézu, kòk chanté, li sonjé, li régrèt, li kriyé san. Jézu padonnin-l (Lc 22, 54-62; Mt 26, 69-75; Mc 14, 66-72; Jn 18, 15-18.25-27). Sint Mari-Madlèn viré do bay péché-a, li vi-n kriyé nan pié Jézu, li vidé losion nan pié-l, li siyé pié-l ak chévé-l, li gin konfians nan **richès kè sansib Jézu** (Lc 7, 36-50), "Dives in misericordia". Sint Monik té lapriyé, té kriyé pandan anpil tan pou pitit li, Sint Ogustin ki t-ap viv nan libètinaj, jous li rivé jouinn favè Bondié pou Sint Ogustin ki viré do bay péché-a, ki antré nan chemin Bondié-a, ki vi-n tounin youn nan pi gran Sin katalòg légliz la ginyin pou sèvi modèl. Sint Ogustin di vèw Nayim nan ki t-ap kriyé sou pitit li-a ki mouri-a, sé légliz la k-ap kriyé sou péché nou yo; gras a priyé-l, Jézu fè nou lévé vivan, li rinmèt nou nan min Manman nou, légliz la. Pinision Bondié bay pèp Israèl la antan-l égzilé-l Babilòn pandan souasandizan, sé pa yon pinision vanjans, sé yon pinision rémèd.

Nouvo liv ki bay règléman pou dirijé légliz la, sa yo rélé "Droit Canon-an" ki té parèt 25 janvié 1985, sé souf richès kè sansib Bondié sa-a li fè pasé nan tout règléman-an. Tout pinision yo té konn rélé "peines vindicatives" yo, sa vlé di sa moun nan té blijé fè minm si li té déja fi-n chanjé mové konduit li-a, tout pinision sa yo, yo disparèt nan nouvo liv la. Sa-k rété ladan-l sèlman sé sa yo rélé "peines médicinales" yo, sa vlé di sa moun nan blijé fè joutan li chanjé konpòtman-an. Sa montré kijan légliz jou an jou ap antré pi fon nan "indulgence" Bondié, nan sansibilité Bondié ginyin pou-l padonnin. Jonas t-al préché nan lavil Niniv. Li té di: "Nan karant jou, vil Niniv la ap détrui" (Jon 3,4). Moun Niniv yo gin tan fè vit, yo abiyé ak rad sak, yo fè jèn, yo chanjé mové konduit yo, yo régrèt péché yo; Bondié pa kité vil la détrui. Sé pa yon "peine vindicative" sé yon "peine médicinale". Kòm rézilta Bondié té bézouin-an déja fi-n réalizé, pinision-an pa gin okinn sans li ankò. Sé té yon pinision "conditionnelle". Sé kòm si Jonas té di: "Nan karant jou Niniv ap détrui, **si moun yo pa chanjé fason y-ap viv la**". Moun ki kinbé moun nan kè, k-ap tiré vanjans, ki réfizé padonnin, ki pi sèvè pasé laloua-a li minm, sé moman pou yo réfléchi sou konduit légliz adopté-a, pou yo fè kè yo sansib yo minm tou, pou yo vi-n pi sanblé ak Jézu, ki gin kè-l tou dou, tou sinp, ki mandé nou lagé chaj nou sou zépòl li, avèk Koua-a l-ap poté-a, pou sé li minm ki okipé nou, pou nou jouinn soulajman (Mt 11, 28-30; Ps 55,23; 34,19). Dépi sou premié ané roua Sirius, roua Pès yo, promès Profèt Izayi-a réalizé: "Konsolé, konsolé, pèp mouin, déklarasion Bondié nou-an, di-l li fi-n péyé sa-l té doué-a, péché-l yo éfasé, li fi-n fè kont pénitans li" (Is 40, 1ss). Tout dézièm pati liv Izayi-a (Is 40-55) ap koulé tankou yon larivè pou montré kijan Bondié padonnin tout fòt pèp li-a, pou konsolé

pèp la ki dékourajé nan égzil la, ki konprann Bondié lagé-l. Profèt la di: Min sa Bondié di: "Èské yon manman kapab lagé pitit li? Ébyin minm si yo té kapab jouinn yon manman ki gin kouraj abandoné pitit li, mouin minm Granmèt la, mouin pap abandoné-ou (cf Is 49,15). Sé poua Psòm nan di: Si papa-m ak manman abandoné-m, Granmèt la ap résévoua-m (Ps 27,10).

Pandan tan Karèm nan, li t-a bon pou nou réli dézièm pati liv Izayi-a tou, chapit 40 a 55, pou nou ouè kijan Bondié sé kè sansib: "Dives in misericordia", paské liv sa-a té ékri jistémman pou konsolé pèp la nan péyi Babilòn nan, sé poua Psòm 137 la (= 136) ki vini kòm Psòm-répons nan lanmès katriyèm dimanch Karèm B-a ap plinyin avèk égzilé yo sou bò riviè Babilòn nan, koté yo pandié mandoli-n yo, yo réfizé chanté kantik Granmèt la sou yon tè étranjé, antan y-ap sonjé Siyon. Sa vlé di pinision-an té réalizé chanjman-an Bondié té vlé-a. Pèp la di: "Si-m bliyé-ou, Jérusalèm sé pou min douat mouin bliyé-m tou; sé pou lang mouin kolé nan palèt mouin, si-m pa sonjé-ou ankò" (cf Ps 137,5s). Pitit la té pati, li t-al dépanse tout ti éritaj li-a nan libètinaj, min kon-l régrèt, li tounin, papa-a résévoua-l san-l pa fè régadan, li pa di-l ou pa pitit mouin ankò, éritaj la déjà fi-n pasé. Okontrè, sé konmsi sé lè sa-a li okipé-l pi byin (Lc 15, 11-32). Si yon papa sansib pou pitit li konsa, nou pa bézouin mandé pou Bondié atò (cf Lc 11,13). Sé nou minm ki pi régadan pasé Bondié, nou toujou prèt pou défann règléman-l pi plis pasé li minm minm. Sé tankou Farizyin yo ki sézi ouè kijan Jézu résévoua moun ki té nan péché yo byin, li manjé avèk yo, li fè zanmi avèk yo. Moun nan pa fè youn ak péché-a, sé pa lanmò moun nan Bondié vlé, sé déstriksion péché-a li vlé. Moun nan t-a kapab kondané pou vintan prizon; sèlman apré kèk ané, li korijé; min laloua sivil prévoua sa yo rélé "condonation", sa vlé di yo fè pa-l pou rès tan li té gin pou-l kontinyé pasé nan prizon-an, paské yo ouè pinision-an sèvi rémèd, li poté chanjman.

Tan Karèm nan sé yon tan pou nou réajisté konsépsion nou ginyin parapò a jistis Bondié: pou nou pa pi sévè pasé li minm minm, lè n-ap gadé moun ki nan péché. Péché lòt moun yo nan boutèy blan, pa nou nan boutèy noua. Jézu di: "Pa rét ap okipé ti pay la nan jé frè-ou la, pandan gro bout boua-a nan jé pa-ou (Mt 7,7). Katriyèm dimanch Karèm nan, yo rélé-l dimanch kè kontan, dimanch "laetare". réfrin antré-a di: "Fè kè-ou kontan, Jérusalem, fè fèt, nou tout ki rinmin-l; fété avèk kè kontan, nou minm ki té chagrin, pou nou dansé, pou nou konblé avèk lèt li k-ap **konsolé nou** (Is 66, 10-11). Sé dènié chapit liv Izayi-a. Pèp la déjà tounin nan péyi-l apré égzil la. Sé konsa papa ti pitit la di: "li té pèdi, koulié-a nou jouinn li; li té mouri, min li réviv" (cf Lc 15,32).

Dimanch sa-a invité nou tou pou nou fè kè nou kontan ansanm ak tout Anj yo, ak tout Sin yo nan sièl la, ak tout légliz sou latè, ak tout nanm nan Piga-toua, pou yon sèl péchè ki fè pénitans (Lc 15, 7.10). Réfrin antré-a ki sèvi pou mès katriyèm dimanch Karèm nan, sé pasaj sa-a ki sèvi pou mès Sint Tèrèz lanfan Jézu (prémié oktòb) kòm prémié Léktu. Sèkè Sint Tèrèz té lapriyè anpil pou péchè yo, li té kalkilé anpil sou richès **kè sansib Bondié**: "Dives in misericordia", sé tout tan li t-ap palé sou "**l'Amour miséricordieux de Dieu**". Nou pa doué konsidéyé Bondié tankou yon jij. Bondié sé yon papa. Li rich ak kè sansib. Prémié priyè lanmès katriyèm dimanch Karèm nan di nou Bondié rékonsiliyé tout moun avèk li antan li bay pròp Pitit li-a (cf Jn 3,16). Sé konsa kè Bondié sansib pou nou. Profèt Ozé di nou Bondié té kondui pèp li-a nan dézè, pou fè-l kité mové rélasion li té ginyin avèk dèt souadizan dié, sa vlé di avèk zidòl ki pa Bondié. Profèt la té éspliké sa antan-l réprézanté pèp la tankou yon madanm marié ki fè adiltè sou do mari-l (cf Os 1-3). Bondié di l-ap pran-l sou plan, l-ap palé nan kè-l, l-ap kondui-l nan dézè, lè sa-a madanm nan ap di: M-ap tounin al jouinn prémié mari-m nan (cf Os 2, 9.16), minm jan ti gason-an té di: M-ap tounin al lakay Papa-m, mouin té gin plis satisfaksion pasé isit la koté m-ap drivé-a (Lc 15,18).

N-ap mandé Manman Mari, Manman kè sansib, "Mère de Miséricorde", dapré tit Pap Jan-Pòl II kòmanté nan chapit sink Lèt ansiklik "Dives in misericordia-a" (DM 9), pou-l aprann nou pa fè régadan avèk moun ki nan péché, pou nou sèvi instriman kè sansib Bondié pou yo, "Dives in misericordia", pou olié yo ront, olié yo kouri al kaché nan fènoua, sé nan limiè yo vini, pou yo gin kouraj déklaré sa yo fè ki mal, minm si sa lèd anpil... Figi Jézu ap pròpté fas yo, yo pap tonbé nan difé ki pap janm étinn nan. N-ap sonjé lè Moyiz té mandé Bondié non-l nan, sé yon litani Bondié té déklaré dévan-l, tankou "litanies du Nom de Dieu" tout non yo té gin minm sans: Kè sansib (Ex 33, 18-19; 34, 6-7). Sé sa-k fè Sin Jan di Bondié sé **Rinmin** (1 Jn 4, 8-10): "**DIVES IN MISERICORDIA**".

*

* *

KATRIYÈM DIMANCH KARÈM C

Karèm sé tan RÉKONSILIASION, dapré sa Sin Pòl di nou nan dézièm lèt Korintyin yo (2 Co 5,17.21): sé nou minm yo konfié sèvis rékonsiliation-an" (2 Co 5,18). Sink foua mo "rékonsilié-a" vini nan léktu sa-a. Prémie foua-a, li di: "li minm ki rékonsilié nou pa lintèmediè Jézu-Kri" (2 Co 5,18a). Dézièm foua li di: "Li ba nou sèvis rékonsiliation-an" (2 Co 5,18b). Touazièm foua li di: "l-ap rékonsilié tè-a avèk li" (2 Co 5,19). Katriyèm foua li di: "li mété paròl rékonsiliation-an nan bouch nou" (2 Co 5,19). Sinkiem foua li di: "Kité yo rékonsilié nou avèk Bondié" (1 Co 5,20). Sé Bondié Papa-a k-ap rékonsilié tout moun nan Jézu-Kri, min sé pa lintèmediè Apot la sèvis sa-a ap fèt. Nan sans sa-a Jézu té di Apot yo, "Résévoua léspri-Sin-an. Moun nou rémèt péché yo, péché yo ap éfasé. Moun nou kinbé péché yo, péché yo ap rété" (Jn 20,22.23; Mt 16,19; 18,18).

Karèm nan sé tan pou moun fè yon bon konfèsion, pou profité tan favè-a k-ap pasé-a (2 Co 6,2; Is 49,8). Sin Pòl di kòm n-ap travay ansanm ak Granmèt la, nou insisté koté nou pou nou pa résévoua favè Bondié-a pou granmési. Sé li minm ki di réyéلمان vré: Nan tan favè-a, mouin réponn ou; nan jou délivans la mouin poté-ou sékou. Min li koulié-a moman favè-a, min li koulié-a jou délivrans la" (2 Co 6,1-2). Pasaj sa-a vi-n osito apré pasaj ki sèvi pou dézièm léktu nan lanmès katriyèm dimanch karèm C-a (2 Co 5,17-21). Konsa sé pou nou profité tan Karèm nan pou nou rékonsilié avèk Jézu-Kri nan yon bon konfèsion, pou nou vi-n tounin yon créatu nouvo (2 Co 5,17), pou ansyin-an disparèt. Pèp Israèl ki té pati kité Éjip la, créatu ansyin-an, li té fi-n mouri nan savann nan pandan karantan. Sé pitit yo ki té vi-n fèt apré-a ki antré nan Tè Bondié té promèt la, sé créatu nouvo-a. Prémie léktu-a prézanté nou pèp nouvo sa-a nan liv Josué-a (Jos 5,9a.10-12). li di "Jodi-a, Granmèt la ouèté laront Éjip la sot sou nou". Pèp la fè Pak li, li manjé pin san lévin avèk zépi tou fré avèk frui tè-a. Pou-l té kapab fè Pak la, fò Granmèt la té ouèté laront Éjip la sot sou li, fò-l té éfasé péché-l. Pou nou fè yon bon Pak fò-n pròpté konsians nou nan yon bon konfèsion. Sé Josué ki sèvi Granmèt la intèmediè pou kèsion sa-a minm jan Sin Pòl ap sèvi Jézu intèmediè pou rékonsiliation-an. Pè yo sé intèmediè tou pou sakrèman konfèsion-an, sakrèman rékonsiliation-an. Gin moun ki prétann yo pito konfésé a-Dié nan léspri yo. Sé pou yo kominié a-Dié tou nan léspri yo. Si yo gin péché grav, ki fè yo sot nan kominion avèk manb légliz yo kapab ouè-a, sé pou yo antré nan rékonsiliation avèk légliz sa-a yon fason yo kapab ouè, nan sakrèman, ki yon sign sansib. Konsa y-a kapab proche nan sakrèman Kò ak San Jézu-Kri-a KI SANSIB TOU. Otrèman si yo vlé konfésé a-Dié yon fason ki pa sansib, sé pou yo kominié a-Dié tou yon fason ki pa sansib. Si yo

vlé fè konfésion "spirituèl", sé pou yo fè kominion "spirituèl" tou. Min si yo aksépté fè konfésion "Sakramantèl", y-ap kapab fè kominion "Sakramantèl", si té gin péché grav ki jinnin konsians-yo. Min sonjé tou Kòmandman légliz la mandé pou yo konfésé nan min Pè o-mouin yon foua chak ané nan karèm-Pak la, minm si pa gin sa yo rélé péché grav sou konsians yo. Si yo pa respékté kòmandman sa-a, lè sa-a vi-n gin péché grav. Min Bondié toujou paré pou-l padonnin. Dé bra-l louvri pou-l résévoua pitit li ki té pati al gaspiyé favè-l, jan lévanjil katriyèm dimanch karèm C-a di-a (Lc 15,1-3.11-32). Lè Jézu fi-n padonnin péchè yo, li manjé avèk yo, (Lc 15,1-3). Sé konsa li té fè ladésant lakay Zaché (Lc 19,1-10), ki régrèt fot li. Konsa tou li fè zanmi ak Matié ki té nan péché (Mt 9, 9-13). Li kité Mari-Madlèn karésé-l pou montré li régrèt fot li (Lc 7, 36-50). Sin Piè li minm té kriyé sou pròp péché-l, Jézu té padonnin-l (Lc 22,54-62), malgré Jézu té konnin davans li t-ap tonbé nan péché épi li té ba-l avètisman (Lc 22,31-34) Sin Piè té gin tròp asirans nan pròp fòs li, pou-l té pran avètisman sa-a o-sérié, min Jézu pran-l o-sérié, lè-l régrèt, épi Jézu fè-l rantré ankò nan Rinmin-l (Jn 21,15-17). Sin Pòl di li minm minm sé pi gran péchè li té yé, sé Granmèt la ki chanjé-l (1 Co 15,9-10). David fè adiltè, épi li touyé mari madanm nan (2 Sm 11,12). Lè-l kriyé, Bondié padonnin-l (Ps 51). Sé pousa pandan Karèm yo chanté Psòm 51-an souvan. Sé Psòm sa-a David té fè, lè-l té fi-n fè kalité gro péché sa-a. Épi sé avèk minm madanm sa-a li vi-n gin yon dézièm pitit yo rélé Salomon. Bondié bliyé sa, li éfasé. Yo konn di "kréyon Bondié pa gin gòm", sé pa vré, okontrè sé "gòm Bondié ki pa gin kréyon". Bondié toujou gin yon gòm nan min-l, pou-l tou prèt pou éfasé péché nou osito nou régrèt, sé nou minm ki konprann Bondié ékri tout fot nou ak lank ki pa kapab éfasé sou yon kayié l-ap louvri dévan nou lè nou mouri. Bondié pa gin tan pou-l pèdi nan jouèt ti moun. Sé mémoua nou ki raplé nou péché nou. Bondié pa gin mémoua nan késion sa-a. Psòm 103,12 di konsa: "minm jan solèy lévé louin ak solèy kouché, li voyé péché nou yo louin nou". Psòm nan insisté ankò, li di: "Tan-kou yon papa sansib pou pitit li yo, konsa Granmèt-la sansib pou moun ki respékté-l yo; li konnin ak ki sa nou fèt, li sonjé sé pousiè nou yé" (Ps 103,13-14). Bondié pa sézi lè nou tonbé nan péché, sé nou minm ki sézi, paské nou pa-t atann nou a-sa. Min Bondié té déjà prévoua sa lontan. Sé pousa li toujou prêt pou-l padonnin. Sé nou minm ki pa gin konfians nan li. N-ap kaché kò nou tankou Adan ki ront parèt nan limiè, paské péché-a fi-n dézabiyé-l (Gn 3,8-10). Gin moun ki pito rét nan fènoua péché yo-a pasé yo vi-n louvri kè yo, vidé sak la, lavé koté ki blésé-a, pou-l pa fè tétanòs (Gn 3,19). Sé abitud sa-a Juda té pran ki fè lè Gran Résépsion-an t-ap fèt la, li glisé kò-l nan fènoua déyò-a ki kondui nan lanmò-a (Jn 13,26-30). Kon Juda fi-n pran bouché-a nan min Jézu, Satan antré nan li, li bliyé suiv Satan ki pa

kapab rét nan limiè, li plonjé nan fènoua. Pa pran abitud gin kè nou sal épi pou-n ap manjé nan min Jézu bon manjé pròp li-a, manjé sa-a ap toufé nou, paské nou pa kapab dijéré-l. Sé manjé sièl la li yé, min péché-a minm fè sé lanfè ki nan kè nou.

Lè nou vi-n konfésé, sé kòm si sé yon rad n-ap lavé-pasé. Prémie bagay nou fè, nou froté rad la byin nan dlo ak savon, nou bat li byin bat ak batouè: sa vlé di nou chèche régrèt fot nou-an yon fason sinsè, sa yo rélé "kontrision". Apré sa, nou blayi rad la byin blayi nan solèy, nou pa kite yon ti pli, yon ti kouin monté yon sou lòt, pou rad la pran tout réyon chalè solèy k-ap séché-la, sé konsa tou nou louvri kè nou byin louvri nan konfèsion la bay mon-Pè, antan nou fè sa yo rélé "akizasion" fot nou yo, san nou pa kaché anyin ki t-a fè nou ront, paské sé ak Bondié n-ap palé, sé dévan solèy nou yé, sé li minm k-ap séché dlo nan jé nou ak chalè rinmin-l. Yon touzièm bagay pou nou fè ankò sé pou nou pasé yon karo byin cho sou rad la pou nou éskanpé-l. Pou-l pa chifonnin, pou nou kapab maché nan sosiété avèk li, sa vlé di sé pou fè pénitans la yo ba nou fè nan konfèsion-an, mim si li rèd tankou yon karo cho k-ap boulé nou, sé pi bèl l-ap fè nanm nou vi-n pi bèl. Konsa anvan konfèsion-an sé régrèt (froté rad la byin froté), pandan konfèsion-an sé bay tout péché yo (blayi rad la byin blayi), apré konfèsion-an sé fè pénitans la (pasé yon karo byin cho sou rad la). Sètènman yon bèl rad konsa, nou pran prékosion pou nou pa sal li, minm si nou konnin l-ap sal kan minm. Lè nou fi-n konfésé, nou pran rézolisyon pou nou pa tonbé nan péché ankò, minm si nou prévoua nan sikonstans n-ap viv la, nou pap manké okazion pou nou tonbé ankò. Sèlman sé pou nou désidé pou fè tou sa nou kapab pou nou évité okazion sa yo. Moun ki konfésé san pa régrèt péché yo, konfèsion-an pa gin valè, sé kòm si sé manti y-ap bay Granmèt la. Yo di: "padonnin-m, mouin régrèt", min nan fon kè yo yo pa régrèt anyin; mòd konfésésion sa yo pa kapab fè nou fè progrè. Sé kòm si sé moun k-ap pran vitami-n, épi an minm tan li lagé kò-l nan bouason. Gin moun ki kaché yon séri péché, yo di: "Pè-a pa bézouin konnin bagay konsa". Sé kòm si yo vi-n konfésé pou yo montré sa yo fè ki byin: sa pa konfèsion. Té gin yon madam ki té fi-n konfésé nan min Sin Loui-Mari Grinion de Monfò. Madanm nan kaché toua gro péché grav. Monfò ba-l yon mouchoua pou-l lavé pou li. Madanm nan alé, li lavé mouchoua-a. Min té gin toua tach nan mouchoua-a. Tach yo pa vlé soti. Malgré tou sa-l fè, li mét sèl, sitron, bagay ki sanblé ak "kloròks", tach yo réfizé pati. Li tounin, li di Sin Monfò sa. Sin Monfò di-l: "fouyé nan konsians ou pi byin". Li fouyé vré; li ouè li té kaché toua gro péché, li té ront di yo. Li dévoualé yo. Dlo sot nan jé-l, yon gout dlo tonbé sou mouchoua-a, la minm tach yo éfasé. Nou pa doué kaché péché, paské sé pou lanfè n-ap travay, n-ap manké sakrèman-an respè, n-ap fè sa yo rélé konfèsion "sakrilèj",

épi tou si n-al kominié konsa, n-ap fè kominion "sakrilèj". Pito nou pa al konfésé minm tan pou nou kaché péché nou bay Pè-a. Té gin yon mésié ki t-al konfésé, yo ba-l kòm pénitans pou-l al plin yon kalbas dlo. Li pasé nan tout riviè, li pa réyisi plin kalbas la. Li plonjé kalbas la. Kalbas la fè "glou-glou-glou". Min dlo réfizé antré nan bouch kalbas la. Li mét kalbas la anba tuyo, dlo-a koulé sou koté, li réfizé antré, li mét kalbas la nan lapli, yon ti gout dlo pa antré. Li fè tout péyi-a ak kalbas la. Li di nan kè-l "kalbas sa-a doué ranjé". Li tounin ak li kot Pè-a. Pè-a di-l: "fouyé konsians ou". Li gadé pi fon, li ouè éta konsians li té yé, li pran lapinn, li kriyé. Yon ti gout dlo tonbé sot nan jé-l, li plin kalbas la la minm.

Nan premié konfésion Sint Tèrèz lanfan Jézu t-al fè, avan-l fè premié kominion-l, Pè-a té di-l konsa: Yon ti gout dlo ki sot nan jé Jézu, ki té tonbé sou kè-ou, li gin tan fonn tout péché-ou. Lè kè nou krazé jan Psòm 51,19 la di-a, sa pèmèt pou Jézu kriyé nan kè nou, li ponpé dlo-a nan jé nou, minm si sé pa jé ki nan tèt nou-an, Jan Sin Pòl di nou nan Éfézyin 1,18, épi péché nou yo fonn. Sint Tèrèz lanfan Jézu di l-ap rét nan pié koua Jézu-a, pou-l ranmasé tout ti gout san Jézu k-ap gaspiyé, pou-l vidé yo sou nanm yo, tankou yon farinaj lapli. Sé konsa li té pèmèt pou Pranzini, asasin sa-a ki té réfizé konfésé-a, chajé santiman. Tou sa yo té fè-l, li té réfizé ouè Pè. Époutan sé pa dé krim li té fè. Yo té kondané-l, pou dènié krim li té fèk sot fè. Té gin yon madanm ki t-ap viv nan dézòd, madanm nan té gin yon pitit fi, madanm nan té rich, ni ti fi-l la tou. Pranzini profité, nan mové rélasyon li gin ak madanm nan, li koupé kou madanm nan, li koupé kou ti fi-a. Ti fi-a té gin yon ti chinn nan kou-l ak yon ti koua. Yo jouinn koua-a planté anba trou blésu-a ki nan kou-l la. Pranzini minm fi-n pran richès yo, li pati. Min yo réyisi arété-l jous byin louin. Yo kondané-l; y-apral touyé-l. Li réfizé ouè Pè. Sint Tèrèz aprann sa, li lapriyé pou li. Lè y-apral koupé tèt Pranzini, Pè-a vi-n dévan-l, li bouradé Pè-a, l-al pou-l fouré tèt li li minm minm anba gro lam nan ki pou tonbé sou kou-l la, min li vi-n gin yon dènié réflèks, li fè yon mouvman kòm si li té bliyé kichòy, li pran Krisifi-a ki té nan min Pè-a, li bo-l toua foua. Sint Tèrèz konprann. Dépi lè sa-a Sint Tèrèz jouinn vokasyon-l: lapriyé pou péché yo.

Té gin yon madanm yo rélé Paéza, nan pouin yon moun nan vil la li pa-t fè tonbé nan péché. Moun yo plinyin, y-al palé yon Pè pou li. Pè-a t-ap viv nan yon savann tou pré, li té konn dòmi atè-a, san nat, nan rajé-a. Li t-ap fè anpil pénitans. Yon jou l-al jouinn Paéza, li mandé pou-l chanjé fason l-ap viv, Paéza di-l konsa: "Nat mouin fi-n tann nan lanfè, ki pénitans mouin t-a kapab fè? Mouin fè tròp péché, nan pouin pénitans ki kapab éfasé péché-m, pa gin mézi pou mouin nan magazin rad Bondié". Pè-a di-l: "Suiv mouin". Li suiv Pè-a. Pè-a kondui-l nan savann nan, koté-l té konn dòmi-a. Li mét

Paéza kouché atè-a. Li fè yon ti pil ak tè-a pou sèvi-l kom zòrié. Paéza kouché, dòmi pati avèk li, paské li té pasé anpil nuit li pa-t dòmi, sé nan libètinaj li té yé. Pè-a minm al dòmi pi louin. Nan nuit, vè minuit Pè-a lèvé pou-l lapriyé. Li gadé nan diréksion Paéza. Li ouè yon réyon lali-n ki désann sou Paéza, épi sé kòmsi sé nanm Paéza k-ap monté anlè. Li proche kot fi-a. Li pa ozé touché-l. Li souké ak pié-l. Li ouè Paéza té mouri. Li tandé voua Bondié ki di-l konsa: "Ti pénitans li fè pandan un-èd-tan-an, sa fè-m plis plézi pasé pénitans dèt moun konn ap fè pandan tout lavi yo". Nan sans sa-a Sint Térèz gin rézon rinmin pasaj nan Kantik dè kantik 8,7 la: "Gran dlo pa kapab étinn Rinmin-an, ni larivière pa kapab nouayé-l". Minm si péché nou rouj kon roukou, Granmèt la ap fè nou vi-n blan kon koton (cf Is 1,18). Nan Izayi 49,15 Bondié di sé yon manman li yé k-ap bay pitit li tété, li pa kapab bliyé-l. Si-l viré do, sé pou yon ti moman, min sé pou tou tan li rinmin (Is 54,6ss; cf Ps 30,6; Job 14,13). Madanm nan ki té nan adiltè-a, Granmèt la fè yon jan pou-l pou fè-l réfléchi nan kè-l (Os 2,9). Granmèt la kondui-l nan savann, li di: "M-ap tounin lakay premié mari-m nan, mouin té pi alèz pasé koulié-a". Sé minm bagay sa-a ti gason-an ki té pati kité papa-l la ap di nan lévanjil katriyèm dimanch Karèm C-a (Lc 15,17-18): "M-ap tounin lakay papa-m, m-ap di-l mouin fè péché nan sièl la ak dévan-ou, mouin pa mérité pou yo rélé-m pitit ou; trété-m tankou youn nan anplouayé-ou yo" (Lc 15,19; cf Nb 21,7). Papa-a pa minm kité pitit la fi-n fè lapriyé-a, sa-l té paré pou-l di-a. Papa-a koupé-l laparòl (Lc 15,21), li fè abiyé-l, ak favè-a, li fè mété yon bag nan douèt li, pou-l pasé kontra avèk li ankò, li fè mét soulié nan pié-l pou-l maché sou chémin kòmandman Granmèt la. Tout avantaj li té ginyin anvan, papa-a rémèt li. Sé papa-a minm ki vòltijé nan kou-l (Lc 15, 20; cf Gn 33, 4; 45, 2-4). Sé pa yè ni avan-tiè li t-ap tann li, kè papa-a té séré. Sé konsa Bondié gin kè séré, l-ap tann kilè yon péchè t-a tounin. Li mét bariè dévan-l pou-l fè-l chanjé chémin vi-n jouinn li (Os 2,8). Ata manjé kochon yo, pitit la pa-t jouinn. Fò-l té tounin vré. Péché-a fè nou pi mal pasé kochon. Époutan, sé pa kochon sèlman papa-a ap touyé pou-l fété ti pitit la, sé bèf (Lc 15,23).

Jézu sèvi ak parabòl sa-a pou-l montré kijan Bondié Papa-a rinmin nou. Sé nou minm ki pa mét konfians asé nan Rinmin-l nan. N-ap mandé Manman Mari pou-l ba nou konfians sa-a k-ap fè Bondié tèlman plézi.

Sé bèl bagay, lè dé moun ki té faché vi-n RÉKONSILIE. Lévanjil katriyèm dimanch Karèm C-a montré nou bèl fèt Papa-a fè pou pitit li-a, ki té pati dépi konbyin tan, al nan libètinaj, al gaspiyé tout ti lajan fanmiy nan (Lc 15,1-32). Sin Pòl di nou nan dézièm Lékту-a (2 Co 5,17-21) pou nou kité Bondié RÉKONSILIE nou avèk li. Li di mision li résévoua, sé mision Rékonsiliation. Sé paròl rékonsiliation-an Bondié mété nan bouch li. Li sé

komisionè Bondié, pou-l anonse Bòn Nouvèl sa-a. Bondié rékonsilié tè-a avèk li nan Pitit li-a, antan-l éfasé tout péché (2 Co 5,17ss). Pou rékonsiliation-an fèt, sé pou gin yon chanjman nan nanm nou. Sin Pòl di sé yon kréatu nouvo nou yé nan Jézu-Kri. Tè ansyin-an fi-n pati. Sé yon nouvo tè ki pran nésans. Mision Sin Pòl ak tout Apot yo, sé travay pou rékonsiliation-an.

Nan mèsaj Pap yo pou jou-d-lan, anpil foua lidé sa-a tounin: Sé chans pou moun k-ap travay pou lapè (Mt 5,9). Travayè lapè pa janm pozé. Sèké sé tout tan pou réfè rélasyon moun yo, paské sé tout tan gin sikonstans nouvo k-ap vi-n antré nan yo pou gaté yo. Rékonsiliation, sé chemin lapè, dapré tit mèsaj lapè Pap Pòl VI té voyé pou premié janvié 1975. Li espliké kijan sé tout tan pou n-ap travay pou lapè, san nou pa répozé. Ékilib lapè-a pa chita sou kat rou, ni sou toua rou. Sé sou dé rou sèlman li chita. Sé mouvman-an ki pou ba-l ékilib. Konsa sé tou tan pou n-ap fè mouvman lapè-a. Plis nou mét vitès, sé plis ékilib la asiré. Lapè-a sé tankou yon zouazo k-ap volé nan sièl la. Sé mouvman zèl li ki asiré ékilib li. Si-l pa déplasé anlè-a, l-ap tonbé atè. Plis li volé vit, sé plis li jouinn ékilib, jan Pap Pòl VI té fè rémaké nan mèsaj lapè pou premié janvié 1970 la, lè-l t-ap espliké paròl Sint Ogustin ki té di: lapè-a, sé "la tranquillité de l'ordre" (De Civ Dei XIX, c XIII; PL 7, 640). Li té di: "C'est un mouvement toujours en progrès, comme l'équilibre du vol doit être à chaque instant soutenu par une force de propulsion". Li té di tou: yo pa joui lapè; yo fè lapè. Sé pa yon nivo koté nou déjà rivé. Sé yon nivo ki toujou dépasé nou koté n-ap éséyé rivé, sé yon konviksion ki fè nou déplouayé tout éfò nou pou nou réalizé-l. Li di: "on ne jouit pas de la paix, on la crée. La paix n'est pas un niveau désormais atteint, c'est un niveau supérieur auquel toujours doivent aspirer tous et chacun. Ce n'est pas une idéologie soporifique; c'est une conception déontologique, qui nous rend tous responsables du bien commun et nous oblige à offrir chacun de nos efforts pour sa cause: la vraie cause de l'humanité".

Nan sans sa-a sé yon édikasyon pou n-ap réfè tout tan osijè lapè-a. Lapè sé pa résignasyon. Lapè sé pa toufé moun. Sé tout tan pou n-ap chèché mouyain nouvo pou nou instalé lapè pou nou anpéché lèzòm dégradé rélasyon yo, pou nou aji. Pap Pòl VI di nan mèsaj lapè an janvié 1975: "Seule la paix engendre la paix". Li mandé pou nou dévloppé konfians nou youn parapò a lòt, pou lapè-a rivé, dapré sa dokiman Konsil Vatikan II té soulignin, nan "Gaudium et spes" (n 82), pou nou kité santiman rayisans, pou youn sispann méprizé lòt, pou youn sispann fè dout sou lòt, pou rayisans youn ras a lèga youn lòt ras fi-n disparèt, pou moun yo sispann youn séparé ak lòt, youn drésé kont lòt, akoz tèl lign lidé yo chak ap suiv. Pou sa, fò nou rékòmansé fòmé mantalité nou, fò diréksion jijman pèp la chanjé. Anvan pou lapè-a réalizé déyò, fò-l

déjà chita anndan fon kè nou. Sé léspri yo pou nou chèché dézamé, si nou vlé anpéchè tout bon vré pou moun yo sèvi ak zam k-ap ataké kò.

Pap Pòl VI fè sonjé rémak Sint-Ogustin fè antan-l di: si nou pa aprann moun yo palé yon minm langaj, sa vlé di si nou pa aprann yo youn konprann lòt, "moun nan ap pi alèz avèk chyin-l pasé avèk yon étranjé" (cf De Civitate Dei XIX, VI; PL 41,634). Li di "La paix a d'autant plus de valeur lorsque, avant d'être extérieure, elle cherche à être intérieure". Il faut désarmer les esprits si nous voulons empêcher efficacement le recours aux armes qui atteignent les corps. Il faut donner à la paix, c'est-à-dire à tous les hommes, les racines spirituelles d'une manière commune de penser et d'aimer. Elle ne suffit pas, écrit saint Augustin, le maître théorique d'une cité nouvelle, elle ne suffit pas pour associer les hommes entre eux, l'identité de leur nature; encore faut-il leur enseigner à parler un même langage, c'est-à-dire à se comprendre, à posséder une culture commune, à partager les mêmes sentiments, autrement, l'homme aimera mieux se trouver avec son chien qu'avec un homme étranger". A fòs moun yo jalou sò lòt, youn ap chèché tiré vanjans sou lòt, youn ap chèché plin pòch li antan-l vidé pòch lòt, y-ap simin danjé lagè, pandan y-ap pran pòz défann lajistis, kòm si lajistis t-a sispann ti sè lapè, pou-l vi-n tounin ti sè lagè (cf Saint-Augustin, ib). "Faut-il qu'un jour la justice ne soit plus sœur de la paix mais de la guerre?" Pap Pòl VI té bay l'UNESCO "pri Jan-XXIII", pou-l ankourajé travay dévlopman k-ap chèché améloré rélasyon pèp yo. Li té bay pri sa-a pou-l fè sonjé lòt ansiklik Pap Jan-XXIII té ékri-a: "Pacem in terris". Li rékonèt nan travay dévlopman-an gin volonté pou chanjé kè moun yo. Min li montré tou kijan nan tan n-ap viv la pèp yo ap dirijé nan chémin ki pou fè yon sèl, sé vré époutan chak jou lagè-a ap pézè pi rèd, antan l-ap ménasé fè tout tè-a détrui. Pouki rézon? Aktivité yo pa plonjé asé nan léspri-a. Sé chanjman sa-a nou gin pou nou réyalizé. Sé léspri yo pou nou rékonsilié pou lapè-a kapab rivé. Pap Pòl VI di: "Il faut valoriser et appliquer le coefficient spirituel, pour le rendre capable non seulement d'empêcher les conflits entre les hommes et de prédisposer ceux-ci à des sentiments pacifiques et civilisés, mais de produire la réconciliation entre les hommes eux-mêmes, c'est-à-dire d'engendrer la paix. Il ne suffit pas de contenir les guerres, de suspendre les luttes, d'imposer trêves et armistices, de définir frontières et rapports, de créer des sources d'intérêts communs; il ne suffit pas de paralyser les possibilités de contestations radicales par la terreur de destructions et souffrances inouïes, une paix imposée ne suffit pas, non plus qu'une paix utilitaire et provisoire; il faut tendre vers une paix aimée, libre, fraternelle, et donc fondée sur la reconsiliation des esprits" (message de paix janvier 1975). Nan dènié pati mèsaj sa-a Pap Pòl VI dévlopé pasaj Sin Pòl di nou nan dézièm Léktu ka-

triyèm dimanch Karèm C-a osijè rékonsiliation-an. Pap Pòl VI di kijan pou yon krétyin travay pou lapè: fò-l rékonsilié avèk Bondié nan Jézu-Kri (2 Co 5,18). Sa-a, sé moual mèsaj Karèm nan. Épi li rivé nan katriyèm dimanch Karèm nan, nan mitan tan Karèm nan. Pap Pòl VI di nou: "La première et indispensable réconciliation à réaliser est la réconciliation avec Dieu. Il ne peut y avoir pour nous croyants d'autres chemin vers la paix que celui-là; bien plus, dans la définition de notre salut, la réconciliation avec Dieu et notre paix coïncident, sont cause l'un de l'autre. C'est l'œuvre du Christ. Il a réparé la rupture que le péché opère dans nos rapports vitaux avec Dieu" (ib). Sé Jézu ki vré lapè nou (Ep 2,14-16). Lapè-a sé frui Léspri-Sin-an (Ga 5,22). Épi Pap Pòl VI ajouté sé pou nou fè lapè anndan légliz la minm, antan nou sispann ap kritiké légliz nou-an. Sé pou nou fè yon sèl pou moun déyò yo kouè Bondié Papa-a voyé Pitit li-a (Jn 17,21). Li di: "Que personne ne pense pouvoir éluder les exigences inévitables de la communion avec le Christ, la réconciliation et la paix, en demeurant sur des habituelles positions contestataires face à son Église" (ib). Li mandé tou pou nou sonjé lapriyé pou tout frè nou yo ki tou pré nou min ki ézité travèsé papòt la, pou nou lapriyé tou pou sa ki louin yo, ki déjà aksépté kòmansman démach rékonsiliation-an. Rékonsiliation-an sé yon dévoua, sé chemin lapè-a. Li mandé nou pou rénonse késion préstij nou, pou nou aprann padonnin (cf Mt 18,21-25), dapré sa-l di nan mèsaj lapè premié janvié 1970 la.

Nan padon-an, moun ki ranpòté laviktoua-a doué rénonse avantaj li, pou-l pa krazé léspri moun ki pèdi-a, pou chagrin pa abité kè-l, moun ki pèdi-a tou, li doué gin fòs nan nanm li; sé antan-l rékonsilié-a l-ap jouinn fòs sa-a. Si moun ki ranpòté laviktoua-a fè kè-l di, pa gin vré lapè. Si moun ki pèdi-a ap sonjé kilè l-ap tiré vanjans, pa gin vré lapè. Padon-an sé jistis ki sipériè tout kalité jistis. Sé li minm ki fini avèk késion préstij ki pa janm fi-n réglé-a. Sé li ki fè moun kapab tounin vi-n zanmi ankò. Pap Pòl VI invité nou li premié prèch Jézu sou mòn nan (Mt 5,21-26.38-48; 6,12.14-15), pou pòté Bòn Nouvèl sa-a pou tè-a, nan égzanp nou ak paròl nou. Li di: "La paix qui met fin à un conflit est d'habitude une domination, une oppression, un joug; le parti le plus faible, le parti vaincu les subit et les tolère par force, mais c'est souvent dans l'attente d'une revanche future, il accepte l'accord convenu, mais cet accord cache l'hypocrisie de cœurs encore ennemis. Il manque à cette paix trop souvent feinte et instable, la complète solution d'un conflit, c'est-à-dire le pardon, le renoncement du vainqueur à ces avantages acquis qui humilient le vaincu et le rendent inexorablement malheureux, il manque au vaincu la fore d'âme que donne la réconciliation. Une paix sans clémence, peut-elle s'appeler paix? Une paix imprégnée d'esprit de vengeance, peut-elle encore être appelée une vraie paix? De part et d'autre il

faut faire appel à cette justice supérieure qu'est le pardon, qui efface les insolubles questions de prestige et rend à nouveau possible l'amitié" (message de paix 1^{er} janvier 1970).

Ézayu té rékonsilié avèk Jakòb apré plis pasé katòz ané séparasion (Gn 33,1-17). Jozèf té rékonsilié avèk frè-l yo apré anpil ané séparasion (Gn 45,1-15). Rékonsiliation-an difisil, min li posib (Sg 1,14; cf message de paix premier janvier 1975). Sé yon kado ki soti nan Bondié, cf message de paix: Pap Jan-Pòl II, premié janvié 1982: "La paix, don de Dieu confié aux hommes").

Kondision lapè-a ki sot nan rèkonsiliation-an, sé yon lòt kè (Ez 18,11; 36,26; Jer 32,39; 31,33) ak yon lòt léspri (Ez 11,19; 18,11; 36,26; Joël 3,1; Nb 11,25ss; A 2, 17ss; Is 32,15; Jn 20,23; Ga 5,22), yon lòt kò (1 Co 15,44; Lc 22,19; 2 Co 5,6) ak yon lòt san (Lc 22,20), yon lòt lavi (2 Co 5,17; Ga 6,15; Ep 2,15; 4,24) ak yon tan (Mc 1,14; Mt 5,21-48), yon lòt jijman (R 12,2; Mt 5,20; Lc 6,36-38) ak yon lòt konduit (1 p. 1,18; 2,12; 2 Co 3,3; Ep 4,17; 5,8), yon lòt sajès (1 Co 1,21; Jn 3,13) ak yon lòt limiè (Is 9,1; 60,19; Ap 21,23; 22,25), yon lòt laloua (Ac 15,28-29; Jn 13,34; 1 Jn 2,8; Jer 31,33) ak yon lòt kontra (Lc 22,20; 1 Co 11,25; 2 Co 3,6; Jer 31,31), yon lòt pèp (Ps 45,11; Is 43,21) ak yon lòt fanmiy (Ps 45,17; Mt 19,19), yon lòt péyi (Gn 12,1) ak yon lòt lang (Mc 16,17; Ac 2,4-6; 1 Co 13,1), yon lòt sièl (Ap 21,1; Is 65,17; 2 p. 3,13; R 8,19) ak yon lòt tè (Gn 3,17; 8,21), yon lòt kay (2 Co 5,1) ak yon lòt **VII** (Ap 21,2; Ez 48 35). Jérusalèm nouvo sa-a k-ap désann sot nan sièl la, bèl tankou Madanm ki fèt marié k-ap vi-n rankonté mari-l, koté mouton ak lou fè zanmi, koté ti bébé mét min sou trou koulèv méchan (Is 11,6-8). N-ap mandé Maman Mari, Rèn lapè, pou-l fè nou abité nan vil sa-a.

Réconciliation: 2 Mac 5,20; 13,23; Si 22,22; R 5,11; 2 Co 5,18-19

Réconcilier: 2 Mac 1,5; 7,33; 8,29; Job 22,2; Pr 16,7; Mt 5,24; R 5,10a.b; 1 Co 7,11; 2 Co 5,18.19.20; Ep 2,16; Col 1,20.22.

Yo kapab rélé katriyèm dimanch Karèm C-a dimanch rékonsiliasion. Sèké pitit la ki té pati kité papa-a, lè-l tounin vi-n jouinn li, antan li fi-n fè yon bon konfésion nan kè-l épi li vi-n mét ajénou dévan papa-a pou jouinn padon-l, li tandé kijan papa-a désidé fè kè-l kontan poutèt li jouinn li vivan, li minm li té konprann ki té mouri (Lc 15,1-3.11-32). Dézièm Léktu-a di pou nou kité yo rékonsilié nou avèk Bondié; Bondié rékonsilié nou avèk Jézu-Kri, li mété paròl rékonsiliation-an nan bouch Apot li yo (2 Co 5,17-21). Premié Léktu-a kòmansé antan-l di: Bondié ouété laront Éjip la sot sou pèp li-a (Jos 5,9a.10-12).

N-ap sonjé Sinòd Èvèk yo té fè sou rékonsiliation-an avèk tit: "La réconciliation et la pénitence dans la mission de l'Église" (Vatican 1982). An 1983, a lokazion ané Jibilé Rédanmsion-an, Pap Jan-Pòl II té voyé yon dokiman bay tout légliz la, ki té gin kòm tit: "Ouvrez les portes au Rédempteur". Li té invité nou louvri pòt kè nou bay Sovè-a li té fè sonjé lè-l té fèk nonmin Pap sé sa li té mandé nou pou nou té fè: louvri pòt yo. Li té rénouvlé invitasion sa-a, antan-l té mandé nou louvri pòt kè nou bay Jézu-Kri, pou nou louvri pòt min nou tou bay frè nou yo. A-Ròm chak sinkant-an Pap la louvri yon pòt spésial nan Bazilik Sin Piè-a, yon pòt ki té toujou rét fèmin. Sa fè sonjé sa Psòm 24 la di: "Pòt yo, lévé batan nou yo; lévé, pòt ki té fèmin dépi lontan yo, pou Roua-a kapab antré, li minm ki plin bèlté-a" (Ps 24,7). Si Pap la louvri pòt sa-a chak sinkant-an, sa vlé di sé yon tan favè spésial légliz mété aladispozision nou. Kòm sé Pap la ki kontinué mision Sin Piè Jézu té bay pouvoua pou maré, pou lagé, pou fèmin, pou louvri (Mt 16,18-19), sé pou sa li té louvri pòt spésial sa-a pou piyay lagras la té louvri. Li té fè sa nan ané 1983, ané òdinè yo té fèté yon fason éstraòdinè, dapré sa Pap la minm té di nan dokiman-l nan: yon ané òdinè, paské sé chak jou n-ap fété mèvèy sakré Délivrans la, antan n-ap suiv lign litiji-a trasé épi k-ap dévlopé pandan tout ané-a. Sèlman ané 1983-a yo té fété-l yon fason spésial, yon fason éstraòdinè tankou yo té fè an 1933 pou raplé Jibilé Délivrans la. Chak Karèm doué invité nou voyé jé nou nan diréksion sa-a. Pasaj ki vini osito apré dézièm Léktu katriyèm dimanch Karèm C-a di konsa: "Granmèt la di: 'nan tan favè-a, mouin té réponn ou, jou délivrans la, mouin té poté-ou sékou'. Min li kouliè-a, tan favè-a, min li kouliè-a, jou délivrans la" (2 Co 6,2; Is 49,8).

Pap la té raplé kijan légliz la transmèt délivrans la gras a Paròl Bondié-a l-ap déklaré-a épi avèk sakréman yo l-ap bay la. Sé konsa li bati légliz la tankou Kò Jézu-Kri, "Sakréman délivrans pou tout moun" (n 3). Pap la té fè sonjé Batèm nan ki fè fidèl yo antré nan kouran lavi-a ki koulé sot nan Sovè-a, lakonfirmasion-an ki fè yo pi séré nan légliz la, ki ba yo plis fòs pou sèvi Jézu-Kri témouin, pou yo rinmin Bondié ak prochin yo yon fason ki vré, lékaristi-a, ki fè fidèl yo fè yon sèl ak Granmèt la, épi antré yo minm, antan Sovè-a ki prézan anba aparans pin ak divin-an bay tèt li pou fidèl yo, konsa lékaristi-a bati légliz la, antan li sign ak kòz ki fè tout pèp Bondié-a fè yon sèl; konsa sé sous ak pouint tèt tout lavi krétyin-an. Pap la té fè sonjé ankò sakréman lapénitans ki pròpté fidèl yo (sé sou sakréman sa-a Sinòd Èvèk yo té insisté nan ané 1983). Li té fè sonjé tou sakréman lòd, sakréman pou fè moun yo konsakré kòm Prèt, pou fè yo vi-n tankou Jézu-Kri Prèt an Chèf ki la pou tout tan, ki ba yo pouvoua pou kondui légliz la o-non-l antan yo ba-l lanségman Paròl la, antan yo ba-l lavi Bondié, sitou nan lamès. Li té fè

sonjé tou mariaj la koté sé Rinmin Bondié-a ki soudé rinmin mari-a ak madanm nan, pou-l dirijé-l, pou-l fè-l vi-n rich gras a pouvoua déliivrans Jézu-Kri-a avèk aktivité légliz la k-ap déplouayé richès déliivrans la. Anfin Pap la fè sonjé lékstrèm-onksion, sakréman malad yo, ki fè soufrans krétyin yo fè yon sèl avèk soufrans Sovè-a, ki pròpté yo pou yo kapab déliivré nèt, jous nan kò yo, ki préparé yo pou yo rankontré sèl Bondié-a an toua Pèsòn nan, k-ap ba yo tout satisfaksion. Pap la palé tou osijè lòt mouayin légliz mété nan sèvis nou, spésialman sa yo rélé "sacramentaux" yo (dlo bénit, sign lakoua, chandèl béni, méday, rélik...) ni divès fason pèp la abitué montré atachman-l pou Bondié (pélérinaj, chaplé, chémin-koua, vizit o-Sin-sakréman...), koté richès lavi Bondié ap koulé tout tan antan-l travèsé nan lanmò Jézu-Kri sou Koua-a, avèk nan Rékonsiliation-l. Tou sa fasilité kontak fidèl yo ak Granmèt la, yon kontak k-ap vi-n pi nèf tout tan, k-ap bay lavi tout tan (n 3).

Sé nan sans sa-a Pap la té di ané 1983-a sé yon ané òdinè yo t-ap fété yon fason éstraòdinè, paské sé minm favè Bondié-a k-ap koulé yon fason òdinè-a, sé li minm ki t-ap koulé nan Jibilé Rédamsion-an yon fason éstraòdinè, antan lè-l louvri pòt sakré-a, jou 25 mas 1983-a a-Ròm, sé té tankou pòt van basin-a ki té louvri pi gran pou dlo lagras la té koulé pi plis.

Chak tan Karèm, nou patisipé nan avantaj sa-a yon fason pi laj pasé nan rès tan ané-a. Nou kapab di avèk Profèt Izayi: "N-ap tiré dlo ak kè kontan nan sous déliivrans la" (Is 12,2). Nou kapab tandé paròl Profèt la k-ap rézonnin nan fon kè nou yon fason pi fò: "Nou tout ki souaf, vi-n nan dlo, minm si nou pa gin lajan, vini"(Is 55,1). Nou tandé konvèsasion Jézu ap fè ak Samaritèn nan k-ap kònin anndan fon kè nou: "Si-ou té konn favè Bondié-a, épi kilès di-ou: 'ban-m bouè-a, sé ou minm ki t-a lapriyé-l, li t-a ba-ou dlo vivan" (Jn 4,10). Nou tandé déklarasion li fè Juif yo ki réponn jous nan fon konsians nou: "Si yon moun souaf, sé pou-l vi-n jouinn mouin, pou-l bouè, jan labib la di; sé lariviè dlo vivan k-ap koulé sot nan kè-l" (Jn 7,37-38). Sou Koua-a lariviè sa-a éklaté vré sot bò kot Jézu, lè sòlda-a té transpèsé-l la: "San ak dlo koulé" (Jn 19,34), tankou dlo lariviè sa-a ki t-ap koulé sot nan kay sakré-a (Ez 47,1), anba lotèl la sou bò douat kontréfò kay sakré-a. Ròch la yo frapé nan dézè-a fè dlo éklaté (Ex 17,6), sé dlo lagras la ki soti nan kè Jézu, épi k-ap koulé pou nou, pou déliivrans nou, dlo lavi-a Sin Jan té ouè nan Apokalips la (Ap 22,17-1).

Chak Karèm nou kapab di robinèt lagras la louvri. Sé pou nou profité. Min li, tan déliivrans la, min li ané Rédamsion-an (2 Co 6,2; Lc 4,19; Is 61,2). Sin Pòl mandé nou avèk insistans pou nou pa résévoua favè Bondié-a san nou pa profité pasaj li (2 Co 6,1). Nou pa doué gaspiyé favè Bondié-a. Nan liv Kantik dè kantik la, nou ouè kijan madanm nan pa vlé lévé sot sou ka-

bann li pou-l louvri bay mari-a k-ap frapé déyò-a, nan sérin-a; lè-l lévé, li trò ta, mésié-a pati al fè rout li, li kontinuyé rout li, joutan madanm nan blijé lévé, sot déyò, fè tout tou lavil la avèk anpil difikilté, joutan li jouinn li (Ct 3,1-4; 5,2-8). Nou pa doué fè tankou Vièj ki pa gin léspri yo, ki kité lanp yo étinn, san yo pa mét luil ladan-l; lè mari-a vi-n ap antré nan sal nòs la, li trò ta, sé lè sa-a y-al achté luil nan nuit, la minm mari-a antré, li fèmin pòt la; yo frapé, li pa louvri, li di li pa rékonèt yo (Mt 25,1-13). Konsa Jézu invité nou pou nou tankou sèvitè ki fidèl, k-ap véyé ak lanp yo limin nan min yo, pou yo tann mèt kay la k-ap vini (Lc 12,33).

Chak Karèm sé tankou yon pasaj spésial Granmèt la. Sé pou nou louvri pòt yo pou-l antré, dapré tit dokiman Pap Jan-Pòl II té voyé bay tout légliz la nan ané 1983-a alokasion Jibilé Rédanmsion-an: "Ouvrez les portes au Rédempteur". Pap la té insisté pou di nou pou nou fè yon éfò pou nou rékonsilié avèk Bondié Papa-a, tankou ti gason-an nan lévanjil katriyèm dimanch Karèm C-a (Lc 15,11-32), épi tou pou nou rékonsilié avèk frè nou yo. Li té di: "En ce temps fort pendant lequel tout chrétien est appelé à réaliser plus profondément sa vocation de RÉCONCILIATION avec le Père dans le Fils, il doit être clair que l'objectif de l'Année ne sera atteint que si tous et chacun s'engagent vraiment au service de la RÉCONCILIATION, non seulement entre tous les disciples du Christ mais également entre tous les hommes, et au service de la paix entre tous les peuples" (n 3, in fine). Sé tankou Sin Pòl di nou nan dézièm léktu katriyèm dimanch Karèm C-a (2 Co 5,17-21): Bondié rékonsilié nou pa lintèmédiè Jézu-Kri, li bay Apot yo mision sèvis rékonsiliasion-an, li mété paròl rékonsiliasion-an nan bouch yo, sé pou nou kité yo rékonsilié nou avèk Bondié. Antan n-ap sonjé Sinòd Évèk yo té fè sou rékonsiliasion-an, sou sakréman lapénitans la, sé nòmàl pou dimanch sa-a nou sonjé yon fason spésial gran favè sa-a Bondié ba nou nan sakréman lakonfésion-an, koté li rinnèt sèvis rékonsiliasion-an nan min Évèk yo ak Prèt yo nan lign Apot yo. Sé moman tou pou nou sonjé fè yon bon Pak, profité pou nou fè yon bon konfésion, minm si sa fè anpil tan nou pa-t konfésé, profité lavé rad la, pròpté konsian nou. Tan favè-a déklaré, pòt yo louvri, va-n basin-an dévisé, dlo lagras la ap koulé, sé pou nou profité, pou nou pa kité-l san rézilta. Sé tout tan pou n-ap chanjé fason n-ap viv pou nou kouè nan Bòn Nouvèl la, jan Jézu déklaré nan premié prèch li-a (Mc 1,15). Légliz la sin, min sé tout tan pou l-ap pròpté-l nan manb li yo.

Pap Jan-Pòl II té di: "Il est impossible que le renouveau spirituel ne passe point par la pénitence-conversion, soit comme attitude intérieure et permanente du croyant et comme exercice de la vertu correspondant à l'appel de l'Apôtre: "Laissez-vous réconcilier avec Dieu", soit comme accès au pardon de Dieu grâce au sacrement de pénitence" (n 4). Nou tout nou sé péchè, nou

bézouin konvèsion. Prèmié libérasion pou chèché, sé libérasion péché-a, paské Jézu-Kri libéré nou pou nou rété lib (Ga 5,1); sé moun ki kité péché-a makònè yo ki ésklav tout bon vré (Jn 8,34). Pap la té di: "Au service de cette liberté, le Seigneur Jésus a institué dans son Église le sacrement de Pénitence, afin que ceux qui ont commis le péché après le Baptême soient réconciliés avec Dieu qu'ils ont blessé" (n 5). Pap la té insisté pou nou té rénovlé atachman nou nan sakréman konfésion-an, li té présizé, li té di: "Pour recouvrer l'état de grâce, dans l'économie ordinaire, il ne suffit pas de reconnaître intérieurement sa propre faute ni d'en faire une réparation extérieure. Car le Christ Rédempteur, en instituant l'Église et en la constituant sacrement universel du salut, a établi que le salut de l'individu se réalise à l'intérieur de l'Église et moyennant son ministère dont Dieu se sert également pour communiquer le commencement du salut, c'est-à-dire la foi. Certes, les voies du Seigneur sont impénétrables et le mystère de la rencontre avec Dieu dans la conscience demeure insondable; mais la "voie" que le Christ nous a fait connaître est celle qui passe par l'Église par le sacrement (ou, à tout le moins par le désir de celui-ci), l'Église rétablit un nouveau contact personnel entre le pécheur et le Rédempteur. Ce contact vivifiant est encore manifesté par le signe de l'absolution sacramentelle: En elle par le ministère, le Christ qui pardonne rejoint dans son individualité la personne qui à besoin de pardon et il vivifie en elle la conviction de la foi, dont dépend toute autre conviction: "la foi au Fils de Dieu, qui m'a aimé et s'est donné lui-même pour moi" (n 5, in fine). Sé yon "acte de foi" nou fè, lè nou konfésé péché nou nan sakréman lapénitans, légliz déklaré lafoua-l, li di Bondié mési pou libété sa-a Jézu-Kri ba nou, li ofri lavi-l kòm sakrifis léspri pou louanj bèlté Bondié, li fè vit pou-l al rankontré Jézu-Kri Granmèt la. Pap la di: Évèk yo résponsab sakréman Pénitans la, paské nan légliz la, sé yo minm ki gin mision pou véyé sou favè-a k-ap koulé sot nan sasèdòs Jézu-Kri-a, épi sé yo minm ki gin pou véyé sou disipli-n lapénitans la. Prèt yo asosié nan résponsabilité sa-a. Li di: "En conséquence la pratique de la confession sacramentelle, dans le contexte de la communion des saints qui concourt, de diverses façons, à rapprocher les hommes du Christ, est un acte de foi dans le mystère de la Rédemption et de son actualisation dans l'Église. La célébration de la pénitence sacramentelle est en effet toujours un acte de l'Église, par lequel celle-ci proclame sa foi, rend grâce à Dieu pour la liberté que le Christ nous a donnée, offre sa vie comme sacrifice spirituel à la louange de la gloire de Dieu et se hâte ainsi à la rencontre du Christ Seigneur. C'est une exigence du mystère même de la Rédemption que le ministère de la réconciliation confié par Dieu aux pasteurs de l'Église, se concrétise tout naturellement dans le sacrement de Pénitence. Les évêques en

sont responsables, car, dans l'Église, ils sont les intendants de la grâce dé-coulant du sacerdoce du Christ, auquel il fait participer ses ministres: Et aussi parce qu'ils sont chargés de veiller à la discipline pénitentielle. En sont aussi responsables les prêtres, qui peuvent s'unir à l'intention et à la charité du Christ, en particulier dans l'administration du sacrement de Pénitence" (n 6 in fine). Pap la té raplé Sinòd Évèk yo pou ané Rédanmsion-an, sou minm kèsion sa-a: rékonsilasion-an ak pénitans la nan mision légliz la. Li té di: "En proposant ces considérations je me sens proche des préoccupations pas-torales de tous mes frères dans l'épiscopat et en union avec eux. A cet égard il est vraiment significatif que le Synode des Évêques qui se réunira en cette année du Jubilé de la Rédemption ait précisément pour thème la réconcilia-tion et la pénitence dans la mission de l'Église. Je suis sûr que les Pasteurs accorderont avec moi une attention spéciale au rôle irremplaçable du sacre-ment de pénitence dans la mission salvifique de l'Église qu'ils veilleront attentivement à ce que rien ne soit omis de ce qui peut servir à l'édification du corps du Christ. N'est-ce pas notre désir commun le plus vif que, durant cette année de la Rédemption, diminue le nombre des brebis errantes et que se réalise pour tous un retour vers le Père qui les attend et vers le Christ, pasteur et gardien des âmes de tous?" (n 7). Pap la té mandé pou nou fè yon éfò pou nou détaché sot nan mantalité tè-a, sot nan péché, sot nan tou sa-k anpéché nou oubyin ralanti nou nan démach sou rout konvèsion-an (n 8): "Les diverses pratiques de cette Année jubilaire doivent s'orienter vers cette grâce, dans un effort continu qui suppose et exige que l'on se détache du péché, de la mentalité du monde 'soumis au pouvoir du Malin' et de tout ce qui empêche ou ralentit le cheminement de la conversion".

Li té fini antan-l té mandé nou pou nou gin plis dévotion parapò a la Trè Sint Vièj. Sé pa lintèmediè-l Jézu té vi-n sou tè-a, sé pa lintèmediè-l tou Jézu gin pou-l kòmandé kòm Roua sou tè-a (n 9). Li di: "Comme Marie a précédé l'Église dans la foi et dans l'amour à l'aube de l'ère de la Rédemp-tion, qu'elle la précède encore aujourd'hui, au moment où l'Église s'achemine par ce Jubilé vers le nouveau millénaire de la Rédemption" (n 9).

N-ap mandé Manman Mari pou-l fè nou louvri kè nou pou Roua-a antré (cf Ps 24,7).

*

* *

SINKIÈM DIMANCH KARÈM A

Si premiè dimanch Karèm nan sé té rénonnman Satan, avèk tantasion Jézu nan savann nan (Mt 4,1-11); si dézièm dimanch Karèm nan sé té Égzòd, avèk transfigirasion Jézu sou mòn Tabò-a, koté li chanjé figi pou nou fè konvèsion nan Batèm nan, chanjé rad (Mt 17,1-9); si touazièm dimanch Karèm nan sé té dlo lavi-a, sa Jézu té promèt Samaritèn nan, tankou nan Batèm nou yo vidé dlo lavi sou fron nou-an pou yo ba nou lavi Papa-a ak Pitit la ak léspri Sin-an (Jn 4,5-42); si katriyèm dimanch Karèm nan sé té limiè, sa avèg la té ouè-a, ki réprézanté Jézu, li minm Sin Jan di ki té Limiè kot Bondié-a, li minm yo ba nou nan chandèl Batèm nan, sign chandèl Pak la (Jn 9,1-41); sinkièm dimanch Karèm nan sé RÉZIKRÉKSION, tankou Batèm nan fè nou sot nan lanmò-a travèsé nan lavi-a (Jn 11, 1-45). Dimanch sa-a, reyèlman vré, nou ouè kijan Jézu fè Laza lévé sot nan parmi mò yo. Antan li fè sa, sé déjà davans li montré li gin pou-l soti nan lanmò-a pou-l réprann lavi ki pap janm fini-an. Épi antan nou fè pati manb Kò-l nan Batèm nan, nou minm tou n-ap patisipé nan jèm lavi sa-a ki pap janm fini-an. Batèm nan sé yon Rézirkéksion.

Chak dimanch nan Karèm nan, yo ba nou yon apèsi sou lansègnman Batèm nan. Dimanch jodi-a, sé sinkièm léson-an. Sé kòm si sé néchèl nou t-ap monté dépi premiè dimanch la jous dimanch jodi-a. Dimanch k-ap vini-an, si Bondié vlé, n-ap ouè kijan Jézu ap antré an trionf nan Jérusalèm, lè ti moun yo ap rélé viv pou li: "Ozana viv sila-a k-ap vini o non Granmèt la", lè foul yo ap mété rad yo atè, y-ap lonjé branch palmis pou yo résévoua-l (Mt 21,1-11), tankou yon jénéral ki sot ranpôté yon gran laviktoua sou lènmi ki t-ap pèsékité pèp la (1 Sm 18, 6s; Ex 15, 20s; Jg 5, 1ss; 11,34). Dimanch Ramo sa-a, sé sign Jézu ap antré nan lagloua sièl la, lè-l lévé vivan sot nan tonbo-a. Min dinanch jodi-a montré pou-l antré an trionf Jérusalèm ki nan sièl la, se pou-l pasé nan kavo-a anvan, sé poua lévanjil Laza-a, sé lanvé lévanjil ramo-a, sé tankou dé goudin kolé, chak bò gin yon sign. Tou sa montré nou gin yon lansègnman légliz ap ba nou antan li suiv tout évéman sa yo, tankou yon fason pou-l montré nou kijan lavi nou doué kolé ak Jézu-Kri Granmèt nou-an. Koté-l pasé, sé la nou minm tou n-ap pasé. Dimanch karèm yo inpòtan anpil pou yon ansègnman katéchis, sitou osijè Batèm nan.

Nan lévanjil sinkièm dimanch Karèm A-a, nou tandé Mat, sè Laza-a, fè "Profésion de foi" 11, (Jn 11, 27), tankou avèg la té fè dimanch pasé-a, nan katriyèm Dimanch Karèm nan (Jn 9, 38). Jézu di Mat konsa: "Si-ou koué, ou-ap ouè bèlté Bondié-a" (Jn 11, 40), Jézu dépayé kèsion-an byin dépayé, nan sinkièm dimanch Karèm A-a, li di: "Mouin sé lévé-a ak lavi-a, moun ki

kouè nan mouin, minm si-l mouri, l-ap viv, épi tout moun k-ap viv épi ki kouè nan mouin, li pap janm mouri. Èské ou kouè sa?" (Jn 11, 25)s. Mat réponn: "Oui, Granmèt, mouin kouè ou sé Kris Pitit Bondié vivan-an, ki té vi-n sou tè sa-a" (Jn 11, 27). Mari, sè Mat la minm, fè "profession de foi" pa-l, sé kriyé li kriyé sèlman (Jn 11, 33; cf 20, 11,13.15). Jézu sansib dévan sa (Jn 11, 35). Sé yon fason pou Mari di-l li rinmin-l, li gin konfians nan li; min lapinn li tèlman gran, li pa gin kouraj palé, sèlman li kouè nan fon kè-l, l-ap konté sou Jézu, sou sa-l vlé fè.

Prémié Léktu sinkièm dimanch Karèm nan Ézékièl (Ez 37, 12-14) di Granmèt la ap louvri tomb nou yo, l-ap fè nou soti nan tonbo nou yo pou-l fè nou antré nan tè Israël la, lè sa-a pèp la ap ba-l lafoua-l, l-ap rékonèt li kòm Granmèt la ki fè yo soti nan kavò yo-a. Psòm-répons la (Ps 129 = 130), sé Psòm yo konn résité nan lantèman-an, sa yo rélé: "De profundis" la, "Nan bafon yo m-ap rélé koté-ou, Granmèt". Sé péché-a ki lakòz lanmò. Tan Karèm nan, sé tan pou nou fè yon bon konfésion pou nou soti nan lanmò-a, pou nou travèsé nan lavi-a. Sin Pòl di Romin yo sa nan dézièm Léktu-a (Rom 8, 8-11): moun ki réglé dapré chè-a, yo pa kapab fè Bondié plézi. Léspri Jézu-Kri-a ki antré nan nou pa lintèmédiè Batèm nan, li fè nou viv. Konsa nou pa doué rétownin nan péché-a ankò.

Tan Karèm nan prèské fini; dimanch k-ap vini-an, si Bondié vlé, sé déjà dimanch Ramo, épi nou antré nan sémèn Sint la. Jou Pak la invité nou kité péché pou lagras alaplas; kité lanmò pou lavi alaplas.

N-ap sonjé prémié dimanch karèm: rénonse Satan (Mt 4, 1-11); dézièm dimanch karèm: égzòd-konvèsion, chanjman mantalité, chanjman figi (Mt 17, 1-9); touazièm dimanch Karèm: dlo lavi (Jn 4, 5-42); katriyèm dimanch Karèm: limiè (Jn 9, 1-41); sinkièm dimanch Karèm: rézirikéksion (Jn 11, 1-45). Tout dimanch sa yo mandé nou pou nou fè yon "profession de foi", pou nou renouvle angajman promès Batèm nou, pou nou mét lafoua nou nan Granmèt nou-an, pou nou préparé sérémoni nan nuit Pak la, tankou yon "clôture générale de mission". N-ap mandé Manman Mari, li minm ki té di lanj Gabriyèl: "Mouin sé Sèvant Granmèt la, sé pou sa fèt pou mouin dapré paròl ou-a" (Lc 1, 38), pou-l aprann nou di Granmèt la ouï, nou minm tou ak tout kè nou, san nou pa maché sou paròl nou, pou nou fè ouï nou-an monté mòn, minm si-l difisil pou nou réalizé-l; sé pa nou minm k-ap aji, sé Granmèt la k-ap aji nan nou.

Ané 1984, 1985, 1986 santré sou lafoua, pou fè sonjé 500 ané dépi Évanjélisation lamérik la kòmansé. Ané 1987, 1988, 1989, sé léspérans ki sèvi kòm flanbo, nan minm sans sa-a. Ané 1990, 1991, 1992, sé lacharité sitou ki dirijé réfléksion nou sou késion sa-a. Alokasion lévanjil sinkièm dimanch Karèm A-a (Jn 11, 1-45), — rézirèksion Laza-a —, li nòm al pou nou fè sonjé léspérans la. Sé yon kalité Bondié dépozé nan nanm nou avèk Batèm nan, minm jan li mété lafoua-a ak lacharité-a. Ki plas léspérans la ginyin nan lavi nou? Ki sa-l dirijé? Nan ki pozision kay nanm nou li yé? Lè n-ap palé osijè léspérans, nou pansé sitou lavi k-ap vini apré lavi sa-a n-ap viv sou tè-a. Si nou konparé-l avèk lafoua ak lacharité, nou kapab di li gadé nan diréksion k-ap vini-an; lafoua minm gadé nan diréksion ki fi-n pasé-a; lacharité gadé nan moman prézan-a. Lafoua-a gin rélasyon avèk Krédo-a. Léspérans la gin rélasyon avèk sakrèman yo épi lapriyè Papa nou ki nan Sièl la. Lacharité-a gin rélasyon avèk Kòmmandman Bondié yo.

Li nòm al pou nou branché léspérans nou sou sakrèman yo ak lapriyè "Papa nou ki nan Sièl la", modèl tout lapriyè. Minm jan nan ané 1984, 1985, 1986, nou insisté anpil sou Krédo-a, alokasion toua ané lafoua yo; konsa nan ané 1987, 1988, 1989, nou insisté anpil sou sakrèman yo ak lapriyè Papa nou ki nan Sièl la, alokasion toua ané léspérans la; épi nan ané 1990, 1991, 1992, nou insisté anpil sou Kòmmandman Bondié yo, alokasion toua ané lacharité-a. Sé matiè Katéchis légliz katolik la: 1é pati: Krédo - 2èm pati: Sakrèman - 3èm pati: Kòmmandman - 4èm pati: Lapriyè.

Nan sinkièm dimanch Karèm A-a, nou tandé kijan Mat ak Mari ap lapriyè. Lapriyè sé éspoqué bézouin nou bay Bondié, jan Sin Pòl di Filipyin yo (Ph 4, 6). Mat ak Mari kontanté yo voyé di Jézu: "Granmèt, sila-a ou rinmin-an malad" (Jn 11, 3). Sé yon fason voualé pou mandé-l vi-n géri-l. Laprè, sèkè lè Jézu rivé, ni Mat ni Mari di-l: "Granmèt, si-ou té la, frè nou-an pa t-a mouri" (Jn 11, 21.32). La Trè Sint Vièj Mari té kontanté-l di Jézu: "Yo pa gin divin" (Jn 2, 3). Sé té yon fason voualé tou pou mandé-l fè kichòy ak pouvoua li ginyin, ki dépasé tout bariè ki kapab prézan. Nan lapriyè nou, nou kontanté nou prézan. Sé bézouin nou dévan Bondié, san nou pa bézouin indiké-l avèk présizion ki sa-l gin pou-l fè. Li konnin sa-l gin pou-l fè. Sé éspérans nou nou ofri-l, antan nou sètin l-ap ba nou sa nou mandé-l la, jan-l invité nou fè nan lévanjil la (cf Mt 11, 23). Konsa éspérans la chita sou lafoua-a. Lapriyè Jézu fè nan lévanjil sinkièm dimanch Karèm A-a, sé yon lapriyè remèsiman. Jézu déja di Bondié mès davans, paské li konnin Bondié Papa-a déja fi-n kouté lapriyè-l. Li di: "Papa, mouin di-ou mès poutèt ou kouté-m" (Jn 11, 41). Anpil Psòm yo k-ap mandé Bondié favè, yo gin yon pasaj anndan lapriyè-a pou di Bondié mès davans. Priyè remèsiman, sé si-

tou lékaristi, jan mo grèk la di-a: "rémèsiman" La "Didachè" prezanté lamès la tankou yon priyè rémèsiman ("Doctrina duodecim Apostolorum", Nn. 9, 1-10, 6; 14, 1-3: Funk 2, 19-22.26, cf Liturgia Horarum III, Vatican 1974, 375-376).

Tertullien (160-220) di lapriyè-a sé yon sakrifis nou ofri Bondié nan lésprî Sin-an ("De oratione, Cap 28-29: CCL, 1, 273-274; cf Liturgia Horarum II, 195).

Sin Cyprien (+258) di priyè Granmèt la (Papa nou ki nan Sièl la), sé modèl tout priyè ("De dominica oratione", Cap 1-3: CSEL 3,267-268; cf Liturgia Horarum II, 81-32). Sé sou pouin sa-a tou Sint Thérèse d'Avila dévlopé lanségman sou l'"oraison"-an. Sin Cyprien di tou lapriyè nou, nou pa janm fè-l pou sèl bézouin pa nou, yon fason apa, minm si nou yon koté pou kò nou, an kachèt. Li gin yon dimansion légliz, yon dimansion piblik ("De dominica oratione", n 8-9: CSEL 271-272; cf Liturgia Horarum III, 282-283). Li di nou pa di: "Papa mouin ki nan sièl la", min nou di: "Papa nou ki nan sièl la"; nou pa di: "pin mouin bézouin chak jou-a, ban mouin li jodi-a"; min nou di: "Pin nou bézouin chak jou-a, ba nou li jodi-a". Sé pa pou pròp pèsòn pa nou sèl nou mandé pou padonnin péché, pou pa kité nou pri nan pièj, pou délivré nou anba tout mal, min sé pou tout pèp la, paské nou tout ansanm nou fè yon sèl. Sa-a sé yon bèl kondision lapriyè. Nan sans sa-a Jézu di si nou mété ansanm pou nou mandé Bondié yon bagay, l-ap bay li (Mt 18, 19-20). Sé poua lè n-ap lapriyè, nou doué gin bòn antant antré nou, pou nou youn padonnin lòt, pou Granmèt la padonnin nou (Mt 6, 12). Mat blijé al chèché Mari, sé a yo dé-a yo mété ansanm pou lapriyè yo-a jouinn satisfaksion (Jn 11, 23ss). Sin Cyprien di: toua Ébré yo nan boukan difé-a, yo fè voua yo fè yon sèl pou lapriyè (Jn 3, 51). Li fè sonjé tou kijan apré Jézu fi-n monté nan sièl la, Apot yo avèk patizan yo, sé yon sèl kè yo té ginyin pou yo patisipé avèk fidéлитé nan lapriyè avèk kèk médam ak manman Mari ak fanmiy Jézu yo (cf Ac 1,14). Sin Cyprien di sé Batèm nan ki fè nou kapab rélé Bondié "Papa" nan lapriyè-a. Nan lanségman Granmèt la, sé "Papa nou ki nan sièl la". Sé poua nan finisman sérémoni Batèm nan, yo fè nou résité lapriyè "Papa nou ki nan sièl la". Tout Karèm nan, sé jalon pou fè réviv sans Batèm nou.

Sin Jean Chrysostome (350-407) di lapriyè-a, sé yon élan ki fè nanm nou monté kot Bondié, pou réspiré-l tout tan san rété, pou rété an rélasyon avèk li, malgré nou nan aktivité (Supp., Ron 6 "De precatione": PG 64, 462-466; cf Liturgia Horarum II, 52-53). Sé konsa Sint Thérèse de l'Enfant Jésus ésplyé lapriyè-a, tankou yon élan ki fè nanm li pran vòl tankou yon ti zouazo

al kot Bondié. Nan sans sa-a Sin Cyprien di sé tout tan, lajounin kon lannuit, n-ap lapriyè, nanm nou kominiké avèk Bondié, nou fè yon sèl ak li, n-ap palé ak li, tankou zanmi ap palé ak zanmi-l (Ex 33, 11). Nan tou sa n-ap fè, nou sonjé Bondié, nou souaf li, nou anvi-l (cf Ps 42, 3; 63,2; 84,3), tankou yon ti bébé ki anvi tété. Paròl pa nésèsè pou lapriyè nou. Nou pa minm konnin ki sa pou nou mandé, sé léspri Sin-an k-ap palé pou nou (Rom 8, 26). Sé pousa lapriyè-a tankou yon difé k-ap boulé kè nou.

Sint Augustin (354-430) di lapriyè, sé yon répo nan Bondié (Ps 62, 2: 55,7). Li di: "Kè nou san répo, joutan-l pozé nan ou" ("Confessions"; lib 1, 1-2, 2.5,5: CSEL 33, 1-5; cf Liturgia Horarum III, 227-229). Si nanm nou pran élan, fò-l jouinn répo, paské sé pou Bondié li fèt. Sé pousa priyè-a chita sou éspérans. Tout tan n-ap chèché Bondié, joutan nou jouinn li. Avèk lapriyè-a Bondié nan nou, nou nan Bondié, malgré ni sièl ni tè pa kapab kinbé-l (1 R 8, 27). Sint Augustin di tou lapriyè-a sé yon rèl ki sot nan fon kè nou, minm san nou pa palé ("Confessions", lib 10, 1, 1-2; 5,7: CSEL 33, 226-227.730-231: cf Liturgia Horarum III, 211-213). Sint Thérèse de l'Enfant Jésus réprann minm mo sa-a tou pou-l éspliké lapriyè-l: yon "rèl" ki sot nan fon kè-l. Sint Augustin di ankò: lapriyè-a sé yon anvi ki orienté nou nan diréksion Bondié (Ps 63, 2, 42, 2; 84, 3; Jn 19, 28; Ps 38,10). Li di: "anvi-ou, sé lapriyè-ou" ("Enarrationibus in psalmis", In ps 37, 13-14: CCL 38, 391-392: cf Liturgia Horarum I, 242-243). Nan sans sa-a sé tout tan n-ap lapriyè san rété; toutotan anvi nou-an pa sispenn, lapriyè nou-an ap kontinué (Lc 18, 1; 1 Th 5, 17). Sint Augustin di tou lapriyè litiji-a fini souvan avèk fraz "pa pouvoua Jézu-Kri". Li di sèké Jézu-Kri ap lapriyè pou nou kòm PRÈT, li lapriyè nan nou kòm TÈT, li résévoua lapriyè pa nou kòm BONDIE ("Enarrationibus in psalmis", Ps 85, 1: CCL 39, 1176-1177; cf Liturgia Horarum II, 288-289). Konsa tout lapriyè nou doué santré sou lapriyè Jézu-Kri. Lapriyè Jézu-Kri montré nou-an, sé "Papa nou ki nan sièl la". Sint Augustin di tou si nou minm nou lapriyè, sé pou nou kapab éksité anvi pou nou résévoua sa Bondié vlé ba nou an ("Epistola ad Probam", Ep. 130, 8, 15.17-19: CSEL 44, 56-57.59-60; cf Liturgia Horarum IV, 302-303). Sé pousa Sint Augustin di li bon pou tanzantan nou fè yon ti lapriyè spésyal pou soutni anvi sa-a, pou-l pa fébli ("Epistola ad Probam", Ep. 130, 9, 18-10, 20: CSEL 44, 60-63; CF Liturgia Horarum IV, 306-307), pou nou souflé difé-a pou-l pa étinn, jan Sint Thérèse d'Avila di tou apré Sint Augustin. Bondié déjà konnin sa nou bézouin. Min si nou déklaré yo dévan-l, sé pou nou minm. Lapriyè, sé pa palé anpil, sé rinmin anpil. Sint Thérèse d'Avila réprann lidé sa-a tou apré Sint Augustin. Minm dlo k-ap sot nan jé nou, sé lapriyè Bondié mété dévan fas li, jan Sint Augustin di antan-l fè sonjé Som nan (Ps 56, 9; cf 2 R

20, 5; Is 38, 3-5; 25, 8; Ap 7,17). Sé konsa dlo k-ap koulé sot nan jé Mari, sé Laza-a, sé yon lapriyè Jézu kouté (Jn 11, 33). Li minm tou li kriyé (Jn 11, 35). Sint Augustin éspliké lidé sa-a, antan-l déstayé chak démann lapriyè "Papa nou ki nan sièl la", pou-l montré sé pa Granmèt la nou vlé ranségné ni touché, min sé nou minm nou vlé fè sonjé sa nou gin pou nou mandé ("Epistola ad Probam", Ep. 130, 11, 21-12, 22: CSEL 44, 63-64; cf Liturgia Horarum IV 309-310). Sint Augustin montré kijan tout priyè lansyin Tésta-man yo, yo ranmasé nan priyè "Papa nou ki nan sièl la". Li déstayé chak démann yo pou-l fè ouè sa ("Epistola ad Probam", Ep 130, 12, 22-13, 24: CSEL 44, 65-68; cf Liturgia Horarum IV, 313-314). Li di nou gin doua di dèt paròl, min sé toujou minm bagay yo n-ap mandé (ib). Sint Augustin montré tou kijan boulon-sant motè lapriyè-a, sé mandé pou Volonté Bondié fèt nan plas volonté pa nou ("Epistola ad Probam: Ep. 130, 14, 25-26: CSEL 44, 68-71; cf Liturgia Horarum IV, 316-317). Sé konsa Sint Thérèse d'Avila palé osijè "union de volonté" nan lapriyè li rélé "oraison de quiétude" la. "Union de volonté" sa-a, sé léspri Sin-an k-ap fè-l pou nou, paské sa-l mandé pou nou, yo réglé sou volonté Bondié (R 8, 27). Sé nan sans sa-a Sint Augustin éspliké Psòm nan ki di: "yon sèl bagay m-ap chèché, sé abité lakay Granmèt la tout tan lavi-m" (Ps 27, 4). Tout rès la, nou pa konn kijan pou nou mandé-l, nou pa minm konn sa pou nou mandé. Sint Augustin rélé-l "une savante ignorance" ("Epistola ad Probam", Ep. 130, 14, 27-15, 28: CSEL 44, 71-73, cf Liturgia Horarum IV, 320-321). Li di ignorans la savan, paské sé léspri Sin-an ki poté nou sékou nan féblès nou (R 18,26).

Sin Pierre Chrysologue (380-451) plasé lapriyè-a pa rapò a toua rélasyon nou ginyin: aléga Bondié, aléga nou minm, aléga prochin-an. Aléga Bondié, sé lapriyè-a minm ki frapé pòt la, aléga nou minm, sé jèn nan, ki jouinn sa nou mandé-a; aléga prochin-an, sè kè sansib la, ki résévoua-l nan pròp min-l ("Sermo" 43: PL 52, 320.322: cf Liturgia Horarum II, 181-182). Li di toua sa yo pa séparé, tankou toua ròch difé.

Sin Léon le Grand (440-461) di nou lapriyè-a fè nou chanjé figi ansanm ak Jézu sou mòn nan (Lc 9, 29). Sé yon avaloua rézireksion-an ("Catechesibus", Cat 3, 24-27: SC 50, 165-167; cf Liturgia Horarum II, 125-126). Sé bouch lésprans la.

Anastase (+700) di lapriyè-a fè nou gouté satisfaksion sièl la dépi anba isit la, a tèl pouin nou kapab di avèk Apòt yo sou mòn nan: "Li bon pou nou rét isit la" (Lc 9, 33). Sé ringn sièl la: nou déjà ouè tankou nan pòtré ("Sermo in die Transfigurationis Domini", Nn 6-10: Mélanges d'archéologie et d'histoire 67 [1955], 241-244; cf Liturgia Horarum IV, 1028-1029). Sèk sis

jou anvan sa; Jézu té di: "Gin nan nou isit la ki pap mouri anvan yo ouè Pitit moun nan vini nan bèlté Papa-l" (Lc 9, 27), dapré rélasyon Anastase konstaté nan dé pasaj sa yo (ib).

Sint Thérèse d'Avila (1515-1582) éspliké lapriyè Papa nou ki nan sièl la. Li di jistéman sa nou mandé anndan-l, sé Ringn Bondié-a. Sé li minm pou nou kòmansé chèché anvan; tout rès la, y-ap ba nou-l apré (Mt 6, 33). Sé lan-sègnman sa-a li bay nan liv "Chemin de la Perfection", k-ap aprann nou fè "oraison" (Ch 30, 1-5: Oeuvres complètes, Paris, Desclée de Br., 1964, 467-468; Liturgia Horara IV, 345-346).

Sin Jean de la Croix (1542-1591) di lapriyè-a fè nou "aspirer Dieu en Dieu" (Cant. Spir. Red. A, str. 38; cf Liturgia Horarum IV, 54-55). Sé la l-ap éspliké pasaj Profèt Ozé-a ki di: "M-ap fiansé-ou avèk mouin pou tout tan" (Os 2, 21). Sé paské lapriyè-a transfòmé nanm nou nan Bondié. Léspri Pitit li-a nan kè nou, l-ap rélé "Aba", Papa (R 8,15; 5,5), nan sa yo rélé "spiration passive" la. Ni Papa-a ni Pitit la ap aspiré léspri Sin-an, nan sa yo rélé "spiration active" la, nan minm aktivité Rinmin-an. Sé poua Sin Pòl di léspé-rans la pa bay désépsion (R 5, 5), akoz léspri Sin-an nan kè nou avèk rinmin Bondié-a. Sin Jean de la Croix di tou nou pa doué ap késioné Bondié pou mandé-l vizion ak révélation, kòm si sa-l déja fi-n ba nou nan Pitit li-a pa kont. Nan lansyin Téstaman yo té pèmèt sa; min kouliè-a Bondié déja dévoualé nou tout bagay nan Pitit li-a, jan Lèt Ébré yo di nou-an (He 1, 1s). Nou pa gin pou n-ap konsilté Bondié, kòm si sé bòkò n-ap konsilté. Sé yon déviasyon lapriyè sa yé. Sé pou nou fixé jé nou sou Jézu-Kri (Montée du Carmel, livre 2, ch 22, cf Liturgia Horarum I, 172-173). Lapriyè, se gadé Jézu: "simplex intuitus Veritatis": simple regard sur la Vérité ("sub influxu Amoris": sous l'influence de l'Amour). Sint Thérèse de l'Enfant Jésus dit: "Pour moi, la prière, c'est un élan du coeur, c'est un simple regard jeté vers le ciel, c'est un cri de reconnaissance et d'amour au sein de l'épreuve comme au sein de la joie; enfin c'est quelque chose de grand, de surnaturel, qui me dilate l'âme et m'unit à Jésus... Quelquefois, lorsque mon esprit est dans une si grande sécheresse qu'il m'est impossible d'en tirer une pensée pour m'unir au Bon Dieu, je récite très lentement un "Notre Père" et puis la salutation angélique; alors ces prières me ravissent, elles nourrissent mon âme bien plus que si je les avais récitées précipitamment une centaine de fois" (Manus. Autob., C fol. 25 r et v; cf P. Marie-Eugène de l'Enfant Jésus: Je veux voir Dieu, Tarascon, éditions du Carmel 1949, 62).

Sin Vincent de Paul (1581-1660) rasié nou, lè-l fè nou konprann si nou kité lapriyè nou pou n-al rann prochin nou sèvis, sé kòm si nou kité Bondié pou

n-al jouirm Bondié. Sé sa-l rélé: "Quitter Dieu pour Dieu". Bondié tout koté, nan tout sikonstans. Tou sa nou fè vi-n tounin priyè (Epist 2546: Correspondance, entretiens, documents, Paris, 1922-1925, 7; cf Liturgia Horarum IV, 1153-1154)

Sin Jean-Marie Vianney (1786-1856) konparé lapriyè-a avèk dé chandèl limin, ki kolé youn sou lòt, k-ap fonn ansanm, nan minm flanm nan. Anyin pa kapab séparé yo. Sé tankou mièl k-ap désam nan nanm nou, ki fè lapinn nou fonn tankou lanèj nan solèy. Sé tankou pouason nan dlo. (Catéchisme sur la prière, A. Monin, L'esprit du Curé d'Ars, Paris 1899, pp 87-89; cf Liturgia Horarum IV, 1015-1016).

N-ap mandé manman Mari pou-l fè nou dévlopé sans LÉSPÉRANS la nan lapriyè. Pèp "nouveau monde" nan, sé PÈP LÉSPÉRANS, dapré sa Pap Jan-Pòl II té di: "Le Continent de l'espérance". Sé pa yon espérans k-ap gadé atè sèlman. Dimansion k-ap gadé anlè-a pi konsékan. Bra lakoua-a pap rét an travès, si-l pa fiksé sou pié Koua-a k-ap gadé Sièl la.

*

Prière en général: Gn 32 ; Nb 11,10-17; Dt 4,7-9; 1 Sm 1 ; 2 Sm 7,18-29; 1 R 3; 8,22-61 ; Esd 9; Ne 9,5-19 ; Tob 3; 8,4-10; 12 ; Est 13; 14; Si 35; Is 1; 63; Jer 14; 15; Lm 2 ; Dn 3,34-43; 9; Joèl 1 ; Mi 7,14-20; Ha 1; Mat 6,5-13; 7,7-11.21-23; 9,37s; 15; 18,19s; 20; 21,13.21-22; Mc 7; 9; 10 ; 11,15-26 ; Lc 5; 10,12; 11; 18,1-8.9-14; Jn 16,23-28; Ac 1; 2; 4,23-31; R 8,13-27; 1 Co 14; Ep 1,15-19 ; 6 ; Ph 1,1-11; 1 Th 3,9-13 ; 1 Tm 2; 2 Tm 1,3-5; Jc 5; Ap 8; 22.

Intercession Gn 18,16-33; Ex 17; 32; Nb 12; 21; Dt 9; 2 Mac 12; Si 36; Jer 18; Lc 7; Jn 2; 17-Ac 12; R 18,26-27; Ep 3,14-19; Ph 1; 2 Th 1,11-3,5; 1 Tm 2; He 7,25; Jc 5; 1 Jn 5.

Cantiques: 1 Sm 2,1-8; Dn 3,52-87; 1 Chr 29,10-12; Is 38,10-16; 12,2-6; Jer 31,10-13; Jon 2,3-8 ; Jdt 13,18-20 ; Ex 15,1-18; Dt 32,3-41; Tob 13,3-41; Lc 1,46-55; 2,29-32; 1,68-79.

Jésus: Mt 11; 26,39-44; 27,46; Mc 14,32-39 ; 15,34 ; Lc 10,21-22 ; 23,34.46; Jn 11,41-42; 17; He 5,7; 7,25.

au sujet de Jésus: Mt 14,19.23; 19,13-15; 20,26-30; Mc 1,35-38; 6,41; 14,22-26; Lc 3,21, 5,15-16; 6,12-16; 9,16.13.28; 11,1-4, 22,19-20.31; 24,30-51; Jn 14,16.

Cris: Mt 8,2 ; Lc 5,12 (cf Mc 1,47) ; 8,8 (cf Lc 7,6); 8,26 (cf Lc 8,24) ; 9,18 ; 14,31 (cf 15,25); 15,22 (cf Mc 10,47; Lc 18,38) ; 20,33; 21,9 ; Mc 4,38 ;

5,23 ; 9,17.29; Mc 10,51 (cf Lc 18,41); 11,9-10 ; Lc 5,8 ; 9,38; 11,1; 17,1.5.14 (cf Mt 9,28; 20,30-31) ; 19,38; 23,42; 24,29; Jn 2,3; 4,15; 6,34.68 ; 12,13; 14,8, 20,28; 21,15.27.

St. Louis-Marie Grignon de Montfort; ASE 104, 136, 175, 134-193; LAC 45; SM 47; VD 101, 130, 132, 145; C 7,32; 15,33.46.47; 77,6; RM 76; C 139,10.24; L 6, 15, 16, 20, 21; PE 25; ACM 3; ASE 205; SM 31, 61, 66, 76) CS 15, 19, 27, 46, 52, 85, 94, 198, 211, 255 ; C 7,9; 80,10; 82,7; 98,22; 134,9) 155,3; L 2, 3, 4, 6, 9, 22, 34; ASE 1, 191, 192; SM 2, 64, 66-69; VD 67, 249, 250, 252; C 83, 126.

*

* *

SINKIÈM DIMANCH KARÈM B

Nouvo kontra-a Bondié pasé avèk pèp li-a, sa Profèt Jérèmi anonsé nan Lanmès 5^{ème}. dimanch Karèm B-a, (Jer 31,31), sé nan San Pitit li-a ki Bondié-a li pasé-l sou Koua-a (Lc 22,20; Ex 24,8). Gras a Batèm nan, nou vi-n tounin manb pèp lèspri-a. Laloua Bondié-a ékri nan kè nou. Konésans li nan lèspri nou. Nou gin yon kè nouvo, yon lèspri ki réfèt tou nèf (Ps 51,15). Moun ansyin-an disparèt, sé yon moun nouvo ki la (2 Cor 5,17; Ph 4,23). Fòt lontan nou yo lavé nan san Jézu-Kri (Jer 31,34). Min sé chak jou pou n-ap kontinué travay k-ap réfè nou tou nèf la. Sèké gin bagay ki maré anndan nou ant fòs mal lontan yo ak fòs byin-an ki tou nèf yo (Rom 7,19). Nou gin pou nou batay pou nouvo kondision nou-an kapab ré an fòm, nan batay lanmò Jézu-Kri-a, li minm ki pou kont li, nan jadin pié Oliv yo, l-ap batay avèk Satan, lènmi sa-a ki fi-n déchinnin kont ras lèzòm nan (Lc 22,55.31). "Papa, si kalis sa-a té kapab pasé louin-m" (Lc 22, 51a). Nan yon lòt fason Jézu di minm bagay sa-a nan lévanjil sinkièm dimanch Karèm B-a: "Papa, sovè-m sot nan lè sa-a" (Jn 12, 27a). Sé nòm al pou-l réaji konsa dévan soufrans la. Lèt Ébré yo nou li nan sinkièm dimanch Karèm B-a di konsa: "Li té lapriyé, li té plinn dévan Sila-a ki gin pouvoua sovè-l sot nan lanmò-a" (He 5,7). Min li chanjé taktik. Nan chanté yo té konn chanté lontan-an pou chémin Koua-a: "O sang qu'un Dieu va répandre" yo té konn di: "son cœur veut et ne veut pas... tantôt la crainte est plus forte, tantôt l'amour est plus fort, mais enfin l'amour l'emporte et lui fait choisir la mort". Lèt Ébré yo di: "Li aprann obéyi nan soufrans li pasé" (He 5,8). Jézu di: "Sé pa volonté pa-m ki pou fèt, min sé volonté pa-ou" (Lc 22, 52b). Nan lévanjil sinkièm dimanch Karèm B-a, sé minm bagay li di: "Sé pou sa mouin vini nan lè sa-a" (Jn 12, 27b). "Papa, fè ouè bèlté non-ou" (Jn 12, 280).

Sé obéyisans Pitit la ki fè ouè bèlté Papa-a, antan li aksépté mision k-ap klouré-l sou Koua-a. Sé lanmò sèl Pitit li sa-a ki fè ouè kijan Papa-a rinmin nou vré. Non Papa-a sé Rinmin. Li bay prèv la (Jn 3, 16). Li signin-l ak san pròp Pitit li-a ki Bondié-a. Tout moun-n k-ap obéyi Jézu, li vi-n sèvi yo koz k-ap délivré yo pou tout tan (He 5,9). Obéyi Jézu-Kri, sé sèvi-l. Sèvi-l, sé suiv li pazapa. "Koté-m yé-a, sé la sèvitè-m nan ap yé" (Jn 12,26). Si Jézu-Kri pasé nan soufrans lanmò pou-l antré nan bèlté-l, sé chémin nòm al li trasé pou tout krétyin. Batèm nan fè nou vi-n tounin sèvitè-l. Li plonjé nou nan lanmò-l, li fè nou lèvé vivan nan lavi-l (Rom 6,5). Nou gin pou nou aksépté détou sa-a li oblijé nou fè nan légzistans nou-an. Si yon moun rinmin pròp tèt li, l-ap pèdi-l; si yon moun rayi pròp tèt li sou tè sa-a, l-ap kon-

sèvé-l pou lavi ki pap janm fini-an (Jn 12,25). Pou nou viv égzijans Batèm nou-an, sé pou nou suiv Jézu-Kri nan mèvèy sakré Pak li-a.

Gin sitiason nan lavi nou ki édé nou débarasé nou avèk rès kras péché ori-jinèl la kité pou nou-an. Lè nou mouri nan pansé ak nan kè lèzòm (Sin Louis Marie Grignon de Monfort, Lettre No. 15), nou asosié nan mèvèy sakré soufrans ak lanmò Jézu-Kri, li minm yo réjité sot nan kominoté koté li t-ap viv la. Lè nou infim oubyin nou malad, atèl pouin nou pa kapab fè anyin, sa mété nou nan yon sitiason nou sanblé nou pa itil moun k-ap viv bò koté nou yo, okontrè sé yo minm ki pou ba nou tout kalité sèvis, bagay sa-a lou pou nou kèkfoua, paské nou t-a pi rinmin bay pasé nou résévoua, kè nou t-a pi kontan (Ac 20,35). Gin dé foua gin moun ki indiféran vizavi nou, époutan nou t-ap tann yo fè bon jan avèk nou, san nou pa bézouin mandé yo, sa fè nou santi nou pou kont nou ansanm avèk Jézu-Kri nan batay lanmò-a, lè tout Apot yo t-ap dòmi-an, lè yo té kité-l ap lapriyè pou kont li-a; kon foul la t-ap vi-n arété Jézu, yo minm yo tout yo t-ap sovè kò yo (Mc 14, 32-52). Nan chak sitiason nou, nou jouinn Jézu-Kri Jétsémani-an, k-ap konfié nou sa-k séré kè-l, k-ap di nou ki jan li tou sèl, k-ap réprann kouraj li pou-l poté Koua nou-an jous nan pouint tèt mòn Golgota-a. Min tou nan chak sitiason sa yo, nou détékté réyon limiè-a k-ap travèsé niaj yo pou-l anonsé solèy la apral lévé, bèlté Jézu-Kri k-ap lévé vivan sot nan lanmò-a. Tout lavi nou, nou gin pou nou fè yon sèl ak soufrans Jézu-Kri yo k-ap kondui nou nan bèlté-l la. Sé kondision nou kòm batizé. Sé konsa n-ap viv nouvo kontra-a ki ékri nan kè nou-an. Vré konésans Bondié-a, sé sa Sin Louis Marie Grignon de Montfort di nou, nan Lèt li ékri moun ki rinmin Koua-a, No.26. Li di: "Minm si yon moun pa konn ni li ni ékri, si moun sa-a fè yon sèl avèk mèvèy sakré Jézu-Kri sa-a, moun sa-a gin plis konésans pasé tout pi gran savan yo ansanm.

N-ap mandé Manman Mari favè sa-a pou-l fè nou konnin Granmèt la, li minm ansanm avèk pouvoua sa-a ki fè-l lévé-a, ki kaché anndan fin-fon soufrans li yo (Ph 3, 10).

*

Sinkièm dimanch Karèm B-a, yo té konn rélé-l premié dimanch lapasion; dimanch Ramo-a sé té dézièm dimanch lapasion. Réyèlman vré, apré ti la-frèch nou té jouinn nan savann Karèm nan, koté nou t-ap fè pèlérinaj la, lè nou té fè yon ti pòz bò dlo-a nan katriyèm dimanch Karèm nan, dimanch "laetare"-a, dimanch kè kontan-an, lè nou té fi-n ralé yon ti souf la, nan mi-tan tan pénitans la, sa yo rélé "mi-carême" nan, nou plonjé karéman nan dézièm pati tan pénitans la, ki montré nou soufrans Jézu apral sibi. Lévanjil

sinkièm dimanch Karèm B-a (Jn 12, 20-33) palé nou sou "lè" Jézu-a. "Lè" sa-a, sé "lè" lanmò-l la. Dépi nan nòs Kana, li té di manman-l "lè-l" pa-t ko rivé (Jn 2,4). Nan tout premié pati lévanjil Sin Jan-an, sé tankou "lè-a" k-ap proche ofi-amézi. Nan chapit 12 lévanjil Sin Jan-an ki fini premié pati lévanjil la, Jézu mandé Papa-a pou-l délivré-l anba "lè" sa-a, sa vlé di anba lanmò-a (Jn 12, 27). Sé tankou lè l-ap di nan jadin Jétsémani-an: "Papa, si kalis sa-a té kapab pasé san pou-m pa bouè li, min sé pou volonté-ou fèt" (Mc 14, 36).

Jézu mouri pou-l rasanblé tout pitit Bondié yo vi-n fè yon sèl (Jn 11, 32). Sé pa pou pèp Israèl la sèl li té vini, dapré sa Sin Jan di nou, antan li fè sonjé promès Bondié té fè Sèvitè Granmèt la: "Sa pa kont pou-ou sèvitè-m pou-ou drésé fanmiy Jakòb yo, pou-ou ramné pitit Israèl yo ki té gayé yo; m-ap fè-ou vi-n tounin limiè nasion yo, pou délivrans mouin-an rivé jous nan bout tè-a" (Is 49, 6). Sé pousa Jézu té di nan finisman lévanjil sinkièm dimanch Karèm B-a: "Lè y-a lèvé-m sot sou tè-a, m-ap ralé tout moun vi-n jouinn mouin" (Jn 12, 32). Sé minm mèsaj sa-a li bay Grèk yo an parabòl, lè-l palé osijè grinn blé-a ki tonbé nan tè-a, ki doué mouri pou-l donnin anpil frui-a (Jn 12, 24). Si Jézu bay mèsaj sa-a dévan Grèk yo, sa vlé di sé **tout pèp yo** k-ap antré nan fanmiy Bondié-a, nan ras Abraam nan, nan légliz la. Sé youn nan kat kalité légliz la: **li la pou tout moun**. Nou abitué chanté kat kalité sa yo nan Krédo-a, lè nou di: "Mouin rékonèt gin yon sèl légliz, li sin, **li la pou tout moun**, sé sou Apot yo li bati". Sin Pòl di pa gin kèsion ni Juif ni Grèk, ni ésklav ni moun lib, ni gason ni fi, nan péyi koté Bondié Roua-a. Juif yo té gin difikilté pou aksépté égalité tout nasion yo ansanm avèk yo nan péyi koté Bondié Roua-a, sou pratèks sé yo minm ki té jouinn premié apèl la nan papa yo Abraam (Gn 12). Profèt Izayi fè konnin yon tan ap vini tout nasion yo ap monté sou mòn Siyon-an pou vi-n adoré Granmèt la (Is 2,3). Sé sou mèsaj sa-a minm dayè liv Profèt Izayi-a fini (Is 66, 23): "**Tout moun** ap vini pou yo adoré dévan fas mouin". Pandan Pèp la té nan légzil Babilòn nan, Profèt la té di nan liv Izayi: "**tout moun** ap ouè bèlté Granmèt la" (Is 40, 5). Lè Jézu mouri sou Koua-a, kapitèn nan déklaré: "Réyéلمان vré, sila-a sé té Pitit Bondié" (Mc 15, 39). Sé yon Romin li yé, yon moun ki soti nan pèp payin. Jézu té gin rézon di: lè y-a lèvé-l sou Koua-a, l-ap rédi tou moun ak tout bagay vi-n jouinn li (Jn 12, 32).

Nan premié Léktu sinkièm dimanch Karèm B-a, (Jer 31, 31-34), Bondié di osijè nouvo kontra-a l-ap pasé avèk nou-an: sé **tout moun** k-ap konnin-l dépi pi piti nan yo jous nan pi gran-an (Jer 31, 34). Sèké l-ap mété kontra-l andan kè tout moun. Laloua-a, Profèt yo ak lasajès la, sé toua moman ki séparé istoua pèp Israèl. **Laloua-a** té gadé nan diréksion pasé, antan li té

détayé istoua zansèt pèp la, kijan Bondié té palé ak li antan-l chouazi Abraam, antan-l bay Moyiz kòmandman-l, antan-l fè pèp la antré nan tè li té promèt la. **Profèt yo** minm té gadé nan diréksion sa k-ap vini apré, antan yo té mandé pèp la chanjé santiman pou malè lontan yo pa tonbé sou yo ankò. Min lasajès la, li minm gadé nan diréksion tan prézan-an, antan-l fè ouè sé TOUT MOUN, nan ninpòt ki péyi li yé, ki kapab antré nan rélation avèk Bondié dépi kouliè-a, minm si li pa soti nan ras Abraam, minm si li pa konn Moyiz, minm si li pa nan péyi koté pèp Israèl la instalé-a. Sé konsa liv sajès yo té palé ak tout nasion sou tè-a. Nan katriyèm Kantik Sèvitè Granmèt la (Is 53, 1-12 = premié Léktu Vandrédi Sin), nou ouè kijan sé **tout moun** ki té pèdi chémin, sé **chak moun** ki té fè chémin pa-l, épi Granmèt la fè péché **tout moun** tonbé sou Sèvitè-l la (Is 53,6). Sèvitè sa-a poté péché **tout pakèt moun yo** (Is 53, 12) tankou mouton Bondié-a ki poté péché tè-a. Sé Koua-a li poté sou do-l konsa. Sé péché-a ki té séparé moun yo, ki té divizé yo, ki té fè ras pa vlé ouè ras. Koua Jézu-a rasanblé tout moun fè yon sèl. Sé mèvèy sakré sajès Bondié. Sajès la sé nan Koua-a li réalizé. Plis vandrédi Sin ap proché, sé plis nou gin pou fiksé jé nou sou dimansion sa-a: "mouin rékonèt gin yon sèl légliz, li sin, **li la pou tout moun**, sé sou Apot yo li bati".

Kòmansman lévanjil sinkièm dimanch Karèm B-a, di nou: "Té gin kèk PAYIN nan moun ki té monté pou yo adoré nan jou fèt la" (Jn 12, 20). Payin sa yo, sé yo minm yo rélé "Grèk" yo, sa vlé di tout moun ki pa Juif. Nou ouè bòn volonté yo ginyin, paské yo monté Jérusalèm yo minm tou pou yo fè pèlerinaj, pou yo adoré vré Bondié-a, minm si yo pa nan ras Abraam nan. Sèké nan péyi koté yo soti-a, gin Juif la tou, sé nan bouch Juif sa yo, yo tandé palé osijè Bondié pèp Israèl la kòm vré Bondié-a. Yo assosyé yo nan pèp la, minm si yo gin kondision spésial moun yo rélé "prosélytes" yo, sa vlé di moun ki konvèti, min ki pa gin tout doua Juif yo ginyin kòm pitit Abraam. Gin koté nan Tanp la yo pa gin doua antré. Sé yo minm nan ki vin kot Filip pou yo mandé-l ouè Jézu. Démach yo-a fè nou sonjé sa Sin Pòl té konstaté nan lavil Atèn, lè-l té rémaké yon Tanp yo té drésé pou Dié yo pa konnin-an (Ac 17, 23). Sa montré gin anpil bòn volonté nan anpil moun k-ap chèché Bondié nan chémin yo konprann ki bon, min ki pa trasé douat, ki pa balizé. Sé dévoua nou pou nou patajé sa nou ginyin-an ak yo. Sé pa nan méprizé yo, nan jouré yo, nan ignoré yo, n-ap réglé anyin pou yo (cf Ad gentes, Gaudium et Spes). Sin Pòl té di madichon pou li si-l pa préché Bòn Nouvel la (1 Co 9, 16). Nan lévanjil sinkièm dimanch Karèm B-a, nou konstaté Filip al kot André, pou yo tou lé dé al fè démach kot Jézu. Jézu di nou lè dé ou toua moun mété ansanm pou yo mandé-l kichòy, l-ap ba yo li

(Mt 18, 19s; cf Jn 11, 28). Sé pou rézon sa-a nou doué lapriyè ansanm, pou tout pèp yo antré nan chémin Granmèt la, pou limiè Jézu-a rivé binyin tout moun nan tout nasion, sou tout tè-a, pou malgré diférans nou, nou rivé sèvi minm Bondié-a.

Gin anpil moun k-ap viv nan péché. Sikonstans lavi-a maré yo nan chinn. Dévan sosisété-a yo yon ti jan antravé. Yo pa kapab défèt chinn yo fasil. Sé Bondié sèl ki kapab fè li nan fon konsians yo. Sé li minm ki ouè ki chémin yo fè pou yo vi-n jouinn li nan fon kè yo, minm si yo pa kapab rantré nan rékonsiliation avèk légliz sou pa déyò. Nou pa poté okinn jijman sou yo ki pou kondané yo. Sé pou nou sonjé tan lapasion-an invité nou lapriyè yon fason spésial, pou Bondié li minm minm kasé chinn sa yo pèsòn pa kapab défèt la. N-ap sonjé Jézu di Bon Gadyin-an kité katrévindisnèf mouton yo pou-l al chèché sa-k té pèdi-a nan rajé-a ak nan pikan yo; lè-l jouinn li, li poté-l sou do-l, minm jan li poté Koua-a sou do-l la (Lc 15, 4-7; Ez 34, 4.16; Is 40,11). Gin anpil moun ki pa nan minm rélijion avèk nou. Gin dé foua minm yo konsidéré nou kòm lènmi nan paròl yo. Sé pa yon rézon pou nou klasé yo nan pami moun ki dané yo (cf Unitatis redintegratio). Sou Koua-a, Jézu té di: "Papa, padonnin yo, paské yo pa konnin sa y-ap fè" (Lc 23, 34; cf Ac 7, 59). Tan lapasion-an mandé nou pou nou lapriyè yon fason spésial pou yo. Nan priyè Vandrédi-Sin-an légliz insisté anpil sou sa, pou nou tout vi-n fè yon sèl nan légliz Jézu-Kri-a.

Dézièm Léktu sinkièm dimanch Karèm B-a (He 5, 7-9) fini antan-l di nou Jézu vi-n tounin kòz délivrans tout tan-an pou **tout moun** k-ap obéyi-l (He 5,9). Li Prèt an chèf nan ran Mèlkisédèk, sa vlé di anlè Abraam, pou tout pèp, tout nasion, tout ras, tout moun.

N-ap mandé Manman Mari, Manman légliz, Manman tout pèp, pou-l aprann nou ouè Jézu nan tout moun. Payin yo té di Filip: "Mèt, **nou vlé ouè Jézu**" (Jn 12, 21). Nou gin doua mandé la Trè Sint Vièj Mari minm sa payin yo té mandé Filip la: "Manman, nou vlé ouè Jézu". Filip té di Jézu nou vlé ouè Papa-a (Jn 14, 8). Jézu té réponn li moun ki ouè-l, li ouè Papa-a (Jn 14, 9). Si nou minm nou vlé ouè Jézu, nou gin doua pansé moun ki ouè prochin-l ak bon jé, li ouè Jézu (cf Tit 1, 15; Mt 5, 8), paské Jézu di tou sa nou fè pou youn na pi piti yo, sé pou li minm pèsònèlman nou fè-l (Mt 25, 40). Mouin kouè nan yon sèl légliz, li sin, **li la pou tout moun**, sé sou Apot yo li bati.

*

* *

SINKIÈM DIMANCH KARÈM C

Prémié mouvman: Jézu pa réponn, li bésé ap ékri ak douèt li sou sab la (Jn 8,6). Dézièm mouvman: Moun ki san péché-a, sé li-k pou voyé prémié kout ròch la. Li bésé l-ap ékri toujou (Jn 8,7-8). Touazièm mouvman: Pèsòn pa kondané-ou. Mouin minm non plis tou. Alé, pa fè péché ankò (Jn 8,10-11). Sa Jézu t-ap ékri konsa? Gin moun ki konprann sé péché lòt moun yo li t-ap ékri. Yo pansé lè moun yo panché sou do-l, yo ouè péché yo ékri atè-a, yo pati, sa-k té pi granmoun yo té gin plis péché, yo pati pi vit. Gin dòt moun ki di li t-ap ékri konsa atè-a, san-l pa gin anyin dirèk pou-l ékri, sé yon fason pou-l pa gadé madanm nan nan jé. Min réyéلمان vré, ki sa Jézu t-ap ékri konsa-a, ki fè lè yo ouè-l, yo pati youn apré lòt, kòmansé sou sa-k té pi gran moun yo? Probabléman Jézu pa-t ékri péché yo. Sé pa abitud li .Sèl fous nou ouè-l ap ékri, sé pa péché ki t-a anba douèt li. Okontrè, li doué t-ap ékri kèk pasaj labib pou montré tout koté Bondié palé sou kè sansib, sou ki fason li toujou prèt pou-l padonnin. Li doué t-ap bay sans lansyin Téstaman-an. Moun ki san péché-a pou-l jété prémié kout ròch la. Tout moun pati. Jézu rété pou kont li. Li minm ki té di nan Sin Jan 8,46: "Kilès nan nou ki kapab prouvé-m mouin gin péché?" Si Jézu ki san péché pa kondané, pa voyé prémié kout ròch la, pèsòn pa kab bay kout ròch la. Sin Pòl di: "Kilès ki kapab akizé sila yo Bondié chouazi-a?" (Rom 8,33). Bondié fè Pitit li-a vi-n tounin péché pou nou (2 Co 5,21). Sé pou sa li pa voyé prémié kout ròch la. Sé péché-a li vlé détrui, Sé pa moun ki gin péché-a. Nan Ézékièl li di: Sé pa moun ki gin péché-a Bondié vlé fè mouri, li pa pran plézi nan bagay konsa, li vlé pou moun sa-a chanjé konduit pou-l viv (Ez 18,32), pou-l gin yon kè nouvo ak yon léspri nouvo (Ez 18,31). Minm kè nouvo ak léspri nouvo sa-a, sé Bondié minm k-ap bay li (Ez 36,26).

David té fè péché adiltè avèk madanm Uri-a, sa yo Bétsabé-a (2 Sam 11,12). Yo pa-t kalonnin madanm nan ak kout ròch ni David non plis tou. Bondié té bay David tan pou-l régrèt péché-l, jous li kriyé, jous li konpozé bèl Psòm 51-an, sa yo chanté souvan pandan Karèm nan. Pitit ki té fèt nan adiltè-a mouri. Min Bétsabé vi-n fè yon lòt pitit ankò pou David, lè mari-l, Uri, fi-n mouri-a: Sé Salomon. Bondié rinmin-l, Bondié té déjà padonnin (2 Sam 12,24). Jézu doué ékri tout bagay sa yo ak douèt li sou sab la. Moun ki té gin plis laj yo, sé yo minm ki té konprann pi vit, paské yo té pi abitudé ak pasaj labib yo. Yo té vi-n ouè klè. Épi Jénèz 38 ki montré adiltè Tamar fè ak pròp bò-pè-l Juda. Sak pi rèd la, sèk Juda té marié prémié pitit gason-l nan avèk Tamar. Min ti gason-an té mouri san-l pa kite désandans. Dapré laloua-a, dézièm pitit gason-an doué marié avèk vèv la, min pitit la k-ap fèt la, yo

doué konsidéré-l kòm pitit fré ki mouri-a. Kòm dézièm frè-a konnin pitit la pap pou li, li triché nan rélasyon-an. Yo té rélé-l Onan. Bondié pini-l li vi-n mouri li min tou. Lè Juda ouè dé pitit gason-l yo mouri, li voyé Tamar, bèl-fi-l la, al fè rout li lakay li. Li di-l konsa: "Lè lòt dènié pitit gason-m nan ap vi-n gin laj pou-l marié, m-a rézévé-l pou ou", dapré sa laloua-a mandé-a. Min lè pitit gason-an vi-n gin laj pou-l marié, Juda pa rézévé-l pou Tamar, jan laloua-a té prévoua sa (Dt 25, 5; cf Mc 12,19). Li té di nan kè-l: "mouin pè pou-l pa mouri minm jan ak dé premié yo". Li bay yon lòt madanm li. Tamar aprann sa, l-al posté kò-l yon koté li té konnin Juda, bò-pè-l la, t-apral pasé. Lè Juda vi-n ap pasé, Tamar vlopé kò-l yon jan pou Juda pa rékonèt li, li kozé ak Juda yon fason ki pou invité-l nan mové rélasyon. Juda aksépté. Tamar vi-n ansint pou pròp bò-pè-l. Sèlman Tamar té pran yon garanti nan min Juda: sé so Juda-a, sa-l té konn sèvi pou tanpé mouton yo, avèk baton-l nan tou. Juda té di-l li t-a voyé péyé-l. Lè Juda voyé péyé-l, pou-l rémèt li so-a avèk baton-an, yo pa ouè madanm nan. Li té pati yon lòt koté. Kèk moua apré, yo voyé di Juda: "Min bèl-fi-ou la ansint. Yo pa konn pou ki moun". Juda voyé di: "Fè-l soti sou laplas la dévan tout moun; boulé-l tou vivan, pou kalité gro krim sa-a li fè-a, li fè adilté". Min Juda pa-t konn sa-k t-ap tann li. Tamar pran so-a avèk baton-an, li di konsa: "Moun nan ki voyé di nou pou yo boulé-m tou vif la, n-a lonjé so sa-a avèk baton sa-a ba li". Lè yo poté so-a avèk baton-an bay Juda, Juda di: "Ébyin li pi jis pasé-m. Li pran-m nan pièj san-m pa konnin; mouin té réfizé-l dènié pitit mouin-an, li jouinn yon fason kan minm pou-l té kapab gin yon pitit ki sot nan fanmiy nan. Bliyé sa". Lè lè Tamar rivé pou-l fè pitit la, sé dé jimo: Farès ak Zara. Non yo nan lis ras Jézu-Kri-a, dapré Matié 1,3, ni non Tamar tou. Konsa tou non madanm Uri-a nan lis ras Jézu-Kri-a kòm manman Salomon (Mt 1,6b). Tout bagay sa yo, Jézu té kapab ékri yo atè-a. Sa-k pi granmoun yo té ouè pi vit. Yo té kouri.

Jézu ékri atè-a, an-atandan li ékri nan kè yo laloua nouvo-a (Jer 31,33). Nou pa gin doua jijé pou yo pa jijé nou ak minm mézi n-ap méziré pou lòt yo (Mt 7,1-5). Anvan yon moun jijé, sa vlé di kondané, sé pou-l sètèn sou pròp konsians pa-l. Nou tankou bèt chaj sa-a yo rélé chamo-a ki gin yon boul nan dol, li pa ouè, sé pa lòt yo li ouè. Nou gin yon abitud ap di, kité-m ouété ti pay la ki nan jé-ou la, épi gro bout boua ki nan jé pa nou-an, nou pa ouè-l (Mt 7,3). Péché lòt moun yo nan boutèy blan, pa nou yo nan boutèy noua. Tout moun gin yon grinn zanno kay òfèv.

Mòd jan pou té touyé moun nan ak kout ròch la, sé pa voyé yon premié kout ròch konsa, sé kouché moun nan atè-a, yon moun kinbé min-l yon lòt kinbé pié-l pou-l pa lévé. Épi témouin-an ki akizé-l la pran yon gro ròch ki

lou anpil tankou yon poua-sinkant, li lagé-l sou léstomak li pou fè vant li éklaté, pou kè-l koupé. Sètènman sé moun sa-a ki poté responsabilité lanmò-a, apré sa, lòt moun yo vini, yo bay lòt kout ròch yo. Min sé premié moun nan ki poté lanmò-a sou konsians li (Dt 17,7). Chak moun blijé réfléchi anvan yo fè sa. Épi, tou chak moun fouyé konsians pa-l, dapré sa Jézu doué té ékri tou atè-a. Li invité yo fè yon égzamin konsians sou éta pròp kè pa yo. Yo gin yon mòd konprann péché yo pa ouè, sé pa grav. Yo jouinn madanm nan ap fè adiltè, sé yon péché piblik, dévan sosiété-a; min sa-k fèt an kachèt la, Bondié ouè-l. Kay koulé tronpé solèy, li pa tronpé lapli. Époutan Bondié pa kalonnin pèsòn, tout moun sa yo ki té vi-n akizé madanm nan, ap pran pòz lébon-apot yo, yo doué gin kichòy tou pou réproché konsians yo; min sa pa-t rivé nan lari. Jézu fè jijman Danièl té fè pou sovè Siza-n sot nan min mové jij yo (Dn 13).

Jézu konnin tout ti rézon ki fè pòv madanm nan doué rivé nan éta sa-a. Li pap fouyé-l, ap mandé-l yon pakèt kòz. Li ouè nan fon kè-l. Li déjà padonnin-l. Sa sèlman li bézouin, sé pou madanm nan pran rézolisyon pou-l pa rékòmansé. Jézu pa vlé fè-l ront. Li pran défans li jan-l té fè pou madanm ki té nan péché-a ki té vi-n kriyé nan piè-l la (Lc 7,35-50). Li padonnin jan-l té padonnin moun ki pa-t kapab maché-a, sa-l té géri bò basin dlo mouton yo nan Jan 5,14. Li louvri kè-l pou li jan l-ap fè pou-l bay asasin-an ki té klouré avèk li-a asirans l-ap sovè nan Luk 23,43. Konsa sa Lévitik 20,10 té prévoua-a avèk Détéronòm 22,22-24 la, Jézu vini pou-l **dépasé** yo. Nan sans sa-a li di: si jistis nou pa **dépasé** pa profèsè yo ak Farizyin yo, nou pap antré nan Rign sièl la (Mt 5,20). Yon sièl nouvo, yon tè nouvo, yon kòmandman nouvo, yon kè nouvo, yon léspri nouvo, yon laloua nouvo (Ap 21,1; Jer 31,31ss; Ez 36,26; 11,19 Ex 34,4). Tout bagay nouvo, sé sans Pak. Pak nouvo (1 Co 5,7). Sé konsa premié léktu sinkièm dimanch Karèm C-a di nou: "Pa sonjé premié bagay yo, pa égzaminé bagay lontan yo; min mouin fè bagay nouvo" (Is 43,18-19). Sin Pòl minm di nou nan dézièm léktu-a: "Mouin bliyé sa-k dèyè, sé sa-k dévan m-ap rapousuiv (Ph 3,13).

Pèp Israèl la minm, Bondié réprézanté-l tankou yon madanm ki adiltè (Os 1-3; Jer 3,1-4,4; Ez 16; Is 1,21). Bondié réprann li (Is 54,1-10). Pèp la ap tounin sot nan égzil Babilòn (premié léktu, ak Psòm-répons). Tounin vi-n jouinn Bondié, sé konvèsion, chanjé konduit; sé sa madanm ki té nan adiltè-a fè, dapré invitation Jézu fè-l (Jn 8,11; cf Jn 5,14). Tan Karèm nan sé yon tan pou moun chanjé konduit, viré do bay péché, tounin vi-n jouinn Granmèt la, konsidéré tout bagay kòm dézavantaj, tankou fatra (Ph 3,8) dévan konésans Jézu-Kri-a (dézièm léktu). Nan vèsè anvan lévanjil la Granmèt la insisté koté nou antan-l di nou: "tounin koté-m ak tout kè nou, paské mouin

bon, mouin gin kè sansib". N-ap mandé Manman Mari pou nou bliyé tou sa-k fi-n pasé, pou nou konsidéyé atirans kè sansib Jézu k-ap rédi nou tankou yon léman, gras a fòs léspri Sin-an, pou nou vi-n jouinn li, pou nou lagé chaj nou sou li, pou-l soulajé nou (Ps 55,23; 37,5; 1 p. 5,7; Mt 11,28-30).

"Moun ki san péché-a, sé li minm ki pou lagé premié ròch la" (Jn 8,7). Jézu té di Juif yo: "Kilès ki kapab ban-m prèv mouin fè péché?" (Jn 8,46). Li minm ki inosan, li péyé pou koupab (Is 53,4), atèl pouin Sin Pòl kapab di: "Si Bondié pou nou, kilès ki kapab kont nou? Sé li minm ki déjà fi-n rann nou kòrèk, kilès ki kapab kondané nou?" (cf R 8,31-34). Péché lòt moun yo nan boutèy blan, péché pa nou nan boutèy noua. N-ap chèché ouété ti pay nan jé lòt yo, pandan gro bout boua-a nan jé pa nou (Mt 7,1-7). Jézu pa fè prosè pou di kilès ki gin rézon, kilès ki gin tò nan dé kan yo. Li ranvouayé tout moun, antan-l invité yo fouyé konsians yo. Karèm nan sé yon tan pou antré anndan fon kè nou, pou nou débarasé-l ak tou sa-k jinnin bon rélasyon ant Bondié ak nou, ant prochin-an ak nou, ant nou minm ak nou. Si travay sa-a pa fèt, sé pa Bondié ankò n-ap chèché tronpé, sé pa lòt moun sèlman n-ap chèché tronpé, sé pròp tèt nou n-ap chèché tronpé. Dé jij yo nan vil Babilòn nan, kè yo té tankou anndan kavò. Épi sé yo minm ki t-ap réglé kòz tout moun pou désidé sa-k gin rézon ak sa-k gin tò (Dn 13). Yo déjà tou avèg, yo vlé kondui lòt moun nan limiè (Lc 6,39). Tan Karèm nan invité nou amélioré rélasyon nou ak Bondié, ak lòt moun yo, ak pròp tèt nou: ak Bondié nan lapriyé, ak lòt moun yo nan charité, ak pròp tèt nou nan pénitans. Pénitans la, sé régrèt fot nou, sé chanjé mantalité, sé kité mové chémin-an, pou vi-n pran bon direksion. Si balans la dérèglé, kòman pou-l fè pézé danré-a kòrèk (Lv 19,36; Pr 11,1; 20,23; Ez 45,10; Os 12,8; Am 8,5; Si 6,11). Nou pa kapab égzijé jistis pou lòt yo, lè nou pa an règ ak pròp tèt pa nou. Si chak moun pran yon ti tan pou balé dévan pòt kay li chak matin, nan yon ka-dè-tan tout lavil la ap fi-n pròp chak jou. Min sé sou do lòt moun yo nou lagé tout chaj la.

Chak foua lamès ap kòmansé, nou di: "Sé fot mouin, sé fot mouin, sé fot mouin vré". Sé kòmsi nou fè tankou Moyiz ki ouété sapat nan pié-l, anvan-l maché sou tè sakré-a, koté Bondié parèt sou fòm difé k-ap boulé-a (Ex 3,5). Sé kòmsi nou fè tankou Profèt Éli ki pozé yon voual sou figi-l, lè-l tandé Bondié ap proche nan briz van-an (1 R 19,13). Sé kòmsi nou fè tankou Profèt Izayi, ki rékonèt li pa mérité pou-l kanpé dévan fas Bondié nan Tanp la, épi Bondié pròpté-l antan-l fè pasé yon chabon difé sou bouch li (Is 6,1-8). Jézu di nou: "Pa jijé pou yo pa jijé nou. Ak minm mézi n-ap jijé-a, sé avèk li tou y-ap jijé nou" (Mt 7,1). Sin Jak di nou jijman-an ap san pitié pou moun ki san pitié (Jc 2,13). Min kè sansib la ap pasé jijman-an nan rizib (ib). Si

Bondié fi-n rann nou kòrèk, kilès ki kapab kòndané nou? Nan mézi yon moun fè kè-l sansib pou lòt yo, li pa bézouin nan kè soté, lè-l tandé kozé jijman-an. Charité-a éfasé kantité fot yo (1 p. 4,8). Sé sou lacharité Bondié ap jijé nou (Mt 25,31-46; R 13,8-10). Charité-a sé pa sèlman ni nésèsèman lagé yon ti lajan nan min yon pòv. Réspékté répitasyon moun, sé charité (Jc 4,11). Sa Farizyin yo té bézouin mét madanm nan nan lari, pou fè tout moun konnin nan ki mové kondision li t-ap viv? Sa sé manké charité. Jé ouè, bouch pé. Sa-k té mété yo kòm jij? Pòv malérèz la gin féblès li. Ki moun ki konnin sa-k pasé nan lavi-l, ki fè-l rivé jous la? Sé pa aksion-an pou yo konsidé. Sé tout chémin ki débouché sou aksion-an pou yo égzaminé. Sa-k kaché pou lézòm, li klè pou Bondié (cf 1 Co 4,5). Sé poussa Jézu di madanm nan li pa kondané-l. Sa pou yo t-a kondané yo, tras yo pa parèt. Jézu pa vi-n jijé tè-a, li vi-n pou-l sové-l (Jn 3,17). Li mouri pou li. Sé pa pou nou fè kòm si lanmò-l la pa gin valè. Tan Karèm nan apral rivé nan bouch Pak, antan-l pasé nan tan lapasion. Li lè pou nou fini ak mantalité Farizyin sa-a, pou nou kité léspri-Sin-an chanjé kè nou.

Nan dézièm léktu sinkièm dimanch Karèm C-a, Sin Pòl palé nou osijè jistis sa-a ki sot nan Bondié-a, ki pa soti nan nou minm (Ph 3,8-14). Li di sé nan Jézu-Kri Bondié ap rékonèt li kòrèk, ap rann li jistis (Ph 3,9). Li pa pran yon lo-n pou-l ap méziré sa-l fè ki bon (Jb 31,6). Li pa okipé sa-k fi-n pasé. Sé dévan l-ap gadé, nan diréksion dènié bout chimin-an koté li gin pou-l rivé-a (Ph 3,13s). Sou prètèks jistis, Farizyin yo ap fè injistis. Séké minm kèsion yo vi-n pozé Jézu-a, sé yon pièj li yé. Sé pa lavérité yo vi-n chèché nan min Jézu. Sé déklarasyon-l yo bézouin pou yo fè tipotaj sou kont li. Rélation ipokrit pa kapab sèvi pou mété lòd nan kominoté. Lapè chita sou lavérité, minm jan li chita sou jistis, minm jan li chita sou charité, minm jan li chita sou libèté (Pacem in terris 37). "L'ordre propre aux communautés humaines est d'essence morale. En effet, c'est un ordre qui a pour base la vérité, qui se réalise dans la justice, qui demande à être vivifié par l'amour et qui trouve dans la liberté un équilibre sans cesse rétabli et toujours plus humain" (Pacem in terris 37; cf 35).

Jézu vlé fè nou konnin sé pa lanmò moun ki nan péché-a li vlé, sa-k inté-résé-l, sé pou moun nan chanjé fason l-ap viv (Ez 33,11; 18,23; Sg 11,26; Lc 15,7). Pou sa, Jézu pa dakò pou krazé libèté moun nan. Sé pa antan yo pran madanm nan, yo kalonnin-l ak kout ròch, y-ap chanjé santiman-l. Sou tan roua Jozias, té gin yon chanjman politik ki té vi-n rivé, apré yo té fi-n jouinn liv Détéronòm nan nan dépo Tanp la (2 R 22-23). Roua-a té fè chanjman politik la, apati chanjman ki té rivé nan rélijion-an. Sèlman moun yo té mal konprann sa liv Détéronòm nan té mandé-a. Séké non sèlman yo té démoli

tout souch maji ki té nan péyi-a, yo touyé moun ki té réponsab koté yo té konn fè maji yo (2 R 23,4-20). Yo té konprann sé konsa yo té kapab jouinn lapè, lòd ak trankilité. Profèt Jérémi lévé pou éspliké yo sé pa sa Bondié mandé. Sé kè yo pou yo chanjé (Jr 31,33; cf 4,4 Dt 10,16). Okontrè minm sé Bondié k-ap ba yo yon lòt kè. Roua Joziás té vlé apuiyé sou Profèt Jérémi pou réglé afè-l. Jérémi fonn nan min-l tankou zangi. Li té ouè plas li pa nan lapolis. Sé Paròl Bondié li té gin pou-l préché, pou-l fè moun yo chanjé kòmpòtman. Li pa voyé touyé moun, ni krazé kay, ni mét difé okinn koté. Bondié pa mété nou kòm jij lòt moun. Li mandé nou chanjé fon kè nou, pou nou sèvi-l kòm instriman pou chanjman kominoté-a.

Sé Bondié k-ap fè tè-a vi-n tou nèf, jan-l anonse nan premié léktu sinkièm dimanch Karèm C-a pa lintèmediè lékòl Profèt Izayi-a (Is 43,19). Pou tè nouvo sa-a rivé fò kè nouvo-a rivé anvan. N-ap mandé Manman Mari pou-l chanjé santiman pitit li yo, ki mal konprann dévoua jistis yo, ki trò cho pou yo kondané lòt moun, san yo pa foyé pròp konsians pa yo.

Sa fè toua dimanch, légliz la ap prezanté nou Amou Bondié ki tankou yon mèt jadin k-ap pran pasians ak plant ki pa vlé donnin-an (touazièm dimanch Karèm C: Lc 13,1-9), tankou yon papa ki gin kè sansib pou pitit li ki té pati kité-l épi ki tounin (katriyèm dimanch Karèm C: Lc 15,1-32), tankou yon avoka ki fè sa-l kapab pou-l plédé kòz koupab la li pa vlé yo kondané-a (sinkièm dimanch Karèm C: Jn 8,1-11). Sé kòm si sé sou sa minm tan Karèm nan vlé insisté ki fè li rézèvé toua dimanch sa yo pou-l palé nou sou sa, sitou nan ané C-a, ané Sin Luk la, ki gin sansibilité kòm mak spésial ki pèmèt distingé-l nan pami lòt Évanjilis yo. Karèm nan sé tan jèn, lacharité ak lapriyé, dapré sa nou konstaté dépi mèkredi sann nan ki té louvri Karèm nan (Mt 6,1-18). Jèn nan pròpté rélasyon nou ginyin parapò a pròp tèt nou; lacharité-a pròpté rélasyon nou ginyin ak frè nou yo; lapriyé-a pròpté rélasyon nou ginyin ak Bondié. Nan premié dimanch Karèm C-a, yo té palé nou sou jèn nan antan yo prezanté nou Jézu nan dézè-a k-ap fè jèn pandan karant jou (Lc 4,1-13). Nan dézièm dimanch Karèm C-a, yo té ba nou léson sou lapriyé, antan yo montré nou Jézu ki monté sou mòn Tabò-a pou-l lapriyé joutan li chanjé fas (Lc 9,28-36). Apati touazièm dimanch Karèm C-a, yo kòmansé bay lanségman sou lacharité-a, antan yo fè nou li paròl mèt jadin-an ki pran pasians avèk pié fig frans la ki pa-t vlé donnin dépi touazan-an (Lc 13,1-9). Yo kontinuyé lanségman sou lacharité-a toujou nan katriyèm dimanch la, antan yo fè nou tandé parabòl ti pitit la ki té pati kité papa-l la épi ki tounin-an, papa-l anbrasé-l, li padonnin-l (Lc 15,1-32). Sé minm lanségman sou lacharité-a toujou yo prolonyé nan sinkièm dimanch Karèm C-a, antan yo fè nou kouté lévanjil madanm nan ki té fè péché adilté-a (Jn 8,111).

Konsa, apré premié dimanch Karèm nan ki palé sou jèn nan, épi dézièm dimanch Karèm nan ki palé sou lapriyè-a, sé kèsion lacharité-a ki kinbé antansion nou dépi touazièm dimanch la, travèsé nan katriyèm dimanch la, jous rivé nan sinkièm dimanch la. Apré sa, sé lapasion ki kòmansé dépi dimanch Ramo-a. Si Jézu soufri-mouri, dapré Istoua lapasion n-ap tandé nan dimanch Ramo-a (Lc 22,14-23,56), sé paské li rinmin nou. Jézu ap frapé nan pòt kè nou, tankou li di nan liv Apokalips la (Ap 3,20): "Min-m nan papòt la, m-ap frapé, moun ki louvri ban mouin, m-ap antré lakay li, m-ap chita an fas li, m-ap manjé avèk li". Sé sa Jézu té fè kay Zaché, koléktè Jériko-a (Lc 19,9-13). Sé sa-l té fè, lè-l té kite madanm nan ki t-ap viv nan péché-a karésé pié-l, antan-l té atab kay Simon Farizyin-an (Lc 7,36-50). Sé sa-l té fè kay Matié, koléktè Kafanaòm nan (Mt 9,9-13). Jézu pa vini pou moun ki konprann yo an santé. Li vini pou moun ki bezouin dòktè, ki rékonèt yo malad. Lè nou vi-n konfésé, nou déklaré péché nou ki vré maladi-a. Jézu padonnin nou, li géri nou.

Té gin yon madanm ki rélé Paéza, li té viv nan libètinaj. Yo poté plint pou li bay yon Pè ki t-ap viv nan dézè, ki t-ap fè anpil pénitans. Pè-a al jouinn madanm nan, li fè-l éplikasion. Madanm nan di-l konsa: apré tout péché sa yo li fi-n fè-a, pa gin pénitans ankò pou li. Pè-a di-l suiv li. Li suiv Pè-a, minm lè-a, san-l pa di pèsòn lakay li anyin, san-l pa mét lòd nan okinn afè-l. Lè Pè-a rivé nan dézè-a, solèy té fi-n kouché. Li rasanblé yon ti pil sab. Li fè yon koua sou li, li fè-l sèvi tankou zòrié; li di madanm nan: "Kouché la". Li minm minm, l-al kouché pi louin. Vè minuit li révéyé, li ouè tankou yon réyon lali-n k-ap désann sou Paéza. Li lévé li proché kot Paéza, li souké-l ak pié-l. Li ouè Paéza gin tan mouri. Yon voua sot nan sièl la, li di-l konsa: "Pénitans madanm sa-a fè pandan u-n-è-d-tan-an, sa fè-m plis plézi pasé pénitans dèt moun ap fè pandan plizie ané". Sé minm bagay asasin sa-a yo té klouré sou koua-a avèk Jézu-a (Lc 23,39-43). Apèn li di Jézu konsa: "Sonjé-m, lè ou-a rivé nan péyi koté ou Roua-a!", Jézu gin tan réponn li: "Jodi-a minm ou-ap avèk mouin nan Paradi-a". Yo gin abitud yo di konsa: "jistis Bondié sé kabouèt bèf; l-ap maché kouta-kouta; l-ap véyé nan kalfou pou-l tiré vanjans sou ou kan minm". Sa-a sé paròl lèzòm, sé pa sa Jézu té dévoualé nou. Jézu vi-n montré kijan Papa-l sé Rinmin, sé kè sansib, li gin pasians (1 Jn 4,8; Ps 103,8; 145,8; 86,15; Ex 34,6; 33,19). Épi sé nan pròp Pitit li-a minm li padonnin fot nou yo, antan li sakrifé-l pou nou sou koua-a (R 8,32; Gn 22,13; Jn 3,16). Sin-t-Ambroise di konsa: "L'eau et les larmes ne manquent pas à l'Église: l'eau du Baptême, les larmes de la Pénitence" (Lettre 41,12; PL 16; 1116; cf la Réconciliation et la Pénitence dans la mission de l'Église, lineamenta, Vatican 1982, n.37, p.45). Sé minm Sin-t Am-

broise toujou ki di: "Bondié kréyé moun nan pou-l kapab jouinn dékoua padonnin, paské li sé kè sansib, li sé padon". Li di: "Il créa le ciel, mais je ne lis pas qu'il se soit reposé; il créa le soleil, la lune et les étoiles, mais là non plus, je ne lis pas qu'il se soit reposé; je lis au contraire qu'il créa l'homme, et alors il sé reposa, trouvant en l'homme quelqu'un à qui il puisse pardonner les péchés" (Hexameron 6,76: Pl XIV,272; cf ib n. 30, p. 38-39). Bondié répozé apré li fi-n kréyé moun nan sou sétièm jou-a, min li pi répozé apré li fi-n padonnin moun nan nan San pròp Pitit li Jézu-Kri. Sé poua lè Jézu fèk kòmansé préché, li déklaré ané "Saba" spésial la, nan Luk 4,18-19; li di: "Éspri Granmèt la sou mouin paské li konsakré-m pou-m poté Bòn Nouvèl la bay pòv yo; li voyé-m anonsé prizonié yo yo lib, avèg yo yo ouè, ranvouyé moun k-ap pasé mati yo an libèté, déklaré yon ané koté Granmèt la fè gràs (cf Is 61,1ss). Sa vlé di yon ané spésial, koté tout moun ki té gin lajan yo prété yon lòt, yo té doué fè-l kado dèt la, koté tout jadin té rét san travay, koté tout ésklav té jouinn libèté pou tounin lakay yo. Profèt la di nan Izayi (Is 40,1ss): "Konsolé, konsolé, pèp mouin, sé Granmèt la ki di sa palé ak kè Jérusalèm, déklaré byin fò ba li paské sèvis li-a fi-n réalizé, fòt li-a fi-n péyé, li fi-n résévoua kont pinision nan min Granmèt la". Ané saba spésial la, yo té rélé-l jibilé, paské yo té konn sonnin tronpèt spésial pou déklaré ané-a louvri, tronpèt la, nan langaj ébré, yo rélé-l "Yobèl", sé la mò "jubilé"-a soti. Trompèt la kléronnin dépi lè Jézu té di: "Tout bagay fi-n bout" (Jn 19, 30). Souf Jézu koupé, pou nou minm nou kapab ralé yon souf. Bondié répozé apré li fi-n kréyé moun, paské li jouinn créatu pou-l padonnin. Lè Bondié pa jouinn moun pou-l padonnin, li pa alèz. Sé pou nou manyè ba-l yon chans pou-l alèz; sé pou nou rékonèt nou sé péchè, l-ap padonnin nou, l-ap répozé nan kè nou; otréman l-ap san souf, li pap kapab répozé, toutotan nou pa rékonèt nou sé péchè.

Rékonsiliation-pénitans: sé rékonésans dèt péché nou, pou Granmèt la éfasé yo pou nou. N-ap mandé la Trè Sint Vièj Mari favè sa-a, pou nou fè tankou moun k-al lariviè pou yo lavé rad: Lè yo rivé nan dlo-a, yo froté rad la byin froté, sa vlé di yo gin lakontrision. Apré sa, yo blayi rad la byin blayi nan solèy, sa vlé di yo déklaré tout fot yo pou solèy Bondié-a séché-l. Épi lè yo rivé lakay yo, yo pran yon karo byin cho, yo pasé rad la byin pasé, sa vlé di yo fè pénitans. N-ap chèché mét plis atansyon nan fason n-ap konfésé, pou nou fè Bondié jouinn répo nan kè nou, pou kité Jézu dòmi nan fon kè nou, tankou li dòmi nan batiman Sin Piè-a, lè té gin tanpèt la sou lanmè-a.

Nan premié konfèsion Sint Thérèse de l'Enfant Jésus, Pè-a di-l konsa: "Yon ti gout dlo ki tonbé sot nan jé Jézu sou kè-ou, li lavé tout péché-ou yo". Sint Thérèse di l-ap rété an-éspri nan pié Koua-a, pou-l ranmasé tout ti gout san

Jézu k-ap gaspiyé atè-a, pou-l vidé yo sou tout moun sou tè-a, tankou lapli lagras. Si-l kapab di sa, nou pa bézouin mandé pou la Trè Sint Vièj Mari, "Réfuge des pécheurs". "L'eau et les larmes ne manquent pas à l'Église: l'eau du Batême, les larmes de la pénitence...(Dieu) créa le ciel, mais je ne lis pas qu'il soit reposé; il créa le soleil, la lune et les étoiles; mais là non plus, je ne lis pas qu'il se soit reposé; je lis au contraire qu'il créa l'homme, et alors il se reposa; trouvant en l'homme quelqu'un à qui il puisse pardonner les péchés" (St Ambroise). "Konsolé, konsolé, pèp mouin, palé nan kè Jérusalèm, di-l tout péché-l éfasé" (Is 40,1ss).

Té gin yon mésié ki t-al konfésé. Pè-a ba-l kòm pénitans pou-l plin yon kalbas dlo. L-al nan tout riviè, li pa réyisi plin-l. Lè-l rétonnin kot Pè-a, Pè-a di-l foyé konsians li pi byin. Li fè sa vré, li vi-n régrèt fot li tout bon vré. Dlo koulé sot nan jé-l. Li tonbé nan kalbas la. Kalbas la plin minm lè-a. Piè té kriyé; la minm péché-l té éfasé (Lc 22,62). Madanm ki té nan péché-a kriyé; la minm péché-l yo éfasé (Lc 7,38.47-48). Nan lapasion-an, gin gro gout san k-ap tonbé sot nan fron Jézu, antan l-ap sué (Lc 22,44). Sé pou nou pran abitud pou nou pa vi-n konfésé tankou yon routi-n, yon abitud ki pa gin sans. Sé pa sa nou fè ki bon pou nou vi-n déklaré, ni okinn lòt problèm lòt moun, ni ki sa yo fè nou. Sé pròp péché nou pou nou déklaré, pou nou régrèt, pou nou pran désizyon korijé, pou nou fè pénitans pou yo. Sé favè sa-a n-ap mandé Manman Mari, antan n-ap préparé rout Pak la, koté n-ap rénouvle promès Batèm nou: "L'eau et les larmes ne manquent pas à l'Église; l'eau du Batême, les larmes de la PÉNITENCE" (St Ambroise).

Lapider: Ex 8,22; 17,4; 19,13; 21,28.29.32; Lv 20,2-27; 24,14.16.23, Nb 14,10; 15,35-36; Dt 13,11.17,5; 21,21; 22,24; Jos 7,25; 1 Sam 30,6; 1 R 12,18; 21,10.13.14.15; 2 Ch 10,18; 24,21; Ez 16,40; 23,47; Mt 21,35; 23,37; Lc 13,34; 20,6; Jn 8,5; 10,31.32.33; 11,8; Ac 5,26; 7,58.59; 14,5.19; 2 Co 11,25; He 11,37; 12,20.

(Ak dlo nan jé li: N-ap réglé p. 244; Bondié gin kè-l sansib pou nou, p. 79; Granmèt Jézu mouin mizérab, p. 210; Granmèt la ba nou kè pozé p. 62; Konsolé p. 302.).

*

* *

DIMANCH RAMO A

Nan Dimanch Ramo yo, nou tandé kapitèn nan nan pié Koua-a, lè Jézu fèk pousé rèl lanmò-a, kapitèn nan di: "Réyèlman vré, sila-a sé té Pitit Bondié-a" (Mt 27, 54). Sé yon "profession de foi" li fè, minm jan avèg la té fè "profession de foi"-l la (Jn 9, 35), minm jan Mat té fè "profession de foi"-l la, (Jn 11, 27), minm jan moun Samari yo té fè "profession de foi" yo-a (Jn 4, 42). Pak tou pré, pèlérinaj lafoua nou-an gin yon ti mòn pou-l monté ankò, dèyè mòn sé mòn: sé mòn Kalvè-a; apré sa, sé limiè nuit Pak la k-ap kléré. Granmèt la ap kondui nou sot nan rotè al nan rotè, joutan li parèt dévan nou nan Siyon (Ps 84, 8; cf 2 Co 3, 18; Ps 34, 6; 36, 10).

Dimanch Ramo-a fè sonjé trionf Jézu; yo rélé-l tou dimanch lapasion, pou fè sonjé soufrans ak lanmò Jézu. Dé évenman sa yo alé ansanm, tankou nandouat ak nanvè yon rad: ni lanmò-a ni trionf Rézireksion-an. Dépi nan dézièm dimanch Karèm nan, litiji-a té montré nou sa, antan li té fè nou ouè Jézu ki chanjé figi, ki transfigure, épi Moyiz ak Éli k-ap pale osijè "exode" (ἐξοδος) li t-apral fè Jérusalèm nan (Lc 9, 31). Sé moman pou nou fè yon dènié ti fouyé konsians nou, pou nou gadé sou ki pouin nou pa ko fè "exode" sa-a, konvèsion sa-a, pénitans sa-a, chanjman sa-a, sitou osijè rékonsilia-sion-an ak pénitans la. Pak apral rivé. Li pa trò ta; sé pou nou sonjé travayé yo ki té rivé nan dènié moman yo t-apral fèmin chantié-a, yo touché minm pri avèk premié yo (Mt 20, 1-16). Mèt la té tèlman kontan fè yo plézi. Konsa tou Bondié ap louvri bra-l pou ti pitit l-a ki té pati kite-l dépi lontan-an, épi ki regrèt yon ti moman nan kè-l, ki di li té gin plis avantaj lakay Papa-a (Lc 15, 18s; cf Os 2, 9), l-ap pati, l-ap tounin al kay Papa-a, l-ap di: "Papa, mouin fè péché kont sièl la ak kont ou, mouin pa mérité pou yo rélé-m pitit ou, trété-m tankou youn nan sèvitè-ou yo". Papa-a pa minm kite-l fin palé (cf Lc 15, 21), li anbrasé-l, li mété yon bèl rad sou li, bèl soulié nan pié-l, bèl bag nan douèt li, li fè touyé bèf la yo t-ap angrésé-a, tèlman li kontan, joutan sa provoké jalouzi premié frè-a. Bondié gin kè sansib, li mal pou faché, li konnin sé péchè nou yé. Nou pa bézouin ront li, sé pou nou profité pou nou fè yon bon konfèsion Pak, pou nou fété lanmò ak Rézireksion Jézu-a, pou-l pa vidé san-l pou granmési. Nou pa doué di tankou pèp Juif la: "Sé pou san-l tonbé sou nou ak sou pitit nou yo!" (Mt 27, 25). Madichon sa-a t-a trò rèd, sa t-a péché kont léspri Sin-an. Nou pa doué kite lagras la pasé san nou pa résévoua-l; otréman li kapab pati nè. Nou pa doué pasé Bondié nan rizib. L-ap frapé nan papòt nou tout nan nuit la (Ap 3, 20; cf Ct 5,2; 2,9). Nou pa doué kite jou baré-l, li gin pou-l kontinué chémin-l. Sé pou nou louvri tout pòt kè nou pou Jézu antré.

Tan lapasion-an, sé moman pou nou sonjé mèwèy sakré Koua-a. Sin Monfò té paré pou-l té planté yon Koua nan finisman mision Ponchato, pou-l té fè sonjé mèwèy sakré Rédanmsion-an. Jou li t-ap béni Koua-a, yo voyé lòd pou-l sispann sérémoni-an. Li di moun yo: nou té paré pou nou té planté Koua-a nan pòt lavil la, yo pa vlé, ébyin n-ap planté-l nan kè nou. Planté Koua-a nan kè nou, sa vlé di bay Jézu plas li avèk tout sa-l mandé nou ki kontrarié nou. Sin Monfò té fè yon Koua nan vil Pouatié an Frans, jouskou-lié-a Koua sa-a la toujou nan kay Sè lasajès yo a-Ròm. Nan mitan Koua-a gin fòm yon kè; nan pié Koua-a gin désin toua klou yo ki té klouré Jézu-a; anba nèt gin yon zétoual; nan mitan bra Koua-a, gin lèt A avèk M ki fè sonjé kòmansman "Je vous salue Marie"-a: Ave, Maria; épi anlè nèt gin lèt J, H, S, ki fè sonjé non Jézu. Nan bra Koua-a, Sin Monfò ékri: "Si vous rougissez de la Croix de Jésus-Christ, il rougira de vous devant son Père". Jézu invité nou pran koua nou pou nou suiv li (Lc 9, 29). Sin Monfò di nou: gadé byin sou Kalvè-a, n-ap ouè toua Koua: pa Jézu-a, pa bon laron-an, pa mové laron-an. Li mandé nou pou nou poté koua nou tankou Jézu, tankou yon inosan, an tou ka omouin tankou bon laron-an, tankou yon pénitan, min li avèti nou pou nou pa poté koua nou tankou mové laron-an, tankou yon dané. Li di:

"Choisis une des croix que tu vois au Calvaire;
choisis bien sagement, car il est nécessaire
De souffrir comme un saint ou comme un pénitent
Ou comme un réprouvé qui n'est jamais content" (Lettre aux amis de la Croix 33, Oeuvres complètes p. 241).

N-ap mandé Manman Mari pou nou poté koua nou avèk Jézu, pou nou kapab jouinn pòsion pa nou nan bèlté sièl la. Apati 15 out 1713, Sin Monfò kòmansé tout lèt li yo, antan-l ékri: "Vive Jésus, vive sa Croix!". Lè sa-a dépi yon ané déjà (1712), li té fi-n ékri "Vraie Dévotion à la Très Sainte Vierge". Plis nou mété la Trè Sint Vièj Mari nan kè nou, plis l-ap fè nou antré nan mèwèy sakré Koua-a, li minm ki té nan pié Koua-a, lè Jézu té di-l: "Madanm, min pitit ou", épi li té di Sin Jan ki té réprézanté nou: "Min Manman-ou!" (Jn 19, 25-27). Nan pié lakoua Granmèt la Mari kanpé avèk Jan, l-ap lapriyé pou pitit li yo Granmèt la rinmèt li.

Pandan tan lapasion-an, li t-a bon pou nou li liv Lamantasion yo, kèk pati nan liv Profèt Jérémi, nan liv Jòb, nan dézièm pati liv Profèt Izayi-a (Is 40-55), ak kèk Psòm ki palé osijè soufrans la, pou nou antré pi fon nan mèwèy sakré Soufrans Granmèt la. Soufrans la pròpté nou, soufrans la sèvi pou délivré nou anba péché (cf Salvifici doloris). Sé pa nésèsèman kòz nou té fè n-ap péyé. N-ap réalizé nan kò nou sa-k manké nan soufrans Jézu-Kri pou

Kò-l ki légliz la (Col 1, 24). Nou tout nou fè yon sèl kò-d-fanmiy. Nou gin doua ofri sa n-ap soufri pou lòt moun ki byin bèzouin, soua sou tè-a, soua nan Pigatoua-a. Yon ti déplasman ki kouté nou, nou fè-l tankou Sint Tèrèz lanfan Jézu ki té konn déplasé sot nan chanm li al nan sal médikaman yo, antan l-ap trinnin sou yon pié, li té konn ofri sa pou kèk misionè ki doué dé-kourajé nan travay li, pou-l kapab kontinué chémin-l, pou-l al konfésé moun yo pou-l al batizé ti moun yo, pou-l al fè lamès koté moun yo ap tann li. Bliyé pou nou bliyé, sé tèt nou pou nou bliyé; sonjé pou nou sonjé, sé frè nou yo. Sé pou nou lapriyé anpil pou Pè yo, sitou jou Jédi-Sin-an, jou Jézu té fè sakréman lòd la ansanm ak lékaristi-a, jou li té bay Kòmandman lacharité-a, pou Pè yo aksépté kontinué sèvi Jézu intèmediè antan y-ap transmèt lavi-l bay fidèl yo. Sin Kuré das, Sin Jan-Mari Viané, sé patron tout Kiré yo, li té gin anpil dévouman, li té konn pasé anpil jou ak anpil nuit nan konfésional. Li té sovè anpil péchè. Li té bay anpil bon konsèy nan sékrè konfésional la. Pou 16 oktob 1983, Pap Jan Pòl II té kanonizé yon Pè Kroat Yougoslav ki té a Padou an Itali: Léopold Mandic, ki té pasé karant ané nan lavi-l ap konfésé pandan douzèd-tan chak jou. Pap la fè sérémoni kanonizasyon-an pandan Sinòd Évèk yo sou rékonsiliasion ak pénitans nan mision légliz la, pou-l montré inpòtans sakréman konfésion-an, sitou nan fòm koté moun nan ap déklaré Pè-a fot li apa, pou-l kouté konsèy ki vo pou li pèsònèlman, nan sitiasion l-ap viv la, pou-l chanjé. Sé pou nou sonjé lapriyé Manman Mari, pou tout Pè yo, li minm ki té résévoua Sin Jan kòm pitit li, antan-l réprézanté Apot yo ak patizan yo Jézu rinmin-an.

*

Nan Istoua Soufrans Jézu-Kri, Granmèt nou-an, chak Évanjélis yo rakonté minm évènman yo; sèlman, chak insisté sou yon aspè spésial. Nan ané A-a, yo li lévanjil Sin Matié. Li insisté pi plis pasé lòt yo sou lansègnman, tankou nan katéchis, épi sou ròl légliz, a tèl pouin paròl Jézu yo dévlo pé anpil, pou lansègnman katéchis la, épi plas Sin Piè inpòtan anpil, kòm Chèf légliz, ni ròl Pèp Juif la tou, k-ap kontrarié légliz la. Aspè sa yo ki parèt pi byin nan lévanjil li-a, yo parèt tou nan Istoua Soufrans Jézu-Kri Granmèt nou-an.

Lè Jézu voyé Apot yo préparé sal résépsion Pak la, li di: "Moman-m nan TOU PRÉ (Mt 26, 18 'Ο καιρός μου ἐγγύς ἐστιν). Min dépi nan kòmansman prèch li yo, nan réjion Galilé-a, li té di: "Rign sièl yo TOU PRÉ" (Mt 4, 17 ἡγγικεν γὰρ ἡ βασιλεία τῶν οὐρανῶν). Moman-l nan ak Ringn sièl yo, sé minm bagay. Ringn sa-a, sé légliz la. Sé osijè-l tou lévanjil Sin Matié-a palé nan sink pati-l yo (déklarasion: Mt 3-7; prèch: Mt 8-10; mèvèy sakré: Mt 11-13; avaloua: Mt 14-18; réalizasion: Mt 19-25). Légliz la, sé yon filè

ki ranmasé tout kalité pouason; rivé yon lè, yo bliyé triyé bon ak mové (Mt 13, 47-50). Sé konsa ròl Juda ap parèt dépi nan kòmansman Istoua Soufrans Jézu-Kri Granmèt nou-an.

Sin Matié montré nou dirèktéman kijan Juda ap fè jé chèch dévan tout lòt Apot yo k-ap mandé Jézu èské sé yo minm k-ap trayi-l la. Juda mandé Jézu tankou tout lòt Apot yo: "Èské sé mouin?". Jézu di: "Ou di-l" (Mt 26,25). Malgré tach sa-a nan Douz yo, nouayo légliz la, Jézu fè lékaristi, sous légliz la, antan-l pran pin ak divin, li fè yo vi-n tounin Kò-l ak San-l, li bay Apot yo manjé ak bouè (Mt 26, 26-29). Li montré kijan San-l ap koulé pou padon péché yo (Mt 26,28). Sin Pòl ap fè nou konnin moun ki manjé Kò-a, ki bouè San-an, san-l pa mérité, sé pròp kondanasion-l l-ap manjé, l-ap bouè (1 Co 11, 27). Sé sa tou k-ap rivé Juda. Sin Matié fè ouè kijan Juda vi-n avèk yon foul ki anpil. Li tankou yon chèf bann ki vi-n ataké yon lòt. Bann pa Jézu-a sé Onz moun li gin avèk li sèlman. Époutan alafin sé li minm k-ap ranpòté laviktoua, malgré tout aparans. Jézu promèt l-ap avèk légliz li-a tou lè jou, jouska lafin sièk tan yo. Sé avèk promès sa-a minm lévanjil Sin Matié-a ap fini (Mt 28, 20). Lè Juda bo Jézu, Jézu di-l: "Zanmi, sa-ou vi-n fè?" (Mt 26, 50). Mo "zanmi" sa-a sé yon kout flach ki pou chiré tout fènoua ki nan fon kè-l. An minm tan sé yon jijman li yé. Sé "zanmi" Mèt nòs la té rélé moun nan ki pa-t gin rad nòs la, sa yo té jété nan fènoua déyò yo, koté ki gin rèl ak manjé-dan-an (Mt 27, 12). Sé "zanmi" Mèt jadin-an té rélé moun ki t-ap babié kont li-a poutèt li té bay lòt yo minm pri avèk li-a (Mt 20,13). Juda sé yon "zanmi" ki vi-n tounin lènmi nan mové moman (Si 37, 1-6). Bouch zanmi sa-a k-ap bo-a, sé yon épé k-ap pèsé (Ps 55, 14,22). Malgré dézakò-a, Jézu toujou kinbé amitié-a. Sé sou bò pa nou nou kasé kòd la. Dépi nou vlé, l-ap maré ankò. Min nou gin éfò pou nou fè, pou nou kité mové abitud ki makònnin nou. Amitié Jézu-a, sé pa bagay sou po, k-ap fè sanblan, ki ipokrit, mòd jan "zanmi" (Mt 11, 16 lectio varians: ἐταῖρος) ki chita sou laplas ap joué flit, ap chanté kantik dèy, youn ap bay lòt chinn pou fè-l maché nan sans li vlé. Amitié pa-l la dépasé indiférans, trayizon, méchansté, inkonsians, intèrè. Li rinnèt byin nan plas mal.

Jézu bay yon bèl léson, lè Sin Piè koupé zòrèy sèvitè prèt an chèf la (Mt 26, 52). Li montré kijan labib di moun ki fè san lòt koulé, y-ap fè san-l koulé tou (Gn 9, 6). Li montré tou kijan sé pa féblès ki fè-l kité yo mét min sou li. Papa-l t-a kapab voyé plis pasé Douz batayon Mésajé nan plas Douz Apot li yo, pou défann li (Mt 26, 53). Légliz pap déplouayé fòs kont lènmi. Épi Jézu fè ouè tou kijan labib la té prévoua sé konsa li té gin pou-l mouri (Mt 26, 54). Li vini pou-l réalizé lansyin Téstaman. Dènié pouin sa-a inpòtan anpil, paské tout lévanjil Sin Matié-a sé yon dévlopman sa-l té anonse dépi

nan premié prèch Jézu-a sou Mòn nan: "Pa konprann mouin vini pou-m anilé laloua-a oubyin Profèt yo; mouin pa vini pou-m anilé min pou-m ré-alizé nè" (Mt 5, 17). Sé yon lansègman ki konsékan anpil. Évènman ak paròl Nouvo Téstaman-an bay sans lansyin Téstaman-an. Lansyin Téstaman-an tou kléré Nouvo Téstaman-an. Youn kléré lòt. Sé yon pouin inpòtan pou KATÉCHIS la sa yé. Sin Matié insisté, li di: "Tout bagay sa yo rivé, pou sa Profèt yo té ékri-a té kapab ré-alizé (Mt 26, 56; cf 1, 22; 2, 5.15.17.23). Déklarasion Jézu ap fè dévan prèt an chèf la, pou-l di li sé Kris, Pitit Bondié-a, l-ap pran yon aspè solanèl, paské prèt an chèf la ap pozé-l késion sa-a, antan-l di: "Mouin mandé-ou sou fòm sèman ('Εξορκίζω), o non Bondié ki vivan-an, pou-ou di nou si-ou sé Kris la, Pitit Bondié-a" (Mt 26, 63). Jézu réponn li yon fason vag: "Ou di-l" (Mt 26, 64). Min osito apré, li ajouté paròl pa-l avèk solanité, pou-l drésé konsépsion Juif yo té ginyin osijè Mési-a ak Pitit Bondié-a: Li asosié dé pasaj lansyin Téstaman (Dn 7, 13 + Ps 110, 1), épi li ba yo yon sans nouvo, antan-l kolé yo ansanm. "Pitit moun nan" Profèt Danièl t-ap palé-a kòm vision-an k-ap pasé nan sièl la, épi "Roua-a" Psòm nan ap palé-a ki chita adouat Tanp la, k-ap pasé sou tè-a. Chak pasaj sa yo pou kont yo pa-t kont pou fè konprann sé osijè Bondié yo t-ap palé. Yo tou lè dé ansanm montré kijan Roua-a chita adouat Bondié nan sièl la, li égal-égo avèk li. Jézu ré-alizé lansyin Téstaman-an. Sé pi bèl témouagnaj li té kapab bay nan lansègnman solanèl dévan tout tribinal la. Sé poua prèt an chèf la chiré rad li. Li konprann sans sa-l rélé "blasphème" nan (Mt 26, 65). Épi sé kondanasion-a-mò-a (Mt 26, 66).

Pandan minm tan sa-a, gin yon lòt tribinal ki drésé nan lakou-a. Sé Piè y-ap pozé késion. Yo fè-l monté machéskalié. Li fi-n di li pa konn sa sèvant la ap di la-a (Mt 26, 70). Dévan lòt sèvant la, li monté yon grad, li fè sèman (ὄρκου) li pa rékonèt moun sa-a (Mt 26, 72). Dévan lòt moun yo, li monté pi ro toujou, li rélé madichon-lanfè sou tèt li ak pi gro sèman li t-a kapab jouinn (καταθεματίζειν καὶ ὀμνύειν), pou-l konvink yo li pa rékonèt mésié-a (Mt 26, 74). Sé lè sa-a kòk la chanté. Son-an réponn li jous nan fon kè, li kriyé san. Chak foua yo akizé-l pi séré, li défann tèt li pi rèd. Premié fou-a sèvant la di: "Jézu, moun Galilé-a" (Mt 26, 69). Dézièm foua-a, lòt sèvant la présizé: "Jézu, moun Nazarèt la" (Mt 26, 71). Touzièm foua-a, lòt moun yo ajouté piès témouagnaj ki pou konvink li: langaj li sé langaj moun réjion sa-a minm (Mt 26, 73). Sin Matié té montré kijan Sin Piè t-ap maché sou dlo, pou-l al rankontré Jézu, min yon lè li fè dout, li kòmansé fonsé; Jézu pran min-l, li fè-l repròch poutèt li té douté-a (Mt 14, 28-31). Min sé li minm Jézu ap rinnèt klé Ringn sièl la; sa-l maré sou tè-a ap rét maré nan sièl la; sa-l lagé sou tè-a ap lagé nan sièl la. Sé sou li Jézu bati légliz li kòm

ròch fondasion, malgré féblès li (Mt 16, 17-20; cf Za 3, 1-9). Sin Piè té fèk fi-n fè "profession de foi"-l, antan-l rékonèt Jézu-Kri kòm Kris la, Pitit Bondié-a (Mt 16, 16). Bondié pa lagé moun li chouazi, malgré féblès yo. Li té konnin yo fèb dépi anvan-l chouazi yo, minm si yo sé chèf légliz. Sin Matié insisté byin sou sa. Sé yon bèl léson sa yé pou nou, pou nou pa dékourajé nan travay Granmèt la konfié nou, lè nou ouè mizè ak féblès nou. Si nou pa fidèl, li minm li fidèl, li pa kapab nié prop tèt pa-l (2 Tm 2, 13). Péché nou mèt vi-n pi lou chak jou, lagras li ap vlopé nou pi plis tout tan, joutan nou sédé.

Sé sa Juda pa konprann ki fè dékourajman anparé-l. Li gin rémò. Li pa konnin lagras Bondié pi fò pasé péché nou. Sin Matié montré kijan Juda al jété trant pies lajan yo nan Kay sakré-a, dévan chèf prêt yo ak ansyin yo (Mt 27, 3-10), anvan l-al pann tèt li. Chèf prêt yo ak ansyin yo achté yon jadin nan min yon moun ki konn fè krich, pou yo antéré étranjé. Sin Matié insisté pou montré sé pou réalizé sa Profèt Jérémi té déjà anonsé davans la (Jer 32, 7ss; Lc= 39, 7ss). Lajan sa-a sé pri yon ésklav (Za 11, 12s; Ex 9, 12). Lan-sègnman ki dégajé sot nan pasaj sa-a, sèké Jézu vi-n tounin ésklav lézòm, pou-l délivré lézòm anba ésklavaj Satan (Ph 2, 7). Konpòtman prêt yo étranj, paské yo fi-n achté yon san inosan, épi yo montré kijan yo soua-dizan réspékté laloua-a, antan yo pa vlé mété lajan-an nan kèt la paské sé lajan madichon. Yo bay kèt la plis inpòtans pasé pèsòn Jézu-a yo kondané a-mò-a. Yo pa rékonèt sé li minm ki vré Tanp la, vré légliz la. Yo gin soua-dizan réspè pou Tanp ki fèt ak ròch la, ki yon sinp pòtré ak lonbraj la, min yo pa gin okinn konsidérasion pou Tanp vivan-an ki vré réalité-a. Jézu té déjà di poutan: "Krazé Tanp sa-a, nan toua jou m-ap drésé-l" (Jn 2, 19; Mt 26, 61; cf Jer 26, 1-24). Jézu té di pou pa fè Kay Papa-l la vi-n tounin yon mézon komès (Jn 2, 14), lè-l té jété lajan moun yo atè-a. Yo soua-dizan réspékté Tanp la, min yo pa réspékté vré Kay sakré-a: Pitit Bondié-a.

Pandan jijman ap balansé ant Jézu ak Barabas, madanm Pilat ap pézé sou balans la, pou fè Pilat lagé Jézu (Mt 27, 19), aköz avètisman li jouinn nan rèv (Mt 27, 19; cf Mt 1, 20; 2, 12.13.19.22), tankou lansègnman Saj yo té konn résévoua nan rèv (cf Ac 16, 9; 18, 9; 23, 11; 27, 33; 9, 10s; 10, 3s.11s; Gn 28, 12ss; 31, 10-13.24; 37, 5; 41, 1-36; Nb 12, 6), malgré kèk limit Profèt yo mété pou évité déviation (Jer 29,8; Qo 5,6; Lv 19, 26.31; Dt 13, 2ss; 18, 10s; Si 34, 1-6). Min pandan minm moman sa-a madanm Pilat ap ba-l bon konsèy la, chèf prêt yo ak ansyin yo ap fè bouch pèp la, pou-l mandé Barabas (Mt 27, 20). Pilat, Sin Matié rélé "préfè" (ἡγεμὼν, Mt 27,2.11.14.15.21.27; 28, 14; cf Mt 10, 18; 2,6), blijé lavé min-l dévan brouyaj foul la t-ap fè (Mt 27, 24; cf Dt 21, 6-8; Ps 26, 6; 73, 13). Yo di pou

san-an tonbé sou tèt yo ak sou tèt pitit yo (Mt 27, 25). Sé kòm "pèp" yo pran angajman sa-a, tankou tout yon légliz ki lèvé an blòk, pèp Bondié té chouazi-a, pou fòmé légliz li-a, Israël sa-a Sin Pòl ap plinn sou li nan lèt Romin yo (R 9-11), sa Jézu ap kriyé sou sò-l la (Lc 19, 41; 13, 34s; 23, 31; cf R 11, 21). Li minm ki pa rékonèt tan vizit li-a (Lc 19, 44).

Sé fièl yo bay Jézu bouè sou Koua-a (Mt 27, 34 $\chiολης$, cf Ps 69, 22). Israël sé yon jadin rézin ki bay grinn rabi nan plas bon rézin pou t-a fè bon divin (Is 5, 2). "Impropères" yo di: Mouin fè dlo sot nan ròch pou pasé souaf ou, ou minm ou ban-m vinèg ak fièl pou-m bouè (cf Mi 6, 3ss). Lè yo fi-n klouré Jézu sou Koua-a, ni chèf prèt yo, ni profesè yo, ni ansyin yo, sa vlé di réprézantan pouvoua rélijyon-an (chèf prèt yo), réprézantan dirèksion lan-sègnman-an (profèsè yo), réprézantan otorité politik yo (ansyin yo), yo tout yo mété ansanm pou yo pasé Jézu nan rizib (Mt 27, 41); y-ap di li té mét konfians nan Bondié, sé pou Bondié sovè-l sot sou Koua-a, si-l rinmin-l, paské li té di li sé Pitit Bondié (Mt 27, 43); y-ap ba-l défi y-ap mandé sign, jan Sin Pòl réproché yo nan lèt Korintyin yo (1 Co 1, 23; Mt 12, 38ss; Jn 2, 18; 6, 30; 4, 48). Sé péché kont léspri Sin, kont lafoua. Non sèlman voual Tanp la ap chiré ($\epsilon\sigma\chi\iota\theta\eta$, Mt 27, 51), min ata ròch yo ap chiré ($\epsilon\sigma\chi\iota\theta\eta\sigma\alpha\nu$, Mt 27, 51). "Si yo pé bouch yo, ròch yo ap palé" (Lc 19, 40). Lè sa-a tè-a pran tranblé (Mt 27, 51). Juif yo mandé sign, yo jouinn sign. Min sé pa fason yo té mandé-a yo jouinn. Bondié lib. Li pa rét ak nou pou fè kat volonté nou. Si-l bay sign, sé pou-l éksité oubyin soutni lafoua nou, sé pa pou satisfè kapris nou. Dévan sign sa yo, kapitèn Romin-an ansanm ak lòt yo ki avèk li-a, yo mét lafoua nan Jézu-Kri kòm Pitit Bondié (Mt 27, 54) li minm ak tout batayon-l nan ansanm fè group pou antré nan légliz avèk lafoua yo. Sé kalité payin sa yo Jézu di k-ap vi-n sot nan tout dirèksion pou antré nan légliz la, chita atab ansanm avèk Abraam, Izaak ak Jakòb, pandan sa-k té soua-dizan pitit-kay yo minm, y-ap jété yo déyò, koté ki gin rèl ak manjé-dan (Mt 8, 10-12). Malgré tout sign sa yo poutan, chèf prèt yo ak Farizyin yo jouinn mouayin pou yo fè konplo toujou pou yo mandé Pilat mét santinèl dévan kavo-a, pou évité patizan yo vi-n pran kò-a (Mt 27, 62-66). La-a tou Pilat lavé min-l, li di yo sé kozé ki gadé yo, yo gin gad; minm jan yo té arété Jézu-a, konsa y-a véyé kavo-a jan yo vlé (Mt 27, 65). Sé sa yo fè vré. Yo pozé sélé ak gad sou kavo-a. Sé konsa lévanjil Ramo A-a fini, nan silans. Sin Pòl ap di yo pa kapab anchinnin Paròl Bondié-a (2, Tm 2, 9).

Jézu té di Juif yo t-ap mouri nan péché yo (Jn 8, 2), paské yo réfizé kouè. Mèvèy sakré Soufrans Jézu-Kri Granmèt nou-an, sé yon lansègnman légliz mét dévan nou pou fè nou réfléchi sou sakrifis sa-a ki sovè nou-an. Sé pou nou kitè-l palé ak nou, pou nou louvri kè nou ba li, pou ba-l lafoua nou, pou

nou chanjé konpòtman nou, pou nou pran rézolisyon kité Koua Jézu-Kri-a dirijé lavi nou. Légliz bati sou lakoua. N-ap mandé Manman Mari pou nou pa fèmin kè nou, pou nou pa fè jé chèch, pou nou pa chèché Délivrans la nan lòt mouayin pasé sou Koua-a, pou nou pa sédé nan tantasion ki té atiré Sin Piè-a pou défann légliz la ak pouint épé. Koua-a n-ap gadé-a (Nb 21, 9; Sg 16, 5; Jn 3, 14; 19, 37), sé yon lansègnman san paròl. Sé nan silans n-ap kouté-l.

*
* *

DIMANCH RAMO B

Pami pèsonaj yo ki balizé lapasion sèlon Sin Mak la, gin trantoua k-apral édé nou ouè divès kalité rélation nou kapab ginyin parapò a Jézu: chèf prèt yo ak profèsè yo, Simon, ki té gin maladi lalèp la, madanm nan ki té vidé losion sou tèt Jézu-a, kèkzin nan moun ki té atab yo ki sézi yo, Juda Iskariòt, patizan yo (Douz yo), mésié ki t-ap poté krich dlo-a, mèt kay la, Piè, Jak, Jan, foul la, ansyin yo, sèvitè-a Piè té koupé zòrèy li-a, ti gason-an ki té sovè ni-kò-a, témouin-manti yo, sèvitè prèt an chèf la ki té dénonse Piè bò difé-a, sèvant la ki té insisté an fas Piè-a, moun yo ki té kanpé bò kot Piè bò difé-a, Pilat, Barabas, sòlda yo, Simon Sirénéyin, Aléksann ak Rufus, dé asasin yo, moun k-ap pasé yo, Éli, kapitèn nan, médam yo ki t-ap suiv Jézu-a, Mari-Madlèn, Mari manman Jak ak Jozèf, Mari-Salomé, Jozèf darimati.

1. Chèf prèt yo ak profèsè yo aji an trèt. Yo pa vlé gin dézòd nan foul la. Sé aparans lòd sèlman y-ap chèché; lòd la, sé sou pa déyò yo respékté-l. Gin lòd déyò, min gin dézòd anndan fon kè yo. Oganizasyon sosisié-a doué maché ès-ès. Sèl péché ki konté, sé sa k-ap troublé bòn mach sosisié-a. Y-ap voyé ròch, y-ap kaché min; yo tankou rat ki konn sa-l fè nannuit, li kaché lajounin. Nan mézi nou kapab gadé Bondié an fas, san konsians nou pa troublé nou, nan mézi sa-a vré lòd la ap respékté, n-ap gin vré lapè-a, kay koulé tronpé solèy, li pa kapab tronpé lapli. Sé minm chèf sa yo ki chita nan tribinal pou jijé Jézu, min sé yo minm ki foulé laloua-a anba pié yo. Jijman-an déjà fi-n signin, yo invanté rézon yo. Sé kòm si yo bati yon pon, apré sèlman y-al détounin yon lariviè pou-l vi-n pasé anba pon-an, pou montré yo té gin rézon fè pon-an la-a. Sé jalouzi k-ap minnin yo, sé santiman sa-a k-ap souflé yo tout jès y-ap pozé. Jalouzi sé yon bon bagay, nan mézi li sèvi yon bon kòz, nan sans Sin Pòl té di moun Korint yo li jalou pou yo pa tonbé nan péché (2 Co 11, 2), nan sans Jézu té di jalouzi pou lakay Bondié Papa-a ap fi-n dévoré-l la (Jn 2, 17), nan sans Bondié té di Moyiz li sé yon Dié jalou (Ex 34, 14; cf Ct 8,4). Sa vlé di li tèlman rinmin nou, li pa kapab sipòté nou trayi-l ap fè péché. Min mòd jalouzi k-ap fè nou dékontrolé lè nou ouè yon lòt ranpòté siksè nan travay li-a, épi n-ap fè tranzaksion sou do-l antou nou invanté tout kalité kritik pou nou sal répitasyon-l nan, l-ap kontinué sa prèt an chèf yo ak profèsè yo té fè kont Jézu nan lapasion-an.

2. Simon, moun maladi lalèp la té invité Jézu lakay li, li té fè résépsion pou li. Sin Luk palé nou osijè yon sètèn Simon ki té invité Jézu lakay li tou (Lc 7, 40), apéprè nan minm sikonstans, lè madanm nan té vidé losion nan pié Jézu-a épi Simon t-ap fè réfléksion nan kè-l la, paské sé yon Farizyin li té yé, Jézu té rédrésé jijman-l osijè madanm nan. Si yo ba-l ti non "moun maladi lalèp", sa vlé di li té pasé maladi, min nou pa sètèn si-l konn rémèd;

paské Jézu vini pou moun malad, li pa vini pou moun ki konprann yo an santé (Mc 2, 27). Pètèt sé yon moun Jézu té déjà géri sot nan maladi lalèp la, paské si-l té gin maladi-a toujou li pa t-ap gin doua invité moun atab pou l-ap fè résépsion. Sèlman gin yon maladi ki pi grav pasé lalèp, sé péché (Ps 51, 9; Lc 14,4; Nb 19,18; Jn 19,29). Jézu té géri Simon pètèt anba maladi lalèp, Simon ginyin-l rékonésans, li invité-l lakay li. Madanm nan k-ap vidé losion sou Jézu-a té géri anba pi gro maladi ki kapab ginyin, li montré rékonésans li aléga Jézu. Sa invité nou pou nou pa jijé dapré laparans, pou nou foyé konsians pa nou avan nou gadé pa lòt (Mt 7, 1-5). Sa invité nou tou pou nou résévoua Jézu lakay nou antan nou fè tankou Simon maladi lalèp la, nou fè résépsion pou li pou nou di-l mèsi poutèt li té géri nou anba maladi nou (Ps 103, 3 = péché-maladi).

3. Madanm nan ki té vidé losion sou tèt Jézu-a, sé pa ninpòt ki ti losion li té achté, sé yon losion kalité sipériè ki vann byin chè. Sin Kiré das, Sin Jan-Mari-Viané, di konsa nan pouin anyin ki trò bèl pou Bondié. Li minm ki té viv pòv nan vil As la, atèl pouin sé yon mamit pòm-tè li té konn bouyi pou yon sémèn, li té konn mété mamit la nan gad-manjé-a, chak jou li té konn pran kèk pòm-tè pou-l manjé. Apré sa, li té rété nan konfésional li, tout la-jounin avèk yon bon pati nannuit ap padonnin péché, ap bay konsians moun limiè. Li minm ki té minnin yon vi si pòv konsa, li pa-t rékilé dévan okinn dépans pou-l té fè pou litiji-a. Pa gin anyin ki trò chè pou Bondié. Losion-an madanm nan té vidé sou tèt Jézu-a, sé réalizasion jès Roua maj yo té vi-n fè pou li lè-l té nan gròt Bétléèm nan, losion lamir nan ki pou té sèvi pou anbomé kò-l, antan yo té montré davans sé yon moun k-ap mouri (Mt 2,11). Jézu di madanm nan anbomé-l davans, paské li té konnin madanm nan pa t-ap gin tan fè bèl jès sa-a pou li lè y-ap désann li sot sou Koua-a jou Vandrédi Sin-an. Madanm nan kasé boutèy la. Boutèy sa-a, yo pa-t kapab sèvi avèk sa-l té ginyin anndan-l nan san yo pa kasé-l (Jg 7, 16.19-20). Lè nanm nou ap sèvi losion pou monté dévan fas Granmèt la, fò boutèy kò-a kasé pou-l bay sa-k anndan-l nan. Yo pa fè omlèt san kasé zé. Nou pa kapab ménajé kò nou, si nou vlé pou nanm nou sèvi losion pou Granmèt la. Madanm nan ki vidé losion-an sou tèt Jézu-a, sé tout bon kalité ki nan kè-l li vidé. Péché lontan ki té nan kè sa-a té fè moun blijé bouché nin yo lè yo té konn proche koté-l. Kouliè-a, Jézu chanjé nanm sa-a. Sé pa mové lodè ankò l-ap bay, sé losion kalité sipériè. Sé nòmal sé sou tèt Jézu pou-l vidé-l (Mc 14, 3). Sin Luk té montré nou yon madanm ki té fè yon jès konsa, kay yon sètin Simon (Lc 7, 36-50), min lè sa-a sé sou pié Jézu li té vidé losion-an. Kouliè-a li monté pi ro, jous nan tèt. Li vi-n pi zanmi ak Jézu, li pa pè ankò, ni li pap kriyé, li pa ront. L-ap trété Jézu tankou zanmi ak zanmi (Ex 33,11; Nb 12,8;

Jn 15,15; Lc 12,4). Tou sa-k té pasé lontan ki pa-t byin, yo tout éfasé. Nou pa gin pou n-ap rétonnin tout tan sou péché nou té fè lontan. Sint Térèz lanfan Jézu té di minm si li t-a gin tout péché ki sou tè-a sou konsians li, li t-ap gin konfians toujou nan Bondié ki Rinmin ak kè sansib (Ps 103,8; Ex 34, 6-7; 33,19; Ps 86,15; 145,8; Os 2,21; 11,4; 14,4; 1 Jn 4, 8.10). Sa invité nou gin **lodas** pou nou proche kot Bondié, jan nou konn di nan lamès la, anvan nou résité "Papa nou ki nan sièl la" lè nou di: nou gin lodas di: "Papa nou ki nan sièl la" (cf He 4,16). Yon foua Bondié fi-n padonin nou, li padonin nou nèt (Ps 103,12). Li pap tounin sou sa nou té fè lontan ankò. Minm si péché nou t-a tankou vlou rouj, l-ap vi-n tankou linn mouton tou blan (Is 1,18).

4. Kèkzin nan moun yo ki té atab yo, yo sézi, yo veksé, yo rélé gaspiyaj, kòm si sé té nan pòch yo lajan-an té soti pou achté losion-an. Sé paské yo pa-t konnin tou ki kalité pèsonaj ki té atab avèk yo-a, sé Pitit Bondié-a, sé Bondié ki mèt tout bagay. Yo gin tan kalkilé pri losion-an: touasan piès lajan, sa vlé di dis foua pi chè pasé pri Jézu li minm ap kouté, paské sé pou trant piès lajan sèlman y-ap vann li, pri yon ésklav (Za 11,12; Ex 9,12). Yo t-ap kalkilé pòv ki ginyin nan péyi-a. Sé konsa yo t-ap palé madanm nan mal. Dépi gin yon jès yon moun pozé nou pa konprann, minm lè-a, san nou pa pran tan réfléchi, san nou pa konn bagay la ni nan tèt ni nan rasi-n, ni dévan ni dèyè, ni dyè ni davantye, nou kòmansé pran pozision kòm si sé nou sèl ki pou dikté lòt konpòtman pou yo ginyin, malgré yo minm yo fi-n kalkilé afè pa yo dépi lontan, yo pézè ni avantaj ni inkonvénian, yo pa aji alaléjè. Sé Jézu ki pran défans madanm nan, ki raplé moun yo alòd antan li mandé yo pou yo kite-l trankil, pou yo sispann trakasé-l, sé yon bon aksion li fè, sé louanj li y-ap fè tout koté y-ap rakonté lévanjil sa-a. Vré pòv la sé Jézu li minm, sé yon pòv k-ap pasé (Lc 9,58). Lòt pòv yo y-ap toujou la. Sé léspri Sin-an ki té souflé madanm nan fè jès sa-a pou li. Nou doué mét min nou sou bouch nou, pou nou pa palé trò vit tankou zanmi Jòb yo, osijè sa nou pa konnin ki pi gran pasé nou. Sin Jak mandé nou pou nou mété frin nan lang nou, ti manb sa-a ki tou piti-a tankou yon ti difé k-ap boulé tout yon rak boua-a, tankou yon gouvènay batiman ki tou piti, k-ap fè tout batiman-an viré adouat oubyin agoch la (Jc 3, 1-12). Tan lapasion-an invité nou fè yon ti silans, bay lang nou yon ti répo; jé ouè, bouch pé. Minm si yo ataké nou, yo palé nou mal paské yo pa konprann jès nou pozé, y-ap fè réfléksion ki dézonèt sou do nou, sé pou nou pé bouch nou, sé Jézu k-ap okipé kozé pran défans nou-an. Mouins nou défann tèt nou, plis l-ap défann nou byin.

5. Juda Iskariòt chanjé fizi-l zépòl. Li chanjé mèt, chanjé métié. Li kite vré Prèt an chèf la sélon ran Mèlkisédèk la, l-al nan sèvis chèf prèt Juif yo.

Li kite vré sous dlo vivan-an, l-al fouyé basin ki pa kapab kinbé dlo (Jer 2, 13; Pr 5,15). Péché-a pa libéré nou, sé ésklav li rann nou pi ésklav (Jn 8, 34). Nou ralé kò nou anba min Bondié; nou tonbé anba min Satan. Lajan té dékontrolé Juda. Époutan sé youn nan Douz yo li té yé. Sé Jézu ki té chouazi-l sou l'inspiration léspri Sin (Ac 1,2). Jézu toujou kontinué rinmin-l pou-l ouè kijan li kapab sové-l. Li pa mété-l déyò nan group Douz yo, malgré sé pa ni yè ni avantye Juda té kite lajan pran nanm li. Jézu anonsé byin fò pandan y-ap manjé atab la ansanm kijan youn nan Douz yo ap trayi-l; Juda fèmin kè-l; li fè kòm si li pa konprann. Lajan-an sé yon bon sèvitè, min sé yon mové mèt. Moun sa-a ki trayi Jézu-a, Jézu di li t-a pi bon pou li si-l pa-t janm fèt. Sa invité nou kalkilé kijan gin péché ki grav, épi kijan soufrans lanfè pa gin konparézon. Juda mét min nan plat la ansanm ak Jézu pou-l tranpé pin-an nan divin-an. Profèt Éli té di pèp Israèl la pou-l sispann bouaté ak dé jarèt, si sé Bondié l-ap sèvi, sé pou-l sèvi-l fran, si sé Baal, sé pou-l fè chémin-l, li pa kapab ap sèvi dé mèt alafoua (1R 18, 21; Mt 6,24). Juda sèvi dé mèt alafoua: Bondié ak lajan. Sé lékontrè jès madanm nan té fè lè-l té vidé losion ki kouté chè-a sou tèt Jézu-a. Pa gin anyin ki trò gran, ki trò bèl pou madanm nan fè pou Jézu. Juda minm pa gin anyin ki trò ba, ki trò lèd pou-l fè kont Jézu. Vizavi minm moun nan, santiman chak moun diféran. Gin bon, gin mové, gin zanmi, gin lènmi, dapré sa kantik la di osijè lékaristi "Pange lingua ": chak moun résévoua-l, min ginyin sé pou yo sové, dèt minm sé pou kondanasion yo. Sa invité nou pou nou évité tout komi-nion sakrilèj koté sé pròp kondanasion nou nou t-a manjé, si nou pa konsidé répròp Kò ak San Granmèt la n-ap résévoua-a (1 Co 11,29).

6. Patizan yo mandé Jézu koté li vlé pou y-al paré pou li pou-l manjé Pak la. Li voyé yo a- dé pou yo paré sal-a-manjé-a. Dé-a sé chif lacharité, dapré sa Sint Ogustin di nou. Si nou pa antann nou antré nou, nou pa kapab antré nan vré sans résépsion Pak la, résépsion lacharité-a. Jézu té déjà abitué voyé patizan-l yo dé pa dé pou yo paré rout pou li koté li té konn apralé (Lc 10,1). Pi bèl préparasion nou kapab fè pou résépsion Pak la, sé rékonsilié antré nou si nou gin ti kont ki divizé nou (Mt 6, 23-24), sé konsa n-ap paré sal-a-manjé-a pou Jézu, Piè té gin lokazion mandé Jézu konbyin foua li gin pou-l padonnin, si sé sèt foua, Jézu té réponn li sé pa sèt foua, sé souasandis foua sèt foua, sa vlé di tout tan (Mt 18, 21-22; cf Gn 4,24). Sé konsa n-ap montré nou sé patizan Jézu tout bon vré. Jézu té fè yo Douz (Mc 3,14), douz kolòn légliz la. Lè youn vi-n trayi, yo té blijé ranplasé-l, douz la sé sign fanmiy Israèl la, sé Pèp la. Nan yon fanmiy gin ti kont ki rivé, min youn padonnin lòt fasil. Nan légliz, nou pa doué kinbé moun nan kè. Lè yo arété Jézu, patizan yo ap sové, min lè Jézu résisité sot nan pami mò yo, l-ap

rasanblé yo ankò, l-ap voyé léspri Sin-an pou yo, y-ap jouinn fòs pou yo sèvi-l témouin. Yo tout yo té di yo pa t-ap trayi-l, yo té konté sou pròp fòs yo, yo té bliyé féblès yo. Nou doué rékonèt nou sé péchè, nou pa doué bonbé pouatri-n nou, kouè nou pap janm tonbé. Lè nou konnin nou fèb, n-ap blijé pran prékosion pou nou pa tonbé.

7. Mésié-a ki té poté krich dlo-a, sé sou sèvis li li té yé. Li pa-t minm konnin si-l té sèvi patizan yo kòm sign pou yo suiv tras li joutan li antré nan kay la. Nou kapab sèvi lòt yo kòm gid san nou pa konnin. Bondié kapab mété nou sou chémin moun nou pa minm konnin. Épi n-ap maché dévan yo pou trasé chémin pou yo, pandan n-ap fè ti travay òdinè nou, sa nou abitué fè chak jou, al chèché dlo pou nou poté lakay. Sé lè n-a rivé nan sièl n-a konnin konbyin moun nou té mété sou bon chémin. Lé kontrè kapab rivé tou élas, si nou pran mové chémin, moun k-ap suiv nou, k-ap gadé sou nou, yo kapab tonbé koté pou yo pa-t alé. N-ap pèdi tèt nou, épi n-ap pèdi dèt moun ansanm ak nou, mandé Bondié padon.

8. Mèt kay la koté sal-a-manjé-a té paré-a, doué té konn abitué résévoua Jézu déja. Sal-a-manjé sa-a ki byin paré-a, li sanblé ak kè nou ki an-éta-de-gras, koté Jézu alèz pou-l fè ladésant. Lè dèt moun ap répousé-l, ap chasé-l, ap fè konplo kont li, gin moun ki paré pou résévoua-l. Sé pou Jézu alèz nan kè nou tankou lakay li.

9. Piè toujou présé palé, sé tanpéraman-l. Li pran laparòl o non tout moun pou-l promèt Jézu l-ap rét avèk li. Satan té tanté Jézu toua foua nan dézè-a, Jézu té rézisté-l toua foua; li té pati, li tounin nan tan lapasion-an (Lc 4, 13; 22, 31). Li vi-n pran révanj li sou Chèf légliz la. Toua foua Piè apral tonbé, min toua foua tou Jézu ap mété-l kanpé antan-l fè-l déklaré toua foua li rinmin-l, apré Réziréksion-l nan (Jn 21, 15-17). Péché pa doué dékourajé nou. Tout maladi gin rémèd. Sé nou minm ki ront paské nou pa-t prévoua sa; min Jézu pa sézi, li té avèti davans sa-k t-ap rivé. Sé pa paské Piè té san défo ki fè Jézu té chouazi-l. Jézu té chouazi-l gratis. Sé sèkrè plan volonté Papa-l pèsòn pa kapab sondé. Sé pa paské nou tonbé pou nou di Bondié pa-t rélé nou nan plas sa-a. Li konnin nou fèb (Ps 103, 14), li chouazi nou kan minm. Jézu té di Sin Pòl favè-l kont li, paské fòs li déplouayé nan féblès (2 Co 12, 9), sé poua Sin Pòl té di lè-l fèb sé lè sa-a li pi fò. Li pa-t trakasé tèt li plis, passé sa lè-l konstaté féblès li. Sa pa vlé di li té fè éspré rét drivé san éfò; min li té konnin malgré tout éfò-l, li té kapab tonbé san-l pa atann (1 Co 9, 27). Piè ap éseyé défann Jézu. Min sé pa mòd défans sa-a Jézu té vlé (Mt 16,14; 2 Mac 15, 15-16). Jan-Batis pa-t konprann nan prizon-an pouki sa Jézu pa-t pran défans li (Mt 11,3; Ac 1,6). Li t-ap tann Mési-a k-ap vi-n ak

rach la pou-l koupé rasin pié boua-a (Mt 9,10), min sé yon Mouton li ouè (Jn 1,23.36; Is 53, 7.12; Ac 8, 32; 1 p. 1,19; 2, 21-25). Kòlè lézòm pa réglé jistis Bondié, dapré sa Sin Jak di nou (Jc 1,20). Piè suiv dé louin kan minm. Li té gin bòn volonté. Li pa-t konprann sa-k t-ap pasé; li kòmansé dékontrolé. Fason li t-ap aji-a, sé pa fason sa-a Jézu té vlé. Sé sa-k troublé-l. Lè yo sènin-l pou kont li nan lakou-a, li dépalé, min sé apré sa, li rékonèt, li pa rét nan péché-a, li kriyé san. Dlo nan jé-l lavé fot nan kè-l.

10. Jak, sé premié Apot k-ap vidé san-l pou Jézu, sé Éròd k-ap touyé-l (Ac 12,2). Li té mandé Jézu yon plas tou kolé-l avèk frè-l Jan. Jézu té invité-l bouè nan kalis li-a. Li té di oui (Mt 20,22). Sé youn nan toua yo ki té akonpagné Jézu, lè Jézu t-ap fè pitit fi Jayir la lèvé-a (Mc 5,37), épi lè Jézu té chanjé fas sou mòn Tabò-a (Mc 9,2). Sé yo toua-a ki ansanm ankò pou la-priyé ak Jézu: Piè, Jak ak Jan (Mc 14,33). Jézu té invité Jak ak Jan pran dènié plas, pou yo sèvi (Mc 10,43s). Pè-d-Fouko di sé yon sèl dènié plas ki té rété, sé Jézu ki pran-l. Si nou bézouin Jézu, sé la n-ap jouinn-li.

11. Jan té pozé tèt li sou pouatri-n Jézu nan dènié Soupé-a (Jn 13,23), minm jan Laza té sou pouatrin-n Abraam nan (Lc 16,23), minm jan Jézu té sou pouatri-n Papa-a (Jn 1,18). Sé nan fason nou santi kè Jézu ap bat nou kapab sèvi-l témouin. Jan té sèvi-l témouin antan-l té dévoualé sékrè ki nan kè-l (Jn 19,35; 21,24; Ac 1,8), paské sé la li té pozé tèt li. Rich la té mandé Abraam pou voyé Laza al sèvi témouin kot frè-l yo sa k-ap pasé lòt bò-a (Lc 16,27s), paské li té sou kè Abraam. Jézu té sèvi Papa-a témouin antan-l vi-n dévoualé sa k-ap pasé anro-a (Jn 1,18; 3,13), li minm ki toujou sou kè Papa-a. Sé pa ak bouch nou pou nou sèvi témouin, min ak tout vi nou, antan nou fè yon sèl ak Granmèt la, tèt nou pozé sou kè-l.

12. Foul la proche ak manchèt, ak baton, gro nannuit tankou pou yon vòlè. Yo pa konn sa y-ap défann. Yon foua gin moun ki pousé yo, yo fonsé. Sé pa kantité moun ki panché yon bò ki kapab sèvi indikasyon sé bon cheminan sa. Gin déklarasyon, sé pa konté pou yo konté yo, sé pézé pou yo pézé yo. Sé pou yo ouè ki kalité moun ki soutni yo, ki sa y-ap défann, ki fòmasyon yo ginyin, ki moun k-ap pousé yo nan do.... Chèf prèt yo ap éksité foul la, y-ap fè bouch li pou yo fè-l mandé Barabas. Ki kalité mòd éléksion sa-a?

13. Ansyin yo nan minm group avèk chèf prèt yo ak profesè yo. Sé toua katégori sa yo ki t-ap dirijé pèp la, dépi sou tan légzil Babilòn nan. Sé dé ansyin ki té mété ansanm pou fè kondané Siza-n, ki pa-t vlé livré kò-l ba yo. Sé ti Danièl Bondié voyé sovè Siza-n antan-l fè rékonèt fo-témouagnaj ansyin yo, ki poutan té sèvi kòm jij (Dn 13). Sa yo mété pou jijé yo, sé yo minm k-ap pèvèti laloua-a.

14. Sèvitè prèt an chèf la Piè té koupé ti bout zòrèy li-a, li té nan sa-k té mét min sou Jézu yo, ki té kinbé-l yo. Sé yon fason Piè té vlé fè-l lagé Jézu. Sin Luk ap di nou Jézu touché zòrèy la, li géri sèvitè-a (Lc 22,51). Jous la Jézu ap fè mirak, ak tout san-foua-l. Malgré sa, yo kondui-l kòm prizonié. Sé t-a poutan yon bèl prèv pou montré sé pa yon kriminèl, okontrè sé yon Profèt, sé yon Sin. Sèvitè-a minm té doué fè dépozision pou li. Min lè rayisans avèglé chèf yo, yo pap tandé dépozision sa-a. Yo pap kouè nan mirak la. Jézu té fè anpil lòt mirak dévan yo déjà, yo pa-t janm vlé kouè. Bondié té di Profèt Izayi sa (Is 6, 9-10), li té di Profèt Êzékièl sa (Ez 3,7). Yo bouche zòrèy yo, yo fèmin jé yo, yo fè kè yo vi-n di (Jn 12, 27-40; Ac 28, 24-28). Favè Bondié-a pa jouinn ni pòt ni fènèt pou-l pasé.

15. Ti gason-an ki sovè kò-l abiyé an "kouran-dè"-a, ki kité sèl ti dra li té gin sou li-a nan min moun yo ki té kinbé-l yo (cf Am 2,16), sé youn ki t-ap suiv Jézu. Gin moun ki di sé Sin Mak li minm. Gin dé sítiasion ki éséyé kinbé nou, nou blijé lagé kichòy, pou nou pa kité pròp kò nou pran nan angrénaj. Pito nou antré nan sièl la avèk yon sèl grinn jé, avèk yon sèl pié, pasé pou-n al boulé nan lanfè-a avèk dé grinn jé nou, ak tou lé dé pié nou (Mt 5, 29-30). Gin avantaj nou blijé kité tonbé pou nou sovè sèl vré avantaj la: sièl la (Ph 3, 7-9). Gason-an sovè ni-kò. Gin kalité lonè ak préstij ak konsidèrasion ki vlopé nou, ki kapab vi-n tounin yon pièj pou nou. Pito nou lagé yo, nou aksépté rété jan nou yé-a, tou sinp, tankou yon ti bébé (Ps 131,1s). Sa fè nou sonjé lè yo fi-n klouré Jézu sou Koua-a, y-ap pran tout rad li, y-ap séparé yo. Li minm ki Roua tout roua, li pa ré ak anyin (Jn 19, 21-24). Sé pa nou minm ki pou monté kòlèt nou pou yon ti grad nou ginyin ki tròp pou nou...

16. Fo-Témouin yo dépozé kont Jézu, min témouagnaj yo pa konkòdé. Ti Danièl té montré kijan jij Babilòn yo té fè mové dépozision kont Siza-n antan li fè ouè témouagnaj yo pa konkòdé (Dn 13, 50-59). Sé yo minm ki sibi chatiman ki té paré pou Siza-n nan. Isit la minm, malgré gin fo-témouagnaj, jijman-an kontinué, sé yon sanblan jijman. Sèl sa yo kinbé kòm dépozision sé kozé kay sakré-a ki pou détrui pou rébati nan toua jou-a. Jérèmi té palé kont kay sakré-a déjà, yo té tradui-l nan tribinal pou sa, min yo té lagé-l, yo té rékonèt li inosan, paské sé paròl Bondié li té palé (Jer 7, 4.14). Jézu sé nouvo Jérèmi, y-ap fè pasé mati pou déklarasion l-ap fè.

17. Sèvitè prèt an chèf la ki dénonse Piè-a, li byin plasé pou-l té ouè sa-k té pasé lè Piè té ralé kouto sou tèt sèvitè parèy li-a, sa zòrèy li té koupé-a. Sé moman pou-l tiré vanjans. Sé tout lanfè-a ki mété ansanm pou ataké Granmèt la ansanm ak patizan-l yo. Sé kòm si sé dé jijman k-ap fèt la-a,

pandan y-ap jijé Jézu anndan kay prêt an chèf la, y-ap jijé Piè nan lakou-a. Sèvitè-a pa pi gran pasé Mèt li. Si yo rélé Mèt la Bèlzeboul, ki sa yo pap fè sèvitè-a (Jn 15-20)?

18. Sèvant la ki insisté an fas Piè-a, li pa palé ak Piè dirèktéman, sé ak tout moun ki alantou yo li palé, pou bay akizasion-an plis fòs. Lè démon-an fi-n pati, l-al chèché dèt démon ki pi fò pasé-l pou vi-n ataké moun nan ankò pou fè-l tonbé (Lc 11,24-26).

19. Moun yo ki té kampé bò kot Piè bò difé-a yo ajouté yon trouazièm prèv ki pi rèd ankò: sé langaj Piè ki montré li sé moun nan-Nò, minm koté ak Jézu. Gin okazion nou jouinn pou nou fè péché, si nou pa-t rankontré yo, nou pa t-ap tonbé nan péché-a. Tout foul moun sa yo kont Piè, sé fòs kont féblès. Prémie Psòm labib la di: mouin pap chita nan group moun ki pa respékté Bondié, mouin pap frékanté yo (Ps 1,1). Gin dé foua nou kaché sa nou yé, paské nou ront montré nou sé patizan fran. Nou mété dlo nan divin nou, paské nan group koté nou yé-a, yo t-a gadé nou krochi si yo t-a ouè n-ap lapriyè anvan nou manjé, anvan nou kòmansé travay, si yo ouè nou gin yon konpòtman sérié, si yo ouè nou pa kité gro mo sot nan bouch nou, nou pa ri nan konvèsasion ki sal. Époutan nou doué fè ouè kè nou, sé Tanp léspri Sin-an, Bondié palé avèk nou yon fason spésial. Sé pa sou konduit dèt moun l-ap mandé nou kont, sé sou konduit pa nou.

20. Pilat, sé joué l-ap joué ak jijman-an. Sé fotèy li sèlman li vlé prézèvé, li bay foul la satisfaksion, antan-l trété Jézu tankou yon jouèt. Tout késion l-ap pozé yo, sé pòz l-ap pran, li té déjà konnin davans sé jalouzi ki fè yo rinmèt Jézu nan min-l. Li pè pèdi plas li, li rinmèt Jézu nan volonté Juif yo. Nou mèt pèdi tout zanmi nou, rouj sé rouj min vèt sé vèt. Nou pa doué konplis krim pèson. Nou pa doué kité yo kondané yon inosan poutèt nou pè pou nou pa pèdi plas nou. Minm nan konvèsasion, lè nou tandé y-ap kritiké yon moun ki pa mérité sa, sé pou nou mété lavérité-a déyò jan-l yé-a, nou pa doué rét an silans pou nou fè tankou Pilat ki lavé min-l pou-l pa antravé, "pa konnin pa pri nan kont".

21. Barabas, sé mòd jan mési sa-a Juif yo t-ap tann, yon moun k-ap pran lézam pou révolté kont Romin yo, pou mété yo déyò nan péyi-a. Kòlè lézòm pa réglé jistis Bondié (Jc 1,20). Jézu di moun ki pran lézam pou touyé moun, li minm tou l-ap péri ak kout zam (Mt 26,52). Nan lajénèz Bondié té di moun k-ap vidé san prochin-l, y-ap vidé san-l tou (Gn 9,6). Juif yo pa-t kapab dakò avèk li, li minm dépi prémie prèch li nan sinagòg Nazarèt la, ki té déklaré okinn Profèt pa gin konsidérasion lakay li, li minm ki t-ap fè louanj vè Sarépta-a ak Naaman jénéral Siryin-an (Lc 4, 23-30), li minm ki

montré bèl jès Samaritin-an ki té panché sou malad Juif la atè-a antan-l pa okipé si sé nan péyi lènmi li soti, min li konsidéré-l kòm frè-l (Lc 10,29-37), li minm ki té fè ouè kijan sé yon Samaritin ki té tounin vi-n di-l mèsi nan dis moun li té géri ak maladi lalèp la (Lc 17, 16-18). Yo pa-t kapab dakò avèk li vré, li té fè louanj étranjé yo tròp, sé Barabas vré pou yo té chouazi, san sovaj li-a té réponn souaf vanjans yo-a (Ac 5, 36-37; 21,38) .

22. Sòlda romin yo pasé Jézu nan rizib anvan yo touyé-l, tankou yon chat k-ap joué ak yon rat anvan-l touyé-l. Sé plézi ki montré nan ki profondé lézòm kapab tonbé apré péché-a. Yo pa konsidéré moun parèy yo tankou moun antan yo konsidéré-l tankou bèt, yo minm tou yo rabésé tèt yo nan nivo bèt. Tout moun lènmi Jézu, ni Juif, ni Romin (Lc 23,12), li pou kont li. Sou Koua-a, li gin rézon vré ap di: "Bondié mouin, Bondié mouin, pouki sa ou lagé mouin?" (Mt 27,46; Mc 15,34).

23. Simon Sirénéyin poté Koua-a san-l pa-t vlé. Sé apré li vi-n aksépté. Sé nan jadin li té soti, li tou bouké. Li t-ap sonjé antré lakay li. Gin dé sèvis yo mandé nou, premié réaksion nou sé babié, sé réfizé. Lè premié mouvman-an fi-n pasé, nou aksépté. Sa pa vlé di nou pa gin mérit. Gin chaj ki sou do nou, nou t-a vlé lagé yo atè; sé Bondié ki ba nou lokazion pou nou édé-l poté Koua-l. Tout sèvis nou rann prochin nou, sé minm jès Simon-an nou fè.

24. Aléksann ak Rufus, si Sin Mak bay non yo, sé paské kominoté Krétyin yo té rékonèt yo a-Ròm kòm Krétyin (R 16,13; Mc 15,21). Sa vlé di sé yon fason Bondié rékonpansé papa yo Simon moun Sirèn nan antan-l fè fanmiy nan vi-n krétyin. Yon vè dlo nou bay yon pòv pap rété san rékonpans (Mt 10,42).

25. Dé asasin yo té gin yon plas adouat, yon plas agoch, dé plas sa yo Jak ak Jan té mandé yo. Lè Jézu rivé sou tè-a, sé ant mouton, kabrit ak bèf ak bourik pétèt li té kouché nan koté yo té konn gadé zannimo yo. Lè l-ap kité tè-a sé ant asasin yo klouré-l. Sé nou minm k-ap triyé moun pou nou fè zanmi, k-ap chèché rélasyon, konsidérasion, préstij. "Moun ki bésé tèt li, Bondié fè-l lévé-l" (Lc 18,14). Tout fason Jézu té vini pou moun ki nan péché (Mt 9,13; Mc 2,17), sé nan mitan péchè li mouri sou Koua-a.

26. Moun ki t-ap pasé yo t-ap déréspékté-l. Sé kozé kay sakré-a ki tounin ankò. Yo pa-t konprann nan ki sans Jézu té di-l. Époutan nan yon ti moman, kon Jézu ap rann dènié souf li, voual kay sakré-a pral chiré dé bout (Mc 15,38). Sé yon sign vré Tanp la sé li minm minm. Roua David té fè plan pou bati Tanp la; pitit li Salomon té bati-l pou li. Pandan tout tan roua yo t-ap kòmandé nan péyi-a, Tanp la té kanpé. Lè Nabukodonozò égzilé roua Sédésias, li boulé Tanp la. Lè pèp la tounin sot nan légzil, sé

Zorobabèl, yon désandan roua yo k-ap bati Tanp la ankò (Ag 1,14; Si 49,11). Roua Èròd, démi-Juif la, ap rébati-l pi gran. Tanp la toujou gin rélation avèk roua yo. Lè gin roua gin Tanp; lè pa gin roua, pa gin Tanp. Vré Roua-a pitit David la, ap mouri vandrèdi-Sin a touazè laprémidi, Voual Tanp la ap chiré la minm. Sé nan Jérusalèm anro-a Tanp la drésé, sé Mouton-an li minm minm ki sèvi kòm Tanp (Ap 21,22).

27. Éli té akoté Jézu ansanm ak Moyiz sou Mòn Tabò-a, nan Transfigirasion-an, li t-ap palé ak Jézu osijè "sòti" li t-apral fè Jérusalèm nan (Lc 9,31). Yo t-ap palé sou lamò-l ak Réziréksion-l. Yo té réprésanté laloua ak Profèt yo. Juif yo ap pasé Jézu nan rizib. Min vré Éli-a, sé Jézu li minm. L-ap gin pou-l monté nan sièl. É sé pa manto-l l-ap lagé, sé léspri Sin-an minm (cf 2 R 2,13; Ac 1,8).

28. Kapitèn nan, nan pié lakoua-a, fè déklarasion lafoua-l: "Réyéلمان vré sila-a sé té Pitit Bondié (Mc 15,39). Sa raplé déklarasion Sin Piè té fè o non tout Apot yo (Mc 8,29) lè-l té di: "Ou sé Kris la". Dépi nan kòmansman lévanjil la, Sin Mak té di sé "Bòn Nouvel osijè Jézu: Kris, Pitit Bondié" (Mc 1,1). Prémie pati-a té fini lè Sin Piè té déklaré Jézu sé Kris la (Mc 8,29). Dézièm pati-a fini lè kapitèn nan fè déklarasion Jézu sé Pitit Bondié-a (Mc 15,39). Prèt an chèf la té pozé Jézu késion sou dé bagay sa yo (Mc 14,61), li té mandé-l devan tribinal la si-l sé Kris, si-l sé Pitit Bondié. Dévan déklarasion Jézu-a, li té chiré rad li pou-l protésté. Koulié-a voual Tanp la li minm chiré pou-l protésté. Mésaj la kité Juif yo, l-al jouinn payin yo k-ap ba-l lafoua yo.

29. Médam yo ki t-ap suiv Jézu-a, yo té rété kanpé louin. Tout zanmi Jézu kanpé louin (Ps 88,19; 31,12; 38,12; Pr 19,7; Job 19,13s; Lc 23,49). Sé konsa minm Sin Piè t-ap suiv byin louin. Tout Apot yo té pati. Nan pami médam yo, nou konnin la Trè Sint Viej Mari li minm li la tou pré (Jn 19,25). Sou rout la Jézu té di médam yo pou yo pa kriyé sou li, pou yo kriyé sou péché yo ki lakoz soufrans li (Lc 23,28). Tradision-an di nou kijan Sint Véronik té siyé figi Jézu, kijan fas Jézu té kité pòtré-l sou mouchoua-l la, konsa li kité tras li nan nanm nou ki fèt sou pòtré Bondié. Nou fèt pou fiksé jé nou souvan sou Koua-a koté Jézu klouré-a, pou nou kalkilé sans soufrans li, jan nou konn chanté nan Chémin-Koua-a: "Gravez à jamais dans mon cœur les plaies du Christ Rédempteur".

30. Mari-Madlèn la tou pré, li minm Jézu té chasé sèt démon sot nan li-a (Lc 8,2). Sé li minm k-ap ouè Jézu an prémie jou Dimanch Pak la (Jn 20,16). Maché chèché pa janm dòmi san soupé. Ak pasians nou ouè trip foumi. Lè Bondié pa ko désidé ba nou yon bagay n-ap mandé-l dépi lontan,

nou pa doué dékourajé pou sa, sé pou nou gin pasians ak pèsévérans. Lè l-a vlé, l-ap aji vit (Is 60,22).

31. Mari, manman Jak ak Jozèf, sé li minm Sin Jan rélé sè la Trè Sint Vièj Mari-a (Jn 19,25). Pitit li yo, Jak ak Jozèf, sé kouzin Jézu, sé yo minm lévanjil la rélé "frè" Jézu yo (Mc 6,3; Mt 13,55). Kouzin Jézu sa yo, yo pa-t kouè nan li o kòmansman, dapré sa Sin Jan di nou (Jn 7,5). Jézu sou lakoua-a transfòmé tout kè. Sé li minm ki fè kapitèn nan ouè klè nan lafoua, sé li minm ki fè asasin-an mandé padon sou Koua-a (Lc 23,42), sé li minm ki fè Jozèf Darimati ak Nikodèm pran kouraj pou montré lafoua yo dévan tout moun (Jn 19, 38-42; cf Jn 3,1; 7,13.50). Nan mézi nou pran abitud fiksé jé nou sou Koua-a koté Jézu pandié-a, tou sa-k ankonbré kè nou, y-ap fonn tankou glas nan solèy...

32. Salomé, sé li minm Sin Matié rélé manman pitit Zébédé yo (Mt 27,56). Sé li minm ki té mandé Jézu yon plas adouat, yon plas agoch pou dé pitit li yo Jan ak Jak (Mt 20,20). Malgré Salomé, manman Jan, nan pié lakoua-a avèk pitit li Sin Jan, Jézu ap rinmèt Sin Jan pròp Manman pa-l, l-ap di: "Min manman-ou" (Jn 19,27). Salomé ap blijé fè sakrifis pitit li-a, li minm ki té mandé plas adouat, plas agoch pou yo. Jézu ba-l plis pasé sa-l té mandé-a (Ps 45,17), li bay pitit li pròp manman pa-l la Trè Sint Vièj Mari. Lè nou mandé Jézu yon bagay, li pa réponn nou dirèktéman, min li ba nou plis pasé sa nou mandé-a, sèlman pou nou résévoua-l, nou blijé vidé pòch nou ak tou sa ki ankonbré-l...

33. Jozèf d-Arimati, sé yon moun ki té gin konsidérasion, li té nan pami moun yo k-ap dirijé pèp la, sa yo rélé "notables" yo, sa lévanjil la rélé "ansyin" yo, akoté prèt an chèf yo ak profèsè yo. Ansyin yo té réprézanté pouvoua sivil, prèt an chèf yo té réprézanté pouvoua rélijjié, profèsè yo té réprézanté pouvoua sians. Sé toua katégori sa yo ki t-ap dirijé pèp la. Sé tou lé toua ki lènmi Jézu, sitou nan lapasion-an. Sèlman nan pami yo, té gin kèkzin ki té patizan Jézu an kachèt tankou Nikodèm, sa Sin Jan montré nou ki té vi-n jouinn Jézu nannuit la tèlman li té pè pou yo pa-t kasé-l nan gouvenman-an (Jn 3,2). Li té éseyé pran défans Jézu yon lè, yo té mété-l nan plas li (Jn 7,50-52). Ginyin ki pa-t ozé déklaré klè yo pou Jézu paské yo té pito konsidérasion ki vi-n sot nan moun pasé sa-k soti nan Bondié. Jozèf vlopé kò Jézu nan yon dra tou nèf, li mété-l nan kavo pa-l ki fèk fouyé, minm jan Jézu té chita sou ti bourik la koté pèsòn pa ko janm monté-a (Mc 11,2). Nan kè nou n-ap dépozé Jézu an silans pandan tout tan lapasion-an.

Sin Grégoua de Nazians di: Si nou sé **Simon Sirèn**, sé pou nou poté Koua-a dèyè Jézu, pou nou suiv li. Si, tankou **Bon laron-an**, nou klouré sou Koua

ansanm avèk li, sé pou nou adoré-l, li minm ki pandié sou Koua-a pou nou, épi pou nou sispann plinyin kont Bondié. Si nou sé **Jozèf Darimati**, sé pou nou mandé Kò li, pou nou bénéfisié sakrifis li-a. Si nou sé **Nikodèm**, k-ap sèvi Bondié nannuit, sé pou nou anbomé-l. Si nou sé **Mari-Madlèn**, lòt Mari-a, Salomé, Ja-n, sé pou nou kité dlo koulé sot nan jé nou, pou lè ròch la roulé, nou ouè Anj yo pétèt an premié, épi apré sa Jézu li minm minm (Oratio 45, 23-24; PG 36, 654-655; cf Liturgia Horarum II, Vatican 1974, 308-309).

Chak pèsonaj nan lapasion-an poté yon léson ba nou: Simon Sirèn, Bon Laron-an, Jozèf Darimati, Nikodèm, Mari ak Sint Fam yo. Nou gin dòt léson tou nan tout lòt pèsonaj yo. Sé tankou yon tablo vivan nou gin dévan jé nou, k-ap sèvi nou kòm modèl. N-ap mandé Manman Mari pou nou fè silans nan kè nou, antan n-ap fikse tablo sa-a ak léspri nou.

*
* *

DIMANCH RAMO C

Karaktè Istoua Soufrans Granmèt la, dapré Luk, sé yon bagay ki palé ak chak moun yon fason pèsonèl épi, sa touché santiman nou.

Sin Luk insisté sou rélasion pèsonèl avèk Jézu-Kri. Patizan-an gin pou-l kolé pèsonèlman sou Mèt la. Li insisté tou sou rélasion pèsonèl Jézu-Kri avèk Papa-a (Lc 23,34.40). Sin Luk fè Jézu palé nan sikonstans spésial, pou tèl moun spésial.

Jézu rélé Juda sou non-l (Lc 22,48). Piè nié toua foua, sé vré, min chak foua déklarasion-l nan pi fèb (Lc 22,54-62). sé kòm si li déjà kòmansé ap régrèt, joutan l-ap kriyé. Sé jé Jézu ki tonbé nan jé-l (Lc 22,61), ki fè-l sonjé, ki fè-l régrèt, pandan kòk la ap chanté-a. Sa pran nou nan zantray. Jézu té avèti Piè kijan Satan té réklamé yo, pou pasé yo nan pasoua tankou blé (Lc 22,31). Li lapriyé pou Piè pèsonèlman, pou lafoua-l pa tonbé (Lc 22,32). Li prévoua l-ap tonbé, l-ap édé-l lévé, li pap lagé-l. Sé yon fason pèsonèl l-ap palé ak kriminèl ki pandié sou Koua-a avèk li-a (Lc 23,42-43). Sonjé-m... Jodi-a minm ou-ap avèk mouin nan Paradi-a. Sé yon fason pèsonèl kriminèl la ap fè lòt la répròch pou mank respè li gin aléga Jézu (Lc 23,40-41), Jézu palé dirèktéman avèk fi yo k-ap kriyé sou li-a (Lc 23,28-31). Li bliyé soufrans li, pou-l ba yo avètisman sou sa k-ap rivé. Sou Koua-a, l-ap di: Papa, padonnin yo, yo pa konn sa y-ap fè (Lc 23,34). Suè Jézu té tankou gro gout san k-ap tonbé atè-a (Lc 22,44). Sé yon Mésajé ki sot an sièl la ki vi-n konsolé-l (Lc 22,43), tankou pou Éli (1 R19,5) Agar (Gn16,7; 21,17-19) nan savann nan. Pilat fè zanmi avèk Éròd sou do Jézu (Lc 23,12; Ac 4,27). Éròd té vlé ouè Jézu pèsonèlman, min instansion-l pa-t douat (Lc 23,8; 9,9). Pilat vlé lagé Jézu, min intansion-l pa douat tou. Sé pou-l kapab kinbé Barabas nan prizon, paské li pè Barabas, ki yon prizonié politik, ki té révòlté kont li. Jézu vi-n tounin yon zèl kat nan min-l. Sé avantaj li sèlman li konnin, li apuiyé sou Jézu kòm prêtèks pou asiré plas li (Lc 23,4.14.16). Éròd palé anpil nan kèsion l-ap pozé Jézu. Jézu réponn li ak silans sèlman (Lc 23,9). Zanmi Jézu yo kanpé louin, y-ap gadé (Lc 23,49). Fi yo égzaminé kavo-a. Jou saba-a, yo rét frankil (Lc 23,55-56). Nan silans sa-a gin yon rélasion spésial avèk Paròl Bondié-a

*

Sé lakoua-a ki fotèy tribinal koté jijman-an fèt la, koté péché-a éfasé-a, koté LAPÈ-a signin-an nan san Jézu-Kri, ki rékonsilié sièl ak tè-a (Col 1,20), li minm ki té di lè y-ap lévé-l anlè sou Koua-a k-ap sèvi-l machéskalié pou-l rémonté nan sièl la, l-ap rédi tout moun ak tout bagay vi-n jouinn li anpè-a (Jn 12,32). Sé nan soufrans li lapé nou-an rétonnin vi-n jouinn nou (Is 53,5).

Li té di li té gin yon Batèm pou-l résévoua, sé pa ti kras anvi li té anvi résévoua Batèm sa-a (Lc 12,50; Mc 10,30), Batèm lapasion-an, pou sièl la louvri ankò (Gn 8,11; Mc 1,10), pou lapè-a tounin sou tè-a ankò (Gn 8, 11; Mc 1, 10). Foul la déjà pot ramo nan min-l antan l-ap chanté "lapè nan sièl la" (Lc 19,38), minm jan Anj yo té chanté "lapè sou tè-a" nan nuit Noèl la, pou moun ki gin bòn volonté yo (Lc 2,14). Davans li minm li signin kontra lapè-a nan Pin-an ki vi-n tounin kò-l la, nan Divin-an ki vi-n tounin San-l nan (Lc 22,19-20). Li fè otorité-l vi-n tounin ésklav, antan-l bésé pou-l lavé pié Apot li yo (Lc 22, 26-27; Jn 13, 4-15), pou-l montré kijan lapè sé aksépté rénonse grad ou pou-ou sèvi lòt yo. Li montré sipériorité padon sou vanjans (Lc 22,52; 23,34), pou-l fè ouè sé vré jistis la sa, ki dépasé tout jistis y-ap pézé sou plato balans, y-ap méziré ak lo-n toual; pou-l indiké diréksion chémin lapè-a ki pap troncé-a, ki pap fè moun tonbé nan falèz la. Li ofri lapè pou kè ki chanjé mové santiman, ki aksépté kité dlo sot nan jé pou lavé péché (Lc 22,62; 23,27.40.48 cf Lc 7,50). Li minm Bondié Papa-a té voyé anonsé yon ané lapè (Lc 4,18-19), pou-l konsolé sa-k nan lapinn (cf Is 61,1-2), li pran soufrans nou sou do-l, joutan li sué san, atèl pouin sé li minm Anj la blijé konsolé, ankourajé (Lc 22,43). Pòv la ki sot nan travay li-a, ki aksépté ba-l soulajman-an, malgré li té présé-a, li jouinn lapè nan kè-l, paské li bliyé tèt li pou-l sonjé sa k-ap souffri-a (Lc 23,36). Rich la ki pran pozision kont injistis lòt chèf yo (Lc 23,50; cf Jn 7,50; 19,38-42), ki mét sa-l ginyin nan dispozi-sion-l nan, lapè jèmin nan kè-l. An-atandan, li minm, kè-l travèsé ak kout fouinn, pou sous lapè nou-a koulé Jn 19,34.

Épé Soufrans la chiré kè Manman-l (Lc 2,35; Jn 19,25-27), Rèn lapè nou-an. **LAPÈ ANFANTÉ NAN SOUFRANS.** Sé pa lapè tankou tè-a bay li-a (Jn 14,27); sé tout tan li mandé pou yo travay pou li (Mt 5,9), tankou yon madanm k-ap akouché (R 8,22; Jn 16,21), ki an "mal-danfan".

Kè pozé, Mésajé yo ap chanté-ou, lè Jézu té fèt nan vil Bètlèèm (Lc 2,14)
Kè pozé, pitit Juif yo ap chanté-ou, lè Jézu antré nan Jérusalèm (Lc 19,38).

Satan réklamé Simon ak Apot yo, pou-l pasé yo nan pasoua tankou blé. Jézu lapriyé pou Simon pou lafoua-l pa fébli, pou lè Simon rétonin, li rafèmi lafoua frè-l yo (Lc 23,31-32).

Simon Piè té konté sou pròp fòs li (Lc 22,33). Li pèdi asirans dévan yon fi (Lc 22,56). Li nié toua foua. Jézu gadé Piè, li raplé Piè fot li-a, minm jan Bondié té fè pou Adan nan jadin Paradi-a (Gn 3,9; Lc 22,61). Piè sòti déyò, li kriyé san (Lc 22,62). Toua foua apré Réziréksion-an Piè ap déklaré li rinmin Jézu. Jézu ap rinmèt li tout pouvoua ankò (Jn 21,15-17). Piè, ansanm ak

tout lègliz la ap kontinué Chémin-d-koua Jézu-a k-ap rivé nan péyi Roua Sièl la (Lc (,28; Mt 8,24).

Jès Piè fè-a, sé yon jès pénitans, sé sa ki pèmèt rékonsiliation-an fèt.

Souffrance: Nb 23,21; Jg 10,16; 2 Ch 21,19; 1 Mac 9,56; 2 Mac 3,17; 7,12; 9,5.18.28; Job 3,10; 6,10; 7,3; 14,22; 16,6; 30,27; 33,19; Q 6,2; 11,10; Sg 18,11; Is 14,3; 53,3.4.10; Jer 10,19; 15,13; Lc 24,26; R,8,18; 2 Co 1,5.6.7; 4,10; Ph 3,10; Col 1,24; 1 Tm 2,2; 2 Th 2,3; 3,11; He 2,10 10,32.34; Jc 5,10; 1 p. 1,11; 2,20; 4,13; 5,1.9; Ap 2,10.

Souffrir: Gn 41,55; Ex 17,3; Jg 15,18; 2 Sm 17,29; 2 R 2,19; 2 Mac 6,30; 7,18-32; Job 21,3; Ps 69,8; 101,5; Sg 11,14; 12,27; 18,1; 19,13; Si 4,2; 7,27; 16,27; 26,28; 32,24; 48,19; Is 23,4; 26,17 ,18; 43,2; 49,10; Jer 4,19; Os 8,10; Mt 8,6; 11,12; 16,21; 17,12; Mc 5,26; 8,31; 9,12; Lc 9,22; 17,25; 22,15; 24,46; Jn 16,33; Ac 3,18; 9,16; 17,3; 26,23; R 3,17; 1 Co 6,7; 12,26; Ph 1,29; 1 Th 2,14; 2 Th 1,5; 2 Tm 1,8; 2,9; He 2,9.18; 5,8; 9,26; 12,7; 13,12; Jc 5,13; 1 P2,19.21.23; 3,14.17; 4,1a.b.15.19; 5,10; Ap 2,2.3; 7,16.

Souffrant: Gn 34,25; 2 R 8,29; 2 Ch 22,6.

Souffreteux: Ez 34,21.

Bondié, Bondié, pouki sa ou lagé mouin: M-ap réglé p. 185; Jézu Granmèt nou obéyi, jous li mouri li obéyi, yo klouré-l li obéyi, 143; Papa, si-ou pa vlé vè sa-a pasé san pou-m pa bouè li, fò volonté ou fèt, 45; Papa mouin, chè Papa mouin, 449; Pèp mouin, ki sa-m fè ou, 299; Jézu désann pou nou san brui, san yon kri, san yon sèl mo 140; Jézu-Kri aksépté mouri, 478; Granmèt, m-ap rélé-ou 237; Mouin salué-ou, Granmèt, ou-k klouré sou koua-a, délivré-m sot nan péché-m, 570; Bondié Sovè mouin, pitié pou mouin, pou-ou délivré mouin, pitié mouin pou ou konsolé mouin, pitié pou mouin. Mouin souaf, min sé vinèg yo ban-m, Papa ouètè vè-a dévan-m, poutan sé sou ou m-ap gadé, sé pou-ou fè tou sa ou vlé (Ps 69): Flanbo p. 313; Ou pou kò-ou: Flanbo p. 177; Gro gout san: Flanbo p. 132 Kè séré: Flanbo p. 121; Mati: Flanbo p. 125; Modèl Koua-a: Flanbo p. 135.

*

* *

JÉDI-SIN

Kòmandman nouvo Jézu bay la, li adrésé-l bay patizan-l yo dabò (Jn 13,34, 1 Jn 2,8; 25,31-46; Jn 15.12.17; Lv 19,13; Mt 19,19; Lc 10,26s). Si antré yo youn rimin lòt, sé yon témouagnaj sa ap sèvi pou atiré moun déyo yo vi-n antré anndan légliz la (Ac 2,44-47J 4,32-35). Sé yon fason pou nou préché san nou pa palé, pou nou misionè san nou pa maché.

An 1975, pou Ané Sint la, Pap Pòl VI té ékri yon Mésaj ki té gin kòm tit: "Exhortation sur la réconciliation à l'intérieur de l'Église". Nan lèt sa-a li té mandé pou nou konsidéré légliz la kòm Manman nou, pou nou évité kritiké li, paské si nou vlé fè youn avèk Jézu-Kri nan légliz la, sé pou nou sonjé pou nou fè youn antré nou tou. Prémie-a pa kapab alé san dézièm nan. Prémie-a sé sa Pap Pòl VI rélé: "unité dans l'Église". Dézièm nan sé sa-l rélé: "unité de l'Église". Prémie-a, li di sé "une communion mystique, constitutive" (cf 1 Co 1,10; 12,12-27). Dézièm nan li di sé "une recomposition oecuménique de l'unité entre tous les chrétiens" (cf "Unitatis redintegratio")

Nou pa kapab rékonsilié avèk Jézu-Kri si nou pa rékonsilié antré nou. Pap Pòl VI di: "Que personne ne pense pouvoir éluder les exigences inévitables de la communion avec le Christ, la réconciliation et la paix en demeurant sur ses habituelles positions contestataires face à son Église; tâchons au contraire de faire en sorte que tous et chacun apportent une nouvelle et loyale contribution pour édifier cette Église de façon fillale, humble, positive. Ne devons-nous pas nous rappeler la parole ultime du Seigneur, pour l'apologie de son Évangile: 'Qu'ils soient parfaitement un et que le monde sâche que tu m'as envoyé' (Jn 17,23). N'aurons-nous pas la joie de revoir des frères aimés et lointains revenir à la joyeuse harmonie d'autrefois?" (Message de Paix: premier janvier 1975).

Lè nou viv kòm frè antré nou, sé yon "signe de crédibilité" li yé pou sa-k déyò yo, ki invité yo antré. Anvan nou gadé déyo pou nou chèché vi-n misionè, sé pou nou kòmansé antann nou anndan minm fanmiy nan, pou nou youn padonnin lòt, pou nou youn lavé pié lòt. Minm jan fidèl yo doué rés-pékté otorité légliz yo, antan yo évité kritiké yo, konsa tou moun ki gin résponsabilité yo nan légliz la, sé pou yo konpòté yo tankou moun k-ap sèvi, jan Jézu fè parapò a patizan-l yo.

N-ap nandé Manman Mari dé kalité sa yo; pou fidèl yo gin respè pa rapò a otorité légliz yo, pou Résponsab légliz yo gin dousè Mouton-an, antan yo rabésé tèt yo pou yo sèvi fidèl yo san yo pa kòmandé yo avèk arogans (1 p. 5,3; 2 Co 1,24; 1 Th 2,7j Tit 1,7). Épi n-ap sonjé pou tout moun: rékonsilia-

sion -an, sé chémin ki kondui nan diréksion lapè-a, dapré Mèssaj Pap Pòl VI té voyé pou premié janvié 1975 la: "La Réconciliation, chemin vers la Paix".

*

* *

VANDRÉDI-SIN

Lanmò Jézu sé pa yon échèk, sé yon Viktousa (Jn 16,33; 12,31; 14,30; 18,6, 1 Jn 2,14). Òrnénan sérémoni Vandrédi-Sin, sé pa koulè noua, sé koulè rouj. "O mort, où est ta victoire?" (1 Co 15,55). La mort est vaincue par la mort. La mort a été engloutie dans la victoire" (1 Co 15,54 1s 25,3; Os 13,14; Ap 20,14). Nan pié lakoua, la Trè Sint Vièj kanpé. Li résévoua dènié paròl Jézu tankou yon Téstaman: "Min pitit ou!" (Jn 19,27). N-ap chèche viv konsign sa-a pi byin, antan nou mét plis konfians nan kè la Trè Sint Vièj, tankou yon pitit parapo a Manman-l, antan nou fè minrn jès Sin Jan té fè-a: li pran-l lakay li (Jn 19,27). "Il l'accueillit chez lui, non pas dans son domaine, car il ne possédait rien en propre, mais il lui donna place parmi les responsabilités auxquelles il se consacrait avec cœur", daprè sa Sint Ogustin di nou (In Joan. Evang. tract. 119,3: CCL 36,359 cf Redemptoris Mater 45, n 130). "L' expression εἰς τὰ ἴδια va au-delà du simple accueil de Marie par le disciple au sens du seul logement matériel, de l'hospitalité dans sa maison, cela désigne plutôt une communion de vie qui s'instaure entre eux deux en vertu de la parole du Christ mourant", Pap Jan-Pòl II di nan Lèt ansiklik li-a sou la Trè Sint Vièj Mari-a (ib). Pap la di: "La dimension mariale de la vie d'un disciple du Christ s'exprime précisément, d'une manière spéciale par cette offrande filiale à la Mère de Dieu, qui a commencé par le testament du Rédempteur sur le Golgotha. En se livrant filialement à Marie, le chrétien, comme l'Apôtre Jean, "reçoit parmi ses biens personnels" la Mère du Christ et l'introduit dans tout l'espace de sa vie intérieure, c'est-à-dire dans son "moi" humain et chrétien. "Il l'accueillit chez lui". Il cherche ainsi à entrer dans le rayonnement de l'amour maternel avec lequel la Mère du Rédempteur "prend soin des frères de son Fils", "à la naissance et à l'éducation desquels elle apporte sa coopération" à la mesure du don qui est propre à chacun de par la puissance de l'Esprit du Christ. Ainsi également s'exerce la maternité selon l'Esprit, qui est devenue le rôle de Marie au pied de la Croix et au Cénacle (RM 45, cf Lumen Gentium 62.63).

Ant Vandrédi-Sin ak Dimanch Pak, limiè lafoua-a té rét limin nan kè la Trè Sint Vièj sèlman (2 p. 1,19, Ap 2,28). Tout Apot yo té pèdi lafoua (Mat 26,56), minm Sin Jan (Jn 20,8). Lè la Trè Sint Vièj lakay Sin Jan, ant Vandrédi-Sin-an ak Dimanch Pak la, sé Limiè-a k-ap kléré nan fènoua-a.

Lè "Ténèbres" Vandrédi-Sin-an anvayi nou, n-a sonjé "veilleuse" sa-a, Pr 31,18, ki limin nan kè la Trè Sint Vièj la, n-a gadé nan diréksion-l antan n-ap di avèk Épouz Kantik dè Kantik la: "Je dors, mais mon cœur veille (Ct 5,2; cf Mt 25,5s).

*

Jézu di katòz kalité paròl nan lapasion sélon Sin Jan-an. Yo chak gin yon sans pou vi nou.

1. "Ki moun n-ap chèché?" (Jn 18,4,6): Sé té premié paròl li, lè Jan ak André t-ap suiv li bò Joudin-an (Jn 1,38, cf 20,15 Lc 2,40). Sé sa l-ap répété nou chak jou: aprann chèché Jézu byin (Am 8,12; 5, 4-6.14.18; Os 5,6; Pr 1,28; Jn 7,34; 8,21; Is 55, 6; Lc 23,8; 9,9).

2. "Sé mouin minm" (Jn 18,5). Sé non Bondié "Je suis" (Ex 3,14) Jézu déklaré, ki fè troup sòlda yo ak Juda tonbé alaranvès la (Jn 18,6; cf 8,25.27.58). Min Jézu pa sèvi ak pouvoua-l pou-l détrui. Li kité yo lèvé, li kité yo pran-l. Otorité nou pa fèt pou krazé lòt yo (Mc 10,43; Jn 13,13s; 1 p. 5, 3; 2 Co 1,24; Tit 1,7; 1 Th 2,7), minm si tanzantan nou montré ki sa nou yé (2 Co 11, 21-12, 15).

3. "Si sé mouin minm n-ap chèché, kité sila yo pati" (Jn 18,8): Jézu sé Bon Gadyin-an, li bay lavi-l pou bann mouton-l yo (Jn. 10, 11; 15, 13). Lè nou gin rèsponsabilité nan yon sosiété, sé pa avantaj nou pou nou chèché, sé byin lòt yo. Sé nan sèvis yo nou yé.

4. "Mété épé-ou la nan fourou-a" (Jn 18,11): Lagè pa kapab mété lapè (Jc 1,20). Gin dòt mouayin pou défann doua nou. Bondié pi fò. Li pap janm kité nou péri (Mt 28, 20; Jn 14,18, Ps 46, 2; Is 26,1; 54,10). Britalité sé pa sign fòs, sé sign féblès.

5. "Mouin minm sé aklè mouin té palé pou tout moun:" (Jn 18, 20): Jézu pa fè ti group anba chal k-ap réglé kozé ki pa klè, k-ap chèché invanté tout kalité konbinézon pou fè tranzaksion. Sa-k kaché pou lèzòm, Bondié ouè-l aklè, l-ap dévoualé-l (1 Co 4, 5; 2 Co 5, 10), jou gran jijman-an.

6. "Si-m mal palé, bay prèv sa-k mal la" (Jn 18, 23): Mové trétman konn fè moun dépalé. Kondanasion Jézu té signin davans. Yo pa-t bézouin prèv pou kòmansé maltrété-l. Jistis mandé pasians pou mété limiè sou aksion yo. Kòlè toujou trò présé égzèsè vanjans ak jalouzi pou yo pa gin tan bay prèv noun nan inosan".

7. "Èské sé ak pròp fòs ou ou di sa oubyin sé dòt moun ki té di-ou sa osijè-m" (Jn 18, 34); Jézu té mandé Àpot yo: "Pou moun yo, ki sa-m yé?" (Mt 16, 13). Apré sa li té mandé yo: "É pou nou minm ki sa-m yé?" (Mt 16, 15). Sé pa sou sa yo di pou nou fè konviksion nou, sé sou ékspérians nou ginyin avèk Jézu yon fason pèsoneèl.

8. "Péyi koté-m Roua-a, li pa soti sou tè-a" (Jn 18, 35); Prinsip gouvènman Jézu pa minm ak prinsip gouvènman pa nou (Mc 10, 42s). N-ap éséyé dé-fann pouvoua nou ak fòs, ak zam, ak batay (Mt 2, 16), Li minm sé apati édi-kasion osijè lapè li instalé gouvènman-l. "Si-ou vlé lapè, préparé lapè"

9. "Ou di-l, sé Roua mouin yé" (Jn 19, 37): Sé pa yon roua k-ap montré prestij li, antan l-ap déplouayé tout kalité fòs lamé, antan l-ap montré tout kantité richès li (Is 39, 2; 1 R 10, 4ss). Sé Roua ki vi-n tou pòv, nan pak Bét-léèm (Lc 2, 7), ki viv tou pòv nan vil Nazarèt (Lc 4, 16ss), ak sou rout Galilé (Lc 9, 58), ki mouri tou pòv sou mòn Gòlgota (Jn 19, 23.41). Vré grandè pa bézouin réklam.

10. "Ou pa t-a gin okinn pouvoua kont mouin si yo pa-t ba ou-l sòt anro" (Jn 19, 11): Sé anro Jézu sòti, sé ak pèmision Bondié Papa-a yo kapab mét min sou li (Jn 3,13; 10,18). Nou sé pitit Bondié. Yon chévé nan tèt nou pap tonbé san pèmision Papa nou (Lc 21, 18).

11. "Madanm, min pitit ou" (Jn 19,26); Dépi nan nòs Kana, limiè Koua-a kléré. Jézu té di lè-l pa-t ko rivé (Jn 2,4). Divin-l té bay la, sé té sign san-l ki t-apral koulé-a. Li sé Tèt la, nou sé Kò-a (Col 1,18.24; Ep 1,22; 5,23). Mari sé Manman nou tout.

12. "Min Manman ou" (Jn 19,27): Jézu fè Testaman-l (Redemptoris Mater 45). Sa-l té ginyin kòm trézò-l la, li rimmèt li ba nou. Nan rnézi nou rinmin Mari, nou obéyi-l, nou défann onè-l, sé yon "acte de piété filiale" nou pozé, antan nou respékté Téstaman Jézu-a.

13. "Mouin souaf" (Jn 19,29): Sou bò pui-a Jézu mandé ti gout dlo pou pasé souaf li (Jn 4,7). Sa nanm nou li souaf. Chak bon aksion nou fè, sé souaf li n-ap pasé sou Koua-a (Mt 2,35).

14. "Li fi-n réalizé" (Jn 19,30): Sa-k té kòmansé dépi Kréasion-an (Gn 3,15; Ap 12, 1ss; cf Redemptoris Mater 24, 47), sé sou Koua-a li fini. Péché-a lavé nan san Jézu. Si gin yon bagay pou nou rayi, sé péché-a, sé pa moun.

*

Jézu té konnin davans tou sa ki t-apral rivé-l. Sé ak tout volonté-l li ofri tèt li nan sakrifis sa-a k-ap délivré nou anba pouvoua péché-a.

Lè-l di: "Ki lès n-ap chèché?", sa fè nou sonjé lè-l té di premié Apot yo, André ak Jan: "Ki sa n-ap chèché?" (Jn 1,38), lè l-ap di Mari Madlèn nan kavoua: "Ki moun ou-ap chèché?" (Jn 20, 15), lè-l té di la Trè Sint Vièj Mari ak Sin Jozèf nan Tanp la: "Pouki sa nou t-ap chèché-m nan, èské nou pa-t konnin sé nan afè Papa-m nouin gin pou-m yé?" (Lc 2,49). Sé yon invitasion

pou réajisté rézon ki fè n-ap chèché Jézu épi ki koté pou nou chèché-l pou nou jouinn li tout bon vré.

Lè-l di: "Sé mouin minn" nan, tout foul sòlda yo tonbé atè. Malgré pouvoua-l, li kite yo pran-l. Sé pa ak fòs nou kapab réglé afè Bondié (Jc 1,20). Lè nou fèb, sé atò nou pi fò, paské pouvoua Bondié déplouayé nan féblès (2 Co 11,9-10).

Jézu gin atansion pou-l protéjé Apot yo. Sé li minm sèl ki an kòz. Li pa fè bann pou défann kòz li. Li pa bézouin okinn témouagnaj lézòm nan lapa-sion. Sé sou Bondié sèl pou nou apuiyé (Jn 5,41).

Jan té gin antré-sòti kay prèt an chèf la (Jn 18,15-16), atèl pouin li té konnin non Malkus (Jn 18,10). Sé li minm ki fè Piè kapab antré nan lakou-a (Jn 18s16b). Juda tou té gin antré-sòti kay prèt an chèf la, min sé pou intèrè pè-sonèl pa-l. Patizan Jézu pi rinmin-an ak patizan ki pi lènmi Jézu-a, yo gin minm frékantasion. Sé pa nésésèman rélasyon sou pa déyò ki konté, sé fon kè nou.

A-n pa-t prèt an chèf ané sa-a (Jn 18,12), Romin yo té instalé Kayif nan plas li. Min Juif yo pa-t rékonèt Kayif. Sé toujou A-n yo té konsidéré kòm prèt an chèf. Sé poua yo blijé fè jijman-an, anba chal pasé kay A-n anvan, nan nuit la minm, malgré laloua pa-t rékonèt mòd jijman sa yo; tribinal pa-t gin doua louvri anvan yon moun té kapab réyisi rékonèt figi yon lòt moun nan lari, fò-l t-a omouin dévan-jou, sé poua Sin Luk pa rapòtè jijman ki fèt kay A-n nan (Lc 22,47-65). Kòm A-n pa-t gin pouvoua dévan Romin yo, sé Kayif k-apral rimmèt Jézu bay Pilat. Sé aparans jijman sèlman ki ginyin. Sé yon vèni yo pasé pou yo pa ouè si planch la pouri...

Jézu ap di Pilat: ringn li pa sou tè sa-a. Li pa vi-n fè konkirans ak pèsòn. Roua Maj yo té déjà sot nan péyi ki byin louin, pou vi-n rékonèt pouvoua-l, paské sé anro yo t-ap gadé, lè zétoual la t-ap dirijé yo-a. Lè yo gadé anba, nan palè Éròd la, Jeruzalèm, zétoual la disparèt. Sé lè yo rékòmansé gadé anlè, nan nuit ak nan savann, zétoual la réparèt (Mt 2,9), li kondui yo nan trou ròch là, Bétléèm. Sé anndan yon kè ki pòv Jézu vré Roua.

Jézu sèvi lavérité-a témouin. Yon konduit ki douat, sé yon rout ki paré pou Bondié parèt. Nou pa gin pou pran défans pròp tèt nou. Sé Bondié k-ap okipé sa.

Pilat di: sa-l fi-n ékri, li fi-n ékri-l. Juif yo pa-t vlé rékonèt Jézu pou Roua yo. Pilat pa kite yo chanjé fraz la. Lè Jézu rann dènié souf li, sé kapitèn nan k-ap déklaré li sé Pitit Bondié vré. Dé pouin sa yo—Roua Juif yo ak Pitit Bondié-a —sé dé Romin (Pilat; ak kapitèn nan) ki rékonèt yo. É sé sou dé-

pouin sa yo minm Jézu té jijé. Lè yo té tradui-l dévan Kayif, tribinal Juif yo, yo té mandé-l èské-l sé Pitit Bondié. Lè yo té tradui-l dévan Pilat, tribinal Romin yo, yo té mandé-l si-l sé Roua Juif yo, Mouins nou pran défans pròp tèt nou, plis Bondié okipé kòz nou.

Nan pié lakoua-a la Trè Sint Vièj Mari la. Jézu rinmèt Manman-l ba nou nan rnin Sin Jan. Sé Téstaman-l (cf Redemptoris Mater 45). Yon moun ki rinmin la Trè Sint Vièj, li gin anpil pri nan kè Jézu (Si 3,4).

Jézu di: "Mouin souaf". Sé kè nou li souaf, minm jan li té rmandé Samaritèn nan dlo-a. Fraz sa-a ap kontinué kònin nan zòrèy nou tout tan. Tou sa n-ap fè ki bon, sé dlo n-ap bay Jézu pou pasé souaf li.

Jézu di: "Tout bagay fi-n réalizé". Mision-l fi-n akonpli. Min koté pa-l la fini, pa nou-an kòmansé, pou nou fè mérit li yo pasé nan lavi nou (Col 1,24).

Kè-l pèsé, san ak dlo soti. Bondié té andòmi Adan, li té pran kòt li, li té fè yon fi pou marié ak li (Gn 2,21s). Jézu andòmi sou Koua-a. Legliz fèt. Sé Madanm marié-l, 2 Co 11,2; Ep 5,26-27.

Nou gin dévoua pou nou fidèl, lè nou konsidéré nan ki sikonstans lavi nou jèmin.

Tout sémèn sint la, dépi Dimanch Ramo, légliz panché sou éta Soufrans Granmèt la yon fason spésial, pou-l fè fidèl yo tiré léson sou sans Soufrans sa yo. Dimanch Ramo, yo li Istoua Soufrans Granmèt la dapré lévanjil sinoptik yo (Sin Matié pou ané A, Sin Mak pou ané B, Sin Luk pou ané C). Vandrédi-sin, yo li Istoua Soufrans Granmèt la dapré Sin Jan. Lindi-Sin, prémié léktu-a sé prémié Kantik Sèvitè Granmèt la (Is 42,1-7); madi-Sin, prémié léktu-a sé dézièm Kantik Sèvitè Granmèt la (Is 49,1-6); mèkrédi-Sin, prémié léktu-a sé touazièm Kantik Sèvitè Granmèt la (Is 50,4-9). Vandrédi-Sin, prémié léktu-a sé katriyèm Kantik Sèvitè Granmèt la (Is 52,13-53,12). Sèvitè sa-a, sé Jézu-Kri li minm minm, ki té di li pa vi-n pou fè yo sèvi-l, min pou-l sèvi épi pou-l bay lavi-l pou délivré pakèt moun yo (Mc 10,41, cf Jn 13,13s; 1 p. 2,22-24). Psòm-répons Vandrédi-Sin-an, sé sa Jézu té di lè-l té sou lakoua-a: "Papa nan min-ou mouin rinmèt léspri-m" (Ps 30 = 31). Vré Prèt an chèf la dapré dézièm léktu Vandrédi-Sin-an sé Jézu li minm, li sé Prèt, li sé lotèl, li sé sakrifis (He 4,14-16; 5, 7-9).

Sin Jan montré kijan Jézu al dévan lanmò-a ak pròp volonté-l, li konnin davans tou sa k-ap pasé. Li montré pouvoua-l ginyin pou-l fè tout lamé Juif yo rékilé tankou lamé Faraon-an ki té tonbé nan lanmè-a (Ex 14,27; Ps 136,15). Lè-l di: "Sé mouin minm" (tankou non "Yavé" Granmèt la li prononsé-a: Ἐγώ εἰμι "Je suis" Jn 18,6; cf 8,28.58), tout moun tonbé alaranvès. Sin Jan

montré kijan Juda tonbé ansanm avèk yo tou. "Ki moun n-ap chèché?" Késion sa-a sé yon klé li yé nan lévanjil Sin Jan-an. Dépi nan kòmansman, y-ap chèché konnin kilès Jézu yé. Jouskalafin y-ap chèché-l toujou. Tout lavi yon Krétyin sé chèché Jézu. Min chèché-l byin, pa pou ésplouaté-l. Jézu gin san-sibilité pou patizan-l yo. Li égzijé pou kité yo alé anvan li kité yo arété-l. Jézu pa bézouin pèsòn défann li. Ak pròp volonté-l l-ap maché nan lanmò, l-ap bouè kalis la Papa-a té paré pou li-a; Sin Piè gin pou-l rinmèt épé-l nan fouro-l. Malgré tou sa, lè yo arété Jézu, yo pè-l toujou, yo maré-l. Sa pa-t nésésè, sé ak pròp volonté-l l-ap maché. Minm lè-l té fi-n antéré, yo té pè-l toujou (Mat 27, 62-66). Yo kondui Jézu kay A-n anvan yo minnin-l kay Kayif. Romin yo té dégradé A-n kòm prèt an chèf, yo té mét Kayif nan plas li. Min Juif yo pa-t janm aksépté sa. Yo té konsidéré A-n toujou kòm vré prèt an chèf, sé pou sa yo kòmansé al dévan-l anvan y-al kay Kayif.

Simon Piè pa séparé fasil avèk Jan (Jn 21, 21; Ac 3,1; 4,13; 8,14; Jn 13,23-24). Sé ansanm yo té yé dépi lè Jézu té rélé yo bò lanmè-a (Mc 1,16-20; Mt 4,18-22). Jan fè Piè antré nan lakou prèt an chèf la. Dépi-l kontré ak sèvant ki t-ap véyé bariè-a, Piè déjà kòmansé ap dépalé. Sèké fi sa-a ki abitué égzaminé tout moun k-ap antré-sòti, li té ouè byin nan ki group moun Piè té yé. Min Piè démanti. Jézu ap tonbé toua foua sou rout Gòlgota-a, Piè sou prémié so-l: "Mouin pa ladan-l". Dayè, li pa vlé nan palé anpil ap fè diskision avèk fi-a, sé antré li bézouin antré pou-l ouè sa k-ap pasé. Li pa konnin si Satan té réklamé-l pou pasé Apot yo nan pasoua tankou blé (Lc 22,31). Sé chèf la Satan vizé pou-l fè tout lòt yo fébli. Péché-a fè Piè vi-n frèt. Li santi bézouin pou-l chofé kò-l, min bò brèz difé-a li pa kapab rét kaché, gin limiè. Pito sé nan limiè Jézu (Ps 36,10) ak nan chalè kè-l (Ps 91,4) li t-al bloti kò-l.

Pandan tan sa-a Jézu ap sibi késion an kachèt, nan fènoua, nan nuit, nan min prèt an chèf la. Sé yon sanblan jijman. Jijman sa-a dayè alé kont laloua-a, paské dapré laloua-a yo pa-t gin doua jijé moun nan nuit, fò dévan-jou té déjà lévé pou yon moun té kapab rékonèt prochin-l pou yon jijman té kapab kòmansé nan tribinal. Tribinal pa louvri nannuit. Prémié répons Jézu bay prèt an chèf la mérité-l yon souflèt nan min yon sèvitè. Min Pitit Bondié-a sé Sèvitè Granmèt la k-ap soufri sa Profèt la té di nan touazièm Kantik Sèvitè-a (Is 50, 6); "mouin pa viré figi-m dévan souflèt yo ak kraché yo" (= prémié léktu mèkrédi-Sin). Apré sanblan jijman-an, A-n voyé-l tou maré bay Kayif.

Yo tounin sou Simon Piè. Li toujou ap chofé kò-l bò difé-a. Péché-a fè-l frèt. Foua sa-a sé pa sèvant la ki nan bariè-a ki pozé-l késion-an min sé anpil moun alafoua. Limiè difé-a kléré-l pi byin. Li réponn minm jan "mouin pa ladan-l". Épi, li pa déyò bariè-a ankò, min li nan lakou-a, yo kapab mét min

sou li pi fasil. Sa pou-l fè? Mèt li maré, li san défans. Ata épé-l la pa kapab sèvi-l. Pou touazièm foua-a, témouagnaj la pi klè, sé fanmiy Malkus la minm ki akizé-l, sa-l té koupé zòrèy li-a, li té ouè-l nan jadin-an ak pròp jé-l. Piè démanté. Kòk la chanté.

Granmatin rivé. Yo kondui Jézu al nan palè Pilat la. Sé yon Romin. Yo pap antré lakay li, otréman yo pap an règ avèk laloua Juif yo, yo pap kapab manjé Pak la. Yo pa ézité poutan kondané yon inosan. Min y-ap obéyi ti règléman pou pa antré kay étranjé. Konsians yo pèvèti vré. Yo di Pilat: "si sé pa-t yon kriminèl, nou pa t-a minnin-l ba ou". Sa vlé di sé Juif parèy nou li yé, nou pa gin okinn intèrè pou nou rinmèt li nan min yon etranjé, fò-l koupab vré. Sé kòm si yo di- l: ou pa minm bézouin jijé-l. Ou mèt tou kondané-l. Démach nou-an kont. Yo di: "nou pa gin doua touyé pèsòn", min kout lang yo-a déjà kondané-l pou touyé-l. Pilat anbarasé avèk ka sa-a. L-al fè va-é-vyin sot kot Juif yo al kot Jézu yon pakèt foua, sitou Juif yo pap antré nan palè-a pou yo pa souadizan sal. Nan Istoua Soufrans Granmèt la dapré Sin Jan-an, sé konvèsasion sèlman prèské ki ginyin. Déroulman-an vif, sé kèsion ak répons, moun ki gin ròl pou rakonté Istoua-a pa gin tan pran souf; anvan-l di yon mo, sé prezanté l-ap prezanté pèsonaj yo. Akizasion Juif yo fè sou Jézu-a lè yo t-ap jijé-l nan tribinal pa yo-a, kay A-n ak Kayif, sé "li di li sé Pitit Bondié". Min akizasion yo fè kont li dévan Pilat, évidaman sé "li di li sé roua Juif yo", pou yo mété-l nan politik avèk Séza épi avèk Pilat ki réprézanté pouvoua ak otorité Séza. Jézu fèl déklarasion sou Pons Pilat dapré sa Sin Pòl ap di Timoté (1 Tm 6,13). Li sé Roua lavérité. É sé pou lavérité-a y-ap kondané-l. Pilat tèlman mélé dévan ka sa-a ki dépasé-l, li vlé fè vit pou-l lagé Jézu, li vlé profité okazion sa-a tou anvan Juif yo mandé Barabas, prizonié politik la. Kon-l palé, yo mandé Barabas. Pilat fè yon mové manèv kòm jij: Li mét Jézu sou minm pié avèk Barabas. Kòz Jézu nan jijman, Jézu pa ko kondané. Dapré abitud la, sé yon kondané yo té konn lagé chak ané. Jézu minm pa ko fi-n jijé, Pilat mété tèt li an balans avèk tèt Barabas. Si yo mandé Barabas, y-ap blijé touyé Jézu. Pilat montré li manké ladrès nan kèsion jijman sa-a, paské intèrè-l avéglé-l, li pè Juif yo, li pè pèdi plas li. Li fè sanblan l-ap défann Jézu, min sé pròp fotèy pa-l l-ap défann. Sa-k pi rèd la, li vlé kontanté Juif yo antan-l pèmèt yo fè Jézu pasé mati pou Juif yo kapab satisfè pou yo pa bézouin mandé Barabas ankò. Époutan kòz la pa ko jijé, li minm minm li pa ouè sa-k mérité lanmò-a. Pilat montré li sé ti moun nan tout alé-vini sa yo l-ap fè-a. Pilat soti avèk Jézu tou bingnin nan san-l, très pikan sou tèt li, rad rouj vif sou li; bagèt rozo nan min-l, pou Juif yo satisfè. Sé kòm si sé toro méchan ki ouè koulè rouj, k-ap fonsé, yo rélé pi rèd: "Klouré-l sou koua". Pilat antré avèk li ankò pou-l pozé-l kèsion, foua

sa-a sou késion Pitit Bondié-a Juif yo réyisi akizé-l la, sa-k fè Pilat pi pè toujou-a. Nan lévanjil dapré Jan-an, ròl Pilat la dévlopé anpil an fas Jézu. Lè Pilat késionin Jézu ankò sou aspè sa-a "Koté-ou sòti?", Jézu pa réponn, sé pa kouliè-a pou-l mandé-l sa. Sé pou-l té kòmansé anvan-l té fè bat li, pou-l kontanté Juif yo, Pilat réklamé doua li ginyin sou Jézu. Jézu di-l pròp pou-voua pa-l sé anro li sòti, épi li minm minm sé anro li soti; konsa si Pilat gin yon doua sou li, sé anro doua sa-a soti pou pèmèt li fè kichòy sou Jézu. Lè sa-a Pilat chèché yon jan pou-l lagé Jézu; li ouè byin li an-afè ak yon bagay ki dépasé-l vré; époutan li pè pedi plas li. Juif yo konn sa. Sé poua yo di-l: "Si-ou lagé-l, ou pa zanmi Séza". Chouazi ant li minm ak Séza. N-ap fè rapò voyé a-Ròm pou nou fè-ou pèdi plas ou. Pilat dékontrolé.

Pilat mét Jézu chita sou fotèy tribinal la. Jézu vi-n tounin jij li minm minm pou-l jijé Juif yo k-ap akizé-l yo. Malgré tou sa Pilat fè, li pa rivé jouinn bout Juif yo. L-ap réglé yo: l-ap ékri: "Jézu moun Nazarèt roua Juif yo". Li pap chanjé sa-k ékri sou pankat la malgré réklamasion yo.

Sé Jézu minm ki poté Koua-l sou zépòl li tankou Izaak té poté boua-a pou papa-l t-al sakrifé-l la sou mòn Moriya-a (Gn 22,6), koté yo té vi-n bati Tanp Jérusalèm nan (2 Chr 3,1; Gn 22, 2.) koté la Trè Sint Vièj Mari ap ofri Jézu nan plas Izaak la, lè l-ap résévoua révélation épé soufrans la nan bouch Siméon (Lc 2,23; cf Redemptoris Mater 16). Yo pa chiré gran ròb long Jézu-a. Li mouri pou-l rasanblé pitit Bondié yo vi-n fè yon sèl (Jn 11,52). Lè ringn Israèl la t-ap chiré sou tan Roboam pitit Salomon ak Jéroboam nan (1 R 11,30), Profèt Ahiya té chiré rad li nan 12 pòsion, li té bay Jéroboam 10 pòsion, li té kité 1 pòsion pou Roboam. Jézu vi-n pou-l rasanblé pitit Israèl yo ki té gayé yo. Rad li-a pa chiré. Gran ròb sa-a tou, sé té ròb Prèt an chèf la, sa-l té konn rnété lè-l té konn sakrifé nan Tanp la, Jézu abiyé ak rad la-mès li-a.

Nan pié lakoua-a, Manman-l résévoua dènié Téstaman-l, dènié volonté-l. Jan réprézanté tout patizan yo Jézu rinmin yo (Jn 13,1; 19,26), Li konfié yo nan min Mari kòm pitit li. Mari minm, li rinmèt yo li kòm Manman yo. Mari sé Manman légliz la. Nan kòmansman kat Évanjil yo (Mt 1,24), sé Jozèf ki pran Mari lakay li, lè Jézu fèk ap antré sou tè-a. Nan finisman kat Évanjil yo (Jn 19,27), sé Jan ki pran Mari lakay li, lè Jézu ap pati kité tè-a.

Dépi lè sa-a Jézu ouè tout bagay fi-n réalizé (Jn 19,28a). Dènié paròl Jézu, apré li fi-n di "mouin souaf", sé "li fi-n réalizé". Souaf Jézu-a sé souaf rinmin. Sa-l té di fi Samari-a bò pui Jakòb la (Jn 4,8): "ban-m ti gout dlo". Sé nanm yo li souaf. Min sé vinèg yo ba li. Li té bay bon divin nan nòs Kana (Jn 2,1-11). Yo rinmèt li vinèg nan nòs l-ap fè ak légliz la, nan pròp nòs pa-

1. Chanté "Impropères" yo (répròch) détayé tou sa pèp la fè kont Granmèt la, kijan li ingra (Mi 6,3): "Pèp mouin, ki sa-m fè ou, ki lapinn mouin fè-ou, réponn mouin!". Profèt Izayi louvri yon prosè kont pèp la (Is 5,1-7): pié rézin-an Granmèt la planté-a, ki bay grinn rabi yo, k-ap fè dan moun gasi-a.

Jézu sé Mouton Pak la, yo pa-t doué krasé okinn zo-l (Ex 12,46). Sé li minm vré Rou-a k-ap fè réfòm roua Jozias pa-t réyisi fè-a, sa-k té mouri nan lagè Mégido-a (2 R, 23,29), sa Jérémi té chanté konplint sou li-a (2 Chr 35,25). Konplint sa-a, lékòl Profèt Zakari-a ap transpozé-l sou Jézu-Kri li minm (Za 2, 10-11): "Y-ap gadé nan diréksion sila-a — mouin minm — yo pèsé-a" (cf Jn 19,37). San ak dlo koulé sakrèman lafoua-a, lékaristi ak Batèm spésialman.

Dé patizan ki té sèvi Jézu an kachèt yo, Jozèf darimati avèk Nikodèm, kon Jézu fi-n mouri, yo déklaré lafoua yo karé. Sé yo minm ki antéré-l. Nan kè Mari tou, li antéré. Mari ap kinbé "veilleuse" chandèl lafoua-a limin nan kè-l pou-l bay tout limiè-l jou Dimanch Pak la. An-atandan, pandan gran Saba-a, tout jounin samdi-a, sé li sèl sou tout tè-a, k-ap kinbé lafoua-a limin pou tout moun. Tout patizan yo té pèdi lafoua. Yo té fébli. Minm si yo fè yon jès, éspoua délivrans yo té ginyin-an pa chita fèm (Lc 24,21). Mari sèl kinbé éspérans la. Sé poua jou samdi-a rézèvé pou li.

Jadin koté yo antéré Jézu-a té gin yon kavou tou nèf, pèsòn pa-t ko antéré ladan-l. Jézu pa abité nan kay moun fè ak min yo (Ac 17,24; 7,48-50, He 9,11,24; 1 R 8,27; Is 66,1; Jer 23,24), li vi-n nan vant yon Vièj ki Imakilé Konsépsion. Lè-l té monté sou ti bourik la pou jou ramo-a, sé yon ti bourik pèsòn pa-t ko monté (Mc 11,2). Lè-l vi-n nan kè nou, fò pa gin péché ki sal konsians nou. Fò kè nou tou nèf. Li vi-n pou fè tout bagay tou nèf (1 Go 5,7; Ap 21,5; 2 Co 5,17;; Is 43,18), Sé sans Pak la sa.

Nan Jan 19,17-37, gin insistans sou rérealizasyon bagay ki ékri. Tout tan, sé ti réfrin sa-a ki tounin: "pou sa ki ékri-a té kapab rérealizé... tèl jan tèl maniè" (Jn 19,24,28,36-37). Sot nan Jan 19,17 rivé nan Jan 19,37, gin kòm sink pasaj ki rakonté sink évenman. Dé premié yo (Jn 19,17-22 pankat la, épi Jn 19,23-24 rad yo) ak dé dènié yo (Jn 19,28-30 souaf la, épi Jn 19,31-37 kout pik la) sé rérealizasyon bagay ki ékri. Min sa-k nan mitan-an (Jn 19,25-27 Mari kòm Manman) sé rérealizasyon tout bagay (jan Jézu konstaté nan dènié kout jé Profèt li fè-a: Jn 19,28 εἰδῶς).

a) Jn 19,17-22 (pankat)

b) Jn 19, 23-24 (rad)

c) Jn 19,25-27 (**M A N M A N**)

d) Jn 19,28-30 (souaf)

e) Jn 19,31-37 (pik)

Lè yo vi-n arété Jézu-a, li di: "Ki moun n-ap chèché?" (Jn 18,4). Sé premié mo ki té soti nan bouch li, apré Batèm Jan-Batis la, lè André ak Jan t-ap suiv li-a. Li té mandé yo: "Ki sa n-ap chèché?" (Jn 1,28). Li té di Mari ak Jozèf, lè-l té gin douzan, lè yo té pèdi-l épi yo té jouinn li apré toua jou nan Tanp la: "Pou ki sa nou t-ap chèché-m?" (Lc 2,49). L-ap mandé Mari-Madlèn, lè-l fi-n lévé vivan-an nan kavo-a: "Ki moun ou-ap chèché?" (Jn 20,15). Li toujou kontinuyé ap mandé nou: Ki sa n-ap chèché osijè-l. Gin divès manié pou chèché Jézu. Yo kapab chèché-l pou satisfè kiriozité, tankou Èròd k-ap chèché-l pou-l ouè mirak (Lc 9,9; 23,8), Yo kapab chèché-l pou fè-l méchansté, tankou Juif yo k-ap chèché-l pou yo touyé-l (Jr 7,1.19.20,2.5, 30; 37.40). Yo kapab chèché-l pou intèrè pèsònèl, tankou foul la k-ap chèché-l nan dézè-a, apré li té fi-n bay pin-an (Jn 6,26). Yo kapab chèché-l pou aprann désizion-l, pou fè volonté-l, tankou Mari ak Jozèf ap chèché-l (Lc 2,44.45.48). Minm si yo pa konprann sa-l vlé di, Mari kinbé paròl la nan kè-l, li kalkilé-l, pou-l réglé tout lavi-l sou li (Lc 2,51).

Ki sa n-ap chèché osijè Jézu? Sa vlé di ki sa Jézu yé pou nou (Mt 16,15). Sé deklarasion solanèl li fè nan lapasion-an, ki montré nou sa-l yé tout bon. Nan lévanjil sèlon Sin Jan-an, nou ouè kijan li réponn sòlda yo k-ap chèché Jézu Nazarèt la. Li di: "Sé moun minm" (Jn 18,5). Mo li anlouayé-a, sé minm sa Bondié té réponn Moyiz la, sou mòn Sinayi-a: "Je suis" ('Εγώ ειμι cf Ex 3, 14; Jn 8, 24.28.58). Sé minm non ak Bondié li ginyin. Sé Bondié li yé. Yo vi-n chèché yon moun, yo tonbé sou Bondié. Laprèv, osito Jézu fi-n déklaré sa-l yé sou fòm sa-a, la minm, yo tout yo tonbé sou do. Jida ki té nan pami yo-a, li tonbé li minm tou sou do (Jn 18,6). Si-l kité yo arété-l, sé li minm ki vlé. Li fè Pilat konnin sé anro li soti. Sé poussa si Pilat gin pouvoua sou li, sé anro ki ba-l pèmision sa-a (Jn 18,16; 19,11). Li sé Roua tout roua. Li sé Chèf tout chèf. Min sé lè-l maré tankou yon ésklav li déklaré sa, lè-l sètèn yo pap atann li pran lèzam pou soulvé pèp la kont Romin yo (cf Jn 6,15). Réyèlman vré sé Barabas y-ap pito pasé-l (Lc 23,18; cf Ac 5,36s; 21,38).

Si anpil moun t-ap chèché Jézu, sé paské yo té espéré yon libérasion ki rété onivo tè sa-a (Lc 24,31; Ac 1,6; Mc 10, 37), minm si sé pou rinmèt rouayom nan nan min Bondié, mouayin yo té chouazi-a sé lagè (2 Ma 15,15; Mt. 16,14; Lc 22, 38; Jn 18,10; Mt 26,51; Mc 14,47, Lc 22,50), sé révòlt, sé lanmò. Mésaj Jézu kontrarié plan yo. Volonté Bondié, dapré lékòl Profèt Izayi-a, sé sa Jézu vi-n réalizé: Yon Mouton y-ap kondui labatoua (Is 53,7, Jn 1,29.36; Gn 22, 7; Ex 12,1-14; Jer 11,19), Lanmò-l sé sakrifis ki éfasé péché-a. Sé vré viktoua sou Satan (Jn 16,33; 12, 31; 14,30; Gn 3,15; Ap 12, 9; 1 Co 15, 54-55), ki kòz péché-a ak kòz lanmo-a.

Nan pié Koua-a, doulè ap chiré kè la Trè Sint Vièj Mari (Lc 2,35). Min li sonjé Jézu té mandé-l pouki yo t-ap chèché-l, èské yo pa-t konnin sé Kay Papa-l pou-l té yé (Lc 2,49). Sé apré toua jou yo té jouinn li (Lc 2,46). Apré toua jou l-ap jouinn li vré byin vivan (Jn 2,19; 20,17). Pa gin Vandrédi-Sin san Dimanch Pak. Min pa gin Dimanch Pak tou san Vandrédi-Sin. Anvan sous lavi-a éklaté, nan légliz ak sakréman yo, fò kè Jézu pèsé ak kout fouinn sòlda-a, pou san ak dlo sòti (Jn 19, 34; Ez 47,1; Za 13,1; 14, 8; Ps 46,5; Joel 4,18; Ap 22, 1). N-ap mandé Manman Mari pou-l aprann nou dépasé fènoua ki vlopé nou jou Vandrédi-Sin-an pou nou gadé nan diréksion Limiè k-ap lévé jou Dimanch Pak la.

*

Croix: Ez 9,4.6; Mt 10, 38; 16, 24; 20, 19; 23, 34; 27, 32.40.42; Mc 8, 34; 15, 21.30.32; Lc 9,23; 14, 27, 23, 26.39; Jn 19,17.19.20.25.31; Ac 2, 23; 1 Co 1, 17.18; Ga 3,1; 5, 11; 6,12.14; Ep 2,16; Ph 2, 8; 3, 18; Col 1, 20; 2, 14; He 12, 2.

*

* *

DIMANCH PAK

Pak sé yon Kréasion, yon Garanti, yon Pasaj, yon Rékonsiliation, yon Kontra, yon Limiè, yon Kè, yon Batèm, yon Réziréksion.

1.- Pak sé yon Kréasion: yon nouvo Kréasion. Bondié rélé sa-k pa anyin pou-l vi-n égzisté. Bondié rélé mò yo pou yo vi-n jouinn lavi (R 4, 17). Bondié rélé sa-k nan péché yo pou yo vi-n réprann lagras.

Chak fousa yon moun ki gin bon volonté sot nan péché, sé yon nouvo kréasion, sé yon Pak, sé yon patisipasyon nan réziréksion Jézu-Kri, pandan l-ap tann pou-l jouinn pòsion pa-l avèk tout kò-l nan réziréksion sa-a.

2.- Pak sé yon Garanti: yon nouvo garanti pou lafousa nou, nou minm pitit Abraam yo. Si Jézu-Kri pa résisité, nou nan péché nou yo toujou (1 Co 15, 17). Lavi n-ap viv kòm Krétyin-an, sé yon lavi nan lafousa ki bazé sou lavi Jézu-Kri ki lévé sot nan lanmò (He 11, 1). Sé konsa nou vi-n tounin pèp li. Kò Sara té déjà mouri lè Bondié rélé-l pou-l fè yon jénérasyon soti nan li (Rom 4, 19). Izaak té fi-n mouri lè Bondié sovè-l nan min Abraam (Gn 22, 12). Sé yon "Rès" ki sot nan lanmò k-ap sèvi Bondié pou-l réfè pèp li-a (Is 7, 3; Am 9, 11; 4, 11; 5, 15; 6, 10; So 3, 13). Lè Abraam aksépté touyé pitit li-a, sé éspoua lézòm li té aksépté touyé, pou-l konté sou Bondié sèl. La Trè Sint Vièj Mari réalizé sa Abraam té fè tankou yon sign nan, li aksépté ofri sèl Pitit li-a, li vi-n Manman tout Krétyin yo ki vi-n tounin tout yon pèp nan Jézu-Kri ki lévé byin vivan (Gn 22, 2; 2 Ch 3, 1; 1 Ch 21, 15; Lc 2, 22-38). Pak sé yon garanti, yon nouvo garanti pou lafousa nou.

3.- Pak sé yon Pasaj: nouvo pasaj lanmè rouj la. Sé pou nou aksépté nouayé, plonjé nan lanmò Jézu-Kri, pou nou résisité avèk li nan Batèm nan. Nou mouri kité péché-a, nou viv nan lagras la. Lanmè-a kouvri lènmi pèp la, sétadi péché yo. Nou pa gin doua pè péché-a ni ménas li, ni défo nou yo k-ap fè nou lagè (Ga 5, 17). Pèp la travèsé. Anyin pa gin doua dékontrolé nou, Satan nouayé avèk tout lamè-l, nou minm nou chapé avèk Jézu-Kri. Pak sé yon pasaj, nouvo pasaj lanmè rouj la.

4.- Pak sé yon Rékonsiliation: nouvo rékonsiliation-an ant Bondié ak pèp li-a, ak nou minm. Paròl Bondié-a la pou tout tan (Is 40, 8; 55, 11). Bondié pa janm réprann paròl li. Sé konsa tou, rinmin-l gin pou nou-an, anyin pa kapab kasé-l (Is 54, 10), pa minm péché-a (Ct 8,7). Péché lézòm pa kapab jinmin plan rinmin Bondié-a. Bondié pi fò. Kontra li pasé avèk nou-an mèt pasé nan pasoua, nou pa gin doua dékourajé. Sé pou nou konté sou Granmèt la, minm si péché-a krazé nou (Ps 55, 23; 37, 5; 1 p. 5, 7; Si 2, 1-18; Mt 11,

28-30). Nòs Bondié fè nan Pitit li-a pap janm kasé ankò; (Ap 21, 1-27; 19, 9). Mòn yo mèt pati, bit tè yo mèt tranblé, rinmin-l gin pou nou-an pa gin doua disparèt (Is 54, 10). Tou sa, gras a Rézirèksion Jézu-Kri-a. Pak sé yon Rékonsiliasion, nouvo rékonsiliasion ant Bondié ak Pèp li-a, ak nou minm (R 5, 10; 2 Co 5, 19; Col 1, 22).

5.- Pak sé yon Kontra: nouvo Kontra Bondié pasé-a, k-ap réalizé sa-l désidé fè-a. Sé tankou yon kontra ant lapli ak tè sèk. Lapli-a marié ak tè-a pou tè-a bay lavi (Ps 85, 12). Lapli-a sé Jézu-Kri ki sot nan sièl la, tè-a sé nou minm ki té nan péché-a: "Ou sé tè, sé pou-ou tounin pousiè tè-a" (Gn 3, 19; Qo 3, 20; 12, 7; Ps 90, 3; 104, 29; 103, 14; Job 34, 15). Jézu lévé madichon-an, lè-l désann vi-n inbibé tè-a, pou-l fè-l donnin (Is 45, 8). Apré sa, li "éva-poré", li tounin nan sièl la ankò kot Papa-a, san-l pa kité tè-a, pou-l rinnèt mision-an Papa-a té ba-l fè-a (Is 55, 11; 40, 8; Jn 3, 13; 20, 17; 12, 32; 16, 28). Pak sé yon Kontra: nouvo kontra Bondié pasé-a, k-ap réalizé sa-l désidé fè-a.

6.- Pak sé yon Limiè: nouvo limiè Sajès la, pa Bondié-a, ki vi-n kléré léspri lézòm. Tout plan Bondié, sé la li abouti. Péché-a té mété nou nan fènoua. Satan te di: "Jé-ou ap louvri, ou-ap vi-n tankou Bondié ki konn ni byin ni mal" (Gn 3, 5). Sajès sa-a li té sansé bay la, li pa-t abouti nan anyin, okontrè, sé fènoua ki té vlopé nou. Sajès Bondié-a, yo pa kapab pran-l daso, sé Bondié minm ki pou bay li (Jn 3, 13; Pr 30, 4; Ba 3, 29; Job 11, 5; 28, 1-28; Sg 9, 16; Si 1, 1-10; Dt 30, 11-14; Is 40, 12-26; R 10, 6-8; 11, 33-34; Ep 3, 18); li dévoualé-l nan mèvèy Pak Pitit li-a, ki mouri-lévé pou montré nou jan Bondié rinmin nou (Jn 3, 16). Pak sé yon Limiè, nouvo Limiè Sajès la, pa Bondié-a ki vi-n kléré léspri lézòm.

7.- Pak sé yon Kè: nouvo kè-a Bondié bay lézòm nan Pitit li-a. Kè-a té malad akoz péché-a (Jer 17, 9); li géri nan padon-an. Tout bagay rékòmansé vi-n tou nèf. Pak la sé premié moua pou pèp Israël la, sé kòmansman ané-a, sé yon ané nouvo ki rékòmansé. Bondié bay lézòm kè nouvo Jézu-Kri-a nan plas kè pa yo-a ki té di tankou ròch la, Bondié ba yo nouvo Léspri Pitit li-a nan plas léspri krochi yo-a ki té gaté akoz péché orijinèl la (Jer 31, 31-34; Ez 36, 26; 11, 19; 2 Co 3, 3; cf Jer 4, 4). Bondié réfè lézòm nan sa-k pi konsékan nan li-a, nan kè-l, li ba-l yon kè nouvo ak yon léspri nouvo ki vi-n tounin yon sous nouvo ki pèmèt li désidé byin. Pak sé yon kè, nouvo kè-a Bondié bay lézòm nan Pitit li-a.

8.- Pak sé yon Batèm: nouvo batèm nan lanmò ak lavi Jézu-Kri-a. Jézu-Kri délivré nou sot nan lanmò péché-a, li fè nou vi-n lib kòm pitit Bondié an-sanm avèk li, pou lanmò pa gin okinn pouvoua sou nou ankò. Nou plonjé

nan lanmò-l pou nou lévé nan Rézireksion-l (Rom 6, 1-11), pou nou jouinn lavi ki pap janm fini-an. Sé pi gran favè Bondié fè nou; sé poutèt sa nou fè louanj alélouya nou éklaté. Nou fè youn avèk Jézu-Kri; déstiné pa-l sé déstiné pa nou tou; koté-l yé-a, sé la tou pou nou yé (Jn 17, 24); koté-l pasé-a, sé la tou n-ap pasé, sot nan lanmò al nan lavi. Pak sé yon batèm, nouvo batèm nan lanmò ak lavi Jézu-Kri-a.

9.- Pak sé yon Rézireksion: nouvo rézireksion-an ki pap janm gin finisman-an. Té gin anpil rézireksion ki té konn fèt déjà. Profèt Éli té résisité pitit yon madanm (1 R 17, 17-24); Profèt Élizé té fi-n mouri, zo-l té nan kavò, li té kontinué ap fè mirak sa-a toujou (2 R 19, 20-21): moun yo t-ap fè yon lantèman, lè yo rankontré avèk yon bann lènmi, yo lagé mò-a nan premié kavò yo jouinn nan, épi yo sovè kò yo; trouvé kavò sa-a sé té kavò Profèt Élizé-a; mò-a touché zo Profèt Élizé, minm lè-a mò-a lévé kanpé byin vivan. Jézu-Kri té résisité moun tou pandan-l té sou tè-a: pitit vèv Nayim nan (Lc 7, 11-17), pitit fi Jayir la (Mt 8, 23-26), Laza (Jn 11, 1-44). Piè résisité Dòkas (Ac 9, 36-42); Pòl résisité jènòm Troas la (Ac 20, 7-12). Min tout moun sa yo, yo té réviv pou yon tan; aprè sa, yo té mouri ankò. Min rézireksion Jézu-Kri-a, sé yon nouvo mòd jan rézireksion. Kondision lavi-l chanjé minm. Li pap viv minm jan ak lavi tout moun sou tè-a ankò. Lavi kò li, sé sou mòd lavi lespri-a l-ap viv. Lavi lespri-a pap janm mouri, sé konsa nouvo mòd lavi-l la pap janm mouri. Kò li vi-n chanjé kondision. Sé yon kò-lespri (1 Cor 15, 44).

Otan istoua lapasion-an long, otan mèsaj rézireksion-an kout. Lapasion-an sé soufrans kò-a ap sibi. Lè ou-ap soufri, sa long anpil. Min Sin Pòl di nou nan premié Lèt Korintyin yo (1 Co 15, 52): sé anvan jé bat, kon tronpèt la sonnin, mò yo ap résisité, épi si lè sa-a nou pa ko mouri, kò nou ap transfòmé. Rézireksion-an sé anvan jé bat, sé bagay ki rapid tankou zéklè. Sé poussa mèsaj rézireksion-an, yo pa trinnin avèk li, sé flap-flap: Li lévé byin vivan (Mc 16, 16; Mt 28, 6; Lc 23, 5; Ac 2, 24). Mari-Madlèn kouri, pou-l pot nouvèl (Jn 20, 18; Mc 16, 9s). Patizan Émayus yo fè minm jan (Mc 16, 13; Lc 24, 33-35). Apot yo fèmin tout pòt; Jézu parèt dévan yo (Jn 20, 19s). Jé yo ouè-l, yo pa bézouin dèt prèv ankò. Nan pouin anpil paròl pou di: sé déklaré mouin ouè-l, mouin témouin, li lévé. Sé sa premié mèsaj Apot yo té kòmansé préché (Ac 2, 32). Sé sou sa jé tout moun té toujou rét fiksé tankou yon limiè. Aprè, yo vi-n palé sou lanmò nan rélasyon avèk rézireksion-an. Li résisité: ki bò li soti? Li soti nan lanmò (1 Co 15, 4; Col 1, 18). Aprè, yo prezanté Soufrans li. Li soufri anvan-l mouri. Aprè, yo détayé lavi piblik li. Li té préché anvan-l té mouri. Aprè, yo raplé lavi-l kòm ti moun (Mt 1-2; Lc 1-2). Li té ti moun anvan-l préché. Min premié bagay la, pré-

mié mèsaj la, sé rézireksion-an. Tout rès la sé orienté sou mèsaj sa-a ki tou kout la: li lévé. Li tou kout, li fèt byin vit parapò a soufrans la ki trinnin, parapò a lavi-a ki long. Nan Profèt Izayi Bondié di: "Lè lè-a rivé, m-ap aji vit" (Is 60, 22). Soufrans la long, rézireksion-an kout. Li rapid tankou yon kréasion, li rapid tankou yon garanti, li rapid tankou yon pasaj, li rapid tankou yon rékonsiliasion, li rapid tankou yon kontra, li rapid tankou yon limiè, li rapid tankou mouvman yon kè, li rapid tankou yon batèm, li rapid kòm rézireksion.

Li pa tonbé anba inpréssion sans lézòm; yo pa kapab tiré pòtré-l tankou lapasion-an, tankou lavi piblik Jézu-Kri-a, tankou lavi Jézu-Kri kòm ti moun. Sé yon mèvèy sakré, li chapé anba rézonman nou, sé lafoua nou sèl ki sèvi antèn pou nou kapté-l. Sé konstatacion Apot yo ak patizan yo fè, yo déklaré nou, nou kouè yo sou paròl, nou aksépté, yo sèvi témouin. Nou minm tou apré sa, nou gin pou nou sèvi témouin avèk minm rapidité-a: témouin nouvo kréasion-an, témouin nouvo garanti-a, témouin nouvo pasaj la, témouin nouvo rékonsiliasion-an, témouin nouvo kontra-a, témouin nouvo limiè-a, témouin nouvo kè-a, témouin nouvo batèm-nan, témouin nouvo rézireksion-an.

Prémié paròl Jézu di médanm yo lè-l sot nan kavo-a, sé "Pa pè" (Mt 28, 10). Dènié paròl Jézu di Apot yo, lè-l ap monté nan sièl la, sé "M-ap avèk nou tou léjou joutan longè tan yo fi-n rivé bout yo" (Mt 28, 20). Lanj Granmèt la té di Mari paròl sa yo dépi Jézu t-ap fèt nan vant li: "Pa pè" (Lc 1- 30); "Granmèt la avèk ou" (Lc 1, 28), Mari sèl kinbé limiè lafoua-a limin pou nou kòm "veilleuse" nan fon kè-l ant vandrèdi-sin ak dimanch-Pak. Sé pousa jou Samdi-a konsakré pou li.

Si n-ap sèvi Rézireksion Jézu-a témouin, si n-ap sèvi témouin sé nan yon nouvo kréasion nou yé, nan yon nouvo garanti nou yé, nan yon nouvo pasaj nou yé, nan yon nouvo rékonsiliasion nou yé, nan yon nouvo kontra nou yé, nan yon nouvo limiè nou yé, nan yon nouvo kè nou yé, nan yon nouvo batèm nou yé, nou pa doué pè, paské Jézu avèk nou tou léjou, jous longè tan yo rivé bout yo.

Nou batisé nan lanmò-l, nou lévé vivan ansanm avèk li; sé angajman batèm sa-a nou rénovlé chak nuit Pak, pou nou profité favè sa-a pi byin: yon lavi tou nèf, koté sé pa nou minm ankò k-ap viv, min sé Jézu-Kri k-ap viv nan nou (Gal 2, 20). Sa nou yé-a pa ko parèt, sé nan sièl la l-ap parèt (1 Jn 3, 3). Toutotan nou sou tè-a, n-ap témouagné Jézu-Kri résisité réyèlman vré, antan nou kité-l transfòmé kondision lavi nou, travay nou, soufrans nou, lanmò nou. Sé sa n-ap mandé Manman Mari, pou nou viv Pak la kòm yon nouvo

kréasion, yon nouvo garanti, yon nouvo pasaj, yon nouvo rékonsiliasion, yon nouvo kontra, yon nouvo limiè, yon nouvo kè, yon nouvo batèm, yon nouvo RÉZIRÉKSION.

*

Kantik apré dézièm léktu pou mès lajounin dimanch Pak la ("Victimae paschali laudes"), li bay sans fèt la: sé sakrifis louanj nou gin pou nou ofri, Jézu-Kri ranpòté laviktoua; Mouton-an yo té sakrifié-a, li délivré ti mouton yo ki té pèdi rout yo-a.

Apré yo fi-n kalkilé sans soufrans Jézu-Kri pandan Karèm nan, kè kontan Pak la éklaté. Jézu-Kri inosan rékonsilié péchè yo avèk Papa-a. Sé yon kè nouvo ak yon léspri nouvo Papa-a ba nou nan Jézu-Kri. Lanmò ki t-ap batay ak lavi-a nan jadin Jétsémani-an, li pèdi batay la, lè chèf lavi-a mouri-a. Krétyin yo gin pou yo viv yon lavi tou nèf avèk Jézu-Kri ki lévé vivan. Vié lévin péché-a, yo gin pou yo fini avèk li. Pin san lévin-an, sé yon nanm ki pròp avèk Jézu-Kri. Nou mouri ansanm avèk li parapò a péché-a, nou lévé vivan ansanm avèk li nan favè-a. Sé pou nou sinsè, sé pou nou vré dapré sa Sin Pòl di nou nan léktu premié lèt Korintyin yo (1 Co 5, 6-8). Sé pou nou fini ak pansé tératè, sé bagay anro yo pou nou chèché, koté lavi nou kaché ak Jézu-Kri nan Bondié-a dapré sa Sin Pòl di nou nan lèt Kolosyin yo (Co 3, 1-4). Mouin pap mouri min m-ap viv pou-m rakonté mèvèy Granmèt la, dapré Psòm-Répons la (Ps 117= 118). Jézu-Kri sé ròch sa-a bòs mason yo té jété yon koté-a, ki vi-n tounin tèt kouin-an. Krétyin pa doué pè, lè tout zanmi-l lagé-l, sé sou Jézu-Kri ki lévé vivan pou-l apuiyé.

Sé témouin yo ki pèmèt nou mét lafoua nan Jézu-Kri ki lévé vivan. Lafoua nou pozé sou témougnaj yo, dapré sa premié léktu Travay Apot yo di (Ac 10, 34-43). Mari-Madlèn t-al pot mèsaj bay Apot yo (Jn 20, 1-9): "Di nou, Mari, ki sa-ou té ouè sou rout la? Kavo Jézu-Kri ki vivan-an". Kavo-a vid. Sèlman Mari-Madlèn pa ko kapab bay sans évènman sa-a. Li vi-n jouinn Chèf Apot yo: Simon-Piè, k-al fè konsta. Dispozision bann toual yo ak mouchoua-a fè Jan konprann Jézu-Kri lévé vivan vré. Si sé ouété yo té ouété-l, yo t-a ouété toual yo ansanm ak kò-a, jan-l té vlopé-a, oubyin omouin toual yo t-a gayé atè-a. Min bann toual yo rété yon fason kòm si moun nan ki té vlopé anndan yo-a té sòti san-l pa déranjé yo, kòm si sé yon balon ki dégonflé. Sa Jan ouè-a, li fè-l koué.

Jézu-Kri ap parèt dévan Mari-Madlèn pou-l fè-l mét lafoua nan Réziréksion-l nan, Sé témougnaj sou témougnaj tan Pak la bay, sitou avèk lévanjil Jan-an yo li chak jou nan lamès, ni Travay Apot yo yo li tou chak jou nan

lamès pandan sinkant jou tan Pak la. Dé liv sa yo insisté anpil sou késion témouagnaj la. Kantik apré dézièm léktu jou Pak la insisté sou késion témouagnaj sa-a ("Victimae paschali laudes"): Mouin ouè Anj yo ki sèvi témouin, ni mouchoua-a, ni rad yo. Mésaj Jézu té bay Mari-Madlèn nan, li poté-l bay Apot yo: Jézu-Kri lévé vivan, li minm ki éspoua-m, li pran dévan nou nan Galilé. Ofi-amézi Jézu-Kri ap parèt dévan youn nan patizan yo, l-ap fè-l sèvi témouin pou lòt yo: "Nou konnin Jézu-Kri lévé vivan vré sot nan pami mò yo".

*

Li ouè, li kouè (Jn 20, 8). Sé pa minm kalité mòd "ouè" ak Sin Toma (Jn 20, 29; cf 1, 52). Sé fason Sin Jan ouè dra-a pozé-a ki fè-l kouè, sé pa Jézu minm li ouè ki fè-l kouè. Li fè yon rézonman, lè-l ouè kijan dra-a rété nan pozision li té vlopé Jézu-a, san li pa chifonnin, sé kòm si moun ki té ladan-l nan té soti san-l pa défèt dra-a ki té vlopé-l la. Jézu soti tankou sé travèsé li travèsé dra-a, dra-a vi-n tounin tankou yon balon ki té gonflé épi ki vi-n déglonflé. Sin Jan égzaminé, épi li di nan kè-l sé pa ouété yo ouété kò-l, sé résisité li résisité. Sé konsa nan asoué Jézu ap vi-n antré nan mitan group Apot yo, anndan kay la koté yo té rasanblé-a, san-l pa louvri okinn pòt (Jn 20,19). Li pa-t bézouin défèt dra-a tou pou-l té soti. Li soti tankou limiè solèy ki travèsé yon fènèt vitré. "Li ouè, li kouè". Sign sa-a késioné-l, li ba-l konsantman-l. Li ouè, li kouè. Apré sa li sèvi témouin, pou nou minm tou nou vi-n kouè (Jn 21, 24; 20, 11).

Mouton Pak la sakrifé (1 Co 5, 3). Sé sakrifis rékonsiliation-an. Jézu-Kri rékonsilié nou ak Papa-a (2 Co 5, 18s; Rom 5, 16; Col 1, 22). Nou minm tou nou gin pou ba-l lafoua nou. Lafoua sa-a sé li minm yo mandé nou nan batèm nan, sé li minm nou déklaré nan nuit Pak la, apré Pè-a fi-n fè prèch la, apré li fi-n béni dlo-a, pou-l voyé-l sou tèt nou kòm souvni batèm nou.

Karèm nan té palé sou Batèm nan: Prémie dimanch la té mandé pou nou rénonse Satan, minm jan Jézu té rézisté Satan nan dézè-a, dézièm dimanch la té fè sonjé rad blan batèm nan tankou transfigirasion Jézu sou mòn Tabò-a koté Moyiz ak Éli t-ap palé osijè "exode" li t-apral fè Jérusalèm nan, li té invité nou fè yon égzòd tou, yon konvèsion, yon chanjman mantalité, pou nou viv dapré égzijans batèm nan; touazièm dimanch la té fè nou kalkilé sou dlo lavi batèm nan, tankou Jézu té promèt Samaritèn nan dlo lavi-a bò pui-a; katriyèm dimanch la té fè sonjé limiè batèm nan, tankou Jézu té louvri jé avèg la, li minm ki Limiè lavi-a; sinkièm dimanch la té fè nou réfléchi sou réziréksion batèm nan fè nou jouinn, tankou Jézu té fè Laza lévé sot nan pami mò yo; dimanch lapasion-an té montré kapitèn nan nan pié Koua-a, ki

fè déklarasion lafoua-a, sa Samaritin yo té fè osijè Mési-a nan touazièm dimanch la, sa avèk la té fè-a tou nan katriyèm dimanch la, épi sa Mat té fè-a tou nan sinkiyèm dimanch la osijè Mési-a. Sé yon fason pou té préparé nou pou nou réfè gran déklarasion sa-a nan nuit Pak la, pou nou raplé égzijans batèm nou.

Nan lévanjil dimanch Pak la, Sin Jan di: "Li ouè, li kouè" (Jn 20, 8). Nan dézièm dimanch Pak la, Sin Toma di: "Granmèt mouin, Bondié mouin" (Jn 20,28); li fè déklarasion lafoua-l tou, minm si sé lè-l fi-n ouè Jézu li minm minm; Jézu fè-l répròch poutèt li pa-t kouè anvan, san-l pa-t ouè-l. Jézu di-l: "Sé chans pou moun ki pa ouè yo, min ki kouè!" (Jn 20, 29). Jézu t-ap sonjé lafoua Manman-l (cf Lc 1, 45.20), minm jan lè-l té fi-n pasé Kana pou dézièm foua-a, li té rankontré kapitèn nan ki té mandé-l pou-l géri pitit li-a ki té gin lafièv la, li té di-l: "Koman, si nou pa ouè sign ak prodij, nou pap kouè?" (Jn 4, 48; cf 2, 11; 3, 2; 1 Co 1, 22). Sint Élizabèt té di la Trè Sint Vièj Mari: "Sé chans pou sila-a ki té kouè paròl Granmèt yo t-ap réalizé-a!" (Lc 1, 45). Sé lafoua sa-a n-ap mandé la Trè Sint Vièj Mari, pou nou kapab viv égzijans angajman batèm nan. Tout tan Pak la raplé nou sa, pandan sinkant jou, jous jou lapankot. Sé kòm si dépi premié dimanch Karèm jous lapankot sé sou batèm nan n-ap réfléchi; sèké batèm nan inpòtan anpil. Sin Monfò di nou konsa si gin anpil moun k-ap viv angajman Krétyin yo yon fason léjé konsa, sé paské yo pa réfléchi asé sou sa; sé pou sa nan finisman tout mision-l yo, li té konn fè moun yo rénovlé promès batèm nan (V.D. 127).

Tout dimanch Pak yo insisté anpil sou lafoua. Jézu ap fè kèk aparision, min sé tankou zéklè. Sé yon fason pou-l aprann Apot yo ak Patizan yo viv rélasyon yo avèk li nan lafoua (Jn 20, 17; Ac 1- 11; 1 Co 15, 5- 8). L-ap kòm "sévri" yo jou lasansion-an, anvan li voyé Léspri Sin-an sou yo, pou-l ba yo fòs pou yo sèvi-l témouin. Nou minm tou nou doué sèvi Jézu témouin avèk lafoua nou. Satan toujou prêt pou-l fè nou pè, sé nou minm ki pou konnin nou pi fò pasé-l, antan nou rézisté-l fèm nan lafoua (1 p. 5, 9). Nou doué fè lafoua-a dévlopé antan nou mété-l an aktivité. Sé antan nou fè égzèsis avèk kò nou manb nou yo pran fòs; konsa tou, lafoua-a, kalité sa-a Bondié dépozé nan nou nan batèm nan, sé antan nou fè égzèsis avèk li l-ap gin fòs, l-ap dévlopé; sé pou nou résité "acte de foi-a" souvan pou sa vi-n tounin yon abitud, k-ap déklanché konpòtman lafoua, lè nou pa ouè klè nan sitiasion lavi nou. Bondié ap kondui nou avèk yon réyon fènoua, jan Sin Jan-d-la-Koua di nou ("un rayon de ténèbre"), pou nou rét fèm, kòm si nou ouè Sila-a yo pa kapab ouè ak jé-a (He 11, 27), jan Lèt Ébré yo di osijè Moyiz la.

*

Sin Pòl di nou: si Jézu-Kri pa lévé sot nan pami mò yo, asirans nou-an pa vo anyin, lafoua nou-an pa pozé sou okinn fondasion solid (1 Co 15, 14). Sin Jan di nou nan lévanjil dimanch Pak la: "li ouè, li kouè" (Jn 20, 8). Dé ti mo sa yo ramasé tou sa-l té vlé di nan tout lévanjil li-a. Sé yon mèsaj pou lafoua. Lèt Ébré yo di konsa: "sa lafoua-a promèt la, nou pa kapab ouè-l ak jé nou, paské sé pa t-a lafoua ankò, sa t-a vizion" (cf He, 11, 1). Sa nou ouè-a, sé yon sign ki kondui nou sou chémin lafoua-a. Nan nòs Kana-a, patizan yo té ouè sign mirak la Jézu té fè, lè-l té fè dlo-a tounin divin-an. Dapré sa yo té ouè-a, yo vi-n kouè (Jn 2, 11). Min sé pa bagay yo ouè-a yo kouè. Sa yo ouè-a, sé chémin ki kondui yo pou yo kouè nan yon lòt bagay. Yo ouè mirak la, yo kouè Jézu sé Mési. Sin Jan ouè dra-a ak mouchoua-a nan dispoziyon yo yé-a ak tonbo-a vid la, li kouè nan yon lòt bagay li pa kapab ouè ak jé-l, li kouè Jézu lévé vivan byin vivan sot nan kavo-a, pou fason dra-a té rété nan pozision yo té antéré Jézu-a, tankou yon balon ki rété nan minm plas la, min ki dégonflé sèlman, sa vlé di: moun nan ki té vlopé ladan-l nan sòti san-l pa défèt dra-a; minm jan Jézu ap parèt dévan Apot yo nan asouè, san-l pa louvri okinn pòt nan kay la (Jn 20, 19), minm jan réyon solèy antré nan piès la antan-l travèsé vit fénèt la san-l pa kasé-l, minm jan Pitit Bondié-a té antré nan vant la Trè Sint Vièj Mari jou lanonsiasion-an, san-l pa déranjé anyin nan li, minm jan li té soti nan vant li jou Noèl la, san-l pa-t blésé okinn òga-n nan li. Li gran, mèvèy sakré lafoua-a (1 Tm 3, 16). Ala yon bèl mèvèy, nou pa kapab ouè, min nou kouè (Jn 20, 29; 1, 50; Lc 1, 45).

Sin Pòl di nou nan lèt li ékri Kolosyin yo, ki vini kòm dézièm léktu pou jou dimanch Pak la: "Sé bagay anro yo pou nou gouté, sé pa bagay ki sou tè-a" (Col 3, 1-2). Sa vlé di nan konpòtman nou, sé pou nou montré nou lévé vivan ansanm avèk Jézu-Kri. "Sé bagay ki anro yo pou nou chèche, koté Jézu-Kri chita adouat Bondié-a", sa vlé di pou nou maché tankou Moyiz ki té gin asirans kòm si li t-ap gadé Sila-a yo pa kapab ouè ak jé-a (He 11, 27: "aoratos", ἁόρατος; cf Col 1, 15; 1 Tm 1, 17: Bondié yo pa kapab ouè ak jé-a; épi Rom 1, 20; Col 1, 16: lòt bagay yo pa kapab ouè ak jé-a: "kompotman lafoua-a fè nou doué jijé tout bagay avèk jé Granmèt la, ki lévé sot nan pami mò yo". Anyin pa doué dékontrolé nou. Yon zanmi nou pèdi konfians li, yon avantaj nou pèdi nan rélasyon sosisété-a, yon désizyon ki bloké..., sé pa yon malè sa yé dévan bèlté lavi ki pap janm fini-an. Si nou lévé vivan ansanm avèk Jézu-Kri, sé bagay ki anro yo pou nou gouté, sé pa bagay ki sou tè-a (Col 3, 1). Lavi nou sou tè sa-a, li kaché avèk Jézu-Kri nan Bondié (Col 3, 3). Sé lè Jézu-Kri ap parèt, nou minm tou n-a parèt avèk li nan bèlté-a (1 Jn 3, 2). An-atandan, sé nan lafoua n-ap maché.

Nou gin tandans vlé ouè tout bagay maché san traka, sitou nou konn anvri pou tout moun ouè afè nou réyisi, lavi nou gin yon sans, konpòtman nou douat, pou yo pa palé nou mal, pou yo fè louanj nou. Époutan nou doué ak-sépté ti grinn blé-a ki tonbé nan tè-a mouri, pou yo bliyé-l, pou-l kapab donnin anpil frui (Jn 12, 24).

Youn nan gran problèm ki pa-t fi-n jouinn solision klè nan lansyin Téstanman, sé rékonpans moun ki korèk yo. Yo té pansé pa-t gin lòt kalité mòd lavi apré lavi n-ap viv sou tè-a, oubyin si té gin yon lòt, sé yon lavi an ralanti li té yé, tankou yon moun k-ap dòmi ak yon gro maladi ki angoudi tout manb li, ki pa ba-l posibilite gouté okinn plézi ki ginyin (Ps 88, 11-13; 6, 6; Is 38, 18; Ba 2, 17; Si 17, 27; Ps 115, 17; 94, 17). Yo pa-t konnin t-ap gin yon rézirkonksion apré lavi sou tè-a. Sé pou rézon sa-a lè yo té konn ouè malè ap tonbé sou moun ki korèk, yo té konn fè Bondié prosè. Sé konsa tout liv Jòb la pasé pou chèché ki sa-l fè ki mal ki fè l-ap souffri konsa-a, joutan Bondié ba-l léson pou-l montré-l sé Sajès Bondié ki kapab réponn problèm sa-a. Minm Apot yo t-ap mandé Jézu kilès ki fè péché, èské sé avèg la oubyin manman-l ak papa-l ak zansèt li, ki fè li fèt tou avèg la. Jézu té blijé éspliké yo ni li minm ni paran-l pa an koz, sé pou yo kapab ouè pouvoua Bondié (Jn 9, 2s). Jérèmi ki Jérèmi pa-t ouè klè, li té blijé ap plinn, minm si-l pa-t fè Bondié ésplikasyon dirèktéman, li té déchajé kè-l sou li, antan li t-ap déklaré-l kijan tout moun ap fè-l souffri, li minm poutant ki tankou yon mouton y-ap kondui labatoua, tou inosan (Jer 11, 18-20; 15, 10-21; 17, 12-18; 18, 18-23; 21, 7-18: sé pasaj sa yo yo rélé "Confessions de Jérémie" yo; sé kòm si sé pròp istoua lavi pèsonèl li li rakonté, antan-l vidé kè-l tankou dlo). Bondié blijé ba-l ankourajman, san-l pa fi-n dévoualé-l tout fon sékrè-l nèt. Chak foua, Jérèmi pran yon ti kouraj, li maché; min pi dévan sé minm bagay ki rékomansé ankò, tout lavi-l pasé konsa, l-ap maché nan fènoua, li sètèn kan minm sou paròl Bonidé-a, min li pa ouè anyin dévan rout li, sièl la bouché, min l-ap maché kan minm. Sèvitè Granmèt la minm ouè li tèlman ap souffri san-l pa ouè rézon-an, li dékourajé. Li di nan kè-l sé pou anyin, sé pou van l-ap gaspiyé fòs li. Bondié di-l sé pa sa, rékonpans li séré koté-l (Is 49, 4), minm jan Sin Pòl ap di nou nan lèt Kolosyin yo pou dimanch Pak la: "lavi nou kaché ansanm ak Jézu-Kri nan Bondié" (Col 3, 3). Kanta pou Siyon minm, li t-ap di Granmèt la lagé-l, li pa sonjé-l ankò (Is 49, 14). Bondié blijé ba-l kouraj antan-l di-l minm si yon manman t-a bliyé pitit li, li minm li pa gin doua janm bliyé-l (Is 49, 15), paské li ékri-l nan min-l (Is 49, 16). Sé lafoua ki pèmèt nou maché san nou pa ouè rékonpans travay nou dévan jé nou (He 11, 13) Liv Apokalips la di sé chans pou moun ki mouri nan Granmèt la paské travay yo ap suiv yo (Ap 14, 13; Is 57, 1-2; He 4, 10;

Mt 11, 28-29). Moun y-ap fè louanj yo sou tè sa-a, yo déjà gin rékonpans yo. Sé pousa Jézu di nou pou nou pa chèché louanj lézòm, antan n-ap fè aksion ki pou parèt dévan jé yo, nan jèn nou, nan lacharité nou, nan lapriyé nou (Mt 6, 1-18). Sé avèk pasaj lévanjil sa-a pèlerinaj Karèm nan té kòmansé jou mèkrédi lésann nan.

Lafoua sé maché kòm si nou té ouè Bondié an fas. Nan tou sa n-ap fè, sé pou nou viv prezans Granmèt la. Bondié té di Abraam: "maché dévan-m, ou-ap kòrèk nè" (Gn 17, 1; cf 5, 21.24 pou Énòk; 6, 9 pou Noé). Prémie léktu dimanch Pak la (Ac 10, 34a. 37-43) fini sou mèsaj lafoua-a (Ac 10, 43). Sin Piè di tout moun ki kouè nan Jézu, yo résevoua padon péché yo. Déklarasion sa-a chita sou mèsaj Pak la. Sin Piè té fèk fi-n anonsé yo té touyé Jézu, Bondié fè-l lévé toua jou apré, li fè-l parèt dévan témouin li té chouazi davans. Yon Krétyin sé yon témouin "réziréksion Jézu-Kri-a". Lafoua-l, sé yon flanbo k-ap kléré chémin frè ak sè-l (Mt 5, 14).

*

Tan pak sé kè kontan k-ap éklaté jous nan lapankot; sé tan alélouya. Jézu lévé vivan. Li fi-n détrui ni lanmò, ni péché (1 Co 15, 54-57). N-ap manjé Pak la avèk yon kè nouvo; nou antéré vie moun nan avèk tout mové panchan-l yo, pou nou lévé avèk moun nouvo-a (1 Co 5, 7), Jézu-Kri k-ap ofri nou bay Papa-a tankou yon sakrifis ki fè-l plézi.

Yon sèl tristès ki kapab ginyin, sé péché-a; lè-l makònin yon moun, li fè-l lèd. Granmèt la pròpté nou, li péyé dèt péché Adan-an; li lavé-l nan san-l. Nan nuit Pak la, nou réfè angajman promès batèm nou; Pè-a voyé dlo bénit sou nou, pou fè nou sonjé jou batèm nou; sé yon invitasion pou nou réfèt tou nèf.

Mari-Madlèn al nan kavo-a, li pa ouè Jézu: Jézu parèt dévan-l pandan l-ap kriyé-a, li voyé-l anonsé Bòn Nouvèl la bay lòt frè yo (Jn 20, 1-18); Piè ak Jan vi-n fè konsta (Jn 20, 3-10). Jézu parèt dévan yo nan asouè (Jn 20, 19-23). Toma pa-t la, sé nan ui jou l-ap kouè, lè Jézu ap fè-l mét min bò kòt li (Jn 20, 24-29). Lafoua nou bazé sou Réziréksion Jézu-Kri (1 Co 15, 14). Li ranpòtè laviktoua sou lanmò pou tout tan (1 Co 15, 54). Okinn kontrariété pa doué dékontolé nou. Si Bondié pou nou, kilès ki kapab kont nou? (Rom 8,31; Is 50, 7-9; Ps 46, 2; Is 26, 1; Mt 14, 27; 8, 26). Ringn Satan fi-n krazé.

Patizan Émayus yo ap maché, ap chèché konprann sa-k pasé; Jézu parèt nan mitan yo, li fè rout avèk yo, li antré nan lotèl avèk yo, li fè yo rékonèt li pandan l-ap kasé pin-an, épi li disparèt (Lc 24, 13-35). Jous pou lasansion, pandan karant jou, sé konsa Jézu ap fè ti aparision tankou kout zéklè; apré sa

l-ap disparèt, pou-l fè patizan-l yo rankontré-l nan lafoua (Ac 1, 3; 10, 40-41; 13, 31; Mt 28, 10; 1 Co 15, 5-8). Lafoua-a pèmèt nou maché nan noua, avèk Limiè Pak la k-ap kléré anndan fon kè nou, tankou flanbo Jédéyon yo ki kaché anndan krich yo (Jg 7, 16-22), pou nou dékouvri sans évènman intélizans nou pa kapab konprann yo. Sé Rézirèksion Jézu-Kri-a ki bay lavi nou vré sans li. Si grinn blé-a mouri, l-ap donnin anpil frui (Jn 12, 24). Jézu voyé nou pou nou donnin frui, pou frui nou-an diré (Jn 15, 16). Élizabèt di Mari li béni pasé tout fi, frui vant li-a béni tou (Lc 1, 42; cf Dt 28, 4). Sé pou-l maché avèk nou nan pèlerinaj lafoua-a (Redemptoris Mater 26), pou nou donnin frui Rézirèksion-an (Ga 5, 22).

*

Antrénman Karèm nan aprann nou batay kont mové tandans nou, sitou ak jèn, lacharité, lapriyè: Jèn nan pou pròpté rélasion nou avèk pròp tèt pa nou, lacharité-a pou pròpté rélasion nou avèk prochin nou, lapriyè-a pou nou pròpté rélasion nou avèk Bondié.

Prémié dimanch Karèm nan, sé jèn: Jézu fè jén nan dézè-a pandan karant jou (Lc 4, 1-13: ané C). Dézièm dimanch karèm nan, sé lapriyè: Jézu lapriyè sou mòn Tabò-a, figi-l chajé aspè, an prezans Moyiz ak Éli, dé pèsonaj sa yo ki té pasé karant jou tou ap fè jén, ap lapriyè nan dézè-a (Lc 9, 28-36). Touazièm dimanch karèm nan, sé lacharité: Bondié pran pasians tankou yon Mèt jadin ki vi-n chèché frui nan pié fig frans li, dépi touazan, li pa jouinn, li tann ankò yon ané san-l pa koupé-l, pou ba-l tan fè yon dènié éfò; pasians Bondié sé kondision konvèsion lézòm (Lc 13, 1-9). Katriyèm dimanch karèm nan tou sé lacharité: Bondié sé yon Papa k-ap tann ti pitit la ki pati al dépanse tout byin-l yo, épi ki tounin vi-n mandé padon (Lc 15, 1-32). Sinking dimanch karèm nan tou sé lacharité: Bondié sé yon Avoka k-ap plédé pou madanm nan yo té pran nan adiltè-a, li pa kité yo kondané-l (Jn 8, 1-11). Si Bondié pou nou, kilès ki kapab kont nou? Si Bondié padonnin, kilès k-ap kondané? (cf Rom 8, 31).

Sé pòt la ki louvri sou dimanch ramo yo, koté y-ap plédé lapasion-an, koté Jézu kouazé jé-l nan jé Sin Piè, pou-l fè-l sonjé, pou-l fè-l régrèt, pou-l fè-l jouinn padon (Lc 22, 61), koté Bon Laron-an mandé Jézu yon ti plas, Jézu fè-l antré nan sièl la minm jou-a san détou: "Jodi-a minm ou-ap avèk mouin nan Paradi-a" (Lc 23, 42-43).

Nan nuit Pak la, sé tout chinn ésklavaj péché ak lanmò ki défèt (1 Co 15, 54-57); laviktoua Jézu lavé fot Adan-an.

An 1983, légliz té fété 1950 ané dépi Rédanmsion-an té rivé. Li té louvri tout pòt li; li té mandé pou fidèl yo louvri pòt kè yo bay Bondié ak plat min yo bay prochin yo (cf Pap Jan-Pòl II; "Ouvrez les portes au Rédempteur"). Pap Jan-Pòl II té bay signal la, lè-l té louvri Pòt Sint Bazilik Vatikan-an jou Anonsiasion 25 mas 1983-a; pòt la té rét louvri jous Pak, 22 avril 1984, pou maké tan "indulgences" légliz la ki té gayé tankou lama-n k-ap tonbé sot nan sièl la. Sa té raplé tan délivrans la, jou padon-an, ané favè-a, jibilié rédanmsion-an Profèt Izayi palé-a (Is 49, 8; 2 Co 6, 2; Lc 4, 18; Is 61, 2). Délivrans nou sé tout tan yo fété-l yon fason abituèl, yon fason òdinè. Ané 1983-a légliz té fété-l yon fason éstraèdinè. Chak Pak raplé Rédanmsion-an. Pak 1983 té gin yon sans spésial, antan-l té raplé 1950 ané dépi Pak ané 33-a té rivé, lè Jézu té lévé byin vivan sot nan pami mò yo. Pandan tout yon ané légliz té fété mèvèy sakré sa-a; li té invité fidèl yo lapriyè pi plis, fè pèlérinaj, fè sérémoni spésial nan légliz yo, pou yo té jouinn "indulgence plénière"; li té bay posibilite jouinn li chak jou; yo té kapab fè-l sèvi tou pou nanm yo nan Pigatoua-a. Nan finisman ané sint la, Pap la té fèmin Pòt sint la, min kè Jézu toujou rét louvri, koté sous mérit Rédanmsion-an kontinuyé ap koulé-a.

Apré délij la, Noé té lagé Kolonb la. Kolonb la té tounin vi-n jouinn li avèk yon ramo oliv tou fré nan bèk li; sé té sign lapè-a (Gn 9, 8-12). Bondié invité nou aksépté mèsaj lapè-a: lapè pou sa-k té louin yo, lapè pou sa-k té pré yo (Ep 2, 17; Is 57, 19). Gin moun ki nan kondision k-ap boulvèsé yo dépi lontan; yo pa konn sa pou yo fè pou yo mété yo an règ avèk légliz; Sin Jan di yo Bondié se RINMIN (1 Jn 4, 8-10); li pa rét ap fè kòlè tout lasint jounin (Ps 103, 8), sé yon Papa (Ps 103, 13), li égzilè péché nou yo louin li (ib). Minm si yon manman t-a bliyé pitit li, li pap bliyé nou (Is 49, 15; 54, 4-10; Ps 27, 10). Pou yon ti moman li faché, min pou tout tan kè-l rét sansib (Ps 30,6). Bondié sé Papa. Abraam pa-t ézité ofri pitit li-a kòm sakrifis (Gn 22, 16); min sé Bondié ki réalizé jès Abraam nan pou nou, antan-l ofri pròp Pitit li-a, Sèl Pitit li-a sou Koua-a pou délivré nou anba ésklavaj péché-a (Rom 8, 32; Jn 3, 16; 1 Jn 4, 9); li fè-l lévé sot nan pami mò yo, li minm yo té rinmèt pou fot nou yo, épi ki lévé vivan pou nou vi-n kòrèk (Rom 4, 24-25).

Ané 1983-a, yo té raplé jibilié rédanmsion-an, tankou yon ané favè, yon ané lapè, yon ané padon, koté mizè lézòm té rankontré mizérikòd Bondié, jan Pap Jan Pòl II té di-a ("La misère de l'homme rencontre la miséricorde de Dieu" cf Ouvrez les Portes au Rédempteur). Sé té yon ané "konsolasion", jan Profèt Izayi di-a: "Konsolé, konsolé, pèp mouin; sé Bondié nou ki di sa; palé ak kè Jérusalèm, déklaré byin fò ba li: paské tout péché-l yo éfasé, li fin jouinn nan min Granmèt la réparasion pou tout péché-l yo" (cf Is 40, 1-

11). Nan lansyin Téstaman, pou ané jibilié-a, yo té konn lagé tout ésklav, anilé tout dèt, kite tout tè an libèté, ni bèt yo ki sou yo-a, pou fè sonjé lè Pèp Bondié-a té ésklav, nan péyi Éjip la, Bondié té kasé chinn ésklavaj li-a. Sé té yon ané répo, yon ané ki vi-n tounin yon saba ki gin 365 jou. Chak 50 ané yo té konn fè sa-a. Yo té konn sonnin tronpèt spésial pou di: Jibilé-a louvri. Tout moun ki gin ésklav, yo té konn voyé yo an libèté; tout moun ki té prété lòt lajan, yo té konn fè yo kado dèt la. Jibilé-a fini; min Rédanm-sion-an kontinuyé.

Nou gin fason pa nou pou nou kinbé moun kòm ésklav, pou nou fè yo doué nou: nan priyè "Papa nou"-an, nou di "padonnin nou sa nou fè tankou nou padonnin moun ki fè nou kichòy", sa vlé di: rinmèt nou dèt nou yo, tankou nou rinmèt moun ki doué nou yo. Si nou kinbé moun nan kè, nou maré-l tankou ésklav, ki chajé ak dèt. Sé dèt sa-a pou nou rinmèt (Mt 6, 12; 18, 23-35). Minm si pòt sint la fèmin, pòt kè Jézu rét louvri, koté san ak dlo koulé (Jn 19, 34), sous rékonsiliasion-an. L-ap frapé pòt kè pa nou (Ap 3, 20; Ct 5, 2). Li mandé pou nou louvri kè nou ba li, pou nou louvri min nou bay prochin nou. Lè Pap Jan-Pòl II té fèk instalé kòm Pap, li té bay kòm konsign: pa pè, louvri pòt yo bay Sila-a ki délivré nou-an. Nan kòmansman Karèm 1983 li té konplété Konsign sa-a antan-l té ajouté: louvri min nou bay prochin nou. Sé dé jès sa yo n-ap ajisté ansanm: pòt kè nou n-ap louvri bay Granmèt la ki délivré nou-an, épi plat min nou n-ap louvri bay prochin nou nan lacharité, nan padon, antan nou fè chinn solidarité ki ranplasé chinn ésklavaj, chinn rayisans, chinn égoïs, chinn vanjans. Pak sé tankou yon kal-fou, koté tan Karèm nan fini, nou pran diréksion lapankot, koté Léspri Sin-an ap fè tout nasion yo fè yon sèl, antan yo tout konprann minm langaj la, langaj lacharité-a (Ac 2, 8). Pandan sinkant jou sa yo, légliz fè nou kalkilé lévanjil Sin Jan-an avèk liv Travay Apot yo. Sin Jan raplé nou rékòmandasion Jézu nan dènié Soupé-a pou nou youn rinmin lòt, tankou li minm rinmin nou (Jn 13, 14.34-35). Sin Luk montré nou prémié Krétyin yo ki gin yon sèl kè, yon sèl nanm (Ac 2, 42-47; 4,32; cf Ps 133, 1).

Sé pou Manman Mari, Rèn Apot yo, fè nou louvri pòt kè nou bay Granmèt la ki délivré nou-an; sé pou-l fè nou louvri plat min nou bay prochin nou yo, ni sa-k louin, ni sa-k pré.

*

Apré lapli, tan-an vi-n bèl; apré vandrédi-sin, sé dimanch Pak. Apré saba-a, sé prémié jou sémèn nan. Sé kavo-a Mari-Madlèn ak lòt Mari-a té vi-n égzaminé (Mt 28, 1); sé dévan lavi-a yo parèt (Lc 24, 5).

Sin Matié mété rélation ant vandrédi-sin-an ak dimanch Pak la. Minm tranbléman-tè ki té fèt jou vandrédi-sin-an, vè touazè-a (Mt 27, 51), sé li minm tou ki fèt jou dimanch Pak la (Mt 28, 2). Minm gad yo ki t-ap fè faksion jou vandrédi sin-an pou yo pa-t vi-n vòlè kò-a (Mt 27, 66), sé yo minm tou ki la jou dimanch Pak la (Mt 28, 4), pou sèvi témouin. Yo té an fòs, koulié-a yo an féblès. Sé yo minm ki vi-n glasé tankou moun mouri (ib), tankou sòlda Faraon yo nan lanmè Rouj la (Ex 14, 27), tankou solda juif yo ki té tonbé sou do lè yo té vi-n arété Jézu-a (Jn 18, 6), tankou sa yo Psòm nan ap palé-a: "sila yo ki t-ap fè souadizan moun brav yo, yo dòmi somèy yo, tout sòlda sa yo, bra yo fébli, lè-ou ménasé, ou minm Bondié Jakòb la, ni kabouèt, ni choual, yo bloké" (Ps 76, 6-7). Rélation avèk vandrédi sin-an klè dapré Sin Matié. Minm Mari-Madlèn nan avèk lòt Mari-a ki té kanpé ap égzaminé koté yo t-ap dépozé kò Jézu-a pou yo té kapab vi-n anbomè-l apré saba-a (Mt 27, 61), sé yo minm minm ki la jou matin dimanch Pak la (Mt 28, 1). Vandrédi-sin-an, yo t-ap kriyé; dimanch la, sé kè kontan. Gad yo minm tèlman pè, san yo trésayi (Mt 28, 4), yo vi-n tankou moun mouri; min médanm yo minm, lanj la di yo yo pa bézouin pè (Mt 28, 5). Sé minm asirans sa-a Jézu ap ba yo tou, lè-l fi-n salué yo, l-ap di yo: "Nou pa bézouin pè" (Mt 28, 10). Ki sa-k pou fè yon moun pè, si sé pa péché-a sèlman (Ps 27, 1; 18, 29-30; Mi 7, 8; Is 10, 14).

Dépi nan Paradi-a, lè Adan ak Èv té fè péché-a; yo té pè, kon yo té tandé brui pié Granmèt la ki t-ap proche nan souf van-an nan asouè-a (Gn 3, 8). Dépi lè sa-a chak foua yon moun konstaté li an fas prezans Bondié, li vi-n gin kè soté, tankou Izayi ki déklaré nan tanp la; "Élas, m-apral mouri, mouin sé yon moun ki plin péché, époutan min jé-m kontré ak Bondié" (Is 6, 5), tankou Jédéon ki pè lè lanj Granmèt la parèt dévan-l nan (Jg 6, 8) tankou Moyiz ki blijé ouété sapat nan pié-l épi bouché figi-l dévan Granmèt la k-ap palé avèk li nan rajé k-ap flanbé san-l pa janm étinn nan (Ex 3, 5.6). Bondié blijé rasiré yo, antan-l fè yo konprann yo pa bézouin pè. Sé konsa Piè té lagé kò-l atè dévan Jézu, lè-l té ouè kijan Jézu té fè-l pran yon gran kantité pouason, atèl pouin filè yo t-ap chiré, li té mandé Jézu pou-l rété louin-l, paské li sé yon moun ki nan péché. Jézu té ba-l asirans, li té di-l: "Pa pè" (Lc 5, 8-10). Sé péché-a sèl ki pou fè nou pè. Jézu lévé vivan, li fi-n éfasé péché-a ak kòz li. Li invité nou fè kè nou kontan. Nan fason li salué médanm yo, li ba yo kè pozé. Sé kè kontan sa-a minm n-ap fété pandan tout tan Pak la jous lapantkot, antan n-ap fè alélouya-a éklaté. "Nou pa bézouin pè". Invitasion sa-a, la Trè Sint Vièj Mari té déjà résévoua-l davans, lè lanj Gabriyèl té parèt devan-l, pou-l té mandé-l konsantman-l nan pou-l té vi-n Manman Pitit Bondié-a. Li té di: "Pa pè, Mari, ou jouinn favè kot Bondié"

(Lc 1, 30). Li té fi-n di-l: "Fè kè-ou kontan, ou minm ki plin favè, Granmèt la avèk ou" (Lc 1, 28). Yon foua Granmèt la avèk nou, nou pa bézouin pè. Sé péché-a sèl ki pou t-a fè nou pè, tankou sòlda yo ki rèd kon bout boua dévan kavo-a tèlman yo sézi (Mt 28, 4), minm jan yo té tonbé sou do, lè yo t-al arété Jézu nan jadin Jétsémani-an, lè Jézu té mandé yo: "Ki moun n-ap chèche?"-a épi li té di yo: "Sé mouin minm" nan (Jn 18, 5). Sé péché-a sèl ki pou t-a fè nou pè, min Jézu soufri-mouri-lévé pou-l ranpôté laviktoua sou péché-a ak sou Satan ki lakoz péché-a (Jn 16, 33). Nou pa bézouin pè. Sé yon mèsaj konsolasion Granmèt la ba nou chak ané, pou anonsé laviktoua tankou apré pasaj lanmè Rouj la. Laviktoua sa-a Jézu ranpôté-a, li réalizé sa Moyiz té ranpôté sou lamé Faraon-an, ki té sèvi tankou lonbraj li (1 Co 10, 6; Col 2, 17; He 8, 5).

Lanj Granmèt la sot nan syèl la, li roulé ròch la, li chita sou li (Mt 28,2). Pòt kavo-a louvri tankou pòt Sint la yo louvri chak foua y-ap fété yon ané jibilé-a. Ané jibilé Rédanmsion-an té louvri pou 25 mas lanonsiasion 1983, pòt Sint la té louvri jou sa-a; li té fèmin pou Pak, 22 avril 1984, nan finisman jibilé-a. Pot Sint la fèmin a Ròm min pot kavo-a toujou rété louvri avèk pòt Kè Jézu ki rété louvri-a (Jn 19,34). Jézu ap parèt dévan Sint Magérit-Mari, lap di-l, antan l-ap montré-l kè-l ki louvri-a : "Min kè sa-a ki si tèlman rinmin lézòm nan!" Jézu mouri-lévé pou nou, paské li rinmin nou, li rinmin nou ak yon kalité difé okinn dlo péché pa kapab étinn, dapré sa liv Kantik dè Kantik la di-a (Ct 8,7). Sint Terèz lanfan Jézu pa konn sal t-a bay pou-l fè lézòm kouè nan rinmin sa-a ki pa gin parèy la. Sé pa sanblan Jézu fè. Kè-l louvri tout bon vré, kè-l rété louvri, li toujou ap tann. Épi li minm minm li vin frapé nan kè pa nou, tankou li di nan Apokalips la (Ap 3,20): "Min-m dévan pòt la, mouin kanpé, m-ap frapé; si yon moun tandé voua-m, épi li louvri pòt la, m-ap antré lakay li pou-m soupé, mouin minm tou pré-l, li minm tou pré-m" (cf Jn 14,23)

Sa bon pou nou tandé Jézu minm k-ap ba nou kalité asirans sa-a. Nou abitué konsidéré Bondié tankou yon pèsonaj ki sévè, ki toujou ap véyé nou pou-l pini nou koté nou tonbé-a. Époutan Bondié li minm déklaré nou: Minm jan yon papa sansib pou pitit li, sé konsa li minm li sansib pou nou, tankou solèy lévé louin ak solèy kouché, sé konsa li égzilé péché nou yo louin nou (Ps 103,12). Li di nou: minm jan sièl la ro anlè tè-a, sé konsa rinmin-l fò pou moun ki respékté-l (Ps 103,11). Lè Moyiz mandé-l non-l, li déklaré li sé kè sansib ak pitié, li mal pou faché, li plin rinmin (Ex 34,6-7; cf Ps 86,15;103,8;145,8). Bondié rivé yon pouin li konparé tèt li ak yon manman, antan-l fè rémaké: minm si yo t-a jouinn yon manman ki pa sansib pou pitit li, li minm l-ap sansib pou nou (Is 49,15). Li di nou, sé pou yon ti moman li

té lagé nou, min sé pou tout tan li fè nou fè yon sèl avèk li, antan li sansib anpil pou nou. Li di: yon ti moman li té kaché fas li dévan nou, min nan yon rinmin ki pap janm fini li gin pitié pou nou. Li di nou: sé tankou pou tan Noé-a, lè-l té fè sèman dlo délij yo pa t-ap tonbé sou tè-a ankò, konsa li fè sèman pou-l pa janm faché kont nou, ni pou-l pa janm ménasé nou ankò. Li di nou: Mòn yo mèt pati, bit tè yo mèt tranblé, rinmin-l nan pap pran distans sot sou nou, kontra kè pozé-l la pap souké. Sé mèsaj konsolasion sa-a li ba nou (Is 54,7ss). Sé konsa li té fè. Lékol Profèt Izayi-a di pèp la nan égzil la: "Konsolé, konsolé, pèp mouin, sé Bondié nou ki di sa, palé ak kè, Jérusalem, rélé byin fò ba li, paské sèvis li-a fini, fòt li-a fi-n péyé, li fi-n résevoua nan min Granmèt la kont pinision pou tout péché-l yo" (Is 40,1s).

Konsolé, konsolé, pèp mouin-an. Léspri Sin-an Jézu souflé sou Apot yo, jou dimanch Pak la, nan asouè, lè-l parèt dévan yo, nan kay koté yo té rasanblé-a, sé léspri konsolasion-an, li konsolé nou paské li éfasé péché nou yo. Lè Jézu souflé sou Apot yo, li di yo: "Résevoua léspri Sin-an; moun nou éfasé péché yo, péché yo ap éfasé, moun nou kité péché yo, péché yo ap rété" (Jn 20,22s). Pandan sinkant jou légliz fété Jézu ki lévé byin vivan, li fini tan Pak la avèk sérémoni Lapankot la, fèt léspri Sin-an. Depi dézièm dimanch Pak la, Jézu bay Apot yo mèsaj rékonsiliasion-an, padon péché yo, antan li ba yo pouvoua éfasé péché, gras a léspri Sin-an li souflé sou yo-a, tankou Bondié té souflé léspri vivan nan nin Adan, lè-l t-ap kréyé-l la, nan Paradi-a (Gn 2,7; Sg 15,11). Kè pozé-a, sé mèsaj sa-a ané Jibilé Rédanmsion-an abitué poté, sé li minm tan Pak la poté. Kè pozé, kè kontan. Nou pa doué gin kè séré, nou pa doué gin kè soté, nou pa doué gin chagrin, nou pa doué gin lapinn, Minm nan mitan soufrans nou, nou doué gin kontantman anndan fon kè nou, nou doué gin lapè anndan fon kè nou, tankou Jézu k-ap domi nan fon kal batiman Sin Piè-a., pandan lanmè-a mouvmané-a. Anyin pa doué troublé nou. "Si Bondié pou nou, kilès ki kapab kont nou?" (Rom 8,31) Si Bondié fi-n rann nou jistis, kilès ki kapab kondané nou? Sé nan san pròp Pitit li-a li fi-n lavé fot nou yo, nou plonjé nan lanmò-l gras a batèm nan nan lafoua, nou lévé byin vivan avèk li pou lavi ki pap janm fini an. Nou déjà fi-n fè séparasion ki pou té fèt la, ak péché-a ak rasi-n péché-a, sa vlé di Satan li minm minm, ni tout atirans li k-ap brouyé imajinasion nou ak sans nou, ak oriantasion rézonman nou, ak panchan volonté nou. Nou chouazi Jézu-Kri Granmèt la, jan nou fè nan promès batèm nou nou rénovlé yo. Anyin pa doué fè nou pè. Sé pou nou sonjé mèsaj lanj la déklaré médanm yo nan kavou-a (Mt 28,5.10), minm mèsaj sa-a Jézu rékòmansé di yo osito apré-a: "Nou pa bézouin pè". Sé tankou lè n-al konfésé, Pè-a di nou: "alé ak kè pozé"! Jézu répété nou minm paròl sa-a ankò antan n-ap soti nan Konfésio-

nal la: "alé ak kè posé". Li té di Sin Piè: "Tou sa-ou maré sou tè-a, l-ap rété maré nan sièl la; tou sa-ou lagé sou tè-a, l-ap rété lagé nan sièl la" (Mt 16,19). Jézu pa vini pou-l jijé tè-a, pou-l kondané-l, min li vini pou-l sové-l (Jn 3,17); mision-l, sé sa-l montré nou nan parabòl papa sa-a ki té ouè pitit li-a kité-l al dépanse tout éritaj li-a; lè-l régrèt, papa-a résévoua-l avèk plis kontantman épi avèk plis konsidération passé anvan (Lc 15,11-32), sé gadyin-an ki pèdi mouton-l nan; ki kité katrévindisnèf yo pou-l al chèché sa-k té pèdi-a (Lc 15,4-7); sé madanm nan ki pèdi piès lajan-an, ki balé kay la, pou-l jouinn li-a épi ki rélé tout vouazinaj vi-n fè kè yo kontan pou li (Lc 15, 8-10). Jézu té chasè sèt démon sot nan Mari-Madlèn (Lc 8,2); li té padonnin fot madanm nan ki té nan péché-a, épi ki té vi-n kriyé nan pié-l la, li té di-l: "Alé ak kè pozé!" (Lc 7,50). Jou dimanch Pak la, Mari-Madlèn tandé Jézu di: "Nou pa bézouin pè" (Mt 28,10) cf Mc 16,9; Lc 24,10; Jn 20,15-18). Jézu té bésé jé-l atè pou jé-l pa-t kontré ak jé madanm nan yo té kinbé nan adiltè-a; li té di-l: "Pèsòn pa kondané-ou, mouin minm non plis tou mouin pa kondané-ou, alé pa fè péché ankò" (Jn 8,11). Sé mésaj konsolasion sa-a Jézu poté ba nou (cf Is 40,1-2). Li invité nou, nou minm tou, pou nou fè kè nou sansib pou lòt yo, antan li ba nou parabòl mové jéran-an mèl li té fi-n rinmèt dèt li-a, li mandé-l pou-l té fè kè-l sansib pou lòt sèvitè parèy li-a, ki pa-t kapab péyé-l la (Mt 18,21-35). Li mandé nou pou nou youn padonnin lòt minm jan li minm li padonnin nou (cf Jn 13,14.34). Li mandé nou pou nou pa fè mové jan aléga lòt yo, tankou Juif yo t-ap fè aléga Zaché-a (Lc 19,7), aléga Lévi-a (Mt 8,11) aléga madanm nan ki té nan péché-a (Lc 7,39).

Sé pou Manman Mari, Rèn lapè, ba nou kè pozè sa-a, pou nou chèché fè-l travèsé nan rélasyon avèk prochin nou, antan nou vi-n tounin moun k-ap travay san rété pou lapè: "artisan de paix" (Mt 5,9), yo minm yo rélé pitit Bondié yo

Dépi premié dimanch karèm nan, atansion nou fikse sou pénitans la (Mc 1,14-15: ané B), konvèsion-an, chanjman chémin-an, pou préparé rénouvèlman promès batèm nan avèk lafoua nan nuit Pak la. Jézu désann al préché nanm moun ki té mouri dépi lontan yo, pou ba yo yon dènié chans mété lafoua nan li. Sin Piè di sa, antan-l fè sonjé délij la ki té rivé sou tan Noé-a, lè l-ap palé osijè batèm nan (1P 3,19-22). Pandan karèm nan, sé tankou pèlérinaj pèp Bondié-a nou réfè pandan karant jou, sa-l té fè pandan karantan nan dézè-a, sé tankou nou anba délij la pandan karant jou ki fè sonjé batèm nan, pandan karant jou nan savann nan avèk Jézu-Kri pandan Satan ap tanté-l. Min nou sonjé tou ak-an-sièl la Bondié té trasé bay Noé-a (Gn 9,8-25), pou montré-l kontra li passé avèk nou, kontra sa-a fè nou sonjé kontra batèm nou. Sa fè nou sonjé tou kolòn difé ki t-ap kondui pèp la nan dézè-a, tankou

chandèl Pak la raplé nou-an (Ex 14-21; 40,36; Dt 1,33; Ps 78,14; 105,39; Ne 9,19; Sg 10,17; 18,3; Is 4,5; Jn 8,12; 10,4; 9,5). Bondié fè lapè avèk Noé, minm jan l-ap fè lapè avèk nou tout (Gn 9,12) nan Pitit li Jézu-Kri ki klouré sou Koua-a, san sa-a ki signin kontra batèm nou-an. Sé poua tan karèm nan té préparé nou nan pénitans, charité, lapriyé: pénitans pou nou té améloré rélasion nou parapò a pròp tèt pa nou, charité pou nou té améloré rélasion nou avèk prochin nou, lapriyé pou nou té améloré rélasion nou avèk Bondié.

Nan dézièm dimanch karèm nan, Jézu chanjé figi sou mòn Tabò-a (Mc 9,2-10: ané B), tankou Batèm nan fè nou chanjé figi. Figi-l té kléré, sé limié batèm nan yo rinmèt nou-an, ki fè nou ouè limié nan limié Bondié (Ps 36,10). Rad li blan passé koton, sé rad batèm nan ki abiyé nou-an. Sou mòn Moriya (Gn 22,2; cf 2 Ch 3,1; 1 Ch 21,15; Lc 2,32-38) Abraam té gin kòm konsign pou-l té sakrifié Izaak, pitit li rinmin-an, sèl pitit li-a (Gn 22,2.10). Min sé Bondié k-ap sakrifié sèl Pitit li-a li rinmin-an (Mc 9,7), pou nou kapab vi-n pitit li nan batèm nan (Gn 22,1-18). Dimanch sa-a té bay konsign: silans (Mc 9,9). Plis nou plonjé pou nou nan Bondié, sé plis nou gin solidarité ak tout frè nou yo ("solitaire pour être solidaire"). Batèm nan fè nou gin solidarité ak tout moun.

Touazièm dimanch karèm nan montré Tanp la Jézu té gin mision pou-l né-touayé-a, lè-l té di yo mèt krazé-l, nan toua jou l-ap mété-l kanpé ankò, antan l-ap palé osijè lanmò-l ak rézireksion-l (Jn 2,13-25: ané B). Batèm nan sé yon lanmò pou yon rézireksion, nanm nou sé Tanp Bondié-a, nou gin pou nou pròpté-l ak tou sa ki ankonbré-l, ki jinnin prezans Bondié landan-l. Sou mòn Sinayi-a Bondié té bay Moyiz laloua-a (Ex 20,1-17) kòm kontra ant li minm ak pèp la. Sa fè sonjé kontra batèm nou nan lafoua, jan Sin Pòl di nou-an. Sé tout tan pou n-ap pròpté Tanp kè nou, antan nou réajisté konduit nou dapré kòmandman Bondié yo, antan nou pa kontanté pou égzékité yo sou pa déyò sèlman, min antan nou sonjé sé léspri-a ki konté plis passé lèt la (Ex 36,23-36), paské nan Jérusalèm anro-a, vré Tanp la sé Jézu-Kri li minm (Ap 21,22). Nan Tanp la, koté la Trè Sint Vièj ak Sin Jozèf té jouinn Jézu-a, li té ba yo randé-vou nan lakay Papa-l anro-a (Lc 2,42-52). Yon moun ki batizé, li gin pou-l sonjé plas li anro-a lakay Papa-a (Jn 14,2).

Avèk katriyèm dimanch karèm nan, sé koulèv la Moyiz té pandié sou bou-a nan savann nan (Jn 3, 14-21; ané B), pou moun ki gadé-l avèk lafoua, yo sové. Sa fè sonjé Jézu yo klouré sou Koua-a. Moun ki gadé-l avèk lafoua, y-ap sové. Batèm nan sé yon angajman lafoua. Pèp Bondié-a té égzilé. Lafoua-l pròpté, li tounin (2 Chr 36, 14-23). Sé tout tan pou n-ap réfè pro-

mès batèm nan, paské sé tout tan nou gin tandans glisé. Sé kè sansib Bondié ki toujou la pou rémaré kontra-a nou défèt la.

Nan sinkièm dimanch karèm nan, sé grinn blé-a ki tonbé nan tè-a pou-l donnin (Jn 12, 20-33: ané B) épi sé nouvo kontra-a Bondié té promèt nou-an (Jer 31, 31-34), antan-l ékri-l nan kè nou-an. Batèm nan, sé nan fin-fon kè nou li yé. Sé ak lafoua pou nou konsidéré-l. Dimanch sa-a montré nou kijan sé tout moun Bondié vlé vi-n pitit li. Batèm nan fè nou vi-n fè yon sèl kòd-fanmiy.

Nan sémèn Pak la, soufrans Jézu sé chémin bèlté-l. Li trasé rout pou nou. Tè-a sé yon pasaj, pou nou travèsé nan sièl la. Sé ak jé lafoua batèm nan pou nou konsidéré tout bagay.

Nan nuit Pak la, difé-a nan papòt légliz la montré nou sign rinmin Bondié ki boulé tankou difé, li minm anyin pa kapab étinn, tankou difé Moyiz té ouè k-ap boulé nan rak boua-a san-l pa janm étinn nan, san-l pa fè sann nan (Ex 3, 2). Tout péché ansanm, sé yon ti gout dlo nan brazié sa-a (Ct 8, 7). Okinn péché nou pa doué dékourajé nou dévan kè sansib Bondié gin pou nou, tankou yon Papa ki rinmin sèl pitit li. Bondié sé limiè, Bondié sé rinmin (1 Jn 1, 5; 4, 8). Sé nan limiè rinmin sa-a nou réfléchi sou kréasion-an (Gn 1, 1-2, 2: premié léktu-a), sou garanti-a nan sakrifis Izaak la (Gn 22, 1-18: dézièm léktu-a) sou pasaj la nan lanmè Rouj la (Ex 14, 15-15, 1: touazièm léktu-a), sou rékonsiliasion-an nan kè sansib Bondié-a (Is 54, 5-14: katriyèm léktu-a), sou kontra-a k-ap diré tout tan-an (Is 55, 1-11: sinkièm léktu-a), sou limiè-a Sajès Bondié dévoualé nou-an (Bar 3, 9-15. 32-4, 4; sizièm léktu-a), sou kè-a dlo pròp Bondié-a ap rénovlé-a (Ez 36, 16-28: sétièm léktu-a), sou Batèm nan Sin Pòl palé nou-an (Rom 6, 3-11: uitièm léktu-a), ki plongé nou nan lanmò Jézu-a, pou-l lévé nou nan lavi-l la, nan Rézirèksion-an (Mc 16,1-8; cf Mt 28,1-10; Lc 24,1-12; névièm léktu-a), ki pouint tèt mèsaj nan nuit Pak la.

Batèm nan sé yon rézirèksion. Nou bliyé tout sa-k té pasé lontan, ki té troublé nou. Nou réfèt tou nèf pou yon lavi tou nèf. Sé pou kè nou kontan. Bondié pa régadan, li pa sonjé péché nou pou l-ap mandé nou kont tout la-sint jounin (Ps 103,8-12). Bondié sé Papa (Ps 103,13). Nan batèm nan li fè nou vi-n tounin pitit li li rinmin ak tout kè-l, ak minm rinmin li rinmin sèl Pitit li Jézu-Kri li ofri sou Koua-a pou nou-an. Sé nan limiè Rézirèksion sa-a n-ap maché. Nan Limié Bondié nou ouè Limiè (Ps 36,10). Limiè ranpòté laviktoua sou fè noua yo. Limiè-a kléré nan fènoua yo, fènoua yo pa réyisi toufé-l (Sg 7,30; Jn 1,5; 12,35; Gn 1,3). Gras a Batèm nan, sé pou nou maché tankou pitit Limiè, nan mitan fènoua k-ap vlopé tè-a, pou nou kléré tan-

kou flanbo (Ep 2,15), pou nou chanté avèk kantik la Sin Pòl raplé Éfézyin yo, Kantik Rézirèksion-an: "Révéyé-ou, ou minm k-ap dòmi-an, lévé sot nan pami mò yo, sou ou Jézu-Kri ap kléré!" (Ep 5,14).

*

Pak sé yon viktoua: Viktoua Jézu sou Satan, viktoua Jézu sou péché, viktoua Jézu sou malè, viktoua Jézu sou lanmò, viktoua Jézu sou fènoua, viktoua Jézu sou chagrin. Pak sé rouayom lapè.

1.- Viktoua Jézu sou Satan, ak tout rayisans ki vlé étinn rinmin: Jou vandrédi-sin-an, rayisans té sanblé ranpòtè laviktoua, lè Jézu inosan té viktim jalouzi, lè kè yo té fèmin dévan tout mirak li yo (Jn 5, 56; 6, 26.30; 9, 16), ata dévan rézirèksion Laza-a minm (Jn 11, 45-54). Okontrè sé sa-k té pousé yo pi plis pran désizyon signin davans kondanasion a-mò-l, pou tout moun pa kouè nan li, pou prèt ak chèf yo ak Farizyin yo pa pèdi popilarité yo, pou foul la pa soulvé kont Romin yo, pou Romin yo pa souadizan vi-n krazé Tanp la, détrui péyi-a (Jn 11, 48). An-atandan, vré Tanp la, yo krazé-l yo minm minm; min toua jou apré, li lévé. Vré Pèp la, yo touyé-l; min toua jou apré, li réfèt tou nèf. Anyin pap janm défèt li ankò. Rayisans pa kapab étinn rinmin. Difé-a ap boulé nan rajé Sinayi-a, san-l pa janm kapab étinn (Ex 3, 2; Ct 8, 7). Pak sé rouayom lapè.

2.- Viktoua Jézu sou Péché, ak tout divizion ki vlé gaté fanmiy: Ala bèl sa bèl, lè tout moun ap viv ansanm kòm frè (Ps 133, 1). Sé vré losion k-ap monté nan dirèksion Bondié (Ps 142, 2). Sé vré sakrifis ki fè-l plézi. Li réspiré alèz nan kè nou (Gn 8, 21; Ex 29, 18.25; Lv 1, 9. 13; Nb 28, 1). Dépi péché-a fi-n antré sou tè-a, Adan akizé Èv (Gn 3, 12), Kayin touyé Abèl (Gn 4, 8), Lamèk touyé ti moun tou piti (Gn 4, 23), Ézayu chèché touyé Jakòb (Gn 27, 41), frè Jozèf yo égzilé-l (Gn 37, 28). Moun viv tankou lènmi youn pou lòt (cf Is 11, 6-9). Fanmiy vi-n séparé pou késion byin, tankou Abraam ak Lòt (Gn 13, 6-9), Ézayu ak Jakòb (Gn 36, 6-8). Jénòm nan mandé Jézu pou-l sèvi jij ant li minm ak frè-l pou késion éritaj (Lc 12, 13). Kòd fanmiy nou sé Jézu-Kri. Li lévé; li pap mouri ankò. Nan lanmò-l nou antéré tout divizion (Ep 2, 14). Pak sé rouayom lapè.

3.- Viktoua Jézu sou malè ak tout kè soté ki vlé défèt konfians: Yon Krétyin sé yon moun k-ap maché kòmsi li ouè Sila-a yo pa kapab ouè ak jé-a (He 11, 27; cf Ex 3, 6; 33, 20.23; Gn 32, 31; Jg 6, 22; 13, 23 Ex 19, 21; Lv 16, 2; Nb 4, 20; 6, 25; 1 R 19, 13; Is 6, 2.4; Dt 5, 24; Ex 24, 11; Nb 12, 7-8; Dt 34, 10; Si 45, 5; Jn 1, 18; 1 R 19, 13; Mt 17, 3; 2 Co 12, 1; Jn 1, 14; 11, 40; 2 Co 4, 4-16; Jn 6, 46; 1 Jn 4, 12; Mt 5, 8; 1 Jn 3, 2; 1 Co 13, 12). Li pa fè tankou

madanm Lòt, k-ap viré gadé déyè pandan vil Sodòm nan ap boulé-a (Gn 19, 26.17; Mt 24, 18; Lc 9, 62). Sé dévan jé-l fikse sou bout chémin-an, koté li gin pou-l rivé-a (Ph 3, 13). Anyin pa gin doua fè-l pè. Pi gro sézisman ki ginyin-an, sé lanmò Jézu. Li valé tout malè. Réziréksion-l ranpòtè laviktoua (Jn 16, 33; Mt 28, 4; Jn 18, 6). Yon Krétyin pa doué gin kè soté dévan anyin. Fòs li nan Jézu-Kri. Sa pa vlé di li pap soufri, li pap troublé. Min li doué égzaminé tout évènman nan balans Réziréksion Jézu-Kri-a. Plato balans la, sé dé bra Koua-a. Poua k-ap pézé danré-a, sé Kò Jézu-Kri ki pandié sou Koua-a, jan "Hymne" Vèp Sémèn Sint la di-a: "Beata cujus brachii saeculi pependit pretium": "Sé chans pou ou, paské pri moun yo, sé sou bra-ou li pandié" (Hymne "Vexilla Regis prodeunt", Liturgia Horarum II, Vatican 1974, 313; Bréviè, Tan Karèm, p. 160). Dévan asirans sa-a, ki sa ki pou fè nou pèdi konfians? (Rom 8, 31-39). Lavi nou nan min Granmèt la; yon chévé nan tèt nou pap tonbé si-l pa pasé lòd (Lc 21, 18). Li bay Mésajé-l yo konsign pou yo poté nou sou min, pou pié nou pa frapé sou okinn ròch nan chémin (Ps 91, 13-14; Mt 4, 6; He 1, 14). Pak sé rouayom lapè.

4.- Viktousa Jézu sou lanmò, ak tout maladi ki vlé jinnin éfò: Sin Monfò t-ap préché mision Saint-Laurent-sur-Sèvres. Nan dènié jou mision-an, li monté sou éstrad; li préché ak tout yon gro lafièv li té ginyin. Apèn li fini, li kouché, li travèsé sot nan lavi sa-a al nan lòt lavi-a. Li té vlé rét fidèl nan pòs li jous nan dènié moman, tankou yon vanyan sòlda. Maladi ak lanmò pa gin doua krazé kouraj nou. Adan té fè péché, sé vré. Péché-a sé pikan anpouazonin lanmò-a (1 Co 15, 56). Min pikan anpouazonin sa-a fi-n krazé, lè Jézu lévé byin vivan-an. Laviktoua-a valé lanmò-a (1 Co 15, 54). Si gin yon séparasion ki réalizé nan légzistans nou, sé pa nan lanmò pou nou chèché-l; sé nan batèm nan. Sé batèm nan ki séparé légzistans nou an dé mouatié: yon prémié mouatié ki pa kapab donnin anyin, yon dézièm mouatié ki chajé ak donézon (cf Ga 5, 12s). Lanmò-a rivé pou-l séparé kò nou ak nanm nou. Lè nou travèsé-l, nou ouè Bondié fas a fas, nou jouinn rékonpans, pou bon aksion nou. Min vré chanjman-an sé dépi nan batèm nou li fèt, batèm sa-a ki plonjé nou nan lanmò Jézu-Kri-a pou nou viv nan Réziréksion-l nan. Pak sé rouayom lapè.

5.- Viktousa Jézu sou Fènoua, ak tout anpéchman ki vlé baré chémin: Jou dimanch Pak la, anvan solèy lévé, vré Limiè-a gin tan kléré. Li si tèlman kléré fò, gad yo pran tranblé ak frison, yo vi-n glasé tankou moun ki mouri (Mt 28, 4), minm jan Sin Pòl ap tonbé dévan Limiè sa-a sou rout Damas la, gro midi (Ac 9, 3-4; 22, 6-7; 26, 13-14). Lansègman Jézu té bay Apot yo, yo pa-t ko kapab konprann li. (Jn 16, 12; 2, 22; 20,9; 14, 26; Lc 2, 50s). Lè-l lévé vivan, li fè yo ouè klè. Li proché sou rout la, l-ap maché ak pélrin

Émayus yo. Lannuit prèské tonbé. Min Limiè-l kléré nan fon kè yo, antan l-ap éspliké sans sa ki té ékri yo, pou-l fè yo konprann évènman ki té rivé vandrédi-sin-an (Lc 24, 13-35). Nan lavi nou, gin anpil bagay ki pa pasé jan nou t-a vlé. Sé nan Limiè Rézirèksion Jézu-Kri-a pou nou égzaminé yo (Ps 36, 10; 27, 1; 89, 16; Job 29, 3; Ps 4, 7; 16, 11). Pak sé rouayom lapè.

6.- Viktous Jézu sou Chagrin, ak tout kè séré ki vlé frinnin léspérans: Chagrin gadé dèyè, léspérans gadé dévan. Moun k-ap fè krich la, lè labou li fi-n pétri-a défèt, li rékòmansé pétri-l ankò, pou-l réfè krich la avèk li, dapré sa Profèt Jérémi di nou (Jer 18, 1-12). Nou pa gin pou n-ap régrèt avantaj nou manké, kòmsi sé yon sèl okazion ki ginyin pou vouayajé. Kè nou kapab sansib, sé vré, min nou pa doué kitè-l séré. Pak sé tan kè kontan. Tout chagrin doué disparèt. Tan frèt la fi-n pati, tan lapli bouché-a fi-n alé (Ct 5, 11). Sé yon nouvo kòmansman ki parèt, k-ap boujonnin yon lavi tou fré. Lavi nou toujou doué rékòmansé a-nèf chak jou, tankou jou matin dimanch Pak la. Jézu lévé byin vivan, kè kontan nan sièl, fèt pou tè-a (cf Ps 97, 1). Pak sé rouayom lapè.

7.- Jézu ranpòté laviktous sou Satan, sou Péché, sou Malè, sou lanmò, sou fènoua, sou Chagrin. Pak sé rouayom lapè. Sé pou Manman Mari, Rèn Lapè, ba nou kè pozé-l la, pou okinn rayisans Satan pa étinn rinmin nou, pou okinn divizion péché pa gaté fanmiy nou, pou okinn kè soté malè pa défèt konfians nou, pou okinn maladi lanmò pa jinnin éfò nou, pou okinn anpèchman fènoua pa baré chémin nou, pou okinn kè séré Chagrin pa frinnin léspérans nou.

Pak sé Rouayom lapè, koté Jézu ranpòté laviktous sou Satan ak rayisans ki vlé étinn rinmin nou sou Péché ak divizion ki vlé gaté fanmiy nou, sou Malè ak kè soté ki vlé défèt konfians nou, sou lanmò ak maladi ki vlé jinnin éfò nou, sou fènoua ak anpèchman ki vlé baré chémin nou, sou Chagrin ak kè séré ki vlé frinnin léspérans nou. Pak sé rouayom lapè.

*

Prémié Dimanch Karèm nan, Jézu rézisté tantasion djab la (Mt 4, 1-11: ané A). Dézièm Dimanch karèm nan, rad li vi-n blan kon koton, pandan voua Papa-a ap déklaré li sé Pitit li, pou nou kouté Paròl li (Mt 17, 1-9). Touzièm dimanch Karèm nan, li promèt Samaritèn nan dlo lavi-a (Jn 4,5-42). Katriyèm dimanch Karèm nan, avèg la témouagné sé li-k fè-l ouè Limiè-a (Jn 9, 1-41). Sinkièm Dimanch Karèm nan, li fè Laza lévé vivan sot nan pami mò yo (Jn 11, 1-45). Dimanch Ramo, kapitèn nan déklaré lafoua-l, antan-l di: "Sila-a, sé Pitit Bondié-a" (Mt 26, 14-27, 66).

Sé tankou machéskalié nou monté osijè lansègman sou BATÈM nan ki fè nou rénonse djab la, nou kouté Paròl Pitit Bondié-a, nou abiyé ak rad tou nèf, nou lavé ak dlo lavi-a, nou maché nan limiè, nou lévé sot nan pami mò yo, nou vi-n pitit Bondié gras a lafoua nou.

Nan nuit Pak la, nou ranmasé tout lansègman sa yo, nou fè sonjé Batèm nan, sitou nan sérémoni Limiè-a, nan sérémoni Paròl la nan sérémoni Dlo-a, koté nou rénonse Djab la, pou nou chouazi Bondié Granmèt la, antan nou dékaré lafoua nou nan Jézu-Kri ki lévé byin vivan sot nan pami mò yo, ki abiyé nou ak rad lagras la pou nou vi-n tounin pitit Bondié.

Karèm nan sé yon tan fò, pou lansègman lafoua nou, ki abouti nan Dimanch Pak la, koté kè kontan nou éklaté pandan sinkant jou, jous lapankot, nan bingn Léspri-Sin-an k-ap dirijé nou nan pèlérinaj lafoua-a. Promès batèm nou, Sin Monfò invité nou réfè-l souvan nan min la Trè Sint Vièj Mari, ki pa janm poté mak péché Adan ak Èv la. Chak nuit Pak, nou réfè promès sa-a yon fason ofisièl. Chak matin lè nou lévé, nou rénouvlé-l nan min Manman Mari, pou-l vlopé nou, pou-l kléré nou, pou-l dirijé nou nan tout sikonstans lavi-a.

*

Pak sé fèt Batèm. An 1988, légliz té raplé sa fè mil ané dépi la Russie té batizé, avèk Sin Vladimir, prins Kièvn, nan ané 988, sou bò larivière Dniepr. Batèm la Russie-a gin yon gran inpòtans akòz éfò k-ap fèt tou lè dé koté, ni sou bò solèy lévé, ni sou bò solèy kouché, pou ouè si légliz Jézu-Kri-a a réyisi fè yon sèl, antan-l "rékòmansé réspiré ak tou lé dé poumon-l", jan Pap la di-a, ni poumon a lès la, ni poumon a louès la.

A lokazion rapèl batèm la Russie-a, Pap Jan Pòl II té ékri yon lét apostolik ki té komansé avèk dènié paròl Jézu-Kri té adrésé Apot li yo avan-l té monté nan sièl la, nan finisman lévanjil dapré Sin Matié-a: "Alé sou tout tè-a, anségné tout nasion yo, batizé yo o non Papa-a ak Pitit la ak Léspri Sin-an" (cf Mt 28, 19; Mc 16, 15). Lèt sa-a, li té rélé-l "Euntes in mundum": "Alé sou tout tè-a". Ladan-l li té fè sonjé kijan Pap Pi XII té déjà ékri yon lét bay Kardinal Tisran an 1939 pou-l té fété 950 ané batèm la Russi-a. Sé nan minn lign sa-a li té vlé kontinué, antan-l té voyé lèt li-a pou fété mil ané batèm sa-a.

Prinsès Olga té résévoua batèm an 955, min sé pitit pitit li, Sin Vladimir, ki té suiv tras li. Svjatoslav, pitit prinsès Olga-a, pa-t angajé nan santié Kris la. Sin Vladimir résévoua batèm nan ané 988. Tout péyi-l la suiv li nan lafoua-

a. Sé nasion rus, ukrénièn ak biélorus. Éritaj sa-a té travèsé lournal, li t-al jous nan lazi nan Nò, li t-al jous sou bò lanmè Pasifik la, épi minm pi louin ankò. Pap Jan Pòl II té fè sonjé sa Psòm nan di-a: "Voua yo rivé jous nan bout tè-a" (Ps 19,5; Rom 10, 18). Batèm sa-a té fè tout péyi larusi, ukréni ak biélorus, sa yo té rélé "Rus" la, fè you sèl avèk légliz Ròm.

Dlo batèm nan yo té béni-an té di: "Ba-l bénédiksion Joudin-an, fè-l vi-n tounin yon sous k-ap fè nou pa mouri ankò, kado k-ap fè nou vi-n sin, k-ap délivré nou anba péché nou. Ou minm, Mèt tout bagay, fè dlo sa-a vi-n tounin yon dlo délivrans, yon dlo k-ap fè nou vi-n sin, k-ap pròpté kò nou ak léspri nou, k-ap délivré nou anba chinn nou, k-ap padonnin fot nou, k-ap kléré nanm nou, k-ap sèvi yon bingn pou réfè nou, k-ap fè léspri nou vi-n tou nèf, k-ap fè nou favè pou nou vi-n tounin pitit adoptif, yon rad k-ap fè nou pa janm mouri, yon sous lavi".

Bondié rinmin Pèp ki nan péyi la Russie yo, jan Profèt Jérémi di-a: "Ak yon rinmin k-ap diré tout tan mouin rinmin-ou, sé poua mouin kinbé favè-m pou ou" (Jer 31, 3). Batèm la Russie-a té poté yon richès nan légliz la. Pè sa yo viv minm lafoua nou-an nan fason pa yo. Chak bagay gin tan-l (Qo 3, 1-8). Gin yon lè tan-an rivé bout li, jan Sin Pòl di Galat yo (Ga 4, 4). Dépi nan névièm sièk légliz Konstantinòp té éséyé fè lafoua-a rivé nan réjion sa yo. Nan dizièm sièk la, sé pa Bizans sèlman ki té voyé misionè, min sé Slav a louès yo, ki tou pré péyi Rus la, ki voyé misionè sou tras Sin Siril ak Sin Métòd, yo minm ki té mété litiji-a nan lang slav la, pou moun yo té kapab konprann pi byin. Dépi an 944. té gin yon légliz nan vil Kièv, ki té konsakré sou non Profèt Éli. Sé konsa vè 955, prinsès Olga fè yo batizé-l. Lè-l t-al rann vizit nan vil Konstantinòp, Patriach Polièkt té salié-l antan-l té di-l: "Ou béni nan pami tout fi rus yo, paské ou rinmin limiè-a, ou chasé fènoua yo. Sé poua pitit larusi yo ap béni-ou jous nan dènié jénérasyon-an". Pitit pitit li, Sin Vladimir, té réprann éritaj léspri-l la an 988, antan-l résévoua batèm ak tout pèp li.

Lè sa-a légliz la té fè you sèl, ni a lès, ni a louès. Sé poua, antan légliz t-ap fété mil ané sa-a an 1988, li té vlé mandé Bondié plis éspérans pou-l rétourin fè you sèl ankò, paské sé minm Batèm nan nou té résévoua. Pap Jan XV té voyé rélik Sin Kléman bay Sin Vladimir, nan ané Batèm nan, pou-l té fè sonjé mision Sin Siril ak Sin Métòd ki té poté rélik sa yo sot Cherson al a Ròm. Pap Silvès II té voyé Bruno de Querfurt an 1007, pou-l té préché an Rusi. Li té bay Vladimir kòm tit: "Roua Rus yo". Pap Sin Grégoua VII té bay désandan yo minm tit sa-a an 1075. Sé you fason pou té montré yo antré nan nasion Krétyin yo. Yo minm tou yo té vi-n misionè, jous nan Kar-

pat, jous Novgoròd, nan sid riviè Dniepr la, jous nan nò riviè Vòlga-a, jous nan bò lanmè Pasifik la.

Konsa lafoua-a té pati sot Kièv, li té kouvri tout péyi ki anba lòd patriarka Moskou-a pou légliz Otodoks, épi anba lòd légliz Katolik Ukrénièn nan, ki té réfè angajman-l parapò a Ròm nan vil Brèst.

Tan-an gin pou-l rivé pou nou vi-n réfè yon sèl, nan yon sèl Batèm sa-a yo té fété mil ané-l an 1988 la, nan Ané marial la. Sé pou Manman Mari, Manman légliz, Manman tout moun, fè nou fè yon sèl tout bon vré, malgré diférans istoua avèk konpòtman ki séparé nou.

*

* *

DÉZIÈM DIMANCH PAK A (DIMANCH MIZÉRIKÒD)

Dézièm dimanch Pak la, yo rélé-l dimanch "in albis", sa vlé di: dimanch "an blan", paské lontan tout moun ki té batizé nan nuit Pak la apré tout antrénman Karèm nan, yo té abiyé tout-an blan, pou fè sonjé kijan batèm nan lavé tout fot yo, li fè yo vi-n san tach. Déklarasion lafoua Sin Toma-a fè nou sonjé dékalrasion lafoua ki kadré avèk batèm nan; chak foua Pè-a lévé Kò ak San Jézu anlè nan lamès la, apré konsékrasion-an, nou di nan kè nou minm paròl Sin Toma sa yo: "Granmèt mouin, Bondié mouin" (Jn 20, 28), épi nou ajouté nan fon kè nou: "Mouin adoré-ou é mouin rinmin-ou". Sa édé nou nourri lafoua nou. Sé tanzantan pou nou répété paròl sa yo, pou nou abitué pozé jès lafoua nan lavi nou, pou nou réaji dévan évènman yo avèk léspri lafoua.

Sin Piè di nou nan premié Lèt li-a (1 p. 1, 3-9), lafoua nou y-ap éséyé-a, li gin plis pri pasé lò, sa yo éséyé nan difé-a; koulié-a nou pa ouè, n-ap maché nan fènoua, min limiè-a kléré sou pa anndan, anndan "acte de foi" nou pozé-a, sé nan sièl la n-ap jouinn rékonpans lafoua nou bay la.

Ni réfrin Alélouya anvan lévanjil la, ni réfrin kominion-an réprann répròch Jézu fè Sin Toma-a osijè lafoua-a (Jn 20, 27).

Sa fè ui jou Jézu lévé byin vivan. Sé "octave" Pak la. Sé jou Granmèt la, jou Apot yo té konn réyini yon fason spésial pou fété mèvèy sakré Granmèt la. Sé antan y-ap fè sonjé jou Granmèt la, Granmèt la parèt nan mitan yo. Sé konsa chak dimanch lè lamès la ap fèt, Jézu Granmèt la la nan mitan nou. Apré Konsékrasion-an, Pè-a di: "Il est grand le mystère de la foi" (cf 1 Tm 3, 16). Ala yon bèl mèvèy nou pa kapab konprann min nou kouè.

Sin Piè di nou nan réfrin pou antré-a (1 P, 2, 2) pou nou konpòté nou tankou ti moun ki fèk fèt, pou nou anvi lèt ki san dlo-a yon fason kòrèk, pou nou dévlopé ladan-l, sé batèm nan ki fè nou vi-n tankou ti bébé ki fèk fèt, sé pou nou dévlopé nan lansègnman Granmèt la, pou nou ba-l lafoua nou. Krétyin yo, yo rélé yo "fidèl", sa vlé di moun ki gin lafoua. Sé non sa-a minm Sin Luk ba yo nan Travay Apot yo (Ac 2, 42-47). Li di tout moun ki té kouè yo, yo ansanm. Batèm nan fè nou vi-n antré nan group fidèl yo, nan fanmiy moun ki kouè yo.

Premié priyé dézièm dimanch Pak la fè sonjé kijan Bondié té limin lafoua pèp la ki konsakré pou li-a, li mandé pou Bondié dévlopé favè sa-a pou tout moun kapab konprann pi byin ki kalité bingn ki lavé yo, sa vlé di nan batèm nan, ki kalité léspri ki fè yo réfèt, ki kalité san ki délivré yo.

Sé sou batèm nan toujou priyè sou kado yo palé, antan li mandé Bondié pou-l résévoua kado pèp li-a ak sila yo li réfè-a, sa vlé di moun ki fèk té batisé nan nuit Pak la, li mandé pou sila yo, ki réfèt nan louanj non Bondié ak nan batèm nan yo jouinn kè kontan ki pap janm fini-an.

Finisman bénédikcion solanèl la raplé kijan Bondié fè nou lévé vivan nan batèm nan, antan nou déjà kouè nan li, li mandé Bondié pou-l fè nou favè patisipé nan déstiné Pitit li-a, antan nou viv douat koulié-a.

Sé pou Manman Mari fè nou viv douat konsa, antan nou anvi lèt ki san dlo-a, yon fason kòrèk, jan Sin Piè mandé nou-an (1 p. 2, 2).

*

Dézièm dimanch Pak la, yo rélé dimanch "in albis" la, dimanch "an blan"-an, akoz moun ki té batizé nan nuit Pak la, yo té konn abiyé jou sa-a tout-an-blan-an, nou sonjé-l, lè, nan batèm nan, nou ouè Pè-a mété ti toual blan-an sou tèt ti moun ki fèk batizé-a, pou montré kijan nanm li tou pròp. Premié priyè-a mandé Bondié pou-l fè nou konprann tout tan pi byin ki kalité batèm ki nétouayé nou, ki kalité l é s p. r i ki fè nou réviv, épi ki s a n ki délivré nou: toua témouin sa yo Sin Jan palé nan premié Lèt li-a, lè-l di sé yo toua k-ap sèvi nou témouin: léspri-a, dlo-a ak san-an (1 Jn 5, 8). Sint Ogustin di: dézièm dimanch Pak la, sé uitièm jou nésans nou. Li fè konparézon avèk jou sikonsizyon Jézu-Kri-a: 8 jou apré nésans li. Li di yo maké nou ak sign lafoua-a (Sermo 8 in octava Paschae, I, 4:PL 46, 838-841; cf Liturgia Horarum II, Vatican 1974, 497-498). Li fè nou sonjé kijan nou lévé byin vivan avèk Jézu-Kri. Li mandé nou pou nou mété lidé nou sou bagay anro yo, koté Jézu-Kri chita adouat Bondié-a. Lavi nou kaché ansanm avèk Jézu-Kri nan Bondié. Lè Jézu-Kri ap rétonnin nan bèlté-l, lè sa-a n-ap parèt nan bèlté-a avèk li tou (ib). Sé pou Manman Mari fè nou évité chèché kondui tèt nou yon fason éstravagan, pou nou pa chèché fè bagay k-ap atiré atansyon lòt moun sou nou; okontrè sé pou nou aksépté kité lavi nou kaché avèk Jézu-Kri nan Bondié; sé li minm k-a fè ouè sa nou yé. Konduit nou doué sèvi-l témouin; sé pa pròp tèt pa nou pou nou sèvi témouin, antan n-ap chèché louanj lèzòm. Ròch la bòs mason yo jété yon koté-a, sé li minm ki vi-n tounin ròch-kouin (Mt 21, 42; Ac 4, 11; Ps 118, 22).

Lè yo méprizé nou, yo pa rékonèt sa nou yé, nou pa gin pou n-ap bonbé pouatri-n nou, pou n-ap éplé non nou. Sé Jézu-Kri k-a okipé kozé sa-a. Li mandé pou nou sèvi-l témouin. Tout liv Travay Apot yo nou li pandan tan Pak la, sé sou témouagnaj sitou li palé. Sé poua léspri Sin-an gin yon gran plas nan liv sa-a.

Pou sèvi Jézu témouin, sé pou nou aprann éfasé kò nou, tankou Jan-Batis, ki fi-n louvri rido-a, li pa rété dévan éstrad la, pou-l pa jinnin pèsonaj la li fi-n prezanté-a.

Sé pou nou sèvi Paròl Bondié-a tankou yon voua k-ap poté Paròl la, san-l pa pran plas li; okontrè sé lè voua-a étinn onivo zòrèy, sans Paròl la gin plis fòs onivo intélijans.

*

Yo rélé dimanch sa a "Dimanch Mizérikòd" tou, dapré priyè ki louvri mès la. Sé Pap Jan-Pòl II ki té ba-l tit sa-a. Sé nan lavèy jou sa-a, nan samdi soua li mouri 2 avril 2005 apré yo fi-n sélébré Mès la pou li, jan li té mandé-a, vè 8 è disoua.

*

* *

DÉZIÈM DIMANCH PAK B (DIMANCH MIZÉRIKÒD)

Dézièm dimanch Pak la fèmin sémèn Pak la. Sin Ogustin konparé-l avèk jou yo té konn fè lasikonsizyon pou Juif yo, ui jou apré yo té fi-n fèt. Li éspliké: uitièm jou sa-a, sé an minm tan premié jou-a. Li mandé pou nou sonjé batèm nou ki fè nou mouri avèk Jézu-Kri pou nou lévé vivan ansanm avèk li. Li invité nou avèk lavi Jézu-Kri, pou nou débarasé nou ak tout mové santiman, mové panchan kò-a. Lévanjil dézièm dimanch Pak la (Jn 20, 19-31) kòmansé antan-l fè sonjé "premié jou sémèn nan" (Jn 20,19); li fini antan-l raplé "uitième jou-a" (Jn 20,26). Premié jou-a Jézu lévé vivan, li parèt dévan dis Apot yo. Uitièm jou-a, li parèt ankò dévan yo avèk dévan Toma ki pa-t vlé kouè anvan. Sé chak dimanch Apot yo rasanblé pou fè sonjé "Jou Granmèt la" té lévé-a. Chak foua, Granmèt la nan mitan nou, lè n-ap fè sonjé-l.

Sa Jézu souété nou, sé kè pozé. Li di Apot yo sa dé foua nan premié jou sémèn nan (Jn 20, 19.21); apré sa li di Toma sa yon foua, nan uitièm jou-a (Jn 20,26). Sé poua minm li té souffri, li té mouri. Apot yo té gin kè soté, yo té pè. Lè yon moun manké lafoua, li pè. Chak foua Bondié vlé asiré lafoua pèp li-a, li toujou di-l: "pa pè, mouin avèk ou". Apot yo té pè Juif yo. Gin Krétyin ki pè montré lafoua yo; lafoua sé kè pozé, li apuiyé sou Jézu-Kri, blòk ròch solid, ki pèmèt nou di: "AMEN", paské nou sètin li pap souké, li pap glisé, li pap roulé. Lafoua sé kondision pou Bondié fè mèvèy pou nou (Mc 11,23; Jn 11,40; Mt 8,10). Pa pè, kè pozé, sé mèsaj Pak la ki ba nou asirans. Lafoua pa bézouin ouè. Otréman li pa lafoua ankò. Sin Toma égzijé ouè avan-l kouè. Lè yo lévé Kò ak San Jézu-Kri anlè apré Konsékrasyon-an, sou aparans pin ak divin-an, nou di nan kè nou minm paròl Sin Toma yo: "Granmèt mouin, Bondié mouin" (Jn 20,28). Sé yon invasiyon pou nou mété lafoua nou spésialman nan sakréman Kò ak San Jézu-Kri-a ki mérité anpil respè-a, paské sé li minm ki sant ak sous tout sakréman yo; apré konsékrasyon-an, sé aparans pin-an ak aparans divin-an sèlman ki la; anba aparans sa yo sé Kò Jézu-Kri, sé San-l, sé Nanm li, sé Divinité-l réyéman ki prézan. Sé poua Pè-a di: li gran sakréman lafoua-a. Ala yon bèl bagay, nou pa kapab ouè, min nou kouè. Jézu-Kri toutantié sou aparans pin-an, li toutantié sou aparans divin-an.

Sé poua nou doué pròpté kè nou avan nou proche koté-l. Bondié té di Moyiz: Rétiré sapat ou nan pié-ou; tè sa-a ou-ap pilé-a, sé yon tè ki sakré (Ex 3,5). Bondié té pròpté po bouch Profèt Izayi ak yon chabon difé nan kay sakré-a, pou Profèt la té kapab kanpé dévan-l (Is 6,6-7). Jézu souflé sou

Apot yo, jou Rézirèksion-an; li ba yo léspri Sin-an ak pouvoua pou éfasé péché yo (Jn 20, 22-23). Sakréman konfésion-an orianté nan dirèksion sakréman lékaristi-a; sé yon préparasion pou lékaristi-a. Si nanm nou gin gro tach ladan-l, nou pa doué proché vi-n résévoua Kò ak San Jézu-Kri, anvan nou konfésé nan min yon Pè. Gin yon moun ki té vi-n jouinn Sin Monfò pou lakonfésion, li té kaché toua gro péché. Monfò ba-l lavé yon mouchoua ki té gin toua tach. Tach yo pa kapab soti, joutan li déklaré toua péché-l yo. Si gro péché taché kè nou, li riské voualé konsians nou; sé pou nou dévoualé-l bay résponsab Bondié rinmèt pouvoua pou éfasé péché; apré sa sèlman, n-ap kapab proché kot gran sakréman-an ki sous tout lòt yo, sakréman lékaristi-a. Gin yon mésié ki t-al konfésé, min li pa-t régrèt péché-l. Pè-a ba-l kòm pénitans pou-l al plin yon ti kalbas dlo. Li maché tout koté, li pa réyisi plin-l, jous yon lè yon ti gout dlo tonbé sot nan jé-l, li plin kalbas la, la minm. Konfésion-an préparé nanm nou pou nou kapab proché sakréman lékaristi-a avèk respè, avèk lafoua, lafoua batèm nou-an. Dézièm dimanch Pak la, yo rélé-l dimanch "in albis", dimanch "an blan "; tout moun ki té batizé pou Pak la, yo té konn abiyé an blan jou sa-a. Nanm nou doué blan minm jan ak jou batèm nou-an.

Sin Piè di nan kòmansman lamès dézièm dimanch Pak la: "Tankou ti bébé ki fèk fèt, nòmalmant sé pou nou anvi lèt ki pa gin dlo ladan-l nan, pou nou dévloppé nan délivrans la" (1 p. 2,2). Lèt sa-a ki pa gin dlo-a, sé yon nanm ki gin kè pozé, ki pa troublé ak pliziè dirèksion; yon sèl chémin, yon sèl kè pou Granmèt la; moun ki sèvi-l ak dé kè, sé kòm si li mété dlo nan lèt la, li pa kapab dévloppé nan délivrans la.

Répròch Jézu fè Toma-a, sé yon konpliman indirèk tou li yé pou Manman-l: Élizabèt té di-l: "Sé chans pou sila-a ki té kouè nan paròl Granmèt la té di-l la pou-l réalizé-a" (Lc 1,45). Jézu di: "Sé chans pou moun ki pa ouè min ki kouè" (Jn 20,29). La Trè Sint Vièj Mari pa-t ouè, min li té kouè. Lè tout Apot yo té pèdi lafoua ant vandrédi-Sin ak dimanch Pak, li minm sèl li té kinbé flanm lafoua-a limin nan kè-l, pou tout tè-a, jous jou Jézu lévé-a. Sin Piè mandé nou pou nou kinbé lafoua-a limin nan kè nou, tankou yon ti lanp k-ap kléré nan fènoua, joutan solèy la lévé (2 p. 1,19). Sé sa minm la Trè Sint Viej Mari té fè pou nou o non tout ras lézòm pandan Limiè Tè-a té étinn anba tè-a ant vandrédi-Sin ak dimanch Pak la, nan gran Saba sa-a. Sé pou sa yo rézèvé jou Samdi-a kòm yon jou ki konsakré spésialman pou la Trè Sint Vièj nan sémèn nan, li préparé nou nan lafoua pou nou fété "Jou Granmèt la" lévé-a, jou Dimanch la, jou Limiè Pak la kléré pou chasé fènoua sou tè-a. La Trè Sint Vièj Mari fè pasaj la, sot nan vandrédi Sin al nan dimanch Pak, san limiè lafoua-a pa étinn nan kè-l. N-ap konfié-l limiè

lafoua pa nou-an, limiè lafoua batèm nou-an; n-ap mété-l nan kè-l pou souf Satan pa étinn li, avèk kè soté k-ap dékontrolé nou. Lanj Granmèt la té di la Trè Sint Vièj Mari: "Ou pa bézouin pè" (Lc 1,30); Jézu di nou: "Kè pozé" (Jn 20, 19.21.26). Anndan kè Manman-l n-ap pozé kè pa nou, byin trankil, tankou yon ti bébé, sou bra manman-l (Ps 131,2).

*

Nan dézièm dimanch Pak la, minm si dé premié léktu yo chanjé chak ané pandan touazan, lévanjil la toujou rété minm nan (Jn 20, 19-31): rankont Granmèt la avèk Apot yo épi ui jou apré avèk Toma, kòm pou konplété mésaj lafoua lévanjil Sin Jan-an dévlopé dépi nan kòmansman-an.

Dènié paròl Jézu di Toma-a (Jn 19,29) invité nou gadé dépi nan kòmansman lévanjil Sin Jan-an, koté nan nòs Kana-a, la Trè Sint Viej Mari té mandé Jézu yon intèvansion pou divin-an ki té manké-a (Jn 2,1-11). La Trè Sint Vièj Mari té di-l: "Yo pa gin divin" (Jn 2,3). Jézu té ba-l yon répons ki pa-t sanblé alé nan sans sa-l t-ap mandé-a: "Sa-k ginyin ant mouin minm ak ou minm, Madanm, lè-m pa ko rivé" (Jn 2,4). La Trè Sint Vièj Mari té di moun ki t-ap sèvi yo: "Ninpòt ki sa l-a di nou, sé pou nou fè-l" (Jn 2,5; cf Redemptoris Mater 21). Jézu té fè mirak la, sé té premié mirak li (Jn 2,11). Sin Jan di nou sé mirak sa-a ki té sèvi lokasion pou patizan-l yo té vi-n kouè nan li (Jn 2,11). La Trè Sint Vièj té kouè san-l pa-t ouè. Lafoua-l té okazioné mirak la. Mirak la li minm té vi-n sèvi lokasion pou déklanché lafoua patizan yo. Konsa sé kòm dé kalité lafoua ki an prézans la-a: yon lafoua yo t-a kapab rélé lafoua manman-an, épi yon lòt lafoua yo t-a kapab rélé lafoua pitit la. Lafoua manman-an sé sa-k sèvi lokasion pou mirak la fèt la, sé lafoua Mari-a; lafoua pitit la, sé sa-k rivé alokasion mirak la, sé lafoua patizan yo. Sé Mari ki té sèvi lokasion pou patizan yo té vi-n gin lafoua akoz lafoua pa-l la. Nan sans sa-a, yo kapab di osijè-l: "Sé chans pou moun ki kouè san yo pa ouè" (Jn 20,29). Élizabèt té déjà fè-l yon konpliman nan sans sa-a, lè-l té di: "Sé chans pou sila-a ki té kouè paròl Granmèt la t-ap réalizé-a" (Lc 1,45; cf Redemptoris Mater 12-13).

Sin Jan pran souin fini lévanjil la antan li di nou Jézu té fè anpil sign-mirak; min si yo t-a vlé rapôté yo tout, tè-a pa t-ap kapab gin plas pou mété liv yo t-ap ékri sou sa. Sa-l rapôté yo, sé chouazi li chouazi yo, pou nou kapab kouè, pou nou kapab gin lavi. Jézu pa fè mirak gratis, li fè mirak pou nou kapab kouè (Jn 20, 30-31).

Jézu fè anpil mirak; min Sin Jan rapôté sèt mirak sèlman nan lévanjil li-a: nan sèt mirak sa yo, sé Kana ki gin premié plas la épi sé li minm ki pèmèt

nou konprann sans tout lòt mirak yo ki vi-n apré yo. Sèt mirak sa yo, sé Kana (Jn 2,1-11), pitit kapitèn nan (Jn 4,46-54), moun ki pa-t kapab maché-a (Jn 5,1-18), pin yo (Jn 6,1-15), maché sou dlo-a (Jn 6,16-21), avèk la (Jn 9, 1-41), Laza (Jn 11,1-37). Kana sé tankou sé li minm ki poté drapo-a pou fè konprann tout lòt yo. Minm nan dézièm nan (pitit kapitèn nan Jn 4,46-54), Sin Jan fè sonjé sa-k té pasé nan premié-a (Jn 4,46), paské sé nan minm bouk Kana-a li fèt tou, Sin Jan raplé sé la Jézu té fè dlo-a tounin divin-an (Jn 4,46), kòm si lè Jézu ap répasé nan bouk la li vi-n sonjé premié mirak sa-a, li sonjé lafoua Manman-l, li fè yon mirak "commémoratif".

Sé pou sa li avèti kapitèn nan davans, antan li di-l konsa: "Kòmman, si nou pa ouè sign ak prodij, nou pap kouè"? (Jn 4,48; cf Jn 3,2; 1 Co 1,22; Mc 11,38; Jn 2,18.23). Li vlé di-l sa l-ap di Juif yo apré mirak pin-an, lè yo vi-n dèyè mirak ankò-a, li di yo: "N-ap chèché-m, sé paské nou té manjé pin, jous pou nou satisfè" (Jn 6,26). Ofon sé pa Jézu yo té bézouin, sé pin yo t-ap chèché ankò. Sé pa poutèt yo té ouè mirak yo, ki fè yo té vini, min sé paské yo té manjé pin kont kò yo. Sé tankou moun k-ap lapriyè pou Bondié ba yo yon bagay, min kon Bondié fi-n ba yo sa yo t-ap mandé-a, la minm yo gin tan bliyé-l, joustan yo nan bézouin ankò.

Sèt mirak sa yo Sin Jan prezanté nan premié pati lévanjil li-a (Jn 1-12), koté Jézu ap dévoualé sa-l yé-a dévan Juif yo, sé tankou sèt machéskalié. Ofi-amézi lè-a ap proché pou Jézu pati al tounin kay Papa-a, mirak yo ap pi gran, jous yo rivé nan dènié machéskalié-a, mirak Laza-a Jézu lévé sot nan tonbo-a (Jn 11,1-37), tankou sign pròp rézireksion pa-l la.

Rézireksion-an, sé fondman lafoua nou. Nan dézièm dimanch Pak la, dènié jou oktav Pak la, léson lafoua-a konplété sa litiji-a fi-n bay nan dimanch Pak la. Sint Ogustin di nou: sa Sin Toma fè-a édé nou kòm prèv rézireksion-an. Li sèvi témouin, antan-l touché kòt Jézu ak min-l, li minm ki pa-t vlé kouè anvan.

Lévanjil la pa di anyin osijè aparision Jézu dévan la Trè Sint Vièj. La Trè Sint Vièj Mari sé yon moun ki viv avèk lafoua. Sé Manman lafoua nou li yé. Dépi Sin Luk té fi-n montré kijan Lanj Gabrièl té parèt dévan-l, té ba-l mision-l, té ba-l sign grosès Élizabèt la pou ankourajé-l, épi Lanj la té disparèt la, dépi lè sa-a yo pa di anyin sou okinn aparision ki t-a prezanté dévan la Trè Sint Vièj Mari. L-ap maché nan fènoua, nan dézè, avèk lafoua Pitit Fi Abraam nan, Pitit Fi Siyon-an. Pélérinaj lafoua Mari-a li "exceptionnel" dapré sa Pap Jan-Pòl II di nan Lèt ansiklik li-a Redemptoris Mater, No.6; li di: "*Un champ très ample s'ouvre ici à l'intérieur duquel la Bienheureuse Vierge Marie continue d'occuper la*

***première place dans le Peule de Dieu**". Son pèlerinage de foi exceptionnel représente une référence constante pour l'Église, pour chacun individuellement et pour la communauté, pour les peuples et pour les nations et, en un sens, pour l'humanité entière. En vérité, il est difficile de saisir et de mesurer son rayonnement".*

Gin kòm toua aspè nan lafoua-a: Yo kapab kouè antan yo apuiyé sou **mirak** yo; yo kapab kouè antan yo apuiyé sou **paròl** la; yo kapab kouè antan yo apuiyé sou **pèsòn** nan. Kouè sou mirak la, sé kòmansman-an; kouè sou paròl la, sé dévlopman-an; kouè sou pèsòn nan sé finisman-an. Anpil nan Juif yo pa-t dépasé premié baro néché la. Yo té rété avèk yon lafoua ki pa dévlopé ditou, antan yo t-ap chèché sign tout tan, atèl pouin Sin Pòl di Korintyin yo: Juif yo ap chèché sign, Grèk yo ap chèché sajàs; min nou minm n-ap préché Jézu-Kri ki klouré sou yon Koua, puisans Bondié, sajàs Bondié (1 Co 1,22-24).

Ròch la bòs mason yo jété yon koté-a, li vi-n tounin premié nan kouin-an. Sé mèvèy Bondié fè dévan jé nou (Ps 118,12s; Is 28,16; Za 3,9; 4,7; Mt 21,42; Ac 4,11; Ep 2,20; 1 Co 3,11). Lafoua fè nou kouè minm lè tout éspoua parapò a lézòm fi-n pèdi. Jézu tann nou pa kapab konté sou anyin ankò pou-l déplouayé fòs li, pou nou pa fè louanj pou pròp tèt nou, pou nou pa konprann sé nan nou mèvèy la sòti. Lè lanj la té prezanté **mirak** grosès Elizabèt la (Lc 1,36), sé premié élan lafoua-a. La Trè Sint Vièj Mari pran élan, li dépasé-l. Lè-l di lanj la: "Sé pou sa fèt pou mouin daprè **paròl** ou-a" (Lc 1,38), sé dézièm élan lafoua-a. La Trè Sint Vièj Mari pran élan, li dépasé-l. Lè Jézu ba-l répons li pa t-ap atann nan nòs Kana-a (Jn 2,4), sé sou pèsòn Jézu minm li pozé lafoua-l épi li mandé sèvitè yo pou yo apuiyé sou paròl li (Jn 2,5). Lafoua-l rét chita fèm sou pèsòn Jézu ki lévé vivan sot nan pami mò yo. Sé lafoua sa-a n-ap mandé-l, pou nou al pi louin pasé ni sign ni paròl, pou nou fikse solid nan Jézu-Kri li minm minm, ròch kouin-an bòs mason yo té jété yon koté-a, sa Bondié lévé-a pou kinbé tout konstriksion-an solid la, légliz la.

*

Jézu antré nan kay la, kot Apot yo rasanblé-a, malgré tout pòt yo byin fèmin (Jn 20,19). Konsa li konn antré anndan kè nou, san nou pa konn ki koté li pasé. Lè n-ap chèché-l déyò, li déjà anndan. Plis nou antré anndan fon kè nou, plis n-ap jouinn li prézan. Jézu té di Sin Ogustin: "Tu ne me chercherais pas, si tu ne m'avais déjà trouvé". Sé paské-l anndan kè nou, li

mété anvî pou nou chèché-l. Li sé Sajès. Sajès la di: "Moun ki manjé-m, l-ap grangou-m ankò; moun ki bouè-m, l-ap souaf mouin ankò" (Si 24,21). Manjé li bay la, souaf li pasé-a, sa pa provoké dégou; okontrè sa éksité apéti. Lè dé-toua moun rasanblé o non Jézu, li la nan mitan yo (Mt 18,20), tankou-l té fè pou patizan Émayus yo (Lc 24,16), tankou-l té fè pou Apot yo (Jn 20,19). Sé pa pou kont nou pou nou chèché-l, sé ansanm, kòm Pèp Bondié, kòm légliz Bondié. Prézans Jézu poté lapè. Li rasiré nou (Jn 20,19). Min an minm tan, li pa kité nou instalé, li fè nou déplasé, al sèvi-l témouin nan mision nou (Jn 20,21). Dé dimansion sa yo, sé léspri Sin-an ki kapab fè nou kinbé yo an ékilib: rét an pè – al poté lapè. Lapè Jézu ba nou-an, li gin yon fòs anndan-l ki pousé nou al kominiké-l bay lòt moun yo. Sé poua lè Jézu fi-n di: "Kè pozé avèk nou" (Jn 20,19.21), li ajouté: "Minm jan Papa-a voyé-m nan, sé konsa tou mouin voyé nou" (Jn 20,20b). Li sé Prins lapè (Is 9,5). Sé lapè sa-a n-ap poté alé, pou nou sèvi témouin Rouayom li-a rivé. Sé pou Mari, Rèn lapè, fè kè nou rét an pè, an minm tan pou-l fè nou sèvi lapè-a témouin, pou-l fofilé kò-l anndan tout kalité kè ki fèmin, anndan tout katégori group ki réplyé sou yo minm, pou nou montré lapè-a sé yon valè ki san frontiè (Pap Jan-Pòl II, Mésaj pou jouinn lapè: prémié janvié 1986).

*

* *

DÈZIÈM DIMANCH PAK C (DIMANCH MIZÉRIKÒD)

Sé sou rézirèksion Jézu-a nou mét lafoua nou. Lè nou rasanblé jou Granmèt la, nan dimanch, pou nou fè sonjé gran mèvèy sa-a, Jézu la prézan nan mitan nou. Li ba nou kè pozé. Apot yo résévoua léspri Sin-an an plin avèk pouvoua pou éfasé péché (Jn 20-22-23). Pouvoua sa-a pasé nan sila yo yo transmèt li-a, Évèk yo, k-ap kontinuyé mision Apot yo nan légliz la. Évèk yo asosié Prèt yo nan mision yo. Lafoua-a pa mandé pou ouè. La Trè Sint Vièj Mari té kouè san-l pa-t ouè (Lc 1, 20). Zakari té mandé sign, li té vi-n baba (Lc 1, 18-20). Toma mandé ouè; Jézu fè-l lobsèvasion (Jn 20, 29). Lafoua nou pozé sou témouagnaj Apòt yo ki konsignin nan labib la, ki vivan nan légliz la, dapré déklarasion Résponsab légliz la.

*

Toua foua, nan lévanjil dézièm dimanch Pak la, (Jn 20,19.21.26). Jézu di: "**Kè pozé avèk nou**": dé foua jou Rézirèksion an, pou dis Apot yo (Jn 20,19.21), yon foua ui jou apré pou Toma ansanm ak rès Apot yo, (Jn 20,26). "Lapè avèk nou": Sé fason pa-l pou-l salié nou, lè-l parèt dévan nou. Lè Juif yo té konn ap salié moun, sé pa yon sinp "bonjou" yo té konn di; nan plas mo politès sa-a, yo té konn di "Lapè"("Chalom": שלום). Lè nou youn salié lòt, sé sans sa-a pou nou mété anndan bonjou nou abitué di-a. Gin anpil évenman ki kapab fè nou gin kè soté ak kè séré. Jézu invité nou pou nou pa troublé. Nan batiman-an, malgré tanpèt la, l-ap dòmi (Mt 8,24). Lè Pè-a konfésé yon moun, li di-l: "Alé ak kè pozé". Si gin yon bagay ki pou fè kè nou soté, sé péché. Min si Jézu éfasé-l pou nou, anyin pa doué anpéché nou viv an-pè. Adan té gin kè soté, paskè li té fé péché. Lè Bondié parèt dévan-l nan jadin-an, li kouri al kaché (Gn 3,8). Moyiz té gin kè soté, lè Bondié parèt dévan-l sou mòn Sinayi-a nan flanm difé-a, paské péché Adan-an té maké-l (Ex 3,6). Izayi té gin kè soté, lè Bondié parèt koté-l nan Tanp la sou fòm lafimin-an, paské sé nan ras péché li té soti tou (Is 6,5). Sin Piè té gin kè soté, lè-l konstaté grandè Jézu alokasion lapèch la, paské li di sé yon moun ki nan péché li yé (Ac 5,8). Chak foua, Bondié bay asirans, li di: "Pa pè", li avèk nou. Min tou sa sé té avaloua. Vré viktoua sou péché-a réalizé nèt jou Rézirèksion-an. Médam yo ki té nan kavo-a; Jézu di yo: "Kè kontan pou nou" (Mt 28,9, minm jan lanj la té salié la Trè Sint Vièj, jou lanonsiasion-an: Sé pou kè-ou kontan, ou minm ki plin lagras (Lc 1,28). Li di yo: "Pa pè" (Mt 28,10 cf 28,5), minm jan lanj la té di Mari. "Pa pè" (Lc 1,30). Péché-a disparèt, sé lagras la ki ranpoté laviktoua. Mari-Madlèn ap kriyé nan kavo-a, Jézu parèt dévan-l, li ba-l asirans, li kité-l touché-l, li konfié-l sékrè-l, li voyé-l pot mèsaj bay Apot yo (Jn 20 1-18). Péché-a éfasé,

sé lagras la ki ranpoté laviktoua. Jou kasé, lannuit bésé, Jézu proché, li déséré kè pèlerin Émayus yo, ofi-amézi y-ap maché, joutan-l rivé anndan kay la avèk yo, li fè yo rékonèt li, li fè yo pot mèsaj ak kè kontan (Lc 24,13-35). Péché-a éfasé, sé lagras ki ranpoté laviktoua. Sé tout tan sou rout nou Jézu ap parèt konsa, san nou pa konnin. Kon-l fin-n déséré kè nou, li fi-n ankourajé nou, li disparèt. Kè kontan sa-a, pèlerin Émayus yo pa kab kité-l pou yo tou sèl, yo kouri al avèti Apot yo, minm jan Mari-Madlèn té fè-a. Kè kontan sé tankou yon ti flannm alimèt ki limin; si yo pa présé kolé-l nan yon bouapin, yon chandèl, yon mèch lanp, l-ap étinn. Kè kontan Pak la Jézu ba nou-an, nou pa doué kité-l pou nou sèl. Sé pou nou poté-l alé bay lòt yo, pou ankourajé yo. Jézu resité, li ranpoté laviktoua sou kè soté ak kè séré, li éfasé péché, ki pou t-a fè kè nou soté, ki pou t-a fè kè nou séré, li pot lapè pou nou. Gin moun, mové léspri boulvèsé yo. Sin Piè di pou nou rézisté ménas la nan lafoua (1 Piè 5,9). Nan prémié lèktu-a (Ac 5,12,16), yo minnin moun démon yo t-ap trakasé yo bay Sin Piè; li chasé mové léspri yo (Ac 5,16). Gin moun, lèzòm pèsékité yo. Dézièm léktu-a (Ap 1,9, 19) montré kijan yo égzilé Sin Jan sou zilé Patmòs poutèt Paròl ak témouagnaj Jézu-a. Jézu parèt koté-l, li di-l: "Pa pè sé mouin minm ki Prémié-a ak Dénie-a" (Ap 1, 17). Jézu sé Alfa ak Oméga. Pèsòn pa kapab défèt sa-l fi-n désidé réalizé. Li déja ékri sa nan liv li. Kréyon-l pa gin gòm nan sans sa-a. Gin moun, tray, maladi, lanmò, chagrin, désépsion, dézéspoua makònin yo, tankou fil aringnin ki vlopé mouch. Yo pa konn kijan pou yo dépétre nan tout èvénman sa yo yo konsidéré tankou dévinn k-ap tonbé sou yo-a. Lévangil la (Jn 20,19-31) montré nou tristès Apot yo (Jn 20,19); kè yo té séré pi mal pasé pòt yo té fèmin a-klé-a, tèlman yo té pè Juif yo. Jézu montré li la nan mitan yo. Li di yo: "lapè pou nou" (Jn 20,19.21.26). Gin anpil moun ki fè tankou Apot yo ki fèmin pòt kay yo byin di, yo fèmin pòt kè yo pi di ankò. Jézu invité nou louvri pòt kay nou, déséré gon kè nou, pou nou youn gin konfians nan lòt, pou nou évité sispèkté lòt, pou vré chanjman-an kapab rivé, paské sé nan kè nou pou-l komansé, avan-l réyisi travay tout bon nan sosiété nou; nou tout nou sé frè; sé pou nou palé langaj lapè, pou réalité lapè-a jèmin; sé pou nou pran modèl sou timoun piti, ki pa nan kèsion kinbé moun nan kè; sè pou nou fè kè nou vin-n jèn, sé la vré chanjman-an gin pou-l kòmansé; sé pou nou youn rann lòt sèvis, ak kè kontan, kòm si anyin ki dezagrèab pa-t pasé anvan sa. Toma té rète sou inpréssion vandrédi sin-an toujou yon sèmèn apré Pak. Jézu bliyé rékomansé vi-n parèt ankò, li rékomansé di "Lapè avèk nou" (Jn 20,26). Apot yo ap péché pouason; la pèch la pa bon; Jézu tann dévan-jou pou-l fè yo voyé filè-a adouat batiman-an, pou-l chajé ak 153 gro pouason, sa vlé di tout kalité pouason, paské nan tan lontan sé 153 espès pouason yo té konnin. Sé yon sign ki vlé di sé tout

moun ki nan légliz la (Jn 21,1-14). Sé pa sou pròp bézouin nou ak fanmi nou, ak katié nou, ak zanmi nou, ak lékòl nou, ak travay nou, ak péyi nou sèlman pou nou panché; sé pou nou gadé nan tou lé kat diréksion tè-a. Lapè-a sé yon valè ki san frontiè. Jézu parèt dévan Étièn nan sièl la ki louvri, li ankourajé-l. Étièn padonnin bouro yo, antan l-ap tonbé anba kout ròch yo (Ac 7,55-60). Si nou vlé pou kè nou jouinn lapè Pak la, minm jan Jézu padonnin-an, sé konsa tou pou nou padonnin (Lc 23,34), antan nou évité kinbé moun nan kè. Sin Pòl t-ap pèsékité lègliz; Jézu fè-l tonbé atè, li fè-l chanjè kan (Ac 9.1-22; 22,5-16; 26,9-18). Pi gro lènmi nou kapab vi-n tounin pi gran zanmi nou. Si Étièn pa-t padonnin, lè Pòl té dakò ak moun yo ki t-ap voyé ròch sou li-a (Ac 7,58; 8,1), Pòl pa t-ap chanjé kompòtman, dapré sa Sint Ogustin di nou. Padon moun ki sibi-a, sé poua ki tonbé nan balans la pou fè moun k-ap maltréte lòt yo kité bafon mové santiman-l yo, pou-l monté nan nivo kot Bondié ap paléavèk li-a.

Sé pou manman Mari aprann nou padonnin pou nou kapab profité lapè Pak la.

*

Jézu souflé sou Apot yo, li ba yo pouvoua pou padonnin péché, gras a Éspri Sin-an li ba yo (Jn 20,22-23). Moun yo ap chèche pou lonbraj Sin Piè touché yo pou yo géri anba maladi yo (Ac 5,12-16), tankou madanm nan ki t-ap pèdi san dépi douzan-an t-ap chèche touché pouint rad Jézu pou sous maladi-l la té kapab séché (Mc 5, 27; Lc 8,44; cf. Ac 19,12; 2 R 13, 21). Sakréman la konfésion mété nou nan kontak avèk pouvoua Jézu, nan lafoua. Pouvoua-l géri nou. Fòs pouvoua sa-a sé sou lakoua-a li soti tankou nan sous li, lè yo pèsé kot Jézu-a, dlo ak san koulé, pou pròpté légliz la, pou ba-l lavi (Jn 19,34; Ez 47, 1; Ap 22,1; Jn 4,10.14; 7,38; Joel 4,18; Za,13,1;14,8; Ps 46,5; Gn 2,4; Ex 17,6). Lè Pè-a fin-n konfésé nou, li di minm paròl Jézu di nan lévanjil dézièm dimanch Pak la: "Kè pozé pou nou" (Jn 2,19.21.26). Li di: "Alé ak kè pozé", minm jan Jézu té di madanm nan ki té nan péché-a épi ki té vi-n kriyé nan pié-l la (Lc 7,50). Toua foua nan lévanjil dézièm dimanch Pak la. Jézu di: "Kè pozé pou nou" (Jn 20,19.21.26). Toma pa-t la premié foua-a; lè-l vini, li pa-t vlé kouè; Jézu parèt nan ui jou apré, li fè-l fè "konsta" Toma vin-n kouè; li di: "Granmèt mouin Bondié mouin" (Jn 20,28). Lè Pè-a lévé kò ak san Jézu anlè pou montré fidèl yo nan lamès la konsékrasion-an, fidèl yo di anndan fon kè yo: "Granmèt mouin, Bondié mouin"; sé minm paròl Toma yo yo di. Sakréman konfésion-an orianté nan sans sakréman lékaristi-a. Lè Pè-a fin-n di nou "alé ak kè pozé" nan konfésion-an, nou kapab proché kot lékaristi-a pou nou

komunié, avèk tout lafoua nou, nou di minm paròl Toma yo: Granmèt mouin Bondié mouin. Sé chans pou moun ki pa ouè, min ki kouè (Jn 20,29). Sa fè nou sonjé sa Élizabèt té di la Trè Sint Vièj la: "Sé chans pou sa-a ki kouè paròl Granmèt la t-ap réalizé-a" (Lc 1,45). Lafoua ap fè nou ouè bèl mèvèy. Foul gason ak fi ki té kouè nan Granmèt la t-ap vin-n pi plis tou tanm (Ac 5,14: prémié léktu). Sé lafoua yo ki té fè yo éspéré lonbraj Sin Piè géri malad yo, chasé démon yo. Ròch la bès mason yo té voyé jété-a, paské yo pat vlé kouè-a, sé li minm ki sèvi jouin pou kinbé tout kay la (cf Ps 118, 22; Ac 4, 11; Mt 21,42; Za 3,9; 4,7; Is 28,16; Ep 2,20; 1 Co 3,11). Sé sou ròch sa nou pozé lafoua nou, sé Jézu-kri ki lévé vivan (cf 1 Co15,14). Sé fondasion lafoua nou. Sin Jan ékri évènman yo nan lévanjil la pou nou kouè Jézu sé Kris la, Pitit Bondié-a, (Jn 20,31). Sé konsa tou nan Apokalips la li té résévoua lòd pou-l ékri sa-l té ouè yo (Ap 1,11-19; dézièm lèktu). Paròl Bondié-a nourri lafoua nou. Prémié priyè-a di: "Ou minm ki limin lafoua pèp la ki konsakré pou ou-a". Sé pou la Trè Sint Vièj Mari ba nou lafoua li, ki tankou "éritaj" nan légliz la, Pap Jan Pòl II di nan lèt ansiklik "Redemptoris Mater" la, No 27: "Cette foi héroïque précède le témoignage apostolique de l'Église et demeure au cœur de l'Église, cachée comme un héritage spécial de la révélation de Dieu. Tous ceux qui participent à cet héritage mystérieux de génération en génération, acceptant le témoignage apostolique de l'Église, participent en un sens à la foi de Marie." Lafoua sa-a pèmèt nou ouè sans évènman nou pa konprann (He 11,27), sou chémin pèlérinaj la k-ap minnin nou ouè Bondié fas a fas la. Granmèt la di nou "Pa pè" (Ap 1,17), "Kè pozè" (Jn 20 19.21.26) pou nou kinbé asirans nou dévan tou sa-k vlé boulvèsé léspri nou. Si Granmèt la pou nou, kilès ki kapab kont nou?" (R 8,31). Avèk Sin Pòl nou kapab di mouin kontan nan mitan tout tray m-ap pasé (Col 1,24; 2 Co 7, 4; 12, 10).

*

* *

TOUAZIÈM DIMANCH PAK A

Dépi dézièm dimanch Pak A jous sétièm dimanch la, sé premié Lèt Sin Piè-a ki sèvi kòm dézièm léktu. Sin Piè palé sitou osijè **Batèm** nan, pou nou konfòmé konduit nou sou égzijans li. Jézu té di Apot yo Jan té batizé nan dlo min yo minm sé nan léspri Sin-an y-ap batizé (Ac 1,1-11). Jou lasansion-an raplé promès sa-a, jou lapankot la fè ouè réalizasion-l. An-atan, patizan Émayus yo sou rout (Lc 24,13-35). Sé antan y-ap maché-a, y-ap palé osijè évenman yo ki pasé Vandrédi Sin-an, Jézu parèt, li kontinué ap maché avèk yo, jou dimanch Pak la, l-ap éspliké yo sa-k konsèné-l ki té déjà ékri nan lansyin Téstaman, yo pa konnin si sé li minm ki nan mitan yo, joutan li antré nan kay la avèk yo, li kasé pin-an ba yo, li disparèt; sé lè sa-a yo rékonèt li, yo kouri tounin Jérusalem, pou yo poté nouvèl bay Apot yo. Min li té déjà parèt dévan Sin Piè épi pandan y-ap palé toujou li vi-n parèt dévan yo tout (Lc 24,36-43). Sé tankou yon léson katéchis Jézu ap bay patizan yo sou rout la, pandan y-ap maché ansanm nan. Lansègnman lafoua-a sé yon chémin li fè nou suiv. Gin anpil bagay, sé ofi-amézi nou dékouvri sans yo; sé sou pa anndan Jézu dévoualé nou sa antan l-ap kléré kè nou (Mc 9,24,25). Nou kapab mét éspoua nou sou tèl fason pou évenman-an té pasé; nou jouinn désépsion, tankou patizan Émayus yo; min lè nou gadé pi dévan, nou vi-n ouè sé plan Bondié minm ki t-ap réalisé. Sé problèm Jòb ak Jérémi, ki pa konprann koz soufrans la inosan-an ap soufria. Sé Limiè Pak la ki vi-n kléré Koua Vandrédi Sin-an. Jézu tann sitiasion-an fi-n gaté anvan-l montré pouvoua-l; li bay patizan yo tan pou yo palé, pou yo blayi tout désépsion kè yo anvan-l montré limiè-a; li fè tankou lè-l té nan Tanp la, lè-l t-ap kouté profèsè yo, anvan-l pozé yo késion, anvan-l réponn yo (Lc 2,46).

Gin lè nou dékourajé, sa fè lontan n-ap trinnin nan yon sitiasion k-ap dégradé chak jou pi plis. Yon lè nou pousé rèl, nou di nou bouké, min sé lè sa-a minm Granmèt la montré nou li té la tou pré nou. Sint Katri-n de Sièn té travèsé yon tanpèt tantasion. Lè kalmi vi-n rivé nan nanm li, li mandé Jézu koté-l té yé pandan li t-ap batay konsa-a. Jézu réponn li li té nan fon kè-l, li t-ap lapriyé. Jézu ap dòmi nan batiman-an, pandan tanpèt ap souflé (Mt 8,23-27), sa vlé di gin asirans, okinn malè pap rivé. Sint Térèz lanfan Jézu invité nou kité-l dòmi konsa nan fon kè nou, pa déranjé-l ak kè soté nou. Jézu fè patizan Émayus yo répròch, minm jan li fè Sin Toma-a (Jn 20,27), poutèt yo pran tan anvan yo kouè sa lansyin Téstaman-an té anonsé-a dépi Moyiz avèk Profèt yo épi Psòm yo, osijè soufrans lanmò ak Rézirèksion Mési-a (Lc 24,25). Sé yon lansègnman ki pa-t ko jouinn aplikasion nan mantalite yo (Mc 16,14). Jé yo té kòm voualé (Lc 24,16),

tankou sé yon dòmi lou ki t-ap pézé sou yo, jan sa té rivé Apot yo Jétsémani-an (Mc 14,40) ak sou mòn Transfigirasion-an (Mc 9,6); intélijans lézòm pa kapab konprann mèvèy sakré Kris la ki dévoualé-a; kè yo ak zòrèy yo trò di (Ex 8,15.32; 9,7.34; Is 33,15; 47,6; 59,1). Lè nou gin problèm konsa ki dépasé nou, nou pa doué kinbé yo pou nou sèl, sé pou nou patajé yo avèk dòt patizan Granmèt la. Patizan Émayus yo té a-dé (Lc 24,13), yo t-ap chèche sans évenman yo. Jézu di koté dé ou toua moun réyini o non li, li la nan mitan yo (Mt 18,19). Sé paské yo t-ap chèche ansanm Jézu parèt nan mitan yo; problèm pa doué divizé nou, okontrè sé pou nou mété ansanm pou nou chèche solision. Jézu di nou pou nou pa troublé, sé pou nou kouè nan li (Jn 14,1). Antan Jézu ap maché ak patizan yo, yo pa-t kapab rékonèt li (Lc 24,16); sé apré sèlman lè-l fi-n pati yo rékonèt sé té li (Lc 24,31), tankou lè Bondié té parèt dévan Moyiz sou mòn Sinayi-a (Ex 33,23), Bondié té di-l: "Ou pa kapab ouè fas mouin, m-ap pasé dévan-ou; antan m-ap pasé m-ap mét min-m sou figi-ou, lè m-a fi-n pasé m-ap ouété min-m, ou-a ouè-m nan do". Sé konsa nou ouè Bondié nan do, lè-l fi-n pasé nou rékonèt tras li. Kléofas di Jézu: "Sé ou minm sèl ki étranjé nan Jérusalèm, ou pa konnin sa-k rivé nan jou sa yo?" (Lc 24,18-19). Jézu mandé-l: "Ki bagay?". Sé yon fason pou-l fè-l palé. Lapriyé nou pa nésésèman fèt pou mété Bondié okouran sa-k pasé, min li fèt pou-l vidé nanm nou, pou nou nan dispozision kouté Bondié, résévoua favè-l, gras a konfians nou. Jézu fè kòmisi l-apral pi louin (Lc 24,28); nou insisté pou-l rété avèk nou (Lc 24,29); li chofé kè nou (Lc 24,32), li éspliké nou mèvèy sakré-l anndan fon kè nou. Konsa Mari té konsévé tout bagay sa yo anndan kè-l (Lc 2,19.51; 11,28; 8,21).

*

Sé sou **rout**, sot nan pouint tèt Galilé (Mc 8,27), jous rivé nan mitan Jérusalèm (Mc 14,37), Jézu té dévloé lansègnman-l bay Apot yo, pandan lavi piblik li. Sé sou **rout** l-ap kontinué dévloé lansègnman-an toujou, lè-l fi-n lévé sot nan pami mò yo (Lc 24,13). Pandan dé patizan yo ap **maché**, Jézu proche kòm **vousajé** (Mc 16,12) ansanm ak yo; ofi-amézi y-ap avansé, l-ap dévloé lansègnman-an pou yo. Kè yo ap chofé toutotan l-ap palé ak yo (Lc 24,32), joutan yo rivé koté yo t-apralé-a, pou yo pasé lannuit la. Lè-l fi-n fè yo rékonèt li, sé lè sa-a li disparèt dévan jé yo (Lc 24,31). Sou mòn Sinayi-a konsa, Bondié pasé kot Moyiz; pandan l-ap pasé, li bouché jé Moyiz; sé lè-l fi-n pasé, li ouété min-l sou jé Moyiz. Moyiz ouè-l nan do (Ex 33,23). Anpil foua, Granmèt la bò koté nou nan évenman, nan moun, nan paròl...; sé lè tout bagay fi-n pasé, nou rékonèt tras li.

Pap Jan-Pòl II té dévlopé lansègnman osijè pèlérinaj lafoua-a, a lokazion Ané marial la, nan Lèt ansiklik li-a (Redemptoris Mater, 25 mars 1987). Pèlérinaj lafoua-a, sé anndan fon kè nou pou nou fè-l; sé pa tèlman déplásé sot yon koté al yon lòt koté; sé yon chanjman sou pa anndan; sé **démach** ki pèmèt nou rankontré volonté Granmèt la pi byin. Sou tè sa-a sé pasé n-ap pasé; kay nou ak vil nou, sé nan sièl la yo yé, jan Lèt Ébré yo di-a (He 11, 13-16; 13,14); nou pa gin pou nou instalé anba isit la, tankou Granmèt la ki pa gin koté pou-l pozé tèt li (Lc 9,58). Avèk li nou fè tankou yon "exode sur place". Nan Lèt ansiklik la, Pap Jan-Pòl II dévlopé lidé pèlérinaj lafoua-a, sitou nan dézièm pati-a, koté-l palé osijè Mari ki gin plas li nan mitan légliz la k-ap maché-a ("La Mère de Dieu au centre de l'Église en marche", Redemptoris Mater, nn 25-37; Vatican, 1987, 52-78).

Dépi nan tit Lèt ansiklik la, li fè konprann sa, lè-l di: "Lettre Encyclique Redemptoris Mater.... sur la Bienheureuse Vierge Marie dans la vie de l'Église **en marche**". Li kòmansé dézièm pati-a antan-l di: l'Église **avance dans son pèlerinage** à travers les persécutions du monde et les consolations de Dieu" (n 25, p. 52). Sé konsa Bondié ap atiré nou ak konsolation-l yo, tè-a ap réjité nou ak pèsékision-l yo. Légliz la sé nan dézè l-ap maché (2 Esd 13,1; Nb 20,4; Dt 23,1ss).

Pèlérinaj légliz la gin von aspè yo kapab ouè ak jé nan tan-an ak nan léspas la koté l-ap réalizé nan istoua-a, antan l-ap gayé tout koté sou tè-a, li gin plas nan istoua lézòm, malgré li dépasé limit pèp yo nan tan-an ak nan léspas la (Lumen Gentium 9). **Min sitou, vré aspè pèlérinaj li-a, sé sou pa anndan li yé.** Sé pèlérinaj lafoua-a minm, pèlérinaj nan léspri Sin-an, k-ap konsolé nou-an san nou pa ouè-l la (Jn 14,26; 15,26; 16,7). Sé nan dé aspè pèlérinaj sa-a **Mari prézan**, li minm Élizabèt té fè konpliman-an poutèt li té kouè-a (cf Lc 1,45; Redemptoris Mater, n.12). Li tankou yon glas koté Bondié fè mèvèy li yo parèt san okinn tach pa jinnin yo. Sé jou lapankot la pèlérinaj légliz la kòmansé nan istoua moun yo ak pèp yo. Mari té la nan kòmansman pèlérinaj la. Li té nan mitan Apot yo apré lasansion-an, li t-ap lapriyè pou-l rélé kado léspri Sin-an (Lumen Gentium 59; Redemptoris Mater n. 54). Min dépi jou lanonsiasion-an, Mari té déjà kòmansé pèlérinaj lafoua pa-l gras a léspri Sin-an ki té désann sou li-a (Lc 1,35). Koté léspri Sin-an yé, moun pa kapab rét instalé. Osito Mari fi-n résévoua léspri Sin-an, li pati la minm kay Élizabèt (Lc 1,39). Osito Apot yo fi-n résévoua léspri Sin-an, yo pati nan mision pou y-al gayé Bòn Nouvèl la tou patou, nan Jérusalèm, nan la Judé, nan la Samari ak jous nan bout tè-a (Ac 2,14; cf 1,8). Min pi plis ankò sé anndan kè Mari pèlérinaj lafoua sa-a ap fèt, antan-l rinnèt tèt li nè bay Bondié nan lobéyisans lafoua-a (Lumen Gentium 5), li

réponn lanj la: "Sé pou sa fèt pou mouin sélon paròl ou-a" (Lc 1,38). Konsa pèlerinaj lafoua Mari-a té kòmansé byin lontan anvan pèlerinaj légliz la, li gin premié plas nan pèlerinaj sa-a. Anvan lapankot la, lanonsiasion-an ak lakoua-a té déjà fè chémin yo nan kè-l; konsa chémin-l nan kouazé chémin légliz la nan lafoua (Redemptoris Mater, n. 26).

Mari pa-t résévoua mision tankou Apot yo pou-l al préché lévanjil la. Min li té nan mitan yo anvan lapankot la, li t-ap lapriyé; li té sèvi yo kòm yon témouin spésial koté yo té kapab ouè Jézu ki té déjà pati kité yo-a. Sé poua Pap la di dépi nan premié moman-an, légliz la t-ap gadé Mari nan Jézu, minm jan li t-ap gadé Jézu nan Mari (Redemptoris Mater, n. 26). Tout épòk Jézu té pasé Nazarèt la, sé Mari sèl ki té konnin-l, li té kinbé tout bagay sa yo nan kè-l, li t-ap kalkilé yo (Lc 2,19.51). Sé premié moun ki kouè, malgré tout kontrariété (Rom 4,18). Tout moun ki kouè sot nan jénérasyon al nan jénérasyon, yo patisipé nan lafoua Mari-a, an minm tan yo chèché apuiyé lafoua pa yo sou lafoua pa-l la (Redemptoris Mater, n. 28). Nan anpil koté yo fè pèlerinaj pou fè sonjé Mari, tankou Guadalupe, Lourdes, Fatima, Jasna Gora. Sé sa pèp Bondié-a ap chèché, l-ap chèché rankontré avèk Manman Bondié-a pou-l fè lafoua pa-l vi-n pi solid.

Mari sé yon sign **espérans** tou ak konsolasyon k-ap kléré sou rout pèlerinaj nou, antan anpil lòt légliz ap gadé-l avèk minm jé ak nou, sitou nan légliz lès la (Lumen Gentium 68,69; cf Léon XIII, Encyclique "Adiutricem populi", 5 septembre 1895, Acta Leonis XV 300-312; Redemptoris Mater, n. 29, note 74, p. 64). Nou pa ko kapab fè youn ansanm ak tout lòt légliz yo, toutotan nou pa ko gin yon sèl lafoua, ki chita sou minm akò, nan minm lansègnman-an. Anpil légliz rékonèt Mari kòm Manman Bondié, yo rékonèt Jézu té ba-l Sin Jan pou pitit li, li rinmèt li bay Sin Jan pou Manman-l. Si nou tout nou rékonèt li kòm Manman nou k-ap lapriyé pou tout fanmiy Bondié-a fè yon sèl, li minm ki pran dévan tout témouin lafoua yo ki kouè nan sèl Granmèt la, Pitit Bondié-a, ki fèt nan vant li ki pa gin tach la, gras a léspré Sin-an; si nou tout nou aksépté baz sa-a, nou pap louin fè yon sèl; nou sou rout pèlerinaj sa-a toujou (Redemptoris Mater, n. 30).

Nan ané 787, dézièm Konsil Nisé-a té déklaré pèp Bondié-a gin doua prezanté mak respè yo dévan Koua-a, pòtré Manman Bondié-a, Anj yo ak Sin yo nan légliz yo, nan kay yo ak sou bò lari yo (Conciliarum Decreta, Bologne 1973, 135-138; DS 600-609; Redemptoris Mater, n. 33, p. 69). Sa té raproché dé kan nan légliz la ki té séparé dépi yon bon moman. An 1988, légliz té fété mil ané dépi la Rusi té batizé, sa yo rélé "Rouss" la (Ukraine, Bielorussie, Russie). Tout fidèl pèp sa yo kontan gin anpil respè avèk amou

pou Manman Mari yo réprézanté ak bèl pòtré yo rélé "icône". Pap Jan-Pòl II té fè sonjé sitou "icône" "La Vierge au Cénacle": Mari k-ap lapriyè avèk Apot yo, antan y-ap tann léspri Sin-an. Li di sé pou "icône" sa-a vi-n tounin tankou sign éspérans nou, antan yon kan ap chèché rankontré lòt la pou obéyi pi byin nan lafoua-a (Redemptoris Mater, n. 33, p. 71). Li di lè sa-a légliz la t-a kapab rivé réspiré ni ak poumon douat, ni ak poumon goch, sa vlé di ni bò koté légliz lati-n ni bò koté légliz lès alafoua.

Pap la di chak foua n-ap chanté Magnifikat la, sitou nan Vèp asouè, n-ap sonjé pèlerinaj lafoua la Trè Sint Vièj la kay Élizabèt (Lc 1,46-55), n-ap fè sa sèvi pròp chanté pèlerinaj pa nou. Magnifikat la montré kijan lafoua Mari gin tan fè chémin dépi lanonsiasion-an lè-l té réponn lanj la apré ésplikasion li té mandé-l la: "Sé pou sa fèt pou mouin dapré paròl ou-a" (Lc 1, 38). Kouliè-a li di: "Sila-a ki gin tout pouvoua-a fè gran mèvèy pou mouin, non-l sin" (Lc 1,49). Pap la rélé sa "une profession de foi inspirée" (Redemptoris Mater, n. 36, p. 74). Magnifikat la sé kantik pòv yo, pòv Granmèt la ki mété konfians yo nan li (Ps 25; 31; 35; 55), k-ap tann Mési pòv yo (Is 11,4; 61,1; Lc 4,18). Pap la fini dézièm pati Lèt Ansiklik la sou plas la Trè Sint Vièj nan mitan légliz la k-ap maché nan pèlerinaj la, antan li montré kijan Mari sé pòtré ki pi bèl osijè libètè ak libérasion moun yo sou tè-a. Li profité pou-l déklaré yo pa kapab séparé vérité osijè Bondié k-ap sové-a avèk fason li montré li pi rinmin pòv yo ak sa-k rabésé yo. Li di tou mo "pòv" la avèk "préférans pou pòv yo" sé pou yo mété yo nan bingn labib la -- paròl Bondié vivan-an --, ki ba yo vré sans yo. Késion sa yo ak problèm sa yo, yo gin rélation nésésè avèk sans krétyin libètè-a ak libérasion-an. Li di: "En puisant dans le coeur de Marie, dans la profondeur de sa foi exprimée par les paroles du Magnificat, l'Église prend toujours mieux conscience de ceci: **on ne peut séparer la vérité sur Dieu qui sauve**, sur Dieu qui est source de tout don, **de la manifestation de son amour préférentiel pour les pauvres et les humbles**, amour qui, chanté dans le Magnificat, se trouve ensuite exprimé dans les paroles et les actions de Jésus. L'Église sait donc bien – et à notre époque, une telle certitude se renforce d'une manière particulière – que non seulement on ne peut séparer ces deux éléments du message contenu dans le Magnificat, mais que l'on doit également sauvegarder soigneusement l'importance qu'ont dans la parole de Dieu vivant "les pauvres" et "l'option en faveur des pauvres". Il s'agit là de thèmes et de problèmes organiquement connexes avec **le sens chrétien de la liberté et de la libération**. Totalement dépendante de Dieu et tout orientée vers lui par l'élan de sa foi, Marie est, aux côtés de son Fils, **l'icône la plus parfaite de la liberté et de la libération** de l'humanité et du cosmos. C'est

vers elle que l'Église, dont elle est la Mère et le modèle, doit regarder pour comprendre dans son intégralité le sens de sa mission" (Redemptoris Mater, n. 37, p. 77-78; cf Congrégation pour la doctrine de la foi, Instruction sur la liberté chrétienne et la libération, 22 mars 1986, n. 97).

Patizan Émayus yo t-ap **espéré** yon libérasion nan sans Theudas ak Judas le Galiléen (Ac 5, 36-37; cf 21, 38). Yo pa-t konprann diréksion chémin Mési-a té gin pou-l té pasé-a. Jézu profité pou-l fè yo fè pèlerinaj lafoua-a, pou-l fè yo chanjé mantalite sou késion sa-a.

Nan "l'Agonie de Gethsémani, enquête exégétique et théologique suivie d'une étude du "Mystère de Jésus" de Pascal", Paris, Gabalda, 1977, pp 117-118, FEUILLET A. di: "Quand Jésus est apparu sur la scène de ce monde, un climat fiévreux d'attente messianique régnait parmi les Juifs; climat favorisé par la soumission forcée au joug détesté des Romains. L'idée courante du Messie était en fonction de cette expérience. On voyait en lui un héros et un triomphateur destiné à anéantir les ennemis d'Israël [... D'où] l'attitude réservée de Jésus en face des aspirations messianiques de ses compatriotes. Il est certain, en effet, que Jésus n'a pas voulu être le Messie national et politique qu'on attendait. Tel est le sens fondamental des récits de la tentation au désert, [...]. Tel est également le motif pour lequel Jésus non seulement ne s'appelle pas lui-même "fils de David", mais encore et surtout évite de se donner ouvertement pour le messie pendant la plus grande partie de son ministère. Il semble qu'une seule fois, au jour des Rameaux, il se soit prêté à un triomphe populaire de sens nettement messianique, mais c'était presque à la veille de sa mort, et d'ailleurs dans un appareil si modeste qu'on ne pouvait se méprendre sur ses intentions". N-ap mandé Manman Mari pou-l akonpagné nou nan pèlerinaj lafoua sa-a nou minm tou nou gin pou nou fè-a, pou nou chanjé mantalite parapò a konsépsion trò tèratè nou kapab ginyin osijè libérasion-an, pou nou chèchè sens **krétyin** libète-a ak libérasion-an nan Paròl Bondié ki vivan-an, jan légliz la éspliké nou li-a.

*

* *

Yo té dé, patizan Émayus yo (Lc 24,13). Jézu di lè dé ou toua moun réyini o non-l, li nan mitan yo (Mt 18,19).

Yo té sou rout ap vouayajé (Lc 24,13 πορευόμενοι), tankou pèlerin ak étranjé. Nou pa gin vil sou tè sa-a ki rélé nou chè-mèt, chè-mètrès (He

13,14); tankou Abraam, sé étranjé ak vouayajè nou yé (Gn 23,4; He 11,13; 1 p. 2,11; Ps 39,13; 119,19): Mouin sé yon pòv k-ap trinnin toupatou... Koté-m passé, m-sé étranjé, min mouin sètin, lè m-ap janbé lòt bò, m-a jouinn koté pou-m répozé: nan répozoua Ékaristi-a déjà préparé pou nou-an. N-ap chèché vil sièl la, Jérusalèm anro-a. Sé nan déplasman nou n-ap jouinn limiè k-ap kondui nou (Ex 40,36-38). Sé Jézu, Kolòn limiè-a ki t-ap kléré épi ki t-ap kondui Pèp Israèl la nan dézè-a, li minm, limiè tè-a, ki louveri jé avèg la (Jn 9,5), li minm, Bon Pastè-a, k-ap kondui mouton-l yo (Jn 10,4), sé li minm ki vi-n fofilé kò-l nan mitan dé vouayajè yo k-apral Émayus la, pou-l kondui yo nan chémin rézonman ki dépasé yo-a, antan l-ap fè yon léson "katéchèz" avèg yo sou rout la. Yo minm, antré yo, yo t-ap fè yon "homélie partagée" (Lc 24,14 ὁμίλουv; 24,15 ὁμιλεῖv), antan yo t-ap chèché sans évenman yo ki té rivé nan Vandrédi Sin-an (Lc 24,15 συζητεῖv; cf. Lc 2,46 ἀναζητοῦντες; 2,48 ἐζητοῦμέν; 2,49 ἐζητεῖτέ). Tankou domino y-ap brasé, tankou jouèt kat y-ap bat, tankou godé zo y-ap souké, y-ap chèché ouè koté pou yo plasé doub sis la pou-l pa rét nan min yo, kijan pou yo fè dekabès la, vièj la, donè-a, ki fason pou yo lévé min atou-a. Yo bo froté évenman yo youn sou lòt, yo pa rivé jouinn sans yo ak pròp rézònman lojik ti léspri pa yo-a. Yo t-ap tann yon Mési k-ap vi-n libéré yo anba min Romin yo. Sé sou yon mouton labatoua yo tonbé. Yo t-ap éspéré yon konkéran, kavalié-jénéral dé divizion sou yon choul rapid, tout kò-l plin zam jous nan dan (Ap 19,11), yo tonbé an fas yon profèt tou dou ki chita sou yon ti bourik pèsòn pa ko janm monté, k-ap maché ti pa-ti pa (Lc 19,34; Jn 12,14; Za 9,9). Yo t-ap sonjé lagè, sé lapè yo tandé, yo blijé ap maché dé bra balan, tou tris, tou chagrin, tou dékourajé. "Homélie partagée" yo-a pa-t débouché byin louin. Té gin tròp "inconnue" nan "équation"-an. Yo pa-t rivé balansé-l jan yo t-a doué.

Sa-k libéré nou, sé pa lò ak lajan, paské y-ap détrui, sé San Kris la ki gin anpil valè-a, Mouton san défo-a san tach la (1 P 1,18-20).

Sé pandan disp Émayus yo ap chèché konsa nan "Homélie partagée" yo-a, Jézu minm an pèsòn vi-n proché, li fè rout ansanm avèk yo (Lc 24,15 συνεπορεύετο). Li fè yon "pastorale de proximité". Li anilé distans ki t-a séparé-l avèk yo-a. Li kòmansé pozé yo késion pou-l pi alèz fè mèsaj li-a passé.

Li pap kòmansé louveri jé yo, sé kè yo l-ap touché anvan (Lc 24,32; Ep 1,18). Dépi kè-a laché, jé yo ap sansib. Chalè-a ap monté sot nan kè-a, l-ap louveri jé-a. Toutotan nou pa rinmin, nou pa kapab konprann, paské réalité sa-a dépasé limit ak posibilite mòd fonksionman ti léspri nou. Kon Jézu touché kè nou nan pouin sansib la, la minm jé léspri nou ap louveri, pou nou sézi nan

rinmin, sa nou pa-t kapab konprann nan rézònman. "Le coeur a ses raisons que la raison ne connaît pas".

Sé tankou yon voual ki té sou jé yo, ki té anpéché yo ouè-l, rékonèt li (Lc 24,16), tankou Mari-Madlèn nan kavo-a, toutotan Jézu pa palé nan kè-l pou-l rélé-l sou non-l: "Mari" (Jn 20,16). "Le Bon Pasteur connaît ses brebis chacune par son nom" (Jn 10,3). Ton voua-a, "flexion"-l, "accent"-l, révéyé kè Mari Madlèn. "L'oeil est critique, mais l'oreille est croyante". Jé-a ap diskité, sé zòrèy la k-ap bay lafoua. Sé pousa Sin Pòl di: "Fides ex auditu"; "La foi vient par la prédication" (R 10,17). Sé pousa tou li di: "Vae mihi si non evangelizavero"; "Malheur à moi, si je n'annonce pas la Bonne Nouvelle" (1 Co 9,16).

Nou ta bo fè tout kalité mèvèy, si nou pa bay sans aksion-an, mèsaj la pap pasé jan-l t-a doué pasé-a. Gin yon "interprétation" ki pou fèt. Sé sa Jézu ap fè sou rout la avèk disip Émayus yo. L-ap fè sa yo rélé yon "herméneutique" (Lc 24,27 διαρμήνευσεν). L-ap apliké paròl Ansyin Téstaman yo sou évenman kalvè-a, pou-l fè ouè sans li. Sé pa yon aza. Sé akonplisman Ékritu-a, sa Bondié té prévoua davans la. Sé mòd fason sa-a li té chouazi pou Pitit li-a vi-n délivré nou anba péché-a ak lanmò-a, antan-l démoli ringn Satan-an. Tout bagay fi-n réalisé dépi Vandrédi Sin. Sé manifesté li pa ko manifesté. Pou sa, fò gin témouin k-ap gayé Bòn Nouvèl la, antan yo transmèt limiè lafoua-a, an-akò avèk Résponsab légliz yo, jan disip Émayus yo fè, apré rankont yo avèk Jézu-a (Lc 24,33), jan Mari Madlèn té fè, apré rankont li avèk Jézu-a nan kavo-a (Jn 20,18).

Jou Pantkot la, Piè avèz Onz yo ap bay yon témouagnaj ki alé nan minm sans, tankou y-ap chanté an "choeur", sé yon "koral": voua yo konkòdé, yo akòdé. Pa gin fos nòt (Ac 2,14 ὁ Πέτρος σὺν τοῖς ἕνδεκα).

Disip Émayus yo ap rékonèt Jézu, lè-l kasé pin-an, li séparé ba yo-a, sa vlé di nan sakrifis Ékaristi-a (Lc 24,30,31).

Lè Jézu fi-n fè sélébrasion Paròl la sou rout la antan l-ap éspliké yo sa-k konsènè-l apati laloua-a ak Profèt yo, nan tout sa-k té Ékri yo, li fè sakrifis ékaristik la antan-l kasé pin-an ba yo (Lc 24,30 κλάσας), tankou-l té fè nan asouè Jédi Sin-an (Lc 22,19 ἔκλασεν), tankou Apot yo ap fè ak premié kominoté-a apré Pantkot la (Ac 2,42 κλάσει), tankou Sin Pòl ap fè nan nuit premié jou sémèn nan nan vil Troas la (Ac 20,11 κλάσας), tankou l-ap fè nan batiman-an, pandan tanpèt la ki té diré anviron dé sémèn nan nan vouayaj Ròm nan sou lanmè Adriatik la (Ac 27,35 κλάσας).

Ané 2005 la sé Ané Ékaristi-a. Pap Jan Pòl II té anonsé-l nan 7 oktòb 2004 la, a lokazion fèt Notre-Dam du Trè Sin Rozè-a, nan yon lèt li té bay kòm tit: "Mane nobiscum Domine", paròl sa-a disip Émayus yo té di Jézu-a: "Reste avec nous Seigneur, car il se fait tard et déjà le jour baisse" (Lc

24,29). Nou kapab di sé "le chant du cygne" Pap Jan Pòl II, anvan Lèt Jédi Sin-an pou prèt yo, anvan bénédiksyon an silans "Urbi et Orbi" Dimanch Pak la, anvan-l antré nan Dimanch Mizérikòd la ki té louvri dépi nan samdi soua 2 avril 2005 la, fèt Mizérikòd sa-a li té instituyé li minm minm nan.

Avèk Sint Tèrèz lanfan Jézu, li kapab di "Misericordias Domini in aeternum cantabo": "Je chanterai éternellement les miséricordes du Seigneur" (Ps 89,2; cf. Ste Thérèse de l'Enfant Jésus, Manuscrit A, 2r; Ms C, 12; Histoire d'une âme, Moerzeke [Belgique], Carmel-Edit, 1999, 75,249; Ste Thérèse d'Avila, lettre du 19 novembre 1581 à Don Pedro de Castro y Nero). Nan Magnificat la Trè Sint Vièj Mari-a, kay Sint Élizabèt la, nou tandé-l di: "Sa miséricorde s'étend d'âge en âge sur ceux qui le craignent... se souvenant de sa miséricorde" (Lc 2,50.54). Sé yon "symphonie" k-ap chanté "variations sur le thème de la miséricorde divine". "Misericordias Domini in aeternum cantabo"... "Je chanterai éternellement les miséricordes du Seigneur"...

Magnificat pa dôt bagay pasé yon "action de grâce" pou "mirabilia Dei" yo (Lc 2,49; Ac 2,11), "les merveilles de Dieu dans l'histoire du salut". Sé sa Ékaristi-a yé tou, yon "mémorial des hauts faits de Dieu qui culminent dans la Résurrection du Seigneur". Sé "Histoire du salut" sa-a Jézu détayé bay pèlerin Émayus yo nan sélébrasion de la Paròl la li fè sou rout la, épi li vi-n signin-l nan sakrifis Kò ak San-l nan, antan-l kasé pin-an ba yo lè-l rivé nan bouk Émayus la. Ékaristi-a sé aksion-d-gras, Magnificat sé aksion-d-gras. Jou Pantkot la, tout nasion yo Jérusalèm t-ap tandé Apot yo k-ap rakonté "mirabilia Dei yo", "les merveilles de Dieu" (Ac 2,11), yo té tandé chak moun nan lang pa-l. Tout vi nou doué vi-n tounin yon Ékaristi, pou nou proklamé "les merveilles de Dieu". Pap Jan Pòl II té di la Trè Sint Vièj Mari sé la "Femme eucharistique" par excellence (Ecclesia de Eucharistia, 17 avril 2003, n. 53). Lè-l té réponn li sé sèvant Granmèt la bay mésaj Akanj Gabrièl la, sé tankou premié kominion-l li té fè (EE, 55): "Et le Verbe s'est fait chair, et il a abité parmi nous" (Jn 1,14). La Trè Sint Vièj Mari aprann nou di "Amèn" tout bon vré lè Pè-a ap kominié nou, antan-l di: "Le Corps du Christ". Tout promès Bondié yo gin "oui" yo nan Kris la (2 Co 1,20). Sé pa lintèmédiè-l nou di Bondié "Amèn" pou gloua li. Épi "Amèn" sa-a doué angajé nou nan sèvis frè nou yo, tankou li té angajé la Trè Sint Vièj Mari. Li kouri byin vit minm lè-a al kay kouzi-n li Élizabèt pou-l al pot Bòn Nouvèl la, épi pou-l al rann li sèvis pandan 3 moua, apati sizièm moua grosès li-a, joutan-l fi-n akouché Jan-Batis (Lc 1,39).

Disip Émayus yo pati minm lè-a byin vit, y-al pot bòn nouvèl la bay Apot yo (Lc 24,33). "Mès" sé "mision", sé yon "envoi".

La Trè Sint Vièj Mari té di sèvan yo nan nòs Kana-a: "Ninpòt sa-l di nou sé pou nou fè-l" (Jn 2,5). Sé té kòm paravans li t-ap mét Apot yo nan dispozision pou yo obéyi Jézu k-ap di yo nan dènié soupé-a: "Fè sa pou fè sonjé mouin" (Lc 22,19).

Pap Jan Pòl II rélé la Trè Sint Vièj Mari: "le premier tabernacle de l'histoire" (EE, 55). Lè-l al kay kouzin-n li Élizabèt la, li poté Jézu nan vant li. Limiè Jézu Kri travèsé nan jé ak nan voua la Trè Sint Vièj Mari. Jan-Batis santi prézans sa-a antan-l nan vant manman-l, li pran dansé gras a Éspri-Sin-an ki sanktifié-l tankou David t-ap dansé dévan Arch d'aliens la, lè yo t-ap fè-l monté al Jérusalèm nan (2 Sm 6,5.14.16).

Mari sé "l'Arche de la Nouvelle Alliance". Aliens sa-a sé Jézu minm, sèl médiatè ant Bondié ak lèzòm (1 Tm 2,5), Médiatè Rédanssion. Médiasion la Trè Sint Vièj la sé yon médiasion "participée" (Redemptoris Mater, 25 mars 1987, no. 38-39). Sous li sé nan sèl médiasion Jézu-a li soti. Li mété médiasion Jézu-a an valè, li pa sèvi yon paravan pou voualé-l. Li fè rékonèt li, li fè-l donnin frui anndan médiasion pa-l la, sé yon médiasion "d'intercession" (RM, 40). Li apliké médiasion "Redanssion" Jézu-a. Médiasion Jézu-a sé yon médiasion "perfective". Médiasion Mari-a sé yon médiasion "dispositive" (St Thomas d'Aquin). Li fè chemin bay Jézu pasé. Li fi-n di-l yo pa gin divin (Jn 2,3). Li di sèvan yo ninpòt ki sa Jézu di yo, sé pou yo fè-l (Jn 2,5). Li ralé kò-l, li pa jinnin chémin-an. Li fi-n fè prézantasion piès téat la tankou yon "metteur en scène"; kon rido-a louvri, li ralé kò-l, li pa rét dévan "scène" nan pou-l pa jinnin "spectateur" yo ni "acteur" yo. Li gin "discrétion", "humilité", sé sa ki fè sèvis li kapab donnin frui.

Jézu té pozé disip Émayus yo késion pou-l té ba yo chinn, pou yo té eksprimé problèm yo, pou yo té kapab pi atantif pou résévoua mèsaj li-a. Li té aproché yo apati késion ki té préokipé yo: "Ki sa nou t-ap réfléchi konsa youn ak lòt antan n-ap maché-a?" (Lc 24,17). Sé lè sa-a yo kanpé antan yo sézi. Sé pa Jézu ki fè yo kanpé, sé yo minm ki kanpé ak sézisman. Ki kalité moun sa-a ki pa konn sa-k té pasé Jérusalèm nan? Sou ki késion ou vlé nou palé si sé pa sou sa-k té rivé Vandrédi Sin-an? Jézu pran pòz ignoran-l: "Ki bagay?" (Lc 24,19). L-ap kite yo fi-n vidé tout problèm yo anvan-l kòmansé réponn nan yon katéchèz méthodik. Li pa fè kou-fouré sou yo. Li pran yo pi louin pou-l minnin yo pi pré. Li pa trò présé. Pou li yon jou sé kon milan, milan sé kon yon jou (Ps 90,4; 2 P 3,8). Sé lè sa-a atò yo kòmansé déjayé-l tout kalité Jézu Nazarèt la, pouvoua-l kòm profèt nan aksion ak nan paròl dévan Bondié ak dévan tout pèp la, sa chèf yo fè-l pasé jous nan lanmò koua-a, atèl pouin éspérans pa yo-a pran désépsion nan mòd kalité libérasion

yo t-ap tann pou Israèl la, épi toua jou gin tan pasé déja, médam yo ki t-al nan kavo-a, sa yo rakonté yo-a, sé tankou pouason davril, tonbo vid, aparision anj; ata konsta kèk nan moun group pa yo-a al fè, min li minm yo pa ouè-l (Lc 24,19-24).

Koulié-a atò, Jézu jouinn matiè pou-l kòmansé katéchèz li-a, pou éspliké yo véritab sans libérasion Israèl la, vré chémin Bondie té chouazi-a. Sé pa sa yo t-ap tann nan, sé pa violans, ki pap réglé anyin-an. Sé nan tan mizèrikòd la nou yé: sé pa nan tan kòlè-a. Tan kòlè-a, tan jijman-an sé pou la fin du mond. Bondié prolonjé tan mizèrikòd la pou bay moun yo okazion pou yo répanti, pou yo régrèt, pou yo chanjé konpòtman, pou yo jouinn padon (Jon 4,11). Mèt jadin-an ki té planté pié fig frans la nan jadin rézin-l nan, pandan touazan, li pa rékòlté frui. Li té vlé koupé-l. Jéran-an di-l pou-l ba-l yon chans ankò, l-ap foyé, l-ap mét fimié, l-ap fè sa-l kapab pou-l ouè si l-a fè-l donnin (Lc 13,6-9).

Nou nan tan mizèrikòd la. Jézu pa vi-n pou moun ki an santé min pou sa-k nan péché (Lc 5,32). Li pa vi-n fè violans ak yo, li pa pran mouton ki té pèdi-a ak kout pié, ak kout fouèt. Li aprivouazé-l, li mété-l sou zépòl li. Li maché tou dousman pou-l suiv kadans sa-k pi fèb yo nan bann mouton yo (Lc 15,4-7; Is 40,11; Gn 33,13-14; Ez 34,16; Ps 23,1; Jn 10,16). Sé nan fèt dimanch mizèrikòd la, samdi soua, 2 avril 2005 ki té ouvri dimanch kazimodo-a, 2èm dimanch Pak la, Pap Jan-Pòl II té fè gran pasaj la, gran Pak la. "Il y eut un soir, il y eut un matin, ce fut le premier jour (Gn 1,5)... et le huitième jour..." Sé nan uitièm jou-a, oktav Pak la, Pap la travèsé, li fè Pak li yon fason "définitif" nan dimanch de la mizèrikòd. "Misericordias Domini in aeternum cantabo", "Je chanterai à jamais les miséricordes du Seigneur"; "Sa miséricorde s'étend d'âge en âge sur ceux qui le craignent"... "Se souvenant de sa miséricorde"... "Dieu est amour miséricordieux". Dézièm lèt ansiklik Pap Jan-Pòl II té ékri, sé "Dives in misericordia", Bondié rich nan mizèrikòd (Ep 2,4). Mizèrikòd la désann sot nan sièl la. Askion-d-gras nou ap monté sot sou tè-a. Ékaristi sé aksion-d-gras, rémèsiman pou mèvèy mizèrikòd Bondié. Nou t-ap tann "le lion de la tribu de Juda" (Ap 5,5), nou jouinn "l'Agneau immolé" (Ap 5,6). Nou t-ap tann batay, nou jouinn lapè. Nou t-ap tann violans, nou jouinn amitié; nou t-ap tann pinision, nou jouinn padon; nou t-ap tann tan kòlè, nou jouinn tan mizèrikòd. Minm Jan-Batis nan prizon-an pa-t fi-n konprann: "Èské sé ou ki té gin pou-ou té vini-an oubyin sé yon lòt pou nou tann?" (Mt 11,3) Jézu fè mirak ki korésponn ak pasaj Izayi-a li sité-a, antan-l kòmansé sitasion-an apré koté ki palé sou jou vanjans la ki t-ap vini-an (Mt 11,4; Is 35,5).

Nan prémié prèch li fè nan sinagòg Nazarèt la, li li pasaj Izayi-a antan-l rété anvan koté-k palé sou jou vanjans la, li fèmin liv la, li rinnèt sèvan-an li, li

fè aplikasyon pou-l montré mision délivrans li nan lign mizèrikòd la. Sé yon ané gras li vi-n proklamé, koté Granmèt la padonnin, koté-l fè mizèrikòd (Is 61,1-2a; Lc 4,18-19).

Ané Ékaristi-a, n-ap di Bondié mési pou mizèrikòd li. "Misericordias Domini in aeternum cantabo". "Je chanterai éternellement les miséricordes du Seigneur".

"Reste avec nous, Seigneur, car déjà le soir tombe et le jour parvient à son déclin". "Mane nobiscum Domine". "Je suis avec vous tous les jours jusqu'à la fin du monde" (Mt 28,20), nan sakréman Ékaristi-a.

Touché kè nou pou-ou louvri jé nou. Kasé pin-an ba nou, apré-ou fi-n détayé paròl la ba nou sou rout la. Ou fè sanblan ou-apral pi louin pou nou invité-ou antré lakay nou (Lc 24,28).

Ou dévan pòt la, ou-ap frapé (Ap 3,20), ou pap défonsé pòt la. Klé-a sou pa anndan, kon nou louvri, ou-ap antré, ou-ap abité anndan kè nou, ou-ap chofé kè nou, pou léspri nou ouè klè, pou-ou chanjé mantalite nou, pou nou sispann ap tann "libération éphémère" avèk kaskad violans, avèk spiral violans ki pa janm kap fini, ralé minnin kasé. Fè-n dépasé ranki-n, rayisans, jalouzi, égoïs, ògèy, éspri dominasion, fè-n bliyé tèt nou pou nou sonjé lòt yo.

Fè nou mété tèt nou ansanm, tankou disip Émayus yo, antan nou fè "homélie partagée", antan nou patajé ékspérians nou, min antan nou kité pòt la louvri pou-ou fofilé kò-ou, antré nan mitan nou, pou-ou fè chémin ak nou, pou-ou rédrésé diréksion krochi nou t-ap pran-an.

Fè nou sonjé kijan nan kòmansman gouvènman-l sou tro-n Sin Piè-a, Pap Jan-Pòl II té di nou: "Pa pè, louvri pòt yo bay Rédanm-tè-a", pou nou louvri pòt kè nou ba ou, pou nou louvri plat min nou bay frè nou.

Fè nou sonjé kijan pi louin Pap la té di nou: "Antré nan léspérans la". Tè léspérans la, sé konsa li té rélé Amérik Lati-n nan, pou nou suiv Koua-a ki té planté lakay nou nan kòmansman évanjélizasyon-an, an 1492 la, pou nou antré nan yon nouvèl Évanjélizasyon avèk yon chalè nouvo, avèk métòd nouvèl, avèk ékspresyon nouvèl: chalè nouvo-a pa rapò a moun nan k-ap poté bòn nouvèl la, métòd nouvèl yo parapò a tan-an ki chanje-a, ékspresyon nouvèl la parapò a group moun yo koté n-ap poté bòn nouvèl la ba yo-a, antan nou évanjélizé kultu-a pandan n-ap adapté Évanjil la nan kultu-a nan sa yo rélé "inculturation"-an, "fer de lance de la Nouvelle Évangélisation".

Fè nou sonjé kijan pi louin Pap la té di nou antan n-ap antré nan jibilibé touazièm milènè-a: "Duc in altum" (Lc 5,4), al nan fon lanmè pou nou lansé filè yo pou lapèch la. Sé odas apostolik pou nou ginyin. Si nou rété sou bò sab la sé ti kribich n-ap péché. Sé nan fon lanmè pou-n alé. Piè té pousé kannòt la nan fon lanmè. Li té pran tèlman pouason, filè yo té plin.

Pap Jan-Pòl II pousé kannòt légliz la nan fon lanmè. Légliz la invité pou-lagè filè yo, minm si nou gin inpréssion nou té travay tout nan nuit san nou pa pran anyin. Pou Granmèt la yon jou tankou milan, milan tankou yon jou. "En temps voulu j'agirai vite" (Is 60,22).

Reste avec nous, Seigneur, car il se fait tard et déjà le jour baisse...

Mane nobiscum Domine.

- N'ayez pas peur, ouvrez les portes au Rédempteur.
- Entrez dans l'espérance
- Duc in altum, avancez au large et lachez les filets pour la pêche
- Mane nobiscum Domine. Reste avec nous Seigneur.

Sé prinsipal jalon Pap Jan-Pòl II té drésé pou balizé chémin 26 ané édmi pontifika-l la.

- Pa pè
- Antré nan léspérans
- Avansé nan fon lanmè
- Rét avèk nou Granmèt.

Dènié-a sé "chant du cygne" li. Lévanjil touazièm dimanch Pak sa-a raplé-l avèk insistans disip Émayus yo: "Mane nobiscum Domine". Arkanj Gabriyel té di la Trè Sint Vièj Mari: "Granmèt la avèk ou" (Lc 1,28). Jézu di Apot yo antan-l t-ap monté nan sièl la: "Mouin avèk nou touléjou joutan sièk tan yo fin akonpli" (Mt 28,20).

Nan lanmès la Pè-a di nou: "Granmèt la avèk nou tout".

Nan Ékaristi-a li avèk nou.

Ané 2005 la sé ané Ékaristi-a. Avèk disip Émayus yo, avèk Pap Jan-Pòl II n-ap di Granmèt la: "Mane nobiscum Domine: Rété avèk nou Granmèt!"

N-ap sonjé tankou yon téstaman Pap Jan-Pòl II té kité pou nou nan finisman dokiman "Mane nobiscum Domine"-a antan li t-ap ba nou kèk ti konsign tou sinp, san-l pa trasé nou okinn gran lign pou dirijé nou. Li té mandé sèlman pou tout sa n-ap fè pou mété Ékaristi-a an valè, li gin mak fabrik "intériorité". Sé pa yon bagay sou pa déyò, sou po, tankou yon téat, k-ap bay yon "cho". Li té di:

"Je ne demande pas [...] que l'on fasse des choses extraordinaires, mais que toutes les initiatives soient empreintes d'une profonde intériorité. Si le fruit de cette Année consistait seulement à raviver la célébration de la Messe dominicale dans toutes les communautés chrétiennes et à faire croître l'adoration eucharistique en dehors de la messe, cette Année de grâce aurait atteint un résultat significatif. Cependant il est bon de viser vers le haut et

de ne pas nous contenter de mesures médiocres, parce que nous savons pouvoir toujours compter sur l'aide de Dieu".

Lè-l di "viser vers le haut"-a, li fè sonjé: "Duc in altum" nan. Fò-n toujou al pi louin, nan "initiative" nou, nan odas apostolik nou, pou nou pa pè, pa rét nan "médiocrité", nan ti bagay raz, fò nou "investi" gro, fò nou pa simin chich, fò nou simim laj pou nou rékòlté anpil, 2 Co 9,6; Pr 11,24.

Lè-l di: "nous savons pouvoir toujours compter sur l'aide de Dieu", li fè sonjé "entrez dans l'espérance" la.

Konsa li invité nou fè sélébrasion mès dominikal yo vi-n pi vivan "raviver la célébration de la messe dominicale", épi dévloppé adorasion ékaristik la an déyò lamès la, "faire croître l'adoration eucharistique en dehors de la messe".

Min konsign li, tou sinp, avèk "dénominate komin": "intériorité". Antré sou pa anndan, pa rét sou pa déyò, "bèl flè san-z-odè".

Sé sa n-ap mandé la Trè Sint Vièj Mari, "Notre-Dame de l'Eucharistie, le premier tabernacle de l'histoire, la Femme Eucharistique par excellence".

Pap Jan-Pòl II té mandé nou pou nou kontanplé Kris la atravè "regard" la Trè Sint Vièj Mari.

Nan adorasion ékaristik la, n-ap kontanplé prezans Kris la atravè "regard" Notre-Dam, antan nou eksprimé divès santiman nou atravè pa-l yo, jan Pap Jan-Pòl II di nan lèt li té ékri pou ané Rozè-a:

"- un regard interrogatif...

- un regard pénétrant...

- un regard douloureux...

- un regard radieux...

- un regard ardent..." (Rosarium Virginis Mariae, 16 octobre 2002, no. 10)

N-ap kité la Trè Sint Vièj Mari gidé nou, pou dialòg nou avèk Jézu-Kri kapab déroulé nan silans: jé ouè, bouch pé. "Quant à Marie, elle conservait tout cela et le méditait en son coeur" Lc 2,19.51; 11,28.

"Je l'avise, il m'avise", jan péyizan Kuré d-Ars la di an fas tabènak la.

"M-ap gadé-l, l-ap gadé-m".

Lapriyè sé "échange de deux regards" ant Bondié ak nou.

San nou pa palé, youn konprann lòt.

Lapriyè sé pa palé anpil, sé rinmin anpil, jan Sint Tèrèz d-Avila di-a.

"Pour toi, Dieu de Sion, même le silence est louange." (Ps 65,2, T.M.)

*

* *

TOUAZIÈM DIMANCH PAK B

"Nou sèvi témouin bagay sa yo" (Lc 24,28). Sé konsa lévanjil touazièm dimanch Pak B-a fini. Nan premié léktu-a (Ac 3,13-19), Sin Piè ap préché dévan foul la, li déklaré o non tout Apot yo: Jézu-Kri résisité sot nan pami mò yo, nou sèvi **témouin** (Ac 3,15). Sé nan korépondans avèk konsign Jézu pasé nan lévanjil touazièm dimanch Pak B-a (Lc 24,15-48). Mo témouin-an kòm sèvi tankou yon fil ki koud liv Travay Apot yo. Jou lasansion-an, Jézu di patizan yo y-ap sèvi-l témouin dépi nan Jérusalèm, pasé Lajudé ak Lasamari, al jous nan bout tè-a (Ac 1-8). Tout liv Travay Apot yo bati sou plan sa-a: sèvi Jézu témouin tou dabò Jérusalèm (Ac 1-7), apré sa nan Lajudé ak Lasamari (Ac 8,1-11,28), apré sa jous nan bout tè-a (Ac 11, 29-28,31). Jérusalèm: sé premié pati liv la (Ac 1-7), premié kominoté-a alantou kay sakré-a, sé nan pati sa-a yo pran premié léktu touazièm dimanch Pak B-a. Lajudé ak Lasamari: sé dézièm pati liv la (Ac 8, 1-11,28); lè yo fi-n touyé diak Étièn nan, kominoté-a gayé poutèt pèsékision-an. Jous nan bout tè-a: sé touazièm pati liv la (Ac 11, 29-28,31); mision Sin Pòl yo nan péyi payin yo, rivé jous a-Ròm (dépi Ac 11,29, min sitou apati chapit 13). Nan tou lé toua pati sa yo mo "témouin"-an tounin souvan: 13 fous sou fòm "martus" μάρτυς (Ac 1,8.22; 2,32; 3,15; 5,32; 6,13; 7,58; 10,39.41; 13,31; 22,15.20; 28,16); mo "témouagné"-a vini 11 fous sou fòm "marturéô" μαρτυρέω (Ac 6,3; 10,22.43; 13,22; 14,3; 15,8; 16,2; 22,5.12; 23,11; 26,5) épi dé fous sou fòm "marturomaî" μαρτύρομαι (Ac 20,26; 26,22); mo "témouagnaj" la vini dé fous sou fòm "marturion" μαρτύριον (Ac 4,33; 7,44) épi yon fous sou fòm "marturia" μαρτυρία (Ac 22,18); sa fè an tou 29 fous pou lidé sèvi témouin-an. Nan Apokalips la, mo "témouin"-an vini 5 fous sou fòm "martus" μάρτυς (Ap 1,5; 2,13; 3,14; 11,3; 17,6); mo "témouagné"-a vini 4 fous sou fòm "marturéô" μαρτυρέω (Ap 1,2; 22,16.18.20) mo "témouagnaj" la vini 1 fous sou fòm "marturiòn" μαρτύριον (Ap 15,5), épi 9 fous sou fòm "marturia" μαρτυρία (Ap 1,2.9; 6,9; 11,7; 12,11.17; 19,10ab; 20,4): sa fè an tou 19 fous.

Nan lévanjil Sin Jan-an, mo "témouagné"-a vini 31 fous sou fòm "marturéô" μαρτυρέω (Jn 1,7.19; 3,11.32.33; 5,31.32.34.36; 8,13.14.17; 19,35; 21,24; 1,7.8.15.32.34; 2,25; 3,11.26.28.32; 4,39.44; 5,31.32.33.36.37.39; 7,7; 8,13.14.18; 10,25; 12,17; 13,21; 15,26.27; 18,23.37; 19,35; 21,24) mo "témouagnaj" la vini 13 fous sou fòm "marturia" μαρτυρία sa fè an tou 44 fous.

Dépi lindi Pak jous dimanch Lapankot nou li liv Travay Apot yo nan lamès la, sé yon fason pou préparé kè nou, pou-l louvri pi byin jou lapankot la, ki

raplé lè léspri Sin-an té désann sou Apot yo. Sé tankou yon pèlerinaj n-ap fè sou tras témouagnaj Apot yo jous rivé Lapankot. Jou Lasansion-an (Ac 1,8), Jézu di Apot yo y-apral résévoua yon fòs, fòs léspri Sin-an k-ap sot anro-a, pou pèmèt yo sèvi-l témouin dépi nan Jérusalèm (Ac 1-7 = premié pati liv la), travèsé Lajudé ak Lasamari (Ac 8, 1-11,28 = dézièm pati liv la), jous rivé nan bout tè-a (Ac 11, 29-28,31= touazièm pati liv la).

Dépi lindi Pak, nou nan premié pati-a (Ac 1-7): Apot yo ap sèvi Jézu témouin Jérusalèm dévan foul la, dévan chèf yo, nan tout kalité sikonstans. Apati mèkrédi touazièm sémèn Pak, nou travèsé nan dézièm pati-a (Ac 8,1-11,28): apré lanmò diak Étièn nan, pèsékision apral éklaté, krétyin yo apral bliyé gayé nan Lajudé ak Lasamari. Apati mèkrédi katyiyèm sémèn Pak, nou pasé nan touazièm pati-a (Ac 11, 29-28,31): yo gayé sou tout fas tè-a alokasion mision Sin Pòl yo, jous rivé a-Ròm.

Étièn sé premié témouin-an, paské mo "témouin"-an vlé di "mati", li mouri mò mati, paské li té rétfidèl nan témouagnaj li rann Jézu (Ac 7, 1-60). Tout moun ki sèvi Jézu témouin, sé mati, minm si-l pa mouri mò mati; si-l mouri mò mati, lè sa-a li signin témouagnaj la ak san-l, tankou Étièn.

Sèlman, vré Mati-a, vré Témouin-an, ki sèvi modèl la, sé Jézu li minm minm, ki vi-n sou tè-a pou-l sèvi Vérité-a témouin (Ap 1,5; Jn 18,37). Témouagnaj sa-a minn-l jous sou lakoua; li di: moun ki vlé suiv li sou rout témouagnaj sa-a, sé pou-l rénonse pròp tèt li, pou-l pran koua-l chak jou, pou-l maché dèyè-l (Lc 9,23). Nou bézouin fòs pou nou sèvi Jézu témouin, sé pa pròp fòs pa nou, paské lènmi-an pi fò pasé nou, sé fòs ki sot anro-a (Ac 1,8), fòs léspri Sin-an, kado sa-a Bondié bay san-l pa méziré-l la (Jn 3,34). Si mo "témouin"-an, "témouagné"-a, "témouagnaj" la vini si souvan nan liv Travay Apot yo {29 fous an tou), san konté fòm konpozé-a: "rann-témouayaj" διαμαρτύρομαι (diamarturomai) ki vini 9 fous ankò: Ac 2,40; 8,25; 10,42; 18,5; 20,21.23.24; 23,11; 28,23; ki t-a fè an tou 38 fous}, sé nòmval pou nou rankontré léspri Sin-an anpil tou nan liv Travay Apot yo. Li vini 58 fous (Ac 1,2.5.8.16; 2,4a.b.17.18.33.38; 4,8.25.31; 5,3.9.32; 6,3.5.10; 7,51.55; 8,15.17.18.19.29.39; 9,17.31; 10,19.38.44.45.47; 11,12.15.16.24.28; 13,2.4.9.52; 15,8.28.29; 16,6.7; 19,1 (lectio varians).2a.b.6; 20,22.23.28; 21,4.11; 28,25). Liv Travay Apot yo, sé liv léspri Sin-an minm. Travay Apot yo, sé travay léspri Sin-an. Léspri Sin-an gayé kon difé nan sa liv sa-a rakonté; sé li minm ki fè Apot yo sèvi Jézu témouin, antan li ba yo kado **Fòs** la ki sot anro-a (Ac 1,8; Lc 24,49).

Nan Apokalips, koté mo "témouin", "témouagné", "témouagnaj" vini 19 fous-a, nou jouinn léspri Sin-an 9 fous (Ap 2,7.11.17.29; 3,6.13.22; 14,13;

22,17). Nan Lévanjil Sin Jan-an, koté mo "témouayé", "témouayaj" vini 31 fous-a, nou rankontré léspri Sin-an 20 fous (Jn 1,32.33a.b; 3,5.6.8a.b.34; 4,23.24a.b; 6,63a.b; 7,39.a.b; 14,17.26; 15,26; 16.13; 20,22).

Nan lévanjil Sin Luk la, mo "témouin"-an vini 2 fous sou fòm "martus" μαρτυς (Lc 11,48; 24,48). Mo "témouagné"-a vini 1 fous sou fòm "marturéô" μαρτυρέω (Lc 4,22). Mo "témouagnaj" la vini 4 fous sou fòm "marturion" μαρτύριον (Lc 5,14a.b; 9,5; 21,13), épi 1 fous sou fòm "marturia" μαρτυρία Mo konpozé "rann témouagnaj" la vini 1 fous sou fòm "diamarturomai" διαμαρτύρομαι (Lc 16,28). Sa fè an tou 9 fous. Sé nòm al tou pou nou jouinn léspri Sin-an nan lévanjil Sin Luk la. Li vini 16 fous (Lc 1,15.35.41.67; 2,25.26; 3,16.22; 4,1a.b.14.18; 10,21; 11,13; 12,10.12). Sé minm Sin Luk la ki ékri liv Travay Apot yo. Li fini lévanjil li-a antan-l montré Jézu ki promèt Apot yo fòs léspri Sin-an k-ap vi-n sot anro-a pou yo sèvi-l témouin, épi li monté nan sièl la dévan yo (Lc 24, 48.49.51). Sé minm prezantasyon sa-a ki nan kòmansman Travay Apot yo (Ac 1, 8-9). Ni lévanjil la, ni Travay Apot yo adrésé bay minm moun nan: Téofil (Lc 1,3; Ac 1,1).

Sé pa pou premié tan légliz la sèlman léspri Sin-an fè mèvèy. Sint Térèz lanfan Jézu di: n-ap jouinn nan min Bondié toutotan nou espéré. Pap Jan-Pòl II té ékri Lèt ansiklik sou léspri Sin-an (Dignum et vivificantem), koté li mandé nou pou nou rénovlé konésans avèk atachman aléga léspri Sin-an, antan n-ap préparé gran jibilé ané 2000 la. Sé nan mézi nou louvri kè nou bay léspri Sin-an n-ap résévoua favè-l pi byin. Sé pou nou kitè-l lib fè sa-l vlé ak nou, minm jan li té sèvi avèk Apot yo. Sin Pòl té vlé al fè mision nan lazi, min léspri Sin-an pa-t dakò (Ac 16,4); li té désidé al Bitini, léspri Sin-an pa-t vlé (Ac 16,7). Sé lè-l rivé Troas, li fè yon rèv: yon moun Masédouan parèt dévan-l, li mandé-l pou-l al poté yo sékou lòt bò lanmè-a. Sé lè sa-a Sin Pòl ouè si léspri Sin-an pa-t kitè-l alé koté li té vlé-a, sé nan Masédouan li té vlé pou-l travèsé, al sèvi Jézu témouin (Ac 16, 9-10). Sin Pòl té vlé tounin Jérusalèm apré sa, léspri Sin-an mandé-l pou-l tounin nan lazi (Ac 19,1 lectio varians).

Sin Pòl pasé anpil mati; fòs léspri Sin-an té avèk li. Dépi nan kòmansman sé konsa sin Piè avèk Apot yo t-ap pasé mati pou non Jézu. Yo bat yo, yo mété yo nan prizon, yo touyé yo, yo rayi yo, yo jouré yo. Yo minm yo kontinué ap témouagné pi fèm. Sé konsign sa-a yo té résévoua nan min Jézu. Sé léspri Sin-an ki t-ap témouagné nan yo (Lc 21,24; 12,12).

Mati Apot yo té pasé nan kòmansman légliz la, gin anpil koté toujou krétyin yo ap sibi-l pou sèvi Jézu témouin; fòs léspri Sin-an ankourajé yo. Gin koté

minm si pa gin pèsékision ofisièl, krétyin yo gin pou yo rézisté avèk asirans pou yo fidèl nan mision témouagnaj yo. Lè Sint Maria Goréti té rézisté dévan okazion Aléksann té mét dévan-l pou fè-l tonbé nan péché-a, sé fòs léspri Sin-an ki té pèmèt li rét fidèl, li mouri antan-l résévoua katòz kout kouto nan min Aléksann, li padonnin Aléksann anvan-l mouri, li promèt l-ap lapriyè pou Aléksann kapab alé nan sièl yon jou. Minm fòs léspri Sin-an té bay Étièn pou-l padonnin bouro-l yo (Ac 7,60; cf Lc 23,34) sé li minm tou Maria Goréti té ginyin, gras a léspri Sin li té fèk sot résévoua nan lakonfimasion-an. Sèt kado léspri Sin-an batay kont atak Satan, kont atirans tè-a, kont mové tandans nou.

*

"Èské nou gin kichòy pou manjé isit la? " Sé konsa Jézu ap bay Apot yo prèv li lévé vivan sot nan pami mò yo (Lc 24, 41-43). Nan dènié Soupé-a li té di li pa t-ap manjé nan frui pié rézin-an ankò joutan akonplisman-an rivé nan péyi koté Bondié Roua-a (Lc 22,18; cf v. 14-20). Apré Réziréksion-an sé pa chagrin ankò; sé kè kontan. Sé alokasion Résépsion-an Jézu té di Apot yo orévoua (Lc 22, 14-20); sé alokasion yon résépsion li fè patizan Émayus yo rékonèt li lévé vivan (Lc 24, 30-31). Sé manjé l-ap mandé Apot yo pou-l fè yo ouè li lévé vivan (Lc 22,41). Sou bò lanmè Galilé-a, l-ap kuit pouason pou Apot yo ki pasé tout lannuit la ap péché san yo pa jouinn anyin (Jn 21,13). Nan péyi koté Bondié Roua-a nan sièl la, sé Résépsion k-ap ginyin san rété (Lc 22,30; Ap 3 20,21).

Sin Justin gin yon bèl pasaj yo rélé "Apologie" (ané 150 apré Jézu-Kri), sa vlé di "plédé kòz rélijion-an", koté li montré grandè Résépsion lékaristi-a y-ap fété spésialman jou Dimanch la, jou yo rélé jou "Solèy" la, jou Réziréksion-an. Nan pasaj sa-a (chap 66-67 PG 6, 427-431), li montré rélasyon ant lékaristi avèk lafoua, li di sé moun ki gin lafoua sèlman ki pou résévoua lékaristi-a, moun ki kouè nan lansègnman Apot yo. Sé poua chak dimanch yo chanté "Credo"-a. Yo pa doué ranplasé-l avèk dèt kantik ki sanblé ak li. Sé "Credo"-a li minm minm pou yo di chak dimanch, pou yo kapab konnin-l byin, pou yo kapab réaji nan konduit lavi-a, dapré lansègnman ki ranmasé ladan-l. Sé sou Apot yo lafoua nou chita, sé pa sou okinn dèt kantik, minm si yo cho, yo bèl. Apré prèch la, chak dimanch sé pou yo chanté oubyin yo li "mouin kouè gin yon sèl Bondié"-a, san yo pa rakousi-l, pou lafoua nou kapab dévloppé afòs nou vi-n abitué avèk li. Konsa sé moun ki kouè nan lansègnman Apot yo ki pou patisipé nan lékaristi-a, dapré sa Sin Justin di nou. Sé moun ki batizé pou résévoua padon péché-l, pou réfèt tou nèf. Batèm nan ak la kominion-an ak lakonfimasion-an, yo

rélé yo sakréman "de l'initiation chrétienne ", sa vlé di sé yo minm ki fè nou antré nan mèvèy sakré Granmèt la. Yo kòm pran nou nan min pou fè nou maché. Nou tankou ti apranti, y-ap montré nou kijan pou nou kinbé yon rabo pou nou raboté planch la byin. Y-ap ba nou tout kalité indikasyon nou bezouin pou la vi nanm nou. Konsa dapré Sin Justin, moun ki pou patisipé nan lékaristi-a, sé moun k-ap viv dapré sa Jézu-Kri rinmèt la. Sé sa Jézu-Kri rinmèt la minm yo mété nan "Credo"-a, yo rasanblé ladan-l, yo rélé sa "symbole", sa vlé di yon bagay ki pèmèt nou youn rékonèt lòt tout koté nou pasé. Nan gròt Lourdes la, lè gin pèlérinaj pou tout kalité nasion ki palé divès lang, tout moun pran chanté minm "Credo"-a an latin, yo tout ansanm, minm si youn pa konprann langaj lòt, yo santi kijan yo fè yon sèl nan minm lafoua-a ki chita sou minm lansègnman-an. Sé pou nou fè atansyon pou nou pa kite lafoua nou glisé nan lansègnman ki pa sòti nan Apot yo, ki pa ranmasé nan "Credo"-a, sé pou sa fò tout fidèl konnin "Credo"-a byin, pou nou dépisté mové lansègnman k-ap glisé nan mitan nou. Otréman nou pa kapab patisipé nan lékaristi-a avèk frui, paské lékaristi-a sé sakréman ki fè nou tout fè yon sèl kò-d fanmiy. Si nou dévié nan lansègnman-an nou pa kapab résevwa sign yon sèl fanmiy nan.

Sin Justin di nou: lékaristi-a sé pa tankou yon pin òdinè ni yon bouason òdinè; sé Kò ak San Jézu-Kri minm, li minm Paròl Bondié-a ki vi-n tounin Kò-a ak San-an pou-l sové nou-an. Lè nou manjé Kò ak San Jézu-Kri sa-a pou nou di-l mèsi-a (dapré so mo "ékaristi"-a vlé di-a), manjé sa-a nourri nou antan-l vi-n tounin chè nou ak san nou. Sin Justin fè nou sonjé dènié Résépsion koté Jézu té di paròl yo ki fè pin-an ak divin-an vi-n tounin Kò-l ak San-l nan: "Sa-a sé Kò mouin; sa-a sé San mouin; fè sa pou nou sonjé mouin".

Sin Justin fè nou sonjé: lékaristi-a sé sakréman ki fè nou fè yon sèl, minm jan sé yon sèl Kò Jézu-a ki ginyin-an. Li raplé nou kijan moun ki gin kichòy, sé pou-l édé sa-k pa ginyin: pou nou toujou kapab fè yon sèl. Sé pou sa dépi lontan nan premié tan légliz, yo té toujou fè kèt nan lamès la, pou édé sa ki pòv yo. Sans kèt la inpòtan anpil. Lontan sé sitou manjé, rad ak dèt bagay ki kapab sèvi pòv yo yo té konn poté nan kèt la. Pou kèt la kapab pi fasil, yo mété lajan pou achte dèt bagay sa yo pi byin. Kèt la, sé pa yon jès ki pa gin sans. Li montré nou fè yon sèl. Tout mitan liv dézièm Lèt Korintyin yo, chapit 8-9 la, insisté sou kèsyon kèt la. Sé pou sa minm Sin Pòl té ékri Lèt sa-a. Rès Lèt la palé osijè apostola Sin Pòl ni nan kòmansman (chapit 1-7) ni nan finisman (chapit 10-13), kòm pou ankadré kozé kèt la. Kèt sa-a sé sign Égliz Masédoua-n yo fè yon sèl avèk Égliz Jérusalèm nan, antan y-ap voyé ti sa yo ginyin-an pou li, pou édé-l, nan povreté-l. Sin Pòl

rivé minm yon pouin li ékri ata légliz Ròm nan li pa ko minm konnin-an pou mandé-l lapriyè Bondié pou légliz Jérusalèm nan aksépté kèt légliz Masédoua-n nan; paské si légliz Jérusalèm nan réfisé kèt sa-a, sa vlé di li pa rékonèt légliz Masédoua-n kòm légliz Jézu-Kri (Rom 15,31), sé konsa Sin Pòl t-a travay pou granmési nan apostola li fè nan Masédoua-n nan. Kozé kèt la, sé yon bagay ki konsékan anpil nan sans sa-a pou tout légliz fè yon sèl la (Rom 15, 25-33). Sé poua kèt la vini apré "Credo"-a épi anvan Ofrann nan ak Konsékrasion-an. Sa nou fi-n kouè nan lansègnman-an koté nou déklaré lafoua nou-an, nou fè-l pasé nan jès nou-an antan nou bay ti sa nou ginyin-an tankou prémié Krétyin yo ki té konn mété tout ti sa yo ginyin-an ansanm nan pié Apot yo pou yo séparé yo apré sa bay tout moun dapré bézouin chak moun (Ac 2,44-45; 4,32.34-35). An minm tan Ofrann n-ap fè-a sèvi pou nou fè louanj pou Sila-a ki kréyé tout bagay la, pa lintèmediè Pitit li-a Jézu-Kri épi pa lintèmediè lèspri Sin-an, dapré sa Sin Justin di nou.

Sin Justin di nou: "tout moun ki abité lavi oubyin andéyò, yo rasanblé yon sèl koté pou li kòmanté Apot yo ak liv Profèt yo, dapré sa tan-an pèmèt". Kozé "yon sèl koté-a" inpòtan anpil tou. Sé pa yon pakèt ti nich poul adouat agoch, yon pakèt ti nich foumi, chak dé katié: sé yon sèl fanmiy nou fè, sé nòm al pou nou rasanblé nan yon sèl Kay. Sé poua légliz la gin fòm yon gran Kay pou-l kapab résévoua yon bon valè moun. Légliz sé yon sèl kò-d fanmiy. Sé nan pié Mòn Sinayi-a Bondié té rasanblé tout pèp la pou ba-l lansègnman-an pa lintèmediè Moyiz. Nan sign sansib Kay la ki rasanblé nou-an, sé pou nou montré nou fè youn tout bon vré. Jou sa-a, nou gin pou nou fè ti sakrifis, minm si koté pou nou rasanblé-a pa trò pré lakay nou, nou pa doué chèché prêtèks di li trò louin; gin moun ki fè anpil kilomèt pou y-al nan maché chak dé jou, pou yo jouinn yon ti avantaj pou lavi sa-a k-ap pasé-a; min sou kèsion lavi ki pap janm fini-an nou doué réfléchi tou pou nou ouè ki konsékans ak ki pi gran avantaj n-ap jouinn lè nou vi-n rasanblé jou dimanch la pou nou vi-n rankontré Granmèt la k-ap palé ak légliz li-a.

Sin Justin di: apré léktu yo, "moun k-ap dirijé sérèmoni-an bay kèk lansègnman ak paròl li épi kèk konsèy pou nou pran modèl sou bagay sa yo ki tèlman bèl yo". Prèch la inpòtan. Gin bagay Pè-a di ki konsèné tèl moun oubyin tèl lòt san-l pa minm konnin ki limiè l-ap mété nan kè-l, paské sé lèspri Granmèt la k-ap palé ak légliz li-a (Ap 2,7.11.17.29; 3,6.13.22). Nou pa doué néglijé prèch la, ni ranplasé-l ak dèt bagay. Sé pou nou gin konfians Bondié ap palé ak légliz li antan li sèvi ak bouch nou pou-l fè mésaj li-a pasé. Li té di Profèt Ézékièl si-l pa préché sé madichon pou li, sé li minm l-ap mandé kont (Ez 3,18; 33,8). Sé poua Sin Pòl di: "Madichon pou mouin si-m pa préché Bòn Nouvel la" (1 Co 9,16). Prèch la mété

aplikasyon lévanjil la nan lavi nou épi li préparé nou sot nan Léktu yo travèsé nan Ofrann nan ak Konsékrasion-an.

Sin Justin di: apré sa, tout moun lévé, yo fè lapriyé, sé sa nou rélé lapriyé pou tout pèp la, ki fè nou sonjé bézouin tout moun; sé pa afè pa nou sèlman n-ap okipé, nou tout nou fè yon sèl kò-d-fanmiy, bézouin youn sé bézouin lòt. Si min-an ap soufri, pié-a doué gin solidarité avèk li (cf 1Co 12,14-26); min anpil chaj pa lou; koté dé ou toua moun mét ansanm pou mandé yon bagay, Bondié ap bay li (Mt 18,19.20). Sé pa pou nou ront déklaré tou sa nou bézouin nan lapriyé pou tout pèp la, sé nan fanmiy nou yé. Tout fason, gin yon ti moman silans apré dènié intansion priyé-a, ki pèmèt tout moun di nan kè yo sa yo pa-t gin tan di dévan tout moun oubyin sa yo pa-t kapab di dévan tout légliz la. Bondié tandé nan fon kè nou.

Sé apré sa yo poté pin, divin ak dlo épi Pè-a fè priyé yo rélé "priyé ékaristik" la; alafin Pèp la di "Amèn". Nan mitan Priyé sa-a, sé Konsékrasion-an, koté Pè-a di paròl Jézu té di sou pin-an ak divin-an, jou Jédi-Sin-an: "Sa-a sé Kò mouin; sa-a sé San mouin". Pè-a lévé Kò Jézu ak San Jézu anlè; lè sa-a nou kapab di tou ba minm paròl Sin Toma yo: "Granmèt mouin, Bondié mouin" (Jn 20,29); nou kapab ajouté tou ba toujou: "mouin adoré-ou é mouin rinmin ou". Sé pa lè sa-a pou n-ap chanté okinn chanté. Gin moman pou sa apré Élévasion-an, lè Pè-a fi-n di "Ala yon bèl mèvèy, nou pa kapab konprann, min nou kouè". Sé sa yo rélé "anamnèse" la.

Lè moman lakominion-an rivé, sé pou nou fouyé konsians nou pou nou pa proché kot Kò ak San Granmèt la ninpòt kijan ak gro péché nan kè nou, pou nou pa manjé ak bouè pròp kondanasion nou (1 Co 11,29).

Sin Justin di osijè Ofrann nan: "Moun ki viv alèz épi ki gin bòn volonté, yo bay san yo pa fòsé yo, chak moun jan-l vlé; sa yo ranmasé-a, yo poté-l bay moun k-ap dirijé-a, sé li minm ki okipé òfélin yo ak vèy yo ak moun ki nan bézouin poutèt maladi oubyin dèt rézon, ni moun ki nan prizon, ni étranjé ki nan vouayaj; nan yon mo, li édé tout moun ki nan bézouin". Konsa kominion nou fè nan Kò ak San Jézu-Kri-a, li prolonjé nan rélasyon nou ginyin ak tout manb Kò-l yo ki nan bézouin yo.

Sin Justin fini antan-l fè nou ouè poukisa sé jou Dimanch la yo fè gran rasanbléman sa-a. Li minm ki t-ap viv dépi nan premié tan légliz la (+ 165), li di: "Jou Solèy la, nou tout nou rasanblé ansanm, paské jou sa-a sé Premié Jou-a, koté Bondié té kréyé tè-a fè-l sot nan fè noua ak matiè san fòm nan, épi tou sé paské sé minm jou sa-a Jézu-Kri ki sovè nou-an té lévé sot nan pami mò yo. Lavèy jou Saturn nan, yo té klouré-l sou Koua, épi toua jou

après jou sa-a, sètadi Jou Solèy la, li fè Apot li yo ak patizan-l yo ouè-l, li aprann yo bagay sa yo nou sot transmèt nou-an". Sé Jou Kréasion-an, sé Jou Rézirèksion Granmèt la. Jou Dimanch la, sé pou nou respékté-l, sé pa jou pou n-ap fè gro travay. Sé pou-n al lamès. Tout bon dispozision sa yo, n-ap mandé Manman Mari pou-l mété yo nan kè nou, pou-l konsèvé yo nan nanm nou.

*

Sin Luk té kòmansé lévanjil li-a, antan-l déklaré li té chèche **témouin** ki té la dépi nan kòmansman (Lc 1,2). Li fini-l, antan-l montré kijan Jézu mandé Apot li yo sèvi-l **témouin** (Lc 24,28). Nan premié témouin ki té la dépi nan kòmansman yo, premié plas la sé pou la Trè Sint Vièj Mari, li minm Bondié té mandé konsantman-l pa lintèmediè Lanj Gabriyèl épi ki té réponn nan lafoua li sé Sèvant Granmèt la (Lc 1, 26-38). Nan kòmansman liv Travay Apot yo, Sin Luk ap montré nou la Trè Sint Vièj, premié Témouin-an, k-ap lapriyé ansanm avèk Apot yo, pou tann lèspri Sin-an k-apral fè yo sèvi Jézu témouin (Ac 1,14).

Témouagnaj nou doué suiv témouagnaj la Trè Sint Vièj. Li viv nan lafoua; l-ap maché kòm si l-ap gadé sa yo pa kapab ouè-a (He 11,27); sans évenman yo, sé nan lafoua li dékouvri yo; sé léson lafoua sa-a l-ap ba nou pou nou sèvi Jézu témouin. Li pa konprann lè-l pèdi Jézu pandan toua jou nan kay sakré-a, min li kinbé paròl li-a ak évenman yo nan kè-l, l-ap kalkilé-l (Lc 2,50.51). Sé Sign Jézu té vlé fè-l davans osijè tan ki t-apral pasé ant Vandrédi-Sin ak Dimanch Pak la (cf Jn 2,19; 20,17). Sé témouagnaj lafoua-l Apot yo ap gadé, tankou yon bousòl, pou yo kontinué rout yo; y-ap gadé-l tankou yon glas koté yo ouè pòtré Jézu. Pandan l-ap lapriyé avèk yo, ant Lasansion ak Lapankot (Ac 1, 13-14), Apot yo ap gadé-l byin gadé, tankou premié Témouin-an ki té okouran mèvèy sakré Jézu dépi lè Jézu té fèk pran nésans nan vant li-a.

Pap Jan-Pòl II di: "*Le premier noyau de ceux qui regardaient avec foi vers Jésus auteur du salut (cf Lumen Gentium 9) savait bien que Jésus était le Fils de Marie et qu'elle était sa Mère, et que, comme telle, elle était depuis le moment de la conception et de la naissance **un témoin unique du mystère de Jésus**, de ce mystère qui s'était dévoilé et confirmé sous leurs yeux par la Croix et la Résurrection. Dès le premier moment, l'Église regardait donc Marie à travers Jésus, comme elle regardait Jésus à travers Marie. Celle-ci fut pour l'Église d'alors et de toujours un **TÉMOIN UNIQUE** des années de l'enfance de Jésus et de sa vie cachée à Nazareth, alors **qu'elle***

conservait avec soin toutes ces choses, les méditant en son cœur" (Lc 2,19; cf Lc 2,51) (Redemptoris Mater 26, Vatican 1987, p. 56-57).

Pap la di tou: " *A l'aube de l'Église, au commencement du long cheminement dans la foi qui s'ouvrait par la Pentecôte à Jérusalem, Marie était avec tous ceux qui constituaient le germe du nouvel Israël. Elle était présente au milieu d'eux comme un témoin exceptionnel du mystère du Christ. Et l'Église était assidue dans la prière avec elle et, en même temps, **la contemplait dans la lumière du Verbe fait homme.** Et il en serait toujours ainsi. En effet, quand l'Église pénètre plus avant dans le mystère suprême de l'Incarnation, elle pense à la Mère du Christ avec une vénération et une piété profondes (cf Lumen Gentium 65). Marie appartient au mystère du Christ inséparablement, et elle appartient aussi au mystère de l'Église dès le commencement, dès le jour de sa naissance. A la base de ce que l'Église est depuis le commencement, de ce qu'elle doit constamment devenir de génération en génération au milieu de toutes les nations de la terre, se trouve celle qui a cru en l'accomplissement de ce qui lui a été dit de la part du Seigneur (Lc 1,45). Précisément cette foi de Marie, qui marque le commencement de l'Alliance nouvelle et éternelle de Dieu avec l'humanité en Jésus-Christ, **cette foi** héroïque **précède le témoignage** apostolique de l'Église et demeure au cœur de l'Église, cachée comme un héritage spécial de la révélation de Dieu. Tous ceux qui participent à cet héritage mystérieux de génération en génération, acceptant le témoignage apostolique de l'Église, **participent, en un sens, à la fois de Marie**". (Redemptoris Mater no. 27, p. 58-59).*

Avèk Apot yo, n-ap gadé la Trè Sint Vièj Mari kòm premié Témouin Jézu. N-ap pran modèl sou lafoua-l la nan pèlerinaj nou, pou lè yo gadé konpòtman nou, yo sonjé Jézu n-ap sèvi témouin-an.

Si gin koté yo pa résévoua témouagnaj nou (Ac 22,18), sé lokazion pou-n al sèvi-l témouin dèt koté (Ac 23,11). Légliz ap avansé, antan batiman-l nan ap balansé ant pèsékision tè-a ak konsolasion Bondié yo, jan Sint Ogustin di-a (De Civitate Dei XVIII, 51: CCL 48, 650; cf Redemptoris Mater No. 25, p. 52). Yon lè va rivé, tankou pou Sin Pòl a-Ròm, koté n-a sèvi Jézu témouin avèk **asirans**, san anyin pa jinnin nou (Ac 28,31). An-atandan, anyin pa doué troublé nou. Nou doué kinbé asirans léspri Sin-an ba nou davans la (Ac 4,31) antan nou sètin, malgré n-ap maché nan fènoua, n-ap rivé nan bout chémin koté Granmèt la voyé nou-an.

*

* *

TOUAZIÈM DIMANCH PAK C

Frèchè bò lanmè-a nan dévan-jou-a (Jn 21,1-19), sa raplé jou dimanch Pak, lè Jézu tè lèvé vivan-an, sé nan minm lè sa-a li vin-n parèt dévan patizan yo bò lanmè Tibériad la, vè toua, kat, sinkè dimatin, (cf Mt 14,25; Mc 6,48). Sé sèt patizan ki la (Jn 21,2). Simon Piè, ki toujou nan tèt kolòn nan; Toma, ki difisil pou kouè-a (Jn20,25); Natanaèl, ki té di: "ki sa-k kapab soti dé bon nan Nazarèt" la (Jn 1,46); dé pitit Zébédé yo, ki té mandé plas adouat ak agoch la (Mc 10,17).

Simon sé chèf. Sé li minm ki désidé al lapèch; sé métié-l lòt yo di y-apralé avèk li tou. Bondié pa pèmèt yo pran anyin nan nuit sa-a; Jézu té di san li minm yo pa-t kapab fè anyin (Jn 15,5); san li anyin pa-t fèt nan sa-k égzisté (Jn 1,3). Avèk Sèvitè Granmèt la, Apot yo ap kapab di yo té kouè yo t-ap travay pou granmési, sé pou van yo té gaspiyé fòs yo, époutan rékonpans yo té rézèvé kot Granmèt la (Is 49,4). Jézu toujou tann sitiasion-an fi-n dézéspéré anvan-l aji. Li tann pa gin divin ankò (Jn 2,3) li kité Laza fi-n mouri (Jn 11,6.13.21.32). Li aji lè sé sink ti pin ak dé ti pouason sèlman ki rété (Jn 6,9); sé lè sa-a li fè ouè sa-l yé.

Granmatin, li kanpé sou bò lanmè-a. Jous lè sa-a patizan yo pa rékonèt sé li minm (Jn 21,4). Dépi kòmansman lévanjil Sin Jan-an sé tout tan réfrin sa-a ap tounin: yo pa rékonèt Jézu (Jn 1, 26.31.35; 2,9; 5.13; 7.28-29; 8.19; 9,12.29; 14,5.9;16,18; 20, 9.14; 21,4). Li kinbé souf nou kout, jan Juif yo réproché-l la (Jn 10,24). Apré Rézirèksion-an minm Mari-Madlèn pran-l pou Jéran jadin-an (Jn 20,14), patizan Émayus yo konprann sé yon étranjé (Lc 24.16; Mc 26.12).

Késion Jézu pozé-a bay inpréssion sé moun ki abitué tann sou bò lanmè-a pou achté pouason (Jn 21,5). Répons Apot yo sèk: "Non" (ib). Fatig ak désépsion pa pèmèt yo angajé konvèsasion. Lè Jézu té konn avèk yo, yo pa-t konn manké anyin (Lc 22,35). Jézu palé ak yo tankou zanmi ak zanmi (Jn 15,14.15 Lc 12,4 Ex 33,11) li pa trété yo tankou sèvitè ki pa konnin sa Mèt li ap fè; li pa kontanté-l di sèlman voyé filè yo pou lapèch (Lc 5,4) oubyin "Plin ja yo dlo" (Jn 2,7) "Pran nan yo koulyé-a, poté bay chèf kanbiz la" (Jn 2,8) "Ba yo manjé nou minm!" (Lc 9, 13). Min li bay rézon-an; lè-l fi-n di "voyé filè-a a douat batiman-an" (Jn 21, 6a) li ajouté: "n-a jouinn" (Jn 21,6b), a tèl pouin gin moun ki di mirak sa-a, sé mirak légliz la.

Filè sa-a, sé légliz la. Pouason yo sé krétyin yo Piè ak Apot yo ap rasanblé nan légliz la. Rinmin-an rékonèt byin vit sa jé yo pa-t ko kapab ouè-a. Jan gin tan rékonèt sé Jézu; mirak la louvri jé-l (Jn 21,7). Simon Piè lagé kò-l tou suit nan dlo, lè Jan di-l sé Granmèt la (Jn 21,7). Li sèlman pran tan pasé yon rad nan tay li. Jan té rivé an premié nan kavo-a, min li té kité Simon Piè

antré anvan-l kòm Chèf légliz la, (Jn 20,3-4,). Jan rékonèt an prémié, min li kité Simon. Piè al rankontré Jézu anvan-l. Jézu té chouazi Jan avèk André an prémié, min sé Piè li té mété kòm Chèf, (Jan 1,42). Lòt Apot yo kontinuyé ak batiman-an, y-ap trinnin filè-a chajé ak kantité pouason (Jn 21,8). Jézu té déjà fè difé, li té déjà kuit pouason ak pin pou yo (Jn21,9), tankou nan dézè-a lanj la té bay profèt Éli manjé pin ki fèk kuit anba sann, épi li té ba-l bouè dlo nan yon krich. (1R 19,5-8). Jézu pran souin légliz li-a. Avèk Psòm nan, nou kapab di: "Granmèt la sé gadyin-m mouin pap manké anyin" (Psòm 23,1). Jézu fè y-al chèché nan pouason yo sot péché-a tou. Sé Simon ki pran ròl Chèf li, l-al chèché filè-a; li trinnin-l; yo konté 153 gro pouason; Jan rapòté ak présizyon sa-l konstaté ak jé-l kòm témouin. An minm tan li dékouvri sans mirak sa-a. Chif 153-a raplé kijan légliz gin tout kalité moun, li la pou tout moun, sèké nan tan lontan sé 153 éspès pouason yo té konnin. Sin Matié di lè yo fi-n péché, yo jouinn tout kalité bagay nan filè-a (Mt 13,47). Légliz la gin tout kalité moun, li gayé sou tout tè-a, sé pa afè yon ti group moun apa, yon katégori moun, yon ras moun, yon klas moun, sé kay tout moun. Nan "Crédo"-a, nou di: "li la pou tout moun", sé youn nan kat karaktè légliz la, jan nou déklaré nan "Crédo"-a: "Mouin kouè gin yon sèl légliz, li sin, li la pou tout moun, sé sou Apot yo li bati".

Filè-a pa chiré (Jn 21,11): Sé yon lòt nan kat karaktè légliz la: li youn, li pa séparé, li fè yon sèl, jan nou déklaré nan "Crédo"-a: "Mouin kouè gin yon sèl légliz, li Sin, li la pou tout moun, sé sou Apot yo li bati". Minm jan manto Jézu-a pa-t chiré, lè yo t-ap séparé rad li yo anba pié Koua-a (Jn 19,23), sé konsa tou filè-a pa chiré. Anvan Jézu té mouri lévé-a, nan kòmansman lavi misionè-l, té gin yon mirak lapèch (Lc 5,1-11); min, lè sa-a, té gin anpil filè (Lc 5,4.5.6), épi filè yo t-ap chiré (Lc 5.6). Jézu pa-t ko mouri-lévé pou-l rasanblé pitit Bondié ki té gayé yo (Jn 11,52;12,32,). Lè sa-a tou sé dé batiman ki té ginyin, pa Piè-a avèk pa asosié-l yo (Lc 5,7). Min apré Jézu fi-n lévé, sé yon sèl filè ki ginyin (Jn 21,6.8.11), épi li pa chiré (Jn 21,11), sé yon sèl batiman tou ki ginyin, pa Piè-a sèlman (Jn 21,3.6.8.11). Sa fè sonjé kijan ringn pèp Israèl la té séparé an dé sou tan Roboam, pitit Salomon-an, avèk Jéroboam, lènmi-l nan, lè Profèt Ahiyya té chiré manto-l la an douz pòsion-an, li té bay Jéroboam dis pòsion, li té kité yon sèl pòsion pou Roboam nan (1 R 11.26-40). Kouliè-a tout bagay vi-n fè yon sèl; légliz la fè yon sèl, yon sèl batiman, yon sèl filè ki pa chiré.

Apré tout sa Jézu fè-a, patizan yo vi-n rékonèt li atò (Jn 21,12). Dépi nan kòmansman lévanjil Sin Jan-an, késion sa-a rétonnin souvan: "Kilès ou yé"? Sé késion sa-a y-ap pozé Jézu sou tout fòm, pèsòn pa rékonèt li nan sa-l yé tout bon-an (Jn 1, 10. 38; 2,18; 4,10.29; 5,18; 6,42; 7,3-5.12.35-36; 8,25.53;

9,18; 10,24; 18,13; 19,9). Alafin lévanjil la sèlman yo rékonèt li (Jn 21,7.12); sé pousa yo pa ozé mandé-l "Kilès ou yè"? (Jn 21,12). Sè lè-l té fi-n séparé pin-an bay patizan Émayus yo yo té rékonèt li tou (Lc 24,31). Jézu parèt dévan Apot li yo, pou-l fè yo vi-n sèvi témouin li lévé vivan. Sé sou témouagnaj yo lòt moun yo ap apuiyé pou yo vi-n tounin patizan. L-ap di yo sa. N-ap sèvi-m témouin nan Jérusalèm, nan lajudé ak lasamari ak jous nan bout tè-a (Ac1,8). Sé yon lòt ankò nan kat karaktè légliz la: sé sou Apot yo li bati, jan nou déklaré nan "Crédo"-a: "Mouin kouè gin yon sèl légliz, li Sin, li la pou tout moun, sé sou Apot yo li bati". Nan pami Apot yo Sin Piè gin prémié plas. Jézu ap konsévé plas sa-a, antan-l rinmèt chaj la sou zépol li. Li mandé-l si-l rinmin-l plis pasé lòt yo (Jn 21,15). Simon té déjà di-l: "Tout moun té mèt trayi-ou, m-apral avèk ou jous nan lanmò" (cf Jn 13,27; Lc 22.33; Mc 14,27; Mt 26,33) Jézu raplé-l sa-k té pasé, pou fè-l réfè promès angajman-l. Pandan toua foua. Apré chak répons, Jézu rinmèt li kòmandman légliz li-a ankò pou montré-l sé pa sou péché l-ap gadé (Jn 21, 15.16.17).

Pliziè foua, lè Jézu vlé montré Piè féblès li, li rélé-l Simon (Jn 21,15; Lc 22,31; Mc 14,37; cf Mt 16,17; cf FEUILLET A., *L'Agonie de Gethsémani*, Paris, GABALDA, 1977, 17, n.1). Toua foua Jézu ap pozé Piè késion antan-l rélé-l Simon pou-l fè-l ouè si-l "Piè", sé pa nan li minm sa sòti, sé nan Granmèt la. Li présizé: "Simon, pitit Jan" (Jn 21,15 .16.17), minm jan ak lè-l t-ap rinmèt li pouvoua Sézaré-a, anvan-l té rélé-l Piè-a (Mt 16,17). Li té fè-l konprann déklarasion lafoua-l la, sé pa-t nan pròp fòs li, ni nan éritaj ras li sa té soti, min nan Papa-a ki nan sièl la. Li té di-l sé sou ròch "Piè" sa li t-ap bati légliz li-a (Mt 16,18). Min Piè té vi-n fébli. Jézu té avèti-l davans, épi lè sa-a sé "Simon" tou li té rélé-l: "Simon, Simon, min Satan té réklamé nou pou-l pasé nou nan pasoua tankou blé; min mouin lapriyé pou ou, pou lafoua-ou pa disparèt; sèlman ou minm, lè-ou tounin, ranfòsé lafoua frè-ou yo" (Lc 22,31-32). Nan nuit Jétsémani-an, lè Apot yo ap dòmi, sé ak Simon sèlman Jézu palé, pou-l fè-l répròch kòm onon tout lòt yo, épi lè sa-a li pa rélé-l "Piè", min li rélé-l "Simon"; sèké Piè, sé léspri-a ki cho-a, min Simon sé chè-a ki fèb la; li di-l: "Simon", ou-ap dòmi? ou pa-t gin fòs pou véyé inèd-tan" (Mc 14,37). Sé apré sa li palé ak tout Apot yo antan-l bay konsign pou véyé, pou lapriyé pou yo pa tonbé nan pièj la, paské léspri-a vif, min chè-a fèb (Mc 14, 38). konsa, pandan toua foua Jézu ap mandé Simon si-l rinmin-l, min sé sou touzièm foua-a Simon ap pran lapinn (Jn 21,17). Li pap pran lapinn kòm Simon, min l-ap pran lapinn kòm Piè, l-ap sonjé li pa-t fidèl nan ròl "Piè"-a li pa-t solid asé nan lafoua-l. Chak foua Jézu ap pozé-l késion, Jézu ap kòm désann yon machéskalié avèk li. Prémié foua-a li mandé-l si-l rinmin-l plis pasé lòt yo, antan-l sèvi avèk mo

"AGAPAS" ἀγαπᾷς (Jn 21,15), ki vlé di yon rinmin ki sipériè. Dézièm foua-a sé minm mo sa-a l-ap anlouayé toujou, min san-l pa fè konparézon avèk lòt yo, li pap mandé Simon si-l rinmin-l plis pasé lòt yo min sèlman si-l rinmin-l (Jn 21,16). Touazièm foua-a l-ap sèvi ak yon lòt mo ki vlé di rinmin tou, min ki pi ba pasé dé premiè foua yo, li pap di "AGAPAS" ἀγαπᾷς ankò tankou dé premiè foua yo (Jn 21,15.16), min la-p di Phileis φιλεῖς (Jn 21,17). Sé poua touazièm foua-a Piè pran lapinn nan. Sèké sé mo sa-a minm Piè té anlouayé dé premiè foua yo lè Jézu t-ap mandé-l si-l rinmin-l ak rinmin sipériè-a (AGAPAS ἀγαπᾷς Jn 21,15,16). Li minm li té kontanté-l réponn li rinmin-l ak sa-k pi ba-a (Philô φιλω Jn 21,15.16). Sé kòm si touazièm foua-a Jézu t-a sanblé mandé Piè: "minm sa-a ou prétann ou ginyin pou mouin-an (Phileis φιλεῖς Jn 31,17), èské ou ginyin-l tout bon vré"? Piè sonjé li té trayi-l, li té kriyé lè jé Jézu té kouazé ak jé pa-l, nan lakou kay prèt an chèf la (Lc 22,62). Li pran la pinn, li réponn ak minm mo sa toujou (Philô, φιλω Jn 21,17). Min l-ap chanjé mo li té anlouayé pou-l té di Jézu dé premiè foua yo li konnin li rinmin-l nan: dé premiè foua yo li té di 'OIDAS' οἶδας (Jn 21,15.16), ki vlé di konèsans sipériè; touazièm foua-a (Jn 21,17), lè-l fi-n di-l minm mo sa-a (OIDAS οἶδας) pou-l di Jézu konnin tout bagay la, li ajouté yon lòt mo ki vlé di konèsans ki fèt ak éspérians, li di: "ginôskeis" (γινώσκεις Jn 21,17), pou-l di-l: "ou konnin ak éspérians mouin rinmin-ou"; sa vlé di: "ou konnin sak té pasé, min ou konnin tou janm té kriyé".

Lè Piè pran lapinn nan (Jn 21,17: élupèthè ἐλπιήθη) sa fè sonjé lapinn Jézu té pran nan Jétsémani (Mt 26,37: lupeisthais λυπεῖσθαι), lè-l té di Piè ak dé lòt yo nanm li gin lapinn (Mt 26, 38: perilupos περίλυπος) yon pouin pou-l mouri, li té mandé yo pou yo rété la, pou yo véyé avèk li (ib). Sé minm lapinn sa-a ki vi-n anvayi Piè. Rinmin-an gin féblès li, min sa pa détrui-l. Si nou kinbé, sé yon favè Granmèt la fè nou, nou pa doué fè grandizè ak sa. Sin Pòl di nou pou nou fè atansion, nou minm ki kanpé-a, pou nou pa tonbé (1 Co 10,12; Ga 6,1). Jézu chouazi Piè, sé pa Jan li chouazi, pou kondui légliz li-a ak tout féblès Piè, ak tout tanpéraman-l, ak tout bon kalité-l, bòn volonté-l, min sa Piè fè ki bon, sé Granmèt la ki fè-l nan li. Lè-l pou kont li, sé sa-l pa vlé fè-a l-ap fè, dapré sa Sin Pòl di nou: "Byin-an dévan-m, mouin vlé fè-l, mouin pa kapab; mal la mouin pa vlé fè-a, sé li minm mouin fè, kilès ki t-a délivré-m sot anba kò lanmò sa-a"? (Rom 7,15). Min minm si nou pa fidèl, Granmèt la li minm toujou rét fidèl li pa kapab rénié pròp tèt li (2 Tm 2,13).

Konsa premié fousa Jézu té mandé Piè si Piè rinmin-l plis pasé lòt yo, yon fason dézintérésé, pou Jézu minm (AGAPAS ἀγαπᾷς Jn 21,15); mo latin-an minm di "diligis"), Piè réponn, li di kòm si sa pòv ginyin, sé li-l poté nan maché... bagay piti pa chich, sa-m ginyin-an sé li mouin ba ou; mouin pa gin sa ou mandé-m nan, gro rinmin dènié dégré-a, ki fè pou-m pa sonjé tèt mouin, pou sé pou ou sèl mouin rinmin ou nan, ou mandé-m si-m ginyin-l pou ou, mouin réponn ou an tou ka, mouin gin yon kalité rinmin ki pa sipériè pasé sa, min mouin ginyin-l kan minm pou ou, sé "Philô-a" (Jn 21,15 φιλω, sa lang latin-an di "amo"-a). Bagay piti pa chich. Dézièm fousa-a, sé minm bagay ankò ki répété; min Jézu pa mandé-l si-l rinmin plis pasé lòt yo; Jézu pozé minm mòd kèsion-an kan minm; Piè réponn sou lòt réjis ki pi ba-a toujou, tankou premié fousa-a: sé sa asé mouin rékonèt mouin ginyin, pran-l kan minm, ou-a fè-l vi-n pi ro, lè ou-a vlé (Jn 21,16). Min touazièm fousa-a, bagay la chanjé, Jézu chanjé mo; li pran mo Piè té di-a, li mété-l nan bouch pa-l, li pozé Piè kèsion, kòm si pou-l mandé Piè: Minm sa-ou prétann ou ginyin pou mouin-an, èské-ou ginyin-l vré pou mouin (PHILÉIS la φιλεῖς Jn 21,17, sa lang latin-an di "amas" la) ti rinmin sansib la, intérése-a. Lè sa-a Piè pran la pinn, li sonjé li té trayi. Dé premié fousa yo (Jn 21,15.16). li té di Jézu: ou konnin ("OIDAS" οἶδας) mouin rinmin-ou. Fousa sa-a li di ou konnin (OIDAS οἶδας) tout bagay, ou konnin ("ginokeis γινώσκετε) mouin rinmin-ou" (Jn 21,17). Sa vlé di: ou gin konésans Profèt (OIDAS οἶδας) pou tout bagay, min la-a sé konésans éspérians ou ("ginoskeis" γινώσκετε) pou-ou sondé, pa gadé-m ak lòt konésans la, mouin an défo pou li... Min Jézu fè minm jan Papa-a té fè pou ti gason-an ki té tounin vi-n jouinn li-a, apré-l té fi-n dépansé tout ti éritaj li-a nan mové konduit la, li abiyé-l byin bèl, li rinnèt li tout doua li té ginyin avan-l té pati-a, li mét bag nan douèt li, li mét sapat nan pié-l, li fè touyé bèl la yo t-ap angrésé pou sikonstans éstraòdinè-a (Lc 15, 11-32) Jézu rinnèt Piè tout chaj li té ginyin anvan-an (Jn 21,15.16.17); li dékaré-l sa toua fousa, pou-l montré sé yon désizion li pap tounin sou li. Sé kòm si li té vlé di: Bliyé sa. Sé toujou ou minm mouin chouazi. Li fè tankou Bondié té fè pou Jozué, prèt an chèf la (Za 3,1-9), ki té kanpé dévan tribinal li, pandan Satan t-ap akizé-l pou péché-l; rad li té sal, sign péché-a. Lanj Bondié-a sèvi-l avoka, li madichonnin Satan. Li di Jozué sé yon ti boua li ouété sot nan difé (Za 3,2). Bondié pasé lòd pou ouété rad sal yo sot sou Jozué, pou abiyé-l ak yon lòt rad prèt an chèf ki byin bèl, pou mété kouròn prèt an chèf sou tèt li (Za 3,4). Li déklaré-l li ouété péché-l la sot sou li (ib). Li rinnèt li gouvènman kominoté sakré-l la ankò (Za 3,6-7). Légliz la sin, malgré manb li sé péchè. Sa-a sé yon lòt nan kat karaktè légliz la, jan nou déklaré nan Krédo-a: "Mouin kouè gin yon sèl légliz, li sin, li la pou tout moun, sé sou Apot yo li bati. "Antan Bondié rinnèt Jozué pouvoua

prèt an chèf la, li fè-l lobsèvasion kan minm, pou-l maché nan chémin-l, pou-l obsèvé kòmandman-l (Za 3,7). Jézu palé yon fason an parabòl pou-l di Piè: pa bliyé sa-m té di-ou anvan-m té mouri-lévé-a, mouin té di-ou: Simon, Simon, Satan réklamé nou pou-l pasé nou nan pasoua tankou blé, mouin lapriyé pou ou, pou lafoua-ou pa fébli; ou minm lè-ou tounin, ranfòsé lafoua frè-ou yo (cf Lc 22,31).

Jézu kontinué, antan-l avèti Piè sou mòd jan l-ap mouri pou-l sèvi témouin; li di-l lè-l té jèn, sé li minm ki té konn maré senti-l, pou-l al koté-l té vlé; Lè l-ap vié, sé yon lòt k-ap pasé senti nan tay li pou-l minin-l koté-l pap vlé. Sé a-Ròm Piè mouri mati pou sèvi Jézu témouin ak lafoua-l; sé nan diréksion légliz Ròm nan tout lòt légliz yo gadé kòm sant yo, koté Pap la, Réprézantan Jézu Kri-a, instalé sou fotèy Piè-a: sé nan sans sa-a yo té konn ajouté nan kat karaktè yo: "légliz la romin ". Mimn si sé pa yon karaktè sa yé, sa invité nou gadé nan diréksion légliz Ròm nan, pou nou an-akò avèk Pap la, nan lign rôl Piè-a Ròch fondasion légliz la, jan Sint-Iréné di-a.

Jézu di Piè: "Suiv mouin" (Jn 21,19). Sé konsa premié kontak Jézu avèk Apot li yo té kòmansé sou minm bò lanmè Tibériad sa-a, li té di yo "suiv mouin" (Mc 1,17; Mt;4,19). Li raplé si yon moun vlé suiv li, sé pou-l rénonse pròp tèt li, pou-l pran koua-l, pou-l suiv li (Lc 9,23).

Premié léktu touazièm dimanch Pak C-a (Ac 5, 27-41) montré déjà ki mové trétman Piè ak Jan ak Apot yo komansé sibi, pou témouagnaj Jézu ki lèvé vivan-an. Patizan-an pa pi ro pasé Mèt li; si yo fè Mèt la pasé mizè, y-ap fè patizan pa-l yo pasé mizè tou (Jn 15,20). Sèlman Granmèt la toujou la pou-l délivré sèvitè-l yo (Psòm répons: Ps 29 = 30). Mouton-an yo té touyé-a, li résévoua tout kalité konsidération (Ap 5,11-14= dézièm léktu). Sé pou nou pasé anba anpil tray pou nou rivé nan péyi koté Bondié roua-a (Ac 14,22).

Légliz la pozé sou zépòl Piè, kòm Chèf li ak lòt Apot yo tou kòm kolòn li; sé nan sans sa-a yo di légliz la "Apostolique". Nan krédo-a nou di: "sé sou Apot yo li bati". Se pou sa pandan tou tan Pak la, chak jou sé liv travay Apot yo yo li, jous rivé nan lapankot. Chak jou tou yo li lévanjil Sin Jan-an, ki insisté anpil sou kèsion témouagnaj. Jan-Batis sèvi Jézu témouin (Jn 1,7. 19; 3,26; 5,33). Sa-k ékri nan lansyin Téstaman-an sèvi-l témouin (Jn 5,39). Aksion li fè yo sèvi-l témouin (Jn 5,36). Papa-a sèvi-l témouin (Jn 5 37). Apot yo gin pou yo sèvi-l témouin tou, pou lafoua kapab antré nan kè moun yo (Jn 15,27; cf Lc 24,48; Ac 2,32; 3,15; 4,33; 5,32; 13, 31; 22,15; Lc 1,2; Ac 1,22; 10,39; R 1, 1ss). Jou lapankot la léspri Sin-an ap témouagné nan mèvèy li fè yo. N-ap mandé Manman Mari pou-l louvri kè nou bay Léspri Sin-an, pou-l fè nou sèvi Jézu témouin, malgré tout péché nou yo; n-ap di

Jézu avèk Sin Piè: "ou konnin OIDAS" οἶδας tout bagay kòm Profèt; ou konnin (ginoskeis γινώσκεις) avèk ékspérians ou mouin rinmin ou (Philo φιλω) ak tout ti féblès mouin (Jn 21,17); koté-m pa kapab, ou-a korijé-l. Sin Pòl té mandé-ou toua fouda pou-ou ouété pikan-an nan kò-l (2 Co 12,8) ou té réponn li: favè-ou kont li, fòs ou déplouayé nan féblès (2 Co 12,9); sé féblès nou nou ofri-ou pou-ou pozé puisans ou sou li (2 Co 12, 9), pou pèsòn pa jouinn prêtèks pou-l vanté tèt li an fas Bondié (1 Co 1,29). Ou konn tout moun (Jn 2,24 "ginòsken", γινώσκειν 2,25 "éginòsken", ἐγίνωσκεν) atèl pouin Natanaèl mandé koté-ou gin tan konnin-l (Jn 1,48 "ginoskeis" γινώσκεις). Ou fè ékspérians moun nan tout bagay sof nan péché-a (He 4,15), min ou pran-l sou do-ou, pou-ou éfasé-l. Nou pa prétann konnin-ou (Jn 3,2 "OIDAMEN" οἶδαμεν). tankou Nikodèm, ki pa minm konnin (Jn 3,10 "ginòskeis" γινώσκεις) sa-k nan lansyin Téstaman-an [cf DE LA POTTERIE I., "*Oida*" et "*gignòskò*", *les deux modes de la connaissance dans le quatrième Évanjile*" Bible 40 (1959) 709-725]; min nou rékonèt nou sé péchè, jan nou di anvan nou kòmansé lamès la: sé konsa n-ap sèvi-ou témouin.

*

Légliz la pozé sou Simon Piè. Sé pa paské li sin plis pasé yon lòt; sé pa paské li savan plis pasé yon lòt; sé pa paské li intélijan plis pasé yon lòt. Sé paské Bondié desidé sa konsa.

Simon pa pi sin pasé yon lòt. Li minm minm li rékonèt sé nan péché l-ap viv, li di Jézu: "Ralé kò-ou sòt koté-m, paské sé nan péché m-ap viv", (Lc 5,8; cf Is 6,5; Ex 3,5-6; Jg 6,22; 13,22 1 R 19,13; Ex 33, 20; Gn 3,8). Jézu ba-l asirans malgré déklarasion sa-a li fè-a (Lc 5,10), li minm minm li doué pansé koulié-a atò li pap tonbé, l-ap rivé yon pouin l-ap di: "Tout moun mèt lagé-ou m-ap rété fèm avèk ou" (cf Lc 22,33; Jn 13,37; Mt 26,33; Mc 14, 29). Jézu avèti-l li ouè davans l-ap tonbé toua fouda anvan jou matin rivé (Mt 26,34; cf 26, 69-73; Mc 14,30; cf 14,66-72; Lc 22,34; cf 22,54-62; Jn 13,38; cf 18,15,27). Sé konsa Piè ékri résponsab légliz yo pou yo pa pran pòz parapò a moun y-ap dirijé yo (1 p. 5,3). Sé pa paské li té pi sin pasé yon lòt Jézu té chouazi-l, sé paské sé volonté Bondié.

Simon pa pi savan pasé yon lòt. Min sé li Bondié chouazi, paské sé volonté Bondié. Li pa-t gin plis sians pasé pèsòn. Chèf tribinal yo té rékonèt ni Piè, ni Jan pa-t pasé sou ban lékòl, yo pa-t gin ni instriksion, ni kilti (Ac 4,13), yo pa konn anyin malgré sa, yo té palé avèk sajès pou défann kòz Jézu-a. Chèf tribinal yo t-ap mandé koté yo jouinn sians sa-a. Sé sinn Simon Piè té konn voyé nan dlo (Jn 21,3; Mt 4,18). Jé-l té abitué foyé fon lanmè-a, pou-l

ouè si gin pouason, li pa-t abitué fouyé lèt labib ni okinn liv savan. Min sé li Jézu chouazi kòm chèf légliz la, paské sé volonté Bondié Papa ki gin tout pouvoua.

Simon pa pi intélijan pasé yon lòt. Sé tout tan l-ap palé trò vit, l-ap dépalé, épi Jézu blijé ap réprann li. Li pa konn sa pou-l di, lè li ouè Jézu chanjé fas épi Moyiz avèk Éli ap palé avè-l sou "sòti" ("EXODE" Lc 9,31 exodòn ἔξοδον) li gin pou-l fè Jérusalèm nan, pou-l al nan sièl la antan-l pasé nan lanmò-a ak Réziréksion-an. Simon Piè gin tan mandé-l pou-l kité yo bati, toua joupa, youn pou Jézu, youn pou Moyiz, youn pou Éli; li pa-t konn sa pou-l té di; min li palé kan minm (Lc 9,33). Li pa-t pi intélijan pasé yon lòt. Lè-l déklaré: "ki koté pou-n alé-a, sé ou minm ki gin paròl lavi ki pap janm fini-an" (Jn 6,69), sé pa ak fòs ponyèt li li té jouinn sa, sé léspri Sin-an ki té soufflé-l sa. Lè-l di Jézu: "Ou sé Kris la, pitit Bondé vivan-an" (Mt 16,16). Jézu fè-l konstaté sé pa ni chè-a ni san-an ki fè-l jouinn sa, sé Papa ki di-l sa pou-l di (Mt 16,17). Li pa-t pi intélijan pasé yon lòt. Apèn Jézu fi-n fè déklarasion sa-a, Jézu anonsé lanmò-l ak Réziréksion-l li minm li éséyé fè Jézu chanjé chémin. Jézu blijé fé-l rémak ki rèd, li di: "Pasé déyè-m, Satan, ou jinnin-m; pansé ou yo pa sot nan Bondié, min sé nan lèzòm yo sòti" (Mt 16,21,23). Li pa-t pi intélijan pasé yon lòt nan réaksion-l li voltijé sou dlo-a; min aprè sa, li régrèt; épi li kòmansé fonsé, Jézu blijé ralé-l monté (Mt 14,28-32). Li pa-t pi intélijan pasé yon lòt. Min sé li Bondié chouazi, paské sé volonté Bondié. Li pa-t pi intélijan pasé yon lòt; li ouè dispozision toual yo nan kavo-a, l-ap refléchi sou sans évenman-an, min li pa réyisi konprann (Lc 24,12 cf; Jn 20,6-7). Li pa-t pi intélijan pasé yon lòt, min sé li Bondié chouazi, paské sé volonté Papa-a. Li pa-t pi intélijan pasé pèsòn; sa sèlman Jézu mandé-l: Èské-l rinmin-l (Jn 21,15,16,17), sa sèlman Jézu mandé-l, sé pou-l aksépté suiv li; li pa konprann pouki sa Jézu kité Jan akoté; époutan Jan gin yon plas spésial nan kè Jézu (Jn 13,23; 19, 26; 20,2; 21,7,20). Jézu mandé-l li minm pou-l suiv li; li di-l pa okipé kozé Jan-an, sé afè ki gadé-l li minm minm (Jn 21,21). Simon Piè pa konprann, li blijé suiv. Li pa janm manjé anyin ki pa pròp, sa vlé di sa laloua-a défann Juif yo manjé. Li ouè yon nap k-ap désann sot nan sièl la ak tout kalité vié bèt ladan-l; yon voua di-l: "Piè, touyé, manjé" (Ac 10,13). Li di li pa janm manjé anyin ki pa pròp (Ac 10,14). Voua-a pasé lòd yon dézièm foua, li di: "sa Bondié fi-n pròpté, ou minm, pa déklaré li sal"(Ac 10,15). Sa répété toua foua (Ac 10,16). Piè pa konprann. Sé apré sèlman, li vi-n konprann sans vizion-an. Sé pou-l aksépté louvri pòt légliz la bay tout payin yo (Ac 11,1,17). Li pa-t pi intélijan pasé yon lòt; sé nan rédi li aksépté batizé Kònèy. Léspri Sin-an blijé désann sou Kònèy ak payin yo ki té avèk li yo, pou fòsé Piè batizé yo (Ac 10,1-48.)

Piè pa pi sin pasé pèsòn, li pa pi savan pasé pèsòn, li pa pi intèlijan pasé pèsòn. Min sé li minm Bondié chouazi pou dirijé légliz li-a, paské sé volonté Bondié. Li gin pou-l di "Oui, Granmèt, mouin aksépté, oui Granmèt, mouin rinmin-ou" Sint -Ogustin di: "yon foua ou rinmin, ou mèt fè sa-ou vlé", sa vlé di: Ou pa bézouin pè, ou pap pasé akoté chémin ki trasé pou ou-a. Sé tout tan Jézu ap mandé nou si nou rinmin-l. Si nou rinmin-l tout bon vré, sé pou nou aksépté responsabilité li konfié nou, paské sé pa nou minm k-ap aji, sé léspri Bondié-a k-ap aji nan nou (Mt 10,20), okontrè, mouins nou konprann nou kichòy, sé plis Jézu ap fè mèvèy avèk nou.

Yo té prezanté toua moun bay Sin Toma dakin, pou-l chouazi youn nan yo kòm résponsab yon kominoté, premié-a té gin répitasyon yon moun ki sin; dézièm nan té gin répitasyon yon moun ki savan; touazièm nan té gin répitasyon yon moun ki gin sajès. Sin Toma dakin di osijè premié-a: "Si-l sin sé pou-l lapriyè!" Li di osijè dézièm nan: "Si-l savan, sé pou-l bay lansègnman!" Li di osijè touazièm nan: "Si-l gin sajès, sé li minm ki pou dirijé kominoté-a!" (Cf Si 9,17; 10,1; Sg 9,9-12; 1 R 3,9).

Sajès Sin Piè, sé pa nan lézòm li sòti; sé nan Bondié minm (Mt 16,17), jan Sin Pòl déklaré Korintyin yo (1 Co 1,19-25). Sé pa sou pròp fòs nou nou konté; otréman oubyin n-ap dékourajé lè nou ouè nou pa kapab rivé fè sa yo mandé nou-an; oubyin n-ap tonbé nan lògèy lè nou vlé montré nou kapab kan minm, malgré nou ouè klè nou pa kapab. Sé pou nou krazé mòn lògèy yo, pou nou konblé bafon dékourajman yo (cf Is 40,4; Lc 3,5).

Sé pou Manman Mari aprann nou respékté désizyon Bondié aléga chèf kominoté yo ak chèf légliz li-a, pou nou pa trò présé pézé yo sou balans, triyé yo nan layo, pasé yo nan pasoua, jous nou kité ma-a sèlman, antan nou jété tout ji-a atè, afòs n-ap konparé yo ak dèt modèl nou drésé dévan jé nou (2 Tm 4,3), pou n-ap méziré tout défo yo, pou n-ap lonnin tout mank yo, pou n-ap égzaminé si yo sin, si yo savan, si yo intèlijan. Sèl bagay pou nou mandé: Èské yo gin SAJÈS?

*

Malgré té gin tout kantité pouason sa yo, filè-a pa-t chiré (Jn 21,11). Filè-a réprézanté légliz, ki fè yon sèl kò-d-fanmiy. Sé tankou manto Jézu-a, yo tiré osò sou li, pou yo pa chiré-l nan séparé ant sòlda yo (Jn 19,22-23). Té gin yon Profèt yo té rélé Ahiyya, sou tan roua Salomon. Li rivé bò Jérusalem, li akosté yon moun yo rélé Jérôboam, li pran pròp manto pa-l ki té sou li, ki té tou nèf; li chiré-l nan douz mòso; li bay Jérôboam dis mòso, li di sé yon sèl mòso k-ap rété pou Roboam, pitit Salomon-an (1 R 11,29ss). Douzièm mòso-a réprézanté pitit Lévi yo, yo pa gin pòsion nan Israël yo minm, pòsion yo ak éritaj yo sé Granmèt la (Nb 18,20; Dt 10,9; Ps 16,17; Si 45,20-

22; Lm 3,24). Sé dépi là sa-a péyi roua Salomon-an té vi-n chiré nan dé pòsion-an, youn nan nò yo rélé Israèl, lòt la nan sid yo rélé Juda. Sé Jézu ki vini pou-l fè tou lé dé fè yon sèl épi pou-l rasanblé tout sa-k té gayé (Ez 37,15-28; Jn 4,1-42; Lc 9,51-56; Jn 12,51-52; Ep 2,14). Manto-l la pa chiré, filè-a pa chiré. Légliz sé yon sèl kò-d-fanmiy.

Sin Piè gin mision pou-l véyé sou fanmiy sa-a, pou-l rété fè yon sèl, pou pa gin divizion ladan-l. Sin Pòl té fè moun Korint yo répròch, li té di yo: Mouin tandé gin divizion nan pami nou, yon pati di: Mouin pou Pòl, yon lòt minm di: Mouin pou Aplòs, yon lòt ap di: Mouin minm sé pou Séfas mouin yé, épi yon lòt pòsion ankò ap di: Mouin minm pou Kris la. Èské Jézu-Kri séparé? (1 Co 1,10-13).

Lè gin éléksion, toujou gin patizan intèl ak patizan intèl. Minm nan minm fanmiy nan konn gin divizion. Chak moun ap chèché koté chèf bann li yé. Nou pa gin chèf bann nan légliz la, sé Jézu-Kri ki sèl Chèf nou. Gin moun li mété kòm Réponsab nou nan légliz la: an tèt sé Pap la, apré sa nan divès pati koté légliz la instalé sé Évèk yo; yo gin Pè yo ak Diak yo ki asisté yo nan mision yo. Chak moun gin tanpéraman-l; sé ak tanpéraman-l l-ap dirijé. Sé pa yon rézon pou nou chèché ki tanpéraman ki alé avèk nou, pou nou chouazi chèf bann nou, tankou bann rara oubyin bann madigra k-ap batay youn kont lòt. Nan kozé légliz Jézu-Kri-a, pa gin sa. Sé yon sèl manto Jézu-Kri-a ki pa chiré, sé yon sèl filè-a ki pa chiré. Jézu mouri-lévé pou nou, li pa divizé, li yon sèl.

Légliz la rich nan divès kalité li ginyin nan manb li yo. Sé tankou yon kò ki gin anpil manb (1 Co 12,12; Rom 12,4). Chak manb gin ròl li. Sé nou tout ansanm ki fè youn. Pié-a pa kapab di li pa nan kò-a paské sé pa li minm ki min-an (1 Co 1,15). Zòrèy la pa kapab di li pa nan kò-a paské sé pa li minm ki jé-a (1Co 12,16). Jé-a pa kapab di li pa bézouin min-an (1Co 12,21). Tèt la pa kapab di li pa bézouin pié yo (ib). Sé antan nou tout ansanm nou fè yon sèl n-a kapab réyalizé travay Granmèt la konfié nou-an. Nou pa doué ap gadé youn sou lòt, ap di nou pa dakò ak intèl, nou pa bézouin sèvis li. Ti sa-l poté-a, sé pou nou pran-l kan minm. Youn poté yon ti ròch, yon lòt poté yon bokit dlo, yon lòt poté yon panyin lacho, yon lòt poté kèk fèy planch, yon lòt poté dé ou toua fèy tòl, yon lòt poté yon saché klou, sé yo tout ansanm ki bati kay la. Nou youn bézouin lòt. Sé nan gadé nan minm diréksion-an n-ap jouinn kijan youn konplété lòt. Diréksion sa-a sé Jézu-Kri li minm minm, sé nan li nou youn konplété lòt. Sé Jézu-Kri ki sèl Gid nou (Mt 23,10). Moun li mété sou tè-a pou kondui nou yo, sé témouin-l yo yé. Li bay Sin Piè pouvoua pou-l maré, pou-l lagé (Mt 16,19). Sin Piè té nié-l toua foua nan lakou kay prèt an chèf la. Sa pa anpéché Jézu rékòmansé ba-l pouvoua sa-a ankò, dapré sa lévanjil touazièm dimanch Pak C-a di-a. Nou pa gin pou nou

chèché yon chèf ki kòrèk nèt sou tè-a, pou nou suiv li; otréman nou pap janm déplasé. Sé nan lafoua pou nou maché kòm si nou ouè sa yo pa pakab ouè ak jé-a, jan Moyiz té fè-a (He 11,27). Aaron ak Miriam té kritiké Moyiz, Granmèt la pini Miriam antan-l fè-l vi-n plin ak lalèp, joutan li blijé rét sèt jou andéyò koté yo té pozé joupa yo; sé sèlman gras a lapriyè Moyiz li géri. Min pandan sèt jou sa yo, pèp la blijé tann li, anvan-l déplasé pou kontinué rout li nan savann nan (Nb 12, 1-16). Moun k-ap kritiké Réponsab légliz yo, yo fè légliz la pa kapab avansé nan kadans pou-l t-a déplasé-a. Pèp la té vlé chouazi yon lòt chèf pou-l tounin Éjip (Nb 14,4); Bondié pa pini-l pou sèt jou sèlman, tankou Miriam, li fè-l alé-vini nan savann nan pandan trantuit ané, an plis dézan li té déjà pasé ladan-l nan, anvan-l kite-l antré nan Tè li té promèt la (Nb 14,1-38). Koré, Datan ak Abiram minm drésé karéman kont Moyiz, yo pran plas li, yo réfizé obéyi, malgré lòd Moyiz pasé yo. Bondié pa kontanté-l pini yo pou sèt jou tankou Miriam, ni pou trantuitan tankou pèp la, min li fè tè-a louvri, li valé yo tou vivan (Nb 16,31-32), difé sot nan sièl la, li boulé sansinkant patizan yo-a (Nb 16,35); konsa Bondié éfasé yo sot nan pèp la yo té vlé dirijé nan mové chémin-an (Nb 16, 1-35). Moyiz minm nan tou lé toua ka sa yo, li kinbé konpòtman chèf li, antan li rabésé tèt li, li lapriyè, li pran désizion. Li rabésé tèt li (Nb 12,3) dévan ka Miriam nan (Nb 12, 1-16), li lapriyè (Nb 14,5.13-18) dévan ka pèp la (Nb 14,1-38), li pran désizion (Nb 16,4-12. 15-17.28-30) pou ka Koré, Datan ak Abiram nan lapriyè (Nb 16,1-35). Lè yo ataké-l, sé pou-l pran désizion (Nb 16,1-35).

N-ap mandé Manman Mari pou-l fè nou évité kritiké chèf légliz, abandoné chèf légliz, ataké chèf légliz, pou nou pa chiré filè légliz la ki plin tout kalité pouason-an, pou nou pa chiré rad Jézu-Kri-a ki fèt san koutu-a.

*

Piè: Mt 4,18; 8,14; 14,28.29; 15,15; 16,18.22.23; 17,1.4.24; 18,21; 19,27; 26,33.35.37.40.58.69.73.75; Mc 3,16; 5,37; 8,29.32.33; 9,2.5; 10,28; 11,21; 13,3; 14,29.33.37.54.66.67.70.72; 16,7; Lc 6,14; 8,45.51; 9,20.28.32.33; 12,41; 18,28; 22,8.34.54.55.58.59.61.a.b; 24,12; Jn 1,42.44; 13,3.37; 18,11.16a.b.17.18.26.27; 20,3.4; 21,4.17.19.20.21.23; Ac 1,13.15; 2,14.37.38; 3,1.3.4.6.11.12; 4,8.13.19; 5,3.8.9.15.29; 8,14.17.20; 9,32.34.39. 40a.b.41.43; 10,5.9.13.14.17.18.19.21.23.25.26.32.34.44.45.46; 11,2.4.7.13; 12,3.5. 6.7.9.11.14.16.18; 15,7; Ga 2,7.8; 1P 1; 2P 1,1.

Simon: Mt 4,18; 10,2; 16,17; 17,25; Mc 1,16.29.30.36; 3,16; 14,37; Lc 4,38.a.b; 5,3.4.5.10a.b; 6,14; 22,31; 24,34; Jn 1,41.42; 21,15.16.17; Ac 10,5.18.32; 11,13; (15,14).

Simon-Piè: Mt 16,16; Lc 5,8; Jn 1,40; 6,8.68; 13,6.9.24.36; 18,10.15.25;
20,2.6; 21,2.3.7.11.15.

*

* *

KATRIYÈM DIMANCH PAK A

Prémié priyè katriyèm dimanch Pak la mandé pou Bondié gidé nou jous nou rivé nan sièl la pou nou gin kè kontan nèt, tankou bann mouton-an ki rivé koté Gadyin-l nan fi-n antré, antan-l ranpòté laviktoua-a, malgré féblès bann mouton-an. Dènié priyè-a palé ak Bondié kòm Gadyin ki gin bon kè, li mandé-l pou-l voyé jé sou pitit li yo avèk kè sansib li, yo minm li sovè gras a san Pitit li-a, pou-l fè yo jouinn yon plas nan péyi sièl la koté li Roua-a. Kantik kominion-an di Jézu lévé byin vivan, li minm vré Gadyin-an, ki bay lavi-l pou bann mouton-l yo, li minm ki chouazi pou-l mouri pou-l té kapab sovè nou. Dimanch sa-a, sé dimanch Bon Gadyin mouton yo. Li konsakré kòm jounin koté yo lapriyè yon fason spésial pou vokasion yo.

Jézu sé Pòt la, jan lévanjil katriyèm dimanch Pak A-a di-a (Jn 10, 1-12). Sé lévanjil sa-a yo té li lè yo t-ap louvri Pòt Sint lan nan Bazilik Vatikan-an pou Ané Jibilé Rédanmsion-an, 25 mas 1983. Pòt Sint la fèmin pou Pak 22 avril 1984, nan finisman Jibilé Rédanmsion-an; min Pòt Jézu déklaré li minm minm li yé-a, li toujou rét louvri.

Jézu sé Pòt mouton yo (Jn 10, 7.9), minm jan li sé Pin vivan-an ki désann sot nan sièl la (Jn 6,35), minm jan li sé Limiè tè-a (Jn 8,12; 9,5; cf 1,9), minm jan li sé Chémin-an, lavérité-a ak lavi-a (Jn 15,6). Nan lévanjil Sin Jan-an yo li pandan tan Pak la, Jézu di souvan li sé tèl bagay: limiè, rout, pin, vérité, lavi, pòt, pié rézin; sé yon fason pou-l fè konnin li gin minm natu avèk Bondié Papa-a, épi li sé Sajès la. Sajès kòmansé déklaré sa-l yé épi apré sa, li invité vi-n jouinn li (cf Pr 8,22-31.32-9,6; Si 24,1-17.18-22; Mt 11,25-27.28-30). Sé konsa Jézu kòmansé déklaré tit li, épi apré sa, li invité vi-n jouinn li kòm Sajès, Pitit Bondié. Lè Moyiz té mandé Bondié non-l, Bondié té déklaré-l: "Je suis Celui qui suis" (Ex 3,14), épi Bondié té di-l: "Je suis" (ib). Lè Juif yo ap késioné Jézu pou mandé-l non-l, Jézu rivé yon pouin li di yo karéman: "Lè n-a isé Pitit moun nan anlè, n-a konnin "Je suis"" (Jn 8,28). Li té déklaré yo: "Si nou pa kouè mouin "Je suis", n-ap mouri nan péché nou" (Jn 8,24). L-ap di yo alafin konvèsasion-an: "Anvan Abraam té kòmansé égzisté, mouin "Je suis" (Jn 8,58). Konsa lè solda yo vi-n arété-l nan jadin Jétsémani-an, li déklaré yo: "Je suis" (egô eimi 'Εγώ εἶμι Jn 18,5), yo tout tonbé sou do la minm (Jn 18,6), akoz fòs pouvoua non Bondié-a ki anlè tout non-an (Ph 2,9).

Jézu sé Pòt la, koté pou nou pasé pou nou antré nan sièl la, antan li gin minm natu avèk Bondié Papa-a. An minm tan, Jézu sé rout la tou. Sa vlé di dépi nou mété nou sou rout la, nou déjà rivé nan papòt la. Min nou pa douè kouè trò vit nou déjà fi-n rivé; paské nou mèt nan pòt la, nou toujou sou

rout; Jézu alafoua pòt la ak rout la. Lè Apot yo té vlé pran-l nan batiman-an, apré mirak pin yo nan dézè-a, nan mitan nannuit la, antan yo té nan mitan lanmè-a, sé la minm yo konstaté batiman-an gin tan rivé nan larad (Jn 6,21). Jézu sé Pòt la, an minm tan li sé Rout la. Yon foua nou mét Jézu nan lavi nou, nou pa bézouin ap mandé tout tan kilè n-ap rivé. Sou tout rout la li avèk nou; paradi-a rivé anndan fon kè nou. Jézu li minm pasé nan pòt la. Pòt sa-a sé volonté Papa-a, ti pòt ki jinnin-an (Mt 7,10), atèl pouin nan jadin Jétsémani-an, li di Papa-a: "si kalis sa-a té kapab pasé san pou-m pa bouè li, min sé pou volonté-ou fèt" (Mt 26,39). Li pasé nan pòt ki séré-a, nan chémin ki jinnin-an; koté-l pasé-a, sé la tou pou bann mouton yo pasé (Jn 10,3). Sé chémin Koua-a, li travèsé lanmò pou-l rivé nan lavi ki pap janm fini an, sé tras sa-a li invité patizan-l yo suiv (Lc 9,23): moun ki vlé vi-n apré-l, sé pou-l pran koua-l chak jou, pou-l suiv li.

Lè Bondié rélé yon moun pou-l antré nan sèvis li yon fason spésial, tankou Abraam konsa, li kòmansé mandé-l pou-l pasé nan pòt ki jinnin-an, antan-l rénonse pròp tèt li, pou-l kite moun lakay li (Gn 12,1). Konsa Jézu mandé jènm rich la pou-l vann sa-l ginyin, pou-l bay pòv (Mt 19,21), pou-l vi-n pòv tankou-l, san-l pa gin koté pou pozé tèt li (Lc 9,58). Lè Bondié fi-n bay Abraam pitit li té promèt li-a, li mandé-l pou-l sakrifé-l ba li (Gn 22,2). Sé nan sans sa-a Sint Ogustin di Bondié pou-l ba-l sa-l vlé mandé-l la, épi apré sa l-a mandé-l sa-l vlé-a. ("Da quod jubes, et jube quod vis"). Lè Bondié fi-n fè Abraam antré nan péyi li té promèt li-a, li mandé-l pou-l kite-l pou-l al nan Éjip (Gn 12,10); apré sa, li fè-l tounin. Moun ki vlé suiv Jézu, sé pou yo débarasé ak tou sa k-ap ralanti démach yo, nan sans byin, rélasyon indépendans.

Lè Sin Monfò té konn sou rout, prémié bagay li té konn fè, sé vidé pòch li, bay tout lajan ak tout asirans li té konn ginyin. Li té déjà fè jès sa-a dépi lè-l té fèk kite lakay papa-l pou-l al nan séminè; prémié pòv li té rankontré-a, li té ba-l tout lajan-l; dézièm pòv la, li té troké rad pa-l avèk ranyon-l yo; épi li té fè vé pou-l pa-t janm posédé anyin sou tè-a. Nan téstaman-l, li té ékri: "Mouin pa gin okinn lajan pou pròp tèt pa-m" (Œuvres complètes, p. 831: "Je n'ai point d'argent à moi en particulier").

Jézu rélé chak moun dapré karaktè-l, préokipasion-l, fòmasyon-l, degré profondè li rivé nan lavi krétyin-an. Chak moun gin istoua spésial vokasion-l, ki pa sanblé ak vokasion okinn lòt moun. Pa gin dé Sin ki sanblé minm nan mouatié, paské pa gin dé nanm ki sanblé minm nan mouatié, dapré sa Sin Jan-d-la-Koua di. Lévanjil katriyèm dimanch Pak A-a di: Bon Gadyin-an rélé chak mouton-l yo youn pa youn, yo chak dapré non yo (Jn 10,3: "kat'

onoma" κατ' ὄνομα) Pa gin dé ki gin minm non. Ant lévanjil la ak lavi Sin yo gin minm diférans ant mizik ki ékri sou papié ak minm mizik la y-ap chanté-a. Sé minm lévanjil la, min aplikasion-an chanjé dapré chak nanm li rankontré, sé minm mizik la, min gin divès fason pou yo égzékité-l. Youn pa kapab kopié sou lòt. Lè nou pran modèl sou yon Sin, sé pa kopié nou kopié-l; sé gadé nou gadé kijan li minm li réalizé sa-k nan lévanjil la, dapré Téstaman Jézu Granmèt la. Minm Jézu, nou pa kapab kopié-l, ni dékalké-l; nou koulé nou nan kè la Trè Sint Vièj Mari, tankou nan yon mouk k-ap fè nou sanblé ak Pitit li-a Jézu-Kri nou chak dapré aspè spésial Jézu Granmèt la vlé nou réalizé-a, pou richès Kò légliz li-a (Ep 4,7-13; Rom 12,3,6; 1 Co 12,8-10.28-30).

Gin divès vokasyon; gin moun Bondié rélé yon fason spésial pou yo dévoué tèt yo pou sèvis légliz li-a antan li mandé yo pou yo vi-n prèt, pou yo dévoué tèt yo pou bann mouton yo. Profèt Ézékièl fè mové gadyin yo répròch, li di yo pa okipé bann mouton yo, yo kité yo san manjé, san souin, yo kité yo nan solèy, yo pa chanjé yo koté yo maré-a, okontrè yo manjé viann yo, yo bouè lèt yo, yo abiyé ak linn yo, yo pa voyé jé sou yo, yo kité lou dévoré yo, épi yo minm minm yo sovè kò yo (Ez 34,1-6). Psòm-répons katriyèm dimanch Pak A-a fè louanj pou Bondié, ki vré Gadyin-an, k-ap kondui bann mouton-l yo nan bon zèb frè, bò sous dlo, pou ba yo manjé, pou ba yo bouè, pou fè yo répozé (Ps 23 = 22).

Jézu di Sin Piè toua fous pou-l okipé bann mouton-l yo (Jn 21,15.16.17), li rinmèt li pouvoua sa-a sou légliz li-a, pou-l korijé déklarasyon Piè té fè nan lakou prèt an chèf la (Mt 26,69-75; Mc 14,60-72; Lc 22,54-62; Jn 18,15-27). Sé pa paské nou san défo Bondié chouazi nou, sé pou-l kapab fè nou vi-n bon nan sèvis li. Li konnin sé pousiè nou yé (Ps 103,14), li konnin kijan nou fèb, nou frajil, tankou ti flè ki fèk parèt nan dévan-jou (Ps 103,15); malgré sa, li chouazi nou kan minm; Granmèt la di Sin Pòl: "Favè-m kont ou; paské fòs mouin, sé nan féblès mouin déplouayé-l" (2 Co 12,9); sé pousa Sin Pòl di lè-l fèb sé atò li pi fò (2 Co 12,10).

Vokasyon yo anpil min sé pou minm travay la yo sèvi. Jézu chouazi Sin Piè pou Krétyin ki sòti nan ras Juif yo sitou, li chouazi Sin Pòl pou sa-k sòti nan ras payin yo sitou (Ga 2,9); min ni Sin Piè ni Sin Pòl yo okipé ni Juif ni Grèk, pandan yo panché plis youn yon bò, lòt la lòt bò-a.

Sa lakoz anpil fous gin difikilté, paské, dapré koté n-ap sèvi témouin-an, nou blijé insisté plis sou tèl aspè pasé sou tèl lòt, antan nou adapté mèsaj la dapré préokipasyon tèl oubyin tèl koté, pou nou fè tout moun vi-n jouinn Granmèt la. Sé nan Granmèt la sèl pou nou jouinn dènié répons la, sé pa

nan yon pakèt diskision sou métòd travay. Sé pou Manman Mari aprann nou respékté aktivité léspri Sin-an, pou nou aksépté diférans youn prezanté parapò a yon lòt, nan minm travay apostola-a Jézu konfié nou chak la.

*

Nan lévanjil katriyèm dimanch Pak A-a, Jézu di: li sé Pòt la, koté mouton yo antré-sòti nan pak la. Pòt la pa pèmèt mouton yo pasé dé a la foua. Sé youn apré lòt yo pasé. Sé pou sa li rélé chak mouton dapré non-l (Jn 10,3: "kat'onoma" *κατ' ὄνομα*). Konsa pa gin dé vokasyon ki sanblé, minm nan mouatié, paské pa gin dé nanm ki sanblé minm nan mouatié, dapré sa Sin Jan-d-la Koua di. Chak moun gin yon fason spésial pou-l antré nan sèvis Granmèt la.

An 1987, pou dimanch vokasyon yo, ki té tonbé 10 mé, Pap Jan-Pòl II té voyé yon lèt, jan-l konn fè chak ané-a. Sa té fè 24èm ané dépi yo té konsakré katriyèm dimanch Pak la kòm dimanch vokasyon: Dimanch Bon Gadyin-an. Pap la té mandé pou lapriyé yon fason spésial pou moun Bondié rélé kòm Prèt, Diak, Misionè, Rélijyé, Rélijéz. Li té fè sonjé Sinòd ki t-apral fèt nan moua oktòb 1987 la sou Vokasyon ak mision layik yo nan légliz la ak sou tè-a vintan apré Konsil Vatikan II-a. Li té indiké yo angajman yo ak rèsponsabilité yo.

Nan premié pati Lèt la, li té di yo pou yo té konsidéré kijan Bondié rélé yo (1 Co 1,26). Sa té fè sonjé sa Sin Pòl di Éfézyin yo (Ep 4,11-12), kijan vokasyon sé yon "kado", yon favè, yon gras Jézu bay pou divès sèvis légliz la: Apot, Profèt, Évanjélis, Gadyin, Savan sakré, sé yon fason l-ap òganizé légliz la pou-l bati Kò Kris la. Li té di: Bondié rélé chak moun yon fason nan légliz la. Sé pou chak moun konsidéré vokasyon pa-l, pou-l sansib sou vokasyon lòt yo, pou-l ouè kijan youn konplété lòt, yo tout ap gadé nan diréksyon minm mision-an.

Nan dézièm pati Lèt la, Pap la té di: Kris la méziré kado-l yo (Ep 4,7). Li té raplé mision fanmiy krétyin yo nan légliz la ak nan sosiété-a; li té di: yo gin premié plas, paské sé nan fanmiy yo vokasyon Prèt ak Rélijyé yo yo jèmin, yo pousé; fanmiy krétyin yo sé "premié séminè". Li té mandé pou fanmiy yo pèmèt vokasyon yo louvri, dévlopé (cf: Optatam totius, 2). Sé premié sèvis paran yo doué fè pou pitit yo: édé yo dékouvri vokasyon yo, pou yo viv li (Gadium et Spes 52: Familiaris consortio, 53). Li té di: si Bondié rélé yon ti moun nan fanmiy nan, sé yon gran konsidérasion li ginyin pou fanmiy sa-a; vokasyon-an sé yon kado fanmiy nan fè bay Bondié, min sé yon kado tou

Bondié fè bay fanmiy nan. Moun ki gin rèsponsabilité nan édikasyon jèn yo, légliz ap tann anpil nan min yo tou, sitou moun ki abitué bay léson katéchis yo. Pap la raplé sa-l té di nan dokiman sou lanségnman katéchis la ("Catechesi tradendae", 39). Li di: anpil vokasyon pran nésans gras a yon lanségnman katéchis ki byin fèt, lè ti moun nan piti ak lè l-ap grandi. Li di: "Touchant les vocations à la vie sacerdotale et religieuse, il ne fait pas de doute qu'un grand nombre d'entre elles sont écloses à la faveur d'une catéchèse bien faite au cours de l'enfance et de l'adolescence". Li té di tou: profèsè lékòl yo gin yon gran ròl tou nan kèsion vokasyon, sitou nan lékòl katolik yo. Li di: "L'école catholique doit constituer une communauté éducatrice capable de proposer non seulement un projet de vie humaine et chrétienne, mais aussi les valeurs de la vie consacrée". Li té fè sonjé rèsponsabilité mouvman aksion katolik yo tou nan kèsion vokasyon-an. Li di: nan mézi yo pran intèrè tout légliz la, y-ap dévlopé pi plis, y-ap jouinn anpil vokasyon k-ap fléri, k-ap grandi nan mitan yo, sa ap tankou yon sign ki klè ki montré yo gin lavi, kijan yo gin angajman krétyin ki solid. Min tou Pap la té fè rémaké kijan yon kominoté ki pa bay vokasyon, sé yon kominoté ki pòv.

Nan touazièm pati Lèt la Pap la té mandé pou lapriyè pou vokasyon yo (Mt 9,38; Lc 10,2). Sé nou tout ki doué lapriyè pou vokasyon yo. Avni vokasyon yo nan min Bondié, min li nan min nou tou. Lapriyè-a sé fòs nou. Pap la té fini antan-l té konfié nou fòm lapriyè li té fè spésyalman nan ané 1987 la pou vokasyon yo. Li di: "N-ap lapriyè Granmèt la ki délivré nou-an konsa: Granmèt Jézu, minm jan yon jou ou té rélé premié patizan yo pou-ou fè yo al lapèch lézòm, konsa tou kontinué fè nou tandé bèl invasiyon-ou nan jodi-a toujou: "Vini, suiv mouin". Fè jèn-jan yo ak jèn-fi yo réponn voua-ou byin vit! Soutni Évèk yo, Prèt yo ak moun ki konsakré ba ou yo nan fatig yo rankontré kòm apot. Fè séminaris nou yo pèsévéré, ni tout moun k-ap viv nan yon diréksion lavi ki konsakré nèt nan sèvis ou. Révéyé angajman misionè-a nan kominoté nou yo. Voyé travayè pou-ou ranmasé frui jadin-ou nan Granmèt, pa pèmèt ras lézòm pèdi poutèt yo pa jouinn gadyin, misionè, ak moun ki konsakré pou kòz lévanjil la. Mari, Manman légliz la, modèl tout vokasyon, édé nou réponn Granmèt la "oui", li minm ki rélé nou pou nou bay konkou nou nan plan délivrans la, Amèn". Pap la té mandé pou Bondié béni nou byin béni, ni Évèk yo, ni Prèt yo, ni Rélijiié yo, ni Rélijiièz yo, ni tout Fidèl yo, épi li té ba nou Bénédiksion apostolik li. Sé 11 févriyé 1987 Pap la té signin Lèt la, nan fèt Nòtré-Dam de Loud.

N-ap sonjé jèn yo yon fason spésial nan lapriyè nou, sitou chak soua lè n-ap fè lapriyè anvan nou dòmi, lè n-ap fè moua-d-Mari, lè n-ap fè moua Rozè ak

lòt kalité rasanbléman lapriyè, n-ap mandé Manman Mari pou-l voyé jé sou yo tankou Manman k-ap édé pitit li maché, pou yo suiv Bon Gadyin-an, sou tout chémin k-ap kondui nan **pèlérinaj lafoua-a**, koté li minm li té pran dévan-an, koté li kontinué ap akonpagné nou-an, antan li nan mitan légliz la k-ap maché-a (cf Redemptoris Mater, n. 25ss). N-ap kalkilé kijan Sin Piè di nou nan Prémie Lèt li-a (1 p. 2,25 = dézièm Léktu katriyèm dimanch Pak A): nou té pèdi rout, koulié-a nou tounin vi-n jouinn Gadyin-an k-ap véyé sou nou-an. N-ap mandé Manman Mari pou-l voyé bon gadyin pou fè anpil mouton tounin nan Pak la. Vré Gadyin-an, sé Granmèt la, jan Psòm-répons la di-a (Ps 22 = Ps 23); Granmèt la sé Gadyin-m, mouin pap manké anyin. Sé pousa moun Bondié rélé nan sèvis li, yo pa doué pè lè yo méziré féblès yo parapò a fòs chaj la yo gin pou yo poté-a. Psòm nan di: "Lagé chaj ou sou kont Granmèt la, sé li minm k-ap soutni-ou" (Ps 55,23; 37,5; 34,19; 1 p. 5,7). N-ap voyé jé sou séri vokasion nou rankontré nan labib la, ki kapab sèvi nou tankou yon tablo vivan, avèk: Abraam (Gn 12,1-9), Moyiz (Ex 3,1-4,14), Jédéon (Jg 6,11-24), Samuèl (1 Sm 3,1-21), David (1 Sm 16,1-13), Élizé (1 R 19,19-21), Amòs (Am 7,14-15), Izayi (Is 6,1-8), Jérémi (Jer 1,4-10) Ézékièl (Ez 1,1-3,21), Sèvitè Granmèt la (Is 49,1-6), la Trè Sint Vièj Mari (Lc 1,26-38), Jan-Batis (Lc 1,5-25), Piè ak prémié Apot yo (Mt 4, 18-22; Mc 1, 16-20; Lc 5, 1-11; Jn 1, 35-51) ak Matié 9, 9; Mc 2, 13-14) ak Douz yo (Mt 10,1-16; Mc 3,13-19; Lc 6,12-16), Nikodèm (Jn 3, 1-21), Matias (Ac 1,15-26), Banabé (Ac 4,36-37), Pòl (Ac 9,1-19; 22,5-16; 26,9-18) [Cf Flanbo p.108]. N-a réfléchi sou mèsaj Pap la ékri apré Sinòd sou "Vokasion ak Mision Layik yo nan légliz la ak sou tè-a" (Christifideles Laïci, 30 octobre 1988, osijè travayè jadin rézin-an Granmèt la rélé nan divès moman lajounin-an (Mt 20, 1-16). Li rélé moun li vlé, lè-l vlé, jan-l vlé, pou sa-l vlé.

*

* *

KATRIYÈM DIMANCH PAK B

Yon lè, Jézu t-ap préché, li rivé nan yon dézè; anpil moun t-ap suiv li dépi matin jous asouè; yo té tèlman anvi kouté lansègnman-l, yo té bliyé manjé (Mc 6,33). Jézu pran pitié pou yo; li ouè yo sanblé ak mouton ki pa gin moun pou okipé yo. Li fè Apot li yo patajé préokipasion-l; li di yo: "Ba yo manjé nou minm" (Mc 6,37; cf Nb 11,12). Yo pa konnin ki koté pou yo jouinn manjé sa-a. Jézu bézouin lafoua yo, pou-l aji, minm jan li di Piè: "Avansé nan gran dlo, voyé filè yo pou lapèch" (Lc 5,4; cf Jn 21,6); apré sa li di-l: "Sé lapèch moun ou-apralé" (Lc 5,10; cf Jn 21, 15-17).

Si Jézu fè Apot yo bay moun yo manjé, sé paské li vlé fè yo antré nan sèvis bon gadyin-an. Bon gadyin-an gin pou-l okipé mouton-l yo. Apot yo gin pou yo nourri pèp la ak lansègnman Jézu-Kri ak sakréman Kò ak San-l, pou yo souin-l, pou yo kondui-l. Tout mizè pèp la, yo doué santi-l jous nan zantray yo. Profèt Ézékièl avèti gadyin yo pou yo souin mouton yo, pansé sa-k malad, soutni sa-k fèb (Ez 34,1-31). Profèt Izayi montré nou Granmèt la k-ap antré nan péyi-a avèk pèp li-a, tankou yon gadyin avèk mouton-l yo (Is 40,11; Jer 23, 1-6; Mt 18, 12-14). Li mété délikatès pou okipé mouton-l yo. Si Bondié chouazi anpil réponsab mision nan pami gadyin mouton, tankou Abraam (Gn 13,3; 12,1), Moyiz (Ex 3,1), David (1 Sm 16,11), Amòs (Am 7,16), épi tou pré nou: Ja-n Dak, Bènadèt, Lusi, Jasint, Fransoua, sé pou raplé nou: mision li ba nou-an, sé pròp mision Pitit li-a: nourri bann mouton-l yo, souin yo, kondui yo. Sé dènié konvèsasyon Jézu avèk Piè: "Okipé bann mouton-m yo" (Jn 21,15.16.17). Sa vlé di: ba yo manjé, souin yo, kondui yo.

Ba yo manjé: si Granmèt la konfié nou bann mouton-l yo, nou doué aksépté vi-n ésklav yo, pou nou ba yo manjé lansègnman Granmèt la tout tan avèk Kò ak San Granmèt la. Paròl Granmèt la sé vré manjé-a k-ap nourri yo tout tan-an. Lansègnman-an, sé premié dévoua yon bon gadyin (Christus Dominus 12); sé sa Granmèt la di Apot li yo, lè l-ap voyé yo an mision: "Alé anségné tout nasion, batizé yo, aprann yo fè sa-m kòmandé nou" (Mt 28,19). Souin yo: Gin mouton ki malad; Granmèt la di: sa yo, yo doué gin premié plas nan kè nou; sé pa moun ki an santé ki bézouin doktè, sé sa-k malad (Mc 2,17); yo voyé-l pou-l al chèché mouton ki pèdi nan pèp li-a (Mt 10,6). Li kité katrévindisnèf sa-k nan pak la, l-al chèché sa-k pèdi-a. Yon bon gadyin doué san souf pou chèché mouton ki pèdi yo, moun ki nan péché dépi lontan yo; li doué aksépté kitè sa-k fasil pou okipé yo, pou-l al dèyè sa-k pèdi nan rajé-a. Sa mandé pou-l gin anpil atansyon, anpil délikatès, anpil bon kè, anpil pasians tankou Granmèt la (Ps 103,13s). Kondui yo: pa kitè

yo kouché tout tan minm koté-a; fè yo déplasé, fè yo fè progrè, fè yo maché, otréman zèb la koté yo kouché-a ap manké, y-ap mouri grangou. Pou nou kapab fè yo manjé, fò nou kondui yo sot nan yon plas al nan yon lòt; fò tout tan y-ap maché, y-ap déplasé, y-ap fè progrè jous yo rivé nan pak sièl la. Sé nan pèlerinaj lafoua sa-a légliz la ap déplasé tout tan. Manman Mari nan mitan-l malgré li déjà pran dévan-an, l-ap sèvi-l modèl, l-ap soutni-l, l-ap dirijé-l (cf Redemptoris Mater No. 26).

*

"Mouin konnin mouton-m yo, épi mouton-m yo konnin-m tou" (Jn 10,14). Déklarasion sa-a Jézu fè-a, yo kapab raproché-l avèk fòmil kontra-a Bondié té pasé avèk pèp li-a lè-l té di-l l-ap Bondié yo épi yo minm y-ap pèp li (Ct 8,16; Os 2,25; Dt 26,17-18; Jer 7,23). Li fè sonjé sa madanm marié-a té di nan Kantik dè Kantik la: "Mouin pou sila-a mouin rinmin-an, épi sila-a mouin rinmin-an li pou mouin" (Ct 6,3, cf 2,16; cf. 7,11).

Sin Grégoua le Gran di: mo "konnin-an" vlé di rinmin (Sermo 14,3-6; PL 76, 1129-1130). Li di: "Mouin sé bon gadyin-an, mouin konnin mouton-m yo, sa vlé di mouin rinmin yo, épi mouton-m yo konnin-m". Sé kòm si li t-a di klèman: sa-k rinmin-m yo, yo obéyi-m. Moun ki pa rinmin lavérité-a, li pa konnin-l minm atò. Konsa Sin Grégoua invité nou mété nou nan kad liv Kantik dè Kantik la, kantik rinmin-an. Li di: "Mouin di nou konnin-l, sé pa pa lintèmédiè lafoua-a min pa lintèmédiè rinmin-an, mouin di nou konnin-l, sé pa nan kouyans la, min nan aksion-an". Li sité Sin Jan ki di: "Moun ki di li konnin Bondié épi ki pa kinbé kòmandman-l yo, moun sa-a bay manti". Sin Grégoua le Gran montré nou kijan, nan minm pasaj lévanjil katriyèm dimanch Pak B-a Jézu di: li konnin Papa-a épi Papa-a konnin-l, épi minm lè-a li di: li bay prèv konésans sa-a, sa vlé di rinmin sa-a, antan li fè volonté Papa-a, li rinmèt lavi-l pou mouton-l yo. Sin Grégoua di: Sé pou sa nan pasaj sa-a Granmèt la ajouté tout suit: "Minm jan mouin konnin Papa-a épi mouin rinmèt lavi-m pou mouton-m yo (cf Jn 10,15). Sé kòm si li di klèman: min prèv mouin konnin Papa-a épi Papa-a konnin-m, sèké mouin bay lavi-m pou mouton-m yo: sètadi sé nan rinmin sa-a ki fè-m mouri pou mouton yo mouin montré kijan mouin rinmin Papa-a".

Dézièm pati lévanjil katriyèm dimanch Pak B-a montré nou kijan gin dèt mouton ki pa nan minm pak la (Jn 10,16). Jézu di: li gin pou-l al chèché yo pou-l kondui yo avèk lòt yo, pou yo kouté voua-l, pou gin yon sèl bann mouton ak yon sèl gadyin mouton. Nan priyè Jézu té fè nan dènié soupé-a, sa yo rélé "Priyè sasèdotal" la (Jn 17), li té di li lapriyè "pou tout moun fè yon sèl, tankou ou minm Papa, ou nan mouin, épi mouin nan ou, sé konsa

tou pou yo nan nou, pou tè-a kouè ou voyé-m" (Jn 17,21). Sé youn nan pi gro soufrans nan légliz la, lè n-ap gadé diféran drapo k-ap floté anlè tè kantité légliz, lè nou konnin sé anba yon sèl ma drapo nou tout nou prétann nou rasanblé, anba pié lakoua-a. Jézu té di lè y-ap lévé-l sot sou tè-a, l-ap rasanblé tout moun ak tout bagay vi-n jouinn li (Jn 12,32), li t-ap palé alafoua osijè lanmò-l sou Koua-a ak osijè lasansion-l nan. Nan pié Koua-a, sòlda yo té séparé rad li yo an kat pòsion, sèlman yo pa-t chiré manto-a ki té fèt ak yon sèl piès, filé alamin, san kouti, sizo pa-t touché toual sa-a, rad la té fèt antan yo t-ap filé toual la minm. Sé yon sign sé yon sèl légliz ki ginyin, li pa fèt pou chiré. Jézu vini pou-l rasanblé tout pitit Bondié yo ki té gayé yo (Jn 11,52; 19,23-24; 21,11). Sou tan roua Salomon, Jéroboam té révòlté. Antan-l ap soti Jérusalèm, Profèt Ahiyya, moun Silo, akosté-l; Profèt la té gin yon manto tou nèf sou li, li chiré-l an douz mòso, li di Jéroboam sé konsa Bondié ap chiré péyi roua-a, l-ap bay Jéroboam diz pòsion, l-ap kite yon sèl pòsion pou Roboam, pitit Salomon-an; antan-l di sa, li rinmèt Jéroboam dis mòso manto-a li té chiré-a (1 R 11,29-39). Sé konsa réyèlman vré pèp Bondié-a vi-n séparé an dé, Israël nan nò, Juda nan sid. Jézu vini pou-l réfè fanmiy nan, li ofri Samaritèn nan rékonsiliasion (Jn 4,7); min pi plis toujou, li vini pou tout moun nèt fè yon sèl. Youn nan pi gran soufrans yon Krétyin, sitou yon Réponsab légliz, sé ouè kijan minm pitit Bondié yo k-ap sèvi minm Jézu-Kri-a, youn ap palé kont lòt. Sin Pòl avèti Korintyin yo (1 Co 1, 10-17) pou yo évité divizion; yon pòsion t-ap di yo pou Séfas, yon lòt pou Apòlòs, yon lòt pou Pòl, yon lòt pou Jézu-Kri. Nan minm légliz la, konn gin moun ki déklaré yo pou Pè intel, dòt minm pou Pè intèl, gin anpil fason pou fè minm travay la, min sé pou minm Granmèt la n-ap fè-l. Chak moun travay avèk tanpéraman-l, avèk fòmasyon-l, avèk préokipasyon-l, avèk mouayin li ginyin nan min-l. Sé pa yon rézon pou n-ap konparé divès fòm rézilta travay yo pou nou fè réfléksion ki pa bèl, ki kapab dékourajé moun k-ap travay yo. Sé minm Bondié-a k-ap aji nan diféran fòm aktivité yo; jan Sin Pòl di Korintyin yo (2 Co 12,4-6; Ph 2,12; R 12,3-8). Sé li minm k-ap fè tout bagay nan tout moun.

Nan katriyèm dimanch Pak B-a, sé lokazion pou nou lapriyé yon fason spésial pou Pè yo, ak moun ki gin lidé fè Pè. Yon Pè sé yon moun ki rann Jézu-Kri prézan nan mitan fidèl yo, kòm Bon Gadyin, li la pou rasanblé bann mouton yo. Li pa doué lokazion pou bann mouton yo gayé. Okontrè lè-l ouè bann mouton yo ap pran divès diréksion, sé pou-l fè sa-l kapab pou-l rasanblé yo. Lè yo té vi-n arété Jézu nan jadin Jétsémani-an, li té di: "Mouin pa pèdi okinn nan sila yo ou té konfié-m yo" (Jn 18,9). Li té prévoua poutan tout Apot yo t-ap sovè, li té avèti yo: "M-ap frapé gadyin-an, mouton yo ap

gayé" (Mc 14,26). Min li té di tou: lè l-a lévé vivan sot nan pami mò yo, l-ap rasanblé yo nan Galilé (Mt 26,32). Lè yon Pè rémaké moun yo ap gayé, sé pou-l chèché yon fason pou-l fè yo rasanblé ankò. Mision Bon Gadyin-an délika, paské chak mouton gin tanpéraman pa-l: ginyin ki maché nan kadans trinnin, dòt ki présé, ginyin ki rinmin dlo k-ap kouri, dòt ki pito dlo k-ap dòmi, ginyin ki rinmin zèb fré, dòt sé zèb ki pi mi. Sé bon gadyin-an ki konnin kijan pou-l fè pou-l rélé chak mouton sou non-l (Jn 10,3), sa k-ap répozé anba lonbraj la, sa k-ap chofé nan solèy la, sa k-ap voltijé sou ròch la, sa k-ap joué nan sab la, sa-k malad la, sa-k vyan-an (Ez 34,3-6).

Problèm yon moun pa problèm yon lòt; pa gin dé nanm ki sanblé nan mouatié, dapré sa Sin Jan-d-la-Koua di, pou montré diféran nan pami moun yo; gin divès fason pou yon avion atéri; li kapab désann apik, li kapab fè atérisaj fòsé, li kapab glisé tou dousman, jous li rivé atè. Gin divès chofè, pa gin dé ki kondui minm jan; gin divès mizisyin, yo chak joué yon fason; gin divès moun k-ap frapé tanbou, yo chak gin fason pa yo pou yo maké kadans chanté-a. Lè yon moun pozé yon jès, yon lòt kapab intèprété-l nan sans pa-l, dapré problèm pa-l, li kapab bay jès la sans li pa ginyin ditou nan léspri moun ki pozé-l la; sé lè li palé avè-l, li ouè pou ki rézon lòt la té pozé tèt jès; époutan gin dé foua sa minnin kont, youn maké lòt mal-viv, youn lènmi ak lòt. Nou bézouin palé youn ak lòt, minm si nou pa bay tout éplikasyon dènié ti jès nou pozé; sé nan konvèsasion-an anpil bagay ap débloké; min konvèsasion-an gin kondision-l; youn nan kondision yo, sé sinsérité, yon lòt kondision tou, sé konfians. Sé pou moun nan sinsè vizavi pròp tèt pa-l, épi sé pou-l fè lòt la konfians (Ga 5,22). Sin Pòl di Korintyin yo lacharité-a kouè tout bagay, li sipòté tout bagay, li éskizé tout bagay, li éspéré tout bagay (1 Co 13,7).

Osijè mouton yo ki pa nan pak la, Bon Gadyin-an di: li kité sa-k nan pak la, minm si yo katrévindisnèf, pou-l al chèché sa-k déyò-a, minm si sé yon sèl la (Lc 15,4). Lè papa-a té résévoua dézièm pitit la ki té tounin lakay la, pi gran frè-a té fè jalouzi (Lc 15, 25-32). Bon Gadyin-an pa gin pou-l kouté jalouzi moun k-ap chèché fè-l dévié nan mision li ginyin pou-l al chèché sa-k pa nan pak la, pou-l ba yo tout tan yo bézouin ak souin ki nésèsè, pou-l ouè si l-a fè yo tounin nan pak la; sé dévoua konsians li. Gin aranjman ki fèt nan règléman légliz pou louvri pòt yo ak fénèt yo, pou moun kapab réspiré pi alèz, pou tout moun konstaté yo lakay yo; min gin moun ki santi yo t-a pi alèz jan sa té yé lontan-an; poutan si légliz fè anrajman sa yo, sé paské, kòm bon gadyin, li vlé bay chak moun chans li pou-l ouè li lakay li. Sé poua nou bliyé bliyé tèt nou pou nou jinnin kò nou, pou lòt yo jouinn yon plas koté yo santi yo lakay yo; nou sé pitit kay; tou sa-k anndan-an sé pou nou, sé

pou nou fè lòt yo ouè tou kijan tou sa-k anndan-an sé pou yo tou. Fidèl yo doué édé Pè yo nan apostola bon gadyin-l nan l-ap fè-a, antan yo minm tou yo pa kontanté yo rété anndan byin alèz, nan bon ti chalè, san yo pa okipé frè yo ki déyò-a nan péché-a; yo pa doué kritiké yo, min yo doué fè kè yo sansib pou yo, yo doué paré chémin pou yo.

Yon bon gadyin konnin mouton-l yo, mouton-l yo konnin-l: sa vlé di li rinmin yo épi yo rinmin-l, jan Sin Grégoua le Gran di nou-an. Lè nou rinmin yon moun, nou gin doua fè-l monté mòn li pa t-a vlé, paské li ouè sé pou byin-l; nou gin doua fè-l pasé nan rajé pikan, paské li ouè sé pa pou nou fè-l méchansté. Sé rinmin sa-a n-ap mandé Manman Mari; n-ap mandé-l tou pou-l fè mouton yo tandé voua Bon Gadyin-an k-ap rélé yo-a, pou yo obéyi-l, pou lou-a pa dévoré yo nan rak boua-a. N-ap mandé-l pasians pou tout Pè yo, pou malgré désépsion yo jouinn nan travay yo, yo pa dékourajé, pou yo konnin si ti grinn blé-a ki tonbé nan tè-a pa mouri, l-ap rété pou kont li, min si-l mouri, l-ap donnin anpil frui (Jn 12,14). N-ap lapriyé tou pou Bondié voyé anpil travayè nan jadin-l nan, paské rékòlt la anpil, min travayè yo pa kont (Lc 10,2).

Katriyèm dimanch Pak la, sé dimanch vokasion; sou tout tè-a y-ap lapriyé pou tout kalité vokasion. Chak ané Pap la voyé yon mèsaj spésial pou jounin sa-a. Nan ané 1985 la, dépi dimanch Ramo-a li té voyé lèt la pou jèn yo, li té insisté anpil sou késion vokasion-an; li té pati nan pasaj lévanjil la koté jénòm rich la té vi-n mandé Jézu kisa pou-l fè pou-l gin lavi ki pap janm fini-an. Li té montré kijan Jézu té gadé jénòm rich avèk bon kè (No. 7; cf Mc 10,21). Sé yon fason pou-l rélé-l; nan fason li pozé jè-l sou li-a, sé tout mèsaj bòn nouvèl la li ranmasé pou-l prezanté ba li, pou-l touché-l jous nan fon kè-l, épi li di-l: "Suiv mouin" (Mc 10,20-21). Li di sé dépi moun yo tou jèn Jézu konn abitué rélé yo, sé pou yo dévlopé apèl sa-a nan fon kè yo joustan li rivé donnin frui (No. 8). Li di légliz la viré nan diréksion jèn yo pou késion vokasion-an; li konté sou yo. Sèkè jèn yo souaf yon idéal nan avni-an. Jénòm nan fi-n déklaré: dépi-l tou piti, li té abitué obsèvé tout kòmandman yo, li bézouin yon lòt égzijans ki pi konsékan pou-l kapab rivé nan lavi ki pap janm fini-an yon fason ki kòrèk nè. Sé poua sé li minm ki mandé ki sa pou-l fè an plis obsèvasion kòmandman yo. Sé lè sa-a Jézu di-l pou chouazi chémin povreté-a, sèlman li té gin anpil richès, li pa-t gin kouraj détaché-l ak yo. Anpil jèn gin ti défo sa-a, yo vlé suiv Jézu, sé vré, sèlman yo pa trankil pou avni yo, y-ap kalkilé kijan pou yo fè pou démin, pou yo pa manké anyin. Sa bloké yo nan kado yo té vlé fè Granmèt la ak tout kè yo-a. Bondié pa pran bagay nou ba-l ak dé kè (2 Co 9,7). Anani ak Safira té vann térin yo-a, yo té séré yon pòsion nan lajan-an, yo té pot rèz la

bay Apot yo; Sin Piè fè Anani ésplikasyon, Anani réfizé rékonèt fot li, li mouri la minm; lè madanm li rivé, sé minm bagay ki rékòmansé, Sin Piè mandé-l ésplikasyon tou, li fè minm jan ak mari-l, li pa rékonèt fot li, li tonbé, li mouri la minm, tout légliz la pran gran sézisman (Ac 5,1-11). Jézu di: sé chans pou moun ki pòv yo, péyi koté Bondié Roua-a sé pou yo li yé (Mt 5,3). An-atandan, bon gadyin-an doué pran jèn yo avèk tout kalité yo, avèk tout défo yo, pou dévlopé sa ki bon, pou korijé sa ki pa bon.

Dépi jèn-jan yo tou jèn, yo doué véyé sou sans yo, sou orientasyon kè yo, pou yo pa joué ak rinmin-an Bondié ap mandé yo-a, pou si-l rélé yo nan sèvis li nèt, yo gin kouraj konsakré kè yo ba li san yo pa séparé-l ak pèsou. Sé nan Bondié y-ap jouinn tout lòt yo; dépi yo jèn yo gin pou yo kòmansé fè sakrifis nan sans sa-a, san yo pa aksépté angajé tèt yo nan chémin falèz. Dépi yo jèn, yo doué aprann obéyi, pou lè Bondié rélé yo vi-n travay nan chanté-l, sé pa volonté pa yo y-ap chèché fè, jan sa fè yo plézi, min sé travay légliz la pou yo anvizajé nan sans otorité légliz yo mandé yo dirijé aktivité yo-a. Sé tou késion sa yo n-ap mété nan kè la Trè Sint Vièj Mari, Manman Bèl Rinmin-an, Vièj Pòv yo, Sèvant Granmèt la, Rèn Apot yo, pou vokasyon yo.

Pou Jédi-Sin 1985, Pap Jan-Pòl II té voyé yon lèt pou tout Prèt yo, jan-l konn fè chak ané-a. Min foua sa-a li té raplé yo dévoua yo vizavi jèn yo, sitou sou késion vokasyon-an; li té fè sonjé konvèsasyon ti jénòm rich la avèk Jézu, antan-l pozé Jézu késion ki pi konsékan ki ginyin osijè sa pou-l fè nan konsians li pou-l rivé nan lavi ki pap janm fini-an, épi antan-l té chèché égzijans ki pi fon toujou pou-l rivé nan dènié degré Bondié té préparé pou li-a (No.4; cf Mt 19,16-26; Mc 10,17-20; Lc 18,18-23). Li té mandé pou Pè yo kité jèn yo proche koté yo avèk fasilité, minm jan Jézu té kité jénòm nan proche koté-l san-l pa jouinn okinn bariè-a. Li té mandé yo pou yo gin kè yo louvri, pou yo montré yo konn résévoua byin, pou yo toujou prèt pou rann sèvis, pou yo kapab édé jèn yo nan konvèsasyon délivrans sa-a, jan yo kapab konstaté nan éspérians lavi Sin yo. Li té di: sé yon késion "pédagogie", sa vlé di yon fason pou dirijé jèn yo. Li té di: sé pou jèn yo kapab mét konfians yo nan yo fasil, pou yo kapab rakonté yo kozé ki kinbé pi gran plas nan kè yo, pou yo konfié yo problèm yo ki délika. Sé pou yo aprann kouté jèn yo, pou yo konn kijan pou yo réponn yo. Tou sa, sé nan lapriyé y-ap jouinn li, antan yo fè youn avèk Granmèt la, antan yo rimmèt tèt yo nan min léspri Sin-an. Li té mandé pou yo gin sans responsabilité vizavi lavérité-a, épi vizavi moun nan k-ap palé avèk yo-a (No. 5), pou yo gin otorité sou késion konsians, sou késion dévoua konpòtman ki douat, pou yo kapab mét lafoua nan yo. Li té di: yo pa doué pè kontrarié jèn yo, lè sa

nésèsè pou yo, minm si yo ouè jèn yo pran chagrin, paské chagrin sa-a sé pou délivrans yo, tankou jénòm rich la ki pati ak chagrin paské li té gin anpil richès la. Pap la rélé sa "tristesse salvatrice" (No. 5) kap bay kè kontan pi dévan. Li di nan sans sa-a nou pa bézouin pè fè jèn yo anpil égzijans. Li di: *"Nous ne devons pas craindre d'exiger beaucoup des jeunes. Peut-être l'un ou l'autre s'en ira-t-il "contristé" lorsqu'il lui semblera qu'il ne peut répondre à telle ou telle exigence; mais cette tristesse peut aussi être "salvatrice". Les jeunes doivent parfois se frayer leur chemin à travers ces tristesses salvatrices pour arriver peu à peu à la vérité, et à la joie qu'elle procure.* Li di: jèn yo pap chèché yon byin yo jouinn nan yon pri ki ba, sa Pap la rélé byin "au rabais". Li di: "Les jeunes n'ignorent pas, du reste, que le véritable bien ne peut être au "rabais" mais qu'il doit "coûter"". Sèké yo gin yon sans réfléksion ak jijman nan kè yo ki fè yo ouè koté vré valè-a yé. Sé poua y-ap chèché moun ki gin éspérians Granmèt la, tankou Pè yo, pou mété yo sou vré chémin-an, san yo pa chèché avantaj anba chal avèk yon lavi trò fasil. Pap la di tou pou Pè yo bliyé tèt yo, minm jan Jézu té fè, lè-l di jénòm nan: "Sé Bon Dié sèl ki bon" (Mt 19,17; Mc 10,18; Lc 18,19). Konsa tou Pè yo pa doué sèvi paravan ak rido ant jèn yo ak Granmèt la (No. 5) minm si yo doué angajé tèt yo nèt nan konvèsasion sa-a. Li di: Jézu té di: "Jouskouliè-a Papa-m ap travay, mouin minm tou m-ap travay" (Jn 5,17). Konsa sé instriman yo yé nan min Granmèt la, sé pou yo kité tout éspas la pou Bondié. Sé pou yo gadé jèn yo avèk minm fason Jézu té gadé jénòm rich la, avèk rinmin, min yon rinmin ki pa bloké sou yon sèl moun, yon rinmin ki louvri (No. 6). Sé pou yo konsidéré plas jèn yo nan lavi lézòm avèk atansyon. Li fè konstaté: jèn yo gin fidélté, min tou yo gin ti défo yo tankou jénòm rich la nan lévanjil la, yo kapab kolé nan byin latè-a fasil. Sé pou Pè yo rankontré yo nan kalité yo ak nan défo yo (No. 6). Li mandé Pè yo pou yo fè sakrifis, pou yo lapriyé; pou yo fè youn avèk Jézu-Kri, pou yo konsakré tèt yo bay la Trè Sint Vièj (No. 6). Li di pou yo préparé yo tou sou plan aktivité intélijans la, pou rankontré jèn yo, paské jèn yo gin éspri kritik, min sitou sé pou yo bon, sé pou yo fidèl nan dévoua yo, sé pou yo kinbé fèm sou prinsip yo (No. 6). Sé pou yo édé jèn yo, antan yo kité yo lib pou yo chouazi (No. 7), pou yo fè yo ouè vré valè-a nan chak branch yo chouazi (No. 7). Li mandé pou soutni lidé yo ginyin pou yo transfòmé tè-a, pou yo fè-l vi-n pi sanblé koté moun abité, pou-l vi-n gin yon lavi koté moun yo sanblé plis ak frè (No. 7). Li palé yon fason spésial sou vokasyon pou vi-n Pè oubyin pou vi-n Frè oubyin Sè (No. 7). Li fè Pè yo sonjé lapriyé yo té konn fè lontan nan pié lotèl la anvan lamès la té konn kòmansé-a: "Introïbo ad altare Dei, ad Deum qui laetificat juventutem mean" "M-ap monté sou lotèl Bondié-a, kot Bondié ki fè-m rétrouvé kè kontan mouin té ginyin lè-m

té jèn nan" sa vlé di: lè-m té fè-k Pè-a. Li profité, antan-l raplé nou priyé sa-a, pou-l fè nou konnin lè nou té fèk Pè-a, sa vlé di sous koté nou jouinn possibilité pou nou vi-n Pè-a, sé Jédi-Sin, premié Jédi-Sin-an, nan dènié Soupé Granmèt la (No. 8). Li mandé nou sé tout tan pou n-ap tounin nan nésans vokasion nou-an. Anvan-l fini, li di: "En ce jour, chers frères, je voudrais souhaiter à tous et à chacun d'entre vous - quels que soient votre âge et la génération à laquelle vous appartenez - que "avancer **jusqu'à l'autel de Dieu**" (suivant les textes du psaume) soit pour vous la **source de la jeunesse** surnaturelle de **l'esprit**, qui vient de Dieu même. Il nous réjouit avec la jeunesse de son mystère éternel dans le Christ Jésus. Comme prêtres de ce mystère de salut, nous participons **aux sources mêmes de la jeunesse de Dieu**: de cette **nouveauté de vie**, inépuisable qui, avec le Christ, se répand dans nos cœurs d'hommes" (No. 8). Li fini antan-l déposé intansion sa yo nan kè la Trè Sint Vièj Mari, ki ba nou vré Kò Jézu-Kri-a, li fè sonjé chanté nou abitué chanté lè n-ap fè "Salut du Très Saint Sacrement"-an: "Ave verum Corpus, natum de Maria Virgine": "Salu, vré Kò-a, ki fèt sot nan la Trè Sint Vièj Mari-a".

Ni Lèt sa-a, ni mésaj pou jèn yo gin minm dat, sé 31 mas 1985, dimanch ramo ak lapasion Granmèt la, nan sètièm ané dépi Pap Jan-Pòl II té instalé kòm Pap sou fotéy Sin Piè-a a Ròm.

*

Bon Gadyin-an rélé chak mouton sou non-l (Jn 10,31); pa gin dé ki gin minm non, pa gin dé nanm ki sanblé, minm nan mouatié, jan Sin Jan-d-la-Koua di-a. Chak moun gin vokasion pa-l. Jézu di: gin anpil koté pou rété nan lakay Papa-l (Jn 14,2). Sint Tèrèz lanfan Jézu di: nanm yo youn diféran ak lòt tankou flè. Sé divès kalité flè ki fè yon jadin bèl. Vokasion Sin Piè (Lc 5,1-11; Jn 1,40-42; Mt 4,18-20; Mc 1,16-18) pa minm avèk pa Sin Pòl (Ac 9,1-19; 22,5-16; 26,9-18). Vokasion Moyiz (Ex 3,1-4,17) pa minm ak pa Jérèmi (Jer 1,4-10). Vokasion Izayi (Is 6,1-13) pa minm ak pa Ézékièl (Ez 1,1-3,21). Bondié rélé moun li vlé, jan-l vlé. Sa sèlman li mandé, sé pou nou réponn li nan lafoua, pou nou fè-l konfians nan chak sikonstans. Li pa di nou davans koté-l apralé avèk nou; min nan chak kalfou li montré nou chémin. Otréman nou t-a dékourajé, si nou t-a ouè longè chémin-an ak tout kalité mové pas ki gin ladan-l. Sin Bénoua, Sin Ogustin, Sin Bazil trasé lign ki pèmèt Rélijyé yo suiv yo, dapré oriantasion yo vlé chouazi. "Ermite du Mont Carmel" yo suiv tras Profèt Éli; Sint Tèrèz davila ak Sin Jan-d-la-Koua rénovlé souf lavi fanmiy nan. Sint-Ignas de Loyola chouazi lign mision-an pou bèlté Granmèt la parèt. Min sou tèt mòn nan yo tout yo

rankontré. Sint Tèrèz davila bay Sin Jan-Bosco nan min anndan Kè Jézu, malgré Sint Tèrèz té orianté plis nan lapriyè épi Sin Jan-Bosco té orianté plis nan aktivité. Gin anpil koté pou rété nan lakay Papa-a (Jn 14,2). Jézu di: gin dôt mouton li gin pou-l minnin nan pak la (Jn 10,16).

Dokiman Vatikan II sou rasanbléman légliz la, "Unitatis redintegratio", fè nou dépasé limit rélijion nou pou nou gadé nan diréksion moun ki pa gin minm fason ak nou pou yo sèvi Bondié. Nan ané 1988 la légliz té fété mil ané dépi Sin Vladimir té batizé, dépi tout péyi-l la té anbrasé lafoua Granmèt Jézu-a; sé té lokazion pou nou té sonjé légliz "orthodoxe" yo yon fason spésial: tout légliz an Russie, Biélorussie ak Ukraine yo. Pap Jan-Pòl II té voyé yon lèt pou-l ankourajé yo ("Euntes in mundum"). Li té voyé yon lòt lèt pi spésial pou légliz Ukraine yo ("Magnum baptismi donum"). N-ap lapriyè pou yo jouinn libètè rélijion yo, antan nou sonjé konsign Pap la té bay pou jounin lapè 1988 la: "La liberté religieuse, condition pour vivre ensemble la paix" (prémié janvié 1988).

*

* *

KATRIYÈM DIMANCH PAK C

Nan tout lamès katriyèm dimanch Pak la, gin dé mo ki tounin souvan, sé mouton ak gadyin. Dimanch sa-a, sé dimanch "Bon Gadyin-an", jou sa-a yo lapriyè tout koté pou vokasyon Prèt yon fason spésial min pou tout vokasyon tou. Pou 30 désanb 1988, fèt Sint fanmiy Jézu, Mari ak Jozèf la, Pap Jan Pòl II té voyé mèsaj spésial osijè Layik yo, pou raplé vokasyon yo nan légliz la, ("Christifideles laici"), antan-l dévlopé pasaj koté Granmèt la rélé travayè yo pou al nan jadin rézin-l nan nan ninpòt ki moman nan jounin-an, li di yo: nou minm tou, sé pou-n al travay nan jadin rézin-m nan (N. 2; cf Mt 20,3-4). Pap la voyé mèsaj sa-a antan-l bazé-l sou travay Sinòd Èvèk yo ki té fèt osijè vokasyon ak mision layik yo nan légliz la ak sou tè-a vintan apré konsil Vatikan II-a. Alokasyon vinsizièm jounin lapriyè pou vokasyon yo (dimanch 16 Avril 1989), Pap la voyé yon lèt, koté li dévlopé pasaj lévanjil katriyèm dimanch Pak la, Bon Gadyin-an ki bay lavi-l pou mouton yo (Jn 10,15), li mandé pou yo lapriyè Granmèt la pou-l voyé travayè nan jadin-l nan (Mt 9,38; Lc 10,2), pou tout moun jouinn lavi ki pap janm fini-an (Jn 10,10), pou yo fè progrè nan konésans lavérité-a (1 Tm 2,4). Li insisté plis sou dévlopman vokasyon nan lékòl yo, sitou nan lékòl katolik (N. 1), ki gin pou mision: fòmé moun nan ak krétyin-an nan tout dimansion-l, pou jèm vokasyon léspri Sin-an dépozé nan nanm moun nan dévlopé yon fason pou moun rivé kapab anonse lévanjil la nan langaj ak nan maniè ki adapté ak tan n-ap viv la (N. 1). Pap la palé yon fason spésial pou lékòl katolik, min li adrésé tou pou lòt lékòl yo, koté profèsè katolik yo ap travay. Lékol katolik la pèmèt moun yo viv espérianans lafoua, lapriyè, sèvis ansanm, konsa li dirijé yo nan sans sajès lévanjil la (N. 2; cf "Gravissimum educationis" 8). Sa ap réyisi fèt pi byin toujou si profèsè yo travay ansanm ak fanmiy élèv yo, antan yo gin kontak dirèk avèk yo (N. 2). Profèsè lékol katolik yo doué sèvi témouin ak lavi yo, yo doué lapriyè anpil, pou yo kapab sèvi instriman Granmèt la k-ap palé ak chak élèv yon fason spésial pou rélé-l vi-n konsakré tèt li nèt pou koz Ringn Bondié-a (N. 3). Lékol katolik ap édé jèn yo dékouvri kijan yo gin posibilité pou réponn Granmèt la k-ap rélé yo-a, malgré sa yo kapab tandé lòt koté pou ralanti élan yo (N. 4). Sé légliz ki rékonèt kapasité sa-a lékol katolik la ginyin pou-l édiké jèn yo nan sans krétyin-an. Légliz konté sou lékol katolik la pou-l fè jèn yo pran konsians vokasyon yo kapab ginyin pou yo vi-n Prèt, pou yo vi-n Rélijyé (N. 5). Paran yo doué konsidéré sa pou yo pran responsabilité yo, pou yo aktif tout tan pi plis anndan kominoté-a k-ap édiké jèn yo nan lékol katolik la. Pitit yo ap gin kè kontan nan mézi yo jouinn posibilité réponn Granmèt la klè anndan fon kè yo. Si yo fè Granmèt la kado yon pitit, sé pa pèdi yo pèdi-l, okontrè sé yon avantaj pou légliz la ak pou yo minm tou (N. 6). Pap la gin yon atansyon

spésial pou jèn yo ki nan lékòl katolik yo, min tout jèn krétyin yo tou ki nan ninpòt ki lòt lékòl. Li mandé sa-k nan lékòl katolik yo pou yo dévlopé intèlijans yo pou yo kapab sèvi Jézu-Kri témouin pi byin dévan lòt moun yo, antan yo marié lafoua yo avèk kilti yo, sa tèlman difisil pou akòdé ak lafoua ak lavi-a nan yon sosiyete ki pa inbibé ak valè krétyin. Lapriyè, Paròl Bondié, lacharité, sèvis sitou pou sa-k pòv yo, sé fason pou yo sèvi Jézu-Kri témouin an fas lòt jèn yo, épi pou yo sèvi Granmèt la yon fason pi ro ak plis dévouman si yo tandé voua-l rélé yo nan sans sa-a, yo pa doué pè réponn (N. 7). Pap la mandé jèn yo pou yo pa fè tankou jénòm rich la ki pa réyisi pran désizyon, ki rété avèk byin-l yo min avèk tristès li-a tou (Mt 19,22), malgré Jézu té pozé jè-l sou li antan-l montré-l kijan-l rinmin-l (Mc 10,21). Li mandé yo okontrè pou yo fè tankou péchè Galilé yo ki té kité tout bagay minm lè-a pou y-al lapèch moun (N. 8; cf Mt 4,18-22). Pap la fini, antan-l fè yon lapriyè pou vokasyon yo, jan-l abitué fè chak ané-a. Li di: "Seigneur Jésus-Christ, Pasteur de nos âmes, toi qui continues d'appeler de ton regard d'amour tant de jeunes gens et tant de jeunes filles qui vivent au sein des difficultés du monde d'aujourd'hui, ouvre leur intelligence pour qu'ils reconnaissent parmi les innombrables voix qui résonnent autour d'eux, ta voie unique, douce et puissante, qui répète aujourd'hui encore: "viens et suis-moi". Dirige l'enthousiasme de notre jeunesse vers la générosité et rends-la sensible aux attentes des Frères qui réclament solidarité et paix, vérité et amour. Oriente le cœur des jeunes vers la radicalité évangélique, capable de dévoiler à l'homme moderne les immenses richesses de ta charité. Appelle-les avec ta bonté, pour les attirer à toi! prends-les avec ta douceur, pour les accueillir en toi! Envoie-les avec ta vérité, pour les conserver en toi! Amen".

Sé pou 2 Fèvrié 1989, nan Fèt Prézantasyon Granmèt la, Pap la ékri lèt sa-a, nan onzièm ané dépi-l instalé sou Fotèy Sin Piè-a a-Ròm.

*

Granmèt la sansib tankou yon gadyin sansib pou mouton-l yo. Kè sansib li plin tè-a (Ps 33,5=32,5: réfrin pou antré mès katriyèm dimanch Pak). Prémie priyè-a mandé pou Granmèt la kondui fanmiy li nan kè kontan sièl la, pou féblès bann mouton yo rivé koté fòs gadyin-an déjà rivé. Psòm-répons la di: "Nou sé pèp li ak mouton pak li (Ps 100,3= 99,3). Dézièm léktu-a montré nou kijan foul la kanpé dévan Mouton-an (Ap 7,9-17), kijan yo blanchi rad yo nan san Mouton-an, kijan sé Mouton-an k-ap kondui yo, k-ap vi-n tounin gadyin yo, paské yo té pèdi rout, dapré Izayi 53,6. Alélouya-a di: Granmèt la sé Bon Gadyin-an, li konnin mouton-l yo, yo minm tou yo konnin-l (Jn

10,14). Sé yon fason pou ranmasé lidé ki nan lévanjil la. Lévanjil la minm (Jn 10,27-30). kòmansé antan-l di: "Mouton-m yo tandé voua-m, mouin konnin yo, yo suiv mouin, mouin ba yo lavi ki pap janm fini-an, yo pap janm péri, pèsòn pap ouèté yo sot nan min-m". Réfrin pou kominion-an minm di: "Bon Gadyin-an lévé, li minm ki bay Lavi-l pou mouton-l yo, li aksépté mouri pou bann mouton-l yo". Dènié priyè-a mandé pou Bon Gadyin-an voyé jé ak bon kè-l sou bann monton-l yo, sa-l délivré ak san Pitit li-a ki gin anpil valè-a, pou-l instalé yo nan pak zèb k-ap diré tou tan yo".

Nan Psòm 23-a, yo di: Granmèt la sé Gadyin nou, anyin pap manké nou. Profèt Ézékièl montré nou sé Granmèt la li minm k-ap vi-n gadyin mouton-l yo (Ez 34,11-16). Sint-Ogustin di, apré Sin Pòl (cf 2 Tm 4,2) pou préché tou tan, nan tout okazion, ni lè sa fè plézi, ni lè sa kontrarié, pou nou ramné mouton k-ap pèdi rout la (Lc 15,4-7; Ez 34,1-6), pou nou souin sa-k blésé-a, dapré parabòl Profèt Ézékièl la, jan Jézu réprézanté pròp mision pa-l la. Li sé Bon Gadyin-an k-ap poté ti mouton-an sou zépol li. Li pa pran-l ak kout pié, li pa bouskilé-l, pou-l fè-l tounin nan bann nan, li pran-l ak délikatès, li pa minm kité-l maché, li poté-l avèk souin (Sint-Ogustin: Sermo 46,14-15:CCL 41, 541-542; cf Liturgia Horarum IV, Vatican 1974, 210-211: office de lecture du lundi 25^e sem ord). Sint-Ogustin kòmanté Ézékièl 34, li di: nou pa bay mouton ki chèch la fòs, sa vlé di sé intèrè nou n-ap chèché, sé pa intèrè Jézu-Kri, antan n-ap profité lèt ak linn mouton-an, lèt la sé richès yo, linn nan sé konsidérasion yo (Sermo 46,13; CCL 41, 539-540; cf Liturgia Horarum IV, 206-208: office de lecture du 25^e dim ord). Sint-Ogustin mandé pou pansé koté mouton yo malad la, sa vlé di pa ba yo poté chaj ki trò lou pou yo, paské minm Bondié pa éséyé pèsòn anlè fòs li, pou yo pa krazé lè tray la rivé (Sermo 46,11-12: CCL 41, 538-539; cf Liturgia Horarum IV, 203-204; office de lecture du samedi de la 24^e sem ord). Sint-Ogustin di, apré Profèt Ézékièl (Ez 33,7s; 3,17ss), nou sé santinèl, lè nou ouè danjé-a sé pou nou avèti, pou nou pa tankou chyin ki baba (Is 56, 10-11), ki pa pakab japé lè volè-a rivé, négljans nou kapab pèdi mouton yo (Sermo 46,20-21: CCL 41, 546-548; cf Liturgia Horarum IV, 217-218, office de lecture mercredi 25^e sem ord). Li mandé pou gadyin yo okipé mouton yo, pou fè yo tout ansanm fè yon sèl, minm jan Papa-a ak Pitit la fè yon sèl la, minm jan Jézu di li gin dèt mouton ki pa nan pak la, l-apral chèché yo pou gin yon sèl Gadyin ak yon sèl bann mouton (Sermo 46, 29-30: CCL 41, 555-557; cf Liturgia Horarum IV, 224-225; office de lecture vendredi 25^e sem ord).

Jézu sé Bon Gadyin; prézans li rasiyé bann mouton yo. Tan Pak la, sé yon tan ki ba nou asirans. Chak foua Jézu parèt dévan Apot li yo, li ba yo asirans sa-a. Dépi lè yo té vi-n arété-l la, Apot yo té santi kijan yo té pou kont yo. Jézu té avèti yo davans; li té raplé yo paròl Profèt Zakari-a: "m-ap frapé gadyin-an, bann mouton yo ap gayé" (Mt 26,31; Za 13,7). Sé sa-k té rivé vré, lè yo té arété Jézu-a, yo tout té sové kò yo adouat a goch. Minm Sin Piè, ki té fè yon ti rézistans avèk épé (Jn 18,10; Mt 26, 51; Mc 14,47; Lc 22, 50), li té vi-n pèdi asirans dévan gad-bariè-a ak dévan moun yo ki té nan lakou tribinal la (Jn 18,15-27; Mt 26,69-75; Mc 14,66-72; Lc 22,54-62). Li té gin kouraj kan minm paské li té suiv Jézu jous la; sé moun ki pa maché ki pa tonbé (cf RIGAUX, B., *Le témoignage de l'Évangile de Luc*, Paris, Bruges, 1970, 301, cit in FEUILLET, A., *L'Agonie de Gethsémani*, Paris, Gabalda, 1977, 161). Jézu té di yo: lè-l té avèk yo-a, yo pa-t manké anyin; min yon lè t-ap rivé yo t-ap santi yo pou kont yo, sé kòm si yo t-ap santi bézouin vann rad yo pou achté épé pou protéjé yo (Lc 22,35-38). Min li té avèti yo tou: apré sa, li t-ap pran dévan yo, nan Galilé, koté li té ba yo randé-vou-a (Mt 26,32). Sou bò lanmè-a li parèt, li kuit pin ak pouason pou yo, li fè yo manjé pou ankourajé yo. Tanzantan li parèt dévan yo konsa pou ankourajé yo, pou-l montré yo minm si yo pa ouè-l, li toujou la nan mitan yo, pou yo pa trakasé, pou kè yo pozé (Jn 21,9). Prèmié bagay li di yo, lè-l parèt dévan yo, sé: "kè pozé" (Jn 20,19.21.26; Lc 24,36), paské li konnin byin lè yo ouè-l, y-ap gin kè soté, y-ap konprann sé yon éspri (Jn 6,19; Lc 24,37; Mt 14,26), épi li konnin kijan lè yo pa ouè-l y-ap gin kè séré (Lc 24,17; Jn 20,11; 11,3.21.32; Mc 16, 10). Tè grinnin sé mizè, tè glisé sé traka. Yo pa ouè Jézu, kè yo séré; li parèt dévan yo, kè yo soté. Li invité nou pou nou toujou gin kè pozé, kit nou pa ouè-l, kit nou ouè-l. Sa vlé di: minm si nou santi yon vid anndan fon kè nou, minm si nou gin inpréssion Granmèt la pa la, li kité nou, li louin nou, nou pa doué gin kè séré pou sa, sé fòs li vlé fè nou pran nan fason nou gin pou nou konpòté tèt nou. Minm si nou gin inpréssion tèl évenman ki rivé, sé min Granmèt la ki frapé nou, nou pa doué gin kè soté pou sa, Granmèt la sé Bon Gadyin k-ap véyé pou okinn malè pa rivé nou (Ps 23,4; 27,1-2). Nou pa doué ap trakasé, ap pozé tèt nou késion, ap mandé kisa nou fé ki mal n-ap péyé? (Lc 13,2.4; Jn 9,2). Nou pa doué tout tan ap pansé: Satan ap ranpòté laviktoua sou nou. Jézu déjà ranpòté laviktoua jou dimanch Pak la (Jn 16,33; Mt 28,4; Jn 18,6; Ex 14,27). Anyin pa doué troublé nou. Sé gro voua Satan ginyin, pou-l fè nou pè; li pa kapab fè nou anyin. Sint Térèz davila di: "pa di: "démon-an"! lè nou kapab di: "Bondié!"."

Si nou pèdi chémin, Bon Gadyin-an ap fè nou tounin. Si nou fè kèk ti rebèl, l-ap korijé volonté nou pou-l fè nou pi dosil. Si n-ap trinnin sou rout afòs nou bouké, l-ap soulvé nou pou-l ankourajé nou maché, antan l-ap di nou: "Fè yon lòt ti kou tanpri, nou pa gin doua lagé, lè n-ap fè travay Bondie!" Si nou troublé akòz nan nuit k-ap vlopé nou, akòz pa gin ni zétoual, ni la li-n, akòz nou pa ouè koté pou nou pozé pié nou, akòz falèz nou santi ki tou pré nou, l-ap kléré rout nou ak yon limiè nou pa ouè ak jé nou, sé kòm si nou tankou chov-sourit yo, n-ap ouè san nou pa louvri jé nou (Ex 13,21; 40,36; Dt 1,33; Ps 78,14; 105,39, Ne 9,12.19; Sg 10,17-18; 18,3; Is 4,5; Jn 8,12; 10,4; 9,5; 1 Co 11,27). Si nou santi fòs nou fébli ak maladi k-ap sousé nou, sé li k-ap jouinn rémèd pou-l ba nou santé, pou-l fè nou réfè, pou-l fè nou géri. Si nou santi chagrin ap fè nich foumi nan tèt nou, ap fè fil aringnin nan kè nou, sé li minm k-ap dégajé nou pou-l fè kè kontan tounin vi-n mét fréchè ak trankilité anndan nanm nou. Si nou santi nou pou kont nou, nou pa kapab poté chaj la ki dépasé fòs nou, sé li minm k-ap montré nou li la pou-l poté-l avèk nou, pou-l ba nou fòs. Si nou santi nou ront, nou jinnin akòz péché ki sal figi nou, ki badijonnnin rad nou ak labou, l-ap fè nou pran asirans antan l-ap raplé nou li ba nou Manman-l k-ap sèvi nou intèmediè, k-ap lavé rad nou pou nou.

Katriyèm dimanch Pak la sé dimanch "Bon Gadyin-an". Yo lapriyé yon fason pi spésial pou vokasion sou tout tè-a. Jézu li minm té di patizan-l yo pou yo lapriyé papa-a pou-l voyé travayè nan jadin-l, paské rékòlt la anpil, pa gin kont moun pou ranmasé danré-a (Lc 10,2). Lè Bondié vlé ba nou kichòy, li fè nou mandé-l, dapré sa Sint Tèrèz lanfan Jézu di nou. Nou pa doué sispan lapriyé pou mandé Bondié voyé anpil Pè pou kontinyé travay Jézu-Kri-a. An 1986 Pap Jan Pòl II té fè sonjé 200 ané dépi Sin Jan-Mari Viané té fèt. Sé patron tout Kiré parouas yo. Li pa-t gin anpil posibilite pou-l té suiv lansègnman yo t-ap bay nan lékòl téoloji pou-l vi-n Prèt. Li té fè anpil éfò; li té kontinuyé fè anpil éfò toujou lé-l fi-n Pè, pou-l préparé prèch li, pou-l fè katéchis pou ti moun yo. Li té pasé kèk fous plis pasé yon jounin ap konfésé moun ki té vi-n sot byin louin. Li té pran tan-l pou-l lapriyé, li té fè anpil sakrifis. Li té konnin sé pa ak pròp fòs li li té kapab chanjé kè moun yo. Bondié fè yon fason pou montré-l li pa-t pèdi tan-l. Apèn 230 moun ki té ginyin nan kòmansman, lè-l rivé nan parouas la. Pa-t gin anpil ki té konn vi-n légliz. Yon ané anvan-l mouri, an 1858, té gin 80.000 moun ki té vi-n sot anpil koté pou vi-n kouté-l, pou vi-n pran konsèy nan min-l, pou vi-n lavé nanm yo. Li té gin kòm toua ròch difé: sé konfésion, lékaristi, prèch. Sé sou toua pouin sa yo sitou li té insisté. Chak matin, li kòmansé jounin-l antan-l rété aladispozision moun ki vlé konfésé. Li préparé lamès li byin an silans

pandan plis pasé yon ka-dè, malgré foudrè moun ki nan légliz la. Li fè lamès avèk atansyon, sitou nan konsékrasyon ak lakominion. Li adoré Jézu ki prézan nan tabènak la, pandan lajounin, ni asouè. Li aprann moun yo fè minm jan, pou yo gin respè pou prezans Granmèt la ki la nan mitan yo avèk pròp Kò-l. Li mété tout kè-l pou-l préché vérité lafoua-a, antan-l insisté sou bon kè Bondié, minm si li pa pè montré tout malè k-ap tann moun ki fè rébèl. Li pasé anpil tan ap fè katéchis pou ti moun yo, antan li sèvi ak konparéon ki sinp, ki palé byin ak léspri yo.

Pap Jan Pòl II té di nan lèt li té ékri Prèt yo pou Jédi-Sin ané 1986 la, kijan nou bézouin témouagnaj ak lapriyé Sin Jan-Mari Viané pou tan n-ap viv la, koté minm nan travay gadyin mouton Granmèt yo, aspè sosiété-a pran dévan tròp, intèrè k-ap pasé yo pran dévan tròp. Yo néglijé sakrifis ki mété nou sou yon nivo sipériè. Lidé k-ap dirijé mouvman foudrè yo kòm mété Bondié a koté. Tou sa kontrarié prèch lévanjil la. Li di: "Combien d'entre nous se sont préparés au sacerdoce, ou exercent aujourd'hui leur difficile charge de Curé, en ayant sous les yeux la figure de Saint Jean-Marie Vianney! Son exemple ne saurait tomber dans l'oubli. Nous avons plus que jamais besoin de son témoignage, de son intercession, pour affronter les situations de notre temps, où, malgré un certain nombre de signes d'espérance, l'évangélisation est contrariée par une laïcisation croissante, où l'on néglige l'ascèse surnaturelle, où beaucoup perdent de vue les perspectives du Royaume de Dieu, où souvent, même dans la pastorale, on se préoccupe trop exclusivement de l'aspect social, des objectifs temporels. Le Curé d'Ars a dû affronter au siècle dernier des difficultés qui avaient peut-être un autre visage, mais qui n'étaient pas moins grandes. Par sa vie et par son action, il a constitué, pour la société de son temps, comme un grand défi évangélique qui a porté des fruits étonnants de conversion. Ne doutons pas qu'il présente aujourd'hui encore un grand défi évangélique" (N.2, p.5-6). Pap Jan-Pòl II prezanté Sin Jan-Mari Viané dévan nou tankou yon "défi" lévanjil la mandé pou nou lévé. Sa égzijé kouraj pou nou maché nan diréksyon ki kontrè ak chémin anpil lòt moun pran (cf Sg 2,14-16). Min sé yon sèl lévanjil ki ginyin, sé lévanjil Jézu-Kri-a. Sé li minm pou nou suiv, minm si-l difisi-l, minm si-l jinnin abitud nou, minm si-l fè nou pèdi zanmi nou, minm si-l fè yo palé nou mal, yo kritiké nou, tankou moun k-ap rékilé. Bousòl nou sé lévanjil la, nou pap pèdi chémin. Paròl Pap Jan-Pòl II yo asiré nou sé diréksyon sa-a minm Jézu mandé pou nou pran. Nou pa bézouin nan kè soté, nan kè séré. Sé pou nou gin kè pozé, tankou Sin Pòl di Tésalonisyin yo. Sé fidélité-l parapò a Bondié ki ba-l asirans dévan lézòm (1 Tm 2,1-12). Sé sa-l fè Korintyin yo rémaké tou (2 Co 6-7; 10-12). Sé pa jijman lézòm ki

konté, sé jijman Jézu-Kri, k-ap mandé nou ki sa nou té fè ak bann mouton yo li té konfié nou-an, li minm ki té di Sin Piè okipé bann mouton-l yo, ni piti yo, ni gran yo. (1 Co 4,3; Jn 21,15.16.17).

*

Bondié rélé chak moun jan-l vlé. Fason Jézu rélé Sin Jan-an (Jn 1,35-39), sé pa konsa li rélé sin Pòl (Ac 9,1-19; 25,5-16; 26,9-18). Li té vè katrè aprémidi konsa, lè Sin Jan rankontré avèk Jézu, chalè solèy la déjà bésé, fréchè kòmansé ap vlopé tè-a, fatig lajounin-an kòmansé kalmé, sé té bò lariviè Joudin-an. Sin Jan pasé tout lannuit la bò kot Jézu, l-ap kouté paròl li. Li té ansanm ak André, frè Simon-an. Nan matin yo tounin lakay yo. André rankontré Piè, li minnin-l kot Jézu. Nan landmin Jézu rélé Filip, zanmi André. Filip minnin Natanaël kot Jézu. Sé tankou yon chinn, youn minnin lòt (Jn 1,35-51). Sé té nan kòmansman lavi piblik Jézu. Pòl li minm té sou rout Damas, li t-ap pèsékité fidèl yo; sé té gro midi, nan dézè, limiè solèy avéglé-l, li tonbé atè, Jézu fè-l répròch, li chanjé diréksion. Lèt li yo pap gin minm ton ak sa Sin Jan ékri yo. Min ni Sin Jan ni Sin Pòl, sé Jézu ki chouazi yo, avèk préokipasyon yo, avèk karaktè yo, nan sikonstans y-ap viv. Sé nan biro kontribision-an minm Jézu rankontré avek Matié (Mt 9,9). Sé sou yon pié boua Zaché té yé lè-l fè-l désann pou Zaché résévoua-l. lakay li (Lc 19,1-10). Sé sou koua-a li promèt Bon Laron-an pou-l fè-l antré nan sièl minm jou-a (Lc 23,39-43). Sé antan-l atab, li chanjé lavi madanm ki té nan péché-a (Lc 7,36-50). Sé nan nuit li résévoua vizit Nikodèm, li réponn késion-l (Jn 3,1-21; 19,39). An sékrè, li dirijé démach Jozèf d-Arimati, (Jn 19,38). Mésié-a li fi-n chasé démon sot nan li-a, li orienté-l nan sans li vlé pou-l voyé-l préché koté-l vlé, koté li minm yo pa vlé résévoua-l la (Lc 8,39). Li bay kondision pou moun ki vlé suiv li: sé aksépté kité tout bagay (Lc 9,57-62). Li mandé pou lapriyé Granmèt la pou-l voyé travayè nan jadin-l (Lc 10,2). Sin-Jan-d-la-Koua di pa gin dé nanm ki sanblé minm nan mouatié. Sint Térèz lanfan Jézu di, sièl la tankou yon jadin ki gin kantité flè divès kalité. Jézu di Apot yo: nan lakay Papa-l, gin anpil koté pou moun rété (Jn 14,2). Konsa gin anpil kalité vokasion, youn pa sanblé ak lòt. Bondié gin fason pa-l pou-l rélé intèl ou byin intèl. Nou pa doué youn ap gadé sou lòt, pou nou konnin si Bondié rélé nou oubyin si-l pa rélé nou. Sitou, nou pa doué trò konté sou kalité natirèl nou. Lè Bondié té chouazi David la, sé David ki té pi piti nan tout frè-l yo, li té tèlman piti, pèsòn pa-t sonjé-l, li t-ap okipé mouton an déyò. Sé Profèt Samuèl ki blijé voyé chèché-l, minm papa-l té bliyé li té la (1 Samuèl 15,1-13). Samuèl di papa-l: Sé pa sou roté tay li pou-l gadé, ni sou bèl aparans li, fason Bondié aji, sé pa minm fason ak lézòm (cf Is 55,8). Gin moun ki gin intélizans dévlopé, ki gin ladrès, sé pa

yo minm nésèsèman k-ap réyisi sou rout koté Bondié rélé yo-a, sèké yo kapab mété tròp konfians sou avantaj kalité natirèl yo, lògèy fè yo konprann yo plis pasé lòt yo. Bondié kapab ba yo kalité pou sèvis lòt yo, min yo minm yo dévloppé-l pou yo, tankou byin pèsonèl yo, yo pèdi orinasyon ak ròl mision yo, jan sa rivé Sayul la (1 Sam 15,10-31).

Sé sa-k fèb yo Bondié chouazi, pou moun pa lévé tèt li dévan Bondié (1 Co 1,26-29). Gédéyon (Jg 6,11,24), Samson, (Jg 13,2-25), Josué (Det 31,7-8.14-15.21), Moyiz (Ex 3,6; 4,10; 6,2-12; 7.1-7), Sayul (1Sam 9 ,1-10,16); David (1Sam 16,1-13), Salomon (1 Chr 28,5-10). Jéyu (2 R 9,1-15), Samuèl (1 Sm 3,1-21), Miché pitit Imla (1 R 22,9). Jérémi (Jer 1,4-10), Ézékièl (Ez 2,1-3,9) Abraam (Gn 12,1-9), Sèvitè Granmèt la (Is 42,1-8; 49,1-6; 50,4-11; 52,13-53,12), Izayi (Is 6, 1-8), Jan-Batis (Lc 1,5-25), la Trè Sint Vièj Mari (Lc 1,26-38): sé toujou féblès moun nan ki antré an konsidèrasion pou fè ouè kijan sé gras Bondié ki fè démach, vi-n rélé-l (cf Lc 1,48-52), san moun nan pa kapab di li gin okinn doua sou sa. Min, minm féblès sa-a minm, ki fè moun nan pran konsians kijan li louin ak Granmèt la (Ex 3,5; 1 R 19-13; Is 6,5; Lc 5,8) Bondié gin fason pa-l pou-l konblé-l. Li rasiré Moyiz, antan-l ba-l Aaron, frè-l la, pou-l poté paròl la dévan-l (Ex 3,1-4, 17). Li touché po bouch Izayi avèk yon chabon difé tou limin, pou-l pròpté fot li, pou Profèt la kapab poté paròl la (Is 6,60). Li touché anndan bouch Jérémi, li mété paròl li nan bouch li, pou-l pa pè palé (Jn 1-9). Li fè Ézékièl manjé liv la, pou-l kapab al préché mèsaj la (Ez 3,1-3). Kanta la Trè Sint Vièj Mari minm, sé PAROL la minm ki vi-n tounin CHÈ nan li (1 Jn 1,14). Li sé Rèn Profèt yo.

Premié dévoua yon Prèt, sé préché Paròl Bondié-a ("Presbyterorum ordinis" 4) dézièm dévoua-l, sé fè moun yo vi-n Sin gras a sakrèman yo (P.O., 5); touzièm dévoua-l, sé dirijé yo (P.O., 6). Sé mision Jézu konfié Apot li yo, anvan-l monté nan sièl: Anségné tout nasion, batizé yo o non Papa-a ak Pitit la ak léspri Sin-an, fè yo obsèvé tout lòd mouin pasé (Mt 28,29-30) Sé pa yon mision ki fasil. Gin jou, dékourajman-an fò, tankou sa té rivé pou Sèvitè Granmèt la (Is 49, 4) pou Jérémi (Jr 11,18; 12,6;15,10-21; 17,12-18; 18,18-23; 20, 7-18), pou Éli (1 R 19,4), pou Jonas (Jon 4,3) pou Moyiz (Ex 32,32). Sou Koua-a, Jézu di: "Bondié mouin, Bondié mouin, pouki sa ou lagé mouin?" (Mc 15,34; He 5,7 "cum clamore valido" = "avèk yon gran rèl"). Min Bondié pa janm kité misionè-l san konsolasyon. Yon Anj vi-n ankourajé Jézu nan jadin Jétsèmani (Lc 22,42), yon Anj ankourajé Profèt Éli nan dézè-a (1 R 19,5-8), yon Anj vi-n ankourajé Agar nan savann nan (Gn 16,7-12; 21,8-19). Lè nou pa ouè kijan nou kapab réponn égzijans mision Granmèt la konfié nou-an, nou doué réponn kan minm. La Tré Sint

Vièj Mari di: "Mouin sé sèvant Granmèt la, sé pou sa fèt pou mouin dapré paròl ou-a" (Lc 1,38) Samuèl di: "Ou mèt palé, sèvitè-ou la ap kouté" (1 Sm 3,9) Moyiz di: "Min mouin" (Ex 3,4), Izayi di: "min mouin, Granmèt voyé-m" (Is 6,8). Granmèt la toujou avèk nou nan tout mision koté li voyé nou. Sé li minm ki nan kòmansman, nan mitan ak nan finisman tout aktivité (Ph 2,13; Ac 17,38; Ep 3,28; He 13,21). San li minm nou pa kapab fè anyin, (Jn 15,5; 1,3), min avèk li nou kapab réalizé tout bagay paské sé li minm k-ap ba nou fòs (Ph 4,13; 2 Co 12,9-10). Si nou konté sou pròp tèt nou, n-ap dékourajé oubyin n-ap tonbé nan lògèy (Is 7,9).

Pou 2 février 1983, jou fèt prezantasyon Granmèt la, nan Tanp la, Pap Jan-Pòl II té voyé mèsaj ki t-ap sèvi pou jounin vokasyon yo. Li té gin kat pouin sitou li té insisté sou yo: Paròl Bondié-a, lapriyè, témouagnaj, apèl pèsonèl. Li té raplé kijan, lè Granmèt la rélé nou, sé pou yon mision spésial nan légliz la, ki pa kapab konfonn avèk okinn plan lézòm. Li té fè sonjé tou kijan sé pou nou lapriyè pou nou mandé Granmèt la vokasyon, paské sé yon kado spésial ki soti nan Bondié (Mt 9,36-38). Li té montré nou tou kijan vokasyon sé tankou yon sémans ki donnin nan yon bon tè (Mt 13,8). Sé pousa kominoté krétyin-an doué sèvi yon sous témouagnaj avèk lafoua, lapriyè, lacharité, apostola, vi krétyin-an. Konsa sé tout kominoté-a ki doué vi-n tounin jèm vokasyon. Li té fè nou sonjé anfin kijan Granmèt la rélé moun li vlé (Mc 3,13), dapré pròp volonté pa-l, dapré bon kè-l, min li fè sa tou pa lintèmédiè lòt moun, tankou-l té fè pou Piè, antan sé André ki té rélé Piè (Jn 1,40), tankou-l té fè pou Natanayèl, antan sé Filip ki té rélé Natanayèl (Jn 1,45). Sé pousa Pap la di nou pa bezouin pè pou nou palé karéman ak lòt yo, pou nou propozé yo yon chémin ak yon diréksion lavi ki gin égzijans pou sèvi Granmèt la pi plis. Sé pou nou gin konfians nan ròl nou, antan Bondié fè nou sèvi kòm intèmédiè, épi tou sé pou nou gin konsidèrasion pou moun nan, antan nou kapab mandé-l égzijans sa yo. Pètèt intèvansyon nou-an, sé sa minm k-ap déklanché tankou yon étinsèl limiè ak favè nan lavi-l. Paròl Bondié, lapriyè, témouagnaj, apèl pèsonèl: sé kat pouin sa yo sitou Pap Jan-Pòl II té dévlopé nan mèsaj li-a. Apré sa, li té fè yon bèl priyè pou jounin vokasyon yo, li té mandé pou nou té fè-l ansanm avèk li tou. Li té di:

" Granmèt Jézu, nan Ané Sint sa-a, koté n-ap réviv évenman ak mèvèy sakré Sakrifis ou fè pou-ou délivré, pou-ou sovè tout moun nan, kouté lapriyè nou: gras a léspri-ou, fè gin anpil moun ou rélé nan sèvis ou: ou li nan kè yo, ou konnin gin anpil ki gin dispozision pou yo suiv ou, pou yo travay pou ou, fè gin anpil jèn ak sa-k mouin jèn ki louvri kè yo gran pou yo résévoua paròl ou k-ap rélé yo, ba yo fòs pou yo aksépté rénonse anpil bagay dapré égzijans

ou, ba yo kè kontan pou yo poté koua-a ki alé avèk désizyon yo-a, tankou ou minm, an premié, ou té poté-l, antan-ou té sètin ou t-ap lèvé byin vivan.

"Tanpri Granmèt Jézu, n-ap lapriyè-ou ansanm ak la Trè Sint Vièj Mari Manman nou, li minm ki té tou pré-ou, lè-ou t-ap ofri sakrifis ou-a pou-ou délivré nou-an, pa lintèmediè-l, n-ap mandé-ou pou, jodi-a ankò, gin anpil nan nou ki gin kouraj, ki rékonèt yo pa anyin, ki fidèl, ki gin kè yo louvri, pou yo réponn "oui", minm jan li minm li té réponn lè Bondié té rélé-l pou-l asosié avèk ou nan mision ou ginyin pou-ou sovè tout moun nan. Amen".

*

Pasteur: Gn 4,2; 48,15; Nb 27,17; 2 Sm 7,7; 1 R 22,17; 1 Chr 17,6; 2 Ch 18,16; Jdt 11,19; Ps 80,2; Qo 12,11; Is 63,11; Jn 2,8; 3,15; 6,3; 10,21; 12,10; 22, 22; 23,1.2.4; 25, 34.35.36; 31,10; 49,19; 50,44; Ez 34,2.a.b.c. d.5.7.8a.b.c.9.10a.b.12. .23a.b; 37,24; Mi 5,4; Za 10.2.3; 11,3.5.8.15.16.17; 13, 7a.b; Mt 2,6; 26,31; Mc 14,27; Jn 10,2.11a.b.12.14.16; Ep 4,11; He 13,20; 1 p. 2,25; 5,4; Ap 7,17.

Brebis: Gn 21,28.29.30; 31,38; 32,15; 33,13; 38,12.13; Lv 5,6; Nb 18,17; Dt 7,13; 15,19a.b; 28,4.18.31.51; 32,14; 1 Sm 15,3; 17,28.34a.b; 22,19; 24,4; Am 7,8; 12,3.4.6; 17,29; 1 Ch 17,7; Tob 1,6; 10,10; Jdt 2,17; 8,26; 11,19; Job 1, 3.16; 21,11; 42,12; Ps 8,8; 78,52.71; 119,176; 144,13; Ct 4,2; 6,6; Is 40,11; 53,7; 65,10; Jer 12,3; 13,20; 23,1.2.3; 31,12; 33,12.13; 50,6.17; Ez 25,5; 34,3.4.10.12a.b.15.17a.b.19. 20.21.22a.b.31; 45,15; Dn 14,3; Os 5,6; Joel 1,18; Ha 3,17; Za 9,16; 10,2; 11,4. 7a.b.c.11; 13,7; Mt 7,15; 9,36; 10,6.16; 12,11.12; 18,12; 25,32.33; 26,31; Mc 6,34; 14,27; Lc 15,4.6; Jn 2,14,15; 10,1.2.3a.b.4.8.11.12a.b.13.14.15.16.26.27; 21,16.17; Ac 8,32; R 8,36; He 13,20; 1 p. 2,25.

Vocation: R 1,1.7; He 3,1; 2 p. 1,10.

Prêtre: Nb 3,52; 5,28a.b.32; Jos 20,6; 2 R 22,4.8; 2 Ch 34,9; Esd 7,5; Ne 3,1.20; 13,28; Jdt 4,6.8.14;15,8; 1 Mac 7,5.21; 10,32.38.69; 12,3.6.7.20; 13,36.42; 14,17.20. 23. 27.30.35.41; 15,2.11.21.24; 16,12.24; 2 Mac 3,1.4.9.10. 16.21.32. 33a.b; 4,29; 11,3; 14,3.13; 15,12; Si 45,24; 50,1; Ag 1,1; Za 6,11; Mt 2,4; 16,21; 20,18; 21,15.23.45; 26,3a.b.14.17.51.57.58.59. 62.63.65; 27,1.3.6.12.20.41.62; 28, 11; Mc 2,26;8,31; 10,33; 11,18.27; 14,1.10.43.47.53a.b.54.55.60.61.63.66; 15,1.3. 10.11.31; Lc 9,22; 19,47; 22,50.54; 24,20; Jn 7,45; 11,49; 18,10.13. 15a.b.16. 19.22. 24.26; 19,21; Ac 4,6.23; 5,17.21.24.27; 7,1; 9,1.14.21; 19,14; 22,5.30; 23,2.4.5.14; 24,1; 25,2.15; 26,10.12; He 2,17; 3,1; 4,14.15; 5,1.5.10; 6,20; 7,26.27.28; 8,1.3; 9,7.11.25.

Prêtrise: 1 Mac 11,27; 2 Mac 4,25; He 7,5.

Sacerdoce: Ex 28,1.3.4.41; 29,1.9.44; 30,30; 31,10; 35,19; 39,41; 40,13.15a.b; Nb 3,3.4; 18,1.7; 25,13; Jos 18,7; 1 Sam 2,28; 1 R 2,27; 1 Ch 5,36; 2 Ch 11,14; Es 2,62; Ne 7,64; 13,29; 1 Mac 2,54; 7,9; 11,57; 14,47; 2 Mac 2,17; Si 45,7.15; Ez 44,13; Os 4,6; He 7,11.12.24; 1 p. 2,5.9

*

* *

SINKIÈM DIMANCH PAK A

Katriyèm dimanch Pak la, Jézu té prezanté tèt li tankou Pòt la; nan sinkièm dimanch la, li montré nou li sé **Chémin-an**. Sé fason sa-a li réponn Toma, ki mandé-l ki koté l-apralé, li pa konnin chémin-an paské li pa minm konnin ki koté l-apralé-a. Jézu di-l: "Mouin sé CHÉMIN-an, lavérité-a, ak lavi-a" (Jn 14,6). Sé pa lintèmediè-l pou nou pasé al jouinn Papa-a. Sa mandé lafoua. Jézu ap bay léson-an yon fason ki pi profon ankò alokasion késion Filip ap pozé-l la, lè-l di-l: "Granmèt, montré nou Papa-a, épi sa ap kont nou" (Jn 14,8). Jézu fè-l konprann kijan moun ki ouè-l, li ouè Papa-a tou. Sèkè li minm ak Papa-a sé yon sèl yo yé (Jn 10,30.38; cf 8,24.25.28.58; 5,17). Sé nan lafoua pou-l aksépté sa. Jézu di-l: "Ou pa kouè mouin nan Papa-a épi Papa-a nan mouin?" (Jn 14,10). Dapré aksion li fè yo, sa montré li minm ak Papa-a yo fè yon sèl, paské aktivité sa yo sé Bondié sèl ki kapab fè yo (Jn 5,17). Jézu minm di moun ki kouè nan li, y-ap fè aksion ki pi gran toujou, paské li minm l-apralé kot Papa-a pou-l voyé léspri Sin-an pou nou (Jn 14,12). Sin Piè mandé nou nan lèt li-a yo li kòm dézièm léktu nan sinkièm dimanch Pak la (1 p. 2,4-9) pou nou mét lafoua nan Jézu-Kri Granmèt la, Ròch sa-a bòs mason yo té jété yon koté-a, min ki vi-n tounin ròch-kouin-an. Moun ki pa kouè nan li, li vi-n tounin yon ròch k-ap fè yo bité pou yo tonbé.

Nan tan Pak la, sé pou nou mandé Granmèt la lafoua. Minm si lafoua nou t-a grosè yon grinn zèb, nou t-a di mòn nan jété kò-l nan lanmè-a, li t-ap obéyi nou. Min Jézu di: Lè Pitit moun nan ap tounin sou tè-a èské l-ap jouinn lafoua ankò? (Lc 18,8). Li mété nou nan pozision pou nou fè atansyon, pou nou pa kité yo pran tèt nou avèk bagay ki parèt dévan jé sèlman, k-ap troublé lafoua nou. Nan kòmansman lévanjil sinkièm dimanch Pak la (Jn 14,1), li mandé nou pou nou pa kité kè nou troublé, pou nou **kouè** nan Bondié, épi pou nou kouè nan li minm tou. Li raplé nou kijan nan lakay Papa-a gin anpil koté pou nou rété. Pa gin dé nanm ki sanblé nan mouatié. Gin plas pou tout moun, chak moun nan fason pa-l. Ginyin sé lévanjil la y-ap préché, gin dèt sé malad y-ap souin, gin lòt ankò sé kominoté-a yo résponsab (Rom 12,6-8; 1 Co 12,8.10.28-30; Ep 4,7-13). Chak moun gin fason pa-l pou-l réalizé mision Granmèt la té préparé pou li-a, pou-l poté koua-a ki té tayé pou zépòl li-a. Konsa nou pa doué dékourajé, antan nou konprann chaj la trò lou pou nou poté, antan n-ap di nou pap janm rivé nan bout chémin-an, paské chémin-an trò lou pou nou; Jézu di nou sé li minm ki Chémin-an. Profèt Éli té bouké, li té kouché nan dézè-a, apré li té fi-n maché pandan yon jou. Dòmi pran-l, li dékourajé, li di Bondié li mèt pran lavi-l, paské li pa kapab ankò, tout moun ap fè konplo kont li, li rété pou kont

li ap défann laloua-l la; tout vré Profèt yo, yo fi-n touyé yo; sé moun k-ap sèvi zidòl sèlman ki rété ap pran pòz profèt yo. Li té brav antan li té provoké mové profèt sa yo apré li té fi-n prezanté tèt li dévan roua Akab ki t-ap chèchè-l (1 R 18,8-19), li té fè difé sièl la désann sou sakrifis pa-l la, li té touyé mové profèt sa yo (1 R 18,20-46). Min apré sa, li té bliyé sovè kò-l, paské rènn Jézabèl ki t-ap sèvi zidòl sa yo t-ap chèchè-l pou touyé-l (1 R 19,1-2). Sé lè sa-a li vi-n fèb kon yon ti bébé, li pran plinyin (1 R 18,3-4). Rout la long dévan jé-l, sab la cho anba pié-l, fòs li flébi, li minm ki té fi-n fè difé désann sot nan sièl la (1 R 18,38), épi li té fè dlo lapli tonbé tou sot nan sièl la (1 R 18,45), kouliè-a sé li minm ki lagé kò-l atè, tankou Jonas ap fè yon lè, ak dékourajman (Jon 4,3.8), tankou Jòb (Jb 7,15), tankou Tobi (Tb 3,6), tankou Moyiz (Nb 11,14), tankou Jérémi ap plinyin lè-l pa ouè klè dévan pèsékision yo épi li pa ouè kijan Granmèt la ap défann li (cf Jer 15,10), tankou anpil Profèt konn fè, antan yo bliyé, lè yo fi-n préché lòt moun yo pou yo pran pasians, sé yo minm atò ki bézouin pou dèt moun préché yo tou pou yo pran pasians nan tou pa yo. Fè yon lòt ti kou tanpri, nou pa gin doua lagé lè n-ap fè travay Bondié. Sa-k fè gin dé foua nou dékourajé fasil la, sé paské nou konprann sé nou minm sèl ki kapab fè tout bagay. Tou sa lòt yo fè, li manké kichòy dévan jé nou. Nou toujou anvi pou dèt moun fè konpliman pou nou, pou yo ouè sa nou fè, pou yo drésé nou kòm modèl pou tout moun. Nou pa aksépté dèt moun édé nou, oubyin si nou kité yo fè kichòy, sé nou minm ki pou voyé dènié kout-jé-a. Lè konsa Bondié pèmèt nou jouinn désépsion, nou échoué, nou pa ouè rézilta travay n-ap fè dépi konbyin tan-an. Pandan touazan mèt jadin rézin-an vi-n ap chèché frui nan pié fig frans la ki té nan mitan jadin-an, min li pa jouinn. Li té vlé koupé-l, pou-l pa rét ap sousé tè-a pou granmési; min jéran jadin-an di-l pou-l pran pasians ankò pandan yon ané, l-ap mété fimié; otréman l-a koupé-l si-l pa donnin apré sa (cf Lc 13, 6-9). Granmèt la pran pasians avèk nou, paské li konnin kijan nou fèt, sé pousiè nou yé (Ps 103,8.14); sé nou minm ki pa pran pasians avèk pròp tèt nou, paské nou gin tròp prétansion, nou gin trò gro lidé sou pròp tèt nou (cf Ps 131,1). Konsa nou pa doué troublé, minm si nou rivé glisé, nou bité, nou tonbé (Lc 22,61; Jn 21,17); n-a lévé, n-a piété, n-a bouaté, n-a trinnin, n-a rivé kan minm yon lè.

Jézu Granmèt la sé li minm ki rout la (Jn 14,6). Nou pa doué ap gadé nan bout chémin-an pou nou kalkilé konbyin distans ki rété nou ankò. Sa ap dékourajé nou, paské sé chak jou Bondié ba nou favè ak fòs pou mézi li mandé nou fè-a. Travay chak jou kont li (Mt 6,34). Chémin-an sé Jézu li minm (cf Jn 6,21), sé pou nou kolé kò nou sou li, pou nou kité-l travay nan nou; tou sa n-ap fè, sé li minm k-ap fè-l, dapré sa Sin Pòl di nou: "Sé pa

mouin k-ap viv ankò, sé Jézu-Kri k-ap viv nan mouin" (Ga 2,20). Sé Jézu minm ki di nou nan finisman lévanjil sinkièm dimanch Pak la (Jn 14,12) travay li fè yo, n-ap fè yo tou, épi n-ap fè sa-k pi konsékan minm toujou. Sèké lè-l t-ap di Apot yo sa, sé té jou Jédi-Sin-an, li té gin pou-l té monté nan sièl pou-l voyé léspri Sin-an pou nou. Minm si nou pa ouè ak jé nou ki sa n-ap réalizé, sé pou nou sonjé sa nou pa ouè yo pi inpòtan toujou (He 11,13-16); minm si nou gin inprésion nou échoué nan aktivité misionè nou, nou pa doué dékourajé. Bondié pa kité nou ouè sa k-ap fèt nan sékrè, nou t-a kité lògèy anvayi nou, nou t-a konprann sé ak pròp fòs nou nou réalizé yo, nou t-a tonbé fasil, nou t-a gaté travay Bondié yo ak lanvi, ak lanbision. Sé pou nou viv nan **lafoua**, tankou Abraam k-ap maché an prezans Bondié (Gn 17,1; cf Énòk: Gn 5,22.24; Noé: Gn 6,4), tankou Moyiz k-ap maché kòm si li té ouè Sila-a yo pa kapab ouè-a (He 11,27). Yon lè, Abraam té rivé di Bondié: "Ki sa ou-ap ban mouin, m-apralé san pitit" (Gn 15,2). Sé lè sa-a Bondié té fè-l soti déyò, li té fè-l gadé sièl la ak tout zétoual yo. Li té mandé-l si-l kapab konté yo, sé konsa pitit li ap anpil (Gn 15,5). Abraam kouè, sa rann li kòrèk (Gn 15,6; Rom 4,3; Ga 3,6s; Jc 2,23). Sin Jan-Batis té rivé yon lè nan prizon-l nan, li voyé mandé Jézu si sé li minm k-ap vini-an oubyin si sé yon lòt pou yo tann. Jézu profité fè anpil mirak dapré klas sa profèt Izayi té promèt Mési-a t-ap fè yo, li voyé répons bay Sin Jan-Batis pou ankourajé-l (Mt 11,2-6). Granmèt la konnin nou fèb, li konnin minm si nou abitué déplouyé anpil aktivité pou nou asiré fondasion lafoua dèt moun, lè sé tou pa nou nou dékourajé vit; sé pou sa li promèt nou léspri-a k-ap konsolé nou-an, k-ap ba nou fòs la (Ac 1,8). N-ap mandé Manman Mari, Rèn Apot yo, pou-l louvri kè nou pou nou résévoua kado fòs léspri-a

*

Gin anpil plas lakay Papa-a, jan lévanjil sinkièm dimanch Pak A-a di nou-an (Jn 14,2). Sin Pòl di gin plas pou Apot, pou Profèt, pou Évanjélis, pou Gadyin, pou Savan sakré (Ep 4,11); gin plas pou sa k-ap fè mirak, pou sa k-ap géri moun, pou sa k-ap rann tout kalité sèvis, pou sa k-ap dirijé, pou sa k-ap palé divès lang, pou sa k-ap bay ésplikasyon mèvèy sakré yo (1 Co 12,28s). Nan premié léktu sinkièm dimanch Pak A-a, douz Apot yo déklaré fidèl yo: sa pa nòmral pou yo minm yo kité Paròl Bondié-a, pou y-al okipé sèvis manjé (Ac 6,2). Yo fè chouazi sèt moun ki gin léspri Sajès, yo pozé min sou yo, yo konsakré yo pou sèvis sa-a kòm diak. Yo minm minm yo rété fidèl nan lapriyè-a ak sèvis Paròl la (Ac 6,4), konsa sé minm kay la y-ap bati, min chak moun sé yon ròch vivan ki antré nan konstriksion kay la, jan Sin Piè di nou nan dézièm léktu sinkièm dimanch Pak A-a (1 p. 2,4).

Nan moua oktòb 1987 la, té gin sètièm Sinòd Èvèk yo ki té fèt a-Ròm, sé té sou vokasion avèk mision Layik yo nan légliz la ak sou tè-a vintan apré Konsil Vatikan II-a. Pap Jan-Pòl II té voyé yon Lèt ki té akonpagné liv yo rélé "Instrumentum laboris" la (instriman travay), ki té sèvi instriman travay pou Èvèk yo nan Sinòd la; liv sa-a té rasanblé konsidèrasion divès péyi yo té voyé a-Ròm sou répons kèsion Ròm té voyé ba yo nan premié Liv la yo té rélé "Lineamenta"-a (gran lign yo), ki té trasé kèk gran lign pou édé réfléksion yo-a. Nan Lèt li-a, Pap la té sité pasaj koté Konsil Vatikan II palé sou apostola Layik yo (Apostolicam actuositatem, 2), ki montré kijan layik yo ap fè apostola, antan y-ap dépansé tèt yo pou lévanjil la pasé nan lavi moun yo, pou yo vi-n sin ("Ils exercent concrètement leur apostolat en se dépensant à l'évangélisation et à la sanctification des hommes"), antan y-ap fè tè-a vi-n kòrèk nèt nan léspri lévanjil la (il en est de même quand ils s'efforcent de pénétrer l'ordre temporel d'esprit évangélique et travaillent à son progrès de telle manière que, en ce domaine, leur action rende clairement témoignage au Christ et serve au salut des hommes. ib). Pap la té sité "Lumen Gentium" tou (niméro 37), dokiman konsil Vatikan II sou légliz la, ki montré kijan Èvèk yo ak Prèt yo doué rékonèt ròl ak réponsabilité Layik yo, épi yo doué édé yo réalizé yo. Li té di: "Nous avons le devoir de reconnaître et de promouvoir, de façon concrète, la dignité et la responsabilité des laïcs. Nous avons le devoir de les aider dans l'accomplissement des tâches qui leur sont propres dans l'Église et dans les réalités terrestres". Li sité "Presbyterorum ordinis" tou (niméro 9), dokiman Vatikan II osijè Prèt yo, ki gin dévoua pou yo chèché ouè kalité spésial Bondié bay Layik yo, pou yo édé yo fè yo dévlopé. Li di: "Vatican II nous rappelle le devoir de découvrir dans la foi, les charismes, les plus humbles comme les plus sublimes, qui, sous de multiples formes, sont donnés aux laïcs et de les reconnaître avec joie et de les cultiver avec diligence". Liv ki té sèvi kòm instriman travay pou sètièm Sinòd Èvèk yo ki té fèt nan moua oktòb 1987 la ("Instrumentum laboris") li té fè sonjé plas jèn yo (No. 48), plas médanm yo (No. 48), plas pòv yo (No. 49) nan légliz la; li té raplé sa dézièm Sinòd éstraòdinè Èvèk yo té palé-a ("Evangelii nuntiandi") sou fason pou poté lévanjil la nan chak pèp antan nou respékté fòm konpréansion pèp yo, sa yo rélé "inculturation de l'Évangile"-la (No. 47). Min li té fè sonjé tou pou nou fè atansyon pou nou pa bliyé sa yo rélé "Évangélisation de la culture" la tou. An minm tan n-ap poté lévanjil la avèk respè fòm konpréansion pèp yo, sé pou nou fè lévanjil la bay mèsaj li gin pou-l bay la, san nou pa ouété anyin ladan-l. Sé li minm ki gin fòs pou-l transfòmé mantalite pèp yo, pou-l korijé déviasion yo ("Instrumentum laboris" 47). Pou 20 désanb 1988, Pap la voyé mèsaj pou tout tè-a, sou tit: "Exhortation

apostolique post-synodale CHRISTIFIDELES LAICI sur la vocation et la mission des Laïcs dans l'Église et dans le monde". Li kòmanté pasaj lévanjil Sin Matié-a (Mt 20,1-16): Mèt jadin rézin-an ki soti nan chak moman lajounin-an pou-l al chèché dôt travayè pou jadin-l nan. Li dévlo pé aspè koté Jézu di: "**Nou minm tou**, al travay nan jadin rézin-m nan" (Mt 20,4.7). Li di Layik yo, yo minm tou, yo gin plas yo nan travay légliz la.

Nan premié Léktu sinkièm dimanch Pak A-a (Ac 6,1-7), yo palé osijè vèv Grèk yo. Légliz la té kòmansé gayé tou patou. Sé pa **Juif** sèlman ki té ladan-l. Grèk yo té kòmansé vi-n anpil tou. Ap gin kèk difikilté konpréansion ant dé group sa yo (Rom 15,31; Ga 2,12; Ac 11,2; 15,1ss). Apré yo fi-n touyé Étien nan, ki té youn nan diak Grèk yo, gin yon ti éspri méfians k-ap glisé, atèl pouin group Grèk yo ki pa Krétyin yo ap chèché touyé Pòl (Ac 9,28). Sin Pòl ap chèché viv yon fason pou-l gin bon rélasyon ni avèk Juif, ni avèk Grèk. Premié léktu sinkièm dimanch Pak A-a montré kijan group Juif yo néglijé vèv Grèk yo nan sèvis manjé y-ap séparé chak jou pou pòv yo. Gin yon édikasyon Layik yo ki pou fèt, pou yo konnin yo gin pou yo sèvi témouin lacharité-a ki pa gin moun-pa. Sé yo minm ki pou fè sèvis sa yo, sé pa Prèt yo, minm si moun yo t-a gin plis konfians nan Prèt yo. Prèt yo gin pou yo rèt fidèl nan sèvis Paròl la ak nan lapriyé-a. Layik yo doué okipé fè sa yo rélé "ordre temporel" la dévlo pé nan léspri lévanjil la. Nan premié tan Krétyin yo, yo té chouazi Diak pou okipé sèvis pòv yo. Anpil fòm sèvis sa yo, yo konfié yo bay Layik yo kouliè-a. Sé pou yo dévlo pé kalité ki nésésè pou yo réalizé mision yo nan kèsion sa-a. N-ap mandé Manman Mari pou-l fè nou gin sans dézintérésman, pou nou pa égoyis, pou nou pa sonjé pròp tèt nou anvan lòt yo, pou nou pa chèché avantaj group pa nou, moun minm koté ak nou, zanmi nou, fanmiy nou, pou charité nou louvri nan diréksion tout moun. N-ap lapriyé-l tou yon fason spésial pou Prèt yo toujou kontinué fè Layik yo plis konfians nan kèsion ki konsèné mach "ordre temporel" sa-a, pou Prèt yo yo minm yo rété fidèl nan sèvis Paròl la ak nan lapriyé-a, Pap Jan Pòl II té raplé nan Lèt li té ékri pou Jédi-Sin 1987 la, osijè lapriyé-a.

*

* *

SINKIÈM DIMANCH PAK B

"San mouin minm nou pa kapab fè anyin" (Jn 15,5). Tout bagay sé gras a Paròl Bondié-a yo té fèt. San li anyin pa-t fèt nan tou sa ki té fèt (Jn 1,3). Tout lannuit nou travay, nou fatigé kò nou, san nou pa pran anyin; min sou paròl ou-a n-ap voyé filè yo (Lc 5,5; cf Jn 21,3-6). Jézu kité nou déplouayé aktivité nou san nou pa réglé anyin, pou-l montré nou sé li minm k-ap aji, sé sou li pou nou konté. "Nou tout ki bouké, k-ap rédi anba chaj, vi-n jouinn mouin, m-ap fè nou jouinn répo" (Mt 11,28). Si Granmèt la pa bati kay la, sé pou granmési mason yo ap travay. Si Granmèt la pa véyé vil la, sé pou granmési santinèl la ap fè pòs (Ps 127,1). Sé pou granmési n-ap kouché ta, n-ap lévé bonè, si nou pa mété Granmèt la nan kòmansman, nan mitan ak nan finisman travay la. Sé li minm k-ap réalizé ni sa nou anvi-a, ni sa n-ap fè-a pou sa li minm li désidé-a (Ph 2,13).

Gin anpil moun, yo lévé matin san lapriyè, yo kouché asouè san lapriyè; tou sa y-ap fè nan lajounin-an, yo pa rouzé-l ak yon ti lapriyè minm. Sé sou pròp tèt pa yo yo konté. Lapriyè-a sé réspirasion nanm nan. Si nanm nan pa réspiré, l-ap toufé. Si branch la pa rét sou pié rézin-an, l-ap séché (Jn 15,6); si-l rét sou pié rézin-an, tout lavi pié rézin-an ap pasé nan li, l-ap donnin frui (Jn 15,5). Sin Pòl di nou sa n-ap fè, soua nan manjé, soua nan bouè, soua nan travay, ninpòt ki bagay, sé pou bèlté Granmèt la pou nou fè-l, sé nan diréksion Granmèt la pou nou gadé (1 Co 10,31). Okinn sitiasion pa doué anpéché nou rét fè youn ak Granmèt la: tray, tèt chajé, minm si nou bouké ak pròp tèt pa nou, si afè nou pa maché byin jan nou t-a vlé-a, sé pa yon rézon pou nou boudé sou Granmèt la. Jézu di nou si nou donnin frui, l-ap nètouayé nou pou nou donnin pi plis (Jn 15,2). Kontrariété pa doué dékourajé nou. Sé Granmèt la k-ap pròpté nou, pou-l aprann nou konté sou li pi plis.

Minm Profèt yo rivé yon lè, dékourajman pran yo. Profèt Éli rivé jous li mandé lanmò (1 R 18,4). Jonas fè minm bagay (Jn 4,3). Moyiz plinyin kot Granmèt la ak tèt chajé pèp la t-ap ba li (Nb 11,15). Jézu ranmasé tout dékourajman sa yo, li mété yo sou do-l, pou-l ranplase yo ak fòs léspri Sin-an l-ap voyé jou lapankot la. An-atanan, li ranmasé tout voua sa yo pou-l fè yo monté kot Bondié Papa-a, antan-l di sou Koua-a: "Bondié mouin, Bondié mouin, pouki sa ou lagé mouin?" (Mt 27,46; Ps 22,2.) Gin anpil bagay n-ap fè, nou konprann sé ak fòs nou nou fè yo; époutan sé favè Bondié ba nou. Li ba nou inpréssion sé nou minm k-ap aji. Ni li minm ni nou minm fè aksion-an. Min sé li minm ki fòs prinsipal la. Nou minm nou

nan min-l tankou yon instriman, ak tout intelijans nou, ak tout volonté nou, ak tout sans nou.

Chémin-an té rèd pou Profèt Éli. Li maché pandan yon jou pou-l al fè rétrèt sou mòn Sinayi. Dépi sou premié jou-a, nan dézè-a, li gin tan bouké, li kouché, li dòmi, lè-l fi-n di Bondié pran lavi-l, li pa kapab ankò. Bondié voyé yon Anj ki vi-n révéyé-l. Li di-l: "Lévé, manjé, otréman chémin-an ap tròp pou ou". Profèt Éli lévé, li ouè yon pin ki kuit anba sann, ak yon krich dlo bò tèt li. Li manjé, li bouè. Min li té tèlman bouké, li kouché ankò. Yon lòt foua ankò Anj la révéyé-l, li di-l minm bagay. Li lévé, li manjé li bouè. Li vi-n jouinn fòs, li maché karant jou ak karant nuit jous rivé Sinayi, koté Bondié bay-l mèsaj li (1 R 19,1-8). Gin dé travay nou kòmansé, nou rivé yon pouin, n-ap mandé kòman pou nou fè pou nou kontinué. Nou pa ouè ni dévan ni dèyè. Époutan Psòm nan di: Granmèt, pa lagé travay min-ou kòmansé-a, bay travay nou-an rézilta (Ps 138,8). Apot yo té voyé sinn tout nan nuit, yo pa-t pran anyin. Yon ti paròl Jézu sèlman yo kouté, yo jouinn kantité pouason plin filè-a (Lc 5,1-11). Sé konsa Granmèt la di nou nan Profèt Izayi: Nan tan mouin vlé-a, m-ap aji vit (Is 60,22). Yon jou pou Granmèt la sé tankou milan. Milan sé kon yon jou (2 p. 3,8; Ps 90,4; cf Ps 84,11).

N-ap mandé Manman Mari pou-l ba nou asirans nan sa n-ap fè. Minm si n-ap maché tankou founi, Bondié gin pouvoua pou-l fè sa-l té fè pou Abraam ak Sara-a (Gn 18,10; 21,1-7), ni pou A-n, manman Samuèl la (1 Sm 1,19s), ni pou manman Samson (Jg 13,5), ni pou Élizabèt ak Zakari (Lc 1,13). Tè-a mèt pa-t janm kapab donnin frui, Bondié kapab fè-l bay frui yon moman (Mt 3,9). Sé lafoua li mandé nou, tankou la Trè Sint Vièj Mari nan nòs Kana-a (Jn 2,5). Jézu mèt fè kòm si li pa sou bò nou, sé pou nou fè tankou Sint Tèrèz lanfan Jézu ki kontinué frapé nan pòt Kamèl la jous yo louvri pou li, tankou Sint Bènadèt ki pèsévéré ap mandé la Trè Sint Vièj non-l, minm si la Trè Sint Vièj kontanté-l souri chak foua, joutan pou 25 mas 1858, li déklaré-l: "Je suis l'Immaculée Conception". Jous anvan-l mouri, Sin Loui-Mari-d-Monfò pa-t ko gin Pè ki té angajé nèt nan konpagni-l nan; min tankou Abraam li té espéré malgré tout kontrariété espérans la té prezanté-a, a tèl pouin li rivé pasé flanbo-a nan min Mulo, pandan Vatèl té nan mision nan yon parouas; dé sa yo avèk kat Frè li té ginyin, sé té ti ponyin-an ki té kòmansé fanmiy nan. San Granmèt la nou pa kapab fè anyin min avèk li nou kapab fè tout bagay (cf 1 Co 1,25).

"Sé pou nou rété nan mouin, minm jan mouin nan nou" (Jn 15,4). Sa-a tou, sé yon rapròchman dé sa nou kapab rélé "fòmil kontra-a". Nan katriyèm dimanch Pak B-a, Jézu té di osijè Bon Gadyin-an: "Mouin konnin mouton-m yo, épi mouton-m yo konnin-m tou" (Jn 10,14). Nou té rapròché-l osijè paròl kantik dè kantik la ki di: "mouin pou rinmin-m nan, rinmin-m nan pou mouin tou" (Ct 2,16; cf 6,3; 7,11). Sé nan sans Bondié té di osijè pèp li Israèl: "M-ap Bondié yo, yo minm y-ap pèp mouin" (Jer 31,33; cf Os 2,25). Konsa parabòl pié rézin-an nap kalkilé sou li nan sinkièm dimanch Pak B-a, nou kapab rapròché-l dé parabòl Bon Gadyin-an nou kalkilé sou li nan katriyèm dimanch B-a. Sé minm lansègnman-an k-ap kontinué, sof nan parabòl Bon Gadyin-an Jézu ap palé ak tout foul pèp Juif la, min nan parabòl pié rézin-an sé ak patizan-l yo sèlman l-ap palé. Prémie pati lévanjil sin Jan-an (chapit 1-12), sé tankou révélation piblik pou tout moun, pou tout foul Juif la; épi dézièm pati-a (chapit 13-21), sé pou patizan yo sèlman, sé révélation privé. Parabòl Bon Gadyin-an nan prémie pati-a, parabòl pié rézin-an nan dézièm pati-a.

Jézu montré nou kijan pou nou kolé sou li. Nou pa sèlman tankou mouton yon gadyin ap kondui, nou sé branch ki kolé sou pié rézin-an, k-ap jouinn minm nouriti ak pié rézin-an k-ap koulé anndan-l. Nou kapab di avèk Sin Pòl: sé pa mouin k-ap viv ankò, sé Jézu-Kri k-ap viv nan mouin (Ga 2,20). Lavi batèm nan n-ap réfléchi sou li-a, li konsékan anpil. Lè nou gin préokipasyon ki anpéché nou sonjé lavi batèm nan, sa riské fè lavi sa-a ap dévlopé o-ralanti, sa kapab minm fè-l vi-n finnin, lè nou bay avantaj tè-a plis plas pasé lavi nanm nou. Si lavi sa-a pa koulé nan nanm nou ankò akoz péché mòtel nou fè, nou tankou branch ki sèch, yo koupé yo, yo jété yo nan difé, mandé Bondié padon (Jn 15,6). Sèlman Jézu di nou, moun ki kolé sou li, ki donnin frui, Papa-l nétouayé branch li, li ouété fèy ki fi-n jòn yo, li koupé ti boujon ki pa pèmèt frui yo gonflé, li nétouayé branch yo pou frui yo kapab vi-n pi bèl, pi plis (cf Jn 15,2). "San mouin minm nou pa kapab fè anyin" (Jn 15,5). Sé yon mèsaj ki fè nou sonjé sa-k té rivé nan kay ro moun Babèl yo t-ap fè-a (Gn 11,1-9). Kay la rété san-l pa fini, paské moun yo té vlé bati san yo pa mandé Bondié pèmision, non sèlman sa, yo té vlé al pran plas Bondié nan sièl la (Gn 11,4). Bondié gayé langaj yo, youn pa konprann sa lòt la ap mandé-l, sé pou sa Psòm nan di: "Si Granmèt la pa bati kay la, sé pou bontan mason yo ap travay" (Ps 127,1). Sin Jan di: "Tout bagay té fèt pa lintèmédiè-l; san li minm anyin pa-t fèt nan sa-k té fèt" (Jn 1,3). Jézu di: moun ki kolé sou li, li mèt mandé tou sa-l vlé, Papa-l ap ba li-l (Jn 15,7). Sèk sé pa li minm k-ap mandé anyin, sé léspri Sin-an k-ap mandé pou li (Rom 8,26-27), léspri Sin-an konnin ki sa pou-l mandé, paské li konnin sa-k

akòdé ak volonté Bondié Papa-a. Sèlman pou nou donnin anpil frui, fò nou aksépté antéré anba tè-a, sa vlé di, sé pou nou aksépté prèské bliyé sa nou mandé-a, pou nou tann lè Bondié vlé ba nou-l, jan-l vlé ba nou-l; lapriyé-a, sé di: "Bondié, sé pou volonté-ou fèt!" (Mt 6,10).

Si Jézu chouazi parabol pié rézin-an pou-l montré jan nou doué fè yon sèl avèk li, sé paské sé détou sa-a, Profèt yo té konn pran pou montré rélasyon pèp Israël té doué ginyin avèk Bondié nan lansyin Téstaman. Sé Israël ki té doué vré pié rézin-an, min Israël raté mision-l, atèl pouin Profèt Izayi fè-l répròch (Is 5,1-7), li di-l Bondié t-ap tann li bay bon kalité rézin, min sé ti grinn chèch li bay, ti grinn chodé, ti grinn rabi. Sé tankou sé yon prosè Profèt la louvri kont Pèp la. Sè lé kontrè liv Kantik dè kantik la, ki yon liv rinmin, rinmin ant yon fiancé ak fiancé-l, liv sa-a té prezanté Pèp la tankou yon jadin rézin. Pèp la pa-t fidèl pou-l té okipé jadin rézin-an (Ct 1,6), min alafin li vi-n fidèl (Ct 8,11-12). Profèt Ozé di Israël sé té tankou yon jadin rézin ki byin donnin (Os 10,1). Profèt Ézékièl konparé-l tou ak yon jadin rézin (Ez 15, 1-8). Psòm nan di: Israël sé té yon pié rézin Bondié té planté sou yon bèl ti mòn (Ps 80,9), li raché-l sot nan péyi Éjip, li transplanté-l sou mòn Siyon-an; min apré sa, lè pié rézin-an fi-n byin donnin, lè-l fi-n bay branch ki kouri jous bò lariviè ak bò lanmè, lè sa-a Granmèt la raché lantouraj li, atèl pouin bèt ki sot nan rak boua yo vi-n pilonnin-l, vi-n sakajé-l, kochon maron vi-n manjé-l (Ps 80,9-17). Sé istoua pèp la ki pa fidèl. Toutotan li fidèl, Bondié protéjé-l; min lè-l abandoné Granmèt la, Granmèt la kité-l pou kont li, pou-l ouè si-l kapab fè kichoy. Jézu gin rézon di san li minm nou pa kapab fè anyin (Jn 15,5). Sé tankou tout nannuit Apot yo ap ramé, y-ap batay kont van-an avèk vag yo avèk nannuit la (Jn 6,18s), sé lè sa-a Jézu vi-n ap maché sou dlo-a, li pasé bò koté yo, yo pè, li fè yo rékonèt li, yo invité-l monté nan batiman-an, sé lè sa-a batiman-an gin tan rivé koté yo té vlé alé-a, san yo pa konprann kijan li fè gin tan fè tout chémin sa yo sou dlo-a anvan jé bat (Jn 6,21). Dépi yo invité Jézu sèlman, Jézu fè yo gin tan rivé koté yo t-apralé-a, paské Jézu sé rout la, li sé pòt la, an minm tan (Jn 14,6; 10,7). Apot yo té pasé tout nannuit yo t-ap péché san yo pa pran anyin (Lc 5,5; Jn 21,5). Sé lè Jézu pasé yo lòd pou yo voyé filè-a tèl koté, sé lè sa-a yo pran anpil pouason joutan filè-a vi-n plin dépasé mézi. San Jézu nou pa kapab fè anyin (Jn 15,5); min ak Jézu nou kapab fè tout bagay. Sin Pòl di: "Mouin kapab fè tout bagay nan sila-a ki ban-m fòs la" (Ph 4,13; cf Col 1,29; 2 Cor 12,9s). Gin anpil moun k-ap fè travay Granmèt la, min sé kòm si sé afè pa yo y-ap okipé. Sé kòm si non Granmèt la sèvi yon sinp kouvèti pou yo. Lapriyé-a pa gin okinn plas pou yo, oubyin plas yo ba li-a tèlman piti, sé kòm si li pa égzisté. Lè pou yo lapriyé, sé kòm si sé toufé y-ap toufé. Sé

aktivité-a sèlman ki konté. Époutan Profèt Izayi di: nou ansint épi nou soufri, min sé kòmси pou nou té anfanté van (Is 26,18).

N-ap mandé Manman Mari favè sa-a pou nou pa janm kòmansé anyin san nou pa lapriyè, épi pou tout aksion nou vi-n tounin lapriyè, dapré sa Sin Pòl di nou: soua n-ap manjé, soua n-ap bouè, soua n-ap fè ninpòt ki bagay, sé pou Bondié pou nou fè tout bagay, pou tout bagay kapab vi-n tounin yon louanj, yon rémèsiman, yon démann (cf 1 Co 10,31; Col 3,17). N-ap sonjé sa Psòm nan di: "Granmèt, travay min-ou nan, pa lagé-l, sa-ou té kòmansé-a, fè-l rivé jous nan bout" (Ps 138,8). Konsa minm jan Sint Élizabèt té di la Trè Sint Vièj: "frui vant ou-a béni" (Lc 1,42), n-a donnin anpil frui (Jn 15,8), frui sa-a ki pa dèt bagay pasé Jézu-Kri li minm.

Tout branch ki donnin, Bondié Papa-a nétouayé-l (Jn 15,2). Lè nou rankontré difikilté, nou konn pansé sé akòz sa nou fè ki pa bon nou jouinn pinision (cf Jn 9,2; Lc 13,2,4). Époutan sé yon nétouayaj Bondié ap fè, pou-l fè nou donnin plis frui, nan lafoua. Sèké dévan difikilté yo, nou blijé aji avèk plis lafoua. Dévan nétouayaj sa-a Bondié ap fè nan nou-an, nou bézouin fòs léspri Sin-an pou nou pa dékourajé; okontrè pou nou déplouayé plis aktivité nan travay Bondié-a. Tout branch ki donnin frui, Bondié Papa-a nétouayé yo, pou yo donnin pi plis frui toujou. Sin Pòl di: **frui** léspri Sin-an sé charité, kè kontan, kè pozé, pasians, rann sèvis, bon kè, konfians nan lòt yo, bon-jan, otorité sou mové tandans nou (Ga 5,22). Sèlman frui sa yo ap dévlopé ansanm ak mové panchan kò-a, jan Sin Pòl di nou tou nan minm Lèt Galat yo, antan-l sité kèk défo ki fòmé tankou yon katalòg péché avèk: mové plézi, mové lidé, libètinaj, sèvis zidòl, maji, rayisans, kinbé moun nan kè, jalouzi, kòlè, diskision, dézakò, séparasion, lanvi, dévègondaj, manjé ak bouè dépasé mézi (Ga 5,19-21). Sé tankou zèb k-ap pousé nan jadin-an ansanm ak bon sémans la. Sé tout tan Bondié Papa-a ap nétouayé jadin-an pou mové zèb yo pa toufé bon sémans la.

Sint Térèz davila ak Sin Jan-d-la-Koua di nou: sou chémin koté n-ap maché pou nou fi-n rankontré Bondié nèt la, gin **nuit** nou blijé travèsé. Sé nuit sa yo yo rélé **purification**-an. Bondié ap pròpté nou, l-ap nétouayé nou, antan-l fè nou travèsé nuit ki noua, pou-l fè nou dékolé sot nan tandans kò-a tout tan pi plis (sa Sint Térèz d-Avila ak Sin Jan-d-la-Koua rélé "**purification des sens**" la, "**nuit des sens**" la), épi pou-l fè nou détaché sot nan pròp volonté pa nou ak pròp limiè intéljans nou (sa yo rélé "**purification de l'esprit**"-a, "**nuit de l'esprit**"-a). Plis n-ap maché pou nou rankontré Bondié, sé plis Bondié ap fè travay sa-a nan nou, ni nan sansibilité nou, ni nan volonté nou ak intéljans nou, pou nou vi-n dosil nèt nan min-l, nan souf

léspri Sin-an. Nan sans sa-a Jézu di: si nou donnin frui, Papa-a ap nétouayé nou, pou nou donnin pi plis toujou (Jn 15,2). Nan "Je vous salue Marie"-a, nou di "Le **FRUIT** de vos entrailles est béni" (Lc 1,42). La Trè Sint Vièj Mari donnin frui ki anlè tout frui. N-ap rinnèt li kè nou, pou-l fè nou donnin minm frui avèk li.

*

* *

SINKIÈM DIMANCH PAK C

Lévanjil la palé sou kòmandman nouvo-a Jézu kite pou Apot li yo: rinmin-an (Jn 13,31-35). Nan ki sans Kòmandman sa-a nouvo? Nan lansyin Téstaman déja té gin kòmandman sa-a nan laloua-a (Lv 19,18) ak nan Profèt yo (Is 58,3-7). Si-l nouvo, sé pa nan natu kòmandman-an minm li nouvo, sé nan fason kòmandman-an apliké-a li nouvo. Nan lansyin Téstaman-an, sé minm rinmin-an ki té ginyin, minm jan sé minm lafoua-a tou ki té ginyin dépi Abraam. Sèlman nan lansyin Téstaman, rinmin sa-a pa-t gin anpil dimansion, li pa-t dépasé frontiè fanmiy, group, ras, rélijion, sosiété, péyi. Yo té mandé pou rinmin prochin-an, min pou rayi lènmi-an (Mt 6,43). Si yo mandé pou pa tiré vanjans, sé pa rapò a moun ki nan minm ras la (Lv 19,18). Si yo fè lacharité bay étranjé, sé étranjé ki abité minm koté ak pèp la (Tob 1,9). Prochin-an, yo té konsidéré-l tankou moun ki pròch tout bon vré. Minm Jonas té réfizé al préché Niniv, paské Niniv té louin, épi sé té lènmi pèp la. Sé Nouvo Téstaman-an k-ap poté lapè pou ni sa ki louin ni sa ki pròch (Ep 2,17; cf Is 57,19). Dépi Jézu-Kri fi-n mouri pou-l rasanblé tout pitit Bondié yo ki té gayé yo (Jn 11,52), pou-l fè yo tout vi-n tounin yon sèl kò-d-fanmiy, sé tout moun ki vi-n tounin prochin, minm sa-k lènmi yo, sa vlé di sa-k louin yo (Lc 10,29-37).

Kòmandman-an vi-n nouvo nan fason li apliké. Nan lansyin Téstaman yo té di pou nou rinmin prochin-an tankou nou minm (Lv 19,18). Si nou rinmin tèt nou yon fason égoyis, n-ap rinmin prochin-an tou yon fason égoyis. Tout fason, si gin konkirans ant pròp tèt pa nou avék intèrè prochin-an, pi plis pou nou fè, sé séparé mouatié-mouatié ant li minm ak nou minm, si nou rinmin-l tankou nou minm. Nouvo Téstaman-an dépasé dimansion sa-a tou avék kòmandman nouvo Jézu vi-n poté-a. Li di sé pou nou rinmin prochin-an tankou li minm li rinmin nou (Jn 13,34; 15,12). Gin yon gran diférens ant rinmin yon moun tankou nou rinmin pròp tèt nou avék rinmin-l tankou Jézu té rinmin nou. Jézu rinmin nou pi plis pasé li rinmin pròp tèt li, sèké li minm minm li di: pi bèl prèv pou nou bay nan rinmin-an, sé rinnèt lavi nou pou sila-a nou rinmin-an (Jn 15,13). Sa vlé di sé rinmin-l pi plis pasé nou rinmin pròp tèt nou. Gin yon dépasman nan nouvo Téstaman-an pa rapò a lansyin Téstaman-an, sé nan sans sa-a kòmandman-an nouvo.

Dézièm Léktu sinkièm dimanch Pak C-a (Ap 21,1-5) palé sou sièl nouvo-a ak tè nouvo-a. Bagay ansyin yo disparét. Granmèt la di li fè tout bagay nouvo. Pak, sé nouvo pin san lévin (1 Cor 5, 8), sé yon kè nouvo ak yon lèspri nouvo (Ez 36, 26; 11, 19). Rinmin-an dépasé mézi, li fè yon moun vi-n nouvo tout bon vré, li réfèt nan Jézu-Kri ki lévé vivan, moun ansyin-an

disparèt, sé yon moun tou nèf ki parèt, san rayisans (Ep 2,13-18; cf 2 Co 5,17).

Prémié Léktu sinkièm dimanch Pak C-a (Ac 14,20-26) montré prémié mision Pòl ak Banabé, ki dépasé frontiè Juif yo, pou y-al jouinn payin yo, pou yo montré kijan rinmin-an dépasé frontiè, limit péyi, ras, kilti, rélijion. Rinmin-an louvri nan tout sans.

Sé nan Granmèt la sous rinmin-an sòti (Psòm-répons: Ps 144 = 145), li sansib, li gin pitié, li gin pasians, kè-l sansib anpil pou tou sa-l fè.

*

Kòmandman Jézu ba nou, sé pou nou youn rinmin lòt, minm jan li rinmin-n, jous li mouri sou yon Koua. Pouki rézon kòmandman sa-a nouvo? Pou dé rézon. Prémié rézon-an, sé paské lansyin Tèstaman-an té di pou rinmin prochin-an, pou rayi lènmi-an (Mt 5,43). Jézu di: minm lènmi nou sé prochin nou (Lc 10,25-37). Dézièm rézon-an sé paské lansyin Tèstaman-an té di pou rinmin prochin-an tankou pròp tèt pa nou (Lv 19,18). Jézu di pou nou rinmin prochin-an tankou li minm li rinmin nou, sa vlé di plis pasé pròp tèt pa nou (Jn 13,34; 15,12); sèké li bay lavi-l pou nou, li mandé nou fè minm jan pou prochin-an (Jn 15,13).

Sé égzijans ki dépasé nou. Nou bézouin konkou léspri Sin-an pou réyalizé yo. Jézu promèt léspri Sin-an pou sa. Jou Lapankòt la, tout moun fè yon sèl kò-d-fanmiy; yo tout konprann lang Sin Piè ak Apot yo ap palé-a (Ac 2,1-11). Sé Léspri Sin-an ki fè nou palé yon langaj nouvo: langaj lacharité-a (1 Cor 13,1). Sé li minm ki fè nou aprann blyé tèt nou, pou nou sonjé lòt yo (Lc 1,36.39ss; Jn 2,3). Prémié kominoté-a té mété tout byin ansanm, Apot yo té séparé yo dapré bézouin chak moun (Ac 2, 44s; 4,32-35). Koté léspri Sin-an yé, li fè tout bagay vi-n nouvo. Li ba nou yon kè nouvo ak yon léspri nouvo (Ez 36,26; 11,19). Li fè vi-n gin yon sièl nouvo ak yon tè nouvo (Ap 21,1). Li fòmé yon pèp nouvo. Li fè nou réyalizé kòmandman nouvo-a (Jn 13, 34). Sé yon mèsaj nouvo (Is 42, 9), ki invité nou chanté yon kantik nouvo (Is 42, 10), paské tout bagay vi-n nouvo (Is 43,19).

N-ap mandé Manman Mari pou nou pa rété sou ringn lansyin Tèstaman, antan nou kinbé moun nan kè nou, min pou nou aprann padonnin sa lòt fè nou, pou nou rinmin prochin nou tankou Jézu rinmin nou. Koté youn rinmin lòt, koté-k gin lacharité, la Bondié yé. Li pi fasil pou palé sou lacharité pasé pou réyalizé égzijans li. Asé souvan, lè n-ap pasé nan lari, sitou bò maché oubyin bò légliz, koté ki gin anpil moun k-ap antré sòti avék ti lajan nan bous yo, nou konn oué pòv ki chita oubyin ki kroupi atè-a, k-ap mandé

lacharité. Gin dé foua, yo insisté tèlman, sé jous nan fon kè nou voua yo kònin. Ginyin ki nan bézouin tout bon. Gin dòt ki fè sa sèvi métié. Zèb la mélé ak sémans la. Malgré tou nou kapab rékonèt Jézu, san nou pa chèché fè diférans. Tou sa nou fè pou yon moun, sé pou li nou fè-l (Mt 25, 40).

Té gin yon sòlda ongroua yo té rélé Matin, li t-ap suiv katéchis pou résévoua batèm. Yon nuit, li té sou chéval li, sé té nan sèzon frèt, li t-ap fè patrouy; li rankontré yon pòv, ki gin ranyon kòm rad sou li malgré frédi-a, lanèj, laglas; sa fè tout kè-l frissonnin, li pran manto ki té sou li-a, li chiré-l nan dé mouatié ak épé li té gin nan min-l nan, li bay pòv la yon mouatié, li kité lòt mouatié pou-l kouvri kò-l. Nan nuit li ouè Jézu ki parèt dévan-l, abiyé ak bò manto-a li té bay pòv la; li di-l mèsi pou bèl jès sa-a li té fè pou li-a. Sé konsa Jézu té parèt dévan Sin Pòl sou rout Damas la, li té fè-l répròch poutèt li t-ap pèsékité-l la (Ac 9,5; 22,8; 26,15). Jézu sé Tèt, nou sé manb (Ep 1,22s; Col 1,18).

Nan lévanjil sinkièm dimanch Pak C-a, léson yo bay sou lacharité-a, li vizé dirèktéman patizan yo ki anndan légliz la, pou fason youn sèvi ak lòt, sa sèvi kòm témouagnaj pou moun ki déyò yo.

Sé pa dirèktéman jan nou konn abitué pran oriantasion kòmandman sa-a yon fason jénéral. Nan sinkièm dimanch Pak C-a, apati pasaj litiji-a chouazi-a (Jn 13,31-33a.34-35), légliz invité nou gadé pito moun ki nan kominoté-a, pou fason n-ap viv avék yo, sa vi-n tounin yon égzanp pou moun ki pa gin lafoua yo, pou yo rékonèt nou kòm patizan Jézu-Kri, dapré sign lacharité nou ginyin antré nou-an. Sé sa minn Jézu té di nan Lapriyè sasèdotal li-a, pròp jou Jédi Sin-an, li té mandé Papa-a pou tout patizan-l yo fè yon sèl, minm jan li nan Papa-a épi Papa-a nan li minm, pou moun yo sou tè-a kapab kouè réyèlman vré sé Papa-a ki té voyé-l (Jn 17,22-23). Konsa, léson litiji sinkièm dimanch Pak C-a ba nou-an, sé pa tèlman fè pòv yon ti lacharité sèlman, min sé bay témouagnaj dévan tout moun, sitou sa-k pa gin lafoua yo, kijan nou tout kòm manb Jézu-Kri nou fè yon sèl.

Sa Sin Pòl di nan premié Lèt Korintyin yo (1 Co 1,10-16), li pèmèt nou vidé limiè sou lévanjil sa-a, pou nou évité fè diskision, évité fè bann-a-pa, évité chèché chèf bann k-ap trinnin nou nan yon diréksion k-ap fè nou kité témouagnaj la nou gin pou nou bay dévan lézòm nan kijan nou fè yon sèl nan Jézu-Kri. Sin Jan té ékri lévanjil li-a, sitou dézièm pati-a (Jn 13-21), pou montré lavi kominoté-a. Sé jistéman nan kòmansman dézièm pati lévanjil-li-a litiji-a pran konsign pou sinkièm dimanch Pak C-a (Jn 13, 31-35). Jès Jézu fè-a, minm Piè pa konprann li (Jn 13,7): Li panché, li pasé dévan tout Apot yo, li lavé pié yo, li di sé yon égzanp li ba yo, pou yo fè minm jan, pou youn

lavé pié lòt. Sa sa vlé di: youn lavé pié lòt? Jézu li minm bay sans la, nan dènié pasaj lévanjil sinkièm dimanch Pak C-a, nan kòmandman nouvo-a, li kité pou nou-an: sé pou youn rinmin lòt minm jan li rinmin nou (Jn 13,34). Égzijans kòmandman sa-a, sé nan "minm jan Jézu rinmin nou-an", sé la li rété. Jézu rinmin nou yon fason ki pa gin limit. Li bay lavi-l pou nou. Sou koua-a, non sèlman li padonnin bon laron-an, min li jouinn yon éskiz pou-l ajouté nan padon li bay pou tout moun yo k-ap maltréte-l la, li di pou Papa-a padonnin yo paské yo pa konnin ki sa y-ap fè (Lc 23,34). Sé yon égzanp ki égzijan. Olié nou fè prosè intansion moun ki pa alé nan minm sans avèk nou, lè konduit yo pa antré nan santiman nou, sé pou t-a réfléchi pou nou oué okontré ki kalité éskiz nou t-a jouinn pou nou ajouté nan padon n-ap ofri Bondié pou yo. Chak moun gin yon bò ki bon nan li. Gin yon provèb ki di: si zanmi-m gin yon sèl grin jé, mouin gadé-l sou bò ki pa avèg la. Chak moun gin yo moso ki bon nan li. Olié n-ap chèché sa moun nan fè ki mal pou nou toujou prêt pou nou kritiké-l, li t-a pi bon si nou t-a éseyé ouè ki sa-l fè ki bon, pou nou pran-l sou bò ki bon-an. Si yon moun blésé, sé pa koté ki blésé-a pou nou touché-l nou konnin n-ap fè-l mal. Sé pou nou gin délikatès pou prochin nou, sitou anndan minm kominoté nou, anndan légliz nou. Si sa ki tou pré nou-an, nou pa kapab antann nou avèk li, nou pa bezouin prétann di n-ap antann nou ak sa ki louin nou. Si sa nou ouè-a, nou pa dakò avèk li, nou pa bezouin prétann di n-ap dakò ak Bondié nou pa ouè-a. Oubyin sé paròl nan bouch sèlman sa yé, sa pa soti nan fon kè nou. Gin moun, tout tan y-ap kritiké lòt; tou sa yon lòt fè, ki pa kadré avèk lidé yo, li pa bon. Sé lidé pa yo sèlman ki pou pasé. Lè y-ap fè yon konvèsasion avèk yon lòt moun, yo pap kouté-l pandan lòt la ap palé-a, yo minm y-ap suiv pròp lidé pa yo, y-ap kalkilé davans ki kalité répons yo kapab paré pou yo krazé rézonman pa lòt la. Yon konvèsasion konsa pa kapab donnin frui. Konvèsasion ki pou poté lapè-a, sa yo rélé "dialogue" la, lè dé moun ap diskité yon problèm, li gin téknik li, pou-l poté frui. Otréman sé yon pièj li yé. Sé kòm si yo atiré lòt la nan yon konplo, yo fè kòm si y-ap palé avèk li pou yo diskité problèm avèk li, min désizion-an déjà fi-n fikse byin solid; yo fè tankou sòlda ki byin protéjé nan sitadèl, k-ap tiré boulèt kanon sou lènmi. Sint Tèrèz lanfan Jézu bay kòm konsign pou lè n-ap palé ak yon moun, si-l koupé konvèsasion-an, nou pa doué tounin sou lidé nou ankò sé pou nou kité sa nou t-ap di-a, pou nou meté tout atansyon nou sou sa li minm l-ap di-a. Sint Tèrèz di: sa-a sé yon sékrè pou nou kapab gin kè nou dégage tankou flè ki louvri nan frèchè granmatin, nan limié solèy ki fèk lévé. Otréman n-ap tankou flè sa-a yo rélé "ront" la, sa yo rélé "sensitive" la, kon yo touché-l, li fèmin la minm. Gin moun ki gin siséptibilité, yo pa kapab palé avèk yo, pou sa pa fè yon afè-déta la minm; yo blijé ap pran pinsèt lè pou yo abòde

yon késion avèk yo, yo déjà konnin davans ki pozision y-apral kinbé. Yo pap lagé yon ti pous, sé yo sèl ki konnin, sé yo sèl ki gin espérian. Lè konsa group moun yo ap lagé yo pou kont yo, minm si yo pa déklaré karéman yo kont yo, min y-ap évité yo. Ki témouagnaj sa kapab yé nan légliz la?

Jézu invité nou pou nou youn rinmin lòt minm jan li rinmin nou, li ajouté: sé sign sa-a k-ap pèmèt yo rékonèt nou sé patizan-l. Li voyé nou sèvi-l témouin jous nan bout tè-a (Ac 1,8). Kijan prémié kominoté krétyin yo té montré yo té patizan Jézu-Kri, sé jistéman nan fason yo t-ap viv antan youn rinmin lòt tankou frè ak sè (Ac 2, 42-47; 4, 32-35).

Pandan tout tan ki suiv Pak la, jous rivé nan Lapankot, sé liv Travay Apot yo yo li chak jou nan lamès kòm prémié léktu. Li montré témouagnaj prémié krétyin yo. Nan lévanjil sinkièm dimanch Pak C-a, Jézu ba nou égzanp, lè-l fi-n lavé pié Apot yo, li ba nou konsign pou nou rinmin lòt minm jan li minm li rinmin nou, nou gin intèrè pran modèl sou Apot yo ak prémié krétyin yo ki té mété konsign sa-a an aplikasion. Lavé pié lòt la, sa vlé di padonnin sa-l fè-ou. Min nan ki oriantasion pou nou konprann kòmandman nouvo lévanjil sinkièm dimanch Pak C-a, sé pa sèlman bay yon pòv lacharité, lagé yon ti sink kòb nan kouli yon pòv ki kroupi atè-a dévan péron légliz la oubyin nan kouli yon maché, oubyin k-ap prominnin nan lari, oubyin k-ap éyéyé chans li bò vouayajè k-ap tann okazion pou yo pati. Nou kapab fè pòv lacharité san nou pa gin lacharité, jan Sin Pòl di Korintyin yo (1 Co 13, 3) sa pap sèvi nou anyin. Sé yon sinp jès ki pa gin konsistans. Pou youn lavé pié lòt, sé pou youn padonnin lòt ak tout fon kè-l, jan Jézu-Kri li minm té padonnin nou, antan li pousé charité-a joutan li éskizé nou, li di nou pa konnin sa n-ap fè. Gin moun nou manké déga, si nou té konnin sa yo té yé, nou pa t-a manké yo déga; yo fè Jézu pasé mizè; si yo té konnin sé Pitit Bondié, sé Bondié li minm minm ki dévan yo, yo pa t-a manké-l déga. Li konn sa. Sin Pòl di Filipyin yo kijan Jézu, égal li égal ak Bondié-a, li pa konsidéré sa tankou yon byin li mété apa pou pròp tèt pa-l, okontrè li rabésé tèt li jous li vi-n sanblé ak lézòm, li désann pi ba toujou, li aksépté mouri tankou yon ésklav, jous lanmò lakoua. Sé pou sa minm Bondié lévé-l anlè, li ba-l yon non ki anlè tout non, pou tou sa-k vivan nan sièl, sou tè ak anba tè mét ajénou dévan-l, pou tout lang déklaré li sé Granmèt pou bèlté Bondié Papa-a (Ph 2, 6-11). La Tré Sint Vièj Mari déklaré nan Magnifikat li kijan Bondié lévé moun ki rabésé tèt yo tankou pòv épi tou kijan li rabésé sa k-ap fè arogan yo (Lc 1, 48-52). Padonnin pa fasil, sitou si moun nan ki fè lòt la afron-an, li gin yon plas ki t-a mandé pou sé li minm ki mété dlo nan divin-l lè-l abòdè lòt la. Époutan si nou pa padonnin, nou pa sèvi Jézu témouin, jan-l mandé-a (Ac 1,8). Sé pou nou youn rinmin lòt minm jan li minm li rinmin

nou, sé nan sign sa-a y-a rékonèt nou sé patizan-l. Priyè sasèdotal la di minm jan Jézu fè youn ak Papa-a sé konsa pou nou fè youn tou, pou moun yo sou tè-a kapab rékonèt sé Papa-a ki voyé Jézu-Kri (Jn 17, 21) Nou sé manb li, li sé Tèt la. Si manb yo divizé antré yo, y-ap chiré Kò-a ankò, kòm si sa pa-t kont li té pasé mati yon foua sou Koua-a. Tou sa nou fè pou youn nan pi piti sa yo ki koué nan li-a sé pou li minm nou fè-l, tout mank déga nou fè yo tou, sé li minm nou fè-l. Li padonnin, nou minm tou sé pou nou padonnin.

Sin Monfò invité nou pran yon chémin rakousi: La Trè Vièj Mari. Nan mézi nou rimèt li tou sa nou yé, kalité ak défo, difikilté ak siksè, tout tan, san ouété anyin, sa nou pa kapab fè ak pròp fòs nou, sé li minm k-ap fè-l pou nou, k-ap aprann nou fè-l. Koté-l yé, léspri Sin-an la, li minm Jézu té bay Apot yo pou yo padonnin-an (Jn 20, 22s). Sé pa nou minm k-ap padonnin, sé Jézu ki nan kè nou, k-ap pran tout volonté nou ak tout intéljans nou ak tout sansibilité nou pou-l padonnin nan nou.

*

Nouveau: Ex 1,8; Lv 13,16; 26,10; Nb 18,12.27; 28,26; Dt 7,13; 11,14; 12,17; 14,23; 18,4; 32,17; Jg 5,8; 1 Sm 10,5.18.24.27; 2 R 18, 14a.b; 19,30; 1 Ch 8,9; 2 Ch 20,5; Ne 10, 38; Jdt 8,22; 16,13; 1 Mac 1, 27; 4, 47.48.53; 2 Mac 15, 19; Job 29, 20; 32,19; Ps 4, 8; 33, 3; 40,4; 96, 1; 102,19; 144, 9; 149,1; Pr 3, 10; Qo 1,9; Ct 7, 14; Sg 14, 6; 19,11; Si 9, 10a.b; Is 24,7; 37,31; 42,9-10; 43,19; 48,6; 49, 26; 62, 2; 65, 17a.b; 66, 22 a.b. 23; Jer 8,10; 31,31; Ez 11,19,17,9; 18,31; 36,26a.b; 47,12; Dn 10, 14; Os 2,10.11.24; 7,14; 9,2; Joel 1,5; 4,18; Ag 1,11; Mt 9,17a.b; 26,29; Mc 1,27; 2,22 a.b; 14,25; 16,17; Lc 5, 37 a. b; 38.39; 22,20; Jn 4, 54; 13, 34; Ac 4, 21; 7, 18; 17,19; R 6, 4; 1 Co 5, 7; 11, 25; 2 Co 3, 6; 5, 17 a. b; Ga 6, 15; Ep 2, 15; 4, 24; Ph 1, 26; Col 2, 16; 3, 10; 2 Tm 1, 12; He 8, 8-3; 9, 15; 12, 24; 2 p. 3, 13; 1 Jn 2, 7. 8; 2 Jn 5; Ap 2, 17; 3, 12a.b; 5,9; 14, 3; 21, 1.2.5. (Cf Qo 1,10; Jer 31, 22 = subst)

Nouveauté: Ac 17, 21; R 7, 6.

Yon sièl nouvo, yon tè nouvo, Jézu vini, tout bagay nouvo (N-ap réglé p. 500)
 Mouin ouè Jérusalèm tou nèf k-ap désann sot lakay Bondié (N-ap réglé p. 393)
 Kantik nouvo (N-ap réglé p. 572)
 Si youn chèché rinmin lòt (N-ap réglé p. 530)
 Sé pou youn rinmin lòt (N-ap réglé p. 528)
 Koté youn rinmin lòt (N-ap réglé p. 174)

*

* *

SIZIÈM DIMANCH PAK A

Jézu di Apot yo li pap kité yo ôfélin, l-apral kot Papa-a, l-apral voyé léspri Sin-an pou yo (Jn 14, 15-21). Nan prémié léktu sizièm dimanch Pak A-a (Ac 8,5-8.14-17), Apot yo rivé lasamari, yo lapriyé pou moun yo ki té batizé o non Granmèt Jézu yo, épi léspri Sin-an tonbé sou yo (Ac 8,14-17). Dépi nan sizièm dimanch Pak la y-ap sonjé dimanch lapankot, koté léspri Sin-an ap vidé sou tout tè-a. Dépi jédi lasansion, lè Jézu ap monté nan sièl la pou-l voyé léspri Sin-an, sé tankou névèn léspri Sin-an ki kòmansé, antan yo montré nou la Trè Sint Vièj Mari avèk Apot yo ki rasanblé ap lapriyé nan kay chanmòt la, apré Jézu fi-n monté nan sièl la, pou yo mandé Bondié voyé léspri Sin-an sou yo. Nan tan sa-a, li bon pou nou résité litani léspri Sin-an chak jou. Sé léspri Sin-an ki fè nou minm nou vi-n sin. Dépi nan batèm nan Bondié mété nou apa, pou nou vi-n sin. Li fè nou sin antan li fè nou vi-n tounin manb Kò sèl Pitit li-a ki sin-an. Sé Bondié sèl ki Sin tout bon vré, nou minm nou sin yon fason "participée", nou patisipé nan "sainteté" Bondié-a. Sé chak jou nou gin pou nou fè éfò pou nou kité léspri Sin-an fè nou vi-n pi sin, antan l-ap dévlopé lavi lagras la nan nanm nou. Konsa jou n-ap travèsé al nan péyi sièl la, n-a rivé nan dégré Bondié té prévoua pou nou-an.

Nou abitué réprésanté nou Papa-a akoz papa ki sou tè-a; nou abitué réprésanté nou Pitit la akoz pitit ki sou tè-a. Min li pi difisil pou nou réprésanté nou léspri Sin-an, paské sou tè-a nou pa ouè okinn léspri. Léspri pa tonbé anba jé nou, min nou, zòrèy nou. Nou fè kèk konparézon pou nou palé osijè léspri Sin-an, nou palé yon fason an parabòl, nou di sé tankou van, sé tankou difé, sé tankou dlo, sé tankou fòs. Nou mété anpil konparézon; min konparézon sé pa rézon. Li prézanté yon aspè vérité-a pou nou kapab kalkilé, min li pa prézanté tout vérité-a. Nou pa doué konfonn konparézon-an avèk vérité li réprésanté-a, pou nou t-a pansé léspri Sin-an sé yon van. Jézu di Nikodèm léspri-a souflé tankou van, nou pa konnin koté-l soti ni koté-l apralé (Jn 3,8). Nan kòmansman kréasion-an, léspri Sin-an t-ap plané anlè dlo yo, dapré liv lajénèz la (Gn 1,2). Nan langaj ébré, koté lansyin Téstanman-an ékri-a, sé minm mo-a ki vlé di ni léspri ni van ("rouah": רוח). Jou lapankot la, sé tankou yon gro kout van yo tandé ki souflé sou kay la, koté patizan yo té rasanblé-a. Sé lè sa-a minm yo tout vi-n plin ak léspri Sin-an ki vi-n pozé sou yo sou fòm lang difé. Konsa, sé tankou van, sé tankou difé (Ac 2,1-11). Jézu té souflé sou Apot yo jou li lévé vivan-an, pou-l ba yo léspri Sin-an (Jn 20,22), tankou pou yon nouvo kréasion, pou fè sonjé lè Bondié té souflé souf vivan nan nin Adan-an li té fi-n fè ak labou-a (Gn 2,7) pou-l ba-l lavi-a, jan liv lasajès raplé-a (Sg 15,11). Jou batèm Jézu-

a, Sin Jan-Batis té ouè léspri-a pozé sou li sou fòm yon kolonb (Jn 1,32; cf Mt 3,16; Mc 1,10; Lc 3,22).

Nan tout aktivité yon Krétyin léspri Sin-an la. Dépi jou lapankot la, li nan légliz la, l-ap travay, li pap sispann travay avèk anpil énjè. Konsa nou doué kité-l travay nan nou; lè-l jouinn yon nanm ki dosil, li travay byin nan li. Sé konsa li té fè la Trè Sint Vièj rivé dènié dégré yon kréatu kapab rivé sou tè sa-a nan rinmin Bondié, paské la Trè Sint Vièj Mari té kité-l fè sa-l vlé avèk li, sitou dépi lanj Gabrièl té di-l: "Léspri Sin-an ap vi-n sou ou, fòs sila ki anro nèt la ap kouvri-ou anba lonbraj li". (Lc 1, 35). Lè la Trè Sint Vièj Mari rivé kay Élizabèt, tout kay la vi-n plin ak léspri Sin-an: Jan-Batis souké kò-l nan vant manman-l akòz fòs léspri Sin-an ki fè-l vi-n sin nan vant manman-l (Lc 1,15.41.44); Élizabèt anvayi ak léspri Sin (Lc 1,41); Zakari vi-n plin ak léspri Sin-an, bouch li vi-n kapab palé, kòd lang li lagé, li palé tankou Profèt (Lc 1,64.67; cf Lc 2,27). Sé ak fòs léspri Sin-an Élizabèt fè konpliman pou Mari, antan-l di: "Ou béni pasé tout fi, épi frui ki soti nan vant ou-a li béni tou" (Lc 1,42). Sé louanj sa-a nou abitué fè tou nan "Je vous salue Marie"-a. Sé pou nou sonjé mandé la Trè Sint Vièj Mari minm favè sa-a li té sèvi lokasion pou Jan-Batis jouinn nan, ansanm ak Élizabèt ak Zakari-a. Koté la Trè Sint Vièj Mari yé, léspri Sin la, jan Sin Monfò di-a. La Trè Sint Vièj té nan kay ro-a ansanm avèk patizan Jézu yo, li t-ap lapriyé ansanm avèk yo (Ac 1,14), pandan névèn léspri Sin-an ant lasansion ak lapankot la. Koté-l yé, léspri Sin-an vi-n la. Nan mézi nou viv dapré jan Sin Monfò di nou-an, antan nou rinmèt li tout nou minm nan konsékrasion nou fè chak matin-an, nan minm mézi sa-a, léspri Sin-an ap anvayi nou, pou-l fè nou vi-n sanblé ak Jézu-Kri, pou-l fè Jézu-Kri grandi nan nanm nou, jous nan dimansion Bondié té prévoua pou nou-an. Koté léspri Sin-an yé, mové léspri yo pati. Li pa soutiré prézans yo, yo minm yo pa kapab sipòtè prézans li. Konsa nan mézi nou gin dévotion aléga la Trè Sint Vièj Mari, l-ap fè léspri Sin-an vi-n nan nou, épi mové léspri-a pap akosté nou, minm si l-ap chèché fè nou pè nan divès maniè.

Jézu di l-ap lapriyé Papa-a, l-ap ba nou yon lòt Avoka, pou-l rété avèk nou pou tout tan: léspri Vérité-a, sa tè-a pa kapab résevoua-a; sé léspri sa-a minm k-ap raplé nou tou sa Jézu té anségné nou, sé li minm k-ap fè nou konprann anpil bagay ki t-a chapé nou, sé li minm k-ap fè nou apliké tèt pasaj lansègnman Krétyin-an nan tèt sikonstans lavi nou (Jn 14,16.17.36; 16,13). Si Granmèt la té kité nou pou kont nou, kòmandman-l yo t-a trò lou pou nou obéyi. Min léspri Sin-an ap fè yo vi-n léjé pou nou, jan Jézu avèti nou, lè-l di nou pou nou vi-n jouinn li, nou tout k-ap rédi anba gro chaj, l-ap fè nou jouinn répo (Mt 11,28). Léspri Sin-an, sé léspri ki bay répo koté fatig

la yé-a, ki bay fréchè koté chalè-a yé-a, ki rédrésé koté chémin-an krochi-a, ki géri koté kò nou oubyin nanm nou blésé-a, ki asoupli koté volonté nou trò rèd la. Sé li minm n-ap mandé Manman Mari, pou-l ba nou répo nan travay la, pou-l ba nou fréchè nan chalè-a, pou-l ba nou konsolasion nan lapinn nan, pou-l ba nou limiè nan fènoua-a, pou-l lavé sa-k sal, pou-l rouzé sa-k sèk, pou-l géri sa-k blésé, pou-l asoupli sa-k rèd, pou-l chofé sa-k glasé, pou-l drésé sa-k krochi, pou-l ba nou sèt kado sakré yo: Sajès, Intélijans, Konsèy, Fòs, Sians, Krint, Piété.

*

* *

SIZIÈM DIMANCH PAK B

Ni nan dézièm léktu-a (1 Jn 4,7-10), ni nan lévanjil la (Jn 15, 9-17), pou sinkièm dimanch Pak B-a, Sin Jan raplé nou gran kòmandman Jézu té pasé nou-an: sé pou nou youn rinmin lòt. Min rinmin sa-a sé pa nan santiman nou li sòti, sé pa paské san nou alé ak yon moun ki fè pou nou rinmin-l. Sé nan Bondié minm rinmin sa-a sòti. Sé sa ki fè Sin Jan di: sé Bondié ki rinmin nou an prémié (1 Jn 4,10), sé sa ki fè nou kapab rinmin-l tou. Si rinmin nou ginyin pou prochin nou, sé nan Bondié li pran rasi-n, non sèlman n-ap rinmin tout moun minm jan Bondié fè-a, min n-ap rinmin ata lènmi nou minm jan Jézu-Kri fè vizavi nou-an, paské sé lènmi-l nou té yé, lè nou té nan péché-a. Li pa okipé sa. Li bay lavi-l pou nou. Si Jézu bay lavi-l pou nou, malgré nou té lènmi avèk li, nou pa doué tann sé moun ki pou fè prémié pa-a nan diréksion nou, pou fè nou éskiz an prémié, si nou gin yon ti kont avèk yo. Jézu réfè tout bagay tou nèt (Ap 21,1-5). Kòmandman rinmin-an tou, li réfè-l tou nèt. Li pa mandé nou pou nou rinmin prochin nou minm jan ak pròp tèt pa nou, tankou nan lansyin Téstaman (Lv 19,18), min pou nou dépasé pròp tèt pa nou, pou nou bliyé pròp tèt pa nou, pou nou rinmèt lavi nou pou prochin nou, puiské li mandé nou pou nou fè minm jan ak li. Sé pou nou rinmin prochin nou minm jan li minm li rinmin nou. Sé nan sa kòmandman-an vi-n nouvo pa rapò a lansyin Téstaman-an (Jn 13,34).

Nou pa doué gadé sou figi moun tou pou nou rinmin. Dévan Bondié tout moun sé moun. Léspri Sin-an tonbé ata sou payin yo ki pa-t ko minm batizé. Piè té pè al lakay yo. Léspri Sin-an montré li adopté yo minm jan ak tout moun. Bondié pa gadé sou figi moun pou-l rinmin. Dévan-l, pa gin Grèk, ni Juif, ni gason, ni fi, ni ésklav, ni moun lib, ni pòv, ni rich, tout moun sé moun (Ep 2,17; Ga 3,28; R 10,12; 1 Co 12,13; Col 3,11). Yo tout sé pitit Bondié; sé pou sa li rinmin tout moun, li mandé nou pou nou konsidéré tout moun tankou pitit minm papa ak minm manman avèk nou.

*

Litiji sizièm dimanch Pak B-a insisté sou kòmandman rinmin-an (Jn 15,9-17). Jézu présizé li rinmin nou minm jan Papa-a rinmin-l nan (Jn 15,9). Konsa sé nan Papa-a Rinmin-an sòti, li pasé nan Jézu, li travèsé nan nou, li rivé nan prochin nou. Kòmandman sa-a konsékan anpil, si nou pran lapinn konsidéré-l jous nan fin-fon sa-l yé-a. Sé pa ti rinmin sou po nou bay prochin nou, sé vré Rinmin-an ki sòti nan Papa-a ak nan Pitit la: sé **léspri Sin-an** li minm minm: touazièm Pèsòn la Trè Sint Trinité-a, ki soti nan Papa-a ak nan Pitit la tou, jan nou déklaré nan Krédo-a. Jézu di: si nou rété nan kòmandman-l yo, n-ap rété nan Rinmin-l nan (Jn 15,10). Sé minm

bagay Sin Pòl di sou yon lòt fòm: tout kòmandman yo ranmasé nan yon sèl, sé Rinmin-an (Rom 13,8-10). Sint-Ogustin di: "Rinmin, épi fè sa ou vlé!". Sa vlé di: si ou rinmin, sé bon bagay sèlman ou-ap fè. Yon moun ki rinmin, li gin kè kontan, minm nan tout tray l-ap pasé (2 Co 7,4; 12,10; Col 1,24). Pi bèl fason pou yon moun montré li rinmin, sé bay lavi-l pou moun li rinmin yo (Jn 15,13).

Jézu pa rélé nou sèvitè ankò, min zanmi (Jn 15,15), paské li fè nou konnin sa Papa-l di-l. Profèt Amòs di: "Granmèt Bondié pa fè anyin san-l pa dévoualé sékrè-l bay sèvitè-l yo Profèt yo" (Am 3,7). Profèt yo sé sèvitè, paské révélation-an pa-t ko rivé nan dènié degré-l. Apot yo jouinn tout révélation-an, sé poua Jézu rélé yo zanmi-l. Osijè Moyiz yo di Bondié té palé ak li "fas a fas, **tankou** yon moun palé ak zanmi-l" (Ex 33,11; cf Nb 12,7-8, Dt 34,10; Ex 33,20). Sé yon konparézon. Apot yo bénéfisié **réalité**-a. Yo sé zanmi tout bon vré, paské léspri Sin-an kondui yo nan tout lavérité-a (Jn 16,13), nan tout révélation-an, li lévé **voual** la, jan mo "révélation"-an vlé di-a, dapré sa Sin Pòl fè Korintyin yo rémaké-a (2 Co 3,13), lè l-ap palé osijè "voual" la ki té sou figi Moyiz la, pou-l montré Révélation-an pa-t ko fi-n réalizé nan lansyin Téstaman. Tout Révélation-an ranmasé jistéman nan kòmandman Rinmin-an. Sa pa vlé di nan lansyin Téstaman-an yo pa-t gin kòmandman sa-a, min yo pa-t gin tout sans li. Nan dé fason li té gin limit, ni nan longè, ni nan lajè; nan longè sé pou moun ki nan minm péyi-a sitou kòmandman sa-a té apliké, sé pa-t tèlman pou lènmi yo, atèl pouin Jézu blijé montré profèsè laloua-a minm Samaritin-an sé prochin paské li bésé sou malad Juif la pou-l okipé-l (Lc 10,25-37); nan lajè, sé pa tankou nou minm sèlman pou nou rinmin, jan lansyin Téstaman té mandé-a (Lv 19,18), min sé pi plis pasé nou minm, sé minm jan Jézu té rinmin nou-an, antan li rinmèt tèt li pou nou. Konsa gin dé dimansion koté kòmandman nouvo Téstaman-an dépasé révélation lansyin Téstaman-an: prochin-an sé tout moun, épi sé pou nou rinmin-l plis pasé tèt nou, jous nou bay lavi nou pou li. Lè sa-a nou pa sèvitè ankò tankou nan lansyin Téstaman (Am 3,7), nou sé zanmi, si nou fè sa Jézu kòmandé nou-an (Jn 15,14).

Jézu di sé pa nou minm ki chouazi-l, min sé li minm ki chouazi nou (Jn 15,16). Sé pa nou minm ki rinmin Bondié an premié, sé li minm ki rinmin nou an premié (1 Jn 4,10). Minm si égzijans rinmin-an difisil pou réalizé, sé pou nou sonjé sé pa nou minm k-ap rinmin, sé li minm k-ap rinmin nan nou minm; sé pa nou minm ankò k-ap viv, sé Jézu k-ap viv nan nou (Ga 2,20). Gin dé foua nou gin inpréssion nou gin rayisans nan kè nou; époutan sé santiman nou ki fè rébèl, san volonté nou pa dakò, sé paské karaktè tèl moun pa alé ak karaktè pa nou, malgré tout éfò nou fè pou nou aksépté-l, nou pa

réyisi. Sa pa vlé di nou pa vlé ouè-l pou sa. Sé santiman nou ki pa alé ansanm; nou pa doué konfonn "santi" avèk "konsanti". Nou santi nou pa kapab sipòtè moun nan, min nou pa nésèsèman konsanti pou sa. Lè konsa sé pou nou ofri Bondié Papa-a Rinmin Jézu gin pou tout moun nan, antan nou rinmèt Jézu volonté nou davantaj. Gin dé foua yon moun fè nou yon bagay ki pa fè nou plézi, nou anvi fè-l ésplikasion, oubyin montré-l nou pa kontan; anvan nou kité volonté nou aji, sé pou nou pran tan rété dévan Granmèt la yon ti moman; apré sa sé pa nou minm ankò k-ap réaji, sé Granmèt la li minm ki pran plas santiman nou, ki chanjé réaksion nou sou pa anndan. Chémin Rinmin-an, sé chémin lakoua; Jézu di nou pou nou rénonse pròp tèt nou, pou nou pran koua nou chak jou, pou nou suiv li (Lc 9,33). Nou pa doué konfonn rinmin-an ak sansibilité. Rinmin-an sé yon "vertu théologale", yon kalité ki dépasé tou sa-k natirèl, sé nan Bondié li sòti, Bondié mété-l nan nou alokasion batèm nan, sé nan volonté nou li kòmandé, sé pa nésèsèman nan sansibilité nou. Sé poua tou nou doué fè atansyon pou nou pa konfonn atirans nou ginyin pou yon moun avèk Rinmin sa-a ki soti nan Bondié-a. Gin défoua san nou alé trò byin ak san yon lòt moun, ki fè nou toujou prèt pou nou défann moun sa-a lè yo ataké-l, lè y-ap kritiké-l, nou santi sé nou minm yo touché; épi lè-l alèz, nou kontan anpil pou li, kòm si sé nou minm sa té rivé, nou rivé yon pouin sé ak jé-l nou ouè tout bagay, li kapab minm vi-n tounin yon voual k-ap bouché jé nou, yon rido k-ap anpéché limiè solèy la antré anndan salon lakay la, klèté Bondié-a antré anndan fon kè nou, pou bay Jézu vré plas li. Kon nou gin yon ti kado, sé moun sa-a nou sonjé pou nou bay li, dapré sa Sint Tèrèz davila di nou. Sin Jan-d-la-Koua bay tankou yon balans pou pézé rinmin-an, pou nou égzaminé si sé nan Bondié li sòti; li di si ofi-amézi rinmin sa-a ap dévlopé, rinmin nou ginyin pou Bondié-a ap grandi tou, nou mèt trankil; min si sé bésé rinmin Bondié-a ap bésé pandan lòt rinmin sa-a ap anvayi kè nou-an, sé pou nou sispèk li. Sint Tèrèz lanfan Jézu té ékri pasaj Sin Jan-d-la-Koua-a dèyè do yon imaj li té ginyin nan liv priyè-l pou-l égzaminé konsians li sou vré Rinmin-an, pou okinn rélasyon sou tè-a pa jinnin rinmin li gin pou Jézu-a, vré zanmi-l nan. Jézu di nou sé zanmi li rélé nou (Jn 15,15). Avèk Sin Jan-Batis nou kapab di nou sé zanmi Mésié marié-a (Jn 3,29s), sé pa nou minm ki Mésié marié-a. Nou pap pran plas li nan kè yon lòt moun, ni nou pap kité yon lòt moun pran plas li nan kè pa nou. Sé pou-l grandi, pou nou minm nou bésé nan kè lòt moun yo. Minm si rinmin-an réaji sou sansibilité nou, nou pap kité sansibilité nou kòmandé réaksion nou. Sé yon fòm koua pou nou poté, antan nou koupé kèk rasi-n ki vlé fiksé nou kèk koté, anpéché nou réalizé mision nou, tankou Sint Ja-n de Chantal ki passé sou kò pròp pitit gason-l, ki té kouché nan papòt lakay la, pou té anpéché-l al jouinn Sin

Fransoua-d-Sal, pou fondé kongrégasion Vizitandi-n nan. Jézu di moun ki pi rinmin fanmiy li pasé-l, li pa mérité suiv li (Mt 10,37; Lc 14,26). Sint Bènadèt té déjà travèsé kité Loud al Nèvé pou-l al fè Rélijièz. Papa-l rivé yon jou pou-l vi-n ouè-l, Bènadèt té rinmin papa-l anpil; li té konprann papa-a t-apral pran-l nan bra-l, karésé-l, di-l "ti pitit mouin, dépi konbyin tan mouin pa-t ouè-ou". Lè yo di Bènadèt papa-l ap mandé pou li, li kité tou sa-l t-ap fè, li vòltijé, tèlman li kontan, li louvri dé bra-l, pou-l volé nan kou papa-l. Papa-a minm rété kanpé byin douat, tankou sé dévan yon étranjé li yé, sé premié foua li té ouè Bènadèt abiyé kòm Rélijié. Li té santi tankou yon dévoua pou-l réspékté nouvo pèsonaj sa-a. Papa-a kontanté-l di: "Bonjou Sè Mari-Bèna". Sint Bènadèt santi kè-l fè-l mal; min li té déjà chouazi. Papa-a té édé-l réfè rénonman-an li té déjà fè lè-l té di oui-a. Sint Tèrèz lanfan Jézu té gin yon ti bag nan douèt li yon ti zanmi té fè-l kado; lè ti zanmi-an vi-n sot nan vakans ti Tèrèz montré-l ki jan bag la té rété nan douèt li ap tann li; ti zanmi-an pa okipé Tèrèz minm; Tèrèz vi-n konprann sé Jézu ki té vlé oblijé-l chouazi yon lòt diréksion pou-l jouinn vré Zanmi-an ki pap lagé-l la. Rinmin sé bliyé tèt nou pandan n-ap sonjé Jézu nan prochin-an.

Lè Jézu té gin douzan, Manman-l ak Papa-l té jouinn li nan tanp la, li té ba yo répons ki pa-t sanblé répons ki t-a soti nan bouch yon ti moun ki rinmin manman-l ak papa-l. Min sa-l té di yo-a, sé té yon sign dépasman (Lc 2,49). Rinmin Jézu mandé nou-an gin dépasman ladan-l, dépasman sa-l rélé "chè ak san"-an (Mt 16,17; Jn 1,13). Si mésié-a ap kité manman-l ak papa-l pou-l kolé kò-l kot madanm li (Mt 19,5; Gn 2,24; Ep 5,31), sa pa vlé di li pa rinmin manman-l ak papa-l, min li rivé yon lè pou-l fè chémin-l. Gin anpil dépasman konsa nan lavi nou nou doué fè. Rivé yon lè frui-a mi, nou pa doué kité-l pouri oubyin séché sou pié-a; sa-l jouinn nan pié-a kont li, sé pou-l fè chémin pa-l kouliè-a pou-l ouè si li minm tou li kapab vi-n tounin yon lòt pié boua k-ap bay frui tou, épi k-ap aksépté yon lè pou frui-a kité-l tou, pou-l al fè rout li, pou-l al bay dèt frui tou li minm. Jézu di nou li chouazi nou, li mété nou pou nou alé, pou nou donnin frui, pou frui nou-an diré (Jn 15,16). Rinmin sipozé séparasion. Yon moun ki pa konn séparé, sé yon moun ki pa konn rinmin; sé yon rinmin ki trò égoyis. N-ap mandé Manman Mari pou-l aprann nou rinmin tout bon vré avèk tout égzijans Rinmin-an ginyin ladan-l pou-l sanblé ak Rinmin ki soti nan Papa-a, ki pasé nan Pitit la, ki travèsé nan nou pa lintèmediè lésprî Sin-an, li minm Apot yo ap mandé ant lasansion ak lapankot la, antan yo rasanblé alantou la Trè Sint Vièj Mari pou névèn lésprî Sin-an.

Sé pa nésèsèman koté nou vlé travay Bondié kité nou travay; Jézu di Apot yo li chouazi yo, li mété yo pou yo **pati**, pou yo donnin frui, yon frui ki diré. Léspri Sin oblijé Piè alé pi louin pasé koté-l té vlé; li fè-l al kay payin yo, pou-l batizé Kònèy. Bondié di Sèvitè-l la: sa pa kont pou-l drésé fanmiy Jakòb yo, pou-l ramné rès Israèl yo; l-ap fè-l vi-n tounin Limiè nasion yo, pou délivrans li-a rivé jous nan bout tè-a (Is 49,6). Koté léspri Sin-an yé gin mouvman (Sg 7,22). Li gonflé voual batiman-an, ki pa kapab rézisté-l (Ac 27,15: "éphérométhá" ἐφερόμεθα; 27,17: "éphéronto" ἐφέροντο; 2 P 1,21: "phéroménoi" φερόμενοι). Légliz misionè. Li la pou tout moun. Rinmin-an pa gin frontiè. N-ap mandé Manman Mari pou nou gin souplès anba lòd léspri Sin-an, pou nou kité-l dirijé nou koté-l vlé, pou nou aksépté défèt program nou, chanjé rout nou, pou nou pa bliyé si Jézu-Kri chouazi nou, li gin plan-l sou nou, minm si nou pa ouè sa-l vlé fè avèk nou. Paròl Granmèt la pap tounin vi-n jouinn li san rézilta. L-ap réalizé mision-l, malgré tout kontrariété li kapab rankontré (Is 55,11).

Pa gin pi bèl prèv jan Jézu rinmin
 Li bay lavi-l pou tout zanmi-l
 sou mòn Kalvè;
 Li bay lavi-l pou tout zanmi-l
 ak kè-l ki rét ouvè.

*

* *

SIZIÈM DIMANCH PAK C

Juif yo ap préché lasikonsizyon avèk lobsèvasion laloua Moyiz la (Ac 15,1-29 = premié léktu sizièm dimanch Pak C-a), chaj zanzèt yo pa-t kapab pòté (Ac 15,10; Ga 5,1), chaj yo minm tou yo pa kapab sipoté; min yo maré yo pou yo mété yo sou do pèp ki fèk nan lafoua yo; yo minm yo pap souké yo ak yon ti douèt (Mt 23,4). Chaj Granmèt la lèjé; sé koté-l li invité tout moun k-ap rédi anba gro chaj pou yo vini (Mt 11,30; Ps 34,19), paské ké-l tou dou, li tou sinp; la-p poté mouton-an ki fatigé-a sou zépòl li (Is 40, 11; Lc, 15,5; Dt 32,11); li déjà poté koua-l avèk tout chaj lézòm jous li mouri anba chaj péché-a (Jn 19,17; Gn 26,6; Jn 1, 29; Is 53,4-6). Li mandé pou kè nou pa troublé, pou-l pa soté, pou-l pa boulvèsé (Jn 14,1.27). Sé ké pozé li vi-n poté ba nou (Jn 14,27). Yon sèl bagay ki kapab ba nou ké soté, sé péché-a, paské sé li minm sèl ki vré chaj k-ap pézé sou do nou-an, ki fè nou pè, nou ront parèt dévan Granmèt la, tankou Adan, lè Bondié té rélé-l la (Gn 3,10). Lévanjil sizièm dimanch Pak C-a (Jn 14,23-29) déjà anonsé séparasion lasansyon-an: "Si nou té rinmin-m, nou t-a kontan poutèt m-apral kay Papa-a" (Jn 14,28). Prézans Jézu kot Apot yo ak nan légliz la, sé sou lafoua li bazé. Limiè k-ap kléré Jérusalèm nan, sé pa limiè solèy la, ni klété lali-nan sé Jézu-Kri li minm minm, Mouton Bondié-a ki di li sé limiè tè-a (Ap 21,23; 22,5; Is 6,1.2-19-20; 2 Co 3,18; Jn 1, 9; 8,12; 9,5; 12,35.36.46). Vil Jérusalèm sa-a Sin Jan té ouè nan vision-an (Ap 21,10-23 = dézièm léktu Sizièm dimanch Pak C-a), li gin douz pòt ki bay nan kat diréksion, sa vlé di ki louvri nan diréksion kat kouin tè-a, pou tout pèp yo antré ladan-l sé légliz la, ki vi-n kontinué mision douz fanmiy Israèl yo, pèp Bondié ansyin Téstaman-an

Non douz pitit Israèl yo ékri sou douz pòt yo (Ap 21,12). Psòm nan di: non chak moun ékri nan Siyon (Ps 87,6). Sé avèk san Jézu-Kri yo ékri. Lè-l sou koua-a, li rédi tout moun vi-n jouinn li, li minm vrè pèp Israèl la (Jn12,32). Sé nan batay Apot yo ap préché mésaj sa-a; jalouzi Juif yo vlè mét bariè pou payin yo pa antré (cf Lc 4,25-30). Dévan difikilté sa-a, yo blijé réyini premié konsil la Jérusalèm (Ac 15,5-29). Kòm sé sou douz kolòn Apot yo miray vil Jérusalèm nan pozé, kòm non yo ékri sou douz kolòn yo, sé yo minm k-ap bay konsign sou kèsion sa-a. Yo fé déklarasion ofisièl ak dokiman yo rinmèt misionè yo pou yo bay pansé ofisièl légliz la. Moun ki pa gin otorisation yo, yo pa gin doua ap simin lansègman k-ap troublé fidèl yo. Daprè sa nou abitué déklaré nan Krédo-a. "Sé sou Apot yo li bati". Kòm sé sou douz kolòn Apot yo miray vil la pozé, sé yo minm ki pou véyé sou lafoua légliz la, tankou santinèl sou tè miray lavil la (Ez 3,17; 33,2). Lè Sin Pòl ap kité Éfèz, li avèti Ansyin yo pou yo véyé tankou santinèl sou bann

mouton yo, paské gin lou méchan k-ap antré nan mitan yo, ki pap ménajé bann mouton yo, ginyin k-ap lévé nan mitan yo minm, k-ap pèvéti fidèl yo, pou fè yo suiv yo nan santié glisé k-ap kondui nan falèz yo, (Ac 20,28-31). Sin Pòl ap mandé Timoté pou-l rét Éfèz, jistéman pou-l konbat mové ansègman sa yo, (1 Tm 1,3-7; 41-2; 6,3-5). L-ap bay Tit minm rékòmandasion sa-a (Tit 1, 10-16). Lavèy jou li mouri-a l-ap kité tankou lèt Téstaman-l pou Timoté nan minm sans sa-a (2 Tm 2,14; 3,17). Lavèy lanmò Jézu, li bay Sin Piè mision pou-l asiré lafoua Frè-l yo (Lc 22,32). Li rénouvélé, mision sa-a lè-l lévé vivan sot nan pami mò yo (Jn 21,15.16.17). Prémie konsil Jérusalem nan ap montré kijan Apot yo pran ròl yo osèriè. Sé léspri Sin-an ki désidé ansann avèk yo déklarasion yo voyé bay tout légliz la osijè lafoua ak konduit yo (Ac 15,28; cf 5,32;1,8). Lè Jézu ap monté nan sièl, li promèt asistans léspri Sin-an k-ap ba yo fòs, pou mision yo-a (Ac 1,8): soti dépi Jérusalem rivé jous nan bout tè-a, an pasan pa Judé ak Samari. Li té déklaré yo léspri Sin-an ap aprann yo tout bagay, l-ap raplé yo tou sa-l té di yo, sé li k-ap souflé yo sa pou yo di (Jn 16,13; 14,26). Sé pou sa yo gin lodas di: "léspri Sin-an avèk nou, nou désidé" (Ac 15,28).

Désizion yo pran-an sé: bay obligasion ki nésésè, pou payin yo ki vi-n gin lafoua yo, k-ap viv nan pami Juif yo ki vi-n nan lafoua yo, yo obéyi réglèman pou vi-n Sin-an, sa lansyin Téstaman-an té déjà prévoua, ni pou Juif yo, ni pou payin yo k-ap viv nan mitan Juif yo antan yo patajé lafoua Juif yo, donk bagay payin yo té kapab déjà okouran (Lv 17,18). Viann yo sakrifié bay zidòl (Lv 17,8,9: "tout moun lakay Israèl oubyin tout étranjé ki abité nan mitan nou"), san (Lv 17,10-12: "tout moun nan kay Israèl oubyin tout étranjé ki abité nan mitan nou") bèt toufé (Lv 17,15; cf Ex 22,30: "tout sitouayin oubyin étranjé"), rélasyon mari-madanm anndan minm fanmiy (Lv 18,16-18; cf 1 Cor 5,1-13). Kat bagay sa yo pa kouvri tout dévoua payin yo doué réglé pou yo vi-n korèk dévan Bondié. Min kòm sant késion-an yo té vi-n prézanté dévan Apot yo, sé té osijè laloua Moyiz la, spésialman problèm sikonsizion-an ki fè Juif yo pa doué frékanaté payin yo pou pa kontaminé dévan laloua-a, Apot yo réglé ki sa y-ap égzijé pou payin yo obsèvé nan laloua Moyiz la: sé bagay yo konnin déjà, paské yo préché yo chak saba, tout koté dépi lontan sa konsèné ni Juif yo, ni payin yo k-ap viv ak Juif yo. Si payin yo pa obsèvé bagay sa yo ki nan laloua-a, sa ap indispozé Juif yo avèk rézon. Égzijans sa yo, yo nan sa yo rélé laloua séparasion pou viv sin-an (Lv 17-18, sa yo rélé laloua "de sainteté"-a. Apot yo pa dispansé payin yo pou pa obsèvé pouin sa yo nan laloua Juif la. Min lèt sa pa déklaré tou sa payin yo gin pou fè daprè laloua krétyin-an. Sa-a sé yon lòt problèm yo pa abòdé la-a. Késion pou yo té trété-a, sé sou li yo rété:

minm si payin yo pa sikonsi, sa pa problèm: min kat bagay sa yo ki nan laloua Juif la, fò yo évité yo. Sé léspri Sin-an k-ap fè tout ras vi-n tounin yon sèl pèp, jou lapankot la (Ac 2,1-11). Nan li tout moun ap batizé: pap gin késion Juif ak payin ankò (Ph 3,11; Ga 3,27 s; 1 Cor 12,13; cf Gn 11,1-9). Sé pa égzijans sou pa déyò k-ap fè moun sin, min sé réglé konduit sou laloua léspri-a ki ékri anndan kè tou nèf la, nan nouvo kontra ki signin nan san Jézu-Kri-a. Sé pa sa-k antré anndan you moun ki sal moun nan, sé movèz volonté yon moun ki sal moun nan (Mc 7,15-23). Tout bagay pròp pou moun ki pròp (Tit, 1,15). Yon kè ki pròp, li ouè Bondié nan tout bagay (Mt 5,8). Yon kè ki pròp, sé koté Bondié Papa-a, Pitit la, ak Léspri Sin-an vi-n abité, dapré sa Jézu di nan Lévanjil sizièm dimanch Pak C-a: "n-ap vi-n lakay li, n-ap abité lakay li" (Jn14,23). Yon moun ki gin lagras, li tankou limiè kristal Jérusalem nan, sa dézièm lèktu sizièm dimanch pak C-a palé-a (Ap 21,11.18.21), paské prezans Bondié ap kléré-l sou pa anndan (Ap 21,23; Is 60,3.11).

*

Jézu di sé lapè li ban nou, sé lapè li kité pou nou (Jn 14, 27). Sé pa tankou tè-a bay li-a li minm li ba nou-l; li mandé nou pou nou pa boulvèsé, pou nou pa pè (Jn14, 1. 27). Léspri Sin li promèt la, l-ap sévi nou défans, an minm tan l-ap raplé nou ansègnman-l yo (Jn 14,26). Li di nou l-ap vi-n abité nan kè nou ansanm ak Papa-a (Jn 14,23). Lavi toua Pèsòn yo, ki yon sèl Bondié-a, li anndan nanm nou, li invité nou voyé jé sou sa-k pi inpotan nan légzistans nou: lavi lagras la, si nou pa ginyin-l, sé tan nou n-ap pèdi nan tout kalité démach n-ap fè pou nou souadizan transfomé yon sosiété. Si anndan fon kè nou sé yon kavò ki plin zosman ak bagay ki pouri (Mt 23,27), koman nou kapab chanjé yon sosiété? Travay n-ap fè-a ap tankou kay ro Babèl la moun yo té vlè bati pou y-al chita minm nivo ak Bondié-a, kay la rété san-l pa fini, paské langaj moun yo brouyé (Gn 11,1-9). Sé konsa Psòm nan di nou: si Granmèt la pa bati kay la, sé pou bontan moun yo ap travay (Psòm 127,1). Jézu pa ba nou lapè tankou tè-a bay li-a. Lapè li bay la, sé pa yon sinp paròl politès. Sé lavi lagras la minm, sé lavi Papa ak Pitit la ak léspri Sin-an li mété nan nanm nou ki fé nou pap troublé, nou pap sézi, dévan okinn mové nouvèl ak dévan okinn ménas térrib. Si Bondié avèk nou, kilès ki kapab kont nou? Sé li minm ki fè nou vi-n korèk, kilès ki kapab kondanè? (R 8,31,34).

Prémiè léktu sizièm dimanch Pak C-a (Ac 15,1,25) montré nou kijan té gin diskision nan légliz Antiòch osijè laloua Moyiz la. Juif yo té vlé pou fè grèk yo obsèvé-l an-antié. Pòl ak Banabé pa-t dakò. Sé tankou dé kan ki vi-n

ginyin. Pou pa gin ralé-minnin-kasé, yo blijé voyé Pòl ak Banabé jous Jérusalèm dévan Chèf tout légliz la, Sin Piè ak dévan Apot yo ak Ansyin yo, pou tandé désizyon yo. Nan premiè réyinion sa-a tou, konsil Jérusalèm nan, gro diskision lévé (Ac 15,7). Min lè Sin Piè fi-n palé (Ac 15, 7b-11), tout moun fè silans (Ac 15,12), paské sé Chèf légliz la li yé. Yo respèkté paròl li. Li fé sonjé kijan sé li minm an premié ki té louvri pòt légliz la pou payin yo antré (Ac 15,7b; cf Ac 10,47). Li mandé pou pa mété plis chaj sou do yo pasé sa Bondié déjà mété (Ac 15,10); li mandé pou pa chajé zépòl yo ak chaj zanzèt yo ni yo minm pa-t kapab poté (ib, cf Ga 5,1; Mt 23,4). Sé nan minm sans sa-a Sin Jak palé (Ac 15,13,21). Apot yo mandé - parapò a payin yo - pou égzijé sèlman sa-k nésésè nan laloua-a (Ac 15,20.28-29). Yo bay Pòl ak Banabé lèt pou yo poté tout koté yo pasé (Ac 15,22,29). Sé konsa légliz yo vi-n gin lapè. Sé pa lapè tankou tè-a bay la. Sé pa yon lapè ki rété sou déyò. Késion yo touché konsèné konsians moun yo. Si anndan fon konsians nou nou pa anpè ak Bondié, ak prochin nou, ak pròp tèt nou, kóman nou kapab vlé fè lòt moun viv an pè? Premié lapè-a sé anndan fon kè nou li chita, koté Papa-a ak Pitit la ak Léspri Sin-an abité-a (Jn 14,23). Apot yo voyé di légliz Antiòch la konsa sé pa yo minm ki té bay moun sa yo manda pou y-al troublé kominoté yo-a avèk yon pakèt lansègnman ki pa chita sou konsign yo (Ac 15, 24). Légliz la gin tèt. Ròl tèt la sé véyé pou kò-a pa pran chòk ki pou fébli-l. Lè gin moun ki pa résévoua manda, épi k-ap troublé kominoté yo ak pròp lidé pa yo yo vlé fé pasé, sé nòmval pou Chèf légliz la fè tandé voua-l, pou-l di li pa dakò; sa pa chita sou lansègnman ak ékspérians légliz la. Si-l pé bouch li. (Is 56,10), paské li pa vlé gin kont ak pèsòn, sé fidèl yo k-ap péyé sa, min sé li minm Granmèt la ap mandé kont (Ez 3,18; 33,6). Sé dévoua konsians li pou raplé lansègnman ak disipli-n légliz la sou tout pouin. Sé konsa pou-l véyé sou lapè sa-a Granmèt la kité pou légliz li-a. Sé tout tan lapè sa-a ménasé. Gin anpil moun ki vlé fé kout chèf yo (Nb 16,1-35), sitou lè yo gin inpréssion pa gin yon ponyèt ki rèd k-ap fè tout moun maché ès-ès (Nb 12,3). Y-ap profité pou yo glisé kò yo anba chal tout koté yo kapab (Ac 20,29; Ga 2,4), pou yo simin zizani, pou yo drésé fidèl kont Chèf légliz, pou yo réklamé souadizan doua yo pa ba yo. Apot yo ékri yon ti biyè tou kout yo voyé bay légliz Antiòch la, koté yo présizé obligasion ki nésésè pou payin yo: manjé zidòl, san, viann toufé, rélasyon mari-madanm laloua-a défann (Ac 15,29). Chèf légliz yo doué klè nan déklarasion yo, défason pou sa-k vlé suiv chémin douat yo, yo jouinn rout la tou trasé pou yo; épi pou sa-k gin movèz foua yo, yo pa jouinn prètèks ki kouvri manèv yo.

Dézièm léktu dimanch Pak C-a (Ac 21,10-23) montré nou vil Jérusalèm sièl la ki chita sou douz kolòn, koté non douz Apot yo ékri (Ap 21,12.14; Ep 2,20). Sé konsa légliz la chita sou Apot yo ak moun ki vi-n apré Apot yo: Pap la avèk Évèk yo. Nan légliz la, gin sa yo rélé: "hiérarchie" avèk "Magistère", ki pa anpéché tout manb yo gin égalité, ki pa jinnin libèté pansé yo, min ki la tankou yon sèvis spésial pou dirijé pèp Bondié-a, pou garanti lafoua-l. sé pa pèp la ki pou dirijé yo, ni ki pou garanti mèsaj yo. Sa sé yon défomasyon ki vlé glisé nan légliz la, min ki pa pozé sou okinn fondman lafoua ak ékspérians légliz la. Sé paské yo vlé konsidéré légliz la tankou ninpòt sosisyè ki fè yo vlé pasé nan minm moul istoua lòt sosisyè yo. Dévan danjé sa-a ki ménasé légliz la, Chèf légliz yo pa gin doua rété bouch fèmin tankou chyin ki pa konn japé (Is 56,10), ki pa avèti lè vòlè-a ap rivé, paské sé yo minm Bondié ap mandé kont (Ez 3,18) kòm santinèl (Ez 3,17; 33,1-9). Vil Jérusalèm sièl la té gin douz pòt ki bay sou kat diréksyon: toua nan diréksyon solèy lévé, toua nan diréksyon nò, toua nan diréksyon sid, toua nan diréksyon louès (Ap 21,13). Sa vlé di li pa gin frontiè, li louvri pou tout pèp. Yon légliz pa doué fèmin sou sèl ti problèm li. Li doué louvri jé-l sou tou lé kat diréksyon tè-a. Nan sans sa-a, légliz la katolik, sa vlé di li gayé sou tout fas tè-a ("kata olèn tèn gèn" = *katholikos* = *κατά ὅλην τὴν γῆν*). Pa gin ni Juif, ni Grèk, ni ésklav, ni moun lib, ni gason, ni fi (Col 13,11; Ga 3, 27s; 1, Cor 12,13; cf Gn 11,1-9). Tout moun sé pitit Bondié, sé frè Jézu-Kri. Chèf légliz yo doué fè atansyon pou jé yo viré nan kat diréksyon, pou yo pa gin moun-pa, pou yo pa bay yon group avantaj kont yon lòt group, paské oriantasyon group la kadré davantaj avèk lidé pa yo, antré pi plis nan santiman yo. Yon Chèf kominoté gin kòm ròl pou-l asiré lapè. Sé pou tout moun kapab alèz avèk li, kapab palé avèk li, ak tout konsians kè-l, antan-l sètèn sa-l di-a pap antré nan yon zòrèy, pou-l soti nan lòt la, ni pou-l soti nan yon bouch k-apral mété kozé kè-l nan lari.

Vil Jérusalèm sièl la pa bézouin limiè solèy ak lali-n, sous limiè-l sé mouton-an (Ap 21,23; Is 60,19s). Nan istoua légliz la, gin anpil moun ki konn lévé yon moman, yo vini avèk lidé pa yo sou yon pouin, y-ap chèché fè dèt moun glisé ansanm avèk yo nan falèz. Chèf légliz yo fè dévoua santinèl yo. Yo avèti koté danjé-a yé, pou mouton yo pa tonbé nan trou-a. Yo fè yo fikse jé yo sou vré limiè-a: Jézu-Kri. Travay Chèf légliz yo, nan lign mision Apot yo, sé yon travay ki délika anpil. Sèké antan yap lonjé douèt yo sou sa-k krochi nan lansègnman ak disipli-n dèt moun ap fè glisé nan légliz la, yo doué fè atansyon pou yo pa réjité moun sa yo nan minm jès la, pou yo pa étinn mèch la, k-ap fè lafimin-an, pou yo pa krazé rozo-a ki féfé-a (Is 42,3; Mt 12,18,21). Yo doué sipozé moun sa yo ap aji ak bon

intansion, sé limiè yo manké. Sé dévoua yo pou yo kléré yo. Gin pozision ki nésèsè nan tèl sikonstans, sa pa nésèsè nan dòt sikonstans. Prèmié léktu sizièm dimanch Pak C-a (Ac 15,1-29) montré si Pòl ak Banabé pa-t réaji dévan konpotman Juif yo, nan légliz Antioch la, payin yo pa t-ap ouè sa-k inpòtan nan laloua Moyiz la, (cf Ga 2,11-14). Min nan légliz Jérusalèm nan, kozé sa-a pa gin minm konsékans. Laprèv sèkè lè Pòl rivé Jérusalèm apré touazièm vouayaj misionè-l la, Jak avèk ansyin Jérusalèm yo invité-l obsèvé laloua-a an piblik nan Tanp la, pou-l bay Juif yo satisfaksion. Li fè sa vré (Ac 21,17-26). Gin souplès pou nou ginyin parapò a prinsip k-ap dirijé konduit nou pou, minm jan avèk Sin Pòl, nou rivé adapté nan tout sikonstans, pou nou pa blésé lapè-a. N-ap mandé Manman Mari kouraj pou nou pran modèl sou Apot yo, ki drésé batiman-an lè-l panché, ki fè-l chanjé diréksion lè l-ap monté sou résif, ki fé tout kalité manèv, lè gin tanpèt, pou yo rivé nan larad, koté vré lapè pap gin sékous ankò.

*

Mésaj Jézu kité pou Apot li yo, li tankou yon Téstaman, sé kè pozé, li ba yo konsign pou yo pa kité kè yo troublé. (Jn 14,1.27). Koté ki gin kè soté, sé pa léspri Sin ki la. Léspri Sin-an okontrè ba nou asirans pou nou kanpé fèm, dévan tout évenman ki t-a kapab dékontrolé nou. Li fè nou ouè louin, nou déjà konnin nan ki sans évenman yo ap viré, sé pou rézon sa-a nou pa troublé.

Sa pa vlé di kè nou pap soté, gin dé lè; min sé pa pou nou rété nan kè soté sa-a, k-ap anpéché nou fiksé léspri nou sou Grammèt la.

Nan prémié léktu sizièm dimanch Pak C-a (Ac 25,1-29), nan kominoté Antiòch la, gin moun ki soti Jérusalèm épi ki vi-n mété boulvès, pou payin ki konvèti yo obsèvé laloua Moyiz la tankou Juif yo, avèk sikonsizyon épi tout lòt régléman yo, minm zanzèt yo pa-t kapab poté yo, (Ac 15,10; Mt 23,4; Ga 5,1). Sin Pòl bay répons nan lèt li ékri moun Galat yo; li di Jézu fi-n fè nou lib, nou pa doué tounin vi-n ésklav ankò. Li épliké ki jan nou doué kité léspri-a kondui nou (Ga 5,16.25), pou nou pa mét zizani nan kominoté yo. Tout lèt Galat la mérité pou li-l nan limiè prémié léktu sizièm dimanch Pak C-a (Ac 15,1-29).

Dépi nan komansman Lèt Galat la, (Ga 1,7), Sin Pòl di gin moun ki vlé vi-n troublé nou, y-ap chèché boulvèsé Lévanjil Jézu Kri-a. Sé minm mo sa yo nou jouinn nan prémié léktu sizièm dimanch Pak C-a, nan lèt mésaj Apot yo voyé bay légliz Antiòch, Siri ak Silisi, yo di gin moun k-ap chèché troublé yo, k-ap boulvèsè yo ak paròl yo, san yo pa résévoua mision yo sot nan min

Apot yo. Lévanjil la di tou pou kè nou pa troublé, pou nou pa boulvèsé (Jan 14,1.27). Sé minm mèsaj la k-ap travèsé tout oriantasion sizièm dimanch Pak C-a, antan légliz la ap tann léspri Sin-an k-ap vi-n ba-l fòs la. Sin Pòl di: minm si sé yon Anj ki vi-n anonsé yon évanjil ki pa al nan minm sans ak sa-l té anonsé yo-a, sé pou yo mété-l akoté, pou yo pa okipé-l, pou yo pa pran-l an konsidérasion (Ga 1, 8s).

Sé konsa nan prémié Liv Roua yo (1 R 13,18), gin yon profèt ki bay yon lòt yon manti, antan-l di sé yon Anj ki dévoualé-l sa sot nan sièl la, pou lòt la aji tèl jan, tèl maniè, pou-l dézobéyi lòd Granmèt la té fi-n ba li déja-a. Séké Bondié té voyé profèt la pou-l anonsé malè k-ap rivé lotèl Bétèl la. Li déklaré malè-a vré, pandan roua Jéroboam t-ap ofri sakrifis sou lotèl la. Roua-a lonjé min-l pou-l sézi profèt la. Min roua-a rété réd, li séché; roua-a pa kapab ramné min-an. Roua-a ouè sann ki té sou lotèl la tonbé a tè-a, lotèl la fann dé mouatiè, dapré sa profèt la té anonsé-a, ki t-ap sèvi sign pou malè yo. Roua-a mandé padon. Profèt la lapriyé Granmèt la, min roua-a géri. Lè roua-a ouè sa, li invité profèt la pou-l vi-n lakay li, pou-l manjé, pou-l bouè, pou-l fè-l kado kichòy. Profèt la réponn li: Granmèt la té di-l pou-l pa manjé anyin, pou-l pa bouè anyin Bétél, pou-l pa tounin nan minm chémin koté-l té vini-an. Profèt la al fè rout li vré nan yon lòt chémin. Sèlman moun yo ki té la-a, y-al avèti yon lòt profèt ki té abité nan péyi Bétél la minm. Profèt sa-a di sé vré, sé Paròl Granmèt la vré li anonsé-a. Sèlman profèt sa-a sélé bourik li, li rapousuiv lòt profèt la, li jouinn li chita anba yon pié boua, li bouké ak grangou, ak souaf. Lòt profèt la di-l pou-l tounin avèk li. Li déklaré li pap tounin paské Granmèt la té pasé-l lòd pou-l pa manjé, pou-l pa bouè, nan koté sa-a, pou-l pa tounin nan minm chémin koté li té rivé-a. Lòt profèt la minm bay yon manti, pou-l éseyé-l, li di-l: Granmèt la, dévoualè-l, pa lintèmediè yon Anj, pou-l tounin avèk li. Profèt la sédé. Li tounin vré. Li manjé, li bouè. Min kon-l fi-n fè sa-a, profèt la ki invité-l la déklaré-l; poutèt li pa obéyi lòd Granmèt la, li aksépté manjé, bouè, ébyin konn-l tounin sou rout la, yon lion ap touyé-l. Sé sa-k rivé tout bon vré. Profèt la pati; lè-l rivé sou rout la, yon lion soti, li fonsé sou li, li touyé-l. Lion-an pa fè bourik li-a anyin. Lion-an rété kanpé bò koté bourik la, l-ap tann. Tout moun kap pasé, yo ouè sa. Lè lòt profèt la aprann sa, li vi-n chèché kò-a, li fè antéré-l nan pròp kavo pa-l. Li di: paròl li té anonsé kont lotèl Bétèl la ap rivé vré; sèlman li pa-t obéyi lòd Granmèt la, li té kité yon lòt ba-l manti, sou prétèks sé yon Anj ki té sot nan sièl la ki té souadizan avèti-l (R 13,11-32). Sé pou sa Sin Pòl di Galat yo (Ga 1,8) minm si yon Anj t-a vi-n anonsé yon lòt lévanjil ki pa kadré avèk lévanjil pa-l la, sé pou yo konsidéré-l kòm

yon démon. Sé yon sèl lévanjil ki ginyin; pa gin dé; sé lévanjil Jézu-Kri-a sèl ki konté.

Chak dimanch nou déklaré lafoua nou nan Krédo-a. Rakousi lansègnman lafoua-a ki rasanblé nan Krédo sa-a, sé tankou moual lévanjil la, nannan lévanjil la. Sé pou nou konn krédo sa-a pa kè, pou-l sévi nou kom lanp pou nou ouè ki chémin pou nou suiv, pou nou pa kité okinn mové anj dékontrolé nou, sé pou nou asiré lafoua nou sou baz sa-a, pou nou pa kité okinn tranbléman-tè troulé nou. Pa gin dé lévanjil, sé yon sèl la ki ginyin. Yon krétyin fèt pou-l pa kité dèniè ti nouvèl l-ap tandé dékontrolé-l, li pa doué kité premié moun ki vi-n koté-l, pou-l pran-l nan pièj avèk kèk paròl dous, fè-l tonbé. Yon krétyin doué yon moun ki chita solid sou lafoua Apot yo té transmèt nou-an. Nou pa doué tounin yon branch boua k-ap souké nan sans tout van k-ap pasé. Krétyin nan vil Béré yo, lè yo té fi-n kouté prèch misionè yo, yo té konn al fouyé nan labib la; pou yo ouè si misionè yo di yo vérité (Ac 17,11). Séké gin moun ki konnin sa-k nan labib la, min yo pa konnin sa labib la vlé di. Yo répété fraz yo, san yo pa mété yo nan koté vivan ki ba yo sans yo-a. Sé tankou yon ti plant vivan yo raché, épi yo mété-l ap griyé solèy, yo vlé pou-l donnin. Paròl sa-a pa nan koté pou sémans la donnin. Yo konn sa-k nan labib la; yo pa konnin sa labib la vlé di. Intèprétasion labib la, sé nan légliz la pou sa fèt. Légliz la sé yon limiè k-ap kléré chémin nou (Ap 21,23; Is 60,19s = dézièm lèktu sizièm dimanch Pak C-a). Si nou viré do ba li, kòman nou vlé pou nou ouè klè? Gin anpil moun ki pèdi chémin konsa, yo kité lafoua Batèm yo-a, y-al suiv dèt moun k-ap kondui yo tankou yon avèg k-ap gidé yon lòt avèg parèy li, tou lè dé ap tonbé nan trou (Mt 15,24). Mésaj lévanjil la sé pa nan moun li soti, sé nan Bondié. Fò nou gin lafoua pou nou ouè sé Bondié k-ap palé avèk nou, lè Pè-a ap préché sou lotèl la, pou nou pa méprizé sa l-ap di-a, pou nou pa néglijé konsign l-ap ba nou-an, paské sé sa k-ap sèvi nou tankou zam pou nou protéjé kò nou, pou nou paré kou Satan ap voyé kont nou, nan lòt mésaj l-ap voyé ba nou, nan yon démon ki dégzé sou fòm Anj (Mt 7,15,20; Ap 13,11; 19,20; 2 P 2,1-3; Dt 13,2-6; 18,9-22; Lc 3,12; Jc 3, 12; Si 27,6). Sé pou nou rézisté-l fèm nan lafoua dapré sa Sin Piè di nou nan premié lèt li-a (1 P 5,8-9).

Sin Piè té blijé mét délikatès pou-l anonsé légliz Jérusalèm nan nan ki sans léspri Sin-an té pousé-l aji kay Kònèy, payin-an, ki té invité-l al kay li-a; li té blijé batizé payin sa-a ak tout moun ki té lakay li, paské léspri Sin-an tonbé sou yo, lè-l ouè Piè t-ap ézité, Piè di si léspri Sin-an tonbé sou yo, kisa li minm li yé pou-l té rézisté léspri Sin-an, pou-l pa-t batizé yo-a. Sé paròl sa yo ki té rivé kalmé légliz Jérusalèm nan (Ac 10,11). Légliz

Jérusalèm nan té trouvè Piè al trò louin nan lajè li louvri pòt yo bay payin yo; min légliz Antiòch la minm ap trouvè Piè pa louvri kont fènèt pou payin yo. Sé pou sa lè Piè rivé Antiòch, Pòl fè-l lobsèvasion dévan tout moun, pou-l reproché-l dévan kèk manb légliz Jérusalèm nan, ki té vi-n vizité Antiòch, ansanm avèk Piè (Ga 2). Jérusalèm di Piè al trò louin. Antiòch di li ézité tròp. Piè byin konnin sa-l gin pou-l fè; sèlman li blijé ménajé moun Jérusalèm yo pou-l pa indispozé yo; sèké té gin anpil prèt Juif ki té konvèti Jérusalèm ki té antré nan légliz krétyin yo. Yo pa-t kapab mandé yo pou rénonse laloua Moyiz la konsa, san gadé dèyè (Ac 6,7;21,20). Payin yo minm nan légliz Antiòch la avèk nan légliz Azi yo, yo pa-t tèlman okouran laloua Moyiz la, sof kat ti pouin yo Apot yo soulignin nan lèt yo-a (Ap 15,20-21.28-29), pouin sa yo, nan tout kay réyinion, nan tout koté, chak saba, yo té konn li yo. Sé pou sa Apot yo di: n-ap kite kat pouin sa yo pou yo obsèvé nan laloua Moyiz la. Min apré sa, nou pap mété okinn lòt chay sou do yo ankò nan laloua ansyin Téstaman-an. Pou Nouvo Téstaman-an. Sé yon lòt bagay; Apot yo pa palé sou sa, paské sé pa sou pouin sa yo ki gin diskision. Obligasyon nouvo Téstaman yo, payin yo gin pou yo soumèt tèt yo ba yo, tankou Juif yo tou, paské sé bagay ki tou nouvo, ki adrésé pou tout moun. Apot yo dévlopé mésaj Krétyin-an nan dòt sikonstans. Sou sa, pa ko gin dézakò. Nan lòt sièk k-ap vini yo, ap gin dézakò; min chak foua ap gin dézakò konsa, chèf légliz la ap kanpé, l-ap rasanblé Résponsab légliz yo, y-ap réyini yon konsil, tankou yo té fé premiè foua-a, nan vil Jérusalèm nan (Ac 15,1,29). Déklarasyon Chèf légliz la gin valè pou tout moun. Sé pou sa Apot yo déklaré: sé lépri Sin-an avèk yo ki fè déklarasyon sa-a (Ac 15,28). Jézu té promèt légliz li-a pou-l avèk li tout tan, jous nan finisman tan yo (Mt 28,20; Jn 14,18,21). Sé li minm tou ki té di Apot yo: lè l-ap monté nan sièl la, l-ap voyé léspri Sin-an tankou yon Avoka pou yo, l-ap fè yo sonjé tou sa-l té di yo, l-ap kondui yo nan lavérité-a (Jn 14,26;16,13). Sé sa-l toujou kontinué ap fè nan légliz la. Lè Pap la konvoké tout Évèk yo, nan yon Konsil, léspri Sin-an la, l-ap bay lansègnman, l-ap fé sonjé lansègnman Jézu-Kri-a, l-ap montré kijan pou yo apliké-l nan tan n-ap viv la, sé pou rézon sa-a Konsil ékiménik yo, Vatikan II té soti yon dokiman li bay kòm Tit: "Légliz nan tan n-ap viv kouliè-a" "Gaudium et Spes".

Sé pou sa chak touazan Pap la rasanblé sinòd Évèk yo, pou yo réfléchi sou yon aspè lansègnman légliz la, pou yo trasé lign aplikasyon pou tan n-ap viv la. Nan oktòb 1987 la, sé té: Vokasyon ak mision layik yo nan légliz ak sou tè-a vintan apré Konsil Vatikan II. Pou 30 désanb 1988, nan fèt Sint Fanmiy Jézu, Mari ak Jozèf la, Pap Jan Pòl II pibliyé dokiman li fè apré Sinòd sa-a pou orienté réfléksion nou, pou dirijé konduit nou, pou ankourajé ékspérians

nou, sé sa yo rélé: "Exhortation apostolique". Li kòmanté pasaj koté Granmèt la ap invité travayè yo vi-n nan jadin rézin-l nan nan ninpòt ki lè nan lajouinin-an, pou yo pa rété san yo pa fè anyin, paské gin plas pou tout moun (Mt 20,1-16; cf 13-38).

Sé tout tan légliz la doué pozé tèt li késion, pou-l ouè kijan li kapab apliké lévanjil Jézu-Kri-a nan sikonstans l-ap travèsè yo. Chèf légliz yo doué tankou santinèl k-ap véyé nan nuit (Ez 3,17; 33,7). Yo doué véyé tankou kaptinn batiman ki toujou gin jé yo louvri, pou yo gadé koté van-an ap sòti, koté résif yo kaché anba dlo-a, nan ki diréksion pou yo fè, pou yo soti nan bon pò.

N-ap mandé Manman Mari favè sa-a, pou nou kouè nan lasistans léspri Sin-an, minm léspri Sin-an ki t-ap palé lè Profèt yo t-ap palé-a, jan nou déklaré nan krédo-a. Léspri Sin-an asisté légliz la yon fason spésial, sitou lè-l rasanblé alantou Chèf li, Pap la. Sa mandé anpil lafoua pou nou ouè désizion Bondié nan bagay ki kontrarié nou. Gin dé foua minm sé fason désizion-an rivé-a ki dékontolé nou. Nou pa-t atann nou a sa, sa tonbé sou nou tankou yon kout zéklè ki avéglé nou. Malgré tou, nou doué maché, paské Bondié kléré nou avèk yon "réyon fènoua", jan Sin Jan-d-la-Koua di-a ("Dieu nous éclaire avec un rayon de ténèbre"). Sin Monfò mandé nou pou nou gin obéyisans yon fason spésial aléga Pap la, avèk Évèk yo. Anpil Évèk té réfizé Sin Monfó travay nan diosèz yo, li té toujou obéyi. Li konnin sé pa dézobéyisans k-ap fè légliz la maché. Sé tan l-ap fé fidèl yo pèdi (Nb 12,15).

Gin moun sé sa yo minm yo desidé sèlman ki gin valè. Pèsòn pa doué kontrarié yo, min yo minm, sa yo fi-n di-a, pèsòn pa doué dézobéyi-l. Sé tankou yon lòt légliz ki anndan vré légliz Jézu-Kri-a. Nou blijé antré souvan anndan fon konsians nou, pou nou ouè nan ki mézu nou pa sèvi fo témouin nan konpòtman ak nan paròl nou, ki démontré karéman nou pa an-afè ak pèsòn ki pasé nou lòd; lòt yo doué pran gan ak pinzèt pou yo abòdé nou, min nou minm minm, nou pa bézouin mét okinn ti gout dlo nan divin nou. Sé pou nou fouyé konsians nou pou ouè si pa gin kèk piès nan motè-a ki déréglé, si boulon-sant la pa fouaré, si volan-an pa gin jé, si ba-diréksion-an pa fosé, si frin-an pa bloké; nou blijé fé grésé-séré, pou falèz pa sèvi nou garaj, pou nou ouè nan ki mézi nou pa sévi lòt yo bariè, ròch nan mitan chémin-an, k-ap fè yo kasé pié yo, zinglin k-ap blésé yo, trou k-ap fè yo fè fo-pa, po-fig k-ap fè yo glisé tonbé: tou sa yo rélé "skandal" la nan langaj labib la (Mt 18,5,10; Mc 9,42; Lc 17, 1-2).

Gin dé foua nou konprann nou fè byin, min rézilta kapab pa byin tout bon vré; sé sou aparans li parèt byin. Bondié pa kapab kontan avèk mòd jan

démach sa yo; sa mété boulvès, (Ac 15,24; Ga 2,12; Jn 14,1.27) nan légliz la, sa troublé (ib) kè moun yo, minm jan ak ak fo-Profèt sa yo ki té rivé nan légliz Antiòch la (Ac 15,1-2), tankou lou ki antré nan pak mouton (cf Ac 20,29), k-ap dévoré lafoua moun, k-ap troublé trankilité léspri Sin-an ba yo-a, k-ap anségné bagay ki pa kadré avèk rasi-n lanségnman Apot yo, k-ap pran pòz chèf ak savan yo, ak apot yo, san yo pa gin okinn mision pou sa. Nan tout épòk, légliz la toujou travèsé gro problèm nan sans sa-a, tankou yon batiman k-ap travèsé nan yon tanpèt. Jézu ap dòmi nan plas moun ki kinbé gouvènay la (Mc 4,38). Sé li minm k-ap kondui bato-a, nan pouin danjé pou monté sou résif. Séلمان gin moun ki kapab pèdi chémin akòz dèt ki kité lògèy pran tèt yo, k-ap trasé rout ki pa alé nan sans légliz la mandé-a.

Jou lasansion-an, Jézu té promèt Apot yo fòs k-ap désann sot nan sièl la, sé léspri Sin-an k-ap fè yo sèvi-l témouin jous nan bout tè-a (Ac1,8). Toua jou anvan lasansion-an (lindi, madi, mèkrédi sizièm sémèn Pak), yo konn résité litani Sin yo, sa yo rélé "Rogation" yo, sé lapriyè ofisièl légliz fè pou tout kalité bézouin. Sé tout Sin yo nou invité lapriyè ansanm avèk nou. N-ap sonjé kijan la Sint Trè Vièj Mari t-ap lapriyè ansanm avèk Apot yo pandan nèvèn nan ant lasansion-an ak lapankot la. Léspri Sin désann sou yo jou lapankot la, li fè tout moun tandé mèsaj Apot yo nan langaj yo (Ac 2,1-11; cf Gn 11,1-9). Léspri Sin bay Apot yo fòs pou sèvi Jézu témouin. Nou bézouin fòs pou nou pa kité okinn mové tandans fè nou glisé nan mové chémin, pou nou rété nan bon santié Jézu trasé pou nou-an. Sa Apot yo réalizé pou nou-an sa yo transmèt bay Évèk yo an-akò avèk Pap la, k-ap kontinué dirijé fidèl yo, antan Prèt yo ak Diak yo ap asisté yo-a.

Nan légliz gin divès tandans, youn pa kontrarié lòt, okontrè youn ta doué konplété lòt, nan mézi yo rékonèt avantaj lòt la poté pou li, épi tou nan minm mézi li rékonèt pròp limit pa-l. Si chak moun konprann sé li sèl ki légliz, ki tout légliz la, yo pa kapab ouè kijan pié-a bézouin min-an, kijan tèt la bézouin piè yo (1 Co 12, 21). Nou pa doué sézi si gin diférans nan fason tèl moun oubyin tèl lòt réalizé mision li ginyin pou-l dirijé légliz la, sé toujou pou byin tout moun (1 Co 12,7). Nou pa doué konparé fason youn aji avèk fason yon lòt aji, pou nou jijé kondané (Mt 7,1; 1 Co 4,5; Rom 2,1-2; Lc 6,37; Jn 3,17; 8,10-11). Sé pou nou évité dézakò: sé pou nou chèché antann nou, minm si sé pa minm chémin nou pran pou nou rivé nan yon koté; gin divès kalité flè nan jadin-an, min sé minm jadin-an.

Moun ki soti Jérusalèm yo pa-t konprann sa, yo té vi-n pou fòsé légliz Antiòch la obéyi détay laloua ki pa-t gin sans pou koté sa-a. Yo pa-t bézouin troublé lafoua légliz payin konvèti yo, antan yo t-ap chèché mété yo nan

minm alignéman ak Juif konvèti yo ki Jérusalèm nan. Gin divès kado léspri-a, min sé minm léspri-a; gin divès sèvis, min sé minm Granmèt la; gin divès aktivité, min sé minm Bondié-a k-ap réalizé tout bagay nan tout moun (1 Co 12,4-6). Youn doué respékté lòt, san-l pa jijé-l, paské lòt la pa pran minm mouayin avèk li pou-l rivé nan minm koté-a. Sa dépann ki kondision ak mouayin Bondié mété nan min-l; yon foua nou konnin sé minm Bondié-a ki la, nou pa doué ap gadé sou sa-k parèt sou déyò; sé anndan fon kè-a ki konsékan; sé anndan véso-a pou nou nétouayé.

*

Lagé chaj ou yo sou Bondié: N-ap réglé, p. 39; Limiè Bondié anvayi tou patou, N-R 388; Nou sé pèp Bondié, la foua nou sé fòs nou, N-R 284; vini jouinn Jézu, l-ap kinbé nou nan konba lavi-a, N-R p. 547, Konpliman pou ou, papa, N-R p. 386; Rèn lapè; krèch lapè, Zétoual lapè, Rèn, Révélation, Rout lapè, Anè lapè, Travayè lapè, Mésaj lapè, Kana (Mariaj lapè). Sémans lapè, Mouton lapè, Jistis ak lapè, Soufrans lapè, Rouayom lapè, Lapè Pak, Rézistans lapè, Gadyin lapè, Chèf lapè, kómandman lapè, Téstaman lapè, Priyè lapè, Éspri lapè, Kantik lapè, Intèmédiè lapè.

*

* *

ASANSION

Dépi jou dimanch Pak la Jézu té déjà monté nan sièl pou-l jouinn tout pouvoua nan min Papa-a, dapré sa-l té di Mari Madlèn (Jn 20, 17): "M-ap monté kot Papa-m ak Papa nou-an, kot Bondié-m nan ak Bondié nou an". Pèsòn pa-t témouin lè sa-a, sa té pasé pou Jézu li minm sèl. Min karant jou apré sa (Ac 1, 9), Jézu monté nan sièl la yon fason sansib pou patizan-l yo ouè. Foua sa-a sé pa pou li sa té fèt, sé pou yo minm. Yo t-ap pozé-l késion sou péyi koté li Roua-a, kilè li t-ap vi-n fè-l rivé sou tè-a. Li fi-n éspliké yo yo pa bézouin konnin moman ak dat bagay sa-a, min sé yo minm k-apral résévoua léspri Sin-an ak fòs léspri-a ap ba yo pou sèvi témouin péyi sièl la koté li Roua-a li déjà rivé sou tè-a. É sé pou-l voyé léspri-a ki fè li pati-a. Donk foua sa-a sé pou patizan-l yo li monté yon fason sansib nan sièl la. Sé yon fason pou fè yo konprann tou dépi karant jou li t-ap parèt dévan yo anpil foua, koulié-a tan sa-a fini; sé nan lafoua avèk sakréman lafoua yo y-apral viv yon lòt mòd kontak avèk li.

Ansanm avèk la Trè Sint Vièj Mari y-al fèmin kò yo pandan yon névèn pou yo lapriyé léspri Sin-an, pou-l désann sou yo, pou yo kòmansé sèvi Jézu témouin.

*

Sizièm dimanch Pak la, litiji-a montré kijan rinmin-an mandé séparasion; vré rinmin-an sipozé dépasman; yon moun ki pa konn aksépté séparasion, sé yon moun ki pa konn rinmin; Jézu réponn Manman-l ak Papa-l nan Tanp la, lè-l té gin douzan, li di yo li gin pou-l nan lakay Papa-l ak nan afè Papa-l (Lc 2, 49). Lè-l ap palé osijè lakay Papa-l la, sé yon fason pou-l di li gin pou-l rémonté koté-l soti-a (cf Jn, 16, 28; 2, 19). Jou dimanch Pak la, lè Mari Madlèn té vlé kinbé-l la, li té di-l pa rét ap kinbé-l konsa, li pa ko monté al kay Papa-l, sé pou-l al di frè-l yo l-ap monté al kay Papa-l ak kay Papa yo, kay Bondié-l ak kay Bondié yo-a (Jn 20, 17). Dépi jou dimanch Pak la, li té monté vré, nan asouè li désann vi-n kot Apot yo, li souflé sou yo, li ba yo léspri Sin-an pou yo gin pouvoua padonnin péché (Jn 20, 21). Apré sa, pandan karant jou, l-ap parèt dévan yo, yon lè sé antan dé patizan yo sou rout (Lc 24, 15; Mc 16, 12), yon lòt lè sé antan patizan yo lapèch (Jn 21, 4), yon lòt lè sé dévan anpil patizan alafoua (1 Co 15, 6), yon lòt foua sé dévan Piè, dévan Jak (1 Co 15, 5.7; Lc 24, 34). Chak foua, li disparèt. Aparision sa yo rapid tankou zèklè. Karant jou apré Pak, l-ap monté yon fason ofisièl nan sièl la, pou montré sé nan lafoua ak sakréman lafoua yo pou nou rankontré-l.

Yon moun ki pa konn aksépté séparasion, sé yon moun ki pa konn rinmin tout bon vré, sé yon rinmin ki trò égoyis. Jézu di li pi bon pou nou si-l pati

(Jn 16, 7), pou-l kapab voyé léspri Sin-an pou nou; si-l pa alé li pa-p voyé léspri Sin-an, Avoka sa-a k-ap plédi kòz nou-an, k-ap ba nou fòs nan tou sa n-ap fè-a. Réyèlman vré, di jou apré Jézu fi-n monté nan sièl la, li voyé léspri Sin-an sou patizan-l yo, li plin yo ak fòs, ak sèt kado yo, pou yo sèvi Jézu témouin sou tout fas tè-a. Lè Jézu pati, sé lè sa-a li pi prézan, dapré sa lévanjil Sin Mak la di nou nan lamès lasansion-an: "Granmèt la t-ap travay avèk yo, li t-ap asiré fòs paròl yo avèk mèvèy li t-ap fè yo" (Mc 16,20). Sé konsa lévanjil Sin Mak la fini (cf Ac 28,31).

Jézu sé Tèt la, nou sé manb yo. Tèt la déjà nan sièl la, l-ap ralé manb yo vi-n jouinn li, dapré sa premié priyè lamès lasansion-an di nou: "Jézu-Kri, Pitit ou-a, monté nan sièl, sé li minm k-ap ralé nou. Li sé Tèt, li pran dévan, nan bèlté-a, nou sé Kò, nou gin éspoua, paské sé li minm ki rélé nou". Lasansion sé mèvèy sakré éspérans. Lè n-ap lapriyè chaplè-a, nou rivé nan dizèn lasansion-an, sé éspérans nou mandé, éspérans pou n-al jouinn Granmèt nou-an nan sièl la. An-atandan n-ap viv lavi sièl la nan lafoua, tankou Moyiz ki t-ap maché sou chémin pèlérinaj li nan dézè-a, "kòm si li t-ap ouè sa yo pa kapab ouè-a" (He 11,27).

Lè Jézu pati al nan sièl la, sé pa lè sa-a tout bagay fini, sé lè sa-a tout bagay kòmansé. Li fè Apot yo konprann sa, lè yo mandé-l si sé nan tan sa-a l-ap vi-n instalé péyi Roua Israël la. Li di yo sé travay pa yo ki kòmansé, sé pou y-al préché tout koté, pou yo sèvi-l témouin, pou yo montré tan yo rivé bout yo, péyi koté Bondié Roua-a li la, sé pou moun yo chanjé konpòtman pou yo kouè nan Bòn Nouvèl la. Sé kè yo ki pou chanjé, pou yo ouè tout bagay avèk jé tou nèf, pou yo ouè Bondié ki Roua anndan fin-fon lavi y-ap viv la. Sin Pòl di Éfézyin yo nan dézièm léktu lamès lasansion-an, sé pou Bondié louvri je kè yo pou yo kapab konnin sa sa vlé di éspoua yo mété nan rélé li rélé yo-a (Ep 1,18). Lasansion-an, sé mèvèy sakré otorité Granmèt la ki chita adouat Bondié Papa-a, anlè sièl la nèt, pi ro pasé tout chèf, otorité, pouvoua, kòmandman, ak tout non yo kapab nonmin, pa sèlman nan tan sa-a, min nan sa k-ap vini-an (Ep 1,20-21). Jézu di Apot yo, jou l-ap pati nan sièl la, yo rinmèt li tout pouvoua nan sièl la ak sou tè-a (Mt 20,18). Sé konsa Sin Pòl di nou nan lamès lasansion-an Bondié Papa-a pozé tout bagay anba piè-l (Ep 1,22). Antan nou sou tè-a n-ap okipé aktivité sièl la (Col 3,1; Ph 3,20), dapré sa priyè apré kominion-an di nou pou jou lansansion-an: "Nou minm ki instalé sou tè-a, ou pèmèt nou okipé aktivité ou yo". Nou pa doué rété bra kouazé ap gadé nan sièl la, koté Jézu disparèt la, jan réfrin pou antré nan lamès lansansion-an di nou-an (Ac 1,11). Nan konvèsasyon Jézu té ginyin ak Nikodèm, li té di-l: "pèsòn pa monté nan sièl la, sof sila-a ki désann sot nan sièl la, Pitit moun nan ki nan sièl la (Jn 3, 13). Sint-Ogustin

di nou sé pou kè nou monté nan sièl la avèk Jézu-Kri ("Semon de Ascensione Domini", Mai 98, 1-2: PLS 2, 494-495; cf Liturgia Horarum II, Vatican 1974, 719; office de lecture pour l'Ascension). Sint-Ogustin di nou: si nou lévé vivan ansanm ak Jézu-Kri, sé pou nou gouté bagay ki anro yo, koté Jézu-Kri chita adouat Bondié-a, sé sa ki anro pou nou chèché, sé pa sa ki sou tè-a. Li di sa pou fè sonjé sa Sin Pòl di nou jou dimanch Pak la nan mès lajounin-an, nan dézièm léktu-a (Col 3, 1-4). Li éspliké nou Jézu monté san-l pa kité nou, nou déja avèk li, minm si kò nou pa ko nan bèlté sièl la, jan-l promèt nou-an. Li fè nou konnin tou sou tè-a Jézu soufri tout mizè nou santi, tankou manb li yo. Li fè nou sonjé sa Jézu té di Sin Pòl sou rout Damas la: "Sòl, Sòl, poukisa ou-ap pèsékité-m nan?" (Ac 9, 4; 22, 7; 26, 14). Li raplé tou sa Jézu té di nan parabòl dènié jijman-an: "Mouin té grangou, nou té ban-m manjé" (Mt 25, 35). Li mandé pou nou travay sou tè-a yon fason pou nou déja répozé ansanm avèk Jézu nan sièl la, pa lintèmédiè lafoua, léspérans ak lacharité, ki mété nou nan rélasyon avèk li. Li di nou li minm pandan li laba-a, li avèk nou tou; épi nou minm pandan nou isit la, nou avèk li tou. Li di nou Jézu pa kité sièl la, lè-l désann vi-n jouinn nou-an; konsa tou li pa kité nou non plis lè-l monté ankò nan sièl la; li té laba-a pandan-l té isit la, jan-l di Nikodèm nan: "Pèsòn pa monté nan sièl la, si sé pa sila-a ki désann sot nan sièl la, Pitit moun nan ki nan sièl la" (Jn 3, 13). Nou fè yon sèl avèk Jézu-Kri; li sé Tèt, nou sé manb. Li pa monté pou kont li, li minnin nou ansanm avèk li. Dépi sou tè sa-a sé pou nou viv lavi sièl la, pou nou sèvi témouin tout bon vré péyi koté Bondié Roua-a instalé isit la. Dépi jou lasansion-an jous jou Pannkot la, pandan di jou, la Trè Sint Vièj Mari ap lapriyé ansanm ak patizan yo, pou yo fè tankou yon névèn k-ap préparé désann léspri Sin-an sou légliz la. Ansanm avèk li, nou minm tou n-ap antré nan névèn sa-a, pou nou mandé léspri Sin-an pou-l chanjé kè nou antan-l vidé sèt kado-l yo ladan-l.

*

Jou lasansion-an, Jézu promèt léspri Sin-an; li té di Apot yo si-l pa pati, li pap voyé léspri Sin-an pou yo (Jn 16, 7). Lasansion gin rélasyon avèk lapankot. Sin Pòl di Éfézyin yo: Jézu monté li bay lèzòm kado yo (Ep 4, 8; cf Ps 68, 19). Sin Pòl détayé kado yo, antan-l di: li bay yon pòsion favè pou yo travay kòm Apot, yon lòt pòsion pou fè aktivité Profèt, yon lòt pòsion pou yo préché lévanjil, yon lòt pòsion pou yo réponsab légliz, yon lòt pòsion pou yo gin sians sakré, tou sa sé pou òganizasion "Sin" yo, sa vlé di fidèl yo, pou dévlopé Kò Jézu-Kri-a, pou tout moun fè yon sèl, malgré gin

pliziè manb. Léspri Sin Jézu ap voyé jou lapannkot la, li pap fè tout moun palé yon sèl lang, min l-ap fè chak moun konprann nan pròp lang pa-l. Li pap égalizé tout bagay nan minm nivo. Li pap koulé tout moun nan yon sèl moul, min l-ap fè tout moun fè yon sèl kan minm, malgré chak moun gin orientasion pa-l, gin mòd jan travay pa-l, gin mouayin pa-l pou-l réalizé aktivité-l. Lasansion orienté nan diréksion lapannkot. Jézu monté pou-l voyé léspri Sin-an k-ap fè tout nasion yo vi-n tounin yon sèl pèp. Li té di lè y-ap lévé-l anlè-a, l-a ramné tout bagay ak tout moun vi-n jouinn li (Jn 12, 32). Kado léspri Sin-an Jézu ap ba nou-an, sé pou fasilité aktivité lafoua, lésperans ak lacharité. Yo fè nou vi-n pi dosil nan intéljans nou, nan volonté nou ak nan sansibilité nou, pou nou kouè pi byin, pou nou rinmin pi byin, pou nou espéré-l pi byin. Sé minm Vérité-a nou kouè, sé minm Bondié-a nou rinmin, sé minm Byin-an nou espéré. Sé poua plis nou gin souplès nan intéljans nou, nan volonté nou, nan sansibilité nou, pou nou kouè, pou nou rinmin, pou nou espéré, gras a kado léspri sin-an, sé plis n-ap fè yon sèl antré nou; malgré nou gin divès orientasion sé yon sèl difé-a ki séparé nan divès flanm k-al pozé sou tèt chak patizan yo. Sou mòn Sinayi-a, Bondié té bay laloua-a ki rasanblé pèp li-a. Jou lapannkot la, Bondié voyé léspri Sin-an, nouvo laloua-a, ki fòmé nouvo pèp la. Laloua sa-a sé rinmin-an. Léspri Sin sé Rinmin Papa-a gin pou Pitit la ak Pitit la gin pou Papa-a. Sé li minm k-ap fè nou fè yon sèl. Papa-a pa Pitit la. Pitit la pa Papa-a; min yo fè yon sèl kan minm. Lè Pitit la monté nan sièl, li voyé léspri Sin-an, pou, malgré nou chak nou rété sa nou yé-a, nou fè youn kan minm antré nou.

Yon lè Sint Bènadèt t-ap fè yon névèn en lonè la Trè Sint Vièj Mari; min li t-ap lapriyé dévan yon statu Sin Jozèf; Sè-l yo fè-l rémaké sa; li di: "Nan sièl pa gin jalouzi". Nan légliz, gin divès fason pou travay, pou lapriyé, pou rinmin, pou sèvi. Youn pa kontrarié lòt. Okontrè, sé anrichi youn doué anrichi lòt. Nou tout, youn bézouin lòt. Pa gin pèsòn ki gin tout kapasité travay la nan min-l. Toujou gin travay pou fèt, si sé pa yon koté, sé youn lòt; si sé pa yon fason sé yon lòt. Liv lasajès la di: léspri Sin rasanblé tout bagay (Sg 1, 7). Lèzòm té vlé rasanblé pou bati kay ro Babèl la kont Bondié oubyin san Bondié. Langaj yo brouyé; éfò yo gayé Lapannkot ap korijé mové orientasion sa-a. Si léspri Bondié soutni éfò nou, n-ap fè youn antré nou (Gn 11, 1-9; Ac 2, 1-11). Tan ki séparé lasansion ak lapannkot la, sé moman pou nou lapriyé yon fason spésial, ansanm avèk la Trè Sint Vièj Mari ak Apot yo, pou nou mandé léspri Sin-an avèk kado-l yo (Is 11, 1ss), avèk frui-l yo (Ga 5, 14), pou-l ba nou kado Sajès, Intéljans, Konsèy, Fòs, Sians, Krint, Piété, pou-l fè nou donnin frui pasians, bon kè, sèvis, konfians nan lòt yo, dousè, ékilib.

Nou pa konn sa pou nou mandé, min sé li minm k-ap mandé-l pou nou, ak paròl nou pa konprann. Sa-l mandé-a l-ap jouinn li, paské li akòdé ak volonté Papa-a (Rom 8, 26s). Sa-k sa-l, l-ap lavé-l; sa-k sèk, l-ap rouzé-l; sa-k frèt, l-ap chofé-l; sa-k fènoua, l-ap kléré-l; sa-k vid, l-ap konblé-l; sa-k fèb, l-ap soutni-l; sa-k malad, l-ap géri-l; sa-k rèd, l-ap laché-l; sa-k krochi, l-ap drésé-l; sa-k étinn l-ap limin-l; sa-k lagé, l-ap maré-l; sa-k pati, l-ap réprann li; sa-k bouké, l-ap poté-l; sa-k fèmin, l-ap louvri-l; sa-k anmè, l-ap sikré-l; sa-k nan chinn, l-ap lagé-l; sa-k t-ap tann, l-ap kalmé-l; sa-k gayé, l-ap réfè-l; sa-k pèdi l-ap séré-l; sa-k grangou, l-ap nour-i; sa-k pòv, l-ap défann li.

L-ap ba nou ékilib, antan-l mét alafoua fòs ak dousè nan nou, pou-l fè nou ouè klè nan nuit, pou-l fè tèt nou kalm nan kont, pou-l fè nou espéré nan tray, pou-l fè nou asiré nan dout, pou-l fè nou réfléchi nan brui, pou-l fè nou rézisté nan van, pou-l fè nou lévé tèt nan ront...

Sé li minm ki voua pou tout moun ki san voua, jan Pap Jan-Pòl II éspliké nan Lèt Ansiklik li ékri osijè léspri Sin-an: "Dominum et vivificantem" (Sila-a ki Granmèt la é k-ap bay lavi-a), N. 65; sèké sé léspri Sin-an li minm k-ap souflé nan kè nou ki sa pou nou di, lè n-ap palé ak Bondié (Rom 8, 26). Fon kè nou tankou yon vid ki san limit (Dominum et vivificantem, 65), Léspri-Sin sèl kapab konblé-l (ib), antan l-ap fè nou aspiré Bondié anndan Bondié li minm, nan lapriyè nou, jan Sin Jan-d-la-Koua di-a (Cantique spirituel, Red. A., str. 33). Minm jan li té plin kè la Trè Sint Vièj Mari Nazarèt pou-l anfanté Jézu (Lc 1. 34s; Mt 1, 18), minm jan-l té plin kay la koté la Trè Sint Vièj Mari ak Apot yo té rasanblé ap lapriyè-a, pou-l anfanté légliz la, konsa n-ap mandé-l pou-l plin kè nou ak Kominoté nou, pou nou sèvi Jézu témouin, antan nou fè ouè, pandan nou sou tè-a, nou déja ap viv lavi sièl la, jan Sin Pòl di Kolosyin yo: "Chèché réalité ki anro yo, koté Jézu-Kri yé-a, koté-l chita adouat Bondié-a; sonjé bagay ki anro yo, sé pa bagay ki sou tè-a pou nou sonjé" (Col 3, 1s). Lasansion Jézu-Kri invité nou dévlopé léspérans nou. N-ap mandé la Trè Sint Vièj Mari pou-l fè nou viv espérans sa-a kòm manb Jézu-Kri, ki déja ranpôté laviktoua ansanm avèk li sou péché-a ak lanmò nan lavi sièl la. Sa ap pèmèt nou dépasé diférans nou, pou nou fiksé atansion nou sou sa-k fè nou sanblé. Nou sé pitit yon sèl Papa, nou tout nou sanblé nan Jézu-Kri. Sé nan li léspri Sin-an ap rasanblé nou, pou nou fè yon sèl fanmiy. Konsa n-ap lapriyè-l pou lapè sou tè-a, nan nasion yo, nan sosiété-a, nan fanmiy yo, nan légliz la.

A pati ané 1987, lasansion-an vi-n rétonin fèt dobligasion pou péyi-a ansanm ak Noèl, Fèt-Dié, Lasansion, la Tousin épi Pèpétuèl Sékou. Sa fè sis fèt dobligasion. Jou lasansion-an Apot yo té kòmansé yon névèn lapriyè;

n-a chèché mété plis atansion sou lapriyè, sitou jou dimanch ak fèt dobligasion yo. Gin moun ki kontanté yo ak yon ti mès lavèy osoua, épi tout jounin dimanch la oubyin fèt obligasion-an, yo lib. Sé pa sans dimanch la ak fèt obligasion-an sa. Sé pou nou fè ouè jan jou sa-a sin, non sèlman nou sispann fè gro travay, min nou konsakré tan nou tou bay Bondié. Sé li-k ba nou-l, nou rimmèt li-l. Sin Luk di apré lasansion-an: "Yo tout, ak yon minm kè, yo té fidèl ap lapriyè, avèk kèk médanm, nan pami yo té gin Mari, Manman Jézu, avèk frè-l yo" (Ac 1, 14). Tout koté yon moun lapriyè, léspri Sin la, jan Pap Jan Pòl II fè rémaké nan Lèt ansiklik sou léspri Sin-an (Dominum et vivificantem, 65). Li mandé pou nou insisté sou konésans ak dévosion léspri Sin, sitou nan tan k-ap préparé Jibilé ané 2.000 la. N-a fè éfò pou jou dimanch ak fèt dobligasion yo nou konsakré tan nou yon fason pi dézintérése pou nou lapriyè. Pap Jan Pòl II di: Minm si nan istoua-a légliz té kité kay koté yo t-ap lapriyè pou tann léspri Sin-an, an fèt li toujou rét ap lapriyè; li komsa pa janm sòti nan kay sa-a (Dominum et vivificantem, 66). Li di: "Au milieu des problèmes, des déceptions et des espoirs, des abandons et des retours que connaît notre époque, l'Église demeure fidèle au mystère de sa naissance. Si c'est un fait historique que l'Église est sortie du Cénacle le jour de la Pentecôte, on peut dire qu'en un sens elle ne l'a jamais quitté. Spirituellement l'évènement de la Pentecôte n'appartient pas seulement au passé: L'Église est toujours au Cénacle, qui reste présent dans son coeur. L'Église persévère dans la prière, comme les Apôtres, avec Marie, Mère du Christ et avec ceux qui, à Jérusalem, constituaient le premier noyau de la communauté chrétienne et attendaient en priant la venue de l'Esprit Saint". (DV 66, Typographie polyglotte vaticane, 1986, p. 132).

N-ap asosié ak lapriyè sa-a pou nou rélé léspri Sin-an: Vini, voyé réyon limiè sot nan sièl la, Papa pòv yo, li minm ki bay kado yo, limiè kè yo, li minm ki konsolé nou si byin, li minm ki abité nan nou avèk dousè, fréchè ki dous, nan travay li sé répo, nan chalè li sé fréchè, nan lapinn li sé konsolasion, limiè ki sin anpil, pou-l plin fon kè fidèl yo; san pouvoua-l, pa gin anyin nan moun ki pa pèvèti, sé pou-l lavé sa-k sal, pou-l rouzé sa-k sèk, pou-l géri sa-k blésé, pou-l asoupli sa-k rèd, pou-l chofé sa-k glasé, pou-l drésé sa-k krochi, pou-l bay fidèl li yo ki mét konfians nan li yo sèt kado sakré yo, pou-l bay mérit bon kalité, pou-l bay dènié délivrans la, pou-l bay kè kontan tout tan.

*

* *

SÉTIÈM DIMANCH PAK A

Sétièm dimanch Pak la anndan névèn lapannkot la. Dépi dimanch Pak, kè kontan éklaté apré karant jou pénitans Karèm nan. Kè kontan sa-a, sé léspri Sin-an ki bay li. Koté léspri Sin-an yé, sé kè kontan, sé kè pozé. Nou manifésté kè kontan sa-a nan litiji-a antan nou di alélouya, sa nou pa-t janm di pandan tout tan Karèm nan. Yon ti niaj kòmansé ap plané nan lè-a, antan jou lasansion-an, Apot yo ouè Jézu monté nan sièl la, épi li disparèt nan niaj yo, yo rété ap fiksé jé yo nan sièl la ap gadé plas koté li fi-n monté-a. Yo té kòmansé pran chagrin. Min fason Jézu vlé gin rélasyon avèk yo, sé nan lafoua avèk sakréman lafoua yo. Sé konsa dépi jou dimanch Pak la, Mari Madlèn té vlé kinbé-l, li té sézi pié-l. Jézu té di-l li pa ko monté kot Papa-a; sé pou-l al kot Papa-a pou-l voyé léspri-a pou yo (cf Jn 20,17). Nan asouè, li désann kot patizan yo nan kay la, li souflé sou yo, li di yo: "résévoua léspri Sin-an, tout péché nou éfasé nou minm, y-ap rété éfasé nan sièl la, sa nou pa éfasé sou tè-a, yo pap éfasé nan sièl la tou". Dépi jou sa-a, li té fè sa paské li té fi-n monté kot Papa-a (cf Jn 20,22), min lè sa-a pèsòn pa-t ouè kijan l-ap monté kot Papa-a. Koulié-a minm, jou lasansion-an li kité légliz la ouè kijan l-ap monté kot Papa-a. Li pati yon fason ofisièl, épi li pap kontinyé ap fè aparision tankou zéklè dé tanzantan ankò, li avèti yo sé yon nouvo fason y-ap gin pou yo antré nan rélasyon avèk li. Sé nan lafoua avèk sakréman lafoua yo.

Épi léspri Sin-an l-ap voyé-a, sé pou tout légliz la, minm jan li monté nan sièl la pou-l fè yo tout ouè-l la. Yo pa bézouin chagrin. Léspri Sin-an ap ba yo kè kontan. Jou lapannkot la, sé yon éklatman kè kontan ki rivé. Anpil nasion té rasanblé Jérusalèm, yo tout tandé Apot yo ap palé nan lang yo, yo tout konprann (Ac 2,4-6). Koté léspri Sin-an yé, gin akò ant tout moun, ant tout nasion, ant tout pèp. Nan épòk moun yo t-ap bati kay ro Babèl la, pou yo té monté nan sièl la al fè Bondié désann nan, Bondié té voyé yon léspri ki fè tout langaj vi-n brouyé, youn pa-t konprann sa yon lòt t-ap di; yo tout té blijé gayé. Koulié-a sé nan sans kontrè évènman-an rivé. Tout moun ki té palé dèt lang, youn konprann lòt. Koté léspri Sin-an yé, li fè tout moun vi-n dakò (Gn 11,1-9). Gin diférans nan konpòtman moun yo, min sé minm léspri-a ki fè tout moun fè yon sèl. Pandan névèn léspri Sin-an sé pou nou sonjé lapriyé pou tout pèp yo fè yon sèl, pou nasion yo sispann fè lagè youn kont lòt, pou fanmiy yo vi-n fè yon sèl anndan kay la, pou divès rélijion yo sispann youn ap trété lòt tankou lènmi ankò. Avèk Psòm nan (Ps 104 = 103) nou abitué mandé Bondié pou-l voyé léspri Sin-an pou fas tè-a kapab chanjé (Ps 104,30). Avèk Profèt Ézékièl, nou abitué ouè kijan Bondié promèt pou-l ba nou yon kè nouvo ak yon léspri nouvo (Ez 36,26; 11,19ss). Sé laloua-l la

li mété anndan kè nou (Jer 31,33), laloua rinmin-an. Léspri Sin-an sé léspri Rinmin. Sé kòmandman nouvo sa-a Jézu di li bay Apot yo (Jn 13,34; 15,12; 1 Jn 2,8) pou youn rinmin lòt minm jan li minm Jézu li rinmin nou joutan li mouri pou nou. Li té promèt madanm Samari-a li t-ap ba li dlo vivan k-ap koulé tankou yon sous (Jn 4,14). Jou fèt Tabènak yo, li té di Juif yo sa: Moun ki kouè nan li, sé yon sous dlo lavi k-ap koulé sot nan léstomak li (Jn 7,38s; Is 44,3; 12,3; 35,7). Sou Koua-a, yon sòlda pèsé kè-l avèk fouinn li, minm lè-a san ak dlo koulé (Jn 19,34). Sé yon nouvo kréasion (Gn 2,6-7; Sg 15,8,11; Ps 104,29s). Koté léspri Sin-an yé, toujou gin rénouvèlman, toujou gin rékòmansman, toujou gin yon lavi ki vi-n pi jèn. Nou vi-n tounin tankou moun ki fèk fèt. Li té la nan kòmansman kréasion-an (Gn 1,2). Li té la nan kòmansman lavi Jézu sou tè-a nan vant Mari ki Vièj (Lc 1,35). Li té la nan kòmansman lavi bibliik Jézu nan batèm nan dlo Joudin-an (Lc 3,22). Li la nan kòmansman légliz la, jou lapannkot la (Ac 2,4).

Chak foua nou kòmansé lapriyè, nou toujou rélé léspri Sin-an, paské sé li minm ki anndan kè nou, dapré sa Sin Pòl di nou (Rom 8,26), k-ap palé langaj nou pa kapab konprann, ki konnin sa Bondié vlé, sé sa minm li mandé pou nou, paské nou minm nou pa konn ki sa pou nou di pou nou lapriyè. Sé li minm nou rélé chak foua n-ap kòmansé yon travay, paské sé li minm k-ap aji nan tout moun ak nan tout bagay. Sé li minm nou rélé, lè mové léspri-a vlé fè nou tonbé nan péché, paské koté li yé, mové léspri-a pa kapab proché. Sin Pòl di nou li gin anpil frui li ba nou: charité, kè kontan, kè pozé, pasians, dousè bon jan, fidélité, konpréansion, fòs pou frinnin mové panchan (Ga 5,22). Sé frui sa yo minm n-ap mandé léspri Sin-an, pandan névèn nan n-ap fè-a. N-ap sonjé Kè Jézu ki té pèsé sou Koua-a, koté san ak dlo té koulé-a (Jn 19,34; cf Ez 47,1), kè sa-a ki si tèlman rinmin lézòm nan, kè sa-a ki ba nou léspri Sin-an. Sé Kè sa-a minm pou Granmèt la mété nan plas kè ròch nou-an, pou-l aprann nou obéyi volonté Papa-a, pou-l aprann nou dosil nan désizyon-l yo. Sin Pòl di moun k-ap viv konsa sou kont léspri Sin-an ki ba yo frui sa yo, yo pa bézouin laloua (Ga 5,23), paské sé léspri Sin-an minm ki sèvi yo kòm laloua, sé nan min-l yo dosil, tout tan. Sé favè sa-a n-ap mandé Manman Mari, pou nou dosil nan min léspri Sin-an, pou tout mové atirans nou yo, nou klouré yo sou Koua-a, pou nou kondui tèt nou dapré léspri Sin-an paské sé lavi-l ki nan kè nou.

*

* *

SÉTIÈM DIMANCH PAK B

Lévanjil sétièm dimanch Pak la transmèt nou sa yo rélé "prièrè **sacerdotale**" Jézu té fè jou Jédi Sin-an. Priyè sa-a gin toua pati: nan premié pati-a (Jn 17,1-8), Jézu ap lapriyè pou tèt pa-l; nan dézièm pati-a (Jn 17,9-19), Jézu ap lapriyè pou Apot yo; nan touazièm pati-a (Jn 17, 20-26), Jézu ap lapriyè pou tout légliz la; minm jan Lévit yo, apré Égzil la, yo té sakrifié pak la pou tout pèp Israèl la ki té sot légzil la, pou frè yo prèt yo, épi pou tèt yo (Ésdras 6,20); minm jan jou fèt Ékspiasion yo ("Yom kipour") Gran-Prèt la té lapriyè pou pròp tèt pa-l, pou fanmiy sasèdotal la (pitit Lévi yo) épi pou tout pèp la (Lv 16,17).

Priyè "sacerdotale" sa-a fè sonjé Jézu sé gran-Prèt la k-ap antré nan "Saint des Saints"-an, dèyè voual sakré-a, nan sièl la (He 9,11s), avèk pròp san pa-l, yon foua pou tout. Sa montré nou pandan Apot yo ap lapriyè nan "Cénacle" la, pandan névèn y-ap fè pou mandé léspri Sin-an, Jézu minm nan sièl la ap lapriyè kòm gran-Prèt, sé minm mouvman priyè sa-a k-ap alé vini nan sièl la ak sou tè-a. Nan premié léktu sétièm dimanch Pak B-a, Sin Piè ap lapriyè pou Bondié fè ouè kilès li chouazi pou ranplasé Juda (Ac 1,20-26). Pandan l-ap lapriyè avèk préokipasion sa-a sou tè-a, Jézu kòm Prèt an chèf, Tèt légliz la, ap akonpagné lapriyè-l la nan sièl la, sé minm litiji-a k-ap déroulé nan sièl la ak sou tè-a avèk yon sèl Gran-Prèt la, Jézu-Kri li minm minm. Li Prèt, li Tèt, li Bondié. Kòm Prèt, l-ap lapriyè pou légliz la; kòm Tèt, l-ap lapriyè nan légliz la; kòm Bondié, légliz la ap lapriyè-l, dapré réfléksion Sint-Ogustin di nou, antan-l nan sièl la, kòm Tèt, li toujou rét sou tè-a nan manb li yo.

Priyè "sacerdotale" sa-a, yo rélé-l tou priyè **konsékrasion**. Nan finisman lévanjil sétièm dimanch Pak B-a, Jézu di: "Konsakré yo nan lavérité... Mouin konsakré tèt mouin pou yo, pou yo kapab konsakré yo minm tou nan vérité-a" (Jn 17,19). Sé kòm si sé dé kalité konsékrasion ki la-a: youn sé konsékrasion Jézu-Kri-a, lòt la sé konsékrasion Apot yo. Konsékrasion Jézu-Kri-a, sé konsékrasion lakoua-a, konsékrasion Apot yo, sé konsékrasion mision prèch yo. Jézu konsakré tèt li pou yo, pou yo minm yo kapab konsakré nan lavérité-a. Sa vlé di: li konsakré tèt li nan lanmò, pou Apot yo kapab konsakré nan travay li ba yo pou yo préché lévanjil la, pou yo sèvi-l témouin-an.

Sèkè gin toua mòd konsékrasion: gin yon konsékrasion yo rélé konsékrasion moral, gin yon konsékrasion yo rélé konsékrasion misionè, gin yon konsékrasion yo rélé konsékrasion viktimal. Konsékrasion **moral** la, sé konsékrasion ki fè moun nan pa gin péché ditou, jan Jézu di: "Kilès ki kapab

prouvé-m mouin gin péché?" (Jn 8,46). Konsékrasion moral sa-a, nou konnin tou la Trè Sint Vièj Mari ginyin-l dépi premié moman li égzisté nan vant gras a privilèj Imakilé Konsépsion-an. Konsa Jézu té déjà konsakré nan konsékrasion moral la. Dézièm konsékrasion-an, sé konsékrasion **misionè**-a, sé konsékrasion sa-a ki mété moun nan apa pou mision-l, jan Bondié té déklaré Jérèmi-an: dépi-ou nan vant manman-ou, mouin konsakré-ou kòm Profèt nasion yo (Jer 1,5). Nan kòmansman lavi misionè Jézu, apré batèm li, léspri Granmèt la sou li, li konsakré-l kòm Profèt (Lc 4,18). Jézu té déjà konsakré nan mòd konsékrasion misionè sa-a tou. Touazièm mòd konsékrasion-an, sé konsékrasion **viktimal** la. Liv Lévitik la di: sa yo ofri Granmèt la sou lotèl la, sé pou yo konsakré-l ba li nèt, toutantié, pou yo boulè-l nan difé, pou yo touyé viktin nan, pou montré doua Bondié gin sou li san limit, san yo pa kite anyin de koté. Sé mòd jan konsékrasion sa-a Jézu ap palé pou pròp tèt li nan finisman lavi l-ap pasé sou tè-a, nan Jédi Sin-an, lavèy jou li mourri-a. Li konsakré-l nan lanmò-a, pou Apot yo kapab konsakré nan dézièm mòd konsékrasion-an, konsékrasion misionè yo, pou yo kapab konsakré nan mision yo, pou yo sèvi lavérité-a témouin, li minm li rinmèt tèt li bay lanmò tankou yon sakrifis ki san défo, ki détrui nèt pou Bondié Papa-a.

Tout misionè doué sonjé sa. Sé sous mision yo. Konsékrasion misionè nou jouinn sous li nan konsékrasion viktimal Jézu-Kri-a. Lè nou dékourajé, antan nou konstaté nou jouinn anpil désépsion nan travay misionè nou, antan nou ouè lavérité-a n-ap sèvi témouin-an, li pa parèt klè, nou pa ouè ki jan pou nou fè-l éklaté, n-a sonjé sé pa sa yo ouè ak jé ki konté, min sé sa ki réalizé dévan Bondié Papa nou. Jézu déjà bay lavi-l pou nou, pou échèk li sou Koua-a vi-n tounin laviktoua nan tout travay misionè n-ap fè. Sin Pòl ékri Korintyin yo pou-l épliké ròl misionè yo k-ap poté trézò apostola mision-an nan véso ki fèt ak tè kuit, ki frajil. Nan dézièm Lèt li ékri Korintyin yo, li palé anpil sou difikilté li rankontré kòm misionè (2 Co 1-7; 10-13). Li té tèlman dékourajé yon lè, li mandé Bondié pou-l délivré-l ak kò lanmò sa-a. Granmèt la di-l favè-l kont li, pouvoua-l déplouayé nan féblès (2 Co 12,9). Li di lè-l fèb sé lè sa-a li pi fò (2 Co 12,10). Li di sé pa dé travay li travay, sé pa dé mizè li pasé, nan prizon, ak kou, ak kout-ròch, ak batiman ki échoué, pandan toua foua, ak yon lè li té rété yon nuit ak yon jou nan fon lanmè, ak anpil vouyaj a-pié, ak danjé larivière, danjé asasin, danjé nan moun minm ras avèk li, danjé nan étranjé, danjé nan lavi, danjé nan dézè, danjé nan lanmè, danjé nan éspion, nan tray, nan anpil vèy, nan grangou ak nan souaf, nan anpil jèn, nan frédi ak nan manké rad, épi sitou nan préokipasion li ginyin osijè mach tout légliz yo (2 Co 11, 23-29).

Li di trézò apostola sa-a sé nan véso frajil n-ap poté-l, pou yo kapab ouè sé nan Bondié pouvoua-a soti, sé pa nan nou minm (2 Co 4,7). Apot yo ap pasé tray, min yo pa krazé; yo pa ouè koté pou yo fè, min yo pa dékontrolé; y-ap pèsékité yo, min yo pa abandoné, yo jété yo atè, min yo pa détrui (2 Co 4,8).

Li t-a bon pou tout misionè sonjé pasaj sa-a Sin Pòl prezanté nou osijè mision Apot yo, lè dékourajman vlé anparé nou, pou nou kapab di avèk Sèvitè Granmèt la nan dézièm Kantik li-a: "Mouin té konprann sé pou granmési mouin t-ap gaspiyé fòs mouin, époutan rékonpans mouin té rété fèm ap tann mouin kot Granmèt la" (Is 49,4). Sé kòmsi Bondié éspozé Apot yo sou yon térin koté y-ap batay ak bèt pou ni anj yo ni moun yo ap gadé yo. Yon lè yo té fèmin tout pòt lavil Damas, sé nan yon panié yo té blijé mété Sin Pòl pou fè-l glisé désann nan yon fénèt miray lavil la pou-l chapé anba min roua Damas la ki té vlé touyé-l (2 Co 11,32).

Jézu sé Tèt, nou sé manb. Sèvitè-a pa pi gran pasé Mèt la (Jn 15,20). Nou konsakré nan travay misionè nou gras a konsékrasion Jézu sou Koua-a kòm viktim. Sé pou nou konplété nan kò nou sa-k manké nan soufrans li pou Kò-l ki légliz la (Col 1,24), pou konsékrasion misionè nou-an patisipé nan konsékrasion viktimal li-a avèk plis angajman nou. Sé sa n-ap mandé Manman Mari nou fété sou tit Rèn Apot yo nan samdi ki vi-n anvan sétièm dimanch Pak la.

*

* *

SÉTIÈM DIMANCH PAK C

Lévanjil sétièm dimanch Pak C-a (Jn 17,20-26), sé touazièm pati nan lapriyè Jézu yo rélé lapriyè konsékrasion-an, nan chapit 17 Sin Jan-an, dènié chapit ki rakonté mision Jézu. Apré chapit sa-a, sé istoua lapasion ki kòmansé nan chapit 18 la. Chapit 17 Sin Jan-an gin toua pati: premié pati-a sé vèsè 1-5 koté Jézu montré li gin minm aksion avèk Papa-a, dézièm pati-a sé vèsè 6-17 koté Jézu montré li gin minm non avèk Papa-a, touazièm pati-a sé vèsè 20-26 (tranch lévanjil pou sétièm dimanch Pak C-a) koté Jézu montré li gin minm natu avèk Papa-a. Chapit 17 sa-a ki vi-n nan finisman mision Jézu-a, sé tankou yon rakousi ki ranmasé tout lévanjil Sin Jan-an. Yo rélé-l tou "priyè sasèdotal".

Nan lévanjil Sin Jan-an, Jézu ap montré li sé Bondié; sé tankou yon voua-l l-ap lévé ofi-amézi dévan Juif yo, tankou lè y-ap dévoualé Koua-a jou Vandrédi Sin-an, yo dékouvri tèt la, apré sa sé yon bra-a, apré sa sé tout kò-a. Li kòmansé montré li gin minm aksion avèk Papa-a nan chapit 5,1-29. Jouskoulié-a Papa-a ap travay, li minm tou l-ap travay (Jn 5,17), é sé aksion sa yo ki rann li témouagnaj (Jn 5,36), minm jan Papa sèvi-l témouin (Jn 5, 32.37), ni Jan-Batis (Jn 5,33), ni labib (Jn 5,39). Sé lè-l té géri infim nan jou saba-a li té fè bèl déklarasion sa-a. Sé kòm yon premié machéskalié li monté avèk Juif yo pou-l montré yo li sé Bondié. Sé minm travay ak Papa-a li fè. Premié machéskalié sa-a, nou jouinn li kòm rakousi nan premié pati lapriyè konsékrasion Jézu-a nan Jn 17,1-5 (cf sétièm dimanch Pak A), koté Jézu di: "Mouin fè ouè bèlté-ou sou tè-a antan mouin réalizé travay la ou té ban-m fè-a" (Jn17,4).

Dézièm machéskalié-a Jézu ap fè Juif yo monté pou-l montré li sé Bondié-a, sé lè l-ap fè yo ouè non sèlman li fè minm travay ak Papa-a, min li gin minm non ak Papa-a. L-ap diskité sou sa ak Juif yo nan Jan chapit 8, 21-59). Li kòmansé di yo sou yon fòm voualé (Jan 8,24): "Si nou pa kouè "je suis", n-ap mouri nan péché nou". Li di yo nan Jan 8, 28: "Lè n-a isé Pitit moun nan, lè sa-a n-a konnin "je suis"". Sé Non sa-a minm Bondié té di Moyiz li ginyin-an. Nan Égzòd 3,14: "Mouin sé "je suis celui qui suis". Li té di Moyiz ankò: "Ou-a di pitit Israèl yo: "je suis" voyé-m koté nou" (Ex 3,14b). Jézu pran minm non sa-a pou-l montré Juif yo li gin minm Non ak Papa-a, donk li sé Bondié. Jézu fini konvèsasyon-an avèk Juif yo, antan li déklaré karéman. "An vérité, an vérité mouin di nou, anvan Abraam té kòmansé égzisté, "je suis" Jn 8,58. Sé lè sa-a yo ramasé ròch pou yo kalonin-l, paské yo rékonèt li vlé di li sé Bondié, li pran minm non ak Bondié. Kozé minm non ak Bondié sa-a, dézièm machéskalié k-ap fè Juif yo ouè Jézu sé Bondié-

a, nou jouinn li tankou rakousi nan dézièm pati chapit 17 lévanjil sin Jan-an 17,6-19 (cf sétièm dimanch Pak B), koté Jézu kòmansé antan-l di: "Mouin montré non-ou bay moun yo ou té mét sou tè-a pou-ou ban mouin yo-a" (Jn 17,6). Jézu insisté, li di: Papa ki Sin, gadé yo nan non ou té ban mouin-an (Jn 17,11). Li kontinué li di: "Lè-m té avèk yo, mouin té gadé yo nan non ou ban mouin-an" (Jn 17,12).

Touazièm machéskalié-a k-ap montré Jézu sé Bondié-a, sé pa sèlman minm travay ak Papa-a li ginyin (Jn 5,1-29; 17,1-5), sé pa sèlman minm Non ak Papa-a li ginyin (Jn 8, 21-59; 17,6-19), min sé minm natu ak Papa-a tou li ginyin. Sé touazièm machéskalié-a. Jézu fè yon déklarasion ofisièl dévan Juif yo nan Jan 10, 22-39 sou kèsion sa-a. Li di karéman: "Mouin minm ak papa-a nou fè yon sèl" (Jn 10,30) Juif yo pran ròch pou kalonnin-l. Yo rékonèt li déklaré li sé Bondié. Min Jézu déklaré pi klè ankò: "Papa-a nan mouin, mouin nan Papa-a" (Jn 10,38), sé konsa li fini diskou-l la. Juif yo chèché sézi-l pou yo touyé-l, li chapé sot nan min yo, li kòm bésé rido-a dépi lè sa-a. Li pa palé an piblik ankò. Li rézèvè prèch li pou Apot li yo. Sé dézièm pati lévanjil la pratikman k-apra-l kòmansé (Jn 13-20) koté Jézu konsakré tout éfò-l pou sélé lansègnman-l nan kè patizan-l yo (cf Is 8,16). Prémié pati-a sé té pou Juif yo an piblik (Jn 1-12).

Toua machéskalié sa-a yo ki té sèvi bòn kilomèt sou rout lansègnman piblik pou Juif yo (minm travay ak Papa-a 5,1-29; minm non ak Papa-a 8,21-59; minm natu ak Papa-a 10,22-39), sé yo minm nou jouinn nan dènié chapit k-ap rasanblé lansègnman ki balizé léson patikilié pou Apot yo, chapit 17 la, avèk: Prémié jalon 17 1-5 minm travay ak papa-a, dézièm jalon 17,6-19 minm non ak Papa, touazièm jalon 17,20-26 minm natu ak Papa-a. Nan touazièm pati sa-a (Jn 17,20-26): lévanjil sétièm dimanch Pak C-a, Jézu di: "Sé pou yo tout fè yon sèl, tankou ou minm Papa, ou nan mouin épi mouin nan ou" (Jn 17,21).

Sé sa-l té di nan touazièm machéskalié-a li té fè Juif yo monté-a nan Jn 10,30.38: "Papa-a ak mouin minm nou fè yon sèl... Papa-a nan mouin, mouin nan Papa-a". Minm natu Papa sa-a Jézu ginyin-an, ki fè-l fè yon sèl ak Papa-a, li mandé pou krétyin yo ginyin-l tou, pou yo fè yon sèl tou antré yo: "pou yo fè yon sèl tankou nou fè yon sèl la, mouin minm nan yo, épi ou minm nan mouin, pou yo fè yon sèl nèt" (Jn 17,22-23). Ti fraz ki anlè tèt lévanjil sétièm dimanch Pak C-a nan misèl la, sé vèsè sa-a li pran, pou bay sans lévanjil sétièm dimanch Pak C-a: "sé pou yo fè yon sèl nèt" (Jn 17,23).

Sé tankou dènié lapriyé Jézu nan lévanjil Sin Jan-an; Jézu ap lapriyé tankou Prèt an chèf la, jou yo té rélé fèt "Padon-an". Prèt an chèf la té konn lapriyé

pou pròp tèt pa-l, pou group prèt yo nan ras Aaron-an, ak pou tout pèp la (cf Lv 16,17b; Esd 6,20). Sé sa minm Jézu fè nan chapit 17 lévanjil Sin Jan-an: li kòmansé lapriyè pou pròp tèt pa-l nan premié pati-a. (Jn 17,1-5: "bay Pitit ou-a bèlté-a" Jn 17,1.5); apré sa li lapriyè pou group Apot yo nan dézièm pati-a (Jn 17,6-19): "sé pou yo m-ap lapriyè" (Jn 17,9); anfin li lapriyè pou tout légliz la nan touazièm pati-a (Jn 17,20-26): "mouin pa lapriyè pou yo sèlman min pou sila yo tou k-ap kouè nan mouin gras a paròl yo" (Jn 17,20). Sé touazièm pati sa-a ki sèvi lévanjil sétièm dimanch Pak C-a, koté Jézu, Prèt an chèf la, ap lapriyè pou tout légliz la (Jn 17,20-26). Lè-l fi-n lapriyè pou pròp tèt pa-l (Jn 15,1,5) ak pou Apot li yo (Jn 17,6-19).

Prèt an Chèf la té konn déklaré Non Grammèt la, jou sa-a sèlman, Non sa-a ki té gin kat lèt la: "YHWH". Pandan kat fous nan lapriyè "sacerdotale" la, (Jn 17), mo "Non"-an tounin (Jn 17,6.11.12.26), pou-l fè sonjé 4 lèt sa yo rélé "Tétragramme sacré"-a, sa yo pa-t gin doua prononsé-a, sof Gran-Prèt la, yon sèl fous, jou fèt Ékspiasion-an ("Yom Kippour"), non Bondié té déklaré bay Moyiz la, Ex 3,14: יהוה .

Sé yon fason voualé pou Sin Jan fè nou santi Jézu sé Prèt an Chèf la, k-ap déklaré Non Grammèt la ki gin kat lèt la, sa pèsòn pa-t gin doua prononsé-a, sof Prèt an Chèf la yon sèl fous, jou Fèt "Padon" yo.

Sé jou sa-a tou Prèt an Chèf la té konn antré nan pati ki pi rézèvé nan kay sakré-a, dèyè voualé la, koté yo té rélé "Saint des Saints"-an ki réprézanté sièl la. Lèt Ébré yo di Jézu sé Prèt an Chèf sa-a, ki travèsé voualé sièl la, li antré dèyè rido-a ki kaché "Saint-des-saints"-an, antan-l monté nan sièl la (He 9,11.12.24). Sétièm dimanch Pak la tou bingnin ak tout losion lasansion-an, yo fi-n fété nan jédi anvan-an.

Lapriyè Prèt an chèf sa-a, sé tout tan Jézu ap fè-l pou nou, san rété. Nan sa Papa-a ba li-a, sé sa li minm tou l-ap ba nou. Nan chapit 17 lévanjil Sin Jan-an, mo "bay" la tounin 15 fous (Jn 17, 2a.b.4.6.a.b. 7. 8a.b. 9. 11. 12. 14. 22. 24.a.b). Minm jan li té promèt madanm Samari-a sou bò pui Jakòb la pou-l ba-l léspri Sin-an (Jn 4,10-14) konsa tou li promèt nou l-ap ba nou léspri Sin-an (Ac 1,4; Lc 24,49). Anvan-l monté pou-l voyé-l, li béni Apot yo (Lc 24,51) tankou Prèt an Chèf la té konn fè pou fèt Padon yo (Si 50,20). Jou lasansion-an, dènié bénédikcion lamès la gin fòmil spésial. Pè-a fè toua lapriyè antan-l lonjé min-l anlè pèp la, anvan-l béni-l. Sé jès Jézu-a nan finisman lévanjil Sin Luk la (Lc 24,50), lè l-ap béni Apot yo anvan-l monté nan sièl la.

L-ap voyé léspri Sin-an pou-l rasanblé tout légliz la fè yon sèl. Sé léspri Sin-an k-ap réalizé sa Jézu mandé nan touazièm pati lapriyè chapit 17 lévanjil Sin Jan-an: pou tout moun fè yon sèl, tankou li minm ak Papa-a yo fè yon sèl la. Ant lasansion ak lapankot, sé yon névèn pou lapriyè léspri Sin-an, pou-l désann vi-n fè légliz Jézu-Kri-a fè yon sèl: Yon sèl Granmèt, yon sèl lafoua, yon sèl Batèm, yon sèl Bondié Papa-a (Ep 4,3-6). Avèk la Trè Sint Vièj Mari, Manman légliz la, k-ap lapriyè ansanm ak Apot yo, n-ap mandé pou tout moun fè yon sèl.

Nan litani Mari ki Sin, ki Vièj la, Pap Jan Pòl II té mandé pou ajouté "Manman légliz" ant "Manman Jézu-Kri" ak Manman favè Bondié-a" (Mère du Christ, "MÈRE DE L'ÉGLISE, Mère de la divine grâce"). Nan yon lèt li té ékri pou 13 mas 1980, Vatikan té voyé anonsé sa, li té di: "Tit Mari Manman légliz la", sa Pap Pòl VI ki mouri-a té déklaré yon fason ofisièl alokasion touazièm réyinion Konsil Vatikan II-a, tit sa-a ki té jouinn anpil siksè nan pèp krétyin-an. Gin yon nouvo mès votiv "Mari Manman légliz" yo mété nan Misèl Romin-an (1975). Pap Jan Pòl II, dévan anpil démand ki sot nan divès pati tè-a pou yo rivé a-Ròm, li bay posibilite pou Réyinion Évèk yo, ki vlé, yo kapab mété "Manman légliz la" nan litani Mari ki sin, ki Vièj. Nouvo tit lapriyè "Manman légliz la", nan éta Litani Lorèt la yé koulié-a, y-ap plasé-l apré "Manman Jézu-Kri" épi anvan "Manman favè Bondié-a". Tanpri, kominiké nouvèl sa-a avèk kondision-an, mouin sézi lokasion pou-m prezanté-ou respè-m. Jak R. Kadinal Knòks, Préfè.

Alokasion névèn lapannkot la, sé nòmval pou nou insisté sou tit sa-a: Mari, Manman légliz.

*

Sétièm dimanch Pak la anndan névèn ki préparé fèt lapannkot la. Dépi mèkrédi sann légliz la ap ba nou mèsaj spésial. Dimanch lapannkot la ap fèmin tan spésial sa-a. Léspri Sin-an désann sou Apot yo ak sanvin patizan yo (Ac 1,20; 2,1ss), li voyé yo sèvi témouin. Sé nésans légliz la koté tout moun fè yon sèl, malgré diférans nasyon yo. Jézu té lapriyè pou tout patizan-l yo fè yon sèl; minm jan li minm li fè yon sèl ak Papa-a. Lè léspri Sin-an désann, sé sou fòm lang difé li pozé sou tèt chak moun. Lè yo palé, tout moun konprann langaj yo. Sé yon fason pou montré légliz la fè yon sèl.

Léspri Sin-an vi-n korijé sa-k té pasé lè moun yo t-ap bati kay-ro Babèl la (Gn 11,1-9; Ps127,1) lè moun yo té vlé mété fòs aktivité yo ansanm pou yo monté minm nivo ak Bondié-a. Kay la té rété san-l pa-t kapab fini. Sé konsa lè nou vlé konsantré éfò nou pou réfè yon sosiété épi nou pa kòmansé

rèkonèt féblès nou, nou pa kòmansé mandé Bondié sékou-l, sé tan nou n-ap pèdi, travay nou kòmansé-a pap fini, jan Psòm nan di: "Si Granmèt la pa bati kay la, sé pou bon tan mason yo ap travay. Si Granmèt la pa véyé vil la, sé pou bontan gad la ap véyé" (Ps 127,1). Nèf jou anvan lapannkot, Apot yo rasanblé alantou la Trè Sint Vièj Mari (Ac 1,14), yo fè rétrèt, yo lapriyé, anvan yo kòmansé mision yo pou yo sèvi Jézu témouin. Sé sou dizième jou-a, léspri-Sin désann sou yo, li ba yo kado Sajès, Intèlijans, Konsèy, Fòs, Sians, Krint, Piété. Si nou mét Bondié a koté, lè n-ap réglé afè nou, nou pap réglé anyin yon fason kòrèk. N-ap brasé anpil bagay, n-ap fè bèl déklarasion, nou pap touché fin-fon travay la. Sé sou déyò n-ap fè yon ti krépisaj, malgré miray la gin gro fant ladan-l (Jer 2,13). Sé léspri Sin-an ki lapriyé nan kè nou, paské nou pa konn ki sa pou nou di nan lapriyé nou (Rm 8,26). Sé léspri Sin ki anndan fon kè nou, ki fè nou kapab réfè lapriyé Jézu té fè sou Koua-a: "Papa padonnin yo, paské yo pa konn sa y-ap fè" (Lc 23,34). Étièn té plin ak léspri Sin (Ac 7,35; 6,3). Sé pou sa lè yo kalonnin-l ak kout ròch, li prèt pou-l mouri, li réfè lapriyé Jézu té fè sou Koua-a: "Granmèt, pa mété péché sa-a sou kont yo" (Ac 7,60), jan premié léktu lamès sètièm dimanch Pak C-a montré-a. Léspri-Sin anndan kè nou pèmèt nou fè mòd jan lapriyé sa-a, ki sanblé alé nan sans kontrè intèlijans nou, volonté nou ak sansibilité nou. Yon moun ki pa konn lapriyé, li pa konn padonnin. Yon moun ki pa kité léspri Sin-an anvayi-l, li pa konn padonnin. Nan névèn k-ap préparé nou pou nou résévoua léspri Sin-an, sé pou nou mandé léspri Sin-an favè sa-a, pou-l plin nou ak fòs li, k-ap pèmèt nou padonnin sa yo fè nou ki mal, jan nou di nan "Papa nou ki nan sièl la" (Mt 6,12,18,21-35; Ep 4,32: Lc 6,36; 11,4).

Nan pami moun yo ki té sèvi témouin, lè yo t-ap touyé Étièn nan, Pòl té la. Sé li minm minm ki t-ap voyé jé sou rad moun yo ki t-ap lagé ròch sou Étièn atè-a (Ac 7,58). Étièn té lapriyé pou Pòl tou. Sé gras a lapriyé sa-a Pòl chanjé rout, dapré sa Sint-Ogustin di nou. Li di: Nou pa t-ap gin Pòl sa-a, si nou pa-t gin Étièn sa-a. Sé konsa Jézu té lapriyé Papa-a, pou-l padonnin tout moun ki fè-l sibi afron ak soufrans, lapriyé-l té chanjé kè asasin-an ki té klouré ansanm avèk li-a (Lc 23,42). Li té chanjé kè kapitèn nan ki té nan pié Koua-a (Lc 24,47). Li té chanjé kè foul yo ki té tounin lakay yo, antan yo t-ap frapé léstomak yo (Lc 24,48). Konsa lapriyé Étièn nan sèvi nan balans la pou chanjé kè Pòl, minm si sé pa minm lè-a (Ac 9,5).

Nou kapab pa ouè rézilta lapriyé n-ap fè pou moun k-ap pèsékité nou. Min lapriyé sa-a pa pèdi. Sint Monik té lapriyé pandan anpil ané pou pitit li Sint-Ogustin, ki t-ap viv nan libètinaj. Lè lè-a rivé, li chanjé konduit. N-ap mandé Manman Mari pou-l fè nou favè louvri kè nou tou gran pou léspri Sin-an

anvayi-l, pou-l souflé anndan-l, pou-l chasé léspri vanjans, pou-l mété léspri padon. Sa nou simin, sé li minm n-ap rékòlté. Si nou simin van, n-ap rékòlté tanpèt, (Os 8,7; 10,13; Job 4,8; Pr 22,8; Ga 6,7). Sin Jan-d-la-koua di; koté ki pa gin rinmin, mété rinmin, n-ap rékòlté rinmin.

*

"Sé pou yo fè yon sèl nèt" (Jn 17,23). Sé lapriyè Jézu fè jou Jédi Sin-an, tankou nan ofètoua lamès la k-ap réalizé nèt sou Kalvè-a. Lè-l mouri sou Koua-a, li mouri pou-l rasanblé tout pitit Bondié yo ki té gayé yo, pou yo fè yon sèl nèt (Jn 11,32). Sé sa minm li té anonsé dévan Grèk yo, lè-l té di: lè y-a lévé-l anlè-a, l-ap fè tout moun vi-n jouinn li (Jn 12,32). Lè-l lévé anlè-a, sé sou Koua-a li lévé, min sé nan lasansion-an tou li lévé. Koua-a sé machéskalié lasansion-an. Konsa lè yon moun viv mèvèy sakré Koua-a ansanm ak Jézu, li patisipé tou nan sékrè lasansion-l nan. Dé bagay sa yo pa séparé, tankou lanvè ak landouat yon rad. Yo lévé-l sou Koua-a pou-l lévé nan sièl la.

Si Jézu lévé konsa monté nan sièl la, sé minm fason-an li gin pou-l rétownin, ak tout pouvoua-l, pou-l jijé ni moun k-ap viv ni moun ki mouri. Sé sa dézièm léktu lamès sétièm dimanch Pak C-a di, nan lapriyè légliz la ap fè-a lè-l di: "Maranatha, vini, Granmèt Jézu" (Ap 22,20). Sé pratikman dènié vèsè liv lapokalips la, an minm tan tou dènié vèsè labib la, paské vèsè ki rété-a, (vèsè 21-an) sé bènédiksion final la. Sé tankou yon éko, k-ap fè lapriyè légliz la kònin, antan l-ap tann Granmèt la, nan léspérans. Léspri Sin-an ap édé-l viv sitiasion l-ap pasé chak jou, san-l pa chèché sovè kité tè-a, min okontrè antan l-ap mandé Jézu pou-l vini fè ouè sé li ki sèl chèf ni sièl la ni tè-a. Granmèt la di l-ap vi-n rinmèt chak moun dapré aksion-l (Ap 22,12; cf Ps 62,13). Sint Tèrèz lanfan Jézu di l-ap fè pasaj sa-a jouinn yon sans ki pa minm ak sa nou abitué konprann nan, lè Bondié ap jijé-l, paské Bondié pap jouinn anyin li fè. Min li di li konn sa l-ap fè, l-ap pran aksion Jézu yo, l-ap ofri bay Papa-a, konsa Bondié ap jijé-l sou pròp aksion Bondié yo minm; paské li minm sé pòv ti malérez li yé, li pa gin anyin pou-l ofri pèsònèlman (cf Ct 8,8). Sé Granmèt la k-ap vini ak tout rékonpans li dévan-l (Ap 22,12; cf Is 40,10). Li sé Tèt la, nou sé kò-a. Tèt la mérité pou nou, nou minm nou glisé kò nou anba mérit li, (Jn 4,38). Prèmié priyè lamès sétièm dimanch Pak la di kijan nou kouè li déjà nan bèlté-a, min li rété avèk nou jous nan finisman tan yo, jan-l té promèt la, (Mt 28,20). Sé lafoua ki fè nou sètèn Jézu pa kité nou, min li la avèk nou. Sé minm kouran lavi-a k-ap pasé nan li ansanm ak nan tout légliz la. Sé nan sans sa-a lapriyè li fè jou Jédi Sin-an mandé pou tout fidèl yo fè yon sèl nèt minm jan li minm ak Papa-a

yo fè yon sèl nèt la. Nan fason n-ap viv, tout moun doué rékonèt Jézu sé Tèt la, nou sé kò-a, nou sèvi-l témouin, tankou Étièn, premié mati-a, té sèvi-l témouin, (cf Ac 7,55-60; premié léktu 7ém dimanch Pak la C). Mo témouinan, sa vlé di "mati" nan langaj grèk la. Pou nou tout fè youn tout bon vré-a, sé yon program ki pa toujou fasil. Gin dé jou sé yon véritab mati sa yé. Lè sa-a nou blijé témouin tout bon vré. Témouin mati sé pa nésèsèman kité yo touyé nou ak kout ròch, jan Juif yo té fè Étièn nan, min témouin mati, sa kapab sipòté défo prochin-an ki tou pré nou-an, chak jou, nan tout ti sikonstans, malgré sa agasé nou, sa kontrarié nou. Gin moun ki toujou prêt pou bay lavi yo pou Jézu, min yo pa kapab sipòté yon ti kontrariété, yon ti maladrès prochin yo ki tou pré yo-a. Sé paròl nan bouch, sa pa sòti nan fon kè; oubyin si-l parèt sòti nan fon kè, sé pito nan imajinasion li soti. Nou pa ouè Jézu, nou di nou rinmin-l, min nou ouè prochin nou, épi nou pa kapab sipòté-l (1 Jn 4,12-20). Sa nou fè prochin nou, sé Jézu minm nou fè-l (Mt 25,40.45; Ac 9,5).

Avèk Psòm ki sèvi kòm réfrin pou antré lamès sétièm dimanch Pak la (Ps 27,7-9 = 26,7-9), n-ap chèché fas Granmèt la, n-ap lapriyé-l pou-l pa viré fas li louin nou, pou-l aprann nou dékouvri fas li nan fason n-ap gadé prochin nou ak bon jé. Sé konsa n-ap sèvi-l témouin. Étièn sèvi Jézu témouin, pandan fo-témouin yo dépozé rad yo, nan pié Sòl (Ac 7,58). Sé minm Sin Pòl sa-a Jézu t-ap di sé li minm li t-ap pèsékité nan krétyin yo (Ac 9,5). Étièn sèvi témouin antan-l mandé Jézu pou-l pa mété péché sa-a sou kont bouro-l yo (Ac 7, 60 cf Lc 23,34). Sèvi Jézu témouin, sé fè rékonèt sé li ki Roua sou tout tè-a, dapré réfrin Psòm répons sétièm dimanch Pak C-a (Ps 97,1.9 = 96,1.90), jan nou di nan lapriyé Jézu montré nou-an (Mt 6,10). Li déjà Roua, ringn li sé nan kè yo li réalizé. Nan mézi li Roua tout bon vré nan kè nou, nou blijé louvri kè nou bay tout moun, ni sa-k bon ni sa-k mové. Jézu monté nan sièl, min li la nan kè nou, sé konsa n-ap sèvi-l témouin, si nou tout nou fè yon sèl nèt, paské li nan kè nou tout.

Sint Térèz lanfan Jézu té abitué di: tout moun ap tronpé osijè-l, paské yo konprann kalité li ginyin yo sé nan li yo soti, li di: jous nan finisman lavi-l, li pa janm gin yon mouvman pasians ki soti nan li, pasians li, sé pasians Jézu ki nan li. Sé minm jan tou nou kapab di: si nou réyisi padonnin prochin-an, sé pa nan nou sa soti, sé nan Jézu, ki padonnin sou Koua-a, épi k-ap kontinyé padonnin nan kè nou, minm jan li té padonnin nan kè Sint-Étièn nan. Avèk li nou patisipé nan mèvèy sakré lakoua-a, antan yo lévé nou sou Koua-a avèk li, pou nou patisipé tou nan sékrè lasansion-l nan, antan yo lévé nou nan sièl la. Nan mézi nou sipòté défo prochin nou ak kontrariété li fè

nou, nan mézi sa-a tou yo lévé nou sou Koua-a, min nan minm mézi sa-a tou yo lévé nou nan sièl la, n-ap viv mèvèy sakré sièl la dépi sou tè-a, min kouran lavi-a ki passé nan Jézu-a kòm Tèt, li passé nan nou tou kòm manb.

*

* *

PANNKOT

Jézu souflé sou Apot yo (Jn 20,22), tankou Bondié té souflé sou labou-a, lè-l t-ap fè Adan-an (Gn 2,7; cf Sg 15,11). Sé yon fason pou montré kijan Jézu ap mét nanm nan légliz la (1 Co 15,45). L-ap sèvi-l kòm prinsip lavi sou pa anndan. Pouvoua li ginyin pou-l éfasé péché yo, li transmèt légliz la li (Jn 3, 19; 5,27; 9,39; cf Mt 9, 8; 16,19; 18,18; Lc 24,47). Pèp ki té gayé yo (Gn 11, 1-9), y-ap vi-n fè yon sèl (Ac 2,1-11). Minm jan Papa-a, Pitit la ak léspri Sin-an fè yon sèl la, konsa Kò légliz la fè yon sèl nan Jézu-Kri. Favè spésial yo ki sot nan léspri-a malgré yo anpil, sé minm léspri-a. Sèvis ki sot nan Granmèt Jézu-a, malgré yo anpil, sé yon sèl Jézu Granmèt la. Aktivité ki sot nan Bondié Papa-a, malgré yo anpil, sé yon sèl Bondié Papa-a (1 Co 12,3-13). Krétyin yo fè yon sèl, minm si gin divès fason pou yo sèvi ak favè yo nan légliz la, pou yo fè sèvis nan légliz la, pou yo déplouyé aktivité nan légliz la. Sé péché-a ki divizé nou. Léspri Sin-an lavé nou, li ba nou kè pozé ak Bondié, kè pozé antré nou (Jn 20,19-23). Sèl bagay, nou pa ouè aklè sa k-ap pasé koulié-a, sé tankou nan travay akouchman nou yé (Rom 8,22-27). Sé nan éspérans n-ap viv, léspri Sin-an ap soutni éspérans nou. Léspri-a sé difé k-ap mét chalè rinmin-an tout koté lacharité-a té fi-n frèt la. An minm tan, li sé dlo k-ap rafréchi chalè rayisans la ki fi-n séché tè-a. Léspri Sin-an sé ékilib. Yon moun ki abitué kité léspri Sin-an kondui-l, minm si-l pa ouè klè, l-ap réalizé volonté Bondié nan tout ti détay, paské sa léspri Sin-an ap mandé nan lapriyé-l, sé bagay ki konfòmé ak volonté Bondié (Rom 8,27). Granmèt la té désann sou mòn Sinayi-a pou-l té bay laloua volonté-l (Ex 10,3-20) pou-l dirijé chémin pèp li-a. Jou lapannkot la sé léspri Sin-an li bay kòm nouvo laloua volonté-l, li mété-l anndan kè nou (Ez 36, 26; 11,19; Jer 31, 3). Sé kè Jézu-Kri-a minm ki akòdé ak volonté Papa-a, koté lariviè dlo ap koulé-a (Jn 7, 37-39). Sé sou tout moun léspri-a ap vidé (Joèl 2,28-32), san konsidérasion (Nb 11,24-29). Léspri-a t-ap plané anlè dlo yo pou premié kréasion-an (Gn 1,2). Li té vi-n pozé sou la Trè Sint Vièj Mari, nan kòmansman mèvèy délivrans la (Lc 1,35). Li té vi-n maké kòmansman mision Jézu-Kri nan batèm nan, lè-l té pozé sou li tankou kolonb la ki té poté ramo oliv lapè-a sou batiman Noé-a (Lc 3,22; cf Gn 8, 9). Konsa li vi-n désann sou patizan yo jou lapannkot la ki réprézanté kòmansman légliz la (Ac 2,1-11). Nan chak kòmansman, léspri Sin-an toujou la. Sé poua anvan nou kòmansé yon travay, nou toujou lapriyé léspri Sin-an avèk lapriyé nou pran nan Psòm nan (Ps 104,30): "Voyé léspri-ou la, tout bagay ap kréyé, ou-a réfè fas tè-a". Nou mandé-l pou-l vi-n plin kè fidèl yo, tankou li té plin kay la koté patizan yo té rasanblé-a, pou sé pa nou minm ankò k-ap aji, min pou sé li minm k-ap aji nan nou. N-ap mandé-l pou-l limin difé-l nan kè nou,

pou-l ba nou fòs ak konsèy, pou nou réalizé bagay ki dépasé limit nou, pou-l ba nou tou lé sèt kado-l yo (sajès, intélijans, konsèy, fòs, sians, krint, piété), pou nou gin plis souplès nan fason n-ap viv lafoua nou, léspérans nou, ak lacharité nou, li minm ki désann yon fason spésial sou moun k-ap dirijé pèp la: roua-a (Is 11,1-3), profèt la (Is 42,1), prèt la (Ez 1,3; 3,12.14), li minm ki limiè, minm si sé ak yon réyon "fènoua" l-ap kondui nou (Lc 1,35). N-ap mandé Manman Mari pou-l fè nou pran abitud résité litani léspri Sin yo souvan, minm chak jou si nou kapab. Olié yo fè nou pèdi tan, sé tan y-ap fè nou jouinn pi plis, antan y-ap fè nou réglé aktivité nou dapré inpòtans yo. (Éspri Sin, aprann nou lavérité: M-ap réglé 297; Éspri Sin, ou sé limiè lavi 358; Léspri Sin 548; O léspri Sin désann sou nou 169; O léspri Sin vini non 167; Sé kat bon sa bon 218).

*

Dépi Jézu parèt dévan Apot yo nan asouè dimanch Pak la, li di yo: "Kè pozé", li voyé yo nan mision (Jn 20, 19.21); li di: "Minm jan Papa-a voyé-m nan, mouin minm tou mouin voyé nou". Kon-l fi-n di sa, li soufflé sou yo pou-l ba yo léspri Sin-an avèk pouvoua pou padoné péché yo (Jn 20, 22s).

Jou lapannkot la fè nou sonjé sa-k té pasé sou mòn Sinayi-a avèk Moyiz, lè Bondié t-ap bay laloua-a, té gin difé ki t-ap flanbé tout koté sou mòn nan, ak brui tronpèt; foul la té rasanblé nan pié mòn nan (Ex 19, 16ss). Léspri Sin-an ranmasé tout dis kòmandman laloua-a nan rinmin-an (Rom 13, 10; 1 Co 13, 4-7). Sé sou li Bondié ap jijé nou nan dènié moman lavi nou (Mt 25, 31-46). Jou lasansion-an, Jézu té promèt Apot yo y-ap batizé nan léspri Sin-an k-ap ba yo fòs pou sèvi-l témouin (Ac 1, 5.8). Témouagnaj la sé lacharité-a. Nan sans sa-a, tout moun sé misionè, paské tout moun doué sèvi Jézu témouin sou késion lacharité-a. Lè yo té konn gadé kijan krétyin yo ap viv, yo té konn di: "Gadé kijan youn rinmin lòt". Sé nan sign sa-a yo té rékonèt yo kòm patizan Jézu-Kri (Jn 13, 35). Jézu té konn voyé patizan-l yo dé pa dé dévan-l (Lc 10, 1) tout koté li té gin pou-l té alé li minm, pou yo té paré chémin pou li. Sint Ogustin di sé paské chif dé-a sé chif lacharité. Nou pa bézouin palé pou yo ouè nou sé témouin, nan fason n-ap viv ansanm tankou frè. Léspri-a ki ba nou répo, fréchè, konsolasion, dousè, limiè, pròpté, gérizon, souplès, chalè, douatu, sé li minm k-ap limin difé rinmin-l nan anndan kè nou, pou-l fè nou sonjé malgré nou chak nou gin karaktè diféran oubyin travay diféran oubyin préokipasion diféran, nou sé manb minm Kò Jézu-Kri-a, nou batizé nan minm léspri-a, pou-l fè nou tout ansanm fè youn. Pannkot sé yon mo ki vlé di sinkant. Sa fè sèt foua sèt jou, plis youn. Sé chif ki dépasé sa yo rélé "plénitude" la, yo rélé-l "superplénitude". Sé

"perfection". Sé nan lacharité-a "perfection"-an rété (Col 3,14). Koté lésPRI Sin-an yé, gin "perfection". Tout bagay rivé nan dènié dégré pou-l rivé-a.

Lévanjil Sin Jan-an, yo rélé-l lévanjil "spirituel". Lévanjil lésPRI Sin-an, sé poussa yo li-l nan lamès chak jou dépi Pak jous lapannkot. Sin Jan té pran la Trè Sint Vièj lakay li (Jn 19,27), sa vlé di nan pami sant préokipasion-l. Koté la Trè Sint Vièj Mari yé, lésPRI Sin-an toujou la. Sin Jan montré kijan dépi nan konvèsasion Jézu avèk Nikodèm nan, Jézu té kòmansé bay lansègnman sou lésPRI Sin-an ki souflé nan diréksion li vlé san nou pa konnin koté-l sòti ni ki koté-l apralé (Jn 3,8). Li bay lésPRI-a san méziré (Jn 3, 34); li promèt madanm Samari-a lésPRI Sin-an tankou yon kado (Jn 4, 14), yon sous dlo k-ap koulé nan kè-l; li anonsé Juif yo moun ki kouè nan li, l-ap jouinn lésPRI sa-a tankou yon sous dlo k-ap koulé nan kè-l pou lavi ki pap janm fini-an (Jn 7, 38s). Li di Apot yo l-ap voyé lésPRI Sin-an k-ap raplé yo sa-l té aprann yo, k-ap kondui yo nan min pou-l dévoualé tout lavérité-a nèt (Jn 14, 26ss; 16, 13). Lè-l sou Koua-a, yon solda pèsé kè-l, san ak dlo sòti (Jn 19, 34), sous lésPRI Sin-an li té promèt la (cf Ez 47, 1). Sé lésPRI sa-a li souflé sou Apot yo nan asouè dimanch Pak la, ak pouvoua pou éfasé péché yo (Jn 20, 22s). Sé li minm Bondié té promèt nan bouch Profèt Izayi (Is 11, 2s), li t-ap désann sou Roua-Mési-a avèk sèt kado yo: sajès, intéljans, konsèy, fòs, sians, krint, piété. Sé li minm ki répozé sou Sèvitè Grammèt la (Is 42, 1ss; cf Luc 4, 18; Is 61, 1ss), pou-l anonsé Bòn Nouvèl la bay pòv yo, pansé kè ki chagrin yo, déklaré yon ané lagras. Lè lésPRI Sin-an kouvri la Trè Sint Vièj Mari ak lonbraj li (Lc 1, 35), la Trè Sint Vièj pati kòm Misionè kay Élizabet. N-ap mandé-l souplès li, détachman-l, pou nou pa trinnin ak komision Bondié, pou nou chèché tout okazion sèvi Jézu témouin spésialman nan lacharité (Jn 2, 1-11).

Sint Iréné di nou yon fari-n tou sèk pa kapab fè pat san dlo, li pa kapab fè pin, sé konsa nou minm tou nou pa kapab vi-n fè yon sèl nan Jézu-Kri san dlo-a ki sot nan sièl la, sa vlé di san lésPRI Sin-an. Li di tè sèk la pa kapab donnin san-l pa résévoua larouzé ki sot nan sièl la, sé minm jan pou nou ki té tankou boua sèk lontan, sé lapli kado lésPRI-Sin ki sot anro-a ki fè nou kapab donnin lavi-a. Li di kò nou vi-n fè yon sèl gras a batèm nan ki fè yo pap dékonpozé, épi nanm nou vi-n fè yon sèl gras a lésPRI-a. Li détayé sèt kado lésPRI Sin-an: sajès ak intéljans, konsèy ak fòs, sians ak piété épi krint Bondié. Li fè sonjé lésPRI Sin-an sé Avoka Jézu té promèt li t-ap voyé sot nan sièl la ki ranvèsé djab la tankou zéklè (cf Lc 10, 18). Li montré kijan larouzé Bondié-a nésésè pou nou, pou nou pa boulé, pou nou pa rét san donnin, épi koté nou gin Satan k-ap akizé nou, la minm tou n-ap gin Avoka-

a k-ap pran défans nou (cf Za, 3, 1-2), paské Granmèt la konfié nou nan min léspri Sin-an.

Jou lapannkot la sé tout nasion yo ki réprésanté Jérusalèm. Langaj yo ki té gayé nan kay ro Babèl la (Gn 11, 1-9), li vi-n rékòmansé fè yon sèl ankò tankou nan kòmansman (Ac 2, 1-11). Pié boua-a té chèch, li rékòmansé donnin frui. Sin Pòl palé nou osijè frui léspri Sin yo (Ga 5, 22-23). Li mété yo an fas frui lachè-a (Ga 5, 19-21). Sé charité, kè kontan, kè pozé, pasians, bon kè, lafoua, dousè, respékté kò-a.

Konsa Sint Iréné prézanté dé bagay sitou ba nou: premié-a sé pou nou fè yon sèl tankou fari-n nan fè yon sèl pat ak yon sèl pin gras a dlo-a. Dézièm nan sé pou nou donnin frui tankou pié boua-a ki rouzé ak dlo lapli-a pou-l donnin-an. Frui sa yo sé frui léspri Sin-an. Dé bagay sa yo alé ansanm. Lè nou fè youn, nou donnin frui fasil. Min lè nou pou kont nou, nou pa kapab donnin frui fasil. Min anpil, chaj pa lou. Si youn ap kritiké lòt tout jounin, malgré sé minm travay légliz la n-ap fè-a, sa vlé di léspri Sin-an pa la pou rasanblé nou. Koté léspri Sin-an yé, gin bòn-antant. Koté Satan minm yé, sé divizion, dapré sa non "djab" la vlé di nan langaj grèk: "diablos" = sila-a k-ap pasé nan ran yo pou-l gayé moun yo (διὰ βάλλει → διὰ βόλος = "sa-a k-ap mét divizion-an"; διαβολή = divizion). N-ap mandé la Trè Sint Vièj Mari, Manman légliz la, favè sa-a, pou nou fè yon sèl pi plis, pou nou kapab donnin frui pi fasil. Dézièm léktu lamès lapannkot la di nou gin divès kado, min sé yon sèl léspri-a; gin divès sèvis, min sé minm Granmèt la; gin divès aktivité, min sé minm Bondié-a k-ap fè tout bagay nan tout moun. Yo bay chak moun posibilité pou-l fè léspri-a parèt pou tout moun ansanm profité (1 Co 12, 4-7). Nou pa doué rété sou diférans ki ginyin nan fason n-ap réalizé travay misionè nou; okontrè plis gin diférans, sé plis travay la ap maché pi byin, paské gin moun ki pi sansib pou tèl fason, gin dòt sé nan tèl jan, tèl maniè pou yo touché yo.

Sint Iréné di nou tou djab la ap akizé nou, dapré sa mo "Satan"-an vlé di nan langaj ébré-a: sila k-ap akizé-a (שָׂטָן), jan-l té akizé Jòb la (Jb 2, 1-6; cf Za 3, 1). Min li di léspri Sin-an sèvi nou kòm Avoka. Sé poussa nou pa doué pè, nou doué gin kè pozé avèk fòs. Jézu té souflé sou Apot yo, li té ba yo léspri Sin-an pou yo padonnin péché yo (Jn 20, 22-23). Sé péché-a ki té lokasion akizasion-an, ki té bay Satan posibilité akizé gran-prèt Jozué-a (Jos 3, 1); si-l éfasé, nou pa doué nan kè soté ankò. Konsa Sint Iréné mandé nou pou nou fè yon sèl, pou nou donnin frui, pou nou gin konfians nan Avoka-a k-ap plédé kòz nou an, 1 Jn 2,1, R 8,33 ("Adversus haereses", lib 3, 17, 1-3: SC

34, 302-306; cf Liturgia Horarum II, Vatican 1974, 804-805; office de lecture pour la Pentecôte.)

Léspri Sin-an sé limiè k-ap voyé réyon-l sot nan sièl la pou gayé fènoua mové lanségnman ak péché. Li sé Papa pòv yo, k-ap konblé yo ak kado-l yo nan mézi kè yo vid pou résévoua-l, tankou la Trè Sint Vièj Mari, Sèvant Granmèt la (Lc 1, 35), ki pati kòm Misionè ak Sèvant kay Élizabèt, koté léspri Sin-an désann sou Jan Batis, Élizabèt, Zakari (Lc 1, 15.40.67). Avèk Apot yo Mari pasé nèf jou ap lapriyé pou léspri Sin-an vini anvan Lapannkot la (Ac 1, 14). Lépri Sin sé konsolasion, dousè ak fréchè. Moun ki gin léspri Sin-an, li toujou ap panché sou féblès ak mizè frè-l ak sè-l pou-l ouè kijan li kapab adousi tray yo, kijan li kapab édé yo poté chaj yo. Li pa la pou pézé chaj la pi plis sou do yo (Ac 15,10; Ga 5,1; Mt 23,4); li pa la ap mété pasé ginyin, lè-l tandé y-ap kritiké yon moun san rézon, pou-l krazé rozo ki déjà félé-a, pou-l étinn mèch k-ap fè lafimin-an (Is 42, 1ss). Léspri Sin sé répo. Sé pa sou pa déyo nou jouinn répo sa-a nésésèman. Pandan tanpèt la ap vanté ak raj, Jézu ap dòmi byin trankil nan batiman Sin-Piè-a (Mt 8, 24). Pèsékision mèt ap tonbé sou nou, nou gin konfians, Bondié ap fè nou soti nan mové pas sa-a, nou rét byin trankil; nou pa fè kè nou soté. Nan mitan tanpèt la nou rét dòmi tankou yon bébé ki pozé sou bra manman-l (Ps 131, 2). Léspri Sin la pou-l lavé sa-k sal, pou-l rouzé sa-k sèk, pou-l géri sa-k blésé, pou-l asoupli sa-k rèd, pou-l chofé sa-k glasé, pou-l drésé sa-k krochi, sa vlé di pou-l korijé tout défo. An fas sèt péché kapito yo, gin sèt kado léspri Sin yo (Is 9, 11, 1ss). An fas frui lachè yo, gin frui léspri Sin yo (Ga 5, 22). An fas djab ak Satan, gin léspri Sin-Paraklè Avoka (Za 3, 1ss; Jn 14, 26; 16, 13). Léspri Sin sé léspri misionè. Nou kapab pa santi kouraj pou nou fè apostola nou, paské nou pa ouè sa nou kapab bay, nou pa ouè anyin ki kapab sòti nan nou, tankou Moyiz ak Jérémi, lè Bondié té rélé yo pou-l voyé yo-a (Ex 4, 10; Jer 1, 6; cf Is 6, 8). Sé lè sa-a pou nou gin pi plis konfians nan mision Bondié konfié nou-an, paské lè nou fèb sé lè sa-a nou pi fò; pouvoua Bondié déplouayé nan féblès (2 Co 12, 9); Sé léspri Sin-an k-ap bay fòs pou nou sèvi Jézu témouin tout koté (Ac 1, 8). Papa-a voyé Pitit la; Papa-a ak Pitit la voyé léspri Sin-an; Sé nan minm mouvman sa-a Jézu voyé nou sèvi-l témouin. N-ap mandé Manman Mari, Manman légliz, Rèn lapè, pou nou pa sèvi fo-témouin, min pou nou sèvi vré témouin, pou yo ouè tout bon vré léspri Sin-an abité nou, antan nou fè yon sèl, nou donnin frui, nou gin kè pozé nan Avoka-a k-ap okipé kòz nou-an.

*

Prémié paròl Jézu di Apot yo nan asouè dimanch Pak la, sé: "Lapè avèk nou" (Jn 20, 19: = évanjil dimanch lapannkot). Li insisté sou sa, li répété

yon dézièm foua: "Lapè avèk nou" (Jn 20, 21). Lè-l fi-n di sa premié foua-a, Apot yo tèlman sézi yo pa réponn anyin, yo pè. Min an minm tan yo kontan anpil. Tout santiman sa yo ansanm fè laparòl yo koupé, yo pa ko réprann sans yo. Sé poua Jézu répété: "Lapè avèk nou". Nan nuit li té fèt Bétlèèm nan, sé konsa Anj yo té désann sot nan sièl, vi-n poté mèsaj lapè dévan gadyin mouton yo: "Viv Bondié nan sièl la, lapè sou tè-a pou moun li rinmin yo" (Lc 2, 14). Si Jézu fèt, si-l mouri lévé, sé pou-l poté lapè pou nou (Lc 19, 38). Anvan yo té vi-n arété-l la, li té kité téstaman-l bay Apot yo, li té di yo li kité lapè pou yo, min sé pa tankou tè-a bay li-a li ba yo li-l. Malgré tray ak pèsékision y-ap kontinué sibi sou tè-a, y-ap gin lapè-l la kan minm (Jn 14, 27.1). Sin Pòl di: "Kè-m kontan malgré tout tray m-ap pasé yo" (2 Co 7, 4; 12, 10; Col 1, 24). Sé konsa malgré tanpèt la, yo gin pou yo fè tankou Jézu, rét dòmni nan batiman-an (Mt 8, 24; Mc 4, 38; Lc 8, 23) paské yo konnin avèk lafoua yo yo pap anglouti nan dlo-a k-ap ménasé, k-ap soulvé, k-ap gonflé, k-ap débòdé-a. Lapè avèk nou: sé mision Jézu sa, poté vré lapè sou tè-a. Li konfié Apot yo mision sa-a; pou yo kapab poté lapè-a sou tè-a, sé pou yo ginyin-l yo minm minm. Nou pa kapab mèsajé lapè, si nou pa gin lapè nan fon konsians nou. Mèsaj n-ap poté otréman, sé rayisans, sé batay, sé vanjans, si sé sa k-ap chofé anndan fon kè nou. Nou pa kapab bay sa nou pa ginyin. Lè nou dékouvri bouch chodiè ki sou difé-a, li fè lafimin, li bay vapè ak chalè. Lè n-ap poté mèsaj bay moun yo, sé santiman k-ap bouyi anndan pròp kè pa nou n-ap transmèt ba yo. Si kè nou sé boua-pin ki limin, n-ap mét difé nan rak boua-a ak nan tout kay yo (Jc 3,5-6; Pr 16,27; Si 28,22). Gin moun sé lanfè ki louvri pòt fou-l, pou défounin pin divizion. Dépi yo louvri bouch yo, sèl prinsip ki dirijé tout program yo, tout paròl yo ak tout aktivité yo, sé drésé moun youn kont lòt, drésé klas moun youn kont lòt, drésé group moun youn kont lòt. Yo pa gin satisfaksion toutotan yo pa ouè batay maré, nich gèp piké, chyin mòdé, lou dévoré, kòk zéponnin. Sé tankou sé san sovaj k-ap koulé nan vinn yo. Tou sa-k té pasé dépi djab té kaporal, fò yo révéyé-l, pou-l ralimin étinsèl difé-a ki t-ap kouvè anba sann nan. Sa pa sòti nan léspri Sin-an. Jou lapannkòt la, sé yon jou pou nou lapriyé pou lapè sa-a Jézu promèt la, li rivé tout koté, pou lapè sa-a li bay Apot yo, li antré nan fon kè nou, sitou moun li chouazi yon fason spésial pou chanjé fas tè-a, pou chanjé kè moun yo, pou youn viv avèk lòt tankou frè ak sè. Sin Pòl di Timoté pou-l fè atansyon, paské yon tan ap rivé koté moun yo ap kité mèsaj lévanjil la pou yo chèché dòt mèt k-ap ba yo konsign ki alé nan sans kontrè sa yo té aprann nan (2 Tm 4, 3s). Sé yon gratèl yo ginyin nan zòrèy yo, ki fè y-ap kouri adouat-agoch, pou yo tandé dòt lansègnman ki pa nan lévanjil la, kòm si lévanjil la pa-t konplè. Jézu di Apot yo: lè yo antré nan yon kay, premié bagay pou yo fè, sé pou yo di lapè pou

kay sa-a (Lc 10, 5). Nan premié prèch li fè sou mòn nan, li di: "Sé chans pou moun k-ap travay pou lapè, y-ap rélé yo pitit Bondié (Mt 5, 9). Koté léspri Sin-an yé la gin léspri lapè; koté léspri djab la yé, la gin léspri divizion. Lè Apot yo té chouazi diak yo, sé té pou korijé divizion ki t-ap glisé anndan premié kominoté fidèl yo, pou kèsion injistis nan séparasion manjé. Juif yo t-ap okipé Juif parèy yo; yo té néglijé Grèk yo. Apot yo pozé min sou sèt moun ki plin ak léspri Sin ak Sajès, épi yo okipé kèsion sa-a byin (Ac 6, 1-6), yo pa kontanté yo séparé byin sèlman, yo préché, yo batizé; Filip montré chémin lévanjil la bay yon payin, yon moun ki sòti jous nan létiopi (Ac 8, 26-40). Lè Ètièn ap préché, li tèlman gin sajès, pèsòn pa kapab fè lansègnman yo pasé nan sans kontrè (Ac 6, 10). Lè yo touyé-l ak kout ròch, li padonnin, paské li té plin ak léspri Sin-an. Yon moun ki plin ak léspri Sin-an, sé yon moun ki konn padonnin. Nan lévanjil lapannkot la (Jn 20,19-23), Jézu souflé sou Apot yo, li di yo: "résévoua léspri Sin-an", an minm tan li ba yo pouvoua pou yo padonnin péché (Jn 20, 23). Yon moun ki gin léspri Sin-an, li konn padonnin; sé mision léspri Sin-an minm sa, li la tankou yon sous dlo ki toujou ap koulé pou-l lavé fot. Sous sa-a sé nan kè Jézu li soti sou Koua-a (Jn 19, 34; 7, 37-39; Ez 47, 1ss), li minm ki té di: "Papa padonnin yo, yo pa konnin sa y-ap fè" (Lc 23, 34; cf Ez 36, 26). N-ap mandé Manman Mari, Manman Kè sansib la, pou-l aprann nou lapriyé léspri Sin-an, pou sous sa-a koulé nan kè nou, pou nou minm tou nou youn padonnin lòt, antan nou sèvi Jézu témouin lapè sou tè-a.

(Éspri Sin, vini, chanjé fas tè-a; Ané lapè; Chèf lapè; Éspri lapè; Fanmiy lapè; Gadyin lapè; Intèmediè lapè; Jistis lapè; Kana (mariaj lapè); Kantik lapè; Kò ak San lapè; Kòmandman lapè; Kondision lapè; Krèch lapè; Lapè; Lapè Pak; Mésaj lapè; Mouton lapè; Priyé lapè; Rèn; Rèn lapè; Révélasion lapè; Rézistans lapè; Rouayom lapè; Rout lapè; Sémans lapè; Soufrans lapè; Testaman lapè; Travay lapè; Travayè lapè; Zétoual lapè; Voua lapè).

*

Jou lapannkot la léspri Sin désann sou Apot yo, tankou sou mòn Sinayi-a Bondié té bay Pèp li lalaoua-a nan mitan kout loraj ak zèklè ak tranbléman-té (Ex 19, 3-10). Léspri Sin-an sé laloua nouvo Pèp la, sé laloua légliz la, sé li ki bay légliz la asirans li, konpozision-l, minm jan laloua ansyin Téstaman-an té sèvi baz pou Pèp la. Sé konsa Profèt Jérémi ak Profèt Ézékièl té promèt Bondié t-ap voyé yon nouvo laloua l-ap mété anndan kè nou, pou nou obéyi lòd li (Jer 31, 33; Ez 36, 26). Laloua Sinayi-a té ékri sou galèt ròch (Ex 19, 3-20). Laloua léspri Sin-an ékri nan kè nou (2 Co 3, 3; Ez 11, 19; 36, 26; Jer 31, 33). Sé poussa li limin difé rinmin-an anndan fon kè

nou. Li fè kè nou jouinn kontantman nan rélation nou. Li ba nou lapè nan tout lavi nou (Ac 2, 3.46; Jn 20, 19; 14, 27; 15, 27). Sé poussa li mét pasians anndan fon kè nou (Mt 18, 24; Lc 13, 8). Li fè nou gin bon kè pou prochin nou (Lc 15, 20). Li fè nou louvri dé min nou pou nou rann sèvis (Lc 1, 40; Jn 2, 5; 12, 2; Lc 10, 40; Rom 12, 7; Gn 18, 5). Sé poussa li réglé konduit nou nan lafoua (Mt 14, 31; Lc 22, 32). Li fè nou tou dou nan konpòtman nou, san nou pa pran pòz nou sipériè pasé pèsòn. (Mt 11, 29; 5, 4). Li korijé mové tandans nou (Jc 3, 8; 1 Co 9, 27). Sé poussa li mété Sajès nan nanm nou (Sg 9, 4; 1 R 3, 9.12; Jn 3, 13; Rom 11, 33; 1 Co 1, 24; Si 1, 8; Job 28, 22; Bar 3, 9-4, 4; Pr 30, 3-4; Qo 7, 33). Li ba nou intélijans pou nou konprann mèvèy sakré-l yo (Si 50, 27; Pr 3, 13; Sg 7, 22). Li souflé nou bon konsèy nan désizion nou (Ex 18, 14; Ac 21, 20-25). Sé poussa li fè nou gin fòs nan karaktè nou (Ac 1, 8; Lc 1, 35). Li ba nou sians pou nou ouè vérité yo sou pa anndan (Gn 2, 9). Li fè nou aji avèk respè. Li fè nou viv tankou pitit aléga Papa-l (Gn 9, 25; Rom 3, 10; 2, 11; Ac 16, 14-15; Job 28, 28).

Sé tankou yon sémans ki planté anndan fon kè nou, k-ap fè nou donnin frui (Mt 7, 17; 12, 33; Jn 15, 5.8; Lc 1, 42; Dt 28, 4), k-ap fè nou dévlopé kado-l yo (Lc 19, 16). Avèk li nou tankou yon ti bébé ki pozé sou kè manman-l (Ps 131, 1) avèk konfians. Sèké sé li minm k-ap lavé tou sa-k sal (Ez 36, 25; Jn 3, 5; 4, 1; 9, 6; 1 R 18, 41; Mc 14, 67; Lc 12, 49); k-ap rouzé tou sa-k sèk, k-ap chofé tou sa-k frèt. Sé li minm k-ap kléré tou sa-k fè noua (Jn 9, 5), k-ap konblé tou sa-k vid (Lc 1, 53), k-ap soutni tou sa-k fèb (2 Co 12, 9). Sé li minm k-ap géri tou sa-k malad (Mc 16, 18), k-ap laché tou sa-k rèd (Ez 36, 26), k-ap drésé tou sa-k krochi (Is 40.3). Sé li minm k-ap limin tou sa-k étinn (1 Th 5, 19; Is 42, 3), k-ap maré tou sa-k lagé (Mt 1, 20), k-ap réprann tou sa-k pati (Lc 15, 2). Sé li minm k-ap poté tou sa-k bouké (Lc 15, 5; Ps 91, 12; 1 R 19, 4), k-ap louvri tou sa-k fèmin (Ap 5, 5; Jn 14, 26; 16, 13), k-ap sikré tou sa-k anmè (Ex 15, 25; Si 38, 5; 2 R 2, 21; Ez 47, 8; 3, 3; Ap 10, 8-11). Sé li minm k-ap lagé tou sa-k nan chinn (Ac 12, 7; 16, 26; Mt 11, 3), k-ap kalmé tou sa-k-ap tann (Ac 1, 6), k-ap réfè tou sa-k gayé (Jer 18, 4; Jn 21, 15-17). Sé li minm k-ap séré tou sa-k pèdi (Lc 15, 4-8; Jn 17, 12), k-ap nourri tou sa-k grangou (Lc 1, 53; 1 R 18, 5; 17, 9), k-ap défann tou sa ki pòv (Lc 7, 44; 10, 41).

Sé antan-l anndan fon kè nou l-ap fè nou sèvi Jézu témouin antan-l voyé nou tou pòv (Mt 10, 5-16; 5, 3) nan diréksion pòv yo (Is 61, 1; 4, 18), jan-l fè pou la Trè Sint Vièj Mari kay kouzi-n li Élizabèt (Lc 1, 39-73), jan-l fè pou Sin Piè kay Kònèy (Ac 10, 1-8); jan-l fè pou Sin Pòl kay Lidia (Ac 16, 6-10); jan-l fè pou André kot Simon (Jn 1, 40-42), jan-l fè pou Jak nan Konsil Jérusalèm nan (Ac 15, 19-28), jan-l fè pou Jan sou kè Jézu (Jn 13, 25; 21,

20; 1, 18), jan-l fè pou Banabé ki vann jadin-l pou bay légliz la pri-a (Ac 4, 36-37), jan-l fè pou Lidia dévan mèsaj Sin Pòl la (Ac 16, 14-15; 1 R 17, 7-16), jan-l fè pou Matié nan biro kontribision-an (Mt 9, 9), jan-l fè pou Jan-Batis bò lariviè Joudin-an (Ac 1, 5; Lc 3, 16; Jn 1, 19; 3, 22), jan-l fè pou Étièn dévan tribinal la (Ac 6, 8-7, 60), jan-l fè pou Apòlòs nan mitan krétyin Éfèz yo (Ac 18, 24-28), jan-l kontinuyé ap fè pou légliz jodi-a.

Li gin yon mision spésial li konfié chak moun, minm si mision sa-a délika tankou mision Jozèf nan péyi Éjip la (Gn 41, 39), tankou mision Moyiz kot Faraon-an (Ex 4, 12), tankou mision Samuèl kot roua Sayul la (1 Sm 15, 22-23), tankou mision Natan kot roua David la (2 Sm 12, 1), tankou mision Amòs dévan prèt Bétéf la (Am 7, 10-17), tankou mision Éli kot Élizé-a (1 R 19, 19), tankou mision Ajé kot pèp la pou-l rébati Tanp la (Ag 1, 8).

Sé pousa lè fatig nan kò nou, lè dòmi nan jé nou (Ac 20, 9; Lc 9, 32; 21, 34; 22, 45; 1 R 18, 5; Jn 4, 6.36; 2 Co 11, 27), lè grangou fébli nou (1 R 17, 2-16; Mc 11, 12);, lè souaf ap toufé nou (Jn 4, 7; 19, 28; Ex 17, 2), lè zanmi lagé nou (Lc 23, 49; 22, 57; Jn 21, 22), lè yo pa konprann nou (Ac 11, 2; 9, 26), lè nou méprizé nou (Lc 23, 11), lè yo kondané nou (Lc 23, 23; Jn 11, 53; Dn 6, 17), lè yo ménasé nou (Ac 4, 18.21; Dn 3, 15; 13, 21; 2 Mac 7, 1ss), lè yo karésé nou (Jg 14, 16; 16, 16; Jdt 12, 11; Gn 39, 7ss), lè solèy boulé nou (Jon 4, 8), lè lapli mouyé nou (1 R 18, 45-46), lè rivivi baré nou (Jos 3, 15; Ex 14, 21), lè chaj la pézé nou (Mt 11, 28; Jn 19, 17; Lc 9, 21), lè tout moun bliyé nou (Ex 1, 8; Est 6, 3), lè yo kritiké nou (Jn 9, 16), lè doulè nan manb nou (Ac 5, 40; 14, 19), lè traka nan tèt nou (2 Co 11, 28; Ac 15, 1), lè nou pèdi rout nou (Ac 16, 6-7; 27, 17; Mt 2, 2), lè lannuit tronpé nou (Jn 6, 19), lè nou pa ouè tras li (Lc 24, 24; Jn 20, 15), lè nou kouè-l lagé nou (Mt 11, 3; Ex 32, 1; Is 49, 14; Mt 27, 46), l-ap ANKOURAJÉ nou (Is 66, 11; 40, 1; 54, 7; 49, 15; 2 Mac 7, 21; Dt 32, 10-11), li pa kite nou òfélin, MANMAN nou kinbé min nou (Jn 19, 26; 2, 5; Ac 1, 14; Gn 27, 16). Koté la Trè Sint Vièj Mari yé, léspri Sin la, ni nan linkanasion, ni nan lavizasion, ni nan lapannkot. N-ap chèché viv anba min léspri Sin-an, antan nou dosil nan min Manman Mari, sé favè sa-a n-ap mandé-l yon fason spésial.

*

Kè pozé avèk nou, sé konsa Jézu salué patizan-l yo ki té fèmin kò yo nan kay la, poutèt yo té pè Juif yo, nan asouè dimanch Pak la (Jn 20, 19). Osito patizan yo kontan (Jn 20, 20). Jézu rékòmansé ankò, li di yo pou dézièm foua Kè pozé avèk nou (Jn 20, 21). Mèsaj kè pozé sa-a, li ankadré kè kontan-an. Sé lè sa-a Jézu souflé sou yo, li di yo: résévoua léspri Sin-an. Li

ba yo pouvoua pou yo padonnin péché (Jn 20, 22-23). Koté léspri Sin-an yé, sé kè pozé, sé kè kontan, paské péché-a éfasé (Ez 36. 25-27). Sèl bagay ki kapab fè kè nou soté, fè mi-n nou maré, sé péché-a (Gn 3, 8-13; 4, 5-7). Mésaj lévanjil la sé lapè, paské péché nou éfasé; sé kè kontan, paské Grammèt la avèk nou (Lc 4, 18-19; Is 61, 1-3; 40, 1-2; 52, 7; Na 2, 1; Rom 10, 15; Mc 16, 15; Lc 10, 5). Lapannkot la sé fèt légliz misionè; mision-l sé poté Bòn Nouvèl délivrans la bay tout pèp yo, pou kè yo pozé, pou kè yo kontan (Is 61, 1ss).

(Hymne acathiste)

Jou dimanch Pak la, nan asouè, tout pòt fèmin, Jézu parèt dévan Apot yo, li di yo; "Kè pozé" (Jn 20, 19.21). Li souflé sou yo, li ba yo léspri Sin-an, li di yo dépi yo éfasé péché moun yo, péché yo ap éfasé (Jn 20, 22-23).

Souf sa-a li souflé sou Apot yo, sé souf kréasion, sé souf charité, sé souf vérité, sé souf rézireksion, sé souf profèt, sé souf lapriyé, sé souf sajès, sé souf òganizasyon, sé souf fòs, sé souf mision.

1.- Souf sa-a li souflé sou Apot yo, sé souf kréasion, sa Bondié té souflé sou Adan, lè-l t-ap fè-l nan Paradi-a (Gn 2, 7; Sg 15, 11). Moun nan sanblé ak Bondié; sé pousiè li yé, nan pousiè li tounin, sé vré; min nanm li ap parèt dévan Bondié pou jijman-an (Ps 104, 19-30; Job 34, 14-15; Gn 3, 19; Qoi 12, 7; Ps 90, 3). Sé souf léspri Sin-an minm k-ap sèvi-l Avoka (Za 3, 1-2; Jn 14, 16). Sé li minm Jézu té promèt Apot yo, sé li minm li voyé nan légliz la jou lapannkot la. Sé li minm ki anndan kè nou chak, k-ap souflé nou tout bon désizyon pou nou pran (Rom 8, 26). Sé pou nou pran abitud obéyi-l nan tout ti détay pou nou pa jouinn tròp problèm nan rout k-ap kondui nou koté Bondié vlé minnin nou-an.

2.- Souf sa-a Jézu souflé sou Apot yo, sé souf lacharité. Sé yon sèl lang ki té gin sou tè-a lontan. Lògèy lòzòm divizé li, nan kay chanmòt Babèl la, antan yo té vlé monté nan sièl pou pran plas Bondié (Gn 11, 1-9). Koté gin lògèy, gin divizion. Koté gin limilité, gin lacharité (Ph 2, 1-11). Sin Pòl di Filipyin yo pou yo pran modèl sou Jézu: malgré li égal ak Bondié-a, li pa fè rayisab ak sa, li aksépté rabésé tèt li vi-n tankou lòzòm, pi ba pasé yo minm, tankou yon ésklav, jous li mouri sou yon Koua. Koté gin lògèy, gin divizion; chak moun vlé pran prémié plas. Koté gin limilité, gin lacharité; chak moun sédé pou lòt. Jou lapannkot la, langaj yo ki té gayé Babèl la, yo vi-n jouinn konpréansion, Apot yo palé nan lang yo; tout moun konprann yo. Koté gin lacharité, toujou gin mouayin pou pa kité kont la travèsé lari, pa kité kòlè-a fè kim sou léstomak nou, pa kité mové san-an kayé nan vinn nou, pa kité

solèy la kouché sou règléman-kont nou (Ac 2, 1-11; Gn 11, 1-9; Ep 4, 26; Ps 4, 5; Mt 5, 22).

3.- Souf sa-a Jézu souflé sou Apot yo, sé souf lavérité; sé sa-l té promèt yo-a, lè-l té di yo li t-ap voyé léspri Sin-an pou-l fè yo konprann tout bagay, léspri Sin-an k-ap kondui yo nan min, pou-l minnin yo nan tout lavérité-a, pou-l fè yo sonjé tou sa-l té di yo, pou-l aprann yo tou sa yo pa-t ko kapab sipòté (Jn 14, 26; 16, 13), tou sa Jézu pa-t ko di yo, paské yo pa-t ko kapab antré nan yo. Jou lapankot la, léspri-Sin-an désann tankou lè Bondié t-ap bay Moyiz laloua-a sou mòn Sinayi-a avèk minm kout loraj la, avèk minm zèklè difé yo, avèk minm tranbléman tè-a. Sèlman sou mòn Sinayi-a, laloua-a té ékri sou galèt ròch, min avèk lapannkot la, laloua léspri-a ékri nan kè nou, jan Bondié té promèt nou nan bouch profèt Jérèmi avèk Ézékièl la (Ex 19, 5-20; 2 Co 3, 3; Ez 11, 19; 36, 26; Jer 31, 33; Jn 16, 13; 14, 26; 6, 45). Li té promèt li t-ap ouété kè ròch la sot nan kè nou, pou-l ba nou yon lòt kè, pou-l mété léspri-l anndan nou, pou-l fè nou konprann désizion-l yo, pou nou réglé konduit nou dapré yo. Konsa sèl sa nou gin pou nou fè, sé rét dosil nan min léspri Sin-an k-ap anségné nou anndan kè nou. É laloua li ba nou-an, sé lacharité-a ki rasanblé tout kòmandman yo (Rom 13, 8-10). Sé poua nou pa doué konprann nou sipériè pasé pèsòn. Bondié sèl sondé anndan fon kè moun, koté léspri Sin-an ékri-a; sé li minm ki konnin ki mèvèy sakré l-ap viv avèk Granmèt la, nan langaj nou pa kapab konprann; langaj léspri Sin-an palé, li pa pasé nan mo ki sot nan bouch lézòm.

4.- Souf sa-a Jézu souflé sou Apot yo, sé souf rézireksion-an; sé souf lavi-a, souf li réprann apré li fi-n lévé byin vivan-an, pou fè nou konnin nou pa fèt pou nou rét anba tè-a, min yon jou n-ap lévé byin vivan ak tout kò nou. Profèt Ézékièl té ouè souf rézireksion sa-a nan vizion-l, lè-l té fè-l mandé pou-l souflé sou zosman yo ki té fi-n séché yo; la minm tout zosman yo rasanblé, yo vi-n gin nè, yo vi-n gin po, yo kanpé, yo vi-n gin léspri, yo vi-n vivan, tankou yon gran lamé; sé tout pèp la ki té fi-n mouri, ki lévé byin vivan (Ez 37, 1-14). Nou pa doué rét ap plinyin, ap di: "nou fi-n dépéri, pa gin lafoua ankò, rélijion-an chanjé, tout bagay fi-n tonbé". Yon krétyin pa fèt pou ap dékontrolé konsa tout tan; okontrè sé pou nou ankourajé tèt nou; Jézu ap travèsè lanmè-a nan kannòt, l-ap dòmi, van-an lévé, lanm yo souké batiman-an, min lè-l révéyé, li kòmandé ni van, ni lanmè; la minm vi-n gin yon gran kalmi. Jézu di Apot yo nan dènié Soupé Jédi Sin-an: "pa kité kè nou troublé" (Jn 14, 1.27). Sin Pòl di Korintyin yo minm bagay pou yo pa kité mové nouvèl ap troublé yo tout tan, pou yo pa nan kè soté (1 Th 2, 2). Koté léspri Sin-an yé, sé kè pozé, sé kè pozé sa-a minm Jézu souété Apot yo, jou dimanch Pak la, lè-l souflé sou yo-a. Sé pou nou viv tankou moun ki

résisité; anyin pa doué dékontrolé nou; nou mèt tonbé byin ba, sé pou nou lévé (Lc 22, 31s; Jn 21, 15.16.17). Sin Piè, Chèf légliz la, Jézu avèti-l l-ap tonbé; Jézu rinnèt li klé gouvènman-an ankò, lè-l lévé sot nan pami mò yo. Anyin pa doué dékontrolé nou. Koté léspri Sin-an yé, sé rézireksion, sé lapè, nan plas lanmò ak kè soté.

5.- Souf sa-a Jézu té souflé sou Apot yo, sé souf profèt; sé pou tout moun li voyé-l jou lapannkot la. Lè Moyiz t-ap dirijé pèp la nan dézè-a, travay la té anpil pou li. Jétro bò-pè-l, té konsyé-l pou-l chouazi kèk anyin nan pèp la pou fè édé-l, pou-l rézèvé bagay ki pi inpòtan sèlman pou li, pou-l pa fi-n dépéri ak tròp travay l-ap poté pou kont li (Ex 18, 13-24). Sé Bondié minm ki té souflé Jétro lidé sa-a, malgré Jétro pa-t minm nan pèp Israël la, li pa-t adoré Bondié Moyiz la, sé prèt Madian li té yé (Ex 18, 1). Bondié pasé pa lintèmédiè-l kan minm pou palé ak Moyiz; Bondié chouazi chémin li vlé; li lib. Bondié pran nan léspri ki té sou Moyiz la, li vidé sou souasandis Ansyin yo li té chouazi-a, pou yo gin ladrès, pou yo kapab édé Moyiz nan diréksion pèp la. Té gin dé ki pa-t prézan nan sérémoni-an, malgré non yo té ékri sou réjis la, sé Eldad ak Médad. Léspri-a tonbé sou yo koté yo té yé-a minm. Yo kòmansé ap palé an profèt. Jozué kouri di Moyiz: "Anpéché yo". Moyiz réponn li: "Ou gin lè jalou pou mouin; pito sé tout pèp Bondié-a ki vi-n tounin profèt, pou léspri Sin-an désann sou yo tout" (Nb 11, 29; Joel 3, 1-5; cf Lc 9, 49-50).

6.- Souf sa-a Jézu souflé sou Apot yo, sé souf lapriyé. Lè nou pa konn ki sa pou nou di, sé li minm k-ap palé pou nou nan langaj moun pa kapab konprann; l-ap palé nan silans, paské nan sièl la sé tout tan l-ap lapriyé, min sé nan yon silans koté Bondié Papa-a konprann sa l-ap di-a, paské sé yon sèl volonté li ginyin ak Papa-a, ansanm ak Pitit la. Nou pa konn ki sa pou nou di nan lapriyé nou, min l-ap lapriyé pou nou (Rom 8, 22-27). Nou pa bézouin ap détayé tout yon pakèt déroulman kozé bay Bondié. Bondié déjà konnin sa nou bézouin anvan minm nou mandé-l. Sé pa palé anpil nou-an k-ap fè-l kouté nou. Si nou palé, sé plis pou nou minm nou palé, pou nou mété nou nan kondision rélasyon avèk Bondié; min vré démann nan, sé léspri Sin-an ki fè-l pou nou; sé pou nou pran abitud ba-l silans kè nou, pou Bondié Papa-a kouté silans li, jan Psòm nan di-a: "Pour toi, Dieu de Sion, même le silence est louange" (Ps 65, 2; Mt 6, 7; Rom 8, 22-27).

7.- Souf sa-a Jézu té souflé sou Apot yo, sé souf sajès k-ap konblé kè ki pòv, kè ki souaf, k-ap fè lariviè koulé landan-l (Jn 7, 37-39; 19, 34; 4, 14; Ez 47, 1; Za 14, 8; Ps 46, 5; 63, 2; Joel 4, 18; Ap 22, 1) Jézu pasé kot Juif yo; yo pa rékonèt moman vizit li. Lè-l mandé madanm Samari-a ti gout dlo-a; sé kè-l

li té mandé-l; lè-l di li souaf sou Koua-a, sé kè nou li souaf; lè-l fi-n di li souaf, li rinnèt léspri-l. Yon sòlda pèsé kè-l, san ak dlo koulé pou pasé souaf nou. Plis nou souaf, plis n-ap jouinn léspri Sin-an; sé pou nou aksépté vi-n tou piti, tankou ti moun, ki rékonèt yo bézouin aprann anpil bagay ankò, sé pou nou gin yon kè tou pòv, tankou kè la Trè Sint Vièj Mari, pou léspri Sajès la konblé nou.

8.- Souf sa-a Jézu souflé sou Apot yo, sé souf òganizasion; sé kado léspri-a ki séparé dapré bézouin chak moun, dapré ròl chak moun nan kominoté-a (1 Co 12, 3-13); sé yon sèl Kò nou fè; min sé divès manb ki ginyin; chak manb gin plas li ki pa sanblé ak yon lòt. Sé pou nou pran abitud aksépté diférans nou, pou nou youn konplété lòt; koté youn manké, lòt la ap édé-l; sé yon fanmiy nou yé; sé pou nou aksépté rékonèt mank nou, pou nou aprann gadé richès lòt yo, k-ap konplété nou.

9.- Souf sa-a Jézu souflé sou Apot yo, sé souf fòs, sa-l té promèt jou lasansion-an (Ac 1, 8) sa yo t-ap tann nan névèn lapriyè-a (Ac 1, 12-14), pou yo sèvi témouin. Pi bèl fason pou nou sèvi Jézu témouin sé nan lacharité; fò nou gin fòs pou nou kapab rinmin, pou nou réglé rélasyon nou dapré lacharité-a. Lakanj Gabriyèl té di la Trè Sint Vièj Mari: "léspri Sin ap vi-n sou ou, fòs Sila-a ki anro nèt la ap kouvri-ou ak lonbraj li" (Lc 1, 35).

10.- Souf Jézu souflé sou Apot yo, sé souf mision; li té vlopé la Trè Sint Vièj jou lanonsiasion-an (Lc 1, 35), ki fè-l vi-n Manman Sèl Pitit Bondié-a, minm léspri Sin sa-a ki té fè-l fèt nan vant san péché-a, minm léspri Sin sa-a ki té fè-l fè progrè nan tout lavi-l, minm léspri Sin sa-a ki té fè-l vi-n misionè kay Élizabèt ak nan tout lavi-l. Koté-l pasé, léspri Sin-an la, kon-l rivé kay Élizabèt, Jan-Batis souké kò-l nan vant manman-l gras a léspri Sin-an (Lc 1, 41.15), Élizabèt vi-n plin ak léspri Sin-an (Lc 1, 41), Zakari vi-n plin ak léspri Sin-an (Lc 1, 67). Nan névèn lapriyè avèk Apot yo, la Trè Sint Vièj Mari la (Ac 1, 14), léspri Sin-an vini (Ac 2, 4).

N-ap mandé-l favè pou nou kolé koté-l, pou nou vlopé ak léspri Sin-an, pou nou dosil nan min-l, pou nou kité-l kondui nou tankou van k-ap souflé nan voual batiman (cf Ac 27, 15.17; 2 P 1, 21) ak souf kréasion-an, ak souf charité-a, ak souf vérité-a, ak souf réziréksion-an, ak souf profèt la, ak souf lapriyè-a, ak souf sajès la, ak souf òganizasion-an, ak souf fòs la, ak souf mision-an.

N-ap mandé-l pou-l lavé tou sa-k sal (Ez 36, 25; Jn 3, 5; 4, 1ss; 9, 6), pou-l rouzé tou sa-k sèk (1 R 18, 41), pou-l chofé tou sa-k frèt (Mc 14, 67; Lc 12, 49), pou-l kléré tou sa-k fènoua (Jn 9, 5), pou-l konblé tou sa-k vid (Lc 1,

53), pou-l soutni tou sa-k fèb (2 Co 12, 9), pou-l géri tou sa-k malad (Mc 16, 18), pou-l laché tou sa-k rèd (Iz 36, 26), pou-l drésé tou sa-k krochi (Is 40, 5), pou-l limin tou sa-k étinn (Is 42, 3; 1 Th 5, 19), pou-l maré tou sa-k lagé (Mt 1, 20), pou-l réprann tou sa-k pati (Lc 15, 20), pou-l poté tou sa-k bouké (Lc 15, 5; Ps 91, 12; 1 R 19, 4; Is 40, 11.30), pou-l louvri tou sa-k fèmin (Ap 5, 5; Jn 14, 26; 16, 13), pou-l sikré tou sa-k anmè (Ez 3, 3; Ap 10, 9), pou-l lagé tou sa-k nan chinn (Ac 12, 7; 16, 26), pou-l kalmé tou sa k-ap tann (Mt 11, 5; Ac 1, 6), pou-l réfè tou sa-k gayé (Jer 18, 4; Jn 21, 15-17), pou-l séré tou sa-k pèdi (Lc 15, 4.8; Jn 17, 12), pou-l nourri tou sa-k grangou (Lc 1, 53; 1 R 18, 5; 17, 9; Ac 10, 15), pou-l défann tou sa-k pèdi (Lc 7, 44; 10, 41).

N-ap mandé-l pou-l vi-n abité nan kè nou (Jn 16, 13; 14, 17.26), pou-l mété ékilib, antan-l ba nou alafoua fòs ak dousè, dé bagay ki pa sanblé alé ansanm époutan ki nésèsè tou lé dé, pou nou kapab sèvi Jézu témouin tout bon vré (Ac 1,8; Mt 11,19; Ga 5,23; 1 Co 13,4; Mt 5,4; 11,12; Lc 16,16).

N-ap mandé-l pou nan nuit, li fè nou ouè klè (Jn 8, 12; 9, 5; 11, 9; Is 9, 1; Sg 17, 1), nan dlo li fè nou janbé (Ex 14, 15; Jos 4, 14), sou rout li fè nou maché (Lc 1, 39; Jg 7, 5), minm si nou fatigé (Is 40, 11.31; Jn 4, 6; 1 R 19, 4-8), nan kont li fè nou rét kalm (Mt 5, 22; Ep 4, 26; Ps 4, 5; 37, 8), nan tray li fè nou espéré (Jn 16, 33), sou tè li fè-n gad nan sièl (Ps 120, 1), minm si nou bouké tann (Mt 11, 3; Ha 2, 3), nan dout li fè-n asiré (Jn 20, 25; Mt 14, 30-32), nan brui li fè-n réfléchi (Lc 2, 19), sou kè-n li fè-n mét bariè (Ps 141, 3; Os 2, 8), minm si-n louvri-l byin laj (Os 11, 8; Jn 19, 34; Za 13, 3), nan van li fè-n rézisté (Mt 8, 24), nan cho li fè-n avansé (Jon 4, 8), sou do-n li fè-n poté koua-n (Lc 9, 23), minm si nou trouvé-l trò lou (Mc 15, 21; Mt 11, 28), nan jinn li fè-n pran kouraj (Ph 4, 12), nan ront li fè-n lévé tèt (2 Co 12, 9), sou fron-l li fè-n mét sign li (Ez 9, 4; Ap 7, 3), minm si nou méprizé (He 12, 2; Lc 23, 11), nan frèt li fè-n chofé kò-n (Mc 14, 67), nan pièj li fè-n jouinn chémin-n (Ex 40, 36; 14, 19; Ac 16, 6-10), sou bra-l li fè-n vouayajé (Lc 15, 5), minm si nou jouinn sékous (Ps 91, 12), nan souaf li fè-n jouinn sous dlo (Jn 4, 14; 7, 37), nan vèy li fè-n rét jé klè (Mt 26, 41), sou Koua-a li fè-n di: "Papa" (Mc 14, 36), minm si nou kouè-n tou sèl (Mc 15, 34; Lc 23, 46), nan mòn li fè-n gin souplès (Ct 2, 8), nan ròch li fè-n vòltijé (Lc 4, 29; Ps 91, 12), sou zèb li fè-n instalé (Jn 6, 12; Ps 23, 2), minm si nou pa jouinn kay (Lc 9, 33), nan frè-n li fè-n ouè Jézu (Mt 25, 20), nan vi-n li fè-n ouè Mari (Lc 1, 43; Jn 2, 5; 19, 26; Ac 1, 14), sou kè-l li fè-n pozé kè-n (Ps 131, 2), minm si nou pa santi-l (Jn 20, 29; cf SM 51-52).

*
* *

TRINITÉ KI SIN ANPIL LA

Nan diskou apré soupé Jédi Sin-an, Jézu palé Apot yo sou lavi Papa-a ak Pitit la ak léspri Sin-an, ki fè yon sèl nan Toua Pèsòn. Révélation sa-a sé amòsé sèlman lansyin Téstaman té kapab amòsé-l, paské Pèp Israèl la t-ap viv nan mitan pèp ki t-ap adoré anpil fo-dié. Profèt yo té insisité sou yon sèl Bondié-a pou yo adoré (Dt 6, 4). Yo pa-t ko kapab résévoua gran Révélation sa-a Jézu ap bay anvan-l pati-a: yon sèl Bondié nan Toua Pèsòn. Lè Abraam té résévoua Toua Pèsónaj yo dévan pòt Lakay li-a (Gn 18, 1-15), sé yon fason déjà pou fè nou konprann gin yon sèl Bondié nan Toua Pèsòn. Min sé tankou yon lonbraj k-ap passé (He 8,5; 9,23; 1 Co 10,6; 1 P 3,21). Révélation-an ap paré chémin-l. Fò Jézu té déklaré li sé Pitit Bondié tout bon vré, pa sèlman pitit adoptif tankou Roua yo, Profèt yo, Saj yo, Pèp la. Fò-l té rivé yon pouin pou-l dévoualé léspri Sin-an sé yon Pèsòn ki diféran ak Papa-a; sé Papa-a ak Pitit la ki voyé-l, minm jan Papa-a té voyé Pitit la sou tè-a kòm Sajès ki diféran ak li, minm si yo fè yon sèl. Lè Jézu ap monté nan Sièl, li mandé Apot yo pou yo fè batèm o non Papa-a ak Pitit la ak Léspri Sin-an (Mt 28,19).

Chak fousa nou fè sign lakoua, nou fè sonjé mèvèy sa-a: lavi Papa-a ak Pitit la ak léspri Sin-an nan nanm nou, gras a Batèm nan ki fè nou vi-n pitit Bondié. Dépi jou Jan-Batis t-ap batizé Jézu sou bò larivière Joudin-an, voua Papa-a té palé antan-l nan Sièl la. Li té di: "Sila-a sé Pitit mouin-an, sa-m rinmin-an, nan li mouin jouinn plézi mouin" (Mc 1, 11). Minm moman sa-a, léspri Sin-an té parèt sou tèt li sou fòm yon kolonb (Mc 1,10). Lè lanj Gabriyèl té vi-n anonsé la Trè Sint Vièj Mari li t-ap vi-n Manman Pitit Bondié-a, li té di-l léspri Sin-an t-ap vi-n sou li, épi Fòs Sila-a ki anro nèt la (Papa-a) t-ap kouvri-l anba lonbraj li (Lc 1, 35). Jézu di Juif yo: "Jouskoulié-a Papa-m ap travay, mouin minm tou m-ap travay" (Jn 5, 17). Li di: "Lè n-ap lévé Pitit moun nan anlè-a, n-ap rékonèt mouin sé "Je suis" (Jn 8, 28), sa vlé di li gin minm non ak Papa-a, non sa-a Papa-a té déklaré bay Moyiz la (Ex 3, 14). Li di: "Mouin ak Papa-a, sé yon sèl bagay nou yé" (Jn 10, 30: "hèn esmen" ἓν ἔσμεν). Li présizé: "Papa-a nan mouin épi mouin minm mouin nan Papa-a" (Jn 10, 38). Li di: sé nan li minm léspri Sin-an ap pran pou-l bay (Jn 16, 14). Léspri Sin-an ap kontinué travay li té kòmansé-a. L-ap éspliké tout lansègnman li té déjà bay épi yo pa-t fi-n konprann nan (Jn 16, 13; 14, 26). Li di: li pap kité yo ofélin, l-ap désann vi-n jouinn yo antan l-ap voyé léspri Sin-an ba yo (Jn 14, 17-18). Sa vlé di li minm ak léspri Sin-an sé yon sèl bagay tou. Li di: l-ap voyé yon lòt Avoka ("Paraclet", Jn 14, 16), pou ankourajé yo, pou konsolé yo, sé léspri Sin-an, ki minm

"Paraclet" avèk Jézu (1 Jn 2,1), minm si yo chak sé yon Pèsonaj diféran. Jézu ap lapriyè pou nou tankou Prèt nou, l-ap lapriyè nan nou tankou Tèt nou, nou lapriyè-l tankou Bondié nou (St Augustin). Min anndan fon kè nou sé léspri Sin-an k-ap lapriyè pou nou antan l-ap di paròl nou pa kapab konprann, épi sa-l di yo korésponn ak volonté Bondié Papa-a (R 8, 26-27). Jézu di: nouriti-l sé fè volonté Sila-a ki voyé-l la, épi réalisé travay li (Jn 4, 34). Jézu sé Paròl Bondié Papa-a palé ak pròp tèt pa-l, nan léspri-l. Léspri Sin-an sé léspri Papa-a, sé léspri Jézu. Papa-a rinmin Pitit la; Rinmin sa-a sé yon Pèsonaj li yé; sé léspri Sin-an. Sé yon mèvèy sakré nou pa kapab konprann. Nou adoré-l nan lafoua. Nan Krédo-a, chak dimanch nou déklaré mèvèy lafoua sa-a osijè Papa-a nan premié pati-a, osijè Pitit la nan dézièm pati-a, osijè léspri Sin-an nan touazièm pati-a, ki débouché sou légliz la. Sé poua chak dimanch ak jou gran fèt, apré prèch la, foul la doué chanté oubyin résité Krédo-a. Yo pa doué ranplasé Krédo-a antan yo chanté dôt kantik ki pi kout. Krédo-a sé yon lansègnman sakré ki pasé sot nan jénérasyon al nan jénérasyon dépi nan Apot yo. Sé Apot yo ki transmèt li bay légliz la. Sé poua yo rélé-l: "le symbole des Apôtres". Sé yon "tradition", yon transmission ("traditio **ab** Apostolis **ad** Ecclesiam": tradision **sot nan** Apot yo **al nan** légliz la", dapré sa Sint Iréné di). Sé yon tradision sakré. Sé yon gro danjé lè moun ki gin réponsabilité fè foul la chanté-l, yo chanjé Krédo-a pou yo pran kantik ki pi kout, oubyin ki pi cho, oubyin sa moun yo konnin pi byin, oubyin sa yo souadizan konprann pi byin. Moun sa yo réponsab déviasion lafoua foul la. Lamès sé yon "catéchèse permanente". Sé yon lansègnman katéchis ki toujou ap continué ap ofri sèvis li tout tan. Sé pou sa chak dimanch nou oblijé vi-n lamès, épi Pè-a oblijé préché. Apré prèch la, foul la déklaré lafoua-l. Si y-ap chanjé krédo-a tout tan, ap rivé yon lè, moun yo pap konnin-l ankò. Sa t-a grav anpil. A lokazion fèt la Trè Sint Trinité-a sé pou nou réfléchi sou pouin sa-a; si gin koté yo pran chémin krochi sou pouin sa-a, sé pou yo chanjé mové abitud sa-a.

Nan kòmansman chak mès, lè nou fi-n di: "O non Papa-a ak Pitit la ak léspri Sin-an, nou di: "La grâce de Jésus notre Seigneur, l'Amour de Dieu le Père et la Communion de l'Esprit-Saint **soit** ('**sit**') **toujours** avec vous", jan dézièm léktu fèt la Saint Trinité A-a fini-an (2 Co 13,13). Sé dènié vèsé dézièm Lèt Sin Pòl ékri Korintyin yo. Malgré gin Toua Pèsòn ak toua kalité ("Grâce" pou Pitit la; "Amour" pou Papa-a; "Communion" pou léspri Sin-an), "verbe" la rété au singulier "**soit**" ("**sit** semper vobiscum"; nan lang grèk la yo pa mété "verbe" la). Sa montré tou lé Toua Pèsòn yo yo fè yon sèl "nature". Sé lavi sa-a minm nou patisipé nan Batèm nou-an. Sé lokazion

pou nou sonjé mèvèy sakré Batèm nou. Sé lokazion pou nou konsidéré kijan sé yon bagay ki konsékan, késion Batèm nan. Sé pou sa yo mandé yon ti préparasion pou papa ak manman sitou, anvan yo fè batizé pitit yo. Lavi sa-a sé yon trézò. Papa-a sé Sous lagras. Pitit la sé Limiè bèlté Papa-a. Léspri Sin-an sé Rinmin ki pap janm fini-an ki soti nan ni youn ni lòt. "Omnis, Pater, fons gratiae;

Lumen paternae gloriae,

Sancte utriusque Spiritus

interminata caritas" (Liturgia Horarum III, Vatican, 1974, 467).

Alafin chak Psòm, lè n-ap lapriyè Bréviè-a, nou di: "Viv Papa-a ak Pitit la ak léspri Sin-an", pou fè louanj Toua Pèsòn yo ki yon sèl Bondié-a. Apré lanjélus la, sé yon abitud pou di toua foua: "Viv Papa-a ak Pitit la ak léspri Sin-an", pou fè louanj Sint Trinité-a. Nan kòmansman tout Litani yo, nou toujou rézèvé yon demann pou Papa-a, youn pou Pitit la, youn pou léspri Sin-an, antan nou mandé yo pou yo pran pitie pou nou, minm si nan rès Litani-an nou di: "lapriyè pou nou", lè n-ap lapriyè la Trè Sint Vièj Mari ou byin Sin yo. Bondié Papa-a, Pitit la, ak léspri Sin-an té toujou égzisté, yo égzisté koulié-a, y-ap toujou égzisté kòm yon sèl Bondié. Sé pi gran mèvèy sakré ki ginyin. Nan Lèt Sin Pòl ékri Romin yo (Rom 11,36), li gin yon pasaj koté li fè louanj Bondié ki yon sèl an Toua Pèsòn nan, li di: "Tout bagay **soti nan** li [Papa-a], tout bagay fèt **pa lintèmediè** li [Pitit la], tout bagay égzisté **nan** li [léspri Sin-an]" ("**ex** ipso et **per** ipsum et **in** ipso sunt omnia"). Li di Korintyin yo (1 Co 12, 4-6): gin divès aktivité min yon sèl Bondié [Papa-a], gin divès sèvis min yon sèl Granmèt la [Pitit la], gin divès kado min yon sèl léspri [léspri Sin-an]. Sé sa yo rélé "appropriation". Sé tou lè Toua Pèsòn yo ki fè minm bagay la, sèlman yo mété responsabilité-a pi plis sou youn oubyin sou yon lòt. **Aktivité-a** pi sanblé ak Papa-a ki kréyé sièl la ak tè-a. **Sèvis** la pi sanblé ak Pitit la ki pa vini pou fè sèvi-l min pou-l sèvi. **Kado-a** pi sanblé ak léspri Sin-an ki kado Bondié-a Jézu té promèt li t-ap voyé-a. Sé Toua Pèsòn, min sé yon sèl ak minm Bondié-a. Sé yon mèvèy sakré nou pa kapab konprann, min nou kouè.

Gin konparézon ki édé proché nan konpréansion mèvèy sakré sa-a. Sé tankou lè n-ap gadé yon pié boua, nou ouè rasi-n pié boua-a ki ba nou yon lidé sou Papa-a, nou ouè branch yo ki ba nou yon lidé sou Pitit la, nou ouè fèy ak flè pié boua-a ki ba nou yon lidé sou léspri Sin-an. Sé sinp konparézon. Konparézon sé pa rézon. Min sa édé nou proché ti kras pou nou fè yon ti lidé sou gran mèvèy sakré sa-a ki dépasé kapasité léspri nou. Lè n-ap gadé solèy la, boul difé-a fè nou sonjé Papa-a, réyon yo fè nou sonjé Pitit la, limiè-a fè nou sonjé léspri Sin-an. Lè n-ap gadé yon lariviè, sous la

fè nou sonjé Papa-a, kouran dlo-a fè nou sonjé Pitit la, lanbouchu-a fè nou sonjé léspri Sin-an. Sèlman légliz la pa aksépté yo réprésanté la Trè Sint Trinité nan nimpòt ki fason, pou évité mové konpréansion mèvèy sakré sa-a. Imaj ki réprésanté Toua Pèsòn yo k-ap manjé dévan papòt kay Abraam nan, sé yon "icône" ki fèt dépi lontan anpil ("icône de Roublev", 1425; cf Gn 18,1-15; = kouran grèk); gin yon lòt kouran ki réprésanté Bondié tankou yon Papa ki kinbé Jézu-Kri klouré sou Koua-a nan bra-l oubyin sou jénou-l, épi anlè Papa-a ak Pitit la yon kolonb ap plané ki réprésanté léspri Sin (Mt 3,16; = kouran latin; cf Le Greco, Prado, Madrid). Réprésantasion-an doué apuiyé sou yon révélation, yon paròl Bondié, ki sèvi kòm fondman konésans nou ginyin osijè Bondié. Nan pòtré ki réprésanté Sint Sésil ki mouri mati, Sint Sésil louvri yon sèl douèt nan yon min; nan lòt min-an, li louvri toua douèt; sé lafoua-l li vlé déklaré; sé pou lafoua sa-a minm li mouri: yon sèl Bondié nan Toua Pèsòn.

Papa-a sé Rinmin, Pitit la sé Favè, léspri-a sé Kominion (2 Co 13,13). Sin Pòl di Éfézyin yo: sé pou Bondié Granmèt nou **Jézu-Kri, Papa** Bèlté-a, ba nou **léspri** Sajès ak Révélation-an pou nou rivé konnin-l (Ep 1,13). Sint Atanaz di: "Papa-a fè tout bagay pa lintèmediè Paròl la, nan léspri Sin-an" ["Pater per verbum in Spiritu Sancto omnia facit" (Ep I ad Serapionem 28-30: PG 26, 594-595,599; Liturgia Horarum III, Vatican 1974, 476-477)]. Li di: minm Trinité-a rété yon sèl ("eoque modo sanctae Trinitatis unitas servatur", ib). Li di sé yon sèl Bondié yo préché nan légliz la, li **anlè** tout bagay, li **atravè** tout bagay, épi li **nan** tout bagay, jan Sin Pòl di Éfézyin yo (Ep 4,6) [Ita unus Deus in Ecclesia praedicatur, qui est **super omnia et per omnia et in omnibus**", ib]. Li éspliké kijan "**anlè** tout bagay" la, sa konsèné Papa-a kòm Prinsip ak Sous; "**atravè** tout bagay" la, sa konsèné Paròl la, Pitit la; "**nan** tout bagay" la, sa konsèné léspri Sin-an ("**super omnia** quidem ut Pater ut principium et fons, **per omnia** vero, nempe per Verbum, **in omnibus** denique, in Spiritu Sancto" ib). Sé lè sa-a li éspliké sa Sin Pòl té di Korintyin yo: anpil kado min yon sèl léspri, anpil sèvis min yon sèl Granmèt, anpil aktivité min yon sèl Bondié ki fè tout bagay nan tout bagay (ib). Li di: sa léspri-a ap séparé bay chak moun nan, sé sa-k sòti nan Papa-a, sa yo bay pa lintèmediè Paròl la. Sèké tou sa-k pou Papa-a, li pou Pitit la tou. Sé pou sa ki soti nan Pitit la épi yo bay nan léspri-a, sé vré kado Papa-a. Minm jan tou, kòm léspri-a nan nou, Paròl la, koté nou résévoua-l la, li nan nou tou, épi nan Paròl la Papa-a la tou. Sé pou sa Pitit la di: "Papa-a avèk mouin, n-ap vini, n-ap abité lakay li" [Quae enim Spiritus singulis distribuit, ea a Patre per Verbum dantur. Nam omnia quae Patris sunt, item Filii: de ea quae a Filio in Spiritu dantur, vera sunt Patris munera. Similiter

cum Spiritus in nobis est, Verbum a quo illum accipimus, in nobis etiam est, et in Verbo est quoque Pater, atque ita fit istud: "Veniemus ego et Pater, ut mansionem apud eum faciemus" ibj). Sé la-a tou li bay konparézon ak limiè-a, ak réyon-an ak klèté-a ("Ubi enim lux est, illic et splendor quoque est; Ubi item splendor est, ibi similiter et ejus efficientia et splendida est gratia", ib; cf Liturgia Horarum III, Vatican 1974, 477). Li fè sonjé dènié vèsè dézièm Lèt Sin Pòl ékri Korintyin yo (2 Co 13,13), sa ki nan finisman dézièm Léktu lamès Sint Trinité A-a: "Favè Granmèt la Jézu-Kri, ak Rinmin Bondié-a ak Kominion léspri Sin-an avèk nou tout". Li montré kijan Favè-a, sé Papa-a ki bay li, pa lintèmédiè Pitit la, nan léspri Sin-an. Min Kado-a pa kapab kominiké nan nou si sé pa nan léspri Sin-an ("Gratia Domini nostri Jesu Christi, et caritas Dei, ac communicatio Sancti Spiritus sit cum omnibus vobis". Omnia enim et donum quod in Trinitate datur, datur a Patre per Filium in Spiritu Sancto. Nanm quemadmodum ex Patre per Filium datur gratia, ita in nobis fieri non potest doni communicatio nisi in Spiritu Sancto. Hujus siquidem participes effecti, Patris caritatem, Filii gratiam et ipsius Spiritus communicationem habemus" ib).

Pap Jan-Pòl II té ékri yon premié Lèt ansiklik sou Granmèt la, Pitit Bondié-a ki délivré nou-an: "Redemptor Hominis". Apré sa li ékri yon lòt lèt ansiklik sou Bondié Papa-a ki rich ak kè sansib la: "Dives in misericordia". Apré sa li ékri yon lòt Lèt ansiklik sou léspri Sin-an ki Granmèt é ki bay lavi-a: "Dominum et vivificantem". Sé yon lansègnman ki rich. Lè nou mété tou lé toua Lèt ansiklik sa yo ansanm, nou dékouvri mèvèy la Trè Sint Trinité. Nou konstaté kijan Pap la gin préokipasyon pou-l anségné nou vré nannan lafoua-a. A lokazion ané marial la, an 1987, li té ékri yon lòt Lèt ansiklik sou la Trè Sint Vièj Mari: Manman Sila-a ki délivré nou-an, "Redemptoris Mater". Li montré rélasyon la Trè Sint Vièj Mari ginyin ak Papa-a ak Pitit la ak léspri Sin-an. Li sité non Sin Monfò yon fason spésial nan finisman Lèt li-a (RM 48). Sin Monfò té insisté anpil sou rélasyon la Trè Sint Vièj Mari té ginyin ak Toua Pèsòn yo ki yon sèl Bondié-a, nan liv li-a: "Traité de la Vraie Dévotion à la Très Sainte Vierge". Nou t-a doué panché anpil sou liv sa-a, pou réajisté pròp rélasyon pa nou ak Papa-a ak Pitit la ak léspri Sin-an. Papa-a sé Prinsip ki pa sòti nan okinn prinsip ("ingenitum"); Pitit la sé Sèl Pitit Papa-a ("unigenitum"); léspri Sin-an sé Avoka-a ("paraclitum"). Sé minm Trinité-a ki Sin, ki pa kapab séparé ("individuum"). N-ap mandé la Trè Sint Vièj Mari pou nou viv rélasyon nou ak Bondié Papa-a ak Pitit la ak léspri Sin-an yon fason pou yo alèz nan kè nou tankou nan Paradi yo. Sé pou sa Bondié té kréyé nou, sé pou sa li fè nou résévoua Batèm nan.

Nan kòmansman lamès la, Pè-a salué fidèl yo, antan-l di: "**Favè** Jézu-Kri Granmèt nou-an, **lamou** Bondié Papa-a, ak **kominion** léspri Sin-an toujou avèk nou tout (2 Cor 13,13). Nan fason salué sa-a, sé toua Pèsòn yo ki Bondié-a ki ba nou sa yo yé-a. Papa-a sé rinmin-an, Jézu sé favè-a, léspri Sin-an sé kominion-an. Sé yon fason pou di nou: nan lamès la nou vi-n antré pi fon nan fanmiy Bondié-a k-ap ba nou mèvèy sakré-a. Nan dimanch la Trè Sint Trinité-a, sé pou nou kalkilé pi plis sou mòd salué sa-a ki nan kòmansman lamès la. Lè nou fè sign lakoua nou, sé o non Papa-a, ak Pitit la, ak léspri Sin-an. Dépi nan batèm nou yo trasé-l sou nou. Sé lavi Bondié n-ap réspiré tout tan. Lavi sa-a sé lavi fanmiy. Liv Éklézias la di: koté yon moun ki pou kont li tonbé, dé moun ansanm rézisté, épi fil ki trésé an toua-a pa kasé fasil (Qo 4,12). Sé poua yo di: li pa bon pou moun rét pou kont li, atansyon pou lè nou dé sèlman, min a toua sé déjà yon kominoté. Chif toua-a sé chif fanmiy.

Pou réprézanté la Trè Sint Trinité, yo konn gadé solèy la; épi yo di ronn solèy la, sé tankou Bondié Papa-a, réyon yo li bay la, sé tankou Bondié Pitit la; limiè-a ki rivé jous sou nou-an, sé tankou Bondié léspri Sin-an. Sé yon fason pou montré minm si toua Pèsòn yo diféran, yo fè yon sèl nan natu yo. Yon lòt konparézon konn édé réprézanté la Trè Sint Trinité tou: sé lè nou égzaminé yon plant; nou ouè rasi-n nan épi nou di: sa-a sé tankou Papa-a; nou konsidéré pié boua-a minm, nou di sa-a sé tankou Pitit la, épi nou voyé jé nou sou flè-a, nou di sa-a sé tankou léspri Sin-an. Toua Pèsòn sa yo, yo diféran, min yo tou lé toua fè yon sèl. Lè n-ap gadé yon lariviè, nou gin doua di: sous la, sé tankou Papa-a; lariviè-a k-ap koulé-a sé tankou Pitit la; lanbouchu lanmè-a sé tankou léspri Sin-an. Yo tou lé toua yo diféran min sé minm nan yo fè. Tou sa, évidaman sé konparézon. Nou pa kapab fi-n fiksé léspri nou nèt nan konsidérasion sa yo. Yo pa kapab sèvi tankou yon pòtré pou fè nou ouè Bondié. Sèlman nou gin doua sèvi ak yo pou nou réprézanté sa Bondié yé.

Bondié sé Rinmin-an; sé non sa-a ki pi adapté ak Papa-a. Sé li minm nou ba li nan kòmansman lamès la lè nou di "lamou Bondié Papa-a". Jézu sé favè-a. Sé non sa-a ki pi alé ak Pitit la, sé li minm nou ba li nan kòmansman lamès la lè nou di "Favè Jézu-Kri". Léspri Sin-an sé kominion-an. Sé non sa-a ki pi alé ak li. Sé li minm nou ba li nan kòmansman lamès la lè nou di: "Kominion léspri Sin-an". Tou sa nan minm fòmil la, pou nou salué fidèl yo k-ap préparé pou yo antré nan gran mèvèy sakré lamès la:

"Lamou Bondié Papa-a;

Favè Jézu-Kri-a;

Kominion léspri Sin-an toujou avèk nou tout"; minm si yo pa di-l nan lòd sa-a ékzaktéman, yo mété Jézu-Kri anvan, paské sé li minm Papa-a té voyé pou vi-n sové nou. Papa-a **anlè** ἐπι tout bagay, Pitit la **atravè** διὰ tout bagay, léspri-a **anndan** ἐν tout bagay (Ep 4,6). Tou lé toua sé minm Bondié-a k-ap aji ansanm. Sé minm natu-a yo ginyin; sèlman **aktivité** sakré yo, nou mété yo sou non Papa-a; **sèvis** sakré yo, nou mété yo sou non Pitit la; **kado** sakré yo nou mété yo sou non léspri Sin-an (1 Co 12,4-6). Nou di aktivité sakré sa yo sot nan Papa-a paské sé li minm ki kréyé tout bagay ak yon sèl mo, li palé épi tou sa-k pa-t anyin vi-n égzisté (Ps 33,9). Nou di sèvis sakré yo vi-n sot nan Pitit la paské li minm li di li pa vini pou-l fè moun sèvi-l, min li vini pou-l sèvi épi pou-l bay lavi-l pou délivrans tout moun (Mt 20,28). Nou di kado sakré yo vi-n sot nan léspri Sin-an paské léspri Sin-an sé kado Jézu-Kri fè nou, dapré sa-l di: "Si-ou té konn kado Bondié-a, épi kilès ki di-ou ban-m ti gout dlo-a, sé ou minm ki t-a mandé-l, li t-a ba-ou dlo vivan" (Jn 4,10.14). Tout aktivité sakré ki ginyin, tout kalité travay ki sakré, nan légliz, nou di sé Bondié Papa-a ki fè-l. Sin Pòl di sa: "Sé Bondié k-ap aji nan nou; ni sa nou vlé-a, ni sa n-ap fè-a, sé Bondié k-ap fè-l nan nou pou bon plézi pa-l" (Ph 2,12). Tout sèvis sakré yo sé Jézu-Kri minm ki panché sou yo: chak ti sèvis nou rann yon lòt moun, sé Jézu li minm ki panché pou-l rann li, li pa vi-n pou yo sèvi-l, li vi-n pou-l sèvi. Tout kado sakré ki ginyin, sa nou rélé don, sé léspri Sin-an ki bay chak moun yo jan lidé-l di-l. Min tou sa, sé pou nou kapab fè yon sèl, minm jan Bondié Papa-a ak Pitit la ak léspri Sin-an fè yon sèl la malgré yo toua-a. Aktivité yo mèt anpil, yo mèt diféran, sé nan yon sèl Papa-a yo soti. Sèvis yo mèt anpil, yo mèt diféran, sé nan yon sèl Pitit la yo soti. Kado yo mèt anpil, yo mèt diféran, sé nan yon sèl léspri Sin-an yo soti. Sé sa-k fè nou minm tou, nou mèt diféran dapré aktivité nou, sé pou nou fè yon sèl antré nou, antan n-ap gadé kot aktivité sa yo soti, nan minm Papa-a. Nou mèt diféran dapré sèvis nou, sé pou nou fè yon sèl antré nou antan n-ap gadé koté sèvis sa yo soti, nan minm Pitit la. Nou mèt diféran dapré kado nou, sé pou nou fè yon sèl antré nou, antan n-ap gadé koté kado sa yo soti, nan minm léspri-a. Bondié sé Toua Pèsòn min sé yon minm natu. Tou sa-k nan yo diféran min sé nan minm sous la yo soti. Sé sa-k fè tout krétyin doué fè yon sèl dapré sous yo, minm si yo diféran antré yo, dapré aktivité yo, dapré sèvis yo, dapré kado yo.

Nan lapriyé Jézu té fè-a, jou Jédi Sin-an, li té di: "Mouin lapriyé-ou, Papa, pou yo fè yon sèl minm jan ou minm ak mouin nou fè yon sèl" (Jn 17,22). Papa-a diféran dé Pitit la antan li sé Papa, épi antan Pitit la sé Pitit. Rélasyon Papa-a pa rélasyon Pitit la. Anndan la Trè Sint Trinité, pa gin rélasyon ki vi-

n ajouté yon bagay nan natu Bondié. Nan sans sa-a antan Bondié sé Papa, li diféran dé Pitit la; antan Pitit la sé Pitit, li diféran dé Papa-a. Antan yo tou lé dé youn rinmin lòt, yo pa diféran antré yo, min yo diféran dé léspri Sin-an. Léspri Sin-an sé Rélation lavi-a Papa-a ak Pitit la ginyin-an. Papa-a ak Pitit la sé minm prinsip la koté léspri Sin-an soti-a. Léspri Sin-an an fas yo dé-a ki kòm si ap souflé-l. Li sé sa yo rélé "spiration passive" la, an fas Papa-a ak Pitit la ki "spiration active".

*

Pou 9 juin 1985, nan fèt dimanch la Trè Sint Trinité, Sint Térèz lanfan Jézu té ofri tèt li bay lamou mizérikòdié Bondié, tankou yon lansan k-ap fè lodè-l monté nan mitan lapriyé asouè. Li dékouvri Bondié sé Rinmin. Épi li té santi kijan sa fè Bondié plézi, lè yon moun gin konfians nan **RINMIN** sa-a. Sé pou sa li té rinnèt tèt li nèt bay Bondié pou Bondié té kapab vidé tout rinmin li vlé sou li, san-l pa bay Bondié okinn bariè. Bondié sé Rinmin. Yon Rinmin ki fè Papa-a, Pitit la ak léspri Sin-an **louvri** kè yo pou yo résévoua tout moun. Fanmiy nou, kominoté nou, légliz nou, péyi nou, doué pran modèl sou Trè Sint Trinité-a, antan yo fè **yon sèl**, épi an minm tan tou antan yo **louvri** a léstériè, san yo pa fèmin sou pròp ti problèm yo y-ap plédé répété tout tan san yo pa janm jouinn solision. Sé pou nou aprann bliyé problèm nou, pou nou viré nan problèm lòt moun. Sé pou nou aprann bliyé tèt nou, pou nou sonjé lòt yo. Sé pou nou sispann plinyin sò nou, pou nou sansib sou sò lòt yo. Si pa gin ouvèti sa-a nan fanmiy-an, nan kominoté-a, nan légliz la, nan péyi-a, group nou yo ap toufé moun yo ki ladan yo, antan y-ap vi-n tounin tankou yon pakèt ti zilé, ki séparé ak dlo lanmè, san yo pa janm kapab anilé distans la, antan youn ap di parapò a lòt: "zafè kabrit pa zafè mouton". Pou yon kominoté réyalizé ròl li, sé pou-l fè yon fason pou tout manb li yo fè youn, sé vré; min tou sé pou-l fè atansyon pou kèsyon fè youn sa-a pa minnin yon kèsyon fè bann apa, fè blòk. Dépi yon group antré nan kèsyon fè blòk, sé kont dèt moun oubyin dèt group l-ap fè blòk. Dépi gin kèsyon fè blòk, gin kèsyon lagè, minm si sé pa lagè kout-pouin, omouin sé lagè kout-lang; bagay ki térib, paské si lacharité-a pa respékté, group la manké ròl li, li raté mision-l; si sé difé l-ap limin, si sé monté l-ap monté manb yo kont intèl, oubyin kont tèl group, sé pa travay Bondié ankò l-ap réyalizé, sé travay djab. Bondié mété nou ansanm pou nou fè youn épi pou nou louvri pòt kè nou bay lòt yo. Sé bèl bagay lè yon kominoté pa kité okinn fo-profèt pran tèt li, pou vidé gaz sou difé, pou éksité rayisans, okontrè li gadé tout moun ak tout bagay ak jé Bondié ki nan mitan-l. Lè sa-a, sé Papa-a, ak Pitit la ak léspri Sin-an tout bon vré k-ap fè lavi yo alé-vini nan group sa-a; lè sa-a, yo kapab di avèk Psòm nan: "Ala bèl sa bèl, lè nou

abité nou tout ansanm tankou frè, sa sé yon paradi" (Ps 133,1). Yon kominoté ki pran modèl sou Trinité-a, sé yon sous dlo lavi ki fré, sé pa yon ma-labou k-ap dòmi. Sous la vivan, l-ap kouri pou-l al rafréchi dòt koté, li pa sonjé ti avantaj koté li sòti-a sèlman. Plis l-ap bay, plis l-ap ginyin. Moun k-ap pasé ap kontan vi-n bouè nan li. Y-ap kontan répozé bò koté-l, tankou Jézu té chita bò pui-a pou-l kozé ak madanm Samari-a, antan li té promèt li sous dlo k-ap kouri nan kè-l, si-l aksépté louvri kè-l ba li.

Yon fanmiy, yon kominoté koté lavi Bondié Papa-a, ak Pitit la ak léspri Sin-an apralé-vini konsa, sé yon fanmiy ak yon kominoté koté manb yo gin rankont fasil youn ak lòt, san youn pa chèché intèrè pa-l nan min lòt, san youn pap mété ak lòt, pou-l kritiké yon lòt, min antan y-ap réspiré afon lavi-a ansanm, antan youn byin kontan kouté lòt la, antan youn aksépté pèdi tan-l pou-l montré lòt la li rinmin-l, san-l pa tann anyin nan min-l pou sa, antan youn chanjé paròl ak lòt nan rinmin sa-a, san yo pa rété bouch fèmin, mi-n maré, youn an fas lòt, avèk gou anmè nan bouch yo, ap manjé dan, ap séré pouin, pou avantaj ak intèrè youn pèdi nan lòt. Okontrè, koté sous lavi Bondié Papa-a ak Pitit la ak léspri Sin-an ap koulé, minm silans vlé di kichòy, paské li plin ak Bondié, sé rinmin-an k-ap koulé san palé: yon sèvis nou rann san yo pa mandé nou, san nou pa tann yo di nou mès, san pèsòn pa bézouin ouè, yon jès prévouayans nou fè pou yon lòt; tou sa fè kominoté-a, fanmiy nan, légliz la, péyi-a, fè yon sèl, san-l pa fèmin sou pròp tèt pa-l, okontrè antan-l louvri sou pa déyò, pou-l résevoua étranjé, pou-l toujou prèt pou-l padonnin, pou-l chèché rékonsiliation. Yon kominoté koté lavi Papa-a, Pitit la ak léspri Sin-an ap koulé, l-ap sonjé kijan chak moun gin ròl li, kijan minm si chak moun pa nan minm pozision, yo tout yo fè yon sèl kan minm, minm jan tout bagay fèt gras a Papa-a, pa lintèmédiè Pitit la, nan léspri Sin-an; minm jan divès rérealizasyon yo sot nan Papa-a, divès sèvis yo sot nan Pitit la, divès kado yo sot nan léspri Sin-an; minm jan Papa-a kinbé kòd Rinmin-an, Pitit la kinbé kòd favè-a, léspri Sin-an kinbé kòd bòn-antant la, min sé minm mizik la k-ap chanté.

Élizabèt de la Trinité té viv nan souf lavi Toua Pèsòn divi-n yo, tout tan li t-ap sonjé yo, antan li t-ap kalkilé sa Jézu té di Sin Jud Tadé-a: "Si yon moun rinmin-m, Papa-m ap rinmin-l, n-ap vi-n lakay li, n-ap abité nan li" (Jn 14,23). Dimanch la Trè Sint Trinité-a doué fè nou sonjé kijan nou sé paradi Bondié dépi jou Batèm nou, lè nou té batizé o non Papa-a ak Pitit la ak léspri Sin-an. Sé lokazion pou nou sonjé sa-k té pasé, lè la Trè Sint Vièj Mari té parèt dévan Sint Bènadèt a Loud, pou 11 février 1858 la, Bènadèt t-apral fè sign lakoua, li pa kapab; la Trè Sint Vièj fè yon bèl sign lakoua; apré sa li minm li réyisi fè pa-l la; dépi lè sa-a li toujou fè-l trè byin, li pran

tan-l pou-l sonjé sé sign Batèm li, sé sign ki fè nou sonjé Papa-a ak Pitit la ak léspri Sin-an abité nan nanm nou. N-ap sonjé lapriyè yon fason spésyal pou tout fanmiy, kominoté, légliz, péyi ki divizé, oubyin pou group ki fèmin sou pròp tèt pa yo, k-ap fè blòk kont lòt group oubyin kont lòt moun, pou yo réspiré Rinmin Bondié Papa-a ak Pitit la ak léspri Sin-an, k-ap fè yo fè youn antré yo, min tou k-ap fè yo louvri pou yo aksépté lòt yo.

*

Nan Batèm nou, nou déklaré lafoua nou nan yon sèl Bondié an Toua Pèsòn: Papa-a, Pitit la, ak léspri Sin-an; sé té premié "Credo"-a krétyin yo té konn résité, anvan yo résevoua Batèm, pou réponn toua késion yo konn pozé yo séparéman osijè Bondié Papa-a, Bondié Pitit la, Bondié léspri Sin-an. Jézu té pasé Apot yo lòd pou yo batizé tout nasion o non Papa-a, ak Pitit la ak léspri Sin-an (Mt 28,19). Sé té dènié paròl li, anvan-l monté nan sièl la, kòm Téstaman-l. Yon sèl Bondié an Toua Pèsòn; sa dépasé rézonman intélizans nou, sé lafoua ki pèmèt nou touché mèvèy sakré sa-a: Bondié ki vi-n abité nan nanm nou, gras a Batèm nan, nan yon sèl natu avèk Toua Pèsòn. Nan dènié Soupé Jédi Sin-an, Jézu té di Apot yo: "Si yon moun rinmin-m, l-ap kinbé paròl mouin, Papa-m ap rinmin-l, n-ap vi-n lakay li, n-ap abité nan li... Avoka-a, léspri Sin-an Papa-a ap voyé o non-m nan, sé li minm k-ap aprann nou tout bagay, l-ap fè nou sonjé tou sa-m té di nou" (Jn 14,24-26). Tout diskou sa-a nèt (Jn 14-17) palé sou Papa-a, ak Pitit la ak léspri Sin-an. Nan Jan 14,1-31 mo Papa-a tounin 24 foua: Jn 14,2.6.7.8. 9a.b.c. 10a.b.c. 11a.b. 12.13.16.20.21. 23.24. 26.28a.b.31.a.b. Nan minm chapit 14 sa-a nan lévanjil Sin Jan-an, Jézu di sé pou yo pasé pa lintèmediè li minm (Jn 14,1-7), pou y-al jouinn Papa-a (Jn 14,8-14), nan léspri-a (Jn 14,15-17). Li réprann minm mouvman pansé-a ankò, li kontinué, li di pou yo pasé pa lintèmediè-l (Jn 14,18-21), pou y-al kot Papa-a (Jn 14,22-24), nan léspri-a (Jn 14,23-31). Nan chapit 15 la, sé plis sou li minm li palé kòm véritab pié rézin-an. Min li palé tou sou Papa-a ak léspri Sin-an. Nan chapit 16 lévanjil Sin Jan-an, Jézu palé sou léspri Sin-an k-ap vini kòm Avoka (Jn 16,5-15), apré sa li palé sou li minm ki gin pou-l tounin tou (Jn 16,16-24), apré sa li palé sou Papa-a (Jn 16,25-33).

Konsa chapit 14 la pi santré sou Papa-a, chapit 15 la sou Pitit la, chapit 16 la sou léspri Sin-an. Nan lansyin Téstaman, yo pa-t ko ouè klè konsa nan Révélasion-an. Min té gin yon ti présantiman avèk toua Invité yo ki té vi-n manjé kay Abraam nan (Gn 18,1-15). Bondié té gin yon fason tou, lè l-ap palé, li fè kòm si sé anpil Pèsòn k-ap palé ansam nan désizion y-ap pran (Gn 1,26; 3,22; 11,7; Is 6,8). Pou pèp la pa-t konprann sé anpil dié ki ginyin,

Bondié pa-t ko kapab dévoualé mèvèy Trinité-a, sé pou sa yo té insisté plis sou yon sèl Bondié-a, sou natu Bondié-a ki yon sèl la, sé té "Credo" Pèp Israël la, sé té baz lafoua-l (Dt 6,4). Nou minm nou gin doua ajouté Toua Pèsòn yo, nan Trè Sint Trinité-a, paské Révélasion-an rivé yon pouin, yo dépasé batay kont kouayans nan anpil dié-a. Sé poua "Credo" pa nou-an, sa nou résite nan Batèm nou-an, li détayé Toua Pèsòn yo ki Bondié, an minm tan li insisté sou égalité yo avèk sou minm yon sèl natu Bondié-a ki fè tou lé Toua Pèsòn yo fè yon sèl Bondié-a. Nan Jan 10,30, Jézu fini diskision avèk Juif yo antan li di: "Papa-a avèk mouin, nou yon sèl" (cf Jn 10,38). Juif yo pran ròch pou kalonnin-l, paské "Credo" yo-a pa-t ko rivé nan chapit sa-a. Lè y-ap jijé Jézu dévan tribinal Juif yo, sé kèsion sa-a tou ki fè yo kondané-l (Mc 14,62-63; Mt 26,64-65; Lc 22,69-71).

Bondié té kòmansé montré tou dabò li sé **Papa** (Ex 4,22-23; Dt 14,1-2; 32,5-6; Is 63,16; 64,7; Jer 3,19-22; Sg 14,3; Si 33,1-6; Sg 2,16-18; 1 Sam 7,8-14; Ps 2,7; 89,27-30; Mt 22,41-46). Jézu montré Bondié sé Papa krétyin yo (Mt 5-7). Li montré Bondié sé Papa-l (Mt 7,21). Nan kòmansman lévanjil la, sé kòm Papa krétyin yo Bondié prezanté. Nan finisman lévanjil Matié-a sé plis kòm Papa Jézu-Kri. Sé yon fason pou Jézu-Kri fè nou pran konsians ki rélasion ki gin ant Papa-a avèk li.

Lè Jézu di li gin pou-l nan afè Papa-l (Lc 2,49-50), Manman-l ak papa-l Sin Jozèf pa-t konprann; la Trè Sint Vièj t-ap kalkilé sa nan kè-l. Nan Batèm nan, Papa-a di: "Sila-a sé Pitit mouin-an, sa-m rinmin-an" (Mt 3,17). Satan ap chèché fouyé sa, lè-l mandé Jézu nan dézè-a: "Si ou sé pitit Bondié..." (Lc 4,3). Dènié paròl Jézu ap di Mari-Madlèn sé: "Al di frè-m yo: M-ap monté lakay Papa-m ak Papa nou-an" (Jn 20,17). **Paròl** Bondié dépi nan lansyin Téstaman, sé pròp Pitit li-a ki égzisté ansanm avèk li dépi tout tan, dapré Provèb 8,22-31, Sira 24,1-22, minm si sa pa ko fi-n klè nan prezantasion-an. Révélasion-an ap fè progrè, l-ap trasé chémin pou Jézu-Kri vi-n dévoualé tout bagay aklè, san-l pa palé an parabòl ankò (Jn 16,25). **Léspri** Bondié, sé touazièm Pèsòn la Trè Sint Trinité. Bondié té promèt li t-ap voyé-l sou tout moun (Joël 3,1ss), minm jan li vi-n palé ak nou pa lintèmédiè Pitit li-a, lè-l fi-n palé pa lintèmédiè Profèt yo. Konsa, ofi-amézi l-ap fè nou antré pi fon nan sa-l yé tout bon vré-a.

Bondié yon sèl nan Toua Pèsòn, tankou gin rasi-n, boua, avèk flè, tankou gin sous, riviè, lanbouchi; tankou gin solèy, réyon, limiè. Sé sinp konparézon. Trinité-a, sé yon bagay nou pa kapab konprann. Sint-Ogustin t-ap chèché démontré-l ak prèv rézonman, lè-l ouè yon Anj ki chita bò lanmè-a sou fòm yon ti moun piti, k-ap vidé dlo lanmè-a avèk yon godé nan

yon trou li té foyé nan sab la. Sint-Ogustin sézi; li di-l: "Ou pap rivé". Lanj la di-l: "M-ap rivé anvan-ou..." Antèn pou nou touché mèvèy sakré sa-a, sé lafoua nou, sa nou déklaré nan batèm nan. Lè n-ap fè sign lakoua-a, o non Toua Pèsòn ki Bondié-a, sé pou nou fè-l byin, jan la Trè Sint Vièj té aprann Sint Bènadèt la a Loud la. Sé sign Batèm nou résévoua o non la Trè Sint Trinité. Sé konparézon ki kapab pèmèt nou ouè gin toua Pèsòn ki diféran min ki gin minm natu. Nan rélation yo ginyin avèk nou, nou konsidéyé yo chak sou yon aspè spésial, parégzanp Papa-a sé **Pouvoua**, Pitit la sé **Sajès**, léspri Sin-an sé **Bon Kè**. Min tout kalité sa yo, sé pou tou lé toua minm jan. Travay sakré fè nou sonjé Papa-a, ki fè sièl la ak tè-a. Sèvis sakré fè nou sonjé Pitit la ki pa vini pou yo sèvi-l, min ki vini pou-l sèvi. Kado sakré yo fè nou sonjé léspri Sin-an, ki séparé kado yo jan-l vlé bay moun li vlé (1 Cor 12,4-6). Min sé tou lé Toua Pèsòn yo ki travay minm travay la, ki sèvi minm sèvis la, ki bay minm kado yo; "operatio sequitur natura". Aksion-an jouinn sous li nan natu-a. Sé yon sèl natu ki ginyin. Tou lé toua Pèsòn yo fè minm aksion-an. Yo diféran nan fason youn yé parapò a dé lòt yo, min yo yon sèl natu: yon sèl Intélijans, yon sèl Volonté. Sa dépasé nou, sé lafoua-a ki pou soutni féblès intélijans nou. Lè n-ap di "Viv Papa-a ak Pitit la ak léspri Sin-an", n-a sonjé bèl mèvèy sakré sa-a ki la dépi tout tan é pou tout tan. Yon moun ki gin lavi Bondié nan li, sé yon mèvèy. Minm jan Toua Pèsòn yo sé yon sèl Bondié-a, konsa tou n-ap fè youn antré nou (1 Jn 1,3; Jn 17,21). Sé péché-a ki séparé nou. Moun ki pa gin lavi Bondié-a nan li, sé divizion l-ap simin tou patou.

*

Tan spésial la fini dépi apré dimanch lapankot. Dépi lindi ki suiv lapankot la, sé tan òdinè. Tan òdinè-a alé jous nan trantkatriyèm dimanch la, dènié dimanch ané litiji-a, fèt Kris-Roua-a. Apré sa, sé tan lavan-an ki kòmansé. Jézu di sé **léspri Sin**-an k-ap aprann Apot yo sa yo pa ko kapab résévoua; l-ap kondui yo nan tout lavérité-a (Jn 16,12-13). Sin Pòl di Romin yo Rinmin Bondié-a vidé nan kè nou gras a léspri Sin-an li té ba nou-an (R 5,5). La Trè Sint Trinité sé yon mèvèy sakré nou pa kapab konprann, sé vré: yon sèl Bondié nan Toua Pèsòn: Papa-a, Pitit la, ak léspri Sin-an. Min sé mèvèy sakré sa-a ki sous lavi nou. Sé nan li nou batizé o non Toua Pèsòn yo ki yon sèl Bondié-a (Mt 28,19), ki mété lavi li nan nanm nou. Mision léspri Sin-an, sé fè nou antré nan lavi sa-a yo rélé lavi "**spirituèl**" la, sa vlé di lavi dapré léspri Sin-an. Papa-a kréyé nou, Pitit la délivré nou, léspri Sin-an fè nou vi-n sin. Minm si sé Toua Pèsòn yo ki fè tou lé toua bagay sa yo, gin youn ki pi sanblé ak tèl Pèsòn an patikilié sou pa déyé "ad extra". **Aktivité** pi sanblé ak Papa-a, **sèvis** pi sanblé ak Pitit la, **kado sakré** pi sanblé ak léspri Sin-an,

jan Sin Pòl di Korintyin yo (1 Co 12,4-6). Yo rélé sa "**appropriation**". Sa vlé di yo mété tèl bagay pi plis sou kont tèl Pèsòn. Papa-a té voyé Pitit la sou tè-a. Lè Pitit la ap tounin, li promèt l-ap voyé léspri Sin-an. Pitit la té résévoua mision-l nan min Papa-a. Léspri Sin-an résévoua mision-l nan min Papa-a ak Pitit la. Sa pa vlé di gin youn oubyin dé nan Pèsonaj yo ki pi gran pasé lòt. Yo tou lé Toua égal, jan Préfas lamès la Trè Sint Trinité-a di-a, jan Krédo-a di-a: Yo adoré léspri Sin-an ansanm ak Papa-a, ansanm ak Pitit la, é li jouinn minm louanj avèk yo. Min pou késion **mision**-an, nan légliz la, sé sou ringn léspri Sin-an nou yé. Dépi nan lansyin Téstaman sé li ki t-ap palé, lè Profèt yo t-ap palé, jan nou chanté nan Krédo-a. Toua Pèsòn yo égal nan yon minm natu, min yo diféran kòm Pèsòn, nan **relasion** youn ginyin pa rapò a lòt: Papa-a, kòm Papa, li pa sanblé ni ak Pitit la ni ak léspri Sin-an antan li sé Papa Pitit la. Pitit la li minm bò koté pa-l, kòm Pitit, li pa sanblé ni ak Papa-a ni ak léspri Sin-an, antan li sé Pitit Papa-a. Léspri Sin-an bò koté pa-l, kòm léspri Sin, li pa sanblé ni ak Papa-a ni ak Pitit la, antan li sé léspri Papa-a ak Pitit la (= "processions"). Papa-a sé Papa ("génération"), Pitit la sé Pitit ("filiation"), léspri Sin-an sé léspri Sin ("spiration passive"). Yo Toua Pèsòn nan yon sèl natu. Sé nan lafoua pou nou antré nan mèvèy sakré sa-a. Min sé pa paské sé yon mèvèy sakré pou nou néglijé-l nan lavi krétyin nou. Chak foua nou fè sign lakoua, sé lavi Toua Pèsòn yo ki yon sèl Bondié-a n-ap raplé o non Papa-a ak Pitit la ak léspri Sin-an, o non yo nou té batizé-a (Mt 28,19). Lè nou fi-n chanté Psòm bréviè-a, oubyin résité yon dizèn chaplé, nou di: "Viv Papa-a ak Pitit la ak léspri Sin-an". Sé tout tan nan lavi nou n-ap raplé bèl mèvèy sakré sa-a ki sous tout lòt yo. Lè n-ap gadé alantou, nou ouè anpil bagay ki raplé nou pou nou adoré yon sèl Bondié nan Toua Pèsòn nan: sous la, kouran lariviè-a, épi lanbouchu-a; rasi-n nan, pié boua-a, épi branch yo; solèy la, réyon yo épi limiè-a... Évidamman sé ti détay; min sé apati sa nou ouè ak jé nou pou nou sèvi pou nou monté kot sa ki pi konsékan min nou pa ouè ak jé nou sou tè sa-a (Rom 1,20; Sg 13,1-9; Si 17,8; Ac 17,26-29; 1 Co 1,20).

Lavi Bondié nan nanm nou, sé tout tan pou n-ap sonjé-l, pou n-ap di Bondié mèsi pou bèl mèvèy sa-a li fè pou nou-an. Sé tankou souf li n-ap réspiré, ki fè malgré kò nou mèt okipé ap fè anpil aktivité sou tè-a, nanm nou ap toujou rét plonjé anndan lavi Bondié. Nou pap kité prezans li nan tou sa n-ap fè, san sa pa jinnin aksion nou, okontrè n-ap réalizé aktivité nou pi byin, paské sé pa nou minm k-ap aji ankò sé Bondié k-ap aji nan nou, san nou pa santi sa. Bondié té di Abraam: "Maché nan prezans mouin, ou-ap réalizé tou sam désidé pou ou" (Gn 17,1). Lè nou résité lanjélus, matin, midi, asouè, li bon pou nou di toua foua "Viv Papa-a, ak Pitit la ak léspri Sin-an" alafin

lapriyè sa-a, an lonè Toua Pèsòn divi-n yo. Sé yon abitud ki nan légliz la anpil koté depi lontan. Lè Pap la fi-n résité lanjélus la, li minm tou li ajouté toua fousa "Viv Papa-a, ak Pitit la ak léspri Sin-an". Byinnéréz Élizabèt de la Trinité té viv tout tan antan l-ap sonjé bèl mèvèy sakré sa-a: lavi Papa-a ak Pitit la ak léspri Sin-an nan nanm li. Lè Abraam té résévoua Toua Pèsonaj yo, gro midi, anba pié boua-d-chèn Manbré-a (Gn 18,1-15), li pa-t konnin si sé té Bondié li t-ap résévoua (cf He 13,2). Li kouri invité yo antré, pou yo lavé pié yo, pou yo répozé anba pié boua-a. Li ofri yo pou yo manjé yon ti moso pin, anvan yo kontinué rout yo, pou yo réfè fòs yo. Li fè madanm li, Sara, pétri galèt an vitès pou-l fè pin, li pran pi bon ti bèf nan pak la, li fè kuit li, li pot fromaj ak lèt, li mét tout manjé sa-a dévan pèsonaj yo. Épi li minm li rét kanpé, pou-l sèvi yo joutan yo fi-n manjé. Toua Pèsonaj yo promèt li madanm li ap gin yon pitit nan yon ané, malgré li vié granmoun nan. Abraam pati avèk yo, l-al kondui yo jous nan diréksion Sodòm. Sé lè sa-a Bondié avèti-l l-ap détrui Sodòm ak Gomò, akoz gro péché moun yo ap fè. Li minm li lapriyè Bondié pou Bondié padonnin yo, si-l jouinn moun ki kòrèk nan vil la. Min li pa jouinn (Gn 18,16-33). Si nanm nou an-éta-de-gras, nou sé kay Papa-a ak Pitit la ak léspri Sin-an, sé kòm si sé kouvè nou paré pou Toua Pèsòn divi-n yo vi-n instalé lakay nou, tankou yo té fè kay Abraam nan. Nan sans sa-a, Jézu di si yon moun rinmin-l, Papa-a ap rinmin-l, y-ap abité nan li (Jn 14,23; cf Ap 3,20). Min, si nou gin malè fè gro péché, nou vidé nanm nou ak prézans Bondié an Toua Pèsòn nan, nou pa gin lavi lagras la nan nanm nou, sé tankou malè Sodòm ak Gomò-a. Nan bèl fèt dimanch la Trè Sint Trinité-a, n-ap di Bondié mési yon fason spésial pou bèl favè sa-a li fè nou nan Batèm nou, n-ap mandé-l pou nou réfè promès Batèm nou souvan, pou nou viv dapré égzijans lavi pa-l li mét nan nou, joutan nou ouè-l fas a fas nan sièl la. N-ap mandé Manman Mari pou-l aprann nou viv an prézans Bondié Papa-a ak Pitit la ak léspri Sin-an tout tan, pou nou pa dérépékté prézans sa-a avèk okinn péché, antan nou sonjé dènié konsign Jézu té bay Apot yo, anvan-l monté nan sièl la: "Alé, fè tout nasion yo vi-n tounin patizan, batizé yo **o non Papa-a ak Pitit la ak léspri Sin-an**" (Mt 28,19).

*

Dènié déklarasion Jézu nan lévanjil Sin Matié-a, anvan-l monté nan sièl, sé lòd pou batizé o non Papa-a ak Pitit la ak léspri Sin-an (Mt 28,19). Sé o non Toua Pèsòn sa yo ki yon sèl Bondié-a nou fè sign krétyin nou, sign lakoua ki fè rékonèt nou sé patizan Jézu-Kri. Lè Pè-a ap fè lamès, li fini priyè yo antan-l di: "... Pa pouvoua Granmèt nou, Jézu-Kri, Pitit ou, li minm ki vivan, ki roua, ki Bondié ansanm avèk ou, ansamn avèk léspri Sin-an, dépi tout tan

é pou tout tan". Sin Pòl di nou, nan premié Lèt li ékri moun Korint yo, gin anpil kalité aktivité, min sé yon sèl Bondié Papa-a; gin anpil kalité sèvis, min sé yon sèl Bondié Pitit la; gin anpil kalité kado, min sé yon sèl Bondié léspri Sin-an. Jou Batèm nou, soua nou minm, soua papa nou ak manman nou, parinn nou ak marinn nou, tout légliz la an tou ka nan bouch kominoté nou-an, déklaré lafoua Krétyin-an. Déklarasion lafoua sa-a, sé tankou yon "mot de passe" pou rékonèt Krétyin yo, sé sa yo rélé "symbole". Sé rakousi lafoua Krétyin-an. Nou kouè nan yon sèl Bondié Papa-a ak Pitit la ak léspri Sin-an. Nou kouè nan Jézu-Kri, sèl Pitit Bondié-a ki fèt sot nan vant Mari ki Vièj, li mouri, li lévé vivan pou délivré nou. Yon sèl Bondié nan Toua Pèsòn. Jézu-Kri ki délivré nou. Sé mèvèy sakré Trinité-a. Sé mèvèy Inkanasion-an ak Rédanmsion-an.

Antan Abraam té chita nan papòt joupa-l, gro midi, li ouè Toua Pèsonaj k-ap pasé, li invité yo vi-n manjé, vi-n bouè, vi-n répozé (Gn 18,1-15). Li rékonèt sé Bondié minm ki té parèt dévan-l. Gin imaj lontan ki té konn réprézanté la Trè Sint Trinité, tankou parérganp imaj sa yo rélé "icône de Roublè" la (1425), koté yo ouè Toua Pèsonaj yo ki chita atab kay Abraam nan, jan lajénèz rakonté-l la (Gn 18,1-15). Gin imaj Greco-a, Prado, nan vil Madrid, péyi léspagn, ki réprézanté Bondié Papa-a, ki kinbé Jézu-Kri krisifié, sou jénou-l, épi anlè tèt yo, sé Kolonb la k-ap plané. Légliz aksépté yo; min an jénéral li pito réprézantasion ki fèt an fòm sinbòl, an fòm sign, ki pa fè imajinasion nou travay tròp, paské sé yon "mystère" la Trè Sint Trinité yé, sa vlé di yon bagay ki dépasé konpréansion intélijans nou. Minm jan Abraam té invité Toua Pèsonaj yo lakay li, sé konsa yon moun ki an-éta-de-gras, li ginyin yon sèl Bondié an Toua Pèsòn nan nanm li, dapré sa Jézu di Sin Jud Tadé: si yon moun rinmin-m, l-ap kinbé paròl mouin, Papa-m ap rinmin-l, n-ap vi-n jouinn li, n-ap abité lakay li (Jn 14,23). Nan bèl diskou Jézu fè apré dènié Soupé-a, li dévoualé Apot yo mèvèy sakré la Trè Sint Trinité-a, antan-l palé yo osijè Papa-a, osijè li minm, osijè léspri Sin-an. Dé foua nan chapit 14 lévanjil dapré Sin Jan-an, Jézu di: afè nou ap réglé pa lintèmédiè li minm (Jn 14,1-7.18-21), kot Papa-a (Jn 14,8-14.22-24), nan léspri Sin-an (Jn 14,15-17.25-31). Révélasion la Trè Sint Trinité-a, sé Jézu-Kri li minm minm ki ba nou-l; li di nou: Tou sa-k pou Papa-a, li pou li, léspri Sin-an réprann sa-k sot nan li pou-l éspliké yo (Jn 16,12-15).

Sèlman lansyin Téstaman té préparé Mésaj sa-a, antan-l té kòmansé dévoualé nou Bondié Papa-a kòm Papa Pèp Israèl la (Ex 4,22-23; Dt 14,1-2; 32,5-6; Is 63,16; 64,7; Jer 3,19-22; Sg 14,3; Si 23,1-6), kòm Papa moun ki kòrèk yo (Sg 2,16-18; Ps 73,25-28; 2 Mac 7,27-29), kòm Papa éritié roua David la (2 Sm 7,8-14; Ps 2,7; 89,27-30). Sé Jézu minm ki prézané nan

Nouvo Téstaman-an kòm vré Pèp Israèl la, kòm vré sila-a ki kòrèk la, kòm vré éritié roua David la. Li sé vré Pitit Bondié Papa-a (Mt 11,25-27; 21,33-41; Lc 2,49-50; Mt 3,17; Mc 1,11; Lc 3,22; Jn 1,34,49; 5,18,26; 8,12-59; 10,30,38; 11,4,27; Mt 24,63-66; Lc 22,70; Jn 19,7). Jézu promèt l-ap voyé léspri Sin-an (Ac 1,8). Li voyé-l vré jou lapankot la (Ac 2,1-11). Dépi dimanch Pak la, li té soufflé sou Apot yo, li té di yo: résévoua léspri Sin-an (Jn 20,22), minm Souf sa-a Bondié té soufflé nan nin Adan-an pou-l té ba-l lavi-a (Gn 2,7; Sg 15,11). Sé souf réspirasion lavi (Gn 3,21; 12,7; Ps 104,29; Job 34,14; 33,4; 1 Cor 15,45). Souf sa-a gin fòs van-an ki t-ap soufflé sou dlo yo, nan kòmansman Kréasion-an (Gn 1,2), minm van sa-a ki té soufflé sou kay la koté Apot yo té rasanblé ansanm avèk la Trè Sint Vièj Mari jou lapankot la (Ac 2,2). Léspri Sin sé souf lavi, sé souf ki bay fòs. Sé poussa Jézu té di Apot yo yo t-apral résévoua yon fòs k-ap vi-n soti anro-a pou yo sèvi-l témouin sou tout tè-a (Ac 1,8), fòs léspri Sin-an. Sé minm Fòs ki té désann sou la Trè Sint Vièj Mari, pou-l té kapab vi-n Manman Pitit Bondié-a (Lc 1,35), Fòs Puisans léspri Sin-an. Sé léspri Sin-an k-ap ba nou lavi Bondié, k-ap fè nou dévlopé ladan-l, k-ap fè nou vi-n sin, jan non-l di-a: léspri **Sin**-an. Sé souf lavi-a, Fòs Bondié-a, Sila-a k-ap fè nou vi-n sin-an, dapré sa kantik la di-a: "**Souffle** de Vie, **Force** de Dieu, Viens, Esprit de **Sainteté**". Li ba nou Sajès pou nou sèvi ak intéljans nou nan konpréansion plan Bondié, nan fason pou nou dirijé, li ba nou pouvoua pou nou palé kòm Profèt (Nb 11,24-30; Joël 3,1-5; Ac 2,1-11). Légliz invité nou nan Batèm nou, pou nou déklaré lafoua nou nan mèvèy sakré yon sèl Bondié an Toua Pèsòn nan. Sé lavi lagras nan nanm nou.

Gin plizière réyinion tout Évèk yo ki té présizé fòmul lafoua-a, sitou nan ané 325 avèk Konsil "Nicée", épi 381 avèk Konsil "Constantinople". Sint-Ogustin (354-430), sé yon gro champion nan démach lafoua k-ap chèchè limiè intéljans, pou présizé mèvèy sakré Trinité-a, yon sèl Bondié nan Toua Pèsòn. Sou tè sa-a, sé tankou nan fènoua n-ap gadé ti pouin limiè k-ap fofilé, joutan vré Solèy la lévé pou nou nan sièl la, lè n-ap ouè Bondié fas a fas (2 Cor 3,18; Ps 84,8) kòm Papa-a, ak Pitit la ak léspri Sin-an. Nan batèm Jézu, Papa-a té fè tandé voua-l, lè-l déklaré-l li sé Pitit li, léspri-a té pozé sou li sou fòm yon Kolonb (Mc 1,9-11). Lè lakanj Gabriyèl té vi-n mandé la Trè Sint Vièj Mari konsantman-l pou-l aksépté vi-n Manman Pitit Bondié-a, li té di-l: Léspri Sin-an t-ap vi-n sou li (= touazièm Pèsòn divi-n nan), Fòs Sila-a ki anro nèt la t-ap kouvri-l anba lonbraj li (= prémié Pèsòn divi-n nan), Sila-a ki t-ap pran nésans nan li-a, yo t-ap rélé-l Pitit Bondié (= dézièm Pèsòn divi-n) (Lc 1,35). La Trè Sint Vièj Mari réponn avèk lafoua (Lc 1,38). N-ap mandé-l minm lafoua sa-a k-ap fè nou viv lavi Batèm nou-

an pi byin, lavi Papa-a, Pitit la ak léspri Sin-an, k-ap dévlopé nan nanm nou, joustan nou fi-n fè yon sèl nèt avèk yon sèl Bondié-a an Toua Pèsòn nan. N-ap mandé-l pou nou gin plis respè pou yon sèl Bondié sa-a an Toua Pèsòn nan ki abité nan nanm nou, nan fason n-ap fè sign Krétyin nou, sign lakoua-a. Prémie foua la Trè Sint Vièj Mari té parèt dévan Sint Bènadèt a Loud, Sint Bènadèt t-ap éséyé fè yon sign lakoua, li pa-t réyisi, min-l té lou. Sé lè la Trè Sint Vièj Mari fi-n fè bèl sign lakoua pa-l la, sé lè sa-a Sint Bènadèt jouinn posibilite fè yon bèl sign lakoua, antan-l pran modèl sou la Trè Sint Vièj, atèl pouin chak foua l-ap fè sign lakoua, sé té yon témouagnaj sa té yé, nan fason li té mét respè pou-l fè-l avèk tout kè-l. Gin moun lè y-ap fè sign lakoua, sé tankou sé mouch y-ap chasé, yo fè-l avèk yon rapidité, ki montré yo présé pou yo mété yo an règ avèk yon obligasion yo pa réfléchi sou li. Sé yon sign. Sa vlé di li gin yon sans. Sé moun ki maké ak sign sa-a ki sové (cf Ap 7,3; Ez 9,4; Ex 12,7.13). Sé létanp Krétyin. Batèm nan tanpé nou sou mak Jézu-Kri ki mouri sou Koua-a pou-l ba nou pròp lavi Papa-a ak Pitit la ak léspri Sin-an. Sé o non yo nou té batizé. Sé pou nou sonjé sa chak foua nou fè sign lakoua-a.

Tan Pak la fini avèk dimanch lapankot la. Tan òdinè-a rékòmansé osito apré. Lontan, pandan tan sa-a, chak dimanch sé Préfas la Trè Sint Trinité-a yo té konn di, tankou chak dimanch nou résité oubyin nou chanté Krédo-a, apré ésplikasion lévanjil la. Krédo sa-a, sé pou nou konnin-l pa kè, minm si-l long. Sé rakousi tout Mésaj lévanjil la, sé baz lafoua nou. Li obligatoua pou nou di-l chak dimanch nan lamès. Sé konsa n-ap fi-n aprann li nèt. Sé sou lafoua-a yo té batizé nou. Sé lafoua sa-a n-ap déklaré, pou nou raplé batèm nou o non Papa-a ak Pitit la ak léspri Sin-an. Nan finisman Psòm yo ak Kantik yo, nou konn abitué di: "Viv Papa-a ak Pitit la ak léspri Sin-an". Sé yon rakousi bèl louanj nou fè pou la Trè Sint Trinité nan "Gloria" nou konn chanté nan lamès la. Sin Pòl di nou: lafoua-a vizé pi plis Pitit la, lésperans la vizé pi plis Papa-a, lacharité-a vizé pi plis léspri Sin-an (cf Rom 5,1-5). Min sé minm Bondié-a ki ba nou lagras pa lintèmediè Pitit la, k-ap kondui nou nan bèlté-a kot Papa-a, gras a kado nan léspri-a. Sé pou bèl mèvèy sa-a n-ap chanté louanj li tout tan, antan n-ap di: "Viv Papa-a ak Pitit la ak léspri Sin-an, épi antan n-ap fè sign lakoua nou avèk atansyon: "**O NON PAPA-A AK PITIT LA AK LÉSPRI SIN-AN**". Amèn.

*

* *

KÒ AK SAN JÉZU-KRI KI SIN ANPIL LA

Ala yon bèl mèvèy, nou pa kapab konprann li, min nou kouè-l. Granmèt, dévlopé lafoua nou!

Ala yon bèl mèvèy! Jédi-Sin nan asouè nou fété sakréman Kò ak san Jézu-Kri. Nou raplé gran mèvèy Jézu-Kri té kite pou nou jou sa-a. Sé té jou sa-a li té fè Prèt yo, sé té minm jou sa-a li té mété sakréman Kò ak San-l nan, sé té minm jou sa-a li té rinmèt nou kòmandman nouvo-a pou nou youn rinmin lòt, minm jan li minm li té rinmin nou-an. Nou ouè rélasyon ki ginyin ant Prèt yo, sakréman Kò ak San Jézu-Kri-a épi lacharité-a. Prèt yo fè sakréman-an, sakréman-an sé sign lacharité-a. Nan Fèt-Dié-a, sé sou Sakréman Kò ak San Jézu-Kri-a minm nou konsantré atansyon nou. Épi sé pa tèlman pou nou détayé sa-l yé ni kijan li fèt, ni ki favè l-ap donnin nan nou. Sa nou ouè ladan-l pi plis nan Fèt-Dié-a, sé sitou prezans Jézu-Kri li minm nan mitan nou. Ala yon bèl mèvèy! Yon lansègnman, anvan yo présizé-l nan légliz, yo kòmansé viv li tou dabò, sé konsa pou prezans Jézu-Kri nan sakréman Kò ak San-l nan. Sakréman lafoua. Li gran, mèvèy sakré lafoua sa-a. Sé sa Pè-a di lè-l fi-n fè lakonsékrasyon pin-an ak divin-an ki vi-n tounin Kò ak San Jézu-Kri-a. Ala yon bèl mèvèy! Li gran, mèvèy sakré lafoua sa-a. Pa gin pin ankò, pa gin divin ankò. Sa-k la sou lotèl, sé Kò ak San ak nanm ak natu Bondié Jézu-Kri ginyin-an. Sa-k té fè pin-an pin, li pa la ankò; sa-k té fè divin-an divin, li pa la ankò. Sé aparans yo sèlman ki rété, sé koulè-a, sé lodè-a, sé fòm nan, sé épèsè-a, sé gou-a. Min nan pouin pin ankò, nan pouin divin ankò. Ala yon bèl mèvèy! Li gran, mèvèy sakré lafoua-a. Si nou té kapab réalizé sa mèvèy sakré-a yé, nou t-ap chanjé konpòtman nou parapò a sakréman Kò ak San Jézu-Kri-a. Apré konsékrasyon, Pè-a di: Ala yon bèl mèvèy, nou pa kapab konprann li, min nou kouè-l.

Nou pa kapab konprann li. Sé sa-k fè gin anpil moun, yo pa pran ka mèvèy sakré sa-a asé. Nou pa kapab konprann li. Sé pa sa-k fè-l pa réalizé. Nou pa kapab konprann li; sé pa yon rézon pou nou gin konpòtman moun indiféran aléga-l. Nou pa kapab konprann li; sé pa yon rézon pou nou proche koté Jézu-Kri avèk kè nou sal. Nou pa kapab konprann li; sé pa yon rézon pou nou fè tankou Juda, pou nou bay Jézu yon bo ak bouch, min kè nou louin-l, jan Jézu li minm li di nou-an; Pèp sa-a ap adoré-m ak bouch sèlman min kè-l louin-m

Min nou kouè. Konpòtman yon Krétyin doué yon konpòtman lafoua. Min nou kouè. Sé pi gran sakréman, sakréman Kò ak San Jézu-Kri.

Ki pi gran favè Jézu-Kri t-a kapab fè nou? Min nou kouè. Nou kouè réyèlman vré Jézu prézan ak kò-l, ak San-l, ak nanm li, ak sa-l yé kòm Bondié. Nou kouè li réyèlman prézan, toutotan konpozision pin-an ak divin-an pa fi-n dékonpozé. Nou kouè ak tout lafoua nou. Si nou pa-t kouè, nou pa t-ap déplouayé tout aktivité sa-a pou-n ap travay tout nan nuit pou nou paré répozoua pou Jézu-Kri. Nou kouè ak tout lafoua nou. Si nou pa-t kouè, nou pa t-a blayi tè-a avèk désin, avèk flè. Nou kouè ak tout lafoua nou. Si nou pa-t kouè, nou pa t-a dékoré kay nou sou tout rout koté Jézu ap pasé.

Granmèt, dévlopé lafoua nou! A Loud, lè Sakréman Kò ak San Jézu-Kri ap pasé, malad yo mét tout lafoua yo déyò, y-ap rélé Granmèt la osékou. Ginyin ki jouinn gérizon la minm pou kò yo; gin plis ankò pasé yo t-a kapab palé ki jouinn gérizon pou nanm yo, ak soulajman pou poté soufrans yo kòm krétyin, nouvo Simon Sirèn. Nou kouè Granmèt, min dévlopé lafoua nou. Si nou té gin lafoua gro tankou yon ti grinn zèb, ala mèvèy ki t-ap fèt. Nou kouè, Granmèt, min dévlopé lafoua nou. Parapò a sakréman Kò ak San Jézu-Kri, gin dé foua sé yon pant lafoua ap désann. Jou premié kominion-an, nanm nan zanmi ak Jézu-Kri tankou dé chandèl ki kolé, k-ap fonn ansanm nan minm flanm nan. Min nan sètin ka, lè ti moun yo kòmansé grandi, y-ap proche pou yo kominié, chiklèt nan bouch yo, yo antré nan légliz la san yo pa chèché prézans Jézu pou yo adoré-l, pou yo salué Mèt Kay la. Yo lagé kò yo sou yon ban, y-ap palé... Nou kouè, Granmèt, min dévlopé lafoua nou. Fèt-Dié-a sé yon manifestasion lafoua nan prézans Jézu-Kri nan sakréman Kò ak San-l nan. Yon prézans ki diré, ki pa la sèlman pandan lamès la, yon prézans k-ap tann nou vi-n palé avèk li, nou vi-n éspozé-l problèm nou, nou vi-n di-l nou rinmin-l, nou vi-n di-l mès, nou vi-n adoré-l. Nou kouè, Granmèt, min dévlopé lafoua nou. Sin Monfò antré nan yon légliz, li ajénou atè-a, li rété katrè-d-tan l-ap adoré Jézu-Kri ki prézan nan sakréman lotèl la. Lè nou rivé nan yon vil, premié koté li t-a bon pou nou alé, sé nan légliz la, pou nou salué prézans Jézu-Kri. Apré sa n-a val réglé tout afè nou. Épi lè sa-a nou pap pou kont nou, Granmèt la ap avèk nou. Nou kouè, Granmèt, min dévlopé lafoua nou. N-ap pasé byin présé dévan légliz la, nou kapab fè yon ti antré, nou pasé kèk ti tan, apré sa n-a kontinué chémin nou, nou pap pou kont nou nan problèm nou, min Jézu-Kri ap akonpagné nou, l-ap fè nou réyisi pi byin pasé tout aktivité avèk intéljans nou t-a kapab déplouayé. Sé pou nou rann li vizit, li minm tou l-ap rann nou vizit. Nou pap pèdi tan nou. Tan-an sé pou li li yé. Yon jou pou li sé tankou mil ané; mil ané sé tankou yon jou (2 p. 3, 8; Ps 90,4). Nou pap pèdi tan nou dévan-l; si nou pè pèdi tan nou dévan-l, n-ap pèdi-l nèt atò,

daprè sa Psòm nan di-a: aprann mouin gadé-ou, pou-m pa pèdi tan mouin. Nou kouè, Granmèt, min dévlopé lafoua nou. Sé sa n-ap mandé Jézu-Kri nan Fèt-Dié-a. Lafoua sé yon kado Bondié fè nou. Nou gin doua mandé-l dévlopé kado sa-a. Fèt-Dié-a sé jou spésial pou fè demann sa-a, pou nou ak pou tout légliz Bondié-a. Nou kouè Granmèt, min tanpri, dévlopé lafoua nou, nan prezans ou k-ap tann nou vi-n adoré-l nan sakréman Kò-ou ak San-ou. Fè nou gin plis respè pou ou nan fason n-ap proche koté-ou. Ouété indiférans la ki chita nan fon kè nou, ki fè nou tèlman égoïs nou pa vlé pèdi tan dévan-ou, nou tèlman présé pou ti tan nou-an, époutan sé ou minm ki préte nou-l. Ouété lògèy ki nan tèt nou ki fè nou réfizé mété jénou atè pou fè yon ti jéniflèksion pou adoré-ou. Aprann nou fè silans dévan-ou pou nou kitè-ou palé anndan nou, ou déjà konnin sa nou anvi mandé-ou la. Fè nou ginyin rékonésans pou nou aprann di-ou mèsì pou tout favè ou fè nou, spésialman pou prezans ou nan pami nou.

Ala yon bèl mèvèy, nou pa kapab konprann li, min nou kouè-l. Granmèt, dévlopé lafoua nou.

*

Nou nan noua, Jézu sèvi nou limiè; nou grangou, li sèvi nou manjé; nou bouké, li sèvi nou répo: **RÉPOZOUA**. sé Kò-l ak San-l, sé prezans li k-ap akonpagné nou nan pèlerinaj nou, antan nou nan dézè-a, antan nou kitè péyi Éjip la, tè péché-a, antan nou déjà travèsé lanmè Rouj la, gras a Batèm nou, antan n-ap maché nan dirèksion Péyi Bondié promèt nou-an, Paradi-a. Nou nan noua, Jézu sèvi nou Limiè; nou grangou, li sèvi nou Manjé; nou souaf, li sèvi nou Dlo; nou bouké, li sèvi nou Répo. Sé Kò-l, sé San-l, sé prezans li k-ap akonpagné nou. Sou tè sa-a, sé pèlerin nou yé. Nou pa gin yon kay fiks. Sé tankou joupa n-ap déplasé adouat-agoch, nan dézè-a. Nou pa kapab instalé. Lè David té vlé bati yon Tanp pou Bondié, Bondié té di-l pa lintèmédiè Profèt Natan sé nan joupa li té abitué déplasé, pandan karantan nan dézè-a. Minm si yo t-a bati yon kay pou li, sa pap fiksé-l yon sèl koté pou sa (2 Sm 7, 5-7). Nan légliz nou yo, koté yo konsèvé Trè Sin Sakréman-an pou yo kominié malad, pou yo adoré-l, yo rélé-l "Tabènak", sa vlé di "joupa", yon tonèl yo kapab déplasé ofi-amézi y-ap kontinué rout la. Sé pousa Sin Jan di lè Jézu vi-n sou tè-a: "Li drésé joupa-l nan mitan nou" (Jn 1, 14). Sé yon "tabènak" li pozé, tankou yon koté li rété an pasan. Li invité nou konsa nou minm tou pou sou tè sa-a koté nou rété yo, sé tankou yon pasaj yo sèvi nou, pou nou pa instalé anba isit la, pou nou gadé nan dirèksion sièl la.

Kò ak San-l sèvi nou yon manjé pou soutni fòs nou sou rout la, sa yo rélé viatik la. Sé konsa Profèt Éli té sou rout Sinayi; li maché pandan yon jounin nan dézè-a, li bouké, li kouché, li dékourajé, li mandé lanmò, li dòmi (1 R 19, 4). Yon Anj révéyé-l; li di-l: "Lévé, manjé" (1 R 19, 5). Li lévé, li gadé bò tèt li, li ouè yon pin ki kuit anba sann ak yon krich dlo; li manjé, li bouè, li kouché ankò, li dòmi, tèlman li té bouké (1 R 19, 6). Yon dézièm foua, lanj la révéyé-l, li fè-l manjé, li fè-l bouè, li di-l: "Lévé manjé, otréman chémin-an ap trò long pou ou" (1 R 19, 7). Manjé-a bay Éli fòs, li maché san rété pandan karant jou ak karant nuit, jous li rivé sou mòn Sinayi (1 R 19, 8). Lè-l rivé la, li adoré an silans, malgré siklòn k-ap fann ròch, malgré tranbléman-tè k-ap souké tout bagay, malgré difé k-ap flanbé, k-ap gayé, li vlopé fas li pou-l adoré Bondié, pandan yon ti van tou léjé ap karésé figi-l, épi Bondié ap palé avèk li (1 R 19, 11-18). Jézu prézan nan Tabènak la, ki raplé nou kay nou sou tè-a, sé joupa yo doué yé, pou nou toujou an déplasman nan diréksion Paradi li promèt la. Li ba nou Kò-l ak San-l ki sèvi nou fòs pou rout la, koté li invité nou maché-a. Li mandé nou pou adoré-l an silans, antan-l prézan nan kè nou. Vré kay li sé kè nou. Anndan kè nou sé pa yon tabènak sèlman, sé Paradi-l. Sé pa yon joupa koté-l fè ladésant an pasan, sé la minm li desidé abité, jan-l di Apot yo: si yon moun rinmin-l, Papa-l ap rinmin-l, y-ap vi-n abité nan kè-l (Jn 14, 23). Sé li minm ki bati kay li nan kè nou pou-l abité. Li pa fòsè volonté nou, li pa défonsé pòt la pou-l antré; li rété déyò byin trankil ap frapé, joutan nou louvri jan liv Apokalips la di-a (Ap 3, 20), apré liv Kantik dè kantik la (Ct 5, 2). Li di li rété déyò, l-ap frapé, si yon moun tandé voua-l, li louvri pou li, l-ap antré, l-ap soupé tèt a tèt avèk moun sa-a (Ap 3, 20). Sé poua li invité nou véyé nan kè nou, minm si dòmi nan jé nou, tankou vièj yo k-ap tann Fiansé-a, ki fèk marié-a (Mt 25, 1-13). Avèk Épouz Kantik dè kantik la, n-ap dòmi, min kè nou ap véyé, pou nou tandé-l ap frapé nan pòt kè nou, lakay li (Ct 5, 2). Nan mézi nou gin dévotion a lékaristi, Kò ak San Jézu-Kri, sé pou nou antré nan fon kè nou, vré kay nou, sé la li yé; tout koté nou rété, sé pasé n-ap pasé; vré fòs nou pou nou kontinué rout nou, pou nou évité instalé okinn koté, pou nou évité fikse nan okinn rélasyon, nan okinn kè, nan okinn situasion, sé Kò ak San Jézu-Kri nou résévoua nan lékaristi.

Prosésion Fèt-Dié raplé nou mach Pèp Israèl nan dézè-a, li kité Éjip, li travèsé lanmè Rouj, l-ap maché nan diréksion Tè-a Bondié promèt li-a. Kolòn difé-a ak niaj la ap gidé-l, lama-n nan ap soutni fòs li; dlo ki koulé sot nan ròch la ap pasé souaf li, Tabènak li drésé an fòm joupa pou pèmèt li répozé lè-l bouké. An fas Tabènak la, sé sa n-ap sonjé, tout ti tabènak sa yo, tout joupa sa yo, tout Tant sa yo Pèp Israèl té konn drésé nan dézè-a; apré sa

li défèt yo, pou-l kontinué pi louin, pou nou pa instalé sou tè sa-a, pou nou toujou ap déplásé (cf Ex 40, 43-36; He 13,14), sa vlé di pou nou chèché fè progrè tout tan nan lavi spirituèl nou, pou nou pa rét drivé nan péché, pou nou pa di nou fè kont nou: nou batizé, nou kominié, nou konfimé, nou marié, étsétéra. Sé pou nou toujou fè pi plis. Lè Sin Vinsan-d-Pòl t-ap mouri, li té régrèt gin anpil bagay li pa-t gin tan fè; époutan li té fè anpil aksion lacharité. Rèn nan mandé-l: "Apré tou sa-ou fi-n fè-a, ki sa-ou t-a vlé fè ankò?" Li réponn: "Pi plis". Nou minm tou nou pa doué janm instalé, ni yon fason matérièl, ni yon fason spirituèl. Sé pou nou toujou chèché fè "pi plis", chèché rinmin Bondié "pi plis", chèché rinmin prochin nou "pi plis", chèché fè sa nou kapab pou yo "pi plis"; paské sou tè sa-a sé pasé n-ap pasé, sé nan pélerinaj nou yé, sé nan Tabènak, nan joupa, nan Tant nou fè ti poz, pou nou kontinué rout nou. Chak ané, Juif yo té gin yon fèt spésial yo rélé "fèt Tabènak", fèt joupa, fèt Tant, Lv 23,34-36.39-43. Pandan yon sémèn, yo dòmi nan joupa yo drésé anlè téras yo, nan lakou yo, koté yo kapab; yo pa abité nan lakay yo pandan sémèn sa-a; sé pou yo té kapab sonjé épòk yo t-ap viv nan dézè-a, pou yo pran konsians pi plis sé sou rout yo yé, yo pa ko rivé koté y-apralé-a, Ps 84,6. Sé dènié jou fèt Tabènak yo, sètièm jou-a, pi gran jou-a, Jézu té di: Moun ki souaf, sé pou-l vi-n jouinn li, pou-l bouè, yon sous dlo lavi ap koulé sot nan kè-l, dapré paròl lansyin Téstaman-an (Jn 7, 37-39; 7,2; Lv 23,33-44; Dt 16,13-15; Ez 45,25). Fèt Tant yo anonsé dènié trionf Granmèt la kòm Roua, Za 14,8-9.16, tout nasion ap vi-n adoré-l.

Fèt-Dié-a, nou kapab di sé fèt Tabènak nou, li raplé nou nou minm tou, désandan Pèp Israèl la, désandan Jakòb (Lc 9, 58; Gn 28, 11; Jn 2, 51), nou sou rout, Kò ak San Jézu-Kri ap sèvi nou "viatik", tankou lama-n nan dézè-a, pou soutni fòs nou. N-ap mandé Manman Mari pou-l ba nou kouraj pou nou kontinué rout nou kòmansé dépi jou batèm nou-an, pou nou rafréchi dispozision ki té nan kè nou jou nou té fè premié kominion nou, pou nou pran abitud fè sa yo rélé kominion spirituèl, lè nou pa kapab kominié ak Kò ak San Granmèt la; pou nou adoré-l an silans dévan Tabènak li ak nan kè nou, malgré siklòn, tranbléman-tè ak difé (cf 1 R 19, 11-13).

Nan finisman "Mane nobiscum Domine", pou ané Ékaristi-a nan 2005 la, Pap Jan-Pòl II, ki mouri samdi asouè nan oktav Pak la, 2 avril 2005, té mandé pou insisté sou "intériorité" kòm mak fabrik nan tout "initiatives" k-ap chèché mété Ékaristi-a an valè. Li di nan no. 29 la: "Je ne demande pas toutefois que l'on fasse des choses extraordinaires, mais que toutes les initiatives soient empreintes d'une profonde intériorité. Si le fruit de cette année consistait seulement à raviver la célébration de la Messe dominicale dans toutes les communautés chrétiennes et à faire croître l'adoration

eucharistique en dehors de la Messe, cette Année de grâce aurait atteint un résultat significatif. Cependant il est bon de viser vers le haut et de ne pas nous contenter de mesures médiocres, parce que nous savons pouvoir toujours compter sur l'aide de Dieu". Pap Jan-Pòl II té ékri lèt sa-a nan 7 oktòb 2004, fèt Notre-Dam du Trè Sin Rozè, nan finisman 26èm ané gouvènman-l nan.

Sé anndan Ané Ékaristi-a minm li travèsé, Jn 13,1 μεταβῆ 20,17 ἀναβέβηκα, Ἀναβαίνω li fè Pasaj tout bon-an, Pak la, kòm véritab pèlerin-an (He 11,13; Jn 23,4; Ps 39,13; 119,19; Jc 1,1; 1 p. 1,1; 2,11; 1,17; Col 3,1-4; Ph 3,20; Ps 84,6-8; 120-134; Is 30,29), ki pa gin koté anba isit la pou pozé tèt li (Lc 9,58), ki pa gin yon vil ki rélé-l chè-mèt, chè-mètès (He 13,14).

Li nomad. Ékaristi-a sé viatik li, nouritu pou rout la nan dézè-a (1 R 19,6-8).

Nan "Ecclesia de Eucharistia", 17 avril 2003, li rélé la Trè Sint Vièj Mari: "le premier 'tabernacle' de l'histoire", no. 55, antan-l fè sonjé vizit li kay Élizabèt: "Heureuse celle qui a cru" (Lc 1,45): dans le mystère de l'Incarnation, Marie a aussi anticipé la foi eucharistique de l'Église. Lorsque, au moment de la Visitation elle porte en son sein le Verbe fait chair, elle devient, en quelque sorte, un 'tabernacle' - le premier 'tabernacle' de l'histoire - dans lequel le Fils de Dieu, encore invisible aux yeux des hommes, se présente à l'adoration d'Élisabeth, 'irradiant' quasi sa lumière à travers les yeux et la voix de Marie". Prosésion Fèt-Dié-a doué pran modèl sou pèlerinaj sa-a Mari fè al kay Élizabèt la. Li sé yon "tabernacle ambulat".

Répozoua nou yo fè sonjé 9 répo yo Jézu pran:

1. nan Papa-a
2. nan li minm
3. nan Éspri Sin-an
4. nan la Trè Sint Vièj Mari
5. nan krèch la
6. sou koua-a
7. nan tonbo-a
8. nan Tabènak nou yo
9. nan kè Sin yo.

Ékaristi-a se aksion-d-gras, sé Magnifikat koté n-ap chanté mizèrikòd Granmèt la (Lc 1,50. 54): "Misericordias Domini in aeternum cantabo", Ps 89,2, jan Sint Térèz lanfan Jézu kòmansé epi fini prémié maniskri-l la li ékri pou Mè Agnès la épi jan-l kòmansé dènié maniskri-a li ékri pou

Mè Mari-de-Gonzag la, antan l-ap kontinué premié-a. Pap Jan-Pòl II travèsé sot nan lavi sa-a al nan lòt la nan samdi soua 2 avril 2005, ki antré nan dimanch mizèrikòd la, dimanch "Quasimodo", dézièm dimanch Pak. Sé Magnificat, Ékaristi, Kantik aksion-d-gras pou mizèrikòd Granmèt la, ki louvri pòt kè-l byin laj pou-l vidé gras Jubilé 3èm milènè-a: "N'ayez pas peur, ouvrez les portes au Redempteur... Entrez dans l'espérance... Duc in altum, Va au large.... Mane nobiscum Domine, Reste avec nous Seigneur..." dans la Sainte Eucharistie, par ta présence réelle. Mouin avèk nou tou lé jou jous nan dènié laj la (Lc 24,29; Mt 28,20). "Dives in MISERICORDIA": Li rich nan mizèrikòd (Ep 2,4).

*

* *

SAKRÉ-KÈ

Kè Jézu-Kri ap bat tout tan, pou-l sovè lézòm (cf Ps 34,11.19). Kè-l sé sous Rinmin ki pa kapab tari. Lè-l sispann bat, jou Vandrédi Sin-an, lè dènié gout san ak dlo koulé-a, li bay pi gran prèv kijan-l rinmin, jous nan lanmò-a (Jn 19,34; 15,13). Tout péché nou, sé nan San Jézu-Kri yo lavé. Li invité nou proché avèk asirans pou nou vi-n tiré dlo nan sous délivrans la ki louvri pou nou-an (cf Is 12,13; He 4,16). Sous sa-a pa gin fon, rotè-l pa gin limit, lajè-l pa gin mézi (cf Eph 3,18s). Nou tout ki bouké, ki souaf, sé nan Kè Jézu pou nou chèché jouinn soulajman (cf Mt 11,29). Dépi nan Paradi yon ti sous t-ap koulé nan mitan jadin-an pou rouzé tè-a (Gn 2,6). Sou Koua-a, sous lagras la koulé nan kè Jézu, vré Paradi-a, pou-l rafréchi kè nou (Jn 19,34). Li kontinué ap koulé nan sakréman yo. Nan premié konfésion Sint Tèrèz lanfan Jézu, Pè-a di-l: Yon ti gout dlo ki sot nan jé Jézu, ki tonbé sou kè-l, li lavé tout fot li. Sé pousa Sint Tèrèz di l-ap rété nan pié Koua Jézu-a pou-l ranmasé tout ti gout san Jézu k-ap pèdi atè-a, pou-l vidé yo tankou yon larouzé sou tout moun. Jézu té di Sint Magérit Mari Alakòk: "Gadé Kè sa-a ki tèlman rinmin moun yo!". Avèk Sin Piè n-ap kite Jézu fikse jé-l nan jé nou pou-l touché fon kè nou, pou sous dlo-a lavé fot nou (cf Lc 22,61s). Minm si nou pa kriyé san, tankou Sin Piè, omouin n-ap akòdé santiman nou avèk santiman Jézu, pou kè nou bat nan minm kadans avèk kè pa-l, pou kalité rinmin ki nan kè-l la travèsé nan kè pa nou. Avèk kadans sa-a anyin pap séparé nou ak rinmin ki nan kè Jézu-Kri-a, ni tray, ni kè séré, ni grangou, ni manké rad, ni danjé, ni pèsékision, ni lanmò, ni okinn lòt kréatu; nan tou sa, sé nou minm k-ap ranpôté laviktoua gras a Sila-a ki rinmin nou-an (Rom 8,35-39).

*

Nétouayé branch yon pié boua, sé youn; koupé pié boua-a, sé dé. Gin yon fason nou anvizajé sakrifis pou satisfè JISTIS Bondié, ki fè nou dévié nan vré chémin-an, chémin **RINMIN**-an. Bondié sé Rinmin (1 Jn 4,8). Sé konsa Sin Jan di nou pou rasiré nou nan démach nou. Lèt Ébré yo di nou pou nou avansé avèk asirans jous dévan tro-n mizérikòd Bondié-a, pou nou résévoua favè-l (He 4,16). Si nou nétouayé branch pié boua-a, sé pou-l kapab bay pi bon frui, kalité sipériè. Dévotion nou doué ginyin vizavi Sakré-Kè Jézu, sé pa égzijans réparasion Jistis ki souaf san, sé égzijans Rinmin Bondié-a, k-ap pasé nan kè Pitit li-a ki blésé-a, koté sous dlo-a ap koulé tankou yon lariviè-a, antan l-ap ba nou léspri Sin-an (Jn 7,37-39), Rinmin-an. Nou minm n-ap nétouayé fon kè nou pou nou résévoua-l. Léspri Sin-an pròpté kè nou pou nou résévoua prézans Bondié pi byin nan

lafoua, léspérans ak lacharité. Nou pap fè ègzèsis jimnastik pou nou dévlopé fòs nou, nan fè éfò pou nou koulé aktivité nou anndan aktivité Bondié. Nou pap mété tout atansyon nan éfò pèsònèl nou pou dévlopé kalité nan nanm nou, min okontrè pou nou vi-n pi soup anba pouvoua Bondié.

Konsa anyin pa doué troublé lapè ki nan kè nou. Sint Tèrèz lanfan Jézu té gin yon kouzi-n li ki té vlé antré nan monastè Kamèl, pou-l fè Mè. Li t-al vizité yon éspozision intènasionnal a Pari; jé-l té tonbé sou kèk pòtré ki té troublé léspri-l pandan yon bon ti moman. Li ékri Sint Tèrèz pou-l avèti-l. Sint Tèrèz réponn li li konprann sa-k rivé-l. Min sé pa pou-l troublé pou sa. Okontrè sé pou-l kominié, pou-l chasé troub sa yo, paské Bondié sé Rinmin, li pap pran plézi ap trakasé léspri nou tout tan. Léspri Sin vidé kalité-l nan nou, sé léspri Rinmin-an; Bondié pa ba nou yon léspri kè soté (2 Tm 1,7), min li ba nou léspri k-ap fè nou di Aba, sa vlé di Papa (Rom 8,15). Bondié sé Papa, Bondié sé pa jij. Sé sa Sakré-Kè Jézu dévoualé nou. Li mandé nou pou nou lagé tout chaj nou sou li (Ps 55,23), pou nou vi-n jouinn li, pou nou pran chaj li ki léjé (Mt 11,28-30). Pou nou kapab poté chaj li-a, Bondié ba nou kado léspri Sin yo li vidé nan nanm nou. Sé pa nou minm k-ap aji ankò, sé léspri Sin-an k-ap aji nan nou. Sé pou rézon sa-a Sint Tèrèz lanfan Jézu té konn abitué di li pa fè okinn bon aksyon ak pouvoua pèsònèl pa-l, sé nan Bondié tou sa-l fè ki bon sòti. Sin Vinsan-d-Pòl té mété kinzan pou-l jouinn diréksyon l-ap bay kominté li té fondé-a pou okipé pòv yo. Si sé té nan aktivité pèsònèl pa-l sa té sòti, li t-a ouè klè pi vit. Akoz sa, li blijé kite léspri Sin-an kondui-l tankou yon ti pay van ap souflé. Sa blijé nou pou nou pa rété ap gadé pròp posibilité pa nou, min sé pou nou gin lodas alé dirèktéman kot Bondié, antan nou pasé nan Sakré-Kè Jézu ki si tèlman rinmin lézòm. Liv Provèb la di: tout plézi-l sé pou-l avèk pitit moun yo sou tè-a (Pr 8,31). Kè Jézu ki pèsé-a, sé sign rinmin-an k-ap koulé pou nou, sé sign léspri Sin-an k-ap vidé tankou yon larivière pou nou, jan Jézu té promèt la (Jn 7,37-39). Sa invité nou pou nou pa rétfiksé atansyon nou sou égzijans Jistis la ki tankou yon fouèt ki toujou prèt pou bat nou épi n-ap chèché paré antan nou fè tout kalité gro sakrifis nou kapab. Sé pa chémin sa-a Jézu trasé pou nou. Sé yon mové fason yo té konprann dévotion aléga Sakré-Kè Jézu apré 1870, kòm si pou kalmé Jistis Bondié. Chémin Jézu trasé pou nou, sé chémin rinmin-an. Tèrèz té dékouvri vré plas Jistis la antan li di: Bondié jis, paské li pran ka féblès nou; sé li minm ki fè nou, li konnin nou fèb, li pa sézi lè nou fè péché, li toujou prèt pou-l padonnin nou (cf Ps 103,14), sé konsa li jis; Jistis li vlo pé nan Rinmin-an. Tèrèz té soufri anpil anndan fon kè-l lè yo té konn ap préché rétrèt nan monastè koté-l té yé nan Kamèl Lizié-a, paské yo té konn insisté tròp sou késion Jistis Bondié-a, yo pa-t ouè vré plas

Rinmin-an. Sakrifis avèk éfò n-ap fè, vré plas yo, vré ròl yo, sé pou drésé, korijé, nétouayé mové tandans nou, pou nou vi-n pi soup pou résévoua Rinmin Kè sansib Bondié-a; sé pa pinision n-ap sibi tankou moun k-ap péyé dèt péché. Tèrèz té gadé Sint Mari-Madlèn ni ti gason ki té pati kité papa-l épi ki té tounin-an, ni Lévi, ni piblikin-an, ni Zaché, ni Sin Pòl, ni bon Laron-an, ni David, ni Sint-Ogustin; li té ouè kijan Jistis la ak Rinmin-an t-ap balansé (cf Ps 85,11), épi kilès ki té pi inpòtan. Farizyin-an té réprésanté Jistis la, piblikin-an té réprésanté kè sansib la. Lògèy Farizyin-an té apuiyé sou pròp aksion pa-l. Piblikin-an minm pa-t gin anyin ki bon, sé sou Bondié li té apuiyé. Li pa-t gin anyin pou-l mét dévan Bondié tankou yon doua li ginyin, jan Jòb té fè-a ak jan nou li nan kèk Psòm nan. Sin Pòl di Romin yo sa, lè l-ap palé sou Jistis Bondié ak Mizérikòd Bondié. Dévan Jistis Bondié tout moun sé péchè, dévan Mizérikòd li li fè tout moun favè (cf Rom 1,18-3,31; 5,1-11; 9,14-24). Sé minm jan ak travayè jadin rézin-an. Sa-k vi-n an dènié yo, mizérikòd la fè yo touché minm pri avèk sa-k té la yo dépi granmatin-an (cf Mt 20,1-16). Mizérikòd la vlopé Jistis la. Bondié sé Rinmin. Li montré nou sa nan Kè sansib Pitit li-a, nan Sakré-Kè Jézu ki si tèlman rinmin lézòm.

Sé pou nou pòv dévan-l, l-ap plin nou ak richès li k-ap débòdé. Sé pou nou tankou yon lasi mòl k-ap résévoua fòm Bondié vlé ba li. Avèk sa sé nòmral pou kè nou an pè, pou nou gin kè kontan, frui prezans léspri Sin-an. Bondié di nan Profèt Ozé l-ap fiansé nou ak li nan fidéité-a ak rinmin-an, nan kè sansib la ak mizérikòd la, sé li minm tou k-ap fiansé nou nan jistis la ak doua-a (Os 2,31), konsa rinmin-an ak vérité-a ap rankontré, jistis la ak kè pozé-a ap anbrasé (Ps 85,11). Sé pou nou sonjé liv Kantik dè kantik la ki montré kijan sé paské Bondié fidèl ki fè nou minm tou nou kapab réprann bon chémin n-ap pèdi tanzantan-an; sé pou nou kalkilé kijan nan liv Profèt Ozé-a Bondié pa okipé fot nou, sé rinmin-l li sonjé pou-l padonnin nou, jan Psòm nan di-a: tankou solèy lévé louin ak solèy kouché, konsa li voyé péché nou yo louin nou (Ps 103,12), tankou yon papa sansib pou pitit li, konsa li rinmin moun ki respékté-l yo (Ps 103,13), li sonjé ak ki sa nou fèt, li sonjé sé pousiè nou yé (Ps 103,14). N-ap mandé Manman Mari, Kè Imakilé, pou-l fè nou gin konfians nan Sakré-Kè Jézu.

*

* *

DIZIÈM DIMANCH ODINÈ A

Rinmin ak vérité rankontré; Jistis ak Kè pozé anbrasé. Juif yo konté sou jistis yo, sa vlé di sou sa yo fè ki mété yo an règ avèk sa laloua-a mandé. Sé konsa Farizyin-an détayé tout conduit li pou-l montré Bondié li gin doua tann rékonpans nan min-l. Piblikin-an minm okontrè fè tankou ti gason-an ki té pati kité papa-l la épi ki té tounin apré-a. Li pa ozé lévé jé-l anlè; non sèlman li pa gin okinn mérit pou-l apuiyé sou yo, min li konnin sé chatiman li t-a doué résévoua, li mandé padon pou sa-l rékonèt li fè ki mal. Li touché Mizérikòd Bondié. Sé li minm Bondié rann jistis. Jistis nou sé nan Bondié li soti. Minm sa nou fè ki bon, sé Bondié ki fè-l nan nou. Sé sa pou nou rékonèt, pou nou pa fè louanj pou pròp tèt nou, pou nou konsidéré nou tankou pòv dévan Bondié.

Jézu pa chouazi nou paské nou bon. Min li chouazi nou pou nou kapab vi-n pi bon. Sa-k bon nan nou-an, sé Bondié minm ki mété-l, pou nou kapab réponn li lè-l rélé nou. Sé sa la Trè Sint Vièj Mari té rékonèt ki fè-l té di li sé Sèvant Granmèt la, Granmèt la voyé jé li sou Sèvant li ki pòv. N-ap mandé-l pou-l fè nou toujou rété pòv dévan Bondié, pou nou sonjé di-l mèsì pou sa-l fè pou nou, pou nou réponn avans li fè nou yo avèk lafoua nou.

*

* *

DIZIÈM DIMANCH ODINÈ B

Sint Tèrèz d-Avila di pou nou pa di: "démon"-an, lè nou kapab di: "Bondié", sa vlé di pou nou pa chèché dékouvri tras Satan, lè nou kapab dékouvri tras Bondié. Gin dé foua yon bagay rivé nou, nou pa t-ap atann, épi sa pa fi-n trò fè nou plézi, minm lè-a nou di: Sé démon-an ki fè-m sa. Époutan si nou gadé byin, nou kapab ouè sé min Bondié ki touché nou. Sèlman min Bondié pa toujou dous, jan nou t-a kouè-a. Okontrè, sign ki pi sètin sé Bondié ki la, sé pa tèlman lè tout afè nou maché byin, sé pafoua lè nan plas **fòs** la n-ap tann nan, sé féblès nou santi; sé lè nan plas **intélijans** la n-ap tann ba nou limiè-a, sé fè noua ki vlopé nou; sé lè nan plas **konsev** la nou anvi-a pou nou konn ki chémin pou nou fè-a, sé ézitasion ki rivé; sé lè nan plas **sajès** la n-ap chèché-a sé povreté nou jouinn ki fè nou vi-n tankou yon ti moun tou piti san espérians. Satan pa gin tout pouvoua nou ba li-a, li pa gin tout galon sa yo nou mét sou zèpòl li-a. Provèb la di: "Dépi djab té kaporal", sa vlé di yo dégradé-l. Dépi jou Vandrédi Sin, lè Jézu mouri sou Koua-a, Satan pèdi tout pouvoua-l. Jézu té di Apot yo: "Kouraj, mouin ranpòtè laviktoua sou tè-a" (Jn 16,33). Sé pa pou bontan Bondié té di Satan nan paradi-a: "M-ap mét yon rayisans ant ou minm ak Madanm nan, ant désandans ou ak désandans pa-l; ou-ap vizé-l nan talon, li minm minm l-ap vizé ou nan tè" (Gn 3,15). Sin Pòl té fi-n fè plan-l pou-l al poté bòn nouvèl la nan péyi lazi, li jouinn kontrariété; li éséyé dirijé nan zòn Bitini, chémin-an bloké. Sé lè-l rivé Troas, li fè yon rèv, yon Masédonyin kanpé an fas li, li vi-n di-l: "Travèsé nan Masédoua-n, vi-n poté nou sékou". Sé lè sa-a li vi-n konprann sé léspri Granmèt la ki pa-t kite-l al ni nan lazi ni nan Bitini (Ac 16,6-10).

Bondié pa ba nou tout program nou yon sèl kou; sé pazapa l-ap kondui nou. Lè nou raté yon viraj, nou pa doué konprann nésésèman sé Satan ki la k-ap giyonnin nou. Bondié ap kondui nou nan min, li vlé pou nou viv nan dépendans li. Sé poua minm lè-l touché nou, li ba nou inprèsiyon sé lékontrè sa nou mandé-a ki rivé nou. Papa Sint Tèrèz té vlé fè Pè; manman-l té vlé fè Mè. Yo jouinn difikilté, yo chak sou bò pa yo. Bondié té prévoua lòt bagay pou yo. Yo marié ansanm. Yo bay youn nan pi gran Sin tan nou yo konnin. Chémin Bondié pa chémin lézòm (Is 55,8). Moun ki présé, k-ap palé san réfléchi, yo kapab ouè aksion léspri Sin-an, épi yo mété etikèt Satan sou li, jan Juif yo té fè osijè aksion Jézu t-ap réalizé yo. Nou pa doué jijé sou aparans. Nou doué viré lang nou sèt foua anvan nou palé, sou sa nou pa konnin.

Ki sign ki kapab montré yon aksion sot nan Bondié? Sé sign "lacharité". Ki sign ki kapab montré yon aksion sot nan djab? Sé sign rayisans. Sé sou frui

pié boua-a pou nou konnin ki ras li. Nou pa doué fèmin kè nou, lè yon bon prochin ak tout bòn volontè-l ap chèché rann nou sèvis; nou pa doué fè intansion-l prosè. Sa-k anndan kè yanm sé ti kouto ki konnin-l. Nou pa doué jijé sou laparans. Chémin li pran-an kapab pa minm chémin ak nou. Sa pa vlé di li pa minnin nan bon rout la. N-ap mandé Manman Mari pou nou gin ouvèti nan kè nou, pou nou aksépté moun ki pa gin minm fason y-ap aji avèk nou, pou nou pa trò présé ouè yon lènmi nan moun k-ap chèché byin nou, pou nou chèché ouè léspri Bondié-a anndan yo, anvan nou déklaré sé léspri Satan k-ap gidé yo. Jézu di nou pou nou pa kondané, pou yo pa kondané nou. Léspri Sin pa akizé pèsòn, okontrè sé défans pitit Bondié yo l-ap pran. Sé léspri Satan k-ap akizé moun, jan-l té fè kont Jòb la (Job 1,9) épi kont Jozué, pitit Josédèk la (Za 3,1). An minm tan tou, sé pou nou pran abitud gin pasians ak prop tèt pa nou, pou nou pa pi présé passé Bondié, pou nou pa konprann sé Satan k-ap ataké nou, lè afè nou pa maché douat. Léspri Bondié souflé jan-l vlé, nou pa konn koté-l soti, ni koté l-apralé. Sé pou nou respékté chémin l-ap fè ni nan lòt moun, ni nan nou minm, san nou pa chèché déstayé tout antré-sòti-l, kòm si sé nou minm pou-l t-a mandé pèmision anvan-l aji, anvan-l pran tèl ou tèl diréksion. N-ap sonjé frui léspri Sin yo Sin Pòl déstayé nou nan lèt li ékri Galat yo: sé rinmin, kontantman, lapè, bon kè, pasians, sèvis, konfians nan lòt moun yo, dousè, frinnin mové panchan nou (Ga 5,22-23)

*

* *

DIZIÈM DIMANCH ÒDINÈ C

Jézu sé nouvo profèt Éli-a. Minm jan Éli té lévé pitit madanm nan ki té mouri-a (1 R 17,17-24), konsa tou Jézu lèvé pitit vèv Nayim nan, yo t-apral antéré-a (Lc 7,11-17). Déklarasion moun yo fé osijé Jézu nan finisman lévanjil dizièm dimanch òdinè C-a (Lc 7,11-17), sé minm déklarasion madanm nan té fè pou Éli. Moun yo di: "yon gran Profèt lévé nan mitan nou." Bondié visité pèp li-a. "Madanm nan té di osijé Éli: kouliè-a mouin konnin ou sé yon moun Bondié, Parol Bondié-a nan bouch ou sé vérité. Vil la koté Éli té fè mirak sa-a, sé sou minm mòn avèk vil Nayim nan koté Jézu té lévé pitit vèv la. Yon vil sou bò isit mòn nan, lòt vil la sou bò lòt bò mòn nan. Lè Jézu pozé Apot yo kèsion pou-l konnin sa moun yo pansé osijé-l, yo réponn li: gin moun ki di ou sé Éli, Jan Batis, oubyin youn nan Profèt yo. Bondié té promèt li t-ap voyé yon Profèt tankou Moyiz pou yo kouté voua-l (Dt 18,18). Profèt sa-a sé Éli ki té gin pou-l rétonin (Mal 3,23; Si 48,10; Mt 17,10-13; Lc 1,17). Yo té konprann sé Jan Batis ki Éli sa-a (Jn 1,21). Jan Batis démanti; min Jézu ba-l tit la (Mt 11,14; 17,11).

Apot yo té gin présantiman Jézu té réalizé mison Éli-a nèt. Tankou Éli té fè difé désann sot nan sièl la (2 R 1,10; cf 1 R 18,38), konsa yo mandé Jézu pou-l fé difé sot nan sièl la tou sou Samaritin yo (Lc 9,54). Lè Jézu ap mouri li rélé Bondié nan langaj Ébré: Éli, Éli, lama sabaktani: Bondié mouin, Bondié mouin, pouki sa ou lagé-m? (Mt 27,46). Yo té konprann sé Éli li t-ap rélé. Sint Ogustin di: Pitit vèv Nayim nan y-ap antéré-a, sé moun ki nan péché. Vèv la, sé Manman nou légliz la, k-ap kriyé sou péché nou. Nan pié lakoua-a vèv sa-a sé Manman Mari. Pitit li-a pran plas péchè yo. Sékèy li sé boua lakoua-a. Sou toua jou l-ap lévé. Sé konsolasion pou Manman sa-a. Sé sèl pitit vèv la té ginyin. Jézu sèl Pitit Manman Mari; nan li tout krétyin yo rasanblé. Yo patisipé nan lanmò-l pou yo lévé nan lavi ki pap janm fini-an. Lévanjil dizièm dimanch òdinè C-a kapab sèvi pou mès ak lantèman défin yo; li débouché sou la vi k-ap diré tou tan-an. Ak Psòm répons la (Ps 29 = 30), n-ap sonjé Réziréksion-an: "M-ap fè louanj ou, Granmèt, ou minm ki lévé-m"; n-ap lapriyé pou défin yo, antan n-ap di: "kot Granmèt la mouin rélé, li kouté-m, li délivré-m, pou tout tan m-ap di-ou mès". Ansann avèk yo n-ap di: "Granmèt, ou ouèté lavi-m sot anba tè-a, ou fè-m viv pou-m pa désann nan fòs la".

*

Sé sou lanmò ak Réziréksion litiji-a mandé pou palé jou dizièm dimanch òdinè C-a, paské sé poua minm yo chouazi ni lévanjil la, koté Jézu lévé pitit vèv Nayim nan yo t-apral antéré-a (Lc 7,11-17), ni premié léktu-a, koté

Profèt Éli lévé pitit vèv Sarépta-a ki té fi-n mouri tou-a (1 R 17,17; 2,14). Sé sou késion sa-a litiji-a mandé nou pou nou réfléchi. Sé poua Psòm nan ki vi-n apré premiè léktu-a (Ps 20 = 30), li di nan vèsè 4 la: "ou ouété lavi-m sot anba tè-a, ou fé-m viv pou-m pa désann nan fòs la". Jézu sé vré Profèt la ki vi-n ranplasé Profèt Éli, dapré sa Alélouya-a di-a (Lc 7,16).

*

Sin Luk montré nou kè sansib Jézu. Sé yon prèv Jézu ba nou kijan Bondié Papa-a rinmin nou. Nan bouch Profèt Izayi Bondié di: Èské yon madanm kapab bliyé ti pitit li, éské-l san pitié pou pitit ki soti nan zantray li? Minm si-l t-a gin yon madanm ki t-a bliyé, mouin minm mouin pap bliyé-ou" (cf Is 49,15). Bondié di sa, lè l-ap palé ak pèp Israèl ki té nan égzil Babilòn, ki t-ap plinyin, antan-l t-ap di: "Granmèt la abandoné-m, Granmèt la bliyé-m" (Is 49,14). Psòm nan di: "si papa-m ak manman-m abandoné-m, Granmèt la ap résévoua-m" (Ps 27,10). Bondié sé Rinmin, sé Kè sansib, sé Pitié, jan-l di Moyiz, ki t-ap mandé-l non-l, sou mòn Sinayi-a (Ex 34,6; cf Ps 85,15; 103,8; 145,8; 1 Jn 4,8.10). Pi bèl prèv Bondié ba nou pou-l montré nou kè sansib li, sé pròp Pitit li, Jézu, li ba nou, jous li mouri sou Koua (Jn 3,16). Lè Jézu ap mouri, youn nan dènié paròl li di, sé: "Min pitit ou" (Jn 19,26), antan-l rinmèt Sin Jan bay Manman-l. Final lévanjil dizièm dimanch C-a fè sonjé bèl jès sa-a Jézu ap fè antan l-ap mouri sou Koua-a. Li rinmèt pitit la bay manman-l (Lc 7,15), vèv Nayim nan, minm jan Profèt Éli té fè pou pitit la li té fè lévé sot nan lanmò-a (1 R 17,23), li té rinmèt li bay manman-l nan, vèv Sarépta-a.

Lè yon malè rivé, nou konn kité bouch nou oubyin omouin kè nou dépalé kèk foua, nou di sé Bondié k-ap pini nou pou péché nou, jan manman pitit la, vèv Sarépta-a, di nan premiè léktu dizièm dimanch C-a. Li di profèt Éli: "Ou vi-n lakay mouin pou-ou fè sonjé fot mouin yo, épi pou-ou fè pitit mouin-an mouri" (1 R 17,18). Nou konn pansé Bondié régadan, li gin kayé koté-l ékri péché nou ak kréyon ki pa gin gòm, pou-l réglé nou an gro. Époutan Bondié fi-n kréyé nou, Bondié sé Papa, li pa kapab pran plézi ap fè moun mouri paské yo fè péché (Ez 33,11). Bondié fidèl. Non-l sé rinmin, sé kè sansib, sé padon, li rété fidèl nan sa-l yé-a, nan rinmin-l nan, nan kè sansib li-a, nan padon-l nan. Psòm nan di: Tankou papa-a sansib pou pitit li, konsa Granmèt la sansib pou nou; tankou solèy lévé louin ak solèy kouché, konsa li égzilé péché nou yo louin-l; li konnin byin sé pousiè nou yé, sé féblès nou yé, sé péché nou kapab fè. Li pap fè régadan pou sa (Ps 103,11-14). Li di sé pa tout tan l-ap fè kòlè poutèt péché nou, li pa kinbé nou nan kè, li pa trété nou dapré fot nou, paské li sé kè sansib, li sé pitié, li mal pou faché, li plin

rinmin (Ps 103-8-10). Yon malè kapab yon okazion pou fè louanj Bondié éklaté, jan Jézu té di Apot yo osijé Laza-a. Maladi sa-a pa pou lanmò, sé pou fè ouè bèlté Bondié (Jn 11,4). Sé pa paské avèg la té fè péché, ni papa-l ak manman-l, ki fè li té fèt tou avèg la, sé pou bèlté Bondié kapab éklaté (Jn 9,2-3). Tout liv Jòb la fè konprann mèsaj sa-a. Profèt yo insisté sou sa, sitou lè pèp la nan égzil, pou fè-l konprann sé pa késion péyé dèt pou péché, sé yon mision yo ginyin pou yo réalizé koté yo yé-a kay payin yo, minm si sikonstans ki minnin yo la-a pa-t akòdé ak volonté yo, ni pa-t nan lign sa ki bon. Sé pa vanjans Bondié ap tiré sou yo, l-ap nètouayé yo pou yo donnin plis frui (cf Jdt 8,27). Péché-a déjà fi-n pasé; yo déjà fi-n régrèt li. Bondié déjà fi-n padonnin-l. Yo pa bézouin ap tounin sou li tout tan ankò, kòm si Bondié pa-t bliyé. Sé nou minm ki pa bliyé; nou sispèk; mouinn ti brui pié nou tandé, nou konprann sé Bondié k-ap vi-n tiré vanjans sou nou (cf Gn 3,8).

Liv Kantik dè Kantik la fini antan-l di: gran dlo pa kapab étinn rinmin-an, ni okinn lariviè pa kapab nouayé-l, paské rinmin-an sé yon difé k-ap boulé san-l pa kapab étinn (Ct 8,6-7; cf Ex 3.2). Gin dé foua nou fè byin, épi nou konstaté malè touché nou. N-ap mandé ki sans sa ginyin. Pòv vèv Sarépta-a té résévoua Éli lakay li, li té ba-l dènié ti bouché fari-n li té ginyin-an ak dènié ti gout luil li té rété nan fon boutèy li-a (1 R 17,12-18). Bondié té rékonpansé-l sé vré. Li té ouè fari-n nan pa-t sispans, ni luil la pa bésé, joutan Bondié voyé lapli sou tè-a. Sèlman apré sa, pitit li-a vi-n mouri mò sibat. Li kòmansé fè kalkil, l-ap mandé pouki sa yon kout dlo cho, yon kout dlo frèt la. Ki tanpéraman Bondié ginyin, ki karaktè-l, ak ki kalité pinsèt pou yo touché-l? Sa-l mandé? Ki sakrifis pou-l fè, pou kalmé-l? (cf Mi 6,6-7). Tou sa, sé mové kalkil, jan liv Jòb la fè konstaté-a. Liv Tobi-a montré sa byin tou. Sé finisman istoua sa-a ki gin klèté fon mèsaj la. Sa-k rivé yo, sé lokazion pou fè ouè grandè Bondié. Nou bézouin lafoua ak pasians pou nou fi-n monté tèt mòn nan jous nou ouè sa-k dèyè. Nou pa doué rété sou chémin.

Lè Jézu rinmèt Sin Jan bay Manman-l nan, sé nou tout patizan-l yo li rinmèt bay Manman nou. Nou té tankou pitit vèv Nayim nan ki mouri-a, tankou pitit vèv Sarépta-a ki trépasé-a. Li fè nou viv gras a pròp lanmò pa-l, li rinmèt nou tou vivan bay Manman nou. Kè Jézu louvri pou-l montré fon kè Papa-a (Jn 19,34), nanm Mari louvri ak épé sa-a Siméyon té anonsé-l la dépi lè-l t-ap ofri Jézu nan Tanp la (Lc 2,35). Jézu palé ak vèv Nayim nan, pou konsolé-l. Li di: "Pa kriyé" (Lc 7,13), tankou Bondié t-ap konsolé pèp li-a an-égzil la (Is 51,12; 40,1; 54,8-10; 43,1,7), li t-ap di-l: "Pa kriyé, siyé dlo nan jé-ou" (Jer 31,16). Sin Piè té kriyé apré fot li-a (Lc 22,62). Jézu vi-n

konsolé-l apré rézirkéksion-an (Jn 21,15-17). Nan pouin péché ki trò lou pou Bondié. Li chajé tout sou do Pitit li-a nan Koua-a, tankou Abraam té chajé paké boua-a sou do pitit li Izaak la (Gn 22, 6; Jn 19,17). N-ap mandé Manman Mari pou-l ban nou konfians nan kè Pitit li Jézu ki louvri tankou pòt sièl la, ki fè nou ouè fon kè Papa-l: kè sansib, pitié, padon, rinmin (cf Gn 3,24; Is 60,11; Ap 21,25). N-ap mandé-l pou nou minm tou nou louvri kè nou gran, pou nou sansib nan soufrans frè ak sè nou, pou nou konsolé yo nan lapinn yo, pou nou édé yo nan tout bézouin yo.

*

* *

ONZIÈM DIMANCH ÒDINÈ A

Douz Apot yo réprézanaté douz fanmiy Israël la. Sé Pèp nouvo-a, légliz la Jézu pozé sou fondasion yo, tankou nan lign Pèp lansyin Téstaman-an. Sé poua Jézu di yo pou yo pa al kay payin yo, ni nan vil Samaritin yo, sé kot Juif yo tou dabò pou y-alé, pou yo éséyé ramné sa-k té pèdi yo. Douz yo réprézanaté ti "Rès" la Profèt yo t-ap palé-a, ki vrè Pèp Israël la, k-ap sèvi pou réfè tout Pèp la, pou drésé joupa David la ki t-ap tonbé-a.

Lè Juda ap trayi, Apot yo ap blijé ranplasé-l avèk Matias, pou chif Douz la kapab pèsisté. Lè sa-a Apot yo ap gin yon lòt mision. Sé pa Pèp Israël la sèlman y-ap gin pou yo ramné, min y-ap sèvi témouin Jérusalèm, nan lajudé ak lasamari épi jous nan bout tè-a. Sin Pòl ap kòmansé adrésé mèsaj Krétyin-an bay Juif yo anvan. Lè Juif yo réfizé kouté, l-ap viré nan diréksion payin yo.

Nou pa doué dékourajé, lè nou konstaté aktivité nou pa donnin frui nou t-a vlé, koté n-ap déplouayé fòs nou-an. Granmèt la di Sèvitè-l la: "Sa pa kont pou-ou Sèvitè-m pou ou rélvé fanmiy Jakòb yo, pou-ou ramné égzilé Israël yo, m-ap fè-ou vi-n tounin limiè nasion yo pou délivrans mouin rivé jous nan bout tè-a". N-ap mandé Manman Mari pou-l ba nou asirans nan mision nou, malgré sé nan noua n-ap maché, pou nou simin tout koté, ni sou bò chémin, ni sou glasi, ni nan rajé, ni nan bon tè. Youn simin, yon lòt rouzé, min sé Bondié ki fè plant la donnin, 1 Co 3,6.

*

* *

ONZIÈM DIMANCH ÒDINÈ B

Sin Jak di lè kiltivatè-a fi-n planté, li pran pasians pou-l tann tè-a donnin frui, lè lapli-a tonbé. Li mandé nou pou nou gin minm pasians sa-a tou osijé prezans Granmèt la k-ap rivé-a (Lc 5,7). Li mandé nou pou nou mét asirans nan kè nou, pou nou pa rété ap plinyin youn kont lòt. Sa Bondié paré pou nou, gran dlo pa gin doua pran-l broté-l alé. Bondié di nou nan Profèt Izayi, lè tan-an rivé, l-ap aji vit (Is 60,22). Jézu di nou sé pa nan trakasé kò nou nou kapab lonjé lavi nou minm longè yon bra (Mt 6,27). Sa invité nou fè Bondié konfians. Nan liv Profèt Ézékièl la, Bondié chouazi yon konparézon pou montré nou kijan kòmansman pèp Israèl la té tou piti, sé sémans Abraam nan ki vi-n dévlopé atèl pouin tout nasion yo vi-n chèché lonbraj nan li, vi-n antré nan fanmiy li, vi-n fè gran légliz la ki sou tout tè-a (Ez 17). Dévlopman lavi lagras nan nanm nou, nou pa kapab méziré-l. Sémans lafoua, léspérans, lacharité-a Batèm nan dépozé nan nanm nou-an, nou pa ouè kijan l-ap grandi, sé Bondié k-ap fè-l dévlopé, pou-l donnin frui, san nou pa konnin. Sé konsa tou lavi légliz la ap dévlopé san nou pa ouè.

Gin dé foua nou konn anvi plinyin, antan n-ap di nou pa fè progrè nan lavi nanm nou oubyin légliz la, kominoté nou-an pa dévlopé jan nou t-a vlé-a. Époutan sé yon rivè k-ap koulé anba tè san nou pa konnin, k-ap rouzé rasi-n pié boua yo san-l pa fè brui. Mòd dévlopman sa-a, sé travay léspri Sin-an. Li pa aji avèk tanbou ni tronpèt. Koté y-ap brasé-chofé tout jounin, sé pa nésésèman prezans léspri Sin k-ap aji. Sé lézòm ki vlé fè ouè y-ap réglé kichòy, pou fè moun bat bravo pou yo. Jézu di yo déja gin rékonpans yo sou tè-a. Plis léspri Sin ap aji, sé plis li ba nou linprésion nou pa réglé anyin. Nou tankou ti moun piti, nou tankou yon ti fèy boua nan grif yon malfini. Nou pa gin pou nou fè kòlè, pou nou fè règléman-kont, pou-n ap di dépi tout tan sa-a n-ap travay, nou pa ouè rézilta. Travay Bondié pa ékri sou papié ak lank. Psòm-répons onzièm dimanch òdinè B-a di nou moun ki kòrèk la, l-ap pousé tankou palmis, l-ap monté byin ro tankou pié bouapin nan péyi Liban. Minm lè-l fi-n vie l-ap donnin frui toujou, l-ap dévlopé, lap rété byin fré (Ps 91 = 92). Bondié di nou pié bouapin ki t-ap fè grandizè-a, li rabésé-l; sé sa-k té ba-a li lévé anlè (Ez 17,24); sa-k té vèt la, li séché-l; sé sa-k té sèk la li fè dévlopé. Sé sa la Trè Sint Vièj Mari di nan Magnifikat la: Bondié rabésé moun k-ap fè arogan yo; li lévé sa-k pòv yo anlè; sa k-ap fè régadan ak richès yo, li fè yo santi grangou; sé sa-k grangou yo li bay manjé vant plin (Lc 1,51-53). Nan dézièm léktu onzièm dimanch òdinè B-a, Sin Pòl di: nou gin KONFIANS, n-ap maché nan **lafoua**, n-ap maché sou rout la **san nou pa ouè**, oui, nou gin KONFIANS (2 Co 5,6-10). Réfrin Psòm-répons la di: "Sa bon pou mét **konfians** nan ou, Granmèt" (Ps 92,2 = 91,2).

Nou bézouin lafoua pou nou kontinué rout nou, malgré difikilté nou kapab rankontré, malgré nou gin inpréision nou pa réglé anyin. Sé pa nou minm k-ap travay, sé léspri Sin-an. Sint Térèz lanfan Jézu déklaré dépi sétan l-ap dòmi pandan l-ap lapriyè an silans inèdtan matin ak inèdtan asouè, épi apré lamès lè l-ap fè aksion-de-gras. Min li di li pa troublé pou sa poutèt li dòmi pandan orézon-l yo ak aksion-de-gras li yo. Li konstaté doktè yo abitué andòmi malad yo, lè y-ap fè opérasion, épi li rémaké tou ti moun yo fè paran yo plézi ni lè y-ap dòmi, ni lè yo gin jé klè. Konsa nou pa gin pou n-ap trakasé tròp pou sa k-ap rivé apré nou fi-n fè travay Bondié mandé nou. Jézu di nou sé pou nou fè tankou sèvitè-a ki fi-n fè travay li, li pa rét tann konpliman, li fè tankou balé, jan Sint Bènadèt di-a, yo dépozé-l dèyè pòt la, yo blyié-l. Psòm nan di: Mouin tankou yon ti bébé byin pozé an pè é an silans sou kè manman-l (Ps 131,2). Yon lòt Psòm di: ou pa bézouin pè nannuit, mil ap tonbé adouat ou, dimil agoch ou, Granmèt la pasé lanj li yo lòd pou yo poté-ou sou bra yo, pou okinn ròch pa touché-ou (Ps 91,5-12). Konfians la sé **léspérans ki vlopé nan rinmin**.

Nou gin abitud pafoua konprann san nou minm anyin pa kapab maché, nou vlé pran pòz jénéral nou nan tèt kolòn lamé yo pou nou kondui tout moun ak tout bagay. Sé tou jis si nou pa indiké Bondié sa pou-l fè. Lévanjil onzièm dimanch òdinè B-a mandé nou pou nou pozé san nou, pou nou konnin minm si Bondié mété nou nan tèt yon kominoté, pou nou dirijé-l, sé li minm k-ap aji, pou nou pa pran pòz nou pi plis an fas frè nou ak sè nou; pou minm si yo di nou pa fè anyin, nou pa bézouin kité san monté nan tèt nou pou sa, pou n-ap chèché fè moun ouè, pou n-ap brasé monté-désann. Nou fi-n fè travay nou, kité léspri Bondié-a réglé afè-l. N-ap sonjé sa Sin Pòl té di Korintyin yo: li planté, Apolos rouzé, min sé Bondié ki fè plant la pousé (1 Co 3,6). Apot yo té voyé sinn nan tout nan nuit la, yo pa-t pran okinn pouason; sou paròl Granmèt la yo voyé filè-a, yo si tèlman jouinn pouason, filè-a rété yon pouin pou-l chiré (Lc 5,1-11; cf Jn 21,1-14). Lè nou konprann n-ap pèdi tan nou, sé lè sa-a travay nou ap rapoté san nou pa konnin, tankou Sèvitè Granmèt la té di-a (Is 49,6). Apot yo ramé tout nannuit, yo pa kapab avansé, kon Jézu proché, la minm batiman-an rivé koté yo té vlé alé-a (Jn 6,16-21).

*

* *

ONZIÈM DIMANCH ÒDINÈ C

Nan lévanjil onzièm dimanch odinè C-a Jézu ba nou yon bèl égzanp rinmin, sa-l ginyin yon fason spésial pou péchè yo. Sé pou sa li té kapab di Sint Magérit- Mari Alakòk, nan monastè Paré-le-Monial an Frans: "Min kè sa-a ki si tèlman rinmin moun yo". Mari-Madlèn ap nan tèt kòlon fi yo k-ap suiv Jézu sou rout Jérusalèm nan, k-ap kondui-l jous nan kavo-a, k-ap fè-l témouin Rézirèksion Jézu-a. Prémie léktu-a montré péché adiltè David té fè avèk Bétsabé, madanm Uri, épi péché krim David té fè antan-l fè touyé Uri pou-l pran madanm li-a. Péché nou mèt grosè lanmè-a, rinmin Bondié pi fò. Dlo ki koulé nan jé David pròpté fot li, dlo ki koulé nan jé Mari-Madlèn lavé kè-l, dlo ki koulé nan jé Sin Piè nétouayé péché-l la. Sé sa Psòm répons la di: (Ps 31=32): "Sé chans pou moun yo padonnin fot li!" David rékonèt: "Mouin fè péché kont Granmèt la". Li déklaré sa dévan Natan, ki sèvi intèmediè pou Bondié. Bondié éfasé péché-l. Psòm nan di: "Mouin fé-ou konnin péché-m nan, mouin pa kaché fot mouin-an. Mouin di m-ap déklaré fot mouin-an dévan Granmèt la. Ou minm ou padonnin fot péché-m nan". Sé sa Mari-Madlèn té fè tou. Li pa-t ront déklaré pénitans li dévan tout moun. Nou pa douè janm kaché gro péché nou pou nou fè konfésion sakrilèj ak kominion sakrilèj, n-ap sot nan lapli pou nou tonbé nan lariviè. Sé pou nou gin sinsérité. Sa nou fè ki mal la, sé pou nou déklaré-l. Nou pa doué pran abitud di: "Pè-a pa bézouin konnin kalité péché sa-a". Bondié mété Pè-a la pou-l sèvi intèmediè pou-l fè favè padon-l pasé, minm jan li té voyé Natan kot David la. Sa-k fè nou ront la, sé pou nou aksépté déklaré-l. Sé sa k-ap chasé Satan sot nan kè nou. Otréman n-ap ésklav li chak jou pi plis. Pè-a pap janm di moun péché nou, li pa gin doua sa. Li t-a pito kité yo touyé-l pasé pou-l t-a dévoualé yon péché yo di-l nan lakonfésion, paské li konnin si-l t-a fè sa, li pa t-ap janm gin doua ni konfésé ni di lamès, ni bay okinn sakréman ankò. Avèk Psòm-répons la n-ap di: "Pèché-m nan, mouin di-ou li; Bondié, padonnin-m!" (Ps 32 = 31).

*

Lévanjil la montré nou kijan Jézu padonnin Sint Mari-Madlèn (Lc 7, 36-8,3). Prémie léktu-a montré nou kijan Bondié padonnin David pou péché adiltè-a (2 Sam 12,7-10.13). Psòm-répons la bay kòm réfrin: "Granmèt padonnin fot péché-m nan"; (Ps 31=32). Tout Psòm sa-a alé nan sans lakonfésion. Alélouya ki vi-n anvan lévanjil la di: "Bondié voyé Pitit li-a pou padonnin péché nou yo" (1 Jn 4,10b). Konsa litiji-a édé nou réfléchi sou sans péché, konvèsion, padon.

*

* *

DOUZIÈM DIMANCH ÒDINÈ A

Jézu di nou: pa pè lèzom; sa nou tandé nan sékrè-a, sé pou nou déklaré-l byin fò. Sa nou résévoua-a, sé pou nou déklaré-l klè nan konduit nou ak nan paròl nou, antan nou sèvi Jézu témouin, pandan nou konté sou fòs léspri Sin-an, k-ap ba nou sans padon, sèvis, obéyisans, charité, lafoua, priyè, sakrifis, lapè, éfò, fidélité, apostola, vérité, konfians. N-ap édé bati Rouayom Bondié-a, antan n-ap batay kont sa-k mal, pou sa-k byin-an ranpòtè laviktoua, pou yo rékonèt pouvoua Bondié ki anlè tout bagay; nou bézouin limiè pou rout la, koté n-ap chèché Bondié-a, antan n-ap suiv Jézu-Kri-a nan répons pèsonèl nou ba li, antan nou antré pi fon anndan kè nou, pou nou viv tou pòv, tou sinp, pou léspri Sin-an donnin frui nan nou.

Légliz sé tankou yon mozayik, koté chak moun sé yon désin; sé tankou yon bouké, koté chak moun sé yon flè; sé tankou yon fraz, koté chak moun sé yon lèt; sé tankou yon Kò, koté chak moun sé yon manb. Léspri Sin-an ba nou chak kalité spésial pou avantaj tout kominoté-a. Sé pou-l akonpagné nou ak fòs li pou mision témouagnaj nou-an donnin bon rézilta avèk frui léspri Sin yo Sin Pòl détayé bay Galat yo, lè-l palé yo osijè; charité, kè kontan, kè pozé, pasians, sèvis, bon kè, konfians nan lòt yo, dousè sakrifis (Gal 5, 22). Sé sémans sa-a li dépozé nan kè nou avèk sèt kado-l yo: Sajès, Intélijans, Konsèy, Fòs, Sians, Piété, Krint. Sèlman sé nan féblès fòs li déplouayé, sé nan fènoua limiè-l kléré, sé nan ézitation konsèy li chèché chémin-l, sé nan povreté sajès li éklaté. Plis nou rabésé tèt nou, sé plis l-ap sèvi alèz avèk nou pou-l réalizé mèvèy li yo, jan-l té fè avèk la Trè Sint Vièj Mari-a; Koté la Trè Sint Vièj Mari yé, léspri Sin-an la. N-ap mandé-l pou-l kinbé min nou, antan n-ap maché sou rout pèlérinaj lafoua-a, pou nou sèvi témouin lavérité.

*

* * *

DOUZIÈM DIMANCH ÒDINÈ B

Jézu ap dòmi pandan tanpèt la ap ménasé pou-l chaviré batiman-an. Sèlman plas koté Jézu kouché-a sé sou kousin-an, koté kapitèn batiman-an konn chita-a pou-l gouvèné-a (Mc 4,38), sa vlé di: minm si l-ap dòmi, sé li minm toujou k-ap kondui batiman-an. Psòm nan di: "Li pap dòmi, li pap minm kabicha, sila-a k-ap véyé sou Israèl la" (Ps 121,4). Solèy pa gin doua jinnin nou lajounin ni lali-n nan nuit, Granmèt la ap protèjé nou anba tou sa ki mal, l-ap véyé sou nou lè n-ap pati, lè n-ap tounin, li toujou bò koté nou. Non sèlman dlo ap plin batiman-an, min sé nannuit (Mc 4,35), pèsòn pa ouè koté pou-l t-a sovè kò-l minm alanaj, pa gin dòt sékou ki t-a kapab sòti atè pou vi-n édé yo. Jan Jézu ap dòmi-an, sa fè sonjé fason Jonas t-ap dòmi nan fon batiman-an lè té gin tanpèt la (Jon 1,4-5). Yo té jété Jonas nan lanmè-a, minm lè-a dlo-a té kalmé. Jézu di: Juif yo ap chèché sign, sé sèl sign Jonas la y-ap ba yo (Mt 16,4; 12,36-41). Sé li minm ki réalizé sa istoua Jonas la té réprézanté-a. Sé li minm k-ap mouri pou tout moun kapab sovè.

Jézu invité nou pou nou gin lafoua. Lafoua-a fè nou pa pran tèt chajé lè gin boulvès, lè tout bagay tèt anba. Nou doué rété kalm, minm si yo fè nou répròch, y-ap mandé nou pou nou souké kò nou, pou nou pa rét ap dòmi trankil konsa, pou nou antré nan batay minm jan ak tout moun, pou-n ap monté-désann, touché tout bagay san nou pa ouè klè sa n-ap réglé, pou nou bay kò nou mouvman, pou yo di n-ap fè kichòy. Sé pa atitid yon krétyin sa. Sa sé moun k-ap aji pou fè ouè, pou fè konprann sé yo minm k-ap sovè tè-a. Sé Jézu minm ki té di patizan-l yo: "an nou travèsé lòt bò lanmè" (Mc 4,35). Paròl li toujou réalizé. Koté-l vlé rivé avèk nou-an, l-ap toujou rivé la, minm si disèt bariè drésé sou rout nou. Nan lavi nou sé konsa. Bondié fi-n palé. Difikilté ki vi-n prezanté, sé éséyé y-ap éséyé lafoua nou. Min yo pa kapab baré chémin nou. Sé paské nou konnin sa ki fè nou rété an-pè, san nou pa trakasé, san nou pa pran tèt chajé. Sé minm Jézu ki té maché sou dlo-a, (Mc 6,45-52; Mt 14,22-33; Jn 6,16-21), sé li minm k-ap dòmi nan batiman-an pandan tanpèt la. Nan pouin anyin li pa kapab fè. Li kréyé sièl la ak tè-a, li ranmasé dlo yo yon koté, li fè lanmè rouj la fann dé mouatié pou bay pèp Israèl la pasé, li fann lariviè Joudin-an pou pèp la antré nan péyi-a; nan pouin anyin li pa kapab fè.

Difikilté sou pa déyò sé youn, difikilté sou pa anndan sé dé. Nou kapab réyisi rété kalm sou pa déyò, pandan tout moun ap boulvèsé kò yo pou yo chèché évité yon danjé ki sanblé l-ap ménasé tout yon kominoté. Min lè sé sou pa anndan difikilté sa yo lévé, san pèsòn déyò pa kapab konnin ni soupsoné sa k-ap pasé anndan fon kè nou, lè sa-a nou bézouin plis lafoua

toujou, paské anndan fon kè nou, tankou nan batiman Sin Piè-a pandan tanpèt la, Jézu ap dòmi, nou gin inpréssion sé koulé n-ap koulé apik, san li minm li pa fè yon mouvman. Sé mati sa-a Sint Tèrèz lanfan Jézu té pasé pandan sètan. Alafin li té gin tèlman dout kont lafoua, li té blijé ékri tout "Credo"-a sou yon papié ak pròp san li, li té mété-l nan lévanjil li-a ki té toujou sou kè-l. Chak foua li gin yon dout sou lafoua, li touché papié-a ak min-l pou-l fè yon "acte de foi", minm si-l pa santi kouraj pou-l palé. Li di: nan dènié ané lavi-l sa-a, li fè plis "acte de foi" pasé nan tout lavi-l. Tanzantan sé tankou yon miray ki drésé rotè sièl la, avèk yon pakèt voua k-ap di-l: "avansé, avancé, pou-ou tonbé nan lanmò, koté sé fènoua sèlman ki ginyin-an, koté-ou pap jouinn anyin minm nan". Li té pè répété paròl sa yo minm, pou-l pa-t kité léspri-l sal avèk yo. Gin yon Sin ki té gin gro tantasion anndan fon kè-l, li batay kont yo, min li santi li pou kont li. Lè tantasion yo fi-n pati, li mandé Jézu koté-l té yé pandan li minm li t-ap batay konsa-a, Jézu réponn li li té nan kè-l, li t-ap lapriyé pou li.

Prézans Jézu la, sé lafoua pou nou ginyin nan li. Li té di Apot yo nan finisman sou pé Jédi-Sin-an: "Kouraj, mouin ranpòté laviktoua sou tè-a" (Jn 16,33). Minm jan ak patizan yo nan batiman-an, kèkfoua nou konn abitué souké Jézu pou nou fè-l révéyé, lè nou gin difikilté soua sou pa déyé, soua sou pa anndan. Époutan si nou gin lafoua tout bon vré, nou doué respékté silans Granmèt la k-ap éséyé landirans nou. Minm jan li minm li rét kè pozé-a, sé konsa nou minm pou nou rét kè pozé tou. Nan prémié léktu douzièm dimanch òdinè B-a, Bondié di Jòb pou-l pa trakasé kò-l dévan difikilté li rankontré yo, pou-l mété konfians li sou li, paské sé li minm ki té fè lanm dlo yo rét trankil (Jb 38,1-11 = prémié léktu). Li gin tout pouvoua. Psòm-répons la montré kijan Granmèt la kalmé tanpèt la sou lanmè-a pou vouayajè yo ki té rivé sou bò lanmò, ki té gin kè yo rivé jous nan bouch yo, tèlman yo té pè (Ps 106 = 107). N-ap mandé Manman Mari lafoua li minm li té ginyin-an, malgré Jézu té di-l sa-k ginyin ant li minm avèk li, lè-l pa ko rivé (Jn 2,4), li té viré nan diréksion moun ki t-ap sèvi yo, li té di yo tou sa Jézu di yo sé pou yo fè-l (Jn 2,5). Jézu fè mirak la vré akòz lafoua-l. Minm si nou gin inpréssion Jézu pa sou bò nou minm, sé pou nou kontinyé maché kòm si nou té déjà ginyin sa nou mandé-l la. Sé sa ki fè-l plézi, sé lafoua nou. Abraam té fè Bondié plézi avèk lafoua-l. Lafoua nou ap fè nou monté tout mòn ki ginyin. Ak lafoua, n-ap fè Bondié plézi minm si nou fè lézòm déplézi, paské nou pap maché nan minm sans avèk yo nan tout ti zigzag y-ap pran, n-ap rét fèm, n-ap maché douat, n-ap rét kè pozé, minm nan mitan tout kalité boulvès, tout kalité tanpèt, antan nou konnin yon sèl mo Jézu ap di l-ap mét tout bagay nan ròl yo, l-ap fè tout moun jouinn plas yo. Mouins

nou défann tèt nou, sé plis l-ap pran défans nou. Sin Pòl di: Si Bondié pou nou, kilès ki kapab kont nou? (Rom 8,31). Épi anndan fon kè nou, minm si jan Sin Pòl di-a, nou ouè byin pou nou fè-a épi nou pa ouè kijan pou nou fè-l, nou ouè mal la pou nou évité-a, min nou pa ouè kijan pou nou évité-l (Rom 7,14-25), nou doué gin konfians kan minm, paské kaptinn batiman-an la, minm si-l pa fè mouvman, minm si l-ap dòmi, kè-l ap véyé (Ct 5,2; cf Mt 25,4), sé li minm k-ap kondui bato-a.

Anndan fon kè-m, nan plas kaptinn nan,
 Granmèt la kinbé gouvènay la,
 Tanpèt, loraj mèt grondé déyò
 Sé li minm k-ap kondui bato-m nan.

*

* *

DOUZIÈM DIMANCH ÒDINÈ C

Lè yo t-ap tann Kris la, yo té konprann sé té yon sovè politik. Sé poua patizan Émayus yo té pran désépsion, yo té di: nou té konprann sé li minm ki t-ap délivré Israël... Lé Jézu ap monté nan sièl, patizan yo té gin éspoua sa-a toujou: Granmèt, éské sé koulié-a ou-ap réfè ringn Israël la? Pitit David la té sansé vi-n réprann térioua lontan yo, chasé Romin yo k-ap okipé péyi-a. Sé nan sans sa-a y-ap bat bravo pou Jézu kòm pitit David, y-ap rélé viv, Ozana pou li, jou Ramo yo. Lé yo ouè yo pa réyisi avèk li, yo viré kò yo kot Barabas. Jézu évité yo dépi lè-l té fi-n bay pin yo nan savann nan, li té ouè mouvman yo pou yo fé-l roua-a.

Kris la, sé sévité k-ap soufri-a. Lè Piè déklaré Jézu sé Mési, Jézu pasé-l lòd pou-l pa di pèsòn anyin, paské sé pa-t sans pa-l la mo sa-a gin nan bouch yo. Jézu kòmansé fè lédikasion Apot li yo sou késion sa-a. Li lévé voual lakoua-a, soufrans, réjè, lanmò, Réziréksion. Li invité tout moun ki vlé suiv li pou yo pran minm ti chémin jinnin lakoua-a, chak jou. Zakari mandé pou yo gadé sila-a ki gin ké-l pèsé-a (Za 12,10-11; cf Lc 9,18-24).

*

Nan tan yo déklaré mésaj Zakari ki sèvi kòm prémié léktu pou douzièm dimanch òdinè C-a (Za 12,10-11), sé té apré ané 332 avan Jézu-Kri, lè Aléksann lé Gran, roua Grèk yo, té ranpoté laviktoua sou lamé Pès yo. Pèp Israël la té déjà fi-n tounin sot nan égzil Babilòn dépi désanzan. Li té nan péyi Palésti-n nan. Sèlman pèp Pès yo t-ap fè-l pasé tray. Lè-l té nan égzil Babilòn nan, Sirius roua Pès yo té délivré-l anba min Nabukodonozò, roua Babilonyin yo. Sèlman lontan apré li, lòt roua Pès yo té vi-n chanjé politik parapò ak pèp Israël la. Nan mizè pèp la t-ap pasé li voyé jé-l gadé ki koté Mési-a ap vi-n délivré-l. Pandan lontan li té konprann sé té Sirius ki té Mési-a. Li détròmpe. Lè Aléksann lé Gran ranpoté laviktoua sou Pès yo, pèp Israël konprann sé Aléksann ki gin ròl Mési-a, yo konprann sé li minm Bondié sakré pou-l vi-n délivré pèp la sot anba min roua Pès yo. Éspoua yo ap grandí ofi a mézi pou ouè kijan l-ap maché sot nan laviktoua al nan laviktoua. Min apré sa yo jouinn désépsion. Pasaj Zakari ki sèvi pou douzièm dimanch òdinè C-a (Za 10,12-11), li ékri apré Joël, avan Ékléziastik. Sé "Jou Granmèt la" k-ap vini, min sé pa jan pèp Israël la té konprann nan. Désépsion li jouinn nan pèmèt yon nétouyaj sou konsépsion li té ginyin osijè Mési-a. Mési k-ap vini-an, sé pa ak zam lagè l-ap krazé-brizé, l-ap rivé tou dou antan-l li fè kò-l tou piti, li monté sou yon ti bourik (Za 9,9 = cf dimanch Ramo), li vi-n pou-l bay kè pozé, li pa vi-n sou chéval, ki té konn sèvi pou fè lagè (Gn 49,11; 1 R 1,33; cf Ex 14,9; Za 1,7-11). Lé

Profèt la di: y-ap gadé nan diréksion sila-a yo té transpèsé-a (Za 12,10), li fè sonjé sa-k té rivé roua Jozias nan Mégiddo dépi nan ané 609. Lè sa-a tout pèp la té konprann Jozias sé té Mési-a, sé li minm ki t-ap fè réfòm, dapré sa liv Détéronòm nan té réklamé-a, yo te konté sou li anpil tankou pi bon roua ki ginyin. Sèlman li mouri nan lagè, antan-l t-ap baré rout roua péyi Éjip la, Néko II, ki t-ap monté al ataké Nabukodono zò nan vil Kakémich, sou bò lariviè Léfrat. Sé youn nan pi gran dèy pèp Israèl té pran, lè Jozias mouri. Pasaj Zakari ki sèvi pou douzièm dimanch odinè C-a (Za 12,10-11), vlé fè konprann sé ak lanmò vré Mési-a ap sovè pèp li-a. Sé pou sa Sin Jan sité pasaj sa-a lè Jézu mouri sou Koua-a, li di: "y-ap gadé Sila-a yo té transpèsé-a" (Jn 19,37; Ap 1,7). Sé konsa tou kantik Sèvitè Granmèt la nan liv Izayi-a montré sé ak soufrans li Sèvitè-a ap sovè pèp la. (Is 52, 13,-53,12 = cf Vandrédi-Sin). Lè Apot yo di Jézu li sé Mési-a, yo té konprann sé yon Mési k-ap vi-n réinstalé gouvènman David la (Ac 1,6), yo té déjà prèt ap mandé yon plas adouat, yon plas agòch (Mc 10,37). Li fé yo konprann sé pa sa,. Li tou profité avèti yo ki jan li gin pou-l mouri-lévé, pou-l sovè pèp la. Sé sa lévanjil douzièm dimanch òdinè C-a rapoté (Lc 9,18-24).

Nou konn gin tandans pafoua pou nou réglé afè Bondié avèk fòs, tankou Sin Piè ki té ralé épé pou-l défann Jézu. Nou pa doué pi présé passé Bondié li minm. Liv Izayi-a di nou l-ap maché dousman antan-l l-ap réglé démach li sou kadans mouton ki maché pi dousman yo nan bann nan (Izayi 40,11). Nou pa doué trò présé. Yon jou sé tankou milan pou Bondié, milan sé tankou yon jou. Li kapab réglé afè-l anvan jé bat, minm si-l prann kont tan-l ap gadé (Izayi 60,20). N-ap mandé Manman Mari favè pasians pou nou réglé démach nou sou kadans Bondié li minm, pou nou pa trò cho vlé réglé tout bagay avèk rapidité, épi avèk mouayin ki mété tout fòs nou déyò. Sé nan mouayin pòv Bondié vlé sèvi pou-l sovè légliz li. Lè sòlda Jédéyon yo t-apral nan lagè-a, pou yo batay kont Madianit yo, ki t-ap fè yo passé tray la, Bondié té di Jédéyon pou-l fè yo passé lariviè-a, pou-l véyé fason y-ap bouè dlo-a. Sa-k mété yo alèz pou bouè dlo-a, sé pou-l voyé yo tounin lakay yo; lòt yo ki kontanté yo antan y-ap travèsé dlo-a, ki ba yo jous nan gòj la, pou yo bouè antan yo mété bouch yo nan riviè-a karéman san yo pa sispann travèsé, sé yo minm pou-l mété akoté, kòm mouayin k-ap sèvi pou ranpòté laviktoua (Jg 7,5). Sé yon ti ponyin ki rété, sé avèk li laviktoua-a ranpoté, ti "Rès" la. Nou konn gin tantasion pansé Bondié bézouin gran mouayin pou-l réglé afé-l. Sé nan min ti Sint Bènadèt, ki pa-t konn li ni ékri la Trè Sint Vièj mété gran dògm Imakilé Konsépsion, ki té kolé ata pi gran Téolojyin ki ginyin tankou Sin Toma d-Akin ak Sin Bèna. Sé nan min Sin Piè Jézu rinmèt klé légliz li-a, malgré Sin Piè pa-t janm passé sou ban lékòl (Ac 4,13).

Sin Pòl di nou sa-k pòv parapò lèzòm, sé li minm Bondié chouazi pou lèzòm pa konprann sé ak fòs yo yo réglé afè Bondié. Plas échèk nan lavi nou, sé minm plas lakoua-a. Sa-k échèk pou nou, li laviktoua pou Bondié. Sé pou nou aprann gadé tout bagay avèk jé Bondié. N-ap dékouvri sans yo ki kaché pou lèzòm. Fason Bondié konsidéré, sé pa konsa lèzòm konsidéré (Izayi 55,8-9). Minm jan sièl la rò anlè tè-a, sé konsa pansé Bondié dépasé pansé lèzòm. Aktivité nou tankou yon ti sémans ki tonbé nan tè-a; si-l pa mouri, l-ap rété pou kont li; si-l asépté mouri la-p donnin frui yo pa kapab konté (Jn 12,34). Sé lafoua pou nou ginyin nan conduit nou. Sé pou nou mét éspérans nou nan Bondié k-ap aji san nou pa konnin. Li lib. Anyin pap jinnin-l. Plan lèzòm pa gin doua dékontrolé-l. Li fè kòm si li pa sou bò yo, li kite yo ranjé tout plan yo byin ranjé; min si-l pa vlé plan-an abouti, anyin pap maché. Si Granmèt la pa bati kay la, sé pou bontan mason yo ap travay (Ps 127,1). Délivrans nou sé sou lakoua-a li pandié. Pa gin dòt mouayin ki sovè nou (cf Ga 3,13). Antan nou pran abitud fè sa premié léktu douzièm dimanch òdinè C-a di nou-an (Za 12,10-11), pou nou gadé nan diréksion Sila-a yo transpèsé-a, sa vlé di pran tan nou fè "oraïson" fè contemplation" antan nou fiksé jé nou sou Jézu-Kri ki klouré sou Koua-a, antan nou kalkilé mèvèy sakré Koua-a, n-ap ouè plas li nan plan Bondié ginyin pou nou, n-ap fè sa Sin Pòl di nou-an: n-ap réalizé nan kò nou sa-k manké nan soufrans Jézu-Kri pou Kò-l ki légliz la (Col 1,25).

*

Lévanjil la montré nou kijan Jézu gin pou-l soufri anpil pou-l instalé péyi koté Bondié Roua-a, (Lc 9,18-24). Sé minm késion sa-a tou premié léktu-a palé (Za 12,10-11), li montré kijan roua Jozias té mouri nan ané 609 Mégiddo, lè Faraon Éjip la, Néko II, té monté pou-l al batay kont roua Babilòn nan nan la vil Karkémich, pou-l té poté sékou bay roua Asiri-a, roua Jozias pa-t vlé kite Néko II pasé nan péyi-l; roua Néko II touyé Jozias nan chémin Kamèl la. Jozias sé té pi bon roua, li minm ak Ézékias, sé sou tan Jozias yo té jouinn liv Détéronòm nan nan Tanp la, yo té komansé rénouvle mantalité pèp la ki té dégradé dépi santan, li té kòmansé travay sa-a dépi nan ané 622 lè yo té jouinn liv Détéronòm nan nan Tanp la, sé té sou tan Profèt Jérémi. Tout moun té konté sou Jozias pou-l réfè péyi roua David la. Li konmasé byin. Min lanmò-l dékourajé pèp la. Jérémi fè yon chanté dèy yo rélé Lamantasion, pou yo fè dèy li. Sé tout bagay sa yo liv Zakari-a raplé, antan-l fè ouè vré Mési-a sé pa nan lagè l-ap sovè pèp li-a; okontrè Mési-a sé sou yon ti bourik li vini, antan-l poté lapè. Li tou dou (Za 9,9). Sé lidé sa-a ki nan lévanjil la tou, sé pou sa Jézu fè Apot yo lobsèvasion pou yo pa fè konnin si-l sé Mési-a, paské yo tap tann yon Mési ki tap ranpòtè

laviktoua avèk fòs lézam, min li minm li vini tou dou, tou pòv, tou kaché, li pito chouazi "Serviteur souffrant"-an, sa méssaj Izayi-a palé sou li-a (Is 53). Psòm-répons la (Ps 62 = 63), sé yon Psòm pòv: moun ki souaf Bondié. Réfrin Alélouya anvan lévanjil la montré Jézu sé Bon Gadyin-an, sila-a ki bay lavi-l pou mouton-l yo (Jn 10,27).

*

Langaj Koua-a, sé yon foli pou moun k-ap pèdi yo, min sé Sajès Bondié ki chouazi chimin sa-a pou-l sovè moun yo sou tè-a. Pou nou rivé sovè tout bon vré, fò-n aksépté pèdi sa-k sèvi nou tankou rasi-n pou fè nou kolé sou tè-a. Natanaèl pa-t vlé kouè, lè Filip té vi-n di-l yo jouinn Mési-a, sa Moyiz té palé osijè-l la. Li di sé pa nan ti bouk Nazarèt Mési-a kapab soti pou-l délivré pèp Israèl anba min Romin yo. Sé Barabas Juif yo fè lagé, paské li pa prezanté mouvman k-ap chèché soti anba pouvoua Romin yo avèk fòs batay. Sé yon moun konsa Juif yo t-ap tann. Min yo pran désépsion, lè yo ouè sé yon Mouton ki rivé dévan yo. Profèt Izayi té anonsé-l. Li tankou yon mouton y-ap minnin labatoua. Jan-Batis vi-n montré-l; Min Mouton Bondié-a ki ouété péché sou tè-a. Min Jan-Batis rivé yon pouin dékourajman pran-l, antan-l nan prizon-an, li voyé mandé Jézu si sé li k-ap vini-an oubyin si sé yon lòt pou yo tann. Yo pa-t ko kapab fi-n konprann vré lènmi-an sé péché-a, sé li minm ki sous tout malè, sé li minm pou ouété anvan. Sé pou sa lè Pèp la té délivré anba pouvoua Faraon-an, sé yon Mouton yo té sakrifé jou Pak la. Dépi davans, tankou an parabòl, sé yon bélié Abraam té sakrifé nan plas pitit li Izaak sou mòn Morija-a (Gn 22,13).

Prémié léktu douzièm dimanch odinè C-a montré nou kijan pèp la ap rékòmansé fè minm dèy, li té fè pou roua Jozias la, lè Faraon Néko té touyé-l nan plinn Mégiddo-a. Époutan sé li minm pèp la té konsidéré kòm vré roua k-ap réfè péyi-a jan-l té yé sou tan roua David la. Méssaj Zakari-a di pèp la ap rékòmansé fé minm dèy sa-a ankò, paské l-ap pran minm désépsion-an ankò dévan konpòtman Granmèt la. Lè Jézu ap mouri, sé prévizion sa-a ki réalizé, dapré fason Sin Jan sité pasaj Zakari-a ki vi-n nan douzièm dimanch odinè C-a: "Y-ap gadé nan diréksion Sila-a yo pèsé-a". Sé pa ak zam vré Roua nou-an ap défann kòz nou, sé ak sakrifis lavi-l, paské vré lènmi-an, sé pa moun, sé Satan. Zam lènmi-an sé péché. Sé lanmò Jézu ki krazé zam péché-a, ki ranpòté laviktoua sou lènmi-an. Pèp la té bouké ak fason Bondié t-ap kondui-l, antan-l li t-ap ba-l jij pou dirijé-l, pandan sé li minm minm ki t-ap kòmandé-l. Pèp la mandé yon roua pou gouvènè-l tankou tout lòt péyi yo, yon roua ki soti nan tèt kolòn lamé-l al batay pou li tankou tout lòt nasion yo (1 Sm 8). Bondié pa-t dakò. Min kòm yo insisté, li di Samuèl ba

yo roua yo mandé-a. Sé Sayul ki vi-n rivé roua. Li maltrété pèp la, li fè-l vi-n pi ésklav pasé avan. Pèp la régrét, min li trò ta. Tout roua k-ap pasé yo, y-ap fè-l pasé nan jé zégui. Ata David ki té kòmansé byin, lè-l rivé yon pouin li konprann sé ak pròp fòs li l-ap sové péyi-l, li fè résansman pou-l kalkilé fòs lamé-l. Bondié puni-l, pou-l aprann li konté sou li nèt (2 Sam 24). Sé pa fòs lèzòm k-ap sové yo. Sé Bondié sèl. Samson té gin fòs, sé vré. Li té réalizé anpil prodij. Min nan min Dalila, li rivé fèb tankou yon ti moun piti. Li pèdi tout avantaj li nan yon sèl jou (Jg 16,4-21). Anvan Jézu monté nan sièl, Apot yo t-ap mandé-l si sé té nan tan sa-a li t-ap réfè péyi roua Israël la, tankou nan tan David la (Ac 1,6). Jézu blijé éspliké yo sé pa sou plan sa-a li yé li minm, sé léspri Sin-an l-ap voyé sou yo pou yo sèvi-l témouin kijan ringn sièl la rivé sou tè-a. Yo pa gin pou instalé sou tè sa-a, nan yon pòsion téréin koté yo monté drapo yo an fas lòt péyi yo. Yo gin pou yo déplasé al nan tout péyi antan y-ap fè rékonnèt péyi koté Bondié Roua-a tou pré, pou fè moun yo chanjé fason y-ap viv, pou yo kouè nan Bòn Nouvél la, pou Bondié kapab Roua sou tout pèp, pou délivrans li-a réalizé nan kè tout moun.

Dézièm léktu douzièm dimanch òdinè C-a di nou nan pouin ni Juif, ni payin, ni ésklav, ni moun lib, ni gason, ni fi; nou tout fè yon sèl nan Jézu-Kri (Ga 3,26-29). N-ap mandé Manman Mari favè pou-l fè nou aprann bliyé tèt nou, pou nou konsidéré kijan nou tout ansann fè yon sèl nan Kò ak San Jézu-Kri. Li sé Tèt, nou sé Manb. Konsa, olié n-ap chèché youn batay kont lòt pou asiré avantaj pèsonèl nou oubyin intéré group nou, oubyin préokipasion pròp péyi nou, n-a éséyé fè sa nou kapab pou nou instalé Ringn lapè-a ki san frontiè-a.

Moun ki vlé vi-n apré-m pou-l suiv mouin, fò-l aksépté bliyé tèt li pou-l pran koua-l chak jou pou-l suiv mouin, fò-l aksépté pèdi lavi-l poutèt pa-m, pou-l sové-l (Lc 9,23). Pèp la t-ap tann Mési k-ap vi-n délivré-l anba min lènmi-l, li rankontré Mouton ki rét an silans dévan labatoua (Mt 11, 2; Jn 1,29; Is 53,7; Lc 24,21; Jn 6,15; 18,16), li rankontré Jozias ki pèdi batay dévan Mégiddo (2 R 22,29; 2 Ch 35,19; Jer 22,10; Za 12,10), li rankontré Sayul ki fè-l fè kòvé, ki fè-l vi-n ésklav (1 Sm 8,5ss), li rankontré David ki pran pinision poutèt résansman (1Ch 21,1ss), li rankontré Samson ki bay Dalila tout fòs li ginyin (Jg 16, 4ss), li rankontré léspri ki désann sou li pou-l sèvi témouin (Ac 1, 6ss). Li jouinn gro désépsion dévan konpòtman Granmèt la.

*

* *

TRÈZIÈM DIMANCH ÒDINÈ A

"Moun ki résévoua nou, sé mouin minm li résévoua. Moun ki résévoua mouin, li résévoua Sila-a ki voyé-m nan" (Réfrin pou Magnifikat premié Vèp 13èm dimanch òdinè). Réfrin Magnifikat pou premié Vèp dimanch sa-a, li ranmasé prinsipal lidé trèzièm dimanch òdinè A-a. Jézu di nou sa nan lévanjil la (Mt 10, 17-42). Premié léktu-a rakonté istoua Profèt Élizé ki té fè ladésant kay madanm nan ki té rich la, nan vil Sunam nan (2 R, 4, 8-16). Sa raplé nou Profèt Éli vèv Sarépta-a té résévoua-a. Sa fè nou sonjé Lidia ki té ofri Sin Pòl lospitalité nan vil Filip la. Sé konsa tou Mat té résévoua Jézu lakay li. Abraam té fè jès sa-a pou toua Pèsonaj yo li té ouè ki t-ap pasé dévan pòt li-a. Li té invité yo vi-n atab. Sé té Bondié minm an toua Pèsòn ki té parèt dévan-l. Bondié té rékonpansé-l antan-l fè madanm li, Sara, fè yon pitit, malgré Sara pa-t kapab fè pitit la épi li té pasé laj pou sa. Sé konsa nan premié léktu-a Profèt Élizé di minm paròl la Bondié té di Abraam osijè Sara-a. Li di madanm Sunam nan: Ané prochèn, nan minm épòk sa-a, ou-ap gin yon pitit sou bra-ou". Résévoua étranjé lakay nou, sa fè pati sa yo rélé: "les sept œuvres de miséricorde corporelle", jan Tobi té konn fè-a. Min lidé trèzièm dimanch òdinè Ané A-a, sé pa sèlman kòm étranjé yo résévoua moun nan, min kòm Profèt, jan lévanjil la di-a. Élizé sé té yon Profèt. Sé yon moun ki gin yon mision Bondié konfié-l. Pou sa Profèt la blijé kité lakay li, li pa gin ni papa, ni manman, ni frè, ni sè, ni péyi, ni kay, ni byin, jan Jézu avèti nan kòmansman lévanjil trèzièm dimanch òdinè A-a: "Moun ki rinmin manman-l oubyin papa-l plis pasé-m, li pa mérité pou-l vi-n tounin patizan-m". Lè Bondié té bay Pèp Israël la tè Kanaan-an, li té mété yon pòsion pou tout fanmiy Jakòb yo, sof pou ras Lévi-a. Sèké ras Lévi-a té konsakré pou Granmèt la, pou sèvis li. Sé Granmèt la ki té sèvi-l kòm pòsion pa-l (Ps 16). Sé poua tout lòt fanmiy yo té konn mét ladim akoté, pou yo bay nan kèt. Sa té sèvi pou pitit Lévi yo, pou yo pa pran tèt chajé sou kèsion sa-a, pou yo konsakré tout tan yo nan sèvis Granmèt la. Konsa moun nan ki résévoua Profèt la, li résévoua yon misionè Bondié voyé. Sé pa yon sinp étranjé k-ap maché chèché lavi tout koté. Sé yon moun ki aksépté vi-n tounin étranjé pou pròp frè-l, ki fè tankou Abraam, ki pati antan-l kité tout rasi-n li.

Nan Lèt Ansiklik Pap Jan-Pòl II ékri osijè Mari Manman Sila-a ki délivré nou-an ("Redemptoris Mater"), li insisté sou pèlérinaj lafoua-a. Nan sans sa-a sé tout Pèp la ki pèlérin. Minm si nou instalé yon koté, nou doué viv tankou étranjé, san nou pa kolé ak byin nou ginyin, paské yon lè ap rivé n-ap blijé kité tout bagay pou-n al nan péyi koté Bondié kité yon plas pou nou-an. Sé dépi antan nou anba isit la pou nou viv nan pèlérinaj lafoua sa-a, ansanm

ak la Trè Sint Vièj Mari. Dépi léspri Sin-an té désann sou la Trè Sint Vièj Mari, li té fè-l poté Pitit Bondié-a nan vant, la minm li pati sou rout, l-al kay kouzi-n li Élizabèt, pou-l poté mésaj la ba li épi pou-l sèvi-l. Li sou rout pou-l al Bétléèm, koté y-ap fè résansman-an, pa gin plas pou li, yo pa résevoua-l, sé nan Pak mouton li anfanté ti Pitit Bondié-a, li mété-l kouché sou pay nan ganmèl yo bay bèt yo manjé. Apré karant jou, li pati sou rout, l-al Jérusalèm pou l-al ofri ti Pitit la bay Bondié Papa-a, tankou Prémie Pitit ki louvri rout pou tout kréasion-an. Li blijé pati sou rout ankò, l-al abité jous nan Nò Nazarèt. Lè Pitit la gin douzan, li pati avèk li sou rout, pou-l al nan pèlerinaj lafoua Jérusalèm, jous li pèdi ti Pitit la, li vi-n jouinn li apré troua jou nan Tanp la. Répons ti Pitit la ba li-a, sé yon répons pèlerinaj: Sé nan lakay Papa-l pou-l chèché-l. Kay sa-a sé nan sièl la li yé. Sou tè sa-a sé nan pèlerinaj nou yé, sé sou rout nou yé, pou nou montré lèt yo tankou Profèt kay yo pa sou tè sa-a, li nan Sièl la. Nan priyè Pap Jan Pòl II té konpozé alokasion Ané Marial la, an 1987, li té insisté sou pèlerinaj lafoua sa-a, k-ap kondui nou sou chémin lapè-a. Avèk li n-ap mandé Manman Mari pou-l kinbé min nou sou rout la pou nou maché san fébli: "nous te confions l'Église qui te reconnaît et t'invoque comme Mère. Toi qui sur terre l'a précédée dans son pèlerinage de la foi, fortifie la dans les difficultés et les épreuves, et fais que, dans le monde, elle soit toujours plus efficacement le signe et l'instrument de l'union intime avec Dieu et de l'unité de tout le genre humain".

Nou tout ki paré pou-n pati nan vouayaj, li lè pou-n lévé, pou-n kanpé, pou-n maché, zétoual la kléré dévan jou, solèy la tou prêt pou-l lévé. Dépi Abraam sé maché n-ap maché, péyi pou-n pozé-a sé li n-ap chèché. Baton nou nan min nou, sandal nou nan pié-nou, sinti nou nan tay nou, éspoua nou nan kè-n. Minm si nou pa konn rout, nou pap pè maché, Manman nou avèk nou, nou pap pèdi rout.

*

Jès madanm nan nan vil Sunam nan té fè pou Profèt Élizé-a, li résevoua rékonpans. Li té abityué ouè Élizé ap pasé souvan pou-l al préché mision, tankou pòv étranjé. Kè-l fè-l mal pou li. Li invité-l manjé. Li paré chanb pou li. Chak foua Élizé té abityué fè ladésant la, lè-l ap pasé. Kòm madanm nan pa-t kapab fè pitit, Élizé lapriyè pou li. Bondié kouté priyè-l. Madanm nan vi-n fè yon pitit (2 R 4, 8-11.14-16a). Sé konsa Abraam té ouè toua Pèsonaj ap pasé bò lakay li nan dézè-a yon lè, gro midi, koté-l té chita anba pié boua-d chèn Manbré-a. Li invité yo antré. Li ba yo dlo pou rafréchi kò yo. Li kouri vit fè madanm li, Sara, préparé manjé pou yo. Min toua Pèsonaj sa yo, sé té Bondié li minm an toua Pèsòn ki té parèt dévan Abraam, san

Abraam pa-t konnin. Sara madanm Abraam, pa-t kapab fè pitit non plis tou. Épi li té pasé laj katrévindizan. Bondié promèt Abraam Sara, madanm li, ap gin yon pitit anvan un-an. Réyéلمان vré, sé sa-k rivé (Gn 18, 1-15). Okinn jès lacharité pap rété san rékonpans. Résévoua étranjé lakay nou, sé résévoua Bondié li minm. Lèt Ébré yo di: lè nou abitué résévoua étranjé lakay nou, n-ap résévoua Anj Bondié san nou pa konnin (He 13,2; cf R 12,13). Sin Pòl té rivé Filip yon lè, pandan li t-ap maché préché, mision. Antan l-ap préché bò yon larivière gin yon madanm yo rélé Lidia ki t-ap kouté. Madanm nan té rich avèk kòmès toual vlou li té konn ap fè. Madanm nan louvri kè-l pou-l résévoua paròl misionè yo. Lafoua-l donnin frui lacharité. Osito apré prèch la, li di Sin Pòl ak lòt misionè yo: "Si nou kouè mouin vi-n tounin patizan tout bon vré, vi-n fè ladésant lakay mouin". Li fòsé yo; yo aksépté (Ac 16, 14-15). Okinn jès lacharité nou fè pap pèdi. Jézu té konn sou rout souvan. Lè-l pasé nan vil Bétani, Mat té konn résévoua-l byin (Lc 10, 42). Lè Laza, frè Mat la, vi-n mouri, Jézu fè-l lévé pou li (Jn 11, 1-44). Okinn jès lacharité nou fè pap rété san rékonpans. Profèt Éli té rivé Sarépta; té gin grangou nan péyi-a, atèl pouin sé yon ponyin fari-n sèlman yon vèy nan péyi-a té rété nan yon kannari, épi avèk yon ti gout luil nan yon poban. Li té sòti déyò, li t-apral ranmasé dé ti bout boua pou-l fè difé, pou-l kuit yon ti galèt pou li minm avèk sèl ti pitit gason li té ginyin-an. Li té di nan kè-l: "Apré sa, m-apral chita yon koté, m-ap tann lanmò". Profèt Éli vi-n ap pasé, li mandé madanm nan ti gout dlo, lè Profèt la ouè madanm nan pral chèché dlo-a, li pran kouraj li di-l: "Tanpri, poté yon ti moso pin pou mouin tou". Madanm nan éspliké-l sitiason-an. Li di madanm nan: "Fè jan ou désidé-a. Sèlman ban-m manjé anvan; apré sa, ou-a okipé pitit ou-a avèk ou minm". Réyéلمان vré madanm nan obéyi. Dépi lè sa-a, malgré séchrès la, fari-n pa janm manké nan kannari-a, ni luil pa janm manké nan poban-an, joutan Granmèt la voyé lapli sou fas tè-a (1 R 17.1-24). Okinn jès lacharité pap rété san rékonpans. Nan dézè-a, lè foul la té rasanblé pou-l kouté paròl Jézu-a, sé yon ti gason sèlman ki té gin sink ti pin ak dé ti pouason. Li aksépté bay yo. Sa sèvi pou nourri sink mil moun, san konté médam yo ak ti moun yo. Épi ak tou sa, gin anpil rès ki rété (Jn 6, 1-13). Okinn jès lacharité pap rété san rékonpans. Lè dé patizan Émayus yo té rivé pou yo té antré koté yo t-apralé-a, Jézu, ki té sou rout avèk yo, té fè kòmsi l-ap kontinuyé rout li. Yo insisté koté-l, yo di-l: "Rét avèk nou, li déjà byin ta, solèy la fi-n, bésé". Li antré avèk yo. Yo sèvi-l manjé. Pandan y-ap séparé manjé-a, li kasé pin-an, yo rékonèt tou suit sé li minm ki té sou rout avèk yo (Lc 24, 13-35). Okinn jès lacharité pap rété san rékonpans.

Pòv Laza minm té chita nan papòt mésié ki té konn abitué ap fè gran résépsion chak jou-a, san-l pa-t janm okipé-l. Lè yo tou lé dé mouri, Laza monté nan sièl; mésié-a ki té konn ap fè résépsion-an minm, li tonbé nan lanfè. Sé lè sa-a li vi-n sonjé gin yon moun yo rélé Laza. Li mandé Abraam pou-l voyé Laza vi-n vidé yon ti gout dlo sou pouint lang li. Abraam réponn li li trò ta (Lc 16, 20-31) Sé pou nou byin kalkilé pou-n pa maché sou "si-m té konnin". Nou pap bliyé bèl jès Sin Matin té fè-a. Li pa-t minm ko batizé, li té nan katéchis; li té sòlda. Li t-ap fè patrouy sou choual li. Sé té nan tan frédi; té gin lanèj. Li ouè yon pòv kouché atè-a; li pran épé-l, li koupé pròp manto-l an dé, li bay pòv la yon mouatié, li kité lòt mouatié-a pou-l kouvri pròp kò-l. Nan nuit, Jézu parèt dévan-l li di-l: "Matin kouvri-m ak pròp manto pa-l". Mouin té grangou, nou té ban-m manjé; mouin té souaf nou té ban-m bouè, mouin té ni-kò, nou té abiyé-m; mouin té étranjé, nou té résévoua-m; mouin té malad, nou té vizité-m; mouin té nan prizon, nou té vi-n ouè-m. Tout sa nou fè pou youn nan pitit nan frè-m yo, sé pou mouin minm nou té fè-l (Mt 25, 31-46). Okinn jès lacharité pap rété san rékonpans. Lè nou rivé nan dènié kalfou-a, sé sou lacharité Bondié ap jijé nou. Lacharité-a ranmasé tout kòmandman yo (Rom 13, 10). Madanm nan bò pui-a pa-t vlé bay Jézu bouè dlo. Époutan sé Jézu ki promèt li dlo lavi-a (Jn 4, 1-15). Moun Samari yo pa-t vlé résévoua Jézu avèk Apot yo. Jak avèk Jan té vlé fè difé tonbé sot nan sièl sou yo. Jézu fè yo lobsèvasion (Lc 9, 51-56). Sé Bondié ki kondui nou, anyin pap maké nou (Ps 23, 1). Jézu té di Apot yo: Pa poté anyin pou anbarasé nou. Nan ninpòt ki kay yo résévoua nou, rété la, aksépté lospitalité-a, bay moun yo lapè (Lc 10, 1-9). Sé pou nou pran abitud ouè Jézu nan tout frè nou, sitou nan sa ki pi pòv, ki malad, ki nan divès sikonstans difisil, jan Tobit té abitué fè-a, joutan li résévoua lanj Rafayèl, san-l pa konnin. Lanj la akonpagné pitit li, Tobi, nan vouayaj li, li délivré Sara, bèl-fi li-a, anba sèt démon yo rélé Asmodé-a, li géri-l li minm, ki té avèg la (Tb 2; 6; 8; 11). Okinn jès lacharité pa rété san rékonpans. N-ap mandé Manman Mari, Rèn lapè, pou-l louvri kè nou, pou nou aprann résévoua misionè Jézu-Kri voyé koté nou, pou bédiksion-l tonbé sou nou. N-ap sonjé "les sept œuvres de miséricorde corporelle: donner à manger aux affamés, donner à boire aux assoiffés, vêtir les sans-habits, héberger les sans-abris, visiter les malades, visiter les prisonniers, enterrer les morts". (cf "Catéchisme essentiel", livre du Pèlerin, Annus Jub. Redemp. 1983-1984, Rome, 1983, 115; CEC 2447), ni "sept œuvres de miséricorde spirituelles" yo tou: "instruire, conseiller, consoler, conforter, pardonner, supporter avec patience, prier pour les vivants et pour les morts" (CEC, 2447).

*

* *

TRÈZIÈM DIMANCH ÒDINÈ B

Sin Mak rakonté dé istoua ansanm (Mc 5,21-43). Li kòmansé ak youn, li kité-l, li pran yon lòt; apré sa li tounin nan premié-a. Pitit fi Jayi-a ki t-ap mouri-a, épi madanm nan ki t-ap pèdi san dépi douzan-an. Li kòmansé palé osijè ti pitit fi-a ki té malad byin mal la; apré sa, li pasé nan istoua madanm nan ki t-ap pèdi san-an; épi li kité-l pou-l tounin nan istoua ti pitit Jayi-a ki gin tan mouri joutan Jézu fè-l lévé vivan. Sé abitud Sin Mak sa, sitou lè-l vlé insisté sou yon késion; li kòmansé palé osijè késion-an, apré sa li kité-l, li pasé nan yon lòt késion; épi li kité lòt la, pou-l tounin sou premié-a. Sé tankou lè fanmiy Jézu té vi-n chèché-l la, apré sa sé késion Bèlzéboul la, épi sé késion fanmiy Jézu yo ankò ki tounin (Mc 3,19-35). Konsa tou lè-l montré Apot yo Jézu voyé al nan mision-an, épi apré sa sé késion Èròd ak Jan-Batis la, épi li tounin sou késion Apot yo ankò (Mc 6,6-30). Sé konsa tou li kòmansé palé sou figié-a, li kité-l, li pran késion Tanp la, épi li tounin sou késion figié-a ankò (Mc 11,2-26). Konsa ankò nan lapasion Jézu-a, li kòmansé palé sou Sin Piè; apré sa li palé sou tribinal la, li tounin sou Sin Piè ankò, li rétounin sou tribinal la ankò (Mc 14,53-73). Sin Mak plis bay mésaj la nan aksion pasé nan paròl. Li gin anpil bagay pou-l di. Li montré yo nan fason li asosyé évenman yo antré yo. Sa montré tou sé konsa bagay yo té pasé an vif. Sin Piè té témouin. Li pa ranjé istoua yo nan fason pa-l. Sin Mak, sékrète Sin Piè, pran-l jan-l yé-a, tou vif.

Ni nan ka ti pitit fi Jayi-a, ni nan ka madanm nan ki t-ap pèdi san-an, sé **lafoua** ki parèt kòm gran mésaj pou lévanjil trèzièm dimanch òdinè B-a. Guérizon madanm nan k-ap pèdi san dépi douzan-an, sé yon avaloua réziréksion pitit fi Jayi-a ki gin douzan dépi-l fèt la. Jayi sé té yon chèf sinagòg, moun sa yo ki lènmi Jézu-a. Époutan li minm li rékonèt pouvoua Jézu. Lè yon group moun kont nou, sa pa vlé di sé tout moun nan group la ki pa vlé ouè nou. Ginyin sé lokazion yo pa jouinn pou yo montré yo pa dakò avèk group la. Min an patikilié yo pran distans yo (Jn 3,1; 7,50; 19,39; 19,38). Si Jézu résisité pitit fi chèf sinagòg la, sé prèv li vini pou-l réfè ras Juif la nèt, antan l-ap ba-l yon lòt lavi tout nèf. Yo pasé-l nan rizib, lè-l di yo pitit la ap dòmi, sé pa mouri li mouri (Mc 5,40) minm jan y-ap pasé Sin Pòl nan rizib lè l-ap palé osijè réziréksion mò yo (Ac 17,32). Jézu ap di ti fi-a: "Lévé". Sé minm mo sa-a y-ap anplouayé lè y-ap palé osijè Réziréksion Jézu-Kri (Mc 8,31; 9,9.31; 10,34; Ac 1,22; 2,24.31.32; 4,33; 10,41; 13,33-34; 17,3.31; R 1,4). Liv lasajès la di sé akòz lanvi démon-an lanmò-a antré sou tè-a (Sg 1,13-15; 2,21-24 = premié léktu 13^e d.o. B). Lè Jayi mandé Jézu pou-l pozé min sou pitit li-a, li mandé Jézu pou-l fè jès li konn abitué fè lè y-ap géri moun ak lè y-ap chasé démon (Mc 6,5; 7,33; 8,23; 16,18; Lc

4,40; 13,13; Ac 9,12; 28,8; Mc 1,31; 9,27; Mt 9,29). Madanm nan minm pa tann Jézu pozé min sou li. Li té tandé palé osijè Jézu tankou bòn nouvèl délivrans la y-ap déklaré nan mèsaj pak la (Lc 24,19.27.44; Ac 13,29; 18,25; 23,12; 28,31). Malgré li pa-t an-éta pou-l proche koté-l (Lc 15,19.25), pou-l pozé okinn jès sakré sérémoni litiji, li fè yon "acte de **foi**". Sé tankou yon antèn ki kapté yon pòs radio. Jézu santi yon fòs ki soti nan li, fòs léspri Sin-an.

Jès lafoua sa-a li pozé-a, li fè-l avèk krint ak tranbléman, ki santiman krétyin (1 Co 2,3; 2 Co 7,15; Ep 6,5; Ph 2,12). Moyiz té tranblé dévan rajé-a ki t-ap flanbé san-l pa fè sann nan, min li té vlé avansé kan minm (Ex 3). Apot yo Piè, Jak avèk Jan, minm sa k-ap asisté rézireksion pitit fi Jayi-a, lè yo té sou mòn transfigirasion-an, yo té tranblé tou, min Sin Piè té gin lodas mandé Jézu pou-l bati toua joupa (Mc 9,2-8). Dévan Bondié, lafoua fè nou avansé avèk lodas, min nou gin krint ak tranbléman kan minm antan nou dékouvri nou sé péchè, nan limiè Granmèt la. Sé konsa Profèt Izayi té tranblé nan Tanp la lè-l ouè jan Bondié ap montré prezans li (Is 6). Min lafoua-l té fè-l rété nan prezans Granmèt la pou-l kouté mèsaj li, pou Bondié pròpté-l. Sé in pé sa-k rivé Sin Piè nan lapèch la (Lc 5,8-9). Nou gin krint ak tranbléman lè nou nan prezans Bondié; min fò nou t-a tranblé pi plis toujou avèk plis krint ankò, si péché-a t-a rivé séparé nou nèt sot dévan Bondié nan vré lanmò-a. Lanmò ki térib la, sé dézièm lanmò-a (Ap 2,11; 21,8) ki kapab séparé nou nèt avèk Bondié, mandé Bondié padon. Sé péché-a ki kondui ladan-l, zam lanmò-a. Sé péché-a pou nou pè, li minm ki défigiré pòtré nou ki sanblé ak Bondié-a. N-ap mandé Manman Mari lafoua-l pou nou fè tankou madanm nan ki t-ap pèdi san-an, pou nou touché Jézu san nou pa bouskilé-l tankou foul la t-ap fè-a, pou nou touché-l avèk délikatès, antan nou gin kichòy inpòtan pou nou résévoua nan min-l an sékrè. Tou sa nou mandé-l, nou sètin l-ap ba nou-l, minm si lafoua nou grosè yon ti grinn zèb.

*

* *

TRÈZIÈM DIMANCH ÒDINÈ C

Litiji trèzièm dimanch òdinè C-a fè nou réfléchi sou vokasion. Gin anpil moun ki vlé suiv Jézu oubyin Jézu rélé yo (Lc 9,51-62= Évanjil 13° d.o. C); gin youn nan yo ki vlé al anbrasé moun lakay li anvan; Jézu réponn li antan-l fè-l sonjé sa-k té rivé Élizé, lè Profèt Éli té rélé-l la, jan-l yé-a li té blijé suiv Profèt Éli (1 R 19,16b, 19-21). Élizé té vlé al di moun lakay li orévoua, Profèt Éli pa ba-l tan (= premié léktu 13° d.o. C). Élizé t-ap viré tè-a avèk douz makòn bèf, li minm li t-ap dirijé dénié makòn nan. Li té blijé fè atansyon pou-l suiv minm lign tou douat lòt makòn yo ki déja trasé siyon-an dévan-l. Li pa-t gin doua gadé déyé, otréman li t-ap gaté tout travay lòt makòn yo té fi-n fè-a. Sé nan sans sa Jézu di: moun ki fi-n mét min sou instriman pou viré tè-a épi k-ap gadé dèyé, li pa mérité pou-l patizan-l. Jézu intèprété sa nan sans pi ro pasé sinp késion viré tè-a. Nou blijé dégajé sot nan tou sa-k kinbé nou, pou nou kapab lib bay Granmèt la tout atansyon nou. Nou pa kapab chouazi-l nèt épi pou n-ap kinbé yon ti kichòy pou nou, sé pa jès lafoua sa yé. Abraam té bay Izaak nèt. Sé Bondié ki kinbé min-l. Toutotan nou pa fi-n bay tout bagay, nou pa ko bay anyin, oubyin si nou fi-n bay avèk min douat, épi n-ap réprann avèk min goch, sé manké konfians nan Granmèt la. Psòm-répons la di: Granmèt la sé pòsion éritaj nou, (Ps15=16). Psòm sa-a fè sonjé fanmiy Lévi yo, ki konsakré bay Granmèt la, ki pa gin éritaj nan pèp Israèl la, paské sé afè Granmèt la yo gin pou yo okipé; sé lòt onz fanmiy yo ki okipé fè yo jouinn sa-k nésèsè pou yo, antan y-ap bay ladim nan sa yo ginyin. Konsa ras Lévi-a, ras prèt yo ak lévité yo, yo lib pou okipé tout aktivité Granmèt la, pou lòt onz fanmiy Jakòb yo. Réfrin pou Alélouya-a pran répons ti Samuèl la (1 Sam 3,9): "Ou mét palé, Granmèt, sèvitè-ou ap kouté". Sé nan sans sa-a la trè Sint Vièj Mari té bay lakanj Gabriyèl répons li: "Mouin sé Sèvant Granmèt la, sé pou sa fèt pou mouin dapré paròl ou-a" (Lc 1,38). Sé pou sa li kapab di moun yo ka-p sèvi nan nos Kana-a: "Ninpòt ki sa-l di nou, sé pou nou fè-l"; (Jn 2,5).

Gin moun okontrè ki t-a vlé suiv Jézu, min Jézu pa kité yo suiv li jan yo t-a vlé-a, parégzanp moun li té fi-n chasé léjion démon-an sot nan li-a, joutan démon yo ta-l nan bann kochon yo, ki lagé kò yo nan lanmè-a. Moun ki abité péyi Gadarényin yo, koté èvènman sa-a té pasé-a, yo insisté koté Jézu pou-l pati kité péyi yo-a. Yo té pè pou rès bann kochon yo. Kòm Jézu pa-t kapab rété nan pèyi sa-a, Jézu voyé moun nan li té fi-n géri-a pou-l al fè témouagnaj pou li. Moun nan té vlé suiv Jézu, antan Jézu t-ap monté nan kannòt la pou-l travèsé lòt bò lanmè-a. Min Jézu pa-t pèmèt li suiv li.

Jézu ba-l mision pou-l al témouagné lakay li. Sé pa nésésèman nan fason nou vlé suiv Jézu li kité nou suiv li. Gin moun li rélé; yo chèché prêtèks pou yo trinnin oubysin pou détounin chémin li vlé yo suiv la, Jénòm rich la pati avèk sa Pap Jan Pol II rélé yon "tristesse salvatrice". Li pati tou chagrin, paské li té gin anpil richès. Omouin li chagrin, paské li té vlé suiv Jézu. Jézu fè-l ouè klè li pa kapab suiv li avèk tout batanklan sa yo k-ap ankonbré ni pié-l, ni pié lòt patizan-l yo. Si-l chagrin, sé paské omouin li konprann li pa kapab gin kè kontan, kè dégajé toutotan li kinbé richès li yo ki rélé-l chè-mèt, chè-mètrès. Moun k-ap akonpagné vokasion yo, yo doué gin kouraj pou yo klè parapò a bagay k-ap jinnin chémin moun Granmèt la rélé yo, minm si antan yo dévoualé yo sa, yo konnin sa ap provoké yon "tristesse salvatrice". Sé yon tristès, sé vré, min tristès sa-a ap lokasion pou moun nan sovè; paské yon lè ap rivé, l-ap abandoné sa-k jinnin-l nan kan minm, paské li pa kapab rété avèk tristès sa-a tout tan, nanm nou pa fèt pou tristès, li fèt pou kè kontan. Si nou pa avèti sa nou ouè ki jinnin chémin-l, sé nou minm Granmèt la ap mandé kont, paské n-ap kité moun nan nan "illusion" li, l-ap imajiné li kapab sèvi dé mèt alafoua, l-ap trinnin sou chémin pa-l, l-ap fè lòt trinnin tou sou chémin l-ap suiv ansann avèk yo-a, finalman l-ap pèdi rout Granmèt la té trasé pou li-a. Sé pou nou karé, tankou Jézu fè-a, épi dépi prémié kontak, minm si nou pa kapab di tout bagay yon sèl kou, nou blijé ménajé posibilite moun nan ginyin pou-l résévoua dòz la; min nou pa doué kaché anyin, pou nou konplis avèk vokasion ki raté. N-ap mandé Manman Mari pou-l ba nou sajès sa-a k-ap fè nou kapab détékté sa-k jinnin chémin moun Bondié plasé sou rout nou pou nou akonpagné yo, épi tou sa-k jinnin pròp chémin pa nou, pou nou pa trinnin, pou nou pa fè dòt moun trinnin tou akòz négljans nou.

*

* *

KATÒZIÈM DIMANCH ÒDINÈ A

"Jouk mouin fasil pou poté, chaj mouin léjé, déklarasion Granmèt la" (Réfrin Magnifikat pou prémié Vèp 14e d.o. A: cf Mt 11, 25-30 = Évanjil 14e d.o. A). Sin Piè di Résponsab Légliz yo pou yo pa pran pòz chèf yo, pou yo pa kondui bann mouton yo avèk arogans, tankou sé yo sèl ki gin doua sou yo, min pou yo sèvi yo modèl nan konpòtman yo (1 p. 5, 2ss). Li té pran léson sou fason Jézu li minm té kondui tèt li pa rapò a Apot yo (Jn 13, 15; Lc 22, 24ss; Ph 2, 5ss; Ep 5,2; Mt 20, 25ss; Mc 10, 42ss). Li té di: yo rélé-l "Mèt" ak "Profèsè", sé sa-l yé vré; min li konpòté tèt li tankou yon ésklav, li pran dènié plas, li lavé pié Apòt yo, li ba yo léson, yo minm ki t-ap diskité pou prémié plas. Li di yo: chèf yo avèk roua yo, yo fè moun yo rélé yo "Byinfètè", yo trété moun yo tankou sèvitè. Nan pami yo sa pa doué fèt konsa. Okontrè, moun ki gin pi gro responsabilité-a, sé pou-l konpòté tèt li tankou pi piti-a; sa k-ap kòmandé-a, sé pou-l pran ròl ésklav tout lòt yo. Moun toujou rinmin kòmandé lòt moun parèy yo. Lè yo chouazi youn nan group la pou-l pran diréksion-an, gin anpil jalouzi ki konn fèt, paské chak moun santi, sé yon chans yo ouété nan min-l. Sé léspri lafoua ki pou fè nou dépasé mantalité sa-a. Gin moun, plis yo santi rézistans nan group la, sé plis yo mété fòs nan fason y-ap dirijé-a. Époutan moun yo sé pa bout boua, sé intélizans ak volonté ak sansibilité. Ralé minnin kasé. Sin Fransoua-d-Sal di: yo kapab pran plis mouch avèk yon sinp kiyè mièl pasé avèk tout yon barik vinèg. Lékòl Profèt Zakari-a anonsé Roua-Mési-a k-ap vini tankou yon pòv, tou dou, tou sinp, sou yon ti bourik (Za 9, 9-10 = prémié léktu 14e d.o. A). Sé konsa minm Jézu té antré Jérusalèm (Jn 12, 14s; Mt 21, 4; Mc 11, 7; Lc 19, 15ss). Sé lè-l té sou fotèy tribinal la, min-l maré kòm prizonié, li té fè gran déklarasion di li sé Roua (Jn 18, 17). Yo t-ap tann yon Roua ki t-ap krazé brizé (Jn 9, 54); min sé yon Mouton yo ouè (Jn 1, 29), ki kité yo kondui-l labatoua, san-l pa louvri bouch li (Is 53, 7; Jn 19, 9; Lc 23, 9; Ac 8, 32). Sé konsa Jézu di pou nou vi-n jouinn li, nou tout k-ap rédi anba gro chaj, l-ap soulajé nou, l-ap fè nou jouinn répo, sé pou nou pran modèl sou li, li gin yon kè tou dou, tou pòv, chaj li fasil pou poté (Mt 11, 28s = évanjil 14e d.o. A; Ps 53, 23; 37, 5; Pr 3,5; 1 p. 5, 7; Si 24, 19; 51, 23; Ga 5,1; Ac 15, 10). Psòm nan di: "Lagé chaj ou sou Bondié, sé li minm ki pou soutni-ou" (Ps 55, 23).

Laloua lansyin Téstaman-an té konpliké pou réalizé (Ac 15, 10). Bondié té promèt li t-ap bay yon kè tou nèf, yon léspri tou nèf, nan plas kè nou ak léspri nou. Sé anndan kè nou ak léspri nou li t-ap mété nouvo laloua-a (Jr 31, 31ss; Ez 36, 26; 11, 19s; Dt 30, 6ss). Sé laloua rinmin-an (Rom 13, 9; Ga 5, 14). Pou yon moun rinmin tout bon vré, fò-l aksépté gin yon kè ki tou

pòv, ki tou dou. Sé kè Jézu-a anndan kè pa-l, sé Sakré-Kè Jézu-a. Jézu té di: "lè y-ap isé-m anlè Koua-a, m-ap rédi tout moun vi-n jouinn mouin" (Jn 12, 32). Sé yon atirans ki tou dous, sé kòm si l-ap fè nou sign (Lc 22, 61). Li pa ralé nou ak yon kòd nan kou nou (Os 11, 4). Minm mouton-an ki pèdi nan rak la, ki kité bann nan, li pa pran-l ak kout pié pou-l fè-l tounin. Li karésé-l, li poté-l sou zépòl li, li minn-l vi-n jouinn rès bann nan (Lc 15, 4ss; 19, 10; Ez 34, 16). Lè gin danjé, sé li minm ki prezanté tèt li pou-l défann bann mouton yo. Li pa sové kò-l pou-l kité lou-a dévoré yo (1 Sam 17, 34ss; Jn 10, 12; 18, 8). Lè gin divizion nan group la, sé li minm ki chèché mété lapè. Li pa mété lapè antan-l fè jadin-an vi-n tounin savann. Li fè pati ki pa kapab antann yo rivé mété tèt ansanm, pou youn kouté lòt, jous yo rivé mété yo dakò antré yo. Li pa kouri trò vit pou ésoflé bann mouton yo. Li pran ka manman mouton yo k-ap bay ti mouton yo tété, ki pa kapab maché tròp, ni trò vit. Li kadré kadans mach li sou sa-k pi fèb la nan bann mouton yo (Is 40, 11; Gn 33, 13-14). Jézu di: moun ki souaf, sé pou-l vi-n jouinn li; moun ki kouè nan li, sous dlo lavi ap koulé nan kè-l pou tout tan (Jn 7, 37s). N-ap mandé Manman Mari pou nou kité Jézu kondui nou nan kadans li, pou nou minm tou nou kondui lòt yo nan pròp kadans pa-l, ki pa présé, paské li gin tout tan gin tan dévan-l.

*

Lévanjil katòzièm dimanch odinè A-a palé sou dousè ak umilitéé ki nan kè Jézu; li invité nou pran léson nan min-l, paské li tou dou, li tou pòv nan kè-l (Mt 11, 29). Lè Jézu fèk louvri bouch li pou-l préché sou mòn nan, premié foua-a, li di: "Sé chans pou moun ki pòv yo, paské péyi Roua sièl la, sé pou yo li yé" (Mt 5, 3). Minm lè-a, li kontinuyé, li ajouté: "Sé chans pou moun ki dou yo, paské y-ap posédé tè-a" (Mt 5, 4). Jézu dou nan kè-l, Jézu pòv nan kè-l. Sé poua li kapab invité nou pran léson sou li, épi li kapab préché foul yo sa kòm kondision pou yo antré nan sièl la, pou yo posédé paradi-a, vré péyi Bondié té promèt la. Dé kalité sa yo, dousè ak umilitéé-a, Jézu ginyin yo kòm Roua. Sé yon Roua ki tou dou, ki tou pòv, vizion liv Zakari-a prezanté k-ap antré Jérusalèm sou yon ti bourik (Za 9, 9-10 = premié léktu 14e d.o A). Li di l-ap gayé kabouèt lagè yo, sot nan Éfrayim, ak choual yo sot nan Jérusalèm. Sé sou choual yo té konn fè lagè lontan. Lè roua-a fi-n ranpòté laviktoua sou lènmi-l, li antré nan lavil li an trionf, sou choual li, pandan y-ap bat bravo pou li. Rapidité choual la sèvi pou lagè. Si sé mèsaj lapè yon moun vi-n poté, sé sou yon bourik li vini. Sé poua liv Profèt Zakari-a montré nou roua Mési-a ap antré nan vil Jérusalèm nan sou yon ti bourik. Jou fèt ramo yo, sé sou yon ti bourik réyèlman vré Jézu antré nan vil Jérusalèm. Sa vlé di sé lapè li vi-n poté, sé pa lagè (Mt 21, 1-12). L-ap kriyé

sou Jérusalèm l-ap di: "Si sèlman jodi-a ou té kapab konprann mèsaj lapè-a mouin vi-n ofri-ou la! Époutan, li rét kaché nan jé-ou"(Lc 19, 41-44; 13, 34-35; Mt 23, 37-39).

Jézu Roua, li pran posésion péyi-l avèk dousè épi umilité li pa krazé-brizé pou-l instalé pròp tèt li, li pa pran pòz li plis pasé pèsòn; okontrè li rabésé tèt li jous li mouri tankou ésklav sou lakoua, épi l-ap di: "Papa, padonnin yo, yo pa konn sa y-ap fè!" (Lc 23, 34). Sé avèk minm dousè sa-a li promèt bon Laron-an paradi-a, pou minm jou Vandrédi-Sin-an: "An vérité, mouin di-ou, jodi-a minm ou-ap avèk mouin nan paradi-a" (Lc 23, 43). Sé avèk minm dousè ak minm umilité sa-a li pa lévé jé-l sou madanm nan yo té akizé kòm adiltè-a, li sèlman bésé tèt li atè, l-ap ékri sou sab la, épi lè tout moun pati, li kontanté-l mandé-l: "Madanm, koté yo, pèsòn pa kondané-ou?... Mouin minm non plis tou, mouin pa kondané-ou, alé, pa fè péché ankò!" (Jn 8, 1-11). Sé avèk minm dousè sa-a li ramné mouton-an ki té pèdi-a; li pa fè brital avèk li, okontrè li poté-l sou zépòl li, jous li fè-l antré nan pak la (Lc 15, 4-7). Sé avèk minm dousè sa-a li trété fi ki té nan péché-a, ki t-ap vidé losion sou pié-l, ki t-ap kriyé sou pié-l, ki t-ap siyé pié-l ak pròp chévé-l la (Lc 7, 36-50). Sé avèk minm dousè sa-a li korijé Zaché, san-l pa di-l anyin ki t-a sanblé yon rémak sou konduit li. Okontrè li fè-l désann sot sou pié boua-a, li di-l sé lakay li l-ap fè ladésant. Sinp prézans Jézu nan lakay la kont pou fè Zaché foyé konsians li, pou-l rékonèt li pa mérité Jézu fè ladésant lakay li. Sa kont pou fè-l chanjé konduit (Lc 19, 1-10). Jézu Roua, li pa vi-n krazé brizé, li pa vi-n pran pòz li plis pasé pèsòn. Sé yon léson li ba nou, minm jan li té fè pou Apot yo ki t-ap fè diskision pou premié plas la. Li té pran yon ti moun piti li mété-l nan mitan yo, li té invité yo vi-n tou piti konsa pou yo antré nan péyi koté-l Roua-a (Lc 9, 35-37).

Li té pran yon sèvièt, li té pasé-l nan tay li, li té lavé pié Douz Apot yo, pou-l montré yo moun ki gin ròl pou dirijé-a, sé li minm ki pou sèvitè tout moun (Jn 13, 1-15). Jézu Roua, li pa vi-n krazé brizé, li pa vi-n pran pòz li sipérié pasé pèsòn. N-ap mandé Manman Mari, Rèn lapè, pou-l fè nou gadé sou li, sitou si nou gin ròl pou dirijé dèt moun, si nou gin réponsabilité nan sosiété-a, nan fanmiy yo, nan légliz la (1 p. 5,3). Sin Fransoua-d-Sal té di li pi fasil pou pran yon mouch avèk yon kiyè siro mièl pasé avèk yon barik vinèg. N-ap mandé Manman Mari pou nou aprann rét kalm, lè gin sitiasion ki troublé, pou nou pa chèché mét lapè antan nou chofé difé lagè, paské sé pa lapè tout bon vré n-ap mété, sé yon dézè n-ap fè, épi fò nou pa bliyé britalité rélé britalité. Si nou trété moun yon fason brital, minm si yo pa kapab pran révanj yo tout-suit, y-ap tann moman ki ranjé yo-a pou yo minm tou yo déklaré lagè. Lagè pa kapab mété lapè. Sa-k mouins pa kapab fè sa-k

plis. Otorité sé pou sèvis lapè li fèt. N-ap mandé Manman Mari, Rèn lapè, pou-l fè nou kalkilé anpil sou mèsaj sa-a lévanjil ak prémié léktu katòzièm dimanch odinè A-a ofri nou-an (Mt 11, 25-30; Za 9, 9-10) pou nou pa ménasé moun, frapé moun, méprizé moun, jouré moun, ésploaté moun. Nou tout sé frè, sé pitit yon sèl Papa nou yé, sé pitit yon sèl Manman nou yé. Sé pou nou pran pasians nan fason n-ap aji; sa nou pa kapab réalizé jodi-a, n-a fè-l démin. Chak jou gin kont chaj li pou poté (cf Mt 6, 34).

*

* *

KATÒZIÈM DIMANCH ÒDINÈ B

Moun Nazarèt yo kòmansé sézi dévan sajàs ak mirak Jézu. Apré sa yo kòmansé fè dout. Épi yo pran pozision kont li. Anfin yo pa mét lafoua nan li ditou. Sé kòmsi sé rékilé y-ap rékilé dépi nan kòmansman. Sé konsa moun kay Jézu résévoua-l, ou pito yo pa résévoua-l. li vi-n lakay li, moun lakay li pa résévoua-l (Jn 1,11). Dépi Bétléèm pa-t gin plas pou li nan kay: sé nan trou ròch li té fèt (Lc 2,7). Sé pou sa li di: "pa gin okinn profèt yo respékté lakay li" (Mc 6,4; cf Mc 6,1-6: évanjil 14^e d.o. B). Poutèt mank lafoua yo li pa réyisi fè mirak ki konsékan lakay yo. Sé konsa Bondié té voyé Profèt Ézékièl dévan pròp pèp li-a, li té avèti-l davans kijan yo t-apral lévé kont li (Éz 2,2-5 = prémié léktu 14^e d.o. B). Min li mandé-l pou-l palé kan minm, otréman sé li minm l-ap mandé kont sou mèsaj li té doué bay la. Jézu fini ministè Galilé-a sou yon échèk. Apré sa, l-apral travèsé nan Judé. Lè sa-a, Apot yo ap gin yon ròl pi aktif (Mc 6,7-13,30). Sé yon fason pou montré dépi davans kijan pèp Israèl la ap réjité mèsaj Jézu-a, sé nan diréksion payin yo mèsaj li-a ap dirijé. Moun Nazarèt yo pa mét lafoua nan Jézu. Sin Pòl ap di kijan sé tout pèp Israèl la ki réjété Jézu, yo pa ba-l lafoua yo (Rom 3,3; 11,30). Moun Nazarèt yo sézi osijè Jézu, kòmsi Jézu vi-n tounin tankou yon bagay k-ap jinnin chémin yo. Sé konsa Sin Pòl di: Koua Jézu-a vi-n tounin tankou yon bagay ki jinnin chémin pèp Israèl la, ki anpéché-l maché, ki lakòz li bité sou rout li (Rom 9,33; 1 Cor 1,23; Ga 5,11). Moun Nazarèt yo rélé Jézu "piti Mari" (Mc 6,3). Sé sèl koté nan lévanjil la yo bay Jézu tit sa-a. Dòdinè sé non Jozèf yo konn mét dévan (Lc 3,23; 4,22; Jn 1,45; 6,42). Sin Jan di: minm fanmiy Jézu pa-t kouè nan li (Jn 7,5). Sin Mak bay non kouzin Jézu yo, sa li rélé frè-l yo (Mc 6,3), sé Jak, Jozèf, Jud, Simon, pitit yon sè Manman Jézu yo rélé Mari tou (Mc 15,40), madanm Kléofas (Jn 19,25). Yo té konn sèvi ak mo frè-a pou di kouzin oubyin tout pròch fanmiy (Gn 13,8; 14,16; 29,15; Lv 10,4; 1 Chr 29,22; Mt 13,55; Jn 7,3; Ac 1,14; 1 Co 9,5; Ga 1,19).

Sé yon gran soufrans lè moun ki pròch nou pa kouè nan nou. An minm tan sé yon okazion pou nou dépasé frontiè fanmiy nou, ras nou, péyi nou, pou nou réalizé mision nou nan lign mision Jézu-a avèk kè-l louvri nan dimansion tout tè-a (cf Is 49,6). An-atandan, soufrans la rèd lè sé moun nou konnin dépi lontan, ki alèz avèk nou, k-ap méprizé nou, ki pa gin konfians nan nou. Lè sa-a sé kot Granmèt la sèl pou nou fè priyè nou monté, jan Psòm-répons katòzièm dimanch òdinè B-a montré-a: "Piti pou nou, Granmèt, yo méprizé nou kont kò yo, yo pasé nou nan rizib kont yo, avèk arogans yo" (Ps 123,3-4 = 122,3-4). Jézu di nou li mété nou pou nou pati, pou nou donnin frui, yon frui k-ap diré (Jn 15,16). Li pa instalé nou pou nou

rét sou plas. Li profité tout sikonstans, minm rayisans ak tranzaksion lézòm pou-l fè nou réalisé mision nou, pou nou poté Bòn Nouvèl la koté-l vlé voyé nou-an. Sé paské yo té chasé Sin Pòl sot nan tèl vil ki fè li t-al nan tèl lòt vil al préché, joutan li fè tout tou lazi, Masédoua-n, lagrès, jous li rivé a-Ròm. Nou pa doué tròp sézi, lè nou rankontré moun ki pran pozision kont nou, k-ap défèt tou sa n-ap fè, ki pa vlé ouè nou san okinn rézon. Sé lokazion pou nou souké poussiè nan soulié nou, pou nou kontinuyé chémin nou. Yo kapab ba nou bariè, min yo pa kapab baré Paròl Bondié-a (2 Tim 2,9). Lè nou ranpòtè siksè yo kapab ouè ak jé, sé pa lè sa-a nésèsèman nou réalisé travay misionè nou jan Jézu mandé nou-an. Yo kapab kòmansé **bat bravo** pou nou, apré sa yo pran **fè dout** antan y-ap gadé sou aparans, épi yo tonbé nan **ataké** karéman, épi anfin yo **ouété konfians** nan nou nèt. Sé tankou yon véso k-ap dégradé ofi-amézi. Rélation nou avèk group la ap pèdi valè-l chak jou pi plis tankou yon pié boua k-ap séché sou pié paské li pa jouinn dlo épi solèy moua-d-juin-an trò cho, van-an trò sèk. Lè konsa nou pa bézouin ap chèche konsolation adouat-agoch. Jézu avèti nou davans: tout moun ap rayi nou poutèt li (Mt 10,22; cf Jn 16,33). Sin Pòl pasé kont tray li avèk fo-apot yo ki t-ap chèche fè-l konkirans yo akoz jalouzi yo té ginyin kont li (2 Co 11). Sé lokazion minm pou nou fè difikilté sa yo sèvi kòm yon mouayin pou pròpté intansion nou, pou nou nètouayé fon lògèy ak égoyis nou ginyin sou pa anndan, ki kapab jinnin aktivité léspri Sin-an, pou-l kapab pi alèz nan nou, pou-l sèvi ak nou kòm instriman pi byin, pi fasil. Sé pou sa n-ap mandé Manman Mari, Rèn Apot yo, pou nou bliyé tèt nou, nan sèvis Granmèt la, pou nou pa gadé sou siksè oubyin échèk nan apostola nou, min pou nou kontinuyé maché tout tan, tout koté, nannuit kon lajounin, nan frédi kon nan solèy, nan mòn kon nan dlo, lavil kon andéyò, byin pré kon byin louin. Koté Bondié vlé voyé nou, sé la pou-n alé pou li. Koté-l vlé mété nou, sé la pou nou rété pou li, koté-l vlé kité nou, sé la pou nou travay pou li.

*

* *

KATÒZIÈM DIMANCH ÒDINÈ C

Jézu voyé misionè-l yo dé pa dé (Lc 10,1-20). Sint-Ogustin di sé paské chif dé-a sé chif lacharité. Sé ringn lapè y-apra-l anonsé; sé nòmâl pou yo kòmansé viv an pè youn ak lòt. Nou pa kapab bay sa nou pa ginyin. Si antré nou sé batay, sé jalouzi, sé mank konfians, sé indépandans, nou pa kapab vré témouin k-ap montré ringn lapè-a rivé sou tè-a. N-ap di yon bagay ak bouch nou, n-ap viv yon lòt nan konpòtman nou. Pap gin koréspandans ant paròl nou avèk aksion nou. N-ap sèvi fo-témouin. Jézu voyé misionè-l yo pou paré rout dévan-l. Pasaj misionè-a pa réglé tout kozé. Sé yon sinp préparasion li yé. Vré Mèt kozé-a sé Jézu-Kri. Sé pou misionè-a évité dé kalité pièj sou pouin sa-a: li pa doué gonflé pouatri-n li si li réyisi mision-l, li pa doué dékourajé si-l jouinn bariè. Nan tou lè dé ka sé pa li minm ki pèsonaj prinsipal la. Si-l gin inpréson li réyisi, sé pou-l fè kò-l tou piti tankou Sin Jan-Batis, pou-l fè ouè sé pa li minm ki Mési-a, min l-ap vi-n apré-l, li minm li pa minm mérité défèt lasèt sapat li. Sé avaloua li vi-n poté, sé gouté li vi-n pot bay gouté, sé tròkèt li préparé, Mèt kozé-a la dèyè. Si-l gin inpréson li jouinn bariè, li doué sonjé sa Jézu té di Sin Pòl nan vil Korint la (Ac 18,10), li gin yon gran kantité foul patizan pou li nan lavil la, sé pou-l kontinuyé palé san-l pa dékourajé. Mèt kozé-a sé Jézu li minm minm. Konsa, kit nou réyisi, kit nou échoué, sa pa doué gonflé kè nou, ni dékourajé nou. Sé nan min Granmèt la tout kozé-a yé. Nou sé sinp komisionè. Komision pa chaj. Sé nan tout vil ak tout bouk Jézu voyé misionè yo. Li pa kité yo chouazi sa-k pi intéresan pou yo, pou yo t-a néglijé koté yo prévoua y-ap rankontré difikilté. Li konnin byin pròp ginyin k-ap résevoua yo, gin dèt k-ap répousé yo ou omouin ki pap ba yo plis intére pasé sa. Li mandé yo pou yo alé kan minm, pou koté sa-a yo pa chèché prêtèks jou jijman-an, pou yo pa di: "nou pa-t konnin, yo pa-t avèti nou"; otréman si nou néglijé kèk koté, sé nou minm Granmèt la ap mandé kont (Ez 3,17-21; 33,8). Jézu di: rékòlt la anpil, travayè yo pa kont. Nou pa gin doua ap triyé misionè, pou nou pran yon ti kras, sa-k gin minm lidé ak nou, pou nou fè ti bann, ti group, pou nou néglijé sa-k gin dèt fason pou anonsé mèsaj ringn lapè-a sou rout koté Granmèt la voyé yo-a. Gin tròp travay pou chak moun pa t-a rivé jouinn plas li. Pou sa-a tou Bondié riské mandé nou kont (Ez 34,21), paské gin kèk mouton k-ap pèdi paské moun yo t-a jouinn pou okipé yo-a, nou mété yo akoté, nou ouété yo sot nan travay la. La-a tou, fò nou frapé léstomak nou toua foua. Jézu mandé misionè yo pou yo lapriyé, pou mandé Granmèt la dèt misionè. Non sèlman nou pa doué réjité misionè k-ap travay, min nou doué mandé Bondié voyé dèt misionè ankò. Travay la ap toujou tròp pou nou. Sèlman sé pa nou minm k-ap gonflé group misionè

nou-an ak yon pakèt manb ki pa gin léspri misionè ditou min ki la sèlman pou bay oriantasion nou-an plis fòs an fas dèt oriantasion, kòm si sé konkirans nou anvi fè pou lidé nou kapab pasé. Nan jadin Bondié pa gin plas pou sa. Sé pa kann sèlman ki ginyin pou koupé. Gin mango tou pou keyi; gin poua pou ranmasé, gin mayi pou kasé. Sé pa afè nou n-ap réglé, sé afè Granmèt la. Sé li minm ki voyé misionè, sé pa nou minm ki chouazi. Sé pou sa li mandé nou lapriyè, pou nou kapab ouè pi fasil sign ki montré nou sé intèl ak intèl li voyé ba nou pou tèl kalité travay, minm si nou pa-t prévoua sa, minm si sa ap déranjé plan nou, minm si sa ap chaviré program nou. Jézu voyé misionè-l yo tankou mouton nan pami lou. Nou pa doué arogan aléga pèson, minm si nou doué palé klè pou prézanté lavérité-a. Sé pa moun ki lènmi nou, sé Satan (Ep 6,12). Bondié gin plis fòs pasé nou kouè pou défanm afè-l. Plis nou fèb, sé plis li pran défans nou (2 Co 12,10). Jézu bay misionè-l yo konsign pou yo pa anbarasé avèk yon pakèt bagay k-ap ralanti mach yo, antan y-ap bay tròp asirans, y-ap instalé yo tròp, y-ap fè yo konté tròp sou pròp posibilite pa yo: lajan, sak, pantouf pou mété pié-n alèz lè nou rivé yon koté, lè nou fi-n ouété soulié nan pié nou... Pou nou pa trinnin sou rout, li avèti nou pou nou pa pasé adouat-agoch kay tèl zanmi ak tèl fanmiy, ap mandé nouvèl intèl, ap bay nouvèl. Koté yo voyé nou-an sé la pou n-alé. Komision-an présé. Sé difé yo voyé nou poté. Si nou mizé nan chémin, l-ap étinn anvan nou gin tan rivé. Jézu présizé, lè nou antré nan yon kay, pou nou di lapè pou kay sa-a. Sé mèsaj Bòn Nouvèl Ringn Bondié-a, Ringn lapè. Sé difé sa-a li té voyé nou poté-a, pou nou pa-t kité étinn sou rout la. Yon misionè pa gin koté pou-l pozé tèt li. Min koté-l pozé-l la tou, li byin pozé-l, minm si sé an pasan. Sé pou sa Jézu di nou pou nou alèz nan kay koté yo résévoua nou-an, tankou-l té fè kay Mat ak Mari-a. Fanmiy ki résévoua nou-an vi-n tounin pròp fanmiy nou, paské nou kité fanmiy pa nou. Koté nou pasé, sé lakay nou nou yé. Nou pa-t poté anyin pou ankonbré nou. Sé tankou pòv nou poté Bòn Nouvèl la bay pòv parèy nou. Jan yo résévoua nou-an sé pou nou aksépté-l. Sa yo ba nou sé pou nou pran-l, tankou yon pòv ki pa réfizé lacharité yo fè-l. Sèl bagay, nou pa gin pou n-ap kouri adouat-agoch, fè moun yo fè jalouzi, akoz n-ap fè ti amitié pa-si, ti amitié pa-la. Nou gin bagay ki pi inpòtan pasé sa pou nou réglé.

Péyi koté Bondié Roua-a tou pré. Sé sa nou gin pou déklaré. Sa invité nou bay égzanp détachman nou minm minm pou yo kapab kouè paròl nou. N-ap mandé Manman Mari, Rèn Apot yo, pou-l fè nou suiv program sa-a Jézu trasé pou nou-an, pou nou kapab vré misionè li chouazi nan kè-l, li fòmé ak min-l, li voyé nan travay li. N-ap sonjé gadé toua léktu katòzièm dimanch òdinè C-a avèk jé lapè-a, antan nou insisté nan lévanjil la (Lc10,1-20) sou sa

Jézu di-a: "Lè nou antré nan yon kay, sé pou nou di: Lapè pou kay sa-a!"; antan nou kalkilé nan prémié léktu-a (Is 66,10-14) sou sa Bondié di-a: "M-ap fè lapè kouri nan diréksion-l tankou yon gran larivière"; antan nou répété souvan nan kè nou sa Sin Pòl di nan dézièm léktu-a (Ga 6,14-18): "Pou moun k-ap suiv régléman lavi sa-a ak pou véritab Israèl la: lapè ak kè sansib". Mision nou sé Mision LAPÈ. Tout koté-n pasé sé pou nou di: lapè Granmèt la ak nou. Rékòlt la gran, travayè pa kont, fò-n lapriyé sa-k Réponsab, mandé konkou (Lc 10,2). Sé kon mouton nan mitan gro lou, nou pa poté lajan ni sak, pa minm sapat (Lc 10,3s). Nou pa gin doua ap trinnin sou rout, al kay zanmi, mandé nouvèl, rét pèdi tan (Lc 10,4). Koté-n pasé, sé pou-n bay lapè. Si gin bon kè, l-a vi-n sou li, l-ap fè-l pozé (Lc 10,5s). Si gin koté yo pa résévoua-n, n-a viré do-n, al lòt koté, pou-n témouagné (Lc 10,10s). Ala sa bèl, misionè lapè k-ap paré rout pou Ringn Bondié; pou chanjé kè (Is 52,7; Na 2,1; R 10,15).

*

Jézu voyé souasandouz patizan yo an mision (Lc 10,1-20: évanjil 14^e dimanch òdinè C). Li di yo pou yo poté mèsaj lapè-a nan tout kay koté yo antré. Prémié léktu-a di lapè-a ap koulé tankou yon larivière k-ap débòdé (Is 66,10-14). Psòm-répons la di kijan Granmèt la ap kòmandé (Ps 65,7 = 66,7). Ringn li sé ringn lapè. Sé ringn sa-a misionè-a gin pou-l anonsé. Réfrin Alélouya-a anvan lévanjil la di: Kè pozé Jézu-Kri-a doué fété nan kè nou (Col 3,15a.16a). Sé mision lapè, kè pozé.

*

* *

KINZIÈM DIMANCH ÒDINÈ A

Sémans la sé Paròl Bondié-a; Sila k-ap simin-an, sé Jézu-Kri; tout moun ki kouté-l, y-ap diré pou tout tan (Réfrin Magnifikat, premié Vèp 15e d.o.: cf Mt 13, 1-23: évanjil 15e d. o. A). Sin Pòl di Timoté pou-l préché san rété, nan tout okazion, lè moun yo dispozé pou kouté, lè yo pa dispozé pou kouté (2 Tm 4,2). Li mandé pou-l bay prèv koté mové lansègnman yo an défo, pou-l fè ménas, pou-l ankourajé, tou sa avèk yon pasians ki pa mandé bouké, épi an minm tan l-ap chèché démontré lavérité-a (ib). Li di gin yon tan k-ap rivé, moun yo pap sipòtè vré lansègnman-an ankò, y-ap kite lanvi yo trinnin yo nan tout sans, pou yo satisfè souaf zòrèy yo ginyin pou kouté, y-apral chèché yon pakèt mè, y-ap fèmin zòrèy yo nan diréksion lavérité-a, y-ap viré yo nan diréksion istoua ki pa vré (ib v. 3-4). Époutan sé an fas sikonstans sa yo minm Timoté gin pou-l réalizé mision-l san fot, pou-l préché lévanjil-la, malgré tout difikilté l-ap bliyé travèsé. Pou sa li bézouin gin SAJÈS (2 Tm 4,5). Kontrariété pa kapab étinn Paròl Bondié-a. Sin Pòl di yo kapab mété-l nan chinn; min yo pa kapab mété Paròl Bondié-a nan chinn (2 Tm 2, 9). Paròl Bondié-a pap tounin koté-l san rézilta (Is 35, 10-11). Minm si sémans la mouri anba tè-a (Jn 12,2; 1 Co 15, 36), l-ap donnin frui. Sé konsa koté nou pa t-a sipozé, sé la prèch la donnin bon rézilta. Sé pou sa malgré mové inpréssion nou kapab ginyin nan travay misionè nou, sé pou nou kontinuyé kan minm san dékourajman. Lékòl Profèt Izayi-a di: "Zèb la séché, flè-a finnin, min Paròl Bondié-a diré pou tout tan" (Is 40, 9). Li soti nan Bondié, li désann vi-n sou tè-a; li tounin nan Bondié, kòm Sajès la (Pr 8, 22ss; Sg 7, 23) ak léspri-a (Is 11, 2), tankou lapli ki sot nan sièl la, ki rouzé tè-a, ki tounin nan sièl la (Is 55, 10-11 = premié léktu 15e d.o A). Sé yon mision li réalizé, jan Jézu di Nikodèm nan: "Pèsòn pa monté nan Sièl la, sof Sila-a ki désann sot nan Sièl la, Pitit moun nan ki nan Sièl la" (Jn 3, 13). Mision li réalizé-a, sé mision Sajès la: vi-n dévoualé lézòm sa k-ap pasé anro-a. Ginyin ki kouè, ginyin ki pa kouè. Li vi-n lakay li, moun lakay li pa résévoua-l. Min sa-k résévoua-l yo, li ba yo pouvoua pou yo vi-n pitit Bondié (Jn 1, 11-12).

Premié moun ki résévoua sémans Paròl sa-a, ki pèmèt li jèmin, pou-l donnin, sé la Trè Sint Vièj Mari ki di: "Mouin sé Sèvant Granmèt la, sé pou sa fèt pou mouin dapré Paròl ou a!" (Lc 1, 38). Sé pou sa Sin Jan kapab di: "Paròl la vi-n tounin chè, li abité nan pami nou" (Jn 1, 4). La Trè Sint Vièj Mari kontinuyé ap di nou nan zòrèy: "Ninpòt sa-l di nou, sé pou nou fè-l!" (Jn 2, 5). Sé minm paròl sa-a Faraon-an té di pèp li-a osijè Jozèf, moun sa-a ki gin sajès la, pou yo té kapab jouinn blé: "Al jouinn Jozèf, tout sa-l di nou n-a fè-l!" (Gn 41, 55). La Trè Sint Vièj Mari orienté nou nan diréksion Jézu-

Sajès, pou nou obéyi-l, pou sémans Paròl li-a jèmin nan nou. Sé pou sa, apré diskou sou Pin lavi-a, nan savann nan, lè tout Juif yo viré do bay Jézu-a, Apot yo rété, Sin Piè di: "Ki koté pou-n alé? Ou gin Paròl lavi ki pap janm fini-an" (Jn 6, 68). Échèk nou kapab jouinn sou rout apostola nou, li pa janm total. Yon pòsion moun kapab méprizé nou, kritiké nou, kontrarié nou, pèsékité nou. Min toujou gin yon pòsion ki kaché ki résévoua mèsaj paròl nou oubyin konduit nou, épi ki pèmèt li fè travay li nan kè yo. Sé konsa Bondié té louvri kè Lidia nan vil Filip, pou-l résévoua paròl Sin Pòl (Ac 16, 14), malgré pèsékision Sin Pòl té gin pou-l rankontré nan vil sa-a (Ac 16, 16-24). Sé konsa tou Jézu té di Sin Pòl pou-l pran kouraj, pou-l kontinuyé palé nan vil Korint la, paské li gin anpil moun ki pou li nan vil sa-a, minm si Sin Pòl pa konnin (Ac 18, 9-10). Gin yon mésié ki té réfizé kouè nan aparision Loud yo. Sint Bènadèt di-l li pa gin mision pou-l fè moun kouè, min sèlman pou-l anonsé mèsaj li résévoua. Nou pa gin pou-n ap sondé koté sémans la tonbé, si sé sou bò chémin, si sé sou ròch, si sé nan rajé, si sé nan bon tè. Nou planté, yon lòt rouzé, Bondié fè pousé (1 Cor 3, 6). Nou doué simin tout koté. Otréman sé nou minm Bondié ap mandé kont, jan-l di Profèt Ézékièl la. Minm si nou konnin gin koté yo pap résévoua mèsaj nou-an, nou doué bay li kan minm, pou yo pa jouinn éskiz (Ez 2,5; 3-11.13; 33, 5). N-ap mandé Manman Mari, Nòtre-Dam de la Sajès, pou-l ba nou pèsévérans nan travay mision nou, pou nou pa pran répo sou késion sa-a, pou nou suiv sa Sin Pòl di nou-an: "Sé pou-ou préché bon tan, mové tan" (2 Tm 4, 2), pou nou fè tankou moun k-ap simin-an: "Je sème à tout vent". Zèb la séché, flè-a finnin, min Paròl Bondié-a ap diré pou tout tan (Is 40, 8). Sé Sajès li ki sot nan bouch li, ki vi-n sou tè-a, ki pap tounin al jouinn li san rézilta, san-l pa réyisi mision-l, minm si nou pa kapab konstaté rézilta sa-a ak pròp jé nou. Gin yon misionè ki t-ap préché. Li fini premié pati prèch li-a. Li t-ap travèsé nan dézièm pati-a, li di: "Kité kozé pran paròl". Lè-l fi-n préché, gin yon madanm ki vi-n koté-l, li di-l kijan-l santi kè-l boulvésé. Misionè-a mandé-l ki sa-k touché-l konsa nan prèch la. Madanm nan di-l: "Sé lè-ou di: Kité kozé, pran paròl la". Misionè-a pa t-a janm pansé si sé pasaj sa-a ki t-a fè madanm nan kité tout yon tranch lavi-l pou-l travèsé nan yon lòt konduit: "Kité kozé, pran paròl". Sa-k sot nan lidé nou ak nan bouch nou, li fè chémin li gin pou-l fè-a, san nou pa kapab jinnin-l. Nou sé sinp komisionè, instriman nan min Bondié. Échèk la pou nou, min bon rézilta-a pou li. Nan kat tranch térin yo, sé dènié tranch la sèlman ki donnin. Moun nan k-ap simin-an, pa doué rété apré premié tranch la, bò rout la; li pa doué rété apré dézièm tranch la: ròch yo; li pa doué rété aprè touazièm tranch la: rajé-a. Sé pou-l kontinuyé avèk pasians, avèk pèsévérans, jous nan dènié bout térin-an, nan katriyèm tranch la, koté ki gin bon tè-a. Pètèt minm tou lè kat tranch sa

yo mélé ansanm; li pa kapab fè distinksiyon. Nan minm moun yo k-ap kouté-la, gin bò chémin, gin ròch, gin rajé, gin bon tè. Pafoua minm sé nan minm kè-a gin divès kouch térin. Moun nan kapab fèmin kè-l pou anpil pati nan prèch la. Sé alafin sèlman gin yon pasaj ki jouinn yon pouin sansib nan li, paské li korésponn ak préokipasion-l. Misionè sé kuiziniè. Li fè tout kalité manjé. Gin tèl plat ki alé pi plis ak tèl gou. Li pa kapab prévoua siksè oubyin échèk. Sé pou-l sèvi manjé-a kan minm. Chak léstomak a dijéré-l dapré posibilite-l.

*

Lè la Trè Sint Vièj Mari rivé kay Élizabèt, Élizabèt déklaré, gras a léspri Sin-an: "Ou béni pasé tout fi, frui nan vant ou-a béni tou" (Lc 1, 42). Sa lékòl Profèt Izayi-a té di osijè sémans Paròl la réalizé vré: "Paròl la pap sòti nan bouch mouin pou-l tounin san-l pa donnin frui" (Is 55, 11). La Trè Sint Vièj té di: "Sé pou sa fèt pou mouin dapré Paròl ou-a" (Lc 1, 38). Minm lè-a Paròl la té vi-n tounin moun, li abité nan mitan nou (Jn 1, 14). La Trè Sint Vièj Mari sé bon tè-a koté sémans Paròl la tonbé-a, li donnin frui yo pa kapab konté. Jézu té di: "Sé pa moun k-ap di 'Granmèt, Granmèt', k-ap antré nan péyi koté Bondié Roua-a, min sé moun k-ap fè volonté Papa-m ki nan sièl-la" (Mt 7, 21). Pou nou fè volonté Bondié, nou doué kalkilé sou Paròl li. Sin Luk di osijè la Trè Sint Vièj Mari: "Kanta Mari, li té kinbé tout paròl sa yo, li t-ap kalkilé yo nan kè-l" (Lc 2, 29-51; cf 8, 21; 11, 28). Nan nòs Kana-a, la Trè Sint Vièj Mari panché sou moun k-ap sèvi yo, li di yo: "Ninpòt ki sa-l di nou, sé pou nou fè-l!" (Jn 2, 5). Paròl Bondié-a pa tounin vi-n jouinn li san rézilta, san-l pa donnin frui. Sin Pòl di nou frui léspri Sin-an, sé: rinmin, kè kontan, lapè, pasians, bon kè, sèvis, konfians nan lòt yo, dousè, réglé panchan nou (Ga 5, 22-23).

Rinmin, sé premié frui léspri Sin-an. Sint-Ogustin di: "Rinmin, épi fè sa ou vlé!". Sa vlé di: nan mézi difé rinmin Bondié-a ki limin nan kè nou, l-ap kléré rout nou pou-l fè nou pran bon diréksion. Sé nan rinmin-an tout kòmandman Bondié yo ak tout paròl Profèt yo jouinn sans yo (Cf Rom 13, 8-10). Si nou rinmin tout bon vré, Paròl Bondié-a ap donnin frui nan kè nou, li pap tounin san rézilta, l-ap réalizé mision-l. Rinmin-an, sé premié frui léspri Sin-an, ki fè Paròl Bondié-a pa tounin san rézilta min pou-l réalizé mision-l. Kè kontan, sé dézièm frui léspri Sin-an. Sin Pòl di san-l trésayi ak kè kontan nan mitan tout tray l-ap pasé (Col 1, 24. 2 Co 7, 4; 12, 10). Kè kontan léspri Sin-an bay la, sé pa nésèsèman brui avèk ri byin fò, sé yon kè ki louvri tankou yon flè roz nan fréchè granmatin. Nou kapab gin lapinn k-ap trakasé nou, min yon foua sé volonté Bondié k-ap réglé lavi nou, sé pou

kè nou kontan, paské sé lavi sièl la nou déja komansé sou tè-a. Sé poua lakanj Gabriyèl té salué la Trè Sint Vièj Mari antan-l té di-l: "Sé pou kè-nou kontan, ou minm ki plin favè!" (Lc 1, 28). Sé pou nou gin kè kontan, paské Jézu lévé vivan. Nou lévé vivan ansanm avèk li, minm si lavi nou kaché avèk li nan Papa-a (Col 3, 3). Lè-l parèt dévan médanm yo nan tonbo-a, nan matin dimanch Pak la, li di yo: "Sé pou kè nou kontan!" (Mt 28, 9). Sèké li ranpòtè laviktoua sou lanmò ak sou péché, ak sou Satan. Yon sèl bagay ki t-a kapab fè kè nou séré, sé péché-a (Gn 3, 8; 4, 6; Is 6, 5; Lc 5, 8). Yon nanm an-éta-de-gras doué toujou gin kè kontan, paské li sé Tanp léspri Sin-an. Koté léspri Sin-an abité, toujou gin kè kontan. Jézu tréyayi ak kè kontan gras a léspri Sin-an, lè Apot yo vi-n poté nouvèl ba li, yo di-l kijan mision yo-a réyisi (Lc 10, 21). La Trè Sint Vièj Mari tréyayi ak kè kontan lè-l rivé kay Élizabèt, tèlman li té plin ak léspri Sin-an, li chanté kè kontan-l nan Magnifikat la, épi li transmèt kè kontan sa-a bay Élizabèt, bay Jan-Batis, bay Zakari (Lc 1, 47.41.44.67; cf 1, 15). Koté la Trè Sint Vièj Mari pasé, léspri Sin-an la, kè kontan-an la. Kè kontan-an, sé dézièm frui léspri Sin-a ki fè Paròl Bondié-a pa tounin san rézilta min pou-l réaliszé mision-l. Lapè, sé touazièm frui léspri Sin-an. Sin Pòl di Timoté yo pa ba-l yon léspri kè soté, sé yon léspri fòs, rinmin ak pou réglé panchan-l (2 Tm 1, 7). Jézu-Kri déja délivré nou sot anba pouvoua péché-a. Nou pa doué nan kè séré pou nou pè pouvoua sa ki mal la. Nan asouè dimanch Pak la, Jézu parèt dévan Apot yo, li di yo: "Kè pozé pou nou!" (Jn 20, 19.21). Antan-l di sa-a, li souflé léspri Sin-an sou yo, li ba yo pouvoua padonnin péché yo (Jn 20, 22-23). Lè Pè-a fi-n konfésé yon moun, li di-l: "Alé ak kè pozé". Sé konsa Jézu té ranvouayé fi-a ki té nan péché-a an pè, lè-l fi-n padonnin péché-l (Lc 7, 50). Koté péché éfasé, sé lapè ki rivé. Nan litani la Trè Sint Vièj yo, dènié invokasion-an di: "Rèn lapè, lapriyé pou nou". Lapè, sé touazièm frui léspri Sin-an ki fè Paròl Bondié-a pa tounin san rézilta, min pou-l réalisé mision-l. Pasians, sé katriyèm frui léspri Sin-an. Sin Jak invité nou pran léson sou kiltivatè yo. Yo travay tè-a, yo simin, yo planté; yo tann lapli, joutan rékòlt la donnin (Jc 5,7). Pasians pèmèt nou sipòté mové karaktè dèt moun k-ap travay ak nou, Sin Jozèf té pran pasians pou-l pa-t ranvouayé la Trè Sint Vièj (Mt 1, 19). La Trè Sint Vièj té pran pasians pou-l kinbé sékrè-l joutan lanj la dévoualé-l bay Sin Jozèf. Sin Jozèf ak la Trè Sint Vièj té pran pasians pou yo chèché Jézu pandan toua jou, joutan yo jouinn li (Lc 2, 41-50). La Trè Sint Vièj té pran pasians ap kalkilé répons Jézu-a nan kè-l, minm si-l pa-t konprann li tout suit (Lc 2, 50-51). Sin Pòl mandé paran yo pou yo pran pasians ak ti moun yo nan édikasion yo (Ep 6, 4). Pasians pèmèt nou dékouvri bon kalité ki nan kè prochin nou, minm si okòmansman sé défo yo ki parèt dévan jé nou. Moun nan ki té doué lòt la anpil lajan-an té di-l: "Pran

pasians avè-m, m-ap rinmèt ou tout dèt la!" (cf Mt 18, 26.29). Jéran jadin-an té mandé mèt jadin-an pou-l pran pasians ak pié fig la ki pa-t vlé donnin dépi touazan-an (Lc 13,8). Bondié toujou ba nou yon dènié chans paské li mal pou faché, li pran pasians (cf Ps 103, 8); Nou minm tou sé pou nou bay prochin nou yon chans ak pasians nou. Pasians la sé katriyèm frui léspri Sin-an ki fè Paròl Bondié-a pa tounin san rézilta mision-l. Bon kè, sé sinkièm frui léspri Sin-an. Papa ti pitit la ki té pati kité kay la, li té gin kè-l sansib pou pitit la. Li bliyé tou sa-l té fè ki mal (Lc 15, 11-32). Nou pa doué tou tan ap sonjé sa moun fè nou ki mal. Nan jadin-an, gin bon sémans, gin zèb. Sé pou nou konsidéré randman bon sémans la ap bay la. Sou Koua-a Jézu padonnin bon Laron-an (Lc 23,43), li padonnin bouro-l yo, li éskizé yo (Lc 23, 34). Nou pa doué préte moun yo mové intansion; nou doué chèché ouè sa yo fè ki byin. Nou pa doué toujou prêt pou kondané yo. Kè nou doué louveri pou nou toujou padonnin. Bon kè-a sé sinkièm frui léspri Sin-an, ki fè Paròl Bondié-a pa tounin san rézilta, min pou-l réalizé mision-l. Sèvis sé sizièm frui léspri Sin-an. La trè Sint Vièj pati al kay Élizabèt pou-l rann sèvis (Lc 1, 36.56). Li nan nòs Kana pou-l rann sèvis (Jn 2, 3). Mat résévoua Jézu pou-l rann sèvis (Lc 10, 40; Jn 12, 2). Abraam invité Toua Pèsonaj yo vi-n manjé lakay li pou-l rann sèvis (Gn 18, 1-7). Épi sé Bondié li minm li té invité-a (He 13, 2). Bliyé pou nou bliyé, sé tèt nou pou nou bliyé. Sonjé pou nou sonjé, sé frè nou yo. La Trè Sint Vièj Mari té di li sé Sèvant Granmèt la (Lc 1, 38). Jézu té di li pa vini pou-l fè yo sèvi-l, min pou-l sèvi (Mc 10, 45; cf Jn 13, 4ss). Sé antan n-ap sèvi n-ap vi-n roua. "Tibi servire regnare est" (Te servir c'est régner). Sèvis la sé sizièm frui léspri Sin-an ki fè Paròl Bondié-a pa tounin san rézilta min pou-l réalizé mision-l. Konfians nan lòt yo sé sètièm frui léspri Sin-an. Minm si nou gin inpréson n-ap réalizé travay la pi byin lè nou fè-l pou kont nou, sé pou nou aksépté konkou lòt yo, pou mété yo alèz, pou nou ba yo possibilité dévlopé pròp kapasité yo. Léspri Sin-an té désann sou souasandouz ansyin yo ki t-ap édé Moyiz nan travay li-a, gin dé nan yo ki pa-t prézan nan sérémoni-an léspri-a tonbé sou yo kan minm; lè Jozué mandé Moyiz pou-l anpéché dé sa yo aji kòm Profèt, Moyiz di-l okontrè, pito sé tout Pèp la ki té jouinn kapasité sa-a (Cf Nb 11, 16-30; cf Ex 18, 21-26). Konfians nan lòt yo, sé sètièm frui léspri Sin-an ki fè Paròl Bondié-a pa tounin san rézilta min pou-l réalizé mision-l. Dousè, sé uitièm frui léspri Sin-an. Jézu di nou vi-n jouinn li, li tou dou, kè-l tou pòv, n-a jouinn répo pou nanm nou (Mt 11, 28-30). Nan prémié prèch li fè sou mòn nan, li di: "Sé chans pou moun ki tou dou yo, paské sé yo minm k-ap éritié tè-a"(Mt 5, 4). Sin Fransoua-d-Sal di nou yo pran plis mouch ak yon kiyè siro-mièl pasé ak yon barik vinèg. Tout moun konprann langaj dousè-a, min britalité-a pa kapab fè moun maché tout bon vré. Sé trinnin li trinnin-l. Nan

mézi nou tou dou, nou rabésé kè nou, nou pa pran pòz nou sipériè plis pasé pèsòn, nan minm mézi sa-a tou n-ap kapab asiré bon rélation nan kominoté nou épi avèk tout moun. Nou gin pou nou aprann sédé pou lòt yo, pou nou pa tout tan nan diskision ki pap fini, pou nou pa fè lòt yo santi fòs pouvoua nou. Nou tout sé frè nou yé. Sé pou nou youn trété lòt avèk respè, san nou pa maltrété pèsòn. Tout moun sé pòtré Bondié li yé. Dousè-a sé uitièm frui léspri Sin-an ki fè Paròl Bondié-a pa tounin san rézilta min pou-l réalizé mision-l. Réglé panchan nou, sé névièm frui léspri Sin-an. Sin Jak di tout bèt sou tè-a kité yo donté yo; min lang moun nan réfizé kité yo donté-l (Jc 3, 7-8). Bondié té di moun nan: "Donté tè-a" (Gn 1, 28). Min li pa kapab donté pròp mové tandans pa-l. Lang nou tou piti, min sé tankou yon ti brèz difé nan tout yon rak boua. Gouvènay batiman-an tou piti, min sé li minm ki dirijé batiman-an. Ak minm lang nan n-ap fè konpliman pou Bondié, n-ap fè kondané frè nou (Jc 3, 1-12). Réglé panchan nou, sé névièm frui léspri Sin-an ki fè Paròl Bondié-a pa tounin san rézilta min pou-l réalizé mision-l. Rinmin, kè kontan, lapè, pasians, bon kè, sèvis, konfians nan lòt, dousè, réglé panchan nou, sé nèf frui léspri Sin-an ki fè Paròl Bondié-a pa tounin san rézilta min pou-l réalizé mision-l. Mari sé bon tè-a ki pèmèt Paròl Bondié-a donnin frui; li béni pasé tout fi, frui vant li-a béni tou.

*

* *

KINZIÈM DIMANCH ÒDINÈ B

Sé yon nouvo aspè travay Jézu (Mc 6, 7-13): moun péyi-l ak fanmiy li pa rékonèt li. Apati lè sa-a, sé patizan-l yo k-apral jouinn avantaj travay li-a. Li konsantré fòs li sou édikasyon yo. Sé sa yo résévoua nan min-l nan y-apral bay. Konsa apati lè sa-a l-apral préparé mision Apot li yo yon fason pi dirèk. Li rélé Apot li yo (Mc 6,7), épi li kòmansé voyé yo dé pa dé (ib). Chak fousa Jézu **rélé** nou, sé pou-l **voyé** nou, minm si nou rété minm koté-a, tankou Sint Téréz lanfan Jézu ki patròn mision yo, san-l pa janm déplasé sot nan monastè-l la. Tou sa-l t-ap fè, sé pou mision yo li t-ap ofri yo; tankou Sint Téréz davila, tankou Byinnéréz Maria Gabriyéla, sa Pap Jan Pòl II té béatifyé an 1983-a, ki té konsakré tèt li pou tout krétyin yo fè yon sèl la, malgré li pa-t janm soti nan monastè Grottaferata, an Itali, koté li té antré kòm trapisti-n nan. Dépi Jézu **rélé** nou, sé pou-l **voyé** nou. Bondié té rélé Abraam, min sé pou Abraam té kité lakay li épi pou-l té pati nan diréksion Bondié t-ap montré-l la (Gn 12,1ss). Bondié rélé Moyiz, min sé pou-l voyé-l (Ex 3,4.10). Bondié rélé Izayi, min sé pou-l ba-l yon mision pou pèp la (Is 6,7-8). Dépi Bondié **rélé** nou, sé pou-l **voyé** nou. Sé pa pou nou rété sou plas, sa vlé di sé pa pou pròp avantaj nou.

Jézu kòmansé voyé Apot li yo dé pa dé. Si-l kòmansé (Mc 6,7), sa vlé di li pa voyé yo tout minm lè-a, nan minm moman-an. Lè Jézu fi-n résisité-a, li té fi-n résévoua toua déklarasyon yo nan min Sin Piè-a, li té di Sin Piè: "Suiv mouin" (Jn 21,19). Min Sin Piè viré dèyè, li ouè Sin Jan, li pozé Jézu késion osijè Sin Jan. Jézu di-l sé afè ki gadé-l; li minm sé pou-l suiv li. Kozé Jan-an, sé li minm k-a okipé sa. Jézu rélé nou yon fason pèsònèl. Sé pa tout moun ki gin minm mision-an, minm lè-a. Minm si nou nan minm promosyon, sa vlé di minm si Jézu té rélé nou minm ané-a, nan minm sikonstans, li té fè nou monté machéskalié yo ansanm pandan anpil ané, lè pou distribision travay la fèt la, sé li minm ki konnin kijan l-ap distribué-l. Sé pa nou minm k-ap chouazi térin koté pou-l voyé nou al fè rékòlt la. Sé pa nou minm k-ap chouazi moun ki gin pou al travay avèk nou-an. Sé pa nou minm k-ap chouazi lè pou-l voyé nou al travay la. Li **kòmansé** voyé yo dé pa dé. Li pran tan-l joutan-l fini. Dé sa yo apral bò isit la, dé lòt sa yo apral bò lòt bò, étsétéra. Nou gin pou nou pran pasians, li konnin sa l-ap fè.

Sint Ogustin di: chif dé-a, sé chif lacharité, paské premié kòmandman-an sé rinmin Bondié, épi dézièm nan sé rinmin prochin-an; épi tou sé paské fò gin dé pèsonaj omouin pou youn rinmin lòt. Konsa chif dé-a sé sign lacharité. Dayè sé nòm al pou misionè yo montré charité antré yo, paské sé kòmandman sa-a ki ranmasé tout lòt yo. Si yo pa kòmansé balé dévan pòt

lakay yo, yo pa kapab prétann al balé kay lòt moun. Si misionè yo pa kòmansé bay égzanp charité-a, ki sa y-apral préché? Sé pou sa Jézu voyé Apot li yo dé pa dé, pou montré yo fè yon sèl fanmiy, épi pou yo kapab mandé lòt moun yo pou yo minm tou yo fè yon sèl fanmiy antré yo, pou fòmè Légliz la. Sin Pòl té mandé moun Korint yo pou yo sispann simin divizion antré yo (1 Co 1-4), pou yo sispann sité frè yo nan tribinal dévan payin yo (1 Co 6), pou yo sispann ap mété pati-pri jous anndan réyinion litiji yo (1 Co 11-14). Sint Ogustin di yon foua nou gin lacharité, tou sa n-ap fè, sé nan sous lacharité-a l-ap soti. Sin Pòl di nou nou pa doué gin okinn dèt aléga pèsòn sof dèt lacharité-a, paské moun ki gin lacharité, li réalizé tout kòmandman yo (Rom 13, 8-10). Lè sa-a li t-ap palé pou tout krétyin, li mandé yo pou yo pa madichonnin moun ki madichonnin yo, okontrè pou yo lapriyè pou yo (Rom 12,14), pou yo pa rann mal pou mal (Rom 12,17), paské sé pa nou minm ki pou rann tèt nou jistis (Rom 12,19), okontrè sé pou nou viv anpè ak tout moun, nan mézi nou kapab (Rom 12,18), paské sé Bondié ki pou okipé kozé jistis la (Rom 12,19), okontrè si lènmi nou grangou, sé pou nou ba-l manjé; si-l souaf, sé pou nou ba-l bouè (Rom 12,19). Sé pa pou nou kité mal la dékontrolé nou, sé nou minm ki pou donté-l antan nou fè byin (Rom 12,21). Sa-a sé pou tout krétyin Sin Pòl ap palé. Nou pa bézouin mandé atò lè sé pou misionè yo Jézu ap bay konsign. Nan dènié Soupé-a li di sé kòmandman nouvo li kité pou nou, pou nou youn rinmin lòt **minm jan li minm li rinmin nou** (Jn 13,24; cf St Augustin: In Ioannem Tract. 65,1-3; CCL 36,490-493; Liturgia Horarum II, Vatican 1974, 618-619, jeudi 4ème semaine de Pâques). Jézu rinmin nou jous li bay lavi-l pou nou (Jn 15,12). Sé sa li mandé nou pou nou fè tou: rinmin lòt yo pi plis pasé nou, bliyé tèt nou. Si gin divès fason pou misionè yo travay, sé pa yon rézon pou youn fè bann kont lòt, pou youn ap palé lòt mal, pou youn ap défèt sa lòt la ap fè, kòm si sé jadin pa nou nou t-ap planté, kòm si sé tè pa nou nou té achté. Sé San Jézu-Kri ki fi-n pèyé plantasion-an, ki fi-n rouzé-l, sé pa nou minm ki mèt rékòlt la, sé sinp travayè nou yé (1 Cor 4,1; 3,9; Lc 17,10). Nou sé sèvitè ki pa vo anyin, nou tankou balé; kon yo fi-n sèvi avèk li, yo pran-l, yo dépozé-l dèyè pòt la, joutan yo bézouin-l ankò.

Nou pa gin pou nou gonflé léstomak nou pou yon ti réponsabilité yo ba nou. Sé pa paské nou mérité-l yo ba nou-l; sé paské Bondié vlé sèvi avèk nou kòm instriman-l. Bondié pa bézouin nou. Li kapab chouazi dèt moun. Si nou profité plas la koté-l mété nou-an pou n-ap gonflé kò nou, l-ap chouazi dèt moun nan plas nou. Sé lògèy ki kòz divizion. Sé umilité ki kannal lacharité (Ph 2,1-11). Plis n-ap pran pòz sé nou minm sèl ki konnin, ki kapab réglé tout bagay, sé plis n-ap simin zizani nan légliz la, sé plis mision-

an pa kapab maché jan-l t-a doué maché-a. Nou konn gin tandans bay inpréson avan nou anyin pa-t janm maché byin, sé kon nou parèt n-apral boulvèsé tout bagay pou nou fè tout moun maché ès-ès. Nou tankou yon ti grinn blé tou sèk, tou chèch. Kon yo mété-l nan dlo, li gonflé; lè yo mété-l nan solèy, li tounin vi-n tou chèch ankò, minm jan-l té yé anvan-an. Té gin dé bourik ki t-ap pot chaj; youn t-ap poté yon chaj koton, lòt la t-ap poté yon chaj sèl. Sa-k pot chaj koton-an, l-ap vòltijé adouat-agoch; kon-l rankontré yon po mango sou rout li oubyin yon branch zèb, l-ap fè makout yo dansé sou do-l, l-ap piafé, l-ap ponpé, l-ap bay payèt. Lòt la minm, sa-k pot sèl la, l-ap maché kouta-kouta, tankou bèf k-ap trinnin kabouèt kann. L-ap sué, l-ap rédi, li réy yon pouin pou-l kouché sou chémin. Sé kout baton ki fè-l blijé kontinué rout li. Plinn sèlman li kapab plinn. Yo tou lé dé vi-n ap travèsé yon gran lariviè. Tou lé dé makout yo plin ak dlo. Lè yo fi-n travèsé riviè-a, sa-k té pot sèl la pa santi anyin ankò sou do-l, sèl la fonn; sa-k té poté koton-a minm, sé koulié-a li kòmansé santi chaj la ap pézé sou do-l; koton-an gonflé ak dlo. Yon jou pou chasè, yon jou pou jibié. Nou pa doué jijé sou aparans. Sé nan fin-fon problèm yo pou nou antré, otrémen n-ap pèdi tan nou. Anvan nou antré anndan fin-fon problèm yo, nou blijé pran tan nou, gadé byin, gadé lontan, pou nou pa fè jijman témèrè, pou nou pa kondané pròp tèt nou, antan nou antré nan koridò ki trò jinnin pou nou, koté n-ap kolé, koté nou pap kapab sòti, koté l-ap trò ta lè jé nou louvri. Nou doué respèkté sa-k té la anvan nou yo, ki té dépansé tan yo, intélijans yo, santé yo, ki té kité fanmiy yo, péyi yo, avantaj yo, pou yo sèvi mision nou-an. Nou pa doué san konsidérasion kondané tou sa yo té fè, san nou pa minm gin yon ti konvèsasion avèk yo, pou **pézé** sa yo fè ki byin, anvan nou **konté** sa yo fè ki mal. Sé pi fasil pou nou konté pasé pou nou pézé. Konté-a mété nou nan kantité. Pézé-a mété nou nan kalité. Kòm jijman nou, sé sou aparans nou fè-l, nou pa pran tan antré anndan moual problèm nan pou nou sondé valè-l, nou pito méziré lajè-l. N-ap mandé Manman Mari, Rèn mision yo, pou-l ba nou pasians pou nou youn sipòtè lòt, pou nou pran abitud vidé kè nou ak tout préjijé ki gin ladan-l, anvan nou angajé nou nan mision-an. Sé nan sans sa-a li t-a bon pou nou fouyé konsians nou alokasion lévanjil kinzièm dimanch B-a (Mc 6,7-13), ki mandé nou pou nou pa poté **anvin** sou rout la, sa vlé di okinn préjijé malonèt, ni pin, ni sak, ni ti monnin, sa vlé di okinn **asirans**.

Sé pou nou alé avèk sandal ak baton, sa vlé di tankou pèlrin Pèp Israël yo ki t-ap sot Éjip pou y-al nan péyi Bondié té promèt la (Ex 12,11), tankou étranjé ki t-apral travèsé lanmè Rouj pou yo plonjé nan dézè-a pandan karantan, pou nou montré kijan sou tè sa-a sé étranjé ak vouayajè nou yé

(He 11,13; Gn 23,4; Ps 39,13; 119,19), san nou pa gin koté pou nou pozé tèt nou (Lc 9,58). Nou pa la pou nou instalé. Nou pa anbarasé nou avèk anyin ki pou jinnin nou nan témouagnaj nou. Sé pa yon djòb n-ap fè, sé pa apouintman fiks n-ap défann, sé pa plas n-ap achté. Jodia-a nou isit, démin nou yon lòt koté. Koté léspri-a souflé-a, sé la nou alé (Ez 1,12). Konsa nou pa nan konkirans avèk pèsòn. Nou pa défann préstij nou dévan okinn group ni okinn kominoté. Koté yo vlé résévoua nou, nou rét la; koté yo pa vlé résévoua nou tou, nou pa insisté (Mc 6,10-11). Sèlman sé pa paské nou prévoua yo pap résévoua nou yon koté pou nou pa alé koté sa-a, paské lè sa-a sé nou minm Bondié riské mandé kont sou sa nou fè ak Bòn Nouvèl la li té konfié nou-an (Ez 3,16-31; 33,8).

Jézu ba nou pouvoua pou nou chasé mové léspri. Laplipa ditan, nou konprann mové léspri sa yo sé djab ak démon sèlman. Sètènman sé yo minm tou dabò. Min gin dé kalité mové léspri, yo pa poté ni non djab ni non démon, min sé nich gèp yo yé. Lè yo kòmansé antré nan group ak kominoté pou yo simin zizani, pou yo kritiké, pou yo mété tout moun ak tout bagay tèt an ba, sé travay djab la minm y-ap fè. Y-ap simin mové léspri, y-ap défèt tou sa moun té pran pasians fè ak tout bòn volonté. Jézu ba nou pouvoua pou nou chasé mové léspri. Nou gin pou nou lapriyè la Trè Sint Vièj Mari, Rèn Apot yo, pou kalité mové léspri sa yo, li fè yo disparèt sot nan group yo ak kominoté yo, pou Bòn Nouvèl Granmèt la pa jouinn bariè.

Prémié léktu kinzièm dimanch òdinè B-a (Am 7,12-15) montré nou kijan Bondié té chouazi Amòs, li rélé-l, li voyé-l pou-l al préché nan Samari. Amòs jouinn bariè nan min prêt Amazias ki anpéché-l préché, k-ap ménasé-l pou-l fè-l pè, k-ap di-l pou-l al fè rout li al préché yon lòt koté. Amòs réponn li sé pa djòb l-ap fè, sé pa yon métié li chouazi pou-l fè lajan, sé Granmèt la ki mét min sou li, ki fòsé-l al préché. Sé minm Amòs sa-a ki té déjà di: "Lion-an rélé, kilès ki pap tranblé? Granmèt la palé, kilès ki pap préché kòm profèt?" (Am 3,8). Sé lè-l t-ap rakonté vokasion-l nan li té di sa. Konsa tou Bondié ba nou yon mèsaj pou nou déklaré, li ba nou yon résponsabilité pou nou poté. Nou pa doué pè dévan okinn ménas. Mision nou gin pou nou réglé-a, n-ap réglé-l jous nan dènié ti pouin-an, paské sé Bondié k-ap mandé nou kont, sé li minm ki rélé nou, sé li minm ki voyé nou, sé li minm ki mété nou pou nou travay pou li, pou nou poté frui, yon frui k-ap diré (Jn 15,16).

Sin Pòl kòmansé lèt Galat yo antan-l di li sé Apot gras a Jézu ak Bondié Papa-a, sé pa moun ki mété-l la, sé pa pa lintèmédiè moun li vi-n Apot la

(Ga 1,1). Asirans li, li détayé-l bay Tésalonisyin yo, antan-l di sé pa sou manti li apuiyé, ni sou bagay ki sal, ni sou riz; sé pa moun l-ap chèché fè plézi, li pa nan flaté moun, li pap chèché okinn avantaj, li pap chèché grad, sé sèvis Bondié l-ap fè (1 Th 2,3-7). Li fè kò-l tou piti tankou yon manman k-ap bay pitit li tété, li fatigé kò-l lannuit kon lajounnin, pou-l pa jinnin pèsòn, antan l-ap anonsé lévanjil Bondié-a. Tankou yon papa dévan pitit li, li bay konsèy, li ankourajé, li insisté pou montré bon chemin-an (1 Th 2,8-12). Li rakonté Korintyin yo tout mizè li pasé nan mision-l san-l pa dékourajé (2 Co 11), nan travay, nan prizon, nan kou, nan lanmè, nan riviè, nan danjé asasin, nan danjé éspion, nan danjé payin, nan fatig, nan vouyayaj, nan vèy, nan grangou, nan souaf, nan jèn, nan frédi, nan manké rad, nan tèt chajé pou tout légliz yo (2 Co 11,22-39). Sa pa dékourajé-l.

Nou minm tou n-a pran kouraj. Jézu voyé-n, n-apralé, li voyé-n préché, n-apral tou patou, louvri kè-n pou-n di-l min mouin. Li voyé-n préché pou rékonsilié Amou ak Vérité, Jistis ak Lapè, dapré sa Psòm-répons kinzièm dimanch òdinè B-a di-a (Ps 85,11 = 84,11). Koté léspri Sin-an yé, la gin ékilib. Nou pa doué gin yon prèch ki insisté sou yon sèl plato balans la. Otréman nou chanjé mèsaj Bondié-a antan nou fè silans sou yon aspè li mandé nou préché, sé pa nou minm ki mèt mèsaj la. Sé sèvitè nou yé. Sé pou nou bay li jan-l yé-a. Sé pa lidé nou n-ap défann. Sé komision n-ap fè. N-ap mandé la Trè Sint Vièj Mari pou nou bon komisionè, pou nou pa ouété, pou nou pa mété (Ap 22,18-19). Sa Granmèt la di, sé li minm pou nou bay (Nb 22,38; 23,26; 1 R 22,14), paské sé sou travay sa yo y-ap jijé nou nan difé (1 Co 3,10-15). Sé Jézu sèl ki fondasyon-an. Si nou bati sou lò, lajan, bijou, boua, zèb, pay, lè difé-a limin, y-ap ouè sa travay nou-an vo, si-l rézisté nan difé-a. Konsa nou pa doué trò présé jijé. Sé pou nou tann difé-a rivé pou nou ouè ki travay k-ap rézisté. Sé pa kon nou fèk parèt pou nou konprann pou nou ranvèsé tout bagay. Sé pou nou gadé sa-k té la anvan nou dépi konbyin tan yo. Kalkilé sou frui travay ki rézisté déjà. Sé pou nou tann pa nou rézisté anvan nou déklaré pa yo-a pa bon. Sé sinp bon sans ki mandé sa. N-ap mandé Manman Mari pou-l aprann nou respékté travay misionè yo ki té pasé anvan nou yo, ki té planté, ki té rouzé, jous Bondié té fè travay yo dévlopé (1 Co 3,6). Yo voyé nou rékòlté koté nou pa-t simin. Sé dèt ki té travay anvan nou; nou minm minm nou rivé apré pou nou rékòlté (Jn 4,37-38). Dèt té fatigé kò yo. Nou minm nou éritié frui travay yo. Konsa tou sé pou nou gin sinplisité travay san nou pa ouè frui travay nou, antan nou aksépté sé dèt k-ap vi-n apré nou k-ap gouté frui travay sa yo. Sèké nou tout sé minm Kò-a nou yé. Yon sèl moun pa kapab fè tout bagay. Pié-a pa tèt la, kè-a pa bouch la, min-an pa léstomak la. Sé

nou tout ansanm ki fè youn (1 Cor 12,12-30). Nou pa doué signin non nou anba okinn fèy papié pou nou prètann sé nou minm ki lotè tou sa-k fèt ki bon. Sé pou nou aprann éfasé kò nou, kité Bondié fè ouè mérit nou. Rékonpans nou kaché nan kè-l (Is 49,4). Nou pa bézouin poté dé chémiz (Mc 6,9), sa vlé di pa inkiété nou pou démin (Mt 7,25-34). Sé Bondié ki pou okipé afè nou. Nou minm n-ap okipé afè pa-l. Dépi anvan tè-a fèt, Bondié té chouazi nou (Ep 1,4), dapré sa dézièm léktu kinzièm dimanch òdinè B-a di-a (Ep 1,3-14). Sa-l chouazi yo, li rélé yo, li fè yo vi-n kòrèk, li ba yo rékonpans bèlté-a (Rom 8,30). Van mèt ap souflé, tanpèt ménasé, sa Bondié paré pou nou, gran dlo pa gin doua poté-l alé.

*

* *

KINZIÈM DIMANCH ÒDINÈ C

Sin Luk sé Évanjélis ki insisté sou lacharité. Li sansib anpil. Li gin konsidèrasion pou ka maléré. Sé li minm ki fè nou ouè kijan Jézu gin atansion spésial pou sa-k pi pòv yo, pou sa k-ap souffri nan kò yo ak nan nanm yo, pou étranjé yo, pou sa-k san défans yo. Li montré nou madanm nan ki nan péché-a, ki nan pié Jézu (Lc 7,36-50), li fè nou ouè pòv vèv la k-ap antéré sèl pitit gason-l nan, avèk jès Jézu ki lévé pitit la pou li (Lc 7,11-17). Li fè nou asisté konvèsasion bon Laron-an avèk Jézu ki promèt li Paradi-a pou pròp jou vandrédi Sin-an minm (Lc 23,42-43). Sé li minm k-ap prézané nou pòtré ti gason-an ki té pati kité papa-l pou-l al banboché ak lajan-l nan yon koté byin louin épi ki té régrèt apré-a (Lc 15,11-32). Sé li minm tou ki fè nou asisté chanjman konduit Zaché ki résévoua Jézu lakay li (Lc 19, 1-10). Sin Luk sé Évanjélis ki gin atansion spésial pou ti délikatès; sé yon doktè li té yé. Sé doktè-a minm ki panché nan lévanjil kinzièm dimanch òdinè C-a (Lc 10,25-37) sou malad ki kouché bò chémin-an, k-ap ralé, dènié ral lanmò, sé apèn si gin yon ti souf nan bouch li, yo fi-n bat li pou yo pran lajan-l ak richès li. Yo kité-l "réstan lanmò".

Prèt la pasé byin présé. Li sot fè sérémoni oubyin pélérijaj Jérusalèm, l-ap désann Jériko nan pakèt ti santié mòn yo, ki pa gin pèsòn. Solèy cho, van ap vanté. Si-l panché li rété ap égzaminé, yo kapab fè-l konparèt pou-l témouagné. Si moun yo ki té fè krim nan pa trò louin, yo kapab fonsé sou li. Si moun nan ki atè-a, sé sanblan li fè sanblan li malad pou-l kapab chèché yon avantaj oubyin pou-l fè yon mové kou li minm minm... Prèt la gin afè pa-l pou okipé; program li tou trasé; anyin pap kontrarié-l. L-ap toujou jouinn yon vèsè nan labib pou-l éskizé konduit li. Sèvitè kay sakré-a pasé tou; sé nan minm sèvis la li soti pétèt, oubyin sé sèvis l-apral fè. Li pi an réta, paské li rété ap mét bagay yo nan lòd pou-l al Jériko. Dé mésié sa yo konn labib, min labib la pa konnin yo. Paròl Bondié-a ékri sou ròch pou yo; li pa gravé nan kè yo jan premié léktu kinzièm dimanch òdinè C-a di-a (Dt 30,10-14). Samaritin-an ki lènmi Juif yo dépi sou tan pitit Salomon-an, Roboam, ki t-ap maltrété yo-a (1 R 12,1-33; cf Ag 2,14; Es 4, 24; Jn 4,8; Lc 9,51-56; Jn 4,48), sé li minm ki panché ki krazé bariè ki té séparé Juif yo ak moun déyò yo, pou-l fè jès rékonsiliasion-an, sa dézièm léktu kinzièm dimanch òdinè C-a palé-a (Col 1,15-20). Jézu di: yo té di nou pou nou rinmin prochin nou min pou nou rayi lènmi nou (Mt 5,43), li minm li mandé pou nou rinmin lènmi nou (Mt 5,44). Li vi-n korijé glisman sa-a. Li fè tout moun vi-n frè, gras a san-l ki vidé sou Koua-a, pou-l bay tout moun pròp lavi pa-l. Prochin-an sé tout moun, paské Jézu vi-n toumin tout bagay nan

tout moun. Dépi Satan té antré nan Paradi-a, li té mète zizani ant Adan ak Èv (Gn 3,12), ant Kayin ak Abèl (Gn 11,1-9), ant Lamèk ak ti gason-an li té touyé-a (Gn 4, 23-24), alafin sé Babèl (Gn 11, 1-9), tout langaj gayé, tout moun séparé. Pannkot rivé; tout moun vi-n rasanblé; nan pouin frontiè lang ankò (Ac 2,1-11), sé yon sèl langaj ki ginyin sé lacharité.

Pou premié janvié 1986 la, Pap Jan-Pòl II té voyé yon mèsaj ki té gin kòm tit: "Lapè kòm valè san frontiè". Lévanjil kinzièm dimanch òdinè C-a (Lc 10,25-37) ba nou ézanp kijan sé pa nan séparation péyi pou ouété frontiè-a, min nan fon kè nou. Samaritin sé lènmi Juif dépi lontan. Pèp Israèl la té gin douz fanmiy. Gin dis ki té séparé sot nan fanmiy Juda-a, apré lanmò roua Salomon. Yo fè rouayom pa yo nan nò avèk Samari kòm kapital (1 R 12). Fanmiy Lévi-a, pa-t gin okinn pòsion pou li. Sé Granmèt la ki té pòsion éritaj li (Ps 16). Konsa tout lòt yo té séparé kite Juda. Lè roua Asiri-a té ranpòté laviktoua sou rouayom nan nò-a, li égzilé pèp nan nò-a, li ranplasé yo avèk dèt pèp étranjé ki pa-t soti nan ras Abraam (2 R 17,5-41; cf Jn 4,18). Sé pou sa Juif yo pa konsidéré moun Samari yo kòm pèp éritaj la. Mo Samaritin-an vi-n tounin yon fason pou jouré yon moun. Farizyin yo rivé minm di Jézu li sé yon Samaritin, yon moun démon abité (Jn 8, 48). Lè Jézu avèk Apot yo t-ap travèsé Samari pou y-al Jérusalèm, moun Samari yo pa-t résévoua yo, atèl pouin Sin Jan té vlé pou Jézu fè difé sièl la tonbé sou yo (Lc 9, 51-56). Si moun Samari yo pa-t résévoua yo, sé paské yo t-apral fété Pak la Jérusalèm. Lè Jéroboam té fi-n séparé dis fanmiy nan nò yo sot nan fanmiy Juda ak Jérusalèm, li instalé yon toro an lò Bètèl sou rout Jérusalèm, pou moun nan nò yo pa désann al fété Pak Jérusalèm (1 R 12,27-29). Jézu ak Apot yo sot nan nò, nan Galilé, ansyin téritoua ki té sou kontròl Samari-a. Yo blijé travèsé Samari pou y-al Jérusalèm. Moun Samari yo pa ouè sa ak bon jé (Lc 9,51-53). Sèké lè pèp la té tounin sot nan égzil, Samaritin yo té mélanjé ak dèt ras; min yo té kontinué ap adoré Bondié pèp Israèl la (2 R 17,24-41); sé pou sa sou bò pui-a, madanm Samari-a t-ap fè diskision ak Jézu sou késion rélijion-an (Jn 4,16-24). Époutan Jézu toujou pran défans Samaritin yo. Nan lévanjil kinzièm dimanch òdinè C-a (Lc 10,25-37), li bay parabol Bon Samaritin-an, pou fè Juif yo kite abitud palé Samaritin yo mal la. Frontiè-a sé pa nan séparation péyi yo li yé, sé nan kè nou, sé la pou nou rétiré-l. Li fè rémaké tou kijan nan dis moun maladi lalèp yo li té géri yo, sé Samaritin-an sèlman ki té tounin vi-n di-l mès. Nèf lòt yo sé té Juif, yo t-al fè rout yo (Lc 17,16). Li fè konstaté kijan prèt la ki Juif, ni Lévit la ki Juif, minm jan ak moun ki blésé atè-a, yo pasé lòt bò lari-a, y-al fè rout yo san yo pa gadé-l (Lc 10,25-37). Frontiè-a sé pa nan séparation péyi li yé, sé nan kè nou. Sé la pou nou ouété-l.

Jézu lonjé min bay madanm Samari-a sou bò pui-a, antan-l fè ouè sé pa ni Jérusalèm, ni sou mòn Garizim pou yo adoré Bondié, min sé nan kè, paské frontiè-a pa nan limit ki séparé Garizim ak Jérusalèm, sé nan kè frontiè-a yé. Sé la pou ouété-l (Jn 4,1-42). Toutotan gin frontiè nan kè nou, Bondié ap jinnin pou fè ladésant lakay nou. Fò-l alèz tankou lakay li. Sou Koua-a Jézu krazé tout bariè ki ginyin, li défèt tout limit, tout frontiè ki séparé pèp yo (Ep 2,13s). Nan pouin Juif ni Grèk, ni ésklav ni moun lib (Col 3,11; Ga 3,27s; 1 Co 12,13; Gn 11,1s). Tout moun fè yon sèl nan san-l ki signin délivrans nou. Vré péyi nou sé sièl la. Dépi nou sou tè-a n-ap viv nan léspri-l. Nou fèt nan yon péyi; nou gin abitud péyi-a, lang péyi-a, istoua péyi-a; kè nou doué dépasé frontiè péyi-a, frontiè sé limit, sé bariè ki bloké kominikasion avèk étranjé. Lansyin Téstaman té rékonèt kòmandman rinmin-an; min li té rétrési-l anndan limit pèp Israèl. Jézu éspliké kòmandman sa-a nan lévanjil kinzièm dimanch òdinè C-a (Lc 10,25-37), antan-l fè profèsè labib la konprann li gin dépasman nan Nouvo Téstaman-an. Prochin-an sé pa sèlman moun ki pròch nou nan ras, nan péyi, nan zanmi; prochin nou sé tout moun, minm sa ki fè aksion ki nan dezavantaj nou. Nou doué dépasé limit sa-a tou, frontiè sa-a tou. N-ap mandé Manman Mari pou nou konsidéré tout moun kòm prochin nou, pou nou pa gadé sou figi moun lè gin yon sèvis pou rann, pou nou konnin sé pou Jézu nou fè-l, sé li minm nou ouè nan prochin nou, sé sou kòmandman sa-a minm l-ap jijé nou (Mt 25,31-46): Mouin té grangou, ou té ban-m manjé, mouin té souaf, ou té ban-m bouè, mouin té nikò, ou té abiyé-m, mouin té malad, ou té vizité-m, mouin té nan prizon, ou té okipé-m, mouin té ÉTRANJÉ, ou té résevoua-m... Laloua sa-a pa louin nou, jan premié léktu kinzièm dimanch òdinè C-a di-a (Dt 30,10-14), **sé nan kè nou li yé** (Dt 30,14). Li pa gin frontiè. Nou pa bézouin travésé lanmè pou al chèché-l. Sé li minm ki rasanblé nou tout nan yon sèl fanmiy. Nou tout sé manb yon sèl Kò-a, anba lòd Jézu ki Tèt la, dapré sa Sin Pòl di nan dézièm léktu kinzièm dimanch òdinè C-a (Col 1,15-20). Tout moun **rékonsilié** nan li. Tout moun jouinn **lapè** pa pouvoua san lakoua-l la, **yon lapè san frontiè**. Ou-a rinmin Bondié-ou ak tout fòs ou ginyin, ou-a rinmin prochin-ou tankou-ou rinmin pròp kò-ou; sé lapè san frontiè (Lc 10,27; Dt 6,5; Jn 13,34). Ou sé étranjé, ou sou rout byin présé, ou kontré prochin-ou ki blayi plat atè; ou panché sou li, pou-ou ouè sa l-ap souffri, ou fè sa-ou kapab pou-ou fè-l joui santé (Lc 10,30-37). Laloua sa-a pa louin-ou, li pa anro nan sièl, li pa lòt bò dlo, pou-ou di "Kilès k-ap pran-l?" Paròl la tou pré-ou, nan bouch ou ak nan kè-ou, pou-ou kap obéyi tou sa-l kòmandé (Dt 30, 11-14). Sa-ou fè pou prochin-ou, sé pou Jézu ou fè-l. Tou sa-k égzisté rékonsilié nan li; sou tè kon nan sièl lapè réalizé gras a san ki sòti nan kè-l sou lakoua (Mt 25,40; 10,40; 18,5; Lc 10,16; Ac 9,5; Col 1,20).

Kinzièm dimanch òdinè C-a palé sou laloua rinmin-an. Rinmin-an ranmasé tout kòmandman yo, dapré sa lévanjil la di (Lc 10,25-37). Prémie léktu-a minm di nou kòmandman sa-a pa trò difisil pou nou (Dt 30,10-14), li nan kè nou. Sé Jézu-Kri ki rann li fasil antan-l vi-n tounin moun, li soufri, li mouri, li lévé pou nou. Si moun kapab rinmin, sé paské Bondié rinmin dabò (1 Jn 4,10), joutan li rinmèt sèl Pitit li-a pou nou (Jn 3,16). Kè sansib li ap débòdé, dapré sa Psòm-répons la di (Ps 68,14.17 = 69, 14.17). Késion spésialis laloua-a té mandé-a, sé ki sa-l gin pou-l fè pou-l gin lavi ki pap janm fini-an. Jézu réponn li sé rinmin. Réfrin pou alélouya anvan lévanjil la (Jn 6, 69s) di nou sé Jézu li minm minm ki gin paròl lavi ki pap janm fini-an.

*

* *

SÈZIÈM DIMANCH ÒDINÈ A

"Péyi Roua Sièl yo sanblé ak yon priz lévin yon madanm pran, li brasé nan toua mézi fari-n, joutan tout pat la lévé". (Réfrin Magnifikat premié Vèp 16e d.o.: cf

Mt 13,24-43). Nou mèt dòmi, nou mèt lévé, péyi koté Bondié Roua-a ap dévlopé kan minm, tankou yon sémans "automatique" cf Mc 4,26-29: "automatè" v. 28 αὐτομάτη). Lévin-an madanm nan mété nan fari-n nan, sé nou minm. Jézu di nou nou sé sèl tè-a (Mt 5,13). Fòs léspri Sin-an ki nan nou-an, li gin posibilite pou-l fè témouagnaj n-ap bay la rivé réalizé rézilta-l, san nou pa bézouin fè dòt manèv pou sa. Lè sé travay Bondié k-ap fèt, li kòmansé tou piti, li gin pou-l dévlopé tankou sémans la ki bay pié boua, koté ata zouazo sièl yo vi-n fè nich nan branch li. Lè Jézu t-ap monté nan Sièl la, Apot yo té vlé pou-l instalé Rouayom Israèl la (Ac 1, 6). Bondié pa janm trò présé pou-l fè ouè valè ak grandè aktivité-l. Li gin tout tan-an pou li. Mouins moun yo ouè valè aktivité nou, plis nou doué kontan, paské léspri Sin-an ap aji an kachèt. Otréman nou t-a riské gonflé kè nou tròp, nou t-a gaté travay Bondié-a (Dn 4, 7-34). Nou kapab gin minm tantasion sa-a, lè nou ouè kijan lévin méchansté-a gonflé vit (Mt 16,6; 1 Co 5, 6-8; Ga 5,9). Nou anvi pou Bondié fè fòs li éklaté vit, pou tout moun respékté-l. Sé kòm si nou t-a di-l sa Satan té di Jézu, lè-l té mété-l kanpé sou pouin tèt Tanp la: "Vòltijé anba pou tout moun kapab ouè ou sé Mési-a" (Mt 4,6). Nou kapab gin anvi di-l sa fanmiy li té di-l lè fèt Tant yo Jérusalèm nan, pou-l monté, pou-l al montré tout moun sa-l yé, pou-l sispann aji an kachèt (Jn 7, 3s). Époutan Jézu tann yo fi-n monté, sé lè sa-a li monté an kachèt, pou kont li, paské lè-l pa-t ko rivé (Jn 7,6-10). Nou pa kapab maché pi vit pasé Bondié. Li ouè tout bagay davans, li gin plan-l li fin-n fè. Li rézèvé yon tan pou tout bagay. Sé nou minm ki trò présé, k-ap rédi sou fisèl la pou nou fè-l tounin élastik, jous nou riské kasé-l.

Bondié gin pasians, jan premié léktu sèzièm dimanch òdinè-a A-a montré-a, nan liv lasajès la (Sg 12, 18; cf Sg 12, 13.16-19). Sèké li vlé ménajé nou. Li pa vlé raché blé-a ansanm ak mové zèb la. Li kité yo pousé ansanm. Mové lidè, mové égzanp aji sou anpil bon moun. Min sé yon okazion tou pou sa-k bon yo kapab sèvi ak volonté yo pou yo chouazi. Jézu invité nou gin minm pasians avèk li, pou nou pa trò vit réjété sètin katégori moun sot nan légliz la. Travay sa-a, sé pa pou nou li yé. Sé Anj Bondié yo k-a fè-l, lè moman-an rivé (Mt 13, 49; 24, 31). Lè sa-a y-ap triyé pouason yo pran nan lapèch la, y-ap mété bon yo yon koté, mové yo yon lòt koté. Kanta nou minm nou pa "juges de paix" (Mt 7,1), nou sé "Anges de paix" (Is 33,7). N-ap anonsé

lapè, san nou pa jijé, san nou pa kondané. Sé Bondié sèl ki konnin sa-k anndan konsians moun. Évidaman prezans yon sètèn katégori moun kapab kontrarié aktivité nou nan légliz la. Min sé lokazion pou nou dépasé difikilté sa yo, pou nou fè pi plis bon aksion. Kaptinn batiman ki pa rankontré tanpèt, li pa jouinn okazion pou-l déplouayé ladrès li nan fason l-ap dirijé batiman-an. Légliz gin bon manb. Légliz gin mové manb. Sé tou lé dé katégori yo k-ap viv ansanm. Fò nou gin tolérans, fò nou gin pasians, pou nou sipoté tout moun jan yo yé-a. Nou pa kapab pran plas Bondié nan jijman-an. Bondié bézouin pasians nou pou-l aji li minm minm. Minm si yo sondé nou antan y-ap di nou pran tròp tan anvan nou aji, nou pa doué sédé pou nou fè moun plézi antan nou kondané moun pou satisfè yon lòt pòsion. Sé Bondié nou gin pou nou rann kont. Tribinal lézòm pa gin doua sou nou (1 Co 4, 3-5). Sin Pòl mandé nou pou nou pa trò présé jijé, pou nou kité Granmèt la rivé, sé li minm k-a mét limiè sou sékrè ki nan fè noua yo pou-l dévoualé pansé ki nan fon kè, sé lè sa-a chak moun a jouinn louanj pa-l nan min Bondié. (ib). Non sèlman Jézu mandé nou pou nou pa jijé, li mandé nou pou nou padonnin. Finisman prémié léktu sèzièm dimanch òdinè A-a (Sg 12, 19) montré nou kijan Bondié vlé aprann nou pou nou gin kè sansib pou nou pran ka moun yo, pou nou aksépté yo ak tout féblès yo ginyin kòm moun. Sé pasians nou ki kapab pèmèt yo jouinn tan pou yo régrèt. Nan group Apot yo té gin divès oriantasion. Matié té koléktè kontribision, sé pou Romin yo li t-ap travay. Jézu rélé-l, li suiv li. Simon "le zélote" té kont Romin yo, li patizan group k-ap chèché délivré péyi yo ak fòs ponyèt yo. Jézu rélé-l, li suiv li. Sé ofi amézi diférans ki séparé Apot yo vi-n konblé nan Jézu. Juda trayi Jézu. Jézu ba-l tan pou-l antré nan fon konsians li, antan-l di-l: "Zanmi, sé ak yon bo ou trayi Pitit Moun nan!" (Lc 22, 39). Jouskalafin Jézu kinbé pasians li avèk li. Piè fi-n déklaré li pa rékonèt Jézu. Jézu kouazé jé-l nan jé-l. Piè kriyé san, li régrèt (Lc 22, 61s). Bondié té kréyé Adan ak Èv san péché. Sé lanvi Satan ki fè péché antré sou tè-a. Sé mové zèb li vi-n simin nan jadin-an, pou-l gaté travay Bondié-a. Bondié pran tan-l, pou-l fòmé yon pèp, pou-l fè la Trè Sint Viè Imakilé Konsépsion soti nan pèp sa-a, san okinn mak péché-a, pou-l fè-l vi-n Manman Pitit li-a, pou-l sovè tè-a. Profèt Jérèmi montré nou pasians Bondié, antan-l sèvi ak konparézon moun k-ap fè krich la (Jer 18, 4ss). Chak foua krich la manké, tè-a kasé, li rébrasé tè-a, li réfè krich la. Sé konsa Bondié fè avèk nou chak foua nou fè péché. Jézu sèvi ak konparézon moun nan ki té éfasé gro dèt lòt la té doué-l la. Li t-ap tann pou lòt la fè minm jan tou pou yon lòt moun ki té doué-l li minm tou (Mt 18, 23-35). Nan "Papa nou ki nan sièl la", nou di: "Padonnin sa nou fè-ou tankou nou padonnin moun ki fè nou kichòy" (Mt 6, 12; Ep 4, 32; Col 3, 13). Sé souasanndis foua sèt foua pou nou padonnin. Sa vlé di san rété (Mt 18, 22; cf Gn 4, 24; Lc 23,

34; 17, 4). Sé gras sa-a n-ap mandé Manman Mari, pou nou pa jijé, pou nou pa kondané, pou nou kite ròl sa-a pou Bondié, ki gin tout tan gin tan dévan-l, ki gin Sajès ki dépasé konpréansyon nou. Sin Pòl di nou sa n-ap soufri nan tè sa-a pa anyin dévan valè rékonpans k-ap tann nou nan Sièl la (Rom 8, 18). Profèt Jérémi pa-t konprann sans soufrans sa-a. Li té kriyé (Jer 11, 18-13-6; 15, 10-21; 17, 12-18; 18, 18-23; 20, 7-18). Jòb pa-t réyisi jouinn okinn éplikasyon dévan mové zèb la Satan té vi-n simin nan jadin-l nan Bondié té planté-a (Jb 1, 6ss). Qoèlèt pozé problèm sa-a, li pa jouinn répons. Li réfizé mandé Bondié kont. Sirasid pa ouè kijan Bondié ap rékonpansé bon yo pou-l pini mové yo sou tè-a. Sé liv la Sajès la ki orienté nou sou lavi Sièl la, nan péyi koté Bondié roua-a (Sg 10, 10). Bondié gin pou-l vi-n instalé Rouayom li-a nan finisman sièk tan yo. L-ap rékonpansé sa-k bon yo antan-l ba yo yon plas koté-l (Sg 6, 18) nan yon lavi ki pap janm fini (Sg 2, 23). Sa n-ap viv koulié-a, sé yon préparasyon lòt lavi-a (Sg 3, 9s). An-atandan kò nou al patisipé nan lavi nanm nan (Dn 12, 2; 2 Mac 7; Ac 17, 32; Sg 3-5; 16, 13; 19, 6-21), pou tout tan k-ap gin tan. Koua-a sanblé yon échèk. An fèt sé yon viktoua, viktoua lasajès. Paské lasajès sé lakoua épi lakoua sé lasajès. Sajès la voualé nan fènoua Koua Vandrédi-Sin-an, l-ap éklaté nan limiè Rézireksion Dimanch Pak la (Cf Jn 3, 13-14).

*

"Pitit moun nan ap voyé Mésajé-l yo. Tout moun k-ap fè lòt yo tonbé nan péché-a ak sa k-ap fè sa-k mal yo, y-ap ouété yo sot nan péyi koté-l Roua-a, y-ap jété yo nan boukan difé-a. Koté sa-a sé rèl ak manjé dan k-ap ginyin. Moun ki kòrèk yo minm, y-ap kléré kon solèy, nan péyi koté Papa yo Roua-a. Moun ki gin zòrèy, sé pou-l tandé!" (cf Mt 13, 24-43). Lévanjil la klè sou légzistans lanfè ak légzistans sièl. Minm si Jézu palé an parabol, li épliké patizan-l yo tout bagay apa, lè yo rivé lakay la. Bondié pa kréyé mal. Sé byin sèlman li kréyé. Sé jalouzi Satan ki gayé mal la sou tè-a. Li minm minm Bondié pa-t kréyé-l mové, li té fè-l Anj Limiè, sé pou sa yo relé-l "Lisifè", sa vlé di: "sila-a k-ap poté Limiè-a"; min olié sé limiè li poté, sé fènoua l-ap gayé; koté ki gin limiè, li mété fènoua pou-l aji an kachèt pi byin san yo pa rékonèt li. Parabol lévanjil sèzièm dimanch òdinè A-a montré kan minm malgré ringn fè-nou-a sanblé li pran pié sou tè-a, sé ringn limiè-a k-ap ranpòté laviktoua, sé yon kèsion tan sèlman. Satan konnin li déjà pèdi batay la, sé pou sa l-ap mété anpil aktivité pou-l chèché fè anpil moun tonbé nan lanfè ansanm ak li, koté ki gin rèl ak manjé-dan. Jézu di moun k-ap fè lòt moun tonbé nan péché, li t-a pi bon pou yo pou yo maré yon gro ròch nan kou yo, pou yo jété yo nan lanmè (Mt 18, 6-7; Mc 9, 42; Lc 17, 1-2). Li di si min-ou oubyin pié-ou vi-n tounin okazion pou-ou tonbé nan péché, koupé

yo, jété yo louin-ou, li pi bon pou ou pou-ou antré nan lavi-a avèk yon sèl min oubyin avèk yon sèl pié pasé pou yo jété-ou nan difé k-ap boulé tout tan-an avèk tou lé dé min-ou oubyin tou lé dé pié-ou; si jé-ou vi-n tounin yon okazion pou-ou tombé nan péché, raché-l, jété-l louin-ou; li pi bon pou ou pou-ou antré ak yon sèl jé nan lavi-a pasé pou yo jété-ou avèk dé jé-ou nan boukan difé-a (Mt 18, 8-10). Sé yon gro péché, moun ki pran abitud ap fè lòt tonbé nan mal; Jézu di Farizyin yo sa pa kont pou yo pa antré nan péyi koté Bondié Roua-a; ata lòt moun yo ki t-a vlé antré yo, yo anpéché yo antré; yo fi-n pèdi klé sièl la yo minm, apré sa y-ap maché tout koté jous travésé lòt bò lanmè fè patizan, pou yo fè yo vi-n tounin pitit difé pi mal ankò pasé yo minm (Mt 23, 13-15). Sé yon gro péché, moun k-ap pran abitud fè lòt moun tonbé nan péché. Sé travay Satan-an minm l-ap fè. Bondié ap kòdé, li minm l-ap dékòdé. Tout travay Bondié ap fè, li minm l-ap défèt li. Bondié fi-n simin bon sémans nan jadin-l, li minm minm li rivé, l-ap simin mové zèb. Sé yon gro péché, moun k-ap pran abitud fè lòt moun tonbé nan péché. Y-ap jété yo nan boukan difé-a (Mt 13, 40-42) pou tout tan (Lc 16, 23-26). Min tan-k yo sou tè-a, yo gin posibilité pou chanjé konduit, jan prémié léktu sèzièm dimanch òdinè A-a di-a (Sg 12, 19), paské pa gin okinn péché ki trò lou pou Bondié padonnin (Ps 103, 6-14; Jon 4, 2; Joel 2, 13-14; Ex 34, 6; 2 Sam 11-12; Lc 7, 36-50). N-ap mandé Manman Mari, Kachèt koté péchè yo jouinn protéksion, pou-l lapriyé pou nou, koulié-a ak lè n-apral mouri, pou nou pa séparé sot dévan fas Bondié.

*

* *

SÈZIÈM DIMANCH ÒDINÈ B

Apati sèzièm dimanch òdinè B, jous vintéinièm dimanch, sé sou pin lavi-a sitou litiji-a palé. Psòm-répons sèzièm dimanch la di: "Granmèt la ap souin-m, anyin pap manké-m" (Ps 22 = 23).

Ané B-a, sé lévanjil Sin Mak la yo li pratikman chak dimanch alasuit. Min apati dizétièm dimanch la jous vintéinièm dimanch òdinè B-a, y-ap travèsé nan lévanjil Sin Jan-an k-ap bay ésplikasyon mirak pin yo (Jn 6,1-15 = 17° d.o. B; Jn 6,24-35 = 18° d.o. B; Jn 6,41-51 = 19° d.o. B; Jn 6,51-58 = 20° d.o. B; Jn 6,60-69 = 21° d.o. B). Apati vindézièm dimanch òdinè B-a, litiji-a ap réprann léktu lévanjil Sin Mak la (Mc 7,1-23 = 22° d.o. B). Sé tout yon lansègnman katéchis k-ap pasé pandan sis dimanch sa yo (16°, 17°, 18°, 19°, 20°, 21°, d.o. B) osijè lékaristi. Alokazion sézièm dimanch òdinè B-a, litiji-a prezanté Jézu tankou Bon Gadyin-an k-ap okipé bann mouton-l yo, k-ap fè yo répozé. Li ouè kijan Apot yo tounin byin bouké sot nan mision, y-ap rakonté-l tou sa yo té fè ak tou sa yo té anségné (Mc 6,30). Li pran pitie pou yo, li invité yo ralé kò yo yon koté apa pou yo répozé (Mc 6,31). Sèké lè yo tounin byin bouké sot nan mision-an, moun yo pa kite yo an répo, y-ap antré-sòti san yo pa ba yo tan pou yo minm pran yon ti moso pin (Mc 6,31). Sé nan batiman yo bliyé travèsé al nan dézè (Mc 6,32). Malgré sa, anpil moun gin tan déviné intansion yo, yo fè tout tou létan-an apié, y-al tann yo lòt bò dlo (Mc 6,33). Lè Jézu ouè sa, li pran pitie pou foul la (Mc 6,34), ki tankou bann mouton san gadyin (ib. Cf Ez 34,5; Nb 27,17). Li aksépté bliyé ni répo pa-l ni répo Apot yo, pou-l konsakré tan-l ap bay anpil lansègnman ankò pou foul la (Mc 6,34). Nan konvèsasyon Jézu avèk Apot yo, sé kòm si Apot yo ap fè sa yo rélé "avocat du diable". Yo kòmansé mandé Jézu pou-l ranvoyé foul la (Mc 6,35-36). Apré sa yo di Jézu minm si yo t-a achté pin, yo pa t-ap janm jouinn kantité nésésè pou nourri tout foul moun sa yo (Mc 6,37). Alafin yo di-l sé sink ti pin ak dé ti pouason sèlman ki ginyin (Mc 6,38). Jézu pa tann yo palé foua sa-a, li pasé yo lòd pou yo fè moun yo chita sou gazon-an (Mc 6,39). Jézu lévé jé-l nan sièl la, li béni pin yo, li kasé yo, li bay Apot yo pou yo séparé bay moun yo (Mc 6,41). Li fè minm jan pou pouason yo tou (ib). Non sèlman moun yo manjé kont kò yo (Mc 6,42) min yo ranmasé douz panié plin moso ki rété (Mc 6,43), malgré té gin sink mil gason (Mc 6,44). Jézu ap **fôsé** (Mc 6,45 "ènagkasén" ἠνάγκασεν) Apot yo rémonté nan batiman-an pou yo travèsé lòt bò dlo ankò, pandan l-ap okipé ranvouayé foul la li minm pèsònèlman. Apré sa l-ap monté al lapriyé pou kont li sou mòn nan (Mc 6,46). L-ap fè tankou Moyiz k-ap lapriyé sou mòn nan, pandan Jozué ap batay nan plinn nan (Ex 17,8-16). Réyé lman vré Apot

yo ap déplouayé anpil éfò kont lanm yo, kont van-an, kont fènoua nannuit la, sé avèk anpil difikilté y-ap avansé (Mc 6,48). Sé lè sa-a li vi-n jouinn yo antan l-ap maché sou dlo-a (Mc 6,48), atèl pouin yo pè, yo rélé (Mc 6,49). Lè-l di: "Je suis" (Mc 6,50: "egô eimi" ἐγὼ εἶμι) li monté koté yo, li kòmandé van-an, kalmi vi-n rivé (Mc 6,51). Yo sézi, min yo pa ko konprann mirak pin yo toujou (Mc 6,52). Apèn yo débaké, moun yo konblé yo ankò, pou yo vi-n fè Jézu géri malad yo (Mc 6,53-56) antan y-ap éséyé omouin touché-l pou yo ouè si yo kapab géri (Mc 6,56). Sé apré pasaj sa-a (Mc 6,56) y-ap réprann léktu lévanjil Sin Mak nan vindézièm dimanch la (Mc 7,1ss). An atandan sé lévanjil Sin Jan-an k-ap sèvi nan 17è dimanch, 18e, 19e, 20e, 21e pou prezanté mirak pin yo, paské li bay ésplikasion-an tou osijè lafoua-a ak lékaristi-a. Pou sézièm dimanch òdinè B-a, litiji-a kontanté-l amòsé lansègnman sa-a, antan-l prezanté kòmansman évnman-an sèlman (Mc 6,30-34). Pasaj yo chouazi-a fini antan-l di: "Li kòmansé ba yo lansègnman anpil" (Mc 6,34). Sé apré y-ap pasé nan mirak pin-an avèk ésplikasion-l, antan yo travèsé nan lévanjil Sin Jan-an (17^e - 21^e d.o. B).

Tout pasaj sa yo fè yon sèl. Jézu kòmansé anségné; apré sa li fè mirak pin yo. Li maché sou dlo-a; li bay sans mirak pin yo; li bay sans maché li maché sou dlo-a. Dé mirak sa yo gin rélasyon antré yo. Jézu kòmansé fè dé mirak sa yo youn dèyè lòt: mirak pin yo (Jn 6,1-15; cf Mc 6,30-44), épi mirak mach sou dlo-a (Jn 6,16-21; cf Mc 6,45-42). Apré sa nan lévanjil Sin Jan-an, li bay ésplikasion mirak pin yo (Jn 6,22-59), épi ésplikasion mach sou dlo-a (Jn 6,40-63). Lékaristi-a orienté nou nan la Rézirèksion, koté kò nou pap sibi atirans tè-a ankò k-ap fè-l lou, k-ap fè-l fonsé nan dlo-a. Okontrè sé anro l-ap fè nou monté. Sé pou sa Jézu ap di Juif yo: "Sa fè nou bité nan konpréansion nou? **"É lè n-a ouè Pitit Moun nan monté koté-l té anvan-an?"** (Jn 6,61-62). Si-l kapab maché sou dlo-a, sé yon sign li vlé bay pou-l montré li kapab rémonté koté-l té yé anvan-an. Chè-a l-ap palé yo-a (Jn 6,53-58), sé chè ki déjà résisité, k-ap viv nan lavi **léspri**-a (Jn 6,63; cf 1 Co 15,44: "corps spirituel": "sôma pneumatikòn" σῶμα πνευματικόν). N-ap mandé Mari, Nòtré-Dam de lékaristi, pou-l ba nou lafoua nan Kò sa-a ki fèt sot nan li-a: "Ave, verum Corpus, natum de Maria Virgine" (Salu, vré Kò-a ki fèt sot nan Mari Ki Vièj la).

*

* *

SÈZIÈM DIMANCH ÒDINÈ C

Pasaj lévanjil sézièm dimanch òdinè C-a (Lc 10,38-42) insisté sou jès Mat fè aléga Jézu, antan-l résévoua-l lakay li; minm jan nan prémié léktu-a (Gn 18,1-10a) Abraam résévoua Bondié an Toua Pèsòn lakay li, sou fòm Toua Vouayajè yo. Résépsion sa-a dépasé yon sinp kad natirèl. Jézu ap invité Mat pou-l pa trakasé tròp nan anpil préparasion. Pi bèl pòsion-an, sé Mari ki chouazi-l, yo pa gin doua ouété-l nan min-l. Sèké Étranjé ki vi-n lakay li-a, sé Bondié li minm minm. Mari chita nan pié-l ap kouté Paròl li, vré Nouritit-a. Gin yon ékilib pou nou chèché nan lavi nou, antan nou asosié Mat ak Mari, youn lakuizi-n ap préparé manjé pou Étranjé-a, lòt la nan salon-an, ap kouté Étranjé-a k-ap rankonté vouayaj li sot fè kay Papa-l. Sint Térèz d-Avila di si sé té Mari ki té di Jézu pou-l fè Mat vi-n chita kouté ansanm avèk li, Jézu t-ap fè-l répròch, li t-ap di-l kité Mat trankil nan travay li. Sin Piè té viré gadé dèyè, lè Jézu té fi-n di-l pou-l suiv li-a, apré Réziréksion-an, li ouè Sin Jan, bon zanmi-l, li té mandé Jézu ki sa l-ap fè ak Sin Jan. Jézu di-l sé bagay ki gadé-l li minm pèsònèlman. Piè pa bézouin konn sa. Sa sèlman li mandé-l sé pou-l suiv li, san-l pa bézouin fouyé sou konduit Sin Jan (Jn 21,20-21). Dapré tanpéraman nou, dapré ròl nou, nou kapab plis panché sou bò Mat oubyin sou bò Mari, nou kapab santi plis gou pou nou travay oubyin pou nou lapriyè, sé nòmàl. Gin divès kalité flè nan jadin Bondié. Okontrè sé diféran yo minm ki fè richès jadin-an. Sèlman nou pa douè klasé lòt moun yo ki pa sou minm bò avèk nou-an, pou nou gadé yo mal pou sa. Sin Pòl di gin anpil manb, min yon sèl kò (1 Co 12). Ginyin sé kè, gin dòt sé tèt, gin dòt sé min. Kè-a doué bat, tèt la doué réfléchi, min-an doué travay. Moyiz té sou mòn nan, li t-ap lapriyè avèk bra-l louvri, pandan Jozué t-ap batay nan plinn nan. Toutotan bra Moyiz rét louvri, Jozué ap ranpòté laviktoua. Lè bra Moyiz fébli, fòs lamé Jozué-a fébli dévan Amalésit yo. Lè Ur ak Aaron ouè sa, yo pran yon gro ròch, yo mété-l yon fason pou Moyiz chita sou li. Yo soutni bra-l chak koté. Li lapriyè joutan solèy fi-n kouché. Jozué ranpòté laviktoua (Ex 17,8-16). Moyiz pou kont li pa kapab réglé tout problèm; Jozué pou kont li pa kapab réglé tout kozé. Sé pliziè douèt ki manjé kalalou, antan yo chak gin pozision diféran.

Pi bèl pòsion Mari chouazi-l; yo pa gin doua ouété-l nan min-l. Si Jézu di lapriyè-a sé pi bèl pòsion pasé aktivité-a, li pa di nou pou nou rét san pa fè anyin. Li vlé montré nan nésésité sa-a yo -lapriyè avèk aktivité-, gin youn ki pi inpòtan pasé lòt, paské sé nanm nan li yé, sé souf la, sé sous lavi-a: sé lapriyè-a. Li pa kondané aktivité pou sa li mété-l nan vré plas li kòm sèvis. Konsa moun gin tan ak gou pou lapriyè, yo pa doué méprizé sa-k pa gin tan,

sa-k pa gin gou. Okontrè yo doué fè tankou Moyiz fè pou Aaron. Pandan lòt yo ap travay, sé pou yo minm yo lapriyè pou yo. Krédo-a di: tout byin zanmi Bondié yo fè sèvi pou lòt yo. Sé yon sèl kò-d fanmiy nou fè. Lè léstomak la manjé, li bay piè-a fòs. Tout moun pa kapab chita sou minm bò kannòt la. Ékilib la, sé o nivo kominoté-a pou nou jouinn li. Sint Térèz lanfan Jézu té konprann sa byin, ki fè anndan "Carmel" la, li t-ap lapriyè pou misionè yo ki byin louin yo, pou yo kapab gin kouraj kontinué rout yo nan mòn, nan rak boua, nan dézè, pou y-al sové nanm frè yo. Sé sa yo rélé "Communion des Saints". Sin Pòl di nan sèzièm dimanch òdinè C-a (Col 1,24-28) li réalizé nan kò-l sa-k manké nan soufrans Jézu-Kri pou Kò-l légliz la. Nou tout ansam fè youn Lapriyè youn sé lapriyè lòt, soufrans youn sé soufrans lòt, aktivité youn sé aktivité lòt. Sé Sara ki t-ap okipé manjé pandan Abraam t-ap kouté Toua pèsonaj yo. Nan légliz ginyin k-ap fè divès kalité travay, pandan gin dôt k-ap lapriyè yon fason ofisièl o non légliz la minm, jan moua-n yo fè-a. Rélijyé yo nan "Carmel" yo, yo pasé dézèdtan ajénou an silans chak jou, inèdtan matin, inèdtan asouè, an plis tout lòt lapriyè yo, pou yo kouté Granmèt la k-ap palé an silans nan kè yo. Yo fè sa pou soutni kouraj Misionè yo k-ap ésouflé nan aktivité yo. Min chak moun doué kité yon ti plas kan minm pou pi bèl pòsion sa-a Mari chouazi-a, yo pa gin doua ouété nan min-l nan. Sin Fransoua-d-Sal té konn rivé bouké asouè, apré yon jounin koté-l sot fè anpil vizit misionè. Li pa kité dòmi pran-l avan-l fi-n tout priyè-l. Pi bèl pòsion, Mari chouazi-l, yo pa gin doua ouété-l nan min-l. Abraam résévoua Toua Pèsonaj yo lakay li. Nou résévoua yo nan kè nou dépi jou Batèm nou, Papa-a ak Pitit la ak Éspri-Sin-an. Sé tout tan pou n-ap kouté yo anndan fon kè nou. Sé yo minm k-ap dirijé aktivité nou, pou nou pa pèdi tan nou. N-ap mandé Manman Mari favè sa-a pou nou fè tankou-l, pou nou konsèvé Paròl Bondié-a nan kè nou (Lc 2,19.51); pou nou kité-l bay lavi nou sans li vlé. Plis n-ap kouté Bondié an silans, plis n-ap sansib sou vré bézouin frè nou, tankou Manman Mari k-al okipé Élizabèt (Lc 1,39ss), k-ap chèché palé Jézu sou divin nòs la ki fini-an (Jn 2,3). Plis nou fiksé jé nou sou Jézu, plis n-ap ouè bézouin frè ak sè nou yo. Mat ap travay, Mari ap lapriyè nou tout ansanm nou fè yon sèl fanmiy. Jézu sou rout, Mat résévoua-l; l-ap préparé sa-k nésésè. Mari nan pié-l, l-ap kouté sa l-ap di (Lc 10,38-42). Bondié parèt kot Abraam sou fòm Toua moun k-ap vouayajé, li rét kouté-l, Sara ap fè manjé (Gn 18,1-10). Nou tout ansanm, nou fè yon sèl; gin kè k-ap bat, gin jé k-ap ouè, youn ap travay, yon lòt ap lapriyè (1 Co 12; Col 1,24).

Sèzièm dimanch òdinè C-a palé sou "Accueil" (Lc 10,38-42; Sg 18,1-10a), fason pou nou toujou prèt pou nou résévoua étranjé lakay nou. Lévanjil la

montré kijan Mat résévoua Jézu byin antan-l fè résépsion pou li, li mété kont aktivité pou sa (Lc 10,38-42). Sé konsa tou prémié léktu-a montré kijan Abraam mété aktivité pou-l résévoua Toua Étranjé yo k-ap passé dévan pòt lakay li, épi sé Bondié minm li résévoua nan Toua Pèsòn la Trè Sint Trinité yo (Gn 18,1-10a). Yon moun ki abitué résévoua étranjé lakay li, li minm Bondié ap résévoua-l nan joupa-l la (cf Psòm-répons: Ps 14 = 15). Min sa-k égozis yo opouin ata lajan, y-ap prêté sa avèk gro intèrè (Ps 14,5 = 15,5) sé pa yo minm k-ap abité nan joupa Granmèt la. Min Granmèt la pa vi-n lakay nou pou-l résévoua, li vi-n lakay nou pou-l bay. Sé pou nou résévoua Paròl li tankou Mari nan pié Jézu (Évanjil: Lc 10, 38-42), tankou Sara k-ap kouté dèyè pòt la (premié léktu: Gn 18,1-10a). Sé pou nou kinbé paròl la nan kè nou (Alélouya: Lc 8,15).

Lè nou abitué tandé pasaj lévanjil sèzièm dimanch òdinè C-a (Lc 10,38-42), sé laplipa di tan pou fè louanj pou moun k-ap lapriyé nan pié Granmèt la, épi pou bay moun ki mété aktivité yo tròp an-avan yo yon ti léson. Nan sèzièm dimanch òdinè C-a poutan, sé pa dirèktéman léson sa-a ki dégajé sot nan pasaj lévanjil sa-a, minm si alafin nou gin doua tiré léson sa-a tou. Sé pa poutèt répròch Jézu fè Sint Mat la litiji-a chouazi lévanjil sa-a pou sézièm dimanch òdinè C-a. Si nou mété-l an konparézon avèk prémié léktu-a (Gn 18, 1-10a), nou ouè minm mèsaj tou lé dé léktu yo ginyin: fason pou akéyi yon étranjé. Nan fason Abraam té akéyi toua Étranjé yo, li fè Sara paré manjé pou yo, l-al li minm minm nan pak mouton-an, li pran yon ti bèf, li fè kuit li, li pran fromaj, li pran pin, li bay Toua Pèsonaj yo manjé. Sa montré litiji-a vlé ba nou yon léson sou fason pou nou akéyi moun lakay nou, minm lè yo vini san nou pa t-ap atann. Lè nou sèvi yon étranjé, sé Jézu li minm minm nou akéyi (Mt 25,35-36). Abraam pa-t konnin sé té la Trè Sint Trinité li té akéyi nan jès li té fè-a (He 13,2). Sé apré li vi-n ouè sé Bondié li minm minm li té résévoua lakay li.

Jézu ap di nou yon jou: "Mouin té grangou, nou té ban-m manjé; mouin té souaf, nou té ban-m bouè; mouin té ÉTRANJÉ, nou té résévoua-m; mouin té ni-kò, nou té abiyé-m mouin té malad, nou té vizité-m mouin té nan prizon, nou té vi-n ouè-m" (Mt 25,35-36). Sé pi bèl fason pou nou fè progrè nan chémin k-ap kondui nou pou nou fè youn avèk Granmèt la, sé lacharité. Sé pou nou bay, san nou pa gadé dèyè; nou pa doué bay avèk dé kè, nou pa doué régrèt sa nou fi-n désidé bay la, ni sa nou fi-n bay la, nou pa doué bay avèk min douat, pou nou réprann avèk min gòch. Bondié konn bay, sé nou minm ki pa konn séparé. Gin dé koté, sou tab la, nan sal-a-manjé-a, yo toujou mété yon kouvè anplis, pou si yon moun vi-n rivé san-l pa-t avèti, li santi kijan yo t-ap tann li kan minm. Sé pou nou mandé

Manman Mari délikatès li ginyin nan fason li abitué gadé sa lòt yo manké, soua kay Élizabèt (Lc 1,39-56), soua nan nòs Kana-a (Jn 2,1-11). Koté la Trè Sint Vièj Mari yé, li fè konstaté sa-k manké; li toujou ap véyé; kòm toujou manké kichòy, sé koté-l yé-a, avèk Limiè léspri-Sin an ki kléré-l la, li fè ouè sa-k manké-a. Si nou abitué fè tankou Sin Jozèf (Mt 1,24) avèk Sin Jan (Jn 19,27), nou pran la Trè Sint Vièj Mari lakay nou, n-ap ouè sa-k manké nou, nou pap konprann nou gin tou sa nou bézouin. Akéyi frè nou, étranjé yo, sé youn; min gin akèy pou nou rézèvé pi plis toujou pou Paròl Granmèt la nan kè nou, sé la vré kay la bati, sé la vré tab la drésé; sé Sajès Bondié ki bati kay sa-a, sé Sajès Bondié ki drésé tab sa-a (cf Pr 9,1-6). Sé pou nou akéyi Paròl li, pou nou kalkilé-l nan kè nou tankou Manman Mari (Lc 1,38; 2,19-51; 8,21; 11,28). Sé sa ki fè Granmèt la kontan anpil. Fò nou gin lafoua pou sa. N-ap mandé Manman Mari lafoua-l la (Redemptoris Mater, 27). Tout tan li t-ap kalkilé Paròl Bondié-a nan kè-l. Sé sa ki t-ap fè-l fè progrè tout tan pi plis nan lafoua. Lafoua pèmèt nou travèsé évènman nou pa konprann, antan nou rékonèt sé min Bondié ki la, sé li minm ki kòmansé, sé li minm k-ap kontiné, sé li minm k-ap fini sa-l té kòmansé-a (Ph 2,13; Ep 3,20; Ac 17,28; He 13,21; Ps 138,8)

*

* *

DISÉTIÈM DIMANCH ÒDINÈ A

"Péyi koté Bondié Roua-a, li sanblé ak yon moun k-ap chèché bijou kalité sipériè, lè-l jouinn youn ki gin gran valè, li bay tout byin-l pou-l achté-l" (Réfrin Magnifikat premié Vèp 17e d.o.; cf Mt 13,44-52), ni lévanjil la, ni premié léktu-a (1 R 3, 5.7-12) palé nou sou la SAJÈS. Sajès la sé tankou yon trézò ki kaché nan yon jadin (Pr 2,4; 8, 21, 20; Sg 7, 14; Si 1, 17.25 3, 4; Lc 12, 33s). Lè yon moun jouinn li, sé tou sa-l ginyin li vann pou-l achté jadin sa-a. Sajès la sé tankou yon bijou sipériè (Jb 28, 18; Pr 3, 15; 8, 11; 20, 15; 31, 10). Si yon moun jouinn li nan kòmès bijou l-ap fè, li vann sa-l ginyin pou-l achté-l. Sajès Bondié-a, nou pa kapab pran-l daso. Pa gin mouayin pran-l ak fòs ponyèt nou (Pr 30, 2-6; Ba 3, 15.23.29-31; Gn 11, 1-9; Jb 28, 12.13.20-21; Si 1, 6; 24, 28; 1Co 2,1; Is 53,1; 1Co 1, 24; Mc 6,2; R 11, 33). Sé vidé pou nou vidé sak nou, pou Bondié plin-l pou nou; sé mandé pou nou mandé-l tankou yon pòv, pou Bondié ba nou-l; sé jinnin pou nou jinnin kò nou pou nou mét Bondié alèz nan fason l-ap kominiké-l ba nou; sé rinnèt pou nou rinnèt tèt nou nèt nan min Manman MARI k-ap sèvi intèmedié pou-l fè nou jouinn li. Sé kat mouayin sa yo Sin Monfò indiké nou pou fasilite nou maché sou chémin k-ap minnin nan diréksion Sajès la: sé pou nou chèché-l san rété antan nou anvi-l anpil (Amour de la Sagesse Éternelle, 181); Sé pou nou mandé-l tout tan nan lapriyé nou (ASE 184); sé pou nou frinnin mové tandans nou k-ap rézisté-l, ak sakrifis nou fè (ASE 194); sé pou nou konsakré tèt nou nèt ba li nan min Manman MARI (ASE 203). Sé Bondié sèl ki Sajès tout bon vré; nou pa kapab fouyé Sajès li (Jb 28; 30-39;; 16, 24; 39, 12s; 42, 16-43; Rom 16, 27; Sg 9, 16-17). Sé li minm ki bay li (Pr 1-9; 8, 21-31; Jb 28; Si 24; Sg 7, 22.8, 1), antan-l bay pròp Pitit li-a (1 Co 1, 24; Jn 1,1-18; 4, 10; 3, 13; Mt 11, 27). Sé trézò-a sa ki kaché nan jadin-an, sé bijou-a sa ki gin valè yo pa kapab kalkilé-a. Ni istoua Pèp la k-ap gadé nan diréksion sa ki té pasé lontan-an avèk laloua-a, ni espérans Pèp la k-ap gadé nan diréksion sa-k t-ap vini-an avèk Profèt yo, sé Sajès la ki réalizé yo tou lé dé nan moman prézan-an. Sé nan sans sa-a Jézu di nan finisman lévanjil disétièm dimanch òdinè A-a: "Tout skrib ki vi-n tounin disip péyi-roua Sièl yo, li tankou yon mèt kay ki pran nan trézò-l ni sa-k tou nèf ni sa-k la dépi lontan" (cf Mt 13, 52).

Salomon té mandé Sajès pou-l té kapab dirijé Pèp li (1 R 3, 5-12). Sajès sé kalité moun ki gin rèsponsabilité pou dirijé lòt moun parèy yo, group fanmiy, group sosiété, group légliz. Té gin toua moun yo prezanté dévan Sin Toma dakin; yo mandé-l pou-l chouazi youn nan yo kòm rèsponsab yon kominoté. Gin youn ki té gin répitasyon savan, yon lòt té gin répitasyon sin,

touazièm nan té gin répitasyon moun ki gin sajès. Sin Toma di osijè premiè-a: "Si-l savan, sé pou-l fè lékòl"; pou dézièm nan li di: "si-l sin, sé pou-l lapriyè"; pou touazièm nan, li di: "si-l gin sajès, sé pou-l dirijé kominoté-a". Sajès sé kalité ki nésèsè pou moun ki gin responsabilité dirijé dôt moun parèy yo. Sé pa sinp sajès yo jouinn nan politik la, koté chak moun ap chèché fofilé kò-l pou-l rivé nan pi gran plas, pou-l fè lòt yo ba-l koté pou-l viré-tounin alèz jan-l vlé (Is 29, 14; 2 Sm 15, 12; Is 19, 11-12; Jer 8, 8-9; 18, 18; 9, 22; 49, 7; 50, 35; 51, 57; Pr 16, 25; 16, 10.12; 25, 6.7; 2 Sm 14, 20; 20, 22; Est 3, 13c). Sé pa sajès yo jouinn nan pèp la, tankou bon sans ki sèvi ak éspérians pou konnin nan tèl kondision ki rézilta tèl aksion ap produi (1 Sm 14, 14; 1 R 20, 11; Jer 31, 29; Ez 18, 2; R 9, 20-21). Sé pa sajès yo jouinn nan fanmiy, koté papa ap bay pitit li konsèy, kijan pou-l kondui tèt li, pou-l réyisi byin nan lavi-a (Tob 4, 1-21). Sé pa sinp sajès yo jouinn nan téknik, koté ladrès yon moun fè-l konnin kijan pou-l sèvi ak dis douèt li oubyin ak intélijans li pou avantaj pèsonnèl li oubyin pou avantaj pròp group pa-l (Ex 28, 3; 31, 3-5; 36, 1; Ps 107, 27; Jer 50, 35; Pr 31, 1; 2 Sm 20, 16). Sé SAJÈS yo jouinn nan RÉLIJION-an, koté volonté moun nan fè tèlman yon sèl ak volonté Bondié, sé pa li minm ankò k-ap aji, sé Bondié k-ap aji nan li (Pr 1, 7; Si 1, 9-10; Job 28, 28; Ps 37, 30; 51, 8; 49, 4; 90, 12; 104, 24; 136, 5; Pr 1, 2.20; 2, 2.6.10; 3, 13.19; 4, 5.7.11; 5, 1; 7, 4; 8, 1, 11.12; 9, 1.10; 15, 33; 30.3). Sajès sa-a sé nan Pitit Bondié-a sèl yo kapab jouinn li (Col 2,3) paské sé nan li sèl volonté moun nan fè yon sèl nèt ak volonté Bondié (Ba 4, 4; Sg 9, 9; Mt 17, 5; Is 53, 10; Lc 22, 42), antan sé yon sèl Pèsòn ki koréponn ak dé natu yo nan légzistans la: dézièm Pèsòn la Trè Sint Trinité-a: Jézu-Kri ki Bondié é ki moun an minm tan. Pou yon moun gin vré Sajès la, fò-l fè youn ak Jézu-Kri.

Sin Monfò di nou pi bèl mouyain pou sa fèt, sé rinmèt tèt nou nan min Manman Mari. Li sé Manman Tèt la, Jézu-Kri li; sé Manman Kò-a, légliz la. Sé li minm sèl k-ap sèvi intèmediè pou Kò-a fè yon sèl ak Tèt la (ASE 207). Nan sans sa-a la Trè Sint Vièj Mari sé Manman Sajès la (ASE 204), sé Mèt Sajès la (ASE 205-207), sé Tro-n Sajès la (ASE 208). Sé pi bèl chémin pou jouinn Sajès la (ASE 209). Chémin ki pi fasil la (Vraie Dévotion, 152-154) Chémin ki pi kout la (VD 155-156), Chémin ki pi kòrèk la (VD 157-158), Chémin ki pi asiré-a (VD 159-167). Sin Monfò di nou sé Jézu-Kri: Sajès ki vi-n tounin moun nan ak Chèf nou-an ki louvri chémin sa-a pou nou, nou minm ki manb li; si nou pasé ladan-l, nou pap tronpé (VD 168). Sètènman nou kapab rankontré kèk santié adouat-agoch ki dékontrolé nou, nou kapab viré monté, viré désann, tounin nan tout sans. Lè Bondié-Sajès ap kondui nou, li kòmansé fè nou pran kèk ti détou konsa (Si 4, 17) pou-l sondé nou avèk égzijans li, pou-l fè nou mét tout konfians nou nan li, joutan-l

dévoualé nou sékré-l sou chémin ki douat la. Nou pa doué pèdi pasians, antan nou pran chémin ki laj la, k-ap désann nan (Mt 7, 13s), sajès lèzòm yo ki gin prinsip k-ap mét fasilité dévan nou. Lévanjil disètièm dimanch odinè A-a (Mt 13, 44-52) di nou okontrè sé tou sa nou ginyin pou nou bay pou nou vi-n tounin tankou yon pòv, dé min vid, pou Sajès la fè nou kado pròp tèt li tankou yon trézò. Trézò sa-a kaché nan yon jadin. Sé jadin-an pou nou pran, pou nou jouinn trézò-a (Mt 13, 44). Sin Monfò di yo t-a pito séparé limiè-a sòt nan solèy la pasé yo séparé la Trè Sint Vièj Mari ak Jézu. Sé poua li di nou nou pa bézouin pè aksépté la Trè Sint Vièj Mari lakay nou, l-ap poté Jézu avèk li. Sin Jozèf aksepté-l lakay li (Mt 1, 20). Sin Jan pran-l pou tout byin li (Jn 19, 27). Sirasid di nou: "Moun ki gin konsidération pou manman-l, sé tankou yon moun k-ap ranmasé trézò". (Si 3, 4). Sé trézò Sajès sa-a ki kaché nan jadin-an n-ap mandé Manman Mari pou-l ba nou. Sin Pòl di nou Sajès Bondié-a, sé pa sékrè ki rété kaché, sa Bondié té déstiné pou bèlté nou davans dépi sièk tan yo (1 Co 2, 7). Li souété pou Bondié fè nou rivé nan dènié dégré intélijans la k-ap fè nou antré nan mèvèy sakré Bondié-a, koté tout trézò Sajès la ak konésans la kaché-a (Col 2, 2-3). Nou pa vlé chèché pou granmési (Jn 7, 36; Pr 1, 28). Si-l kaché (Jn 12, 36), sé pou moun ki pran pòz yo sipériè yo (Mt 11, 25; Mc 6, 2). Sé poua n-ap konpòté tèt nou tankou ti moun piti (ib; Ps 131, 2) pou-l dévoualé pou nou, minm si moun k-ap konpòté tèt yo dapré sajès lèzòm yo, yo réjité nou (Sg 2, 12-16; 20, 17; Ps 118, 22; Lc 2, 34). Lè tan-an a rivé, y-a triyé Sajès Bondié-a ak sajès lèzòm yo (1 Co 1, 19; Is 29, 16; Ps 33, 10; R 1, 22; 1 Co 2, 6ss; 3, 19; Job 5, 13; Ps 94, 11; Col 2, 23; Jc 3, 15; Ps 107, 27), tankou lévanjil disètièm dimanch òdinè A-a montré nou kijan y-ap triyé bon pouason ak mové pouason (Mt 13, 48).

Si nou avèk la Trè Sint Vièj Mari, Mèt Sajès la, Fotèy Sajès la, Chémin Sajès la, n-ap kinbé bon divin-an jouskalafin (Jn 2, 10). Nou pap jété vié chodiè pou chodiè nèf. N-ap pran nan trézò nou ni sa-k nouvo ni sa-k ansyin (Mt 13, 52). La Trè Sint Vièj Mari sé jadin-an koté trézò Sajès la kaché, dapré sa Sin Monfò di nou nan ti liv "Secret de Marie"-a (SM 70; 20), trézò sa-a pou nou chèché posédé, antan nou bay tout sa nou ginyin (Pr 4, 7; Mt 13, 44), trézò moun ki gin konsidération pou Manman-l (Si 3, 4), trézò sa-a Jézu rinmèt nou kòm Téstaman-l sou Koua-a: "Min Manman-ou" (Jn 19, 27). Yon Madanm ki gin tout bon kalité, kilès ki kapab jouinn li?", dapré sa finisman liv Provèb la di-a, li gin plis valè pasé bijou sipériè (Pr 31, 10): Notre-Dam de la Sajès.

Trézò-a moun nan jouinn nan jadin-l nan, sé Sajès Bondié-a. Sajès sa-a roua Salomon té mandé lè-l té fèk rivé roua-a, pou-l té kapab kòmandé pèp li avèk intélijans la (1 R 3, 9; Sg 9, 10). Sajès sé yon trézò. Liv Jòb la di: "Bèl kokiyaj lanmè ak kristal pa mérité yo palé sou yo; pito yo péché lasajès pasé yo péché bijou yo rélé "perle" la; an konparézon lasajès, bijou yo rélé "topaze" la ki sòti nan péyi létiopi-a san valè; lò ki pi fin-an pèdi pri-l" (Jb 28, 18-19). Lasajès sé trézò ki sòti nan Bondié. Li kaché, jan lévanjil disétièm dimanch òdinè A-a di-a. Baruch di nou apré Jòb (Jb 28, 1-28), kijan si Bondié pa dévoualé-l ba nou, nou pap jouinn li, tèlman li kaché fon (Bar 3, 9-36); sé minm langaj sa-a tout liv sajès lansyin Téstaman yo ginyin, lè liv Provèb yo di parégzanp: "Mouin pa-t aprann Sajès la, mouin pa konnin Sians Sin yo; kilès ki monté nan sièl la épi kilès ki désann, kilès ki ranmasé van-an nan ponyèt li, kilès ki séré dlo yo nan rad li, kilès ki asiré tout fondman rasi-n tè-a, ki non-l, ki non pitit li-a, si-ou konnin"? (Pr 30, 3-4). Jézu ap réponn késion sa-a liv Provèb yo pozé-a, antan li montré Nikodèm sé li minm minm ki poté répons sa-a bay lèzòm, antan-l désann sot nan sièl la, kòm Sajès (Jn 3, 13). Sé Sajès sa-a minm roua Salomon té mandé pou-l té kapab kòmandé pèp li-a (Sg 9, 1-18). Salomon di: "Ki moun ki konnin volonté-ou, si-ou pa bay lasajès, si-ou pa voyé léspri Sin-ou nan sot anro-a?" (Sg 9, 17).

Sé Jézu ki bay léspri Sin-an réyèlman vré, léspri Sajès ak Intélijans, léspri Konsèy ak Fòs, léspri Konésans ak Krint Granmèt la, léspri Piété (Is 11, 2). Jézu bay léspri sa-a san méziré (Jn 3, 34), tankou yon sous k-ap koulé nan kè moun ki kouè-a (Jn 7, 37). Min pou nou jouinn trézò sa-a tout bon vré, sé tou sa nou ginyin pou nou bay, jan lévanjil disétièm dimanch òdinè A-a di-a: Moun ki jouinn trézò-a, li pati, l-al vann tou sa-l ginyin, épi li achte jadin-an, pou-l al foyé trézò sa-a. Yo konparé la Trè Sint Vièj Mari ak yon jadin ki donnin bèl frui; tankou vré Paradi-a, nouvo Paradi-a, ki bay frui lavi-a. Frui sa-a, sé Jézu li minm minm; frui sa-a, sé Sajès Bondié-a ki kaché dépi tout tan épi ki vi-n dévoualé tèt li ba nou, antan li pran yon kò nan vant Mari ki Vièj. Lè Jézu ap mouri sou lakoua, li rimmèt Manman-l bay Sin Jan ki réprézanté nou tout. Sin Jan pran-l lakay li kòm pròp byin pa-l, kòm trézò-l (Jn 19, 25-27). Pou nou jouinn trézò sa-a, sé pou nou rimmèt tou sa nou ginyin. Sin Monfò invité nou fè konsékrasion pròp tèt nou nan min Manman Mari, spésialman pou 25 mas ak 8 désanb. Konsakré tèt nou nan min la Trè Sint Vièj Mari, sé rimmèt li tou sa nou yé ak tou sa nou ginyin, sé tankou "vann" tou sa nou ginyin pou nou achte jadin ki gin trézò Sajès la. La Trè Sint Vièj Mari té di moun yo ki t-ap sèvi nan nòs Kana-a: "Ninpòt sa Jézu ap di nou, sé pou nou fè-l!" (Jn 2, 5). Sé léson Sajès li t-ap ba yo, paské sé li

minm ki Fotèy Sajès la, koté Sajès la instalé. Li pa Sajès li minm minm, min sé Fotèy la li yé. Sajès la, sé Jézu li minm minm, Sèl Pitit Bondié, ki konn volonté Bondié; min sé nan la Trè Sint Vièj Mari li vi-n jouinn nou, sé nan li li adapté nan posibilite nou. Minm sa la Trè Sint Vièj di moun k-ap sèvi nan nòs Kana yo, sé sa tou Faraon-an té di moun Éjip yo osijè Jozèf (Gn 41, 59): "Al jouinn Jozèf; tou sa-l di nou, n-a fè-l". Sèké Jozèf sa-a, sé té yon moun ki té gin sajès ak intéljans (Gn 41, 39; Ac 7, 10). Si nou bézouin jouinn Jézu-Sajès, sé pou nou pasé pa lintèmédiè la Trè Sint Vièj Mari, Fotèy Sajès la. Avèk kado sa-a, lasajès, sé tout lòt kado yo Bondié ap ba nou. Lasajès la, sé tankou pòt la ki louvri sou tout kado léspri Sin-an bay yo. Sé li minm ki kòmandé yo. Yo nésèsè pou fasilite travay lagras la nan nanm nou, sé tankou fondasyon Bondié foyé pou-l planté poto kay la.

Sin Jak di nou si nou bézouin jouinn lasajès, sé pou nou mandé-l nan lapriyé nou; Bondié pap réfizé nou li, yon foua nou mandé-l avèk lafoua, san nou pa ézité, san nou pa fè tankou mouvman vag lanmè yo k-ap monté-désann, k-ap roulé dé bò, k-ap fè adouat-agoch, k-ap bouaté ak dé jarèt (Jc 1, 5-8; 1 R 18, 31). Sin Jak di nou vré lasajès la bay prèv li, sé nan frui-a nou jijé pié boua-a. Li di vré Sajès la mété kè pozé nan mitan moun yo, li fè yo gin bon konduit, yo tou dou (Jc 3, 13). Min li di si nou gin jalouzi anmè, ak léspri batay nan kè nou (Jc 3, 14), sa-a sé pa vré Sajès la; sé pa nan Bondié li soti, sa-a sé prinsip konduit ki soti nan tè-a, nan bèt, nan djab la (Jc 3, 15). Li di koté ki gin jalouzi ak kont, la gin dézòd tout kalité mové aksion (Jc 3, 16). Li di Lasajès ki soti anro-a, li nèt, li bay kè pozé, li fè nou byin dispozé pou nou aksepté lòt yo ak tout défo yo, li fè nou louvri kè nou pou nou résévoua yo jan yo yé-a, li plin pitié, li poté bon frui, li pa nan moun pa, li pa nan fè ipokrit (Jc 3, 17).

Jistis ak lapè sé dé grap frui k-ap balansé nan pié boua lasajès la (Jc 3, 18). Jistis ak lapè poutan sanblé dé bagay ki pa alé ansanm; époutan nan lasajès yo rankontré (Ps 85, 11). Lasajès sé ékilib ki pèmèt nou ajisté sa ki sanblé yo pa alé ansanm. Konsa tou si yon moun gin tanpéraman kontrè ak tanpéraman pa nou, nou kapab antann nou gras a Sajès la ki ba nou yon kè ki louvri pou aksépté tout moun ak tout défo yo. Sé favè sa-a n-ap mandé Manman Mari, pou-l fè nou jouinn: yon kè ki gin Sajès, pou nou aksépté tout moun ak tout défo yo, pou nou pa jijé pèsòn, paské sé Bondié sèl ki gin doua jijé, pou nou vi-n tounin "Ange de paix", pou nou pa pran pòz "Juge de paix", jan Sint Térèz lanfan Jézu di-a. Bondié té fè Salomon konpliman poutèt nan lapriyé-l li pa-t mandé pou-l viv lontan, ni richès, ni lanmò lenmi-l, min poutèt sé Sajès li té mandé; Bondié ba-l lasajès la, épi li ajouté

sou sa, li ba-l sa-l pa-t mandé-a, li ba-l richès ak grandè tou. Sé konsa Jézu di nou: "Kòmansé chèché Rouayom Bondié-a ak jistis li-a; tout rès la, y-a ba nou-l an plis" (1 R 3, 11-13; Mt 6, 33).

*
* *

DISÉTIÈM DIMANCH ÒDINÈ B

Dépi disétièm dimanch òdinè B-a rivé jous nan vintéinièm dimanch la, sé chapi 6 lévanjil Sin Jan-an y-ap li, sou pin-an Jézu té fè vi-n gin posibilite nourri tout yon foul moun nan dézè-a, épi ki invité pou gin lafoua, paské sé sign ki sèvi pou lékaristi-a (17^e d.o. B = Jn 6,1-15; 18^e d.o. B = Jn 6,24-35; 19^e d.o. B = Jn 6,41-52; 20^e d.o. B = Jn 6,51-59; 21^e d.o. B = Jn 6,61-70). Apati vindézièm dimanch la, yo réprann léktu lévanjil Sin Mak la (Mc 7,1-23), yo fini ak lansègnman sou pin-an ki sign lékaristi-a. Konsa, pratikman dépi sézièm dimanch la jous vintéinièm dimanch, nan ané B-a, sé minm lansègnman-an k-ap pasé; lékaristi-a. Pou disétièm dimanch la (2 R 4,42-44; Ps 145 = 146; Ep 4,1-6; Jn 6,1-15), premié léktu-a réponn lévanjil la, paské sé yon mésié ki poté yon mèl pin tou fré ki fèk défounin bay Profèt Élizé pou-l fè-l kado; Profèt Élizé di sèvitè-l yo pou yo bay pèp la manjé. Yo di-l: kòman ak ti kras kantité pin sa-a pou yo t-a fè nourri tout foul la. Sé minm sitiasion sa-a ki nan lévanjil Sin Jan-an: avèk sink ti pin sèlman Jézu ap nourri tout yon foul ki gin plis pasé sink mil moun san konté médam yo ak ti moun yo. Jézu sé vré Profèt la yo t-ap tann nan, ki vi-n fè minm sa Moyiz té fè nan dézè-a, lè-l té lapriyé pou lama-n nan té tonbé pou-l té nourri pèp la (Ex 16,1-36). Jézu réfè jès Profèt Élizé-a, li bay pèp la manjé. Min moun pa viv sèlman ak pin min ak tout paròl ki soti nan bouch Bondié (Mt 4,4; cf Jn 4,34; Am 8,11; Ne 9,29; Pr 9,1-5; Sg 16,26; Si 24,19-21; Jn 6,30-36.68ss). Épi Paròl la vi-n tounin chè, li abité nan mitan nou (Jn 1,14), lè la Trè Sint Vièj Mari di: "Mouin sé Sèvant Granmèt la, sé pou sa fèt pou mouin dapré Paròl ou-a" (Lc 1,38). Moun ki manjé Kò-l, ki bouè San-l, li gin lavi ki pap janm fini-an, Jézu fè mirak la antan-l nourri foul la ak sink ti pin yo ak dé ti pouason yo, apré sa li mandé lafoua nan Mésaj li, épi li bay lansègnman ki pi konsékan ki ginyin-an, lansègnman sou lékaristi-a. Sé la Juif yo ap pati kité-l, yo pa réyisi monté sou tèt mòn sa-a (Jn 6,60.66). Sé Apot yo k-ap rété avèk Jézu. Jézu ap mandé yo yo minm tou si yo vlé pati kité-l, Sin Piè ap réponn li: "Kot kilès pou nou alé? Ou gin Paròl lavi ki pap janm fini-an" (Jn 6,68). Lafoua Sin Piè lonjé min bay lafoua la Trè Sint Vièj Mari. Sé sou lafoua sa-a minm Jézu bati légliz li-a (cf Mt 16,18). Lékaristi sé sakréman lafoua. Ala yon bèl mèvèy, nou pa kapab konprann li, min nou kouè-l! Konsa nan disétièm dimanch òdinè B-a premié léktu-a (2 R 4,42-44) réjouinn mésaj Sin Jan-an (Jn 6,1-15) lè Filip té di Jézu: "Désan goud pin pa t-ap kont pou yo bay chak moun yon ti moso pin" (Jn 6,7). Lè Jézu fi-n bay tout moun manjé, gin rès ki rété, dapré sa Profèt Élizé li minm té di: "Y-ap manjé, épi ap gin rès" (2 R 4,43). Sé konsa Psòm-répons la (Ps 145 = 146)

di nan réfrin-an: "Ou louvri min-ou, Granmèt, ou satisfè nou". Min mèsaj nouvo Téstaman-an ap dépasé mèsaj lansyin Téstaman-an, pa sèlman nan yon kèsion dégré (longè, lajè, profondè), min nan yon kèsion **natu** antan li nouvo ("kainos" καινός Mt 9,17; Lc 5,36; Mt 27,60; Mc 2,21; Jn 19,41; Mt 13,52; 26,28 1.v.; Mc 14,24 1.v.; Lc 22,20; 1 Co 11,25; 2 Co 3,6; He 8,8.13; 9,15; Jer 31,31; Ac 17,21; Mc 1,27; Ac 17,19; 1 Jn 2,7; 2 Jn 5; Ap 5,9; 2,17; Mc 16,17; 2 p. 3,13; Ap 21,1; Jn 13,34; 1 Jn 2,8; Mt 26,29; Mc 14,25; 2 Co 5,17; Ga 6,15; Ep 2,15; 4,24; Ap 3,12; 21,2.5) nan sans li pa défréchi (Mt 9,17; Lc 5,36; Mt 27,60; Mc 2,21; Jn 19,41; Mt 13,52), li ranplasé sa-k té la anvan-an (Mt 26,28 1.v.; Mc 14,24 1.v.; Lc 22,20; 1 Co 11,25; 2 Co 3,6; He 8,8.13; 9,15; Jer 31,31), li réprézanaté yon bagay yo pa-t konnin ni tandé anvan (Ac 17,21; Mc 1,27; Ac 17,19; 1 Jn 2,7; 2 Jn 5; Ap 5,9; 2,17; Mc 16,17), li nan kondision ki pi kòrèk ki ginyin (2 p. 3,13; Ap 21,1; Jn 13,34; 1 Jn 2,8; Mt 26,29; Mc 14,25; 2 Co 5,17; Ga 6,15; Ep 2,15; 4,24 Ap 3,12; 21,2.5), li pa sèlman nouvo nan laj ("néos" νέος Mt 9,17; Mc 2,22; Lc 5,37; 1 Co 5,7; Col 3,10; He 12,24; Lc 15,12; Jn 21,18; 1 Th 5,11; Lc 22,26; Ac 5,6; 1 Th 5,1; Tt 2,6; 1 p. 5,5; Tt 2,4; 1 Tm 5,2.14). Ak yon mèt pin Élizé nourri tout yon foul. Ak sink ti pin épi dé ti pouason Jézu nourri tout yon foul tou. Min sans dé mirak sa yo diféran pa sèlman nan yon kèsion **dégré**, min nan yon kèsion **natu**. Profèt Élizé rété sou plan pin ki nésésè pou viv sou tè sa-a; Jézu tranpozé sou plan pin ki nésésè pou lavi sièl la ki pap janm fini-an. Sé pou sa Jézu ap di Juif yo sé pa pou manjé k-ap gaté-a pou yo travay, min sé pou yo travay pou manjé k-ap diré nan lavi ki pap janm fini-an (Jn 6,27). Sa-l ba yo-a, sé yon sinp sign li yé; sé pa pou manjé sa-a pou yo tounin vi-n koté-l ankò (Jn 6,26). Moun pa viv ak pin sèlman, min ak tout Paròl ki sòti nan bouch Bondié (Mt 4,4; Dt 8,3; Is 55,2). N-ap mandé Manman Mari pou-l aprann nou chèché manjé sa-a k-ap diré tout tan-an.

*

* *

DISÉTIÈM DIMANCH ÒDINÈ C

Jézu kontinué bay lanségman sou lapriyè (Lc 11,1-13 = évanjil; cf Gn 18,20-32 = premié léktu; cf 16° d.o. C = Lc 10,38-42: évanjil; Gn 18,1-10: premié léktu; cf Mt 6,9-13; 7,7-11). Jan-Batis té aprann patizan-l yo lapriyè, tankou li minm té konn lapriyè, li té aprann yo fè jèn, tankou li minm li té konn fè jèn (Lc 5,33). Jézu ap aprann patizan-l yo di "Papa" (Ga 4, 5; Rom 8, 15; Mc 14,36). Sé espérian pèsònèl pa-l l-ap kominiké yo. Lapriyè sa-a sé lapriyè dènié tan-an. Nou pitit Bondié nan dènié tan-an (Lc 6, 35; 20, 35); Yo rékonèt Non-l sin nan dènié tan-an (Is 29, 23). Bondié fè ouè Non-l sin nan Jézu (Mc 1, 23; Jn 12, 27) spésialman lè Jézu ap tounin kot Papa-a, pou-l voyé léspri-a (Jn 16,14). Ringn nan rivé nan dènié tan-an (Lc 4,6;22,18). Pin nou bézouin jou apré jou-a, jous nan dènié jou-a, sé pin dènié tan-an, pin kò Jézu-a (Lc 9,17; Jn 6,54). Padon péché yo, avèk protéksion kont Satan, sé toujou dènié tan yo (1 Th 1,6.10; 3,2-5; 5,6). Nan dènié tan yo, démon-an ap déchinnin pi rès, li konnin tan-l méziré (Ap 12,12).

Apré lanségman-an, sé parabòl la (Lc 11,5-8). Lè Bondié vlé bay yon favè, li kòmansé bay bariè: Pòt la fèmin" (Lc 11, 9). Tout moun ap dòmi nan kay la. Sé atè sou nat yo kouché. Si Papa-a lévé pou-l al louvri pòt la, l-ap maché sou timoun yo atè-a. Li réfizé zanmi-an sèvis la li mandé-a. Insistans zanmi-an blijé fé lòt la lévé, pou-l ba-l plis pasé sa-l mandé-a.

Apré parabòl la, sé konsign nan (Lc 11,9-13): Mandé, chèché, frapé (Mt 7,7-11). Kado Bondié ap bay la, sé Léspri Sin-an (Lc 11,13), kado dènié tan-an (Joël 3,1; Ez 36,27; Ac 2, 16.21), k-ap fè nou vi-n tounin pitit Bondié-a (Rom 8,23; 2 Co 1,22; 5,5; Ep 1,13). Lapriyè disétièm dimanch òdinè C-a prezanté-a (Lc 11, 1-13; cf Gn 18, 20-32), sé lapriyè démann, tankou lapriyè Abraam fè pou Sodòm nan (Gn 18, 20-32). Min Abraam té manké insisté. Li té manké lodas. Jézu invité nou gin lodas (He 4, 16), pou nou proché avèk asirans kot Fotèy favè-a. Sé Léspri Sin-an Bondié ba nou, li minm k-ap lapriyè nan kè nou, sa-k korésponn ak lidé Bondié (Rom 8, 26-27). Sé ak priyè démann nan nou pi abitué. Min gin priyè louanj tou, priyè gratis, tankou Mari nan pié Jézu, Bétani, priyè silans, jan Psòm nan di-a (Ps 65,2): "Pou ou, Bondié, minm silans sé louanj", tankou priyè Brévié-a tou. Gin priyè rémèsiman tou, tankou Samaritin-an ki té géri ak lalèp la (cf Lc 17,18), tankou Magnifikat la Trè Sint Vièj Mari-a (Lc 1, 46-56). Kalité lapriyè démann nan litiji-a invité nou kalkilé pou disétièm dimanch òdinè C-a, sé PÈSÉVÉRANS. Nan nòs Kana, la Trè Sint Vièj ba nou égzanp sou sa. Li réyisi (Jn 2, 1-12).

Konsa, lévanjil disétièm dimanch òdinè C-a (Lc 11, 1-13) gin toua pati: prémié pati-a sé moul lapriyè-a (Lc 11, 1-4; "Papa nou ki nan sièl la"); dézièm pati-a sé parabòl sou lapriyè-a (Lc 11, 5-9: insistans zanmi-an); touazièm pati-a sé konsign sou lapriyè-a (Lc 11, 9-13: mandé, chèché, frapé).

Psòm yo édé nou anpil nan lapriyè louanj (Ps 8, 19, 1-7; 29; 33; 46-48; 65; 66,1-12; 68; 76; 77, 14-21; 84; 87; 93; 95-99; 104; 111; 113-114; 117; 122; 129; 134-138; 139; 145-150), ni nan lapriyè démann (Ps 3; 4; 5-7; 10; 14 = 53; 17; 22; 25-28; 35-36; 38-39; 40, 12-18; 42, 43; 51; 52; 54, 57; 58; 59; 61; 63-64; 69-71; 77, 2-11; 86; 88; 102; 109; 120; 140; 141-143), ni nan lapriyè remèsiman (Ps 10, 1-11; 22; 30-31; 40, 2-11; 41; 66, 13-20; 73; 92; 103; 107; 116; 138).

Anpil fouda démann nan vlopé nan remèsiman-an. Sé yon fason pou di Bondié mèsi davans, antan nou sètin, avèk lafouda nou, sa nou mandé-a, nou déjà jouinn li.

Gin kontinuasion sou mèsaj lapriyè-a ant sézièm dimanch òdinè C-a avèk disétièm dimanch la. Pou sézièm dimanch la, lévanjil la montré nou kijan pou nou chèché mèt ékilib nan lavi nou, antan nou asosié lapriyè ak travay nou, pandan nou rézèvé prémié plas pou lapriyè (Lc 10,38-42). Mari chita nan pié Jézu, ap kouté-l, pandan Mat ap préparé manjé, minm jan Abraam rét kot Bondié pandan Sara ap fè sèvis lakuizi-n (Gn 18,1-10). Pou disétièm dimanch òdinè C-a, litiji-a mété insistans sou pèsévérans nan lapriyè. Jézu aprann Apot li yo pròp lapriyè li minm li té konn fè: "Papa nou ki nan sièl la". Nou rétrouvé Abraam kot Bondié, l-ap lapriyè pou Sodòm ak Gomò (Gn 18,20-32). Abraam ap fè kòmisi l-ap "machandé". Bondié sédé chak fouda, joutan Abraam fébli, li pa ozé désann pi ba. Min si-l té désann pi ba, Bondié t-ap dakò. Jézu di: mandé, y-ap ba nou; chèché n-ap jouinn; frapé y-ap louvri ba nou (Lc 11,9). Lévanjil disétièm dimanch òdinè-a fini antan-l di pou nou mandé Papa-a bon léspri-a, l-ap ba nou li (Lc 11,13). Min vré lapriyé. Gin bagay n-ap mandé ki pa kadré ak volonté Bondié. Sin Pòl di Romin yo nou pa konn ki sa pou nou mandé; léspri Sin-an nan kè nou ap lapriyè pou nou ak mo nou pa konprann; sa-l mandé-a korésponn ak volonté Papa-a (Rom 8, 26-27). Jézu montré Apot yo lapriyè; li di: "Sé pou volonté-ou fèt sou tè-a tankou nan sièl la" (Mt 6,10). Volonté Bondié, nou pa konnin-l fasil; nou pa réalizé-l fasil. Sé léspri Sin-an ki konnin-l, sé li minn ki kapab réalizé-l. Gin dé fouda nou ouè-l min nou pa gin fos pou nou fè sa-l mandé (Rom 7, 14-25), jan Sin Pòl di-a: Byin-an dévan-m mouin vlé fè-l,

mouin pa kapab. Mal la mouin pa vlé fè-a, sé li minm m-ap fè. Fòs mal la k-ap pèzé nou-an, sé léspri Sin-an ki kapab krazé-l pou nou (Rom 7,21). Sé poua nou doué mandé Bondié Papa-a kado léspri Sin-an. Pap Jan-Pòl II té palé sou sa anpil nan lèt ansiklik li té ékri osijè léspri Sin-an pou 30 mé 1986 ("Dominum et Vivificantem"); li té signin lèt la pou 18 mé 1986 nan fèt lapannkot. Li té montré kijan Léspri Sin-an, sé Léspri Papa-a ak Pitit la, ki bay légliz la, li (niméro 3-26). Li té fè ouè kijan sé Léspri Sin-an, ki bay prèv péché tè-a (niméro 27-48). Li té épliké kijan sé léspri Sin-an ki bay lavi (niméro 49-66).

Dépi pròp jou dimanch Pak la, nan asouè, Jézu té soufflé sou Apot yo; li té ba yo Léspri Sin-an, pou yo éfasé péché sou tè-a (Jn 20,22-23). Sé léspri sa-a minm li té promèt jou Jédi-Sin-an (Jn 14,16-17; 16,5-15). Li té anonsé-l nan fèt Tabènak yo (Jn 7, 37-39). Li té bay Samaritèn nan yon premié son klòch sou li, sou bò pui Jakòb la (Jn 4,14). Dépi-l t-ap palé ak Nikodèm nan nuit la, li té konprann ròl Léspri Sajès sa-a (Jn 3,5-8). Sé yon kado ki sot nan Bondié Papa-a ak Pitit la. Li montré sans péché. Li bay vré lavi-a. Pap la fè nou voyé jé nou sou ané 2000 la, koté n-ap fété sa yo rélé "Jubilé"-a: gran dat ki raplé nésans Jézu-Kri sou té-a. Li mété insistans sou pati sa-a nou déklaré nan Krédo-a: "Le Christ qui a été conçu du Saint Esprit" (Cf Lc 1,34-35; Mt 1,18). Sé léspri Sin-an ki fè tan-an rivé nan dènié pouin pou-l té rivé-a (Ga 4,4-5), pou Jézu-Kri fèt, Jézu-Kri ki Alfa ak Oméga, Kòmansman ak Finisman (Ap 1,8; 22,13). Koté léspri Sin-an yé, la gin libèté (2 Co 3,17). Sèk sé péché-a ki fè nou ésklav. Léspri Sin-an éfasé péché nou. Koté-l yé, ésklavaj mové léspri-a disparèt avèk chinn péché-a ki krazé-a. Nou jouinn vré libèté-a. Tout souadizan libèté ki makònin ak péché, li pa libèté tout bon vré. Li fè nou pi ésklav ankò. Vré libèté pitit Bondié yo, sé nan léspri Sin-an li yé. Sé poua nou doué mandé Bondié Papa-a kado sa-a tout tan, bon léspri-a, l-ap ba nou li pou-l fè nou jouinn vré libèté-a n-ap chèche-a.

Sé léspri Pitit Bondié-a k-ap lapriyé nan kè nou, k-ap di: "Aba", sa vlé di: "Papa", premié mo nan lapriyé Jézu té aprann Apot yo: "Papa nou ki nan sièl la" (cf Ga 4,6; Rom 5,5; 2 Co 1,22). Frui léspri sa-a, sé "charité, kè kontan, lapè, pasians, sèvis, bon kè, konfians nan lòt yo, bon jan, otorité sou mové panchan" (Ga 5,22-23). Gin anpil sign lanmò k-ap plané sou tè-a nan épòk nou-an, avèk ménas lagè, avèk grangou anpil koté, avèk avòtman... (niméro 57). Sé moman pou nou rélé léspri ki bay lavi-a (Ps 103,20) yon fason spésial nan tan k-ap préparé ané 2000 la, tankou yon gran tan lavan. Sé léspri ki bay lavi-a ki kapab délivré nou ak tandans moun ki konsidéré lanmò tankou dènié bout chémin légzitans la (niméro 57), antan yo pa rékonèt anyin anlè matiè-a. Sé poua olié y-ap chèche lapè, sé divizion y-ap

simin, pou démolé lavi. Pap la di: Jibilé ané 2.000 la gin mésaj libérasion Léspri Sin-an fè pou nou-an antan sé li minm ki édé nou dégajé nou sot nan rout falèz sa yo k-ap fè nou glisé nan trou-a. Li di: "Le grand Jubilé de l'an 2.000 contient donc un message de libération par l'action de l'Esprit: seul Celui-ci peut aider les personnes et les communautés à se libérer des déterminismes anciens et nouveaux, en les guidant par la loi de l'Esprit qui donne la vie dans le Christ Jésus" (R 8,2), en agissant dans la plénitude de la vraie liberté de l'homme ainsi découverte. En effet, comme l'écrit Saint Paul, là "où est l'Esprit du Seigneur, là est la liberté (2 Co 3,17)" (niméro 60). Nan finisman Lèt ansiklik la (n. 65), Pap la rézèvé yon pasaj koté-l palé nou sou lapriyè-a, antan-l montré nou koté ki gin lapriyè, Léspri Sin-an la, paské sé li minm ki sous lapriyè-a, ki nanm li, sé li minm ki souf li. Li di lapriyè-a sé voua moun ki pa gin voua, sé gran rèl Jézu-Kri sou Koua-a (He 5,7): "La prière demeure toujours la voix de tous ceux qui apparemment n'ont pas de voix, et dans cette voix résonne toujours la "violente clameur" attribuée au Christ par la Lettre aux Hébreux" (n. 65). Li di priyè-a, sé yon vid Léspri-Sin-an sèl kapab plin. Épi li sité pasaj lévanjil disétièm dimanch òdinè C-a, koté Jézu invité Apot yo pou yo mandé Papa-a kado Léspri Sin-an: "La prière est aussi la révélation de cet abîme qu'est le cœur de l'homme, une profondeur qui vient de Dieu et que Dieu seul peut combler, précisément par l'Esprit Saint. Nous lisons dans Luc: "Si donc vous, qui êtes mauvais, vous savez donner de bonnes choses à vos enfants, combien plus le Père du ciel donnera-t-il l'Ésprit Saint à ceux qui l'en prient!" (Lc 11,13) (n. 65). Sé la tou li di nou Léspri Sin-an sé kado-a, an minm tan tou li sé lapriyè-a: "L'Esprit Saint est le Don qui vient dans le cœur de l'homme en même temps que la prière" (n. 65) Li di kado sa-a vini pou édé féblès nou: "Dans la prière, il se manifeste avant tout et par-dessus tout comme le Don qui "vient au secours de notre faiblesse" (cf R 8,26)" (n. 65). Sèké nou pa konnin sa pou nou mandé. Sé Léspri Sin-an k-ap palé pou nou antan la-p di sa nou pa konprann.

Léspri Sin-an fè nou lapriyè, an minm tan li kondui lapriyè nou-an anndan fon kè nou. Li fè lapriyè nou vi-n tounin yon lapriyè Bondié: "Non seulement l'Esprit Saint nous amène à prier, mais il nous guide de l'intérieur dans la prière, compensant notre insuffisance, remédiant à notre incapacité de prier; il est présent dans notre prière et il lui donne une dimension divine (cf ORIGÈNE, De Oratione, 2, PG 11, 419-423). "Celui qui sonde les cœurs sait quel est le désir de l'Esprit et que son intercession pour les saints correspond aux vues de Dieu (R 8,27)" (n. 65). Pap la raplé kijan épòk nou-an bézouin anpil lapriyè, paské n-ap viv moman ki difisil. Li konstaté avèk satisfaksion kijan gin anpil group moun k-ap chèché rénovlé lavi dapré

léspri-a: "Il y a...[] depuis quelques années, un nombre croissant de personnes qui dans des mouvements ou des groupes toujours plus développés, mettent la prière au premier plan et y cherchent le renouveau de la vie spirituelle. C'est là un fait significatif et réconfortant, puisque cette expérience apporte une contribution réelle à la reprise de la prière parmi les fidèles, aidés à mieux considérer l'Esprit Saint comme celui qui suscite dans les cœurs une profonde aspiration à la sainteté" (n. 65). Pap la invité yo jouinn yon ankourajman nan Lèt ansklik li ékri sou Léspri Sin-an (Dominum et Vivificantem), li mandé yo tou pou yo aji dapré lign légliz la trasé ba yo: "C'est ainsi que les temps que nous vivons rapprochent de l'Esprit Saint de nombreuses personnes qui reviennent à la prière. Et je suis sûr que toutes trouveront dans l'enseignement de la présente Encyclique une nourriture pour leur vie intérieure et qu'elles sauront, sous l'action de l'Esprit, affermir leur engagement dans la prière en plein accord avec l'Eglise et avec son Magistère" (n. 65). Li fini antan-l mandé nou pou nou PÈSÈVÉRÉ nan lapriyè-a, tankou Apot yo ansanm avèk Mari, Manman Jézu-Kri, antan n-ap tann léspri lapannkot la: "l'Église persévère dans la prière, comme les Apôtres, avec Marie, Mère du Christ, et avec ceux qui, à Jérusalem, constituaient le premier noyau de la communauté chrétienne et attendaient en priant la venue de l'Esprit Saint" (n. 66). Mari sé modèl légliz, sé Manman-l. Avèk li n-ap lapriyè pou paròl lapokalips la réalizé: "L'Esprit et l'épouse disent au Seigneur Jésus: Viens!" (Ap 22,17). Minm jan léspri Sin-an té préparé Mari nan vil Nazarèt la pou Jézu té vini premié foua-a, konsa tou l-ap préparé légliz la pou Jézu tounin. Ané 2.000 la, sé yon jalon sou rout Jézu ap fè pou-l tounin-an. Sé yon "Chiffre rond" ki invité nou gadé sa yo rélé "plénitude du temps"-an. Sé poua sé léspri Sin-an n-ap mandé Papa-a yon fason spésial, pou-l fè nou préparé kè nou pou gran "chiffre rond" sa-a, pou "jalon" sa-a, sou rout akonplisman tan-an: "Dans la perspective du troisième millénaire après le Christ, tandis que "l'Esprit et l'Épouse disent au Seigneur Jésus: Viens", cette prière est chargée, comme toujours, d'une portée eschatologique destinée à donner aussi une plénitude de sens à la célébration du grand Jubilé. C'est une prière tournée vers le salut à venir, auquel l'Esprit Saint ouvre les cœurs par son action au cœur de toute l'histoire de l'homme sur la terre. En même temps, cependant, cette prière s'oriente vers une étape précise de l'histoire marquée par l'an 2.000, dans laquelle est mise en relief "la plénitude du temps". L'Église désire se préparer à ce Jubilé dans l'Esprit Saint, de même que c'est l'Esprit Saint qui prépara la Vierge de Nazareth, en laquelle le Verbe s'est fait chair" (n. 66). N-ap mandé Manman Mari PÈSÈVÉRANS sa-a nan lapriyè-a, pou Papa-a

ba nou bon lés-pri-a nou mandé-l la (Lc 11,13), jan Jézu invité nou fè nan finisman lévanjil disétièm dimanch òdinè C-a.

*

Disétièm dimanch òdinè C-a palé sou lapriyè ki pa doué dékourajé (Lc 11,1-3 = évanjil), minm si Bondié fi-n déklaré pinision-an (Gn 18,20-32 = prémié léktu). Psòm-répons la di; nan ninpòt ki jou moun nan rélé, Bondié réponn (Ps 137 = 138). Nou sé pitit k-ap lapriyè PAPA (Rom 8,15 = Alélouya).

Lapriyè, sé pa yon fòmalté yo ranpli, sé pa tankou yon vè dlo nou boué épi nou fi-n ak sa; lapriyè sé yon réspirasion. Lè n-ap réspiré, sé pa yon sèl bouché lè nou pran, sé tout tan n-ap aspiré lè-a, si nou pa vlé toufé. Sé konsa nanm nou bézouin réspiré Bondié; sé pa yon ti moman an pasan, sé tout tan pou n-ap lapriyè, san nou pa janm rété. Sint-Ogustin di toutotan nou kinbé anvè lapriyè-a, lapriyè-a pa sispann ("ton désir est ta prière"). Lè nou frapé yon kout mato sou yon klou, sé pa nan prémié kou-a kloua-a antré nèt. Lapriyè sé répétision ki mété nou nan yon klima, ki fè nou fi-n akòdé lèt avèk volonté Granmèt la. Si nou abitué fè volonté-l, tou sa nou mandé-l l-ap ba nou-l. Jézu di nou pou nou mandé, y-ap ba nou; pou nou chèché, n-ap jouinn; pou nou frapé, y-ap louvri ba nou. Li pran égzanp mesié-a ki gin yon étranjé ki vi-n lakay li nan nuit, li pa gin anyin pou-l ba li, l-al kay yon vouazin, li déranjé-l nan kabann li, lòt la pa déplasé poutèt sé zanmi-l li yé-a, min poutèt l-ap anpéché-l dòmi ansanm ak tout moun lakay la. Si yon ti pitit grangou, li mandé papa-l manjé, papa-a ap ba li-l.

Abraam fè "jis-pri" avèk Granmèt la, antan l-ap konté konbyin moun kòrèk ki kapab sovè sitiasion Sodòm nan. Li pa jouinn, min li désann kantité-a sot nan sinkant jous nan dis. Bondié gin pasians pou-l kouté-l. Lafoua Abraam té réprézanté laj "de la pierre taillée" parapò a lafoua la Trè Sint Vièj Mari ki réprézanté laj "d'or" nan légliz Granmèt la. Nan bout kòmansman-an sé Abraam, nan bout finansman-an sé la Trè Sint Vièj Mari. Si Abraam té désann "pri-a" jouska youn, Bondié t-ap padonnin poutèt yon sèl la. Sin Pòl di akoz péché yon sèl (Adan), tout foul moun yo vi-n tounin péchè, yo sibi ou an tou ka yo mérité kondanasion, min akoz sakrifis yon sèl (Jézu-Kri), tout foul moun yo mérité résévoua padon-an. La Trè Sint Vièj Mari, nan nòs Kana, pa-t tann Jézu ba-l répons ki pou asiré-l, li fè kòm si li déjà gin sa-l mandé-a, li jouinn li vré. Si-l té nan plas Abraam, li pa t-ap désann "pri-a" nan dis sèlman; li t-apralé jous nan youn. Granmèt la t-ap padonnin vré. Bondié sé rinmin. Sé sa sèlman li yé, sé non-l sa. Lè nou lapriyè avèk lafoua, nou jouinn tou sa nou mandé-l, minm si-l pran tan pou-l kapab pròpté lafoua nou, pou nou pa konprann sé mérit nou ki té fè nou

ginyin-l, sé yon doua nou té ginyin koté-l, sé yon lajan nou té gin labank, n-al tiré chèk sou li. Si Bondié réponn lapriyè nou, sé yon kado gratis li fè nou. Min pouki sa li mandé nou lapriyè kan minm, puisqué li vlé ba nou sa nou mandé a? Sé pou nou kapab louvri kè nou pou nou résévoua sa l-ap ba nou-an tankou yon kado gratis, pou nou ouè mak min-l, pou nou di-l mèsì.

*

* *

DIZUITIÈM DIMANCH ÒDINÈ A

Sajès la ofri manjé, minm jan laloua-a té bay manjé, mim jan Profèt yo té promèt manjé.

Sajès la ofri manjé, dapré sa lévanjil dizuitièm dimanch òdinè A-a montré-a: avèk sink pin, ak dé pouason, Jézu nourri sink mil moun, antan-l fè sa Sajès la té anonsé nan liv Provèb yo: "Sajès la drésé tab li, li di: "Vi-n manjé nan pin-m nan!" (Pr 9,2.5), antan-l fè sa Sajès la té anonsé nan liv Ékléziastik la: "Vi-n jouinn mouin, nou minm ki anvi-m, manjé kont kò nou nan sa-m donnin yo!" (Si 24,19). Sajès la ofri manjé, minm jan laloua-a té bay manjé, minm jan Profèt yo té promèt manjé.

Sé nan dézè-a Jézu-Sajès fè jès sa-a (Mt 14,13.15), tankou, lè Pèp la té kite Éjip la, Moyiz ki réprézanté laloua-a té mandé Bondié manjé pou li nan dézè-a. Bondié té voyé lama-n nan (Ex 16,4) ak zouazo yo rélé "kay" yo (Ex 16,8.12.13). Li té fè sa pou-l sondé si Pèp la t-ap maché antan-l obéyi laloua-l la (Ex 16,4). Sajès la ofri manjé, minm jan laloua-a té bay manjé, minm jan Profèt yo té promèt manjé. Nan premié léktu dizuitièm dimanch òdinè A-a, lékòl Profèt Izayi-a promèt manjé san péyé (Is 55,1-4), jan Izayi té déjà anonsé lontan davans la (Is 25,6), lè-l té di Granmèt la t-ap paré yon résépsion pou tout pèp yo sou mòn li-an. Profèt yo di sé kouté pou pèp la kouté, pou-l kapab manjé sa-k bon (Is 55, 2; cf Am 8, 11; Mt 4, 4; Dt 8, 3; Sg 16, 25; Jn 4, 34; 6, 27), jan premié léktu-a di-a (Is 55, 1-3). Sajès la ofri manjé, minm jan laloua-a té bay manjé, minm jan Profèt yo té promèt manjé. Sé kouté pou yo kouté-l. Pou-l fè Pèp li kouté-l, li minnin-l nan dézè, jan Profèt Ozé di-a: "M-ap kondui-l nan dézè-a, m-ap palé nan kè-l" (Os 2, 16). Résépsion Mouton Pak la té fèt, lè Pèp la t-apral antré nan dézè-a (Ex 12). Sé tankou yon manjé ki t-apral ba-l fòs pou-l al maché pandan karantan. Li manjé-l nan pozision moun k-apral pati: senti-l nan tay li, sandal li nan pié-l, baton-l nan min-l, byin vit (Ex 12, 11).

Pasaj ki sèvi pou premié léktu dizuitièm dimanch òdinè A-a, sé finisman dézièm pati liv Profèt Izayi-a (Is 40-55), ki anonsé kijan Pèp la ap pati kite Péyi Babilòn, koté-l égzilé-a, tankou lè-l té pati kite péyi Éjip la, li té maché an prosésion nan dézè-a. Sé Bondié k-ap ba-l manjé pou-l soutni fòs li, pandan-l sou rout pélérijaj sa-a, koté nan dézè-a yo paré chémin Granmèt la, yo égalizé rout pou Bondié nou-an (Is 40, 3). Manjé-a ap soutni fòs Pèp la k-ap travèsé dézè lavi sa-a pou-l rivé nan lòt lavi-a koté l-apral chita atab avèk Abraam, Izaak ak Jakòb pou tout tan-an, sou mòn Sinayi-a, lè Bondié fi-n bay laloua-a, Pèp la ofri sakrifis kominion (Ex 24, 5), koté yo manjé, yo boué dévan Bondié (Ex 24, 11). Nan dézè-a, yo kouté Bondié, Bondié ba yo

manjé. Bondié di: "Mouin palé, nou pa kouté, sé poua sèvitè-m yo ap manjé, nou minm minm n-ap rété grangou" (Is 65, 11). Bondié sé yon Bon Gadyin k-ap kondui bann mouton-l nan dézè-a. Koté-l jouinn zèb ki fré, sé la li fè pòz ak li (Ps 23, 2). Dévan nou li paré yon tab an fas lénmi nou, jan minm Psòm nan di-a (Ps 23, 5). Profèt Éli té blijé sovè kò-l al nan dézè, pou-l chapé anba Rèn Jézabèl ki t-ap chèché touyé-l. Lè-l fi-n maché pandan yon jounin li bouké, li kouché, li dékourajé, li dòmi. Yon Anj révéyé-l li di-l: "Lévé manjé; otréman chémin-an ap trò long pou ou!" (1 R 19, 5). Éli lévé, li gadé, li ouè yon pin ki kuit nan sann difé, ak yon krich dlo, ki pozé bò tèt li. Li manjé, li bouè. Li té tèlman bouké, li kouché ankò, li dòmi. Yon dézièm foua, Anj la révéyé-l, li fè-l manjé, li fè-l bouè. Manjé sa-a bay Éli tèlman fòs, Éli maché karant jou ak karant nuit san rété, jous li rivé sou mòn Sinai-a koté Bondié ba-l konsign li, minm jan li té bay Moyiz lòd li-a.

Bondié bay Pèp li-a manjé nan dézè-a pou-l soutni fòs li. Lè tè gin séchrès pandan touazan édmi-an, Profèt Éli té nan bouch dézè-a, bò yon ti ravi-n dlo. Gragra yo té konn poté pin ba li nan matin, ak viann nan asouè (1 R 17, 1-6). Lè ravi-n nan séché, sé yon pòv vèv li rankontré nan péyi Sarépta, ki t-apral ranmasé dé ti bout boua pou-l kuit dènié asièt fari-n li té rété nan kay la ak dènié ti gout luil ki té rété nan fon boutèy la. Éli mandé-l dlo. Lè l-apral chèché dlo-a, Éli di-l pou-l ba-l yon mòso pin. Li épliké Éli nan ki kondision li yé. Éli di-l sèvi-l anvan, apré sa Bondié ap okipé-l li minm. Pòv vèv la fè sa vré. Li kuit sa-l té ginyin-an, li poté bay Profèt Éli. Dépi lè sa-a, fari-n nan pa janm manké, luil la pa janm fini, joutan Bondié voyé lapli sou tè-a (1 R 17, 7-16).

Lévanjil dizuitièm dimanch òdinè A-a montré kijan Apot yo gin konpòtman kontrè ak konpòtman la Trè Sint Vièj té gin nan nòs Kana-a. Sé yo minm ki mandé Jézu pou-l ranvouayé foul la pou y-al chèché manjé dòt koté (Mt 14, 15). Jézu minm ap plédé nan lòt sans la, li di yo sé pa lapinn pou ranvouayé yo, sé pou yo ba yo manjé yo minm (Mt 14, 16). Yo diskité ankò avè-l, yo di-l sa yo ginyin-an pa kont minm pou yo minm douz Apot yo sèlman, yo pa bézouin mandé pou sink mil fanmiy sa yo (Mt 14, 17). Jézu blijé pasé yo lòd pou yo poté sa yo jouinn nan, bay piti pa chich (Mt 14, 18). Li pasé lòd fè moun yo chita. Li fè mirak ak minm jès lè l-ap fè lékaristi-a pou Jédi Sin-an (Mt 14, 19; 26, 15). Li bay Apot yo séparé bay foul la. Sa-k té ginyin anvan-an pa-t minm kont pou douz Apot yo; koulié-a yo ranmasé douz panié plin, lé tout moun fi-n manjé (Mt 14, 20). Nan nòs Kana okontrè, sé la Trè Sint Vièj ki té sèvi avoka pou mirak la fèt, malgré Jézu t-ap ba-l répons ki pou t-a dékourajé-l (Jn 2, 4). Lafoua-l pèmèt mirak la fèt (Jn 2, 5; cf 2, 1-11). Li

sèvi Sajès la intèmediè kòm Manman-l, kòm Mèt li, kòm Fotèy li, kòm Chémin-l ki pi kout, ki pi asiré, ki pi fasil, ki pi kòrèk.

Sajès la drésé tab li, li di: "Vi-n manjé nan pin-m nan!" (Pr 9, 1-6). Sajès la ofri manjé, minm jan laloua-a té bay manjé, minm jan Profèt yo té promèt manjé nan dézè-a. Sé nan mézi nou kouté-l nou jouinn manjé Sajès la (Is 55, 2). La Trè Sint Vièj di: "Ninpòt sa-l di nou, sé pou nou fè-l! (Jn 2, 5). Prèmié pati lamès la invité nou kouté Paròl Sajès la. Dézièm pati-a invité nou manjé pin Sajès la ki vi-n tounin kò-l, bouè divin Sajès la ki vi-n tounin San-l. Sé nan frékantasion sa-a n-ap vi-n jouinn fòs pou rout la nan dézè lavi-a. Fòs la, sé yon kado spésial Sajès la bay moun ki gin pou-l sèvi témouin, jan Jézu promèt Apot yo lè-l t-ap monté nan Sièl la. (Ac 1, 8). Aprann kouté Jézu-Sajès, sé ba-l sa nou ginyin, minm si-l tou piti. L-ap fè-l donnin pou nou anvan jé bat, paské pou li yon jou sé tankou mil-an, épi mil-an sé kon yon jou (2 p. 3,8; Ps 90,4). Sé gras lafoua sa-a n-ap mandé Manman Mari, Nòtré-Dam de la Sajès, pou nou fè tankou vèv Sarépta-a ak ti priz fari-n li-an, ak ti fon poban luil li-a, tankou ti gason lévanjil dizuitièm dimanch òdinè A-a ak sink ti pin-l yo ak dé ti pouason-l yo, sa vlé di ak ti kapasité nou, pou nou mét sa nou yé ak sa nou ginyin nan sèvis Grammèt la, ninpòt ki sa-l mandé nou, paské sé li minm ki fè ni sa nou vlé-a, ni sa nou réalizé-a pou avantaj plan bòn volonté-l (Ph 2,13). N-ap pozé tèt nou sou kè la Trè Sint Vièj, pou nou tandé invtasion Jézu-Sajès fè nou nan résépsion Nòs la (Mt 9,15; Ap 19,9; Ct 5,1), nan résépsion **Pak** la (Lc 22,16), nan résépsion **dènié tan**-an (Lc 22,29; Mt 5,6). Sé yon grangou Bondié ap voyé nan péyi-a, jan Profèt Amòs di-a, min sé pa grangou pin ni souaf dlo, sé grangou ak souaf pou tandé Paròl Grammèt la (Am 8,11). Nan dézè-a Jézu di: "Moun pa viv ak pin sèlman, min ak tout Paròl ki soti nan bouch Bondié! (Mt 4,4; Dt 8,3). Moun ki manjé Paròl Sajès sa-a, l-ap grangou-l ankò, moun ki bouè-l, l-ap souaf li ankò (Si 24,21). Sé pou Manman Mari fè nou toujou grangou-l, toujou souaf li, pou tout tan n-ap kalkilé sa-l vlé di nou nan tèl sikonstans lavi nou, nan dézè-a n-ap travèsè-a, nan **pèlerinaj lafoua-a**.

*

Jès Jézu fè lè-l séparé sink ti pin yo ak dé ti pouason yo, sé yon fason pou-l montré li sé nouvo Moyiz la, sé li minm ki gin mision pou-l kondui Pèp la nan vré paradi-a, nan Sièl la. Li kondui Pèp Bondié-a nan dézè Sinayi-a, li té nourri-l ak lama-n ki tonbé sot nan sièl la, épi li té souin nanm li avèk Paròl Bondié té ba li pou réglé konduit Pèp la, laloua ki té ékri sou galèt ròch yo. Vré laloua-a, vré Paròl la, sé Jézu-Kri li minm, Pitit Bondié. Sé prèch li

minm foul la t-ap kouté nan dézè-a, ki fè yo té bliyé tounin lakay yo al chèché manjé-a. Moun pa viv ak pin sèlman min ak tout Paròl ki soté nan bouch Bondié (Mt 4, 4). Paròl la vi-n tounin moun, li abité nan mitan nou (Jn 1, 14). Sé moun ki gin kè pòv ki toujou tann sitiasyon-an rivé nan dènié limit li, anvan pou-l fè intèvansion pa-l, pou yo pa vi-n jouinn li tankou yon moun ki la pou fè mirak sèlman. Si-l fè mirak la, sé pou-l invité nou pozé yon jès lafoua; épi anvan minm li fè mirak la, li mandé nou lafoua. Sé konsa, nan nòs Kana li tann pa gin divin minm ankò anvan li fè kichòy, épi li kiité Manman-l mandé-l, san-l pa bay yon répons ki pou t-a satisfè-l (Jn 2, 1-11). Li kité Laza fi-n mouri, antéré dépi toua jou, anvan li rivé nan vil Bétani, pou-l invité ni Mat, ni Mari, fè yon jès lafoua, pou-l lévé Laza (Jn 11, 1-44). Li kité pitit fi Jayir la fi-n mouri anvan-l antré nan kay la, pou-l montré sé li minm ki mèt lavi-a, lè-l fè-l lévé vivan (Mc 5, 21-43). Jézu vlé minnin nou antan nou travèsé dézè, sé la li paré tab pou nou (Ps 23; 145, 15-16). Tout moun sé nan diréksion-l y-ap gadé, li louvri min-l, li konblé tout vivan. Sink ti pin ak dé ti pouason: Tou sa nou ginyin, sé pou nou aksépté bay Bondié li san ouété anyin; minm si-l tou piti, sé pou nou bay li, sé sa minm Bondié ap tann pou-l okipé nou. Toutotan nou pa ko fi-n bay tout bagay, li pa kapab fè sa-l vlé-a pou nou. Si zouazo-a maré avèk yon ti fil tou piti, li pa kapab volé dapré sa Sin Jan-d-lakoua di nou. Sé pou nou kalkilé pou nou ouè ki sa nou kinbé séré nan kè nou, ki fè Bondié pa ko kapab pran posésion sou tou sa nou yé ak tou sa nou ginyin. Sé nan dézè Bondié ap fè nou travèsé, sa vlé di, tout asirans nou té ginyin, sou tè sa-a, koté nou té instalé-a, koté nou té konprann sé la nou gin pou nou rété tout tan-an, sé pou nou fini ak sa; sé pou nou aprann fè Bondié konfians, viv ansanm avèk li chak jou nan léspri lapriyé Pitit li-a montré nou-an, lè-l invité nou fè tankou flè lis yo Bondié Papa-a abiyé pi bèl pasé roua Salomon nan tout richès li, tankou ti zouazo yo Bondié Papa-a nouri, san yo pa simin, san yo pa rékòlté, pou nou chèché péyi koté Bondié Roua-a ak jistis li, l-ap ba nou tout rès la an plis (Mt 6, 33).

Viv nan dézè, sa vlé di aksépté pèdi zanmi, koté nou té mété tout konfians nou, koté nou té konn abitué dépozé tout ti sékrè nou (Lc 23, 49; Pr 19, 7; Si 13, 21). Viv nan dézè, sa vlé di aprann fè silans nan fon kè nou, pou nou tandé Pitit Bondié-a k-ap palé avèk nou, k-ap mandé nou konfòmé konduit nou avèk égzijans Papa-l réklamé, sispann minnin yon lavi trò lib, trò fasil, trò indépandan, sispann obéyi tout ti kapris nou, sispann bay kò nou tout satisfaksion li mandé, sispann kité tanpéraman nou ap débòdé tout jounin tankou yon lariviè ki pa gin dig, k-ap fè ravaj, k-ap sakajé jadin moun. Viv nan dézè, sa vlé di tout ti lajan nou té konn ap séré, pou-l fè pil, san nou pa

gadé si yon lòt nan bèzouin bò koté nou, pou nou fè yon jan pou sèvi ak li, pou-l kapab sèvi prochin nou tou, paské Bondié konn bay, sé nou minm ki pa konn séparé. Viv nan dézè sa vlé di fèmin jé nou sou byin lòt moun posédé épi nou t-a vlé ginyin, pa fè tankou pèp Israèl la ki té régrèt zonyon ak konkonb ak mamit viann li té kité Éjip la. Viv nan dézè sa vlé di mété énjèi nan kò nou, pou nou maché sou chémin lavi-a k-ap kondui nou nan sièl la, pa rét ap drivé nan poussiè-a koté péché-a ap déséché nanm nou. Viv nan dézè sa vlé di kité léspri Sin-an kondui nou jan-l vlé, koté-l vlé, san nou pa fè réziztans nan min-l, antan nou fè-l égzijans pou fòsé-l suiv sa nou minm nou té désidé davans ak tout program nou té déjà trasé dépi konbyin tan. Viv nan dézè sé maché nan fènoua, pou kolòn limiè Bondié-a indiké nou rout nou, san nou pa al chèché limiè dèt koté, nan min dèt moun k-ap fè léspri Bondié konkirans. Viv nan dézè, sé fè tankou Sin Jan-Batis, k-ap paré chémin Granmèt la (Mt 3, 3), sé débarasé kè nou, pou Granmèt la jouinn koté pou-l antré, sé fè tankou foul yo k-al jouinn Jan-Batis pou konfésé péché yo, pou fè pénitans, pou tann vizit Granmèt la. Viv nan dézè, sé fè tankou Jézu ki lévé granmatin, ki pati koté li pou kont li, pou-l lapriyé Bondié Papa-a, minm si tout moun ap chèché-l tout koté (Mc 1, 35), nou konnin sé la n-ap jouinn li. Viv nan dézè, sé fè tankou André ak Jan, ki kité okipasion yo ak lakay yo, pou ya-l chèché Jézu, pou yo suiv li, pou yo pasé nuit koté-l, ap kouté-l (Jn 1, 35-42), pou chanjé kichòy nan lavi yo. Viv nan dézè, sé fè tankou Lévi ki kité kontoua kontribision-l nan, ak tout intéré malonèt li té konn soutiré, pou-l fè yon chanjman total nan lavi-l, san-l pa bèzouin rét kalkilé kijan l-ap fè pou viv pi dévan.

Koté Jézu yé-a, sé la pou nou yé nou minm tout (Jn 14, 3; 12, 26; 17, 24; cf 7, 34). Li nan dézè-a, l-ap tann nou. Mat té di Mari sè-l la: "Mèt la laba-a, l-ap rélé-ou" (Jn 11). La Trè Sint Vièj panché bò zòrèy nou, l-ap di nou: "Ninpòt ki sa li di nou, sé pou nou fè-l" (Jn 2, 5). N-ap mandé-l favè sa-a pou aprann obéyi Jézu, nan tout kondision, san nou pa konnin ki koté l-ap minnin nou, kijan l-ap débrouyé-l ak nou, sa l-ap mandé nou réglé, pou nou fè-l konfians, nan dézè-a koté l-ap travèsé avèk nou-an, koté li mandé nou pou nou ba li tout sa nou ginyin ki rété nan kè nou, san nou pa rézèvé-l pou anyin ni pou pèsòn, san nou pa bèzouin konnin sa-l ap fè avè-l.

Lévanjil dizuitièm dimanch òdinè A-a di nou: "Koté sa-a, sé yon dézè, épi kòmansé fènoua" (Mt 14, 15). N-ap mandé Manman Mari favè pou ni dézè-a, ni fènoua-a pa fè nou rékilé, lè Jézu koté nou. Minm jan li té di priyé bédiksion-an, li té kasé pin yo, li té séparé yo, lè-l fi-n lévé jé nan sièl la pou-l di Papa-a mèsi-a, épi li té fè tout moun manjé kont kò yo-a joutan gin rès la, konsa tou l-ap toujou kontinué okipé ni kò nou, ni nanm nou, nan tout

bézouin nou ginyin. Mirak li fè nan dézè-a, sé yon sign sakréman lékaristi-a, li té gin pou-l té bay jou Jédi Sin-an. Dézè-a sé Paradi nou, fènoua-a, sé Limiè nou. Nan Sakréman lékaristi-a, n-ap jouinn manjé, n-ap jouinn limiè; n-ap jouinn fòs pou féblès nou, n-ap jouinn klèté pou rout nou. Patizan Émayus yo té sou rout, li té asouè, lè Jézu vi-n ap maché avèk yo, l-ap kléré fon kè yo, san yo pa konn si sé li; lè-l antré avèk yo nan kay la, li di bédiksyon sou pin-an, li kasé-l, li ba yo-l, yo vi-n rékonèt li, min la minm li disparèt dévan jé yo (Lc 24, 13-32). Lékaristi mandé lafoua. Jézu prézan nan sakréman lékaristi, minm si nou gin inprésion sé nan dézè n-ap maché. Dézè sa-a gin tan fléri, savann sa-a gin tan abité, lasali-n sa-a gin tan tounin jadin Paradi, koté solèy la pa janm kouché (Ap 21, 23; Is 60, 1-3.19-20; 2 Co 3, 18; Ep 5, 8-14). Mouvman pou jouinn Jézu-a pa toujou alé nan minm sans ak chémin tout moun ap pran yon fason òdinè. Gin anpil foua nou blijé chouazi ant sa tout moun abitué fè avèk sa Jézu mandé nou fè. Li pran chémin dézè, li kondui nou nan fènoua, pandan tout lòt moun yo ap pran chémin kontrè, koté ki abité, épi koté ki gin Limiè, koté yo kapab ouè klè pou yo maché (cf Mt 7, 13s). Y-ap lonjé douèt sou nou, paské nou pa fè minm jan avèk yo. Époutan Jézu di klèman chémin sièl la jinnin, pòt ki bay sou Paradi-a, li jis, sé pou nou fè éfò pou nou monté mòn rèd la, pou nou pasé nan koridò ki séré-a, paské anpil moun ap pran chémin k-ap désann nan, rout ki laj la, épi sé nan lanfè y-ap tonbé, nan fè noua ak soufrans ki pap janm fini yo (Mt 7, 13-14). Sièl la, sé moun ki gin énéji, ki gin otorité sou mové tandans yo, sé yo minm k-ap antré ladan-l (Mt 11, 12; Lc 16, 16). Lòd Jézu pasé nou mèt sanblé yo pa gin sans, sé pou nou obéyi-l kan mim, dapré sa la Trè Sint Vièj di moun yo ki t-ap sèvi nan nòs Kana-a: "Ninpòt ki sa li di nou fè, sé pou nou fè-l!" (Jn 2, 5). Sé konsa Jézu ap di Apot yo: "Jété filè-a adouat batiman-an, n-ap jouinn pouason!" (Jn 21, 6; cf Lc 5, 4). Époutan, tout nan nuit yo té travay san yo pa-t pran anyin. Yo t-a gin doua di yo fatigé, yo pa kapab ankò. Min yo obéyi. Épi yo jouinn anpil pouason. Jézu di: san li minm nou pa kapab fè anyin (Jn 15, 5; 1, 3). Lòd li té pasé moun yo ki t-ap sèvi nan nòs Kana-a té parèt déplasé; sé pa-t moman pou yo té plin ja yo ak dlo; ja yo té abitué sèvi pou moun yo lavé min yo ak pié yo anvan yo manjé; min lè sa-a tout moun té déjà atab atèl pouin divin té vi-n manké. Min kòm la Trè Sint Vièj té di moun yo k-ap sèvi yo pou yo obéyi nan ninpòt ki kondision, yo fè sa Jézu mandé-a, épi dlo-a vi-n tounin divin. Sé konsa a-Loud la Trè Sint Vièj té mandé Sint Bènadèt pou-l té manjé zèb, pou-l té froté figi-l avèk yon dlo labou. Ti Bènadèt té obéyi, atèl pouin moun yo té konprann li té pèdi bon sans li. Min jès lafoua ak obéyisans li pozé-a pèmet mirak yo fèt, dlo-a éklaté, vi-n tounin yon sous k-ap koulé jous jodi-a, k-ap géri ni kò, ni nanm anpil moun. Jézu mandé pou yo louvri tonb nan,

pou yo lagé Laza, pou yo kite-l alé. Mat di sa fè kat jou li la, Jézu invité-l obéyi nan lafoua. Mirak la fèt (Jn 11, 1-44). Jézu di Apot yo nan lévanjil dizuitièm dimanch òdinè A-a: "Bay moun yo manjé nou minm" (Mt 14, 16). Yo fè-l konstaté sé sink pin sèlman yo ginyin ak dé ti pouason. Sa sa yé pou sink mil moun, san konté fi ak ti moun. Min obéyisans yo pèmèt mirak la fèt. Kalité Bondié ba nou kapab sanblé yo pa gin posibilité pou réponn égzijans travay la réklamé-a. Époutan Sin Pòl di nou li kapab tout bagay nan Sila-a ki ba-l fòs la. Sé nan féblès pouvoua Bondié déplouayé (Ph 4, 13; 2 Co 12, 6-10; Col 1, 29). Si Granmèt la pa bati kay la, sé pou bontan mason yo ap travay; si Granmèt la pa véyé vil la, sé pou bontan gad yo ap véyé (Ps 127, 1). Sé pa ak fòs ponyèt nou n-ap réglé aktivité Bondié. Énèji pou nou déplouayé-a, sé kont pròp tandans pa nou pou nou dirijé-l, pou nou gin souplès nan min Bondié k-ap fè travay li, antan li sèvi ak nou kòm instriman, jan-l té fè avèk Sin Kiré das la, Sin Jan-Mari-Viané. Sé yon vérité nou bézouin kalkilé souvan sou li, pou nou pa kite lògèy anvayi nou lè nou gin kèk siksè, ni tou okontrè pou nou pa kite dékourajman ralanti nou, lè mòn nan trò rèd pou nou monté. Nan lévanjil dizuitièm dimanch òdinè A-a, Jézu di Apot yo: "Ba yo manjé nou minm!" (Mt 14, 16). Sé ak pòv sa nou yé-a, ak ti sa nou ginyin-an Bondié vlé aji, tankou li té fè avèk ti Bènadèt, ti Tèrèz: "Foli Bondié pi saj pasé lèzòm, féblès Bondié pi fò pasé lèzòm" (cf 1 Co 1, 25). Sé sa-k fèb sou tè-a Bondié chouazi pou-l montré sa-k fò yo yo pa anyin, pou anilé sa-k kichòy, pou pèsòn pa lévé tèt li avèk arogans dévan Bondié (1 Co 1, 28-29). "Ba yo manjé nou minm" (Mt 14, 16), sé sa Jézu di tout moun li chouazi pou suiv li nan mision-l. Sa nou ginyin-an pa anpil, min rinmèt li bay Jézu nan min Manman Mari, l-ap fè mèvèy avèk li pou nou. N-ap mandé Manman Mari fè nou favè gin lodas Apot yo, avèk détachman yo, pou nou pa pè angajé afon nan travay Jézu-a, antan nou laché tout sa nou té séré avèk yon éspoua ki pa gin éspérans. Sin Jan-d-Lakoua di nou: "Je n'ai jamais manqué de rien, depuis que je me suis mis en rien". Li di tou: "Pour arriver à posséder tout, veillez à ne posséder quoi que ce soit de rien". (Montée du Carmel, livre I, chapitre XIII; cf P. Marie Eugène de l'Enfant Jésus, Je veux voir Dieu, Tarascon, éditions du Carmel, 1949, 601). Imitasion Jézu-Kri-a invité nou kite tout bagay pou nou jouinn Jézu-Kri. Sé konsa apré lapèch la Apot yo té kite tout bagay, yo té suiv Jézu-Kri (Lc 5, 11). Anpil moun nan foul la ap tounin vi-n jouinn Jézu, min sé paské yo té jouinn pin pou yo manjé. Démach nou pa doué intéresé konsa. Sé pou nou chèché Jézu pou li minm, sé pa pou nou chèché-l pou sa l-ap ba nou. Si-l fè mirak la sé pou-l invité nou pozé jès lafoua antan nou débarasé nou ak tou éspoua nou té mété sou intéchè lavi sa-a k-ap pasé-a, pou nou konnin anyin pap manké nou, si nou suiv li, pou nou rénonse tout avantaj nou té ginyin.

Nan dézièm léktu-a Sin Pòl di anyin pa kapab séparé nou sòt nan rinmin Jézu-Kri-a; nan bariè li anvizajé yo, li mété grangou-a tou (Rom 8, 35). Lévanjil la montré nou sa-l di-a sé vré. Manman Mari pa sispann chanté nan Magnifikat li-a: "Moun ki grangou yo, li plin yo ak byin" (Lc 1, 52). N-ap mandé-l pou nou pran abitud chèche péyi koté Bondié Roua-a avèk jistis li, sa vlé di avèk sa k-ap fè nou vi-n sin-an, pou tout rès la, li ba nou-l an plis (Mt 6, 33). N-ap chèche Jézu san intèrè: "Recherchez le Dieu des consolations, non les consolations de Dieu".

*

* *

DIZUITIÈM DIMANCH ÒDINÈ B

Jézu pa réponn késion foul la pozé-l la (Jn 6,26): "Kilè-ou rivé isit la?" Li konnin pou kisa y-ap chèché-l: sé dèyè pin yo yé ankò. Yo pa-t ouè vré sans mirak la. Li pa soti pou-l fè yon dézièm mirak ankò, pou-l ba yo pin. Sé aspè matérièl mirak la sèlman yo konsidéré. Yo pa ouè vré sans li. Minm jan ak madanm Samari-a sou bò pui Jakòb (Jn 4,15) k-ap di: "Granmèt, ban-m dlo sa-a pou-m pa souaf ankò, pou-m pa vi-n tiré dlo isit la ankò". Jézu mandé pou travay nou pa pou pin k-ap disparèt la, min pou pin k-ap diré tout tan-an (Jn 6,27). Nan premié pati diskou-a, pin-an sé **lansègnman** l-ap bay la, minm jan ak dlo-a li t-ap palé madanm Samari-a (Jn 4,13-14): "Moun ki bouè nan dlo sa-a ap souaf ankò; min moun k-ap bouè nan dlo m-ap ba li-a pap janm souaf; dlo m-ap ba li-a ap vi-n tounin yon sous dlo nan li, k-ap ponpé pou lavi ki pap janm fini-an". Pin-an Jézu ap bay la, sé lansègnman-an, dapré sa lékòl Profèt Izayi-a di-a (Is 55,2): "Kouté-m, n-a manjé sa-k bon". Lansègnman Granmèt la sé yon manjé (Ez 3,1; Ps 119, 103.131; Si 24,19-21). Konsa sé pa pou pin k-ap pasé-a pou yo travay, min pou Pin k-ap diré tout tan-an. Yo pozé Jézu késion (Jn 6,28): ki sa pou yo fè pou yo travay nan travay Bondié yo? Jézu réponn yo (Jn 6,29): sé pou yo aksépté-l nan **lafoua**. Yo pozé-l késion ankò (Jn 6,30). Sé pa nan Jézu y-ap mét lafoua, min sé nan mirak li: yo di-l: "Ki sign ou-ap fè, pou nou ouè, pou nou kapab kouè?" Sé konsa yo té mandé-l yon sign tou pou yo té kouè nan li (Mc 8,11; Mt 16,1; Lc 11,16). Sèké léspri yo té yon ti jan tèratè. Yo déklaré sé pin **tè**-a sèlman Jézu fè vi-n anpil la (Jn 6,31); nan tan Moyiz Bondié té bay pin ki sot nan **sièl** la (Ne 9,15). Yo bézouin ouè lama-n tonbé sot nan sièl la ankò, pou yo kouè nan Mési-a (Ps 78, 23-24; 105,40; Sg 16,20-22). Jézu fè yo konprann vré Pin-an ki sot nan sièl la, sé li minm (Jn 6,32), minm jan sé li minm ki vré Limiè-a (Jn 1,9). Li montré sé li minm vré Pin-an ki bay vré lavi-a (Jn 6,33; cf 1,4) min lama-n nan pa anpéché moun ki manjé-l yo mouri. Foul la rékòmansé ankò sou térin tèratè-a (Jn 6,34), minm jan ak madanm Samari-a (Jn 4,15) ki té di: "Granmèt, ban-m dlo sa-a pou-m pa souaf ankò, pou-m pa vi-n tiré dlo isit la". Yo di: "Granmèt, toujou ba nou pin sa-a". Yo ouè l-ap palé osijè yon pin ki pa matérièl, épi yon pin li kapab bay. Sèlman yo pa ko kouè li minm ak pin sa-a sé minm bagay. Jézu apral rivé nan pi gran déklarasion-an (Jn 6,35). Tout késion-répons yo, sé la yo abouti. Sé sans tout konvèsasion-an. Jézu lévé voual la karéman, tankou jou Vandrédi Sin, yo dékouvri Koua-a, yon bra, apré sa tèt la, apré sa lòt bra-a ak tout rès Koua-a. Sé fason sa-a Jézu bay lansègnman-l. Li bay li gout-a-gout. Li pa bay tout bagay ansanm. Sé tankou lè y-ap aprann ti moun maché. Li dévoualé lansègnman-an bout pa

bout. Sé sa Révélation-an, li fè-l avèk progrè. Jézu di karéman foua sa-a: "Mouin minm, mouin sé pin lavi-a", minm jan li té di madanm Samari-a li sé dlo lavi-a (Jn 4,10). Li pasé grangou ak souaf (Jn 4,14): "Moun ki vi-n jouinn mouin" sa vlé di: "moun ki kouè nan mouin" (Jn 5,40). Minm jan Jézu di: "Mouin sé pin lavi-a" (Jn 6,35.48.51), l-ap di "Mouin sé Limiè lavi-a" (Jn 8,12); an minm tan li montré li sé Bondié. Sé kòmsi li t-a di: "Mouin sé Sila-a ki toujou la-a" (cf Jn 4,26; 6,20; Mt 14,27; Mc 13,6; 14,62; Ex 3,6.14; 20,2; Dt 32,39; Is 43,10; 46,4; 51,12). Jézu gin konsians sé li minm ki vi-n pou nouvo Alians la. Li di: "Yo té di nou.... Kanta mouin minm mouin di nou" (Mt 5,22.28.32.39.44). Nan réfrin pou Alélouya anvan lévanjil dizuitièm dimanch òdinè B-a, li di: "Sé pa avèk **pin** sèlman moun viv, min ak tout **paròl** ki soti nan bouch Bondié". Pin Jézu ap bay la, sé lansègnman-l. Apré sa, nan dézièm pati diskou-a, l-ap montré sé Kò-l ak San-l. Paròl la vi-n tounin moun, li abité nan mitan nou (Jn 1,14).

(Moun pa viv ak pin sèlman, min ak tou sa-k sot nan Bondié. Vini jouinn Jézu. Pèp la travèsé, dlo lanmè-a dèyè-l, sab la cho anba pié-l, Paradi-a byin louin-l. Moun ki manjé mouin, l-ap anvi-m ankò; tout moun ki bouè mouin, l-ap souaf mouin ankò).

*

Dizuitièm dimanch òdinè B-a kontnué minm mésaj disétièm dimanch la (cf Jn 6,24-35). Foul la rétonnin nan landmin apré Jézu fi-n fè mirak pin-an, l-ap chèché Jézu, li travèsé lanmè, pou-l al dèyè-l, paské li té ouè li té bay pin nan lavèy, li té éspéré t-ap gin pin ankò. Jézu profité pou-l fè-l monté pi ro, antan li ba-l léson lafoua-a, li di-l pou-l pa travay pou nouriti k-ap péri-a, min pou-l travay pou nouriti ki pap janm pasé-a, sa Papa-a bay la. Sé lè sa-a atò Jézu bay lansègnman sou **lafoua**-a. Sé kòmsi sé dézièm machéskalié Jézu ap monté avèk Juif yo sou késion mirak Pin sa-a. Li kité plan natirèl la avèk yo, l-ap éseyé fè yo monté pi ro, nan réalité ki pap janm pasé yo. Si-l fè mirak la, sé pa paské foul la té grangou sèlman, pou-l ba yo yon ti manjé k-ap satisfè yo an pasan, min sé pou-l té kapab fè yo ouè gin yon manjé ki pi konsékan toujou, sa ki nésésè pou moun viv tout tan-an. Min li pa rivé nan dégré sa-a toujou avèk yo. Li kòmansé rété sou chapit lafoua-a toujou: "Min travay Bondié-a: sé pou nou **kouè** nan Sila-a li voyé-a" (Jn 6,29). Li fè yon ti amòs avèk yo kan minm, lè-l di yo: "Sé pa Moyiz ki ba nou pin ki soti nan sièl la, min sé Papa-m ki ba nou pin ki soti nan sièl la, vré Pin-an. Pin Bondié-a sé Sila-a ki désann sot nan sièl la, épi ki bay tè-a lavi-a" (Jn 6,32s). Juif yo minm toujou sou plan matérièl la, minm jan avèk madanm Samari-a, lè Jézu té di li gin yon dlo l-ap bay k-ap koulé tankou yon ti sous nan fon kè-

l, li minm li konprann sé dlo òdinè, li di-l: "Ébyin ban-m dlo sa-a pou-m pa bézouin vi-n tiré dlo tout tan nan pui-a" (cf Jn 4,15). Li pa-t konprann Jézu t-ap palé osijè Paròl li-a ak léspri Sin-an. Sé konsa tou lè Jézu t-ap di Apot li yo Laza ap dòmi, yo té konprann sé dòmi natirèl la, min li minm li t-ap palé sou lanmò tout bon-an (Jn 11,11-13). Jézu sou yon plan ki pi ro pasé nou. Nou yon ti jan tètè. Li mandé nou pou nou monté lidé nou pi ro, pou nou gadé réalité ki pap disparèt yo (cf Col 3,1), pou nou pa rét pèdi tan nou ap réglé yon pakèt késion ki pap minnin byin louin, k-ap sèvi pou tan sa-a sèlman, épi apré sa ki pa kapab fè anyin pi plis, min sé pou nou chèchè réalité ki pap janm disparèt yo. Sé avaloua-a li ba nou nan lékaristi-a.

Prémié léktu dizuitièm dimanch òdinè B-a (Ex 16, 2-4.12-15) sèvi tankou lonbraj, pòtré, égzanp, k-ap préparé mèsaj lévanjil la (cf 1 Co 10,6.11; 1 P 3,21; He 8,5; 10,1; Col 2,17; 9,24). Foul Pèp Israèl la nan dézè-a grangou, yo révolté kont Moyiz avèk Aaron, pou yo mandé manjé, yo mandé lanmò, yo di yo té pito mouri nan Éjip kòm ésklav pasé pou y-ap pasé mizè nan dézè-a koté ki pa gin manjé-a, paské nan Éjip la omouin yo té chita dévan mamit viann yo. Gin anpil moun ki pito ésklav péché-a, yon foua yo jouinn avantaj pou kò-a avèk lavi tè sa-a. Pito nou pòv nan kò-a, min nanm nou an pè avèk Bondié. Bondié ap fè mirak, l-ap fè lapli lama-n tonbé sot nan sièl la, pou pèp la jouinn manjé, min sé sitou pou-l kapab mété **lafoua** nan Granmèt la, minm jan avèk mirak Jézu fè nan lévanjil la. Granmèt la di Moyiz: M-ap fè lapli pin tonbé pou nou sot nan sièl la, pou-m ouè si pèp la ap maché nan laloua-m nan oui ou non (Ex 16,4; Dt 8,2). Foul pèp la babié nan dézè-a (Ex 16,2.6.8.9.11), minm jan Juif yo ap babié kont Jézu (Jn 6,41.43.6; cf 7,32.12: "gogguzein" ἐγόγγυζον). Psòm nan di: "Karantan pèp sa-a dégouté-m" (Ps 95,10). Pèp la ouè lama-n nan ki tonbé sot nan sièl la, tankou galèt. Yo pa konn sa-l yé, yo di: "Ki sa sa-a yé?" Nan langaj ébré, sa vlé di: Mân-hû מַן הוּא, Ex 16,15). Sé poua yo rélé-l lama-n. Psòm-répons la (Ps 77 = 78) di: "Granmèt la ba yo pin sièl la" (v.24).

*

"Moun yo rivé Kafanaòm, y-ap **CHÈCHÉ** Jézu" (Jn 6,24; cf 6,24-35). Sé minm koté sa-a déjà, Kafanaòm nan, dépi nan kòmansman aktivité misionè Jézu, yo t-ap chèchè-l, lè-l té pati al yon koté dézè, pou-l lapriyé byin bonè anvan solèy lévé-a (Mc 1,35). Lè yo té jouinn li, Simon-Piè té di-l: "Tout moun ap chèché-ou". Li té réponn li: "An-al dôt koté, nan bouk yo ki tou pré yo, pou-m al préché la tou, paské sé poua mouin sòti" (Mc 1,35). Si, dépi lè sa-a, yo t-ap chèchè-l, sé paské lavèy yo té ouè tout kalité mirak li té fè, ak malad yo li té géri yo, ak démon yo li té chasé yo. Li minm li pa vlé

yo chèché-l pou avantaj l-ap bay. Sé lafoua li bézouin. Lè Jan-Batis té fi-n di: "Min Mouton Bondié-a" (Jn 1,36), André avèk Jan té suiv Jézu. Prèmié kèsion Jézu té pozé yo, sé "Ki sa n-ap **chèché**?" (Jn 1,38). Li té bézouin pou démach y-ap fè-a, li gin yon sans ki alé nan diréksion lafoua. Prèmié paròl ki soti nan bouch li, lè-l lévé sot nan kavo-a, dapré lévanjil selon Sin Jan-an, sé "Ki moun ou-ap **chèché**?" (Jn 20,15). Lè sa-a sé ak Mari-Madlèn l-ap palé. Li vlé orianté démach li tou, pou-l pa chèché **Vivan**-an nan pami mò yo (Lc 24,5). Chèché Jézu, sé yon obligasion pou nou. Min sé pou nou konnin kijan pou nou chèché-l, sa n-ap chèché nan min-l. Èròd t-ap **chèché-l** pou-l ouè mirak (Lc 23,8; 9,1). Papa Èròd t-ap **chèché-l** pou-l touyé-l (Mt 2,8). Juif yo tou, yon lè, ap **chèché-l** pou yo touyé-l (Jn 7,19). Lè sòlda prèt an chèf yo vi-n **chèché-l**, pou yo arété-l, li kòmansé fè yo santi pouvoua-l, antan-l fè yo tonbé atè, anvan-l kité yo mét min sou li, pou-l montré yo sa-l yé tout bon vré (Jn 18,5-6). Lè Manman-l ak Papa-l t-ap chèché-l, yo té jouinn li nan tanp la, li té mandé yo pouki sa yo t-ap chèché-l la (Lc 2,48-49). Li té ésplyé yo sé nan okipasion Papa-l pou-l té yé, sé la pou yo té chèché-l. Jézu toujou korijé rézon ki fè n-ap chèché-l. Sèké démach nou mélanjé avèk préokipasion pèsonèl nou. Sé pa pou nou minm pou nou chèché Jézu, sé pou li minm. Sé pou démach nou-an dézintérésé. Sé pou nou chèché intèrè Jézu. Li minm l-ap okipé intèrè pa nou (Mt 6,33).

Jézu invité foul la, nan dizuitièm dimanch òdinè B-a, pou-l pa travay pou manjé k-ap pasé-a, min pou-l dépansé fòs li pou manjé k-ap diré tout tan-an (Jn 6,27). Réyélmàn vré, si y-ap chèché Jézu, sé poutèt li té séparé pin ba yo lavèy la (Jn 6,26). Jézu di yo sé pa pou pin sa-a k-ap pasé-a pou yo travay, sé pou vré Pin-an k-ap diré tout tan-an, ki désann sot nan sièl la (Jn 6,32). Sé Jézu minm ki kòmansé démach pou chèché nou-an, jan chanté lamès défin yo di-a: "Querens me, sedistis lassus": antan ou-ap chèché-m, ou bouké, ou chita sou bò pui-a (cf Jn 4,6). Jézu ap chèché nou tankou Gadyin ap **chèché** mouton-l ki pèdi (Ez 34,16; Lc 15,4,7; 19,10). Nou pa doué fè lago-lago avèk li; sé pou antré nan plan li. Nou minm n-ap chèché-l, min sé nan yon lòt diréksion, sou yon lòt plan, antan n-ap suiv yon lòt lidé, pou réglé kèsion ki konsèné lavi tè sa-a sèlman. Li avèti nou sé pa sou tèrin sa-a n-ap jouinn li. Sé konsa li té invité Nikodèm dépasé nivo sa yo ouè ak jé-a pou-l travèsé nan bagay ki pi ro pasé sans nou ak rézon nou, ki mandé **lafoua** (Jn 3,1-21) osijè nouvo nésans la. Nan konvèsasion-l avèk madanm Samari-a, li té ésyé fè-l travèsé sot sou plan réalité tè sa-a, pou-l monté sou plan réalité yo pa ouè ak jé-a (Jn 4,7-14), antan-l montré-l kijan dlo l-ap bay la ap vi-n tounin sous dlo k-ap diré tout tan-an. Nan rélasyon nou ginyin avèk Jézu, li toujou oblijé nou korijé mantalité nou (Ep 4,23), rézon ki fè n-

ap chèché-l pou-l fè nou monté pi ro. Minm lè fanmiy li t-ap **chèché** vi-n palé ak li, pandan-l t-ap préché-a, li té profité fè yo dépasé rélasyon chè ak san-an (Mt 12,46-50). Lè n-ap lapriyè, nou konn gin abitud ap chèché kijan nou kapab améloré kondision lavi nou anba isit la. Sé konsa nou vlé sèvi ak Bondié pou-l antré nan konbinézon nou fi-n ranjé-a. Époutan lapriyè sé koulé nou nan moul Bondié fòmé pou nou-an. Sé antré nan volonté Bondié. Sé asosié nou nan désizion-l. Sé nan sans sa-a nou di: "Sé pou volonté-ou fèt sou tè-a tankou nan sièl la" (Mt 6,10). Lékòl Profèt Izayi-a di sé pou nou **chèché** Granmèt la pandan nou kapab jouinn li, pandan li tou pré (Is 55,6).

Sa mòd **chèché** sa vlé di? Sé yon fason labib vlé fè nou konprann pou nou kalkilé sou aksion Bondié abitué fè nan istoua Pèp li-a, pou nou réglé rélasyon nou avèk li. Sé sou fòm sa-a lansyin Téstaman té gin yon fason pou kalkilé sans évenman ak paròl Bondié yo tankou yon "méditation"; yo rélé-l "**midrash**" (מדרש): sé yon mo nan langaj ébré ki vlé di **chèché**, fouyé. N-ap chèché, n-ap fouyé, apati tou sa nou ouè Bondié abitué fè, pou nou orienté konduit nou parapò a li minm, parapò a prochin nou, parapò a nou minm. Psòm-répons dizuitièm dimanch òdinè B-a (Ps 77 = 78), sé yon Psòm "méditation" nan sans "midrash" la, nan sans réchèch sa-a koté y-ap kalkilé sou istoua pèp la pou ouè sa Bondié fè pou li, pou invité pèp la pran yon atitud konfians, éspérans pou sa l-ap viv nan tan prézan-an ak pou sa k-ap vini apré. Minm Bondié ki té fè mèvèy pou zansèt yo, sé li minm tou k-ap kontinué okipé pèp li-a, épi ki pap janm abandoné-l, sé pasians pou pèp la pran pou-l tann lè Bondié vlé montré aktivité-l, ki pa janm sispann nan. Psòm sa-a raplé kijan Bondié té bay pèp la manjé pin nan dézè-a (Ps 77,23-25 = 78,23-25). Sé konsa Psòm sa-a kalkilé sa-k té pasé nan dézè-a, lè pèp la té fi-n travèsé lanmè Rouj la, dapré sa premié léktu dizuitièm dimanch òdinè B-a fè sonjé-a (Ex 16,2-4.12-15). Liv lasajès la sèvi anpil ak mòd réfléksion sa yo (midrash) pou-l bay sans évenman ki té pasé nan dézè-a. Sé konsa li éspliké kijan lama-n nan té konn fonn atè nan dézè-a dépi premié réyon solèy la lévé, pou-l invité moun yo lévé bonè al chèché-l, pou-l fè yo ouè kijan sé dépi anvan solèy lévé pou yo kanpé al rankontré Bondié nan lapriyè yo (Sg 16,27-28). Sé nan minm lign mòd réfléksion sa yo k-ap fouyé, k-ap **chèché**, k-ap kalkilé sans évenman yo pou antré pi plis nan profondè yo Jézu dévlopé diskou-l la, apré mirak pin-an nan dézè-a. Sé tankou yon **méditation** li invité pèp la fè, pou orienté réchèch li, pou desidé-l chanjé rézon ki fè l-ap chèché-l la. Li invité foul la pou-l dépasé évenman li ouè ak jé-l yo, pou-l chèché dékouvri sans li. Premié sans la sé **lafoua**. Dézièm sans la sé **lékaristi**. Sé pousa Jézu ap kòmansé palé osijè lafoua-a. Apré sa l-ap palé osijè lékaristi-a.

Sé yon **réfléksion sajàs** Jézu ap fè avèk yo osijè mirak pin-an, nan prolonjman réfléksion liv lasajès la té déjà kòmansé fè sou évenman égzòd la (Sg 16), nan minm lign Profèt yo té kòmansé-a tou (Is 55). Sin Pòl ap kontinué nan minm lign sa-a toujou, lè l-ap palé ak Korintyin yo. L-ap di yo sa-k té pasé nan lansyin Téstaman-an sé sign ak léson sa té yé pou nou minm ki jouinn vré réalité yo, nou minm ki touché nan finisman sièk tan yo (1 Co 10,11). Sin Jan invité nou fè tankou premié Krétyin yo, ki té abitué **MÉDITÉ**, kalkilé, **CHÈCHÉ**, fouyé, apati évenman Jézu té réalisé yo, pou yo dékouvri sans évenman sa yo. Nan lavi pèsonèl nou, sé pou nou pran abitud tou pou nou réfléchi sou intèvansyon spésial Bondié abitué réalisé nan lavi nou, pou nou pa tout tan ap mandé-l bagay ki nan gou nou, pou nou pa ba-l défi, min pou nou ouè nan ki sans li vlé pou nou aji. Lapriyé nou sé mandé-l pou nou chèché konfòmé konduit nou dapré volonté-l. Sé pou rézon sa-a n-ap **chèché** tout tan ki volonté-l sou nou.

Sèlman nou pa doué koupé évenman lavi nou avèk istoua Pèp Bondié-a, avèk maniféstasyon Bondié nan istoua sa-a. Sé minm Bondié-a ki té aji nan istoua pèp li-a, sé li minm tou ki kontinué ap aji nan lavi nou chak. Sa-l té fè pou Pèp li-a, sé sa l-ap kontinué fè pou nou tou. Sé pousa lè larinn Èstè ap lapriyé-l, li kòmansé raplé-l tou sa-l té fè pou zansèt yo (Est 4,17). Anpil priyé nan lansyin Téstaman, sé konsa yo kòmansé (cf 1 R 8,23), sitou Psòm yo (cf Ps 74,2; Jn 11,41). Lè nou gin yon bagay pou nou mandé Bondié, n-ap sonjé kòmansé di-l mèsi pou sa-l té fè pou Pèp li-a épi pou sa-l té déjà fè pou nou tou, minm sa nou pa konnin. Apré sa-a n-a sonjé mandé-l sa n-ap mandé-l la.

Lékaristi-a sé yon priyé rémèsiman, yon priyé rékonésans, yon priyé "aksion de gras". Jézu pran pin-an, li di **Bondié mèsi**, li kasé-l, li ba yo (cf Jn 6,11). Sèl lapriyé la Trè Sint Vièj nou konnin, sé lapriyé **rémèsiman**, Magnifikat la (Lc 1,46-55). N-ap mandé-l pou nou bliyé tèt nou, pou nou kòmansé sonjé di Bondié mèsi pou sa-l fè pou nou déjà, épi pou nou pran abitud tou di-l mèsi davans pou sa-l vlé fè pou nou ankò, pou nou pa rét ap suiv lidé nou tèlman nou pèdi tras chémin Bondié balizé pou nou-an. Jézu di nou pou nou **CHÈCHÉ** péyi koté Bondié Roua-a ak jistis li; tout rès la, y-ap ba nou-l an plis (Mt 6,33). Sé nan sans sa-a pou nou chèché-l li minm. Lè n-ap chèché-l pou rézon nou pa doué chèché-l, li gin doua kòmansé tésté nou, antan li mandé nou: "Kisa n-ap chèché?" (Jn 1,38). Lè n-ap chèché-l koté nou pa doué chèché-l, li gin doua mandé nou: "Ki moun ou-ap chèché?" (Jn 20,15). Lè n-ap chèché-l lè pou nou pa chèché-l, li gin doua mandé nou: "Pouki sa nou t-ap chèché-m?" (Lc 2,49). Li mandé nou pou nou **chèché** Paròl Bondié-a (Am 8,12; Os 5,6), k-ap ba nou sans sa-k byin ak sa-k mal

(Am 5,14). Konsa sé yon dévoua pou nou fè mòd jan **réchèch**, méditation, kalkil, réfléksion sa-a, ki chita sou Paròl Bondié-a. Yon moun ki abitué réglé lavi-l sou Paròl Bondié-a konsa, sé yon moun ki abitué réspiré lè ki fré. Nanm li ap gin santé. Li pap nan kè soté tout jounin pou yon ti krik ti krak. Li gin asirans lafoua-a bay la, minm si-l pa ouè koté l-ap pozé pié-l, akòz sé nannuit l-ap maché. Mòd méditation sa-a (midrash) ap réfè mantalite nou, léspri nou, jijman nou, jan Sin Pòl di nou nan dézièm léktu dizuitièm dimanch òdinè B-a (Ep 4,23), pou nou kité fason nou té konn abitué jijé lontan yo, dapré moun ansyin-an, ki gin yon pakèt lanvi k-ap bay désépsion (Ep 4,22), tankou payin yo (Ep 4,17). N-a évité fè tankou Juif yo, k-ap mandé sign pou yo ouè, pou yo kapab kouè (Jn 6,30; cf Mt 16,1; Mc 15,32; Lc 11,29). Jézu di sé chans pou moun ki kouè san yo pa ouè (Jn 20,29). La Trè Sint Vièj sèvi nou kòm modèl nan sans sa-a (Lc 1,45). Sé tout tan li t-ap kalkilé Paròl Bondié-a nan kè-l (Lc 2,19,51; cf 8,21), pou-l **CHÈCHÉ** sans li nan lavi-l, pou konfòmé konduit li sou li. Sé "méditation"-an ki sèvi nouriti pou dévlo pé lafoua-a. Sé tankou yon mèl koté y-ap froté kouto lafoua-a pou filé-l. Tankou nannuit, n-ap chèché antan n-ap touché adouat-agoch, jous nou rivé koté n-apralé-a (Ac 17,27; cf Ct 3,1,2; 5,6; 6,1). Si nou aprann ranjé kabann nou bonè, anvan dòmi nan jé nou, sa vlé di pran abitud chèché Granmèt la lè nou kapab jouinn li (Is 55,6), li pap fèmin zorèy li lè n-ap rélé-l (Am 8,1; Pr 1,28; Jn 7,34; 8,21; Is 65,12; 66,4). Moun ki chèché-l dépi granmatin, l-ap jouinn li san fatig (Sg 6,14; 16,28; Si 6,36; 39,5). Moun ki chèché-l avèk kè-l tou sinp, l-ap jouinn li (Sg 1,1). Sèk sé li minm ki di: "Chèché, n-a jouinn" (Mt 7,7). Avèk Psòm nan, n-ap di: "Sé fas ou, Granmèt, m-ap chèché" (Ps 28,7).

"Pa travay pou manjé k-ap pasé-a, min pou manjé k-ap diré tout tan-an" (Jn 6,27). Si Jézu bay sink mil moun manjé ak sink pin, sé yon **sign** li té vlé ba yo, pou-l fè yo réfléchi sou li. Yo minm yo pa fiksé atansyon yo sou sign nan. Sé pousa Jézu di yo: "N-ap chèché-m, sé pa paské nou té ouè sign, min sé paské nou té manjé nan pin yo jous nou satisfè" (Jn 6,26). Jézu pa fè mirak gratis, sa vlé di li pa vlé rété sou plan matiè-a. Li vlé lévé nou pi ro. Li sé Pin ki vivan-an, sa nou jouinn nan lafoua-a. Li louvri jé avèg la paské li sé Limiè lavi-a. Li fè Laza lévé vivan sot nan lanmò paské li sé lavi. Pèp Juif la t-ap tann yon Mési k-ap chasé lènmi yo pou-l instalé rouayom Israèl la sou tè-a. Sé yon Mouton ki vini, ki kité yo kondui-l labatoua. Jézu gin rézon mandé André ak Jan: Ki sa n-ap chèché? (Jn 1,38). Nou doué rédrésé rézon ki fè n-ap chèché Jézu, pou nou pa pran désépsion. N-ap mandé Manman Mari pou-l fè kè nou bat nan minm kadans ak kè pa-l lè-l t-ap chèché Jézu pandan toua jou-a (Lc 2,49), pou, minm si nou pa

konprann répons li, nou réfléchi sou li anndan fon kè nou nan lafoua nou pou nou kap aksépte-l (Lc 2,51).

*

* *

DIZUITIÈM DIMANCH ÒDINÈ C

Dènié tan yo rivé. Késion éritaj, richès, byin latè, Sin Luk invité nou kalkilé sou fason pou nou sèvi avèk yo. Lansyin Téstaman té prévoua kondision transmission éritaj (Nb 27,1-11; Dt 21,15). Min dépi gin késion éritaj k-ap séparé, gin diskision. Jézu pa la pou réglé kozé sa-a. Yo té mandé Moyiz kilès ki mété-l kòm chèf ak jij sou pèp la (Ac 2,21; Ex 2,14). Jézu bay minm késion sa-a pou afè éritaj la, koté yo pran-l kòm abit la. Li profité pou-l fè sonjé konsign liv Provèb la bay pou sèvi yon fason kòrèk ak byin tè-a (Pr 18,11). Sin Pòl di: moun k-ap achté, k-ap vann, k-ap posédé, sé pou-l fè kòm si li pa-t gin anyin, paské figi tè sa-a ap pasé (1Co 7,30-31).

Lè-l fi-n bay lansègnman sa-a après évenman ki pasé-a, Jézu ap profité pou-l mandé nou pou nou rimmèt kòz nou nan min Grammèt la (Lc 12,22-31). Sé ringn Bondié-a pou nou kòmansé chèché anvan, tout rès la ap vini après (Mt 6,33). Sin Luk sé Évanjélis ki sansib anpil sou kondision pòv la k-ap pèmèt nou antré nan Ringn sièl la. Prèmié kominoté Jérusalèm nan té pòv (Ac 4,32-5,11). Riz Anani ak Safir la té jouinn pinision (Ac 5,1-11). Banabé té vann sa-l té ginyin, li té bay Apot yo pri-a (Ac 4,36-37). Mésié-a ki té vlé suiv Jézu-a té tandé kondision-an. Réna yo gin trou yo, zouazo sièl yo gin nich yo, pitit moun nan pa gin koté pou-l pozé tèt li (Lc 9,58; Mt 19,16-26; Gn 28,11). Sin Jak montré malédikcion k-ap tann mové rich yo (Jc 4,13-15, cf Pr 27,1; Si 11,19). Dènié tan-an rivé, Ringn sièl la tou pré (1Co 15,32). Sé pou Grammèt la pou nou ranmasé richès (Ap 3,17; Mt 6,19-21). Tout bagay sé van k-ap pasé (Qo 2, 21-23) sof rinmin Bondié, dapré sa Maksimin le Konfèsè di (PG 90,962-967; cf office de lecture 7ème dimanche ordinaire).

*

Dizuitièm dimanch òdinè C-a fè nou réfléchi sou "vanité des richesses".. Tout richès mèt jadin-an té séré-a, yo pa sèvi-l, li mouri nan nuit la minm (Lc 12,13-21). Sé poua réfrin Alélouya-a di sé chans pou moun ki pòv nan léspri-a (Mt 5,3). Réfrin sa-a édé nou antré nan sans lévanjil la. Prèmié léktu-a di nou tout bagay sé yon ti souf (Qo 1,2; 2,21-23): moun nan fi-n travay, li blijé kité éritaj li pou yon lòt, li pa gin tan joui-l. Sé chémin ki trasé pou mèsaj lévanjil la. Moun ki gin kè di, ki fèmin kè yo pou yo pa obéyi lòd Bondié yo, yo pi mal pasé si sé richès tè-a ki té ankonbré yo (cf Psòm répons: Ps 94=95).

*

Dizuitièm dimanch òdinè C-a invité nou rénoncé ataché nou ak byin nou, pou nou sonjé péyi koté n-apralé-a, sièl la. Sé alokasion yon késion éritaj Jézu profité pou bay lansègnman sajès sa-a. Otorité li ginyin, sé pa pou fè jijman sou séparasion éritaj, sé raplé vré déstiné nanm nou, ki gin pou parèt dévan jijman Granmèt la. Sé pa richès k-ap pézé nan balans la, pou indiké valè yon lavi. Finisman lévanjil dizuitièm dimanch òdinè C-a (Lc 12,13-21) di sé pa pou nou minm pou nou ranmasé richès, sé pou Bondié pou nou vi-n rich (Lc 12,21). Nou pa doué ap séré akoté, pou nou jouinn asirans nan répo, nan manjé, nan bouason, nan plézi (Lc 12,19). Sa sé foli (Lc 12,20). Lavi ki pap janm fini-an trò inpòtan pou n-ap riské-l avèk konpòtman sa-a. Premié léktu-a (Qo1,2; 2,21-23) fè konstaté kijan sa pa gin sans, sé tankou yon ti souf ki sot nan nin yon moun (Qo 2,23 : "hébel" הֶבֶל). Malgré tout traka nou bay tèt nou pou nou instalé richès nou, n-ap blijé kité yo bay lòt. Sèlman Koélèt pa-t ko ouè vré rézon-an, sé Jézu k-ap dévoualé-l: sé lavi ki pap janm fini-an. Dézièm léktu-a (Col 3,1-11) invité nou chèché byin ki anro yo. Sin Pòl di Kolosyin yo: déstiné lavi yo sé anro-a li yé, sé pa sou tè-a (Col 3,1-4). Sou tè-a nou mouri avèk Jézu-Kri. Lavi nou kaché avèk li nan Bondié (Col 3,3). Sin Pòl mandé nou pou nou frinnin anvi jouisans. Li di: sé tankou sèvis zidòl sa yé (Col 3,5). Konpòtman moun ansyin-an doué disparèt, pou nou abiyé ak moun nouvo-a: Jézu-Kri (Col 3,9s). Sé tou tan Bondié ap fè nou vi-n pi nèf, pou-l fè nou jouinn vré konésans la (Col 3,10). Nou doué toujou paré pou nou rankontré Granmèt la (Mt 24,42-44). Kè nou pa doué lou ak préokipasion byin k-ap pasé sou tè-a. Nou pa konn kilè Pitit Moun nan ap vini. Li gin pou-l rétonnin ak otorité pou-l jijé ni moun k-ap viv ni moun ki mouri.

Antan n-ap préparé gran "Jibilé" Ané 2000 la (cf lèt ansiklik Pap Jan Pòl II: "Dominum et vivificantem": "Sila-a ki Granmèt la é ki bay lavi-a"), dé mil ané dépi Jézu té vini sou tè-a, n-ap sonjé l-ap vini ankò yon lè nou pa konnin, sé pou nou kòmansé paré kè nou nan konpòtman nou ginyin parapò a byin k-ap pasé yo. Sé pou nou pran modèl sou konduit la Trè Sint Vièj nan vil Nazarèt, ki t-ap tann Mési-a vini, antan li té ofri-l yon kè tou pòv, dapré sa Profèt yo té mandé-a, avèk Sofoni, Miché, Izayi, Jérémi, Èzékièl, Zakari, Amòs, ki té di: Granmèt la t-ap kité yon ti "Rès" tou pòv nan pèp la. Sé nan mitan ti "Rès" pòv sa-a li t-ap vi-n fè ladésant (Mi 5,2-7; So 3,12; Is 1,8s). La trè Sint Vièj di: "Li voyé jé sou sèvant li ki pòv"(Lc 1,48). Pasaj sa-a doué sèvi nou tankou yon konsign pou nou paré kè nou pou gran fèt "Jibilé" sa-a k-ap rivé nan ané 2000 la. Sé nan sans sa-a n-ap planté pou nou rèkòlté byin (2 Co 9,6; Ga 6,7s).

Sin Jan-d-la-Koua di: plis n-ap monté sou mòn "Carmel" la, pou n-al rankontré Granmèt la, sé plis nou pa jouinn "anyin". Sé konsa pou nou vidé kè nou ak tout atirans ki ladan-l, ki fè nou anvi posédé tout tan pi plis, joui tout tan pi plis, gin otorité tout tan pi plis. Sé pòv Jézu té yé (2 Co 8,9). Sé bay pòv li adrésé mèsaj li-a. Li di: Sé chans pou moun ki pòv yo, paské péyi koté Bondié Roua-a, sé pou yo li yé! (Lc 6,20; Mt 5,3). Nan premié prèch li fè nan kay réyinion Nazarèt la, li di: "Léspri Granmèt la sou mouin; li voyé-m poté Bòn Nouvèl la bay pòv yo" (Lc 4,18). Li di patizan ki té vlé suiv li-a: "Réna yo gin trou ròch yo; zouazo sièl yo gin nich yo; Pitit moun nan pa gin koté pou-l pozé tèt li" (Lc 9,58). Gin moun Jézu rélé vi-n suiv li yon fason spésial, pou yo viv pòv tankou-l, antan yo rénonse avantaj yo t-a kapab jouinn nan byin k-ap pasé sou tè-a. Yo sèvi modèl pou raplé moun yo sou tè-a kijan vré péyi nou sé nan sièl la li yé. N-ap sonjé lapriyé yon fason spésial pou moun sa yo ki gin vokasion sa-a nan lavi rélijijé, pou yo kinbé lanp la byin limin nan min yo, antan y-ap montré lòt yo chémin ki kondui nan sièl la, ki pa pèmèt nou instalé sou tè-a. Sé lokazion pou nou sonjé lapriyé pou moun k-ap parèt dévan jijman Granmèt la, pou lanmò-a sèvi yo yon sinp pasaj, k-ap fi-n fè yo débarasé nèt ak rèz atirans byin tè-a pou y-al joui nan prezans Bondié nan sièl la. Sin Pòl di sé toutan l-ap fè éspérians lanmò (1 Co 15,31: "quotidie morior": chak jou mouin éspozé bay lanmò). Sa vlé di l-ap viv sou tè-a avèk konpòtman moun ki gin asirans li nan sièl la. Li di Korintyin yo: "Tan-an kout: moun k-ap achté, sé pou yo fè kòm si yo pa-t posédé; moun k-ap sèvi ak tè sa-a, sé pou yo fè kòm si yo pa t-ap sèvi avèk li tout bon vré!" (1 Co 1,30s), sèké l-ap pasé, figi tè sa-a (ib).

*

Pòt sièl la séré; chémin-an jinnin; sé nan fòsé; sé nan rédi pou nou antré, pou nou monté (cf Mt 7,13-14; 11,12). Gin défoua n-ap kalkilé sa n-ap manjé, sa n-ap bouè, sa n-ap mét sou nou, préokipasion ki riské dékontré prezans léspri nou. Bondié abiyé flè lis yo pi bèl pasé roua Salomon nan tout bèlté-l. Li nourri ti zouazo yo ki pa simin yon grinn zèb, ki pa filé koton (cf Mt 6,24-34). Gin moun ki rinmin ranmasé mété nan dépo, fè pil, pou yo gin anpil machandiz an rézèv kòm asirans. Bondié konn bay sé nou minm ki pa konn séparé. Lè jénòm nan té vlé suiv Jézu-a, Jézu té kòmansé di-l pou-l kité tout bagay, anvan-l suiv li, paské li pa gin koté pou-l pozé tèt li (Lc 9,57s). Lè jénòm rich la té pati byin chagrin paské li té gin anpil byin-an, Sin Piè té di Jézu: "É nou minm ki kité tout bagay, nou suiv ou-a?". Jézu té réponn li yo t-ap gin san foua plis pasé sa yo kité-a, dépi sou tè-a avèk pèsékision, épi lavi ki pap janm fini-an lòt bò-a nan sièl la (cf Mc 10,17-31). Gin dé foua n-ap trinnin yon bagay dépi anpil tan avèk nou, ki pa janm sèvi

nou, min nou rét ap di nan kè nou: "n-ap kite-l toujou, pétèt yon lè l-a sèvi nou". Min pandan tan sa-a, yon lòt moun t-a byin bézouin bagay la, nou kite-l, kèkfoua bagay la gaté afòs li pa sèvi. Lè nou limin yon alimèt, si nou pa fè vit kolé flanm li nan yon lanp oubyin yon chandèl oubyin yon bouapin, alimèt la ap étinn: "Le feu qui ne se communique pas s'éteint". Si nou pa rézignin nou simin, nou pap rékòlté; épi sé pa ti kras pou nou simin, sé ak gro godé; konsa lè n-ap fè lacharité, plis nou bay sé plis n-ap rékòlté (cf 2 Co 9,6; Pr 11,24s). Sé lafoua pou nou ginyin, pou nou konnin sé préte Bondié préte nou byin yo li mété nan min nou-an; sé pa yon doua nou ginyin sou yo antan yo t-a rélé nou chè mèt, chè mètrès. Nou tout sé pòv nou yé dévan Bondié; nou pa doué ap pansé: "sé sa nou fè pou nou ouè, sé nou minm ki travay, sé nou minm ki pou joui, nan pouin jou pou nou kite yon lòt ap profité sa nou fi-n rédi pou li-a". Bondié konn bay, sé nou ki pa konn séparé. Sé pou nou aprann konté plis sou Bondié, li minm ki bay moun k-ap simin grinn pou-l simin-an, li minm ki bay sila-a k-ap rékòlté-a frui-a l-ap rékòlté-a (cf 2 Co 9,10; Is 55,10; Os 10,12). N-ap mandé Manmna Mari pou-l aprann nou gin DÉTACHMAN.

*

Richès: Gn 31,1.16; Jos 22,8; 1 Sm 9,20; 17, 25; 1 R 3,11-13;10.23; 1 Ch 29,12-28; 2 Ch 1,11-12; 9,1-22; 17,5;18,1; 32,27; Tob 4,21; 12,8; Est 1,4; 5,11; 1 Mac 4,23; 6,1; 10,24; 14,32; 2 Mac 1,14; 3,6-7a-b-13-14; 10,10; Job 20,10-15; 31,25; Ps 39,7; 49,7; 62,11; 65,10; 104,24; 105,21; 119, 14; Pr 3,16; 8,18; 11,4-7-16-24-28; 13,8; 14,24; 19,4;22,1-4; 23,4; 27,24; 30,8; Qo 4,8; 5,12-13-18; 6,2; 9,11; Ct 8,7; Sg 5,8; 7,8-11-13; 8,5.18; Si 5, 1-8; 10,30-31a-b; 11,14; 13, 24; 14,3; 21,4; 24,17; 28,10; 29,5.11; 30,16; 31,1; 37,6; 40,13.26; Is 8,4; 10,3.14; 23,3; 30,6; 33,6; 45,3; 60,5.11.16; 61,6; Jer 9,22; 15,13; 17,3.11; 20,5; Ba 6,34; Ez 22,25; 26,2.12; 27,27.33; 29,19; 30,4; Dn 11,2a.b-24.28; Joël 2, 22; Abd 11,13; Mi 4,13; Ha 2,5; So 1,13; Za 14,14; Mt 13,22; Mc 4,19; 10,23; Lc 6,14; 18,24; R 2,4; 9,23; 11,12a.b.33; 1 Co 1,5; Ep 1,7; 2,7; 3,8.15; Ph 4,19; 1Tm 6,9.17; He 10,34; 11,26; Jc 5,2; 1 Jn 2,16; Ap 5,12.

*

* *

DIZNÉVIÈM DIMANCH ÒDINÈ A

"Granmèt, pasé-m lòd pou-m vi-n jouinn ou sou dlo yo. Jézu lonjé min-l, li kinbé Piè; li di-l: Lafoua-ou piti, pouki sa ou douté?" (réfrin Magnifikat premié Vèp 19^e d.o.; cf Mt 14,22-33).

Jézu sou mòn nan pou kont li, l-ap lapriyè nan dézè-a. Konsa Profèt Éli té sou mòn Sinayi-a, nan trou ròch la, l-ap lapriyè nan nuit (1 R 19,8-11.13 = premié léktu). Tanpèt la sou lanmè ap gonflé lanm yo, ap ménasé pou-l chaviré batiman-an, koté Apot yo yé-a, tankou gro kout van-an ki té soti pou-l krazé mòn yo sou Sinayi-a, pandan Profèt Éli t-ap lapriyè-a. Sa pa fasil pou lapriyè nan kontrariété. Sé lafoua-a ki pou sèvi tankou yon trou ròch koté nou kaché pou rankontré Bondié nan fon kè nou pou kont nou. An minm tan tou sé lapriyè k-ap kalmé tanpèt la. Minm si nou gin difikilté pou lapriyè nan kontrariété, sé pou nou fè éfò-a ralé kò nou apa, yon koté pou kont nou, antré nan kontak avèk Bondié. L-ap ouè lafoua nou, l-ap kalmé tanpèt la. Gin dé foua nou vlé batay ak kontrariété yo anvan, pou nou jouinn posibilité lapriyè ak kè pozé apré. Sé yon mové program. Sé pou nou pran abitud nan mitan tanpèt la minm pou nou lapriyè. Lè Bondié vlé, l-a fè tanpèt la kalmé. Otréman nou riské pasé anpil tan san nou pa réyisi lapriyè, paské gin dé tanpèt ki pran tan avan yo kalmé. Apot yo ap ramé nan sans kontrè van-an. Min tout nan nuit, y-ap déplouayé éfò yo, yo pa réyisi avansé anpil. Sé lè Jézu monté nan batiman-an, van-an sispann.

Sou mòn Sinayi-a, van souflé, tranbléman-tè fèt, difé gayé. Min lè Bondié vi-n rivé, sé yon ti souf tou léjé ki pasé. Tout bagay kalmé. Koté Bondié yé, sé lapè. Min anvan nou jouinn li, nou pasé nan kè séré, nan kè soté. Si Jézu kapab maché sou lanmè, si-l bay Piè pouvoua pou-l maché sou lanmè, sé sign li déja ranpôté laviktoua sou tou sa-k anvè kontrarié nou. Sé sou asirans sa-a nou apuiyé pou nou pa troulé dévan anyin k-ap ménasé nou. Dévan bouch ménas la minm n-ap kontinué program nou kòmansé, san nou pa défèt anyin. Sé pa nou minm ki an kòz. Sé Bondié k-ap réglé kozé-a pou nou. Sa sèlman li mandé nou, sé konfians. Apot yo té pasé tout nan nuit ap fè lapèch san yo pa pran yon ti pouason. Sou lòd Jézu yo voyé filé yo adouat batiman-an, yo jouinn tèlman pouason, filé yo t-ap chiré (cf Lc 5,1-11). Koté Bondié yé sé lapè. Lapriyè nou rélé prézans Bondié; li fè lapè rivé. Sé poua nan moman koté tout bagay ap boulvèsé, nou doué ralé kò nou yon koté pou kont nou, pou nou lapriyè. Bondié ap ouè lafoua nou, l-ap fè lapè rivé. Kontrariété sa yo sé éséyé y-ap éséyé lafoua nou. Jézu di Piè: lafoua-ou piti, pouki sa ou douté? (Mt 14,31). Lafoua la Trè Sint Vièj Mari fè-l mandé Jézu premié mirak la nan nòs Kana. Malgré kontrariété li

rankontré, li kouè pi fèm toujou. Jézu fè mirak la vré (cf Jn 2,1-11). Madanm nan ki t-ap pèdi san dépi douzan-an, ak lafoua-l li touché manto Jézu, sous san-an tari la minm (Mc 5,26-34). N-ap mandé Manman Mari lafoua sa-a, pou nou lapriyé Jézu nan moman ki sanblé yo pi boulvèsé tankou batiman sou dlo nan tanpèt nan nuit, pou prézans Jézu kasé fòs van-an, pou-l kalmé mouvman dlo yo.

Jézu di Sin Piè l-ap rinnèt li klé péyi Roua sièl yo, pouvoua lanfè pap kapab fè anyin kont légliz la k-ap bati sou li-a (Mt 16,18-19). Dépi davans li vlé montré Sin Piè kijan l-ap patisipé nan laviktoua li ranpôté sou pouvoua mal la, antan li fè-l maché sou dlo-a minm jan ak li minm (Mt 14,22-33). Lanmè-a réprézanté fòs mal la. Lè Jézu maché sou lanmè-a, sa vlé di li pilonnin tout pouvoua Satan. Sin Piè, kòm chèf légliz la, li minm tou, l-ap maché sou tèt lènmi sa-a. Sèlman toutotan nou sou tè sa-a, nan lavi sa-a, malgré tout pouvoua nou kapab ginyin, nou rété fèb kan minm, nou bézouin lafoua, ki pou fè nou kanpé. Toutotan Sin Piè gin lafoua, l-ap maché sou dlo-a, min kon-l ézité, kon-l pè, li kòmansé fonsé nan dlo-a, li blijé rélé Jézu vi-n poté-l sékou. Jézu fè-l rémak la, sé lafoua-l ki pa ko fi-n pran rasi-n. Sé yon fason tou pou avèti Sin Piè davans l-ap fébli lè yo fi-n arété Jézu-a, min après sa l-ap régrèt, l-ap rékòmansé maché nòm (cf Lc 22,31-34).

Nan ninpòt ki dégré Jézu fè nou rivé pou nou zanmi avèk li, nan ninpòt ki rotè li fè nou monté pou-l konfié nou résponsabilité nan légliz li-a, nou pa doué konprann sé yo garanti sa yé k-ap fè nou évité tonbé. Okontrè, plis nou ro, sé plis nou doué fè atansion pou nou pa tonbé ba. Sin Piè ap tandé Jézu fi-n konfié-l klé péyi Roua sièl yo, après li fi-n fè déklarasion lafoua-l sou Mési-a, min tout-suit après, l-ap fè yon fo-pa, antan l-ap éséyé détounin Jézu nan diréksion chémin lakoua-a. Li pa-t ko konprann sé chémin sa-a ki pou té minnin nan Réziréksion-an. Jézu, ki té fèk fi-n fè konpliman pou li, ap fè-l répròch, l-ap di-l pasé dèyè-l, l-ap jinnin rout li tankou Satan (Mt 16,21-23). Sin Piè aksépté tout ti répròch sa yo. Li aksépté pou Jézu rélé-l Satan. Li pa faché pou sa. Répròch Jézu fè nou, sé sign rinmin li rinmin nou, pou-l korijé nou, pou-l fè nou fè progrè. Pou nou rivé jouinn Jézu, nou gin lanm lanmè yo pou nou travèsé. Toutotan Sin Piè té nan batiman-an, li té gin asirans, min li té louin Jézu. Lè l-ap rivé kot Jézu, l-ap gin plis asirans ankò, min an-atandan, li gin pou-l kité asirans kannòt la, pou-l travèsé dlo-a, anvan-l jouinn vré asirans Jézu ap ba li-a. Konsa tou, nou toujou gin yon asirans pou nou kité nan lavi nou, pou nou jouinn vré asirans Jézu ap ba nou-an. Ant dé asirans sa yo, gin yon vid koté n-ap balansé sou dlo-a, ki fè nou pè, paské nou santi nou pou kont nou. Sé lafoua-a ki kapab ba nou

asirans. Fò-l solid. Lè yon manman ap aprann pitit li maché, tout tan l-ap rékilé, pou pitit la fè yon pa an plis. Sé konsa Jézu ap fè avèk nou. Tout pié boua ki donnin frui, Bondié tayé branch li pou-l kapab donnin pi plis (cf Jn 15,2). Jézu invité nou fè éfò pou dépasé mézi distans koté nou rivé-a, pou nou toujou fè plis progrè. Jous nan dènié moman l-ap pasé sou tè-a yon fason vizib avèk Apot yo, apré mirak lapèch ki té fèt apré Réziréksion-an, Jézu fè Sin Piè rémak toujou, lè-l di-l pou-l suiv li-a, Sin Piè gadé, li ouè Sin Jan, l-ap mandé Jézu késion osijè avni Sin Jan; Jézu di-l sa pa gadé-l; sa-l di-l fè-a sé sa pou-l fè, san-l pa chèché okipé afè lòt moun. Sin Piè obéyi la minm (cf Jn 21,20-23). Sin Piè aji avèk tanpéraman-l. Jézu rinmin nou avèk tanpéraman nou, minm si Jézu ap chèché amélioré tanpéraman sa-a. Sé pa pou nou chèché fi-n poli ti tanpéraman nou, fi-n débarasé tout kay la ak tout ti pousiè anvan nou proché kot Jézu; okontrè, jan nou yé-a, sé konsa l-ap tann nou; si gin yon bagay ki krochi, sé li minm k-ap drésé-l pou nou, li konnin byin kijan nou fèt, sé ak pousiè Bondié té fè nou (cf Ps 103,14). Lè Profèt Éli té sou mòn Sinayi-a, nan gròt la, koté Bondié té bay Moyiz randé-vou-a, lè-l t-ap ba-l dé galèt kontra yo, té gin yon van si tèlman fò, sé kòm si sé chiré li t-ap chiré mòn yo, l-ap krazé ròch yo. Apré sa sé té tranbléman-tè ak difé (1 R 19,9-11.13). Minm jan lè Bondié t-a bay Moyiz laloua-a sou mòn Sinayi-a, sé konsa tou té gin gro brui sou mòn nan, gro kout loraj ak tranbléman-tè ak difé (cf Ex 19,16-25). Min lè Bondié vi-n rivé kot Éli, sé yon ti van tou dou, kalmi-an gin tan rivé, tankou lè-l t-ap fè konvèsasion ak Moyiz, kon yon zanmi ap palé ak zanmi-l (Ex 33,11; cf 33,22). Lè yon zanmi ap palé ak zanmi-l, li pa palé fò tankou dé moun k-ap jouré pou tout lari tandé, sé ti sékrè youn ap di lòt nan zòrèy. Konsa tou, lè Jézu monté nan batiman-an, van-an sispann (Mt 14,32). Minm jan ak Moyiz, minm jan ak Éli, Sin Piè té pasé nan boulvès sa-a, koté tout chèf ki gin yon réponsabilité inpòtan nan légliz la doué pasé, anvan yo fi-n pran kòmandman-an nèt (cf Si 4,17s). Yon chèf doué toujou rét kalm, malgré tout boulvès ki kapab ginyin. Apré gro kout van, tanbléman-tè, difé, sé kalmi k-ap vini. Yo pa doué dékourajé trò vit. Psòm nan di Bondié kité kòlè-l, li tounin sot nan difé kolè-l la; sé pa pou tout tan l-ap faché, li pap vidé kolè-l pou tout jénérasyon, l-ap fè nou ouè jan kè-l sansib, jistis la ap bay lapè-a nan min (Ps 84 = 85). Konsa nou minm tou, apré yon premié mouvman kòlè ki tou natirel, nou doué kité van-an kalmé, pou vag yo sispann gonflé, pou rélasyon yo vi-n nòmval. Gin réaksion ki tankou tanpèt, tranbléman tè, difé, min sé pou yon tan sa doué yé, pou tanpéraman Bondié ban nou-an kapab soulajé, épi apré sa sé pou rélasyon-an tounin vi-n nòmval, dapré sa Sin Pòl invité nou fè, lè-l di nou nou mèt faché, min pa kité solèy kouché sou kòlè nou (Eph 4, 26; Ps 4, 5). Tout nan nuit van-an té déchinnin sou lanmè-a, min vè toua-katrè di

matin, lè Réziréksion-an, Jézu kalmé-l. Nou doué viv tankou moun ki résisité ki konn donté mouvman sans yo k-ap éséyé débòdé tankou riviè k-ap kasé dig pou anvayi jadin moun. N-ap mandé Manman Mari pou-l aprann nou fè édikasion tanpéraman nou, min pou nou pa tann nou fi-n bon nèt anvan nou fè zanmi ak Jézu; okontrè sé plis nou rinmèt li tou sa nou yé, n-ap chanjé pi fasil, paské sé léspri Sin-an k-ap fè travay sa-a nan nou. Nou minm, sé pou nou pran abitud rét dosil nan min-l. Lè nou konstaté nou nan mové pozision, n-ap nouayé, sé pa pou nou pè rélé Jézu vi-n sové nou. Li pap mizé. Nou pa doué rét ap débat pou kont nou; plis n-ap chèche débat, sé plis n-ap plonjé. Sé pou nou fè tankou avèg la, pou nou rélé: Jézu, Pitit David, pitié pou nou (Lc 18, 38s). Van mèt ap souké, tanpèt ménasé; lè-l palé, yo tandé. Anndan fon kè-nou, nan plas gouvènay la, nan plas kaptinn nan, sé li minm k-ap kondui bato-a.

*

* *

DIZNÉVIÈM DIMANCH ÒDINÈ B

Juif yo pran babié (Jn 6,41), tankou zansèt yo té fè nan dézè-a (Ex 16,2.8). Y-ap jijé sou aparans (Jn 6,42; cf Mc 6,2); yo konn Jézu kòm moun; min yo pa ouè-l kòm Bondié, épi yo pa konnin sa-l fèt sot nan Mari ki rété Vièj, gras a travay léspri Sin-an. Min krétyin yo ki t-ap li lévanjil Jan-an, yo té konnin sa déja; okontrè minm krétyin Èfèz yo pa-t tèlman insisté sou Jézu-Kri kòm moun. Yo té konn Jézu kòm Bondié. Sé pou yo Jan t-ap ékri. Jan insisté minm pou montré yo kijan Jézu sé moun tout bon vré. Sé pou sa Jan rapòtè réfléksion sa yo Juif yo fè-a, an minm tan li vlé montré kijan Juif yo pa-t gin lafoua nan Jézu kòm Bondié. Jézu pa réponn yo sou késion sa-a (Jn 6,43). Li réprann sa-l té di-a (cf Jn 6,37); sé pou yo korésponn a favè Bondié-a antan yo kouè nan li, pou yo pa rét ap pèdi tan yo ap pozé yon pakèt késion ki pa gin sans.

Papa-a ap rédi **fidèl** la (Jn 6,44) minm jan Jézu ap rédi-l antan-l sou Koua-a (Jn 12,32), minm jan léspri-a ap kondui-l nan min, jous nan dènié bout lavérité-a (Jn 16,13). Jézu sité Izayi (Jn 6,45 = Is 54,13). Sé yon kè tou nèf Granmèt la ap bay (Jer 31,34), ak yon léspri tou nèf l-ap mété nan kè fidèl yo (Ez 36,26). Yo minm sé pou yo dosil nan lansègnman sa-a ki ékri anndan fon kè yo-a, pou yo vi-n jouinn Jézu. Pèsòn pa ouè Papa-a, sof Jézu (Jn 6,46 = 1,18; 14,9). Sé li minm sèl ki sèvi intèmediè pou yo ouè Bondié, antan yo ouè-l li minm minm nan lafoua. Jézu répété: moun ki kouè nan li, l-ap gin lavi ki pap janm fini-an, sa lama-n nan pa-t kapab bay la (Jn 6,47-50; cf 6,32-35). Li rivé nan pouint tèt konvèsasion-an (Jn 6,51): Pin-an sé **chè**-l minm pou lavi tè-a. Sé lékaristi. Sakréman Kò ak San Jézu-Kri-a. Sé koulié-a Jézu palé sou sa. Li pa-t ko di sa toujou. Li té vlé ménajé distans rout la. Li té maché ti pa, ti pa. Minm jan li té di: "Mouin sé pin lavi-a ki désann sot nan sièl la" (Jn 6,35) apré anpil késion-répons. Konsa tou koulié-a (Jn 6,51) Jézu rivé nan yon pouint tèt mòn, antan li dévoualé yon vérité yo pa-t ko kapab résévoua. Anvan (Jn 6,34) sé osijè lansègnman-an li t-ap palé. Pin-an sé té lansègnman-l. Koulié-a (Jn 6,51), pin sa-a sé pròp chè-l. Sé sakréman lékaristi-a Jézu dévoualé karéman la-a.

*

Juif yo toujou kontinué ap babié poutèt Jézu té di li sé pin vivan-an ki désann sot nan sièl la (Jn 6,41-52). Yo pa réyisi débloké sot nan sa yo ouè ak jé yo, pou yo travèsé nan sa yo pa ouè ak jé kò yo, pou yo dépasé al nan lafoua. Yo gin tan ap fè rélasyon, ap di: "Èské sé pa Jézu, pitit Jozèf la, sa nou rékonèt papa-l ak manman-l nan? Kijan li kapab fè di sé nan sièl mouin désann nan? (Jn 6,42). Tròp rézonman. Lafoua pa bazé sou rézonman. La

foua, sé rinmèt tout lavi nou nan min Bondié, sa nou konprann ak sa nou pa konprann. Non sèlman Jézu di li sé pin ki désann sot nan sièl la, min li di sé pou yo manjé chè-l pou yo gin lavi ki pap janm fini-an. Sa-a yon ti jan tròp pou moun sa yo ki pa gin kont lafoua-a. Yo pa ouè klè ditou. Yo pa konprann anyin.

Prémié léktu-a réponn lévanjil la (1 R 19,4-8), koté sé Profèt Éli ki maché nan dézè Sinayi-a pou-l al fè pèlerinaj minm koté Bondié té bay Moyiz dis kòmandman yo. Min dépi sou prémié jou-a, li bouké, li dékourajé, li lagé kò-l atè, li pran dòmi, li mandé lanmò. Li di Granmèt la: "Ou mèt pran lavi-m, paské mouin pa miyò pasé zansèt mouin yo". Dékourajman-an minnin yon gro dòmi lou ki tonbé sou li. Min lanj Bondié-a touché-l, li di-l: "Lévé, manjé". Lè Profèt Éli lévé, li gadé bò tèt li, li ouè yon moso pin ki fèk fèt, ki té kuit anba sann, épi yon krich dlo. Li manjé, li bouè, li dòmi ankò, tèlman li té bouké ni nan kò-l, ni nan nanm li sitou. Pin Bondié-a fèt pou réba nou kouraj, nan batay lavi-a, lè nou pou kont nou, lè pèsòn pa konprann nou, lè tout moun lagé nou. Granmèt la pap janm lagé nou, jan Psòm nan di-a: "Si papa-m ak manman-m abandoné-m, Granmèt la ap résévoua-m" (Ps 27,10). Konsa, lanj la touché Éli yon dézièm foua ankò, li fè-l lévé, li fè-l manjé pou-l kapab kontinué maché. Avèk fòs manjé sa-a, Éli maché pandan karant jou ak karant nuit san-l pa bouké, jous li rivé nan mòn Sinayi koté Granmèt la pasé-l lòd pou-l tounin nan mision-l. Psòm-répons la (Ps 33 = 34) di: "Gouté, n-a ouè kijan Granmèt la bon". Sé minm Psòm sa-a ki tounin nan vintièm dimanch la ak nan vintéinièm dimanch la tou kòm répons.

Lékaristi ba nou **fòs** pou nou kontinué rout **pèlerinaj lafoua-a** nan dézè-a. Profèt Éli té dékourajé, li té santi li té pou kont li; pin-an ak dlo-a lanj la ba li-a réfè fòs li; li maché karant jou ak karant nuit avèk manjé sa-a jous sou mòn Sinayi. Sé pa nésésèman moun k-ap pèsékité nou, tankou roua Akab ak rènn Jézabèl t-ap pèsékité Profèt Éli-a. Lènmi nou kapab anndan kè nou ak défo nou yo ak tantasion yo. Sin Pòl drésé yon katalòg (Ep 4,31; 5,3ss; Ga 5,18ss): kòlè, jouman, méchansté... Nou bézouin lékaristi-a pou chasé yo. N-ap mandé Manman Mari pou nou mét konfians nou nan Kò ak San Jézu (Jézu vivan nan losti. Gouté, gouté. Sièl la ouvè. Kalité sous lagras sila. Oui, nan losti-a).

*

* *

DIZNÉVIÈM DIMANCH C

Dèniè tan yo tou pré. Sé poua Granmèt la mandé pou vann richès yo, pou bay pòv yo, pou nou gin trézò nou nan sièl, la (Lc 12,32-48), pou nou jouinn péyi koté Bondié Roua-a. Nan kondision sa-a nou rét ap tann Granmèt la (Lc 12,35-48; Mt 25,1-13), tay nou maré tankou Pèp la k-ap pati kité Éjip la, nan nuit Pak la (Ex 12,11; 1 P 1,13; Sg 18,8s). Pou dènié tan yo, Sin Pòl mandé pou nou véyé, pou nou pa kité vòlè antré lakay la (1 Th 5,2-11; 2 P 3,10; Ap 3,3). Pap Jan-Pòl II té fè yon diskou pou 2 juiyè 1980 Rio Janeiro, Brésil, nan yon katié pòv Vidigal, li té di: "I. Lè Jézu monté sou ti mòn nan, li kòmansé déklaré lansègnman-l bay foul yo, lansègnman sa-a nou abitué rélé Prèch sou mòn nan, premié bagay ki té soti nan bouch li, sé bénédiksyon yo. Uit bénédiksyon: premié-a déklaré: "Sé chans pou moun ki pòv nan léspri-a, paské ringn sièl yo, sé pou yo" (Mt 5,3).

Gin yon sèl mòn nan la Galilé, koté Jézu té déklaré bénédiksyon-l yo. Sèlman, yo anpil sou tè-a, koté yo anonsé minm déklarasyon yo, koté yo kouté yo. Yo anpil tou, kè yo ki pa sispann ap réfléchi sou sans paròl sa yo ki té déklaré yon foua pou tout la. Yo pa sispann ap kalkilé sou yo. Sèl anvi yo, sé obsèvé yo ak tout kè yo. Y-ap chèché viv vérité uit bénédiksyon yo. Sètènman, nan péyi Brézil la, gin anpil koté konsa. Isit la tou, té gin anpil koté konsa, gin anpil koté konsa toujou.

1. Lè-m t-ap kalkilé nan ki fason mouin té gin pou-m té prezanté-m dévan moun yo ki abité péyi sa-a m-ap vizité pou premié foua-a, mouin té santi mouin té doué prezanté-m tou dabò avèk lansègnman uit bénédiksyon yo. Mouin vi-n gin lidé pou-m palé nou sou bagay sa yo, nou minm moun yo ki abité VIDIGAL la. Nan non nou minm, mouin t-a vlé palé tou avèk tout moun k-ap viv nan minm kondision avèk nou nan Brézil la. "Sé chans pou moun ki pòv yo nan léspri-a".

2.- Nan mitan nou, gin anpil pòv. Nan péyi Brézil la, légliz la vlé vi-n tounin légliz pòv yo. Li souété pou nan gran péyi sa-a, premié bénédiksyon prèch sou mòn nan réalizé.

Pòv yo nan léspri-a, sé sila yo ki pi louvri kè yo bay Bondié-a avèk nan "mèvéy Bondié yo" (Ac 2, 11). Pòv, paské yo prèt pou yo aksépté kado sa-a ki vi-n sot anro-a, ki vi-n sot nan Bondié li minm nan. Pòv nan léspri-a yo minm k-ap viv avèk konsians sé nan min Bondié yo résévoua tout bagay, tankou yon kado gratis, épi chak sa yo résévoua, yo ba-l valè. Yo toujou gin rékonésans, tout tan y-ap répété tout bagay sé favè; an nou di Granmèt

Bondié nou-an mèsì. Jézu di osijè yo tou, yo gin "kè yo nè", yo "dou"; yo minm ki "grangou", ki "souaf justis la", yo minm ki "gin lapinn" souvan; yo minm anfin, ki "gin kè sansib" (cf Mt 5, 3-10).

Réyèlman vré, pòv yo, pòv yo nan léspri-a, yo gin plis kè sansib. Kè ki louvri bay Bondié yo, yo pi louvri bay lèzom to poutèt sa. Yo paré pou yo édé avèk atansyon. Yo prèt pou patajé sa yo ginyin. Yo prèt pou résévoua lakay yo yon vèv oubyin yon òfélin ki abandoné. Yo toujou jouinn yon plas an plis nan mitan ti koté séré koté y-ap viv la. Konsa tou yo toujou jouinn yon bouché manjé, yon moso pin sou pòv tab yo-a.

Pòv, min ki gin bon kè; pòv, min ki gin kè laj. Mouin konnin gin anpil konsa, isit la, nan mitan nou, nou minm m-ap palé avèk nou kouliè-a, min tou nan divès lòt koté nan Brézil la.

3.- Paròl Jézu-Kri yo sou kondision pòv nan léspri-a, èské, paraza, yo fè bliyé injistis yo? Èské yo pèmèt pou nou pa bay yon répons dévan divès problèm ki lévé nan tou sa yo kapab rélé problèm sosiété-a? Problèm sa yo ki rété nan istoua ras lèzòm nan, yo pran divès figi, dapré diféran épòk istoua-a, épi yo gin yon fòs ki réglé sou dimansion chak sosiété an patikilié, an minm tan yo touché grandè tout tè-a nè. Li nòmal pou problèm sa yo pran yon dimansion ki kadre avèk péyi sa-a tou, yon dimansion brézilyin.

Paròl Jézu-Kri yo ki déklaré sé chans pou pòv yo nan léspri-a, yo pa chèchè siprimé tout problèm sa yo. O kontrè, yo fè ouè yo pi byin, yo mété yon plas apa pou pouin ki pi inpòtan-an, ki moun nan, ki kè moun nan, ki chak moun san éksépsyon. Moun nan dévan Bondié, épi an minm tan dévan lòt moun yo.

Pòv nan léspri, èské sa pa vlé di: "moun nan ki louvri bay lòt moun yo", sa vlé di bay Bondié avèk bay prochin-an?

Èské bénédiksyon "pòv nan léspri" sa-a pa gin an minm tan yon avètisman avèk yon akizasyon? Èské sé pa sètin, li di moun yo ki pa pòv nan léspri-a yo andéyò Ringn Bondié-a? Lè Jézu-Kri ap sonjé moun sa yo ki "rich yo", ki fèmin bay Bondié ak bay lèzòm, san kè sansib..., èské li pap di nan yon lòt pasaj: "madichon pou nou" (Lc 6,24).

"Madichon pou nou": paròl sa-a kléronnin yon fason sévè, yon fason k-ap ménasé, sitou nan bouch Jézu-Kri ki té gin abitud palé avèk bon jan, avèk dousè, épi ki té gin abitud répété: "sé chans". Époutan, l-ap di tou: "madichon pou nou".

4.- Légliz sou tout tè-a vlé vi-n tounin légliz pòv yo. Légliz nan péyi Brézil la vlé vi-n tounin tou légliz pòv yo, sa vlé di li vlé tiré tout vérité-a ki kaché nan bénédiksion Jézu-Kri yo, sitou nan premié-a ‘Sé chans pou moun yo ki pòv nan léspri-a’. Li vlé anségné vérité sa-a, li vlé obsèvé-l, tankou Jézu té vi-n fè-l la, té vi-n anségné-l la. Konsa légliz vlé tiré nan lansègnman uit bénédiksion yo tou sa ki kadré pou chak moun nan yo: moun ki pòv la, k-ap viv nan mizè-a, moun k-ap viv nan anpil richès la, ki gin tou sa-l bézouin-an; épi anfin sa ki posédé tròp la, ki gin plis pasé sa-l bézouin-an. Minm vérité premié bénédiksion-an kadré ak chak moun yon fason diféran.

Pòv yo, - Sila yo k-ap viv nan mizè-a, li di yo yo pré Bondié avèk ringn li-a yon fason apa. Min an minm tan, li di yo yo pa janm gin doua – jan pèsòn pa gin doua – pou yo chouazi lagé kò yo nan mizè nèt, ni yo minm ni fanmiy yo: Sé pou yo fè tou sa ki nan doua yo pou yo asiré tou sa ki nésésè pou yo viv, pou yo jouinn souin ni pou yo, ni pou moun lakay yo. Nan kondision pòv la, sé pou konsèvé sitou ran moun nan ginyin kòm moun épi tou grandè kè sa-a, kè sa-a ki louvri pou lòt yo, bòn volonté pou rann sèvis, sé sa ki signati pòv yo – pòv yo nan léspri-a.

- Moun yo k-ap viv nan pakèt richès yo oubyin o mouin nan yon sètin avantaj, ki gin sa yo bézouin (minm si kèk foua yo pa gin anpil ki rété an plis), légliz la ki vlé vi-n tounin légliz pòv yo, di yo: "Nou mèt sèvi ak frui travay nou-an, avèk ladrès ki déplouayé nan kad koté nou gin doua déplouayé-l, sèlman o non paròl Jézu-Kri yo, o non tou lézòm ki doué viv kòm frè, o non lasosiyé koté youn doué soutni lòt, pa fèmin kò nou anndan nou minm! Sonjé sa-k pi pòv yo. Sonjé sa-k pa gin asé yo, k-ap viv nan mizè tout tan-an, k-ap soufri grangou yo. Patajé avèk yo. Patajé yon fason k-ap suiv yon program, k-ap suiv yon sistèm. Richès tè-a pa doué anpéché nou jouinn frui léspri. Prèch sou mòn nan, li pa doué séparé nou sot nan bénédiksion pòv yo nan léspri-a.

Légliz pòv yo di minm bagay, avèk plis fòs, pou moun yo ki gin tròp yo, k-ap viv nan anpil richès yo, k-ap viv nan démonstrasion richès. Li di yo: Gadé yon ti kras alantou nou. Èské sa pa fè kè nou mal? Èské nou pa santi rémò nan konsians nou? Akoz richès nou avèk sa nou gin an tròp? Otréman, si nou vlé sèlman ‘gin’ plis tout tan, si zidòl nou sé posésion avèk plézi, sonjé valè yon moun pa méziré dapré sa-l ginyin, min dapré sa-l yé, konsa, moun ki anpilé anpil la, épi ki konprann tout bagay doué rivé la, sé pou-l sonjé li kapab gin mouins valè (nan fon kè-l avèk nan jé Bondié) pasé youn nan pòv sa yo yo pa konnin-an – ki kapab ‘mouins moun’ pasé-l.

Mèzi richès, lajan avèk démonstrasion richès, sa pa sou minm pié avèk mèzi vré ran moun nan ginyin kòm moun.

Konsa, moun yo ki ginyin an tròp la, sé pou yo évité fèmin sou pròp tèt yo, kolé kò yo sou richès la, avéglé léspri yo. Sé pou yo évité sa avèk tout fòs yo. Tout lavérité lévanjil la pa doué sispann akonpagné yo, sitou lavérité ki kaché nan paròl sa yo: ‘Sé chans pou pòv yo nan léspri-a, paské ringn sièl yo pou yo’ (Mt 5,3).

Sé pou vérité sa-a trakasé yo. Sé pou-l sèvi yo avètisman tou tan ak yon défi.

Li pa doué pèmèt yo, minm pandan yon minit, pou yo vi-n avèk akoz y-ap fè égozis, akoz y-ap chèché satisfè pròp anvi yo.

Si-ou gin anpil, si-ou gin tèlman, sonjé ou doué anpil, paské ou gin tèlman pou-ou bay. Épi sé pou sa sonjé kijan pou-ou doué bay, kijan pou-ou òganizé tout lavi sosisèté-a avèk fason pou réglé byin yo avèk chak séktèl-yo, pou lavi sa-a rivé fè tout moun viv égal pou pa gin pi alèz ant yo.

Si ou konnin anpil épi ou instalé anlè tèt néchèl sosisèté-a, ou pa doué bliyé, minm pandan yon ti moman, plis yon moun ro, plis li doué sèvi. Sèvi lòt yo. Otréman ou-ap an danjé pou ou déviè, ni ou minm ni lavi-a, louin bénédiksion yo, spésialman louin prémié-a: ‘Sé chans, pou pòv yo nan léspri-a’. Yo pòv nan léspri-a tou, "rich" yo ki, dapré mézi pròp richès yo, pa sispann ‘konsakré pròp tèt yo’ yo minm minm, pou yo sèvi lòt yo’.

5- Konsa, légliz pòv yo ap palé tou dabò, avan tout bagay avèk moun nan, avèk chak moun, épi poutèt sa, avèk tout moun. Sé légliz tout moun. Légliz sé légliz mèvèy sakré Paròl la ki vi-n pran chè-a. Sé pa légliz pou klas oubyin yon sèl group. L-ap palé o non lavérité-a. Sé pou nou konsidéré chak réalité moun, chak injistis, chak sitiasion ki mélé, chak batay. Légliz pòv yo pa vlé sèvi sa-k lakoz sitiasion yo mélé, sa k-ap fè batay éklaté ant lèzòm. Sèl batay, sèl lagè légliz la vlé sèvi, sé bèl batay pou lavérité, avèk pou lajistis la, avèk batay pou vré kè pozé-a, batay sa-a koté légliz la ap soutni chak moun nan. Sou chémin sa-a, légliz la ap batay avèk épé paròl la, san-l pa ménajé ankourajman yo, min ni avètisman yo tou kèk foua yon fason sèvè (tankou Jézu-Kri té fè tou-a).

Anpil foua, li ménasé, li montré konsékans manti mal la. Nan batay sa-a k-ap fèt dapré lévanjil la, légliz pòv yo pa vlé sèvi intèrè politik nan tan l-ap viv la, ni batay pou pouvoua; an minm tan li mét gran antansion pou-l chèché fè yon fason pou yo pa sèvi avèk paròl li yo, avèk aksion-l yo, nan intèrè sa yo, pou yo pa fè yo sèvi kòm ‘instriman’.

Konsa légliz pòv yo ap palé ak moun nan, ak chak moun, ak tout moun. An minm tan, l-ap palé ak sosisiéte yo, ak sosisiéte yo nan tou sa yo réprézanté, avèk divès kouch sosisiéte-a, group yo, ak divès métié yo. L-ap palé tou avèk sistèm yo, avèk chapant sosisiéte yo, chapant òganizasion k-ap réglé késion byin sosisiéte yo, késion politik sosisiéte yo. L-ap palé langaj lévanjil la, l-ap éspliké-l tou nan limiè progrè sians lèzòm, min san-l pa mété bagay ki pa gin anyin pou yo ouè avèk léspri-l la, bagay ki pa nan lign léspri-l, bagay ki kontrè léspri-l. L-ap palé ak tout moun o non-Jézu-Kri, l-ap palé tou o non moun nan (an patikilié avèk sila yo pou ki non Jézu-Kri-a pa di tout bagay, pa déklaré tout lavérité sou moun nan, sa non Jézu-Kri sa-a ginyin-an).

Konsa légliz pòv yo di: "Fè tout bagay, nou minm sitou ki gin pouvoua désizyon-an, nou minm ki gin sitiasion tè-a nan min nou-an, fè tout bagay pou lavi chak moun nan péyi nou-an vi-n 'plis nan kondision moun', plis nan ran moun nou doué ginyin kòm moun".

Fè tou sa nou kapab pou falèz sa-a disparèt, o mouin moso pa moso. Falèz sa-a ki séparé sa-k rich anpil yo; ki yon ti pòsion-an, avèk gran foul pòv yo, sa k-ap viv nan mizè yo. Fè tou sa nou kapab pou falèz sa-a pa laji, min pou-l rétrési, pou nou maché nan diréksion égalité nan sosisiéte-a, pou séparasion byin yo ki fèt yon fason ki pa kòrèk la, li sédé dévan yon séparasion ki pi kòrèk.

Fè sa an konsidérasion pou chak moun ki prochin nou, ki nan minm péyi avèk nou. Fè sa an konsidérasion pou byin tout moun yo. Fè sa an konsidérasion pou nou minm, antan nou konsidéré sosisiéte ki kòrèk la, ki gin pou-l toujou vi-n pi kòrèk. Sé sosisiéte sa-a sèl ki gin démin-an dévan-l. Sosisiéte ki pa kòrèk la, ki pa gin lanbision pou démin-an, li éspozé sa l-ap vi-n tounin démin-an nan danjé. Konsa sonjé pasé-a, gadé jou jodi-a, protéjé sa tout sosisiéte nou-an gin pou-l vi-n tounin démin pi byin-an.

Tout bagay sa yo fèmin nan sa Jézu-Kri té di nan prèch sou mòn nan. Nan sa sèl fraz sa-a ginyin-an: "Sé chans pou pòv yo nan léspri-a, paské Ringn sièl yo pou yo".

*

Diznévièm dimanch la sé "vigilance". Lévanjil la (Lc 12,32-48) mandé pou nou véyé tankou mèt kay la ki konnin vòlè-a ap vini nan nuit. Réfrin Alélouya-a mandé pou rét véyé tou (Mt 24,42-44). Li édé préparé publikaion lévanjil la. Li santré atansion nou sou késion "véyé-a" Prémie

léktu-a raplé nuit Pak la koté Israèlit yo t-ap véyé-a (Sg 18,6-9). Vyé sé espéré, dapré Psòm-répons la (Ps 32/33,22).

*

Sin Piè di moun ki fèk batizé yo pou yo rét vif nan kè yo pou jé intéljans yo kléré (1 P 1,13), pou yo véyé sou sans yo, pou yo pa ba yo tou sa yo mandé, pou yo pa kite yo trinnin yo antan y-ap satisfè tou sa yo anvi, pou yo dévlopé espérans la nan yo osijè favè Jézu-Kri poté pou yo nan mésaj li dévoualé yo-a. Nan sans sa-a yon krétyin doué fè tankou Pèp Israël la nan nuit Pak la (Ex 12,11), antan-l rét kanpé nan nuit, ap véyé jan légliz kontinué ap fè chak nuit Pak la, sinti nan tay li, sandal nan piè-l, baton nan min-l, kòm si l-ap tann lòd pou-l pati sou rout. Lavi nou sou tè-a sé yon nuit Pak li yé. Sé lòd n-ap tann nan min Granmèt la pou nou dérapé (Sg 18,6). Sin Pòl di Éfézyin yo pou yo rét kanpé (Ep 6,14), pou sinti Vérité-a nan tay yo, pou chémiz an kui Jistis la protéjé léstomak yo, pou sandal aktivité misionè lévanjil lapè-a nan pié yo, pou zam défans lafoua-a nan min yo, pou kask délivrans la sou tèt yo, pou épé léspri-a, Paròl Bondié-a, nan min yo. Li ajouté pou yo viv nan lapriyé (Ep 6,18s), pou sé tout tan y-ap lapriyé nan léspri-a, pou yo véyé san rété. Jézu di sé lè nou pa konnin l-ap vi-n chèché nou (Lc 12,40). Sé pou sa nou blijé rét tann tout tan, kit li minuit, kit li touazè dimatin (Lc 12,28). Lèt ansiklik Pap Jan-Pòl II osijè léspri Sin-an (Dominum et vivificantem, Vatican, 18 mai 1986, nn 65-66) invité nou tann ané 2000 la nan lapriyé avèk souf léspri Sin-an, tankou premié patizan yo t-ap tann lapankot la, atan yo t-ap lapriyé nan kay chanmòt la ansanm avèk Mari Manman Jézu (Ac 1,14). Samuèl t-ap véyé, sé pou sa li té tandé voua Granmèt la ki rélé-l (1 Sm 3,4). Lèt Ébré yo mandé nou pran modèl sou Abraam, Izaak, Jakòb, Sara, tout zansèt nou yo nan lafoua (He 11,1-19), ki té konsidéré lavi yo sou tè sa-a tankou moun ki étranjé, k-ap vouayajé. Vré péyi yo, sé sièl la, koté yo t-ap dirijé rout yo.

N-ap mandé Manman Mari favè sa-a, pou-l fè nou rét fidèl ap véyé nan lapriyé, sou lòd léspri Sin-an, pou nou pa gin konduit instalé nan péché, ap bay sans yo tout satisfaksion yo mandé, pou minm si jé nou ap dòmi, kè nou rét véyé, jan Épouz Kantik dè kantik la di-a (Ct 5,2). Konsa nou pap tandé répròch Bondié fè pèp li-a, ki réfizé réponn li-a: "Puiské mouin rélé épi nou réfizé, puiské mouin lonjé min san pèsòn pa okipé-m, puiské nou néglijé tout konsèy mouin yo épi nou pa aksépté okinn nan rémak mouin yo, mouin minm tou m-ap pasé nou nan rizib lè nou nan tray la... Lè sa-a y-ap rélé-m, min mouin pap réponn; y-ap chèché-m, yo pap jouin mouin" (Pr

1,24-28; Is 65,2.12; 66,4; 50,2; Jer 7,13; Jn 12,36). Jézu di-n véyé, pa rét ap dòmi, l-ap vi-n kon vòlè, pinga nou rét ap dòmi.

*

Sé pou nou rét ap véyé. Nan nuit Pak la, nou abitué véyé. Sé manman tout vèy yo. Sé lè sa-a Granmèt la pasé pou-l fè rout avèk Pèp li. Tout lavi nou doué tankou yon nuit Pak. Véyé-a, sé pa pasé nuit san somèy nésésèman, sé véyé sou mové tandans nou, pou nou donté yo. Sé tout tan mové panchan nou vlé pran pié sou nou. Nou gin pou nou rézisté yo. Nou mèt fi-n pasé yon kontra avèk bouch nou pou nou fè "jé ouè, bouch pé", anvan jé bat, bouch gin tan louvri. Sin Piè té di Jézu tout moun mét lagé-l, li minm l-ap rété kanpé avèk li; kòk la pa-t ko chanté, li té gin tan bliyé promès li-a toua foua (cf Lc 22,31-34.54-62). Jézu di nou lapriyé pou nou pa tonbé nan pièj (Lc 22,40-46). Konsa, véyé, sé pi fò lapriyé (Mt 26,41). Lè moun ap fè vèy pou yon moun ki mouri, yo rélé vèy la "priyé". Donk véyé, sé priyé. Jézu fè nou konprann sa nan fason li palé, li di "sé pou nou véyé, sé pou nou lapriyé". Li akòdé vèy la avèk lapriyé-a. Sin Pòl di nou sé tout tan pou n-ap lapriyé, san nou pa sispann (Ep 6,18; Col 4,2-4; Rom 12,12; Lc 21,36; 18,1; 11.9ss; 1 Th 5,17). Sint-Ogustin intèprété sa nan sans pou nou anvi fè volonté Granmèt la. Toutotan anvi nou-an pa mouri, lapriyé nou-an vivan; paské lapriyé sé pa nésésèman palé anpil; tou sa n-ap fè kapab vi-n tounin lapriyé (Enarrationibus in psalmos, In Ps. 37,13-14: CCLI 38,391-392; cf Liturgia Horarum I, Vatican 1974, 242-242, vendredi 3^e sem. Avent, office de lecture). Lapriyé sé pa palé anpil, sé rinmin anpil (Sint Tèrèz davila). Konsa tou nan ninpòt ki sa n-ap fè, nou kapab véyé. La Trè Sint Vièj té toujou ap kalkilé Paròl Bondié-a nan fon kè-l. Sa-a sé lapriyé, sa-a sé véyé (Lc 2,19.51; 8,21; 11,28).

Gin dé foua nou prèt pou nou bay répons ki kapab blésé yon moun, minm si moun nan pa pi siséptib pasé sa. Nou viré lang nou sèt foua, nou pa di-l. Sé yon bèl laviktoua nou ranpòté. Nou montré nou konn sa sa vlé di véyé. Nan Psòm nan, nou mandé Bondié pou-l véyé sou po bouch nou, pou-l mét yon bariè pou nou pa kité ninpòt ki bagay sòti (Ps 141,3). Ak lang nou nou kapab fè anpil mal, minm jan ak minm lang nan nou sansé fè anpil byin, nou gin dévoua fè louanj Bondié (Jc 3,1-12).

N-ap mandé Manman Mari pou-l édé nou véyé sou po bouch nou pou-l édé nou respékté répitasyon prochin nou, pou nou pa rét gadé ti pay la nan jé frè nou-an, pandan gro bout boua-a ap avéglé nou-an, pou nou pa pran kòm métié ap vidé gaz sou difé, okontrè sé étinn pou nou étinn li ak dlo. Sé pou nou véyé sou lidé nou, pou nou pa kité ninpòt ki pansé antré vi-n fè nich nan

léspri nou; sé pou nou véyé sou jé nou, pou nou pa louvri fénèt nanm nou bay okazion péché; sé pou nou véyé sou zòrèy nou pou nou pa kite ninpòt ki konvèsasion glisé vi-n chita nan fon kè nou. Sé pou véyé sou mémoua nou, pou nou pa rét ap répasé bagay ki té déjà pasé lontan épi ki sèvi lokazion pou yo trinnin nou nan minm kalité péché lontan yo. Sé pou nou véyé sou imajinasion nou, pou nou pa rété ap joué ak pòtré n-ap fòmé nou minm minm anndan tèt nou. Sé pou nou véyé ki chémin n-ap pran pou nou pa alé koté nou pa t-a doué, pou nou pa glisé nan chémin k-ap pèdi nou. Sé pou nou véyé sou zanmi n-ap fè pou nou pa kite yo trinnin nou nan pièj dévègondaj. Jézu di misionè-l yo pou yo sinp tankou toutrèl, min tou pou yo malin tankou sèpan (Mt 10,16). Jézu di-n véyé, pa rét ap dòmi, l-ap vi-n kon vòlè, pinga nou rét ap dòmi. Sé nou ki konprann nou fò, nou sé tankou yon vié-pti pay, van k-ap pasé-a ap broté nou. Nou pa doué konprann nou fi-n rivé. Sé tout tan pou n-ap rékòmansé pran élan nan éfò n-ap fè pou nou véyé-a. Koté léspri Sin-an yé, sé kòmansman tout tan. Toujou gin kichòy nou pa-t ouè, nou bézouin. Sé pou nou véyé sou liv nou kapab li; gin dé liv, yo sanblé yo inosan sou tit la; min lè moun kòmansé antré nan sa yo rakonté-a, dé fil an égyi sé kòmisi sé nan yon antonoua dlo y-ap antré joutan yo angoufré. Sé pou nou véyé sou film nou t-a kapab gadé; nou pa doué di "n-apral nan sinéma", min sé pou nou di "n-apral ouè tèl film"; pran dévan pa anyin, sé konn larout ki tout. Sé pou nou véyé sou tan vakans nou. Nou pa doué mét Bondié nan vakans. Li toujou lè pou nou rinmin Bondié, li toujou tan pou rinmin Bondié. Sé Bondié ki rinmin an prémié (1 Jn 4,10). Si-l té pran vakans yon ti bout tan nan késion okipé nou-an, nou t-ap tounin la minm nan sa-k pa anyin-an. N-ap mandé Manman Mari favè sa-a pou tout lavi nou nou fè Bondié plézi antan nou rét ap véyé Mèt la kap rivé sot nan nòs, pou nou louvri ba li osito li frapé, pou nou pa fè tankou fiancé-a nan liv Kantik dè kantik la, ki tandé fiancé-l ap frapé, li rét ap di li fi-n lavé pié-l, li pap sal li ankò. Lòt la minm, lè-l tandé sa, l-al fè rout li. Li fè fi-a blijé lévé kouri nan tout lavil la, joutan li jouinn li apré anpil mizè (Ct 5,3ss). Bondié ap pasé, nou pa doué kite-l pasé san nou pa suiv li, paské l-ap pi difisil apré sa, si nou kite-l fi-n pasé. Jérusalèm pa-t rékonèt tan vizit li-a (Lc 19,44). N-ap mandé Manman Mari pou nou atantif, pou nou aprann rékonèt pasaj Granmèt la sou rout nou, tankou Abraam té rékonèt Granmèt la lè-l té pasé sou fòm toua Pèsonaj yo vi-n dévan papòt li-a, li té résévoua yo, yo té promèt li rékonpans nan pitit la yo té di yo t-ap fè-l ginyin-an (Gn 18,1-15).

*

Veiller: Ex 12,42; 23,30; Nb 4,16a.b; Dt 2,7; 32,11; Jos 1,7.8; 10,18; 1 Sm 26,15.16; 1 R 8,25; 14,27; 2 R 21,8; 2 Ch 6,16; 12,10; 33,8; Es 8,29; Jdt 7,5; Est 5,1a; 1 Mac 11,27; 2 Mac 3,39; 9,21; 15,2; Job 10,12; 21,32; 29,2; Ps 12,1; 66,7; 102,8; 127,1; 141,3; Pr 2,8.11; 4,6.23; 8,34; 13,3; 16,17; 27,18; Qo 5,7; Ct 5,2; Sg 6,15; 13,16; Si 1,29; 7,24; 12,11; 32,23; 33,16; 38,17; Jer 1,12; 31,28a.b; 44,27; Ba 2,9; Ez 34,16; Dn 9,14.19; Mt 24,42.43; 25,13; 26,28.40.41; Mc 13,33.34.35.37; 14,34.37.38; Lc 12,37; 21,36; Jn 17,12; 1 Co 16,10.13; 1 Th 5,15; 1 Tm 4,16; He 12,15; 13,17; 1 P 5,2.8; Ap 3,3; 16,15.

Veilleur: Ps 130,6a.b; Si 37,14; Is 21,11a.b.12; 29,20; 62,6; Jer 1,11; 31,6.

Veille: Ex 12,42; 14,24; Jg 7,19; 1 Sm 11,11; Jdt 8,6a.b; 12,5; 2 Mac 2,26; 8, 26; 15,36; Jb 17,2; Ps 63,7; 90,4; 119,148; Si prològ 31; 38,26.28.30; Lm 2,19; Ez 33,22; Mt 14,25; Mc 6,48; 15,42; Lc 2,8; 12,38; 2 Co 6,5; 11,27.

*

* *

VINTIÈM DIMANCH ÒDINÈ A

Lafoua madanm Kanaan-an (Mt 15,21-28) fè ouè kijan légliz la louvri pou tout nasion (Is 56, 1.6-7) "Kay mouin sé kay lapriyè pou tout pèp yo" (Is 56,7; Mt 21,13; Mt 1,11; So 3,9). Jézu ap fè konpliman pou lafoua kapitèn Romin-an ki té vi-n mandé-l géri pitit li-a. Jézu té di-l: "Ou mèt alé, pitit ou-a viv" (Jn 4,50). Kapitèn nan té kouè-l sou paròl. Pitit la té géri vré. Nan pié Koua-a, yon kapitèn Romin déklaré lafoua-l. Lè-l ouè jan Jézu mouri, li di: "Réyéman vré, sila-a sé té Pitit Bondié" (Mc 15,39). Sin Piè blijé batizé Kònèy, kapitèn Romin-an, ki té voyé chèché-l pou-l tandé mésaj Bondié-a Sézaré. Léspri Sin-an désann sou kapitèn nan, ansanm ak tout moun li yo, pou-l fòsé Sin Piè batizé yo (Ac 10,44s). Nan premié prèch Jézu té fè nan kay réyinion Nazarèt la, li té montré kijan vè Sarépta-a té obéyi Profèt Éli nan lafoua, ki fè fari-n li ak luil li pa-t janm fini joutan lapli té vi-n tonbé nan péyi-a (Lc 4,25; cf 1 R 17,6ss). Li montré tou kijan Naaman, jénéral Siryin-an, té obéyi Profèt Élizé, nan lafoua, ki fè li vi-n géri sot nan maladi lalèp li-a (Lc 4,27; cf 2 R 5,14). Jézu pa manké yon okazion pou fè louanj lafoua pèp déyò yo, pou montré **légliz la pa gin frontiè**. Lè-l té fi-n géri dis moun ki té gin maladi lalèp yo, sé yon sèl ki té tounin vi-n di-l mèsi. Li fè ouè sé yon Samaritin (Lc 17,16). Li montré tou kijan yon prèt Juif ak yon moun ki nan sèvis sakré nan ras Lévi-a, yo pasé bò kot yon Juif parèy yo ki té tonbé atè-a anba kou asasin, épi yo kontinué chémin yo. Min sé yon Samaritin an vouayaj ki proche sou li, ki okipé-l (Lc 10,33). Légliz pa gin frontiè. Anpil moun nan vil Samari-a té kouè nan Jézu, lè-l té fi-n palé ak madanm Samari-a sou bò pui-a (Jn 4,39), atèl pouin Samaritin yo té mandé-l pou-l rété kèk jou lakay yo (Jn 4,40). Époutan nan pròp péyi pa-l, li pa-t jouinn konsidérasion (Jn 4,44; Mt 13,57). Li vi-n lakay li, moun lakay li pa résévoua-l (Jn 1,11). Bondié té pasé kontra avèk Abraam, min sé pou-l té kapab vi-n papa tout pakèt nasion yo (Gn 17,4). Yo té prévoua yon lè ki t-ap rivé, tout pèp yo t-ap vi-n sou mòn Siyon-an pou yo kouté Paròl Bondié (Is 2,3; cf Ps 87,5). Profèt Malachi di: Koté solèy lévé jous koté-l kouché Non Granmèt la gran nan pami nasion yo, tout koté yo ofri sakrifis lansan ak kado ki pròp o non-l (MI 1,11). Légliz la gayé nan kat diréksion. Sé yon fanmiy. Jézu té di lè y-a lévé-l anlè sou Koua-a ak nan Sièl la, l-ap rédi tout moun ak tout bagay vi-n jouinn li (Jn 12,32).

Lè madanm Kanaan-an lapriyè Jézu, Jézu pa réponn anyin. Patizan yo sèvi intèmediè pou Jézu ba-l satisfaksion, pou madanm nan sispann ap rélé nan tèt yo. Jézu fè éspré li di sé pou pèp Israèl la li vini. Madanm nan rékòmansé lapriyè ankò. Jézu di: li pa kapab pran pin ti moun kay pou-l jété bay ti chyin. Madanm nan di sa pa fè anyin, y-ap manjé miyèt ki sot sou tab

la. Jézu blijé fè konpliman pou lafoua-l. La minm li géri pitit li-a, li chasé démon-an ki t-ap trakasé-l la (Mt 15,21-26). **Légliz pa gin frontiè**. Sin Pòl prezanté Romin yo pozision pèp Israël la (Rom 11,13-32). Akoz li kite moman vizit la pasé san-l pa rékonèt li (cf Lc 19,44), éritaj lafoua-a pasé nan min lòt nasion yo, jous lè dènié moman-an rivé. Pèp Bondié té chouazi-a réjté-l. Sé lòt nasion yo ki bénéfisié promès la. Sèvitè Granmèt la té tandé Bondié di-l: "Sa pa kont pou-ou sèvitè-m pou ou kapab drésé ras Jakòb yo, pou-ou fè ras Israël yo tounin, m-ap fè-ou vi-n tounin limiè nasion yo, pou délivrans mouin-an rivé jous nan bout tè-a" (Is 49,6s; cf Lc 2,32; Ac 13,42). Nan témouagnaj nou, nou kapab jouinn échèk koté Bondié voyé nou. Sa pa vlé di nou manké mision nou pou sa. Bondié vlé pou nou pa rété minm koté-a, min pou-n al sèvi-l témouin tou patou, paské **légliz la pa gin frontiè**. N-ap Mandé manman Mari pou nou aprann gadé pi louin paské koté n-ap travay la. N-ap mandé-l pou nou paré pou n-al sèvi Jézu témouin koté yo réklamé prezans nou, paské **légliz la pa gin frontiè**.

*

Lè Siméyon résévoua Jézu nan bra-l, li déklaré li sé limiè k-ap kléré **nasion yo** (Lc 2,32). Jézu réalizé mision sa-a Sèvitè Granmèt la té ginyin-an, lè-l té tandé Bondié di-l: "Sa pa kont pou-ou sèvitè-m pou-ou fè ras Israël la kanpé, m-ap fè-ou vi-n tounin limiè nasion yo, pou délivrans mouin-an rivé jous nan bout tè-a" (Is 49,6). Kananéyèn nan ki sòti nan péyi Tir ak Sidon, sé yon étranjé li yé parapò a pèp Israël la, koté Jézu t-ap fè mision-l yo. Sin Matié vlé montré nou Jézu pa vini pou Juif yo sèlman min pou tout pèp yo. Jézu ap di Juif yo: "moun ap soti nan diréksion solèy lévé ak nan diréksion solèy kouché, y-ap vi-n atab avèk Abraam, Izaak ak Jakòb, min nou minm, pitit kay yo, sé déyò n-ap rété" (Mt 8,11). Klé ki louvri pòt la bay Kananéyèn nan, sé **lafoua-l**; Jézu di-l: "Madanm, lafoua-ou gran anpil, sé pou sa fèt jan ou vlé-a" (Mt 15,28). Sé lafoua-a ki fè payin yo vi-n tounin pitit Abraam tout bon vré (Rom 9,7-8; Ga 4,21-31; Jn 8,35-40).

Kay mouin, y-ap rélé-l "kay lapriyé pou tout pèp" (Is 56,7). "**Étranjé** yo ki vi-n nan sèvis Granmèt la potèt non-l yo rinmin-an, épi ki vi-n tounin sèvitè-l, m-ap kondui yo sou mòn mouin-an ki sin-an" (ib). Lè Jan-Batis t-ap préché batèm pou paré chémin Jézu-a, li té di Juif yo pou yo pa konprann y-ap sové paské yo soti nan ras Abraam nan. Bondié kapab fè ròch yo vi-n tounin pitit Abraam (Mt 3,9). Sé pa kozé ras la ki konté, sé lafoua-a ki donnin frui. Sin Piè té gin yon vizion, sé té yon nap ki té désann sot nan sièl la, li té maré nan kat kouin-l, li té gin yon pakèt bèt laloua Juif la défann manjé. Yon voua di Sin Piè: "Touyé bèt sa yo, épi manjé!". Sin Piè réponn

li pa manjé bagay konsa dépi-l fèt. Toua foua sé minm bagay ki rékòmansé. Épi voua-a di Sin Piè: "Sa Bondié déklaré pròp, ou minm ou pa gin doua di li pa pròp" (cf Ac 10,1-48). Bondié té vlé fè-l ouè pou-l louvri pòt légliz la bay payin yo. Yon moman apré Sin Piè désann kay yon payin yo rélé Kònèy, épi léspri Sin-an fè-l batizé-l. Sin Pòl di Tit: "Tout bagay pròp pou moun ki pròp" (Tit 1,15). Jézu té di lè y-ap lévé-l anlè, l-ap rédi tout moun vi-n jouinn li (Jn 12,32). Sin Pòl ap fè nou konprann lanmò Jézu sou Koua-a krazé tout bariè ki séparé Juif yo ak payin yo (Ep 2,14ss). Bondié té di Abraam li t-ap vi-n tounin papa yon pakèt nasion (Gn 12,4). Sé lafoua-a ki fè payin yo vi-n pitit Abraam. Lè Jézu fi-n mouri sou Koua-a, sòlda Romin-an ki té nan pié Koua-a fè déklarasion lafoua-l, li di: "Rèyèlman vré, Sila-a sé té Pitit Bondié-a!" (Mc 15,39). Lè ofisié Romin-an té vi-n kot Jézu pou-l mandé-l gérizon pou sèvitè-l la, li té di li pa janm jouinn yon lafoua konsa nan Israèl. Jous jodi-a, anvan nou kominyin, sé minm paròl ofisié Romin sa-a nou abitué di, pou nou révéyé lafoua nou (Lc 7,1-10; cf Jn 4,46-54). Sin Pòl di nou Bondié fè kè-l sansib pou tout moun (Rom 11,32). Bondié vlé pou tout moun sovè, pou yo rivé nan konésans lavérité-a (1 Tm 2,4). Rut, fi ki té soti nan péyi Moab la, ki té vi-n Bétlèèm ansanm avèk bèlmè-l Noémi-an, li zansèt roua David (Mt 1,5; Rt 3,1-15; 4,18-22). Li té di Noémi, bèlmè-l: "Koté ou-apralé, m-apralé; Bondié-ou ap Bondié pa-m; pèp ou ap pèp mouin" (Rt 1,16). Jonas té réfizé al préché nan vil Niniv, li pa-t vlé pou étranjé sa yo, ki tè lènmi pèp Israèl, té rivé sovè. Bondié blijé-l alé, Bondié fè-l ouè li gin kè-l sansib pou tout pakèt foul moun sa yo ki pa-t ko résévoua mèsaj li-a (Jon 4,10-11).

Lè Jézu ap monté nan sièl, li mandé Apot yo pou y-al fè tout nasion yo vi-n tounin patizan, pou yo batizé yo, pou yo aprann yo sa-l té kòmandé yo (Mt 28,20). Kijan pou moun yo fè kouè, si yo pa préché yo Bòn Nouvèl délivrans la? Kijan pou yo fè préché yo, si pa gin pèsòn moun yo voyé pou sa? (Rom 10,14ss). Alafin chak mès, yo di nou: "Alé ak kè kontan". Sé pa pou nou kinbé mèsaj sa-a séré nan fon kè nou, sé pou nou séparé-l koté nou pasé. Sa-k kapab fè kè nou kontan si sé pa prézans Bondié nan kè nou? Sé prézans sa-a minm pou nou fè kléré sou rout nou, tankou yon flanbo. Sé pa sèlman kot zanmi nou ak fanmiy nou yo voyé nou; sé kot tout moun Bondié mété sou chémin nou. Nou pa gin pou nou chouazi koté n-apralé-a. Sé koté Bondié voyé nou, sé la pou nou alé. Sin Jan Krizostòm di sé pa nan dé vil Bondié voyé nou, ni nan dis vil, ni nan vin vil, ni nan yon kalité ras spésial tankou Profèt lontan yo, min sé sou tè-a ak nan lanmè, ak sou tout fas tè-a (Homélie en Mathieu, Hom 15,6,7: PG 231-232). Nou pa ouè nésèsèman rézilta mision nou. Sé planté n-ap planté, yon lòt ap rouzé, Bondié ap fè

plant la pousé. N-ap mandé Manman Mari léspri misionè sa-a, pou-n al préché tou patou rinmin Bondié-a, pou-n kléré kon solèy, pou-n limin kon difé, pou-n chofé sa ki frèt, ki chita nan fè noua péché-a ak lonbraj lanmò-a. Prochin nou, sé tout moun.

*

* *

VINTIÈM DIMANCH ÒDINÈ B

Jézu fè gran déklarasion sou sakréman lékaristi-a (Jn 6,51). Li di pin-an l-ap bay la, sé chè-l pou lavi tè-a. Sé konsa Sin Pòl transmèt nou paròl Jézu yo (1 Co 11,24) lè-l t-ap fè sakréman Kò ak San-l nan: "Sa-a sé Kò-m ki pou nou-an". Jézu pa di "kò" nan lévanjil Sin Jan-an, min li di "chè". Sa fè nou sonjé kijan "Paròl la vi-n tounin **chè**" ("sarx" σάρξ, li abité nan mitan nou" (Jn 1,14). Chè-a, sé Jézu ki vivan-an, min ki moun tankou nou, ki gin pou-l pasé nan lanmò-a tankou tout moun. Juif yo rékòmansé babié ankò (Jn 6,52): "Kòman-l fè kapab ba nou chè-l pou nou manjé?"; tankou Nikodèm ki pa-t konprann sans paròl Jézu ki t-ap di-l: sé pou-l réfèt yon lòt foua-a. Li té konprann sé lavi natirèl la ki pou rékòmansé (Jn 3,4); tankou Samaritèn nan ki pa-t konprann sous dlo lavi Jézu t-ap bay la, li té konprann sé dlo tankou tout dlo (Jn 4,11). Jézu sou yon lòt nivo, min yo minm yo sou yon nivo pi ba. Sé tankou lè Jézu té di patizan-l yo Laza ap dòmi-a, li t-ap palé osijè somèy lanmò-a, min yo minm yo té kouè li t-ap palé sou somèy natirèl la (Jn 11,11-13). Li sou yon plan ak Mat, min Mat minm réponn li sou yon lòt plan (Jn 11,23-24). Chè-a Jézu t-ap palé-a, Juif yo té konprann sé chè, tankou yon moso bout viann yo koupé, ki pa gin lavi ladan-l, ki pa gin léspri-a k-ap fè-l viv la. Jézu ap ba yo répons sou sa (Jn 6,63): "Sé léspri-a ki bay lavi, chè-a pa sèvi anyin". Donk lè Jézu ap palé késion chè-a, sa vlé di tout li minm, ni chè-a ni léspri-a ansanm, tout pèsòn li tout-antié k-ap mouri épi k-ap résisité. Sé konsa nan sakréman lékaristi-a, sé Jézu nèt ki la avèk kò-l, san-l, nanm li, natu Bondié-l. Juif yo pa konprann tou, paské lè yo di yon moun ap manjé chè yon lòt moun, sa vlé di l-ap touyé-l (Ps 27,2): "Lè méchan yo ap avansé pou yo manjé chè-m" (= pou yo touyé-m).

Jézu insisté, li présizé (Jn 6,53): "Si nou pa manjé chè **Pitit moun nan**. Pitit moun nan, sé yon pèsónaj koté sièl la ak tè-a rankontré (Dn 7,13-14), koté Bondié ak moun rankontré. Sé yon moun k-ap viv avèk bèlté Bondié-a. Konsa li sèvi intèmediè ant Bondié ak moun yo. Pitit moun sa-a sé Jézu li minm. Tout pèp Bondié-a ranmasé nan li (Dn 7,13-14), épi an minm tan tou li sé Bondié (Jn 1,51). Konsa Jézu fè ouè lékaristi-a sé li minm kòm Pitit moun nan (Jn 6,53). Si késion "manjé chè-a" révòlté Juif yo, késion "bouè san-an" pi révòlté yo toujou, paské laloua-a té défann yo bouè san-an, paské sé nan san-an lavi-a yé (Gn 9,4; Dt 12,16). "Chè-a ak san-an" sa vlé di tout lavi moun nan. Sé tout Jézu-Kri vivan yo résévoua nan lékaristi. Lavi Jézu-Kri yo résévoua nan lékaristi-a fè yo kapab lévé vivan (Jn 6,54-55). Lékaristi-a sé sakréman ki louvri sou dènié tan yo. Lè nou résévoua lékaristi-a, nou fè yon sèl avèk Jézu-Kri (Jn 6,56-57): "Moun ki manjé kò-m, ki bouè san-m, li rét nan mouin, mouin rét nan li" (cf Jn 17,21-23; 10,30.38).

Sin Pòl di (1 Co 10,16): Kalis la fè nou fè yon sèl avèk san Jézu-Kri. Pin-an fè nou fè yon sèl avèk kò Jézu-Kri. Sé sa yo rélé "kominion", sa vlé di "fè yon sèl ansanm". Minm jan Jézu fè yon sèl ak Papa-a (Jn 14,10; 5,21), konsa tou krétyin-an ki kominyin-an fè yon sèl avèk li. Jézu réprann (Jn 6,58) sa-l té di nan kòmansman-an (Jn 6,33): Pin ki désann sot nan sièl la, ki pa tankou lama-n nan ki té kité zansèt yo mouri-a; sa-a li, moun ki manjé-l pap janm mouri. Jézu rasanblé tout mèsaj la nan finisman diskou-a, minm jan li té rasanblé premié pati lansègnman-an lè-l té di (Jn 6,33): "Pin Bondié-a sé sila-a **ki désann sot nan sièl la**, ki bay tè-a lavi-a"; ak minm jan li té rasanblé dézièm pati lansègnman-an (Jn 6,51) lè-l té di: "Mouin sé pin vivan-an **ki désann sot nan sièl la**; moun ki manjé pin sa-a, l-ap viv pou tout tan. Épi pin-an m-ap bay la, sé chè-m pou lavi tè-a". Konsa touazièm pati lansègnman-an ak tout diskou-a nèt rasanblé (Jn 6,58) lè-l di: "Min pin-an **ki désann sot nan sièl la**, li pa tankou sa zansèt nou yo té manjé yo, yo minm yo mouri, moun ki manjé pin sa-a, l-ap viv pou tout tan".

Plis Jézu ap déklaré pi klè li sé pin vivan-an ki désann sot nan sièl la (Jn 6,51-59), sé plis Juif yo ap babié pi rèd, sé plis y-ap rékilé sou chemin lafoua-a. Aparans ki dévan yo-a avéglé yo. Yo pa réyisi dépasé sa yo ouè ak jé yo, pou yo antré nan sa yo pa ouè ak jé kò. Liv Provèb la (Pr 9,1-6) montré kijan lasajès drésé tab li, li mélanjé divin-an, li invité vi-n manjé pin, vi-n bouè divin pou moun kapab maché nan chemin Sajès la. Psòm nan di: "Gouté, n-a ouè kijan Granmèt la bon" (Ps 33/34). Vré manjé-a, vré bouason-an, sé Kò Jézu, sé San-l, sé lékaristi ki bay vré sajès la, ki pèmèt nou ouè limiè pou nou orianté démach nou nan lavi-a, pou nou chouazi chemin n-ap fè, pou nou pran diréksion ki fè Bondié plézi, minm si sa pa kadré avèk oriantasion lézòm, paské chemin Bondié louin ak chemin lézòm (Is 55,8).

*

Sa fè katriyèm dimanch dépi tèks lamès yo ap palé nou osijè lékaristi-a: 17^e, 18^e, 19^e, 20^e dimanch òdinè ané B. Pou 21^e dimanch la, sé dènié dimanch y-ap ba nou lansègnman sou pouin sa-a ankò. An-atandan, pou vintièm dimanch la, gin yon aspè **SAJES** ki dégajé nan tèks lamès la. Chè Jézu sé **vré** nouriti-a, san-l sé **vré** bouason-an (Jn 6,55). Sajès la abitué invité moun yo nan lansyin Téstaman pou yo pa pèdi tan yo ap chèché bagay ki pap satisfè yo (Is 55,2), min pou yo vi-n jouinn li (Si 24,19). Sé konsa nan premié léktu 20^e dimanch la, liv Provèb la di Sajès la paré divin-l, li drésé tab li, li voyé fè invitasion pou yo vi-n manjé pin-l, pou yo vi-n bouè divin-l, pou yo kapab jouinn sajès ak intélijans (Pr 9,1-6). Psòm-répons la fè

invitation tou pou moun yo vi-n résévoua lanségnman k-ap ba yo krint Granmèt la (Ps 33/34,12). Krint Granmèt la sé kòmansman Sajès la, sé prinsip Sajès la (Ps 111,10; Pr 1,7; 9,10; 15,33), sé kouròn Sajès la tou (Si 1,18), sé Sajès la li minm (Si 19,20; Jb 28,28). Sajès la pèmèt nou rékonèt **Vérité** ki kaché anba sign nan. Jézu sé Sajès. Li sé **vré** pié rézin-an (Jn 15,1), li sé **vré** limiè-a (Jn 1,9), li sé **vré** Pin-an (Jn 6,32.55). Konsa, nou gin pou nou aprann fè diférans ant manjé k-ap pasé ak manjé k-ap diré tout tan-an, jan Jézu té déjà mandé nou nan minm diskou-l la (Jn 6,27). Sin Pòl ba nou léson Sajès nan dézièm léktu-a (Ep 5,15-20), lè-l di nou pou nou pa viv tankou moun fou, min tankou moun ki gin **sajès**, pou nou pa kondui tèt nou san réfléksion, pou nou kite **léspri Sin-an** plin nou. Pasaj liv Provèb nou li nan lamès 20^e dimanch la (Pr 9,1-6) fè nou sonjé dé premié sign yo Jézu té fè nan kòmansman lavi piblik li, dapré sa Sin Jan rapòté nou: Sé **divin** li bay nan nòs Kana-a (Jn 2,1-12) épi sé **Tanp** la li nétouayé Jérusalèm nan (Jn 2,13-22). Liv Provèb la di Sajès la bati **Kay** li (= Tanp la), li paré **divin-l** (Pr 9,1). Tout lévanjil Sin Jan-an montré nou Jézu sé Sajès. Lè l-ap palé ak Nikodèm, li fè-l konprann kijan sé li minm sèl ki désann sot nan sièl (Jn 3,13) pou-l rémonté antan-l pasé sou Koua-a (Jn 3,14), pou-l dévoualé nou sa k-ap pasé anro-a (Jn 1,18). Nan konvèsasion-l ak Samaritèn nan, li ofri-l dlo Sajès la (Jn 4,13-14; cf Si 24,21; 15,3). Sé sign léspri Sin-an l-ap bay sou Koua-a (Jn 7,37; 19,34). Li sé limiè Sajès la k-ap kondui avèg yo (Jn 9,5; 8,12), k-ap bay avètisman pou pa kite trò ta baré nou (Jn 12,35-36; Sg 7,30). Sajès la sé don léspri Sin-an ki pèmèt nou gouté afè Bondié, pou nou ba yo premié plas nan lavi nou. Minm jan lè Bondié ap ba nou fòs li, li kòmansé fè nou santi féblès nou, minm jan lè l-ap ba nou konsèy li, li fè nou santi ézitation nou, minm jan lè l-ap ba nou intéljans li, li fè nou santi fènoua nou, sé konsa lè l-ap ba nou Sajès li, li fè nou santi kijan nou pòv, nou tou piti, nou pa anyin. Juif yo pa-t kapab résévoua sajès sa-a paské yo té konprann yo konnin tout bagay. Y-ap babié, yo di yo rékonèt Jézu, yo konn papa-l ak manman-l; dépi kilè sé nan sièl li soti-a, épi kijan pou-l fè bay kò-l pou manjé-a (Jn 6,42.52). Yo té trò satisfè ak konésans yo pou yo té kapab résévoua sajès Jézu-a. Lògèy konn gonflé nou yon fason nou fèmin tout pòt nou pou anyin pa antré. Don léspri Sin yo, sé pòt ki louvri sou lavi Bondié-a ki pa gin limit la, pou gran van léspri Sin-an antré nan yo. Sé voual batiman-an ki isé byin ro, ki déplouayé byin laj pou van léspri Sin-an pousé batiman-an sou dlo-a ak gran vitès, san difikilté. Sé trou ki fouyé nan miray la pou résévoua boulon-an k-ap fiksé étajè-a. Bondié édé intéljans nou fè "acte de foi", antan-l ba-l yon kou-d-min ak don intéljans. Li édé volonté nou fè "acte de charité" antan-l ba-l yon kou-d-min ak don fòs. Sé konsa li édé nou plonjé jous anndan fon

mèvèy sakré-l, antan-l ba nou yon kou-d-min ak don Sajès. Lékaristi-a sé yon nouriti **Sajès** k-ap ba nou gou pou bagay Bondié. Gin moun ki pa aprésié bagay Bondié yo nan vré valè yo. Yo toujou konprann sé yon konkirans afè Bondié ap fè avèk afè lèzòm. Yo mét nan lidé yo sé yo minm ki pou chanjé fas tè-a ak pròp fòs yo. Yo san souf pou ap mét bouch yo nan tout kozé. Yo pa pran tan konsidéré sé instriman yo yé nan min léspri Sin-an, pou yo dévlopé souplès yo nan min-l. Jézu invité nou manjé chè-l, bouè san-l, ki vré nouriti nou ak vré bouason nou, tankou Sajès la fè-a (Is 25,6; 55,1-5; Mt 22,1-14). Gin anpil moun ki pa réponn invitation sa-a. Yo pito al okipé afè pa yo (Mt 22,5). Époutan sakréman lékaristi-a, sé yon mèvèy sakré ki gran anpil. Sa mandé lafoua pou nou aprésié valè-l. Sé lafoua sa-a n-ap mandé Manman Mari, Nòtre-Dam de la Sajès, pou nou konsidéré lékaristi-a kòm kouròn lavi nou. Minm jan Sajès la di: "Si nou manké sajès, **vi-n jouinn mouin** (Pr 9,4), konsa Jézu di: "**Vi-n jouinn mouin**, nou tout k-ap rédi, k-ap plouayé anba gro chaj, m-ap ba nou soulajman" (Mt 11,28). Sajès la fè chaj nou vi-n pi lèjè, li fè nou évité dépansé fòs nou pou granmési (Is 55,2).

Si lékaristi sé nouriti Sajès, chémin koté li kondui-a, sé chémin **Koua**-a, paské Sajès Jézu-a sé sou Koua-a li pasé, dapré sa Sin Pòl di Korintyin yo (1 Co 1,17-25). Lè Pè-a fi-n fè konsékrasyon pin-an nan Kò Jézu ak divin-an nan San Jézu, li di "Ala yon bèl mèvèy, nou pa kapab konprann, min nou kouè". Nou réponn: "N-ap anonsé lanmò-ou, Granmèt, n-ap déklaré ou lévé byin vivan, n-ap tann ou rétonin nan bèlté-a". Yo pa kapab séparé sakréman sa-a ki fèt jou Jédi Sin-an avèk lanmò Jézu ki rivé jou Vandrédi Sin-an. Nouriti Sajès la, li gin gou lakoua. Moun ki manjé Kò Jézu, ki bouè San-l, li rété nan Jézu, Jézu rété nan li. Sé konsa liv Kantik dè kantik la di: "Fiansé-m nan sé pou mouin li yé, épi mouin pou li" (Ct 6,3). Sé konsa Jézu di tou: "Mouin konnin mouton-m yo, mouton-m yo konnin-m tou" (Jn 10,14). Nòs la sé sou kabann lakoua-a li fèt. Ni lè Jézu bay sign divin nan nòs Kana-a (Jn 2,1-12), ni lè li bay sign Tanp la li nétouayé Jérusalèm nan (Jn 2,13-22), pou-l montré li sé Sajès liv Provèb la palé-a (Pr 9,1), sé randé-vou li bay nan pié lakoua-a. Li di Manman-l lè-l pa ko rivé, sa vlé di lè Koua-a (Jn 2,4; 7,30; 8,20; 12,23; 13,1; 17,1; 19,27). Li di: krazé tanp sa-a, nan toua jou l-ap bati-l, toua jou l-ap pasé anba tè-a (Jn 2,19; Mt 16,21; 20,19). Sajès la soti nan sièl, li désann sou tè-a, li rémonté nan sièl la antan-l pasé sou Koua-a (Jn 3,13-14; Jb 28,1-28; Pr 30,4; Sg 9,1-18; Ba 3,9-38). Si y-ap chèché anilé plas Koua-a nan chémin Sajès la, sé lévanjil la minm y-ap éséyé anilé (1 Co 1,21). Lékaristi sé nouriti sajès ki gin gou lakoua.

Sajès la bati kay li, li drésé tab li. Li bati kay li: sé Tanp la. Li drésé tab li pou-l paré pin-an ak divan-an. Jézu sé Sajès sa-a. Ni kay la, Tanp la, sé pròp Kò-l; ni manjé-a, pin ak divin-an, sé pròp Kò-l ak San-l. Li sé Tanp la, li sé Nouriti-a. Gin rélation ant Tanp la ak Nouriti-a. Gin rélation ant légliz ak lékaristi. Légliz fè lékaristi, lékaristi fè légliz. Chak foua Pè ap fè lamès, sé légliz k-ap fè lékaristi. An minm tan tou sakrèman lékaristi-a nouriti lavi légliz la, li dévlopé-l. Yo pa séparé légliz ak lékaristi; yo pa séparé lékaristi ak légliz. Yon légliz ki pa t-a fè lékaristi, li t-ap séché. Yon lékaristi ki t-a fèt an déyò rélation avèk légliz, li t-ap pèdi fòs lavi-l. N-ap mandé la Trè Sint Vièj Mari, Manman légliz, Nòtre-Dam de lékaristi, pou-l ba nou sans rélation sa-a ki ginyin ant légliz ak lékaristi-a, pou nou konsidéré légliz la nan nouriti sa-a k-ap ba-l lavi-a, pou nou pa anvizajé lékaristi-a san rapò avèk légliz la, koté sous li yé-a. Lékaristi fè légliz, Légliz fè Lékaristi. Rélation ant yo dé-a, sé rélation Sajès la. Sé minm Jézu-Sajès la ki bati **kay** li, sé minm Jézu-Sajès la ki drésé **tab** li (Pr 9,1). Kay la pa alé san tab la. Tab la pa alé san kay la. Yo tou lé dé sé pròp Kò Jézu. Sé Jézu ki vré Tanp la, sé Jézu ki vré nouriti-a. Yon foua nou gin Sajès sa-a pou nou ouè afè Bondié avèk jé léspri Sin-an, nou pap séparé sa ki fèt pou alé ansanm.

Fòs pa sanblé alé ak dousè, min Sajès la fè yo alé ansanm. Fènoua pa alé ak limiè, min Sajès la fè nannuit nou ouè klè. Brouyay jinnin trankilité nou; min Sajès la fè nan kont nou rét kalm. Tray troublé éspérans nou; min Sajès la ankourajé nou travèsè difikilté yo. Dout fébli asirans nou; min Sajès la fè nou pasé anlè. Brui anpéché nou réfléchi; min Sajès la fè léspri nou travay anndan fon kè nou. Van pa kité nou kanpé douat; min Sajès la fè nou rézisté. Chalè fè nou anvi répozé anba lonbraj pou ralanti mach nou; min Sajès la fè nou avansé. Bariè pikan jinnin nou; min Sajès la ba nou kouraj. Laront rabésé préstij nou; min Sajès la lévé tèt nou. Frédi angoudi nou; min Sajès la chofé nou. Niaj fè nou pèdi rout nou; min Sajès la montré nou chémin-an. Souaf séché nou; min Sajès la fè nou jouinn sous dlo. Dòmni fèmin pòpiè nou; min Sajès la louvri jé kè nou. Mòn krazé fòs nou; min Sajès la ba nou souplès. Ròch ralanti kous nou; min Sajès la fè nou vòltijé. Koté Sajès la yé, li drésé sa-k krochi, li chofé sa-k frèt, li soutni sa-k fébli, li fè sa-k bouké répozé, li rafréchi sa-k cho, li ankourajé sa-k nan lapinn, li lavé sa-k sal, li rouzé sa-k sèk, li géri sa-k blésé, li fè sa-k rèd vi-n mou. Yon moun ki gin dévotion aléga lékaristi, ki fidèl nan randé-vou Sajès la ki invité-l vi-n manjé pin li paré pou li-a, ak divin li mélanjé pou li-a, moun sa-a ap travèsè tout soua-dizan kontrariété. L-ap dépasé aparans pou-l gadé jous anndan fin-fon réalité-a. L-ap dékouvri sa sign nan vlé di. Li pap bloké dévan bagay ki sanblé yo pa alé ansanm. Okontrè plis li ouè yo

sanblé pa alé ansanm, sé plis l-ap gin kouraj pou-l fonsé. Sèkè Sajès Bondié-a sé pa sajès lézòm. Lézòm jijé sou laparans, Bondié jijé nan fon kè. N-ap mandé Manman Mari pou-l fè nou fidèl kominié chak jou, nan mézi nou kapab, pou nou gin gran respè pou prézans Jézu-Kri sou aparans pin ak divin-an, k-ap nourir nou pou nou fè yon sèl avèk li, pou ba nou lavi k-ap diré tout tan-an.

Sa fè 4 dimanch dépi légliz ap ba nou lansègnman sou lékaristi. Nan 17^e dimanch la, sé Jézu **Bon Gadvin**-an k-ap nourir mouton-l yo, k-ap fè yo répozé koté zèb la fré-a (Jn 6,1-15; 2 R 4,42-44). Nan 18^e dimanch la, sé invitation pou nou **chèché**-l koté nou kapab jouinn li (Jn 6,24-35; Ex 16, 2-15). Nan 19^e dimanch la, sé fòs nou jouinn nan **Viatik** la pou nou maché sou rout la (Jn 6,41-51; 1 R 19,4-8). Nan 20^e dimanch la **sé Sajès la** ki ba nou nouriti k-ap fè nou gin bon konprann (Jn 6,51-58; Pr 9,1-6). Nan 21^e dimanch la, sé **Désizion** nou gin pou nou pran nan kalfou-a, antan nou chouazi Jézu ak lafoua nou, tankou Apot yo fè-a, pandan foul Juif yo ap lagé-l youn apré lòt, ofi-a-mézi lansègnman-l nan ap dépasé kapasité yo, minm jan Jozué mété pèp la dévan obligasion pou-l fè désizion pou Granmèt la oubyin pou zidòl yo (Jn 6,60-69; Jos 24,1-18). N-ap mandé Manman Mari pou lansègnman lékaristi-a 5 dimanch sa yo ba nou-an profité nou pou nou rénovlé angajman nou parapò a égzijans nou ginyin aléga Jézu, **Bon Gadvin** nou (17^e dimanch), **Sous Réfléksion** nou (18^e dimanch), **Rout** nou (19^e dimanch), **Sajès** nou (20^e dimanch), **Désizion** nou (21^e dimanch). N-ap mandé Manman Mari pou nouriti Sajès lékaristi-a fè nou trouvé Koua Jézu-a léjé kon pay, jan-l ba nou asirans la: "Vi-n jouinn mouin, nou tout k-ap rédi, k-ap plouayé anba gro chaj, m-ap ba nou répo; pran chaj mouin mété sou zépòl nou, **pran léson sajès** nan min-m, mouin tou dou, mouin tou pòv nan kè-m, n-a jouinn répo pou nanm nou (Mt 11,28-29).

*

Pasaj prèch Jézu sou lékaristi pou vintièm dimanch òdinè B-a, (Jn 6,51-58), liv Provèb la vidé yon bèl limiè sou li (Pr 9,1-6), antan-l di: "Vini, manjé nan pin-m nan, bouè nan divin-an mouin paré-a (Pr 9,5). Pap Jan-Pòl II di nan lèt ansiklik li té ékri osijè la Trè Sint Vièj Mari pou ané marial la (Redemptoris Mater No. 44): **Mari kondui fidèl yo nan lékaristi**. Vini, manjé nan pin-m nan, bouè nan divin-an mouin préparé-a. Nan lékaristi-a, Jézu prézan nan vré Kò li, ki fèt sot nan la Trè Sint Vièj Mari: "Ave, **verum corpus, natus de Maria Virgine**": Salu, vré Kò ki fèt sot nan la Vièj Mari. Pap Jan-Pòl II di: "A juste titre, la piété du peuple chrétien a toujours vu un **lien profond** entre la dévotion à la Sainte Vierge et le culte de l'Eucharistie"

(RM 44). La Trè Sint Vièj Mari sé Manman nou; avèk légliz, nan légliz, l-ap nourri lavi-nou. "Vini, manjé nan pin-m nan, bouè nan divin-an mouin préparé-a". La Trè Sint Vièj sèvi intèmediè k-ap dispozé kè nou pou nou résévoua Jézu, nan lanségman-l ak nan manjé-l. "Ninpòt ki sa-l di nou, sé pou nou fè-l" (Jn 2,5). "Vini, manjé nan pin-m nan, bouè nan divin-an mouin préparé-a". La Trè Sint Vièj sèvi intèmediè pou nou résévoua Jézu-Kri Paròl, pou nou résévoua Jézu-Kri Kò ak San. Pap la di: Intèvansion-l, sé yon "**médiation maternelle**". Li sé Manman Jézu-Kri ki premié Pitit nan pami kantité frè yo (Rom 8,29). "Marie conduit les fidèles à l'Eucharistie" (RM 44). "La piété du peuple chrétien a toujours vu un **lien profond** entre la dévotion à la Sainte Vierge et le culte de l'Eucharistie" (RM 44). Jézu di: "Moun ki manjé Kò-l, ki bouè San-l, li gin lavi ki pap janm fini-an, li minm l-ap fè-l lévé vivan nan dènié jou-a ak tout kò-l (Jn 6,54). La Trè Sint Vièj déjà rivé nan bout rout sa-a, li nan Sièl ak tout kò-l (Ap 12,1; cf RM 47). "L-ap édé tout pitit li yo (...) pou, nan Jézu-Kri, yo jouinn rout ki kondui lakay Papa-a", jan Pap la di nan lèt ansiklik li-a (Rm 47). "Marie, fille de Sion par excellence, aide tous tes fils --- où qu'ils vivent et de quelque manière que ce soit --- **à trouver dans le Christ la route qui conduit à la maison du Père.**" Pèp Bondié-a ap tonbé, l-ap chèché lévé, sou rout pèlerinaj li-a, jan nou chanté nan "Alma Redemptoris Mater" la (Manman Sila-a ki délivré nou-an) (RM 51). L-ap fiksé jé-l sou Mari, zétoual lanmè-a (RM 6,51), sign espérans ki asiré-a (cf Rom 5,5) ak sign konsolasion-an (RM 50; LG 68), pòt Sièl la ki toujou rété louvri-a (RM 51), jan "Alma Redemptoris Mater" la di-a. Pèp la ap avansé antan l-ap tonbé, l-ap chèché lévé. Sèkè l-ap avansé nan pèlerinaj li-a, jan Sint Ogustin di-a: "à travers les **persécutions** du monde et les **consolations** de Dieu" (De Civitate Dei, XVIII, 51: CCL 48, 650, RM 25; LG 8). Sé yon rout an zigzag, jan liv Ékléziastik la di-a (Si 4,17s), ki pasé nan "**nuît lafoua**" (RM 17), dapré paròl Sin Jan-d-la-Koua (Montée du Carmel 1. II, ch 3, 46), tankou yon voual ki dévan jé nou, antan n-ap proche tout tan pi pré Sila-a yo pa kapab ouè-a, pou nou viv pi fon nan mèvèy sakré-l yo (RM 18). La Trè Sint Vièj sèvi nou modèl, antan chémin-l kouazé ak chémin légliz nan lafoua (RM 26). Dépi nan kòmansman, légliz t-ap gadé Mari nan figi Jézu, li t-ap gadé Jézu nan figi Mari (RM 26). Sé pou sa ròl Mari-a, Pap la rélé-l "**une médiation dans le Christ**" (RM 38; LG 60; 1 Tm 2, 5ss). Sin Monfò té insisté sou pouin sa-a. Nan finisman Lèt ansiklik li-a, Pap la palé osijè Sin Monfò antan-l di: "J'aime à ce propos évoquer, parmi de nombreux témoins et maîtres de cette spiritualité la figure de Saint Louis Marie Grignon de Montfort, qui proposait aux chrétiens la consécration au Christ par les mains de Marie comme un moyen efficace de vivre fidèlement les promesses du

baptême. Je constate avec plaisir que notre époque actuelle n'est pas dépourvue de nouvelles manifestations de cette spiritualité et de cette dévotion" (RM 48). Lè Sin Monfò vlé montré kijan la Trè Sint Vièj Mari rinmin nou, li di: "rinmin ki nan kè tout manman yo, yo t-a mèl mèté yo ansanm nan kè yon sèl manman pou yon sèl pitit, yo pa kapab rivé sondé profondè rinmin la Trè Sint Vièj ginyin pou chak moun nan nou. "Mettez, si vous pouvez, l'amour de toutes les mamans dans le cœur d'une seule mère pour son fils unique. Certainement, cette maman aimerait beaucoup cet enfant. Il est vrai que Notre-Dame aime encore bien plus chacun d'entre nous que cette mère n'aimerait son enfant" (Vraie Dévotion, n. 202).

Ant la Trè Sint Vièj Mari avèk nou vi-n gin yon rélasyon spésial Pap la rélé "**une communion de vie**" (RM 45, nòt 130), nan mézi nou fè jès Sin Jan té fè vizavi-l la, nou pran-l kòm byin pèsònèl nou, jan Pap Jan-Pòl II di nan lèt ansiklik li-a (RM 45): "En se livrant filialement à Marie, comme l'Apôtre Jean, le Chrétien reçoit parmi ses **biens personnels** la Mère du Christ et l'introduit dans tout l'espace de sa vie intérieure, c'est-à-dire dans son "moi" humain et chrétien. Il l'accueillit chez lui". Sint Ogustin éspliké: "Il l'accueillit chez lui, non pas dans son domaine, car il ne possédait rien en propre, mais il lui donna place parmi les responsabilités auxquelles il se consacrait avec cœur" (In Ioan. Evang. Tract. 119,3: CCL 36, 659; cf RM 45, n.130). Gras a "communion de vie" sa-a, la Trè Sint Vièj kondui nou nan lékaristi: "**Vini manjé nan pin-m nan, bouè nan divin-an mouin préparé-a**" (Pr 9,5).

Mari, ban mouin nouriti-a ou t-ap préparé-a nan kay Nazarèt la Moun ki manjé nan pin sa-a, l-ap gin lavi nèt alé.

*

* *

VINTIÈM DIMANCH ÒDINÈ C

Dènié tan-an, difé ap vi-n séparé, ap vi-n nétouayé sila yo ki gin pou yo antré nan ringn nan. Jézu kòmansé ap plonjé nan soufrans sa-a li minm (Ps 124, 4-5; Lc 10, 34-36.38). Patizan-l yo gin pou yo suiv li nan chémin lakoua sa-a. Li té promèt kè pozé (Lc 1, 79; 7, 50); min sé pa nan konpromision avèk tou sa-k pa bon. Yo t-ap tann yon Mési politik k-ap vi-n bay byin tè-a. Sé yon Mési k-ap souffri yo jouinn, épi ki invité patizan-l yo suiv li sou rout Koua-a. Sin Pòl di: Yon sèl bagay mouin vlé konnin nan pami nou, sé Jézu-Kri ki klouré sou Koua-a (1 Co 2, 2; Ga 3, 1; 6, 14). Sé li minm pou chak Krétyin chouazi pèsònèlman, pou-l bay lavi-l yon sans, pou-l pa suiv chémin mové profèt k-ap anonsé chémin kè pozé dapré prinsip tè-a, min pou-l pran chémin k-ap monté nan dirksion Gòlgota, pou-l débouché nan sièl la.

Min yon prèch Pap Jan-Pòl II té fè pou jèn yo premié juiyè 1980 nan Brésil, BELO HORIZONTE:

"1. Nou pap sézi si Pap la kòmansé prèch sa-a antan-l fè yon déklarasion ki soti nan fon kè-l. Mouin té li anpil foua kijan Péyi nou gin plis pasé mouatié moun li yo ki gin mouins pasé vinsinkan. Dépi-m rivé Brazilia, koté-m pasé, mouin ouè anpil figi jèn, mouin pa kapab konté yo; lè-m rivé nan vil sa-a, mouin pasé nan mitan yon pakèt jèn jan; lè-m ouè nou, nou minm jèn yo, si tèlman anpil, alantou lotèl sa-a, mouin avoué mouin konprann pi byin, apati sa-m ouè ak jé-m nan, sa-m té aprann ak léspri-m. Mouin kouè mouin vi-n konprann pi byin tou pouki rézon Évèk Pouébla yo ap palé sou préférans nou doué ginyin san nou pa ouété pèsòn nan kè nou, min nan sans premié plas pou nou bay- pou jèn yo.

Préférans sa-a vlé di légliz la pran angajman pou-l anonsé jèn yo méyaj libérasion-an nèt tout tan. Sé méyaj délivrans la l-ap kouté nan bouch Sovè-a li minm épi li gin pou-l transmèt yon fason ki fidèl nèt.

2. Nan Mès sa-a mouin fè nan mitan nou ak kè kontan-an, nan intansion nou-an, méyaj la parèt avèk sa-l ginyin ladan-l ki pi inpòtan nan léktu nou sot kouté yo.

" Fè dévoua nou, obsèvé jistis la", sé sa profèt Izayi invité nou fè, avèk yon fòs ki pa fébli, dépi dé mil sinksan (Is 56, 1). Li ajouté: anlè tout bagay, nou gin pou nou "rété fèm nan kontra-a", sa Bondié signin avèk

moun nan. Sé yon invitasion pou nou douat, pou nou fidèl, yon invitasion ki touché jèn yo byin pré.

Nan lèt Pòl ékri krétyin Korint yo, gin yon paròl ki rich, ki bay konviksion, jan paròl gran Apot la abitué yé-a: si yon moun vlé bati lavi-l, pa gin dèt fondasyon pou mété pasé sa-k pozé déjà-a: Jézu-Kri (1 Co 3, 10). Li té konnin sa-l t-ap di, Pòl sa-a. Lè-l té jèn, li té pèsékité légliz li-a. Min té vi-n gin chémin Damas la, yon jou, rankont sa-a li pa t-ap tann nan avèk Jézu-Kri li minm minm nan. Épi sé témouagnaj pròp lavi pa-l ki fè-l di-l: pa gin dèt fondasyon yo kapab mété. Li tan pou mété Jézu kòm fondasyon pròp égzistans la. Nan lévanjil Matié ki sin, paj sa-a pèsòn pa li san kè soté-a chak foua li réprann li-a: "Ki sa-m yé pou lòt yo?" dapré sa Jézu mandé Apot yo. Apré yo fi-n transmèt yon pakèt opinion, sé késion ki pi inpòtan-an: "min pou nou minm, ki sa-m yé?" Nou tout, nou konnin moman sa-a, koté sa pa kont pou palé osijè Jézu, antan n-ap répété sa lòt yo té di, nou blijé di sa nou pansé, sa pa kont pou nou sité yon opinion, nou doué bay yon témouagnaj, nou doué santi témouagnaj la angajé nou, épi apré sa, nou doué alé jous nan bout égzijans angajman sa-a. Pi bon zanmi yo, sa-k suiv li yo, Apot Jézu yo, sé toujou sila yo ki té santi yon jou, anndan fon kè yo, dènié késion sa-a yo pa kapab évité-a, késion ki fè tout lòt yo pasé apré-a, ki fè tout lòt yo dévié-a: "Pou ou minm, ki sa-m yé?". Lavi, déstiné-a, istoua koulié-a ak istoua apré osijè jèn nan, yo réglé sou répons nèt, sinsè, san fraz, san kachotri, li kapab bay késion sa-a. Li déjà chanjé lavi anpil jèn.

3. Sé nan mèsaj sa yo Paròl Bondié-a ofri-a, mouin t-a vlé pran mèsaj spésial la m-ap kité pou nou nan rankont sa-a, ki pèmèt mouin santi kijan nou anvizajé égzistans nou yon fason sérié.

Pi gran richès Péyi sa-a, ki rich anpil la, sé nou minm. Vré avni péyi sa-a, ki yon péyi pou démin, sé nan sa nou yé koulié-a li kaché. Sé poussa Péyi sa-a, épi avèk li, légliz la, ap gadé nan dirèksion nou antan l-ap tann, l-ap espéré. Nou louvi nan dimansion moun nan parapò a sosiété-a, nou pa kaché volonté nou ginyin pou nou chanjé rasi-n òganizasyon sosiété-a nou ouè ki pa kòrèk. Nou di, épi nou gin rézon, li pa posib pou nou gin kè pozé, lè nou ouè yon pakèt frè ki pa gin pi piti okazion pou yo gin yon égzistans nan kondision moun. Nou di sa pa nòmral pou kèk moun ap gaspiyé sa-k manké sou tab lòt moun yo. Nou désidé bati yon sosiété ki kòrèk, ki lib, ki rapòté, koté tout moun avèk chak moun kapab joui avantaj progè-a.

4. Lè-m té jèn, mouin té viv nan minm konviksion sa yo. Mouin té kléronnin yo, kòm jèn èlèv, nan sa-m ékri avèk nan sa-m chanté. Bondié té

vlé pou konviksion sa yo té tranpé nan difé yon lagè ki té rèd anpil, ki pa-t ménajé fanmiy mouin. Mouin té ouè kijan konviksion sa yo té foulé anba pié, anpil fason. Mouin té pè anpil, lè-m ouè yo éspozé nan gran van. Yon jou, mouin désidé pou-m mété yo an fas Jézu-Kri: mouin vi-n pansé sé li minm sèl ki té kapab dévoualé-m vré sa-k nan yo avèk vré valè yo, pou-l protéjé yo kont sa-m santi ki t-apral détrui yo sètènman.

Tou sa, éspérians sa-a ki té térib la, ki gin anpil valè-a, li aprann mouin kijan jistis sosiété-a vré sèlman si fondasion-l chita sou doua chak moun an patikilié, épi doua sa yo, y-ap rékonèt yo tout bon vré sèlman si yo rékonèt dimansion moun nan ki dépasé sa yo ouè ak jé, moun sa-a ki kréyé sou pòtré ak figi Bondié-a, li minm Bondié rélé pou-l vi-n tounin pitit li-a ak frè lòt moun yo, li minm Bondié déstiné pou lavi tout tan-an. Si yo réfizé rékonèt dépasman sa-a yo pa kapab ouè-a, y-ap fè moun nan vi-n tounin yon instriman pou yo ésplouaté-l, ki sèvi pou égoyis ak anbision lòt moun yo, oubyin pou yon léta ki gin tout pouvoua, ki drésé kòm valè ki pi ro, fè tou sa-l vlé avèk li. Nan pròp mouvman anndan kè-m nan ki fè-m dékouvri Jézu-Kri-a, épi ki rédi-m koté-l san-m pa kapab rézisté-a, mouin té santi kichòy Konsil Vatikan II-a vi-n déklaré sou li; li réspékté plas konsians la avèk désizion-l ki lib; li avèti san fébli pou yo dévlopé tout bon kalité moun nan, pou sèvis Bondié ak pou kè pozé lézòm épi finalman, li rékòmandé tout moun rinmin tout moun. Sa korésponn avèk laloua ki nan fondasion désizion krétyin-an (Gaudiun et Spes, 41).

5. Mouin té aprann yon jèn krétyin sispann rété jèn, épi gin lontan li pa krétyin ankò, lè-l kité yo tronpé-l avèk lansègnman oubyin filozofi k-ap préché rayisans oubyin batay. Réyéلمان vré, yo pa bati yon sosiété kòrèk sou injistis. Yo pa bati yon sosiété ki mérité poté non sosiété moun, antan y-ap manké réspè, oubyin sa-k pi mal ankò, antan y-ap détrui libèté moun nan, antan y-ap réfizé chak moun libèté yo pi bézouin yo. Kòm prèt, kòm évèk, kòm kadinal, mouin té patajé lavi anpil jèn, nan univèsité, nan group jèn yo, nan promnad nan mòn yo, nan réyinion réfléksion oubyin lapriyé; mouin té aprann kijan yon jèn kòmansé viéyi tout bon vré, lè-l kité yo tronpé-l avèk prinsip sa-a ki fasil, ki glisé tou patou, ki di: "sa-ou gin lidé fè-a, li sèvi garanti pou mouayin yo ou pran-an", lè-l rivé kouè sèl éspoua pou-l amélioré sosiété-a, sé éksité batay ak rayisans ant group sosiété yo, avèk rèv yon sosiété ki san klas, sosiété sa-a ki montré byin vit kijan li fè dèt klas. Mouin vi-n gin konviksion sé rinmin-an sèl ki raproché sa-k gin diférans, épi ki fè tout moun fè yon sèl malgré diférans yo. Paròl Jézu-Kri yo "Mouin ba nou yon kòmandman nouvo, sé pou nou youn rinmin lòt tankou mouin rinmin nou-an" (Jn 15, 12), yo vi-n parèt dévan-m lè sa-a, malgré mouin pa-t

kapab konprann profondè yo té gin nan Bondié-a, tankou jèm avèk prinsip sèl chanjman ki ataké rasi-n yo, yon fason yon jèn kapab aprésié. Jèm ak prinsip sèl révolision ki pa trayi moun nan, sèl vré rinmin k-ap bati.

6. Si jèn sa-a mouin té yé-a, jèn sa-a ki té gin pou-l viv lavi-a nan yon moman istoua ki rèd la, si-l kapab di jèn yo nou yé-a kichòy, mouin kouè mouin t-a di yo konsa: pa kite yo sèvi avèk nou kòm "instriman".

Chèché pran konsians byin sou sa nou vlé-a ak sa n-ap fè-a. Min mouin ouè sé sa minm Èvèk Amérik Lati-n yo té di nou, lè yo té rasanblé Pouébla, ané pasé-a: "Sé pou yo fòmé sans jijman nan léspri jèn yo, an fas sa k-ap ataké valè kilti yo, sa divès filozofi yo ap chèché transmèt li yo" (Dokiman Pouébla, No 1197) spésialman filozofi ki apuiyé sou matiè-a, pou yo pa sèvi ak jèn yo jan yo vlé. Konsil Vatikan II di: "Li nésésè pou lòd sosiété-a dévlopé tout tan, avèk lavérité kòm fondasion, sé pou-l bati sou jistis la, sé pou-l gin rinmin-an kòm nanm li, épi nan libèté-a sé pou-l rankontré yon ékilib ki réglé tout tan pi plis sou moun nan" (Gaudim et Spes No 26, paragraf 3).

Youn nan sila yo ki té vi-n anvan-m yo, ki té gran anpil yo, Pi Douz, té adopté kòm konsign pèsonèl: "bati kè pozé-a nan jistis la"; mouin kouè sé yon konsign pèsonèl épi sitou yon angajman ki mérité plas nan kè nou, nou minm jèn Brézilyin yo.

7. Mouin pè pou anpil bon lidé pou bati yon sosiété ki kòrèk, yo pa pouri nan sa ki pa vré, yo pa vidé tankou kim savon, paské yo manké yon éfò pou yo jinnin kò yo, pou yo kontanté yo avèk sa-k nésésè. Nan dòt mo, nou bliyé ranpòté laviktoua sou sa yo rélé "sosiété k-ap gaspiyé-a", anvi lanbision pou toujou gin plis la, olié pou chèché vi-n pi plis tout tan, pandan dòt moun toujou gin mouins.

Mouin kouè isit la, nan lavi chak jèn, bénédiksyon éspri pòv la gin yon fòs ak yon sans ki kolé nan réalité-a, ki adapté pou tan n-ap viv la: nan jènm rich la, pou-l aprann sa-l gin an tròp la, sé prèské tout tan sa-k manké dòt yo, épi pou-l pa ralé kò-l byin tris (cf Mt 19, 22), lè l-ap tandé nan fon konsians li Granmèt la k-ap rélé-l pou-l détaché-l pi plis; nan jèn nan k-ap viv kondision ki pa fiksé-a, ki pèmèt yo sètin pou démin-an, minm jous nan grangou, pou lè l-ap chèché amélioré kondision lavi-a pou li minm ak pou moun lakay li yon fason ki kòrèk, sé ran moun nan ginyin kòm moun ki atiré-l, min sé pa lanbision, léspri lajan, pièj sa ki tròp.

Zanmi-m yo, nou minm tou nou réponsab konsèvé vré valè yo ki té toujou fè pèp brézilyin-an lévé tèt li.

Pa kite éksitasion sans nou pran tèt nou, bagay k-ap sakajé sa rinmin moun nan ginyin ki vré-a, bagay k-ap gayé fanmiy nou. "Èské nou pa konnin kò nou sé yon kay sakré, épi léspri Sin-an abité nan nou"? dapré sa Sin Pòl ékri nan tèks nou té kouté-a.

Sé pou jèn fi yo chèché rankontré vré ròl kondision yo kòm fi, vré réalizasion fi-a kòm moun, kòm pati ki antré nan sosiyété-a, nan yon patisipasion yo fè avèk konsians, dapré sa-k fè rékonèt li.

8. Antan m-ap fini, mouin réprann paròl ki sèvi kòm klé yo, sa nou té ranmasé nan léktu lamès sa-a:

- fè dévoua-ou, obsèvé jistis la;
- pa bati sou dòt fondasion pasé Jézu-Kri;
- gin yon répons pou-ou bay Granmèt la lè-l mandé: "pou ou, ki moun mouin yé"?

Sé mèsaj sinsè yon zanmi, mèsaj ki plin konfians. Mouin t-a anvii ba nou chak nan min, pou-m palé avèk nou chak. An tou ka, sé ak chak moun m-ap pale, lè m-ap di tout moun: Jèn BELO HORIZONTE yo, ak tout Brézil la, Pap la rinmin nou tout anpil, Pap la pap janm bliyé nou: Pap la ap pati soti isit la avèk yon bon souvni pou nou tout.

Zanmi-m yo mouin rinmin anpil la, résévoua Bénédksion ki soti nan Apot yo, sa m-apral bay nan finisman lamès sa-a, tankou yon sign kijan mouin rinmin nou, kijan mouin gin konfians nan nou ak nan tout jèn yo ki nan Péyi sa-a."

*

20èm dimanch òdinè C-a invité nou kalkilé sou pèsékision. Jézu déklaré sé difé ak séparasion li vi-n poté (Lc 12, 49-53). Prémie léktu-a (Jer 38, 4-6.8-10) fè nou ouè pèsékision Profèt Jérémi sibi pou Paròl Bondié-a antan yo fonsé-l nan labou yon pui. Psòm nan di kijan Granmèt la ouété patizan-l sot nan fòs mizè-a ak nan labou ki sal la (Ps 39/40, 3). Réfrin pou alélouya-a (Jn 10, 27) fè nou sonjé sé poutèt n-ap kouté voua Granmèt la nou jouinn pèsékision-an.

*

Lè nou chouazi, nou blijé rénonné. Nou pa kapab kontanté tout moun alafoua. Gin kalfou ki gaté zanmi. Époutan nou pa kapab rété nan kalfou-a tout tan. Fò nou kontinué chémin nou. Gin rout k-ap désann byin laj; gin santié k-ap grinpé byin séré; tout moun pa gin minm konviksion.

Èské sa vlé di nou sé lènmi moun nan, si nou pa suiv minm chémin avèk li? Pa nésèsèman; minm si li minm li maké nou mal-viv, poutèt désizion nou ki fè nou blijé viré do ba li, pou nou kapab viré fas bay Granmèt la pi byin. Difé Jézu vi-n limin pou nou sou tè-a, sé léspri-Sin-an li vi-n poté. Li promèt li bay Nikodèm nan nuit la (Jn 3, 5), bay Samaritèn nan sou bò pui Jakòb la (Jn 4, 14), bay Juif yo nan dènié jou fèt tant yo (Jn 7, 37). Li bay Apot yo li nan asouè Rézirèksion-an (Jn 20, 21). Li fè-l tonbé sou 120 patizan yo ki t-ap lapriyé nan kay chanmòt la ansanm avèk Mari, jou lapannkot la (Ac 2, 1-4). Yon pakèt lang tankou difé désann sot nan sièl la, yo vi-n pozé sou chak moun nan kay la (Ac 2, 3). Difé mòn Sinayi-a désann (Ex 19, 18; Dt 4, 36; cf Ex 3, 2). Sé difé sa-a ki té konn désann sot nan sièl pou-l boulé ofrann yo prezanté bay Granmèt la kòm sakrifis, jan sa té passé sou mòn Kamèl avèk Profèt Éli (1 R 18, 38; cf Nb 11, 1; 16, 35; Lv 9, 24; Jg 6, 21; 1 Co 21, 26; 2 Ch 7, 1). Nan Lèt ansiklik Pap Jan-Pòl II té ékri osijè léspri Sin-an, pou 18 mé 1986 la, nan fèt lapankot la ("Dominum et vivificatem": li sé Granmèt é li bay lavi), li té fè sonjé kijan difé sa-a kòm tonbé sou ofrann Kalvè-a jou Vandrédi Sin-an pou-l boulé sakrifis Jézu-a yon fason total, ki fè Jézu pousé gran rèl sa-a lèt Ébré yo palé-a (He 5, 7). Pap la di: Sé léspri Sin "qui agit au plus profond du mystère de la Croix" (DV 41). Li di: "Dans le Christ souffre un Dieu repoussé par sa propre créature" (ib). Li ajouté: Léspri Sin "consumme ce sacrifice par le feu de l'amour" (ib), (...car il) fait croître à un degré nouveau le Don fait à l'homme et à la création depuis le commencement" (ib). Nan sakrifis Jézu-a volonté lézòm, ki té rebèl aléga Bondié, vi-n dosil nèt nan soufrans li-a (He 5, 7; DV 40). Sèlman sou Koua-a, li pou kont li. Minm zanmi-l yo rété bon distans (Lc 23, 40). Pèp Israèl té yon pèp konsakré. Li té blijé fè chémin apa. Lè Profèt Éli té vlé kinbé fidèlité konsèkrasion sa-a, li té rét pou kont li, tout moun té vi-n tounin lènmi-l (1 R 19, 14). Profèt Jérèmi di dépi-l louvri bouch li, sé an fas lènmi li ouè-l. Profèt Ézékièl drésé an fas yon pèp ki fè kou-l rèd. Apré pèp Israèl la té fi-n ofri sakrifis bay toro an lò-a, Moyiz té blijé fè séparasion nan tout fanmiy ant sa-k pou Bondié ak sa-k pou zidòl (Ex 32, 27). Nou pa kapab sèvi dé mèt alafoua. Dépi léspri Sin-an pozé sou yon moun épi moun sa-a ba-l tout volonté-l, pou-l boulé-l tankou nan sakrifis lakoua-a, moun sa-a doué aksépté pèdi tout zanmi li (Sg 2, 12-20). Konduit li vi-n tounin yon répròch pou lòt yo. Sèké léspri Sin-an sé yon jij. Li minm li sondé profondè Bondié ak profondè lézòm (1 Co 2, 10-21; Sg 1, 7), li dévoualé koté bon chémin-an yé, koté péché-a yé; li vidé limiè sou sa Sin Pòl rélé "mystère de la piété" (1 Tm 3, 16) avèk "mystère de l'iniquité" (2 Th 2, 9). (cf DV 32).

Yon moun ki kité difé léspri Sin-an boulé-l nan minm sakrifis Jézu ofri sou Koua-a, sèl fason l-ap viv, sa vi-n tounin yon paròl jijman ki blijé pròp zanmi-l foyé konsians li. Lè konsa konpòtman-l jinnin moun ki alantou li. Oubyin yo répousé-l, épi yo pasé nan kan lènmi-l yo. Sèké kè yon moun pa fasil kité léspri Sin-an antré ladan-l (Ps 81, 13); Jer 7, 24; Mc 3, 5; cf DV 46). Sé poua Pi-Douz té di: "Le péché de ce siècle, c'est la perte du sens du péché" (Radiomessage au congrès catéchétique national des E.U.A. à Boston, 26 Oct 1946, Discorsi e Radiomessaggi, VIII (1946) 288; DV 47, n 186, Vatican 1986, p. 87). Yon moun ki fè désizyon-l pou-l kité difé léspri Sin-an boulé-l, li doué rénonse tèt li, antan-l sonjé paròl Sint-Ogustin-an: "amour de Dieu poussé jusqu'au mépris de soi" ("De civitate Dei" XIV, 28: CCl 48, 451; cf DV 48); paské li blijé chouazi an fas lòt yo ki gin kòm konsign: "amour de soi poussé jusqu'au mépris de Dieu" (ib). Li blijé aksépté yo méprizé-l, si-l vlé kolé kò-l sou bò Bondié. Sin Pòl di fidèl Korint yo sa, lè l-ap palé yo sou Sajès Bondié-a, ki dévoualé nan langaj lakoua-a (1 Co 1, 18). Koua-a sé yon kalfou ki gaté zanmi. Min nan pié Koua-a, Manman Mari la. Koté-l yé, léspri Sin-an la (Lc 1, 35.42; Ac 1, 14; 2, 4), difé sa-a ki vi-n séparé zanmi ak fanmiy nan sign kontradiksion sa-a Siméyon té anonse la Trè Sint Vièj la, dépi-l t-ap ofri Pitit li-a nan Tanp la (Lc 2, 34s). Nou pa kapab dakò ak tout moun, si difé léspri Sin-an boulé ofrann nou-an. Nou minm tou n-ap vi-n tounin yon sign kontradiksion.

*

Persécuter: Dt 30, 7; Ps 119.86.161, Si 30, 19; Lm 5, 5; Ba 4, 25; Mt 5, 11.12; Lc 21, 12; Jn 5, 16; 15, 20; Ac 7, 52; 9, 4.5; 22, 4.7.8; 26, 14.15; Rom 12, 14; 1 Co 4, 12; 15, 9; 2 Co 4, 9; Ga 4, 29; 5, 11; 1 Th 2, 15; 2 Tm 3, 12.

Persécuteur: Jg 2, 18; Est 3, 10; 7, 4.9; 8, 1; 9, 10.24; Ps 119, 84.150.157; 142, 7; Jer 15, 15; 17, 19; Mt 5, 44; Ga 1, 23; Ph 3, 6; 1 Tm 1, 13.

Persécution: 2 Mac 6, 12; 8, 23.30; Mt 13, 21; Mc 4, 17; 10, 30; Ac 8, 1; 13, 50; Rom 8, 35; 2 Co 12, 10; Ga 1, 11; 6, 12; 2 Th 1, 4; 2 Tm 3, 11a/b.

Contradiction: Lc 2, 34; Ac 22, 22; He 12, 3.

Contradicteur: Tit 1, 9.

Contrarier: 1 R 1, 8; Tob 9, 4.

Contrarié: Ne 2, 10; Tob 10, 3; 1 Mac 10, 22.68; Ac 4, 2.

*

* *

VINTÉINIÈM DIMANCH ÒDINÈ A

Gin toua sous koté nou kapab konnin sa Jézu yé: sous lèzòm, sous pa nou, sous Bondié Papa-a. Nan lévanjil vintéinièm dimanch òdinè A-a (Mt 10,13-20), nou ouè tou lé toua sous sa yo. Prémie sous la, sé lè Jézu mandé Apot yo: "Ki sa moun yo di Pitit moun nan yé?" (Mt 16,13). Dézièm sous la sé lè Jézu mandé yo: "Min pou nou, ki sa-m yé?" (Mt 16,15). Touazièm sous la, sé lè-l di Piè: "Révélasion sa-a, sé pa nan chè-a ak san-an li soti, min sé nan Papa-m ki nan Sièl la" (Mt 16,17). Sé nan sans sa-a Jézu di: "Mouin fè konpliman pou ou, Papa, ou minm ki mèt sièl la ak tè-a, poutèt ou kaché bagay sa-a bay moun ki gin sajès ak intélijans, épi ou dévoualé-l bay sa-k tou piti yo" (Mt 11,25). Sé nan sans sa-a tou li di: "Pèsòn pa kapab vi-n jouinn mouin, si Papa-m ki voyé-m nan pa atiré-l" (Jn 6,44). Sèké pèsòn pa konn Pitit la sof Papa-a (Mt 11,27). Konsa gin toua fason pou konn Jézu: dapré sa lèzòm di, dapré sa éspérians pèsònèl nou fè nou dékouvri, dapré sa Bondié Papa nou li minm li mété nan léspri nou. Sé touazièm fason-an ki kòrèk nèt. Minm si nou gin inpréson sé nan nou sa sòti, an réalité sé Bondié Papa-a ki ba nou konésans sa-a. Sé pa paské nou savan, sé paské li gin plan-l sou nou. Si-l bay Piè konésans sa-a, sé paské li té vlé mét Piè kòm Réponsab légliz li. Li ba-l sajès sa-a ki soti nan Bondié li minm, ki pa soti ni nan lèzòm, ni nan Piè. Lè Piè ak Jan té dévan tribinal Juif yo, chèf tribinal yo té rékonèt sé moun ki pa gin ni instriksion ni fòmasyon (Ac 4,13), époutan yo palé avèk asirans. Yo pa-t konnin koté asirans sa-a té soti. Sé Sajès Bondié Papa-a bay Piè-a ki fè-l gin asirans sa-a; san-l pa refléchi, li déklaré Jézu: "Ou sé Kris la, Pitit Bondié vivan-an!" (Mt 16,16). Asirans la fondé sou Bondié. Sé poua li solid. Sé sou lafoua sa-a Jézu bati légliz li tankou sou yon fondasyon ròch.

Sé pa sa tout moun ap di pou nou répété. Kouran sajès sa-a, Sin Pòl rélé-l sajès tè-a. Nou gin pou nou pran pozision sou sètin pouin yon fason katégorik, pou konviksion nou tranché pa rapò a konviksion pa lèzòm. Yon pòsion di: sé Jan-Batis (Mt 14,2). Yon lòt pasion di sé Éli (Mt 3,23; Si 48,11). Yon lòt pòsion di sé Jérémi (2 Mac 15,13-15). Yon lòt pòsion di sé youn nan Profèt yo (Dt 18,15; Nb 12,6-8). Sa fè yon pakèt kouran lékòl koté n-ap chèché chouazi mèt pa nou (2 Tm 4,3). Époutan pa gin youn ki bon. Yo pa poté mak Bondié nan yo. Sin Pòl di Timoté: "Yon tan ap rivé, moun yo pap sipòté bon lanségman-an ankò, min okontrè, y-ap suiv tandans lanvi yo, zòrèy yo ap graté yo, y-ap chouazi yon pakèt mèt, y-ap viré zòrèy yo sot nan diréksion lavérité-a, y-ap viré yo nan diréksion istoua ki pa gin fondman (2 Tm 4,3s). Sin Pòl mandé Timoté pou-l fè atansyon nan

tout bagay, pou-l sipòté tray la, pou-l préché lévanjil la, pou-l fè travay li kòrèk (ib. v. 5).

Sé pa nésésèman sa tout moun ap di ki bon. Konduit Bondié ak conduit lèzòm gin distans sièl la ak tè-a ki séparé yo (Is 55,9). Minm nan pròp konsians pa nou tou, nou gin doua jouinn bariè, minm si Bondié fi-n dévoualé nou vérité osijè Pitit li. Laprèv, sèké apré Jézu fi-n déklaré Piè répons li-a sé pa nan chè-a ni nan san-an li soti, min sé nan Papa-l ki nan sièl la, li anonsé li gin pou-l al Jérusalèm, l-ap souffri, y-ap touyé-l, l-ap lévé vivan sou touazièm jou-a (Mt 16,21), Piè pran-l apa, li di-l pa fè sa (Mt 16,22). Lè sa-a Jézu di Piè pasé dèyè-l, paské l-ap jinnin-l, répons sa-a sé pa nan Bondié li soti foua sa-a, sé nan lèzòm (Mt 16,23). Sé tout tan nou bliyé ap kinbé rélasyon séré ak Bondié, sé pa paské li fi-n dévoualé nou kichòy nou konprann nou pa bézouin limiè ankò. Minm Sin Piè-a ki fi-n di Jézu li sé Kris la, sé li minm ankò k-ap anpéché-l suiv chemin-an Papa-a té trasé-l la. Sa vlé di konésans la Papa-a té fi-n ba li-a, li té gin pou-l fouyé-l ankò, pou-l jouinn vré sans li. Li té konn sa Jézu yé, min li pa-t konn vré ròl li. Li té gin chemin pou-l fè ankò.

Sé poua nan finisman lévanjil vintéinièm dimanch òdinè A-a (Mt 16,13-20) Jézu di pou yo pa di pèsòn li sé Kris la. Sèké konsépsion foul la té ginyin osijè Kris la, sé yon konsépsion lagè, sé tankou yon moun k-ap vi-n batay pou-l chasé lènmi-an sot nan péyi-a, pou-l instalé yon gouvènman ki gin indépandans. Sé poua lè Jézu ap anonsé lapasion-l, Piè ap ba-l bariè. Jézu ap aprann Piè pou-l pa suiv konsépsion lòt moun yo sou pouin sa-a, sé yon lòt nivo Papa-a gin pou-l dévoualé-l ankò.

N-ap mandé Manman Mari pou-l ba nou pasians sa-a, pou nou kité Bondié Papa-a anségné nou (Jn 6,45) moso pa moso. Pou sa, fò nou fidèl nan rélasyon nou ak li, fò nou dosil pa rapò a léspri li, pou nou fouyé sans sa-l fi-n dévoualé nou, pou nou pa intèprété-l alaléjè, nan minm kouran konviksion koté tout moun ap najé, pou nou konnin si Bondié aprann nou kichòy spésyal pa rapò a Pitit li, sé paské li vlé ba nou yon ròl spésyal nan diréksion frè ak sè nou yo. Nou doué sèvi yo kòm limiè pou nou mété yo nan bon chemin, olié nou pran minm rout ak yo, k-ap fè nou pèdi vré ròl nou kòm **témouin**.

Ni Sin Mak (Mc 8,27-30), ni Sin Luk (Lc 9,18-21), yo mét toua non nan bouch moun yo osijè sa Jézu yé: sé Jan-Batis, Éli oubyin youn nan Profèt yo (Mc 8,28; Lc 9,19). Min Sin Matié li minm, li mété yon katriyèm non: sé **Jérémi** (Mt 16,14). Pouki sa? Sé paské Sin Matié vlé insisté sou késion rouayom Bondié-a, épi li vlé montré nan ki sans pou yo konprann Rouayom sa-a. Sèké nan tan Juda Makabé t-ap défann péyi-a kont lòt pèp ki t-ap fè-l

lagè yo, vè ané 160 anvan Jézu-Kri konsa, Juda Makabé té fè yon rèv, koté-l ouè yon prèt an chèf ki té sin anpil yo té rélé Onias ki parèt dévan-l ansanm ak Jérémi. Onias té lonjé min-l, li t-ap lapriyè pou tout kominoté Juif yo, épi Onias di Juda Makabé: "mésié sa-a, sé zanmi frè-ou yo, l-ap lapriyè anpil pou pèp la, ak pou tout vil la ki sin-an, sé Jérémi Profèt Bondié-a" (2 Mac 15,14). Jérémi minm lonjé min douat li, li bay Juda Makabé yon épé an lò, épi li di-l: "**Pran épé sa-a, sé yon kado Bondié, avèk li ou-ap krazé lènmi yo**" (2 Mac 15,16). Lè Juda Makabé rakonté rèv sa-a, Juif yo réprann kouraj, yo ataké, yo ranpòté laviktoua sou Nikanò, jénéral Démétrius prémié-a, ki té vi-n ataké yo-a. É sé konsa Juif yo réprann vil Jérusalèm nan nan min lènmi yo (2 Mac 15,37). Sé avèk évenman sa yo liv Makabé-a fini. Sé poua pèp la té kinbé éspoua Bondié t-ap voyé Jérémi ankò vi-n rinmèt yon épé pou délivré lavil la ak pèp la sot nan min Romin yo. Yo fini konpozision liv Makabé-a vè ané 120 konsa anvan Jézu-Kri. Sa fè sansinkantan dépi pèp la ap tann vanjans spésial sa-a. Jézu détronpé yo. L-ap fè Piè rinmèt épé-a nan fourou-l. Moun ki frapé ak épé, l-ap péri ak épé (Mt 26,51-53; cf Gn 9,6). Èské, nan tan n-ap viv la, nou pa gin pou nou korijé sètin tandans nan sans sa-a? Sèké gin toua sous koté nou kapab konnin sa Jézu yé: sous lèzòm, sous pa nou, sous **Bondié Papa-a**. Sé nan touazièm sous la pou nou bouè dlo: léspri Sin-an (Jn 4,14; 7,38; 19,34; Ez 47,1; Za 13,1; 14,8; Ap 22,17; Ps 46,5; Gn 2,6).

*

* *

VINTÉINIÈM DIMANCH ÒDINÈ B

"Nou sézi, ébyin lè n-a ouè Pitit moun nan monté koté-l té yé anvan-an, ki sa n-a di?" (cf Jn 6,61-62). Répons sa-a Jézu bay Juif yo, li fè sonjé sa-l té di Natanaël la: "Ou-ap ouè pi plis ankò, n-ap ouè sièl la ouvè, épi Anj Bondié yo k-ap monté-désann anlè Pitit moun nan" (Jn 1,50-51). Li té di Nikodèm tou: "Si nou pa kouè lè-m ap palé nou sou bagay tè-a, kijan n-ap fè kouè lè m-a palé nou sou bagay sièl la?" (Jn 3,12). Yo pa kouè sé nan sièl la Jézu té soti (Jn 6,41). Min pou yo kapab kouè, sé yon favè Bondié Papa-a ap fè yo (Jn 6,44-45). Jézu insisté sou nésésité favè-a léspri-a ap fè Krétyin yo pou yo kapab kouè (Jn 6,63). Lavi l-ap palé-a sé lavi léspri-a. Sé léspri-a ki kapab fè konprann li. "Sé léspri-a ki bay lavi, chè-a pa sèvi anyin. Paròl yo moun palé nou-an sé léspri épi sé lavi" (Jn 6,63). Jézu té déjà di Nikodèm sa: "Sa-k fèt sot nan chè-a, sé chè, sa-k fèt sot nan léspri-a, sé léspri" (Jn 3,6-8). Chè-a Jézu ap palé isit la sé pa chè pa-l ki nan lékaristi-a, min sé natu chè-a an jénéral, ki pa anba pouvoua léspri-a (Jn 3,6). Léspri-a gin pou-l mété lavi (1 Co 15,45). Jézu déjà ouè pozision Juda (Jn 6,64), sa l-ap réglé nan dènié résépsion-an (Jn 13,30). Anpil nan patizan yo pa suiv Jézu ankò (Jn 6,66). Sé tankou yon jijman ki séparé bon ak mové yo (Jn 12,37; Mt 11,20-24). Piè fè déklarasion lafoua o non Douz Apot yo: "Granmèt, kot ki moun pou-n alé? Ou gin paròl lavi ki pap janm fini-an" (Jn 6,68). Jézu sé Pin lavi-a, sé Dlo lavi-a, sé Limiè lavi-a, sé Paròl lavi-a. Sa raplé déklarasion lafoua pèp Israèl la té fè dévan Jozué, lè-l té blijé chouazi ant ziddòl li yo ak vré Bondié-a (Jos 24, 16-18). Sé tankou "Mouin kouè gin yon sèl Bondié-a" nou chanté chak dimanch la. Lafoua nou apuiyé sou lafoua Apot yo, sou lafoua Piè déklaré-a. Sé konsa diskou sou Pin lavi-a fini. Lékaristi sé sakréman **lafoua**.

*

Nan 21^e dimanch òdinè B-a, yo fini léktu chapit 6 Sin Jan-an avèk vèsè 61-70, koté Jézu pou kont li avèk Apot yo, lè foul Juif yo fi-n pati-a, antan y-ap babié toujou, tankou pèp Israèl la té fè kont Moyiz nan savann nan. Lè Jézu ouè moun yo ap dégrinnin tankou mayi boukannin, li pa fè anyin pou-l kinbé yo, okontrè li mandé Apot li yo: "Èské nou minm tou nou vlé pati?". Nan mèsaj nou, lè yo pa résévoua nou, nou pa doué ouété anyin nan égzijans lévanjil la pou nou fè réklam, pou nou atiré moun, pou nou ratrapé zanmi nou k-ap fonn nan min nou tankou zangiy. Okontrè sé lè sa-a minm pou nou palé pi klè, pou nou pa rét nan okinn machandaj. Sé sa oubyin sé pa sa. Si sé sa, sé Granmèt la li minm ki pou kléré jé kè moun yo (Ep 1,18), pou-l fè yo ouè kot lavérité-a yé. Simon Piè fè déklarasion lafoua o non tout Apot

yo: "Granmèt, kot kilès pou-n alé, sé ou minm ki gin paròl lavi ki pap janm fini-an" (Jn 6,68). Lè Pè-a ap kominié fidèl yo, li fè yo fè déklarasion lafoua yo tou, antan yo réponn: "Amèn" lè-l di yo: "Kò Jézu-Kri". Min an plis, chak dimanch, aprè prèch la ki suiv lévanjil la, nou déklaré lafoua tout légliz la nan "Mouin kouè gin yon sèl Bondié"-a.

Prémié léktu 21° dimanch òdinè B-a (Jos 24, 1-2a.15-17.18b) montré kijan pèp Israèl la fè déklarasion lafoua-l anba pié boua Sikèm nan, koté Abraam té prémié adoré Bondié-a (Gn 12,6). Jozué fè sa lè-l fi-n fè pèp la travèsè lariviè Joudin-an. Lékaristi sé sakréman lafoua. Psòm-répons la (Ps 33/34) di: "Gouté, n-a ouè kijan Granmèt la bon". Sa fè toua dimanch (19°, 20°, 21°) li tounin pou mandé nou pou nou gouté, pou nou pran gou, pou nou pa kapab détaché nou sot nan Granmèt la, antan nou fè zanmi avèk li tout bon vré.

Dépi 16° dimanch òdinè B y-ap ba nou lansègnman sou lékaristi avèk Mak 6,30-34 ki amòsè lansègnman sa-a, tankou prémié pati lamès la koté sé Paròl la yo bay la, ki préparé dézièm pati-a, koté sé lékaristi-a yo bay la. Réyèlman vré Mak 6,30-34 sé tankou yon prémié pati, Mak 6,35-44 sé tankou dézièm pati-a. Nan dézièm pati sa-a yo rakonté mirak pin yo. Min nan ané B-a, olié yo li dézièm pati sa-a nan Mak, nan yon sèl dimanch, yo tou profité pou pran pasaj ki korésponn nan lévanjil Sin Jan-an (Jn 6), koté mirak la pi détayé, paské yo palé sou sans mirak la, épi yo pasé sink dimanch konsa an plis pou yo bay lansègnman sou sa.

16° d.o. B	Jer 21,1-6	Ps 22/23	Ep 2,13-18	Mc 6,30-34	} Mc 6,35-44 =
17° d.o. B	2 R 4,42-44	Ps 145/146	Ep 4,1-6	Jn 6,1-15	
18° d.o. B	Ex 16,2-4,12-15	Ps 77/78	Ep 4,17.20-24	Jn 6, 24-35	
19° d.o. B	1 R 19,4-8	Ps 33/34	Ep 4, 30-5,2	Jn 6,41-52	
20° d.o. B	Pr 9,1-6	Ps 33/34	Ep 5, 15-20	Jn 6,51-59	
21° d.o. B	Jos 24,1-2a.15-17.18b	Ps 33/34	Ep 5,21-32	Jn 6,61-70	

Lè Sin Piè fè déklarasion lafoua-a o non tout Apot yo, sa fè sonjé déklarasion Jozué té fè avèk pèp Bondié-a, lè yo fi-n antré nan péyi Bondié té promèt la. Yo té fi-n maché nan dézè-a pandan karantan, yo té manjé

lama-n chak jou, tankou yon avaloua lékaristi, apré yo té fi-n batizé nan lanmè Rouj la (1 Co 10,2) épi yo té fi-n fè déklarasion solanèl nan pié mòn Sinayi-a, avèk Moyiz, antan yo té di: "Tou sa Granmèt la di, sé pou nou obéyi-l" (Ex 19,24). Min tout moun sa yo ki té pati kité Éjip la, ki té travèsé lanmè Rouj la, ki té réponn paròl Bondié-a nan pié mòn Sinayi-a, ki té manjé lama-n nan nan dézè-a, yo tout yo té fi-n mouri déja nan dézè-a. Sé pitit yo ak pitit pitit yo ki té travèsé lariviè Joudin-an avèk Jozué. Minm Moyiz pa-t travèsé lariviè Joudin-an. Konsa Jozué ap fè pèp la ki tou nèf la réfè angajman zansèt li yo té pran pou li nan pié mòn Sinayi-a. Sé kòm si pèp la rivé nan laj pou-l pran désizyon pou kont li, Jozué fè-l réfè promès angajman batèm li, sa zansèt li té pran pou li lontan-an. Sé kòm si lè nou fi-n batizé tou ti moun, rivé yon lè nou vi-n gin laj pou nou angajé tèt nou pou kont nou, nou fè angajman nou nou minm minm. Jézu té chouazi Apot li yo san yo pa-t mérité sa. Yo té vi-n jouinn li. Li fè anpil mèvèy dévan yo, dépi nòs Kana koté li té fè dlo-a vi-n tounin divin-an (Jn 2,1-12). Nan dézè-a, li fè sink mil moun manjé avèk sink ti pin. Li bay lansègnman sou lékaristi. Alafin lansègnman-an, li mandé Apot yo pou yo chouazi kouliè-a, puiské jouskisi sé li minm ki té chouazi yo; gin youn nan yo minm sé kò-l ki té la, nanm li pa-t la, sé Juda. Konsa Jézu mandé yo pou yo chouazi, paské li ouè kijan Juif yo ap pati youn apré lòt, ofi-amézi l-ap antré pi fon nan lansègnman lékaristi-a. Sin Piè di: "Kot kilès pou nou alé, ou gin paròl lavi k-ap diré tout tan-an, nou rékonèt ou sé Sin-an, Sin Bondié-a" (Jn 6,69).

Nan finisman tout mision-l yo, Sin Monfò té konn abitué fè moun yo rénouvlé promès batèm yo, pou yo kapab rénouvlé léspri rélijyon krétyin-an (GRANDET, p. 101, OC 823). Li té rélé sa "Kontra dalians avèk Bondié". Li té ékri fòmil la sou yon papié tankou yon nouvo sètifika batèm, li té signin-l, li té fè moun yo signin-l tou, tankou dé roua ki angajé pou youn asosié avèk lòt épi ki signin kontra alians sa-a yo tou lé dé. Sin Monfò signin nan plas Bondié, épi moun yo signin tou. Chak moun rétonin lakay li avèk sètifika-l, souvni angajman kontra-a li té rénouvlé-a. Kontra-a té di: 1. Mouin kouè avèk konviksion tout vérité lévanjil Jézu-Kri-a. 2. Mouin rénonné démon-an, tè-a, péché-a ak mouin minm pou tout tan. 3. Mouin promèt gras a favè Bondié-a ki pap janm manké-m, pou-m rét fidèl nan tout kòmandman Bondié-a ak kòmandman légliz yo, antan mouin évité péché mòtèl ak okazion-l yo, sitou mové frékantasion. 4. Mouin rinmèt tèt mouin toutantié bay Jézu-Kri nan min Mari, pou-m poté koua-m dèyè-l pandan tout lavi-m. 5. Mouin kouè si-m kinbé promès sa yo fidèl jous mouin mouri, m-ap sovè pou tout tan, min tou si-m pa kinbé yo, m-ap kondané tout tan. Sé poutèt sa mouin signin.

Konsa Sin Monfò té aji nan minm sans avèk tout fason Bondié té abitué kondui pèp li-a. Bondié chouazi nou. Rivé yon lè, li mandé nou pou nou réfè angajman pèsonèl nou. Sé sa ki fè lafoua nou vi-n dévlopé. Sin Monfò invité nou rénouvlé angajman sa-a chak matin nan ti fòmil konsékration-an, li mandé pou nou fè nan min Manman Mari-a. Dé foua chak ané tou, li mandé pou nou fè gran konsékration-an, 8 désanm ak 25 mas, nan min Manman Mari, pou nou kapab pi fidèl nan angajman promès batèm nou, paské Manman Mari té di **OUI**, épi kòm li pa-t gin mak péché orijinèl la, li pa-t janm réprann paròl li-a, sé poua Paròl la té vi-n tounin chè, li té abité nan mitan nou, gras a li. Li toujou la pou-l fè nou kinbé paròl nou, pou-l kinbé-l pou nou. Sé poua Pap Jan-Pòl II di nan ansiklik li té ékri osijè la Trè Sint Vièj Mari-a (Redemptoris Mater): "J'aime à ce propos évoquer, parmi de nombreux témoins et maîtres de cette spiritualité, la figure de saint Louis-Marie Grignon de Montfort **qui proposait aux chrétiens la consécration au Christ par les mains de Marie COMME MOYEN EFFICACE DE VIVRE FIDÈLEMENT LES PROMESSES DU BAPTÊME**. Je constate avec plaisir que notre époque actuelle n'est pas dépourvue de nouvelles manifestations de cette spiritualité et de cette dévotion" (RM 48, Vatican 1987, p. 105). Gin moun Bondié mandé pou yo rinmèt tèt yo nèt ba li antan yo fè vé provrété, chastété, obéyisans, pou yo viv angajman batèm yo-a pi byin, pou yo nan sèvis légliz li-a pi byin. Yo fè-l vré, é dé tanzantan li bon pou yo rénouvlé-l nan kè la Trè Sint Vièj Mari, premié Rélijjèz Bondié ki toujou ap di nou: "Ninpòt sa-l di nou, sé pou nou fè-l" (Jn 2,5).

*

Lansègman sink dimanch yo (17^e, 18^e, 19^e, 20^e, 21^e dimanch òdinè B' fini sou yon **déklarasion lafoua**: "Nou **kouè**, nou konnin ou sé Kris la, Pitit Bondié-a" (Jn 6,69). Sé tankou tèt mòn nan koté Jézu t-ap éséyé fè foul la monté dépi nan kòmansman diskou-l la. Sé sèl Douz yo ki té réyisi rivé ansanm avèk li. Moun yo lagé youn apré lòt. Yon moman, yo déklaré karéman: "Paròl sa-a rèd, kilès ki kapab kouté-l?" (Jn 6,60). Jézu répété: Pèsòn pa vi-n jouinn li si sé pa yon favè Papa-a fè-l (Jn 6,65; cf 6,44). Sèlman gin moun ki aksépté favè sa-a; gin lòt ki réfizé-l, antan yo fèmin kè yo. Paròl la rèd, paské yo fè kè yo di. Sé pou yo té fè kè yo tou sinp tankou yon ti bébé (Ps 131, 1-2). Jézu di: Papa-a kaché mèvèy li yo pou savan yo ki gin lògèy nan kè yo-a, li dévoualé yo pou sa-k tou piti yo, ki tou pòv nan kè yo-a (Mt 11,25-27). Foul la fè kou-l rèd tankou pèp la nan dézè-a, sé poua li trouvé paròl la rèd (Ps 95,8). Li babié pandan tout prèch la (Jn 6,41.43.61), minm jan Pèp Israèl la t-ap babié nan dézè-a kont Moyiz ak

Aaron, kont Bondié li minm (Ex 16,7.8.9.12; 17,3; Nb 11,1; 14,27.29; 17,6.20.25; Ps 106,25; Si 10,25; Is 29,24; 58,9; Lm 3,39; Sg 1,10.11; Si 46,7). Yo jouinn bariè sou rout yo (Jn 6,61). Yo pa kapab janbé-l, paské sa mandé yon èfò. Yo rété sou aspè tè-a. Yo pa anvizajé aspè léspri-a (Jn 6,63; 3,6). Jézu di yo: Si sa-a fè yo bité, lè y-a ouè-l monté koté-l té yé anvan-an minm, kot Papa-a, y-ap pi sézi toujou (Jn 6,62; 1,51). Yo pa tann moman sa-a pou yo lagé Jézu. Dépi premié difikilté-a yo kité-l (Jn 6,66). Sin Piè pran laparòl o non Douz yo (Jn 6,68), antan Bondié Papa-a fè-l favè sa-a (cf Mt 16,17; Jn 6,64.65). Li fè déklarasion lafoua sou dé pouin (Jn 6,69): Premié pouin-an sé sa Jézu **ginvin** (paròl lavi ki pap janm fini-an). Dézièm pouin-an sé sa Jézu yé (Kris la, Pitit Bondié-a). Sa pa vlé di li anvizajé nan tout détay tou sa-k nan déklarasion lafoua sa-a. Laprèv sèké lè Jézu ap avèti li gin pou-l mouri, pou-l lévé vivan, Piè vlé ba-l bariè sou pouin sa-a. Li fè Piè répròch (Mt 16, 22-23). Sé ofi-amézi Apot yo ap antré nan profondè déklarasion lafoua-a yo fi-n fè-a, gras a limiè léspri Sin-an ap vidé nan kè yo (Jn 14,26; 16,12-13).

Pèp Israël la té fè déklarasion lafoua-l tou dévan Jozué, apré pasaj lariviè Joudin-an (Jos 24, 14-24), jan premié léktu vintéinièm dimanch òdinè B-a montré-a. Li té fè-l tou sou dé pouin (Jos 24,17-18). Premié pouin-an sé sa Granmèt la té **fè** pou yo (égzòd). Dézièm pouin-an sé sa Granmèt la **yé** pou yo (Bondié yo). Sé konsa lè n-ap déklaré lafoua nou tou, nou anvizajé **pouvoua** Bondié, nou konsidéré sa Bondié **yé**. Sa-l **yé**: li sé Papa-a, Pitit la, ak léspri Sin-an (**Trinité**). Sa-l **fè**: li gin tout pouvoua, li kréyé sièl la ak tè-a, tou sa nou ouè ak tou sa nou pa ouè (**Kréasion**) pa pouvoua léspri Sin-an, sèl grinn Pitit li-a vi-n tounin moun nan vant Mari ki Vièj (**Inkanasion**); li soufri sou ringn Pons Pilat, li mouri, yo antéré-l, li lévé sou touazièm jou-a, li monté nan sièl la, li chita adouat Papa-a, li gin pou-l rétounin ak tout otorité pou-l jijé ni moun k-ap viv, ni moun ki mouri, é li va roua pou tout tan. Léspri Sin-an bay lavi, sé li ki t-ap palé lè Profèt yo t-ap palé (**Redanmsion**).

Lafoua nou sé minm lafoua avèk Abraam, avèk Pèp Israël la. Lè Jézu vini, li lévé voual la ki té kaché profondè mèvèy Bondié yo, li déklaré nou pi klè sa Bondié **yé** nan li minm, sa-l **fè** pou nou. Sin Piè aksépté fè déklarasion lafoua sa-a o non tout légliz la. Sé sou déklarasion-l nan ak déklarasion Apot yo lafoua nou chita. Sé poua nan Krédo-a, nou di: mouin kouè nan légliz la, li fè yon sèl kò-d-fanmi, li sin, li la pou tout moun, **sé sou APOT yo li bati (légliz)**. Pandan toua ané (1984, 1985, 1986), nou té insisté sou lafoua-a, anndan nèf ané ki t-ap préparé gran fèt sinkièm santnè évanjélizasion lamérik la (1984 à 1992). Pandan toua lòt ané (1987, 1988,

1989) sé sou lésépérans nou té insisté, épi toua dènié ané yo (1990, 1991, 1992) sé sou lacharité. Vintéinièm dimanch òdinè ané B-a antré nan kad sa-a avèk lafoua-a. Lafoua, lésépérans, lacharité, sé chapant lanségnman katéchis la, ak tout lòt aktivité nou yo. Lafoua Apot yo vi-n rivé nan lamérik an 1492. An 1992 sa fè sinksan. Yon légliz grandi nan mézi lafoua-l byin chita sou lanségnman Apot yo. Nou pa doué kité lafoua nou bati sou sab, pou kay la pa tonbé nan premié ti sékous van oubyin gran dlo (Mt 7,24-27; 1 Co 3,10-15). Nou pa doué kité zouazo manjé sémans lafoua-a, nou pa doué kité solèy chodé-l, nou pa doué kité rajé toufé-l (Mc 4,1-20).

Sin Pòl di: Kòman pou moun yo fè gin lafoua si pa gin moun pou préché yo. Li kontinué, li di: Kòman pou moun yo fè préché yo, si yo pa **voyé yo préché** (Rom 10,14-15). Gin moun ki tankou lou ki dégizé an mouton (Mt 7,15; Ap 13,11; 19,20; 2 p. 2,1-3; Dt 13,2-6; 18,9-22; Lc 6,43-44; Jc 3,12; Si 27,6; Mt 12,33; Ga 1,19-24), y-ap brouyé lafoua fidèl yo, antan y-ap déklaré bagay ki kontrè ak lanségnman lévanjil la. Sé sou frui yo n-ap rékonèt yo (Mt 7,16). Sin Pòl di Galat yo: frui léspri Sin-an sé charité, kè kontan, kè pozé, pasians, rann sèvis, bon kè, konfians nan lòt yo, dousè, otorité sou mové tandans kò-a (Gal 5,22-23). Okontrè frui lachè-a minm sé mové plézi, bagay ki sal, lisans, zidòl, maji, rayisans, divizion, jalouzi, kòlè, diskision, dézakò, séparasion, lanvi, bouason, fèt-libètinaj, ak anpil lòt bagay nan sans sa-a. Moun k-ap fè péché sa yo, yo pap éritié péyi kot Bondié Roua-a (Gal 5,19-21). Kòman yo t-a kapab fè montré lòt chémin ki kondui ladan-l?

Lafoua nou chita sou déklarasion lafoua Sin Piè ak Apot yo. Granmèt, koté pou nou alé, sé ou ki gin paròl lavi ki pap janm fini-an. Nou minm nou **KOUÈ**, nou konnin ou sé Kris la, ou sé Pitit Bondié-a (Jn 6,68-69). Jézu té mété Apot yo dévan lokazion pou yo fè yon **DÉSIZION**. Sé konsa Jozué té mété pèp Israèl la dévan dévoua-l pou-l chouazi ant Bondié ak zidòl yo (Jos 24). Pèp la chouazi Bondié. Apot yo chouazi Jézu-Kri. Yo déklaré lafoua yo. Angajman yo pran-an montré sé tout lavi yo ki chita sou paròl Jézu-Kri-a. Li gin Paròl lavi ki pap janm fini-an. Yo réglé lavi yo sou li (Jn 6,68). Nou minm tou sé sou paròl Jézu-Kri yo nou réglé lavi nou. Sé pa sou paròl lézòm. Sé pou rézon sa-a nou doué égzaminé si paròl n-ap tandé yo mérité pou nou joué lavi nou sou yo, si sé nan Jézu-Kri yo soti oubyin si sé nan lézòm. Sin Pòl bay Korintyin yo sign ki pou fè yo rékonèt vré Apot yo (2 Cor 6,4-10; 12,12; 1 Th 2,3-12). Li mandé pou fè atansyon ak fo-apot yo k-ap chèché tronpé, ki dégizé tankou Apot Jézu-Kri (2 Cor 11,13), minm jan Satan li minm dégizé tankou Mésajé limiè (2 Cor 11,14). Li di nou pa bézouin sézi si sèvitè-l yo tou dégizé tankou sèvitè jistis (2 Cor 11,15).

Kanta li minm, lèt rékòmandasion-l sé konduit li, kòm sèvitè Bondié (2 Cor 6,4): gran landirans nan tray, nan tèt chajé, nan kè séré, anba kou, nan prizon, nan dézòd, nan fatig, nan vèy, nan jèn, avèk kè pròp, avèk sians, avèk pasians, avèk bon kè, avèk yon éspri ki sin, avèk yon charité ki pap tronpé, avèk paròl lavérité, avèk pouvoua Bondié, avèk zam jistis la pou ataké, épi pou défann, nan konsidérasion, ak nan laront, nan mové répitasion ak bon répitasion, lè yo konsidéré-l kòm fo-témouin époutan sé lavérité l-ap di; lè yo konsidéré-l kòm moun ki pa gin rénomé, époutan tout moun konnin-l; lè yo konsidéré-l kòm moun k-apral mouri, époutan li byin vivan; lè yo konsidéré-l kòm moun k-ap sibi chatiman, san yo pa touyé-l; lè yo konsidéré-l kòm moun ki nan chagrin, malgré li toujou gin kè kontan; lè yo konsidéré-l kòm pov, li minm ki fè kantité moun vi-n rich; lè yo konsidéré-l kòm moun ki pa gin anyin, li minm ki posédé tout bagay (2 Cor 6,4-10). Li di: mak ki fè yo rékonèt Apot yo, yo réalizé nan li, sé yon landirans ki san défo, sé sign, sé prodig, sé mirak (2 Cor 12,12). Li fè rémaké kijan prèch li pa vi-n sot nan mové lanségnman, ni nan bagay ki pa pròp, li pa chèché pran moun nan pièj (1 Th 2,3). Sé Bondié ki rinmèt li lévanjil la, lè-l fi-n éseyé-l. Sé poua li préché san-l pa chèché fè moun plézi, min antan l-ap chèché fè Bondié plézi, li minm ki sondé kè yo (1 Th 2,4). Li pa janm gin yon mo k-ap chèché flaté, ni li pa janm mét lidé sou richès moun (1 Th 2,5), ni li pa chèché prestij sélon lézòm (1 Th 2,6), malgré li t-a kapab fè santi chaj otorité-l kòm Apot Jézu-Kri (1 Th 2,7). Okontrè sé tankou yon manman li konpòté tèt li aléga moun yo l-ap préché yo, antan-l fè kò-l tou piti nan mitan yo, li antouré yo avèk souin (1 Th 2,7), sé minm lavi-l li t-a vlé bay pou yo an minm tan ak lévanjil Bondié-a (1 Th 2,9). Konsa li sèvi Bondié témouin nan yon konduit ki sin, ki kòrèk, ki san répròch (1 Th 2,10). Tankou yon papa pou pitit li (1 Th 2,11), li bay konsèy, li ankourajé, li insisté anpil pou moun yo gin yon konduit ki mérité yo kanpé dévan Bondié (1 Th 2,12). Tout sign sa yo, Sin Pòl bay yo pou yo kapab rékonèt vré Apot yo, pou lafoua moun yo kapab chita sou lafoua Apot yo tout bon vré.

Minm jan mari-a kité lakay li pou-l kolé kò-l kot madanm li, dapré sa Sin Pòl di nou nan dézièm léktu vintéinièm dimanch òdinè B-a (Ep 5,21-32), nou minm tou, **désizion** nou fè nan déklarasion lafoua nou-an; désizion sa-a blijé nou rénonse anpil bagay pou nou kolé kò nou sou Jézu-Kri. Sin Piè pat ouè tou sa déklarasion lafoua-l la té ginyin ladan-l nan minm moman-an, ni Sin Pòl tou sou rout Damas la (Ac 9,1-19; 22,5-16; 26,9-18), ni lòt Apot yo tou. Sé ofi-amézi léspri Sin-an lévé voual la, li fè yo ouè pi klè. Nou minm tou nou pa ouè tou sa ki anndan déklarasion lafoua-a, lè nou fè-l pou premié foua-a. Sé ofi-amézi n-ap dékouvri richès li. Sé poua, li bon pou chak jou

nou pran abitid résité Krédo-a, épi sitou dimanch, lè fidèl yo rasanblé légliz la, sé pou yo toujou di-l, san yo pa ranplase-l avèk okinn lòt kantik. Sé tout yon program lanségman li gin ladan-l avèk Trinité, Créasion, Inkanasion, Rédanmsion, Égliz, Sakréman, Dènié tan. Nou pap bliyé plas la Trè Sint Vièj Mari ladan-l kòm Manman Jézu. Li t-a bon tou pou nou insisté yon fason spésial sou pouvoua légliz la ginyin pou padonnin péché, jan nou di-l nan Krédo-a, sitou sé sou pouin sa-a Sinòd Évèk yo a Ròm té travay an-oktòb 1983: Rékonsilasyon-Pénitans. N-ap mandé la Trè Sint Vièj Mari pou-l fè nou fidèl nan déklarasyon lafoua nou, pou nou pran tan nou détayé Krédo-a, sa yo rélé "**Sinbòl Apot yo**", pou lafoua nou byin chita, pou nou pa kite mouinn ti van mové lanségman fè nou viré-tounin adouat-agoch tankou fèy boua. Trinité, Créasion, Inkanasion, Rédanmsion, Égliz, Sakréman, Dènié tan, Nòtré-Dam. Sa fè yon bèl ti program k-ap édé nou fouyé Krédo-a pi byin.

*

* *

VINTÉINIÈM DIMANCH ÒDINÈ C

Juif yo té konprann sé paské yo sé pitit Abraam y-ap sové. Sin Jan-Batis té di yo Granmèt la kapab fè ròch vi-n tounin pitit Abraam (Lc 3,8). Moun k-ap suiv Jézu yo té konprann sa kont yo pou sèvi yo asirans pou antré nan sièl la. Jézu fè yo konprann sé pa kozé moun-pa k-ap fè yo antré. Sé éfò pou yo fè nan fason y-ap viv, pou yo jinnin kò yo, paské pòt la piti, rout la séré (Lc 31,22-30).

Nou gin doua abitué frékanté sakréman Kò ak San Jézu-Kri, "nou manjé dévan-ou, nou bouè dévan-ou" (Lc 13,26), nou gin doua abitué ap kouté prèch chak dimanch, "ou konn bay lanségman sou laplas nou yo" (ib); min nou pa kité Jézu antré anndan fon nanm nou tout bon, avèk ÈGZIJANS li. Sé Jérusalèm li t-ap monté (Lc 13,22), sa vlé di sé "Chémin-d-Koua" li t-ap fè, li t-a pralé dirèk nan lanmò. Min moun ki t-ap suiv li yo, yo té mét lidé yo sou Mési politik la, ki t-ap vi-n sové pèp Juif la sot anba min lènmi yo, pou fè yon ti ringn avèk yo.

Profèt yo té déjà palé sou késion "Rès" sa-a, ti kras moun yo k-ap sové-a (Lc 13,23; cf Am 5,15; Is 4,3; Am 3,12; 9,8-10; Is 6,13; 7,3; 10,19-21; 28,5-6; 37,4; 2 R 19,4; Is 37,31-32; Mi 4,7; 5,2; So 2,7.9; 3,12; Jer 3,14; 5,18; Ez 5,3; 9,1ss; Ez 12,16; Ba 2,13; Ez 6,8-10; Dt 10,1-2; Is 11,11.16; Jer 23,3; 31,7; 50,20; Ez 20,37; Mi 2,12-13; Za 1,3; 8,11; Ag 1,12 Abd 17; Joël 3,5; Za 13,8-9; 14,2; Is11,1.10; 4,2; Jer 23,3-6; Is 14,22.30; 15,9; 16,14; Ez 21,37; Am 1,8; Abd 18). Min lidé moun yo té mété anba mo sa-a té sibi anpil nétouayaj. Sou tan Profèt Izayi, moun ki té fè péché yo nan pèp la, yo té jouinn égzil nan Asiri kòm pinision, sé sa-k té rivé Pèp Israèl nan Nò-a. "Ti kras" ki té rété nan péyi-a, sé yo minm yo té konsidéré kòm bon moun. Sou tan Jérémi ak Ézékièl, sa-k té pati an-égzil nan Babilòn yo, yo té konprann yo pa-t bézouin mét éspoua sou anyin ankò (Ez 37), Jérémi avèk Ézékièl di yo okontrè sé yo minm ki réprésanté "ti rès" la k-ap sèvi kòm rasi-n pou promès la réfléri, pou-l donnin. Sa-k rété nan péyi Palésti-n yo, sé pa yo minm ki réprésanté pèp chouazi-a (Ez 11,16). Sou tan profèt Zakari, sé moun k-ap vi-n soti nan légzil Babilòn yo ki réprésanté "ti Rès" la k-ap poté promès Abraam nan. Min asé vit, y-ap vi-n konprann sé pa sitiasion sou pa déyo k-ap fè moun yo éritié Ringn nan. Chanjman-an sé sou pa anndan, nan fon kè-a, pou-l fèt. Sé "Pòv" Bondié yo, sa Profèt Sofoni ap palé-a (So 3,12s). Sin Luk ap ouè "Pòv" sa yo nan group la Sint Vièj Mari, Sin Jozèf, Élizabèt, Zakari, Siméyon, A-n, tout moun ki t-ap tann délivrans Jérusalèm yo, gadyin mouton yo..., roua Maj yo.

Tout Lévanjil Sin Luk la, sé tankou yon chémin-d-Koua koté Jézu ap monté Jérusalèm. Moun ki asosié avèk li tout bon vré, yo bliyé aksépté kité Koua sa-a planté nan fon kè yo, tankou la Trè Sint Vièj Mari, ki tandé Siméyon di-l yon épé ap travèsé nanm li, paské pitit li-a ap yon sign kontradiksyon (Lc 2, 34-35). Nan premié léktu vintéinièm dimanch òdinè C-a, Granmèt la di l-ap mété yon sign nan mitan nasion li vlé rasanblé yo (Is 66, 18-21). Sign sa-a sé sign lakoua-a, sign kontradiksyon sa-a, ki gin pou-l rasanblé tout moun vi-n jouinn Pitit li-a (Jn 12, 32; 11, 52). Suiv Jézu sé pran Koua-a, mété-l sou zèpòl nou, pasé minm chémin avèk li (Lc 9,23). Anpil moun zanmi Jézu sou mòn Tabò, yo nié-l sou mòn Gòlgota (Lc 9,33; 23,49). Anpil moun konnin Jézu lè afè yo pa bon, yo gin démann pou yo fè, yo bliyé-l lè yo pa gin bézouin. Suiv Jézu, sé bliyé pròp tèt nou, rénonse intére pèsonèl nou. Nan pié Koua-a, sé yon "ti kras" pòsion patizan ki té la, alantou la Trè Sint Vièj Mari, ki t-ap réfè minm jès Abraam nan ki t-ap ofri pròp pitit li, Izaak, sa-l rinmin-an, sèl ti sa-l té ginyin-an (Gn 22,1-18; 2 Ch 3,1; 1 Ch 21,15; Lc 2,22), pou-l mét lafoua nan Granmèt la, ki té promèt li li t-ap vi-n papa yon pakèt foul nasion-an (Gn 17,4). Promès sa-a, li té gin pou-l té pasé nan pasoua. La Trè Sint Vièj Mari pran plas Abraam (Ps 87,5; Is 63,16; 66,8; Soph 3,14; Is 54,1; Lc 1,28; 2,53). Li vi-n tounin Manman légliz. Promès Abraam nan pasé nan pasoua nan kè-l. Jézu té di: lè y-a lévé-l anlè-a l-a rédi tout moun vi-n jouinn li (Jn 12,32). Li té gin pou-l té mouri, pou-l té kapab ramné tout pitit Bondié yo ba li (Jn 11,52). Tout pèp ap vi-n tounin pitit Bondié, gras a sakrifis Jézu-a. Bra-l louvri nan dimansion tout tè-a. Dapré sa premié léktu vintéinièm dimanch òdinè C-a di (Is 66,18-21), sé tout nasion k-ap soti byin louin pou vi-n fè louanj Granmèt la; lévanjil la minm (Lc 11, 21-30) di y-ap soti nan kat diréksyon tè-a pou yo vi-n atablé avèk Abraam, Izaak épi Jakòb nan Ringn sièl la.

Sé lakoua-a ki pèmèt légliz la fondé. Koua-a ki planté sou tèt mòn Gòlgota-a, nou doué fè-l pasé nan lavi nou, aksépté soufrans nou yo, kontrariété nou yo, jinnin kò nou, nou pa kapab vlé pou nou posédé byin tè-a ansanm ak byin sièl yo. Gin yon désizyon pou nou pran. Jézu minm di jénòm rich la ki té vlé suiv li-a: alé, vann tou sa-ou ginyin, bay pòv yo, épi suiv mouin, ou-a gin yon trézò nan sièl la (Mt 19,21). Yon krétyin ki pa konn métrizé kò-l, sé pa yon krétyin tout bon vré, sakréman lakonfirmasyon nou résévoua-a, li fè nou vi-n tounin sòlda. Sin Pòl di nou moun k-ap fè antrènman yo, yo fòsé kò yo fè sakrifis, pou yon ti rékonpans k-ap pasé, é nou minm ki gin yon kouròn ki pap janm finnin k-ap tann nou-an (1 Co 9,25), éské nou kapab rét kè pozé ap bay kò nou tou sa-l mandé, pou nou konprann apré sa nou gin asirans pou nou travèsé frontiè sièl la?

*

Konsa vintéinièm dimanch òdinè C-a fè kalkilé sou "universalisme". Légliz la "la pou tout moun" jan nou di nan Krédo-a. Juif yo té konprann sé yon ti gras moun k-ap sovè. Lévanjil la réponn antan li di: moun yo ap vi-n sot nan diréksion solèy lèvé, ak solèy kouché pou adoré Granmèt la (Lc 13,22-30). Prémie léktu-a minm nan dènié chapit Izayi-a (Is 66 18-21) montré kijan moun yo ap vi-n nan tout nasion pou yo vi-n adoré Granmèt la. Psòm-répons la di pou al sou tout tè-a préché lévanjil la (Ps 116/117). Tout moun sa yo mèt anpil kon yo kapab anpil, sé nan yon sèl pòtay jinnin pou yo pasé, nan yon sèl rout séré pou yo angajé, sé Jézu-Kri. Réfrin alélouya-a montré sa (Jn 14,5).

Lapè sé yon valè san frontiè. "Moun ap vi-n soti nan diréksion solèy lèvé ak solèy kouché, soti nan Nò ak nan Sid, y-ap atabé nan péyi koté Bondié Roua-a"(Lc 13,29). Nan kòmansman ané 1986 Pap Jan-Pòl II té voyé mèsaj lapè-a, antan li té insisté sou valè sa-a ki san frontiè-a. Li té fè konstaté kijan Nò kanpé an fas Sid, kijan Lès drésé an fas Louès. Li té di sé dé bra Koua-a ki pou rankontré nan sakrifis Jézu-a, li minm ki té di lè y-a lèvé-l anlè-a, l-ap rasanblé tout moun vi-n jouinn li-a (Jn 12,32). Lévanjil vintéinièm dimanch òdinè C-a (Lc 13,22-30) fè nou sonjé lapriyè pou valè lapè sa-a ki san frontiè-a. Lékòl Profèt Izayi-a di Bondié ap rasanblé tout nasion ak tout lang (Is 66,18). Li bay yon lis péyi ki réprézanté tankou yon échantiyon pou montré sé sou tout fas tè-a mèsaj lapè-a gin pou-l gayé, pou tout pèp yo vi-n tounin yon sèl fanmiy. Li nonmin Tarsis, Pout, Loud, Méchèk, Toubal, Yavan, ak zilé ki louin yo, ki pa-t jann tandé palé sou Granmèt la (Is 66,19; cf Ez 27,10-13). Li kadriyé fas tè-a. Sé konsa, jou lapannkot la, léspri Sin-an ap fè yon fason pou tou lé kinz nasion yo ki rasanblé Jérusalèm nan tandé mèsaj Apot yo nan pròp lang pa yo. Sin Luk détiyé katalòg pèp yo ba nou, antan-l nonmin yo sot nan diréksion solèy lèvé al nan diréksion solèy kouché, sot nan diréksion Nò al nan diréksion Sid (cf Lc 13,29), avèk Part, Mèd, Élam, Mézopotami, Judé, Kapadòs, Pon, Lazi, Friji, Panfili, Éjip, Libi-sirénayik, Ròm, Krèt, Arabi (Ac 2,9-11). Sé dé bra koua-a: Lès-Louès, Nò-Sid, ki rankontré nan Jézu-Kri. Légliz sé yon fanmiy ki gayé sou tout fas tè-a, san limit frontiè, léspri Sin-an pa gin bariè k-ap jinnin aksion-l. Prochin nou sé tout moun, jan Jézu déklaré nou nan parabòl Bon Samaritin-an (Lc 10,30-37). Lè Apot yo voyé Sinn nan adouat batiman-an, sou lòd Jézu ki té parèt dévan yo apré Réziréksion-l nan, yo pran sansinkantoua gro pouason (Jn 21,11). Sé yon fason pou di yo pran tout kalité pouason (cf Mt 13,42), paské lè sa-a sé sansinkantoua espès pouason yo té konnin. Légliz la la pou tout moun, sé yon filè ki ranmasé tout kalité

pouason. Sin Piè té gin yon vizion ki montré-l yon nap k-ap désann sot nan vant sièl la, ki maré nan kat kouin-l, épi ki gin tout kalité bèt kat pat ak bèt k-ap maché sou vant yo, ak tout zouazo sièl la (Ac 10,11-12). Yon voua di-l pou-l manjé, li réponn li pa konn manjé bagay ki pa pròp. Voua-a di-l sa Bondié fi-n déklaré pròp, moun pa gin doua di li sal (Ac 10,13-15). Sa répété toua foua, épi vizion-an disparèt. Lè léspri Sin tonbé sou Kònèy ak lòt payin yo ki té nan kay la, Sézarè-a, Piè konprann li pa gin doua réfizé batizé yo pou fè yo antré nan fanmiy légliz la, li konprann sans vizion-an (Ac 10,44-48; 11, 1-8). Sin Pòl di: Tout bagay pròp pou moun ki pròp (Tit 1,15). "Sé chans pou moun ki gin jé yo pròp, y-ap ouè Bondié" (Mt 5,8). Lè jé nou pròp, nou ouè Bondié nan tout moun. Sin Pòl insisté sou mèsaj sa-a: sé pou tout nasion yo promès Abraam nan yé. Légliz sé kay tout moun (Ep 2,14ss).

Pou premié janvié 1987, Pap Jan-Pòl II té bay Kòm konsign pou jouinn lapè-a: "Développement et solidarité: clés de la paix". Nan ané 1972, Pap Pòl VI té dévlopé mèsaj lapè-a avèk: "Si tu veux la paix, agis pour la justice". Pou 1984, Pap Jan-Pòl II té di: "D'un cœur nouveau naît la paix". Pou 1985, sé té: "La paix et les jeunes marchent ensemble".

Pa kapab gin vré dévlopman si pa gin solidarité, si Nò pa vlé ouè Sid, si Lès pa vlé ouè Louès. Pap Jan-Pòl II té fè sonjé sa Pap Pòl VI té di nan "Populorum progressio": "Le développement intégral de l'homme ne peut aller sans le développement solidaire de l'humanité" (Populorum progressio. 43; cf nn 44-48). Li té bay kòm égzanp pou-l montré koté dévlopman-an ak solidarité-a édé kòz lapè-a: li prezanté késion moun ki égzilé sot nan péyi yo oubyin ki pati pou dèt rézon épi k-al kaché nan lòt péyi. Li fè sonjé tou késion dèt nasion pòv yo ginyin aléga rich yo, li mété sa an rélasyon avèk mouvman moun k-ap soti nan péyi rich yo pou yo vi-n édé péyi pòv yo, sa yo rélé "coopération internationale" la. Li palé tou sou vré koz òrganizasyon k-ap simin kè soté tout koté, sa yo rélé "terrorisme" nan. Li fè sonjé tou kijan y-ap ésplouaté sa-k fèb la, sou plan lajan, sou plan sosiété, ak sou plan politik. Li di: tout bagay sa yo oblijé nou kontinué chèché dévlopman péyi yo nan yon éspri solidarité sou plan sosiété-a. Nan kòmansman ané 1986 la déjà, Pap la abòdè késion sa-a nan mèsaj li-a: " La paix comme valeur sans frontière" (nn 4,5), pou montré kijan solidarité-a sé yon lòt klé lapè. Pou premié janvié 1987, Pap la raplé sa dévlopman-an té yé an 1980. Li bay présizyon sou sans li. An minm tan li montré ki sa-k kapab édé solidarité sou tè-a jodi-a, tankou klé ala dispozision tout pèp ki gin bòn volonté, k-ap chèché louvri chémin pou yon pi bon lapè. N-ap mandé Manman Mari pou nou pa rét an déyò mouvman pèp yo k-ap chèché fè yon sèl fanmiy nan, pou malè Babèl la pa rivé (Gn 11,1-9). Min sé anndan légliz léspri Sin-an souflé

mouvman sa-a. Si Granmèt la pa bati kay la, sé pou bon tan mason yo ap travay (Ps 127,1). Sé légliz ki gin mision rasanblé pèp yo (Ps 87,5), kòm limiè nasion yo (Is 49,6; Ac 13,47; Lc 2,32), jan dokiman Konsil Vatikan II-a déklaré-a, "Lumen Gentium". Sé travay léspri Sin-an k-ap fè-l konpòté-l tankou yon Manman k-ap anfanté dèt pitit tout tan pi plis (Mt 13,31-33; Ac 2,47; 4,6; 5,14; 6,1.7; 9,31; 11,21-24; 16,5; 12,24; 13,48-49; 19,20). Dévlopman ak solidarité, sé klé lapè.

*

Késion moun nan pozé Jézu-a, li gin fondman-l nan konviksion Profèt yo té mété nan kè pèp la: Sé pa tout moun nan péyi Israèl la ki vré pèp Bondié-a. Sé moun ki fè volonté-l. Sa pa kont pou yo pitit Abraam pou yo kapab sovè. Bondié kapab fè ròch yo vi-n tounin pitit Abraam (Mt 3,9; Ps 87,4; Is 63,16). Bondié té di Sèvitè-l la: Sa pa kont pou-ou Sèvitè-m pou-ou drésé ras la, pou-ou rasanblé pitit Israèl yo; m-ap fè-ou vi-n tounin limiè nasion yo pou délivrans mouin rivé nan bout tè-a (Is 49,6). Abraam té gin pou mision pou-l vi-n papa anpil nasion (Gn 17,5). Jézu di: Lè y-a lévé-l anlè sou Koua-a ak nan sièl la, l-ap rasanblé tout moun ak tout bagay vi-n jouinn li (Jn 12,32). Youn nan karaktè légliz la sèké li sé fanmiy ki rasanblé tout pèp yo. Jou lapannkot la, Apot yo palé. Tout nasion yo konprann. Sé lé kontrè sa-k té pasé nan kay ro Babèl la, koté Bondié té brouyé langaj moun yo (Ac 2,4-6; Gn 11,7-8). Pèp Israèl la té pasé tankou nan yon pasoua pou pa-t konprann sé tit pitit Abraam nan ki t-ap sèvi yo kòm asirans pou yo sovè. Sé yon ti rès ki té rété, jan Profèt yo té anonse-a. Min ti rès sa-a poté délivrans la bay tout nasion yo. Profèt Sofoni té déjà anonse sé yon ti rès Granmèt la ap kité nan pèp la, yon ti rès ki pòv, ki pa konsidéré tèt li kòm anyin, ki pa nan fè grandizè, ki pa nan pran pòz (So 3,12). La Trè Sint Vièj ap di: Li jété jé-l sou Sèvant li-a ki pòv (Lc 1,48) La Trè Sint Vièj sé bèl ti flè ki té boujonnin sou pouint pié boua pèp Israèl la, ki donnin frui délivrans la: Jézu, k-ap sovè tout pèp sou tè-a. N-ap mandé pou-l fè nou jouinn favè pou nou rabésé tèt nou byin ba, pou nou pa pran pòz nou plis pasé pèsòn, pou nou pa konprann kabann nou déjà fi-n ranjé nan sièl la, min pou nou fè éfò donté mové tandans nou, travay pou nou antré nan pòt ki séré-a, chèché pasé nan chemin ki jinnin-an, viré do bay tout plézi ki pa kòrèk, pou nou pròpté kè nou, pou nou kapab antré koté Bondié Roua-a.

O Mari, Manman Jézu, tout pitit ou rasanblé, pou yo tout fè louanj pou ou.

Sé nan kè-ou, Mari, fanmiy Bondié rasanblé, sé ou-k ba nou Jézu, li-k Paròl Bondié, é nan kè nou sé ou minm k-anfanté li.

Mari, sou jénou-ou Bondié karésé tout pitit li yo; Mari, sé nan kè-ou Bondié konsolé ti frè Jézu-Kri.

Mari, sé nan kè-ou tout pèp yo rasanblé, sé ou ki Manman tout piti Bondié.

*

Solidaire: Ac 10,33 Ap 18,4.

Universel: Est 3,13b; Sg 16,25; Si 40,1; Ac 3,21 1 Co 4,13; He 12,23.

*

* *

VINDÉZIÈM DIMANCH ÒDINÈ A

Pèp la t-ap tann Mési k-ap vi-n délivré-l anba min lènmi-l; li rankontré Mouton ki rét an silans dévan labatoua (Jn 1,29; Is 53,7; Ex 12,5; Gn 22,13). Li jouinn gro désépsion dévan konpòtman Granmèt la. Sin Piè fi-n fè déklarasion lafoua-l osijè Mési-a, Pitit Bondié vivan-an; min lidé li té ginyin osijè Mési-a pa-t korésponn avèk réalité plan Bondié té ginyin-an (Mt 16,21-27 = Évanjil 22^{èm} dimanch òdinè A-a; cf Mt 22,51; Jn 18,19; 2 Mac 15,15; Mt 16,14). Chémin lèzòm pa chémin Bondié; lidé lèzòm pa lidé Bondié; sé distans sièl la ak tè-a ki séparé yo (Is 55,8ss).

Jérémi santi sa nan tout lavi-l, ki sèvi tankou yon modèl (Jer 20,7-9 = prémié léktu 22^{èm} dimanch òdinè A-a). Li tankou yon mouton y-ap kondui labatoua. Li pa vlé pasé nan chémin sa-a. Bondié trasé-l pou li, Bondié minnin-l nan li. Jérémi rivé jous li régrèt jou-l té fèt la (Jer 20,15; 15,10; cf Job 3,3; 7,15; 1 R 19,4; Nb 11,15; Tob 3,6; Jon 4,3.8). Li rakonté lavi-l, antan-l montré soufrans li nan pasaj yo rélé "Konfésion" yo (Jer 11,18-23; 15,10-21; 17,14-18; 18,18-23; 20,7-18).

Li kòmansé, antan-l di li té tankou yon mouton ki rét kè pozé, y-ap minnin labatoua, san-l pa konnin sa y-ap paré pou li (Jer 11,19 = prémié konfésion). Li rivé yon pouin, bouch li chapé, li di li jouinn désépsion dévan konpòtman Granmèt la (Jer 15,18 = dézièm konfésion). Li souaf, li ouè dlo k-ap koulé, li proche, li gouté, dlo-a anmè (cf Ex 15,23). Li minm mandé vanjans kont moun k-ap pèsékité-l yo (Jer 17,18 = touazièm konfésion). Ni laloua, ni Profèt, ni lasajès sanblé abandoné Jérémi (Jer 18,18 = katriyèm konfésion). Li kòm andéyò Pèp la, li pou kont li, pèsòn pap okipé sa l-ap di. Malgré tout éfò li fè pou-l abandoné mision-l, Bondié kinbé-l ladan-l nan minm sikonstans sa yo (Jer 20,9 = sinkième konfésion). Min nan tout tray sa yo Bondié toujou avèk li, paské sé li minm ki voyé-l. Li mandé pou-l gin lafoua, pou-l gin konfians.

Bondié invité nou chanjé mantalité (Rom 12,1-2 = dézièm léktu 22^{èm} dimanch òdinè A-a), pou nou pa pran modèl sou fason moun yo ap kondui tèt yo sou tè sa-a, pou nou chanjé fason n-ap pansé, pou nou réglé-l sou volonté Bondié.

Mési Pèp la t-ap tann nan, sé yon Mési politik k-ap délivré-l anba min lènmi-l, tankou Samson (Jg 13-16), Sayul (1 Sam 8,20), David (1 Sm 17; 1 Chr 21), Jozias (2 R 23), Juda Makabé (2 Mac 15). Pèlerin Émayus yo déklaré sa bay Jézu nan asouè dimanch Pak la (Lc 24,21). Patizan yo ap raplé Jézu sa jou l-ap monté nan Sièl la (Ac 1,6).

Sé lè léspri Sin-an désann sou yo y-ap konprann vré ròl yo (Ac 1,8), y-ap sèvi Jézu témouin, antan yo pran Koua yo pou yo maché dèyè-l (Mt 16,24).

Si patizan yo té insisté antan yo té nonmin **Jérémi** nan lis moun yo yo t-ap tann kòm Mési-a (Mt 16,14; konparé avèk Mc 8,28 épi Lc 9,19), sé paské Jérémi té parèt nan rèv dévan Juda Makabé, li té rinmèt li yon **épé** an lò, li té di-l: "Pran épé sa-a ki sin-an, sé yon kado Bondié; avèk li ou-ap krazé lènmi-ou yo!" (2 Mac 15,16), kòm Sin Matié orianté lévanjil li-a sou **Rouayòm Sièl la**, li konsèvé non Profèt J é r é m i, pou amòsé limiè sou vré Rouayom nan.

Apot yo ap pran épé pou yo défann Jézu nan jadin Jétsémani-an, san yo pa konprann sé an parabòl Jézu t-ap palé avèk yo (Lc 22,36.38). Jézu ap fè yo konprann moun ki sèvi ak épé, l-ap péri ak épé (Mt 26,51-54 = Gn 9,6; cf Jn 18,31). Sé pa chémin sa-a Bondié Papa-a trasé pou li.

N-ap mandé Manman Mari pou nou pran pasians, antan n-ap sèvi Jézu témouin, minm si tan-an parèt long, tankou pou Jan-Batis nan prizon-l nan (Mt 11,3). Nan tan Bondié maké-a, l-ap aji vit (Is 60,22).

*

* *

VINDÉZIÈM DIMANCH ÒDINÈ B

Détéronòm di pou yo pa ajouté anyin nan paròl yo, pou yo pa ouété anyin nan yo (Dt 4,2: cf premié léktu 22^e dimanch òdinè B: Dt 4,1-8; cf Ap 22,18s). Jézu ap réproché Farizyin yo ak Juif yo k-ap toufé Paròl Bondié-a avèk abitud pa yo (Mc 7, 1-23 = Évanjil 22^e dimanch òdinè B). Psòm-répons la éspliké nan ki sans Bondié égzijé pou nou pròpté anvan nou proché koté-l: sé parapò a kè-a: jistis, vérité, pa fè manti, pa fè abi, pa praté lajan pou gro intèrè, pa kondané inosan pou avantaj pèsonèl (Ps 14 = 15). Sé mòd jan nètouayaj sa-a Jézu mét dévan jé Farizyin yo ak Juif yo, lè-l détayé katalòg péché yo: adiltè, mové plézi, touyé moun, vòlè, rinmin lajan, méchansté, manti, mové konduit, mové jé, sèman, lògèy, gro lidé (Mc 7, 21-22). Li mandé pou pa jijé moun sou aparans. Sin Jak ap prezanté kondision vré rélijion ki nèt, ki san tach, dévan Bondié Papa-a: vizité òfélin yo ak vèv yo nan tray yo, kinbé kè nou san tach louin tè sa-a (Jc 1,17-27; dézièm léktu 22^e dimanch òdinè B). Konsa li mandé nou pou nou obéyi Paròl Bondié-a, pou nou pa rét ap kouté-l sèlman, ap tronpé tèt nou.

Laloua Bondié-a sé Sajès, li fè Bondié vi-n tou pré nou (Dt 4, 1-8: premié léktu). Nou pa doué ranplásé-l avèk lansègnman lèzòm, abitud pa nou (Mc 7, 1-23: Évanjil). Nou doué antré anndan fon kè nou, koté paròl la planté nan nou-an (Jc 1,17-27: dézièm léktu), pou nou égzaminé konsians pa nou, san nou pa bézouin rét ap jijé lézòt, ki pa gin minm konpòtman avèk nou. Konsa n-a kapab abité kot Bondié (Ps 14 = 15: Psòm-répons).

*

Nou rékòmansé léktu lévanjil Sin Mak la nan chapit 7. Nou té kité-l nan chapit 6 la dépi sèzièm dimanch òdinè B, lè nou té pasé nan chapit 6 sin Jan-an, ki palé sou mirak pin yo avèk lansègnman sou lékaristi-a pandan 5 dimanch ki sot pasé yo (17^e, 18^e, 19^e, 20^e, 21^e dimanch òdinè B), nan plas Mak 6, 33-44 ki palé sou minm mirak la, min yon fason pi kout, san-l pa bay lansègnman sou lékaristi-a yon fason dirèk. Konsa apati 22^e dimanch la, nou retounin nan lévanjil Sin Mak la, n-ap kontinué li-l nan ané B-a. Nan 22^e dimanch la, Farizyin yo vlé pran Jézu nan pièj sou kèsion détay laloua, pa tèlman sa ki ékri nan labib la, min dòt abitud Juif yo ajouté épi ki vi-n tèlman anpil sé toufé yo rét yon pouin pou yo toufé vré égzijans laloua-a ki ékri-a épi ki réalizé nan sèl ti kòmandman sa-a, dapré sa Sin Pòl di-a: Sé rinmin-an (Rom 13,9; cf Ga 5,14).

Jézu palé rèd avèk Juif yo, li di yo, yo kité kòmandman Bondié yo akoté, yo kolé kò yo sou abitud lézòm, yo mété abitud sa yo nan plas labib la.

Nou doué fè atansyon pou nou pa ranplase kòmandman Bondié yo avèk pròp abitud pa nou, pròp préokipasyon pa nou. Nou pa doué pran lévanjil la ak labib la tankou yon avoka pou défann kòz nou ki fi-n byin chita, min sé pou nou fè kò nou tou piti pou nou kite lévanjil la ak labib la kèsioné nou, chanjé abitud nou, koupé rasi-n oriantasyon nou ki pa kadré ak plan Bondié-a. Otréman sé nan bouch sèlman n-ap respékté Bondié, min kè nou ap louin-l. Sé kòm si nou ta vlé pou sé li minm ki fè volonté nou, san nou pa pliyé kò nou pou nou fè volonté pa-l, ki jinnin nou. Gin paj labib nou t-a pito pa janm viré, paské yo akizé nou; époutan sé pou nou kite limiè Bondié-a troublé fènoua konsians nou, pou nou kite Paròl li-a chiré kè nou, pou nou chanjé mantalité. Gin anpil moun sé bagay sou pa déyò y-ap konsidéré sèlman, min sa-k anndan fon kè-a, yo pa ba-l inpòtans; époutan sé la sous la yé; si nou pa pròpté sous la, lariviè-a ap sal.

*

Sin Pòl di Tit: "Tout bagay pròp pou moun ki pròp" (Tit 1,15). Sèké dépi yon moun gin kè-l pròp, li ouè Bondié tout koté, jan Jézu té di nan premiè prèch li-a: "Sé chans pou kè ki pròp yo, y-ap ouè Bondié" (Mt 5,8). Farizyèn yo gin yon gro bout boua nan jé yo, y-ap chèché ouété ti pay la ki nan jé frè yo-a (Mt 7,3; Jn 8,7; cf Mt 23, 1-32). Jézu éspliké nou sé sa-k soti nan fon kè-a, sé sa ki sal moun nan. Sé sou frui-a yo jijé kalité pié boua-a (Mt 7,16; Lc 6,43; Jc 3,12; Si 27,6). Jézu drésé yon katalòg péché pou sèvi nou jalon, pou nou kapab obsèvé koté mové léspri-a soti. Sé: lisans, vòlè, touyé moun, adiltè, rinmin lajan, méchansté, rizèz, libètinaj, lanvi, tripotaj, lògèy, aksion ki pa gin sans (Mc 7,21-23; cf Mt 15,19; Rom 13,13; 1 Co 5,10-11; 6,9-10; 2 Co 12,20; Ga 5,19-21; Ep 4,31; 5,3-5; Col 3,5-8; 1 Tm 1,9-10; 6,4; 2 Tm 3,2-5; Tit 3,3; 1 p. 4,3; Ap 21,8; 22,15). Sé yon lis péché ki sèvi nou tankou yon griy, pou nou pasé lachò-a nan tami, pou nou séparé-l avèk ti ròch yo. Jézu té di: moun ki kouè nan li, yon sous ap koulé sot nan kè-l (Jn 7,37). Sé léspri Sin-an k-ap lavé tou sa ki sal (Ez 36,25-26). Sé léspri Sin-an, dlo pròp sa-a, ki sèvi nou tankou yon nouvo laloua ki ékri nan kè nou, nan plas laloua ki té ékri sou galèt ròch yo (Jer 31,33).

Liv Détéronòm nan palé nou osijè laloua-a. Li mandé pou pa ajouté anyin ni ouété anyin ladan-l (Dt 4,2; cf Ap 22,18-19). Min Juif yo vlopé laloua sa-a avèk yon pakèt égzijans yo ajouté (Mc 7,2-6) ki fè laloua-a vi-n lou pou obsèvé (Ac 15,10; Ga 5,1; Lc 11,46; Mt 23,4; Mc 11,28), avèk tout bann obligasyon yo yo mété an plis la.

Bondié pròpté kè nou ak lafoua (Ac 15,9). Sé nan sans sa-a li ouété voual la ki té fèmin kè nou-an (Dt 30,6; 10,16; Jer 32,40; 4,4; 2 Co 3, 13-16; Mc

15,38). Si kè nou pròp, nou ouè Bondié nan tout sikonstans. Sin Pòl di: moun ki rinmin prochin-l, li réalizé laloua-a (Rom 13,8). Charité-a, sé tout laloua-a, ki ranmasé ladan-l (Rom 10,10). Nou pa gin pou nou drésé yon bariè sou pa déyò pou nou an règ avèk yon fòm, antan nou kité fon-an ap pouri (Mt 23,27). Sin Pòl avèti nou nan Lèt Galat yo. La-a tou li pran tan-l drésé yon katalòg péché ki raplé nou sa Jézu di nou nan finisman lévanjil 22^e dimanch òdinè B-a (Mc 7,21-22). Li détayé: mové plézi, libètinaj, lisans, sèvis zidòl, maji, rayisans, kont, jalouzi, kòlè, diskision, dézakò, séparasion, lanvi, dévègondaj, dézafi, ak tout bagay nan sans sa-a (Ga 5,19-21). Li invité nou pou nou pa jijé sou laparans, min pou nou gadé nan fon kè, koté léspri Sin-an abité-a avèk: lacharité, kè kontan, lapè, pasians, sèvis, bon kè, konfians nan lòt yo, dousè, otorité sou mové tandans yo (Ga 5,22-23). Sin Pòl di: kont kalité sa yo pa gin laloua k-ap fè konkirans (Ga 5,23). Sé léspri Sin-an k-ap sèvi kòm laloua (Ga 5,18).

Sin Mak mandé nou, nan dézièm léktu 22^e dimanch òdinè B-a, pou nou pa kontanté nou kouté paròl Bondié-a sèlman, min pou nou réglé lavi nou sou li nan lacharité, antan nou édé òfélin ak vèv yo, épi antan nou kinbé kò nou pròp nan mitan sièk sa-a (Jc 1,22.27).

Sin Pòl ap di Romin yo: Bondié mété laloua-a nan kè yo, min yo sal kè yo, yo avili kò yo, avèk: tout kalité bagay ki pa kòrèk, méchansté, rinmin lajan, movèz foua, mové plézi, lanvi, touyé moun, kont, rizèz, atachman nan sa-k mal, sal répitasion moun, tripotaj, lènmi Bondié, arogans, lògèy, prétansion, tranzaksion pou mal, rébèl kont paran, aksion ki pa gin bon sans, manti, san kè, san pitié (Rom 1,29-31).

Tout lis péché sa yo Sin Pòl drésé nan lèt Galat (Ga 5,19-21) avèk nan lèt Romin (Rom 1,29-31), sé yon invitasion pou sispann voyé jé gadé sa prochin-an ap fè pou jijé-l sou laparans, pou okontrè nou antré anndan fon kè nou pou nou ouè koté nou manké parapò a vré laloua Bondié-a, léspri Sin-an nou résévoua nan batèm nou-an, k-ap pròpté kè nou-an. Dé lèt sa yo Sin Pòl ékri yo, ni Galat, ni Romin, sé jistéman pou mété laloua-a nan vré ròl li, pou montré plas léspri Sin-an. Sa pèmèt nou konprann diskision Jézu té ginyin avèk Farizyin yo épi sans répons li ba yo-a, antan-l palé osijè lis péché yo ki sal fon kè nou-an (Mc 7,20-23).

Chak soua anvan nou kouché, li bon pou nou pran abitud antré anndan fon kè nou, pou nou fouyé konsians nou, antan nou édé mémoua nou avèk lis sa yo, pou nou ouè koté nou fè fo-pa, pou nou rédrésé, pou nou pa rét ap fè tripotaj sou do lòt moun, pou nou pa prétann vlé drésé tout bagay ak tout moun, antan n-ap chèché ouété ti pay la ki nan jé yo-a, pandan nou minm nou gin

yon gro bout boua nan jé pa nou (Mt 7,3). Mouins nou foyé konsians nou, sé plis kè nou ap fèmin, sé plis voual la ap kouvri-l. N-ap tankou avèg k-ap chèché kondui avèg. Ni nou minm, ni moun n-ap chèché kondui yo, nou tout n-ap tonbé nan falèz (Mt 15,14; Lc 6,39). Sé pou nou sispann joué ak respè Granmèt la. Bondié pa ti moun k-ap joué kannik avèk nou nan pousiè-tè. Sé pasians li ginyin. Nou pa doué sèvi mal ak pasians li-a. Sé tan li ba nou pou nou chanjé mové fason n-ap viv la (Lc 13,6-9). Nou doué pran sa osérié.

Sin Pòl invité nou, nan prémié lèt Korintyin yo, pou nou maché nan limié gro lajounin, antan nou kondui tèt nou avèk respè, pou nou sispann ap maché nan fènoua nannuit, koté ki gin: dézafi, libètinaj, dévègondaj, kont, jalouzi (Rom 13,13). Sin Pòl rivé minm yon pouin li mandé nou pou nou sispann frékanté moun ki poté non krétyin, épi, malgré sa, "yo nan mové plézi, yo rinmin lajan, y-ap sèvi zidòl; y-ap fè arogans, yo pran abitud ap bouè bouason fò, y-ap pran byin moun". Li di pou nou pa minm manjé ak moun sa yo (1 Co 5,11). Li pa palé pou payin. Li palé pou moun ki souadizan di yo sé krétyin (1 Co 5,10.12-13). Li di pou ouété sa-k mové-a sot nan mitan nou (1 Co 5,13; Dt 13,6). Li fè sonjé sa-k té konn pasé nan lansyin Téstaman, lè yo té konn ouété moun sa yo nan pèp Bondié-a, dapré règléman liv Détéronòm nan té konn pasé osijè sa yo rélé "éskominkasyon"-an. Sé yon fason pou nou éskominié moun sa yo.

Pliziè foua, réyèlman vré, liv Détéronòm nan rétownin sou sa, antan-l di: Sé pou-ou ouété mal la sot nan mitan-ou (Dt 13,6; 17,7,12; 19,19; 21,21.22.24; 24,7; cf 19,13; 21,9; Jg 20,13). Sé sa yo rélé laloua "bi arta", sa vlé di laloua "éskominkasyon", laloua séparasion. Kapab rivé yon pouin, réyèlman vré, yo blijé ouété zoranj pouri-a sot nan panié-a, pou-l pa gaté tout pil zoranj la. Min anndan kè chak moun gin kèk rasi-n mové kalité sa yo ki tout tan ap jèmin pouazon ki ménasé fè lavi Bondié-a pèdi valè-l nan nanm nou. Nou blijé gadé anndan fon kè nou, pou nou nètouayé-l, anvan nou obsèvé konduit lòt moun. Si jé kè nou pa klè, kòman nou kapab fè ouè pou nou jijé lòt yo, parapò a sa-k byin ak sa-l mal? Sin Pòl di nou pou nou pa tronpé tèt nou, antan n-ap chèché rout ki kondui nan péyi kot Bondié Roua-a. Li di Korintyin yo nou pap jouinn rout sa-a nan kalfou "mové plézi, sèvis zidòl, adiltè, libètinaj, konduit sal, vòlè, rinmin lajan, pran abitud bouè bouason fò, arogans, pran byin ki pa pou nou" (1 Co 6, 9-11). Tou sa sé jalon pou indiké nou koté rout la gin falèz ak mové pa. Li avèti korintyin yo l-ap vi-n vizité yo. Li déja voyé avèti yo sou ki pouin pou yo égzaminé konsians yo, pou-l pa nan kont ak yo: dézakò, jalouzi, kòlè, diskision, manti sou do moun, tripotaj, arogans, dézòd, konduit sal, mové plézi, lisans (2 Co 12,20-21). Si

yon moun pran abitud fouyé konsians li chak soua sou tout pouin sa yo, li pap nan kontravansyon avèk Bondié, lè Bondié ap vi-n vizité-l pou-l jijé-l nan dènié jou lavi-l, paské dòmi sé ti frè lanmò. Sé pou-l aprann ranjé kabann li bonè, avan dòmi nan jè-l.

Sin Pòl prévoua mouvman kòlè kapab chapé nou. Li di Éfézyin yo pou nou pa kite solèy la kouché sou kòlè nou (Ep 4,26; cf Ps 4,5; Mt 5,22). Li mandé nou an tou ka pou nou pa fè léspri Sin-an lapinn avèk kè vinèg, gro san, kòlè, rélé fò, jouré (Ep 4, 30-31). Tout bagay sa yo, li mandé pou raché yo sot nan kè nou tankou rasi-n chyindan nan jadin mayi. Sé mal la ki parèt sou divès kalité fòm. Li di ata non bagay sa yo, li pa vlé pou yo sòti nan bouch nou: mové plézi, tout fòm dévègondaj, rinmin lajan, gro mo, bagay ki pa gin bon sans, plézantri ki sal (Ep 5, 3-4), paské ni moun k-ap fè mové plézi-a, ni sa-k nan libètinaj la, ni sa-k rinmin lajan-an, ki tankou moun k-ap sèvi zidòl la, yo youn pap éritié péyi kot Jézu-Kri Roua-a (Ep 5,5). Sin Pòl mandé Kolosyin yo pou nou gin otorité sou kò nou, antan nou touyé jèm rasi-n péché-a ap donnin-an nan mové plézi, konduit ki sal, mové atirans, lanvi sou bagay ki pa pròp, rinmin lajan, ki tankou sèvi zidòl, kòlè, gro san, movèz foua, jouré, gro mo, manti (Col 3,5-9), pou nou ouété moun lontan-an ak tout konduit li sot sou nou, pou nou abiyé nou ak moun nouvo-a, ki pòtrè ak Bondié-a (Col 3, 9-10).

Sin Pòl montré Timoté vré ròl laloua-a ki sèvi pou jijé moun ki réfizé obéyi, k-ap fè rébèl, ki méchan, k-ap drivé nan péché, k-ap fè sakrilèj, k-ap dérèspékté afè Bondié, k-ap touyé papa yo, k-ap touyé manman yo, k-ap asasinin moun, ki nan dévègondaj, k-ap fè mové rélasyon avèk moun ki gason parèy yo oubyin ki fi parèy yo, k-ap vann moun, k-ap bay manti, ki pa réspékté garanti yo fi-n bay sou pròp paròl yo, ak pou tou sa-k nan kontradiksyon avèk vré lanségnman-an (1 Tm 1, 9-11). Li mandé pou évité: lanvi, dézakò, jouré, mové dout sou moun, diskision ki pa kapab fini (1 Tm 6, 4-5). Li di sé konsa nan dènié tan yo moun yo ap égoyis, rinmin lajan, grandizè, fè lògèy, bay manti sou do moun, fè rébèl aléga paran yo, ingra, fè sakrilèj, san kè, san pitié, tripòt, fè libètinaj, réfizé chanjé konduit, lènmi sa-k byin, dénonse moun, san réspè pou granmoun, kite lògèy fèmin jé kè yo, pi zanmi mové plézi pasé zanmi Bondié, pran rélijyon-an pou kouvèti antan yo réjité fòs li (2 Tm 3, 2-5). Moun sa yo tou, Sin Pòl mandé Timoté pou-l évité yo (2 Tm 3,5). Sé yon fòm éskominikasyon. Li fè Tit sonjé lontan nou minm tou nou té san bon sans, rébèl, pèdi bon chémin, ésklav yon pakèt mové tandans ak plézi, ap viv nan méchansté ak lanvi, nou té mérité yo rayi nou, nou youn té rayi lòt (Tit 3,3). Min Jézu lavé nou nan batèm nan, li réfè nou nan léspri Sin-an pou nou posédé éritaj lavi ki pap janm fini-an (Tit 3,

4-7). Sin Piè di nou nou pa doué tounin nan konduit lontan-an ankò, avèk libètinaj, mové tandans, bouè jous nou sou, fèt koté yo manjé dépasé mézi, fèt koté yo bouè dépasé mézi, sèvis zidòl (1 P 4,3). Sèké Jézu-Kri soufri nan kò-l pou nou, nou minm tou sé pou nou gin otorité sou kò-a, pou nou kasé kontra péché-a, pou nou viv dapré volonté Bondié (1 P 4,1-2). Lè sièl nouvo-a ak tè nouvo-a ap parèt (Ap 21,1), moun ki lach yo, ki abandoné lafoua yo-a, ki pèvèti yo, ki asasin yo, ki gin konduit sal yo, k-ap fè maji yo, k-ap sèvi zidòl yo (Ap 21,8), éritaj yo sé nan létan difé ak souf k-ap boulé-a, sé dézièm lanmò-a (Ap 21,8), rad yo pap lavé pou yo kéyi nan pié boua lavi-a, pou yo antré nan pòt lavil la, sé déyò y-ap rété: gason ki gin métié fè mové plézi nan sérémoni sipèstision yo, sa k-ap fè maji yo, sa-k gin konduit sal yo, sa-k asasin yo, sa k-ap sèvi zidòl yo, ak tou sa k-ap pran plézi fè sa-k mal yo (Ap 22,14-15).

Tout bagay nèt pou moun ki nèt (Tit 1,15). La Trè Sint Vièj Mari Imakilé, san yon tach. Antan nou koulé nou nan li, l-ap pèmèt nou ouè tout bagay pròp avèk jé kè nou pròp, pou nou ouè Bondié nan prochin nou. Sé chans pou kè ki pròp yo, y-ap ouè Bondié (Mt 5,8). Anvan nou proché pou nou **konfésé** nan min Pè, li bon pou nou fouyé konsians nou, pou nou ouè si nou gin gro péché. Si nou pa jouinn gro péché, omouin n-a jouinn ti péché. Nou pap pran pòz inosan nou, antan nou sonjé labib di: "moun ki kòrèk la, li tonbé sèt foua épi li rélvé" (Pr 24,16), sa vlé di nou tout nou sé péchè, min Bondié padonnin nou, li soutni nou, li réfè nou tout tan, cf Jòb 5,18.

Avan nou proché pou nou **kominié** sé pou nou mandé Bondié padon pou ti péché nou, antan nou frapé léstomak nou, nou di: "Granmèt, mouin pa mérité ou antré lakay mouin, min di yon sèl ti paròl é nanm mouin va géri" (cf Mt 8,8). Anvan Pè-a kòmansé lanmès, li toujou fè yon ti moman silans pou invité nou rékonèt nou sé péchè, pou nou mandé Bondié padon. Moun ki bésé tèl li, li touché kè Bondié. Bondié lévé-l anlè (Lc 18,9-14; cf 1, 51-52).

*

Katalòg péché: Mc 7, 21-23; Mt 15,19; Rom 13,13; 1 Co 5, 10-11; 6,9-10; 2 Co 12,20; Ga 5,19-21; Ep 4,31; 5, 3-5; Col 3, 5-8; 1 Tm 1,9-10; 6,4; 2 Tm 3, 2-5; Tit 3,3; 1 p. 4,3; Ap 21,8; 22,15; Ps 15,2-5: lisans, vòlè, touyé moun, adiltè, rinmin lajan, méchansté, rizèz, libètinaj, lanvi, tripotaj, lògèy, aksion ki pa gin bon sans, mové plézi, sèvis zidòl, maji, rayisans, kont, jalouzi, kòlè, diskision, dézakò, séparasion, dévègondaj, dézafi, movèz foua, atachman nan sa-k mal, sal répitasion moun, lènmi Bondié, arogans, prétansion, tranzaksion pou mal, rébèl kont paran, manti, san kè, san pitié,

bouason fò, pran byin moun, conduit sal, manti sou do moun, dézòd, kè vinèg, gro san, rélé fò, jouré, gro mo, plézantri ki sal, mové atirans, lanvi sou bagay ki pa pròp, réfizé obéyi, rétin drivé nan péché, sakrilèj, dérespékté afè Bondié, touyé papa, touyé manman, mové rélasion avèk moun ki gason parèy yo oubyin ki fi parèy yo, vann moun, pa respékté garanti yo fi-n bay sou pròp paròl yo, kontradiksion avèk vré lanségnman-an, mové dout sou moun, égoyis, grandizè, ingra, réfizé chanjé conduit, lènmi sa-k byin, dénonné moun, san respè pou granmoun, pran rélijion-an pou kouvèti antan yo réjité fòs li, pèdi bon chémin, ésklav yon pakèt mové tandans ak plézi, fèt koté yo manjé dépasé mézi, fèt koté yo bouè dépasé mézi, lach, abandoné lafoua-a, pèvèti, métié fè mové plézi nan sérémoni sipèstision, pran plézi fè sa-k mal, prété lajan pou gro intèrè, aksépté kado sou do inosan.

Kòmandman Bondié yo

Yon sèl Bondié pou-ou adoré, pou-ou rinmin-l avèk tout kè-ou
 Non Bondié pou-ou respékté, pa fè sèman pou granmési
 Jou dimanch pou-ou obsèvé, antan-ou sèvi Bondié fidèl
 Papa-ou ak manman-ou pou-ou respékté pou-ou kapab viv byin lontan
 Okinn moun ou pa gin doua touyé, ni ak pròp min-ou, ni ak volonté-ou
 Mové plézi ou pa doué fè-l, ni nan kò-ou ni nan konsantman-ou
 Byin prochin-ou ou pa doué pran-l, ni kinbé-l san okinn rézon
 Sou do prochin-ou pa fè manti, ni tripotaj pa rapòtè-l
 Plézi lachè ou pap anvil-l, sof lè-ou rivé marié sèlman
 Sou byin prochin-ou pa mét lidé-ou, pou-ou t-a kapab pran-l san rézon.

Kòmandman légliz yo

Jou dimanch pou-ou respékté, ni jou fèt dobligasion
 Minm jou sa yo pou-ou al lamès, pou-ou asisté-l avèk tout kè-ou
 Jou pou-ou fè jèn, fò-ou obsèvé-l, ni jou pou-ou pa manjé piès viann
 Tout péché-ou fò-ou konfésé, omouin yon foua chak ané
 Bondié Sovè-ou pou-ou résévoua, omouin a Pak kòrèktéman.

*
 * *

VINDÉZIÈM DIMANCH ÒDINÈ C

Vindézièm dimanch òdinè C-a fè nou réfléchi sou sa yo rélé "HUMILITÉ"-a. Li montré kijan moun ki rabésé tèt li tankou Piblikin-an, Bondié lévé-l anlè; min moun ki lévé tèt li tou, tankou Farizyin-an, Bondié fè-l bésé-l atè (Lc 14,1.7-14). Jézu prezanté pròp tèt li kòm modèl nan réfrin pou Alélouya-a (Mt 11,29), antan li di kè-l tou pòv. Liv Sirasid la (Si 3,19-21.30-31) mandé pou nou rabésé tèt nou, pou nou kapab jouinn favè dévan Bondié. N-ap sonjé kijan la trè Sint Vièj Mari té jouinn favè sa-a, li minm minm li té di nan Magnifikat la kijan Granmèt la voyé jé-l sou Sévant li ki pòv. Psòm-répons la (Ps 67 = 68) montré kijan Bondié paré kay pou pòv la. N-ap mandé-l pou kè nou toujou pòv.

*

Nan Magnifikat la, la Trè Sint Vièj Mari té di: "Li jété sa-k gin pouvoua yo sot sou fotèy yo, li lévé sa-k pòv yo anlè". Sé sa lévanjil 22èm dimanch òdinè C-a di tou: "Tout moun k-ap lévé tèt li, y-ap rabasé-l; moun ki rabésé tèt li, y-ap lévé-l". Prémié léktu-a bay minm mésaj la, antan-l di nan liv Sirasid la: "Plis ou gran, plis sé pou-ou rabésé tèt ou nan tout bagay. Konsa dévan Bondié ou-a jouinn favè". Jézu té bay Apot yo léson sa-a, lè yo t-ap fè diskision pou prémié plas la. Li té rélé yon ti moun tou piti, li té mété-l nan mitan yo, li té di yo si yo pa vi-n tankou ti moun piti sa-a, yo pap antré nan péyi koté Bondié Roua-a. Lè yon moun rabésé tèt li, li mété dispozision nan kè-l pou-l résévoua favè Bondié. Lè-l lévé tèt li, li fèmin kè-l, pa gin koté pou favè Bondié yo pasé. Nan dénié Soupé-a, Jézu té pran yon sèvièt, li té maré nan tay li, li té pasé dévan tout Apot yo, li té lavé pié yo. Jès sa-a Pè-a réfè chak Jédi-Sin-an, li montré grandè kalité sa-a yo rélé "Humilité"-a. Sé tankou yon téstaman Jézu kité pou nou, pou nou fiksé jé nou sou dènié jès li fè-a avèk Kominoté-l la. Li di yo rélé-l Chè ak Mèt; sé sa li yé vré. Min li konpòté-l nan mitan yo tankou moun k-ap sèvi. Li di yo sé konsa pou yo minm tou youn fè parapò a lòt. Nan Lèt Sin Pòl ékri Filipyin yo, li mandé yo pou chak moun konsidéré lòt yo pi plis pasé pròp tèt pa-l. Sé konsa pou yo kinbé bon rélasyon nan kominoté-a. Li bay égzanp Jézu-Kri, pitit Bondié-a, minm kondision ak Bondié, ki rabésé tèt li, ki vi-n obéyi jous li mouri lanmò lakoua, tankou yon ésklav, sé poua Bondié, lévé-l anlè, li ba-l yon non ki pi ro pasé tout non ki ginyin, pou o non Jézu sa-a tout jénou plouayé nan sièl, sou tè ak anba tè, pou tout lang déklaré li sé Granmèt pou bèlté Bondié Papa-a (Ph 2,6-11). Kalité sa-a yo rélé "Humilité"-a, sé li minm labib rélé "kondision pòv" la. Nou tankou pòv dévan Bondié. Té gin yon group moun nan lansyin Téstaman yo té rélé "anawim" (עַנְוִיִּם), sa vlé di "pòv Bondié yo".

Sé nan group sa-a Profèt yo té anonsé Mési-a t-ap vini. Anpil moun t-ap tann yon Mési k-ap vi-n ranpòtè laviktoua sou lènmi yo, pou-l réfè péyi roua David la (Lc 24,21; Ac 1,6; Mt 11,3; Jn 12,13; Mt 21,9; Mc 11,10). Min lè Jézu vini, sé yon pòv ti Mouton yo ouè (Jn 1,29), ki pa louvri bouch li, ki poté péché tè-a, ki kité yo kondui-l labatoua (Is 53,7; 42,2). Sé fason sa-a li chouazi pou-l sovè pèp li-a. Li fè ladésant nan kè moun ki pi pòv la, la Trè Sint Vièj Mari, ki réprézanté tout pèp lansyin Téstaman-an nan pòsion-l ki pi pòv la, dapré sa Profèt yo té anonsé-a.

Si kè nou pòv, sé nòm al pou nou santi nou atiré nan diréksion moun ki pòv yo parapò a sosiété-a, moun ki pa gin dékoua pou yo soutni lavi kò yo, moun ki pa jouinn plas yo nan group k-ap dirijé yo, moun ki fèb pa rapò a sa k-ap profité tiré intèrè sou yo, dapré sa Pap Jan-Pòl II dépayé pou nou nan mèsaj jounin lapè premié janvié 1987 la: "Dévlopman ak solidarité, klé lapè". Si nou pòv nan kè nou, n-ap santi nou gin solidarité avèk pòv yo, ki jinnin sou kèsion lajan, ki jinnin sou kèsion sosiété, ki jinnin sou kèsion politik. Sé nòm al pou nou mété nou akoté yo, pou nou résévoua yo, pou nou gin lodas invité yo, jan lévanjil 22èm dimanch òdinè C-a di-a. Psòm-répons la di: Bondié sé Papa òfélin yo, sé jij k-ap pran défans vèv yo, li fè pòv yo abité nan yon kay, li kondui prizonié yo nan richès. Bondié konn bay, sé nou minm ki pa konn séparé. Konpòtman Bondié ginyin pou pòv yo, li mandé nou pou nou sèvi-l intèmediè, pou fè-l pasé nan koté n-ap viv nou minm, pou nou pa di yon paròl ak bouch nou épi n-ap gin yon lòt konduit nan lavi nou. Si nou pòv nan kè nou, nou doué gin solidarité avèk pòv yo lajan-an pa sèvi-a, avèk pòv yo sosiété-a pa okipé-a, avèk pòv yo politik la pa intèrésé-a. Invité yo lakay nou, sé ba yo plas nan kè nou, poté difikilté yo, édé yo jouinn chémin pou maché sou rout Bondié trasé pou yo-a. Sa pa vlé di n-ap fè lagè kont pèsòn. Jézu pa voyé nou batay. Li di Piè rinmèt épé-a nan fouro-l. Moun ki vidé san lòt, yon lòt ap vidé san pa-l tou (Mt 26,52; Gn 9,6). Nou pa jij pou nou kondané, pou nou tiré vanjans. Sèlman nan fason n-ap kondui tèt nou, nou sèvi yon pankat pou nou indiké vré chémin sièl la, koté-l pasé.

Sé chans pou moun ki pòv yo, paské péyi koté Bondié Roua-a, sé pou yo li yé (Mt 5,3; Lc 6,20).

N-ap mandé Manman Mari, Manman pòv yo, pou-l ba nou lodas sa-a pou nou aksépté montré tout moun ki kalité mòd zanmi nou ginyin, pou yo kapab réfléchi nan fon kè yo ki chanjman yo gin pou yo fè tou, pou yo rankontré Granmèt la koté-l pi rinmin rété-a, nan mitan sa-k pòv yo, li minm ki té di nan premié prèch li té fè Nazarèt la: "Léspri Granmèt la sou mouin, li sakré-m, li voyé-m poté Bòn Nouvèl la bay pòv yo" (Lc 4,18). Konsa nan

finisman lévanjil 22èm dimanch òdinè C-a, n-ap sonjé li di: "Lè-ou ap fè yon résépsion, invité pòv yo, malad yo, sa k-ap bouaté yo, avèg yo" (Lc 14,13).

Épi lè n-a gin pou nou rankontré-l nan dènié jou-a, l-a raplé nou nou té déjà fè konésans avèk li, lè-l té grangou, nou té ba-l manjé; lè-l té souaf, nou té ba-l bouè; lè-l té étranjé, nou té résévoua-l; lè-l té ni-kò, nou té abiyé-l; lé-l té malad, nou té vizité-l lè-l té nan prizon, nou té vi-n koté-l.

L-ap di nou: "Vi-n antré koté-m, pou nou fè kè-n kontan. Lè-m pa-t gin manjé, sé mouin minm minm nou té nourri; lè-m pa-t gin santé, sé mouin minm minm nou té réfè. Lè-m pa-t gin sipò, sé mouin minm minm nou té soutni; lè-m pa-t gin fanmiy, sé mouin minm minm nou té pòté. Lè-m pa-t gin mari, sé mouin minm minm nou té défann; lè-m pa-t gin péyi, sé mouin minm minm nou té kaché. Lè-m pa-t gin kouraj, sé mouin minm minm nou té édé; lè-m pa-t gin lonè, sé mouin minm minm nou té drésé. Lè-m pa-t gin zanmi, sé mouin minm minm nou té chouazi; lè-m pa-t gin limiè, sé mouin minm minm nou té kondui. Lè-m pa-t gin éspoua, sé mouin minm minm nou té lévé; lè-m pa-t gin pasians, sé mouin minm minm nou té kalmé. Vi-n antré koté-m, pou nou fè kè-n kontan!".

*

La Trè Sint Vièj Mari té di: "Li voyé jé sou Sèvant li ki pòv... Li lévé sa ki pòv yo anlè". (Lc 1,48,52). Jézu invité nou vi-n jouinn li, paské li gin kè-l tou pòv (Mt 11,29). Sé konsa lè-l fèk kòmansé ap préché sou mòn nan, li di: "Sé chans pou moun ki pòv nan kè yo" (Mt 5,3). Profèt Sofoni té anonsé sé yon ti rès tou pòv nan pèp Israèl la k-ap rété pou résévoua délivrans la, pou transmèt li (So 3,12). Jézu té di nan prémié prèch li té fè nan kay réyinion Nazarèt la: "Léspri Granmèt la sou mouin, sé poua li sakré-m, li voyé-m poté Bòn Nouvèl la bay pòv yo" (Lc 4,18; Is 61,1ss)

Pòv labib la palé yo, sé moun ki gin kapasité pou résévoua méyaj Bondié-a avèk yon kè sinp, yon kè tankou ti moun piti, ki pa konsidéré tèt yo pou anyin, ki pa nan pran pòz, ki pa bazé sou grandè konésans yo, sou valè richès yo, sou ran yo ginyin nan sosiyé-a, sou aksion yo réyalizé, min ki konnin sé sinp sèvitè yo yé dévan Granmèt la ak dévan lèzòm. Sé konsa la Trè Sint Vièj Mari rélé pròp tèt li: "Mouin sé Sèvant Granmèt la" (Lc 1,38), "li voyé jé sou pòv Sèvant li-a" (Lc 1,48).

Jézu minm sé Sèvitè Granmèt la li yé, sa lékòl Profèt Izayi-a té di osijè-l la: "Min SÈVITÈ-M nan m-ap soutni-an... li pa rélé fò, li pa lévé voua-l, li pa fè tandé voua-l nan lari, li pa kasé rozo-a ki plouayé-a, li pa étinn mèch la k-

ap fè lafimin-an" (Is 2,1-3). Li fatigé kò-l san-l pa gin inpréssion li réalizé gran bagay (Is 49,3-4). Min Granmèt la fè rézilta travay li al pi louin pasé sa-l té kouè (Is 49,5-6). Li pozé kò-l tou dousman tankou yon élèv dosil k-ap kouté léson Mèt li, li kité yo frapé-l nan do, yo joué nan figi-l, yo kraché sou li (Is 50,4-7), tou sa-k rivé Jézu nan lapasion-an. Yo méprizé-l, yo dézonéré-l, yo rabésé-l, li pa louvri bouch li, tankou yon mouton y-ap kondui labatoua (Is 53,3-7). Min sé Granmèt la ki lévé-l anlè (Is 53,12).

Jak avèk Jan té mandé yon plas adouat, yon plas agoch Jézu, nan péyi koté li Roua-a. Jézu té fè yo laléson, antan-l montré li sé Sèvitè, li pasé nan mitan yo, li pran yon sèvièt, li maré tay li, li lavé pié yo tout. Minm Sin Piè pa-t konprann jès la. Jézu té vlé montré sa-k gin premié plas la, sé li minm ki pou tankou yon ti ésklav, paské dévan Bondié nou tout nou nan minm ran (Mc 10,35-45; Jn 13,2-15; Mt 18,1-4). Jézu té pran yon ti moun tou piti, li té mété-l nan mitan Apot yo, li té mandé yo pou yo vi-n tankou ti pitit tou piti-a, pou yo résévoua Rouayòm Sièl la avèk fréchè kè yon ti moun ki pa konpliké nan anpil konsidérasion (Mt 18,4). Li di nou pou nou tankou sèvitè ki fi-n fè travay yo, san yo pa rét tann rékonpans oubyin rémèsiman, sé pou yo viré do yo al fè rout yo, antan yo di nan kè yo sé travay yo yo fè (Lc 17,7-10). Sin Pòl di nou sé santiman sa-a ki kondision lacharité antré nou, antan youn konsidéré lòt la pi plis pasé-l (Ph 2,3). Sé konsa Jézu sèvi nou modèl, li minm ki égal avèk Bondié-a, li kòm vidé kè-l antan li pran kondision Sèvitè, li vi-n sanblé ak lèzòm, li mété-l sou minm ran ak yo, li désann pi ba pasé yo ankò, li vi-n mouri sou lakoua tankou yon ésklav. Min Bondié lévé-l anlè, li ba-l yon non ki anlè tout non, pou tout jénou plouayé dévan non sa-a (Ph 2,6-11).

N-ap mandé Manman Mari, "la Vierge des Pauvres", pou-l fè nou gin kè nou tou pòv, minm jan ak kè Jézu, pou Bondié Papa-a pran plézi nan nou, minm jan li pran plézi nan li minm nan: li lévé pòv Sèvant li anlè (fc Lc 1,48.52; Ap 12,1). N-ap mandé-l pou-l fè nou pa janm méprizé pèsòn, okontrè pou nou panché sou sa ki pi nan bézouin yo, sa lasosiyété-a pa konsidéré yo, sa-k nan problèm yo, sa k-ap soufri anndan fon kè yo san pèsòn pa konnin, sa tout jé ap fiksé yo san okinn min pa lonjé ba yo, sa répitasion yo fi-n finnin yo, sa-k tankou moun ki gin maladi lalèp yo, ki égzilé pou kont yo, ki pa jouinn yon kè k-ap bat nan minm kadans avèk kè pa yo, sof Sakré-Kè Jézu ak Kè Imakilé Mari.

*

Pauvre (subst.): Ex 23,6.11; Lv 19,10.15; 23,22; Dt 15,4.7.11; 1 Sm 2,8; 2 Sm 12,3; Tob 2,2-3; 4,7; Est 9,22; Jb 5,15; 20,10.19; 24,4.9.14; 29,12.16;

30,24; 31,19; 36,6.15; Ps 9,12; 12,6; 14,6; 22,25.27; 34,7; 35,10; 37,14; 41,1; 49,3; 60,11; 69,34; 72,4.12.13a.b; 74,21; 82,4; 107,41; 109,16.31; 112,9; 113,7; 132,15; 140,13; Pr 3,34; 13,7.8.23; 14,20.21; 15,15; 16,19; 17,5; 18,23; 19,1.4.7.17; 19,22; 22,2.7.9.16.22; 28,6.8.11.27; 29,13; 30,14; 31,5.9.20; Qo 5,7; 9,16; Si 4,1.4.8; 7,32; 10,23.30; 11,1.21; 13,3.18.19.20.23; 21,5; 25,2; 29,9.22; 30,14; 31,4; 34,20.21; 35,13; Is 14,30.32; 29,19; 32,7; 40,20; 41,17; 50,7; 61,1; 66,2; Jer 2,34; 22 16; 52,15.16; Ba 6,27; Ez 16,49; 18,12; 22,29; Dn 4,24; Am 2,6; 4,1; 5,12; 8,4.6; Za 7,10; Mt 5,3; 11,5; 19,21; 26,9.11; Mc 10,31; 14,5.7; Lc 4,18; 6,20; 7,22; 14,13.21; 16,20.22; 18,22; 19,8; Jn 12,5.6.8; 13,29; 2 Co 9,9; Ga 2,10; Jc 2,2.3.5.6; Ap 13,6.

Pauvre (adj.): Lv 14,21; Nb 13,20; Dt 15,7.9.11; 24,14.15; Jg 6,15; Rt 3,10; 1 Sam 18,23; 2 Sam 12,1.4; 2 R 24,14; Tob 4,21; Jdt 9,4; Ps 22,22; 40,1; 70,6; 86,1; 109,22; Pr 20,13; Qo 4,13; 6,15; 9,15; Sg 2,10; Si 2,4; 10,22; 11,12; 10,24; 26,4; 40,15; Is 41,14; Jer 5,4; 39,10; Mc 12,42.43; Lc 21,3; 2 Co 6, 10; Ap 2,9.

Pauvreté: 1 Chr 22,14; Tob 4,13; Job 36,15; Ps 22,25; Pr 30,8; Si 10,31; 11,14; 13,24; 18,25; 22,20; Rom 15,26; 2 Cor 8,2.9; Ap 2,9.

*

* *

VINTOUAZIÈM DIMANCH ÒDINÈ A

Si yon moun nan kominoté nou fè yon bagay ki mal kont légliz, nou fèt pou fè-l rémak pou-l kapab korijé (Mt 18,15-20), olié pou nou kinbé sa nan kè nou, pou nou maké-l mal viv, pou nou poté chaj péché-a, jan liv Lévitik la di-a (Lv 19,17), jan Profèt Ézékièl répété-a (Ez 33,7-9).

Nou tankou santinèl pou véyé danjé-a koté-l soti-a, pou nou avèti pran prékosion (Ez 6,17-19; Is 21,6-11). Si nou pa avèti, sé nou minm Bondié ap mandé kont pou malè-a ki rivé-a. Épi sé pa yon sèl foua pou nou bay avètisman, ni sé pa ninpòt kijan pou nou fè rémak la. Dépi anvan bagay la rivé trò louin, nou doué rélé moun nan apa, fè-l konprann si l-ap kontinué konsa, l-ap glisé sou mové pant. Si nou pa réyisi korijé-l nan fason sa-a, nou pa doué lagé-l pou sa; nou gin pou nou chèché kijan nou kapab fè-l tandé voua nou pi byin, antan nou pran youn oubyin dé lòt témouin ak nou, san nou pa mét bagay la tròp nan lari, pou nou pa fè moun nan ront, pou nou pa jinnin démach konvèsion-l. Si nou pa gin siksè, lè sa-a, sé dévan tout légliz la pou nou poté kòz la. Sa mandé anpil pasians.

Sèké ant chak kalité rémak sa yo, nou doué bay moun nan tan pou-l kapab antré anndan fon kè-l, pou-l jouinn posibilite chanjé konpòtman. Si nou fè tou sa nou kapab san nou pa réyisi, mision nou fini la, jan Sin Pòl di nou, lè-l palé osijè moun yo k-ap mét divizion ak bariè kont lanségnman fidèl yo résévoua nan légliz la (Rom 16,17; 1 Cor 5,11; Dt 13,6; Lv 18,29; 1 Tm 1,20; 2 Tm 4,14; Tit 3,10; 2 Th 3,6.14), jan Sin Jan avèti nou tou (1 Jn 5,16; 2 Jn 10), jan Sin Jud raplé nou (Jud 23). Sèké sé moun nan minm ki ouété kò-l sot nan kominoté-a, ki kòm "éskominié" pròp tèt li.

Jézu di koté dé ou toua moun rasanblé o non-l, li la nan mitan yo. Sa Piè ak Apot yo maré sou tè-a, li maré nan sièl la; sa yo lagé sou tè-a, li lagé nan sièl la (Mt 18,18-20). Moun nan ki réfizé kouté voua légliz la, li révòlté kont prézans Jézu li minm minm nan légliz li-a, sé sa Psòm-répons la di: "jodi-a, si nou tandé voua-l, pa fèmin kè nou, tankou jou Masa nan dézè-a, koté zansèt nou yo té tanté-m nan, malgré yo té ouè aksion-m yo, sé poussa mouin fè sèman, yo pap antré nan répo-m nan (Ps 94/95,7-9; He 3,7-11; Ex 19,5; 17,1-7; Ps 81,9; Nb 20,2-13; Dt 6,16; 33,8; Nb 14,22; Ps 78,8.37).

Sa kapab kondui nan **péché kont léspri Sin**-an, sa Pap Jan-Pòl II palé nan Lèt ansiklik li ékri osijè léspri Sin-an: "Dominum et vivificantem" (nn. 46-48). Li rélé péché sa: "**Les paroles du non-pardon**" (D.V. 46). Jézu di sé yon péché ki pap janm jouinn padon ni nan lavi sa-a, ni nan lòt lavi-a (Mt 12,31-32; Mc 3,28-29; Lc 12,10). Sin Toma dakin di péché sa-a réfizé tout posibilite padon (IIa-IIae, q 14, a 3). Sé nan minm sans Sint-Ogustin palé

(Epist. 185,11,43-49: PL 33,814-815). Sèké **moun nan réfizé rékonèt péché-a**, malgré limiè léspri Sin ba li pa lintèmediè légliz la, ki montré klè koté péché-a yé. Konsa li réfizé intèvansion léspri Sin-an ki gin pouvoua padoné péché-a, ki sèvi avoka pou pròpté konsians nou ak San Jézu-Kri-a (Jn 20,22-23). Moun nan kòm réklamé doua pou-l rétin fèmin nan péché-l, san-l pa bay dèt pèsonaj posibilite pou antré nan sékrè konsians li. Konsa moun nan réfizé chanjé kè-l, li réfizé padon-an tou, paské sé chanjman kè-a ki pou minnin padon-an. Moun nan kòm réklamé doua pou-l pèsévéré nan sa-k mal, konsa li réfizé Délivrans la, li rétin fèmin anndan péché-a, tankou anndan yon prizon, san-l pa louvri kè-l bay sous la ki pou t-a pròpté konsians li, ki pou t-a fè-l jouinn padon péché yo (D.V. 46). Kè-l vi-n di tankou ròch, jan Profèt Jérèmi di-a (Jer 7,24; Ps 81,13; Lc 3,5). Konsa li rivé yon pouin li vi-n **pèdi sans péché-a** (D.V. 47; cf Réconciliation et Pénitence n. 18; Pie XII, Radiomessage 26-10-46: "Discorsi e Radiomessage" VIII (1946) 288). Li minm **pèdi sans Bondié** péché-a ataké-a. Li vi-n **pèdi sansibilité an fas byin-an ak mal la**. Sin Pòl di pou pa étinn léspri Sin-an (1 Th 5,19), pou pa fè-l lapinn (Ep 4,30). Sé li minm ki vi-n montré péché tè-a (Jn 16,8). Pap Jan-Pòl II mandé pou nou lapriyé, pou péché kont léspri Sin-an rékilé sot nan nanm yo (D.V. 47). N-ap mandé Manman Mari pou-l touché kè ki rébèl yo, pou-l fè yo vi-n sansib, **pou yo kouté voua légliz la** k-ap palé o non Jézu-Kri, ki di: "Moun ki kouté nou, sé mouin minm li kouté, moun ki réjité nou, sé mouin minm li réjité, ansanm ak Papa-m ki voyé-m nan". N-ap mandé-l pou nou gin kouraj asiré ròl **santinèl** nou, pou nou indiké danjé-a, koté-l yé-a, pou nou pa konplis péché-a, minm si nou sètin pafoua sé nan dézè voua nou ap kònin, pou nou pa chèché ménajé bòn rélasyon, pou nou aksépté pèdi zanmi sou tè-a, pou nou kapab fè Jézu jouinn yo li minm nan sièl la.

*

Jézu di Farizyin yo pou yo pa rétin ap di frè yo kité yo ouété ti pay la nan jé yo, pandan yo minm yo gin yon gro bout boua nan jé pa yo. Pou nou kapab fè prochin-an rémak ki valab, sé pou nou kòmansé pròpté fon konsians pa nou, sitou sou pouin-an koté nou vlé fè-l lobsèvasion-an. Nan sans sa-a nou pa doué rétin indiféran, si nou ouè frè nou ap tonbé nan trou, sé pou nou avèti-l pou-l pa gin tan glisé. Min pozision pou nou yé pou nou kapab avèti-l la, sé yon pozision dobsèvasion.

Profèt Ézékièl di nou sé kòm santinèl Bondié mété nou pou nou avèti lè danjé-a ap rivé. Ki koté santinèl la yé, si sé pa nan yon pòs dobsèvasion, yon koté li kapab ouè louin? An minm tan ki pozision yon santinèl, si sé pa pozision kanpé, pou-l pa kité dòmi poté-l alé, pou-l toujou ap véyé kot

danjé-a ap sòti, sitou lannuit, lè tout moun ap dòmi. Konsa, gin moun ki gin ròl sa-a yon fason spésial. Sé travay yo minm, pou yo avèti danjé-a k-ap rivé. Sé dévoua yo pou yo fè lobsèvasion, paské yo nan pòs dobsèvasion yo. Sé yo minm Bondié ap mandé kont, si yo pa fè dévoua yo. Min fason pou nou fè rémak, pou yo kapab aksépté-l pi fasil. Sé pou nou kòmansé pran moun nan apa, yon moman nou ouè sa kapab profité-l, pou nou pa bay linpréson sé ront nou vlé fè-l ront dévan tout moun; min pou-l kapab ouè sé byin-l n-ap chèché. Si-l kouté nou, n-ap sovè-l. Lè dé ou toua moun mét ansanm pou réglé yon kozé, Bondié la nan mitan yo. Si mal la pèsisté, sé lè sa-a nou blijé chèché dòt témouin, pou nou ouè si n-a jouinn mouayin fè moun ki an défo-a chanjé santiman; paské li t-a kapab kouè sa nou di-a sé pa vré, si sé nou minm sèl ki fè-l rémak la. Pètèt anpil lòt moun ouè sa, min yo pa vlé pran chans fè-l lobsèvasion; youn ap gadé sou lòt. Lè dé ou toua moun mété ansanm yo fè rémak la, sé kòm si yo fè Bondié sèvi témouin, paské Jézu di lè dé ou toua moun rasanblé o non-l, li la nan mitan yo. Si kozé-a pa kapab réglé la, si sé bagay ki konsékan, sé lè sa-a nou blijé poté kòz la nan gran jijman ofisièl. Sin Matié di: si-l pa kouté dé ou toua moun yo, di légliz la sa. Légliz gin sajès nan pasians li; li pa kondané moun fasil konsa; li pran tan pou-l bay moun nan lokazion korijé, apré réfléksion. Si nan touazièm dégré sa-a malad la réfizé pran rémèd, sé li minm ki pa vlé géri. Lè sa-a, moun ki nan pòs lobsèvasion-an, li kit, li fi-n fè dévoua-l. Min nou pa doué lavé min nou fasil dévan kòz frè nou, kòm si sa pa gadé nou. Nou youn nou réponsab lòt; minm si nou pa pi bon pasé pèsòn; sèké pèsòn pa kapab jij pròp tèt li. Pètèt moun nan ki an tò-a, li pa-t janm pozé tèt li késion sou pouin sa-a koté li pri nan kontravansion-an. Li bézouin yon bon prochin ki pou gin kouraj fè-l rémak la.

N-ap mandé Manman Mari pou-l ba nou pasians li avèk kouraj li, pou nou kapab jouinn fason ki soup pou nou fè rémak nou doué fè, nan tan nou doué fè-l, san nou pa présé kéyi mango-a tou vèt, min tou san nou pa kité-l pouri sou pié.

N-ap mandé-l tou pou nou fè atansyon pou nou pa pran péché yo fè **kont nou** (Mt 18,21) yon fason pèsònèl, pou nou mété-l sou minm pié ak péché yo fè **kont légliz** (Mt 18,15). Péché yo fè kont nou-an, sé souasandis foua sèt foua nou doué padonnin-l (Mt 18,22), sa vlé di tout tan, san rété; min péché yo fè kont légliz la, sé li minm ki égzijé toua séri avètisman yo; apré sa, mision nou kit (Mt 18,15-17), san nou pa kinbé pèsòn nan kè pou sa.

*

* *

VINTOUAZIÈM DIMANCH ÒDINÈ B

Profèt Izayi fè sonjé tan pèp Bondié-a t-ap sòti Éjip la, pou-l travèsè tèt sèk la (Is 35). Sé Bondié ki té kondui-l. Profèt la déjà avèti gin yon lòt intèvansyon Bondié apral fè ankò pou-l fè pèp li-a sòti nan légzil Babilòn, nan minm fason li té fè-l sòti Éjip la (Is 40,3; 43,19). Moun avèg ap ouè, **moun soud ap tandé**, moun k-ap bouaté ap maché, **moun bèbè ap palé**, tèt sèk la ap bay dlo. Sé sign sa yo Jézu bay (Mt 11,5), antan l-ap sité Profèt Izayi (Is 35), pou-l montré tan Mési-a rivé: "Al di Jan sa nou tandé ak sa nou ouè: avèg yo ouè, moun k-ap bouaté yo maché, moun maladi lalèp yo pròpté, **moun soud yo tandé**, mò yo lévé, Bòn Nouvèl la rivé nan zòrèy pòv yo.

Psòm-répons la (Ps 145/146) dépayé kèkzin nan mèvèy sa yo; li mandé pou fè **louanj Granmèt la**, sé yon fason pou préché mèvèy li fè yo.

Si Jézu fè mirak yo antan-l géri maladi yo, sé pou-l montré tan-an rivé pou instalé péyi koté Bondié Roua-a. Sin Matié di: "Jézu t-ap préché Bòn Nouvèl péyi Roua-a, li t-ap géri tout kalité maladi ak féblès nan pèp la" (Mt 4,23). Sé sign laviktoua sou péché-a, péché sa-a ki fè moun avèg, soud, bèbè, infim, grangou, souaf. Satan fèmin zòrey moun ki nan péché-a pou-l pa tandé Bondié k-ap rélé-l, tankou li té rélé Adan apré péché-a, lè-l té di: "Adan, koté-ou?" (Gn 2,9), pou-l té kapab géri-l. "Li bay mò yo lavi, li rélé sa-k pa anyin yo pou yo vi-n égzisté" (Rom 4,17).

Sé yon nouvo kréasion Jézu ap fè. Sin Mak montré nou sa nan réfléksion moun yo: "Li fè tout bagay byin" (Mc 7,37). Sé kòm si yon éko k-ap répété sa kòmansman liv lajénèz la té di-a: "Bondié ouè tou sa-l té fè, tou sa té byin fèt" (Gn 1,31). Jézu pran saliv li (Mc 7,33) pou-l touché lang bèbè-a, minm jan li té kraché atè pou-l té fè labou lè-l t-ap géri avèg la (Jn 9,6), pou fè sonjé sa Bondié té fè lè-l t-ap kréyé Adan-an (Gn 2,7). Paròl Jézu déklaré-a montré pouvoua li ginyin (Mc 7,34), antan-l di yon mo, sa-l di-a vi-n fèt vré (Ps 33,6). Souf Jézu pousé-a (Mc 7,34) montré pouvoua li ginyin tou kòm Bondié k-ap kréyé tout bagay ak souf li, antan-l touché moun nan yon fason sansib. Sé poua minm li té pran yon kò nan vant Mari ki Vièj, pou-l pa-t kontinué aji antan-l louin sèlman, min pou-l té kapab gin kontak sansib avèk kò moun nan ki té gaté ak péché-a, péché sa-a ki té fèmin fénèt zòrèy li-a, péché sa-a ki té maré kòd lang li-a.

Jézu vlé montré tou gin yon nouvo sitiasion ki rivé, tankou Profèt Ézékièl té montré sa-a: "jou sa-a bouch ou ap louvri, pou-ou palé ak moun ki chapé-a; ou-ap palé, ou pap bèbè ankò, ou-ap sèvi yon sign, y-ap konnin sé mouin ki Granmèt la" (Ez 24,27; cf 33,22). Sitiasion nouvo sa-a, sé pèp la k-ap sot

nan lanmò, k-ap travèsé nan lavi (Ez 37). Pèp la té fèmin zòrèy li pou-l pa-t kouté paròl Bondié (Iz 48,8); Bondié vi-n géri-l, li ouvri bouch li (Sg 10,21).

Nan bouch Bondié, sé ni Paròl la ni Souf la ki soti, sa vlé di ni Dézièm Pèsòn la Sint Trinité-a, Pitit la, ni Touazièm Pèsòn nan, léspri Sin-an. Sé tou lé toua Pèsòn divi-n yo ki fè lakréasion-an ansanm. Sé poussa Jézu-Kri lévé jé-l nan sièl la, koté-l soti-a (Mc 7,37; Jn 6,41; 11,41).

Jézu pa vlé kité moun konnin sa-l fè-a. Sé poussa li pran malad la apa anvan-l fè mirak la (Mt 7,33) tankou Profèt Éli té fè-a (1 R 17,19), ni Profèt Élizé tou (2 R 4,33), épi li fè moun yo rékòmandasion pou yo pa di pèsòn anyin, lè-l fi-n fè mirak la (Mc 7,36). Li pa vlé pasé pou majisyin. Li vlé sé lafoua yo ki pou dévlopé, san yo pap chèché gran prodij (cf Mc 7,24); min plis l-ap mandé yo fè silans, sé plis y-ap préché nouvèl la; sé tankou lè léspri Sin-an fi-n désann sou Apot yo, yo kòmansé palé (Ac 2,4; 19,6). Souf Jézu té pousé-a, sé kòm si sé léspri-a ki tonbé. Minm lè-a, bèbè-a pran palé, nan sans li kòmansé préché mèvèy la. Tout moun ki ouè sa, yo édé-l préché. Sé nan sans sa-a réfrin Psòm-répons la di: "**Fè louanj Granmèt la, nanm mouin**" (Ps 145/146).

*

Jézu louvri zòrèy moun soud la, moun nan tandé, li palé (Mc 7,31-37). Sé sign sa yo Profèt Izayi té bay pou montré Mési-a k-ap vini-an (Is 35, 4-7a). Sèlman Jézu pasé lòd pou yo pa di pèsòn sa. Sèké li té konnin byin pròp tout moun t-ap vi-n gonflé sou li, yo t-ap di: "Min Mési-a ki rivé". Sèlman ki kalité Mési yo t-ap tann? Sa yo té vlé-a, sé sa ki t-ap ba yo avantaj tè sa-a, ki t-ap délivré yo sot anba min Romin yo. Konsépsion yo pa-t ko nétouayé asé. Jézu pa-t vlé parèt dapré sa yo t-ap tann nan. Chémin Jézu chouazi pou-l sové nou, sé chémin soufrans ak lakoua-a (Mt 16,21), chémin sa-a ki dékontrolé ata Sin Piè li minm, ki poutan té fèk fi-n rékonèt Jézu kòm Mési (Mt 16,16). Lè Jézu anonsé li gin pou-l souffri, pou yo touyé-l, pou-l lévé toua jou apré, Piè éséyé détounin-l; Jézu di-l: "Pasé dèyè-m, Satan, ou-ap jinnin-m; lidé-ou pa lidé Bondié, sé lidé lézòm" (Mt 16,23). Sé pou nou pran abitud pa réprézanté yon Mési ki kòm tayé sou mézi nou minm nou vlé-a. Sé pa nou minm ki pou dikté Bondié lidé nou, sé nou minm okontrè ki pou suiv chémin li trasé pou nou.

"Li fè moun soud yo tandé, li fè bèbè yo palé" (Mc 7,37). Profèt Izayi té di osijè Mési-a: "Jou sa-a, moun yo ap tandé paròl ki nan liv la" (Is 29,18), paské zòrèy yo ap louvri (Is 35,5). Li invité yo pou yo louvri zòrèy yo, pou yo tandé (Is 42,18), pou yo sispann fè rébèl (Is 43,8). Sèké pèp Bondié-a té gin mani fèmin zòrèy li pou-l pa obéyi Granmèt la (Is 42, 19; Ps 95,9). Si

nou fè la "soud-orèy" (Ps 98,5), Bondié ap fè kòm si li pa tandé nou tou, lè n-ap rélé koté-l (Job 24,12; Ps 28,1; Lam 3,56), lè n-ap kriyé nan pié-l (Ps 39,13; cf Pr 1,24-29; Is 65,2.12; 66,4; Jer 7,13; Ps 107,11).

Koté pou nou fèmin zòrèy nou, pou nou pa louvri bouch nou, sé lè méchan yo ap chèche nou kont, pou yo éksité nou, pou yo fè nou fè kòlè, pou yo fè nou pèdi asirans (Ps 38,14). Tou sa y-ap di sou nou, sa doué koulé kon dlo sou plim kann. Dévan kantité paròl sa yo, nou doué soud, nou doué bèbè. Sé pa tou sa yon moun di nou pou nou réponn li. Lè nou pé bouch nou, sé Bondié k-ap palé pou nou. Sèvitè Granmèt la té tankou mouton dévan moun k-ap koupé linn li, li pa louvri bouch li (Ap 8,32; Is 53,7; 1 P 2,23; Mt 26,63; Jer 11,19; Ac 8,32-33; Jn 1,29).

Gin yon tan pou nou palé, gin yon tan pou nou fè silans (Qo 3,7). Lè nou fin palé kont kò nou, pou nou montré chémin lavérité-a, épi malgré sa, yo pa kouté nou, nou pozé douèt nou sou bouch nou (Ez 3,26; Lc 10, 10-11), joutan lè-a rivé pou nou fè ouè pouki rézon nou té blijé fè silans la (Ez 24,27; 33,22; Is 8,16; 30,8; 34,16; Ha 2,2; Jer 30,2; 36,2; Ex 17,14). Sèké pandan tan sa-a Bondié pap pé bouch li li minm (Ps 83,2). Sé pa moun k-ap palé tout tan k-ap fè ouè yo gin rézon (Job 11,3). Moun ki an-tò yo, Bondié ap fè yo fèmin bouch yo yon lè, tankou bèt y-ap minnin labatoua (Ps 49,13.21), pou y-al koud bouch yo nèt nan lanfè-a (Ps 31, 18-19).

Louvri pou nou louvri bouch nou, sé pou fè louanj Bondié, sé pa pou nou défann tèt nou (Ps 145/146, ref). Nan premié léktu vintouazièm dimanch òdinè B-a, Profèt Izayi di pouki sa zòrèy moun soud yo ap louvri-a, lang bèbè yo ap lagé-a, sé paské dlo ap éklaté nan savann nan, gran ravi-n ap koulé nan tè sèk la (Is 35,5). Sa vlé di Granmèt la ap rivé pou-l pran défans yo. Sé pou sa li invité yo "pran kouraj, pa pè" (Is 35,4) dévan tèt chajé li ouè yo ginyin k-ap dékontrolé yo.

Gin moun, tou sa yo tandé, fò yo répété-l; tou sa yo konnin, sé pou yo di-l. Sé tankou yon pasoua bouch yo yé, lang yo tankou zèl papiyon ki pa kapab rét an plas. Yo toujou gin mèsaj y-ap bay, kòm si sé Profèt yo yé. Minm Profèt Élizé té fè sinkant frè-profèt yo pé bouch yo, lè yo té vi-n di-l yo aprann Granmèt la ap fè Éli monté nan sièl la; li réponn yo, li minm tou li konn sa, sé pou yo fè silans (2 R 2,3.5). Sé pa tout bagay nou konnin nou blijé palé, tankou yon radio k-ap bay nouvèl. Épi sé pa paské nou pa di anyin-an ki fè nou pa konnin pou sa. Silans la sé yon konpòtman sajès; li montré nou konn sa yo rélé réfléchi. Yon moun k-ap palé tout tan, li pa gin tan réfléchi. Épi li anpéché lòt moun réfléchi. Apèn lidé-a kòmansé jèmin nan tèt li, la minm li gin tan mété-l déyò, san-l pa ba-l tan pou-l rèk, ni pou-l

mi. Li bay li tou vèt, tèlman li pè pou-l pa rét yon moman san palé. Sin Jak di nou lang nou, malgré li tou piti, li kapab fè gran déga, tankou gouvènay yon batiman k-ap fè batiman-an viré adouat oubyin agoch, tankou yon ti difé k-ap boulé tout yon rak boua, antan difé sa-a ki limin-an, sé déjà nan lanfè-a li sòti (Jc 3,1-12).

Roua la Siri-a té voyé minis li dévan Jérusalèm, li fè kont ésplikasion pou chèché pèp la kont. Roua Jérusalèm nan, Ézékias, di moun yo pou yo pa réponn anyin. Réyéلمان vré yo pa di yon mo (2 R 18,36). Lè roua Asiri-a ouè sa, li voyé lèt bay roua Jérusalèm nan pou-l jouré-l, pou-l éksité-l pi plis toujou, pou-l mandé-l batay. Roua Jérusalèm nan pran lèt la, li louvri-l dévan lotèl Granmèt la nan Tanp la. Granmèt la réponn li pa lintèmédiè Profèt Izayi, li di-l pou-l pa trakasé kò-l, sé li minm k-ap pran défans li. Réyéلمان vré nan minm nuit sa-a, katrévinsik-mil sòlda tonbé nan kan Asiri-a, roua-a pati al lakay li; lè-l rivé, li minm tou li mouri (2 R 19).

Gin anpil kalité silans: gin yon silans, sé silans **SAJÈS** (Job 13,5; 33,33; Ps 39,3; 131,2; Si 20,1; Ps 4,5; Lam 3,26; Ez 24,17; Dn 8,26.27; Lc 9,36; Gn 24,21; 34,5; Ac 15,12; 21,40; 22,2; 1 Rm 2,11.12; Am 6,10; 8,3), tankou silans Jézu dévan Èròd la (Lc 23,9); tankou silans sa-a roua Ézékias kinbé dévan provokasion roua Asiri-a (Is 30,21); tankou silans sa-a Sin Jak mandé-a (Jc 3,1-12), tankou silans sa-a Profèt Élizé té invité sinkant frè-profèt yo pou yo fè-a (2 R 2,3). Sé yon silans ki respékté prezans Granmèt la, paské Granmèt la sé Paròl li yé, sé nan silans li fè tandé voua-l. Sé poua Profèt yo abitué di: "Silans dévan Granmèt la, min l-ap soti nan lakay li ki sin-an" (So 1,17; Ha 2,20; Za 2,17). Lè Mouton-an louvri sètièm so-a, gin yon gran silans ki fèt nan sièl la pandan démi-è-d-tan, pou fè chémin dévan Granmèt la k-ap parèt (Ap 8,1). Mòd silans sa yo, sé chémin dévan Paròl Bondié-a. Nou fè silans pou nou kouté Paròl li (Dt 27,9; Is 41,1). Sé apré yon silans konsa voua Bondié touché zòrèy Job (Job 4,16). Sé nan silans ti briz van-an Bondié palé ak Profèt Éli (1 R 19,12). Sé nan mitan nannuit pandan yon gran silans konsa Paròl Bondié-a désann sou tè-a (Sg 18,14).

Gin yon lòt kalité silans, sé silans **DÉFO**. Sé lè yo kinbé nou an défo, nou blijé fè-l (Ne 5,8). Juif yo pa-t jouinn anyin pou yo réponn Néémi, paské yo té an défo, antan yo t-ap fè frè yo tounin ésklav (cf Am 8,4). Juif yo blijé fè silans dévan répons Jézu bay késion yo pozé kòm pièj dévan-l yo (Lc 20,26). Israèl blijé fè silans ak laront dévan péché-l yo Bondié fè-l rékonèt, anvan-l padonnin yo (Ez 16,63). Sé mòd silans sa yo k-ap koud bouch moun yo nan lanfè-a. Yo pap jouinn anyin pou yo di pou défann tèt yo, paské tout bagay ap parèt klè (Mt 22,12; Ps 31,19; Is 47,5).

Gin yon lòt kalité silans, sé silans **KONPLIS**. Nou dakò avèk moun nan, n-ap "kasé fèy kouvri sa" pou li, paské n-ap chèché yon avantaj nan min-l. Minm si yo fè nou ouè sa moun nan fè ki mal, nou pé bouch nou, soua pou nou pa pri nan kont, soua pou nou pa pèdi avantaj n-ap chèché nan min-l (cf 1 Mac 11,5; Mt 11,11-15).

Gin yon lòt kalité silans, sé silans **FÒSÉ**. Sé lè yo anpéché nou palé, paské yo fè fòs sou nou (Ps 107, 29; Jer 8,14; 25,37; 47,5; 48,2; Is 47,5; Lam 2,10; Mt 20,31; Mc 4,39; 10,48). Juif yo anpéché ti moun yo déklaré Jézu sé Roua Israèl, sé Pitit David la; yo anpéché avèg Jériko-a rélé Jézu, Pitit David, pitié pou li (Mt 20,31; 21,16; Lc 19,39). Sé mòd silans sa-a Satan pézé sou lang bèbè-a, ki anpéché-l fè louanj Granmèt la. Jézu vini pou-l délivré nou anba pouvoua sa-a Satan ap fè pézé sou nou-an. Sé nan sans sa-a li lagé kòd lang bèbè-a, pou-l montré tan Mési-a rivé (Is 35,5). Satan kinbé anpil moun nan ésklavaj nan sans sa-a. Li anpéché yo rékonèt vré mèsaj Granmèt la k-ap kònin nan zòrèy yo dépi lontan; li anpéché mèsaj la pasé nan bouch yo pou yo transmèt li bay lòt frè yo. Nan sérémoni batèm lontan, Pè-a té konn touché zòrèy ak bouch ti moun nan, li té konn di "éféta", sa vlé di "louvri". Sé nan sérémoni yo té konn rélé "egzòsism" nan. Konsa li t-ap mandé pou Bondié louvri zòrèy ti pitit la, pou ti pitit la tandé paròl li, pou Bondié louvri bouch li pou-l déklaré mèsaj li tandé-a.

N-ap mandé Manman Mari pou nou pa fè "la-soud-orèy", lè Bondié ap palé avèk nou, pou nou pa fè péché kont léspri Sin-an, antan nou fèmin kè nou pou nou pa kouté-l; pou nou sansib dévan répròch konsians nou ap fè nou antan-l mandé nou chanjé mové chémin nou t-ap suiv la, pou nou pa mérité al tonbé nan koté ki vlopé ak silans nèt la (Ps 94,17; 115,17; Job 13,19). Plis n-ap fèmin kè nou, sé plis voua Bondié ap vi-n pi fèb nan zòrèy nou, joustan li fè silans nèt. Silans Bondié térib (Ha 1,13; Ps 28,1; Is 64,11). Sé ak Paròl li Bondié kréyé tout bagay (Ps 33,6). Si-l fè silans, tout bagay ap tounin anyin. Konsa lè yon nanm pran abitud pa kouté Bondié, épi Bondié fè silans nan zòrèy nanm sa-a, sé yon bagay ki térib anpil.

Bondié kapab kinbé yon silans **pasians** (Is 42,14), pou bay moun ki nan péché-a tan pou-l chanjé konduit. Lè konsa nou minm tou nou pran modèl sou mòd silans sa-a pou nou tann sékou Bondié, san nou pa bézouin babié ni fè okinn tranzaksion (Lam 3,28). Lè tan-an rivé, Bondié ap sòti nan silans li. Bondié fè Zakari vi-n bèbè pou yon tan, paské li pa-t fè Bondié konfians asé (Lc 1,20). Lè tan-an rivé, Bondié fè kòd lang li délagé, Zakari palé kòrèk, li fè louanj Bondié (Lc 1,64).

Nan tout kalité silans sa yo, silans-**sajès**, silans **défo**, silans-**konplis**, silans **fòsé**, n-ap mandé Manman Mari pou-l aprann nou kinbé silans-**SAJÈS** la, minm silans sa-a li té kinbé li minm pou-l kalkilé mèwèy sakré Jézu-Kri yo, ni lavi-l, ni lanmò-l, ni rézirèksion-l (Lc 2,19,51; 11,28; 2,33). Li té kinbé paròl Bondié-a nan kè-l, li t-ap réfléchi sou li. N-ap mandé-l pou-l fè nou aprann réfléchi anvan nou palé, pou nou mét yon kadna sou bouch nou (Ps 141,3), lè mové-san ap gonflé nan kè nou, pou nou pa présé fè sa-k antré nan zòrèy nou sòti nan bouch nou, san-l pa pasé nan kè nou, kot Bondié abité-a. Sé Bondié ki pou pasé-l nan pasoua, pou-l mété sa-l vlé déyò. Sa mandé pou nou gin pasians, anpil pasians minm kèkfoua, pou nou kinbé yon sékrè nan kè nou, joustann nou kapab déklaré-l san nou pa vann pèsòn, san nou pa chèché défann pròp tèt nou.

N-ap blijé fè atansyon tou yon lòt fason pou okontrè nou pa séré nan kè nou sa nou doué mét déyò, pou nou pa konplis péché moun, pou nou fè rémak la lè sé nésésè, avèk tout prékosyon nou blijé pran pou nou pa krazé pèsòn. N-ap mandé-l tou parapò a pròp péché pa nou, pou nou pa séré yo fè pil sou pil sou léstomak nou, pou nou pa kité démon-an fè nou vi-n bèbè dévan konfèsional la, lè pou nou déklaré gro péché ki trublé konsians nou, antan nou sonjé sa Jézu té di Juif yo: "Lavérité-a ap délivré-nou" (Jn 8,32). Yon foua kòd lang nou lagé, nou déklaré péché nou nan lavérité-a, kè nou ap dégajé, n-ap vi-n lib. Gin yon madanm ki t-al konfésé nan min yon Pè, li té kaché toua gro péché; Pè-a ba-l kòm pénitans pou-l al lavé yon mouchoua ki té gin toua tach. Tou sa-l fè pou tach yo pati, li pa réyisi. Sé alafin li déklaré toua gro péché-l yo, dlo sot nan jé-l, li tonbé sou mouchoua-a, tach yo disparèt. Gin yon tan pou nou fè silans, gin yon tan pou nou palé (cf Qo 3,7). Gin bagay nou ouè, ki pa gadé nou; nou pa gin pou nou fè tripotaj al rapòté dèt moun pou nou vidé gaz sou difé-a: "jé ouè, bouch pé". Min sa-k jinnin bòn rélasyon konsians nou ak Bondié, sé pou nou mété-l déyò, pou trò ta pa riské baré nou yon lè, pou lang nou pa al koud nèt nan difé lanfè-a. Konfèsion, sa vlé di "déklarasyon". Lè yon moun konfésé lafoua, sa vlé di li déklaré lafoua-l dévan tout moun, san-l pa pè. Konsa tou lè yon moun "konfésé" péché-l dévan Pè-a, li "déklaré" tou sa-l fè ki mal, li rékonèt li koupab, li pa chèché éskizé tèt li. An minm tan li rékonèt féblès li, li rékonèt tou pouvoua Bondié ak kè sansib Bondié ki padonnin-l. Avèk kòd lang bèbè-a ki lagé-a, n-ap mandé la Trè Sint Vièj Mari pou kòd lang nou lagé tou, pou nou fè louanj Bondié, avèk Sin Pòl, osijè mèwèy sakré ki té vlopé nan silans tout tan yo (Rom 16,25). Pou lang nou kapab fè louanj Bondié, fò-l kòmansé rékonèt li sé péchè (Is 6,5), jan nou abitué fè nan kòmansman chak mès. Anani ak Safi té bay manti osijè térin-an yo té vann

nan. Yo poté moso pri-a sèlman bay Apot yo. Yo tonbé youn apré lòt nan mitan foul la, yo mouri (Ac 5, 1-11). Bondié lagé kòd lang nou, pou nou déklaré lavérité, minm si sé pa nan avantaj nou. Nou pa doué konplis okinn manti. Oui sé oui, non sé non (Mt 5,37; 2 Co 1,17-20; Jc 5,12). Épi nou pa doué kité lang nou ap graté nou, pou nou pasé tan nou ap fè tripotaj sou do lòt yo.

Sin Jan-Batis té nan prizon-l nan, li té voyé mandé Jézu si sé li minm ki t-ap vini-an oubyin si sé yon lòt pou yo té tann. Jézu té voyé réponn li, antan-l sité yon pasaj nan Profèt Izayi (Is 35,5 = prémié léktu 23^e dimanch d.o. B), li té ajisté-l avèk dòt pasaj Profèt Izayi (Is 26,19; 29,18; 61,1). Li té di: "avèg yo ouè, moun k-ap bouaté yo maché kòrèk, moun ki malad lalèp yo géri, moun soud yo tandé, mò yo résisité, yo anonsé Bòn Nouvèl la bay pòv yo" (Mt 11,5). Tout katégori sa yo, sé "pòv" yo (anawim) ki t-ap tann tan Mési-a nan lésépérans. Sé yo minm ki konblé. Konsa moun soud la, moun bèbè-a réprézanté "pòv" la k-ap tann Granmèt la, pou-l vi-n louvri zòrèy li, pou-l vi-n lagé kòd lang li. Sé pou "pòv" sa yo Bòn Nouvèl la yé. Sé pousa Sin Jak insisté pou-l mandé nou pou nou gin respè pou pòv yo, pou nou pa trété yo avèk indiférans, ni avèk sipériorité, pou nou pa triyé moun pou nou fè zanmi ak nou, épi pòv yo minm nou kité yo ap drivé atè (Jc 2,1-5). Si gin fòtèy pou rich la, gin pou pòv la tou. Sé lafoua ki fè nou ouè Jézu nan pòv la k-ap vi-n vizité nou-an, joustan yon lè l-a di nou li té grangou, nou té ba-l manjé; li té souaf, nou té ba-l bouè; li té ni-kò, nou té abiyé-l; li té étranjé, nou té résévoua-l; li té malad, nou té vizité-l; li té nan prizon, nou té vi-n ouè-l (Mt 25,35s). Tou sa nou fè pou youn nan pi piti nan frè-l yo, sé pou li minm nou fè-l. Yon lè Sin Monfò t-ap pasé dévan pòt yon monastè, koté li té gin yon sè-l ki rélijijé. Li fè yon antré, li mandé Sipériè-a: "lacharité pou lamou de Dié". Sipériè-a pa rékonèt li, li voyé-l alé konsa. Lè Sipériè-a rakonté lòt Sè yo sa, nan fason li détayé figi pòv la, Sè Sin Monfò-a rékonèt sé frè-l la. Li di Sipériè-a: "Sé frè-m nan". Sipériè-a voyé chèché-l pou résévoua-l. Sin Monfò réponn: "Ou pa-t vlé fè-m lacharité pou lamou de Dié; koulié-a ou vlé fè-m lacharité pou lamou de mouin minm, mouin pa vlé; mèsì". Sin Monfò kontinué chémin-l, san-l pa minm antré al di Sè-l la bonjou. Jézu konn pasé dévan pòt nou kèkfoua konsa, antan-l abiyé ak rad pòv, tankou-l té fè lè-l té fèt Bétléèm nan, pa-t gin plas pou li nan okinn lotèl (Lc 2,7; Jn 1,11).

Jézu louvri zòrèy moun soud la, li lagé kòd lang li. Profèt Izayi di: "Jé avèg ap louvri, zòrèy moun soud ap tandé, moun ki bouaté ap vòltijé kon kabrit, moun bèbè-a ap rélé ak kontantman" (Is 35,5-6). Sèlman si jé nou, zòrèy nou, pié nou, bouch nou vi-n tounin lokazion pou nou tonbé nan péché, li t-a

pi bon pou nou antré nan lavi-a san nou pa-t janm ouè sou tè sa-a, san nou pa-t janm tandé, san nou pa-t janm maché, san nou pa-t janm palé (cf Mt 5,27-30). Si kontak Jézu géri nou, sé pou nou konsakré-l aktivité n-ap fè avèk jé nou, zòrèy nou, pié nou, bouch nou, sé pa pou nou sèvi mal ak sa-l ba nou-an pou nou gadé sa nou pa doué, pou nou kouté sa nou pa doué, pou nou alé koté nou pa doué, pou nou palé sa nou pa doué. Jé nou sé jé Jézu, zòrèy nou sé zòrèy Jézu, pié nou sé pié Jézu, bouch nou sé bouch Jézu. Nou fè youn ak li nèt nan tou sa n-ap gadé, nan tou sa nou tandé, nan tout koté n-ap pralé, nan tou sa n-ap di. Kò nou sé tanp léspri Sin-an, minm souf sa-a Jézu té souflé sou bèbè-a, lè-l té di "Éféta", sa vlé di "louvri"-a (Mc 7,34; Jn 20,22). Sé pou nou gin pòt kè nou louvri nan diréksion léspri Sin-an, pou-l antré ak tout fòs li, pou-l ouè ak jé nou, pou-l tandé ak zòrèy nou, pou-l maché ak pié nou, pou-l palé ak bouch nou. Konsa tou sa n-ap ouè, n-ap ouè-l ak jé léspri Sin-an; tou sa n-ap tandé, n-ap tandé-l ak zòrèy léspri Sin-an; tout rout n-ap fè, n-ap fè-l ak pié léspri Sin-an; tou sa n-ap di, n-ap di-l ak bouch léspri Sin-an. Jézu louvri, sé li minm tou ki pou fèmin (Is 22,22; cf Mt 16,19; Ap 3,7). N-ap mandé Manman Mari pou-l louvri sans nou pou tou sa ki byin, pou-l fèmin yo pou tou sa ki mové, pou-l sèvi nou kòm yon bariè, yon pòtay, yon kontré-fò (Is 26,1; Ps 48,13), pou nou tounin yon jadin ki byin fèmin pou Jézu, yon sous ki byin kachté (Ct 4,12).

*

Bondié fè tou sa-n ouè, paské-l rinmin-n anpil
 Louanj pou Bondié
 Bondié Granmèt mouin, fò-m chanté louanj ou
 Yon asouè, yon granmatin
 Bondié Granmèt nou, ala gran non ou gran

*

* *

VINTOUAZIÈM DIMANCH ÒDINÈ C

Pi bèl SAJÈS ki ginyin, sé rénonse pròp tèt nou ak tout avantaj tan koulié-a. Sé pa sa-k réyisi tout-suit ki konté; sé sa-k diré. Nou kapab byin limin yon difé ak papié, ak pay, nou ouè-l flanbé monté disèt rotè, sa pa vlé di l-ap diré pou sa. Sé konsa moun nan ki fi-n pozé fondasion kay li oubyin ki kouri pip-pip al nan lagè-a, li kapab fè ouè, min fè-ouè pa diré. Sé sa-k diré ki konté. Pito nou mizé nou poté bon komision. Jézu aprann nou kalkilé (Lc 14,25-33). Min Sajés ak prévouayans, sé Bondié ki bay sa. Sajés Bondié pa kanmarad sajés lèzòm (1 Co 1,20ss). Sé tout tan pou n-ap lapriyé pou Bondié ba nou Sajés ki té bò koté-l la lè-l t-ap kréyé Sièl la ak tè-a (Sg 9,13-19), sé pandan tout tan ki gin tan li t-ap pansé fondasion sa-a, pou-l tè pozé-l sou baz ki pap tranblé-a. Léspri Sajés la ba nou Sajés Bondié-a. Milan dévan Bondié sé tankou yon jou, sé pou-l aprann nou kalkilé pou nou réglé afè nou dapré li minm ki asiré travay min nou (Ps 89/90). Sajés la sé yon limiè; sé fas Granmèt la k-ap kléré sou nou, pou-l aprann nou jijman-l yo (Ps 118/119).

*

Sajés Bondié dévoualé nan Koua-a. Lè Jézu ap palé ak Nikodèm (Jn 3,13-14), li fè-l konprann pèsòn pa monté nan sièl la (pou-l al chèche Sajés la), sof Sila-a ki désann sot nan sièl la (ki poté Sajés la; cf Ba 3,29; Pr 30,4; Job 11,5; 28,1,28; Si 1,1; Sg 9,16; Dt 30,11; Rom 10,6; Ep 4,8-9 3,13; Ph 2,6-11); épi minm lè-a, li ajouté: Tankou Moyiz té isé koulèv la sou poto-a nan savann nan, konsa yo gin pou yo isé pitit Moun nan tou (sou Koua-a), Jn 3,14. Sajés la dévoualé nan Koua-a. Sin Pòl di Korintyin yo sa. Sin Monfò di Sajés la sé Koua-a, Koua-a sé Sajés la. Lévanjil vintouazièm dimanch òdinè C-a di: "Moun ki pa poté Koua-l pou-l vi-n apré-m, li pa kapab patizan-m". Premié léktu-a minm palé nou sou Sajés Bondié-a yo pa kapab sondé-a. Y-ap mandé Bondié pou-l voyé-l, pou lèzòm kapab kalkilé volonté-l. Sé lidé sa-a tou Psòm-répons la dévlopé lè-l di: "Aprann nou konté jou nou yo pou nou mété kè nou nan chémin Sajés la" (Ps 89/90,12). Premié léktu-a di: "ki moun ki konnin léspri-ou, si-ou pa bay sajés la, si-ou pa voyé léspri Sin-ou nan sot anro nèt la?" (Sg 9,17).

Ansilik Pap Jan-Pòl II sou léspri Sin-an (Dominum et vivificatem) mandé nou pou nou lapriyé Granmèt la, pou-l voyé léspri Sin-an, spésialman antan n-ap viv tan k-ap préparé ané 2.000 la.

Nan sèt kado léspri Sin-an, premié plas sé pou léspri Sajés la. Lè n-ap vòltijé yon bariè oubyin lè n-ap janbé yon kanal ki laj, nou rékilé, pou

nou pran élan. Sé nan sans sa-a lévanjil vintouazièm dimanch òdinè C-a mandé nou pou nou kòmansé chita pou nou kalkilé sa-k nésésè anvan nou mét min nan travay la, pou nou kalkilé si nou gin kont sòlda anvan nou pati al fè lagé (Lc 14,25-33).

Jézu éspliké sans parabòl la, antan-l di: "Sé konsa tout moun nan pami nou ki pa rénonsé tou sa-l ginyin, li pa kapab patizan-m" (Lc 14,33). Koua-a, sé rénonman. Nan sans sa-a, aksépté kondision pòv la, sé aji avèk sajès. Psòm-répons la di: "Lavi nou sé tankou zèb, li pousé yon jou, li fléri, li séché" (Ps 89/90,6). Lè n-ap réfléchi sou tan-an k-ap pasé-a, nou pézè avantaj ki sou tè-a avèk poua balans tan ki pap janm fini-an (Ps 89/90,4.10.12). Lè sa-a nou pa mét asirans nou nan anyin sof nan Bondié. Okontrè plis nou kapab rénonse byin nou ginyin, sé plis nou gin garanti nan Bondié. Final Psòm-répons la di: "Asiré travay min nou-an sou nou, travay min nou, asiré-l" (Ps 89/90,17).

Dokiman Konsil Vatikan II ("Gaudium et Spes") sou kondision légliz nan tan sa-a (n. 39), fè sonjé sa Sin Pòl di Korintyin yo, kijan tan-an kout, l-ap pasé vit; li di: "Moun ki marié, sé pou yo fè kòmsi yo pa-t gin madanm; sa k-ap kriyé, kòmsi yo pa t-ap kriyé; sa-k gin kè kontan, kòmsi yo pa t-ap gin kè kontan; sa k-ap achté, kòmsi yo pa-t posédé; sa k-ap sèvi ak tè sa-a, kòmsi yo pa t-ap sèvi avèk li vré, paské l-ap pasé, figi tè sa-a" (1 Co 7,29.31). Sé konsa nan lévanjil vintouazièm dimanch òdinè C-a Jézu di: "Si yon moun vi-n koté-m san-l pa rayi papa-l, manman-l, madanm li, pitit gason-l, pitit fi-l, frè-l ak sè-l, jous pròp tèt li, li pa kapab patizan-m" (Lc 14,26). Li éspliké déklarasyon sa-a pi louin, antan-l di: "moun ki pa poté Koua-l pou-l vi-n apré-m, li pa kapab patizan-m" (Lc 14,27). Li ba-l yon dénié ésplikasyon nan finisman pasaj minm lévanjil la antan-l di: "Sé konsa tout moun nan pami nou ki pa rénonse tou sa-l ginyin, li pa kapab patizan-m" (Lc 14,33)

Tou lè toua foua li fini sou minm réfrin-an: "Li pa kapab patizan-m"; sa vlé di tou lé toua pasaj yo sanblé, youn éspliké sans lòt; sé minm mésaj la. Joupa nou abité sou tè-a, l-ap défèt moso pa moso (2 Co 5,1ss), sé yon kay k-ap diré tout tan n-ap jouinn pou nou abité nan sièl la. Sou tè sa-a sé pélrin ak étranjé nou yé (He 11,13; 1 p. 2,11; Ps 119,19); nou pa gin doua kòmsi sé la pou nou té rété tout tan. Sé tout tan nou blijé ap fè rénonman sa-a.

Sin Pòl mandé Filémon nan dézièm léktu vintouazièm dimanch òdinè C-a pou-l lagé Onézim, ésklav li-a, pou-l konsidé-l tankou frè-l, sé paské avèk batèm li-a, li déjà travèsé nan kondision moun k-ap viv lavi anro-a, koté tout moun fè yon sèl fanmiy (Phm 9b-10.12-27). Biyé Sin Pòl voyé bay

Filémon-an doué fè nou réfléchi sou fason pou nou trété moun ki nan sèvis nou. Nou doué sonjé yon lè ap rivé, koté nou tout ap sou minm ran dévan jijman Granmèt la Sè dépi kouliè-a pou nou réajisté konpòtman nou. Nou pa doué kite sé dèt moun ki pa nan légliz k-ap vi-n ba nou léson pou montré nou kijan pou nou fè pou nou konsidéré tout moun kòm moun, san diférans klas, san katégori. Jézu déjà ap répété nou sa dépi lévanjil ap préché. Apot yo pa sispann ap kontinué fè tandé mèsaj li-a. Sé konsa Sin Jak di pou nou fè atansion, si nou résévoua vizit moun ki gin konsidérasion ak moun ki gin plas nan sosiété-a, pou nou pa fè diférans, yo tout sé frè nou, yo tout sé sè nou (Jc 2,1-13).

Nan pansion lékòl, gin yon ti élèv ki té lèvé nan nuit, l-al nan gad-manjé-a, li pran yon saché bonbon. Sivéyan-an ouè sa, min kòm lamp té déjà étinn, li pa réyisi rékonèt élèv la. Li kinbé-l. Élèv la débat nan min-l, pou-l chapé. Anvan-l gin tan fi-n glisé nèt nan min-l, sivéyan-an pran yon sizo, li koupé yon mèch chévé élèv la, pou-l kapab rékonèt li nan landmin matin. Élèv la minm, pandan-l kouché nan kabann li, li pa réyisi dòmi. Li kalkilé. Li pran yon sizo tou, li maché bò kabann tout lòt élèv yo, li koupé yon mèch chévé nan tèt yo chak tou. Konsa nan landmin matin, lè sivéyan-an ap fè inspéksion, li ouè tout moun gin minm mak la, li pa réyisi rékonèt kilès ki té pran saché bonbon-an.

Nou tout nou gin yon mak konsa. Nan pouin diférans nan pami nou. Nou tout nou éritié péché Adan-an. Min an minm tan tou nou tout nou éritié lagras Jézu-Kri-a. Sé pou nou gin SOLIDARITÉ youn pa rapò ak lòt, pou youn pa trété lòt pi ba, paské mòd jan sèvis lòt la ap rann nan pa ba-l posibilite pou-l chita nan salon. Nou tout sé frè. Salon nou sé nan sièl la li yé, koté Granmèt la ba nou randé-vou nan mézi nou gin lacharité nan kè nou.

N-ap mandé Manman Mari pou nou fè rénonisman sa-a, antan sé pa byin nou sèlman pou nou kite, min sé pròp konsidérasion nou gin pou pròp tèt pa nou, ki fè nou gin tandans konprann nou plis pasé yon lòt la.

*

Lasajès sé lakoua; lakoua sé lasajès, dapré sa Sin Loui-Mari Grinion de Monfò, di nan liv "l'Amour de la Sagesse Éternelle" (N 180). Sé pa li minm ki invanté fòmil sa-a, li ranjé-l konsa tankou yon fason pou rasanblé lidé Sin Pòl dévlopé nan premié lèt li té ékri Korintyin yo (1 Co 1,17-25). Li té di langaj Sajès Bondié-a sé foli pou lèzòm, paské sé nan lakoua-a li parét klè. Sé lè Jézu isé anro Koua-a li fè ouè Sajès Bondié-a tout bon (Jn 3,13.14). Lè Jézu ap palé avèk Nikodèm, li di-l pèsòn pa monté anro-a nan sièl la, sof

Sila-a ki té désann sot nan sièl la, Pitit moun nan ki nan sièl la (Jn 3,13). Sé yon fason pou-l té di sé Pitit Moun nan sèlman ki gin Sajès, paské Sajès la sé nan sièl la sèlman li soti. Pou yon moun gin Sajès la, fò sé nan sièl la li soti avèk li. Min nan pouin pèsòn ki monté nan sièl la al chèchè-l, dapré sa liv sajès yo té konn di-a (Pr 30,2-4; Sg 9,1-18; Ba 3,9-4,4; Job 28,1-28; Si 1,1-10; cf Dt 30,11-14). Konsa sé Jézu sèl, li minm ki Pitit Bondié ki nan vant Papa-a, ki kapab bay Sajès la, paské sé li minm sèl ki soti nan sièl la. Sé poua li di Nikodèm: "Pèsòn pa monté nan sièl la sof Sila-a ki désann sot nan sièl la, Pitit Moun nan ki nan sièl la" (Jn 3,13)

Min osito apré (Jn 3,14) Jézu di karéman, san-l pa pasé okinn chanjman vitès, tankou li kité priyè pran kantik, li di: "Minm jan Moyiz té lévé koulèv la nan savann nan, konsa tou y-ap lévé Pitit Moun nan, pou moun ki koué nan li yo pa péri, min pou yo gin lavi ki pap janm fini-an". Sé yon fason pou-l invité nou ouè lonbraj Koua-a ki déjà ap kouvri tè-a jou Vandrédi-Sinan. Koua-a sé chémin Sajès Bondié-a pran pou-l rétownin lakay li nan sièl la koté-l soti-a. "Pèsòn pa monté nan sièl la sof Sila-a ki désann sot nan sièl la, Pitit Moun nan ki nan sièl la". Li rémonté nan sièl la, antan-l monté sou Koua-a, sé lè sa-a minm li fè ouè li sé Sajès tout bon vré. Li montré rinmin li gin pou Papa-a, ak rinmin Papa-a gin pou nou.

Yon misionè sé moun ki doué gin lodas, ki pa doué rét ap kalkilé pou-l ouè si tout moun dakò avèk li anvan-l mét yon pié dévan. Minm si li pou kont li, sé pou-l maché; otréman li riské rét kanpé minm koté-a pandan lontan. Li pa doué mizé sou rout avèk komision Granmèt la. Li mandé pou nou sèvi-l témouin jous nan bout tè-a (Ac 1,8). Sa mandé pou nou fè kèk rénonnman ki kouté nou.

Élizé té dakò pou suiv Profèt Éli, min li té mandé Profèt Éli pou-l pasianté yon ti moman, pou-l pèmèt li al anbrasé moun lakay li. Profèt Éli pa dakò. Minm lè-a Élizé pran bèf yo ak zouti ki t-ap sèvi pou viré tè-a; li touyé bèf yo, li sèvi ak boua zouti-a pou-l kuit yo. Li séparé yo bay moun ki t-ap travay avèk li yo, épi li suiv Profèt Éli la minm (1 R 19,19-21). Sé poua Jézu di: Moun ki mét min nan zouti k-ap sèvi viré tè-a, épi ki gadé dèyè, li pa mérité pou-l vi-n avèk li (Lc 9,61.62). Yon misionè blijé fè kèk rénonnman, pou-l pran koua-l, pou-l, pou-l suiv Jézu. Chak moun gin fason pa-l pou fè rénonnman-l. Chak moun gin fason pa-l pou-l viv Sajès lakoua-a. Gin dé foua sé zanmi nou nou blijé rénonné. Sé pa nou ki t-a vlé, min nou blijé chouazi ant yo minm ak Granmèt la k-ap kondui nou sou yon chémin ki plin pikan, koté yo minm yo gin pié trò délika pou yo pasé.

Nou blijé chouazi; lavi-a, sé yon pakèt kalfou, koté n-ap chouazi: chyin gin kat pat, li pa kouri pa kat chémin. Fè-l pran youn nan yo. Chémin sièl la sé monté l-ap monté. Moun ki rinmin lavi fasil, pou yo gin tou sa yo bézouin, pou pran lèz-kò yo, jan yo pito, yo pap pran rout k-ap monté-a; li trò rèd pou yo, li mandé tròp éfò (Mt 7,13s). Époutan, yo pa kéyi ròz san sé pa sou branch pikan.

Jézu té di yon Sin: "Sé pa pou jouèt mouin té rinmin-ou" Rinmin sé dévoué tèt nou, rinmin sé bliyé avantaj nou, rinmin sé sonjé lòt la, rinmin sé sakrifis. N-ap mandé Notré-Dam de la Sajès pou-l aprann nou maché sou chémin lakoua-a, san nou pa plinyin, antan nou poté koua-a avèk kouraj, pou nou rivé nan chémin k-ap débouché nan siè-l la.

Psòm-répons la (Ps 89/90) mandé Bondié pou-l aprann nou kalkilé jou nou yo, pou nou dékouvri Sajès la. Aprann kalkilé, sé sa tou lévanjil la di nou (Lc 14,25-33). Aprann kalkilé, sé sa roua Salomon té mandé Bondié, nan bèl lapriyé li té fè pou-l mandé Sajès la, dapré premié léktu-a (Sg 9,13-18).

Aprann kalkilé, sé aprann fè méditation, sa vlé di gadé tout bagay nan limié Bondié, nan klété léspri Sin-an, pou nou pa kité rézonman moun troublé nou (Col 2,8). Minm si avèk lidé y-ap prézanté dévan nou, y-ap éséyé mét barié sou chémin nou, sé pou nou pasé anba lantouraj la, jan Sint Tèrèz lanfan Jézu di-a, san nou pa bézouin voltijé anlè-l pou nou pa chiré rad nou. Glisé kò nou anba-l tou dousman. Yon lè Sint Tèrèz de lanfan Jézu minm avèk sè-l la, Séli-n, yo té tou piti, yo t-ap éséyé antré nan yon jadin, min té gin yon choyal ki té baré rout la, granmoun yo blijé fè tout tou-a pou yo antré nan jadin-an, yo minm minm yo glisé kò yo anba vant choyal la, yo antré nan jadin-an karéman. Li di sé konsa nan lavi-a, lè nou pa kapab pasé anlè difikilté yo, sé pou nou pasé anba, sé yon fòm Sajès sa yé. Fè kò nou tou piti, glisé kò nou, n-ap rivé kan minm koté n-apralé-a.

N-ap mandé Manman Mari pou-l fè nou pozé kò nou tou piti, san nou pa pran pòz, san nou pa fè arogan, grandizè, antan nou pozé nou konnin pasé pèsòn, sitou pou nou gin kouraj rénonse yon chémin koté nou té déjà angajé, lè nou ouè li pap débouché.

Solda Jédéyon yo ki t-apral nan lagè-a, Granmèt la té trouvé yo trop (Jg 7,2). Li fé Jédéyon ranvouyé tou sa-k pè, k-ap tranblé (Jg 7,3). Sou trandé-mil moun, sé dimil sèlman ki rété. Sou di-mil sa yo, gin touasan ki travèsé lariviè-a, san yo pa pozé, san yo pa pran tan ouété sa-k nan do yo, pou yo bouè dlo pi alèz, yo kontanté yo lanbé dlo-a ak lang yo tankou ti chyin, antan y-ap travèsé lariviè-a minm ki té ba yo jous nan kou-a, konsa

yo pa pèdi tan. Sé yo minm sèl ki kontinué ak Jédéyon jous yo ranpòté lavitoua-a (Jg 7,4-8).

Si nou pa rénoncé pran lèz-kò nou, nou pap rivé nan bout chémin-a.

*

Croix: Ez 9,4.6; Mt 10,38; 16,24; 20,19; 23,34; 27,32.40.42; Mc 8,34; 15,21.30.32; Lc 9,23; 14,27; 21,25.39; Jn 19,17.19.20.25.31; Ac 2,23; 1.Co 1,17.18; Ga 3,1.; 5,11; 6,12.14; Ep 2,15; Ph 2,5; 3,18; Col 1,20; 2,14; He 12,2.

*

* *

VINKATRIYÈM DIMANCH ÒDINÈ A

Lè n-ap résité "Notre Père" la, nou di: "Padonnin nou sa nou fè-ou, tankou nou padonnin moun ki fè nou kichòy!". Sou Koua-a Jézu di: "Papa, padonnin yo, paské yo pa konn sa y-ap fè!" (Lc 22,34). Non sèlman li padonnin, min li éskizé. Sé konsa lè Sint-Étièn ap mouri anba kout ròch Juif yo, li di: "Granmèt, pa mété péché sa-a sou kont yo!" (Ac 7,60). Jézu di Sin Piè sé pa sèlman sèt foua pou-l padonnin, min souasandis foua sèt foua (Mt 18,22). Li fè sonjé padon-an pa doué gin limit, pou-l korijé déklarasion Lamèk té fè-a, lè-l té di vanjans la pa t-ap gin limit la, lè-l té touyé ti moun nan ki té dérèspékté-l la, épi li té di: "Y-ap tiré vanjans sèt foua pou Kayin, min Lamèk minm y-ap tiré vanjans pou li souasandis foua sèt foua" (Gn 4,24).

Nou doué padonnin, paské Bondié padonnin nou (Col 6,13), nou doué padonnin tou pou Bondié kapab padonnin nou (Lc 6,37). Bondié déjà pran dévan, li padonnin nou. Éspérians sa-a nou fè-a dispozé kè nou pou nou éfasé dèt **lòt moun** kapab ginyin aléga nou. Jès sa-a nou fè-a louvri kè nou nan diréksion **Bondié** pou nou profité padon-l nan. Lè nou padonnin, nou sévi intèmediè ant Bondié ak prochin-an. Sèké sé Bondié sèl ki kapab padonnin. Li fè padon-l nan pasé nan nou pou-l touché kè moun nan ki fè nou kichòy la, paské tou sa yon moun fè nou, sé Bondié minm li fè-l. Nou sé pòtré Bondié. Si nou réfizé padonnin, nou fèmin kouran padon Bondié-a. Padon-an sot nan Bondié, li pasé nan nou, l-al nan prochin-an. Kè prochin-an déséré. Li réprann rélasyon-l parapò a nou, nou minm tou nou vi-n alèz parapò a Bondié. Padon-an, sé yon kouran ki sot nan Bondié, ki travèsé kè nou, ki tounin nan Bondié, koté-l té sòti-a. Sous sa-a pa kapab tari. Sé sous k-ap koulé nan kè Jézu, ki louvri sou Koua-a (Jn 19,34). Sé sous sa-a minm li promèt madanm Samari-a sou bò pui Jakòb la (Jn 4,10), ak Juif yo nan fèt Tant yo (Jn 7,38): Nan kè-l sé larivière dlo lavi k-ap koulé. Sous sa-a sé léspri Sin, li minm Profèt Ézékièl di Bondié ap vidé nan kè nou tankou yon dlo pròp la, pou nétouayé sa nou fè ki pa pròp yo (Ez 36,26ss). Sé li minm Jézu té bay Apot yo nan asouè Rézureksion-an, lè-l souflé sou yo, li di yo: résevoua léspri Sin-an; péché yo éfasé, y-ap rét éfasé!" (Jn 20,21).

Sa té fè plis pasé katòzan dépi Jakòb té pati pou-l sovè kò-l louin frè-l Ézayu ki t-ap chèché touyé-l la. Lè-l tounin nan péyi-a, li voyé yon pakèt kado bay Ézayu pou-l pèmèt li travèsé péyi-l la (Gn 32-33). Lè yo rankontré, Ézayu vòltijé nan kou Jakòb, yo tou lé dé pran kriyé. Ézayu bliyé si-l té gin kont ak Jakòb (Gn 33,4). Jozèf kriyé lè-l fè frè-l yo rékonèt li (Gn 45,2). Non sèlman li padonnin yo, min li fè yo vi-n abité nan péyi-a, li ba yo tout kalité

avantaj pou yo viv alèz. Lè Jozèf aprann yo pè pou-l pa tiré vanjans kont yo, Jozèf kriyé ankò (Gn 50,17). Li di li pap pran plas Bondié, li konsolé yo, li palé ak yo avèk bon jan (Gn 50,11).

Padon-an sé kouran léspri Sin-an ki sot nan kè Bondié, ki travèsé kè nou, ki louvri kè prochin-an, ki rétravèsé kè nou, ki tounin nan Bondié koté-l soti-a. Sin Pòl di: "pa étinn léspri-a" (1 Th 5,19). Si nou réfizé padonnin, sé léspri-a nou étinn nan kè nou. Sin Pòl di: "nou mèt fè kòlè, min pa kité solèy la kouché sou kòlè nou" (Ep 4,6; Ps 4,5; Mt 5,22), sa vlé di: pa kinbé moun nan kè, pa kalkilé vanjans.

Moun nan ki fè péché piblik ki grav kont légliz, apré nou fi-n ba-l toua avètisman lévanjil vintouazièm dimanch òdinè A-a prézanté yo, --- premié avètisman-an pou kont nou avèk li-a, dézièm avètisman-an dévan dé oubyin toua témouin yo, touazièm avètisman-an dévan tout légliz la, ---, minm si mision nou fini aléga-l sou pouin sa-a, nou pa kinbé-l nan kè nou pou sa (Mt 19,15-17; 1 Co 5,13.5; 1 Tm 1,20; 2 Tm 4,14; 2 Jn 10; 3 Jn 10; Jud 22-23), nou pa kalkilé lidé vanjans kont li pou sa, nou pa pran plas Bondié pou sa; minm si dévoua nou fini kòm santinèl, nou toujou rété yon frè ak yon papa pou li, yon sè ak yon manman pou li, san nou pa jijé fon konsians li, san nou pa kondané-l. Sé Bondié sèl ki sondé kè ak rin.

Nou pa doué sanblé difé rayisans nan kè nou, minm si tanpéraman nou pa alé avèk tanpéraman yon lòt moun. Sin Pòl té fè gro diskision ak Sin Banabé osijè Sin Mak. Banabé té pran Mak avèk li, li t-al fè mision sou zilé Chip. Pòl té pran Silas ak li, yo té pati an Siri ak Silisi (Ac 15,36-40). Min nan téstaman Sin Pòl ékri Timoté, li mandé-l pou-l pran Mak, pou-l minnin-l vini avèk li a-Ròm, paské Mak ba-l anpil bon konkou nan apostola-a (2 Tm 4,11). Sa vlé di rékonsiliation-an té fèt (cf Col 4,10; 1 Co 9,6). Sé pa bout boua nou yé; nou kapab rivé yon pouin, nou bouké, nou pa kapab sipòté kontrariété; min lè fatig la pasé, rélasyon yo doué vi-n réajisté avèk délikatès.

N-ap mandé Manman Mari pou-l aprann nou distingé péché-a ak moun nan ki fè péché-a, pou nou kondané péché-a, min pou nou sipòté moun nan ki fè péché-a.

*

Nan premié prèch Jézu té fè sou mòn nan, li té bay yon konsign nan finisman prèch la, li té di jan nou vlé pou yo trété nou, sé konsa tou pou nou trété prochin nou. Sèvitè nan lévanjil vinkatrièm dimanch òdinè A-a té égoiyis (Mt 18,21-35); li té rayisab, sé tèt li sèlman ti t-ap sonjé, li pa-t pran

ka lòt la. Nan lapriyè Jézu té montré Apot li yo, li té di yo pou yo mandé Papa-a padonnin yo minm jan yo minm tou yo padonnin moun ki fè yo kichòy (Mt 6,12.24-15). Sin Jak di nou jijman-an ap san kè sansib pou moun ki pa fè kè yo sansib pou prochin yo. Liv Ékléziastik la di nou nan prémié léktu vinkatrièm dimanch òdinè A-a (Si 27,30-28,7) moun k-ap tiré vanjans sou lòt yo, Bondié ap tiré vanjans sou li tou (Si 28,1). Sèké Sin Pòl di nan lèt li ékri Romin yo Bondié di vanjans la sé pou li li yé (Rom 12,20). Liv Ékléziastik la mandé pou nou padonnin fot prochin yo, pou, lè n-ap lapriyè, Bondié padonnin péché nou (Si 28,2). Si nou kinbé moun nan kè, Bondié pap géri nou, dapré sa liv Ékléziastik la di nou (Si 28,3). Li di si nou pa pran pitié pou prochin nou, nou pa bézouin rét ap lapriyè pou pròp péché pa nou, Bondié pap kouté nou. Jézu di nou si nou gin kichòy ak frè nou, sé pou nou rékonsilié anvan nou proché dévan-l (Mt 5,24). Liv Ékléziastik la di si nou kinbé prochin nou nan kè, ki moun k-ap padonnin péché nou? (Si 28,5).

N-ap mandé Manman Mari pou-l aprann nou padonnin minm jan Granmèt la padonnin fot nou. N-ap mandé-l pou nou pa kinbé pèsòn nan kè, pou nanm nou débarasé, pou Jézu kapab alèz nan kè nou. N-ap mandé-l pou nou pa fè gro kòlè k-ap dékontrolé nou, k-ap fè bouch nou chapé, pou-l di sa pou-l pa t-a di. N-ap mandé-l pasians pou nou sipòté défo prochin nou, tankou Granmèt la pran pasians avèk défo pa nou. Liv Ékléziastik la di: sonjé dènié moman-an, épi sispann rayi (Si 23,6). Nou pa doué rété ap défann répitasyon nou, sé sa ki lakoz youn pa kapab konprann lòt. Sé pou nou aksépté frotman tanpéraman nou avèk pa lòt yo, sé tankou dé kouto youn ap filé lòt. Gin anpil bagay nou pa kapab ouè davans. Nou pa kapab prévoua réaksion paròl nou oubyin konpòtman nou ap okazioné nan yon lòt moun. Nou pa doué trò présé palé, dapré sa Sin Jak di nou (Jc 1,19). Li di kòlè lézòm pa réglé jistis Bondié (Jc 1,20). N-ap pran modèl sou Jézu ki tou dou, ki tou pòv nan kè-l. Konsa rélasyon nou ak lòt yo pap tounin vinèg, okontrè l-ap tankou siro mièl pou fè nou bliyé tout ti gou anmè nou té rankontré.

*

* *

VINKATRIYÈM DIMANCH ÒDINÈ B

Prémié léktu vinkatriyèm dimanch òdinè B-a (Is 50,5-9a), sé li minm tou ki vini nan Mèkrédi-Sin. Sé youn nan kat pasaj liv Profèt Izayi yo yo rélé "Kantik Sèvitè Granmèt la". Prémié-a (Is 42,1-7) vini pou Lindi-Sin, dézièm nan (Is 49,1-6) vini pou Madi-Sin, touazièm nan (Is 50,5-9) vini pou Mèkrédi-Sin, katriyèm nan (Is 52,13-53,12) vini pou Vandrédi-Sin. Konsa sé tout Sémèn Sint la yo vini. Sèvitè sa-a sé Jézu-Kri li minm, spésyalman nan tan Soufrans ak lanmò-l la. Yo voualé fas li, yo ba-l souflèt, yo kraché nan figi-l. Li rété byin dosil, san-l pa fè rébèl (Mt 26,67; Lc 22,63-65; Mc 14,65; 15,16-20). Jézu té aksépté maché karéman dévan soufrans sa yo, sé kòm si li fè figi-l vi-n di kon ròch pou-l monté Jérusalèm (Lc 9,51; cf Ez 3,8). Okinn fo-témouin pa-t kapab fè balans la panché pou kondanasion-an (Mc 14,56). Bondié Papa-a té gin pou-l rann li jistis (Jn 17,1). Si Bondié avèk nou, kilès ki kapab kont nou? Kilès ki kapab akizé sila yo Bondié fi-n chouazi-a? Sé Bondié k-ap rann jistis, ki moun ki kapab kondané nou? (Rom 8,33-34).

Piè pa konprann chémin sa-a Jézu chouazi-a. Li éseyé fè-l chanjé. Piè fi-n konnin Jézu sé Kris la, Sila-a Bondié Papa-a sakré-a, li voyé sou tè-a. Min Kris la yo t-ap tann nan, sé té yon moun ki pou té vi-n délivré Pèp Israèl la sot nan min Romin yo ak tout lòt lènmi yo, tankou patizan Émayus yo té dévoualé karéman-an jou soua Pak la, lè yo t-ap palé ak Jézu, san yo pa-t rékonèt si sé li minm ki té sou rout la avèk yo-a (Lc 24,21). Époutan sé pa mòd roua sa-a Jézu chouazi. Li té déjà sovè kò-l lè foul la té vlé fè-l roua apré li té fi-n ba yo pin nan savann nan (Jn 6,15). L-ap di Pilat sé pa sou tè sa-a péyi koté-l Roua-a soti (Jn 18,36). Li gin pou-l fè Piè rinmèt sab li nan fourou-l, lè Piè té vlé pran défans Jézu-a nan jadin Jétsémani-an, lè sòlda chèf prèt yo té vi-n arété Jézu-a (Jn 18,10-11; Mt 26,52). L-ap di Juif yo sé anro li soti, li pa soti anba-a (Jn 8,23). Li gin pou-l monté koté-l soti-a, min sé sou Koua-a l-ap isé, pou-l minnin tout moun avèk li (Jn 12,32) nan sièl la.

Jézu vi-n kòm Roua, min sé tou dou, tankou yon mouton y-ap kondui labatoua (Is 53,7). Péyi Roua-l la, sé sou yon ti bourik l-ap monté pou-l antré ladan-l ak kè pozé, sé pa sou choual k-ap sèvi pou batay (Jn 12,14-15; Za 9,9) ak kè séré.

Sé konsa, lè yo té vi-n kot Jan-Batis pou yo té mandé-l ki moun li té yé-a, Kris la, Éli, Profèt la, yo t-ap tann mòd jan Mési k-ap délivré Pèp la sot anba min lènmi-an ki t-ap krazé-l la. Jan-Batis té fè konprann li pa-t Paròl la, sé voua-a k-ap soutni Paròl la li té yé. Li té di li pa-t minm mérité défèt kòd sapat Kris la, li té di sé pa li minm ki mari-a, sé zanmi mari-a li yé, li té di sé

pou Kris la grandi, pou li minm li bésé. Sé yon sinp ti lanp li té yé, sé pa li minm ki té Limiè-a (Jn 1,19-28; 3,29-30; 5,35). Sé minm chémin sa-a Jézu suiv tou. Sé pa chémin grandè li pran pou-l sovè Pèp li-a. Min fason sa-a, Pèp la pa-t kapab konprann li. Kouzin Jézu yo té di-l: Fè ouè sa-ou yé, sispann aji an kachèt, montré foul la bèlté-ou (Jn 7,2-4). Jézu pa aksépté tonbé nan pièj sa-a, minm mòd pièj Satan té tann dévan-l déja nan dézè-a (Mt 4,5-6; Lc 4,9).

Chémin délivrans la, sé chémin pikan, sé chémin k-ap monté, sé chémin ki rèd (Mt 7,13-14). Sé chémin lakoua-a. Fèt "Exaltation de la Croix"-a (14 septembre) éspliké kijan bèlté koua-a sé nan Sajès Bondié li soti, Sajès sa-a ki pa minm avèk pa lézòm nan. Lékòl Profèt Izayi-a di: "Pansé nou, sé pa pansé-m, chémin nou sé pa chémin-m; minm jan sièl la ro anlè tè-a, konsa tou chémin-m yo ro anlè chémin pa nou, pansé-m yo ro anlè pa nou" (Is 55,8-9). Si Jézu pasé Piè lòd pou-l pa di pèsòn li sé Kris, sé paské moun yo pa-t ko paré pou yo té antré nan mòd jan chémin Bondié té chouazi pou Pitit li-a, chémin lakoua-a. Yo t-ap tann yon Mési k-ap ranpòté laviktoua sou tè-a. Jézu pa vlé kité yo nan lidé sa-a. Sé poua li di karéman: Moun ki vlé suiv li, sé pou-l rénonse pròp tèt li, pou-l pran Koua-l, pou-l suiv li. Sé pa nan chèché intèrè pèsònèl nou n-ap sovè, sé chèché avantaj Granmèt la. Sin Pòl di sé nan Koua Granmèt la l-ap jouinn okazion pou-l lévé tèt li (Gal 6,14; cf Alélouya 24° d.o. B). Sin Jak ba nou yon égzanp ki jan lidé nou pa minm ak lidé Bondié (Jc 2,14-18 = dézièm léktu). Nou égozis. Anvan nou fè yon ti lacharité, nou kalkilé kont kò nou pou nou ouè ki dézavantaj sa ap ba nou oubyin kijan nou kapab tiré yon avantaj. Nou voyé moun nan al fè rout li. Pòv sa-a sé Jézu li minm minm ki vi-n frapé pòt lakay nou. Lafoua nou mandé nou pou nou gadé anndan kè-l, jan Sin Vinsan de Pòl avèti nou-an (cf 27 septembre). Pòv la déja klouré sou Koua-a; nou pa doué pézé Koua-a pi plis sou do-l toujou, olié nou fè tankou Simon Sirèn k-ap édé Jézu poté Koua-l

*

Mési-a yo t-ap tann nan, sé yon Mési politik, k-ap délivré Pèp Israèl la sot nan min Romin yo. Min Jézu vini antan li réalizé jès Sèvitè Granmèt la, sa Profèt la té ouè nan vizion-an nan Liv Izayi-a (Is 42; 49; 50; 53), léktu yo konn li nan Sémèn Sint la (Lindi Sin: Is 42; Madi Sin: Is 49; Mèkrédi Sin: Is 50; Vandrédi Sin: Is 53). Nan vinnkatriyèm dimanch òdinè B-a sé touazièm Kantik la (Is 50) légliz mété pou nou kalkilé pou nou antré pi fon nan mèsaj lévanjil la (Mc 8,27-35).

Lè Jézu mandé Apot yo sa-l yé pou yo, li invité nou chak réponn, antan nou pozé tèt nou minm késion sa-a. Prémie paròl ki té soti nan bouch li nan lévanjil Sin Jan-an, lè Apot yo t-ap suiv li-a, sé "Sa n-ap chèche?" (Jn 1,38). Jézu toujou ap mandé nou nan ki sans n-ap chèche-l, sa nou bézouin nan min-l, kijan nou konsidéré-l, sa-l yé pou nou. Sé pa kozé nan liv, sé pa "yo di", sé pa sa moun yo di mouin yé, sé sa-m yé pou nou. Sa mandé pou nou fè espérians ak Jézu, viv ak li yon fason séré, sé moun ki dòmi ak Jan ki konn ronf Jan. Épi si nou gin yon lidé ki trò tèratè osijè-l, sé pou nou korijé-l, oubyin an tou ka, kite-l korijé-l pou nou, jan li té fè pou Apot yo, lè-l té di yo: "Sa fè dépi konbyin tan mouin la avèk nou, épi nou pa ko konnin-m toujou" (Jn 14,9).

*

Sé sou rout Jézu pozé patizan-l yo késion-l nan (Mac 8,27): ki sa-l yé-a. Li fè tankou l-ap fè avèk dé patizan-l yo sou rout Émayus la, apré-l té fi-n lévé vivan sot nan pami mò yo, jou dimanch Pak la (Lc 25,15). Li fè tankou-l fè avèk Samaritèn nan sou bò pui Jakòb la, antan l-ap fè yon ti poz sou rout la (Jn 4,6ss). Li fè tankou-l té fè avèk André ak Jan ki t-ap suiv li apré batèm li-an (Jn 1,38). Li fè tankou-l té fè avèk Nikodèm nan nuit la (Jn 3,1-21). Li fè tankou-l té fè avèk foul Juif yo nan dézè-a, apré-l té fi-n ba yo pin pou yo manjé-a (Jn 6,22-71). Li fè tankou-l té fè avèk Farizyin yo nan Tanp la (Jn 8,12-59). Sa-l gin pou-l dévoualé osijè pròp tèt li-a, li dévoualé-l tankou sé yon **chémin** li fè nou fè ansanm avèk li. Li pran nou sot byin louin, li kondui nou jous nan fon vérité-a. Sa nou pa kapab konprann, li kite lésprî Sin-an pou-l kontinué fè rès rout la avèk nou (Jn 16,13; Lc 2,50-51).

Nan koté nou rivé nan lévanjil Sin Mak la, sé tankou yon kalfou (Mc 8,27ss). Apati sa patizan yo konnin osijè Jézu, li pra-l fè yo monté pi ro, al pi dévan, antré pi fon. Sin Piè déklaré li sé Kris la (Mc 8,29). Sèlman Jézu pra-l fè-l dékouvri dimansion vérité sa-a. Juif yo t-ap tann yon Kris k-ap montré pouvoua-l (Mt 4,6; Jn 6,15; Ac 1,6). Jézu pral dévoualé yon Kris k-ap kite yo krazé-l (Is 53,1-12). Sé pou sa nan prémie léktu-a, nou li pasaj koté lékòl Profèt Izayi-a prézanté touazièm Kantik Sèvitè Granmèt la (Is 50,5-9), ki pa rézisté dévan moun k-ap frapé-l la, k-ap dérespékté-l la, paské li konnin sé Bondié k-ap pran défans li. Sé nan sans sa-a Jézu fè déklarasion sou mové trétman li gin pou-l sibi (Mc 8,31-33). Piè pa konprann; Jézu fè-l lobsèvasion (Mc 8,33). Lè y-ap vi-n arété Jézu nan jadin Jétsémani-an, Piè ap ralé épé, l-ap koupé zòrèy youn nan sèvitè gran-prèt la, pou-l pran défans Jézu (Mc 14,44). Jézu ap fè-l lobsèvasion ankò (Mt 26,52-54). L-ap géri zòrèy la minm (Lc 22,51). L-ap montré-l sé mision-l ginyin pou-l bouè kalis la (Jn 18,11). Sé pa féblès ak rézignasion ki fè-l adopté konduit sa-a; li

déklaré li gin doua fè ouè pouvoua-l (Mt 26,53). Li fè sòlda yo tonbé alaranvès anvan-l kité yo mét min sou li (Jn 18,6). Sé pa pran yo pran lavi-l, sé li minm ki bay li. Sé sa Profèt yo té ékri osijè-l. Sé sa li vi-n réalizé (Mt 26,54; Lc 24,26-27; cf 1 P 1,11).

Sin Piè ap profité léson sa-a, paské l-ap ékri osijè Jézu, antan-l prézanté-l pou nou tankou yon modèl pou nou suiv tras li: "li minm ki pa-t fè péché, yo pa-t jouinn manti nan bouch li; li minm yo déréspékté, min ki pa tiré vanjans, li minm ki soufri, san-l pa ménasé, antan-l rinmèt kòz li nan min Sila-a k-ap jijé avèk jistis la; li minm ki poté fot nou nan kò-l sou boua-a, pou nou mouri parapò a fot nou, pou nou viv pou jistis la, li minm ki géri nou avèk koté-l blésé yo" (1 P 2,21-24). Patizan Émayus yo (Lc 24,15), Samaritèn nan (Jn 4,6ss), André ak Jak (Jn 1,38ss), Nikodèm (Jn 3,1-21), foul Juif yo (Jn 6,22-71), Farizyin yo (Jn 8,12-59), sé konsa Jézu fè **chémin** avèk yo, antan l-ap dévoualé yo sa-l yé tout bon vré-a. Sé kòm si li pran yo nan yon pouin, li kondui yo nan lòt pouin-an. Li pa déplasé trò vit avèk yo. Li suiv kadans yo (Is 40,11; Gn 33,13). Li lévé voual la tou dousman. Li dékouvri yon ti pòsion alafoua, tankou lè y-ap fè sérémoni pou dévoualé Koua-a jou Vandrédi-Sin-an. Yo dékouvri yon bra; apré sa, tèt la, apré sa, tout Koua-a. Fèt "Exaltation de la Croix"-a, yo rélé-l "La Croix Glorieuse" (14 septembre). Sé yon fason pou montré vré sans soufrans Jézu-Kri yo, y-ap débouché nan bèlté-a. Sé yon **CHÉMIN** ak yon Pòt ki louvri sou vré lavi-a.

Sé pou rézon sa-a ki fè, apré Jézu fi-n fè premié déklarasion osijè soufrans, lanmò ak réziréksion-l nan, li pran toua nan patizan-l yo. ---- minm sa k-ap asisté-l yo sou mòn Jétsémani-an, jou y-ap vi-n arété-l la (Mc 14,33) ---- li minnin yo sou yon mòn ki ro anpil, épi li chanjé figi dévan yo; fas li vi-n kléré kon solèy, rad li vi-n blan kon lanèj, Moyiz avèk Éli ap palé avèk li, voua Papa-a ap déklaré li sé Pitit li rinmin-an, pou yo kouté-l (Mc 9.2-8). Jézu té vlé montré davans kijan soufrans ak lanmò-l té orienté nan Réziréksion bèlté-a, pou patizan-l yo pa-t dékourajé lè sa rivé (cf Préfas fèt Transfigirasion, 6 out).

Sou boua lakoua-a délivrans lézòm pandié, pou lavi-a soti ankò nan pié boua-a, min jan sé nan yon pié boua lanmò-a té soti, pou lènmi-an ki té ranpòtè laviktoua nan pié boua-a, Jézu-Kri krazé-l sou pié boua-a li minm (cf Nb 21,4-9; Jn 3,14; Gn 3,1-24). Sin Pòl di nou sèl fiètè nou, sé lakoua Jézu-Kri Granmèt nou (Gal 6,14). Li di Korintyin yo sé langaj Koua-a Bondié chouazi nan Sajès li pou dévoualé sékrè-l (1 Co 1,18ss).

Li fè Juif yo soti Éjip; yo drésé yon koua pou li. Li kondui yo karantan nan savann nan, li nourri yo ak lama-n, li fè yo antré nan péyi li té promèt la; yo drésé yon koua pou li. Li planté yo tankou yon bèl pié rézin; yo ba-l bouè vinèg ak fièl, yo louvri kè-l ak fouinn. Li frapé péyi Éjip la pou délivré yo; yo rimmèt li nan min Romin yo, yo frapé-l. Li fè yo soti Éjip, li nouayé Faraon nan lanmè Rouj; yo rimmèt li nan min gran prèt yo. Li louvri lanmè-a dévan yo; yo louvri kè-l ak fouinn. Li dirijé yo ak kolòn niaj la; yo kondui-l bay Pilat. Li protéjé yo nan savann nan, li ba yo manjé lama-n; yo frapé-l, yo bat li. Li kondui yo nan Ròch la, li ba yo bouè dlo lavi délivrans la, yo ba-l bouè fièl, yo pasé souaf li ak vinèg. Li frapé roua yo pou yo, roua ki gin pouvoua nan Kanaan, yo frapé-l ak rozò. Li mété yon baton kòmandman nan min yo; pou yo vi-n tounin pèp roua; yo mété kouròn pikan sou tèt li. Li lévé yo byin ro ak tout pouvoua-l; yo pandié-l sou boua lakoua-a. Koua Jézu-a, sé pa yon moso bout boua sèlman, sé pa nuit Jédi Sin-an ak jounin Vandrédi Sin-an sèlman. Sé tout réjité pèp li-a réjité-l san rézon-an, antan-l montré sa divès maniè, dépi-l rivé sou tè-a (Lc 2,7; Jn 1,11) joutan l-ap rémonté al kot Papa-a (Jn 19,15). Li rimmèt li mal pou byin. Sé poua Jézu di: "Yo rayi-m san rézon" (Jn 15,25). Épi li di si yo rayi-l, nou minm tou y-ap rayi nou (Jn 15,18). Sé nan sans sa-a nou gin pou nou réalizé nan kò nou sa-k manké nan soufrans Jézu yo pou kò-l ki légliz la (Col 1,24). Nou patisipé nan mèvèy sakré lakoua-l la, lè yo réjité nou san rézon. Lèt Ébré yo di pou nou aksépté soti déyò, koté yo réjité nou-an, sé la n-ap rankontré Jézu, n-ap poté laront li-a ansanm avèk li (He 13,13). Lè Jézu té fi-n anonsé soufrans li, lanmò-l ak réziréksion-l nan (Mc 8,31-33), li té rélé foul la ansanm ak patizan-l yo, li té invité yo patisipé nan kondision-l nan (Mc 9,34-38). Moun ki ront li dévan lézòm, l-ap ront yo tou dévan fas Papa-l ak dévan Anj li yo. Li mandé nou pou nou rénonse tèt nou, pou nou pran Koua nou, pou nou suiv li (Mc 8,34).

Li té détayé toua klas moun k-ap réjité-l yo: ansyin yo, gran prèt yo, profèsè yo (Mc 8,31), sa vlé di tout otorité yo: ni moun ki gin pouvoua pou **gouvènè** yo (ansyin yo), ni moun ki gin pouvoua pou **sanktifié** yo (gran prèt yo), ni moun ki gin pouvoua pou **anségné** yo (profèsè yo). Lè l-ap lévé vivan sot nan pami mò yo, anvan-l monté nan sièl la ofisièlman, l-ap bay Apot yo toua pouvoua sa yo, antan Papa-a rimmèt li tout pouvoua nan sièl la ak sou tè-a; l-ap di yo pou yo fè tout nasion yo vi-n tounin patizan (pouvoua pou yo **anségné**), pou yo batizé yo (pouvoua pou yo **sanktifié**), pou yo aprann yo obsèvé tou sa-l té kòmandé yo (pouvoua pou yo **gouvènè**) (Mt 28,19-20).

Min li pa-t vlé pou yo sèvi avèk yo tankou Juif yo. Nan sans sa-a li té avèti yo moun k-ap pèdi lavi-l akòz li minm ak lévanjil la, l-ap sovè-l (Mc 8,35).

Moun ki pèdi otorité-l akoz Jézu ak Lévanjil la, l-ap sové-l. Lè nou fèb dévan lézòm, sé lè sa-a nou fò dévan Bondié. Fòs Bondié déplouayé nan féblès (2 Co 12,9-10; 1 Co 1,25,27). Pouvoua sa yo, Jézu bay yo pou bati, li pa bay yo pou démoli (2 Co 13,10; 10,8). Sé sou li nou pran modèl antan nou aksépté pou nou sèvi avèk yo yon fason tou dou, tankou mouton y-ap kondui labatoua, dapré invitasion Jézu adrésé nou, lè-l di: "Vi-n jouinn mouin, nou tout k-ap rédi, k-ap plouayé ak gro chaj, m-ap soula-jé nou. Mété chaj mouin-an sou do nou, pran léson nan min-m, mouin tou dou, mouin gin kè-m tou pòv" (Mt 11,28-29). Sin Pòl di Korintyin yo: ak pouvoua sa yo Jézu ba li-a, li gin doua mét lòd nan kominoté-a yon fason sévè (2 Co 13,2), paské y-ap éksité-l pou yo chèché yon prèv nan min-l, pou-l montré pouvoua li ginyin (2 Co 13,3). Min li pito kité pouvoua Granmèt la déplouayé nan féblès li (2 Co 13,4). Li montré énjè nan lèt li yo (2 Co 10,10). Lè-l parèt, li pa réalizé pinision li té anonsé-a. Avètisman li té bay la fè yo gin tan korijé (cf Jonas). Sé pa pinision "vindicative" li vlé vidé sou yo, sé pinision "médicinale". Sé chanjman konduit yo li vlé, sé pa vanjans pou afron yo té fè-l. Pouvoua nan min nou kapab gonflé kè nou. Li kapab sèvi pou nou chèché fè respékté prestij nou. Jézu ba nou yo pou nou sèvi pèp li-a. Sé poua li di: plis nou gin yon plas ki ro, sé plis nou doué rabésé tèt nou ba (Mc 8,35; 10,43). Sé Granmèt la ki pran défans sa ki tou piti yo, jan Psòm-répons la di nou-an (Ps 114/116,6). Doué gin koréspondans ant déklarasion lafoua nou avèk konduit lavi nou, jan Sin Jak mandé nou nan dézièm léktu-a (Jc 2,14-18). Sin Piè té fi-n fè déklarasion lafoua-l: "Ou sé Kris la" (Mc 8,29). Min osito apré, lè Jézu montré ki trétman k-ap tann Kris la, li pa dakò avèk li. Gin anpil moun ki zanmi Jézu sou mòn Tabò-a, min ki pa rékonèt li sou mòn Jétsémani-an ak sou mòn Kalvè-a. Lè yo méprizé nou, lè yo réjté nou poutèt Jézu-Kri ak lévanjil li-a, sé pou nou sonjé patizan-an pa jouinn plis konsidérasion pasé Mèt li (Mt 10,24-25). Sé nan min Granmèt la pou nou rinmèt kòz nou, antan nou lapriyé avèk paròl Psòm nan: "Pitié pou nou Granmèt, pitié pou nou, gadé jan yo méprizé nou" (Ps 123,3).

N-ap mandé Manman Mari pou-l fè nou antré nan plan délivrans Granmèt la, antan nou aksépté rékonèt plas Koua-a doué ginyin nan lavi nou, san nou pa chèché anilè inpòtans li, antan nou sonjé rékòmandasion Sin Pòl la: "Pou mouin yon sèl bagay mouin vlé rékonèt nan mitan nou, sé Jézu-Kri, Jézu-Kri yo klouré sou Koua-a" (1 Co 2,2; Ga 3,1; 6,14). N-ap sonjé la Trè Sint Vièj Mari ki kanpé nan pié Koua-a, l-ap kalkilé sou sans koua-a nan kè-l, ki travèsé avèk épé-a, dapré sa Siméyon té di-l davans la (Lc 2,35; Jn 19,25). Nou chak nou gin yon fòm épé konsa ki travèsé kè nou; nan pié lakoua Jézu-

a, ansanm avèk "Notre-Dame des Douleurs", n-ap ofri-l bay Granmèt la pou nou réalisé nan kò nou sa-k manké nan soufrans li pou kò li ki légliz la (Col 1,24).

*

* *

VINKATRIYÈM DIMANCH ÒDINÈ C

Vinkatriyèm dimanch òdinè C-a, sé "miséricorde". Gin plis kè kontan nan sièl la pou yon sèl péchè ki fè pénitans pasé pou katrévindisnèf moun kòrèk ki pa bézouin fè pénitans (Lc 15,1-32: lévanjil). Bondié sé kè sansib tankou yon papa ki té pèdi pitit li épi ki vi-n jouinn li. Pèp Bondié-a fi-n fè péché, Bondié té prèt pou-l pini-l, lapriyè Moyiz dévoualé nou konfians nan bon kè Bondié. Bondié kalmé kòlè-l (Ex 32,7-11.13-14: prémié léktu). Psòm-répons la (Ps 50 /51), sé pròp lapriyè David té fè-a apré li té fi-n fè adiltè ak krim nan. Li lapriyè, Bondié padonnin-l. Sé Bondié ki rékonsilié nou nan Jezu-Kri épi ki voyé préché rékonsiliation-an (2 Cor 5,19: Alélouya).

*

Bondié sé kè sansib. Sé konsa li éplé non-l bay Moyiz. Kè-l téلمان sansib li voyé Pitit li-a pou-l sové moun péché-a té fè ésklav yo. Lè Jonas té fi-n préché moun Niniv yo, li té ralé kò-l nan dézè-a, pou-l ouè kijan difé sièl la ap tonbé sou Niniv apré karant jou yo. Min li konstaté Bondié pa détrui jan li minm li té anonsé yo nan prèch li-a. Li faché kont Bondié. Antan-l nan chalè dézè-a, Bondié fè yon ti pié maskriti pousé, pou ba-l lonbraj. Li kontan; nan landmin, Bondié fè yon ti vè piké pié maskriti-a. Pié maskriti-a mouri. Chalè solèy la tonbé sou tèt Jonas. Jonas pran babié pi rèd atò. Foua sa-a, li mandé mouri. Bondié di-l li sansib pou ti pié maskriti-a ki pa-t kouté-l okinn travay la. Épi li pa sansib pou tout foul moun sa yo ki abité Niniv la. Sa-k fè Jonas té vlé pou Niniv détrui-a, sé paské moun Niniv yo sé té lènmi pèp Israèl la. Sé yo minm ki té fè yo ésklav sou tan roua Niniv la yo té rélé Téglat Falaza-a. Jonas té byin konnin si-l préché yo épi yo fè pénitans, madichon Bondié té anonsé-a pa t-ap réalizé. Sé poua minm Jonas té sové kò-l byin louin jous nan dirèksion Tarsis la. Sé Bondié ki fòsè-l tounin antan-l fè yon gro pouason broté-l jous Niniv. Malgré Jonas fi-n préché, li té espéré kan minm moun yo pa t-ap kouté-l. Min li sézi lè-l ouè yo fè pénitans épi Bondié pa fè malè-a rivé. Jonas té vlé ouè vanjans tonbé sou Niniv. Bondié ba-l léson. Li montré-l li pa kalité Bondié sa-a y-ap fè provèb sou li-a, y-ap di: "kréyon Bondié pa gin gòm" nan... Okontrè sé gòm Bondié ki pa gin kréyon. Bondié toujou prèt pou-l éfasé péché nou. Sé nou minm ki sispèk, ki toujou ap sonjé sa nou té fè, ki pè parèt dévan fas Bondié, tankou Adan (Gn 3, 10). Bondié sé Papa, sé li minm ki kréyé nou. Li pa kapab pran plézi pou-l ap détrui nou. Li di sé pa lanmò moun ki nan péché-a li vlé; sa li vlé, sé pou moun nan chanjé fason l-ap viv, pou-l jouinn lavi ki pap janm fini-an (Ez 33,11).

Sé Konsa nan lévanjil vinkatriyèm dimanch odinè C-a, Sin Luk détayé toua parabol pou éspliké kè sansib Bondié: sé mouton-an ki nan rak boua-a, sé piès lajan-an ki pèdi-a, sé ti pitit la ki pati-a. Tou lé toua vlé fè nou konnin gin plis kè kontan nan sièl la pou yon sèl péchè ki fè pénitans pasé pou katrévindisnèf moun korèk ki pa bézouin pénitans. Min ki sans pénitans la yé?

Sé pa nésésèman abiyé ak rad sak tankou moun Niniv yo; sé pa non plis nésésèman rét konbyin jou san manjé, sé pa non plis nésésèman maché louin pou fè pèlerinaj; sé pa non plis nésésèman pran yon fouèt pou n-ap frapé kò nou. Bondié di vré pénitans la sé anndan kè nou li doué fèt. Sé kè nou pou nou chiré, sé pa rad nou. Sé sa Profèt yo di nou, sitou Izayi. Vré jèn nan sé chanjé mové dispozision kè nou aléga moun ki nan sèvis nou, soulajé éfò yo, ménajé fòs yo (cf Is 58). Vré pénitans la sé fè kè nou sansib pou pòv la, ki pa gin moun pou okipè-l la. Nou pa kapab konprann nou an règ ak Bondié, pandan nou kité prochin nou nan mizè. Vré konvèsion-an sé défèt tout kòd injistis, ki fè gin moun ki pa kapab kanpé an fas nou, pou yo palé ak nou.

Bondié désann li vi-n alarotè moun, pou moun nan kapab alarotè-l. Pénitans la, sé abandoné santiman ki fè nou konprann nou pi plis pasé yon lòt, n-ap gadé-l anlè poutèt nou gin richès, nou gin konsidérasion, nou gin konésans, nou gin bon konduit. Pénitans la, sé aksépté rékonèt tout moun sé moun, sou minm ran ak nou. Nou tout sé frè nan Jézu-Kri. Sé minm Bondié Papa-a ki fè nou. Sé tout tan nou bliyé ap réajisté santiman kè nou, pou nou aprann padonnin sa moun fè nou, sa sé yon pénitans tout bon vré; sa bliyé nou bliyé pròp tèt nou, pou nou sonjè lòt yo. Bondié sé kè sansib, li mal pou faché, li padonnin fasil; Sin Luk di nou sé pou nou gin kè sansib minm jan Papa nou ki nan sièl la gin kè sansib. Jézu di sé pou nou padonnin souasandis foua sèt foua, sa vlé di san limit.

Finisman prémié lèktu-a montré kijan Bondié kalmé akòz lapriyé Moyiz fè pou pèp la, ki té fè péchè antan-l adoré zidol la (Ex 32, 14). Som ki suiv prémié léktu-a montré kijan péchè-a gin kè-l krazé épi kijan Bondié pa méprizé-l (Ps 50/51,19). Vèsè anvan lévanjil la raplé nou rékonsiliasion Bondié tré sé nan Jézu-Kri ant li minm avèk tè-a (2 Cor 5,19). Sou bò Bondié sé padon, sou bò lèzòm sé konvèsion tou lé dé ansanm sa bay rèkonsiliasion (cf "Réconciliation et pénitence dans la mission de l'Église: exhortation apostolique post-synodale du Pape Jean Paul II). An dé foua nan dézièm léktu-a (1 Tm 1,12-17), Sin Pòl di li résévoua kè sansib Bondié-a, malgré li sé péchè. Yon moun ki konn padonnin, li monté rotè Bondié. Moun ki kinbé moun nan kè, li désann nan nivo diab la. Bondié sé kè sansib.

Djab la sé kè ròch. Lamèk touyé yon ti moun pou yon afron li fè-l (Gn 4, 23-24). Sé dégradé kondision lézòm dégradé, lè kalité mòd méchansté sa yo antré nan kè moun, lè pou yon ti krik, yon ti krak, y-ap tiré grosè vanjans sa yo.

N-ap mandé Manman Mari pou minm jan nou résévoua avantaj kè sansib Bondié-a, konsa tou pou nou fè kè nou sansib pou prochin nou, malgré ninpòt ki sa li fè nou.

*

Bondié sé Papa, li pa trouvé sa kont, ki konparé tèt li ak yon manmam, li di si yon manman t-a bliyé pitit li, li minm li pap bliyé nou (Is 49, 15). Nou konn di kréyon Bondié pa gin gòm, sé lékontrè ki vré, sé gòm Bondié ki pa gin kréyon. Bondié toujou gin yon gòm nan min-l, pou-l éfasé péché nou yo, lè nou fi-n fè yo, Sé nou minm ki sispèk, paské sé nan kè nou péché-a gravé, sé nan mémoua nou li ékri, nou toujou ap di tankou Adan: "mouin ni-ko, mouin pa kapab soti vi-n rankontré-ou" (Gn 3,10). Bondié té rélé Adan sot nan sa-k pa anyin-an, vi-n nan légzistans, Adan té parèt nan légzistans la, min lè Bondié rélé Adan sot nan péché-a vi-n nan padon-an, Adan jouinn prêtèks, li manké lafoua nan bon kè Bondié. Tout péché nou ansanm sé yon ti gout dlo nan brazié Rinmin Bondié-a k-ap boulé san- l pa janm kapab étinm, jan Sint Térèz lanfan Jézu-a di-a. Bondié sé rinmin (cf Rom 4, 17; Ct 8, 6-7; Ex 3, 2; 1 Jn 4,8).

Lévanjil vinkatriyèm dimanch odinè C-a montré kijan papa-a pa bay pitit la chans pou pitit la fi-n fè lapriyè li té komansé préparé-a; pitit la té di nan kè-l: "M-ap tounin, m-ap di: Papa, mouin fè péché kont sièl la ak dévan ou, mouin pa mérité pou yo rélè-m pitit ou, trété-m tankou youn nan sèvitè-ou yo" (Lc15.18-19; cf Os 2,9). Priyè-a gin toua pati, papa-a kité pitit la di dé prémié pati yo, min li pa kité-l gin tan di dènié pati-a. "trété-m tankou youn nan sèvitè-ou yo". Okontrè papa-a rélé yon sèvitè, li trété pitit la tankou yon prins. Li abiyé-l ak rad ki pi bèl la, li mété bag nan douèt li. Li mét sandal nan pié-l (Lc 15,22 cf Za 3,4-5), li lagé kò-l nan kou-l, li bo-l kont kò-l. Papa-a doué di nan kè-l si pitit la té pati-a, sé paské mouin pa-t ba-l asé prèv mouin rinmin-l. Nan lévanjil la yo pa palé osijè manman-an ditou. Si pitit la té pati, li t-al chèché karès dôt koté, sé pétèt li pa-t jouinn yo nan min manman-l. Frè-l la ki té nan jadin, lè-l tandé sa-k pasé, li réfizé antré, sé pa nan min frè-l la ti té abitué jouinn konsolasion; apré kont tan sa-a pitit la té pati-a sé konsa frè-a résévoua-l, sa montré frè sa-a pa-t gin anpil konsidérasion pou li. Pétèt li doué té kon abitué fè-l ouè sé li minm ki gin doua-dènès la, li doué té konn maké-l mal viv. Pitit la minn lè-l ouè sa, l-al

chèché indèpandans li yon lòt koté, li soti nan prizon sa-a. Min li pa-t konn sa-k t-ap tann li. Li konn sa-l kité, li pa konn sa-l pral jouinn.

Zanmi lòt koté yo, sé pòch li yo té zanmi; sé nan mèzi li té gin kichòy pou-l té ba yo, yo té montré-l byin viv. Lè-l vi-n pòv, li pou kont li. Bondié profité pou-l fè-l antré nan fon kè-l, pou-l régrèt, pou-l rétonnin koté-l té soti-a, cf Os 2,9.

Minm si sé pa kondision sa-a égzaktéman nou viv, nan lavi nou toujou gin yon moman nou antré nan fon kè nou, nou kalkilé fason nou té konn fè lontan, vi-n rivé yon moman nou chanjé san nou pa ouè kilè chanjman-an vi-n fèt. Lè sa-a nou gin yon chanjman diréksion pou nou fè, pou nou rékòmansé nan fason nou té konn fè lontan-an, koté nou té plis nan volonté Granmèt la. Bondié pèmèt pou Sin Piè, tou chèf légliz la li té yé, li di toua foua li pa-t rékonèt Jézu. Sin Jan ki Sin Jan té sovè kò-l lè yo té vi-n arété Jézu-a. Chak moun gin yon grinn zanno kay òfè. Sé tout tan pou n-ap égzaminé konsians nou, pou nou ouè nan ki pouin nou rivé, sa-k gin pou-l chanjé, pou nou pa tann pousiè-a fi-n fè pil sou tab la anvan nou siyé-l, pou nou pa tann rad la fi-n sal nèt ak tach, anvan nou lavé-l pou nou pa tann kannal la fi-n bouché anvan nou nétouayé-l. Lè nou fouyé konsians nou, nou parèt dévan Bondié jan nou yé-a. Nou rékonèt grandè Bondié avèk mizè nou. Konsa nou éspozé mizè nou dévan Mizérikòd li. Lè yo tou lé dé rankontré, sa fè RÉKONSILIASION.

Na-p mandé Manman Mari pou-l ba nou sans péché-a, pou nou konnin Bondié pa ront nou, paské li konnin ak ki sa nou fèt, li konnin sé pousiè nou yé (Ps 103,14), li konnin tou sa nou kapab fè ak sa nou pa kapab fè, malgré tou, li chouazi nou, sé pa paské nou bon li chouazi nou, sé pou nou kapab vi-n bon li chouazi nou. Konsa nou pa doué janm dékourajé ak nou minm. Parabòl blé ak mové zèb la k-ap pousé ansanm nan, sé pa sèlman pou éspliké kijan nan Légliz la gin bon ak mové ki mélanjé ansanm, min tou sé pou fè ouè anndan minm kè-a gin bon santiman ak mové santiman ki mélanjé. Nou pa kapab ouété youn fasil san nou pa détrui lòt la, si nou vlé aji trò vit. Se pou nou pran pasians ak prop tèt nou, pou nou sipòté défo nou ak tan n-ap pran pou nou korijé-l la. Chak défo sé lanvè yon kalité. Yon moun ki gin kouraj pou-l mét aktivité nan tout kalité travay ki mandé énéji, moun sa-a kapab gin dé lè énéji-l la chapé, l-al frapé yon lòt moun ki doué té proche trò pré-l lè pou-l pa-t proche-a, sé yon mouvman ki chapé-l. Min si pou-l t-a frinnin énéji-l la, sou prétèks l-ap évité fè kolizyon ak lòt moun sou chémin-l, li pa t-ap fè anyin minm. Yon lòt moun minm pran tan-l pou-l kalkilé anpil, anvan-l mét yon pié dévan, pou-l sètin sé nan bon diréksion-an l-ap maché, li pran pasians pou-l tann moman ki pi favorab la pou-l réglé tèl

késion. Li kapab parèt yon moun ki pa gin anpil énéji, min si yo t-a fosé-l présé fè tèl oubyin tèl bagay anvan-l té désidé, li t-ap kapab riské fè-l mal, paské li pa t-ap ouè asé klè avan-l aji. Koté lòt la gin plis énéji, li minm li gin plis pasians. Si nou konsidéré nou chak sé manm yon sèl ko, youn konplété lòt, nou t-ap padonnin avèk fasilite, lè nou konstaté gin ti frotman ki fèt antré nou. Tout fason, pou filé yon kouto, yo oblijé froté-l sou mèl, oubyin yo froté-l ak lòt kouto. Nou kapab fè étinsèl, lè youn froté ak lòt, min n-ap pi filé apré sa, karaktè nou ap pi fin, tanpéraman nou ap pi soup.

N-ap mandé Manman Mari, "Notre Dame de Pitié, pou-l fè nou aprann padonnin, minm jan Jézu té di Piè, pa sèlman jouska sèt foua, min jouska souasandis foua sèt foua, épi nou aprann fè tankou Jézu sou Koua-a non sèlman li padonnin, min li ékskizé: "Papa, padonnin yo paské yo pa konnin sa y-ap fè" (Lc 23,34).

Kè sansib lapè. Ti pitit la pati, min grangou vi-n anparé-l, li antré nan fon kè-l, li régrèt. Ti pitit la pati, min grangou vi-n anparé-l, li sonjé jan papa-l gin bon kè – Tout mouton nan jadin, gin yon sèl ki pèdi, ou santi kè-ou pa kap rèt an pè; Tout monton nan jadin, gin yon sèl ki pèdi, ou blijé kité tout pou-ou chèché-l. Tout bijou nan tiroua, gin yon piès ki pèdi, ou santi kè-ou pa kap rét an pè; tout bijou nan tiroua, gin yon piès ki pèdi, ou blijé kité tout pou-ou chèché-l. Tout ti moun nan lakou, gin yon sèl ki pèdi, ou santi kè-ou pa kapab rét an pè; tout ti moun nan lakou, gin yon sèl ki pèdi, ou blijé kité tout pou-ou chèché-l.

*

* *

VINSINKIÈM DIMANCH ÒDINÈ A

Apot yo té voyé filè tout nan nuit san yo pa péché yon ti pouason. Sé sèlman granmatin, lè Jézu parèt, li di yo voyé filè-a adouat batiman-an, y-a jouinn. Yo di-l tout nan nuit yo travay san yo pa pran anyin, min sou Paròl li, y-ap voyé filè-a. Yo voyé-l vré, yo pran tèlman kantité pouason, yo pa minm kapab ralé filè-a (Jn 21,1-14; cf Lc 5,1-11). Sé nan sans sa-a Bondié di lè tan-an rivé, l-ap aji vit (Is 60,22). Bondié aji ak jistis, sa-a nou konprann li; min Bondié aji pi plis ankò avèk kè sansib; sa-a nou pa kapab konprann li. Sans parabòl vinsinkiem dimanch òdinè A-a (Mt 20,1-16), sé **kè sansib Bondié, ki vlé éklaté dévan lézòm**. Lè Moyiz mandé Bondié non-l sou mòn Sinayi-a, Bondié di-l: li fè kè-l sansib pou moun li vlé (Ex 33,19; Rom 9,15), li pran pitié pou moun li vlé (ib). Kè sansib, sé non-l sa. Nan pouin késion moun ki vlé oubyin moun k-ap kouri (Ps 147,10), min sé Bondié ki fè kè-l sansib, jan Sin Pòl di Romin yo (Rom 9,16; cf Mal 1,2-3). Kè sansib la pa fè jistis la konkirans. Anndan Bondié pa gin anyin ki pa Bondié. Jisit li sé kè sansib li, kè sansib li sé jistis li. Sé nan léspri nou y-ap séparé. Bondié fidèl parapò a promès li fè pou-l sovè nou gratis, antan-l konsidéré kè sansib li, san-l pa gadé sou sa nou fè ki bon. Sa dépasé konpréansion nou; sé poua lékòl Profèt Izayi-a di nan premié léktu vinsinkiem dimanch òdinè A-a (Is 55,6-9): "pansé-m sé pa pansé nou, chémin-m sé pa chémin nou" (Is 55,9). Sa pèmèt nou konprann pouki sa Juif yo té fè difikilté lè yo té ouè payin yo ki t-ap antré nan éritaj lafoua-a, san yo pa pasé nan tout filiè égzijans laloua Moyiz la, tankou dènié pitit la ki té pati kité lakay Papa-l la, pou-l al gaspiyé lajan-l déyò-a; lè-l tounin, Papa-a fè fèt pou li. Gran frè-a pa konprann sa; li révolté, li réfizé antré lakay la, li fè papa-a ésplikasion. Papa-a blijé fè-l konprann sé kè sansib li ki boulvèsé pou pitit li-a li té konprann ki té mouri-a épi ki vivan-an (Lc 15,11-32). Bondié sé kè sansib; sé pa dapré sa nou fè li trété nou, jan Psòm nan di-a (Ps 103,10). Sé yon Papa ki panché sou pitit li avèk bon kè-l (Ps 103,13). Li konnin sé ak pouzié nou fèt (Ps 103,14), li konnin sé féblès nou yé, sé poua li toujou prèt pou-l padonnin sa nou fè ki mal, pou-l ba nou plis pasé sa nou mérité. Li konsidéré mérit pròp Pitit li Jézu-Kri, épi li fèmin jé-l sou péché nou, li lavé yo nan san Pitit li-a (Ez 36,25s).

Sé mèsaj sa-a Juif yo té gin difikilté pou résévoua-a, yo minm ki té la dépi granmatin nan jadin rézin-an, yo t-ap poté chaj égzijans laloua Moyiz la (Mt 20,1-16). Jézu di: "Vi-n jouinn mouin, nou tout k-ap rédi, k-ap plouayé anba gro chaj, m-ap ba nou soulajman" (Mt 11,28). Sé konsa Psòm nan di: Lagé chaj ou sou Bondié, sé li minm k-ap soutni-ou (Ps 55,23). Jézu di Apot yo li voyé yo rékòlté koté yo minm yo pa-t fatigé kò yo pou travay; dèt

té fatigé kò yo pou sa, épi yo minm yo antré anndan avantaj la (Jn 4,38; Qo 2,21). Sèké li té gin pou-l sakrifé tèt li sou Koua-a, pou yo minm yo té kapab vi-n sakré pou sèvis Vérité-a (Jn 17,19). Nou tout nou sé ouvriyé ki rivé nan dènié moman yo. Bondié fè nou favè, san nou pa mérité. N-ap mandé Manman Mari pou nou gin rékonésans pou sa, san nou pa konprann sé poutèt pròp mérit nou Bondié trété nou konsa. N-ap mandé-l tou pou an fas lòt moun yo nou fè kò nou tou piti, pou nou pa pran okinn pòz paské Bondié fè nou favè, li ba nou konsidérasion parapò a yo, antan nou sonjé sa Sin Pòl di-a: "Ki sa-ou ginyin ou pa résévoua? Épi si sé résévoua ou résévoua-l, pouki sa ou-ap fè-l sèvi lokazion pou-ou gonflé kè-ou" (1 Cor 4,7).

N-ap sonjé tou chak lè Mèt jadin rézin-an soti-a, sé yon lè lapriyé ofisièl légliz la: premié lè-a, sé vè sizè di-matin, lè yo résité lapriyé bréviè-a yo rélé "Laudes" la; touazièm lè-a, vè névè di-matin, lè yo résité lapriyé "tierce" la, sizièm lè-a, vè midi, lè yo résité lapriyé "sexe" la; névièm lè-a, vè touazè lapré midi, lè yo résité lapriyé "none" nan; épi onzièm lè-a, vè sinkè lapremidi, inèdtan anvan yo résité lapriyé "Vêpres" la. Nou gin doua apliké sa nan lavi pèsonèl nou. Gin bagay nou kapab pran anpil tan n-ap mandé Bondié nan lapriyé, san nou pa jouinn anpil satisfaksion. Sé lè-l désidé, li fè nou jouinn plis pasé sa nou mandé-a. Gin priyé n-ap fè, sé éfò pèsonèl nou nou déplouyé san anpil rézilta. Yon lè, léspri Sin-an souflé nan voual la, nou ranmasé ram yo, nou kite-l aji, san nou pa bézouin fè anpil éfò. Lapriyé sé pa palé anpil, sé rinmin anpil, dapré sa Sint Térèz davila di nou. Siklòn nan pa minnin prézans Bondié, sé avèti li avèti sèlman Bondié ap vini. Tranbléman-d-tè-a non plis pa minnin prézans Bondié, sé avèti sèlman li avèti l-ap vini. Difé-a non plis tou pa minnin prézans Bondié, sé avèti li avèti sèlman Bondié ap vini. Sé ti van léjé tou dou-a ki pa fè okinn brui-a, ki rivé ak prézans Bondié, sou mòn Sinayi-a, nan trou ròch koté Profèt Éli ap lapriyé-a (1 R 19,11-12). Nou gin doua déplouyé tout fòs nou, nou pap dékroché Bondié koté-l yé-a (Gn 11,1-9). Sé kè nou pou nou louvri tankou yon ti moun tou piti, pou Bondié antré lè-l vlé, ak pouvoua léspri Sin-an ki souflé koté-l vlé, san nou pa konnin koté-l soti, ni koté l-apralé (Jn 3,8). Bondié lib, li aji jan-l vlé; sé nou minm ki pou konfòmé nou nan mòd jan li aji-a, san nou pa dikté-l okinn konsign pou-l suiv. Jistis li sé kè sansib, kè sansib li sé jistis. Lapriyé sé réspiré Bondié anndan Bondié, jan Sin Jan-d-la-Koua di-a, tankou yon pouason nan dlo, jan Sin Jan-Mari Viané di-a. Lapriyé sé kominiké souvan pou kont nou ak Bondié, antan nou konnin li rinmin nou, jan Sint Térèz davila di-a. Lapriyé, sé yon élan kè nou pran, ki gonflé-l ak prézans ak rinmin Bondié-a, jan Sint Térèz lanfan Jézu di-a.

Lapriyè, sé tankou dé chandèl ki kolé ansanm, k-ap fonn nan yon sèl flam, ki réprézanté kè nou ak kè Bondié, jan Sin Jan-Mari Viané di-a. Lapriyè, sé fiksé jé kè nou sou Vérité Bondié-a, jan Sin Toma dakin di-a avèk lékòl Salamank la. Sé yon bagay ki tou sinp Bondié dévoualé bay nanm ki sinp yo. Gin plas pou tout moun, tout tan nan jadin rézin-an, jan Pap Jan-Pòl II di-a nan "Exhortation apostolique post-synodale" sou mision layik yo nan légliz la ak sou tè-a.

*

* *

VINSINKIÈM DIMANCH ÒDINÈ B

Avèk lévanjil vinsinkiem dimanch òdinè B-a (Mc 9,29-36), sa fè dézièm fous Jézu ap anonsé li gin pou-l soufri-mouri-lévé. Li té déjà anonsé-l yon prémié foua (Mc 8,31-33 = 24^e dimanch d.o. B), l-ap anonsé-l ankò you touazièm foua (Mc 10,32-34). Sé kòmsi toua son klòch anvan lanmès la. Chak foua Jézu gin lokazion fè anons sa-a, sé lè sa-a pou Apot li yo kòm loubri tankou yon pòs radio sou yon lòt bann. Prémié foua-a sé Piè ki té vlé kontrarié Jézu, lè-l té di-l: "Mandé Bondié padon, bagay sa-a pa gin doua fèt" (Mc 8,32). Jézu té fè-l konprann li t-ap suiv sajès lézòm, lè l-ap palé konsa-a. Sajès Bondié pa suiv minm chémin ak sajès lézòm (Mc 8,33). Dézièm foua Jézu fè minm anons soufrans-lanmò-lévé-l la, sé Apot yo k-ap diskité antré yo kilès ki pi gran, ki gin pi gro grad, ki gin plis otorité, ki nan pi gro ran, k-ap kòmandé sou lòt yo (Mc 9, 33-34). Jézu fè yo konprann sé pou yo vi-n tankou yon ti moun piti pou yo jouinn gran plas (Mc 9,35-37), pou yo vi-n tankou yon sèvitè, minm jan li minm l-ap sèvi, li minm k-ap pran yon basi-n dlo ak yon sèvièt pou-l lavé pié Apot yo, pou-l siyé yo, pou-l ba yo égzanp sa-l vlé anségné yo-a (Jn 13,4-16; Lc 22,27). Touazièm foua l-ap fè anons soufrans-lanmò-lévé-l la, sé Jak avèk Jan k-ap vi-n mandé tankou piston pou yo gin plas kòm minis adouat-agòch Jézu nan rouayom sièl la (Mc 10, 25-40). Jézu ap fè yo konprann minm léson li té bay dé prémié foua yo. L-ap mandé pou chèf yo sèvi (Mc 10,41-45), tankou li minm ki vini kòm "Sèvitè Granmèt la".

Sa montré kijan patizan Jézu yo pa-t ko prèt pou yo aksépté chémin la Koua-a kòm chémin délivrans la. Si yo minm yo pa-t ko paré pou sa, ki moun ki té kapab paré? Sé yon favè pou Bondié fè yo pou-l loubri anndan kè yo, pou yo ouè sans plan Bondié-a nan lafoua. Soufrans ak lanmò pa gin sans pou rézonman lézòm. Sans la sé anndan kè Bondié li yé. Sé li k-ap bay favè pou fè nou antré ladan-l. Sin Mak di yo pa-t konprann sans paròl la (Mc 9,32); min yo té pè pozé-l késion. Yo té fè tankou ti moun lékòl. Lè yo pa konprann sa mèl la ap di yo, yo palé kozé pa yo, antré yo, bagay ki intéresé yo; sé lè sa-a atò yo mandé kilès k-ap ranplasé Jézu, lè-l pati-a; kilès nan yo ki gin plis otorité.

Jézu ap bay yon bèl léson, lè-l pran ti moun piti-a, li plasé-l nan mitan-an, pou-l montré kilès ki pi gran-an. Si nou pa vi-n tankou ti moun piti, nou pap antré nan péyi Bondié ki Roua-a (Mt 18,1-4). Sé kòmsi yon nouvo nésans ki pou fèt, sa vlé di yon konvèsion, yon chanjman santiman, pou konsidéré réalité-a avèk dòt jé tou nèf. Si yon moun pa réfèt nan sans sa-a gras a léspri Sin-an, li pap antré nan péyi koté Bondié Roua-a (Jn 3,3). Sèké Bondié

kaché mèvèy sakré-l yo dévan jé moun ki konprann yo gin intéljans yo, li dévoualé yo bay sa-k tou piti yo tankou ti moun yo (Lc 10,21).

Jézu sé "Sèvitè Granmèt la" k-ap pasé kont soufrans li. Li té déjà di sa nan premié anons lapasion-an (Mc 8,27-35 = 24° d.o. B), ak dézièm "Kantik Sèvitè Granmèt la" (Is 50,5-9 = 24° d.o. B). Sé minm lansègnman-an k-ap kontinué nan dézièm anons lapasion-an toujou (Mc 9,29-36 = 25° d.o. B). Sé poua premié léktu vinsinkiem dimanch òdinè B-a (Sg 2,17-20) montré nou kijan "Sèvitè Granmèt la" ap pasé mizè, antan moun péyi-l ak rélijion-l yo réjité-l, yo fè-l sibi tray pou éséyé-l, pou ouè si Bondié ap délivré-l, si-l sé pitit Bondié ---- minm si lè sa-a mo "Pitit Bondié"-a té vlé di pitit adoptif nan lansyin Téstaman (Ex 4,22-23; Dt 14,1; 51,10; Ps 89,27; Sg 9,7; 10,15.17; 12,19.21; 16,26; 18,4); nan nouvo Téstaman, sé pitit tout bon vré ---. Paròl yo di-a fè nou sonjé sa Juif yo té di Jézu sou mòn Kalvè-a: "Si-l sé Pitit Bondié, sé pou Bondié défann li, sé pou-l délivré-l sot nan min lènmi-l yo" (Sg 2,18). Sé minm paròl la nou jouinn nan Sin Matié (Mt 22,43 = Ps 22,9). Réfrin Psòm-répons vinsinkiem dimanch òdinè B-a di sa yon ti jan ki poté minm lidé-a tou: "Sé Granmèt la k-ap soutni nanm mouin" (Ps 53/54,6b). Yo di karéman konduit moun sajès la, li jinnin yo (Sg 2,12), paské Sajès Bondié sé bariè sou chémin sajès lézòm. Konduit moun sajès la sé yon répròch kont lavi moun k-ap suiv mové panchan yo. Ouè yo ouè-l sèlman, yo kimin ak raj (Sg 2,14). Lavi-l pa sanblé ak pa lòt yo, chémin-l pran lòt diréksion (Sg 2,15). Li pa frékanaté yo jan yo t-a vlé-a (Sg 2,16). Yo fè konplo kont li, yo kondané-l nan lanmò ki pi ba ki ginyin, sa vlé di lanmò ésklav (Sg 2,20). Sé lanmò sa-a minm yo té fè Jézu mouri, lanmò lakoua ki té rézèvé pou ésklav yo. Réyéلمان vré li té aksépté désann sou tè-a pou-l vi-n tounin yon ésklav (Ph 2,6-11). Sé nan sans ésklav la yo anplouayé mo "Sèvitè Granmèt la". Sé minm mo-a ki vlé di "ésklav" ak "sèvitè". Lè Jézu di si yon moun vlé vi-n gin premié plas, sé pou-l vi-n tounin sèvitè lézòt yo, li vlé di sé pou-l vi-n tounin ésklav yo. Épi li di minm bagay tou, lè-l di mouin nan pami nou tankou yon sèvitè-a, sa vlé di mouin nan pami nou tankou yon ésklav. Apot yo pa-t ko prèt pou aksépté sa. Sèké sajès lézòm pa sajès Bondié. Sin Jak montré kijan gin dé kalité sajès (Jc 3,16-4,3), yon ki sot anro ak tout bon kalité, lòt la ki sou tè-a ak tout réjiman défo-l yo. Sin Jak di sa klè (Jc 3,17) lè-l nonmin mo "Sajès ki sot anro-a". Sajès Bondié pa sajès lézòm. Sin Jak fè ouè kijan sajès lézòm sé lanvi k-ap minnin nan tout kalité sa-k pa bon; sé lanvi sa-a minm ki fè Apot yo t-ap chèché premié plas la. Sé lanvi sa-a tou ki fè jouskouliè-a nou pa ko kapab fi-n aksépté sa Sin Pòl di nou nan Lèt li ékri Filipyin yo (Ph

2,3): "Fè kò nou tou piti pou nou konsidéré lòt yo kòm sipériè pasé nou". Sa mandé pou nou chanjé mantalite nou.

Jézu vlé ba nou lanségnam sou ròl Mési-a k-ap soufri-a, nan vinsinkiem dimanch òdinè B-a, minm jan ak nan vinkatriyèm dimanch la. Sé pa mòd jan Mési sa-a yo t-ap tann; yo t-ap tann yon Mési politik k-ap vi-n krazé-brizé, détrui pouvoua Romin yo. Yo ouè sé yon mouton ki tou dou, ki pa loubri bouch li, y-ap kondui labatoua. Lanségnman sa-a Jézu bay nan vinsinkiem dimanch la, sé tankou dézièm son lamès la. Sé toua foua Jézu ap anonsé soufrans ak lanmò-l (Mc 8,31; 9,31; 10,33). Pandan Apot yo ap palé sou késion préstij, grandè, prémié plas, Jézu minm ap bay léson pou montré si nou vlé vi-n gin prémié plas sé pou nou rabésé tèt nou nan dènié ran. Sé yon sèl dènié plas ki té rété, dapré sa Pè-d-Fouko di, sé Jézu ki ladan-l; si nou vlé al jouinn li, sé pou-n al nan dènié plas la.

*

Sa fè dézièm foua Jézu anonsé l-ap mouri épi l-ap lévé vivan (Mc 9,29-36). Prémié foua li té fè konn sa, sé té apré déklarasion lafoua Sin Piè-a (Mc 8,31). Sin Piè t-ap chèché fè-l pran yon lòt chémin, dapré mòd kalité Mési Juif yo t-ap tann nan (Mc 8,32). Li té profité pou-l ajisté mèsaj Koua-a yon fason pi séré (Mc 8,34 = 24^e d.o. B). Nan vinsinkiem dimanch òdinè B-a, sé pa Sin Piè sèlman ki pa konprann, sé tout patizan yo (Mc 9,32). Yo pè pozé Jézu késion. Yo sonjé fason sévè li té réponn Sin Piè (Mc 8,33). Sé li minm atò k-ap amosé késion-an. Li mandé yo sou ki sa yo t-ap palé konsa antré yo sou rout la (Mc 9,33). Non sèlman yo té pè pozé-l késion; koulié-a minm yo pè réponn li (Mc 9,34). Sèké yo té santi davans yo pa-t nan lign li minm li té trasé ba yo-a. Yo t-ap suiv lidé lézòm, yo pa-t suiv Sajès Bondié (Is 55,8-9). Réyèlman vré sou rout la, yo t-ap chèché konnin kilès nan yo ki té gin pi gran plas (Mc 9,34). Kòm Jézu té konn sa, li ba yo mèsaj la dirèk. Li kòmansé chita (Mc 9,35), sa vlé di sé yon lanségnman l-ap bay avèk otorité (cf Mt 5,1). Li ranmasé tout lanségnman katriyèm Kantik Sèvitè Granmèt la (Is 52,13-53,12), antan-l di: "Si yon moun vlé vi-n gin prémié plas, sé pou-l pran dènié plas la, pou-l sèvi tout moun" (Mc 9,35). Pou-l éspliké sa, li pran yon ti moun piti, li mété-l nan mitan, li montré ak ki sa péyi Roua Sièl la sanblé (Mc 9,36). Sé konsa nan dènié Soupé-a, l-ap raplé lanségnman sa-a, antan-l ouété manto-l, li pasé yon tabliyé nan tay li, li lavé pié tout Apot yo (Jn 13,2-5). Simon-Piè pa-t konprann toujou. Jézu ap fè-l lobsèvasion ankò (Jn 13,6-15). Li di sé yon égzanp li ba nou, pou nou pran modèl sou li. Jan-l fè-a, konsa pou nou fè youn parapò a lòt. Chak moun konn gin tandans vlé rédi dra-a sou bò pa-l; yo riské chiré-l. Toujou gin yon

késion protokòl y-ap chèché défann. Ròl chèf sé ròl **sèvitè**. Non yo bay Mési-a, sé **Sèvitè** (Is 42,1; 49,3; 50,10; 52,13; Mt 12,17). Non sa-a kaché tout yon program; sé pa chémin grandè ak prestij li indiké (Ps 131,1), sé dènié plas li invité chouazi (Mc 9,35). Sé pousa Jézu di nou sé pou nou tankou sèvitè k-ap tann mèt yo lè l-ap sot nan nòs (Lc 12,37), tankou sèvitè ki pa rét ap tann konpliman pou travay li, paské sé dévoua-l li fè (Lc 17,30). Li di nou lè yo invité nou nan yon résépsion, sé pa nan premié plas la pou nou kouri al chita, min sé dènié plas la pou nou okipé, pou lè mèt résépsion-an rivé, li fè nou monté pi ro (Lc 14,7-11). La Trè Sint Vièj Mari di nan Magnifikat la kijan Bondié lèvé sa ki pòv yo anlè (Lc 1,52). Li té konsidéré tèt li tankou Sèvant (Lc 1,38).

Profèt yo sé sèvitè (Nb 11,8; Am 3,7). Prèt yo sé sèvitè (Lc 2,29). **Roua** yo sé sèvitè (Lc 1,69; Ps 132,10). Profèt yo nan sèvis **Paròl** la; Prèt yo nan sèvis **lotèl** la; Roua yo nan sèvis **Pèp** la. Toua pouvoua sa yo Jézu ap bay Apot yo, sé pou yo kapab vi-n tounin sèvitè nou (Jn 13,16; 15,20). Min l-ap di yo yon lè li pap rélé yo sèvitè ankò, l-ap rélé yo zanmi (Jn 15,15), paské li fè yo konnin tou sa-l tandé kot Papa-l. Nan mézi nou vlé vi-n zanmi, sé pou nou aksépté kòmansé vi-n sèvitè. Sin Luk di li té konsilté moun ki té sèvitè Paròl la dépi nan kòmansman (Lc 1,2). Nan pami moun sa yo la Trè Sint Vièj Mari té gin premié plas, li minm ki té déklaré tèt li **Sèvant** Granmèt la, pou sa fèt sèlon **Paròl** la (Lc 1,38). Sèké Mési-a té doué Sèvitè, Pitit Sèvant la (Ps 116,16; 86,16; Sg 9,5). Bondié té plasé Adan nan jadin-an pou-l sèvi (Gn 2,15). Tansion-an Satan vi-n mét dévan Èv la, sé lògèy ak légoyism, pou-l vi-n égal ak Bondié (Gn 3,5; cf Ph 2,6-11). Sé minm tansion sa-a ki jèmin nan léspri moun yo ki t-ap bati kay ro Babèl la (Gn 11,4). Nan lis péché kapito yo, premié plas la sé lògèy la ki ginyin-l. Sé yon gro chouk rasi-n péché. Nou toujou konprann nou pa kamarad lòt yo. Si sé nan **sèvis Paròl Bondié-a** nou yé, nou riské gonflé kò nou, poutèt ti sians la nou ginyin-an, ti lansègnman-an nou té aprann nan, ti plas koté nou yé pou nou transmèt li bay fidèl yo. Époutan sé pa tèlman sou sa n-ap **di** Bondié ap rékonpansé nou, sé sou sa nou **yé**. Sèvi Paròl la témouin, sé sèvi frè ak sè nou yo modèl, pou yo ouè kijan Paròl la vi-n tounin chè nan konduit nou. Lè sa-a nou pap sèvi fo-témouin, pou nou mandé moun yo fè sa nou di, san yo pa ouè kijan pou yo fè sa nou fè (Mt 23,3). Lè y-ap bay chanté yon mès, yo konn di y-ap bay chanté yon sèvis: sé **sèvis lotèl Bondié-a**. Sèvis sa-a sé sakrifis lakoua-a ki ba-l sans li. Sèvitè-a alafoua prèt, lotèl ak viktim. Li rinmèt tèt li nèt san okinn fòm égoyism. Tout moun lagé-l. Sé soufrans ki tonbé sou li, jan premié léktu vinsinkiem dimanch òdinè B-a montré nou-an (Sg 2,12-20). Parapò a sèvis lotèl la, nou pa gin plis avantaj pasé lòt moun.

Okontrè nou doué fè youn pi plis avèk Jézu yo klouré sou Koua-a, ki ofri kò-l pou manjé, ki vidé san-l pou bouè. Nou doué aksépté dévoué tèt nou, san chèche intèrè pa nou. **Sèvis Pèp Bondié-a** bliyé nou raplé pafoua kèk konsign; sa pa vlé di nou anlè konsign sa yo. Yo konsèné nou tou. Sé pa otorité nou n-ap défann. Laloua-a fèt pou lézòm; sé pa lézòm ki fèt pou laloua-a (Mc 2,27). Si nou raplé kèk règléman, sé nan sèvis lézòm, sé pou nou kapab maché pi byin. Konsa Jézu ba nou toua pouvoua nan sèvis **PARÒL** la, nan sèvis **LOTÈL** la, nan sèvis **PÈP** la: kòm Profèt pou Paròl la, kòm Prèt pou Lotèl la, kòm Roua pou Pèp la.

Satan kapab tanté nou nan toua pouvoua sa yo, antan li souflé nou pou nou mété yo nan sèvis **prestij** nou, nan sèvis **intèrè** nou, nan sèvis **otorité** nou. Sé déplasé nou déplasé sèvis la. Nou vi-n tounin sèvitè pròp tèt nou. Sé poua Sin Piè avèti réponsab légliz yo, antan-l mandé yo pou yo fè dévoua yo san yo pa fòsè yo, min ak bon kè dapré Bondié; san yo pap chèche yon avantaj malonèt, min antan yo dévoué tèt yo; san yo pa fè santi otorité yo sou sa-k doué rélé yo chè-mèt, chè-métrès, min antan yo vi-n tounin modèl mouton yo (1 p. 5,2-3).

N-ap mandé Manman Mari pou Sajès Bondié-a abité nou, jan Sin Jak palé nan dézièm léktu vinsinkiem dimanch òdinè B-a (Jc 3,16-4,3), pou nou évité tout kalité jalouzi ak konkirans, okontrè pou nou chèche gin kè sinp, kè pozé, bon jan, konpréansion, kè sansib, bon rézilta, san nou pa triyé moun pou nou fè zanmi, san nou pa fè ipokrit. Nan mézi nou bliyé tèt nou, nan minm mézi sa-a Bondié ap sonjé nou. Juif yo té di: Jézu konté sou Bondié, sé pou-l délivré-l sot sou Koua-a (Mt 27,43); cf Sg 2,18-20; Ps 54,6). Sans Koua-a, sé Sajès Bondié k-ap fè nou dékouvri-l. Nou pap anilé-l sot nan lavi nou ni nan sèvis nou.

*

* *

VINSINKIÈM DIMANCH ÒDINÈ C

Vinsinkiem dimanch òdinè C-a palé sou "avarice".. Nou pa kapab sèvi Bondié avèk lajan (Lc 16,1-13: Èvanjil). Moun yo k-ap achté pòv yo ak lajan-an, Profèt Amòs ba yo avètisman sévè (Am 8,4-7: premié léktu). Sé sou pòv la Bondié voyé jé-l pou-l lévé-l anlè (Ps 112-113: Psòm répons). Jézu li minm vi-n pòv pou-l anrichi nou ak sa-l té ginyin-an (Co 2 8,9: Alélouya).

Sin Matié té pèséptè nan kontribision, li chanjé métié, li fè yon konvèsion; li mét rapidité pou-l kité kontoua ladoua-n nan, pou-l suiv Jézu nan détachman ak rénonnman (Mc 2,13-17). Lévanjil la palé nou osijè yon lòt pèséptè ankò, Jézu fè louanj li, paské li bat léstomak li, li rékonèt li sé péchè, pandan Farizyin-an minm ap gonflé pouatri-n li, ap blayi tout bon kalité-l ak tout bon aksion-l (Lc 18,9-14). Zaché yon lòt pèséptè ankò, li minm tou li fè yon konvèsion. Li pran désizyon pou-l rinnèt kat foua plis tou sa-l té pran nan tranzaksion (Lc 19,1-10). Antan n-ap réfléchi sou lévanjil vinsinkiem dimanch òdinè C-a, toua bèl figi sa yo vi-n dévan jé nou. Jézu invité nou fè zanmi avèk lajan malonèt la (Lc 16,1-13), pou lè-l vi-n manké nou, yo résévoua nou nan joupa k-ap diré tout tan yo, sa vlé di nan sièl la. Lajan, sé yon asirans; li fè nou trankil pou landmin. Sé poua gin yon tandans nan nou pou nou ranmasé pi plis nou kapab, pou nou pa nan graté tèt. Époutan, léson Jézu ba nou nan lévanjil vinsinkiem dimanch òdinè C-a fè nou konprann kijan asirans nou pi solid ankò nan zanmi nou fè ak lajan malonèt la pasé nan lajan-an li minm minm. Sèké lajan bay asirans pou tè sa-a sèlman, min zanmi nou fè yo, antan nou éfasé dèt yo, y-ap résévoua nou ak bra louvri nan sièl la, lè Jézu ap di nou: "Mouin té grangou nou té ban-m manjé; mouin té souaf nou té ban-m bouè; mouin té malad nou té okipé-m; mouin té nan prizon nou té vi-n vizité-m; mouin té ni-kò, nou té abiyé-m; mouin té étranjé, nou té résévoua-m. Tou sa nou fè pou youn nan pi piti nan frè-m yo, sé pou mouin minm nou fè-l" (cf Mt 25,35ss). Sin Loran sé té diak légliz Ròm. Li té responsab okipé byin légliz pou li séparé yo bay pòv yo. Sé té nan tan pèsékision, sou Valéryin (258). Lè yo vi-n arété-l, yo mandé-l pou-l bay richès légliz la; l-al chèché tout pòv yo, li minn yo vini, li di: "Min richès légliz la!". Sé konsa Jézu té di jénòm rich la: si-l vlé suiv li, sé pou-l vann byin-l, pou-l séparé yo bay pòv yo, l-a gin yon richès nan sièl la. Pèsòn pa kapab sèvi dé mèt a la foua: Bondié ak lajan. Sin Pòl di fidèl Korint yo tan-an kout, figi tè sa-a sé pasé l-ap pasé; moun k-ap achté sé pou-l fè kòm si-l pa posédé (cf 1 Co 7,29ss). Barnabé té gin yon térin; li vann li li poté pri-a bay Apot yo (Ac 4,36-37). Min Anani ak Safira minm okontrè, yo pran pri térin pa yo-a, yo séré-l; yo poté mòso sèlman bay Apot

yo. Sin Piè fè yo éksplikasion, antan-l mandé yo poukisa y-ap chèché troncé lésprî Sin-an. La minm chatiman tonbé sou yo, yo mouri youn dèyè lòt (Ac 5,1-11). Jézu montré nou kijan mésié ki té gin anpil richès la té bati gran dépo pou-l mété byin-l, pou-l joui avèk asirans. Min nan nuit la minm, li mouri (Lc 12,13-21).

Lévanjil 25èm dimanch òdinè C-a mandé pou nou aji avèk sajès. Olié pou n-ap prêté lajan, pou yo rinmèt nou dé foua plis, sé éfasé pou nou éfasé nan dèt lòt moun ginyin pou nou. Sé nan sièl la y-ap rinmèt nou sa. Jès Sin Matié-a minm invité nou kité tout asirans lajan-an nèt ak tout kontròl nou t-a kapab ginyin sou lòt moun nan pouin sa-a, pou nou suiv Jézu tou pòv, li minm ki di: "Réna yo gin trou ròch yo, zouazo sièl yo gin nich yo; Pitit moun nan minm pa gin koté pou-l pozé tèt li" (Lc 9,58). Sé lokazion pou nou sonjé lapriyé pou tout moun Jézu rélé nan sèvis li yon fason spésial pou yo vi-n prêt nan légliz li, pou asirans lajan-an ofri-a pa atiré yo, pou yo fè rénonnman ak détachman tankou Sin Matié, pou yo konnin, tankou finisman lévanjil 25èm dimanch òdinè C-a raplé-a, nou pa kapab sèvi dé mèt alafoua: Bondié ak lajan.

Sin Kuré das, Sin Jan-Mari-Viané, patron tout Kuré yo, té viv tou pòv, li té bay égzanp lacharité. Tou sa-l té ginyin, li té séparé-l bay pòv yo.

N-ap mandé Manman Mari pou-l mété minm santiman sa yo nan kè prêt k-ap travay nan légliz Jézu-Kri yo, ak séminaris Jézu-Kri rélé pou vi-n prêt nan légliz li, pou yo pa ézité fè lacharité, pou yo pa chèché asirans pou landmin nan lajan k-ap pasé-a, pou yo konnin sé jéran yo yé, sé pa propriété, pou yo fè pi byin pasé jéran-an lévanjil la palé nou-an, pou sé pa dèt sèlman yo éfasé, min pou yo pa pè louvri min yo pou yo soulajé mizè pòv yo ak ti sa yo kapab jouinn nan, antan yo asiré Bondié ap toujou okipé yo .

Nou nan yon péyi ki pòv. Pou nou prêt selon kè Jézu-Kri, nou doué gin SOLIDARITÉ avèk Jézu PÒV k-ap vizité nou sou tout fòm, k-ap mandé nou tout kalité, "lacharité pou lamou dé Dié". Sin Monfò t-ap pasé dévan yon monastè koté youn nan sè-l yo té anndan kominoté rélijijé la. Li parèt dévan pòt la; li mandé "lacharité pou lamou dé Dié". Mè-a ki louvri pòt la pa rékonèt li. Li ranvouayé-l. Lè sè Monfò-a éspriké sé pròp frè-l, Mè-a voyé chèché-l; li réponn: "Ou pa-t vlé fè-m lacharité pou lamou dé Dié; koulié-a ou vlé fè-m lacharité pou lamou dé moua-mènm; mési!". Li kontinué chémin-l san-l pa minm antré al di pròp sè-l la bonjou. Yon lòt foua li t-apral préché rétrèt nan yon kominoté rélijijé; li ranmasé yon pòv ki té malad, atè-a nan lari-a, li mété-l sou zépòl li, li frapé pòt kay la, li di: "louvri bay Jézu-Kri!". Nou bézouin anpil prêt ki gin minm tranp sa-a, ki

gin SOLIDARITÉ avèk pòv yo tout bon vré, ki rékonèt Jézu Pòv nan moun ki pòv yo, li minm ki di osijè pròp tèt li: "Léspri Granmèt la pozé sou mouin, li sakré-m, li voyé-m poté Bon Nouvèl la bay pòv yo" (Lc 4,18), li minm ki di osijè moun k-ap kouté-l yo: "Sé chans pou moun ki pòv nan léspri-a paské péyi koté Bondié Roua-a, sé pou yo li yé" (Mt 5, 3), li minm ki di misionè-l yo: "Nou résévoua gratis, sé pou nou bay gratis". (Mt 10, 8). Pa poté sak, lajan, manjé, ak anyin k-ap jinnin déplasman nou (cf Lc 10, 4; 9,3).

Égzijans sa yo sanblé yo rèd, min sé rout séré-a, sé pòt ki jis la (Mt 7, 13s; Mt 11,12), pou travèsé rivé nan sièl la.

Garanti lapè: Matié sou kontoua, li kité tout lajan-l, li suiv Granmèt la avèk tou dé min-l vid. Nou résévoua gratis, sé pou-n bay gratis. Zaché sou pié boua-a désann vi-n jouinn Jézu, li séparé byin-l ak moun ki nan bézouin. Sé pou-n fè zanmi avèk lajan-n ginyin, pou yo résévoua-n nan kay ki pa krazé. Jézu té grangou, sé li nou bay manjé, li pa-t gin yon kay, sé li nou résévoua. Nou sé sinp jéran, nou pa propriètè, sé pou-n solidè avèk Jézu ki pòv.

*

* *

VINSIZIÈM DIMANCH ÒDINÈ A

"Sé pa moun k-ap di-m "Granmèt, Granmèt" k-ap antré nan péyi Sièl la koté Bondié Roua-a, min sé moun k-ap fè volonté Papa-m ki nan Sièl la" (Mt 7,21; cf antienne à Magnificat, 1ères Vêpres 26^{èm} d.o. A). Oui pa monté mòn. Farizyin yo té gin yon kalité mòd priyé y-ap fè, koté sé tou sa yo fè ki soua dizan bon y-ap mét dévan, pou égzijé Bondié pran ka yo an konsidérasion mérit yo, an minm tan y-ap méprizé péchè piblik yo, tankou Jézu montré nan parabòl li rakonté nan Sin Luk la. Farizyin-an di li pa tankou rès lòt moun yo ki plin péché, li détayé tout yon katalòg péché sou kont yo: kòm-koua yo fè moun abi, yo fè injistis, yo fè adiltè (Lc 18,11; cf Rom 1,29-30; 13,13; 1 Co 5,10-11; 6,9-10; Ga 5,11-21; Ep 4,31; 5,3-5; 1 Tm 1,9-10; 6,4; 2 Tm 3,2-5; Tit 3,3; Mt 15,19). Antan l-ap di sa-a minm, l-ap vizé yon péchè piblik ki nan fon Tanp la, k-ap lapriyé tèt bésé, ki pa minm gin kouraj lévé jé gadé Sièl la, tèlman li ront pou sa-l fè ki mal. Farizyin-an minm ap gonflé kè-l, li di li fè jèn, li bay nan kèt (Lc 18,12), min sé pa sa Bondié gadé. Sé sa-k frapé léstomak li-a, ki mandé Bondié padon pou péché-l yo, sé li minm Bondié konsidéré (Lc 18,13-14).

Yon moun ki rénonse pròp volonté pa-l, pou-l réglé konduit li sou volonté Bondié, sé li minm ki vi-n zanmi Bondié (Mt 21,28-32 = évanjil 26^{èm} d.o. A). Gin dé foua nou bliyé fè yon gran chémin pou nou kité mové abitud nou. Gin plis kè kontan nan Sièl la pou yon sèl péchè ki chanjé konduit pasé pou katrévindsnèf moun kòrèk ki pa bézouin viré do bay péché (Lc 15,7.10). Péchè piblik yo chanjé konduit, lè yo tandé prèch Jan-Batis la ki boulvèsé kè yo (Lc 7,29-30; Mt 21,32). Farizyin yo minm kontanté yo di nan kè yo yo sé pitit Abraam (Mt 3,8) san yo pa chanjé anyin nan konduit yo. Yo tankou pié boua ki pa donnin frui yo (Mt 3,10.8a), yo tou prèt pou yo koupé yo, pou yo jété yo nan difé (Lc 3,9). Sé pa moun k-ap di "Granmèt, Granmèt" k-ap antré nan péyi koté Bondié Roua-a, sé moun ki fè volonté Bondié Papa-a ki nan Sièl la. Péchè piblik yo gin tèlman bòn volonté, y-ap mandé konsèy pou konnin ki koté volonté Bondié-a yé, yo mandé Jan-Batis: "Ki sa pou nou fè?" (Lc 3,12). Yo pa pran pòz tankou Farizyin yo ki konprann yo konn tout bagay, yo pap pran léson nan min pèsòn, okontrè sé yo minm k-ap bay lòt moun léson. Farizyin-an ki té invité Jézu atab la, lè-l ouè kijan madanm nan ap kriyé nan pié Jézu, l-ap siyé pié-l ak chévé-l, l-ap bo pié-l, li kòmansé fè jijman sou li nan kè-l (Lc 7,39), époutan sé Bondié sèl ki jijé sa-k nan fon kè. Si Jézu déklaré madanm Samari-a sa-k nan fon kè-l, sé sèlman pou-l té kapab fè-l chanjé konduit, sé pa pou avilil-l (Jn 4,18.19). Minm prezans léspri Sin-an ba yo Limiè pou nou rékonèt péché nou, épi an minm tan li padonnin péché nou nan mézi nou aksépté limiè-l la ki fè nou rékonèt yo-a

(cf Dominum et vivificantem nn 46-48). Zaché promèt pou-l bay pòv yo mouatié nan byin-l, pou sa-l té pran yo, li rinnèt kat foua plis (Lc 19,8), paské Jézu vi-n vizité-l, li touché kè-l; li boulvèsé konsians li, pandan moun yo minm ap babié poutèt Jézu fè ladésant lakay li-a (Lc 19,7). Sé pa moun ki gin santé ki bézouin doktè, sé moun ki rékonèt yo malad (Mt 9,12). Jézu vi-n chèché mouton ki té pèdi yo (Lc 19,10). Sa-k nan péché yo tou, sé pitit Abraam yo yé (Lc 19,9; cf 3,8; Mt 3,9; Rom 4,11s; Ga 3,7; Rom 9,7s; Ga 4,21.31). Sé poussa Jézu chita atab avèk yo, jan-l té fè lè-l té rélé Matié dèyè kontoua kontribision-an (Mt 9,9-13). Sé **kè sansib** li vlé, plis pasé sakrifis (Mt 9,13; Am 5,21; Os 6,6; Mt 12,7).

Nou pa gin doua klasé yon katégori moun davans, kòm si sé nou sèl ki sovè, yo minm yo kondané. Sé Bondié sèl ki jij. Olié nou jijé lòt yo, sé pròp tèt pa nou pou nou jijé, pou nou rantré nan fon konsians nou, pou nou égzaminé **sa-k bézouin chanjé NAN NOU**. Si nou gin bout boua nan jé nou, nou pa kapab vlé ouété pay la sot nan jé lòt yo (Mt 7,3). Jézu toujou ap invité nou régrèt sa nou fè ki pa bon, li pa janm trò ta pou sa (Mt 21,32), minm si nou gin inpréson tan-an fi-n pasé. Tan fig yo té fi-n pasé, lè Jézu t-al chèché frui nan pié-a sou rout Bétani-Jérusalèm nan (Mc 11,12-14.20-25). Lè-l pa jouinn, li madichonnin-l. Sé tankou yon fason pou-l fè konprann, malgré tout movèz foua Juif yo, li té kontinué ap ofri yo yon dènié chans ankò. Sèkè yo pa-t janm gin doua kéyi tout frui sou pié-a, yo té gin obligasion kité kèk frui pou vèv ak òfélin, ak étranjé, ak pòv ki pa gin jadin, ki toujou gin éspoua, minm si tan frui yo fi-n pasé, y-ap jouinn kichòy kan minm pou grapiyé, dapré sa laloua-a té prévoua-a (Lv 19,9s; 23,22; Dt 24,19ss; 26,12; Ex 23,11, Rt 2,2). Min pié fig sa-a, yo pa-t kité anyin ladan-l minm; kè-a té fi-n di nèt, pa-t gin yon ti bò minm ki rété mou. Tout pòt té fèmin, pa-t gin yon ti fénèt ki té rété ouvè. Lè sa-a, pié fig la vi-n séché jous nan rasi-n (Mc 11,20), paské yo pa-t minm vlé kité yon ti grinn fig ladan-l pou moun k-ap pasé.

Dévan lafoua kapitèn Romin-an, ki té gin sèvitè-l malad la, ki pa-t minm vlé kité Jézu déplasé, antan-l mét lafoua sou Paròl li-a, Jézu di Juif yo li pa janm jouinn yon lafoua konsa nan Israèl (Mt 8,10). Li di: anpil moun ap sot nan diréksion solèy lévé ak nan diréksion solèy kouché, y-ap chita atab avèk Abraam, Izaak ak Jakòb nan péyi koté Bondié Roua-a, pandan pitit péyi Roua yo minm, y-ap jété yo déyò, nan fènoua yo, koté ki gin rèl ak manjé-dan (Mt 8,11s). "Sé pa moun k-ap di-m "Granmèt, Granmèt" k-ap antré nan péyi koté Bondié Roua-a, min sé moun k-ap fè volonté Papa-a ki nan Sièl la" (Mt 7,21).

Jézu di Juif yo si tout mirak sa yo, ki fèt lakay yo-a, yo té fè yo nan vil Tirak Sidon, yo t-ap gin tan fè pénitans pou yo chanjé fason y-ap viv. Y-ap mouin rèd pou yo nan jou jijman-an (Lc 10,13ss). Sint Tèrèz lanfan Jézu di: Li chita sou minm tab avèk péchè piblik yo, l-ap manjé pin sèk moun ki pa gin lafoua yo. Nou chak nou gin yon chanjman pou nou fè nan kè nou. Sé yon kouran lariviè n-ap rémonté nan kannòt. Si nou sispann ramé, kouran-an ap broté nou. Nan ninpòt nivo nou rivé, nou gin éfò toujou pou nou fè, pou nou monté pi ro. Nou pa doué konsidéré nou fi-n rivé déja. Sé tout tan pou n-ap chèché chanjé kichòy, pou nou vi-n pi nèf. Sé nan sans sa-a Sint Tèrèz lanfan Jézu té konsidéré li gin minm plas ak péchè piblik yo, pou Sin yo nan Sièl la té kapab kontan pou li tou plis pasé pou katrévindisnèf moun kòrèk yo, ki pa konsidéré yo gin anyin ankò pou chanjé lakay yo-a.

N-ap mandé Manman Mari pou-l ba nou sans anvi chanjman sa-a anndan fon kè nou, pou nou pa konprann nou fi-n rivé, min pou nou sonjé sé nan légliz "**militante**" nou yé, nou gin anpil batay pou nou fè, spésialman kont pròp défo pa nou, ki pa doué nan boutèy noua dévan jé nou, épi pou nou chèché toujou gin plis kalité, sitou kalité **obévisans** la, jan Sin Pòl di nan dézièm léktu 26^{em} dimanch òdinè A-a, nan Lèt li ékri Filipyin yo (Ph 2,1-11), lè l-ap palé nou osijè Jézu ki obéyi jous lanmò sou lakoua-a. Lévanjil 26^{em} dimanch òdinè A-a (Mt 21,28-32) di nou: Premié pitié la fi-n dézobéyi, min apré sa li régrèt, li chanjé davi. Travay yo té ba-l fè-a, li fè-l (Mt 21,28). Dézièm nan minm fi-n obéyi; épi lè li kalkilé avantaj li t-apral pèdi, li réprann paròl li. Sé lafoua ki pou kondui démach nou. Li pa janm trò ta pou nou fè sa-k byin, pou nou korijé sa nou fè ki mal. Sé moun nou yé. Bondié pa sézi poutèt nou fè rébèl. Li ba nou favè-l pou nou chanjé désizyon nou. Sé pou nou chèché mouayin nou pa rézisté dévan favè sa-a, nou kité-l chanjé kè nou, pou léspri Sin-an di "oui" nan nou, minm si nou té déja fi-n di "non" ak bouch nou. Nan pouin bagay ki fè Bondié plézi konsa, lè nou rékonèt nou té tronpé, lè nou kité chémin pròp volonté pa nou, pou nou suiv chémin pròp volonté pa-l, jan Profèt Ézékièl montré nan premié léktu 26^{em} dimanch òdinè A-a (Ez 18,25-28). Sé pa moun k-ap di-m "Granmèt, Granmèt" k-ap antré nan péyi koté Bondié Roua-a, sé moun ki fè volonté Papa-m ki nan Sièl la (Mt 7,21).

Sin Monfò di nou: "Tout mon valant, c'est d'être **OBÉISSANT**". L'obéissant remportera des victoires signalées. L'obéissance vaut mieux que le sacrifice (1 Sam 15,22; Mt 9,13; 12,7; cf Os 6,6), parce que l'obéissance est elle-même sacrifice d'amour.

*
* *

VINSIZIÈM DIMANCH ÒDINÈ B

Sé léspri Sin-an ki chasé mové léspri yo (cf Mt 12,28). Gin Juif ki té konn abitué chasé démon (Ac 19,11-17). Jézu di Juif yo si sé pa pouvoua Bèlzeboul li chasé démon, pitit pa yo minm, pa pouvoua kilès yo chasé? (Mt 12,22-32). Sé Jézu ki bay pouvoua pou chasé démon yo, antan-l bay léspri Sin-an. Apot yo réalizé mision sa-a sitou apré lapannkot (Ac 5,16; 16,18). Pouvoua chéf tè-a fini (Jn 16,33; 2 Th 2,6-8). Koua Jézu-a ranpôté laviktoua sou li. Majisyin yo rélé Simon-an té éséyé achté pouvoua léspri Sin-an nan min Sin Piè, pou-l té kapab fè lajan (Ac 8,18-24). Sin Piè di-l si l-ap angajé nan chémin sa-a, sé nan fièl anmè ak chinn mal l-ap tonbé. Sin Pòl fè majisyin yo rélé Bar-Jézu-a vi-n avèg (Ac 13,6-12). Fòs léspri Sin-an ap krazé pouvoua Satan tou patou anba min Apot yo. Patizan ki pa-t ap suiv Jézu-a épi ki t-ap chasé démon-an, li té patizan Jézu kan minm, minm si-l pa-t nan minm kondision avèk sa ki t-ap suiv li yo (Mc 9,37-47). Sé pousa Jézu di yo pou yo pa anpéché-l chasé démon. Sé tankou Èldad ak Médad (Nb 11,25-29 = prémié léktu 26° d.o. B). Léspri-a tonbé sou yo malgré yo pa-t nan group souasandis yo ki té réyini alantou Moyiz la. Moyiz di yon bèl paròl ki nan Joël tou ak nan Travay Apot yo: "Sé sou tout pèp la léspri Sin-an gin pou-l tonbé" (cf Nb 11,29; cf Joël 3,1; Ac 2,17). Sé yon bon konsign pou nou pa trò vit kondané yon moun ki pa fi-n gin minm konpòtman avèk nou nan légliz la. Bondié sèl sondé sa-k nan fon kè. Li bay chak moun fason pa-l pou-l sèvi-l. Minm sa-k pa nan légliz yon fason nou kapab ouè ak jé kò nou, Bondié konn kijan pou-l fè rankont avèk li nan kè-l. Jéto, bò-pè Moyiz la, té bay bon konsèy, malgré li pa-t nan pèp Bondié-a. Sé li minm minm ki té konséyé Moyiz pou-l pa fatigé kò-l tròp ap okipé tout bagay pou kont li, pou-l chouazi kèk moun pou-l mété résponsab tèl ak tèl pòsion pèp la pou yo réglé tout bagay ki pa trò konsékan. Sa-k pi inpòtan yo, Moyiz ap okipé yo li minm (Ex 18,13-27). Moyiz suiv konsèy bò-pè-l la vré. Époutan mesié sa-a pa-t konn rélijion Granmèt la. Min sé Bondié minm ki té mété lidé sa-a nan léspri-l. Sé konsa Jézu di Jan pou-l pa anpéché moun yo fè travay Profèt yo, pou-l pa anpéché yo chasé démon yo. Si yo fè sa, sé sign léspri Sin-an avèk yo, l-ap fè yo travay pou li (Mc 9,39).

Gin moun ki vlé réglé tout bagay pou kont yo sèl, kòm si sé yo minm sèl ki konnin, ki kapab. Nou toujou bézouin yon pi piti pasé nou. L-ap fè tèl bagay pi byin pasé nou. Sé pa paské Bondié mété nou nan tèl plas, sé pa pousa li blijé pasé pa lintèmédiè nou pou tout bagay (Jn 20,21-22). Bondié lib. Okontrè, sé lè sa-a minm nou doué fè kò nou tou piti, pou nou résévoua konsèy ak konkou nan min lézòt yo. Psòm-répons la di: péché lògèy sé gro

péché, li mandé pou Bondié pròpté nou anba gro péché sa-a (Ps 18/19,14). Tèl moun pa minm krétyin, min si-l fè nou kado yon vè dlo paské nou sé patizan Jézu-Kri, moun sa-a pap pèdi rékonpans li. Yon foua li gin lacharité, li nan légliz yo kapab ouè-a, min li ladan-l yon fason yo pa kapab ouè. Gin moun ki bay bon konsèy, sé vré, ki fè bon sèvis, sé vré. Min gin dèt tou ki konn bay mové konsèy, ki gin mové léspri nan lidé yo, épi k-ap gayé mové léspri sa-a pou fè lòt yo tonbé sou rout ki minnin nan sièl la. Jézu di pou nou pa kite anyin dékontolé nou sou rout Sièl la, li té mèt sé jé nou, pié nou, bra nou...

*

Prémié léktu 26^e dimanch òdinè B-a (Nb 11,25-29) montré kijan Bondié pran nan léspri Moyiz la pou-l mété sou souasandis Ansyin yo pou yo édé Moyiz nan travay li; osito apré, liv Nonb nan montré kijan Bondié pini Miriam ak Aaron ki révòlté kont Moyiz (Nb 12). Dé pasaj sa yo, youn konplété lòt. Sé pa paské Bondié bay Moyiz moun ki pou édé-l ki fè yo kapab déprésié Chèf kominoté-a. Bondié fè Miriam vi-n blanch ak lalèp. Lè Aaron mandé padon pou li, Bondié fè Miriam rété kan minm pandan yon sémèn ap fè pénitans. Moyiz pa-t jalou otorité-l; liv Nonb nan di Moyiz sé té moun ki rabésé tèt li pi plis pasé tout moun (Nb 12,3). Yon chèf kominoté doué gin prémié kalité sa-a, li doué "**HUMBLE**". Pouvoua Bondié bay Chèf la, li pa doué fè rayisab ak sa (Nb 11,29). Min yon lòt koté tou, si moun l-ap kòmandé yo ap fè rébèl sou rébèl, Pèp la pap kapab maché, l-ap lou pou déplasé (Nb 12,15). Nou doué patajé rèsponsabilité nou. Min anpil, chaj pa lou. Mésié-a ki t-ap chasé démon-an, minm si-l pa-t maché nan group Apot yo, li té gin léspri Sin-an kan minm (Mc 9,39-40); gin anpil bon konsèy nou gin doua jouinn nan min moun ki pa nan minm rélijion ak nou. Jéto, bò-pè Moyiz la, té ba-l konsèy pou-l té patajé rèsponsabilité Pèp la ak souasandis Ansyin yo, époutan Jéto pa-t nan minm rélijion ak Moyiz. Sé Bondié ki té palé ak Moyiz pa lintèmediè Jéto (Ex 18). N-ap mandé Manman Mari pou Chèf Kominoté yo gin "**HUMILITÉ**" pou patajé rèsponsabilité yo, épi pou moun y-ap dirijé yo gin **dosilité** pou maché nan minm kadans ak yo, pou pa fè kominoté-a trinnin pou granmési (Nb 12,15-16).

*

* *

VINSIZIÈM DIMANCH ÒDINÈ C

Vinsizièm dimanch òdinè C-a fiksé atansion nou sou youn nan sèt péché kapito yo, sa yo rélé "la LUXURE" la. Mové rich la ap fè banbòch chak jou, pandan pòv Laza ap soufri grangou nan papòt li (Lc 16,19-31 = Évanjil 26e d.o C). Moun Samari yo t-ap lagé kò yo sou divan yo nan pozision mòl, ap fè banbòch (Am 6,1a.4-7=premié lektu d.o C), san yo pa konnin si malè-a tou pré yo. Sèké Granmèt la ap gayé rout péchè yo (Ps 145-146,9 = Psòm répons). Jézu vi-n pòv malgré li té rich, pou-l anrichi nou ak povreté-l (2 Co 8,9 = Alélouya), pou-l aprann nou ouété lidé nou sou byin k-ap pasé yo.

*

Sin Luk sé Évanjélis PÒV. Dépi premié prèch Jézu nan kay-réyinion Nazarèt la, li sité pasaj lékòl Profèt Izayi-a: "Léspri Granmèt la sou mouin, li voyé-m poté Bòn Nouvèl la bay pòv yo" (Lc 4,18; cf Is 61,1). Jézu palé yon fason dirèk antan-l di: "Sé chans pou nou minm ki pòv yo" (Lc 6,20), kòm si sé pòv sa yo minm li té gin dévan jé-l, antan-l t-ap palé-a. Réyéلمان vré, li té avèti moun ki té vlé suiv li yo li pa-t gin koté pou-l pozé tèt li (Lc 9,58). Sé minm Sin Luk sa-a ki montré kijan premié kominoté-a té viv yon fason pòv antan fidèl yo té pran abitud séparé sa yo té ginyin ak tout kominoté-a, pou pèsòn pa mét non-l sou pròp byin pa-l (Ac 4,32-37; 2,44-45). Sin Luk té abitué akonpagné Sin Pòl nan mision-l yo. Li té konstaté kijan Sin Pòl té insisté sou sa. Sin Pòl té montré Korintyin yo kijan Jézu vi-n pòv, malgré li té rich, pou-l anrichi nou ak povreté-l (2 Co 8,9). Mésaj sa-a, sé pa yon bagay ki nouvo. Dépi nan lansyin Téstaman, Profèt yo té tèlman insisté sou li, yo té rivé yon pouin yo rékonèt sé sou fòm pòv Kris la té gin pou-l vini, tou dou, chita sou yon ti bourik, pou-l antré kòm Roua nan vil Jérusalèm (Za 9,9). Sé yon pèp tou pòv k-ap résévoua-l (So 3,12). Sé konsa Sin Luk montré kijan la Trè Sint Vièj Mari té gin konsians li réprézanté pèp pòv sa-a, antan-l di: "Li voyé jé-l sou sèvant li ki tou pòv la... Li lévé pòv yo anlè" (Lc 1,48-52). Dispozision pòv sa-a, ki chita nan kè-a, Profèt yo té invité pèp la pou-l ginyin-l, antan-l ouété lidé-l sou tranzaksion, sou injistis, antan youn sispann ap fè profitè sou lòt. Sé konsa nan premié léktu 26èm dimanch òdinè C-a (Am 6, 1a. 4-7), Profèt Amòs ap reproché mòd jan moun yo ap viv nan vil Samari-a, antan y-ap fè dépans ki egzajéré pou yon plézi k-ap pasé, minm sa lévanjil 26èm dimanch òdinè C-a (Lc 16, 19-31) montré nou osijè mové rich la .

Tout gaspiyaj sa yo, sé yon fason pou yo provoké moun ki pa minm gin dékoua manjé. Sa pa kapab pa révòlté yo, jan Pap Pòl VI ak Pap Jan Pòl II

répété nan mésaj yo ékri pou jouinn lapè yo nan kòmansman moua janvié yo dépi ané 1968 la. Dépi péché-a fi-n antré sou tè-a, moun gin tandans fè égozis ak rayisab. Sé kòm si yo fèmin zòrèy kè yo pou yo pa tandé voua konsians yo k-ap réproché yo. Évanjil 26èm dimanch òdinè C-a (Lc 16,19-31) montré klè kijan olié pou mové rich la bay pòv Laza kichòy pou-l pasé grangou-l, sé chyin yo ki vi-n niché koté-l blésé yo. Li déja pòv. Olié yo ba li, sé pran yo pran nan min-l. Pandan-l tou vivan, chyin déja kòmansé ap manjé-l.

Min Sin Luk pa rété sou pasaj sa-a. Li vlé montré gin yon jistis ki dépasé manèv lèzòm. Li vlé fè nou konprann sou tè sa-a sé pasé n-ap pasé. Si nou pa kondui tèt nou byin, malè ap tann nou, lè nou travèsé nan lòt lavi-a. Sé poua malgré li prézanté dé figi yo avèk grosè diférans sa-a, li montré kijan ròl yo chanjé apré lavi sa-a. Mové rich la ki t-ap gaspiyé byin-l nan libètinaj la dévan fas pòv Laza-a, li pa-t okipé kòm chyin-an, lè-l mouri sé nan difé lanfè li tonbé. Mo yo pa kont pou ésplyé jan l-ap souffri nan flanm difé yo (Lc 16, 23). Lè-l lévé jé-l, li ouè Laza byin louin sou kè Abraam nan sièl la ap joui koulié-a. Sé lè sa-a li rékonèt li, l-ap mandé pou Abraam voyé-l vidé yon sèl ti gout dlo sou lang li. Sa yon ti gout dlo kapab fè pou yon moun ki nan brazie difé? L-ap gin tan évaporé anvan-l rivé sou lang moun nan. Sé dépalé l-ap dépalé, tèlman l-ap souffri. Pasaj sa-a ta doué kont pou fè moun k-ap pasé tan yo nan libètinaj réfléchi sou sa k-ap tann yo apré lavi sa-a, si yo pa chanjé konduit. Sé Jézu minm ak pròp bouch li ki avèti yo. Sé chatiman difé ki pap janm étinn nan. Épi sé kòm si sé yon falèz ki ginyin ant sièl la ak lanfè-a, ki fè yo pa sot nan youn pou travèsé nan lòt la. Liv Provèb la di: "moun ki bouché zòrèy li nan rèl pòv la, lè-l rélé li minm, li pap jouinn répons" (Pr 21,13). Non sèlman Laza pap désann al nan lanfè-a, pou-l poté ti gout dlo-a bay mové rich la, min li pap minm résisité al sou tè-a, pou avèti lòt frè mové rich yo pou yo chanjé konduit. Yo gin moun Bondié mété pou préchè yo. Si yo fèmin zòrèy yo nan paròl yo, Bondié pap fè mirak pou fòsé volonté yo. Sé lafoua yo ki pou sové yo. Bondié ap dérasinin non yo sot sou tè vivan yo. Sé sou bagay éstèriè yo konté pou drésé préstij yo. Sé ak rad soua, ak vlou mové rich la té konn abiyé. Sé pa dé lajan moun konn gaspiyé nan rad ak bijou (1 Tm 2,9; 1 P 3,3-4; Is3,16-26). Époutan sa-k pou fè-l bèl tout bon vré-a, sé anndan kè-a li yé, sé bèl kalité Bondié dépozé anndan nanm nou, tankou jèm li kaché anba tè pou yo pousé, pou yo fléri, pou yo donnin. Provèb la di: "Bondié konn bay, sé nou ki pa konn séparé". Yo viré Provèb la, yo fè-l di "Bondié konn bay, li pa konn séparé", pou yo ouété fot la sot sou do lèzòm, pou yo mété sou kont Bondié.

Yon lè Sint Tèrèz lanfan Jézu té résévoua yon panié bonbon, ki té gin dé ti bag ki fèt avèk sik-dòj. Li di nan kè-l: "Dé bag sa yo, youn pou mouin, youn pou Séli-n, sè-m nan". Kòm sé té ti moun piti, antan l-ap maché, l-ap balansé ti panié-a nan min-l, épi tout ti bonbon yo ap gayé, san-l pa konnin; yo simin nan lari-a, tankou "le Petit Pousset". Lè-l rivé lakay li, li konstaté gin youn nan dé ti bag yo ki té pèdi sou rout; li pran kriyé: "bag Séli-n nan pèdi". Apré sa, lè-l vi-n gran, l-ap raplé sa, li di bag yo pa-t maké; yo tou lé dé té sanblé, san pa gin diférans ant yo; pouki sé pa Séli-n nan ki té pèdi-a? Sé paské nan kè nou gin santiman égoyis. Sé tout tan nou oblijé ap fè éfò sou nou, pou nou sonjé séparé sa nou ginyin ak lòt yo, san nou pa mét non nou sou anyin ki pou nou.

N-ap mandé Manman Mari pou-l fè nou sonjé gadé sa lòt yo bézouin, tankou li minm li té fè kay Élizabèt la ak nan nòs Kana-a (Lc 39ss; Jn 2, 3).

*

* *

VINSÉTIÈM DIMANCH ÒDINÈ A

Konparézon pié rézin-an, Mésaj labib la sèvi avèk li anpil (32 fous nan Nouvo Téstaman; 139 fous nan lansyin Téstaman: Mt 20,1.2.4.7.8; 21,28,**33.39.40.41**; 26,29; Mc 12,1.2.8.9a.b; 14,25; Lc 13,6; 20,9.10.13.15a.b.16; 22,18; Jn 15,1.4.5; 1 Co 9,7; Lc 3,12; Ap 14,18.19; Gn 9,20; 40,9; 49,11; Ex 22,4a.b; 23,11; Lv 19,10; 25,3.4; Nb 6,4; 20,5.17; 21,22; 22,24; Dt 6,11; 8,8; 20,6; 22,9; 23,25; 24,21; 28,30.39; 32,32; Jos 24,13; Jg 9,12.13.27; 13,14; 14,5; 15,5; 21,20.21; 1 Sm 8,14.15; 22,7; 1 R 5,3; 21,1.2a.b.6a.b.c.7.15.16.18; 2 R 5,26; 18,31; 19,29; Ne 5,3.4.5.11; 9,25; 1 Ma 3,56; 14,12; Job 15,33; 24,6.18; Ps 78,47; **80,9,15**; 105,33; 107,37; 128,3; Pr 24,30; 31,16; Qo 2,4; Ct 1,6a.b.14; 2,13.15a.b; 6,11; 7,13; 8,11.12; Si 24,17; Is 1,8; 3,14; **5,1a.b.3.4.5.7.10**; 7,23; 16,8.9.10; 24,7; 27,2; 32,12; 34,4; 36,16; 37,30; 65,21; Jer 2,21; 5,17; 6,9; 8,13; 12,10; 31,5; 32,15; 35,7.9; 39,10; Ez 15,2.6; 17,6a.b.7.8; 19,10; 28,26; Os 2,14; 10,1; 14,8; Joel 1,7.12; 2,22; Am 4,9; 5,11.17; 9,14; Mi 1,6; 4,4; Na 2,3; Ma 3,17; So 1,13; Ag 2,19; Za 3,10; 8,12; Mal 3,11).

Pié rézin-an, sé Jézu li minm (Jn 15,1ss; Si 24,17). Sé Papa-a ki planté-l; sé li minm ki okipé-l. Branch yo, sé nou minm; si nou donnin frui, Papa-a ap nètouayé nou, pou nou bay pi plis toujou. Min pou nou donnin frui, sé pou nou rété kolé sou Jézu, vré pié rézin-an. Si branch yo détaché, y-ap ranmasé yo, y-ap jété yo déyò, y-ap boulé yo nan difé. San li minm, nou pa kapab fè anyin (Jn 15,5; 1,3).

Jadin rézin Bondié planté-a, li voyé travayè ladan-l nan tout moman (Mt 20,1ss; cf Exhortation apostolique sur la mission des laïcs dans l'Église et dans le monde). Sé pa sou mérit travay yo li gadé pou-l rékonpansé yo, jan préfas lamès Sin yo di-a: "lorsque tu couronnes leurs mérites, tu couronnes tes propres dons". Minm sa-k té réfizé vi-n travay anvan épi ki chanjé davi apré, ki vi-n travay, li aksépté yo (Mt 27,28ss), paské chak moun gin lè pa-l ak sikonstans pa-l pou-l fè yon chanjman nan lavi-l, pou-l fè konvèsion. Sa-k fèmin kè yo jous yo révòlté poutèt jalouzi avèk égoyis, malgré anpil demach ki ofri yo rékonsiliasion, sé yo minm ki mété pròp tèt yo déyò éritaj jadin rézin-an (**Mt 21,33ss**). Bondié planté nou; l-ap tann nou bay bon rézilta (**Is 5,1ss**).

Sé pa grinn rabi pou nou bay. Valè li mété nan nou nan batèm nan (lafoua, léspérans, lacharité) ak nan lakonfimasion-an (sajès, intélijans, konsèy, fòs, sians, piété, krint), ak kalité li ba nou yo tankou gon pou soutni pòt kay la (prudans, jistis, fòs, tanpérans,) ak tout lòt kalité li mété nan nou pou nou fè aksion ki bon ("prévoyance, circonspection, constance" pou "prudence" la;

"patience, magnamité, longanimité" pou "force" la; "religion, pénitence, obéissance" pou "justice" la; "chasteté, douceur, pauvreté" pou "tempérance" la) nou doué fè yo travay, pou Bondié rékòlté frui nan nou, pou nou pa bay Bondié désépsion (Ps 79/80; Ct 1,6; Jer 2,21; Ez 19,10; Os 10,1; Na 2,3), pou nou bay frui léspri Sin yo Sin Pòl palé nan Lèt Galat yo (Ga 5,22-23) ("charité, joie, paix, longanimité, serviabilité, bonté, confiance dans les autres, douceur, maîtrise de soi").

N-ap mandé Manman Mari pou nou dosil nan min léspri Sin-an, pou-l fè nou donnin frui mézi Bondié Papa nou prévoua pou nou. Sèvitè-a ki té résevoua yon sèl piès lajan-an, li t-al séré-l anba tè-a, li pa-t fè-l rapòté anyin-an, mèt li di-l omouin sé pou-l té mété-l labank; lè li t-a tounin, li t-a jouinn li avèk bénéfis. Li fè rétiré piès lajan-an nan min-l pou-l bay dèt moun ki té fè lajan pa yo travay (Lc 19,24). Sin Pòl di nou sé nan véso frajil n-ap poté favè Bondié ba nou-an (2 Co 4,7). Sin Monfò konsyéé nou rinnèt li nan min la Trè Sint Vièj pou Satan pa fè nou pèdi-l (cf 1 P 5,8). Lè n-ap lapriyé chaplé-a, nou mandé Manman Mari pou-l fè **frui** mèvèy sakré yo désann nan nanm nou. Sé frui zantray la Trè Sint Vièj, jan Sint Élizabèt té di-l la: "Ou béni pasé tout fi; **frui** zantray ou-a béni tou!" (Lc 1,42; cf Dt 28,4).

*

"Ròch la bòs mason yo jété yon koté-a, li vi-n tounin ròch kouin-an" (Mt 21,42; cf Ps 118,22; Is 28,16; Za 3,9; 4,7; Ac 4,11; Ep 2,20; 1 Co 3,11). Fason Bondié aji, sé pa fason lézòm aji (cf Is 55,8). Moun Bondié mété pou-l dirijé lòt yo, sé pa li minm nésésèman yo adopté. Okontrè, si-l sèvi kòm yon répròch pou konsians yo (Sg 2,14), yo jété-l yon koté, pou yo bati dapré plan pa yo, tankou yo té fè lè yo t-ap bati kay Babèl la (Gn 11,4; Ps 127,1). Lè sa-a yo mété tèt yo ansanm pou yo gin plis fòs, min sé pou yo kapab rézisté dévan fòs Bondié-a. Frè Jozèf yo té gin présantiman sé li minm Jakòb té chouazi kòm ròch-kouin-an. Nan rèv li yo, li té konn ap palé yon fason sé kòm si sé li minm ki té anlè tout lòt yo: paské zépi pa-l la té ré kanpé, pandan lòt paké zépi yo té plouayé dévan-l (Gn 37,7). Solèy, lali-n ak zétoual té bésé dévan-l (Gn 37,9). Frè-l yo fè jalouzi kont li (Gn 37,11). Yo santi sé li minm ki éritié-a. Yo jété-l déyò éritaj la, antan yo vann li bay machann Madian yo ki t-apral nan péyi Éjip la (Gn 37,28). Min sa Bondié paré pou nou, gran dlo pa gin doua broté yo. Sé kòm si sé paré Jozèf t-ap paré rout pou yo. Li minm yo jété yon koté-a, sé li minm ki vi-n tounin ròch-kouin-an, pou bati kay Israèl la. Fason lézòm bati, sé pa fason Bondié bati. Lézòm gadé sou aparans, Bondié gadé sou pa anndan (1 Sam 16,7; Is 55,8-9; Job 10,4; Ps 147,10s; Jer 11,20ss; Pr 15,11). Ròch lézòm chouazi,

sé ròch ki gin bèl aparans, sa pa vlé di ròch la solid pou sa. Bondié minm chouazi ròch ki solid, minm si-l pa bèl dévan jé lézòm. Sé pa tout bèl flè ki gin bon lodè. Moun pa bézouin pou lòt moun yo di: "Gadé jan kay la bèl, gadé jan ròch-kouin-an bèl" (cf Mt 24,1; Mc 13,1; Lc 21,5). Min yo pa konsidéré si anvan mouins ti sékous, l-ap fonn. Kristal bèl, min li frajil. Sé pou rézon sa-a sé sa lézòm méprizé, sé yo minm Bondié pran an konsidérasion, jan Sin Pòl di Korintyin yo (1 Co 1,27). Sin Piè di nou pou n-al jouinn Jézu koté bès mason yo réjté-l la (1 P 2,4; cf He 13,12-13), tankou yon ròch ki pa vo anyin-an, min ki sèvi poutan kòm ròch-kouin nan kay Bondié-a (1 P 2,6). Moun ki pa gin lafoua yo, y-ap bité sou li (1 P 2,8). Sin Pòl di Éfézyin yo: fondasion Kay la, sé Apot yo ak Profèt yo; Ròch-kouin-an, sé Jézu-Kri li minm (Ep 2,20). Lèt Èbré yo di nou pou nou soti déyò lavil la, pou n-al rankontré Jézu, koté yo klouré-l sou Koua-a (He 13,12-13). Sèké anba isit la, nou pa gin yon vil k-ap diré, min sé maché n-ap maché nan diréksion vil n-ap chèché-a (He 13,14). Nou pa gin yon koté, pa minm yon ròch pou pozé tèt nou (Lc 9,58; Gn 28,11.22), tankou yon pòv k-ap trinnin tou patou, koté-n pasé nou sé étranjé, min nou sètèn lè n-a jambé lòt bò-a, n-a jouinn koté pou-n répozé. Lè moun ap fè louanj nou, sé pa sign nésésèman nou fè Bondié plézi. Lè Samuèl t-al kay Jésé pou-l sakré yon roua, pou ranplasé Sayul, Jésé fè tou lé sèt pitit gason-l yo pasé dévan-l. Dépi sou prémié-a – Éliab --, ki té gin bèl rotè, Samuèl di: "Sètènman sé sila-a Granmèt la chouazi pou-l sakré-l la" (1 Sam 16,6), min Bondié di Samuèl: "Pa konsidéré aparans li ni rotè tay li, paské mouin réjté-l. Fason Bondié gadé, sé pa tankou fason lézòm gadé; moun gadé sou aparans, min Bondié gadé nan kè" (1 Sam 16,7). Lè dézièm nan – Aminadab -- pasé, Samuèl di: "Sé pa li minm non plis Granmèt la chouazi" (1 Sam 16,9). Tou lé sèt pasé. Samuèl di minm bagay: "Granmèt la pa chouazi okinn nan yo" (1 Sam 16,10). Samuèl blijé mandé Jésé: "Kòman, ou pa gin okinn gason ankò?" (1 Sam 16,11). Sé lè sa-a papa-a vi-n sonjé té gin yon dènié, sa-k pi piti-a, li té andéyo, li t-ap véyé mouton. Samuèl voyé chèché-l. Lè-l rivé, Bondié di: "Sé li minm pou-ou sakré kòm roua" (1 Sam 16,12). Ròch la bès mason yo jété yon koté-a, sé li minm ki vi-n tounin ròch-kouin. Fason lézòm aji, sé pa konsa Bondié aji (Is 55,8-9; Job 10,4; Ps 147,10; Jer 11,20; Pr 15,11). Sint Bènadèt di: Si la Trè Sint Vièj Mari té jouinn yon ti fi ki pi pòv nan vil Lourdes la, sé li minm li t-ap chouazi pou-l ba-l mèsaj li-a. Sé nan féblès lézòm fòs Bondié déplouayé, jan Sin Pòl di Korintyin yo (2 Co 12,9; 4,7; Is 40,29). Lè Bondié chouazi Zorobabèl pou-l rébati Tanp la, apré légzil la, nan ané 520 anvan Jézu-Kri, li di nan bouch Profèt Zakari: "**Sé pa ak puisans ni ak fòs min sé ak léspri-m**" (Za 4,4).

Tout travay Bondié vlé fè avèk nou, sé ak léspri-l l-ap fè-l, sé pa fòs pouvoua moun k-ap réglé anyin. Okontrè plis nou fèb, sé plis li minm l-ap aji alèz, paské li kréyé tout bagay san anyin. N-ap mandé Manman Mari pou-l ba nou asirans sa-a, pou nou pa trakasé tèt nou, lè nou gin inpréssion yo mété nou akoté nan bagay inpòtan y-ap réglé. Bondié pa janm bliyé nou. Nan mézi nou aksépté plas nou, san nou pa fè pèsòn konkirans, san nou pa plinyin, nan minm mézi sa-a Bondié ap réglé afè pa-l avèk nou, yon fason k-ap dépasé sa nou t-a éspéré. Ròch la bòs mason yo jété yon koté-a, li vi-n tounin ròch-kouin nan tèt kay la pou kinbé tout konstriksion-an. Sa yo rélé "clé de voûte" la.

*

* *

VINSÉTIÈM DIMANCH ÒDINÈ B

Lévanjil 27^e dimanch òdinè B-a (Mc 10,2-16) gin dé pasaj: prémié-a konsèné mari ak madanm (Mc 16,2-12); dézièm nan konsèné pitit yo (Mc 10,13-16).

Nan prémié-a, Jézu vlé bay lansègnman sou **mariaj** (Mc 10,2-13). Li pa monté nan lansègnman Moyiz. Li monté pi ro pasé Moyiz, jous nan lakréasion, pou-l montré gason-an ak fi-a ki fi-n marié pa gin doua divòsè (Gn 1,27; 2,24; Mc 10,7-9). Granmèt la ki té kréyé yo-a té fè yo dé-a nan yon sèl kò. Si té vi-n gin posibilite divòs, sé paské gason-an t-ap maltrété fi-a pou ninpòt ki rézon (Si 26,16). Min mariaj la sé sign aliens ant Bondié ak Pèp li. Nan lansyin Téstaman, Bondié rélé Pèp li-a madanm li (Is 62,4-5; Ct 4,7; Os 1,21-22; Jer 2,26; Ez 16,8). Bondié minm, sé mari li (Os 2,4; Jer 31,22). Nan tout liv sa yo, nou konstaté Granmèt la ak Pèp la toujou ap fè lago-lago. Kontra-a ki pasé ant Bondié ak Pèp li-a nan lansyin Téstaman-an sé yon kontra k-ap maré, k-ap lagé, dapré jan Pèp la fidèl oubyin infidèl (Os 2,4; Ct 5,2-8), joutan rivé jou lè kontra-a pap janm kasé ankò (Jer 31,31-33), lè l-ap signin nan san Jézu-Kri li minm minm avèk légliz la, nan nouvo Téstaman, dapré sa Sin Pòl di Éfézyin yo (Ep 5,21-32), koté li éspliké nou kijan sakréman mariaj la gran; paské sé sign kontra ki pasé ant Jézu-Kri ak légliz la. Kontra Nouvo Téstaman sa-a pap janm kasé ankò. Konsa tou, mariaj nan Nouvo Téstaman-an pa kapab kasé; sé pou sa Sin Pòl di Korintyin yo (1 Co 7,10-11) mari-a oubyin madanm nan pa gin doua divòsè; an tou ka si youn ranvouayé lòt, li pa gin doua al marié ak yon lòt moun. Sé adiltè li fè. Sa Bondié fi-n maré, lézòm pa kapab kasé-l. Pito nou réfléchi byin anvan nou marié. Min si nou fi-n marié, nou angajé nèt. Sé pa yon pè soulié n-ap éseyé; kon nou fi-n chiré-l, nou voyé-l jété yon koté. Profèt Malachi palé sévè sou késion divòs la (Mal 2,14). Li di: "Granmèt la témouin ant ou minm ak madanm ou té ginyin lè-ou té jèn nan, épi ou trayi madanm ou-an, malgré sé asosié-ou li yé, sé madanm kontra-ou la. Sé yon sèl li yé avèk ou, sé konsa Granmèt la té fè-l; sa l-ap chèché, sé yon désandans Bondié ba li. Sé pou-ou respékté lavi-ou, ak madanm ou té ginyin dépi-ou té jèn nan; pa trayi-l; paské mouin minm Granmèt la, mouin rayi divòs; pa fè trayizon sa-a" (Mal 2,14-16).

Sé pou préparé lansègnman sa-a litiji 27^e dimanch òdinè B-a fè nou tandé pasaj liv lajènèz la (Gn 2,18-24 = prémié léktu) ki rakonté kijan Bondié té fè fi-a ak yon kòt ki sot nan gason-an, ki fè yo rélé fi-a madanm "ishâ", yo rélé gason-an mésié "ish", kòm si yo t-a di "nèg" la, "nègès" la. Psòm-répons la (Ps 127/128) montré kijan sa bèl lè yon fanmi kapab gin bòn antant ant

mésié-a ak madanm nan. Madanm nan tankou yon pié rézin nan mitan lakay la. Liv Provèb la (Pr 31,10-21) fè ouè kijan yon madanm gin plas inpòtan nan yon kay. Sa vo tout kalité richès. Mari-a gin doua pozé tout konfyans li sou li. Yon madanm nan yon kay, sé solèy k-ap lévé granmatin, sé limiè lanp ki limin asouè (Si 26,16-17). Si nou divòsé avè-l, sé fè noua k-ap antré nan fènèt lakay la. Divòs té fè pati laloua lansyin Téstaman, sé vré, yon sètin moman (Dt 24,1-5). Min ofi-amézi Pèp Bondié-a ap évolué, sitiasyon sa-a ap chanjé. Sé poua Profèt Malachi (Mal 2,13-16), ki vi-n lontan apré Détéronòm, palé karéman kont divòs. Dayè Détéronòm (Dt 24,1-5) pa-t minm dakò pou mari-a té réprann madanm nan ankò, apré divòs la. Lontan apré, Profèt Jérèmi (Jer 3,1) fè sonjé pasaj Détéronòm sa-a; li apliké-l sou Pèp Israèl la nan rélasyon-l avèk Bondié. Profèt Jérèmi (Jer 3,8) di Bondié té bay Israèl papié divòs la. Époutan Bondié ap tann li tounin vi-n jouinn li toujou (Jer 3,12), malgré sé li minm ki té trayi, tankou yon madanm ki trayi mari-l (Jer 3,20). Sé nan sans sa-a Profèt Ozé (Os 2,9) fè Pèp la di: "M-ap tounin kot prémié mari-m nan", minm jan ti pitit la ki té pati kité papa-a té régrèt la, li té tounin kay papa-a (Lc 15,18). Profèt Jérèmi (Jer 18) fè nou ouè kijan moun k-ap fè krich avèk tè-a, kon yon krich kasé, li réprann tè-a, li réfè krich la avèk li. Toutotan tè-a pa ko kuit, yo kapab réfè krich avèk li. Sé yon égzanp pasians pou mari ak madanm ginyin youn vizavi lòt minm jan Granmèt la ginyin parapò a Pèp li-a.

Jézu pasé lòd (Mt 5,31-32) pou pa janm ranvouyé madanm nan, sof si sé ka koté moun yo ap viv nan sitiasyon ki pa nan kad mariaj la, dapré sa laloua-a té prévoua (Lv 18,6-18; cf Ac 15,20-29; Mt 19,1-9). Yo pa mandé pou mésié-a ranvouyé madanm nan, si madanm nan fè adiltè. Sé pa nan sans sa-a pou konprann yo. Yo mandé pou ranvouyé-l, si sé dé moun ki t-ap viv nan mové plézi ansanm. Sin Pòl palé sou sa ak Korintyin yo (1 Co 6,12-20). Li di si sé ak kòd péché-a nou maré ansanm, sé pou nou délagé-l. Li palé sou yon lòt ka tou (1 Co 5,1-13), youn nan ka laloua-a té prévoua yo (Lv 18,8), sa yo rélé "inceste" la. Sin Pòl prévoua gin nan vré mariaj koté moun yo kapab pa vlé viv ansanm ankò pou rézon grav (1 Cor 7,1-11); li mandé kan minm pou yo fè tout éfò pou éséyé rét ansanm; min si yo séparé, nan pouin késion rémarié ankò.

Gin moun ki tankou papiyon. Dépi yo ouè yon flè, fò yo pozé sou li. Kon yon lòt madanm oubyin yon lòt mésié fè yo déklarasion, yo tonbé pou li; sé lè sa-a yo ouè pròp madanm pa yo-a oubyin pròp mari pa yo-a gin tout kalité défo, épi yo mandé divòs. Vré kòz divòs la, sé nan yo li yé, sé lanbision pou satisfè lanvi lachè yo ki pa kontrolé asé. Sé pou nou pran tèt nou, pou nou pa mandé divòs, pou nou pa kléré jé nou sou lòt madanm oubyin lòt mari,

pou nou pa bay mari-a oubyin madanm nan lokazion mandé divòs. Sé nan kléré jé sou Bétsabé-a, madanm Uri-a, ki fè David té tonbé pou li-a, jous li fè adiltè avèk li-a, épi li fè touyé mari-a, pou-l té kapab pran madanm nan pou li-a (2 Sam 11-12). Sé nan kléré jé sou Jozèf, ki fè madanm Putifa té tonbé pou li, jous li éséyé fè adiltè avèk li; lè-l pa réyisi, li fè mété-l nan prizon (Gn 39,7-20). Sé pou nou pran tèt nou, pou nou pa kléré jé nou sou lòt, pou nou pa tonbé nan adiltè. Pito nou raché jé sa-a (Mt 5,29) tankou Sin Pòl mandé pou ouété mové lévin-an k-ap gaté tout pat la (1 Cor 5,6.13.5). Sé pou nou évité divòs, sé pou tout fanmi kapab viv nan bòn antant, pou lédikasion pitit yo.

Nan dézièm pati lévanjil 27^e dimanch òdinè B-a (Mc 10,13-16), Jézu béni **ti moun yo**, li anbrasé yo, li mandé Apot yo pou yo pa répousé yo, pou yo kite yo vi-n jouinn li, sé pou moun ki sanblé yo péyi Bondié ki Roua-a yé. Nan fanmi yo, ti moun yo gin plas yo. Gin anpil fason pou répousé ti moun yo. Gin yon fason ki téréb, sé lè yo répousé-l anvan-l gin tan ouè limiè solèy la minm; sa-a sé yon krim; ti moun nan pa-t mandé fèt; anvan-l fèt, yo jété-l. Sé pa aksion sa yo ki kapab fè fanmiy yo viv nan bòn antant. Ti moun nan, sé li minm k-ap sové nou pi ta. Dépi lavi-a parèt, sé pou Bondié li yé. Li té mèt nan vant, li pa pou nou; nou pa kapab kréyé lavi; sé pou nou respékté lavi-a. Gin moun k-ap chèché plézi sèlman nan mariaj; sé pa sa ki kapab fè mariaj sa-a diré; yo pa vlé pitit la; époutan pitit sa-a sé li minm ki tankou yon siman k-ap simanté dé blòck ròch yo mari-a ak madanm nan réprésanté-a; otréman dé blòck ròch sa yo ap tonbé, yo pap janm rété ansanm. Gin anpil mouayin y-ap chèché mété pou yo triché nan mariaj la, soua ak pilil, soua ak stérilè, soua ak opérasion, soua ak dòt métòd ki pa an règ avèk diréksion légliz. Mòd jan lavi mariaj sa yo pa sanblé ditou ak sa Granmèt la di-a, lè-l t-ap kréyé moun nan: "Fè pitit, vi-n anpil, plin tè-a, mété-l sou lòd nou" (Gn 1,28). Gin anpil moun ki t-a vlé gin pitit, yo pa kapab, gin dòt minm k-ap gaspiyé jèm lavi-a Bondié ba yo a. Si sé plézi sèlman y-ap chèché, mésié-a ak madanm nan, youn konsidéré lòt tankou yon plat manjé oubyin yon jouèt. Vré rinmin-an dépasé mòd plézi sa yo; li akòdé dé nanm yo ansanm tankou dé instriman mizik k-ap bay minm son. Bondié pa mété gason ak fi pou yo viv tankou bèt; min si-l mété madanm nan kot mésié-a, sé pou-l sèvi-l tankou èd ki sanblé ak li (Gn 2,20-24). Okinn bèt pa-t kapab pran ròl sa-a (Gn 2,18-20). Madanm nan pa yon bèt-chaj mari-a gin doua maltrété jan-l vlé, sakajé-l kon-l vlé, ranvouayé-l lè-l vlé. Mésié-a pa yon jouèt madanm nan gin doua réfizé-l jan-l vlé, fè kapris avè-l lè-l vlé, fè-l filalang jan-l vlé.

Madanm nan sé yon flè délika; sé poussa Sin Pòl di mari yo sé pou yo rinmin madanm nan tankou pròp kò yo, jan Jézu-Kri rinmin légliz la (Ep 5,25-33). Konsa tou mari yo pa gin doua ranvouayé madanm yo, paské Jézu-Kri pa ranvouayé légliz la. Épi madanm nan doué obéyi mari-a, pa palé anpil nan tèt li, voyé pouint ba li, jous pou fè-l pati kité kay la (Col 3,18-21). Légliz la dosil nan min Jézu-Kri; mariaj la sé yon sakrèman ki gran, ki konsékan, li gin aplikasion nan rélasyon Jézu-Kri ak légliz la, rélasyon sa-a ki pap janm kasé; konsa yo pa gin doua joué ak yon bagay ki si tèlman sérié. Madanm nan doué fè atansyon pou-l pa éksité mari-a, pou-l pa ba-l lokasion déréspékté-l. Sin Piè di (1 P 3,1-7): mari-a doué gin délikatès pou madanm nan (1 P 3,7), madanm nan li minm tou doué konsidéré mari-a avèk réspè, pou gras a konduit li li chanjé konpòtman mari-a (1 p. 3,1). Sé pa rét ap mét périk, braslè lò, bèl rad byin plaké, ki fè yon madanm bèl; sé sou pa anndan kè-a pou toualèt la fèt, antan-l tou dou, tou kalm, sé sa ki gin valè dévan Bondié (1 P 3,3-4). Liv Ékléziastik la di pou madanm yo pa rét ap fè jalouzi (Si 25,13; 26,7,25), pou yo pa méchan (Si 25,21; 26,9-12). Sé nan sans sa-a tou liv Provèb la di pou gason yo fè atansyon médam yo k-ap fè yo tonbé-a (Pr 7,5-27). Mariaj sé bagay sérié; yo pa joué ak sa; David kité mové atirans li trinnin-l nan adiltè avèk Bétsabé madanm sòlda-l la yo té rélé Uri-a. David fè jous li touyé mari-a pou-l kapab pran madanm nan. Granmèt la fè-l répròch, li pini-l (2 Sm 11-12). David régrèt, Bondié padonnin-l. Si mari-a ak madanm nan té kapab antann yo pou youn padonnin lòt, pou afè yo pa bézouin rivé nan lari, pou yo lavé rad sal yo anndan lakay la minm, sou tè-a pa t-ap gin tròp problèm; yo fi-n marié, piga yo chèché divòs. Tankou Adan té andòmi pou Bondié té pran kòt li, pou-l té fè madanm nan (Gn 2,21), konsa Jézu-Kri andòmi sou lakoua-a, nan somèy lanmò-a, lè yo pèsé kòt li-a, san ak dlo sòti, sign sakrèman yo; sé la légliz la soti, kòm madanm Jézu-Kri (Jn 19,34).

Yo marié kòt a kòt, yo travay kòt a kòt, yo soufri kòt a kòt, jous nan sièl kòt a kòt. Si youn chèché konprann lòt, jan Kris la té vi-n montré nou, sou tè-a pa t-ap gin tròp problèm. Anpil moun pa konnin ki sa sa yé rinmin, poutèt yo nan plézi ansanm, yo di sa sé rinmin, poutan sé pa sa. Ala chans pou moun k-ap viv sou kont Granmèt la, k-ap réglé chémin-l sou rout Granmèt la trasé. Sé marié, marié, marié, sé marié Bondié mété.

*

Mariaj sé prémié sakrèman, li rémonté dépi nan lakréasion (Gn 2, 18-24). Prémié bagay lévanjil la rakonté, sé mariaj la Trè Sint Vièj ak Sin Jozèf (Mt 1,18-25). Prémié mirak Jézu fè sé nan nòs Kana (Jn 2,1-11). Mariaj sé sign kontra Bondié ak Pèp li (cf Kantik dè kantik). Sin Pòl di sé sign rinmin

Jézu-Kri ginyin pou légliz li (Ep 5,11-33), li signin kontra mariaj la ak san-l sou Koua-a, jou Vandrédi-Sin-an. Yo pa doué joué ak sakréman sa-a ki gran-an (Ep 5,32). Mésié-a ak madanm nan, youn pa doué konsidéré lòt tankou yon pè soulié y-ap éséyé, yo chanjé lè yo vlé. Nan pouin okinn ka koté légliz pèmèt divòs. Sé pou yo réfléchi byin anvan yo marié.

*

Mariaj sé sign sakré rélation Jézu-Kri ginyin avèk légliz (Ep 5,23-33). Sé dé moun ki asosié ansanm pou yo fè **yon sèl kò** épi **yo pa kapab séparé** (cf Canon 1056). Konsantman yo fi-n bay la, sé yon akt volonté koté mésié-a ak madanm nan pasé yon kontra yo pa kapab kasé, antan youn rinmèt tèt li bay lòt, épi li résévoua lòt la tou (Canon 1057,2). Sé sa mariaj la. Pou yon ti krik, yon ti krak, moun yo konn ap mandé divòs. Sa pa anilé mariaj la pou sa. Sa égzijé pou moun yo réfléchi byin anvan yo aksépté marié. Rézon ki fè youn marié avèk yon lòt, yo doué pézé sa lontan. Sèké gin rézon ki pa rézisté, paské yo pa sérié. Lajan, bèl figi, rélation, tou sa kapab fosé balans la, lè yon moun gin pou chouazi yon lòt, pou fè rout avèk li pandan tout lavi. Sé pou sa yo fè préparasion mariaj, ki kapab diré pandan yon bon moman-tan, pou moun yo pa maché sou "si-m té konnin".

Nan préparasion mariaj sa yo, yo montré moun yo sa-k kapab anpéché yon mariaj fèt, parégzanp:

- si mésié-a pa ko gin 16 an épi madanm nan pa ko gin 14 an. Limit laj sa-a sé pou tout péyi, min nan chak péyi group Évèk yo kapab mété limit laj la pi ro (Canon 1083).
- si mésié oubyin madanm nan pa kapab antré nan rélation yon fason nòmral (Canon 1084).
- si youn nan moun yo té déja marié épi mari-a oubyin madanm nan vivan toujou (Canon 1085).
- si youn batizé nan légliz katolik, épi lòt la pa batizé (Canon 1056).
- si mésié-a Évèk, Pè oubyin Diak (Canon 1087).
- si youn nan dé yo déja fè vé piblik pèpétuèl nan kominoté rélijijéz (Canon 1088).
- Si mésié-a sézi madanm nan oubyin li kinbé-l pou-l kapab fòsé-l marié avèk li (Canon 1089).

- si mésié-a touyé mari fi-a li vlé marié avèk li-a oubyin si-l touyé pròp madanm pa-l pou-l marié ak tèl fi; nan lòt sans la tou si fi-a touyé madanm mésié-a li vlé marié avèk li-a, oubyin si-l touyé pròp mari pa-l pou-l kapab marié avèk tèl lòt mésié (Canon 1090).
- si mésié-a ak madanm nan sé papa ak pitit, gran-papa ak pitit-pitit; gran-papa-papa ak pitit-pitit-pitit...; oubyin manman ak pitit, grann ak pitit-pitit, gran-grann ak pitit-pitit-pitit...; oubyin tou si sé frè ak sè, tonton ak niès, tant ak névé, kouzin jèmin ak kouzi-n jèmèn (Canon 1091).
- si fi-a sé pitit oubyin manman madanm mésié-a, épi madanm sa-a mouri, oubyin si mésié-a sé pitit oubyin papa mari fi-a épi mari sa-a mouri (Canon 1092).
- si mésié-a gin frè-l ki té marié ak fi-a nan yon mariaj ki pa vo épi yo té abité ansanm, oubyin si fi-a gin sè-l ki té marié ak mésié-a nan yon mariaj ki pa vo épi yo té abité ansanm; oubyin tou si mésié-a gin frè-l ki plasé ak fi-a oubyin si fi-a gin sè-l ki plasé ak mésié-a (Canon 1093).
- si mésié-a sé pitit adoptif fi-a oubyin pitit pitit adoptif li; si fi-a sé pitit adoptif mésié-a oubyin pitit pitit adoptif li; oubyin si mésié-a sé pitit adoptif papa oubyin manman fi-a; oubyin si fi-a sé pitit adoptif papa oubyin manman mésié-a (Canon 1094).

An déyò ka sa yo ak lòt ka anpéchman ki ginyin tou (Canon 1095ss; 1108ss; 1124ss), yon foua mariaj la fi-n fèt épi dé moun yo abité ansanm avèk rélasion nòmral, yo pa kapab défèt li (Canon 1141), sof lanmò youn nan dé yo. Gin sikonstans ki pèmèt pou dé moun yo viv yo chak bò pa yo (Canon 1151ss), sèlman yo blijé fè atasion édikasion ak souin ti moun yo. Tout fason yo pa doué bliyé mariaj la fèt pou mésié-a ak madanm nan rét ansanm pandan tout lavi yo, épi pou yo fè pitit (Canon 1096). Sé konsa fanmiy nan ap édé sosiété-a ak tout légliz la dévlo pé. Nan nòs Kana Jézu fè premié mirak li, gras a la Trè Sint Vièj Mari ki di-l yo pa gin divin (Jn 2,1-11). N-ap rinmèt li tout fanmiy yo, pou nou kinbé bon divin-an jous nan bout (Jn 2,10). L-ap kalmé tout ti kont nou yo.

*

* *

VINSÉTIÈM DIMANCH ÒDINÈ C

Si nou gin lafoua tankou yon grinn séuvé... yon ti grinn séuvé, li grosè yon ti pousié, sé tankou pousiè priz tabak an poud, tèlman li piti. Époutan lè-l pousé, li bay yon bèl ti pié boua ki kapab monté rotè yon ti pié bouapin, atèl pouin zouazo nan sièl yo vi-n fè nich ladan-l. Épòk Profèt Abakik t-ap viv la, sé té yon épòk ki té troublé anpil. Gro nasion yo t-ap fè profitè sou ti piti yo. Sé konsa Asiri té fi-n pran pié sou tout ti péyi yo ki té environnin-l yo, tankou yon gro pouason k-ap manjé ti piti. Profèt Abakik rélé kot Granmèt la, pou-l mandé-l jous kilè bagay sa-a ap diré konsa. Abakik préché ant 605 ak 597, yon ti kras aprè Naoum, nan épòk Profèt Jérémi.

Avèk Profèt Jérémi, avèk Jòb, avèk Koélet, sé problèm Mal la ki préokipé-l. Li pa konprann fason Bondié ap dirijé tè-a. Sé tankou sé yon kriz lafoua ki pran-l (Ha 1,1-13). Bondié réponn li l-ap préparé laviktoua Jistis la k-ap gin dènié mo-a, min Bondié mandé-l pou-l ba-l lafoua-l ki gin pèsévérans (Na 2,1-4). Sé konsa Sin Pòl ap ékri lèt Romin yo tankou yon dévlopman pansé Abakik la, antan li anonsé sijè-a avèk lajistis ak lafoua. Jistis sou bò Bondié, lafoua sou bò lézòm. "Jistis Bondié-a dévoualé-l sot nan lafoua al nan lafoua" (Rom 1,17; Ga 3,11; He 10,38). Lè Abakik fi-n plinyin dévan Bondié (Ha 1,2-4), Bondié réponn li yon premié foua (Ha 1,5-11); min Abakik rékòmansé plinyin ankò (Ha 1,12-17); Bondié réponn li pou dézièm foua-a (Ha 2,1-4), sé la li mandé-l pèsévérans la: "Moun kòrèk la sé ak lafoua-a li viv" (Ha 2,4). Premié foua-a sé osijè injistis ak mové tretman péyi Asiri ap fè pèp yo pasé. Bondié réponn li sé difé pay; koulié-a ou ouè-l monté disèt rotè, min yon ti moman apré sa, ou-ap gadé, ou pap ouè tras li ankò, sé sann ak pousiè k-ap rété nan tout grandizè l-ap fè yo. Réyéلمان vré, kèk tan aprè, Asiri tonbé. Min lòt péyi-a ki krazé-l la, li minm tou li rékòmansé ap fè profitè sou lòt yo olié li ba yo indépandans yo, sé Babilòn. Sé pousa Abakik rékòmansé plinyin ankò (Ha 1,12-17). Foua sa-a Granmèt la répliké-l pou-l ékri vizion-an sou galèt ròch yon koté pou yo ouè-l, pou-l pa éfasé. Lè vizion-an ap réalizé, y-a rékonèt sé Granmèt la li minm k-ap kòmandé nan péyi-l la, minm si-l bay inpréson li pa sou sa, li sanblé kité moun yo fè sa yo vlé. Konsa Abakik rélé yon premié foua (Ha 1,2-4), Bondié réponn yon premié foua (Ha 1,5-11). Abakik rélé yon dézièm foua (Ha 1,12-17), Bondié réponn yon dézièm foua (Ha 2,1-4). Sé premié rèl Abakik la (Ha 1,2-4) ak dézièm répons Granmèt la (Ha2,1-4), Litiji 27èm dimanch òdinè C-a pran soulignin mèsaj LAFOUA li mandé pou nou réfléchi sou li-a. Sé mèsaj sa-a minm lévanjil la ap déklaré-a nan Sin Luk (Lc 17,5-10), pou 27èm dimanch la.

Vizion-an louin toujou, min l-ap parèt alafin, li pap tronpé; si-l fè réta, sé pou yo tann li, paské l-ap vini sètèman, li pap mizé. Moun ki kòrèk la, sé nan lafoua-l l-ap viv. Périòd Abakik t-ap préché-a té troublé anpil, ant 605 ak 597: dé dat ki raplé dé évènman térib pou pèp Israèl la. Prèmié dat la (605) raplé Nabikodono-zò ap pran posésion péyi Israèl la. Dézièm dat la (597) fè sonjé kijan Nabikodono-zò té egzilé pèp Israèl la. Pou prèmié dat la (605), Nabikodono-zò, roua Babilòn, ataké Asiri, an 609. Lè Faraon Éjip la, Néko II, ouè sa, malgré Asiri sé té lénmi Éjip lontan, l-ap chèché kijan pou-l frinnin pouvoua Nabikodono-zò, l-ap éséyé pou-l al poté Asiri sékou. Min pou-l sòti Éjip pou-l rivé Asiri, li blijé pasé nan péyi Israèl. Lè sa-a sé roua Jozias ki t-ap kòmandé nan Israèl, sé li minm yo té konsidéré kòm pi bon roua nan istoua pèp Israèl la, li minm avèk roua David épi roua Ézékias. Faraon Éjip la, Néko II, mandé-l doua pasaj sou tiritoua-l la, pou-l monté al rankontré Nabikodono-zò, pou-l anpéché-l désann pi ba. Min Jozias réfizé ba-l pasé. Li touyé Jozias Mégido, nan kouloua bò mòn Karmèl la (2 R 23,20). Tout pèp la kriyé sou Jozias. Jérémi fè yo chanté dèy pou li yo rélé Lamatasion. Zakari ap prédi gran dèy Mési k-ap soufri-mouri-a antan li fè sonjé lanmò Jozias la, li di: "Y-ap fiksé jé yo sou sila-a yo té pèsé-a" (Za 12,10; cf Jn 19,37). Roua Jozias mouri an 609. Évènman sa-a troublé pèp la anpil. Kòman yon si bon roua tankou Jozias rivé jouinn yon lanmò konsa, li minm ki té fè réfòm rélijion ak politik Pèp la, dépi yo té fi-n jouinn liv Détéronòm nan nan tanp la an 622, li té démoli tout vié lotèl zidòl, li té anilé tout sèvis prèt zidòl yo t-ap fè, li té réfè fontière tout péyi-a tankou sou tan David, li té révòlté kont Asiri ki t-ap kinbé pèp la an ésklavaj épi ki t-ap fè-l sèvi zidòl. Li té fè pèp la rénouvélé kontra-a avèk Granmèt la yon fason ofisièl. Ata Jérémi té ba-l yon kout min nan réfòm li-a nan kòmansman. Pouki-sa yon si bon roua jouinn yon lanmò konsa? Sé sou li yo té konté pou-l té réfè pozision pèp la tankou lontan. Sé yon késion konsa patizan Émayus yo ap pozé Jézu sou rout la, nan asouè dimanch Pak la, san yo pa konnin si sé Jézu k-ap maché nan mitan yo. Jézu ap éspliké yo sans soufrans la. Sé pa yon gouvènman krazé-brizé li vi-n instalé jan Apot yo ap mandé-l jou lasansion-an ankò (Lc 24,13-35; Ac 1,6-8). LagLoua-a pasé nan lakoua-a. Sé avèk jé lafoua pou nou ouè limière Pak la nan fènoua Vandrédi-Sin-an. Pou sa, nou gin pou nou fiksé jé nou sou figi Bondié, pou limière-l kléré fon kè nou, pou-l fè nou dékouvri sans évènman yo jous nan rasi-n yo, an konfòmité avèk volonté Bondié ki pi fò pasé tout bagay. Lè tan-an rivé, Bondié aji vit (Is 60,22). Konsa, lè Jozias fi-n mouri an 609, sé Éjip ki kòmandé sou Israèl. Faraon Éjip la, Néko II, mété moun li vlé kòm roua (Éliakim-Joyakim nan plas Chalum, dézièm pitit Jozias la ki té gin doua pou-l vi-n roua-a). Sé lè sa-a Nabukodono-zò, roua Babilòn nan, rékòmansé

ataké Èjip an 605 sé batay Karkémich la (Jer 46,20-21). Nabukodonozò ranpòtè laviktoua sou Èjip. Li pran péyi Israèl la pou li. Li fèk kòmansé ap fè-l pasé mizè, joutan an 597, l-ap ataké Jérusalèm karéman (Jer 22,18-19), li sézi roua Joakim-Jékonias (2 R 24,10-16), li égzilé-l avèk yon bon pòsion poplasyon-an (Ézékièl té nan pami égzilé yo tou probabléman). Min épòk Abakik ap préché-a, sé yon épòk ki noua kon dékou, san zétoual, san lali-n, gro minuit ap sonnin. Yo pa ouè dévan ni déyè, yo pa konnin ki koté ki nan-nò, ki koté ki nan-sid.

Lafoua mandé pou maché kan minm. Limiè-a sé anndan fènoua-a l-ap kléré. Zétoual la k-ap dirijé roua Maj yo, li étinn lè yo antré Jérusalèm. Sé lè yo aksépté plonjé nan lannuit la, pou kont yo ankò, san yo pa bézouin asirans roua Èròd ni présizion profésé labib yo, sé lè sa-a zétoual la ki jalou otorité-l la ap rékòmansé kléré pou yo (Mt 2,9). Nou pa doué plinyin sou kè lèzòm. pou éspliké sitiasion nou; sé kot Bondié pou nou plinyin sò nou. L-ap éspliké nou kijan pou nou maché nan lafoua, sou chémin ki pa trasé, paské sé li minm minm k-ap kondui batiman-an, minm si l-ap dòmi nan plas gouvènay la (Mc 4,38). Sé lafoua sa yé. Sé mèsaj lévanjil 27èm dimanch òdinè C-a, sé mèsaj tout dimanch la. Sé yon jou pou nou li liv Profèt Abakik la nan ékléraj sa-a, l-ap palé anpil ak kè nou, l-ap raplé nou tout mèsaj Lèt Sin Pòl pou Romin yo, l-ap réponn problèm nou nan silans rinmin Bondié ki sèvi lafoua nou kòm baz; paské sé sou rinmin Bondié lafoua nou chita.

Asiri t-ap krazé pèp yo, Babilòn vi-n krazé-l pa lintèmédiè roua Nabikidonozò (Ha 1,2-4). Babilòn li minm tou ap krazé pèp yo, min l-ap jouinn roua Pès yo ak Mèd yo, Sirius k-ap mét yon finisman nan ajisman-l yo (Is 40ss). Sé Sirius k-ap délivré Pèp Israèl, k-ap fè-l tounin sot légzil. Sé vizion sa-a Profèt Abakik té gin pou-l ékri sou galèt ròch la, pou-l invité pèp la pou-l gin lafoua. Pran dévan pa anyin, sé konn larout ki tout. Trò présé pa fè jou louvri. Bout kòd rété vouayaj, byin pré pa lakay. Lafoua-a minm fè nou déjà rivé anvan nou gin tan pati, paské sé avaloua promès yo li yé, sé garanti byin nou pa ouè yo (He 11,1; Ha 1,12-17; 2,1-4).

Tan yo fi-n bout, promès la akonpli; min gin dèyè, sé li minm n-ap rét tann, Paradi-a sé nan noua n-ap viv li. Réyèlman vré, lè Pèp Israèl pati kité Babilòn, lè-l tounin sot nan légzil, li té konprann tout bagay fi-n rivé, tankou Apot yo ap konprann jou lasansion-an: "Èské sé nan tan sa-a ou-ap instalé péyi roua-a nan Israèl?" (Ac 1,6). Sé pa sa di tou. Lè nou ranpòtè laviktoua sou injistis, lè nou amélioré yon sitiasion sosial, ékonomik, politik, sé yon premié pa, sé yon sign, min sé pa paradi-a nou instalé pou sa. Paradi-a sé nan yon lòt nivo li yé. Sa-k té jinnin-l nan, nou débloké-l. Min sa pa vlé di pou nou dòmi sou dé zòrèy nou. Nou pa doué instalé, nou doué gadé

dévan toujou, maché pi louin, jan chanté-a di-a: "Va plus loin...; le voyage est à peine commencé...; même si tu te crois arrivé, va plus loin...; et la route est encore longue vers la fraternité et l'horizon de l'amitié..."; N-ap mandé Manman Mari pou-l ban ou lafoua ki nan kè-l la, pou nou aprann maché nan fènoua nan diréksion limiè-a, malgré tout bariè k-ap jinnin mach nou.

Liv Profèt Abakuk la gin kòm toua pati: yon "De profundis" (Ha 1,1-2,5), yon "Dies irae": (Ha 2,6-20), yon "Te Deum" (Ha 3,1-19). Sé "De profundis" la (Ha 1,1-2,5) ki sèvi 27èm diamnch òdinè C-a, pou nou kalkilé sou mèsaj lafoua-a, avèk dé plint li yo (Ha 1,2-4.12-17) épi dé répons Granmèt la (Ha 1,5-11; 2,1-5). Li t-a bon pou nou li rèz liv la tou, ni dézièm pati-a (Dies irae-a: Ha 2,6-20), koté Profèt la lansé sink madichon kont: moun ki anvi profité yo (Ha 2,6b-8), sa k-ap ranmasé richès gras a linjistis yo (Ha 2,9-11), politik britalité-a (Ha 2,12-14), méchansté nan lagé-a (Ha 2,15-17), sévis ziddòl (Ha 2,18-20); ni touazièm pati-a (Te Deum nan: Ha 3,1-17) koté Profèt la lapriyé (Ha 3,2), li ouè Granmèt la (Ha 3,3-7), li montré kijan Granmèt la ap ranpòté viktoua sou viktoua (Ha 3, 8-15), li bay léson sou krint Bondié ak lafoua (Ha 3, 16-19).

Avèk Profèt Abakik, nou kapab mandé nou poukisa Bondié fèmin jè-l sou Mal la (Ha 1,2 = Jer 22,13-19) antan li kité Asiri ap krazé pèp yo, laloua-a ap fi-n mouri (Ha 1, 4 = Mi 7.2-3; Is 59,14). Granmèt la ap réponn li sé Mèt Istoua-a (Ha 1,5 = Is 5,12; 20,21; 29,25). Kaldéyin yo sé instriman k-ap sèvi kòz Jistis li, minm si yo pa kon sa. Min nou pa janm satisfè répons Granmèt la. Fò nou fouyé zo nan kalalou, fò nou konn dénié ti sékrè Granmèt la, pou nou kapab alèz. Babilonyin yo, ki sèvi instriman vanjans li, yo ba yo pòt, yo mandé fènèt. Yo fè plis égzaksion ankò pasé lòt pèp la yo fi-n chasé-a (Ha 1,12 = Jer 12,6). Granmèt la pa fatigé réponn nou. L-ap satisfè kèsion nou-an (Ha 2,1). Li bay vizion-an (Ha 2,2), li fè ékri-l (cf Is 30,8; 8,1), pou yo kapab fè "konsta" (Is 55,10-11), paské paròl li pap tounin jouinn li san rézilta, san-l pa réalizé sa-l té vlé-a, san-l pa akonpli mision-l. Sé nou minm ki pou tann nan lafoua (Ha 2,4 = Ex 17,12; 2 R 12,16; R 1,17; Ga 3,11; He 10,38). Nou mèt déjà kòmansé chanté "Te Deum" nan davans (Ha 3,1) pou di mèsì, paské Granmèt la di lè nou mandé Bondié yon bagay, sé pou nou asiré nou déjà ginyin-l, épi l-ap rivé vré pou nou. Alò nou di mèsì davans. Bondié pap kité nou gaspiyé mèsì nou-an konsa. Li ouè nou tèlman gin konfians, l-ap ba nou sa nou mandé-l la, li pap fè nou tann tròp, minm yon ti avaloua l-ap ba nou toujou, pou tan-an pa parèt trò long pou nou (Lc 11,5,14).

Tout istoua k-ap déroulè-a, sé istoua délivrans la (Ha 3,2-7). Sé minm Bondié légzòd la k-ap minnin tout bagay dapré volonté-l, sé nan min-l tout souf moun yé, minm sa k-ap pran pòz yo sé otorité yo, époutan sé Bondié ki sèl otorité (Ps 2). Sé otorité-l ki ba nou sans istoua-a. Sé nan lafoua pou nou dékouvri sa. Bondié gin pou-l parèt abiyé an limiè (Ha 3,3; cf Dt 33,2-26; Jg 5,4.5.20; Ps 68,29). Réyon limiè-a ap sòti nan min-l (Ha 3,4 cf Ex 34,29.30.35). Sé lagras k-ap simin konsa sou nou, pandan nou nan fènoua-a.

Nan Méday Mirakiléz la, nou ouè nan min la Trè Sint Vièj Mari gin réyon limiè k-ap sòti pou yo anvayi tout tè-a, antan li sé Médiatris tout gras (cf Ha 3,4). Pouvoua Jézu-Kri-a, li patisipé ladan-l (cf Lumen Gentium 60-62; Redemptoris Mater 38-41). N-ap mandé-l pou-l fè nou pran abitid chanté Magnifikat li-a souvan, pou nou di Bondié mèsi davans; avèk lafoua li déjà ba nou sa nou mandé-l nan sékrè kè nou, san nou pa minm konnin kijan pou nou mandé-l, atèl pouin sé léspri Sin-an k-ap plinn kot Bondié pou nou nan yon langaj ki dépasé kapasité intéljans nou (Rom 8,26). Si nou gin lafoua grosè yon ti grinn sénvé n-ap jouinn anpil lagras. La Trè Sint Vièj Mari konblé avèk lagras (Lc 1,28), li plin ak lafoua (Lc 1,45,38) "la justice de Dieu (grâce) se révèle de la foi à la foi, selon qu'il est écrit: le juste (grâce) vit de la foi" (Rom 1,17).

*

27èm dimanch òdinè C-a ba nou lansègnman sou lafoua. Minm si-l tou piti, grosè yon ti grinn "sénvé", li gin doua déplasé mòn (Lc 17,5-10). Sèké moun ki korèk la, l-ap viv gras a lafoua (Ha 1,2-3; 2,2-4), minm si Bondié sanblé li mizé pou-l réponn lapriyé nou. Psòm répons la (Ps 94-95) mandé pou nou pa fèmin kè nou, sé la-a lafoua-a chita; lafoua sé tankou yon antèn ki pèmèt nou touché Bondié, kapté mèsaj li. Konsa nou pa doué fèmin kè nou; sé pou-l louvri; sé lafoua ki pòt kè-a. Lafoua apuiyé sou Paròl Granmèt la k-ap diré pou tou tan (1 p. 1,25).

*

Ni lévanjil 27èm dimanch òdinè C-a (Lc 17,5-10), ni prémié léktu-a (Ha 1,2-3; 2,2-4) palé nou sou lafoua. Lafoua, sé yon kalité ki dépasé posibilité natu nou. Sé Bondié li minm ki mété-l nan nanm nou. Posibilité sa-a Bondié ba nou-an, li mandé nou pou nou fè-l ajj, pou-l donnin frui. Dépi nan batèm, nou gin lafoua, léspérans ak lacharité. Yo tankou sémans nan tè. Yo gin pou yo grandi, pou yo dévlopé, pou yo bay rézilta. Sé nan aktivité sa yo nou jouinn mérit nou. Lafoua sé nannan bagay n-ap éspéré yo, sé konviksion bagay nou pa ouè yo, dapré sa lèt Ébré yo di nou-an (He 11,1).

Lèt sa-a montré nou modèl zansèt nou yo nan lafoua-a, k-ap défilé dévan jé nou tankou nan yon prosésion: Abèl (He 11,4), k-ap palé toujou nan kado li ofri yo, malgré li mouri-a; Ênòk (He 11,5), ki vòltijé bariè lanmò paské-l fè Bondié plézi ak lafoua-l; Noé (He 11,17), ki résévoua avètisman Bondié pou-l sovè lavi-l, gras a lafoua-l; Abraam (He 11,8), ki pati san-l pa konnin ki koté Bondié ap dirijé-l; Izaak, Jakòb (He 11,9), ki suiv minm tras la; Sara (He 11,11), ki jouinn posibilité anfanté malgré li pa-t kapab fè pitit épi li té vié granmoun. Yo tout kondui tèt yo tankou étranjé ak vouayajè sou tè-a (He 11,13), antan y-ap déplasé nan diréksion yon lòt péyi (He 11,14), san yo pa viré gadé dèyè (He 11,15), pou yo pa gin lidé tounin (He 11,6), tankou pèp Israèl nan dézè-a (Ex 16,3; 17,3; Ps 95,8), ki t-ap chèche Granmèt la kont antan l-ap mandé-l fè kat volonté-l. Paròl ak kopòtman kont lafoua fè Bondié lapinn. Sé nan lafoua li jouinn plézi li (He 11,6). Jozèf (He, 11,22), Moyiz (He 11,23), Raab (He 11,31), Jédéyon (He 11,32), Barak, Sanson, Jéfté, David, Samuèl, Profèt yo (ib), Mati yo (He 11,33ss), sé lafoua ki té sèvi limiè k-ap kléré rout yo nan lannuit la. Lafoua lansyin Téstaman-an ak Nouvo Téstaman-an sé minm lafoua-a. Lansyin Téstaman t-ap tann promès la. Nouvo Téstaman-an jouinn li réalizé nan Jézu Kri ki lévé vivan sot nan pami mò yo. Sé garanti, sé baz pou nou viv lavi sièl la dépi sou tè-a.

Lévanjil 27èm dimanch òdinè C-a montré nou yon bèl lapriyé Apot yo fè, antan yo di: "Mèt, mèt plis lafoua nan nou!" (Lc 17,5). Répons Jézu bay la invité nou réfléchi; li réponn yo: lafoua, sé pa yon késion kantité, sé yon késion KALITÉ, sé yon késion konviksion, sé yon késion asirans. Sèké li konparé lafoua ak yon ti grinn "sénévé". Li di sa kont pou nou déplasé mòn (Lc 17,6). Sé yon kalité ki déplasé posibilité natu nou. Lè Apot yo té fè dout dévan tanpèt la, Jézu té révéyé, li té di yo: "Pouki sa nou fè dout la, nou apuiyé yon fason trò fèb sou lafoua nou" (Mt 8,26: "oligopistoi" ὀλιγόπιστοι. Lafoua-a mèt piti tankou yon ti grinn "sénévé" (Lc 17,6), sé pou nou apuiyé ak tout fòs nou sou li (Mt 8,26). Sé sa-a minm ki fè Bondié plézi-a, li montré sé sou li nou konté, nou konnin rézulta k-ap sòti-a, sé pa nan nou li jouinn sous li (Mt 14,16). Moun maladi lalèp la proche kot Jézu ak lafoua, li géri la minm (Mt 8,2s). Kapitèn Romin-an pa minm kité Jézu al lakay li. Li di-l ak yon sèl mo li konnin li kapab géri sèvitè-l la. Jézu déklaré li pa janm ouè yon kalité lafoua konsa minm nan Israèl (Mt 8,10) "tosautèn pistin" τὸσαύτην πίστιν. Lafoua sé yon kalité. Sé pa yon késion kantité. Apot yo té di: "Mèt plis lafoua nan nou!". Jézu di sé pa sa. Nou déjà ginyin kont sa nou bézouin. Sé nou minm ki pou apuiyé sou li. Si gin yon bariè, sé nan nou sa soti, sé pa nan Bondié. Nou bézouin lodas.

La Trè Sint Vièj té di sèvan yo: "Ninpòt ki sa-l li di nou, sé pou nou fè-l" (Jn 2,5), malgré Jézu té fi-n réponn li: "Sa-k gin ant mouin minm ak ou minm, Madanm, lè-m pa ko rivé?" (Jn 2,4). Madanm ki t-ap pèdi san dépi douzan-an, sé ak lafoua-l li proché, li touché rad Jézu, li géri la minm (Mc 5,28s). Jézu fè-l konpliman dévan tout moun pou bèl jès sa-a (Mc 5,34). Jézu profité pou-l invité Jayir mét lafoua nan li, pou pitit fi-l la kapab lévé vivan (Mc 5,36 "kouè sèlman!": "monòn pisteue" μόνον πίστευε. Lè Sin Piè ap maché sou dlo-a pou-l al rankontré Jézu-a, li rivé yon moman, li pè, li kòmansé fonsé, li rélé osékou; Jézu lonjé min, li sézi-l, li mandé-l pou kisa li fè dout, li pa apuiyé asé sou lafoua-l (Mt 14,31 "oligopisté" ὀλιγόπιστε). Jézu abitué ésyé lafoua nou, pou oblijé nou apuiyé pi fèm sou li, jan-l fè pou Siroféniyé nan k-ap mandé pou-l géri pitit fi-l la ki gin yon léspri pa pròp ki kinbé-l la. Nan yon premié tan, Jézu pa okipé-l (Mt 15,23). Nan yon dézièm tan li di sé pou pitit Israèl yo voyé-l (Mt 15,24). Nan yon touazièm tan, li di yo pa kapab pran pin ti pitit kay yo pou yo voyé jété bay chyin (Mt 15, 26). Min dévan insistans madanm nan ki di "chyin yo abitué manjé mièt ki tonbé sot sou tab la" (Mt 15,27), Jézu di-l: "lafoua-ou gran, madanm" (Mt 15,28 "mégale sou hè pistis" μεγάλη σου ή πίστις. Nan pouin anyin nou mandé Bondié li pap ba nou-l, si nou mandé-l ak lafoua. Min lafoua doué gin pèsévérans. Li doué gin andirans, li doué gin rézistans, paské Bondié kapab pa ba nou sa nou mandé-l la minm lè-a, li kapab fè nou tann, jan premié léktu lanmès 27èm dimanch òdinè C-a déklaré nou nan liv profèt Abakuk la (Ha 2,3). Bondié kapab pa réponn nou nan sans nou té mandé-l la tou. Sa-l ba nou-an kapab fè nou pran désépsion. Profèt Abakuk té plinyin koté-l dévan mové trétman Asiryin yo t-ap fè pèp li-a sibi. Bondié réponn li, antan-l voyé yon lòt pèp pou pini Asiryin yo: sé Babilònyin yo. Min Abakuk pa satisfè, paské Babilonyin yo yo minm tou yo fè pèp la pasé mizè. Abakuk rékòmansé plinyin ankò. Bondié réponn li ankò: foua sa-a li di-l pran pasians; sa-l mandé-a ap réalizé, min tan-an pa ko rivé. Sé nan lafoua pou tann li (Ha 2,3-4). Rès chapit Abakuk yo montré kijan Jézu kinbé paròl li.

Sé konsa liv Abakik la gin sa yo t-a kapab rélé

- a) "De profundis" (Ha 1,1-2,4)
- b) "Dies irae" (Ha 2,5-20)
- a') "Te Deum" (Ha 3,1-19).

Nou mèt nan fon anba tè-a, n-ap rélé osékou: «De profundis»
 Sé pou nou asiré jou Granmèt la ap vini: "Dies irae"
 pou davans nou déjà di-l mès, antan n-ap chanté laviktoua avèk LAFOUA
 nan yon "TE DEUM"

N-ap mandé Manman Mari pou-l ba nou lafoua-l, ki pa ouè, ki pa gouté, ki pa santi, jan Sin Loui-Mari Monfò di-a, pou nou mandé avèk asirans, malgré sé nan fènoua.

*

* *

VINTUITIÈM DIMANCH ÒDINÈ A

Pandan kat dimanch (25^{èm}, 26^{èm}, 27^{èm}, 28^{èm}, dimanch òdinè A), Sin Matié palé nou osijè éritaj péyi koté Bondié Roua-a k-ap soti nan min Juif yo pou-l al nan min payin yo. Nan 25^{èm} dimanch la, sé parabòl travayè yo ki rivé an dènié yo, vè sinkè lapré midi sèlman, épi ki touché minm pri avèk sa-k t-ap travay dépi granmatin yo (Mt 20,1-16). Sé payin yo ki rivé an dènié épi ki gin minm éritaj avèk Juif yo; Juif yo fè jalouzi, yo fè kòlè, yo méprizé pri travay la. Nan 26^{èm} dimanch la, sé dé pitit gason yo papa-a voyé nan travay la; prémié-a di li papralé, min apré sa li régrèt, l-alé; dézièm nan di l-apralé min li pa fè yon pa (Mt 21,28-32). Sa-k régrèt la, ki chanjé konduit la, sé koléktè yo ak fi movèz vi yo (Mt 21,23), k-ap rivé nan péyi koté Bondié Roua-a anvan Farizyin yo, ki di oui nan bouch (Mt 7,21) min ki pa minm aksépté batèm Jan-Batis la. Nan 27^{èm} dimanch la, sé parabòl jadin rézin-an mèt la loué bay jéran yo (Mt 21,33-43); chak foua li voyé chèché frui ladan-l, sé kont, sé batay. Lè sé éritié-a minm ki rivé, yo touyé-l pou yo jouinn éritaj la. Mèt jadin-an ap ouété jadin-an nan min yo pou-l bay dèt moun k-ap fè-l rapoté pou li. Éritaj la ap soti nan min Juif yo, pou-l al nan min payin yo. Nan 28^{èm} dimanch la, sé nòs la roua-a fè pou pitit li-a (Mt 22,1-14). Invité yo réfizé vini. Sé tout moun nan lari yo ranmasé pou plin sal la. Gin insistans sou mo "**tout**" la, tankou nan prémié léktu lamès 28^{èm} dimanch òdinè A-a (Is 25,6-9), sé pou **tout** pèp yo Granmèt la ap préparé résépsion sou mòn li-an. Juif yo réfizé inviasion-an, sé tout pèp yo ki résévoua-l. Lévanjil la di yo ranmasé **tout** moun, bon kon mové, tankou sinn nan ki ranmasé **tout** kalité pouason. Apré sa, yo chita sou bò lanmè-a, yo triyé yo, pou yo pran sa-k bon, pou yo jété sa-k mové yo (Mt 13,47-48). Sé konsa tou nan lévanjil 28^{èm} dimanch òdinè A-a yo réjé sa-k pa-t gin rad nòs la. Sé **tout** moun yo rélé, min ginyin ki pa mérité antré nan sal nòs la. Rad nòs la, sé lagras k-ap pèmèt nou proché sou tab résépsion Granmèt la. N-ap mandé Manman Mari, jan nou abitué chanté-a, pou-l abiyé nou ak rad Jézu, pou-l véyé sou rad la, tankou Rébéka fè pou Jakòb la, pou nou pa sal li, pou si-l sal ak gro péché, pou-l lavé-l pou nou, pou-l pa kite nou proché sou tab kominion-an avèk gro péché nan konsians nou, pou nou pa fè sakrilèj pou yo pa jété nou nan difé lanfè, nan fènoua déyò yo, koté ki gin rèl ak manjé dan.

Sé pou nou fè atansyon tou pou nou fidèl rét ap kouté voua Bondié k-ap rélé nou, k-ap invité nou, k-ap voyé mèsaj ba nou, pa lintèmediè sèvitè-l yo. Nou pa doué fèmin kè nou, nou pa doué réfizé inviasion-l nan, nou pa doué rét instalé nan aktivité pa nou, sa nou déja fi-n fè program pou li-a.

Rélation avèk Bondié toujou déranjé plan nou fi-n bati davans. Sé pou nou gin asé sinplisité pou nou obéyi-l. Sé pou byin nou. Nou pa doué fè tankou Épouz Kantik dè kantik la ki fi-n kouché, ki réfizé lévé al louvri pou mésié-a k-ap frapé nan nuit la, ak nan sérin lapli-a, joutan mésié-a viré do-l al fè rout li (Ct 5,2-8; Ap 3,20; Is 50,20; 65,12; 66,4; Pr 1,24.32; Jer 7,13; Jn 12,36b).

Pitit ki té pati kité papa-l la, pou-l al joui éritaj li-a lòt koté-a, lè-l tounin, Papa-a résévoua-l byin, min gran frè-a fè kòlè, li viré do-l, li pa dakò pou papa-a fè kè-l sansib pou sa-k té pèdi-a (Lc 15,11-32). Sé sa Juif yo pa konprann: lajè kè Bondié. Y-ap réglé tout bagay avèk règ jisitit la ki byin méziré séré-séré, pou pa kité yon santimèt lonn toual la gaspiyé. Yo pa konprann Bondié sé Rinmin k-ap débòdé. Sé mantalité yo minm ki pou chanjé, pou kè yo louvri, pou mèsaj Bondié-a antré tout bon vré, pou-l bay lavi yo yon nouvo orientasyon. Lè Sin Pòl té konn ap préché mision, li té konn al nan kay réyinion Juif yo anvan. Lè yo pa kouté-l, li viré do, li souké pousiè anba pié-l, l-al nan diréksion payin yo (Ac 13,46). Sé konsign sa-a minm Jézu té bay Apot yo (Mt 10,14). Li té bay sign sou sa dépi nan premié prèch li té fè Nazarèt la, atèl pouin Juif yo té pousé-l déyò lavil la, pou yo jété-l sou falèz la (Lc 4,30). Li pasé nan mitan yo, l-al fè rout li. Li té déklaré nan pouin profèt yo byin résévoua nan péyi-l (Lc 4,24). N-ap mandé Manman Mari pou-l ba nou sans légliz, pou nou dépasé ti konsidérasion ki pa débouché byin louin, pou nou gadé lòt bò frontiè ti limit péyi nou ak préokipasion nou.

*

* *

VINTUITIÈM DIMANCH ÒDINÈ B

Nan lévanjil 28^e dimanch òdinè B-a (Mc 10,17-30), gin dé pati: premié pati-a konséné jénòm rich la (Mc 10,17-22); dézièm pati-a konséné patizan Jézu yo (Mc 10,23-30).

Nan premié pati-a (jénòm rich la = Mc 10,17-22), nou ouè ti jénòm nan byin vif, an mouvman, tankou nan sinéma; li kouri mét ajénou dévan Jézu, jis lè Jézu dérapé pou-l pati. Épi sé lè sa-a li pozé-l késion sou sa-l gin pou-l fè pou-l rivé éritié péyi Roua sièl la. Li bay Jézu bèl tit: "Bon Mèt". Jézu minm ap tésté-l pou-l konnin ki degré lafoua-l. Èské li rékonèt li kòm Bondié pou-l ap rélé-l konsa. Nan répons Jézu-a, li sité yon pasaj Détéronòm tout moun konnin kòm laloua-a (Dt 5,16-20; cf Dt 24,14; Ex 20,12-16). Sé dis kòmandman yo. Min jénòm nan vlé plis toujou. Li di: bagay sa yo, li fi-n pasé yo déja; li bezouin chanjé klas. Époutan pasaj Jézu sité-a, sé sa ki pi inpòtan pou Juif yo: li kòmansé avèk "Kouté, Israèl..." (Dt 5,1). Yo té rélé-l nan non ébré-a: "Chema, Israèl", minm jan ak sa tout Juif té blijé résité chak jou-a, ékri sou pòt kay li-a, sou bando nan fron-l nan (Dt 6,4). Ti jénòm nan vlé plis. Li santi sa pa kont li. Jézu ouè bòn volonté-l. Sé poua Jézu fiksé jé-l sou li, li rinmin-l (Mc 10,21). Sèlman Jézu kòmansé fè-l ouè gin yon bagay ki manké. Si-l aksépté rékonèt li manké kichòy, l-ap kapab fè progrè. Otréman, gin yon nivo li pap kapab travèsé. Li gin pou-l vann sa-l ginyin, pou-l bay pòv yo, pou-l kapab gin richès la k-ap tann li nan sièl la, épi pou-l suiv Jézu. Sa-a, sé zo pouason-an. Jénòm nan pati, l-al fè rout li byin tris, paské li té trò rich.

Yo pa kapab antré nan sièl ak byin latè, jan Psòm nan di-a (Ps 49,18). Premié kominoté-a té mété byin yo ansanm pou yo séparé antré yo (Ac 2,41-45). Banabé fè bèl jès nan sans sa-a (Ac 4,36-37).

Min lè Apot yo t-ap maché nan mision avèk Jézu, li té di yo sé pòv yo pou yo bay valè-a épi pou yo suiv li dé min vid, lib, bra balan, san yo pa ankonbré ak anyin k-ap jinnin yo. Sin Monfò té suiv konsèy sa-a nèt; lè-l kité lakay li, premié pòv li jouinn nan, li vidé bous lajan-l ba li; dézièm pòv la, li troké bèl réchanj li ak vié rad chiré pòv la; li fè tankou Sin Fransoua dasiz, li di: apati kouliè-a, mouin kapab di: Papa mouin ki nan sièl la. Sin Fransoua dasiz té fè jès sa-a lè-l té fi-n tandé lévanjil la ki mandé pou vann tou sa-l ginyin pou-l bay pòv, pou-l suiv Jézu; minm jan sa té rivé Sint-Antoua-n "du désert". Minm lè-a, li kité tout éritaj li, li pati al préché dé min vid. Li fè fanmiy rélijyé Fransiskin ak Klaris. Sin Mak (Mc 10,22) di jénòm nan vi-n tris, mi-n li défréchi, li pati tèt bésé, lè-l tandé égzijans Jézu mandé-a, paské li té trò rich. Gin moun, y-ap dakò avèk Jézu sou tout

bagay, min sou pouin sa-a sé tankou gin yon grinn sab nan angrénaj la. Lajan sé yon bon sèvitè, min sé yon mové mèt. Moun yo gin mòd yo di: chémin lajan pa gin pikan. Yo toujou souaf lajan. Jézu di: fè zanmi ak lajan malonèt la, pou lè-l manké nou, yo résévoua nou nan joupa k-ap diré tout tan yo nan sièl la (Lc 16,9).

Nan dézièm pati-a (patizan Jézu yo: Mc 10,23-30), Jézu kòm vlopé patizan-l yo avèk fason li gadé yo (Mc 10,23,27). Ni nan kòmansman (Mc 10,23) ni nan finisman (Mc 10,27), li fikse jé-l sou yo, minm jan li té fikse jé-l sou jénòm nan (Mc 10,21). Li té rinmin-l. Jézu tiré léson pou patizan-l yo: kijan sa difisil pou yon rich antré nan péyi Roua Sièl la. Sa fè sonjé parabolò mové rich la ak pòv Laza-a (Lc 16,19-30). Lè tou lé dé mouri, sé pòv la k-al nan sièl, mové rich la tonbé nan lanfè. Richès li té trò lou. Li pa-t fè zanmi ak lajan malonèt la. Lè jijman-an, li tandé Jézu di-l: "Mouin té grangou, ou pa-t ban-m manjé; mouin té souaf, ou pa-t ban-m bouè" (Mt 25,35). L-ap blijé ralé kò-l sot dévan fas Granmèt la (Mt 26,41; 7,23). Patizan yo rété vlopé nan limiè jé Jézu ki pozé sou yo dépi kòmansman (Mc 10,23) jouskalafin (Mc 10,27). Jénòm rich la minm, li pati tou tris. Jézu té pozé jé sou li nan kòmansman (Mc 10,21); min li kité prézans Jézu, li pati, li pa kinbé bon divin-an jouskalafin (cf Jn 2,10).

Prémié léktu 28^e dimanch B-a (Sg 7,7-11) montré kijan Salomon lapriyé pou-l mandé lasajès ki fè-l ouè koté vré valè lavi-a yé: "Dévan léspri Sajès la, mouin konsidéré richès la kòm anyin..., lajan-an sé tankou labou... Avèk Sajès la sé tout byin yo ki vi-n pou mouin..., yon richès yo pa kapab kalkilé" (Sg 7,8). Psòm-répons la (Ps 89/90) fè nou kalkilé sou vérité sa-a. Li mandé Bondié pou-l aprann nou byin konté tan n-ap viv la, pou nou anplouyé-l byin avèk sajès, pou nou pa pèdi tan ap travay pou bagay k-ap pasé sèlman, ki pap diré (cf Jn 6,27). Nan lèt Ébré-a (He 4,12-13 = dézièm léktu 28^e dimanch òdinè B-a), paròl Bondié-a ap jijé tout fon kè nou, nou gin pou rann li kont. Nou t-a souété li di nou: "Mouin té grangou, nou té ban-m manjé; mouin té souaf, nou ban-m bouè" (Mt 25,35). "Fè zanmi avèk lajan malonèt la, pou lè-l vi-n manké nou nou rivé jouinn plas k-ap diré tout tan nan sièl la" (Lc 16,9).

Jézu di moun ki pa rénonse tou sa-l ginyin, li pa kapab vi-n tounin patizan-l (Lc 14,33). Sé tankou lè moun ap bati kay oubyin lè yon roua vlé al nan lagè, li kòmansé chita pou-l kalkilé (Lc 14,23-33). Nan sans sa-a, li rénonse sa-l ginyin anba min-l, pou-l al dèyè yon byin ki pi louin, ki pi gran. Jézu di pèsòn pa kapab sèvi Bondié ansanm ak lajan (Lc 16,13). Mésié-a ki té vi-n koté Jézu pou réglé éritaj li-a, Jézu té ranvouyé-l antan-l montré-l kijan gin yon byin sipériè (Lc 12,13-21). Jézu di-l pèsòn pa mété-l pou-l réglé késion

éritaj ak pataj. Sé lè sa-a Jézu profité ba-l léson sou fason yo doué trété richès latè. Sé pa richès yo k-ap asiré lavi nou (Lc 12,15). Mésié-a ki té pozé kè-l sou richès li yo, apré rékòlt jadin-l nan, nan nuit la minm li fi-n asiré tout byin-l yo, li mouri. Yo jijé-l, li pèdi tout bagay. Jézu mandé pou fè Bondié konfians pou késion sa-a, paské nou vo plis pasé pié flè yo ak zouazo yo (Lc 12,22-32). Li mandé pou nou pa voras. Gin moun ki pa janm gin asé lajan. Y-ap bati kay sou kay. Y-ap fè lajan fè pil sou pil. Yo doué fè atansion, mété frin nan machi-n nan k-ap désann nan mòn nan ak tout vitès la, pou-l al tonbé nan falèz la. Sin Pòl di: rinmin lajan sé minm bagay ak sèvis zidòl. Li di rasi-n tout malè sé rinmin lajan (1 Tm 6,10). Li di moun yo ki vlé ranmasé richès yo, yo tonbé nan yon pakèt pièj ak lanbision ki pa gin sans, k-ap lagé yo nan trou, k-ap plonjé lézòm nan dézas (1 Tm 6,9). Kondision pou suiv Jézu sé rénonnman. Jézu pa gin koté pou-l pozé tèt li (Lc 9,58).

*

Prémié prèch Jézu fè nan kay-réyinion Nazarèt la, li di léspri Bondié pozé sou li, sé avèk li li sakré-l, li voyé-l poté Bòn Nouvèl la bay **pòv yo** (Lc 4,18). Li bay dé égzanp pòv: youn ki pa-t minm gin yon ti moso pin lakay li, sé yon ti priz fari-n ki té rété-l ak dé toua ti gout luil, li t-apral kasé dé ti branch boua nan rajé-a pou-l fè galèt ak ti rèz fari-n nan pou li minm ak ti piti li; épi sa-l ginyin-an, li bay Profèt Éli ki té mandé-l (Lc 4,25-26; cf 1 R 17,1-16); lòt la, sé té yon jénéral, ki té gin maladi lalèp, li kité péyi-l, li rénonné pròp volonté-l, li rabésé tèt li tankou yon pòv, li obéyi lòd Profèt Élizé pou-l al binyin sèt foua nan lariviè Joudin-an; li ofri Profèt la lajan ak richès li, min Profèt la pa aksépté. Jès li té fi-n fè-a té kont pou plasé-l nan pami pòv Granmèt yo (Lc 4,27; cf 2 R 5,1-27).

Prémié prèch Jézu fè sou mòn nan, li déklaré sé chans pou moun ki pòv parapò a léspri-a, paské péyi koté Bondié Roua-a, sé pou yo li yé (Mt 5,3). Lè jénòm nan té vlé suiv li, li déklaré-l davans li pa gin koté pou-l pozé tèt li, pandan minm zouazo gin nich yo, réna gin trou ròch pou yo rété (Lc 9,57-58). Li minm ki té rich, li vi-n tounin pòv, pou-l fè nou vi-n rich ak sa-l ouété sot nan min-l nan (2 Co 8,9). Sé sou pay li fèt, pa-t gin plas pou li nan lotèl (Lc 2,7). Kado manman-l ak papa-l prezanté pou li, lè yo t-ap ofri-l nan Tanp la, sé kado pòv (Lc 2,24; cf Lv 12,8). Époutan sièl ak tè-a pou li (2 Sam 7,5-7; 1 R 8,27; Is 66,1; Ac 7,49); min sé modèl li trasé pou nou. Li voyé Apot yo san sak, ni bous, ni lajan, ni pin, ni rad pou chanjé, tankou pòv ak pèlrin, moun k-ap pasé, ki pa gin koté pou yo instalé (Lc 9,3; 10,4), pou yo fè moun yo konprann sou tè sa-a sé sou rout nou yé, nan diréksion sièl la.

Sé pou rézon sa-a jénòm nan ki vlé vi-n sin-an, li kòmansé mandé-l rénonse tout byin-l, pou-l bay pòv yo, pou-l suiv li sou rout ki minnin nan sièl la (Mc 10,17ss). Sé bay pòv yo Jézu voyé patizan-l yo pou sèvi-l témouin. Sé nòmral pou yo alé kòm pòv. Sé pa ak richès nou nou kapab fè pòv yo chanjé konduit. Si yo suiv lidé nou poutèt avantaj n-ap ba yo pou lavi tè sa-a, sé pa lafoua ki sous chanjman sa-a, sé intéré. Lè sous la tari, y-ap fè pròp chemin pa yo. Sé poussa dayè Jézu pa-t cho pou-l fè mirak lè moun yo pa-t ko gin lafoua, pou yo pa suiv li poutèt intéré. Sé yon pièj ki toujou ap kontinué ménase misionè yo: chèché fè bann avèk mouayin ki fè moun yo konprann sé nou minm k-ap amélioré lavi yo sou tè-a. Yon foua nou kòmansé glisé nan pièj sa-a, li pa fasil pou nou sòti. Sé yon falèz n-ap désann. Tounin grinpé-a pi difisil. Glisé désann nan pa gin frin. Y-ap bat bravo pou nou fasil, toutotan n-ap ofri avantaj matérièl. Nou minm nou pri nan fil aringnin-an, nou pa ouè dèt mouayin pou nou kinbé popilarité nou. N-ap kontinué fè bann, gonflé foul patizan, joutan, yon lè, blad la éklaté, yo ouè sé van ki té gin ladan-l. Sèké chemin sa-a, sé yon toubiyon, l-ap ba nou vètij. Nou vi-n tounin tankou yon pay k-ap viré fòl nan gran van. Nou bliyé rasi-n lévanjil la ak tout égzijans li. Si nou li-l, nou fèmin jé nou sou pasaj ki piké konsians nou-an. Nou intèprété-l nan fason pa nou. Sé nou minm ki pozé-l késion. Nou pa kite-l pozé nou késion. Nou pran dévan ak paròl anpil, pou nou pa fè silans, kouté méssaj Granmèt la ak répròch li. N-ap kouri monté-désann sot nan projè al nan projè. Nou pa pran tan pou nou chita, pou nou kalkilé ki sa-k pi nésésè. Sa-k parèt dévan jé nou-an, sé li nou konprann ki gin premié plas. Sé kòmsi nou fè yon lòt lévanjil ki kontrè ak lévanjil Granmèt la; sé yon lévanjil ki "revu et corrigé...". Sin Pòl ba nou avètisman sévè, lè l-ap palé ak misionè Korint yo, li di yo si y-ap bati sou lò, sou lajan, sou bijou, sou boua, sou pay, lè Jou-a rivé, l-ap fè ouè sou ki vid travay nou-an té pozé. Y-ap éséyé-l nan difé; si-l pa rézisté, y-ap mandé nou kont tankou sé nan difé y-ap fè nou pasé, paské sé yon sèl Fondasion ki ginyin, sé Jézu-Kri (1 Co 3,10-15). Premié kominoté-a té suiv modèl Jézu-Kri té trasé pou li. Pèsòn pa-t konsidéré anyin kòm byin pa-l, pou-l gonflé kè-l an fas lòt yo. Okontrè chak moun vann propriété-l, yo pot lajan-an vi-n dépozé nan pié Apot yo. Apot yo séparé bay chak moun sèlon nésésité ki prezanté (Ac 4,32-37). Anani ak Safir bay moso sèlman nan lajan pa yo-a. Pinision-an tonbé sou yo la minm (Ac 5,1-11).

Jézu mandé nou pou nou rénonse byin nou. Sé pou nou kapab vi-n pi zanmi avèk Papa-l, avèk li minm, avèk léspri Sin-an (Mt 5,3). Sé pou nou kapab viv tankou frè ak sè, tankou moun ki nan minm fanmiy (Ac 4,32-37). Sé pou nou kapab pi lib pou nou anonsé Bòn Nouvèl la bay pòv yo (Lc 10,4).

Sé pou nou kapab sèvi témouin péyi koté Bondié Roua-a déja rivé sou tè sa-a (Mc 10,17-30; 1 Co 7,29-31). Sé kat dimansion yo ta kapab rélé: dimansion "mystique", dimansion "communautaire", dimansion "apostolique", dimansion "eschatologique".

N-ap mandé Manman Mari pou nou aksépté kité mèsaj lévanjil la pozé nou késion, froté konsians nou, foubi-l, pou ouété larouy ki fè klé pòt sièl la gin difikilté pou-l louvri séri ki fèmin kè nou-an. Sèké Paròl Bondié-a sé yon kouto dé bò k-ap antré jous nan fin-fon nanm nou, jous nan jouinti ak mouèl, l-ap jijé intansion ak pansé ki nan kè. Pèsòn pa chapé anba min-l, tout bagay aklè dévan-l, jé-l fikse sou yo, nou gin kont pou nou rann li, jan Lèt Ébré-a di nou nan dézièm léktu lanmès 28^e dimanch òdinè B-a (He 4,12-13). Konpòtman Jézu mandé nou-an, sé yon konduit Sajès. Richès, bijou, lò ak lajan pa anyin dévan Sajès sa-a, jan premié léktu lamès 28^e dimanch òdinè B-a déklaré-a (Sag 7,7-11). Sé sab ak labou (Sag 7,9). Avèk Sajès sa-a sé richès yo pa kapab kalkilé k-ap rivé sou nou (Sag 7,11). Sé pou nou aprann konté, aprann kalkilé koté inpòtans la yé, dapré sa Psòm-répons la di nou-an (Ps 89/90,12-17). Mésié-a ki té gin tèlman richès li pa-t konn koté pou-l té mété yo-a, li té vlé krazé dépo-l, li té desidé bati yon pi gran kay pou-l séré yo. Min nan nuit la minm li té blijé parèt dévan Bondié pou-l rann kont sou fason li té sèvi ak byin yo Bondié té ba li-a (Lc 12,13-21). Jézu di nou pou nou pa kité kè nou troublé antan n-ap kalkilé ki sa n-ap manjé, ki sa n-ap bouè, ki rad n-ap mété; Bondié Papa-a okipé zouazo yo, li abiyé flè yo. Nou gin plis inpòtans dévan jé-l pasé yo (Lc 12,22-31). Nou blijé rénonse tout byin nou pou nou maché avèk Granmèt la sou rout sièl la (Lc 14,28-33). Sèké koté richès nou yé-a, sé la kè nou ap yé tou (Lc 12,33-34). Li mandé nou pou nou fè zanmi, antan nou sèvi avèk lajan sa-a ki bon sèvitè-a min ki mové mèt la (Lc 16,1-15). Li montré nou kijan mové rich la ap boulé nan lanfè, pandan pòv maléré Laza-a ap joui nan sièl la (Lc 16, 19-31). Li di nou résévoua gratis, sé pou nou bay gratis (Mt 10,8; 2 Co 11,7; 1 Co 9,18; Nb 4,11-19). Géazi, sèvitè Élizé-a, pa-t suiv modèl Profèt la té trasé ba li sou pouin sa-a. Li té fè Naaman ba-l lajan. Chatiman-an tonbé sou li minm lè-a. Maladi lalèp Naaman-an kolé sou po-l (2 R 5,20-27). Jézu voyé nou tankou pòv bay pòv. N-ap mandé la Trè Sint Vièj Mari, "la Vierge des Pauvres", pou-l fè nou pran konsign sa-a osérié.

*

Détachman sé **SAJÈS**. Lévanjil 28^e dimanch òdinè B-a montré rout Sajès sa-a, antan-l trasé kondision pou gin trézò nan sièl la. Sé nan konvèsasion Jézu-Kri avèk jénòm rich la. Trézò sa-a, liv lasajès la di sé li minm minm ki lasajès la, sa vlé di sé Bondié li minm minm (Sg 7,8-9.11). Premié léktu-a

di: "Tout byin yo rivé avèk Sajès la, yon richès yo pa kapab kalkilé (Sg 7,11). Sé poua tout lò sou tè-a, sé tankou yon ponyin sab dévan-l, lajan sé tankou labou dévan-l; bò koté-l richès pa anyin, bijou pa kapab konparé avèk li. Sèlman sé pa tout moun Bondié mandé détachman spésial sa-a, jan-l mandé jénòm rich la nan lévanjil la. Gin moun li chouazi spésialman pou sa, pou yo sèvi Pitit li-a témouin yon fason apa, tankou rélijyé yo, rélijyèz yo, moua-n yo, monial yo, moun ki nan institi rélijyé yo avèk dèt institi ak asosiasion ki gin kondision sa-a nan règléman yo. Dévan lòt moun yo, yo sèvi tankou yon pankat k-ap montré rout Sièl la, jan Sin Pòl di Korintyin yo: Tan-an kout; figi sièk tan sa-a, sé pasé l-ap pasé; sé poua moun k-ap achté, sé pou yo fè kòm si yo pa posédé (1 Co 7,29-31). Antan n-ap gadé moun ki fè vé povreté, ki kite tout byin yo t-a kapab posédé, sa invité nou sonjé richès Sièl la, koté nou gin pou nou alé yon jou-a. Moun sa yo résévoua yon apèl spésial. Sé yon "don" Bondié fè yo. Yo rélé sa "charisme". Minm Bondié ki rélé-a, sé li minm minm ki ba yo fòs pou réponn. Dézièm léktu 28^e dimanch òdinè B-a di nou kijan Paròl Bondié-a vivan, li ènèjik, li filé, li antré jous nan fon kè, jous nan jouinti, jous nan moual (He 4,12ss). Pèsòn pa gin fòs pou réponn apèl Bondié-a, si sé pa Bondié li minm ki ba-l fòs sa-a, antan-l rélé-l la minm. Sé poua Jézu di: "Pèsòn pa kapab vi-n jouinn mouin, si Papa-m ki voyé-m nan pa atiré-l" (Jn 6,44). Paròl Bondié gin yon fòs ki atiré nou. Profèt Amòs di: "Lion-an pousé rèl, ki moun ki pap tranblé? Granmèt la palé, ki moun ki kapab rézisté transmèt paròl li?" (Am 3,8). Antan Jézu rélé nou, li ba nou fòs pou nou suiv li. Jénòm nan nan lévanjil la gadé dèyè. Li ézité. Époutan si-l té pozé jès lafoua, li té suiv Jézu, li t-ap jouinn fòs chak jou pou-l viv détachman-an. Époutan li té gin bòn volonté, puiské sé li minm ki fè démach la vi-n mandé Jézu ki kondision li bézouin ranpli pou-l antré nan péyi koté Bondié Roua-a. Lè Jézu prezanté-l kòmandman yo, li di dépi-l piti l-ap obsèvé yo. Li vlé fè pi plis pasé sa. Chémin **kòmandman** yo pa kont li. Sé chémin òdinè. Li vlé suiv chémin konsèy yo, chémin éstraòdinè. Malérézman, li bité dévan kondision-an: détachman total, sa Sin Jan-d-la-Koua rélé "nada"-a, "rien, rien, rien rien". Li di gin sink foua "anyin" sou rout la, koté n-ap monté sou mòn Kamèl la, pou nou rankontré Granmèt la sou rotè-a. Plis n-ap monté pi pré-l, sé plis pou nou vidé tèt nou, sé plis pou nou débarasé kò nou, sé plis n-ap rankontré anyin, paské Bondié li minm sé tout bagay, fò nou vidé tèt nou nèt pou nou posédé-l (cf. Je veux voir Dieu p. 601). Sa-a, sé sa yo rélé "**la voie des conseils**". Sé pa tout moun Bondié rélé ladan-l. Li rélé tout moun nan "la voie des **commandements**", sa jénòm nan di li té obsèvé depi-l tou piti-a. "La voie des conseils" la, sé "la voie de la **perfection**". Jézu di-l: "Si tu veux être **parfait**". Si ou vlé vi-n kòrèk nèt, vann tou sa-ou ginyin,

bay pòv yo, ou-a gin yon trézò nan sièl la. Sa vlé di dépi sou tè sa-a ou-ap viv yon fason pou-ou montré lòt moun yo Sièl la déjà désann sou tè-a. Sé ouè sèlman yo pa ouè-l avèk jé yo. É sé poua minm ou vlé montré yo li. Konsa gin kèk moun Jézu chouazi pou sa, pou orienté rout lòt yo. Nou gin pou lapriyé yon fason spésial pou yo, pou sign sa-a Jézu trasé yo-a, yo kinbé-l byin, pou yo pa gadé dèyè, minm si yo pa ouè sa y-ap réglé. Jézu té di: réna yo gin trou ròch yo, zouazo sièl yo gin nich yo; min li minm li pa gin koté pou-l pozé tèt li (Lc 9,58; cf Gn 28,11). Sé nan trou ròch Manman-l la Trè Sint Vièj Mari té anfanté-l (Lc 2,7). Sé yon pè toutrèl la Trè Sint Vièj Mari ak Sin Jozèf té ofri lè yo t-ap prezanté-l nan Tanp la, ofrann pòv yo, yo pa-t gin dékoua pou yo achte mouton-an (Lc 2,24; cf Lv 12,8). Sé kon pòv, étranjé, égzilé, yo pati avè-l Éjip (Mt 2,13ss). Sé kòm pòv, anba min léspri Sin-an, Jézu pot Bòn Nouvèl la bay pòv yo (Lc 4,18). Sé kòm pòv li voyé Apot li yo nan mision yo, san sak, san lajan, san anyin ki pou t-a anbarasé yo (Lc 10, 3-4) avèk soua-dizan asirans, pou tout koté yo pasé yo déklaré "Péyi koté Bondié Roua-a, li rivé" (Lc 10,9).

N-ap mandé Manman Mari fòs sa-a pou nou détaché ak tou sa nou kolé tròp sou yo, pou nou sèvi Jézu témouin li la, li sé sèl richès nou, li anrichi nou ak povreté-l, antan-l kite lakay Papa-l pou-l vi-n viv ak nou (2 Co 8,9; Jn 3,13), tankou nou (He 4,15), pou-l minnin nou al joui éritaj Sièl la. Sin Fransoua dasiz té tandé lévanjil sa-a yon dimanch, li obéyi-l la minm, tankou Sint-Antoua-n "du désert"; li kite tout richès li; li vi-n viv **pòv**. Sa té pèmèt li vi-n gin anpil **charité** ak anpil **kè kontan**. Povreté-a, charité-a, kè kontan-an, yo alé ansanm. Povreté Pitit Bondié-a, Charité Bondié Papa-a, Kè kontan Bondié léspri Sin-an. Nou bay richès nou pou nou viv pòv, pou nou fè lacharité. Sa fè nou dégajé, nou vi-n gin libètè ki fè kè nou kontan. Jénòm lévanjil la té vi-n tou tris, li té chagrin, li pa-t kapab gin kè kontan, li té manké lokazion fè lacharité, lacharité-a ki réalisé tout kòmandman yo, ki t-a fè-l gin "perfection"-an. "Perfectae caritatis", "la charité parfaite". Sin Pòl di Korintyin yo: "Dieu aime qui donne avec joie" (2 Cor 9,7; Pr 22,8 LXX). N-ap mandé Manman Mari pou nou gin yon "**pauvreté charitable et joyeuse**", tankou li minm ki "pauvre", ki "charitable", ki "joyeuse". Li "pauvre", li di: "Mouin sé Sèvant Granmèt la" (Lc 1,38); "Granmèt la voyé jé sou Sèvant li ki pòv" (Lc 1,48). Li "charitable", l-al édé kouzi-n li Élizabèt (Lc 1,39ss); li okipé moun yo ki pa-t gin divin nan nòs Kana-a (Jn 2,3). Li "joyeuse". Li chanté Magnifikat li (Lc 1,46-55). "Pauvreté, charité, joie". "Pauvreté" Pitit Bondié-a, "Charité" Bondié Papa-a, "Joie" Bondié léspri Sin-an.

* * *

VINTUITIÈM DIMANCH ÒDINÈ C

Vintuitièm dimanch òdinè C-a fè nou sonjé "action de grâce". Sé Samaritin-an sèl ki tounin vi-n di Jézu mèsi poutèt maladi lalèp li Jézu ouété sot sou li-a (Lc 17, 11- 19), malgré yo tou lè dis té géri. Lòt yo al fè rout yo, san yo pa tounin vi-n di Jézu mèsi. Naaman tou, yon étranjé, yon Siryin, té tounin vi-n di Profèt Élizé mèsi pou maldi lalèp la li té ouété sot sou li-a (2 R 5, 14-17= premié léktu). Li té pran ata tè péyi Israèl la pou-l té poté lakay li tankou rélik pou-l ofri sakrifis rémèsiman bay Granmèt la. Psòm répons la (Ps 97/98) mandé pou bat bravo, pou fè konpliman pou Granmèt la. Sin Pòl di nou nan tout sikonstans sé pou nou di Bondié mèsi (1 Th 5, 18 = Alélouya). Avan nou rétounin lakay, ansanm avèk tout frè nou yo, nou vlé pran tan pou nou di ou mèsi. Lè n-ap sonjé paròl chanté sa-a, nou pap kouri trò vit aprè lamès la al fè rout nou, san nou pa pran tan di Bondié yon ti mèsi. Gin moun k-ap chanté kantik sa-a nan bouch yo san yo pa fè atansyon sans paròl yo, paské pandan y-ap chanté-l minm y-ap soti nan légliz la; yo pa pran tan vré pou yo di Granmèt la mèsi. N-ap sonjé lapriyé la Trè Sint Vièj la: Magnifikat la. Nou t-a doué di-l aprè chak mès.

*

Lalèp sé sign péché (Ps 51, 9). Gérizon Jézu fè-a, li montré davans kijan li vini pou délivré nou sot anba pouvoua maladi péché-a k-ap manjé nou-an. Pou sa, sé li minm ki pran lalèp la sou li (Jn 19, 29). Tout moun abandoné-l (Lc 23, 49). Yo voualé fas yo dévan-l (Is 53, 3). Réyèlman vré, moun ki gin maladi lalèp yo pa-t gin doua antré nan vil la. Sé byin louin yo kanpé pou yo mandé Jézu pran pitié pou yo (Lc 17, 12). Lapriyé yo fè-a (Lc 17, 13), sé chak foua lamès apral kòmansé nou répété-l: " Granmèt, pitié pou nou". Premié kondision pou yon malad jouinn santé, sé pou-l rékonèt li malad, pou-l déklaré doktè-a sa. Avan Moyiz proché kot flanm difé k-ap boulé nan rajé Sinayi-a, li blijé ouété sapat nan pié-l, li voualé figi-l (Ex 3, 5-6). Lè Bondié ap pasé kot Moyiz, li bouché jé Moyiz (Ex 33, 22). Lè-l parèt dévan Éli, Profèt la mét manto-l sou figi-l (1 R 19, 13). Lè-l prezanté dévan Izayi, Izayi rékonèt li sé péchè, yon Anj nétouayé-l avèk yon chabon difé li pozé sou bouch li (Is 6, 5-6).

Pap Pie XII té di: " Péché sièk sa-a, sèkè li pèdi sans péché-a". Dépi nou rékonèt nou sé péchè, nou mandé padon, Bondié padonnin nou nan kè sansib li. Sèlman nou gin tandans ap éskizé pròp tèt nou. Péché nou nan boutèy noua, péché lòt yo nan boutèy blan (Mt 7, 3). Adan té éskizé tèt li. Sé pa-t fòt li, sé té fòt Èv. Èv minm pran éskizé tèt li tou. Sé pa li minm, sé sèpan-an ki tronpé-l (Gn 3, 12- 13). Époutan lè nap résisté "Dévan Bondié

ki gin tout pouvoua"-a, nou di: "Sé fot mouin, sé fot mouin, sé fot mouin vré". Sé pa yon sèl foua nou di-l. Nou répété-l toua foua, tankou "Granmèt, pitié pou nou"-an, paské chif toua-a sé yon fason pou déklaré yon bayag gran anpil, anpil, anpil. Minm jan péché-a gran anpil la, konsa Bondié sin anpil. Nan "Santcus" la, nou di toua foua tou: "Sé ou ki sin, sé ou ki sin, sé ou ki sin tout bon" (Is 6, 4). Otan Bondié sin, otan nou minm nou péchè. Otan nou di "sé fot mouin, sé fot mouin, sé fot mouin vré", otan nou di "sé ou ki sin, sé ou ki sin, sé ou ki sin tout bon". Min sa pa yon okazion pou nou dékourajé dévan distans ki séparé nou ak Bondié-a. Okontrè, sé lè sa-a pou nou gin plis konfians antan nou di, ansanm ak moun ki gin maladi lalèp yo, ansanm ak tout moun ki paré pou kòmansé lamès yo; Granmèt, pitié pou nou; Jézu-Kri, pitié pou nou; Granmèt, pitié pou nou".

Moun maladi lalèp yo proché vi-n rankontré Jézu. Lè n-apral fè lakonfésion, sé yon demach lafoua nou fè, antan nou proché vi-n rankontré Jézu li minm; nou konnin sé li minm k-ap palé nan bouch prêt la, k-ap kouté nou nan zòrèy li, k-ap fè jès pou padonnin nou ak min-l. Jézu voyé moun yo al fè konsta gérizon yo dévan prêt yo (Lc 17, 14). Antan y-apralé, yo konstaté yo géri. Sèké paròl Jézu, sé yon paròl ki kréyé (Ps 33, 6). Psòm nan di: "Kréyé yon kè nèt nan mouin, Granmèt, réfè yon léspri fèm anndanm" (Ps 51, 12).

Yon sèl nan dis moun yo tounin vi-n di Jézu mèsi (Lc 17, 15-16), yon étranjé, moun Samari, tankou premié léktu-a montré nou kijan Naaman, Siryin-an, ap tounin vi-n di Profèt Élizé mèsi pou maladi lalèp li-a li géri-a, antan-l fè-l binyin sèt foua nan lariviè Joudin-an (2 R 5, 14-17). Apré "Kyrie", sé "Gloria". Lè nou fi-n mandé Bondié pran pitié pou nou, nou fè louanj li davans pou nou di-l mèsi, paské nou sètin li padonnin nou. Sé dévoua rékonésans. Nèf lòt yo pa-t tounin. Sé yon tandans ki nan nou: nou sonjé Bondié lè nou nan bézouin; lè-l fi-n réponn nou, nou pa sonjé di-l mèsi.

Époutan avèk priyé demann, gin priyé louanj ak priyé RÉMÈSIMAN. Apré konfésion-an, li bon pou nou di Bondié mèsi, jan yo prévoua nan sérémoni "Célébration pénitentielle" la. Nan lévanjil 28èm dimanch òdinè C-a, nou gin tou lè toua fòm priyé ki égzisté: priyé déman (Lc 17, 13: " pran pitié pou nou"), priyé louanj (Lc 17, 15: "N-ap fè louanj Bondié"), priyé rémèsiman (Lc 17,16: "N-ap di-l mèsi").

Sin Luk insisté pou montré sé étranjé-a sèl ki fidèl jous nan bout (Lc 17, 18). Jézu chouazi égzanp Naaman, Siryin-an, pou montré kijan mision-l dépasé limit pèp Israèl la (Lc 4, 27). Dépi lè sa-a, akoz sa minm, Juif yo té

déjà ap chèché touyé-l (Lc 4, 29). Sé lè Sin Pòl ap déklaré minm dimansion mision sa-a Juif yo ap lévé voua yo kont li pou yo mandé lanmò-l (Ac 22, 21). Jézu rékonpansé Samaritin-an, lè-l di-l: "Lévé, alé, lafoua-ou sové-ou" (Lc 17, 19). Lòt yo jouinn gérizon. Li minm, an plis, li jouinn délivrans pou nanm li. Sèké li té rékonèt gérizon-an sé yon sign ki dépasé délivrans kò-a. Démach li fè, lè-l tounin-an, sé yon démach lafoua. Bondié konn fè mèvèy pou nou, pou-l fè nou monté pi ro. Si Jézu fè dlo tounin divin, sé pou patizan-l yo té kapab vi-n gin lafoua (Jn 2, 11). Madanm nan ki té touché fil rad Jézu-a épi ki té géri-a, Jézu di-l: "Lafoua-ou sové-ou, alé ak kè pozé" (Lc 8, 48). Li pa jouinn lapè pou kò-l sèlman, min pou nanm li tou, lè-l fi-n fè dékarasion dévan tout moun nan (Lc 8, 47). Gérizon maladi, sé sign pouvoua Jézu ginyin pou géri nanm (Mc 2, 10). Lè-l fi-n géri moun ki pa-t kapab maché-a, li avèti-l pou-l pa fè péché, pou malè pi gran pasé sa pa rivé-l (Jn 5, 14).

N-ap mandé Manman Mari pou nou pran abitud foyé konsians nou byin, pou nou konsidéré distans péché-a mété ant nou minm ak Bondié, pou nou aksépté gin solidarité avèk pòv péchè yo, antan nou aksépté kèk ti sakrifis nou ofri kòm pénitans. N-ap mandé-l tou pou nou gin sinplisité pasé nan intèmediè Jézu-Kri mété pou transmèt nou lagras padon-an, li minm ki té di Apot yo: "Résévoua léspri Sin-an; moun nou ouété péché yo, péché yo ap éfasé" (Jn 20, 22-23). N-ap mandé-l pou nou pran abitud pa tann péché-a fè pil sou konsians nou joutan li angoudi nou, li dékontrolé nou, li détaché nou sot nan lagras Bondié-a, anvan nou proche kot sakréman konfèsion-an. N-ap mandé-l pou-l fè nou favè évité tout kominion sakrilèj, pou si nou gin péché mòtèl sou konsians nou, nou pa résévoua lékaristi anvan nou konfésé péché nou nan min yon Pè. N-ap mandé-l pou nou gin sans péché-a, pou nou kapab gin sans Bondié pi plis.

*

Di mèsì, sé yon fason pou nou mandé ankò. Nou rékonèt nou pa kapab fè anyin pou kont pa nou; tou sa nou ginyin, sé Bondié minm ki ba nou-l. Fòm lapriyè la Trè Sint Vièj Mari ki pi dévlopé, sé Magnifikat rémèsiman-an. Nou pa doué sèlman sonjé konsolasion Bondié yo, sé pou nou sonjé Bondié konsolasion yo. Naaman té vlé pèyé Profèt Élizé pou mirak gérizon-l nan, Profèt la réfizé. Yo pa achté sèvis Bondié. Mirak la sé yon favè gratis Bondié fè nou. N-ap mandé Manman Mari pou-l fè nou patisipé nan réspirasion lapriyè rémèsiman l-ap fè tout tan, pou nou pran tan di Bondié mèsì san rété. Priyè démann, priyè louanj, priyè rémèsiman, sé toua fòm lapriyè sa yo ki rasanblé tout lapriyè nou fè bay Bondié. Nou pi abitué ak lapriyè démann nan, li pi adapté avèk bèzouin nou. Nou konn fè

lapriyè louanj tou, parègzanp lè n-ap résité Bréviè-a pou fè louanj Granmèt la avèk Psòm yo, spésialman nan matin, nan lévé limiè solèy la (Laudes) épi nan asouè, nan kouché limiè solèy la (vêpres). Min kanta pou lapriyè rémèsiman-an, nou pa fi-n trò alèz nèt avèk li, paské li fè nou sonjé dèt nou doué Bondié; moun pa janm fi-n trè alèz avèk dèt yo. Lè nou doué yon moun, sa mété nou mal-alèz, nou éséyé pa pasé koté moun nan yé, pou nou pa sonjé dèt la, joutan nou fi-n péyé-l. Époutan Bondié sé li minm k-ap ba nou tout bagay gratis san nou pa konnin; minm dèt la, sé li minm ki péyé-l pou nou; nou pa konn sa pou nou di, sé Léspri Sin-an k-ap lapriyè pou nou nan kè nou ak mo nou pa kapab konprann (R 8, 26). Minm jan sé li minm k-ap fè priyè demann nan, sé li minm tou k-ap fè priyè rémèsiman-an. Sé pou nou dosil nan min-l. Nou toujou gin dèt rékonésans vizavi Bondié. Léspri Sin-an nan kè nou toujou ap di mèsì pou nou. Di Bondié mèsì, sé mandé-l ankò; plis n-ap di-l mèsì, sé plis l-ap fè nou favè gratis. La Trè Sint Vièj Mari "pleine de grâce" (Lc 1, 28). La Trè Sint Vièj Mari fè "action de grâce" (Lc 1, 46-55).

Yo rélé lamès la "Eucharistie" sa vlé di rémèsiman, "action de grâce". Jézu pran Kalis la, li di Bondié mèsì. N-ap fè tout lavi nou vi-n tounin yon sakrifis rémèsiman an-akò avèk sakrifis lamès la.

*

* *

VINTNÉVIÈM DIMANCH ÒDINÈ A

Tout pouvoua nan min Bondié. Lè pèp Israèl té vlé instalé yon roua pou kòmandé-l tankou lòt nasion yo (1 Sam 8,5), sa pa-t fè Bondié plézi, paské sé otorité Bondié minm yo té réjité, pou yo pran indépandans yo aléga li. Réyéman vré, Sayul, roua yo-a, déréspékté lòd Bondié. Bondié réjité-l sot sou fotèy gouvènman-l nan. Bondié pa kont prinsip pou yon roua kòmandé sou Israèl, min li kont prinsip pou otorité sa-a vi-n tounin lokazion pou fè pèp la viré do bay lòd li pasé (Dt 17,14-20).

Profèt Samuèl, ki té sakré Sayul, blijé avèti kijan Bondié réjité-l, pou-l bay yon lòt moun plas li (1 Sam 15,23). Sé David Samuèl vi-n sakré nan plas Sayul (1 Sam 16,12). Bondié mété yon lanp pou kléré chémin David, pou-l maché sou rout li trasé pou li-a, sé Natan. Koté David fè byin, Natan ankourajé-l (2 Sam 7). Koté-l fè mal, Natan korijé-l (2 Sam 11-12). Apré Natan, sé Profèt Gad ki réalizé ròl sa-a (2 Sam 24), lè David t-ap fè résansman pèp li-a pou-l kalkilé fòs pouvoua otorité-l, kòm si sé pa nan Bondié fòs li té sòti. Sé minm konduit sa-a Bondié kinbé pa rapò a tout roua yo, lè-l mété yon Profèt koté yo pou montré yo chémin, tankou Éli an fas Akab (1 R 18-19; 21); konsa Profèt Izayi chèché drésé mové balan roua Akaz t-ap pran pou-l al chèché sékou nan min lamé Asiryin yo, san-l pa mét konfians li nan Bondié (Is 7). Nan pitit li yo, ki vi-n apré-l yo, sé roua Ézékias (2 R 18-20) avèk roua Jozias (2 R 22-23) ki kinbé vré ròl yo.

Bondié té anonsé yon Mési k-ap Roua, sé Émanuèl, Pitit David la (Lc 1,32; 2 Sam 7,16; Mt 1,22; Is 7,14). Juif yo t-ap tann li pou-l réfè limit péyi yo-a, pou-l ba yo indépandans parapò a Romèn yo. "Zélòt" yo té vlé mété fòs déyò pou sa. Farizyin yo pa-t dakò pou mété fòs déyò, min yo pa-t dakò tou pou péyé taks la. "Érodyin" yo minm té dakò pou péyé taks la karéman. Farizyin yo ak Érodyin yo mété yo dakò pou yo éséyé Jézu pou fè-l pasé soua nan kan "zélòt" yo soua nan kan "Érodyin" yo, nan fason yo pozé-l kèsion-an, minm jan yo té déjà éséyé-l, lè-l té fi-n géri moun nan ki té gin min-l séché-a, jou saba-a (Mc 3,6). Yo poté yon piès lajan ba li, ki té gin pòtré Séza avèk tit: "Ti(berius) Caesar Divi Aug(usti) Fi(lius)": Tibè Séza, pitit Ogus ki Bondié-a. Jézu fè yo konprann li pa dakò ak tit ki sou piès lajan-an, paské li pa rékonèt Séza kòm Bondié. Sé poua li di pou rinnèt Séza piès lajan-l nan, min pou rinnèt Bondié sa-k pou Bondié. Sa pa vlé di li séparé tè-a nan dé pòsion: youn pou Séza, lòt la pou Bondié. Pèsòn pa kapab sèvi dé mèt alafoua (Mt 6,24). Sé Bondié ki sèl Mèt. Tout pouvoua-a, li rinnèt li nan min Pitit li-a (Mt 28,18). Ata pouvoua Séza ginyin-an, sé Bondié ki pèmèt li ginyin-l, tankou Sirius yo palé nou nan premié léktu lamès 29^{èm} dimanch òdinè A-a (Is 45,1-6). Péyé inpo-a, sa pa vlé di rékonèt

Séza sé Bondié, minm si sé sa ki ékri sou piès lajan-an. Rinnèt Séza lajan-l; min rinnèt Bondié tit li ak dévoua nou doué-l (Mt 22,15-21).

Lè té gin résansman sou tan Kirinius, préfè Siri-a, sé Séza Ogus, papa Tibè Ogus, ki té pasé lòd pou fè-l. Sin Jozèf té monté jous Bétlèèm ansanm avèk la Trè Sint Vièj Mari ki té ansint, pou-l t-al fè ékri non-l sou réjis léta (Lc 2,1-7). Min Juda, moun Galilé-a, té kanpé, li té révòlté, li té minnin anpil moun dèyè-l. Min yo touyé-l nan batay la, épi lòt moun yo gayé (Ac 5,37). Sé patizan Zélòt yo. Minm nan pami Apot yo té ginyin ki té soti nan group Zélòt yo, tankou "Simon le Zélote" (Ac 1,13). Kòlè lézòm pa réglé jistis Bondié (Jc 1,20). Jézu di Sin Piè pou-l rinnèt épé-l nan fourò-l paské moun ki frapé ak épé, l-ap péri ak kout épé (Mt 26,32; Gn 9,6). Péyi koté-l Roua-a pa gin minm prinsip avèk lòt yo (Jn 18,36; Mc 10,42-45). Group ki lènmi antré yo mété yo dakò kont Jézu, tankou Pilat ak Éròd (Lc 23,12; Ac 4,27). Konsa Farizyin yo mété yo dakò avèk Érodyin yo pou yo pran Jézu nan pièj. Min lanj Granmèt la sèvi-l défans pou paré chòk la (Ps 34,8). N-ap mandé Manman Mari pou-l ba nou konfians, pou nou pa kité okinn konplo dékontrolé nou, pou nou di ansanm ak Sin Pòl: "Yo sintré nou tout koté, min yo pa rivé krazé nou; nou pa konn sa pou nou éspéré, min nou pa dézéspéré; yo pèsékité nou, min nou pa abandoné; yo jété nou atè, min nou pa disparèt" (2 Co 4,8).

*

* *

VINTNÉVIÈM DIMANCH ÒDINÈ B

Lévanjil 29^e dimanch òdinè B-a (Mc 10,35-45) gin dé pati: prémié-a (Mc 10,35-40), sé démach Jak avèk Jan kot Jézu pou yo chèché yon plas adouat li, yon plas agoch li, nan péyi koté-l Roua-a. Dézièm nan (Mc 10,41-45) sé léson Jézu ap bay Apot li yo sou késion sa-a.

Nan prémié pati-a (Mc 10,35-40), Jak avèk Jan kòm di Jézu pou-l fè volonté yo (Mc 10,35). Sé tankou yo viré sans lapriyè "Papa nou ki nan sièl la". Olié yo di "sé pou volonté-ou fèt sou tè-a tankou nan sièl la", yo mandé Jézu pou-l fè volonté pa yo. Nan rélasyon nou ak Bondié, sé yon ti jan sa nou konn fè kèkfoua. Nou mandé Bondié pou-l fè volonté pa nou. Nou di lapriyè "Papa nou ki nan sièl la" ak bouch nou; min nou viré sans li nan kè nou. Sé pou volonté-ou fèt, min fè pa nou-an anvan; apré sa, n-a ouè sa n-a fè pou ou. Jézu minm gin bon jan ti pasians. Li pran yo koté yo yé-a: ki sa nou vlé pou-m fè pou nou? (Mc 10,36). Yon plas adouat, yon plas agoch ou nan péyi koté-ou Roua-a (Mc 10,37). Yo bliyé si sé dé asasin yo k-ap ankadré Jézu: youn adouat, lòt la agoch sou mòn Kalvè-a. Jézu profité réponn yo yo pa konn sa y-ap mandé (Mc 10,38). Li montré yo chemin bèlté-a pasé nan chemin lakoua-a. Fò yo bouè nan bouason soufrans la, fò yo batizé nan batèm lanmò-a anvan yo antré nan péyi koté Bondié Roua-a. Yo pa fi-n ouè konsékans sa Jézu mandé yo-a, min yo di oui kan minm, paské sé plas la ki intéresé yo (Mc 10,39). Jézu minm réponn yo: késion plas la, sé nan min Papa-a sa rété. Sé konsa prémié pati-a fini (Mc 10,35-40).

Sa nou konstaté, sèké sé lè Jézu té fèk fi-n palé sou késion soufrans li ak lanmò-l (Mc 10,32-34) sé lè sa-a Jak avèk Jan ap mandé plas adouat-agoch. Sa vlé di yo pa konprann sa Jézu t-ap di-a vré. Époutan sa fè touazièm foua Jézu t-ap palé sou sa (cf prémié foua-a = Mc 8,31-33; dézièm foua-a = Mc 9,30-32; touazièm foua-a = Mc 10,32-34). Sé tankou toua son klòch anvan lamès Kalvè-a kòmansé. Épi chak foua, nou konstaté kijan Apot yo viré késion-an. Prémié foua-a (Mc 8,31-33) sé Piè li minm minm ki té vlé détounin Jézu (Mc 8,32), Jézu té fè-l répròch (Mc 8,32) épi li té bay foul la léson (Mc 8,34-38). Dézièm foua-a (Mc 9,30-32), sé Apot yo minm ki t-ap diskité antré yo kilès ki pi gran (Mc 9,34), épi Jézu té ba yo léson tou (Mc 9,35-37). Touazièm foua-a (Mc 10,32-34), sé Jak avèk Jan k-ap chèché prémié plas (Mc 10,35-37), Jézu korijé yo (Mc 10,38-40), li profité bay tout Apot yo léson (Mc 10,41-45).

Sé dézièm pati lévanjil 29^e dimanch òdinè B-a (Mc 10,41-45). Jézu sé Sèvitè Granmèt la, sé ésklav. Li pa vi-n pou fè moun sèvi-l, li vini pou-l

sèvi. Sèl sa ki bay chèf yo rézon pou yo rét nan plas yo, sé sèvis la. Si yon chèf pa sèvi, li pa nan ròl li. Chèf pa la pou pézé sou lòt yo, pou lévé tèt yo anlè lòt yo, min yo la pou soulvé lòt yo tankou yon djak anba machi-n. Sé pa sézi yon moun nan très chévé k-ap lévé-l anlè. Sé soulvé-l sou bra. Moun ki vlé vi-n gran-an, sé pou-l sèvi lòt yo; sa-k vlé vi-n premié-a sé pou-l vi-n èsklav lòt yo. Sé pa yon konparézon, sé yon réalité. Sé sa minm Jézu fè. Pèsòn pa sipériè anlè lòt. Dènié plas ki té ginyin-an, Jézu pran-l. Sé sa Pè-de-Fouko di. Si nou vlé rankontré Jézu, sé la pou-n al jouinn li.

Jézu té promèt Apot yo pou yo chita sou douz fotèy, lè l-ap tounin pou-l jijé ni vivan ni mò (Mt 19,28; Lc 22,28-30), atèl pouin lè l-ap monté nan sièl la Apot yo t-ap mandé-l èské sé koulié-a l-ap instalé péyi Roua Israèl la. Yo bézouin pou yo chita sou douz fotèy pou yo jijé douz fanmiy Israèl yo, sa vlé di pou yo chèf sou yo. Sèlman gin dé nan yo k-ap mandé kilès nan douz fotèy sa yo k-ap pi pré Jézu, youn adouat, lòt la agoch, nan plas-donè. Otorité sé sèvis, sé plis balé pasé po-d-flè.

Si Jézu mandé Jak avèk Jan si yo kapab bouè nan minm kalis avèk li, sa vlé di si yo vlé aksépté patajé ni bon moman ni mové moman nan déstiné-l. Kalis la, sé kalis bénédiksyon, sa vlé di évenman kè kontan (Ps 23,5; 116,7; Jer 16,7), min an minm tan tou sé kalis malè, sa vlé di évenman ki minnin soufrans (Ps 75,9; Is 51,17; Jer 25,15-18; Ha 2,15-16; Lam 4,21). Sé tou lé dé ansanm pou patajé, si nou vlé kominié vré avèk déstiné Jézu-Kri. Gin moun yo konn Jézu sou mòn Tabò, min yo bliyé-l sou mòn Gòlgota: Tout zanmi-l yo té rét kanpé louyin ap gadé, lè-l t-ap mouri sou mòn Kalvè-a (Lc 25,49). Sé nan malè nou konn vré zanmi. Jak avèk Jan paré pou yo patajé kalis bénédiksyon-an avèk Jézu, pou yo résité ansanm avèk li Psòm nan ki di: "Ou drésé tab dévan-m, **kalis** mouin ap débòdé" (Ps 23,5), ni Psòm nan ki di: "Kijan pou-m fè di Granmèt la mèsè pou tout byin li fè-m yo? M-ap lévé **kalis** délivrans la, m-ap rélé non Granmèt la" (Ps 116,13), ni ansanm avèk Jérémi: "**Kalis** konsolasyon-an" (Jer 16,7). Min yo bliyé si kalis sa-a sé yon kalis ki kinbé bouason anmè tou avèk fièl. Sé pa kalis divin nòs Kana-a sèlman (Jn 2,1-11), min sé kalis vinèg yo té prezanté bay Jézu sou mòn Kalvè-a tou, sa li té déjà ouè nan vizion nan jadin pié oliv yo, lè-l té di: "Papa, ouété **kalis** sa-a sot dévan-m, tanpri souplé, min sé pou volonté-ou fèt" (Mt 26,39; Mc 24,36; Lc 22,42). Yo bliyé si sé kalis Psòm nan palé-a, lè-l di: "Granmèt la gin yon **kalis** nan min-l, sé divin gaté ki plin-l" (Ps 75,9). Yo bliyé sa Profèt Abakuk prezanté, antan-l di: "L-ap paré pou ou, **kalis** min douat Granmèt la, laront apral kouvri bèlté-ou la" (Ha 2,15-16). Yo bliyé sa Lamantasyon chanté nan kantik dèy la: "**Kalis** la ap pasé pou ou tou" (Lam 4,21). Kalis sa-a sé bon moman, sé mové moman. Moun ki

marié, yo doué toujou paré pou yo pasé nan minm chémin, ni chémin flè ni chémin pikan. Ginyin ki divòsé kon yo pasé nan chémin pikan-an. Jézu bouè kalis kè kontan-an, li bouè kalis kè séré-a. Si yon moun vlé patajé otorité-l, li doué paré pou-l bouè tou lé dé kalis bouason yo, ni divin dous nòs Kana-a, ni vinèg fièl lantèman Kalvè-a.

Nan moman Jézu pozé Jak avèk Jan késion-an, li vizé lanmò-l sitou, lè l-ap di Simon-Piè: "Rinmèt sab la nan fourò-l; kalis la Papa-m té ban mouin-an, èské mouin pap bouè-l?" (Jn 18,11), lè l-ap di Apot yo: "**Kalis** sa-a sé nouvo kontra-a nan san-m nan ki vidé pou nou-an" (Lc 22,20; cf 1 Cor 11,25).

Kanta batèm nan minm, Psòm nan montré sé lanm dlo malè yo ki nouayé moun nan: "Mas lanm ou yo ak vag ou yo té pasé sou mouin" (Ps 42,8). Psòm nan montré kijan dlo yo monté jous nan kou moun nan, kijan-l pasé nan yo, kijan lanm yo nouayé-l nan soufrans la: "Sové-m, Granmèt, paské dlo yo rivé jous nan kou-m, m-ap fonsé nan labou bafon-an, anyin pa kinbé-m, mouin antré nan bafon dlo yo, lanm nan nouayé-m" (Ps 69,2-3). Sé Psòm sa-a Jézu té lapriyè sou Koua-a (Jn 19,28 = Ps 69,22). Lékòl Profèt Izayi-a di: "Si-ou pasé nan dlo yo, m-ap avèk ou, riviè yo pap nouayé-ou" (Is 43,2). Sé yon lapli chabon difé ak souf Psòm nan palé tou antan l-ap fè sonjé tou kalis la k-ap plin ak van flanm difé-a (Ps 11,6).

Prémié léktu 29^e dimanch òdinè B-a (Is 53,10-11), sé katriyèm Kantik Sèvitè Granmèt la, ki vini nan Vandrédi-Sin tou. Li montré kijan Granmèt la krazé Sèvitè-l ak soufrans. Sé yon sakrifis k-ap péyé péché lézòm. Sé konsa Sèvitè-a ap réalizé volonté Granmèt la. Sé péché yo li chajé sou zépòl li tankou yon Koua l-ap poté. Sé konsa l-ap fè foul yo vi-n kòrèk épi li minm sé nan chémin Koua sa-a l-ap pasé pou-l antré nan bèlté-a. Lanmò-a sé pa yon garaj, sé yon pasaj. Dènié vèsè lévanjil 29^e dimanch òdinè B-a (Mc 10,45), sé pasaj sa-a minm li sité, lè-l di: "Pitit Moun nan pa vini pou fè yo sèvi-l, min pou-l sèvi, pou bay lavi-l k-ap sèvi pou péyé délivrans foul moun yo". Sin Mak sité Kantik Izayi-a (Is 53), li montré sans sakrifis Jézu-a. Sé poussa yo mété pasaj liv Izayi-a (Is 53,10-11) kòm prémié léktu nan 29^e dimanch òdinè B-a, pou fè sonjé kijan litiji prémié tan légliz la t-ap konsidéré tout évenman lavi-lanmò-lévé Jézu nan limiè tèks lansyin Téstaman yo ki té ékri lontan, san moun ki té ékri yo pa-t ouè tout sans ki té kaché nan yo. Yo t-ap viv avèk éspérans.

Psòm-répons la (Ps 32/33) palé sou éspérans la, li di Granmèt la ap prezèvé moun ki réspékté-l yo, pou lanmò-a pa valé yo. Li di tou nan réfrin-an (vèsè 22): "Fè kè-ou sansib pou nou, Granmèt, paské nou éspéré sou ou".

Kantan Lèt Ébré yo (He 4,14-16), li montré kijan Jézu, Prèt an Chèf la, sibi tout tray lézòm sof éspérians péché li pa-t fè. Sé poua li ba nou posibilité pou nou avansé avèk asirans kot fotèy favè Bondié-a. Nan sans sa-a, nou pa minm bézouin mandé premié plas kot fotèy li-a, adouat-agoch, sé pou nou avansé avèk asirans kot fotèy sa-a. Gin plas pou tout moun, nan mézi nou fè youn avèk soufrans Jézu-Kri yo pou nou fè youn avèk bèlté-l la tou. Sé pa afè pa nou n-ap réglé, sé afè pa-l.

*

"Sèvitè", sé non Mési-a sa. Li vini pou-l éfasé péché lògèy la (Gn 3,5; Ph 2,6-11). Sin Pòl di Filipyin yo: malgré sé nan kondision Bondié li yé, li pa konsidéré sa tankou yon byin l-ap séré; okontrè li vidé avantaj sa réprésanté pou li-a, li rabésé tèt li, antan-l pran kondision moun, li mouri tankou ésklav. Sé poua Bondié lévèl-anlè, li ba-l non ki anlè tout non (Ph 2,6-11). Satan té di li pap sèvi. Sé konsa péché té kòmansé. Sé dézobéyisans ak lògèy. Bondié té instalé moun nan jadin-an pou-l sèvi (Gn 2,15). Satan fè-l dékontrolé avèk dézobéyisans (Gn 3,4-5). Jézu vi-n délivré nou, antan li pran plas li. Li vi-n tounin sèvitè. Sin Matié sité pasaj premié Kantik Sèvitè-a osijè Jézu, li di: "Min Sèvitè-m nan mouin chouazi-a" (Mt 12,18-21; cf Is 42,1-4). Premié léktu lamès 29^e dimanch òdinè B-a montré sans soufrans Sèvitè sa-a (Is 53,10-11). Sé péché foul pèp la li t-ap poté sou do-l, jan Jézu ap poté Koua-a. Sin Pòl invité nou réalizé nan Kò nou sa-k manké nan soufrans Jézu-Kri yo pou Kò li ki légliz la (Col 1,24). Apot yo t-ap tann yon Mési k-ap fè ouè li roua avèk préstij, avèk otorité, antan l-ap pasé lòd adouat-agoch, l-ap instalé moun adouat-agoch pou kòmandé. Jézu fè yo konprann sé pa chémin sa-a Papa-a chouazi pou li. Sé yon tantasion nou toujou ginyin: chèché fè lòt yo santi pouvoua nou ak otorité nou, pou nou montré nou sipériè pasé yo. Sé pa lévanjil la sa. Mésaj Jézu-a alé nan sans kontrè. Résponsabilité, sé sèvis, sa vlé di nou blijé mété nou pi ba pasé moun yo nou gin doua sou yo-a. Yon moun ki chèf, li la pou fè tout group la maché ansanm. Si-l pran pòz li sipériè pasé yo, li kapab fè yo maché ès-ès, sé vré; min li pap fè kè yo bat nan minm kadans avèk kè pa-l. Dépi yo ouè-l parèt, kè yo ap soté. Y-ap obéyi lòd li yo, min sé soua pou fè-l plézi, soua pou évité dézagréman. Yon moun ki konprann ròl résponsab li, sé pou-l fè tankou Jézu-Kri ki rénonné avantaj sa réprésanté pou li. Sé pou-l aksépté vi-n tounin balé ak rato, pou-l ranmasé pouziè ak zèb. Li blijé kité yo intèprété jès li pozé nan sans malonèt, san-l pa fè kòlè pou sa. Li pa doué sézi tandé yo mété nan bouch li paròl li pa-t di. Li doué gin san-foua, pou-l ouè l-ap pèdi zanmi-l yo youn pa youn (Lc 23,49; Pr 19,7; Ps 38,12). Li gin pou-l konnin davans li vi-n tounin tankou yon étranjé pou moun ki té konn

patajé minm lidé ak li yo (Ps 69,9). Sé plas koté-l yé-a ki mété-l nan pozision sa-a. Sèké li pap gadé nan minm sans avèk lòt yo ankò, min li viré ap gadé yo an fas, pou-l fè tankou Moyiz: transmèt yo lòd Granmèt la pasé-l sou mòn Sinayi-a.

Aaron ak Miriam té révòlté kont Moyiz (Nb 12,1-16). Moyiz pa-t défann tèt li, li pa-t fè régadan. Liv Nonb la di: Moyiz té youn moun ki gin kè-l pi ba pasé tout moun sou tè-a (Nb 12,3). Sé Bondié ki pran défans Moyiz kont Miriam ak Aaron, pròp sè ak frè Moyiz. Bondié faché kont yo, li fè Miriam vi-n gin lalèp, atèl pouin sé lapriyè Moyiz ki géri-l aprè sèt jou.

Yon moun ki gin plas réponsab, li doué fè kò-l tou piti. Plis li pran pòz sèvitè-l, sé plis l-ap soudé kominoté-a. Lè-l pa ouè rézilta travay li, li pa doué dékourajé pou sa. Li doué pozé tèt li kèsion pou-l égzaminé kijan l-ap fè pou-l éséyé fè mèsaj la pasé pi byin, pou sa-l gin nan lidé-l la rivé jouinn préokipasion group la, pou sa k-ap trinnin yo oubyin k-ap rédi nan lòt sans yo, yo rivé jouinn avantaj sèvis li-a kan minm. Li doué fè tankou yon **manman** k-ap bay pitit li tété (1 Th 2,7b), ki suiv kapris li, joutan li fè-l bouè lèt la. Sé byin group la li anvizajé, sé pa otorité-l l-ap chèché asiré. Li doué an minm tan tankou yon **ti moun** tou piti, pou yo aksépté-l (1 Th 2,7a), minm si-l doué tankou yon **papa** tou pou bay konsèy, pou ankourajé (1 Th 2,11-12).

Sé dé fason diféran léta ak légliz konsidéré kozé otorité sa-a. Jézu di roua nasyon yo pézé fòs pouvoua yo sou moun yo pou fè yo maché ès-ès, min nan pami nou sé pa sa. Sèké sé léspri Sin-an k-ap dirijé kominoté-a. Chèf yo ouè ak jé-a, sé sinp instriman li yé. Sé pa fotèy pouvoua ak prestij li l-ap asiré. N-ap mandé Manman Mari favè sa-a pou nou aksépté maché pi dousman kèkfoua (Is 40,11; Gn 33,14), minm si nou présé rivé, pou tèt la pa dékolé sot nan kò-a.

*

Sèvitè: 724 foua nan lansyin Téstaman, 115 foua nan Nouvo Téstaman: Gn 14,24; 18,3.5.7; 19,2.19; 20,8.14; 21,25; 22,3.5.19; 24,2.5.9.10.14.17.34.35.52. 59.61.65a.b.66; 26,14.15.18.19.24.25.32; 27,37; 30,43; 32,5.6.11.17a.b.19.21; 33,5.14; 41,10; 42,10.11.13; 43,28; 44,7.9.16.18a.b.19.21.23.24.27.30. 31a.b.32.33; 46,34; 47,3.4.a.b; 50,17; Ex 4,10; 5,15.16a.b.21; 7,10.20.28.29; 8,5.7.17.20.25.27; 9,14.20.30.34; 10,1.6.7; 11,3.8; 12,30.45; 14,5.31; 20,10.17; 24,13; 32,13; 33,11; Lv 22,10; 25,6.42.44a.b.55a.b; 26,13; Nb 11,11; 12,7.8; 14,24; 31,49; 32,4.5.25.27.31; Dt 1,38; 3,24; 5,14a.b.21; 9,27; 12,12.18; 15,17; 16,11.14; 28,68; 29,1; 32,36.43; 34,5.14; Jos 1,1.2.7.13.15; 5,14; 8,31.33; 9,8.9.11.24a.b; 10,6; 11,12.15; 12,6a.b;

13,8; 14,7; 18,7; 22,2.4.5.29; Jg 2,8; 3,24; 6,27; 7,10.11; 15,18; 19,3.9.10.11.13.19; Rt 2,5.6.9.15.21; 1 Sm 2,13.15; 3,9.10; 8,16; 9,3.5.7.8.10.22.27; 10,14; 12,19; 14,41; 16,15.16.17.18; 17,8.9a.b.32.34.36.58; 18,22a.b. 23.24.26; 19,4; 20,7.8; 21,8.12.15; 22,8.14.15a.b; 23,10.11a.b; 25,8a.b.10a.b.14.19.39.40.41; 26,18.19; 27,5.12; 28,2.7a.b.23; 29,3.8.10; 2 Sam 3,18; 6,20; 7,5.8.19.20.21.25.26.27a.b.28; 7,29a.b; 9,2.8.9.11a.b; 10,2a.b.3.4; 11,21.24; 13,18.24.28.29.35; 14,19.20.22a.b. 30a.b.31; 15,2.8.21.34; 16,1; 17,20; 18,29; 19,6.15.18a.b.20.21.27a.b.c.28.29. 36a.b.37.38a.b; 24,10.21.23; 1 R 1,2.19.26a.b.51; 2,38; 3,6.7.8.13; 11,11.13. 32.34.36.38; 12,7a.b; 14,8.18; 15,18.29; 18,9.12.36.43.44; 19,3.21; 20,6a.b.9.12.20.23.31.32.39.40.50; 2 R 1,13; 2,16; 3,11; 4,1a.b.12.15. 19.22.24.25. 38.43; 5,6.13.15.17a.b.18a.b.20.23.25.26; 6,3.15.17; 8,4.13.19; 9,7a.b.28.36; 10,5.10.23.25; 14,25; 16,7; 17,13.23; 18,12.24.26; 19,34; 20,6; 21,8.10.23; 22,9; 23,30; 24,2; 1 Ch 2,34; 6,34; 16,13; 17,4.7.17. 18a.b.19.23.24.25.26.27; 19,2.3.4; 21,3.8; 2 Ch 1,3; 2,7a.b.9.14; 6,14.15.16.17.19.20.21.23.27.42; 8,18a.b.c; 9,7.10a.b.12.21; 10,7; 13,6; 22,8; 24,6.9.25; 28,10; 32,9.16a.b.; 33,24; 34,16; 35,23.24; Esd 4,11; 5,11; 9,11; Ne 1,6a.b.7.8.10.11a.b; 2,5.20; 4,16; 5,15; 6,5; 9,14; 10,30; Tob 8,9.18; 9,2.5; 10,10; Jdt 3,2; 5,5a.b; 6,3.6.7.11; 7,12; 8,7; 9,3.10; 10,23; 11,4; Est 1,3; 2,18; 3,2.3; 4,11; 5,11; 1 Mac 4,30; 16,16; 2 Mac 1,2; 7,6.33.34; 8,29; Job 1,3.8.15.17; 2,3; 4,18; 19,16; 31,13; 40,28; 42,7.8a.b.c; Ps 18,1; 19,12.14; 27,9; 31,17; 34,23; 35,27; 36,1; 69,18.37; 78,70; 79,2.10; 86,2.4.10; 89,4.21.40.51; 90,13.16; 102, 15.29; 103,21; 104,4; 105,6.25.26.42; 109,28; 113,1; 116,16a.b; 119,17.23.38.49. 65.75. 84.122. 124.125.135.140.176; 123,2; 132,10; 134,1; 135,1.9.14; 136,22; 143,2.12; 144,10; Pr 12,2; 14,35; 17,2; 29,12; Qo 7,21; Sg 6,4; 9,5; 10,16; 18,21; Si 4,30; 6,11; 7,20; 10,25; 33,25.27; 36,16; Is 20,3; 22,20; 36,9.11; 37,35; 41,8.9; 42,1.19a.b; 43,10; 44,1.2.21a.b.26; 45,4; 48,20; 49,3.5.6; 50,10; 52,13; 53,11; 54,17; 56,6; 63,11.17; 65,8.9.13a.b.14.15; 66,14; Jer 7,25; 21,7; 22,2.4; 25,4.9.19; 26,5; 27,6; 29,19; 30,10; 33,21.22.26; 35,15; 36,24.31; 37,2.18; 43,10; 44,4; 46,26.27.28; Ba 1,20; 2,20.24.28; 3,37; 6,25.38; Ez 28,25; 34,23.24; 37,24.25a.b; 38,17; 44,11; 45,5; 46,17.24; Dn 1,12.13; 2,4.7; 3,35.44.46.65.93.95; 6,21; 9,6.10.11.17; 10,17; 13,27; 14,14; Joël 1,9.13a.b; 2,17; Am 3,7; Ag 2,23; Za 1,6; 3,8; Ha 1,6; 3,22; Mt 8,9; 10,24.25; 12,18; 13,27.28; 14,2; 18,23.26.32; 20,26; 21,34.35.36; 22,3.4.6.10; 23,11; 24,45.46.48.50; 25,14.19.21.23.26.30; 26,51; Mc 9,35; 10,43; 12,2.4; 13,34; 14,47; Lc 1,2.54.69; 2,29; 12,37.43.45a.b.46.47; 14,17.21a.b.22.23; 15,22.26; 16,33; 17,7.9.10; 19,13.15.17.22; 20,10.11; 22,50; Jn 1,51; 12,26; 13,16; 15,15a.b.20; 18,10a.b.18.26; Ac 2,18; 3,13.26; 4,25.27.29.30; 16,17; 26,16; R 1,1; 14,4; 1 Co 3,5; 4,1; 2 Co 4,5; Ga 1,10;

Ph 1,1; Col 4,12; 1 Tm 4,6; 2 Th 2,24; Tit 1,1; He 1,7; 3,5; Jc 1,1; 1 P 2,16;
2 P 1,1; Jd 1; Ap 1,1a.b; 2,20; 7,3; 10,7; 11,18; 15,3; 19,2.10; 22,3.6.9

*

* *

VINTNÉVIÈM DIMANCH ÒDINÈ C

Vintnévièm dimanch òdinè C-a, ba nou lansègnman sou "prière constante". Minm mové jìj la té blijé bay vèv la satisfaksion pou-l pa vi-n déranjé-l tout tan ap mandé-l rann li jistis (Lc 18, 1-8). Bondié pap tann nou fè tout kalité démach sa yo anvan-l résévoua lapriyè nou. Li éséyé nou sèlman pou-l fè nou gin pèsévérans nan démenn nou. Pandan lagè Jozué ap minnin kont Amalésit yo, Moyiz ap lapriyè avèk bra-l lévé nan diréksion sièl la. Lè bra Moyiz fébli, Jozué rékilé nan batay la; lè bra Moyiz drésé, Jozué fè progrè nan batay la (Ex 17, 8-13 = premié léktu). Lapriyè Jézu toujou ap monté kot Papa-a nan lagè n-ap minnin kont démon-an. Bra Jézu lévé sou Koua-a. Li invité nou patisipé nan pèsévérans lapriyè-l. Sé sou sakrifis li nou konté. Bondié ap toujou kouté nou. Granmèt la pap dòmi, li pap minm fèmin jé-l, li minm k-ap poté nou sékou (Ps 120 (Psòm-répons)). Paròl li réalizé sa-l vlé (He 4, 12: Alélouya).

Sin Luk sé Évanjélis lapriyè. Jézu fi-n batizé, sé antan l-ap lapriyè, léspri Sin désann sou li sou fòm kolonb lan (Lc 3, 21). Anvan-l chouazi Douz yo, li pasé tout nuit la, l-ap lapriyè (Lc 6, 12). Lè-l té sou mòn Tabò-a, pou-l lapriyè-a (Lc 9, 28), sé pandan-l t-ap lapriyè minm, fas li vi-n chanjé-a (Lc 9, 29). Sé lè-l té fi-n lapriyè li minm pèsonèlman, Apot yo té mandé-l pou-l aprann yo lapriyè tou, tankou Jan-Batis té aprann patizan pa-l yo lapriyè (Lc 11, 1). Sé lè sa-a li montré yo "Papa nou ki nan sièl la". Lè-l fi-n géri mesié ki té gin maladi lalèp la, nouvèl la té tèlman gayé tout koté, moun yo vi-n konblé-l, li té blijé ralé kò-l nan dézè, li té rét la ap lapriyè (Lc 5, 16). Li té pou kont li li t-ap lapriyè, lè Apot yo proché koté-l, li mandé yo ki sa moun yo di li yé, épi li mandé yo ki sa yo minm yo di li yé. Sé lè sa-a minm Piè réponn li sé Kris la (Lc 9, 18) Lè Jézu ap batay ak lanmò-a, li prolonjé lapriyè-l (Lc 22, 44). Sé lè-l lévé sòt nan lapriyè-l (Lc 22, 45), li vi-n jouinn patizan yo. Anvan Sin Piè chouazi ranplasan Juda-a, tout patizan yo ansann ak la Trè Sint Vièj Mari lapriyè, pou Bondié montré volonté-l (Ac 1, 24). Lè kominoté-a fi-n chouazi diak yo, Apot yo lapriyè, épi yo pozé min sou yo (Ac 6,6). Lè légliz Jérusalèm aprann moun Samari yo gin lafoua, yo voyé Piè ak Jan ki lapriyè pou yo, pou yo kapab résévoua léspri Sin-an (Ac 8, 15). Lè Pòl fi-n rankontré Granmèt la sou rout Damas la, sé pandan l-ap lapriyè, li ouè Anani k-ap vi-n pozé min sou li, malgré jé-l pa ko kapab ouè klè. Li déjà ouè nan vizion anvan-l ouè nan réalité (Ac 9, 11s). Anvan Piè fè Tabita lévé vivan, li pozé jénou-l atè, li lapriyè (Ac 9, 40). Sé pandan Piè t-ap lapriyè sou téras kay Simon-an, nan vil Jopé-a, vè midi, li ouè vizion nap la k-ap désann sot nan sièl ak tout bèt yo ladan-l nan, pou fè-l konnin sé pou-l

fè payin yo antré nan légliz la (Ac 10, 9; 11, 5). Sé pandan Kònèy ap lapriyè vè touazè, lanj la parèt dévan-l pou fè-l voyé chèche Piè vi-n batizé-l (Ac 10, 30). Lè Éród té arété Piè, li t-apral fè touyé-l la, anpil fidèl té rasanblé kay Mari, manman Mark, pou lapriyè, lanj la délivré Piè (Ac 12, 12). Lè léspri Sin-an chouazi Pòl ak Banabé pou mision yo-a, Ansyin yo nan légliz Antiòch la lapriyè, yo pozé min sou yo, yo voyé yo (Ac 13, 3). Pòl ak Banabé chouazi Ansyin pou réponsab légliz Listr, Ikoniòm ak Antiòch Pisidi, yo lapriyè, yo pozé min sou yo (Ac 14, 23). Sé vè minuit, pandan Pòl ak Silas ap lapriyè nan prizon Filip la, tranbléman-tè-a louvri pòt yo, kasé chinn prizonié yo (Ac 16, 25). Pòl mét ajénou sou bò lanmè-a ansanm ak Ansyin yo ki réponsab légliz Éfèz la, pou yo lapriyè, anvan-l pati kité yo (Ac 20, 36). Anvan Pòl kité fidèl Tir yo, li fè minm jan. Yo pozé jénou yo sou sab la, yo lapriyè (Ac 21, 5). Sé pandan Pòl t-ap lapriyè nan Tanp Jérusalèm nan, Granmèt la mandé-l pou-l pati louin al pot Bòn Nouvèl la bay payin yo (Ac 22, 17). Lè batiman-an échoué sou zilé Malt la, Sin Pòl lapriyè, li pozé min sou papa chef zilé-a ki té malad, li fè-l jouinn santé (Ac 28, 8).

Sin Luk té akonpagné Sin Pòl nan vouyaj li yo. Li konnin kijan Pòl té mandé Éfézyin yo pou yo lapriyè tout tan (Ep 6, 18), kijan-l té mandé Tésalonysiyn yo pou yo pa sispann lapriyè (1 Th 5, 1). Sé poua li sansib pou-l fikse jé-l sou Jézu k-ap pasé tout lannuit nan lapriyè (Lc 6, 12). Li fikse jé-l sou Apot yo ak patizan yo alantou la Trè Sint Vièj Mari nan kay chanmòt la, ki rét fidèl nan lapriyè (Ac 1, 14) ant lasansion ak lapannkot, li fikse jé-l sou prémié Kominoté-a ki kinbé fèm nan lapriyè (Ac 2, 42), li fiské jé-l sou Piè ak Jan k-ap monté nan Tanp la pou lapriyè touazè laprè-midi-a (Ac 3, 1), li fiské jé-l sou Douz yo ki pou fè foul patizan yo chouazi sèt Diak pou sèvis tab yo, pou yo minm yo kapab rét fidèl nan lapriyè yo (Ac 6, 4), li fikse jé-l sou Kònèy ki tandé Anj la k-ap di-l lapriyè-l yo monté dévan Bondié (Ac 10, 4.31), li fikse jé-l sou légliz la ki pa sispann fè lapriyè-l monté pou Piè ki nan prizon-an (Ac 12, 5), li fikse jé-l sou bò lariviè Filip la ki té sansé rézèvé pou lapriyè-a (Ac 16, 14.16). Nan konsèy Sin Pòl bay Romin yo, li di: "Rét fidèl nan lapriyè" (Rom 12, 12). Li mandé Filipyin yo pou yo déklaré bézouin yo dévan Bondié nan lapriyè yo (Ph 4, 6). Li pasé Kolosyin yo konsign pou yo fidèl nan lapriyè-a, antan y-ap véyé (Col 4, 2). Sé souf sa-a Sin Luk réspiré nan konpagni Sin Pòl, ki fè-l insisté konsa pou raplé nou inpòtans lapriyè-a.

N-ap mandé Manman Mari pou, tankou Moyiz louvri bra-l pou-l lapriyè pandan Aaron ap batay la, nou minm tou nou pa sispann lapriyè avèk PÈSÉVÉRANS pandan dòt frè nou ap batay (Ex 17, 8-13), jan prémié léktu

lanmès 29èm dimanch òdinè C-a montré nou-an. N-ap sonjé sa Pap Jan-Pòl II di nan lèt li ékri osijè léspri Sin-an ("Dominum et vivificantem", n. 66), lè-l ap palé sou pèsévérans lapriyè légliz la ki fidèl nan mèvèy sakré nésans li. Li di: "Au milieu des problèmes, des déceptions et des espoirs, des abandons et des retours que connaît notre époque, l'Église demeure fidèle au mystère de sa naissance. Si c'est un fait historique que l'Église est sortie du Cénacle le jour de la Pentecôte, on peut dire qu'en un sens, elle ne l'a jamais quitté. Spirituellement, l'événement de la Pentecôte n'appartient pas seulement au passé. L'Église est toujours au Cénacle, qui reste présent dans son cœur. L'Église persévère dans la prière, comme les Apôtres, avec Marie, Mère du Christ, et avec ceux qui, à Jérusalem, constituaient le premier noyau de la communauté chrétienne et attendaient en priant la venue de l'Esprit Saint. L'Église persévère dans la prière avec Marie. Cette union de l'Église en prière avec la Mère du Christ fait partie du mystère de l'Église depuis son origine: nous voyons Marie présente en ce mystère comme elle est présente dans le mystère de son fils" (n. 66).

N-ap mandé Granmèt la pou-l ba nou kado léspri Sin-an (Lc 11, 13), pou-l soutni pèsévérans nou, antan n-ap lapriyè yon fason spésial pou LAPÈ. Réyèlman vré, si gin yon bagay ki riské dékourajé nou nan lapriyè nou, sé kozé lapè-a. Nou pa ouè progrè l-ap fè dévan jé nou. Nou tandé anpil ménas lagè, nou tandé anpil nouvèl lagè, ni anndan, ni déyò. Époutan nou doué kontinué lapriyè toujou pou mandé lapè-a, sé yon késion pèsévérans, jan lévanjil 29èm dimanch òdinè C-a raplé-a. Sèké lapè-a, sé yon bagay ki anndan kè. Léspri Sin kapab chanjé kè yo san nou pa ouè. An tou ka lapriyè nou pa pèdi. N-ap sonjé tit Mésaj Pap Jan-Pòl II té voyé pou prémié janvié 1987 la: "Dévelopman ak solidarité: klé lapè". Tou sa doué antré nan lapriyè nou. Minm si nou pa ouè rézilta ak jé nou, Bondié ap chanjé fon kè yo kan minm. Lapriyè-a sé yon fòm solidarité. Tou sa zanmi Bondié fè sèvi pou lòt yo, jan nou di nan Krédo-a. Sé sa yo rélé "la communion des Saints". Lapè sé yon valè ki san fontiyè. N-ap kontinuyé résité bèl priyè Pap Jan-Pòl II pou mandé lapè-a.

*

Lapriyè SAN FÉBLI, sé sa Jézu mandé nou nan lévanjil 29èm dimanch òdinè C-a. Non sèlman nou pa konn sa pou nou mandé nan lapriyè-a, sé léspri Sin-an ki vi-n osékou nou avèk paròl nou pa kapab konprann (Rom 8, 26), min tou nou pa kapab kinbé ap lapriyè pandan lontan. Sint Ogustin érézman konsolé nou antan li di nou: Mézi chandèl bòn volonté nou, sé mézi lapriyè nou. Otréman di, toutotan nou kinbé anvi lapriyè-a, sé lapriyè minm n-ap fè; si nou lagé anvi-a, nou sispann lapriyè. Lè Apot yo té sou lanmè-a,

yo ouè Jézu sou dlo-a, yo té pè; lè yo rékonèt sé li minm, yo té anvi fè-l monté nan kannòt la, min minm lè-a batiman-an gin tan rivé koté li t-apralé-a; malgré té rété sèt kilomèt ankò pou ramé sou lanmè-a (Jn 6, 21). Longè anvi lapriyè nou, sé longè lapriyè nou (Sint Ogustin: Enarrationibus in psalmos", In ps 37, 13-14: CCL 38, 391-392; cf Liturgia Horarum I, 242-243; Livre des Jours, p. 7071, vendredi 3^{ème} semaine Avent). "Sa-ou anvi-a, sé li minm ki lapriyè-ou".

Min kijan Sint-Ogustin di nou sa, antan l-ap kalkilé sou Psòm 37 la. Li di: "Mouin t-ap rélé afòs kè-a t-ap plinn". Gin yon fason ou-ap plinn ki kaché, moun pa tandé-l; sèlman si pansé anvi-a plin kè-a tèlman, koté moun nan blésé anndan-an blijè fè signal yon son ki klè, y-ap chèché koz la; moun nan di anndan konsians li: Pètèt sé tèl bagay ki lakòz l-ap plinn nan, pètèt yo fè-l tèl bagay. Ki moun ki kapab konprann, si sé pa sila-a minm k-ap plinn nan pròp jé-l ak nan pròp zòrèy li-a? Sé pou sa li di: "mouin t-ap rélé akòz kè-m ki t-ap plinn", paské lèzòm, lè yo tandé yon moun ap plinn, pi souvan sé chè-a yo tandé k-ap plinn nan, min yo pa tandé moun nan k-ap plinn anndan kè-l la.

"Épi ki moun ki té konn pouki sa li t-ap rélé-a?" Li ajouté: "Tou sa-m anvi-a li dévan-ou". Si yo dévan lèzòm, yo pa kapab ouè sa-k nan kè-a, min "sé dévan-ou tou sa-m anvi-a yé". Si sa ou anvi-a dévan-l, Papa-a ki ouè nan sa-k kaché, l-ap rinmèt ou sa.

Sa-ou anvi-a li minm, sé lapriyè-ou; épi si sa-ou anvi-a la, li la tout tan, lapriyè-a la tout tan. Sèké sé pa pou granmési Apot la di: Sé pou nou lapriyè san rété. Èské sé san rété n-ap fè jéniflèksion, n-ap bésé kè nou oubyin n-ap lévé min nou, jan-l di-a : "Sé pou nou lapriyè san rété". Oubyin si sé konsa nou di n-ap lapriyè, mouin pansé nou pa kapab fè sa san rété.

"Gin yon lòt lapriyè sou pa anndan san rété, sé sa-ou anvi-a. Ou mèt ap fè ninpòt ki lòt bagay, si ou anvi saba sa-a, ou pa sispann lapriyè. Si-ou pa vlé sispann lapriyè, pa sispann anvi.

"Si anvi-ou la ap diré, voua-ou ap diré tou. Ou-ap pé bouch ou, si-ou sispann rinmin. Kilès ki pé bouch yo? Sila yo yo di osijè yo-a: "Paské péché-a débòdé, charité anpil moun vi-n frèt".

"Charité ki vi-n frèt la, sé silans kè-a; chalè charité-a, sé rèl kè-a. Si charité-a rété tout tan; si ou-ap rélé tout tan, ou anvi tout tan; si-ou anvi, ou-ap sonjé répo-a.

"Tout anvi-m dévan-ou". Sa-k rivé si anvi-ou la dévan-l, épi rèl la pa dévan-l? Koté sa kapab sòti, paské anvi-a li minm; sé nan rèl la li fè tandé voua-l?.

"Sé pousa li kontinuyé: "Rèl mouin-an pa kaché louin-ou". Li pa kaché pou ou, min li kaché pou anpil moun. Kèk foua sé kòm si pòv sèvitè Bondié-a t-ap di: "Rèl mouin-an pa kaché pou ou". Kèk foua sé kòm si sèvitè Bondié-a t-ap ri; èské anvi sa-a mouri nan kè-a? Si gin anvi, gin rèl; li pa rivé nan zòrèy lèzòm tout tan, min li pa janm sispann frapé zòrèy Bondié".

Sé konsa Sint Ogustin ankourajé nou pou nou kalkilé avèk Psòm 37/38 la li kòmanté pou nou nan ofis léktu vandrédi touazièm sèmén lavan-an. Konsa nou ouè lapriyè sé pa sèlman yon aksion, min tou sé yon éta. Yo kapab lapriyè yon fason abituèl, min si yo pa rivé fè sa kontinuelman yon fason ki mandé pou pozé aksion ak paròl. Lapriyè sé tankou yon souaf ki fè nanm nan pran élan nan diréksion dlo lavi yo. (Ps 63, 2; 42, 2; 84, 3; Jn 19, 28). Sé yon anvi ki dirijé fon kè nou nan diréksion Bondié. N-ap mandé Manman Mari pou-l soutni bra nou nan lapriyè-a tankou Aaron ak Our té fè pou Moyiz (Ex 17, 8-13).

*

* *

TRANTIÈM DIMANCH ÒDINÈ A

Pasaj lévanjil lamès trantièm dimanch òdinè A-a (Mt 22,34-40), sé diskision sou gran kòmandman-an, ki antré nan yon séri sink diskision Jézu gin avèk Juif yo. Prémie-a (Mt 21,23-27), sé sou kèsion otorité Jézu. Sé Prèt an chèf yo ak Sadéséyin yo ki ataké-l sou sa. Li réponn yo ak kozé batèm Jan-Batis la; yo pé bouch yo la minm. Dézièm nan (Mt 22,15-22), sé sou inpo pou péyé bay Séza-a (cf 29^{èm} d.o. A). Sé Farizyin yo ki ranjé avèk Érodyin yo pou pran Jézu nan pièj, li ranvouayé yo antan-l dépasé problèm nan, li rosé-l sou nivo dévoua vizavi Bondié. Touazièm nan (Mt 22,23-33), sé afè mariaj ak réziréksion-an. Sé Sadiséyin yo ki vlé pasé Jézu nan rizib ak kozé sèt frè yo ki mouri youn apré lòt, apré yo chak té fi-n marié ak minm madanm nan. Jézu dépasé kèsion sa-a tou, antan-l fè yo ouè nan réziréksion-an p-ap gin kèsion mariaj ankò, n-ap tankou Anj yo nan sièl la. Katriyèm nan (**Mt 22,34-40**), sé lévanjil trantièm dimanch òdinè A-a, koté yon Skrib nan pami Farizyin yo (Mt 22,35; Mc 12,28; Lc 10,25) vlé antravé Jézu sou kèsion pi gran kòmandman-an. Jézu ap réponn li, san-l pa okipé kèsion 613 kòmandman yo Juif yo té détayé nan laloua-a avèk distinkision 248 kòmandman ki konsènè obligasion avèk 65 kòmandman ki konsènè défans ni kèsion kòmandman ki konsékan ak kòmandman ki léjé. L-ap pran lapriyé Juif yo abitué résité matin, midi, asouè, nannuit la, sa yo rélé "Shema Israèl" la (Dt 6,4-9), ki ramné tout kòmandman yo nan rinmin Bondié ak rinmin prochin-an. Sinkièm nan (Mt 22,4-16), sé Jézu minm ki anbarasé Farizyin yo, antan-l mandé yo kijan Mési-a kapab fè pitit David, paské David rélé-l Granmèt. Apati lè sa-a, yo sispann pozé-l kèsion.

Konsa lévanjil trantièm dimanch òdinè A-a plasé nan séri sink diskision sa yo. Li nan katriyèm pozision. Sé kozé pi gran kòmandman-an. Jézu bay Farizyin yo ak Skrib yo léson pou yo pa rét ap pèdi tan nan anpil détay. Sé yon sèl kòmandman ki kinbé tout lòt yo tankou yon klou koté yo pandié tout yon séri kasròl (= "crémaillère"; cf Mt 22,40: κρέματα, "krématai"). Si klou-a kasé, tout kasròl yo ap tonbé. Sé rinmin-an ki moual tout kòmandman yo. Lè Sint Tèrèz lanfan Jézu t-ap chèché nan ki sans pou-l maché, li louvri premié Lèt Sin Pòl ékri Korintyin yo; li tonbé sou chapit 12 ak 13 la, koté Sin Pòl montré kijan rinmin-an sé prinsip tout bagay. Sint Tèrèz kòmansé ouè, apré Sin Pòl, kijan tout moun pa kapab alafoua Apot, Profèt, Savan sakré. Li ouè kijan légliz la gin divès kalité manb. Jé-a pa kapab min-an an minm tan. Li ouè kijan minm si nou t-a gin tout bon kalité, san rinmin-an nou pa anyin (Manuscrits autobiographiques, Lisieux 1957, 227-229; cf Liturgia Horarum IV, Vatican 1974, 1176). Rinmin Bondié, rinmin prochin-an, sé gran kòmandman-an. Nan lèt Sin Pòl ékri Romin yo,

li montré sé Kòmandman sa-a ki ramasé tout lòt yo (Rom 13,8-10; cf 12,3-21; Ga 5,14; Col 3,14; Jn 13,34; Ep 4,1-3) tankou tèt yo (cf Rom 13,9: ἀνακεφαλαιοῦται, "anaképhalaioutai").

Sèlman Juif yo té gin tandans konsidéré kòmandman lacharité-a tankou yon lòd ki konsèné moun ki nan minm ras avèk yo sèlman. Prémie léktu trantièm dimanch òdinè A-a montré kijan pou nou louvri kè nou tou bay moun ki soti nan lòt péyi, épi ki vi-n abité lakay nou, pou nou pa gadé yo ak mové jé, pou nou pa konsidéré yo tankou "moun vini", ki pa gin minm doua ak lòt yo (Ex 22,20-26). Jézu ap di kòmandman rinmin li bay la, sé yon kòmandman nouvo (Jn 13,34). Sé pa sèlman étranjé ki vi-n abité lakay nou pou nou konsidéré avèk atansyon, min minm sa ki poté etikèt "lènmi", ki nan lòt péyi, sé pou nou rinmin yo avèk kè sansib. Sé pou Jézu bay égzanp bon Samaritin-an, lè-l réponn késion Skrib la (Lc 10,29-37). Sèké lansyin Téstaman té di réyèlman pou rinmin prochin-an tankou ou minm (Lv 17,18). Min Skrib la té gin rézon mandé Jézu kilès ki prochin-l nan (Lc 10,29). Èské sé moun ki nan pèp li-a sèlman, jan liv Lévitik la té di-a: "Pa tiré vanjans sou **moun pèp ou**, pa kinbé yo nan kè. Sé pou-ou rinmin **prochin-ou** tankou ou minm" (Lv 19,18). Jézu éspliké prochin-an sé tout moun.

Épi Jézu mandé nou pou nou youn rinmin lòt, pa sèlman tankou nou rinmin pròp tèt nou, jan lansyin Téstaman-an té di-a, min sé pou nou youn rinmin lòt tankou li minm li rinmin nou (Jn 13,14). Kijan li rinmin nou? Li rinmèt tèt li pou nou. Sa vlé di li rinmin nou plis pasé pròp tèt pa-l. Sou sa-a tou, kòmandman-an nouvo.

Gin dépasman parapò a lansyin Téstaman. Dépasman nan longè (sé tout moun pou nou rinmin); dépasman nan lajè (sé pou nou rinmin yo pi plis pasé nou rinmin pròp tèt pa nou). N-ap mandé Manman Mari, "Manman Bèl Rinmin-an", pou-l fè nou favè louvri kè nou nan dé nouvo dimansyon rinmin sa-a.

*

* *

TRANTIÈM DIMANCH ÒDINÈ B

Pasaj lévanjil trantièm dimanch òdinè B-a (Mc 10,46-52) fè nou sonjé yon lòt pasaj nan lévanjil Sin Mak la (Mc 8,22-26), koté Jézu té géri yon lòt avèg, li té pran-l nan min, li té fè-l soti déyò bouk la, li té mét saliv sou jé-l, li té pozé min sou li, li té mandé-l si-l té ouè kichòy. Avèg la té di li ouè tankou sé pié boua k-ap maché vi-n jouinn li. Yon dézièm foua, Jézu té pozé min sou jé-l ankò épi avèg la té ouè klè nèt byin louin. Dé mirak sa yo (Mc 8,22-28 avèk Mc 10,46-52a), yo kòm ankadré tout lansègnman Jézu bay sou sans soufrans-lanmò-lévé-l la (Mc 8,27; 10,45). Pandan toua foua Jézu ap anonsé li gin pou-l souffri, pou-l mouri, pou-l lévé pandan l-ap bay lansègnman inpòtan sa-a (Mc 8,31-33 = premié son klòch la; Mc 9,30-32 = dézièm son klòch la; Mc 10,32-34 = touazièm son klòch la). Sé kòmsi lansègnman inpòtan sa-a té kadré anndan dé pòt: youn pou antré ladan-l, sé premié mirak avèg la (Mc 8,22-26), lòt la pou soti ladan-l, sé dézièm mirak avèg la, (Mc 10,46-52), lévanjil trantièm dimanch òdinè B-a. Jézu té fè premié mirak la an dé tan (Mc 8,22-26): yon premié tan koté avèg la té kòmsi ouè troub (Mc 8,24), yon dézièm tan koté avèg la té vi-n ouè klè byin louin (Mc 8,25). Dézièm mirak la minm (Mc 10,46-52), Jézu fè-l tankou yon zéklè. Sé yon fason pou montré lansègnman inpòtan l-ap bay sou soufrans lanmò-lévé-l la (Mc 8,27-10,45). Sé mòn l-ap fè nou monté ak toua rotè. Dèyè mòn sé mòn. Min plis l-ap monté avèk nou, sé plis l-ap fè nou ouè klè, jan Psòm nan di-a: "Y-ap monté **sot nan rotè al nan rotè**, épi Bondié ap parèt dévan yo nan Siyon" (Ps 84,8). Sin Pòl montré Éfézyin yo kijan gin yon progrè k-ap fèt nan dékouvèt limiè sa-a, lè-l di: "Figi nou dékouvri, n-ap fè ouè bèlté Granmèt la tankou nan yon glas, n-ap pran fòm pòtré-l, antan n-ap monté **sot nan bèlté al nan bèlté**" (Ep 3,18).

Fènoua ki anndan kè nou-an, sé pa yon ti moman Bondié ouété-l. Li pran tan. Minm si-l parèt tankou yon zéklè dévan Sin Pòl sou rout Damas, li jété-l atè, Sin Pòl avèg pandan toua jou anvan-l kòmansé ouè klè, épi sé chak jou l-ap ouè pi klè (Ac 9,3-19; 22,6-21; 26,12-18). Sé konsa Sin Pòl ékri Korintyin yo (2 Co 4,6), antan-l di: Minm Bondié-a ki té di sé pou limiè-a kléré sot nan fènoua yo, sé li minm tou ki kléré nan kè nou pou-l fè konésans bèlté Bondié-a kléré, sa-k sou fas Jézu-Kri-a. Sin Pòl lapriyè pou Bondié kléré jé kè nou (Ep 1,18). Li té résévoua mision pou-l mété réalizasion sékrè plan Bondié-a nan limiè (Ep 3,9).

Lansègnman inpòtan sa-a, sé patizan-l yo Jézu aprann li apa (Mc 8,27-10,45) apati lè Sin Piè fi-n fè déklarasion lafoua-l la (Mc 8,27-29). Sé apati lè sa-a Jézu kòmansé **anségné** yo gran vérité soufrans-lanmò-lévé-l la (Mc 8,31: "didaskain διδάσκειν"). Anvan sa, sé **préché** l-ap préché pou tout

foul la nan premié pati lévanjil Mak la (Mc 1,14-8,21; cf 1,14: κηρύσσων "kèrussôn"). Koulié-a li kité foul yo (Mc 8,27) pou-l okipé patizan-l yo sèlman. Li fi-n **préché** foul yo sou késion ki té intéresé yo-a: si-l sé Kris la (Mc 1,14-8,21). Koulié-a l-ap **anségné** patizan-l yo sou késion ki pi inpòtan: li sé Pitit Bondié. Li gin pou-l mourir, pou-l tounin koté-l soti-a, pou-l réalizé mision-l (Mc 8,29-10,45). Toua gran pati vi-n nan pasaj sa-a avèk toua son klòch (Mc 8,31-9,29 = premié-a; Mc 9,30-10,31 = dézièm nan; Mc 10,32-45 = touazièm nan).

Konsa gin dé mirak avèg Jézu géri ki ankadré gran lansègnman sa-a: premié-a sé avèg Bétsayid la (Mc 8,22-26), épi dézièm nan sé avèg Jériko-a (Mc 10, 46-51). Bétsayid sé vil Filip la, André ak Piè (Jn 1,44) nan Galilé, koté Jézu té kòmansé mision-l (Mc 6,45; Lc 9,10; Mt 11,21; Lc 10,13). Jériko minm sé prèské dènié vil Jézu ap rankontré sou chémin-l anvan-l rivé Jérusalèm, koté l-ap fini mision-l (Mc 10,46; 11,1). Jézu soti dépi nan Galilé pou-l monté Jérusalèm épi sé pandan l-ap maché l-ap bay lansègnman pou patizan-l yo; lansègnman sa-a sé tankou yon progrè nan lavi-a koté y-ap monté sot nan roté al nan roté pou Bondié parèt dévan yo nan Siyon, sa vlé di nan Jérusalèm anro-a (Ps 84,8), koté y-ap monté sot nan bèlté al nan bèlté pòtré Granmèt la (2 Cor 3,18).

Konsa, lévanjil trantièm dimanch òdinè B-a (Mc 10,46-52), sé dènié stasion sou rout lansègnman-an anvan Jézu antré solànèlman kòm Mési nan Jérusalèm (Mc 11,1-11). Gin vinsèt kilomèt ki séparé Jériko ak Jérusalèm. Sé kòm si sé dènié poz anvan dènié stasion chémin-d-Koua-a.

Avèg Jériko-a rélé byin fò (Mc 10,47). Lè Jézu té parèt dévan Apot yo li t-ap maché sou lanmè-a avèk pouvoua éstraòdinè-l la, yo té pousé rèl tou (Mc 8,49). Sé yon fason pou fè ouè grandè Jézu ak distans ki ginyin ant li minm ak avèg la épi avèk lézòm tou, paské tout moun sé avèg, dapré sa Jézu fè Farizyin yo konprann nan lévanjil dapré Sin Jan-an (Jn 9,39-40). Démon yo té pousé rèl dévan grandè-l (Mc 1,23-24; 3,11; 5,7; 9,26). Papa ti pitit ki té gin maladi tonbé-a té pousé rèl pou-l déklaré lafoua-l dévan grandè Jézu (Mc 9,24); moun yo sou rout Jérusalèm nan ap pousé rèl pou déklaré rékonésans lafoua yo nan grandè Jézu (Mc 11,9): "Ozana".

Avèg la rékonèt Jézu kòm Kris avèk tit "Pitit David", dapré promès Bondié té fè David pa lintèmediè Natan-an (2 Sam 7,12-16; 1 Ch 17,11-14; Ps 89,29-38). Moun yo ap répousé avèg la, y-ap blijé-l pé bouch li (Mc 10,48). Jézu té konn blijé démon yo pé bouch yo lè yo té konn ap fè déklarasion sou li-a (Mc 3,12). Li té blijé Piè fè silans sou déklarasion-l nan tou (Mc 8,30). Min koulié-a (Mc 10,48), Jézu pa mandé silans, okontrè. Sé moso pa moso

li té konn dévoualé li sé Kris; sé poua li té konn ap ménajé déklarasion yo sou késion sa-a dévan foul yo. Koulié-a minm li pa gin okinn ménajman pou-l pran ankò. Li rivé nan bout kous la. Avèg la minm, plis y-ap mandé-l fè silans, sé plis l-ap rélé pi fò. Avèg Bétseyid la t-ap ouè pi klè chak foua Jézu té pozé min sou li (Mc 8,22-28). Avèg Jériko-a ap rélé pi plis, pi fò tout tan. Gin kòm yon progrè nan déklarasion lafoua-l la, tankou Piè ki t-ap rékonèt pi plis Jézu kòm Kris la (Mc 8,27-30). Gin progrè nan révélation-an avèk nan lafoua-a, sé tankou yon chémin mòn k-ap monté. Konsa avèg la ap rélé pi fò tout tan kòm pou-l montré progrè lafoua-l nan Jézu kòm Kris.

Jézu mandé-l sa-l vlé (Mc 10,51), tankou li té mandé Jak ak Jan sa yo té vlé (Mc 10,36). Répons avèg la, Bartimé, nan yon lòt nivo ki pa minm ditou avèk répons Jak avèk Jan-an. Sé pa plas donè adouat-agoch li mandé; sa sèlman li mandé sé pou-l ouè klè. Malgré li té avèg la, li té ouè pi klè pasé moun yo ki ouè ak dé jé yo-a. Li té ouè pi klè sou mòd jan otorité Jézu té ginyin kòm Roua-a, li té konnin otorité sa-a sé yon sèvis.

Jézu fè konpliman pou lafoua-l. Sé lafoua-l ki touché kè Jézu tankou lè moun infim nan yo té désann nan fétay kay la dévan Jézu-a (Mc 2,5) ak madanm nan ki t-ap pèdi san-an épi ki té vi-n touché fil rad Jézu-a (Mc 5,34). Avèk yon ti kras lafoua grosè yon ti grinn jijiri, nou kapab déplasé mòn al nan lanmè. Min sé sa-k manké pi plis. Anpil moun sé kè soté ki tankou yon kouch larouy sou lafoua batèm yo, ki avéglé jé kè yo, ki fè yo fè dout, alokasion maladi, kontrariété, difikilté..., olié yo di ansanm avèk avèg la: "Granmèt, fè-m ouè" (Mc 10,51).

Avèg la suiv Jézu sou rout la, li vi-n tounin patizan-l. Nan sans sa-a prémié léktu trantièm dimanch òdinè B-a (Jer 31,7-10) montré yon kolòn vouayajé k-ap suiv Granmèt la sou rout k-ap kondui sot nan légzil Babilòn nan. Nan pami moun yo gin **avèg** tou. Sé sitiasion pèp Israèl la (Is 42,9). Granmèt la chouazi sèvitè-l, Kris la, pou-l louvri jé avèg yo (Is 42,7), pou-l kondui yo sou chémin yo pa-t konnin (Is 42,16), paské sé limiè nasion yo li yé (Is 49,6); l-ap kléré tankou solèy k-ap lévé (Is 60,1) sou pèp la ki t-ap maché nan fènoua-a, ki té chita nan lonbraj lanmò-a (Is 9,1). Sé mision Jézu, sé sa li déklaré nan kay réyinion Nazarèt la nan prémié prèch li té fè-a (Lc 4,18): "Li voyé-m anonsé avèg yo y-ap ouè klè". Li sé limiè tè-a (Jn 1,4-5.9). Moun k-ap suiv li pap maché nan fènoua, l-ap gin limiè lavi-a (Jn 8,12). Sèlman sé pou yo profité pasaj limiè-a anvan fènoua rivé plonjé yo nan dékou (Jn 12,35-36; cf Jn 9,5). Sé égzilé sa yo péché-a té égzilé louin Granmèt la, sé yo minm k-ap chanté avèk Psòm-répons trantièm dimanch B-a (Ps 125), k-ap mandé pou Granmèt la fè égzilé yo tounin-an. Péché-a té égzilé nou nan fènoua. Limiè Granmèt la pasé, "Limiè Jézu-Kri". Kolòn

limiè n-ap suiv nan nuit Pak la, k-ap kondui Pèp Israèl la nan dézè-a (Ex 13,21; 40,38). Sin Pòl di nou Jézu-Kri détrui lanmò-a, li fè lavi-a **kléré** gras a lévanjil la (2 Tm 1,10 = alélouya anvan lévanjil trantièm dimanch òdinè B-a). Sé kòm si li sèvi intèmediè nan rélasyon ant lézòm ak Bondié kòm Prèt an chèf la ki déja travèsé nan **limiè**-a, k-ap kondui nou nan minm limiè sa-a (He 5,1-6 = dézièm léktu trantièm dimanch òdinè B-a), nou minm ki té nan fè noua péché-a, nan ignorans péché-a, ki té pèdi rout nan péché-a, ki té nan féblès péché-a.

*

Jézu di li sé **Limiè** tè-a, moun k-ap **suiv** li pap maché nan fènoua, min l-ap gin lavi ki pap janm fini-an (Jn 8,12). Lè Jézu fi-n géri jé avèg la, la minm avèg la suiv li. Jézu sé Limiè, Jézu sé Chémin (Jn 14,6). Li pa ba nou limiè-l pou nou rét chita minm koté-a, min sé pou nou maché sou minm rout avèk li. Nou konn anvi ouè klè pou nou konnin ki sa Bondié vlé nou fè. Min lè nou fi-n konnin-l, nou pa fè plis mouvman pasé sa pou nou chanjé konpòtman. Nou rété nan minm fason nou t-ap viv la. Sa pa angajé nou plis pasé sa. Sé tankou yon konésans an plis nou té bézouin pou léspri nou, min volonté nou pa fè okinn jès pou-l antré nan diréksion intéljans la ouè-a.

Avèg la fi-n di: "Granmèt, fè-m ouè". Min lè-l fi-n ouè, li pa rét chita sou bò chémin-an toujou ap mandé lacharité. Li kité manto-l ak tout ti asirans li, li pati dé min vid nan group patizan Jézu yo sou rout Jérusalèm nan. Li minm tou li t-ap tann Mési-a, Pitit David la, k-ap vi-n poté limiè pou nasion yo, jan Siméon té di nan Tanp la (Lc 2,32), antan-l sité dézièm Kantik Sèvitè Granmèt la (Is 49,6; cf Is 42,6; 9,1). Sètènman avèg la pa-t ouè nan ki sans Jézu té Limiè tè-a. Li té avèg. Li ouè klè. Sé ofi-amézi l-ap gin pou-l konprann pi byin limiè sa-a li ouè-a, sé yon sign yon lòt limiè yo pa kapab ouè ak jé, ki pi konsékan toujou, limiè lagras la, limiè lafoua-a (cf Jn 9,38). Moun k-ap viv nan péché, sé nan fènoua y-ap drivé, minm si yo gin dé jé yo; yo ouè limiè solèy la, min yo avèg parapò a limiè lagras la. Sint Tèrèz davila di yon moun ki nan éta-de-gras, sé tankou yon boul kristal ki kléré anpil; li tèlman bèl, nou t-a anvi mouri pou nou gadé-l tout tan. Sèké yon moun ki nan éta-de-gras, li sé Paradi Bondié abité, Bondié sé Limiè; li kléré-l sou pa anndan. Avèg la réprézanté Pèp sa-a Izayi palé osijè-l la, lè-l di: "Pèp ki chita nan fènoua ak lonbraj lanmò-a, li ouè yon gran Limiè ki vi-n kléré sou li" (Is 9,1). Sèké Profèt Izayi réprézanté Mési-a sou fòm Limiè k-ap kléré nan fènoua. Pèp ki té chita nan fènoua ak lonbraj lanmò-a, sé Pèp Israèl la ki t-ap drivé nan péché épi ki té kòm égzilé sot nan péyi li-a, ki té ésklav sou tè étranjé. Sé li minm Mési-a t-ap ramné nan pròp péyi-l, jan

Profèt Jérèmi di-a nan premié léktu trantièm dimanch òdinè B-a (Jer 31,7-9), épi jan Psòm-répons la chanté-a (Ps 125/126,1).

Pasaj Jézu, sé yon gras li yé. Avèg la té gin lontan li té chita atè-a, nan fènoua, ap mandé lacharité. Jézu vi-n ap pasé, li profité pasaj li-a pou-lévé, pou-l fini ak kondision sa-a. Gin moun ki chita nan péché-a dépi lontan. Jézu ap pasé dévan yo yon lè nan yon fason éstraòdinè, nan yon sikonstans spésial. Sé yon okazion pou yo soti nan péché-a. Sèlman kilès k-ap ba yo okazion sa-a? Sin Pòl di: Kijan pou moun yo fè kouè, si pa gin **Misionè** k-ap préché Bòn Nouvèl la (Rom 10,14). Sin Grégoire le Grand di: Tè-a plin prèt, min li pa fasil pou jouinn travayè pou rékòlt la, paské nou résevoua réponsabilité prèt la, sé vré, min kanta pou travay la réponsabilité sa-a mandé-a, nou pa réalizé-l. Travay sa-a sé dabò préché Bòn Nouvèl la, pou limiè kléré avèg yo (cf Hom 17,1-3: PL 76, 1139; Liturgia Horarum IV, Vatican 1974, 1215: "Ecce mundus sacerdotibus plenus est, sed tamen in messe Dei rarus valde invenitur operator, quia officium quidem sacerdotale suscepimus, sed opus officii non implemus"). Yon mision sé yon gran gras. Sé yon pasaj spésial Jézu ap fè dévan moun ki chita nan fènoua, tankou avèg la, pou ba yo chans rélé: "Granmèt, Pitit David, pitié pou mouin, fè-m ouè, pou-m soti koté-m yé-a, pou-m suiv ou". Gin anpil koté yo té lagé mouvman mision-an, yo rékòmansé pran-l ankò. Sèké yo konstaté lòt métòd yo té vlé mété pou ranplasé-l yo, yo pa bay rézilta yo té éspéré-a. Gin yon gras spésial ki soti nan mision-an. Sé pa nou minm ki mété-l, nou pa kapab prévoua-l, nou pa kapab ouété-l, nou pa kapab orienté-l, nou pa kapab pézé-l. Sé pou nou aksépté-l, sé pou nou rékonèt nou dévan yon mèvèy sakré ki dépasé nou.

N-ap mandé Manman Mari pou nou fè kò nou tou piti, pou nou aksépté tout déranjman aktivité misionè-a déklanché nan program nou, pou nou pa mérité répròch ki di: gin moun program yo sé "habitatores quietis", sa vlé di: "Kité-m trankil" (cf Règle manuscrite, 2; Œuvres complètes, 690).

"**Lumière**": 135 foua nan Lansyin Téstaman, 71 foua nan Nouvo Téstaman: Gn 1,3.4a.b.5.18; Ex 10,23; 35,14; Nb 4,9; 8,2; 2 Sm 23,4; Tob 3,17; 5,10; 10,5; 11,3.14; 15,11; 14,10; Est 1,1k; 8,16; 10,3c; 1 Mac 1,21; 2 Mac 4,22; Job 3,4.9.20; 8,6; 12,22.25; 17,12; 18,5.6.18; 22,11.28; 24,13.16; 26,10; 29,3; 30,26; 33,28.30; 37,21; 38,15.19; 41,10; Ps 4,7; 19,9; 27,1; 36,10; 38,11; 43,3; 44,4; 49,20; 56,14; 74,16; 97,11; 104,2; 112,4; 119,105; 148,3; Pr 4,18; 6,23; 13,9; 16,15; 29,13; Qo 11,7; 12,2; Sg 5,6; 6,22; 7,10.26.29; 10,17; 17,20; 18,1.4a.b; Si 17,8; 22,11; 24,32; 26,17; 32,16; 33,7; 50,29; Is 2,5; 5,20a.b.30; 9,1a.b; 10,17; 13,10a.b; 18,4; 30,26a.b.c; 42,6.16; 49,6; 51,4; 53,11; 58,8.10; 59,9; 60,1.3.19a.b.20; Jer 4,23; 13,16; 25,10; Lam 3,2;

Ba 3,14.20.33; 4,2; 5,9; Dn 2,22; 3,72; 5,1.14; Os 6,5; Am 5,18.20; 8,9; Mi 7,8.9; Za 14,6.7; Mt 4,16a.b; 5,14.16; 6,23; 17,2; 24,29; Mc 13,24; Lc 2,32; 8,16; 11,35; 16,8; Jn 1,4.5.7.8a.b.9; 3,19.20.21; 5,35; 8,12a.b; 9,5; 11,9.10; 12,35a.b.36a.b.46; Ac 9,1; 12,7; 13,47; 16,29; 22,6.9.11; 26,13.18.23; Rom 2,19; 13,12; 2 Cor 4,6; 6,14; 11,14; Ep 3,9; 5,8a.b.9.13.14; Ph 2,15; Col 1,12; 1 Th 5,5; 1 Tm 6,16; Jc 1,17; 1 p. 2,9; 1 Jn 1,5.7a.b; 1,8.9.10; Ap 18,23; 21,24; 22,5.

*

* *

TRANTIÈM DIMANCH ÒDINÈ C

Trantièm dimanch òdinè C-a, sé "Prière humble". Piblikin-an té fè kò-l tou piti pou-l lapriyè, antan li rékonèt, li sé péchè, li pa gin okinn doua nan sa l-ap mandé-a (Lc 18, 9-14 = évanjil). Sé lapriyè moun ki rabésé tèt li-a ki travèsé niaj yo (Sir 35, 12-18 = prémié léktu), tankou lapriyè la Trè Sint Viè Mari, Bondié voyé jé-l sou Sèvant li ki tout piti, li lévé sa ki pòv la anlé. Yon pòv rélé, Granmèt la kouté-l, paské li tou pré moun ki gin kè yo krazé yo (Ps 33/34 = Psòm-répons). Fè kò nou tou piti, sé kondision rékonsiliation-an sa. Nan sakréman rékonsiliation-an, sakréman lapénitans la, sakréman lakonfésion-an, nou gin pou nou fè kò nou tou piti, pou nou bénéfisié rékonsiliation-an ki réalizé nan Jézu-Kri-a, sa Apot yo sèvi pòt paròl pou li-a (2 Co 5, 19 = dézièm dimanch léktu). Lè n-ap konfésé, nou pa doué fè tankou Farizyin an k-ap rakonté tou sa-l fè ki bon, k-ap akizé lòt. Nou doué fè tankou Piblikin-an, rékonèt nou sé péchè tout bon vré dévan Bondié. Nou doué fè kò nou piti. Lè yon pòv ap mandé lacharité, li lonjé min-l, li pa fè arogans, kòm si li mérité sa l-ap mandé-a. Sé konsa pou nou prezanté dévan Granmèt la, pou-l kouté lapriyè nou, tankou yon ti pòv.

Lapriyè sé rékonèt nou pa anyin dévan Bondié, ni dévan Anj yo, ni dévan moun yo. Sé rékonèt gin yon vid anndan fon kè nou Bondié sèl kapab konblé pa lintèmediè léspri Sin-an, paské sé li minm ki mété vid sa-a, jan Pap Jan-Pòl II di nou nan lèt li té ékri sou léspri Sin-an, pou Lapankot 1986 la: "Dominum et vivificantem" ("Li sé Granmèt é li bay lavi", n. 65). Priyé moun ki rabésé tèt li-a, li travèsé niaj yo, dapré sa liv Ékléziastik la di nou-an, nan prémié léktu trantièm dimanch òdinè C-a (Si 35, 21). Asasin-an sou koua-a té rékonèt sé yon péchè li yé. Li mandé Jézu sonjé-l lè-l rivé nan péyi koté li Roua-a. Jézu réponn li l-ap avèk li minm jou Vandrédi Sin sa-a nan Paradi-a (Lc 23, 41-43). Mari-Madlèn kriyé nan pié Jézu, li vidé losion sou li, li siyé pié-l ak chévé-l. Li rékonèt kondision-l kòm péchè. Tout péché-l padonnin la minm (Lc 7, 36-50).

Dévan sa nou fè ki mal, nou kapab dékourajé, lè nou ouè bafon koté nou tonbé, oubyin nou kapab fèmin jé nou pou nou pa rékonèt féblès nou. Époutan alafoua sé pou nou aksépté distans ki séparé nou ak Bondié-a épi fò nou gin konviksion Bondié tou pré nou pou-l lévé nou jous roté figi-l pou-l pozé nou jous sou kè-l (Os 11, 4), san-l pa sonjé anyin nan sa-k té pasé (Is 1, 18; Ps 103, 12; Jer 31, 34). Konfians nou ginyin-an, sé nan li minm li rété, sé pa nan nou minm.

Nan lèt Pap Jan-Pòl II té voyé pou lapankot 1986 la, osijè léspri Sin-an, li té di nou nan dézièm pati-a (nn 27-48) léspri Sin-an fè nou ouè péché tè-a. Li

té fini pati sa-a (nn 46-48) antan-l té palé nou sou péché kont léspri Sin-an. Li té raplé pasaj Matié (Mt 12, 31-32), Mak (Mc 3, 28-29) avèk Luk (Lc 12, 10). Li rélé yo "paroles du non pardon" (n. 46). Li di péché sa yo rélé "blasphèmes contre l'Esprit Saint"-an, sé pa késion jouré léspri Sin-an, min sé réfizé résévoua Délivrans la Bondié ofri moun nan, pa lintèmediè léspri Sin-an, k-ap ajì avèk fòs sakrifis lakoua-a (n. 46). Moun nan réfizé limiè péché-a léspri Sin-an montré-l la, pou-l sové-l la. Konsa li réfizé prezans léspri Sin-an tou k-ap sèvi-l Avoka pou plédé kòz li-a, pou défann li-an, pou konsolé-l la. Li pa aksépté pouvoua San Jézu-Kri-a k-ap délivré-l antan-l nètouayé konsians li sot nan aksion lanmò yo. Nan sans sa-a Pap la fè sonjé réfléksion Sin Toma dakin, ki di sé yon péché ki pa gin padon, paské li réfizé baz koté pou padon-an chita-a (S. Th. Iia-IIae, q. 14, a.3; cf S. Augustin, Epist. 105, 1, 48-49; PL 33, 814-815; péché "irrémissible de par sa nature, parce qu'il exclut les éléments de grâce auxquels est accordée la rémission des péchés").

Si moun nan louvri kè-l pou-l aksépté limiè léspri Sin-an bay sou péché-a, léspri Sin-an chanjé fon konsians li, li fè-l viré nan diréksion sous délivrans yo ki toujou louvri; sé mision léspri Sin-an minm pou-l fè yo koulé, pou-l tiré nan sous sa yo, san yo pa janm kapab tari. Min si moun nan réklamé doua pou-l pèsisté nan sa-k mal la ninpòt ki kalité péché- li réfizé Délivrans la. Li fèmin tèt li nan péché-a, li mét inposibilité pou-l chanjé, pou-l résévoua padon, paské li pa konsidéré padon sa-a gin nésésité ni inpotans pou lavi-l. Sé détrui lavi nanm li ap détrui, paské péché sa-a pa pèmèt li soti nan prizon-an koté-l fèmin tèt li-a. Li pa pèmèt li louvri kè-l nan sous k-ap sot nan Bondié pou nètouayé konsians li-a, pou padonnan péché-l yo. Aksion léspri Sin-an k-ap éséyé mét limiè sou péché-a, li rankontré yon rézistans, anndan fon kè moun nan, sé kòmsi aksion sa-a pa kapab antré anndan fon konsians li. Sé moun nan minm ki chouazi pou-l fèmin kè-l karéman (n. 47). Kè-l vi-n di kon ròch (Ps 8, 13; Jer 7, 24; Mc 3, 5). Li vi-n pèdi sans péché-a (cf Réconciliation et pénitence, n. 18). Sé poua Pap Pi XII té di: "Le péché de ce siècle est la perte du sens du péché" (Radio-message, Congrès eucharistique national E.U.A, Boston 26 octobre 1946; cf Discorsi e Radiomessaggi VIII [1946] 288). Dépi yon moun pèdi "sans péché", li vi-n pèdi "sans Bondié" tou (Dominum et vivificantem, 47). Nan moun gin yon "jèm-Bondié" moun nan pòtré, paské sé nan Bondié li soti épi sé nan Bondié li gin pou-l alé. Sé poua sé sa-k kaché nan Bondié-a ki kapab dévoualé sa-k kaché nan moun nan. Konsa pa gin yon vré sans péché, si moun nan pa rékonèt péché sé yon afron ki dirijé kont Bondié li minm.

Sé tout tan légliz ap lapriyè pou moun nan kapab aji douat nan konsians li, pou-l pa pèdi sansibilité konsians li doué ginyin parapò a sa-k byin ak sa-k mal la. Sé aksion léspri Vérité-a ki kapab ba-l sa ki pou fè-l aji douat, ki pou fè-l sansib parapò a sa-k byin ak sa-k mal. Sé pousa Sin Pòl di Tésalonisyin yo: "Pa étinn léspri Sin-an!" (1 Th 5, 19), épi li mandé Éfézyin yo: "Pa fè léspri Sin-an lapinn!" (Ep 4, 30). Sé tout tan pou nou lapriyè pou péché sa-a pa grandi sou tè-a, okontrè minm pou-l rékilé sot nan kè moun yo ak nan sosiété yo, pou moun yo louvri konsians yo, pou léspri Sin-an kapab sovè yo, pou yo paré pou aksépté limiè-l k-ap montré kot péché-a yé. Sint Ogustin di sé dé kan ki ginyin: yon bò, moun nan ki rinmin tèt li joutan li méprizé Bondié; lòt bò-a, moun nan ki rinmin Bondié joutan-l méprizé pròp tèt pa-l (De Civitate Dei XIV, 28: CCL 48, 451; cf Dominum et vivificantem 48). Lè nou rékonèt péché nou, nou rinmin Bondié joutan nou méprizé pròp tèt pa nou. Lè nou réfizé rékonèt péché nou, nou rinmin tèt pa nou joutan nou méprizé Bondié. Sékrè bon kè-a (1 Tm 3, 16) ki kaché nan Bondié-a, l-ap batay ak sékrè mal la (2 Th 2, 7) ki kaché nan moun nan.

N-ap mandé Manman Mari pou-l louvri kè nou, pou léspri Sin-an ranpòtè laviktoua sa-a, li minm Jézu-Kri té soufflé sou Apot yo nan asouè Dimanch Pak la, antan-l té ba yo pouvoua éfasé péché yo (Jn 20, 22-23), pou rékonsiliation ki fèt sou Koua-a réalizé nan chak moun. (2 Cor 5, 19). Sé léspri Sin ki vi-n o-sékou féblès moun nan k-ap lapriyè-a, paské moun nan pa konn ki sa pou-l mandé nan lapriyè-l (Rom 8, 26). Sé li minm k-ap lapriyè pou nou, ak paròl nou pa kapab konprann, koté-k gin vré lapriyè, léspri Sin-an prézan (Dominum et vivificantem, n. 65), paské sé li k-ap gidé lapriyè-a sou pa anndan. Sé pousa yon vré lapriyè sipozé moun nan rékonèt li pa anyin ni dévan Bondié, ni dévan Anj yo, ni dévan li minm, tankou Piblikin-an nan fon Tanp la (Lc 18, 13) k-ap di: "Bondié, éfasé fot mouin, mouin sé péchè!" n-ap fè bèl lapriyè sa-a kontinué sonnin anndan kè nou, chak fousa n-ap sonjé paròl Psòm yo, sitou sa yo rélé Sèt Psòm pénitans yo (Ps 6; 32; 38; 51; 102; 130; 143), spésialman Psòm nan ki di: "mouin rékonèt fòt mouin, péché-m nan dévan tout tan-an (Ps 51, 5), avèk sa-k di: "mouin déklaré-ou péché-m nan, mouin pa kaché fòt mouin-an, mouin di m-ap konfésé sa-m fè ki mal yo dévan Granmèt la, épi ou éfasé péché-m nan (Ps 32, 5). Anvan lamès la kòmansé, nou rékonèt dévan Bondié nou fè anpil péché, nou mandé la Trè Sint Vièj Mari, tout zanmiy Bondié ki nan sièl la ak tout fidèl yo lapriyè pou nou. Nan lapriyè "Je vous salue, Marie"-a, n-a insisté yon fason spésial sou paròl sa yo: "Priez pour nous, pauvre pécheurs".

*

Lè n-ap lapriyè, nou konn gin inprèsiyon sé yon chèk n-al tiré labank sou manman lajan-an nou té déposé nan biro Bondié-a. Sé kòm si sa nou mandé-l la, li doué nou li. Sé tou jis si nou pa mandé-l avèk arogans. Farizyin-an mét tou sa-l konnin déyò pou-l fè Bondié ouè li gin doua mandé sa-l mandé-a, épi Bondié doué ba li-l. Priyè konsa pap monté kot Bondié, li pap travèsé niaj yo dapré sa liv Ékléziastik la di-a (Si 35, 21). Gin moun lè y-ap lapriyè, sé non sèlman tou sa yo fè ki bon yo y-ap di, min yo profité tou pou yo avili lòt yo, antan y-ap fè konparézon avèk pròp tèt pa yo. Tout défo yo nan boutèy noua, défo lòt moun yo minm nan boutèy blan. Finisman lévanjil jodi-a raplé nou Magnifikat la Trè Sint Vièj la: "Tout moun k-ap lévé tèt yo, y-ap rabésé-l; moun ki rabésé tèt li, y-ap lévé-l anlè". Li jété sa-k gin pouvoua yo sot sou tro-n yo, li lévé sa ki pòv yo anlè.

Bondié pran plézi pou-l kouté lapriyè Manman Mari, paské li fè kò-l tou piti pou-l lapriyè, li sé pòv Sèvant Granmèt la. Youn nan pi bèl Psòm nan labib la di: "Granmèt, kè-m pa gonflé, léspri-m pa arogan, mouin pa pran chémin grandè, ni mèvèy k-ap dépasé-m, okontrè mouin kinbé nanm mouin anndan-m tankou yon ti bébé ki bloti ti kò-l sou léstomak manman-l, nanm mouin byin trankil an silans (Ps 131). Sé konsa nou doué lapriyè, tankou pòv piblikin-an ki pa minm lévé jé-l anlè, li bloti ti kò-l atè-a, pou-l rékonèt sé pòv péchè li yé, sé sou kont Bondié li yé, pou-l mandé-l pran pitié pou li, pòv péchè. Lè nou antré nan yon légliz koté ki gin Trè Sin Sakréman, sé pou nou ajénou pou nou rabésé tèt nou nan lapriyè nou, paské Pèsonaj ki prézan la-a, nou pa mérité pou nou défèt lasèt sandal li.

*

* *

TRANTÉINIÈM DIMANCH ÒDINÈ A

Moun ki lévé tèt li, y-ap fè-l bésé-l. Sa-k bésé-l la minm, y-ap lévé-l (Mt 23,12)... Paròl sa yo fè nou sonjé kantik rémèsiman la Trè Sint Vièj Mari-a, Magnifikat la, lè-l di: "Granmèt la voyé jé-l sou Sèvant li ki rabésé tèt li-a. Apati koulié-a tout moun ap di mouin gin chans. Granmèt la déplouayé fòs bra-l, li chaviré grandizè yo sot sou fotèy yo, li lévé sa-k tou piti yo anlè" (cf Lc 1,48.51-52).

Père de Foucauld di sé yon sèl dènié plas ki té rété, sé Jézu ki pran-l; si nou vlé jouinn Jézu, sé la pou-n al chèché-l. Lè yon moun rabésé tèt li, li touché kè Bondié (Si 35,21). Lè-l lévé tèt li, antan-l konprann li plis pasé lòt yo, sé distans l-ap pran parapò a Bondié. Moun yo ki t-ap bati kay ro Babèl la pou yo t-al chèché monté rotè Bondié-a, sé désépsion yo pran (Gn 11,1-9). Lè la Trè Sint Vièj Mari té parèt a Lourdes devan Sint Bènadèt, li té mandé-l pou-l té bouè dlo nan yon ti ma labou. Bènadèt obéyi. Sé yon jès pénitans sa té yé, pou Bènadèt té rabésé tèt li. Sé ak labou Bondié té fè nou (Gn 2,7). Sé tout tan pou-n ap sonjé sa. Lògèy sé yon gran rasi-n péché li yé. Sé li minm ki louvri lis sèt péché kapito yo. Ni lévanjil trantéinièm dimanch òdinè A-a (Mt 23,1-12), ni prémié léktu-a (Mal 1,14-2,10), yo palé nou osijè moun ki gin ròl pou yo dirijé légliz la. Jézu réproché Skrib yo ak Farizyin yo poutèt yo gin yon lansègnman nan bouch yo, min konduit yo pa réglé sou li. Yo té doué sèvi Pèp la modèl. Min okontrè yo vi-n tounin okazion pou fè-l tonbé. Yo mét inpòtans sou sa-k parèt déyò. Y-ap lavé véso-a sou pa déyò, min anndan-an rét byin sal. Jézu di moun ki pi ro-plasé-a, sé li minm ki pou sèvi lòt yo. Li minm minm li té bay Apot yo égzanp, antan-l té pran yon sèvièt, li té pasé nan tay li, li té lavé pié Apot yo, yo minm ki t-ap batay pou prémié plas la (Jn 13,1-15). Profèt Malachi di: Prèt yo kité rout la, yo fè laloua-a vi-n tounin lokazion pou foul moun yo tonbé. Yo pèvèti kontra-a Bondié té pasé avèk Pèp la. Bondié li minm tou l-ap réprann konsidèrasion yo té ginyin-an, l-ap rabésé yo dévan tout Pèp la (Mal 1,14-2,10). Olié yo trasé chémin pou montré moun yo Bondié ki sèl Papa-a, yo drésé kò yo kòm rido ant Bondié ak Pèp la. Psòm-répons la (Ps 130/131) fè déklarasion kijan sé yon kè tou sinp, tou pòv, ki fè Bondié plézi, yon kè ki pa arogan, ki pa gin lanbision, ki pa gin prétansion, ki pap chèché monté disèt rotè. Sé tankou yon kè ti bébé ki pozé byin trankil sou kè manman-l. Sin Pòl di nou (1 Th 2,7-13 = 2^{èm} léktu) lè-l t-ap fè sèvis Apot li kot Tésalonisyin yo, li té fè kò-l tou piti, tou dou, pou-l pa-t fè otorité-l pézé sou yo. Okontrè li té fè tankou yon manman k-ap okipé pitit li yo, k-ap karésé yo, k-ap nourri yo, k-ap souin yo.

N-ap mandé Manman Mari minm konpòtman Sin Pòl sa-a, lè n-ap okipé travay mision Granmèt la konfié nou, pou nou pa fè pèsòn nou ak otorité nou vi-n tounin yon poua-sinkant sou do moun yo, min okontrè pou sé nou minm ki poté yo sou bra nou tankou Simon Sirèn k-ap édé Jézu poté Koua-l.

(Granmèt mouin, kè mouin byin dosil
Moun ki lévé tèt, Bondié fè-l bésé-l)

*
* *

TRANTÉINIÈM DIMANCH ÒDINÈ B

Kòmansman lévanjil trantéinièm dimanch òdinè B-a (Mc 12,28) fè rélation avèk pasaj koté Jézu té bay répons ki fèmin bouch Sadiséyin yo (Mc 12,18-27) osijè mariaj la avèk sa k-ap pasé nan lòt lavi-a apré lanmò-a. Yon profèsè labib mandé Jézu ki kòmandman ki pi gran nan yo tout. Jézu réponn avèk lapriyè Juif yo abitué di chak jou-a, ki kòmansé avèk mo sa yo: "Kouté Israèl (Mc 12,29 = Dt 6,4-5), yo rélé priyè sa-a "Shema, Israèl", sa vlé di "Kouté Israèl". Sé pi gran kòmandman pou Juif yo. Yon sèl Bondié pou-ou rinmin, ak tout kè-ou, ak tout nanm ou, ak tout fòs ou. Détéronòm (Dt 6,6-7) di sé pou paròl sa yo rété gravé nan kè yo, pou yo répété yo bay pitit yo, ni anndan lakay, ni déyò, ni lè yo kouché, ni lè yo kanpé, pou yo maré yo nan min yo ak sou fron yo, pou yo ékri yo sou poto kay yo ak sou pòt yo. Kòm kòmandman sa-a sé li minm ki pi gran-an, sa vlé di sé li minm ki kinbé tout lòt yo, tankou yon manman ki fè tout pitit li yo. Sin Pòl di nou sa yon lòt fason nan lèt li ékri Romin yo (Rom 13,8-10). Rinmin-an sé tout laloua-a. Sin Pòl palé osijè rinmin prochin-an. Sin Jan di sa tou nan premié lèt li-a, antan-l konsidéré rinmin prochin-an tankou yon sign ki fè nou dékouvri rinmin Bondié-a (1 Jn 4,20). Nan sans sa-a tou lé dé kòmandman sa yo fè yon sèl. Yo sanblé. Profèsè labib la té mandé éklèsisman sou premié kòmandman-an (Mc 12,28). Jézu minm réponn li pou dézièm nan tou (Mc 12,31). Épi li mété tou lé dé ansanm lè-l di: "Pa gin kòmandman pi gran pasé sa yo" (Mc 12,31b). Nou pa kapab di nou rinmin Bondié nou pa ouè-a, si nou pa rinmin prochin nou nou ouè-a (1 Jn 4,20). Sé poussa minm Jézu ajouté nan répons li-a (Mc 12,31): "Min dézièm nan: sé rinmin prochin-an tankou ou minm" (cf Lv 19,18).

Sèlman nan Lévitik (Lv 19,18), mo "prochin"-an pa-t vlé di "tout moun", sa té vlé di "moun ki **pròch** dapré rélation fanmi, pèp...." paské Lévitik (Lv 19,18) di: "Pa tiré vanjans, pa kinbé faché kont pitit **pèp ou-a**, sé pou-ou rinmin **prochin-ou** tankou ou minm". Sé poussa nan lévanjil Sin Jan-an (Jn 13,34) Jézu ap di: "Mouin ba nou yon kòmandman **nouvo**: sé pou nou youn rinmin lòt, **tankou mouin té rinmin nou-an**, sé konsa pou nou youn rinmin lòt" (Jn 15,12,17). Sint-Ogustin ap fè kòmantè sou premié lèt Sin Jan-an (1 Jn 2,7-8) osijè kòmandman nouvo-a épi l-ap di nou sé nan sans sa-a kòmandman-an nouvo-a: sèké sé pa sèlman rinmin lòt la tankou nou minm, min tankou Jézu té rinmin nou. Li rinmin nou jous li mouri pou nou. Sé prèv rinmin li bay la. Min sé pa pou yon sèl pòsion moun li mouri, sé tout moun li rinmin. Prochin-l sé tout moun, paské Pèp li sé légliz la, sa vlé di tout moun, tout Pèp Bondié-a. Nan pasaj koté Sin Luk (Lc 10,25-28)

rakonté minm bagay la, li profité pou-l bay ésplikasyon léson-an avèk parabol Jézu té bay osijè bon Samaritin-an (Lc 10, 29-57), lè profèsè labib la té mandé-l kilès ki prochin-l nan. Prochin ou, sé tout moun, minm sa nou konsidéré kòm lènmi nou yo.

Profèsè labib la fè konpliman pou répons Jézu-a (Mc 12,32-33), li ajouté: rinmin-an pi gran pasé sakrifis, antan-l sité pasaj Profèt Samuèl (1 Sam 15,22) ak Ozé (Os 6,6). Jézu minm fè konpliman pou profèsè labib la tou, min Jézu invité-l pou-l fè progrè. Jézu di-l: "ou pa louin péyi koté Bondié Roua-a" (Mc 12,34). Sa vlé di: ou pa ko fi-n rivé nèt; fè progrè toujou. Sé tankou lè Jézu té di jénòm rich la, ki té di li té obsèvé tout kòmandman yo dépi-l té tou piti-a: "Yon sèl bagay manké-ou pou-ou fi-n rivé nan bout chémin lavi ki pap janm fini-an: al vann tou sa-ou ginyin, bay pòv yo, vini, suiv mouin, ou-a gin yon richès nan sièl la" (cf Mc 10,21). Toujou gin éfò pou fè an plis, lè n-ap suiv Jézu, nou pa janm fi-n rivé sou tè sa-a. Lè nou konprann nou fi-n rivé, sé rékilé n-ap rékilé. Sé moun ki vif, k-ap fè éfò tout tan sou pròp tandans yo k-ap pran sièl la daso (Mt 11,12; cf Lc 16,16).

Apré sa pèsòn pa ozé pozé Jézu késion ankò (Mc 12,34). Sé konsa Sin Mak vlé fè konprann apati koulié-a sé Jézu k-ap kòmansé pozé késion li minm, pou-l anbarasé profèsè labib yo atò (Mc 12,35-37) osijè késion Pitit David la.

Konsa lansègnman Jézu-a sé yon fason pou raplé li pa vi-n pou-l détrui lansyin Téstaman-an, min pou-l réalizé-l nèt, pou-l dépasé koté-l té rivé-a, antan-l montré tout vré dimansion-an (Mt 5,17-20). Li vi-n réalizé-l (Mt 5,17). Li vi-n dépasé-l (Mt 5,20). Sé nan dépasman-an minm réalsasyon-an yé. Nan sans sa-a li éspliké nou: lontan yo té di nou: "rinmin prochin-ou, rayi lènmi-ou" (cf Mt 5,43). Min mouin minm mouin di nou: "rinmin lènmi nou, fè dibyin pou moun k-ap pèsékité nou" (cf Mt 5,4). Sé poussa sou Koua-a (Lc 23,24) Jézu di: "Papa, padonnin yo, paské yo pa konn sa y-ap fè". Sé minm paròl sa yo Sint-Étièn répété lè y-ap kalonnin-l ak kout ròch la, pandan l-ap mouri-a (Ac 7,60; cf Lc 6,27-35).

Sé yon fason pou Jézu tiré sot nan dépo-l sa-k nèf ak sa-k ansyin (Mt 13,52) lè-l pran lansègnman lansyin Téstaman-an nan Détéronòm nan (Dt 6,2-6) pou-l éspliké-l avèk dépasman li ba li-a, jan-l abitué fè-a. Sé poussa 31^e dimanch òdinè B-a pran pasaj sa-a kòm premié léktu pou préparé nou résévoua lansègnman tou nèf Jézu-a nan lévanjil Sin Mak la (Mc 12,28-34). Psòm-répons la (Ps 17/18) fè nou chanté kòm réfrin: "Mouin rinmin-ou, Granmèt, ou minm ki fòs mouin" (= v.2). Alélouya-a ki préparé nou pou

nou tandé mèsaj lévanjil la, li di: "Moun ki rinmin-m, li kinbé paròl mouin, Papa-m ap rinmin-l, n-ap vi-n lakay li, n-ap abité lakay li" (Jn 14,23).

Lèt Ébré yo (He 7,23-28), kòm dézièm léktu, pa antré dirèktéman nan lign mèsaj lansègnman nou jouinn nan tout lòt léktu trantéinièm dimanch òdinè B-a, paské sé yon pasaj nan léktu y-ap li chak dimanch yon fason abituèl alasuit, san yo pa chèché pou kadré-l spésialman avèk lévanjil la; min malgré sa, nou gin doua ouè li palé sou sakrifis Jézu-a kòm prèt an chèf ki ofri pròp tèt li san-l pa bézouin ofri bèt kòm sakrifis (He 7,27). Sa fè nou sonjé kijan Profèt Ozé di: "sé rinmin-an mouin vlé, sé pa sakrifis bèt" (Os 6,6). Épi sa raplé nou kijan Jézu di pi gran prèv pou montré nou rinmin, sé bay lavi nou pou sila-a nou rinmin-an. Konsa nan lèt Ébré-a, nou jouinn yon aplikasyon nan réalité aksion Jézu ki vidé yon limiè sou lansègnman-l nan.

Prémié priyè 25^e dimanch òdinè-a di: "Bondié, ou mandé pou nou rinmin ni ou minm ni prochin nou. Tout pati ki fòmé laloua sakré-a, sé nan sa ou rasanblé yo. Fè nou obsèvé kòmandman-ou yo, pou nou réyisi rivé nan lavi k-ap diré tout tan yo". Minm si sé pa priyè pou 31^e dimanch òdinè-a, n-a sonjé li kapab édé nou fè lansègnman nou résévoua nan léspri nou-an pasé nan kè nou.

Nou pap bliyé tou répons Jézu té bay profésè labib la, li té kòmansé avèk pasaj Détéronòm nan ki di: "Kouté, Israèl, Granmèt la, Bondié-ou la sé **yon sèl** Bondié-a" (Dt 6,4). Rinmin Bondié, sé kòmansé rékonèt sé li minm sèl ki Bondié, pa gin lòt. Nou pa kapab sèvi dé mèt alafoua. Sèvis rinmin-an sé yon kontra. Fò nou fidèl nan kontra batèm nan ki fè nou rékonèt ak lafoua sé yon sèl Bondié ki mèt nou. Sé yon sèl Bondié ki vivan. Sin Pòl di nou sé pou nou évité sèvis zidòl (1 Cor 10,14). Li di sa yo sakrifé nan sérémoni zidòl yo, sé bay démon yo sakrifé yo, li pa vlé nou antré nan rélasyon avèk démon (1 Cor 6,14.16). Zidòl la pa anyin (1 Cor 10,19). Sé démon-an ki kichòy (1 Cor 10,20). Granmèt la sé Bondié ki jalou (1 Co 10,22).

Yon sèl Bondié pou-ou adoré,
pou-ou rinmin ak tout kè-ou.

*

Sin Pòl di sé rinmin-an ki sèl dèt nou doué ginyin (Rom 13,8). Sé li minm ki tèt tout kòmandman yo (Rom 13,10; Ga 5,14), krochèt koté yo tout pandié (Mt 22,40; cf 7,12). Sé sou kòmandman sa-a Jézu ap jijé nou (Mt 25,31-46). Sint-Ogustin di: "Rinmin, épi ou mèt fè sa-ou vlé". Sa vlé di si

sé rinmin-an k-ap dirijé aksion-ou, sé nan lign Bondié trasé-a ou-ap maché. Sin Pòl chanté louanj rinmin-an nan lèt li ékri Korintyin yo, antan-l di: san rinmin-an nou tankou yon kuiv k-ap sonnin, yon sinbal k-ap fè brui (1 Cor 13,1). Sin Jan-d-la-Koua di: Koté ki pa gin rinmin, sé pou nou mété rinmin, épi n-ap rékòlté rinmin.

Rinmin mandé pou nou dépasé tèt nou, bliyé tout intéchè nou, rénonse avantaj nou, aksépté pèdi trankilité nou, pou nou mété nou nan sèvis prochin nou poutèt Bondié. Rinmin prochin-an pa kapab séparé sot nan rinmin Bondié-a. Sé mak fabrik li. Yon moun k-ap dévoué tèt li pou lòt yo, antan-l ouété Bondié nan lavi-l, li pa aji sou diréksion vré rinmin-an, paské rinmin-an sé nan Bondié li soti. Bondié sé rinmin (1 Jn 4,8-10). Épi tou yon moun ki rinmin Bondié pa kapab fèmin kè-l dévan bézouin prochin-l paské sé Bondié k-ap réspiré nan kè-l. Dé rinmin sa yo pa kapab séparé youn sot nan lòt, minm jan tèt la pa kapab séparé sot nan kò-a. La Trè Sint Vièj Mari pa-t kapab rété indiféran dévan kondision kouzi-n li Élizabèt. Li kouri byin vit al rann li sèvis (Lc 1,39ss). Nan nòs Kana, li ouè tout suit koté sèvis la manké; li palé ak Jézu sou sa (Jn 2,3). Plis nou viv zanmi ak Bondié, sé plis n-ap ouè bézouin prochin nou, n-ap santi égzijans pou nou édé yo. Sé konsa y-ap ouè nou sé patizan Jézu-Kri tout bon vré. Bondié di pa lintèmédiè Profèt Ozé sé rinmin li vlé plis pasé kado ak sakrifis (Os 6,6). Nou kapab fè yon kado ki pa tranpé nan rinmin. Nou kapab ofri-l pou nou débarasé nou ak yon moun k-ap jinnin-nou ak prezans li. Nou kapab fè yon sakrifis tou ki pa vlopé nan rinmin. Nou kapab fè-l pou nou trankil ak konsians nou, tankou yon dévoua nou doué fè pou konsians nou pa réproché nou. Nan sans sa-a Bondié di li pa bézouin ni kado ni sakrifis (cf Is 1,11; Jer 6,20). Sé konsa Pitit Bondié-a di, antan l-ap vi-n sou tè-a: "Ou pa-t vlé ni kado ni sakrifis, ou ban-m yon kò, mouin di m-ap vini pou-m fè volonté-ou" (Ps 40,7). Volonté Bondié sé rinmin. Rinmin sé kado, rinmin sé sakrifis.

Gin moun ki rinmin, sèlman sé sa-k fè yo plézi yo rinmin. Yo triyé moun pou yo fè rinmin. Karaktè ki alé avèk san yo, yo fè zanmi avèk yo. Lòt yo, yo répousé yo. Gin dòt sé nan minm ras ak yo, yo chouazi moun pou yo rinmin. Lòt yo pa konsidéré kòm prochin yo. Ginyin sé moun minm kondision ak yo yo frékanaté. Yo gadé lòt yo tankou moun k-ap jinnin yo. Sin Pòl di: pa gin ni Juif ni Grèk, ni ésklav ni moun lib, ni gason ni fi (Ga 3,28), nou tout sé frè ak sè, sé san Jézu-Kri ki fè nou vi-n tounin yon sèl fanmiy. Nan Krédo-a nou déklaré nou kouè légliz la fè yon sèl kò-d-fanmiy. Jézu kité kòmandman rinmin-an pou Apot yo, antan-l di sé konsa y-ap rékonèt yo kòm patizan-l, antan youn rinmin lòt, minm jan li minm li rinmin yo (Jn 13,34-35). Sé yon kòmandman ki konsékan, sé Téstaman Jézu-Kri-a.

Li angajé nou nan sa n-ap di ak nan sa n-ap fè. Li blijé nou rénonse kozé kinbé moun nan kè-a. Gin bagay nou pa kapab bliyé, sé vré. Sèlman nou blijé dépasé késion vanjans la. Jézu di Sin Piè sé pou-l padonnin souasandis fous sèt fous, sa vlé di pou-l toujou padonnin (Mt 8,22; cf Gn 4,24). Li bay égzanp moun nan ki té doué mèt li gran valè lajan-an, épi ki té gin yon lòt ki té doué-l yon ti valè tou piti. Mèt li fè-l kado sa-l té doué-a. Min li minm li rét yon pouin pou-l toufé lòt la ki té doué-l la (Mt 18,23-35). Rinmin sé rékonèsans. Sé paské Bondié rinmin nou nou kapab rinmin nou minm tou. Sé pa nou minm ki rinmin an prémié, sé li minm ki rinmin nou anvan (1 Jn 4,10), ki ba nou posibilite rinmin ni li minm ni prochin nou. Konsa rinmin-an sé pa santiman, sé yon kalité ki soti anro, Bondié mété nan kè nou, pou nou sanblé avèk li nè. Sé poussa sé sou rinmin-an l-ap jijé nou (Mt 25,31-46).

N-ap mandé Manman Mari favè sa-a pou nou rinmin, san nou pa chèchè avantaj nou, san nou pa tann yon rékonpans, san nou pa kalkilé ki kalité moun nou rinmin-an, antan sé pou Bondié sèl nou rinmin.

Amour: 203 fous nan lansyin Téstaman, 63 fous nan nouvo Téstaman: Gn 30,14a.b.15a.b.16; 34,3; Dt 7,8.9.12; 10,15; 2 Sam 1,26; 13,15; 22,51; 1 R 11,2; 2 R 19,31; 1 Ch 16,34.41; 29,3; 2 Ch 5,13; 7,3.6; 20,11; Esd 3,11; Est 5,16; 1 Mac 4,24; 2 Mac 6,29; 7,23; Ps 5,8; 6,5; 13,6; 18,51; 25,6.7.10; 26,3; 31,8.17.22; 33,5.18.22; 36,6.8.11; 40,11.12; 43,1; 44,27; 45,1.10; 52,10; 57,11; 59,11.17.18; 61,8; 62,13; 63,4; 66,20; 69,14.17; 77,9; 85,8.11; 86,5.13.15; 88,12; 89,2.3.15.25.29.34.50; 90,14; 92,3; 94,18; 98,3; 100,5; 101,1; 103,4.8.8.11.17; 106,1.4.7.45; 107,1.8.15.21.31.43; 108,5; 109,21.26; 115,1; 117,2; 118,1.2.3.4.29; 119,41.64.76.88.124.149.159; 122,8.9; 136,1.2.3.4.5.6.7.8.9.10.11.12.13.14.15.16.17.18.19.20.21.22.23.24.25.26; 138,2.8; 143,8. 12; 144,2; 145,8.13.17; 147,11; Pr 5,19; 7,18; 10,12; 27,5; Qo 9,1.6; Ct 1,2.4; 2,4.5.7; 3,5; 4,10a.b; 5,8; 7,7.13; 8,4.6.7a.b; Sg 3,9; 6,17.18; Si 9,8; 27,1; 40,20; 47,8; 48,11; Is 9,6; 26,11; 37,32; 54,8.10; 63,9; Jer 2,2.33; 31,3.11; Ez 16,8; 33,32; Dn 3,35.89.90; Os 4,1; 6,4.6; 9,10; 10,12; 11,4; 12,7; So 3,17; Za 1,14; 7,5; Mt 24,12; Lc 7,47a.b; 11,4.42; Jn 5,42; 13,35; 15,9.10a.b.13; 17,26; Rom 5,5; 8,35.39; 12,10; 13,8; 2 Cor 5,14; 13,13; Ep 1,4; 2,4; 3,17.19; 5,2; Ph 2,1.2; Col 2,2; 1 Th 3,12; 4,9; 2 Th 1,3; 2,10; 3,5; 1 Tm 6,10; 2 Tm 1,7.13; 4,8.10; Tit 3,4; 1 p. 3,8; 2 p. 1,7a.b; 1 Jn 2,5.15; 3,1.16.17; 4,7.8.9.10.12.16a.b.v.18a.b.c; 5,3; 2 Jn 3,6a.b; Ap 2,4.19.

Charité: 5 fous nan lansyin Téstaman, 60 fous nan nouvo Téstaman: Pr 19,17; Si 3,14; 12,3; 16,14; 40,17; Rom 12,9; 13,10a.b; 14,15; 15,30; 1 Co 4,21; 8,1; 13,1.2.3.4a.b.8.13a.b; 14,1; 16,14; 2 Cor 2,8; 6,6; 8,7.8.24; 13,11; Ga 5,6.13.22; Ep 1,15; 4,2.13.16; 6,23; Ph 1,9.16; Col 1,4; 5,14; 1 Th 1,3;

3,6; 5,8.13; 1 Tm 1,3.14; 2,15; 4,12; 6,11; 2 Tm 2,22; 3,10; Tit 2,2; Phm 5,7.9; He 6,10; 10,24; 1 P 4,8a.b; 5,14; 2 P 1,7; 3 Jn 6; Jd 2.21.

*

* *

TRANTÉINIÈM DIMANCH ÒDINÈ C

Trantéinièm dimanch òdinè C-a, sé "miséricorde, conversion". Zaché chanjé fason l-ap viv paské Jézu fè kè-l-sansib pou li (Lc 19, 1-10 = évanjil). Bondié pran pitié pou tout moun paské li rinmin tout bagay ki égzisté (Sag 11, 23; 12, 2 = prémié léktu). Granmèt la gin pitié, li gin kè sansib, li gin pasians, li gin anpil kè sansib, li bon pou tout moun, kè-l sansib pou tou sa-l fè (Ps 144/145, 8-9 = Som-répons). Li tèlman rinmin tè-a li bay Sèl Pitit li-a (Jn 3, 16 = Alélouya). Sé paské li fè kè-l sansib li pèmèt nou chanjé fason n-ap viv. Nan fason nou prezanté nou dévan moun ki pa maché sou bon rout, nou kapab fè yo rantré sou bon chémin-an oubyin fè yo dévié pi plis, sa dépann si nou montré konpréansion pou nou padonnin minm jan Jézu té padonnin nou oubyin si nou pran pòz, pou-n ap trakasé yo antan n-ap jouré yo, n-ap méprizé yo, n-ap fè yo prosè, n-ap fè kè yo soté. Kondision konvèision-an sé kè sansib. Sé pou nou louvri kè nou, pou moun ki nan péché-a, pou-l konnin sé kay Papa-l li vini, y-ap résévoua-l. Nou pa doué mété trop kondision k-ap rébité-l. Sé kè sansib nou k-ap fè-l chanjé fason l-ap viv. Se pou nou pran modèl sou Jézu, Pòtré Bondié Papa-a. Nou minn tou nou sé pòtré Bondié, li fè nou sou résanblans li (Gn 1, 27), pou nou padonnin minn jan li minn li padonnin nou.

*

Zaché sé té chèf kòléktè yo. Sé sèl koté nan labib la nou jouinn mo sa-a (ἀρχιτελώνης "architelōnēs" Lc 19, 2). Matié li minm sé té sinp kòléktè kontribision (Mt 9, 9). Li té chita nan biro ladoua-n nan (καθήμενον ἐπὶ τὸ τελώνιον "kathēmēnon ἐπὶ τὸ τελώνιον"), lè Jézu té rélé-l. Anpil lòt kòléktè té vi-n atablé avèk Jézu pou yo manjé (Mt 9, 10 τελῶναι), lè yo ouè kijan-l té rélé zanmi yo Matié, atèl pouin Farizyin yo t-ap babié (Mt 9, 11). Koulié-a, yo gin rézon babié pi plis ankò, paské sé pa sinp ti prépozé yo Jézu rélé vi-n suiv li, sé kay chèf kòléktè yo minm li fè ladésant (Lc 19, 7). Nan kòmansman mision-l, li atablé avèk yon sinp prépozé (Matié). Nan finisman mision-l, li fè ladésant kay chèf kòléktè yo, dirèktè jénéral kontibision yo, Zaché. Li té vlé montré li pa vini pou moun ki déjà anndan lakou. Li vini pou-l al chèchè sa-k pèdi yo (Lc 19, 10), jan-l té déjà éspliké dépi lè-l té rélé Matié-a (Mt 9, 13). Lè-l té rélé Matié-a, li té di: "sé kè sansib mouin vlé, sé pa sakrifis, sèké mouin pa vi-n rélé sa-k korèk yo min sé péchè yo mouin vi-n rélé" (Mt 9, 13). Lè-l fè ladésant kay Zaché-a, li di: "Pitit Moun nan vini pou-l fè sa-k pèdi-a jouinn lavi, pou-l sovè-l" (Lc 19, 10). Minm Sin Luk la té déjà prezanté nou sa-k té rivé mové rich la (Lc 16, 19-31 = cf 26èm d.o. C). Li té fèmin kè-l dévan mizè pòv Laza. Lè yo tou lé dé mouri, Laza al nan sièl; mové rich la al nan lanfè. Li gin rémò, min li té trò ta. Min

nan 31èm dimanch òdinè C-a, Sin Luk vlé montré nou sé pa paské yon moun rich pou nésésèman l-al nan lanfè. Si-l louvri kè-l bay pòv yo, sé pòt sièl la l-ap louvri tou pou-l antré yon jou ansanm avèk yo. Sin Luk di Zaché té RICH (πλούσιος "plousios" Lc 19, 2), minm jan ak mové rich la. Sèlman diférens ki ginyin ant yo dé, sèké youn fèmin kè-l anndan richès li yo, malgrè pòv ap trinnin dévan papòt la, lòt la minm louvri pòt li pou-l résévoua JÉZU, ki vré pòv la, épi ki fè-l louvri pòt kè-l pou séparé byin-l ak pòv yo, pou-l rinmèt lajan li té pran nan tranzaksion (cf Lc 16, 19). Li fè dé jès: youn pou la jistis, lòt la pou la charité. Moun li té fè injistis yo, li promèt pou-l rinmèt yo kat foua plis pasé sa-l té pran nan min yo-a. Moun ki pòv yo, li promèt pou-l fè yo lacharité antan l-ap ba yo mouatié nan byin-l yo (Lc 19, 8). Si Zaché fè dé jès sa yo pou lajistis ak lacharité, sé paské Jézu té déjà fè ladésant lakay li (Lc 19, 5-6). Li té déjà gin bòn volonté, antan-l té monté sou pié fig frans la pou-l té ouè Jézu k-ap pasé (Lc 19, 4). Sé lagras k-ap pasé nan lavi-l, tankou lè misionè yo ap préché mision yon koté. Li te vlé profité favè sa-a. Jézu ouè bòn volonté-l. Min Jézu fè-l chanjé fason pou-l rankontré-l. Sé pa anro pou-l monté, sé anba pou-l désann. Sé pa pou-l fè tankou moun yo ki t-ap bati kay ro Babèl la, pou y-al rankontré Bondié (Gn 11, 1-9). Sé pou-l désann anba, antan-l rékonèt kondision péché-l, pou-l rankontré Jézu k-ap tann li la. Li tèlman kontan (χαίρων "chairôn" Lc 19, 6), kè-l viré lanvè. Léspri Sin chanjé santiman-l, ni parapò a Lajistis, ni parapò a Lacharité: dé plato balans la, jan Psòm nan di-a: "Rinmin ak Vérité rankontré, Jistis ak Lapè anbrasé" (Ps 85, 11).

Nan rankont Jézu ak Zaché-a, nou gin pou-n konsidéré kijan prémié mouvman konvèsion-an sé yon favè li yé. Sé nan Bondié li sòti. Sé pa paské Zaché fè bèl jès pou lacharité ki fè Jézu désann lakay li. Sé paské Jézu déjà désann lakay li, li fè-l favè sa-a pou-l chanjé santiman parapò a lajistis ak lacharité, san Jézu pa minm bézouin di-l anyin sou sa. Prézans li kont pou raplé moun nan dévoua-l. Sé pou rézon sa-a nan dévoua apostola nou, sé pou nou mété moun yo an fas Jézu li minm minm, sé pou nou fè yon fason pou yo rankontré avèk Jézu, moun Nazarèt la, avèk Parol li, avèk Istoua li, pou-l aji nan kè yo, pou-l palé nan kè yo. Sé li minn k-ap pozé yo késion. Sé li minn k-ap fè yo répons. Sé li minm k-ap fè yo chanjé fason y-ap viv. Sé pa antan n-ap voyé pouint, n-ap jouré, n-ap soulvé moun, n-ap éksité yo pou yo batay, pou yo pran ak fòs, pou yo détrui, n-ap réglé anyin ki konsékan. Lè Sin Pòl té rivé Filip nan péyi Masédoua-n, antan l-ap préché, paròl li antré tou douat nan kè yon madanm yo rélé Lidia, ki té rich anpil, avèk kòmès vlou nan vil Tiatur. Li louvri pòt li bay misionè yo, minm jan li té louvri kè-l bay Paròl Bondié-a yo t-ap préché-a (Ac 16, 14-15). Sé

pa nou minm k-ap chanjé kè moun yo, sé Jézu li minm minm avèk Paròl li, antan li sèvi avèk nou kòm intèmediè li. Sé pa pròp tèt nou pou nou préché, sé pa pròp santiman ki nan kè nou pou nou mét déyò, antan n-ap piké, n-ap frapé ak bouch nou, pou nou drésé moun kont moun, klas moun kont klas moun, group moun kont group moun. Si nou simin van, n-ap rékòltè tanpèt (Os 8, 7). Liv lasajès édé nou konprann lévanjil trantéinièm dimanch òdinè C-a, antan-l di, nan prémié léktu-a "Paské-ou gin tout pouvoua, ou gin pitié pou tout moun, ou fèmin jé-ou sou péché lèzòm pou yo kapab régrèt, paské ou rinmin tou sa-ou kréyé yo, ou pa rayi anyin nan sa-ou fè yo (...). Ou padonnin tout moun, paské tout bagay pou ou, Granmèt, ou rinmin nanm yo" (Sg 11, 23-24, 26).

N-ap mandé Manman Mari pou nou aprann gin pasians ak tout moun, minm jan Jézu pran pasians ak nou, pou nou pa ézité rankontré yo pèsònèlman, pou prezans nou sèvi lokazion chanjé kichòy nan lavi yo, san nou pa bézouin malminnin yo ak kout jouré, ak kout lang.

*

Sin Luk sé Évanjélis Lamizèrikòd. Kè sansib Bondié Papa-a parèt nan Pitit la ki antré jous nan fon moual mizè nou, pou-l fè mizè lèzòm rankontré avèk mizèrikòd Bondié. Mèt jadin rézin-an té vi-n chèché fruit nan jadin rézin-an pandan touazan, li pa-t jouinn, li té mandé jéran jadin-an pou-l té fè koupé-l, pou-l pa rét ap gaspiyé tè-a. Jéran-an té réponn li pou-l té tann ankò yon lòt ané, li t-apral mété fimié alantou-l; si apré sa li pa donnin, yo t-a koupé-l, min an-atandan sé pou yo ba-l yon dènié chans (Lc 13, 1-9). Jézu profité pou invité nou fè pénitans pou nou bénéfisié mizèrikòd Bondié, pou RÉKONSILIASION-an réalizé. Dènié pitit la ki té pati lakay papa-l la (Lc 15, 1-3. 11-32), li t-al joui lajan-l nan avèk fi mové konduit; lè lajan-an fini, li vi-n grangou, li régrèt, li antré nan fon konsians li, li kasé tèt tounin, sé sa konvèsion-an yé. Nou t-ap fè yon mové chémin, nou viré tounin nan bon diréksion-an. Nou "konvèti", sa vlé di nou chanjé santiman kè nou. Papa-a minm t-ap tann pitit la konsa, sé pitit la ki té ront. Min papa-a minm té kontan lè pitit la tounin, li té tèlman kontan li fè fèt pou li, épi Jézu di nou gin plis kontantman nan sièl la pou yon sèl péchè ki fè pénitans pasé pou katrévindsnèf moun kòrèk ki pa bézouin fè pénitans. Tout moun ap akizé madanm nan yo pran nan adiltè, min Jézu minm bésé atè-a ap ékri; lè tout moun fi-n pati, li voyé madanm nan alé ak kè pozé, antan-l mandé-l pou-l pa rékòmansé (Jn 8, 1-11).

Yo di kréyon Bondié pa gin gòm, sé pa vré, sé gòm Bondié ki pa gin kréyon. Li toujou gin yon gòm nan min-l, li tou prèt pou-l éfasé péché nou yo, sé konsantman nou sèlman li bézouin. Nan asouè Dimanch Pak la, li

souflé sou Apot yo pou-l ba yo Léspri Sin-an, pou-l ba yo pouvoua pou yo éfasé péché yo (Jn 20, 19-31). Jézu chita avèk Sin Piè sou bò dlo-a, li fè Sin Piè réfè angajman-l toua foua (Jn 21, 15-17). Koté fot la té anpil la, favè-a débòdé, gras rinmin-an. Fot la fi-n pasé, sé tan pou réfè kontra-a. Li pa-t janm kasé sou bò Bondié. Minm si nou infidèl, Bondié rét fidèl, li pa kapab nié paròl li (2 Tm 2, 13). Tout moun ki souaf, vi-n nan dlo san péyé (Is 55, 1ss; Jn 7, 37) Jézu invité nou antré nan kè-l, jan-l té di Sint Magérit Mari Alakòk: "Gadé kè sa-a ki si tèlman rinmin moun yo!". Zaché pran rézolisyon pou-l rinnèt sa-l té pran épi pou-l fè lacharité kòm pénitans, li fè yon konvèsion, ki pèmèt li rankontré mizérikòd Bondié, pou rékonsiliation-an réalisé.

N-ap mandé Manman Mari pou nou fè tankou Zaché, pou nou rékonèt fot nou, san nou pa kaché yo tankou Adan ki kouri al kaché, lè Granmèt la ap rélé-l pou-l fè-l régrèt, pou-l padonnin-l (Gn 3, 8-10). Moun ki kòrèk la tonbé sèt foua min li lévé. Nou pa doué ap di n-ap konfésé a-Dié. Si sé konsa sé pou nou kominié a-Dié tou, pou kont nou nan fon kè nou, san nou pa bezouin proché dévan balis si nou pa kapab proché dévan konfésional. Sé youn ki préparé lòt. Nou pa doué manké sakréman lékaristi-a réspè, pou nou pa manjé ak bouè pròp kondanasion nou, antan nou pa t-a rékonèt Kò ak San Granmèt la (cf 1 Co 11, 29).

*

* *

TRANDEZIÈM DIMANCH ÒDINÈ A

Avèk tranndézièm dimanch òdinè A-a, sé mèsaj sou dènié tan-an Jézu bay nan lévanjil la (Mt 25,1-13). Li pa di kilè dènié tan sa-a ap rivé. Li mandé pou véyé, paské jistéman nou pa konnin lè-a ak dat la. Léson ki dégajé nan pasaj lévanjil sa-a sé pou nou **véyé** (cf 1 Th 5,1-11; 2 Th 2,1-11).

Tan lavan tou pré, sé tan pou nou véyé. Sé minm mèsaj sa-a ki vini nan dènié dimanch yo ni nan prémié dimanch yo nan ané litiji-a. Sa sa vlé di: véyé? Tout dis ti fi vièj yo t-ap dòmi. Min gin sink ki té kapab di avèk fiancé liv Kantik dè kantik la: "M-ap dòmi, min kè-m ap véyé" (Ct 5,2).

Véyé-a, sé dispozision kè-a. Sink yo ki té gin luil nan lanp yo-a, sé sa ki t-ap véyé nan kè yo, minm si kò yo t-ap dòmi. Nou gin anpil mové tandans nan nou ki vlé pran pié sou nou, pou fè nou tonbé nan péché, pou sousé tout ti luil nan lanp nou-an. Sé tout tan pou-n ap véyé kont yo, pou nou mété luil ankò, chak foua l-ap bésé, paské lanp la kapab rivé yon lè li étinn tout bon, ak pa-n luil. Nou pap ouè ankò koté n-ap maché. N-ap tonbé nan falèz, paské lannuit ap vlopé nou.

Toutotan nou gin lagras nan nanm nou, nou gin limiè lanp nou limin, n-ap véyé. Granmèt la mèt vi-n frapé, n-ap louvri ba li, n-apral rankontré-l ak lanp nou limin. Si lanp nou étinn, sé nou minm kouliè-a atò k-apral frapé nan pòt la, ki déjà fèmin, l-ap di nou li pa rékonèt nou (Lc 13,25). Minm jan lè divin nan nòs Kana-a té fini-an, la Trè Sint Vièj Mari té fè Jézu bay dèt divin (Jn 2,1-11), konsa tou lè nou prévoua luil nan lanp nou ap bésé, sé pou nou rinnèt li lanp nou pou-l plin-l pou nou. Jan kantik la di-a, l-ap véyé sou rad nou tankou Rébéka fè pou Jakòb la.

Sin Pòl di nou nan dézièm léktu-a (1 Th 4,13-16) pou nou tann Granmèt la k-ap tounin-an, pou-n al rankontré-l sou niaj yo nan sièl la. Li mandé nou pou **léspérans** nou-an fè nou kanpé fèm.

Prémié léktu-a (Sg 6,12-16) di yon moun ki rét ap **véyé**, l-ap jouinn Sajès la san fatig, sé Sajès la minm k-ap pran dévan pou-l vi-n rankontré-l (cf Si 6,27.36; 39,5; Pr 8,17; Mt 7,7). Véyé ta nan nuit, lévé bonè granmatin, sa vlé di véyé sou mové panchan nou k-ap batay kont jèm lavi léspri Sin-an ki nan nou-an.

Psòm-répons la (Ps 62/63) di: dépi anvan solèy lévé, nou anvi Granmèt la, nanm nou souaf li, tankou yon tè sèk k-ap tann lapli (cf Ps 5,4). Tout nan nuit n-ap véyé-l. Tou sa sé divès fason pou invité nou véyé, sa vlé di fè atansion sou mové panchan nou.

N-ap mandé Manman Mari pou-l édé nou paré chémin Granmèt la nan kè nou, pou nou tann li avèk kè nou pròp, pou nou pa rét drivé nan okinn péché mòtèl k-ap sal nanm nou, pou nou évité tout santié k-ap fè nou glisé nan mové chémin.

N-ap sonjé lapriyé yon fason spésial pou moun ki mouri yo. Dézièm léktu-a (1 Th 4,13-18) raplé nou léspérans pou nou ginyin osijè déstiné moun ki mouri zanmi Bondié yo. N-ap mandé Granmèt la pou-l louvri kè-l bay tout pitit li yo ki pati, min ki pa ko rivé koté-l, pou-l pròpté yo ak tou sa-k anpéché yo ouè fas li. N-ap mandé-l pou-l fè jou kolè-a tounin jou padon. Sint-Anbouaz di Kris la sé lanmò kò-a, sé léspri lavi-a; nou mouri ak li pou nou viv ak li. Sé konsa li éspliké paròl Sin Pòl di Filipyin yo: "Pou mouin, viv sé Kris la, lanmò sé yon avantaj" (cf Ph 1,21). ("De excessu fratris sui Satyri", lib 2,40.41.46.47.132.133; CSEL 73, 270-274, 323-324; cf Liturgia Horarum IV, Vatican 1974, 1250-1252).

(Jézu di-n véyé, pa rét ap dòmi

L-ap rivé, gran jou-a, m-ap gadé Granmèt la, m-ap fiksé-l nan jé).

*

* *

TRANDEZIÈM DIMANCH ÒDINÈ B

Nan lévanjil trandézièm dimanch òdinè B-a (Mc 12,38-44), gin dé pati: Prémie pati-a (Mc 12, 38-40) kondané rélijion Juif la avèk grandizè profesè labib li yo k-ap fè ipokrit yo; dézièm pati-a (Mc 12,41-44) fè louanj pou ti "Rès" Pèp pòv yo ki réprézanté vré rélijion Israèl la, avèk vèv la k-ap bay sèl ti monnin li ginyin-an.

Litiji trandézièm dimanch òdinè B-a insisté pi plis sou dézièm pati-a (Mc 12,41-44), dapré sa nou ouè nan premie léktu-a (1 R 17,10-16), koté yon pòv vèv bay Profèt Éli tout ti sa-l té ginyin pou-l viv lakay la, sé sou sa Bondié gadé pou-l rékonpansé-l, antan-l fè-l jouinn tou sa-l bézouin pi plis ankò. Épi Psòm-répons la (Ps 145/146) édé kalkilé sa, lè-l di: "Granmèt la soutni vèv la ak òfélin-an" (Ps 145/146,9). Réfrin Alélouya-a, sé konpliman Jézu fè pou sa-k pòv yo nan léspri-a paské sé pou yo péyi koté Bondié Roua-a, li yé (Mt 5,3).

Konsa nan lévanjil la (Mc 12,38-44) gin dé pati: premie pati-a (Mc 12,38-40) sé yon répròch; dézièm pati-a (Mc 12,41-44) sé yon louanj. Prémie pati-a sé kòm si sé pou krazé, dézièm pati-a sé kòm si sé pou bati. Prémie pati-a sé kòm si sé pou raché, dézièm pati-a sé kòm si sé pou planté. Sé mision Profèt yo Bondié té déklaré, lè-l té rélé Jérèmi-an (Jer 1,10). Sé té mision Izayi tou, ni Ézékièl ni tout Profèt yo. Jézu kòm Profèt, fè minm jan. Jan-Batis té trasé rout dévan-l nan minm sans sa-a. Sé pou sa Siméyon té di la Trè Sint Vièj Mari Jézu ap sèvi pou anpil moun tonbé, pou anpil moun lévé (Lc 2,34). Sé mision Profèt yo.

Konsa nan dé pati lévanjil trandézièm dimanch òdinè B-a (Mc 12,38-44), gin yon lanvè (Mc 12,38-40) ak yon landouat (Mc 12,41-44). Prémie pati-a (lanvè-a), ki palé kont rélijion Juif yo, sé kòm yon pòt y-ap fèmin, ki té déja louvri dépi Jézu té fèk antré solanèlman nan vil Jérusalèm nan (Mc 11,1). Rélijion Juif la, sé té tankou yon pié fig ki pa kapab donnin (Mc 11,12-13.20-25), sé té tankou moun yo k-ap fè kòmès nan kay sakré-a (Mc 11,15-19), sé té tankou prêt an chèf yo, Profèsè Labib yo ak Ansyin yo ki jalou pou otorité yo-a (Mc 11,27-33), sé té tankou jéran jadin rézin yo ki kriminèl yo (Mc 12,1-12), sé té tankou Farizyin yo ak patizan Èròd yo k-ap mélé politik ak rélijion-an (Mc 12,13-17), sé té tankou Sadiséyin yo ki pa kapab distingé ant lèt la ak léspri-a nan labib la (Mc 12,18-27.35-37), sé tankou profesè labib la ki sanblé ak ti moun lékòl k-ap fè plèd nan kèsion katéchis la (Mc 12,28-34). Jézu lévé pou yo, nan premie pati lévanjil trandézièm dimanch òdinè B-a (Mc 12,38-40) ki kòm ranmasé tout diskision sa yo (ki té

kòmansé dépi Mc 11,1 jous nan Mc 12,37) pou montré kijan rélijion Juif la apral blijé sédé térin dévan lanségman Jézu-a (cf Mt 23; Lc 11,37-53).

Sé lè sa-a atò, apré tout térin sa yo fi-n débléyé-a, apré tout fondasion sa yo fi-n fouyé-a, apré tout tè sa yo fi-n saklé-a, y-apral bati, y-apral planté (Mc 12,41-44), sé pati ki pi inpòtan-an nan lévanjil tranndézièm dimanch òdinè B-a, ti jès pòv vèw la ki bay tou sa-l té ginyin nan kèt la. Sé poussa sé pati sa-a yo gin doua pran, si yo vlé rakousi léktu-a, nan lamès la.

Profèsè labib yo ap dévoré byin vèw yo (Mc 12,40). Min ti pòv vèw la minm ap bay Granmèt la tout ti sa-l té ginyin pou-l viv la (Mc 12,42-43). Profèsè labib yo ap fè sanblan fè gro lapriyé, y-ap gin pi gro kondanasion. Yo tankou moun rich yo k-ap fè grandizè, k-ap dépozé gro kado pou tout moun ouè sa yo mété (Mc 12,41). Min pòv vèw la minm, li bay ti dis kòb li-a, ti lacharité yon bon prochin doué té sot fè-l la, pètèt. Li di nan kè-l: sa-a sé pou Granmèt la. Sé tankou pòv péchè piblik la, li ront dépozé ti sa-l ginyin-an, min li fè-l ak tout kè-l. sé Granmèt la ki ouè anndan fon kè, ki fouyé nan fin-fon pansé. Pòv la, sé pa ladim li bay, sé sakrifis antié, pou montré tout bagay sé pou Granmèt la.

Lè Pèp Bondié-a té fèk sot nan égzil Babilòn nan, premié bagay moun yo té fè, sé té kouri al okipé afè pa yo, al rébati kay yo ki té krazé dépi sièk tan yo. Min yo pa-t minm gadé Kay Granmèt la. Profèt Ajé fè yo répròch (Ag 1,2-11). Profèt la di yo: Granmèt la di: Kay mouin krazé, épi chak moun ap kouri bati pròp kay pa-l (Ag 1,9). Épi Profèt la di: Sé poussa madichon ap tonbé sou nou; nou mèt manjé, nou pap satisfè; nou mèt gin lajan, pòch nou ap gin trou (Ag 1,6). Sièl la ap kinbé lapli bénédiksion-an (Ag 1,10). Kòmansé okipé afè Granmèt la anvan, l-ap ba nou tout rès la apré sa (Mt 6,33). Tout tan, Profèt Agé ap di nou: Réfléchi byin nan kè nou dépi kouliè-a jous pou rès tan-an (Ag 1,7; 2,15.18). Profèt Agé fè nou konprann sé lè n-a aji tankou pòv vèw ki té bay Profèt Éli tout sa-l ginyin-an (1 R 17,2-12), sé lè sa-a Bondié ap béni nou (Ag 2,19): "Apati kouliè-a, m-ap béni" (cf Dt 28,4; Mal 3,10-12).

Profèt Malachi minm déklaré sé tronpé n-ap tronpé Bondié, antan n-ap ba-l sa nou pa bézouin (Mal 3,8). Li di sé kòm si nou di nan kè nou: Tab Granmèt la mérité pou yo méprizé-l (Mal 1,7). Li éspliké sé bèt ki avèg la, ki gin pié kasé-a, ki malad la, sé sa yo pa kapab vann nan maché-a, sé li minm nou poté pou ofri kòm sakrifis pou Granmèt la (Mal 1,8). Li di: Ébyin, poté-l bay yon gro chèf, n-a ouè kijan l-ap résévoua nou. Si-l pa bon pou yo, li pa bon pou Granmèt la non plis tou (Mal 1,8). Li di: mòd jan sakrifis sa yo pa kapab fè Bondié plézi, sé sal n-ap sal tab Granmèt la, sé

méprizé n-ap méprizé manjé-l yo (Mal 1,12). Moun yo rét ap di: nou gin kont tèt chajé pou okipé afè nou, kòm si sé afè Granmèt la pou nou t-a okipé! Épi Profèt Malachi di: sé pou sa sé bèt nou vòlè-a, sa-k bouaté-a, sa-k malad la, sé li minm n-ap ofri kòm sakrifis la (Mal 1,13). Nou fi-n promèt sa-k pi bon-an, épi sé viann avarié-a nou poté (Mal 1,14). Granmèt la fèmin jé-l, li viré fas li, li kaché min-l, li bouché nin-l (Mal 1,10).

An fas simagri sakrifis sa-a, gin vré sakrifis ki fè Bondié plézi (Mal 1,10), sou tout tè-a. Kado pòv vèv Sarépta-a ki bay Profèt Éli tou sa-l té ginyin-an, malgré vèv sa-a pa-t nan minm rélijion ak pa Profèt Éli-a, sé sa-k fè Bondié plézi.

Konsa nan pié Koua-a, la Trè Sint Vièj Mari ofri sèl sa-l té ginyin-an, sa-l té déjà ofri nan kay sakré-a dévan Prèt Siméyon-an (Lc 2,22-38; cf Gn 22,2). Kado li té ofri lè-l té prezanté Jézu nan Kay sakré-a, sé té kado pòv yo, yon pè toutrèl oubyin dé ti kolonb (Lc 2,24). Daprè sa Lévitik té prévoua (Lv 12,6), li té gin pou-l té ofri yon mouton ansanm avèk yon kolonb oubyin yon toutrèl. Min Lévitik té prévoua tou (Lv 12,8), si-l pa kapab jouinn lajan pou-l achté mouton-an, l-a kontanté-l ofri "dé toutrèl oubyin dé kolonb". Sé sa la Trè Sint Vièj Mari té fè (Lc 2,24). Li té trò pòv pou-l té jouinn lajan pou-l achté mouton-an. Dayè, Mouton-an té sou bra-l: sé té Jézu, Mouton Bondié-a ki ouété péché sou tè-a (Jn 1,29.36), li minm k-ap ofri pròp tèt li kòm sakrifis, k-ap bay tout bagay nèt san ouété anyin. Sé mòd jan sakrifis sa yo ki fè Bondié plézi-a (Ps 40,7-9; 51, 18-19; 1 Sam 15,22).

Si nou gin yon ti kado n-ap bay Granmèt la, li mèt piti, sé pou nou bay li kan minm. Ak sink ti pin yo avèk dé ti pouason yo, ti gason-an té bay la, Jézu té bay sink mil moun manjé épi té rété rès (Jn 6,5-13). Ti kado nou ginyin-an mèt pa prezantab, sé pou nou bay li kan minm, minm si sé sa sèlman nou ginyin. N-a fè-l pasé nan min la Trè Sint Vièj Mari, jan Sin Loui Mari Monfò konsyé nou-an, pou Bondié pa rébité nou. La Trè Sint Vièj Mari ap ouété koté ki gaté-a, l-ap pròpté-l, l-ap prezanté-l pou nou. Granmèt la ap kontan-l, paské sé nan min Manman-l li soti.

Jéfté té gin yon sèl pitit fi-l. Li té promèt Granmèt la premié moun l-ap rankontré ki sot lakay li. Épi sé pitit li-a ki parèt. Pitit la minm ankourajé papa-a pou-l pa manké paròl li. Papa-a ofri pitit la vré (Jg 11,1-40). Abraam pa ménajé sèl pitit li-a, li té rinmin-an. Bondié té vlé tésé-l pou-l ouè si-l pi rinmin pitit li-a pasé-l. Volonté sakrifis la kont pou Bondié, sé bòn foua Abraam ki konté pou li, sé bòn volonté-l ki fè Bondié plézi (Gn 22,1-18). Pòv vèv la bay sèl ti sa-l té ginyin pou-l viv la. Sé sakrifis Jézu-a minm Jézu vlé montré nan léson sa-a li bay la. Sèké li rivé nan finisman

mision-l. Sé Soufrans lanmò-l k-apral kòmansé (Mc 14). Li montré kijan yon moun pa ko bay anyin toutotan li pa bay tou sa-l ginyin. Li minm, non sèlman li bay tou sa-l ginyin, min li bay tou sa-l yé. Lè l-ap mouri, dèniè kado l-ap bay la, sé Manman-l (Jn 19,26-27).

Pasaj Lèt Ébré yo ki vini kòm dézièm léktu-a (He 9,24-28), minm si-l pa antré dirèktéman nan minm lign lansègnman sa yo, li sèvi pou montré nou dépasman aplikasyon mèsaj la avèk sakrifis Jézu-a. Sé pa bèt li vi-n ofri kòm sakrifis (He 9,25), sé pròp tèt li minm li vi-n ofri (He 9,26). Sé nan sakrifis Jézu-a tout sakrifis pa nou yo jouinn valè yo. Sé lavi Jézu nou kontinué ap ofri bay Bondié Papa-a ansanm ak la Trè Sint Vièj Mari, ansanm ak tout Sin yo nan sièl la, ak tout nanm nan Pigatoua-a, ak tout légliz sou tè-a.

*

Yon vè dlo nou bay yon pòv pap rét san rékonpans. Sa pou nou bay la, sé pa sa n-ap ginyin démin, sé sa nou ginyin jodi-a minm, minm si-l tou piti. Sé yon jès lafoua ki fè Bondié plézi. Nou pa gin pou n-ap di nan kè nou: "Si-m bay sa-m gin la-a, ak ki sa m-ap okipé afè-m démin?". Kalkil sa-a pa antré nan léspri lafoua. Jézu fè louanj pou vè la ki bay dé ti piès lajan li té ginyin kòm sèl richès li. Li té konnin sé Bondié ki ba li. Sé yon fason li té vlé di Bondié mèsi épi li té vlé montré Bondié li konté sou li toujou. Nou toujou ap grignoté sou sa nou fi-n bay Bondié. Nou répran-n ak min goch sa nou fi-n bay ak min douat. Lè sé mandé n-ap mandé, min nou louvri byin laj. Lè sé bay nou gin pou nou bay, min nou lou, kè nou séré. Sèké tras péché orijinèl la kite nan nou-an gin égozis ladan-l. Nou t-a vlé tout bagay pou nou. Fò nou fè rayisab ak tou sa nou ginyin. Sé avèk chagrin nou ouè l-ap vi-n pi piti, lè nou ouété ladan-l pou bay lòt.

Lévanjil tranndézièm dimanch ôdinè B-a montré yon dimansion espésial lacharité-a ginyin: sé dévoua **rélijion**-an ki mandé pou nou rinmèt Bondié sa-k pou li. Sé konsa prémié léktu-a montré tou kijan pòv vè Sarépta-a bay **Profèt Éli** ti galèt li t-ap fè pou li minm ak ti pitit li-a, sèl ti manjé ki té rété-l pou-l viv la. Li fè jès sa-a parapò a Profèt la kòm **Mésajé Bondié** (cf Mt 10,41). "Moun ki résévoua yon Profèt kòm Profèt, l-ap résévoua yon rékonpans Profèt". Sa montré nou dévoua rélijion-an pou fidèl yo okipé afè Bondié ak moun Bondié. Nan douz fanmiy ki soti nan Jakòb yo, gin youn ki pa-t gin okinn pòsion éritaj nan tè Israèl la, sé fanmiy Lévi-a. Pòsion-l ak éritaj li sé Granmèt la (Nb 1,49; Dt 10,9; cf Ps 16,5), sé nan sèvis Granmèt la li té yé. Sé nan fanmiy sa-a Prèt yo té konn soti pou okipé afè litiji-a sitou. Sé lòt fanmiy yo ki té gin pou okipé fanmiy Lévi-a ak byin pa yo. Sé dévoua rélijion-an yo té réalizé konsa. Sa té pèmèt fanmiy Lévi-a okipé afè

Bondié-a pi byin, san-l pa bézouin ap trakasé tèt li pou-l chèché kijan l-ap viv. Si Sin Pòl té rénonné sèvi ak doua sa-a, sé pou-l pa-t bay lènmi-l yo lokazion palé-l mal. Min li té di li té gin doua fè minm jan ak lòt Apot yo, paské yo pa maré bouch bèf la k-ap foulé blé-a. Li di Prèt yo gin pou yo viv nan sèvis lotèl la (cf 1 Th 2,7; 2 Co 11,9; 12,13; Ph 4,10.15; 1 Co 9,9.13; 1 Th 5,18; Dt 25,4).

Sé yon mové konpréansion ki fè moun yo konn koué Prèt yo gin riches. Si késion lajan pasé nan min yo, sé pi fò pou okipé afè légliz la minm. Sé tankou yon kanal koté dlo ap koulé. Sé tout tan y-ap chèché kijan pou yo fè légliz la maché pi byin, dévloché pi plis, ni nan lansègnman, ni nan sérémoni, ni nan administrasion. Sé pou rézon sa-a yo konn mandé fidèl yo yon patisipasion soua sou fòm kèt, soua sou fòm ofrann alokasion sakréman yo oubyin dòt sèvis. Pètèt si yo mandé, sé paské fidèl yo pa pran késion sa-a asé osérié, tankou pòv vèv la nan lévanjil tranndézièm dimanch òdinè B-a. Jézu té mandé madanm Samari-a yon ti gout dlo. Li té réfizé-l poutèt li pa-t Samaritin minm jan ak li (Jn 4,7-9). Profèt Éli mandé pòv vèv Sarépta-a ti gout dlo. Lè-l ouè pòv vèv la apral chèché-l, li pran kouraj, li mandé-l ti moso pin: paské li té grangou pi plis pasé-l té souaf. Pòv vèv la ba-l dènié ti sa-l té gin lakay la. Époutan li pa-t nan minm ras ak li ni nan minm rélijion ak li. Jézu chouazi égzanp sa-a nan premié prèch li fè nan kay-réyinion Nazarèt la pou-l montré moun pròp péyi-l yo kijan tout tè-a sé yon sèl fanmiy li fè (Lc 4,25). Sin Pòl té mandé moun Korint yo ak Masédoua-n yo pou yo fè yon kèt pou légliz Jérusalèm nan (2 Co 8-9) pou montré kijan tout légliz sa yo sé nan minm Jézu-Kri-a yo soti (cf R 15,27). Sé konsa nan dòt péyi yo fè kèt espésial pou édé péyi ki pi nan bézouin yo. Gin òrganizasion ki la pou sa. Sé yon fason pou réalizé plis léspri fanmiy ak divès légliz yo. Gin moun ki fè anpil sakrifis pou yo voyé ti sa yo ginyin-an. Sa yo ranmasé-a konn sèvi pou bati légliz, pou édé moun k-ap fè katéchis, pou fè lékòl, pou okipé dispansè... N-ap sonjé kijan jès sa-a doué raplé nou nou tout nou fè yon sèl fanmiy, minm si lanmè séparé nou (cf Rom 15,31; Ac 11,27-30; Ga 2,10; 2 Cor 8,12).

N-ap mandé Manman Mari pou nou aprann louvri kè nou nan bézouin frè ak sè nou, pou nou pa fèmin jé nou sou dévoua nou ginyin parapò a késion rélijion-an, pou nou fè sa nou kapab pou nou soutni aktivité légliz la. Sé yon fason pou nou ofri pròp tèt pa nou kòm kado (Rom 15,16). Psòm-répons la mandé pou nou mét espoua nou nan Bondié Granmèt nou, li minm ki nourri moun ki grangou, ki protèché étranjé, ki soutni vèv ak òfélin-an (Ps 145/146,7.9). Bondié okipé zouazo ak flè yo. Nou gin plis valè nan jé-l (Mt 6,25-34). Nou pa doué fè régadan sou ti sa n-ap bay la. Moun ki simin

chich, l-ap rékòlté chich, dapré sa Sin Pòl di Korintyin yo nan Lèt li ékri pou-l mandé òganizé kèt la pou Jérusalèm nan, antan-l sité Psòm nan (2 Co 9,6; cf Ps 126,5) ak Provèb la (Pr 11,24; 19,17; 22,9).

Moun ki bay ak kè kontan, Bondié rinmin-l (2 Co 9,7).

*

"**Collecte**": 2 fous nan lansyin Téstaman, 1 fous nan nouvo Téstaman-an: 2 Mac 12,43; Za 6,10; 1 Co 16,1.

"**Aumône**": 26 fous nan lansyin Téstaman, 14 fous nan nouvo Téstaman-an: Tob 1,3.16; 2,14; 4,7.8a.b.10.11.16a.b; 12,8a.b.9a.b; 14,2.8.11; Si 3,30; 4,3; 7,10; 17,22; 29,1.12; 35,2; 40,17.24; Mt 6,2.3.4; Lc 11,41; 12,33; Ac 3,2.3.10; 9,36; 10,2.4.31; 24,17; 1 Co 13,3.

"**Lévi**": 67 fous nan lansyin Téstaman, 8 fous nan nouvo Téstaman-an: Gn 29,34; 34,25.30; 35,23; 46,11; 49,5; Ex 1,2; 2,1a.b.; 6,16a.b.19; 32,26.28; Nb 1,49; 3,6.15.17.26.32; 16,1.7.8; 17,18a.b.23; 18,2.21.23; 26,59; Dt 10,8.9; 21,5; 27,12; 31,9; 33,8a.b; Jos 13,14.33; 21,10; 1 R 12,31; 1 Ch 2,1; 5,27; 6,1.4.23.28.32; 12,27; 15,4; 21,6; 23,14.24; 24,20.30; Esd 8,18; Ne 12,23; 12,28; Ps 135,20; Si 45,6; Ez 40,46; 48,31; Za 12,13; Mal 2,4.8; 3,3; Mc 2,14; Lc 3,24.29; 5,27.29; He 7,5.9; Ap 7,7.

"**Veuve**": 72 fous nan lansyin Téstaman, 27 fous nan nouvo Téstaman-an: Gn 3,11.14.19; Ex 22,21.23; Lv 21,14; 22,13; Nb 30,10; Dt 10,18; 14,29; 16,11; 116,14; 24,17.19.20.21; 26,12.13; 27,19; Rt 4,10; 2 Sam 14,5; 20,3; 1 R 7,14; 11,26; 17,9.10.20; Tob 1,8; Jdt 8,4; 9,4.9; 2 Mac 3,10; 8,28.30; Job 22,9; 24,3.21; 27,15; 29,13; 31,16; Ps 68,6; 78,64; 94,6; 109,9; 146,9; Pr 15,25; Sg 2,10; Si 35,14.15; Is 1,17.23; 9,16; 10,2; 47,8; Jer 7,6; 15,8; 18,21; 22,3; 49,11; 51,5; Lam 1,1; 5,3; Ba 4,12.16; 6,37; Ez 22,7.25; 44,22a.b.c; Za 7,10; Mal 3,5; Mc 12,40.42.43; Lc 2,37; 4,25.26; 7,12; 18,3.5; 20,47; 21,2.3; Ac 6,1; 9,39.41; 1 Co 7,8; 1 Tm 5,3.4.5.9.11.14.16a.b; Jc 1,27; Ap 18,7.

"**Offrande**": 200 fous nan lansyin Téstaman, 14 fous nan nouvo Téstaman-an.

*

(sa pòv ginyin, sé sa-l pot nan maché).

*

* *

TRANDEZIÈM DIMANCH ÒDINÈ C

Anpil moun konpranm sé pou tè sa-a sèlman y-ap viv. Konpòtman yo pa sanblé démach moun k-ap dirijé nan péyi Bondié promèt la. Yo bay inpréssion Pèp Israèl la ki fi-n travèsé lanmè Rouj la, ki gin tan bouké, ki mandé koté pou-l instalé, san-l pa ouè sé tout longè yon dézè pou-l travèsé pou-l rivé nan péyi koté lèt ak mièl ap koulé-a.

Sint Térèz d-Avila di si nou rété nan chémin, nou pap bouè dlo sous la k-ap koulé tou fré nan tèt mòn nan. Lavi-a sé yon batay. Si sé lèz-kò nou n-ap chéché anba isit la, sé tan nou n-ap pèdi. Lévanjil la di nou: Péyi koté Bondié Roua-a, sé moun ki donté mové lanvi kò yo, sé yo minm k-ap pran-l daso (Mt 11, 12). Gin moun, jan Sin Pòl di-a, dié yo sé vant yo (Ph 3,19). Yo mét bèlté yo nan sa-k fè yo ront. Époutan Bondié pa kréyé nou pou bagay k-ap passé, li kréyé nou pou volonté nou fè yon sèl ak volonté pa-l nan rinmin-an, pou nou kapab jouinn kontantman nou tout tan ki gin tan. Gin moun sé nan manjé, sé nan bouè, sé nan plézi, sé nan richès, sé nan pouvoua yo jouinn tout avantaj yo. Yo pa gin yon prinsip ki pi ro passé sa k-ap gidé aktivité yo.

Trandézièm dimanch òdinè C-a palé nou sou Réziréksion (Lc 20, 27-28 = évanjil; 2, Mac 2, 7-14 = prémié léktu; Ps 16/17 = Psòm-répons). Sé finisman ané litiji-a k-ap rivé. Yo invité nou réfléchi sou sa yo rélé "les fins dernières", dènié étap k-ap tann nou, nan bout lavi n-ap minnin anba isit la: lanmò, jijman, Paradi oubyin lanfè. Yo pa palé anpil sou sa. Yo insisté plis sou éspérans nou doué ginyin nan bon kè Bondié ki kréyé nou pou nou patajé kè kontan ak kè pozé l-ap joui pou tout tan nan sièl la. Sa sèvi nou tankou yon drapo group moun k-ap saklé jadin-an mété nan bout térin-an pou yo rivé nan limit sa-a anvan solèy fi-n kouché. Nou blijé sonjé tou sa k-ap rivé, si nou fè parès, si nou pa gadé drapo-a, si nou kité tan-an passé san nou pa fè anyin, si nou tann pòt yo fi-n fèmin anvan nou rivé vi-n ap frapé, n-ap di: "Louvri, louvri" (Mt 25,11), Mèt la ap di nou li trò ta, li pa konnin nou, ralé kò nou sot sou li, al boulé nan difé lanfè-a ki fèt pou djab la ak parèy li yo.

Sé dépi byin bonè pou nou ranjé kabann nou, anvan dòmi nan jé nou, pou dòmi pa troncé nou, pou nou pa kité Mésié marié-a gin tan fi-n soti nan nòs, pou nou ouè si lè sa-a nou pa gin luil nan lanp nou, pou nou kòmansé ap di: "Ban-m ti gout luil pou lanp mouin pa fi-n étinn" (Mt 25,8). Y-ap di nou: "Al achté nan boutik". Lè konsa tout boutik ap déjà fèmin. L-ap trò ta, Mèt la ap antré, y-ap fèmin nou déyò. Nou pa doué joué avèk déstiné nou. Nan

tout bagay sé pou nou konsidéré finisman-an. Lè nou sonjé finisman nou, n-ap maché kòrèk (Qo 11, 9).

Prémié lèktu-a (2 Mac 7, 1-14) montré nou kijan y-ap fòsé sèt frè pou yo manjé viann laloua lansyin Téstaman-an pa-t pèmèt yo manjé. Yo pito roua-a touyé yo pasé yo dézobéyi laloua Bondié-a, paské yo té konnin lavi sa-a sé yon avaloua li yé. Vré Lavi ki pap janm fini-an, sé lòt bò-a li yé, nan sièl la, épi yo té kouè kò sa-a roua-a mèt touyé-l, Bondié ap fè-l lévé pou lavi ki pap janm fini-an. Sé konsa nan prémié tan légliz la, té gin anpil Krétyin ki té pito yo fè yo pasé mati, yo touyé yo tout kalité mòd jan lanmò, nan difé, ak épé, sou koua, pasé yo trayi kòmandman Granmèt la. Lè yo té konn fòsé yo ofri sakrifis bay zidòl, yo té konn pito pèdi lavi sa-a yo ouè-a pou yo joui lavi yo pa ouè-a, sa yo kouè nan li-a, sa yo éspéré nan li-a. Nan Krédo-a, nou di: "Mouin kouè nan lavi ki pap janm fini-an". Sé Lavi sa-a minm litiji trandézièm dimanch òdinè C-a mété dévan jé nou pou nou kalkilé sou li, pou nou pa kité okinn pièj dékontrolé nou. Sa-k marié doué rétt fidèl nan yon sèl mari oubyin yon sèl madanm, san yo pa kité lòt moun ap vi-n tronpé yo, ap fè promès ba yo, ki pa gin sans, ki pa gin débouché. Pito yo antré nan sièl la antan yo réfizé yon plézi k-ap pasé, pasé yo boulé nan lanfè-a apré yo fi-n gouté plézi tè-a k-ap finnin-an, k-ap kité gou anmè nan bouch yo. Sa k-ap travay pou yon apouintman ki pèmèt yo débat nan lavi-a, pito yo antré nan sièl la avèk dé min yo vid pasé pou y-al boulé nan lanfè-a avèk pòch yo lou ak lajan tranzaksion. Sa-k gin yon plas tou ba nan sosiété-a, pito yo antré nan sièl la avèk kè yo tou pòv, pasé pou y-al boulé nan lanfè-a avèk kouròn flè plin tèt yo, antan yo kéyi yo nan jadin prochin-an (Mt 18,8; 5,30).

N-ap mandé Manman Mari pou-l fè nou konsidéré valè éfò n-ap fè pou nou donté sans nou k-ap chèché plézi, pou nou frinnin anvi nou k-ap chèché gin plis lajan tout tan pi plis, pou nou mét bariè nan lidé nou k-ap kouri dèyè gran plas k-ap ba nou otorité ak pouvoua kòmandé lòt moun. N-ap mandé-l sa pou nou kapab ranjé kabann nou, matla nou, dra nou, zòrié nou, anvan dòmi nan jé nou, anvan Bondié vi-n frapé nan pòt nou, pou-l mandé nou kont sou fason nou té sèvi ak lavi sa-a li té ba nou-an.

Trandézièm dimanch òdinè C-a sé "Réziréksion". Sé pou nou sonjé défin yo. Bondié pa Bondié moun mouri, li sé Bondié vivan yo, mò yo ap lévé (Lc 20, 27-30 = évanjil). Sèt frè Makabé yo té gin éspérans sa-a lè yo t-ap touyé yo pou laloua-a (2 Mac 7,1-2. 9-14). N-ap ouè fas Bondié, l-ap satisfè nou lè l-ap révéyé nou ak fas li sot anba tè-a (Ps 16/17, 15 = Psòm-répons). Jézu-Kri lévé an prémié tankou prémié Pitit nan pami mò yo (Ap 1,5.6 = Alélouya).

*

Nou doué lapriyè yon fason spésial pou mò yo. Lévanjil tranndézièm dimanch òdinè C-a palé nou sou dènié kondision moun yo apré lanmò-a, lè dènié tan-an ap rivé. Tout dimanch sa yo ki fini ané litiji-a, jé nou fiksé sou sa nou rélé "les fins dernières". Dézièm liv Makabé yo, ki sèvi kòm premié lèktu tranndézièm dimanch òdinè C-a montré nou kouraj sèt frè yo pandan pèsékision Antiokus Épifa-n nan. Yo pa pè sibi mati ak lanmò poutèt lafoua yo, paské yo té gin konfians nan Réziréksion kò yo. Roua-a ki t-ap fè yo pasé mati-a, yo di-l, li minm tou l-ap résisité, min sé pa pou lavi (2 Mac 7,14). Liv Apokalips la ap palé nou sou dézièm lanmò-a, pinision moun ki kondané yo (Ap 20, 14). Sa mandé pou nou réfléchi anpil pou nou konn kijan n-ap sèvi ak lavi sa-a k-ap pasé-a, pou nou pa gin rémò lè l-ap trò ta nan jou kòlè-a (cf Ep 5, 6). Sé pou nou profité tan pasians la, pou nou korijé sa-k jinnin nou sou rout sièl la. Psòm-répons la fè nou ouè kijan nan Réziréksion-an n-ap gadé Bondié fas a fas (Ps 16/15), si nou aksépté viv sou tè sa-a tankou sé nan yon pélérijaj nou yé, paské gin moun ki konprann sé pou lavi sa-a sèlman y-ap viv (Ps 18,14), yo chajé ak byin, yo pa kapab poté yo avèk yo nan lòt lavi-a, yo bliyé kité yo pou désandans yo. Min lè y-ap rivé nan lòt lavi-a, Bondié ap mandé yo kont sou fason yo té sèvi ak yo. Sin Pòl di Korintyin yo tan-an kout; moun ki marié, sé pou-l fè kòm si li pa-t marié; moun k-ap kriyé, sé pou-l fè kòm si li pa t-ap kriyé; moun ki nan kè kontan, sé pou-l fè kòm si li pa-t gin kè kontan; moun k-ap achté, sé pou-l fè kòm si li pa-t posédé; moun k-ap sèvi ak tè sa-a, sé pou-l fè kòm si li pa t-ap sèvi avèk li, paské l-ap pasé, figi tè sa-a (1 Co 7,29-31). Sé nan sans sa-a Jézu réponn Sadiséyin yo ak konparézon sèt frè yo yo té prezanté-l la; youn té mouri apré lòt, chak foua yo té fi-n marié ak madanm gran frè-a ki té déja mouri-a, épi alafin madanm nan li minm tou li vi-n mouri. Yo té vlé pran Jézu nan pièj antan yo t-ap mandé-l pou kilès nan sèt yo madanm nan t-ap yé apré réziréksion-an. Jézu fè yo konprann nan lòt lavi-a pa gin késion mariaj, paské n-ap viv tankou Anj yo. Sèké sou tè-a moun yo marié, paské yo konnin y-ap mouri, yo bézouin transmèt lavi-a bay désandans yo pou yo prolonjé-l pou yo, nan plas yo. Min nan réziréksion-an minm, pa gin késion mouri ankò, sé pou sa pa gin késion transmèt lavi ankò.

Nan finisman Krédo-a nou di: "M-ap tann tout mò lévé, m-ap tann lavi k-ap vini-an". Vérité sa-a fè pati dépo lafoua nou. Sin Pòl di Korintyin yo: "Si n-ap préché Jézu-Kri lévé sot nan pami mò yo, kòman fè gin kèk moun nan nou k-ap di pa gin késion lévé sot nan pami mò yo. Si pa gin késion lévé sot nan pami mò yo, Kris la pa résisité tou; si Kris la pa résisité, prèch nou-an vid, lafoua nou-an vid tou" (1 Co 15, 12-14). Sin Pòl pran

konparézon ti grinn blé-a ki simin nan tè-a, li mouri, apré sa li lévé (1 Co 15, 51-52). Dépi koulié-a, nou doué toujou ap véyé, dapré sa Koélèt di nou, pou nou pa régrèt nan dènié jou-a, lè solèy, limiè, lali-n ak zétoual yo ap pèdi klèté yo (Qo 12, 2), lè moun nan apral abité nan kay koté-l gin pou-l rété tout tan-an (Qo 12, 5), lè pousiè-a ap tounin koté Bondié té pran-l pou-l té fòmé moun nan, nan tè-a, koté-l té sòti-a, épi léspri-a ap tounin koté Bondié ki té bay li-a (Qo 12, 7). Nan sans sa-a Koélèt di: "Tout bagay sé vapè" (Qo 12, 8) sou tè sa-a. Tout kondision ki fè yon moun pran pòz li sipériè pasé yon lòt, sé pou yon tan, apré sa l-ap pasé. Nou doué réfléchi sou dènié moman-an pou nou konn kijan pou aji. Nou pa doué tann nou fi-n vié granmoun, pou nou ajisté konduit nou sou règléman Bondié ak prinsip Légliz ba nou antan n-ap di: "n-a gin tan, an nou joui lavi-a toujou, apré sa n-a ouè!". Bondié planté nou nan jadin-l. Li pa di nou kilè l-ap vi-n kéyi nou. Jézu di l-ap vini tankou yon vòlè, lè nou pa atann (1 Th 5,2; 2 P 3,10; Ap 3,3; Mt 24,43; Lc 12,39).

Sèt frè yo té fi-n marié, yo té tou jèn, lè nanm yo vi-n séparé ak kò yo. Sèt pitit madanm nan ki té mouri yon sèl jou-a, sé ti moun yo té yé. Nou pa kapab fè Bondié prosè pou fason li rélé nou ak lè li rélé nou. Sé nou minm ki pou toujou paré. Li déjà avèti nou. Lavi nou sou tè sa-a, sé yon pèlerinaj. Zanmi, fanmiy, konésans nou t-ap viv avèk yo, nou rété konsa yon jou, nou aprann yo kitè tè-a, soua sé aksidan, soua sé maladi; bagay nou pa-t prévoua. Sa fè yon vid nan kè nou. An minm tan sa fè nou sonjé gadé chémin sièl la, koté Bondié rélé yo-a.

N-ap mandé Manman Mari favè pou nou aprann gadé pi louin pasé koté n-ap pozé pié nou, pou nou aprann prévoua dènié koté nou gin pou nou rivé-a. N-ap sonjé lapriyé yon fason spésial pou mò yo, pou Bondié ba yo limiè, répo ak lapè. Chak matin, chak midi, chak soua, épi si nou kapab, chak foua lè-a sonnin oubyin li maké sètè, uitè, névè, étsétéra..., sé pou nou sonjé fè yon ti lapriyé pou moun ki mouri yo, sitou sa ki pa gin pèsòn pou sonjé yo. Minm si priyé-a tou kout, li gin valè dévan Bondié. Sé yon fason pou nou sonjé nou tout sé yon sèl kò-d fanmiy nou yé. Lanmò pa gin frontiè. Si gin yon frontiè pou nou trasé, sé pa nan lanmò-a, sé nan batèm nan. Lavi nou séparé an dé: avan batèm nan, épi apré batèm nan. Batèm nan plonjé nou nan lanmò Jézu-Kri, pou-l fè nou lévé vivan nan lavi li. Lavi n-ap viv koulié-a, sé li minm n-ap kontinué viv lè nou travèsé lanmò-a, sof nap ouè Bondié fas a fas, si nou viv an éta-de-gras. Sé poua tou, nou pa doué pè lanmò-a, tankou sé yon madigra, yon zombi, yon loularou. Lanmò sé sèlman séparasion nanm nan ak kò-a. Sèlman nou doué lapriyé anpil pou moun k-ap mouri yo, paské Satan ap fè tou sa-l kapab pou-l dékourajé yo,

pou-l fè yo fè péché kont lafoua, tankou li té éséyé Sint Téréz lanfan Jézu-a. Démon yo t-ap di-l: "Avansé, Avansé, pou-ou al jouinn yon lannuit ki pi noua ankò pasé sa ou-ap travèsé koulié-a, lannuit koté ki pa gin anyin minm nan". Sé pou nou fè aprantisaj lanmò chak jou, pou nou pa dékontrolé, lè li rivé. Pou sa, sé pou nou suiv konsèy Sint-Ambouaz ba nou nan liv li ékri osijè lanmò frè-l la Satyrus, lè-l di: "Sé chak jou pou nou pran abitud ak santiman lanmò, pou nou séparé sot nan mové anvè kò-a, pou nanm nou pran distans li, antan-l instalé anlè, louin plézi tè-a, pou-l pa kité yo kolé sou li, pou-l aksépté pòtrè lanmò-a, pou-l pa sibi chatiman lanmò-a" (St Ambroise: "De excessus fratris sui Satyri, Lib 2, 40.41.46.47.132.133; CSEL 73, 270-274, 323-324; Liturgia Horarum IV, Vatican 1974, 1250-1252: " Sit quidam cotidianus in nobis usus affectusque moriendi, ut per illam segregationem a corporeis cupiditatibus anima nostra se discat extrahere, et tanquam in sublimi locata, quo terrenae adire libidines et eam sibi glutinare non possint, suscipiat mortis imaginem, ne poenam mortis incurrat"). Sint-Ambouaz di, apré Sin Pòl: "Kilès ki ka délivré-m sot nan kò lanmò sa-a?" (ib, cf Rom 7, 24).

*

* *

TRANTOUAZIÈM DIMANCH ÒDINÈ A

Trantouazièm dimanch òdinè A-a mandé nou véyé pou lè Granmèt la ap tounin-an, li jouinn nou paré.

Lévanjil la (Mt 25,14-30) montré nou "véyé"-a sé pa sèlman évité sa-k pa bon, min tou sé mét aktivité pou travay yon fason pou, lè Granmèt la tounin, nou rann li kont sou sa-l té mandé nou fè-a. Jèm lavi-a li té mété nan nou-an, lafoua, léspérans, lacharité ak tout lòt bon kalité yo, nou pa gin sèlman pou nou véyé sou yo, pou yo pa pèdi valè yo ak mérit yo, min tou nou doué fè yo aji tankou sèvitè sa yo mèt la té rimmèt piès lajan yo pou yo travay avèk yo-a.

Sin Pòl (1 Th 5,1-6 = dézièm léktu) palé nou tou sou lè Granmèt la ap tounin-an, li di nou sé tankou yon volè l-ap vini, sa vlé di san nou pa konnin ki lè, ni tan, ni dat. Nou pa doué kité jou sa-a sézi nou (cf Ac 1,7). Sin Pòl di nou sé pou nou véyé, pou nou pa kité fènoua-a vlopé nou, pou nou pa rété ap fè parès, ap di sé lapè, sé trankilité. Jézu di nou sé moun ki gin aktivité nan kò yo k-ap pran sièl la daso (Mt 11,12).

Prémié léktu-a (Pr 31,10-31) montré nou kijan madanm ki vyan-an, li pa dòmi minm tout nan nuit, li rété ap véyé, lanp li limin (Pr 31,18). Min-l fè anpil travay. Sé tankou sèvitè yo yo té rimmèt lajan-an pou yo fè-l rapòté-a.

Psòm-répons la (Ps 127/128) di n-ap joui travay min nou.

Konsa tout litiji tranrtouazièm dimanch òdinè A-a palé nou sou travay pou nou fè, pou jèm lavi Bondié dépozé nan nou-an avèk batèm nan, li pa rété san rézilta. Sé léspri Sin k-ap aji nan nou, sé vré, min sé pou nou dosil nan min-l, pou nou pa jinnin travay li. Pou sa, nou bézouin fè anpil éfò. Liv Provèb la di sé pou yo bay madanm nan nan frui min-l, sé pou travay li fè louanj li nan pòt yo. Sint Élizabèt té di la Trè Sint Vièj Mari "Ou béni nan pami tout fi, frui vant ou-a béni tou" (Lc 1,42). La Trè Sint Vièj Mari té chanté: "Tout jénérasyon ap fè louanj mouin" (Lc 1,48).

Vré frui-a sé Jézu li minm minm. Sé li minm la Trè Sint Vièj Mari kontinué ap fòmé nan kè nou, pou nou vi-n transfòmé nèt nan Jézu, pou nou di avèk Sin Pòl: "Sé pa mouin k-ap viv ankò, sé Jézu k-ap viv nan nanm mouin" (Ga 2,20).

N-ap mandé Manman Mari pou nou mét aktivité tankou bon sèvitè ki gin dévouman, pou Granmèt la ba nou plis favè toujou poutèt nou té fidèl nan sa-l té mandé nou-an.

(Gin yon fanm ki san défo, li bèl pasé lò, lajan ak diaman;

Ala chans pou moun k-ap viv sou kont Granmèt la)

*
* *

TRANTOUAZIÈM DIMANCH ÒDINÈ B

Lévanjil tranrtouazièm dimanch òdinè B-a (Mc 13,24-32) palé nou sou dènié jou-a, lè Pitit Moun nan gin pou-l parèt la. Sé nan dènié diskou Jézu-a (ki té kòmansé dépi nan Mc 13,5-8). Jézu di pou fè atansion moun yo k-ap pran pòz yo sé Kris la (Mc 13,6.21-22). Li insisté, li di fè atansion (Mc 13,9.23.33). Pasaj lévanjil tranrtouazièm dimanch òdinè B-a (Mc 13,24-32) gin dé pati, youn sé Pitit Moun nan k-ap vini-an (Mc 13,24-27), lòt la sé avètisman pou véyé-a (Lc 13,28-32). Jézu kòmansé, li di: "après jou sa yo" (Mc 12,24). Sa vlé di sé pa évenman yo kapab fiksé avèk présizion, sé yon fason laj pou prezanté tan koté bagay sa yo ap pasé. Lè Sin Mak pa vlé bay présizion sou lè ékzak yon bagay pasé, sé mo sa yo li abitué anplouayé "jou sa yo", tankou lè batèm Jézu-a (Mc 1,9) ak lè-l té fè mirak pin-an dézièm foua-a (Mc 8,1). Gran tray la l-ap palé-a, sé sa Profèt Danièl té prédi-a (Dn 12,1). Sin Jan té répété minm bagay nan Apokalips la (Ap 16,18; cf Ex 10,14; 11,6; Jer 30,7). Sé poua premié léktu-a sé nan pasaj Danièl la yo pran-l (Dn 12,1-3). Solèy la, lalu-n nan ak zétoual yo k-ap boulvèsé-a (Mc 13,24-25), sé yon fason Profèt yo abitué anonsé sign gran jijman-an (Is 13,10; 34,4; Ez 32,7-8; Joël 2,10). Pitit Moun nan k-ap parèt la (Mc 13,26), sé pasaj sa-a ki pi inpòtan nan sa Jézu ap di la-a (cf Dn 7,13). Sé Jézu li minm k-ap vini ak tout otorité-l, jan nou abitué di, lè n-ap déklaré lafoua nou nan Krédo-a, antan nou di: "Li gin pou-l rétownin avèk tout pouvoua li, pou-l jijé ni moun k-ap viv ni moun ki mouri, é li va Roua pou tout tan". Jézu ap bay répons (Mc 13,28-31) sou késion Piè, Jak, Jan avèk André té pozé osijè kay sakré-a ki t-ap détrui-a (cf Mc 13,4): "Di nou kilè bagay sa-a ap fèt, épi ki sign k-ap pèmèt rékonèt tout bagay sa-a ap fini". Jézu rékòmansé palé sou dènié-a, lè Pitit Moun nan ap vini-an (Mc 13,32). Yo sètin l-ap vini; min kilè? Pèsòn pa konnin. Sé konsa gin dé bagay ansanm la-a. Gin kay sakré-a k-ap détrui nan ané 70 après Jézu-Kri, épi gin dènié Jou-a k-ap rivé avèk Pitit Moun nan k-ap vini san pèsòn pa konnin-an. Sé poua nou blijé rét ap véyé (Mc 13,33-37).

Pèp Israèl té kouè Jou Granmèt la t-ap yon jou laviktoua sou lènmi pèp la (Ac 1,6-8). Profèt Amòs di sé tout moun k-ap sibi jijman (Am 5,18-20). Profèt Izayi di tout moun k-ap vanté tèt yo gin pou yo bésé-l jou sa-a (Is 2,12). Profèt Jérémi di jou sa-a sé jou pou Granmèt la réglé kont ak lènmi-l yo (Jer 46,10). Sèlman jou sa-a sé Granmèt la sèl ki konnin-l, dapré sa Profèt Zakari di (Za 14,7; cf Ac 1,7), jou sa-a pap gin lajounin ak lannuit, min sé limiè sèlman, dapré sa Profèt Zakari di. Sèlman pou moun ki nan péché yo, jou sa-a ap tankou fènoua (Joël 2,2). Profèt Sofoni minm chanté yon chanté dèy sou Jou sa-a tankou sé gla k-ap sonnin: "Dies irae, dies illa"

(cf So 1,15). Sofoni di sé jou kòlè jou sa-a yé, jou tray ak tèt chajé, jou dézas ak ravaj, jou fènoua ak niaj épè, jou dékou ak fènoua, jou son tronpèt ak rèl lagè. Ki moun ki kapab parèt dévan Granmèt la jou sa-a? Chak moun gin kichòy pou réproché tèt li. Min sa-k té mouri déjà gin pou yo lévé pou jijman-an, dapré Danièl (Dn 12,2 = premié léktu). Danièl di: Foul moun k-ap dòmi nan péyi pousiè-a (= ki mouri yo), y-ap lévé, yon pòsion pou lavi tout tan-an, lòt yo pou laront la, pou dézonè tout tan-an. Pasaj sa-a palé sou kèsion tout moun mouri ap lévé-a, sa nou di lè nou déklaré lafoua nou nan Krédo-a, lè nou di: "m-ap tann tout mò lévé, m-ap tann lavi k-ap vini-an". Sizièm nan sèt frè Makabé yo di roua Antiokus Épifa-n k-ap fè touyé-l la: "Kriminèl, ou égzilé nou sot nan lavi sa-a, min Roua Sièl la ak tè-a ap fè nou lévé pou lavi tout tan-an, nou minm k-ap mouri pou laloua-l yo".

Psòm-répons la (Ps 15/16) di: "ou pa kapab lagé nou nan lanmò, ou pap kite zanmi-ou ouè dékonpozision". Jou jijman-n, moun ki fè byin, y-ap lévé pou rékonpans la, min sa-k fè mal, y-ap lévé pou pinision-an. Nan lavi Sin Bruno, yo rakonté kijan li té gin yon bon zanmi li té rinmin anpil. Zanmi-an vi-n mouri. Lè Sin Bruno rivé dévan sèkèy la, zanmi-an lévé toua foua. Premié foua-a li di: "Mouin konparèt dévan Bondié". Dézièm foua-a li di: "Yo jijé-m". Touazièm foua-a, li di: "Yo kondané-m". Dépi lè sa-a Bruno chanjé chémin, li pran bon rout joustan li vi-n sin. Yon moun pa doué joué avèk létènitè-l. Sé yon bagay ki trò sérié, ki konsékan. Nou pa doué rét ap di Bondié bon, épi nou rét ap drivé nan péché sal. Malè pa gin klaksòn. Lanmò pa di "onè" ni "si-l vou plè". Li té trò ta, lè mové rich la té rélé Abraam, pou-l voyé Laza rafréchi lang li nan lanfè-a (Lc 16,26). Jézu di: lè pòt la ap fi-n fèmin, lè sa-a n-a rété déyò-a ap frapé, l-ap réponn nou: "An vérité, mouin pa konnin nou; ralé kò nou sot sou mouin, nou minm k-ap pléde fè péché-a" (Mt 25,12; 7,23; Lc 13,25).

Sin Pòl palé nou sou dènié tan sa yo nan premié Lèt li ékri moun Tésalonik yo (1 Th 4,13-18), nan minm fason Sin Mak prezanté-l nan lévanjil la. Li invité nou pou nou véyé (1 Th 4,1-11), paské pèsòn pa konn dat la Granmèt la ap vi-n tankou yon vòlè gro lannuit la (1 Th 5,2). Li di nou pou nou rét ap véyé, sa vlé di pou nou pa rét ap lagé kò nou nan péché, paské péché angoudi nanm nou, sé somèy lanmò, sé papòt lanfè. Nan dézièm Lèt Tésalonisyin yo (2 Th 2,11-12), li di nou pou nou pa kite moun troublé nou kan minm sou kèsion sa-a, antan y-ap di nou: "min li, min li, jou-a rivé". Li di djab la gin pou-l dévoualé anvan, pou Granmèt la fè-l disparèt ak souf bouch pa-l, pou-l fonn li avèk prézans li (2 Th 2,8). An-atandan jijman jénéral la, chak moun doué kinbé kò-l pré pou jijman patikilié-a, sa l-ap sibi kon-l mouri-a. Nou pa konn ki lè n-ap mouri, yon aksidan, yon maladi,

minm nan dòm, lanmò kapab pati avèk nou. Nou kouché asouè, nou pa révéyé nan matin; dòm sé ti frè lanmò.

Sé poua réfrin Alélouya-a di: "Rét véyé, lapriyé tout tan, pou nou mérité kanpé dévan Pitit Moun nan" (Lc 21,36). Lèt Ébré yo montré nou Jézu chita nan sièl la adouat Papa-a, l-ap tann pou lènmi-l yo anba pié-l (He 10,13; cf 10,11-18). Sin Pòl di nou dènié lènmi-an ki détrui-a, sé lanmò-a (1 Cor 15,26). Tou sa fi-n réalizé nan Pitit Moun nan déjà. Min rété pou réalizé sa nan manb li yo, nan légliz li-a, nan nou minm.

Moua novanb konsakré pou sonjé lapriyé yon fason spésial pou mò yo. Sé yon dévoua pou nou, vivan yo, pou nou lapriyé pou sa-k déjà pran dévan yo (2 Mac 12,38-45; 1 Co 3,15). Sa doué raplé nou tou nou pa fèt pou rét instalé anba isit la, lavi sa-a sé yon pasaj, sé pa yon garaj.

*

Sé tankou toua fous Jézu vini: yon premié fous pou Noèl, yon dènié fous pou jijman dènié-an; épi ant dé fous sa yo li kontiné ap vini chak jou nan nanm nou. Sé poua li mandé nou pou nou rét ap véyé tout tan. Invitasion sa-a raplé nou nou rivé nan finisman ané litiji-a. Sé lokazion raplé nou mésaj Pap Jan-Pòl II té voyé dépi nan premié Lèt ansiklik li té ékri-a nan ané 1979: "Redemptor hominis", lè-l té mandé nou pou nou té paré ané 2000 la, tankou yon nouvo tan lavan. Li té insisté sou kèsion sa-a ankò apré sa, alokasion jibilé Rédanssion-an, an 1983. Li té mandé nou pou nou kolé kò nou pi plis sou Manman Mari pandan gran tan lavan sa-a, sa vlé di pandan tout tan ki séparé 1983-a avèk 2000 la. Sé tan sa-a li rélé gran lavan-an. Sèké nan ané 2000 la, nou t-ap fété yon jibilé spésial: 2000 ané dépi Jézu té fèt. Sé nòm al dépi moman sa-a pou nou té sonjé 2000 ané dépi la Trè Sint Vièj Mari té fèt, minm si nou pa konn dat la ékzak, ni ané-a tou. Sèké tout tan sa-a li minm, li t-ap préparé pou-l vi-n Manman Jézu-Kri Pitit Bondié-a. Sé li minm ki kapab édé nou préparé gran évenman sa-a pi byin. Pandan tout tan sa-a nou viv nan léspri ki préparé fèt Noèl la. Pandan tan lavan yo réyèlman vré litiji-a invité nou fiksé jé nou sou prezans la Trè Sint Vièj Mari avèk Sin Jozèf avèk Sin Jan-Batis sitou. Plis Noèl ap proché, sé plis limiè-a ap dirijé pi klè sou figi la Trè Sint Vièj Mari. Kalité pou nou dévlopé sitou nan kè nou, sé silans la Trè Sint Vièj Mari-a, sé lafoua-l, sé sèvis li, sé éfasman-l. Sé nan sans sa-a pou nou rét ap véyé. Véyé-a, sé pa nésèsèman pasé nuit san dòm. Sé fè atansyon pou chéniy péché-a pa dévoré fèy plant lagras la nan nanm nou. Lè Jézu ap vini, si nou paré, l-ap fè nou antré avèk li nan lakay Papa li. Min si n-ap dòm nan péché, nou pap gin pèsion avèk li. Nou pa doué viv sou tè sa-a kòm si sé la sèlman nou gin pou nou pasé

légzistans nou. Vré péyi nou sé sièl la. Sin Kolonban fè komantè paròl Jézu di Apot yo, pou yo tankou sèvitè k-ap véyé, pou lè Granmèt la rivé, li fè konpliman pou yo (Inst. de compunctione, 12,2-3: Opera, Dublin 1957, 112-114; cf Liturgia Horarum IV, Vatican 1974, 283-284, mardi 28^e s.o., office de lecture; cf Lc 12,37). Li di sé nan somèy parès la pou nou révéyé, pou difé lacharité Bondié-a limin nou, pou-l chofé kè nou. Konsa tout nan nuit lanp nou ap limin nan Tanp Granmèt la, pou-l kléré fènoua nou, pou fènoua tè-a ralé kò-l sot sou nou. Li di sé tout tan, lajounin kon lannuit, pou n-ap gadé nan diréksion Jézu, pou nou anvi-l, pou nou rinmin-l, li minm lanp ki toujou limin-an. Li di rinmin sa-a, gran dlo pa kapab étinn li (cf Ct 8,7).

N-ap mandé Manman Mari pou nou kinbé lanp nou limin nan min nou, pou nou pa fè tankou vièj fòl yo ki kité lanp yo étinn, paské yo pa-t mét luil nan yo, épi lè fiansé-a rivé, li antré, yo minm minm yo rét déyò (Mt 25,1-13). Nan sièl la solèy pap bay limiè ankò lajounin, ni lali-n nannuit, min sé Mouton-an k-ap kléré vil Jérusalèm anro-a (Ap 21,23; 22,5; Is 60,19-20). Konsa sé dépi anba isit la pou nou kòmansé viv lavi sièl la, antan nou kité Granmèt la ap kléré nou anndan kè nou, tankou kolòn niaj la ak limiè-a ki t-ap kondui Pèp Israèl la nan dézè-a, pandan karantan-an, joustan-l antré nan péyi Bondié té promèt li-a (Ex 13,21). Limiè sa-a sé limiè lafoua-a.

Bondié ba nou rézon nou pou nou réfléchi, pou nou ouè kijan pou nou kondui tèt nou nan divès sikonstans lavi-a. Sèlman nou pa doué bliyé rézon-an doué obéyi limiè lafoua-a ki sipériè pasé-l. Yon moun k-ap véyé ak limiè sa-a k-ap kléré nan fon kè-l, li doué konsidéré valè ki pi inpòtan, k-ap montré-l rout pou-l fè, k-ap abouti nan péyi ki pap janm disparèt la. Sa vlé di gin konsidèrasion nou bliyé fè pasé apré. Sé pou nou kòmansé sèvi Bondié anvan, rès la ap vi-n apré (Mt 6,33).

Daprè rézonman yo prezanté dévan nou, nou doué triyé pou nou ouè kilès ki kadré avèk limiè sa-a k-ap kléré nan fon konsians nou-an. Nan sans sa-a nou doué véyé pou okinn fo-profèt pa fè nou fè fo-pa, antan yo dégizé nan Anj limiè pou vlopé nou nan fènoua (2 Co 11,14). Sin Piè di nou rét véyé, paské Satan tankou lion fèròs ap fè lavironn nou, pou chèché dévoré nou. Sé pou nou rézisté-l fèm nan lafoua (1 p. 5,3).

"Veiller": 58 foua nan lansyin Téstaman, 26 foua nan nouvo Téstaman-an: Ex 12,42; 23,20; Nb 4,16a.b; Dt 2,7; 32,11; Jos 1,7.8; 10,18; 1 Sm 26,15.16; 1 R 8,25; 14,27; 2 R 21,8; 2 Ch 6,16; 12,10; 33,8; Esd 8,29; Jdt 7,5; Est 5,1a; 1 Mac 12,27; 2 Mac 3,39; 9,21; 15,2; Job 10.12; 21,32; 29,2; Ps 12,1; 66,7; 102,8; 127,1; 141,3; Pr 2,8.11; 4,6.23; 8,34; 13,3; 16,17; 27,18; Qo 5,7; Ct 5,2; Sg 6,15; 13,16; Si 1,29; 7,24; 12,11; 32,23; 35,16; 38,27; Jer

1,12; 31,28a.b; 44,27; Ba 2,9; Ez 34,16; Dn 9,14.19; Mt 24,42.43; 25,13; 26,38.40.41; Mc 13,33.35.37; 14,34.37.38; Lc 12,37; 21,36; Jn 17,12; 1 Co 16,13; 1 Th 5,15; 1 Tm 4,16; He 12,15; 13,17; 1 p. 5,2.8; Ap 3,3; 16,15.

"Lampe": 5 fous nan lansyin Téstaman, 20 fous nan nouvo Téstaman-an: Ex 25,37a.b; 27,20.21; 30,7.8; 35,14; 37,23; 39,37; 40,4.25; Lv 24,4; Nb 4,9; 8,2a.b.3; 1 Sam 3,3; 2 Sam 21,17; 22,29; 1 R 7,49; 11,36; 15,4; 2 R 4,10; 8,9; 1 Ch 28,15a.b.c; 2 Ch 4,20.21; 13,11; 21,7; 29,7; Tob 8,13; 1 Mac 4,56; 2 Mac 1,8; 10,3; Job 18,6; 21,17; 29,3; Ps 18,29; 119,105; 132,17; Pr 6,23; 13,9; 20,20.27; 24,20; 31,18; Jer 25,10; Ba 6,18; Dn 10,6; Za 4.2a.b; Mt 5,15; 6,22; 5,1.3.5; 25,7.4; Mc 4,21; Lc 8,16; 11,33.34.36; 12,35; 15,8; Jn 5,35; Ac 20,8; 2 p. 1,19; Ap 4,5; 18,23; 22,5.

"Nuit": 319 fous nan lansyin Téstaman, 66 fous nan nouvo Téstaman-an: Gn 1,5.14.16.18; 7,4.12; 8,22; 14,15; 19,2a.b.5.33.34a.b.35; 20,3; 24,23.54; 26,24; 28,11; 30,15.16; 31,29.39.40.42.54; 32,14.22.23; 40,5; 41,11; 42,27; 43,21; Ex 4,24; 10,13; 11,4; 12,8.12.29.30.21.42; 13,21a.b.22; 14,20a.b.21; 24,18; 34,28; 40,38; Lv 6,2; 8,35; Nb 9,21; 11,9.32; 14,1.14; 22,8.19.20; Dt 1,33; 9,9.11.18.25; 10,10; 16,1; 21,23; 28,66; Jos 1,8; 2,2.5; 3,1; 4,3; 6,11; 8,3.9.13; 10,9; Jg 6,25.27.40; 7,9.19; 9,32.34; 16,2a.b.3a.b; 18,2; 19,6a.7b.9a.b.10.11.13.15a.b.20.25; 20,4.5; Rt 1,12; 3,2.8.13; 1 Sam 14,34.36; 15,11.16; 19,10.11.24; 25,16; 26,7; 28,8.20.25; 30,12; 31,12; 2 Sam 2,29.31; 4,7; 7,4; 12,16; 17,8.16; 19,8; 21,10; 1 R 3,5.19.20; 8,29.59; 19,8.9; 2 R 6,14; 7,12; 8,21; 19,3; 25,4; 1 Ch 9,27.33; 17,3; 2 Ch 1,7; 6,20; 7,12; 21,9; 35,14; Esd 10,6; Ne 1,6; 2,12.13.15; 4,3.16a.b; 6,10; 9,12.19; 13,20.21; Tob 8,9; 10,7; Jdt 6,21; 7,5; 8,3; 11,3.5.17a.b; 12,5.7; 13,14; Est 1,11; 4,16; 6,1; 1 Mac 4,1.5; 5,50; 9,58; 12,6.27; 13,22; 16,4; 2 Mac 8,7; 12,6.9; 13, 10.15; Job 2,13; 3,3.7; 5,14; 7,3; 10,22; 17,12; 24,7.14; 27,20; 29,19; 30,17; 34,20.25; 35,10; 39,9; Ps 1,2; 4,7; 17,3; 19,3; 22,3; 32,4; 42,4.9; 55,11; 74,16; 77,3.7; 78,14; 88,2; 90,4; 91,1.5; 92,3; 104,20; 105,39; 119,55; 121,6; 134,1; 136,9; 139,11.12; Pr 7,9; 31,15.18; Qo 2,23; 8,16; Ct 3,1.8; 5,2; 7,12; Sg 7,30; 10,17; 17,2.5.14.21; 18,6.14; Si 36,27; 38,27; 40,5; Is 4,5; 8,22.23; 15,1a.b; 16,3; 21,8.11a.b.12.13; 26,9; 28,19; 30,29; 34,10; 37,36; 38,12.12; 60,11; 62,6; 65,4; Jer 6,5; 8,23; 13,16; 14,8.17; 16,13; 31,35; 33,20.25; 36,30; 39,4; 52,7; Lam 1,2; 2,18.19; Ba 2,25; Dn 3,7,1; 5,30; 6,19; 7,2.7.13; 14,15; Os 4,5; 7,6; Joël 1,13; 5,8; Abd 5; Jon 2,1; 4,10; Mi 3,6; So 2,14; Za 1,8; 14,7; Mt 2,14; 4,2; 12,40; 14,25; 21,17; 24,43; 26,31.34; 28,13; Mc 4,27; 5,5; 6,48; 14,30; Lc 2,8.37; 5,5; 6,12; 11,5; 12,20; 17,34; 18,7; 21,37; Jn 3,2; 6,17; 9,4; 11,10; 13,30; 19,39; 21,3; Ac 5,19; 9,24.25; 12,6; 16,9.33; 17,10; 18,9; 20,7.31; 23,11.23.31; 26,7; 27,23.27; R

13,12; 1 Co 11,23; 2 Co 11,25; 1 Th 2,9; 3,10; 5,2.5.7a,b; 2 Th 3,8; 1 Tm 5,5; 2 Tm 1,3; Ap 4,8; 7,15; 8,12; 12,10; 14,11; 20,10; 21,25; 22,5.

"**Flambeau**": 5 fous nan lansyin Téstaman, 2 fous nan nouvo Téstaman-an: Jdt 10,22; 1 Mac 6,39; 2 Mac 4,22; Pr 21,4; So 1,12; Ap 11,4; 21,23.

"**Torche**": 10 fous nan lansyin Téstaman, 2 fous nan nouvo Téstaman-an: Jg 7,16.20; 15, 4a.b.5; Job 41,11; Si 48,1; Is 62,1; Ez 1,13; Za 12,6; Jn 18,3; Ap 8,10.

(Jézu di-n véyé; Mouin pap janm mouri; Bondié sé éritaj mouin).

*

* *

TRANTOUAZIÈM DIMANCH ÒDINÈ C

Sé sou késion "dènié tan" yo légliz la ap palé nou nan tranntouazièm dimanch òdinè C-a. Lè gin chanjman gouvènman, yon gouvènman ap tonbé, yon lòt ap ranplasé-l, gin yon moman tankou yon chanjman vitès nan kous machi-n nan k-ap monté mòn nan. Gin boulvès. Anpil moun pa ouè klè. Gin yon pakèt kandida k-ap plédé kòz yo: sa-a di sé li minm ki pou kòmandé, yon lòt di sé li minm, yo tout ap montré kalité yo ginyin, ak doua yo. Sé konsa pou dènié tan yo. Sé yon moman brouya koté sa-a di sé li minm ki profèt, lòt la di sé li minm ki Kris la, yon lòt di sé li minm Éli ki té gin pou-l vini-an, jan Profèt Malachi té anonsé-a. Dévan boulvès sa yo anpil fidèl dékontrolé. Sin Pòl avèti fidèl Korint yo pou yo pa kite okinn mové nouvèl konsa fè yo pèdi tèt yo, pou yo pa rété san yo pa fè okinn travay, pou yo pa rété ap di: "akoua bon", pou yo pa rété bra kouazé paské min dènié tan yo rivé, travay la pap sèvi yo anyin. Yon Krétyin pa fè konsidèrasion konsa (2 Th 3, 6-12). Mision-l sé chanjé fas tè-a avèk difé rinmin Bondié-a.

Apot yo pa-t ko ouè sa, lè Jézu t-ap monté nan sièl la. Yo té mandé-l si sé té nan tan sa-a li t-ap vi-n instalé péyi Roua Israël la (Ac 1, 6). Jézu di yo sé travay pa yo ki kòmansé. Lasansion Jézu-a sé pa yon finisman, sé yon kòmansman. Jézu monté pou-l voyé Léspri Sin-an, k-ap vidé difé rinmin Bondié-a sou tè-a, pa lintèmédiè Apot yo, nan légliz la. Apot yo té rété ap gadé nan sièl la, lè niaj la té voualé Jézu dévan jé yo-a. Anj la té mandé yo pouki sa yo té rété ap gadé sièl la, konsa-a. Minm Jézu sa-a té gin pou-l tounin ankò jan-l monté-a. An-atandan, travay pa yo t-ap kòmansé pou yo té préparé jou sa-a l-ap tounin an, antan yo poté Paròl li-a jous nan dènié bout tè-a.

Sé travay nou sa, poté Paròl Granmèt la jous nan dènié limit tè-a. Konsa sé responsabilité misionè nou pou nou pran. Nou kapab pa gin asé konfians nan ròl nou ginyin pou nou réyalizé nan Légliz la, oubyin nou mét limit nan ròl sa-a. Époutan sé pa dapré sa nou ouè Bondié réyalizé aktivité-l. Sé dapré volonté pa-l ki pa méziré sou intéljans nou (Is 55, 8). Otan sièl la ro anlè tè-a, otan lidé-l louin ak lidé nou (Is 55, 9). Sé yon jès lafoua nou fè, lè nou aksépté sèvi mouayin pou Bondié transmèt komision-l bay lòt frè nou yo. Minm si nou pa ouè klè ki sa paròl nou-an kapab chanjé nan lavi yo, sé pou nou palé kan minm. Paròl la sé yon sémans ki tonbé nan divès kalité tè, yon pòsion tonbé sou bò chémin, yon lòt nan ròch, yon lòt nan pikan. Sé dènié pòsion-an ki tonbé nan bon tè-a (Mc 4, 8). Konsa nou pa doué dékourajé, si nou voyé sinn nan tout nan nuit, san nou pa pran anyin. Nan dévan-jou lapèch la ap éstraòdinè (Lc 5,1-11; Jn 21,1-14).

*

Trantouazièm dimanch òdinè C-a sé "parousie", maniféstasion Granmèt la. Jézu bay lansègnman sou dènié tan-an k-ap rivé-a (Lc 21, 5-19 = évanjil). Jou-a ap rivé tankou solèy jistis la k-ap lévé pou nou, k-ap pot délivrans la nan réyon-l (Mal 4, 1-2a/ 3, 10-20 = premié léktu). L-ap vi-n pou-l jijé tè-a (Ps 97/5 = Psòm-répons). Sé pou nou lévé tèt nou, paské délivrans nou-an ap proché (Lc 21, 28). Sé pou nou viv yon fason pou tout moun ouè péyi koté Bondié Roua-a déjà nan mitan nou.

Nou prèské rivé nan finisman ané litiji-a. Sé pou sa yo invité nou réfléchi sou Jou Granmèt la. Jézu kòmansé bay patizan-l yo avètisman pou yo pa kité pèsòn vi-n tronpé yo, antan y-ap fè yo kouè Jou-a rivé (Lc 21, 8). Konsa tou Sin Pòl avèti Tésalonisyin yo, nan dézièm léktu-a, pou yo sispann ap fè parésé, kòm si yo pa t-a bézouin travay ankò, paské dènié tan-an déjà rivé. Li di yo moun ki pa travay pa gin doau manjé (2 Th 3, 10-12). Sé mové nouvèl moun yo ap gayé, pou dékontrolé lòt yo. Sa pa gin okinn fondman. Jou Granmèt la gin pou-l rivé vré, jan Profèt Malachi di nan premié léktu-a (Mal 3, 19). L-ap chofé tankou yon brazié. Tout moun k-ap pran pòz yo sipériè pasé lòt yo, tou sa k-ap fè mal yo, y-ap tankou pay kay. Jou-a ap flanbé yo; li pap kité ni rasi-n ni ramo pou yo.

Sèlman Profèt Malachi invité nou pou nou pa fè kè nou soté, si nou respékté Non Granmèt la (Mal 3,20), paské sé yon Solèy Jistis k-ap lévé pou nou, avèk gérizon-an nan réyon-l. N-ap dansé ak kontantman. Jou Granmèt la sé jou fèt l-ap yé pou nou, sé pa jou dèy, jan Profèt Sofoni déklaré pou méchan yo (So 1, 14-16): "Dies irae, dies illa", jou kòlè, jou sa-a. Psòm-répons la mandé pou rélé kè kontan nou dévan Granmèt la k-ap vini-an (Ps 95/96, 6) pou-l jijé tè-a (Ps 95/96, 8). Konsa nou pa doué kité mové nouvèl troublé nou.

Gin anpil fo-profèt k-ap chèché fè patizan suiv yo, antan y-ap déklaré yo sé Kris la, san pèsòn pa ba yo manda (Lc 21, 8), antan y-ap déklaré tan-an rivé (ib). Jézu di: pa suiv yo (ib). Li di tout kalité brui lagè ak boulvès n-ap tandé yo, sa pa doué dékontrolé nou; bagay sa yo gin pou yo rivé réyèlman vré; min sé pa tout suit; apré sa finisman-an ap rivé (Lc 21, 9). Nan mitan tout boulvès sa yo, ap gin pèsékision kont Krétyin yo (Lc 21, 10-19), min sé Granmèt la k-ap sèvi yo défans (Lc 21, 14-15) pou yon sèl chévé nan tèt yo pa tonbé (Lc 21, 18). Li mandé yo pou yo gin Landirans (Lc 21, 19). Sé konsa y-ap sové lavi yo. Anvan Jézu monté nan sièl la, Apot yo ap mandé-l si sé nan tan sa-a l-ap vi-n rinnèt tout bagay an plas, sa vlé di l-ap fè dènié

jou-a rivé (Ac 1, 6). Li ésplicé yo yo pa kapab konnin ni tan ni moman Papa-a désidé nan pròp pouvoua-l (Ac 1, 7). Li fè yo konnin sé tan légliz la ki komansé (Ac 1, 8), antan y-ap résévoua fòs Léspri Sin-an pou yo sèvi-l témouin jous nan bout tè-a anvan dènié Jou-a rivé. Konsa sé pou lévanjil la rivé jous nan dènié bout tè-a, pou dènié Jou-a kapab rivé (Mt 24, 14; cf 2 Th 2, 6-8). Pandan tan sa-a nou doué véyé, paské nou pa konn ni jou-a ni lè-a (Mt 24, 36-44). Dévoua nou sé sèvi Jézu témouin tou patou, pou ringn li rivé, pou-l tounin dézièm foua-a kòm Roua nan bèlté-a. Nan tan sa-a Léspri-a ak Légliz la ap di: "Maranatha", Granmèt, vini! (Ap 22, 17; cf Dominum et vivificatem 66). Jézu di tout moun ap rayi nou poutèt non-l (Lc 21, 17). Nan tan pèsékision-an, nou bézouin landirans (Lc 21, 19: ὑπομονή "hupomonè") yo. Sé yon kalité Léspri Sin-an bay Apot yo, pou yo kinbé fèm, malgré tout kontrariété k-ap jinnin éfò yo. Sé tankou sé yon kouran dlo y-ap rémonté alanaj; si yo fébli, l-ap broté yo. Sé pou soutni landirans sa-a Profèt yo ak Apot yo té ékri liv apokalips yo pou ankourajé fidèl yo nan tray yo, pou raplé yo pèsékision-an pap diré tout tan, li gin limit li; sé Granmèt la k-ap ranpòté laviktoua. Antiokus Épifa-n té pèsékité pèp Bondié-a pandan touazan édmi. Aprè sa pèp la té dégajé anba difikilté sa yo. Sé poua Sin Jan palé osijè mil-désansouasant jou-a; li di tou: yon tan, kèk tan ak mouatié yon tan; épi tou karandé moua. Tou sa vlé di touazan édmi: limit pèsékision Antiokus Épifa-n nan, ki sèvi tankou yon modèl pou fè sonjé tout pèsékision gin limit yo (Ap 12, 14; 11, 2-3; cf Dn 7, 25; Ap 13, 5).

Lontan lè pèp Israèl té konn ap palé osijè Jou Granmèt la, li té konn fè sonjé Jou-a ap vini pou tiré vanjans sou lènmi pèp la. Sèlman pèp Israèl pa-t konn fè éfò pou-l aji dapré volonté Bondié. Li té tèlman sètèn Jou Granmèt la t-ap vi-n réglé lènmi-l yo pou li. Profèt yo mandé-l pou-l détronpé tèt li (Am 5, 18-20). Si-l pa aji byin, Jou Granmèt la ap valé-l li minm tou ansanm ak tout moun k-ap fè sa-k mal yo. Sé pa sou tit nou Bondié ap jijé nou. Sé pa paské nou nan tèl group n-ap présèvé nésésèman. Sé dapré konduit nou Bondié ap jijé nou. Profèt Amòs di: "Madichon pou moun sa yo ki anvi Jou Granmèt la! Ki sa l-ap yé pou nou, Jou Granmèt la? Sé fènoua l-ap yé, sé pa limiè. Tankou yon moun k-ap sovè dévan yon lion, épi sé yon ous ki vi-n rankontré-l, li antré lakay li, li mét min sou miray la épi yon sèpan piké-l" (Am 5, 18-19). Konsa nou doué gin landirans nan éfò nou, pou nou batay kont défo nou, san nou pa fè négljans antan n-ap di Granmèt la ap réglé lènmi nou yo pou nou. Lènmi-an anndan kè chak moun nan nou. Alafoua sé pou nou konté sou fòs Léspri-Sin-an pou nou pa dékourajé nan pèsékision nou, an minm tan tou sé pou nou fè fòs sa-a sèvi,

antan nou fè éfò pou nou véyé sou mové tandans nou, pou Jou-a pa jouinn nou ap dòmi nan libètinaj, paské l-ap vi-n tankou yon vòlè, san nou pa konn kilè (1 Th 5, 2; Mt 24, 42; Lc 12, 39).

N-ap mandé Manman Mari favé pou nou kondui tèt nou tankou nan lajounin, jan Sin Pòl di Éfézyin yo, Romin ak Tésalonisyin yo (Ep 5, 8-14; R 13, 11-13; 1 Th 5, 5-10). Lèt Ansiklik Pap Jan-Pòl II té ékri osijè Léspri Sin-an ("Dominum et vivificantem") té invité nou gadé nan diréksion ané 2000 la tankou yon jalon nan istoua-a ki fè nou sonjé lè tan-an té rivé bout li-a, Bondié té voyé Pitit li-a sou tè-a, pou-l té pran nésans nan Mari ki Vièj, jan Sin Pòl di Galat yo (Ga 4, 4; cf "Dominum et vivificantem", 49). Pap la té mandé nou pou nou té préparé pou nou fété jalon sa-a nan Léspri Sin-an, antan nou chèché konnin-l pi plis, antan nou chèché rinmin-l pi plis ("Dominum et vivificatem", 66).

Ané 2000 la sé yon gran "Jubilé" li yé. Mo "jubilié"-a soti nan yon mo ébré yo rélé "yobèl" (יובל), ki vlé di "tronpèt". Sé chak 50 ané yo té konn sonnin tronpèt pou maké jalon nan istoua-a k-ap kondui nou nan bout tan-an. Anj yo ap sonnin gran tronpèt yo pou rasanblé tout moun sou fas tè-a pou dèniè jijman-an (1 Co 15, 5; Mt 24, 31; cf Lv 25, 9-12). Minm jan Léspri Sin té paré la Trè Sint Vièj Mari pou nésans Pitit Bondié-a, sa-a ki t-ap vi-n sou tè-a pou-l pran kò-a, konsa l-ap paré Légliz pou-l résévoua minm Pitit Bondié-a ki gin pou-l tounin kòm Roua ("Dominum et vivificantem", 49-51). Sé pousa ansanm ak La Trè Sint Vièj Mari, ak Légliz, Léspri Sin-an ap di: "Maranatha", Granmèt, vini! (Ap 22, 17; "Dominum et vivificatem", 66).

*
* *

TRANKATRIYÈM DIMANCH ÒDINÈ, KRIS-ROUA A

Nan dènié dimanch lané-a, litiji-a palé nou sou dènié tan yo. Lévanjil la (Mt 25,31-46) montré nou Granmèt la k-ap séparé bon yo avèk mové yo, pou-l voyé bon yo nan Paradi-a, mové yo nan lanfè-a. Sé sou lacharité jijman-an ap poté. Prèmié léktu-a (Ez 34,11-17) fini antan li di kijan Granmèt la ap fè **jijman** ant sa-k bon ak sa-k méchan. Sin Pòl (1 Co 15,20-28), nan dézièm léktu-a, palé sou sa k-ap rivé apré lanmò-a nan dènié tan-an, sé rézirèksion tout moun, lè Jézu ap rinmèt pouvoua-a bay Bondié Papa-a, apré li fi-n détrui tout pouvoua mal yo. Dènié lènmi l-ap détrui-a sé lanmò-a. Li déjà lévé vivan, l-ap fè nou lévé vivan tou.

Dènié dimanch la, yo rélé-l dimanch Kris-Roua. Dépi Jézu fèt, li sé Roua. Min fotèy gouvènman-l sé yon ganmèl koté bèt manjé zèb, palè-l sé yon trou ròch ki sèvi pak mouton. Li Roua lè yo kondané-l amò, yo klouré-l sou Koua-a. Kouròn li, sé yon très pikan. Lè l-ap tounin nan mitan Mésajé-l yo, sou niaj yo, lè sa-a y-ap ouè klè ki grandè li ginyin. An-atandan li toujou rét kaché pou invité nou gin rélasyon lafoua avèk li.

Lanmò, jijman, Paradi, lanfè, sé sa yo rélé dènié finisman yo. Dènié dimanch lané-a palé nou sou yo, an minm tan l-ap montré nou Jézu-Kri kòm Roua. N-ap mandé Manman Mari, Rèn sièl la ak tè-a, pou-l fè nou dévlopé lacharité nan kè nou, pou nou pa fè régadan avèk prochin nou, pou nou konnin ninpòt ki ti sèvis nou rann yo, sé Granmèt la minm nou rann yo. N-ap sonjé kijan lè Jézu té vi-n sou tè-a prémié foua-a sé an sékrè, sé pa lintèmediè Manman Mari li té pasé. Lè l-ap tounin dézièm foua-a aklè-a, sé Manman Mari k-ap paré rout li tou nan kè fidèl yo. Lè n-ap travay pou la Trè Sint Vièj Mari vi-n Rèn nan kè nou, sé gouvènman Jézu n-ap instalé. Tan lavan-an ap insisté sou plas Jan-Batis, Jozèf ak Mari. Plis Noèl ap proché, sé plis prezans la Trè Sint Vièj Mari ap vi-n pi pré, pou vi-n dépozé ti Jézu nan Krèch la. Anndan lavan-an, Imakilé Konsépsion ap parèt tankou yon bèl zétoual k-ap kléré nan nuit. N-ap ranmasé priyè ak sakrifis nou tankou yon bèl bouké flè pou nou prezanté bay Manman Mari. L-ap ranjé yo byin bèl pou-l ofri yo bay Jézu kòm kado Noèl, nan mitan bijou ak kado Roua-Maj yo ap poté pou rékonèt Jézu kòm sèl Gran **ROUA**.

(Ou ban-m manjé, ou ban mouin bouè, ou fè-m antré lakay Papa-m Jézu-Kri sèl Roua, sé li minm sèl ki sou fotèy la)

*

* *

TRANKATRIYÈM DIMANCH ÒDINÈ, KRIS-ROUA B

Nan lévanjil dapré Sin Jan-an (Jn 18,33-37), kèsion Pilat pozé Jézu-a pa préparé. Sa sèlman Juif yo di-l: "Sé yon malfètè nou minnin ba ou" (Jn 18,36). Épi Pilat mandé-l si-l sé roua. Jézu rinmèt li kèsion-an tou: "Èské sé plint sa-a yo dépozé kont mouin?" (Jn 18,33). Nan lévanjil dapré Sin Luk la poutan (Lc 23,2) nou tandé Juif yo k-ap di: "L-ap mét kabouyay nan nasion nou-an, paské li anpéché yo péyé inpo bay Séza épi l-ap di sé li ki **KRIS-ROUA**." Pilat pa fè ka bagay sa-a (Lc 23,4). Pilat t-ap chèché débarasé-l ak ka sa-a ki jinnin-l tròp la, atèl pouin li té ranvouayé-l bay Èròd (Lc 23,6-7), tankou lè Féstus té gin pou-l prononsé jijman kont Pòl, li té anbarasé, li té blijé rélé roua Agripa vi-n ba-l yon kout-min (Ac 25,13-27), minm jan Galion pa-t kapab ouè anyin nan ka Pòl yo té vi-n akizé dévan-l nan tribinal la (Ac 18,14-16). Sa pa fasil pou jijé douz ras Israèl yo (Mt 19,28). Sé yo minm ki gin pou jijé Mésajé yo (1 Co 6,3).

Tout fason, Jézu avèti Pilat pou-l mété-l alèz. Péyi koté-l Roua-a, sé pa anba isit la li yé, paské sé pa konsa bagay yo t-a pasé (Jn 18,36). Li té déjà bay prèv li té kapab jété tout lamé-a atè-a nan jadin Jétsémani-an, lè yo té vi-n arété-l la (Jn 18,6; Mt 26,53). Kon-l di "Sé mouin", la minm tout sòlda yo tonbé atè sou do (Jn 18,6). Sé sa Psòm nan té déjà prévoua "Yon lamé mèt proche kont mouin, sé lènmi-m yo ki rékilé, ki tonbé" (Ps 27,2). Jézu té fè Piè lobsèvasion, lè-l té blijé-l rinmèt épé-l la nan fourou-l la (Jn 18,11). Sé pa mòd otorité fòs sa yo li chouazi pou-l kòmandé. Préfas fèt Kris-Roua-a di: "Tout koté Jézu-Kri Roua, sé lavérité, sé lavi, sé byin ak Bondié, sé maché douat, sé rinmin, sé kè pozé". Juif yo pa-t konprann mòd jan Roua sa-a. Sé yon lòt kalité roua yo t-ap tann: Roua k-ap ba yo manjé pin an kantité (Jn 6,15), roua k-ap défann yo kont lènmi-an ki t-ap maltrété yo-a (Lc 24,21). Sé poua yo t-al rankontré-l avèk branch palmis lè-l t-ap antré Jérusalèm dènié foua-a (Jn 12,2). Min pouvoua-l vi-n sot anro: "Yo rinmèt mouin tout pouvoua nan sièl la ak sou tè-a" (Mt 28,18). Fòtèy pouvoua sa-a sé nan sièl la li chita (Dn 7,14). Sé ak san lakoua-a li signin kontra pouvoua sa-a (Ap 5,11). Vré sans mision Roua Jézu ginyin, sé témouagné sou lavérité-a (Jn 18,37). Li sé Pitit Papa-a plin Favè ak Vérité (Jn 1,14). Li palé sou sa-l konnin, li témouagné sou sa-l ouè, min yo pa aksépté témouagnaj li-a (Jn 3,11.32). Moun ki aksépté témouagnaj li-a, li sètifié Bondié di lavérité (Jn 3,33). Sé kòm si Jézu invité Pilat pou-l kouè li minm tou nan lavérité-a ak lavi-a (Jn 5,25; 8,47). Min invtasion sa-a, sé pou nou tout li yé.

*

Jézu di péyi koté-l Roua-a, sé pa sou tè sa-a li soti. Nan dènié dimanch ané litiji-a, nou fiksé jé nou sou Jézu-Kri Roua. Li fè nou konnin sé pa pou tè sa-a n-ap viv. Sé pasé n-ap pasé sou li, antan nou fè dévoua nou, pou nou mérité sièl la. Sé tankou yon batay n-ap minnin anba isit la, sé poua yo rélé légliz ki sou tè-a légliz "militante". Légliz ki nan sièl la sé légliz "trionphante": li déja fi-n batay, li ranpòté laviktoua. Légliz nan Pigatoua-a, sé légliz "souffrante" k-ap fi-n pròpté anvan-l antré nan bèlté-a. Konsa nou pa doué instalé kòm si sé pou tè sa-a sèlman n-ap travay. Sé joupa nou planté sou li, k-ap défèt lè vré kay la ap bati anro-a (2 Co 5,1). Sans pasaj sa-a doué pousé nou maché, pou nou fè éfò tout tan. Lè Bondié té fi-n fè pèp Israèl antré nan péyi Kanaan-an, pèp la té vi-n pran abitud moun yo ki té déja abité péyi-a. Li instalé, li bliyé sé maché Bondié té konn fè-l ap maché nan dézè-a. Li tèlman instalé, li mandé pou-l gin yon roua k-ap dirijé afè-l, minm jan ak tout lòt nasyon yo (1 Sam 8,5ss). Sé yon fason pou-l pran indépendans li parapò a Bondié. Roua yo fè-l pasé nan jé zégui, jan Profèt Samuèl té avèti-l davans la (1 Sam 8,11-18). Yo lokazion li pati an-égzil. Lè-l tounin, li mét éspoua-l sou Roua Bondié té promèt la k-ap réfè péyi David la (Ag 1,12.14; 2,2,4,21,23; Za 4,4b.7-10; cf 2 R 23,1-30).

Jézu vini réyèlman vré kòm Roua, Pitit David la (Lc 1,32; cf Mt 1,1). Sèlman, sa yo t-ap tann nan min-l nan, sé pa sa li poté. Li fè déklarasion solanèl dévan Pilat, péyi koté-l Roua-a pa sou tè sa-a, jan lévanjil dapré Sin Jan-an di-a (Jn 18,33-37). Li té déjà montré pèp la sa divès fason, tankou lè-l té sové nan mòn nan, poutèt yo té vlé fè-l roua, apré mirak pin yo nan dézè-a (Jn 6,15). Dépi-l fèt, roua maj yo sot jous nan péyi diréksion solèy lévé, pou pot kado ofri-l, antan yo ouè zètoual li lévé nan sièl la, kòm Roua ki anlè tout roua. Yo pa-t ko konprann ki kalité mòd gouvènman sa-a. Sé poua sé kot Èròd y-alé dabò, Jérusalèm, pou chèché ésplikasion (Mt 2,1ss). Min lè yo rivé koté-l yé-a, yo konstaté sé tankou yon pòv li vini sou tè-a, kouché sou pay, nan pak zannimo yo. L-ap mouri san-l pa minm gin yon kavou pou li. Sé nan pa lòt y-ap antéré-l (Jn 19,41-42). Sé pa mòd kalité roua sa-a yo t-ap tann. Min sé li ki vini.

Li kité modèl pou nou (1 p. 2,21), pou nou pa pran pòz poutèt yon ti grad ak yon ti otorité nou ginyin (cf 1 P 5,1-4). Tout pouvoua sé nan Bondié li soti (Rom 13,1). Si Bondié ba nou-l, sé pou nou fè pèp la, kominoté-a, fanmiy nan, légliz la, fè yon sèl. Yon chèf fèt pou asiré bòn antant nan pami group l-ap dirijé-a. Li pa doué profité ròl li pou-l avantajé intèl parapò a tèl lòt, pou-l montré ki pèz li ginyin, pou pran nan bouch intèl pou-l krazé tèl lòt. Li doué gin plato jistis la ak charité-a an-ékilib nan min-l, pou-l jijé an minm tan tou l-ap rinmin. Youn pa alé san lòt. Rinmin-an sé aktivité ki nan sèvis

Vérité-a. Jijman-an sé aktivité ki sèvis lapè-a. Sé poussa Psòm yo k-ap prezanté kalité Roua-a Bondié té promèt la, yo insisté sou dé kalité sa yo: rinmin ak vérité, jistis ak lapè: "Rinmin ak vérité rankontré, Jistis ak lapè anbrasé" (Ps 85,11). Préfas fèt Kris-Roua-a di: ringn Granmèt la sé yon ringn "lavi ak lavérité, lagras ak zanmi Bondié, jistis rinmin ak lapè".

N-ap mandé Manman Mari, Rèn lapè, pou-l fè nou chèché mété lapè koté ki gin lagè, pou nou pa vidé gaz sou difé-a, mété pasé ginyin, lè gin ti kont, okontrè pou nou fè sa nou kapab pou nou kalmé léspri yo, fè yo fè youn nan **lavérité**, pou nou chofé kè yo, fè yo fè youn nan **lacharité**.

*

* *

TRANKATRIYÈM DIMANCH ÒDINÈ, KRIS-ROUA C

Jézu-Kri Roua sou tout tè-a, min sé lè-l sou Koua-a, sa parèt (Lc 23, 35-43= évanjil). Bon laron-an mandé-l pou-l sonjé-l, lè l-ap vini nan péyi koté li Roua-a. Jézu réponn li sé pròp jou Vandrédi-Sin-an minm l-ap avèk li nan Paradi-a. Rouayom nan déjà la. Lè Jézu t-ap maché préché nan Lapalésti-nan, li pa-t vlé kité yo ba-l tit roua-a, paské moun yo té gin yon konsépsion osijè roua-a ki pa-t dakò avèk plan Bondié. Yo t-ap tann yon roua k-ap vi-n délivré yo anba lokipasion Romin yo. Min sé pa sa Bondié té chouazi pou-l té réalizé plan-l. Sé lè Jézu chita sou fotèy Pilat la avèk très pikan-an nan tèt li, li déklaré li sé Roua. Yo t-ap tann pitit David la ki t-ap vi-n réfè gouvènman-an, jan Apot yo t-ap mandé Jézu avan lasansion-an. Moun Ébron yo té sakré David roua sou Israèl pou-l défann kòz yo (2 Sam 5, 1-3 = premié léktu). Fotèy roua-a té instalé Jérusalèm (Ps 121/ 122 = Psòm-répons). Sé rouayòm sa-a yo t-ap tann rétonnin (Mc 11, 10 = alélouya), pou fè pèp la fè yon sèl, pou ba-l fòs kont Romin yo. Jézu pa vi-n pou-l batay. Li vi-n pou-l mété yon rouayòm rinmin. Sé konsa li Roua nan kè nou.

*

Sin Matié okipé konsidéré pi plis Légliz avèk katéchis. Sin Mak insisté pi plis sou konsidèrasion prèch la avèk fason ki fè chòk. Sin Luk li minm gin plis atansyon pou fè ouè koté paròl avèk aksion lévanjil la touché nou nan fon ZANTRAY nou, yon fason PÈSONÈL. Sé konsa pasaj lévanjil selon Sin Luk la osijè Kris-Roua-a (Lc 23, 35-43) palé sou bon Laron-an ki sansib pou Jézu, lè-l tandé mové laron-an ap pasé-l nan rizib. Épi lè-l fi-n fè ouè kijan Jézu inosan, li viré kot Jézu yon fason pèsonèl, li lapriyé-l pou pròp tèt li, li mandé-l pou-l sonjé-l lè-l rivé nan péyi koté li Roua-a. Sèké li té mét lafoua nan réalizasyon paròl Jézu-a. Si-l té vi-n tounin yon asasin, sé paské li t-ap chèché yon avantaj li pa-t jouinn nan chemin lavi-a. Min li té pran mové chemin. Li rékonèt sa. Li fè konfèsion-l. Jézu viré koté-l. Li bliyé soufrans li, pou-l réponn li avèk promès li fè-l: "Jodi-a minm ou-ap avèk mouin nan Paradi-a" (Lc 23, 43). Jézu vini pou malad, pou péchè, pou mouton ki pèdi. Li réalizé mision-l yon fason ki ba nou rézon espéré. Nou t-ap tann yon jij, nou jouinn yon Avoka (1 Jn 2,1); nou t-ap tann yon mèt, nou jouinn yon Doktè; nou t-ap tann yon kontrolè, nou jouinn yon Gid.

Fèt Kris-Roua, sé fèt tout mouvman aksion katolik. Kiro pran non-l nan dé premié lèt grèk yo ki fòmé non Kris la: yon "Ki" (X) avèk yon "Ro" (P), ki bay sign "Kiro"-a (XP). Yo fété fèt yo yon fason spésial pou Kris Roua-a. Min tout mouvman aksion katolik yo, sé témouin yo yé ki pou fè ringn Jézu-Kri-a dévlopé sou tè-a. Josis yo ap travay nan mitan frè ak sè yo tankou

lévin nan pat la, pou yo chanjé konsépsion moun yo ginyin osijè prinsip k-ap réglé aktivité yo. Fouayé yo ap viv yon fason pou fè papa ak manman yo réalizé ròl Bondié té ba yo dépi lè-l té kréyé premié gason ak premié fi-a pou yo fòmé yon fanmiy koté moun yo vi-n tounin tankou Paradi Bondié. Péché-a gaté réalizasion plan Bondié-a. Min sa Bondié paré pou nou, anyin pa kapab poté-l alé. Jézu-Kri-Roua ranpoté laviktoua sou péché ak sou Satan. Li Roua pou tout tan. Léjion-d-Mari tankou yon lamé ranjé pou batay, l-ap montré kijan ringn Satan fini, sé Bondié ki Roua. L-ap fè ouè plas la Trè Sint Vièj Mari nan batay la. L-ap dévlopé dévotion la Trè Sint Vièj Mari nan kè fidèl yo, sitou ak chaplè-a, pou dévlopé ringn Jézu-Kri nan nanm yo. Misionè Jézu-Kri yo ap maché préché tout koté tankou Apot yo, san rété, bay tout moun, nan tout kondision, pou fè ouè ki jan tan yo rivé pou moun yo pran désizyon sèvi Jézu fran avèk konfians. Konsa y-ap préparé chémin dévan Jézu tankou Jan-Batis nan dézè-a. MÈJ yo ap fè ouè inpòtans Ékaristi-a, prezans sakramantèl Jézu-Kri ki toujou rété avèk nou k-ap bay tout priyè nou avèk tout aktivité nou yon nanm. Sé konsa tout manb aksion katolik yo ap travay yon fason spésial pou fè moun yo ouè ringn Bondié-a ki nan mitan yo-a, pou fè yo rékonèt prezans Jézu-Kri nan tout sitiasion koté yo yé, nan tout sikonstans y-ap viv. N-ap lapriyè Granmèt la yon fason spésial pou manb aksion katolik yo pa dékourajé, pou yo konnin sé sòlda yo yé, pou minn si yo rankontré anpil difikilté, yo kontinué chémin yo, pou yo sonjé premié so pa so, pou yo fiksé jé sou chémin-Koua Jézu-a, pou yo pa bliyé apré Vandrédi-Sin sé Dimanch Pak.

Préparé chémin Granmèt la. Jézu vini yon premié foua an kachèt, Bétléèm, koté li rivé lakay li, moun lakay li pa rékonèt li (Jn 1, 11.26; cf Lc 2, 7b), L-ap vini yon dézièm foua, nan klèté, sou niaj yo avèk tronpèt Mésajé yo, kòm ROUA (1 Th 4, 16; Mt 24, 30; 25, 31; Ac 1, 11). La Trè Sint Vièj Mari té sèvi-l CHÉMIN spésial premié foua. L-ap sèvi-l CHÉMIN spésial dézièm foua-a tou (cf VD 1, OC 487; VD 49; OC 514; VD 50-54; Oc 515-519; VD 152-168; OC 582-597; ASE 212, OC 208-209). Plis nou konsakré tèt nou nan min la Trè Sint Vièj Mari, plis chémin Jézu-a ap égalizé nan fon kè nou (Mt 3, 3; Is 40, 3). Louvri tout pòt kè nou pou Jézu antré. Pòt ki té fèmin dépi sièk tan yo, louvri pou Roua-a ki plin pouvoua-a (Ps 24, 7). Débloké séri yo, grésé gon yo, détaké krochèt yo, asiré panti yo, l-ap vini, li pap mizé (Ha 2, 3).

*

Té gin anpil katégori moun an fas Jézu ki t-ap mouri sou Koua-a: foul la, chèf Juif yo, sòlda romin yo, asasin yo.

1. Foul la: li minm sé gadé l-ap gadé (Lc 23, 35). Jé ouè, bouch pé. Li pa konn sa pou-l di, nan ki sans pou-l palé. Lè Jézu fi-n mouri, l-ap tounin antan l-ap frapé léstomak li (Lc 23, 48). Li rékonèt li koupab: sé fòt li, sé fòt li, sé fòt li vré. Pandan tan sa-a minm, zanmi Jézu yo ki té nan foul la, y-ap rété kanpé toujou, byin louin, yo pa ozé proche (Lc 23, 49), ni médanm yo ki té vi-n sot jous nan Galilé ansanm ak li yo (ib). Lanmò sa-a frapé yo jous nan fon kè yo. Sé yon échèk li yé pou yo. Yo pa konprann ki kalité mòd roua sa-a (cf Lc 24, 19-24). Jozèf d-Arimati ap fè bèl jès, antan-l antéré-l nan pròp kavo-l, li minm ki t-ap tann rouayom Bondié-a (Lc 23, 50-56; Jn 19, 38-42).

2. Chèf Juif yo: yo minm, yo pa kontanté yo rét kanpé ap gadé; y-ap pasé Jézu nan rizib (Lc 23, 35). Tit li-a yo pa-t dakò avèk li-a, sé li minm ki vi-n nan bouch yo pou yo jété-l nan fas li: "Kris Bondié-a, sila-a ki chouazi-a" (ib). Yo ba-l défi sovè tèt li, puiské-l té sovè dèt moun (ib). Sé fason pa yo pou yo fè louanj tèt yo, pou yo montré yo ranpòtè laviktoua sou li. Lè l-ap lévé vivan, y-ap tèlman ront, y-ap bay lajan an kachèt pou voualé vérité-a (Mt 28, 11-15). Nan chèf Juif yo ginyin ki pap dakò ak jès sa-a. Minm si Nikodèm té patizan an kachèt, ofi-amézi, li montré sou ki bò-l yé (Jn 3, 1ss; 7, 50 ss, 19, 39).

3.- Sòlda romin yo: yo minm y-ap joué ak li tankou ti moun (Lc 23, 36 ἐνέπαιξαν "énépaiksan") antan y-ap proche vinèg bò bouch li pou pasé souaf li. Mo k-ap sot nan bouch yo yo minm pou jété nan fas li, sé "roua Juif yo" (Lc 23, 37). Sé sou pouin sa-a yo pa dakò ak li yo minm kòm Romin. Minm si yo pa dakò ak Juif yo, yo ba-l minm défi Juif yo té ba li-a pou-l "sovè tèt li". Èròd ak Pilat pa-t dakò antré yo. Min kont Jézu, yo té mété tèt yo ansanm (Lc 23, 12, Ac 4, 27). Sèlman lè Jézu fi-n mouri, chèf sòlda romin yo ap rékonèt "li sé yon moun ki kòrèk" (Lc 23, 47).

4.- Asasin yo: yo minm gin youn sé jouré l-ap jouré-l, antan l-ap déréspékté Bondié (Lc 23, 39 ἐβλασφημει "éblasphèmei"). Minm tit chèf Juif yo té mét dévan-an, sé li minm tou li mét dévan: "Kris-la". Minm jan tou li mandé-l pou-l sovè tèt li épi pou-l sovè sa-k kondané ak li yo. Sé fason pa-l pou-l ba-l défi li minm tou. Sé yon bagay ki konsèné-l pèsònèlman: sovè-l sot nan malè koté-l pandié-a. Lòt la minn korijé mové paròl yo (Lc 23, 40). Sé li sèl ki palé ak Jézu avèk tout fon kè-l, ak tout konfians li, paské li pran-l osérié. Li santi gin yon bagay éstraòdinè ki gin pou rivé. Li pa konn ki sa. Li pa mandé sovè-l sot nan soufrans li, ni sot nan lanmò, Li sèlman di Jézu pou-l sonjé-l koté l-ap yé-a, lè l-ap vini kòm ROUA-a (Lc 23, 43). Sé yon déklarasion lafoua sa-a yé, minm jan chèf sòlda yo ap fè déklarasion lafoua-l apré Jézu fi-n mouri-a (Lc 23, 47). Répons Jézu ki fini pasaj lévanjil Kris-

Roua-a dapré Sin Luk la (Lc 23, 35-43), sé tankou sé yon tèt mòn ki pèmèt nou ouè tout dimansion péyi-a, apré nou fi-n rédi kont kò nou pou nou monté (Lc 23, 43): "AN VÉRITÉ, MOUIN DI-OU, JODI-A MINM OU-AP AVÈK MOUIN NAN PARADI-A". Min vré Rouayom nan, min vré Délivrans la: Sé PARADI-a. Jézu pa fè-l tann; li di-l: "Jodi-a minm" (σήμερον "sèméròn"). Nan minm "Notre- Père" la nou di: "Sé pou yo rékonèt sé ou ki Roua" (Mt 6, 10; Lc 11, 2).

Épi nou di: "Pin nou bézouin chak jou-a, ba nou li jodi-a" (Mt 6,11 σήμερον "sèméròn"). Sou Koua-a yo té ékri: "Sa-a sé roua Juif yo" (Lc 25, 38). An fèt, ringn Jézu dépasé limit Judé, jan l-ap di Apot yo, anvan-l monté nan sièl la, pou yo sèvi-l témouin, jous nan bout tè-a (Ac 1, 8).

Sé chak jou (σήμερον "sèméròn") pou rékonésans sa-a fèt dépi nan fon kè nou, Jézu sé roua kè yo. Li té di Pilat ringn li pa sot sou tè-a (Jn 18, 36). Sé pou sa li pa chèché mouayin défann tèt li ak zam. Li mandé Piè pou-l rinmèt épé-l nan fourou-l (Jn 18, 11; Mt 26, 52). Li montré fòs pouvoua-l, antan-l fè tout sòlda yo tonbé sou do, lè-l di: "Sé mouin minm" (Jn 18, 6). Li té di Papa-l té kapab voyé kantité foul Anj pou batay kont lènmi-l yo, pou ranpòtè laviktoua sou yo (Mt 26, 53; Jn 18, 36). Réyèlman vré Sin Jan ap montré nou nan Apokalips la kijan Akanj Sin Michèl avèk Anj li yo ap jété Satan atè, ansanm ak tout lamé anj rébèl yo (Ap 12, 7-9), jan liv Danièl la té déjà ba nou yon avaloua-a (Dn 10, 13. 21; 12, 1; Jd 9). Rouayom Jézu pa sot sou tè-a. Sé pa nan krazé tèl kan, tèl group moun, tèl klas moun, n-ap instalé rouayom li. Sé antan nou sèvi-l témouin nan lavi nou, spésialman nan lacharité. Lacharité pap janm pasé (1 Co 13, 8.13). Gin moun ki konprann pou instalé Ringn Bondié-a, fò sé nan krazé. Léspri Sin sé tankou siro mièl. Sé yon sous k-ap koulé, sé yon ti van léjé k-ap souflé, sé yon fason nou pa konprann l-ap antré anndan fon kè nou (Jn 3, 8; 7, 37-39). Jézu di koté dé ou toua moun rasanblé o non-l, li la nan mitan yo (Mt 18, 20). Sèlman gin moun k-ap rasanblé pou yo fè konplo kont lòt, pou yo grosi bann yo fòsé lòt yo aksépté pròp lidé pa yo, pou yo montré lòt yo fòs yo, pou yo fè respékté yo, y-ap bati pou tè sa-a sèlman. Épi sé sou sab y-ap bati. Gran dlo ap rivé, van ap souflé, fondasion ap krazé, fétay ap gayé (Mt 7, 26-27; Dn 2, 32-45). Démon-an al chèché sèt lòt ki pi méchan pasé-l pou yo instalé, min sé pou yon tan (Mt 12, 45; Lc 11, 26; 4, 13; Jn 16, 33; 18, 6; Ap 12, 12). Yo détrui, yo fè dézè, yo vi-n di "tout moun an pè". Vré lapè sé pa lanmò, sé lavi ki gin mouvman. Tout moun kapab pa gin minm lidé. Sé pa yon rézon pou fè lènmi pou sa. Épi tou nan minm group la nou kapab rankontré zanmi, nou kapab rankontré lènmi.

Nan kat kalité group moun yo ki té bò Lakoua-a (foul la, chèf Juif yo, sòlda romin yo, asasin yo), té gin zanmi Jézu, té gin lènmi-l. Chèf Juif yo té gin zanmi Jézu, té gin lènmi-l. Sòlda yo té gin zanmi Jézu, té gin lènmi-l. Asasin yo té gin zanmi Jézu, té gin lènmi-l. Frontiè ant zanmi ak lènmi-an, li pa pasé ant divès klas moun yo, li pasé anndan klas moun yo. Li pasé minm anndan kè chak moun. Konsa si gin batay pou minnin, sé pa kont moun pou dirijé-l, dapré sa Sin Pòl di Éfézyin yo (Ep 6, 12), sé kont démon yo (ib) pou nou rézisté fèm nan lafoua, dapré konsign Sin Piè ba nou (1 P 5, 9). Tandans léspri-a ap batay kont tandans kò-a, dapré sa Sin Pòl di Galat yo (Ga 5, 17). Sé mové rasi-n défo yo pou nou chèché ouété nan fon kè nou, pou Léspri Sin alèz antan l-ap fè lavi lagras la dévlopé nan nou, pou Rouayom Bondié-a instalé tout bon vré sou tout tè-a, antan n-ap sèvi Jézu témouin.

N-ap mandé Manman Mari pou nan fason n-ap viv nou montré tout moun Jézu-Kri sé ROUA ki vi-n pot lapè toupatou.

*

"pouvoir": 98 fous nan lansyin Téstaman, 69 fous nan Nouvo Téstaman-an; Gn 31, 29; Ex 1, 8; 4, 21; Lv 25, 43. 46; 26, 25; Nb 5, 19. 20; 21, 2. 3. 34; Dt 1, 27; 2, 24. 30; 3, 2. 3; 6, 5; 7, 8. 24; 20, 13; 21, 10; Jg 6, 13; 9, 22; 1 Sam 23, 7; 2 Sam 3, 6; 8, 3; 1 R 2, 12; 5, 1; 2 R 14, 5; 15, 19; 1 Ch 5, 20; 18, 3; 2 Ch 9, 26; 17, 1; 25, 8; Jdt 5, 18; Est 3, 13b; 4, 17b; 8, 12f.n; 1 Mac 1, 8; 5, 50; 8, 16; 9, 46; 10, 52; 2 Mac 4, 9. 10. 27.50; 5, 7; 12, 24; 13, 11; Job 1, 12; 9, 24; 12, 10; Ps 10, 10; 54, 3; Pr 3, 27. 28; 18, 21; Sg 6, 3; 7, 20; 14, 21; 15, 2. 3; 16, 13; 17, 2; 19, 20; Si 5, 3; 11, 6; 17, 2; 18, 4; 24, 11; 28, 26; 29, 20; 33, 20. 21; 38, 15; 42, 17; 43, 30; 47, 21; Is 9, 5. 6; 22, 21; 64, 6; Jer 10, 23; 32, 4; 38, 5; Ba 2, 4; Dn 2, 37; 3, 94; 6, 28; 11, 6. 43; Os 13, 14; Mal 2, 4; Mt 9, 6. 8; 10, 1; 14, 2; 20, 25; 28, 18; Mc 2, 10; 3, 15; 6, 7. 14; 10, 42; 13, 34; 14, 8; Lc 4, 6; 5, 24; 9, 1; 10, 19; 12, 5. 26; 20, 20; 22, 25. 53; Jn 1, 12; 5, 27; 7, 1; 10, 18; 14, 30; 17, 2; 19, 10a.b. 11; Ac 2, 24; 4, 7; 8, 19; 9, 14; 10, 38; 20, 32; 26, 10. 12; R 6, 9; 7, 14; 16, 25; 2 Co 10, 8; 13, 8. 10; 2 Th 3, 9; Phm 6; He 9, 9; 1 Jn 5, 19; Ap 2, 26. 28; 6, 8; 9, 3. 10; 10, 6a.b.c; 12, 2. 4. 5. 7. 12; 16, 9; 17, 12. 13. 17; 18, 1; 20, 6.

"autorité": 27 fous nan lansyin Téstaman, 28 fous nan Nouvo Téstaman-an; Gn 41, 35; 42, 6; 1 Ch 26, 6; 2 Ch 23, 20; Esd 5, 6; 6, 6; Jdt 9, 11; Est 2, 3. 8; 4, 17r; 8, 12c; 9, 29; 1 Mac 10, 38. 70; 12, 4; 14, 4; 2 Mac 6, 23; 7, 16; Qo 5, 7; Sg 10, 14; Si 10, 1; 44, 3; Is 40, 10; Dn 3, 2. 3; 11, 39; Mt 7, 29; 21, 23a.b.24. 27; Mc 1, 22. 27; 11, 28a.b. 29. 33; Lc 4, 32. 36; 12, 11; 19, 17; 20, 2a.b. 8. 20; Jn 7, 26; Ac 1, 7; r 13, 1a.b. 2. 3; 1 Tm 2, 2; Tit 2, 15; 3, 1.

"paix": 235 fous nan lansyin Téstaman, 96 fous nan Nouvo Téstaman-an: Gn 15, 15; 26, 29. 31; 43, 23; 44, 17; Ex 4, 18; 18, 23; 18, 23; Lv 16, 6; Nb 6, 26; 25, 12; Dt 2, 26; 20, 10. 12; Jos 9, 16; 10, 1. 4; 11, 19; Jg 4, 17; 6, 13; 18, 6; 21, 13; 1 Sam 1, 17; 7, 14; 20, 42; 25, 35; 29, 7; 2 Sam 3, 21. 22. 23; 10, 19; 15, 9. 27; 19, 25. 31; 1 R 2, 5. 6. 13a.b.c; 5,4; 20,18; 22, 17.45, 2 R 4, 23; 5,19; 18,31; 20,19; 22,20; 23,18; 1 Ch 12, 19a.b; 19, 19; 22, 9a.b.; 2 Ch 15, 5; 18, 16; 34, 28; Esd 4, 17; 5, 7; 7, 12; 9, 12; Ne 9, 28; Tob 7, 11a.b. 12; 10, 12a. b; 12, 5.17; 13, 14; 14, 1; Jdt 3, 1; 8, 35; 12, 4; Est 3, 13b; 8, 12n; 9, 30; 1 Mac 5, 54; 6, 49. 50; 14, 8. 12; 16, 10; 2 Mac 1, 1.4; 3, 1; 4, 6; 12, 4. 12; 14, 10; Job 3, 13. 26; 5, 33; 12, 6; 15, 21; 21, 9. 13. 23; 22, 21; 25, 2; Ps 4, 9; 28, 3; 29, 11; 34, 15; 35, 20. 27; 37, 11; 55, 19; 72, 3. 7; 85, 9. 11; 119, 165; 120, 6. 7; 122, 6. 7.8; 125, 5; 128, 6; 131, 2; 147, 14; Qo 3, 8; Ct 8, 10; Sg 3, 3; 14, 22; Si 13, 18 a.b; 26, 2; 28,9.13.16; 4,14; 44, 6.14; 45,24; 47. 13.16; 50,23; Is 9, 6; 26, 3.a.b.12; 27, 5a.b; 32, 17.18; 33, 7; 36, 16; 39, 8; 52, 7; 53, 5; 54,10; 55, 12; 57, 2.19.21; 59,8a.b; 60, 13; 66, 12; Jer 4, 10; 6, 14; 8, 11.15; 9, 7; 12, 1.5.12; 14, 13.19; 16, 5; 20, 10; 23, 17; 28, 9; 29, 7a.b.11; 30, 5; 33, 6.9; 34,5; 38, 4; 43, 12; Lam 3, 17; Ba 3, 13.14; 4, 20; 5, 4; 6, 2; Ez 7, 25; 13, 10.16; 34, 25; 37, 26; Dn 3, 98; 6, 26; 10, 19; Mi 3, 5; 5, 4; Na 2, 1; Ha 3, 16; Ag 2, 9; Za 6, 13; 8, 12.16.19; 9,10; Mal 2, 5; Mt 5, 9; 10, 13a.b.34a.b; Mc 5, 34; 9, 50; Lc 1, 79; 2, 14.29; 7, 50; 8, 48; 10, 5.6a.b; 12, 51; 14, 32; 19, 38.42; 24, 35; Jn 14, 27a.b; 16, 33; 20, 19.21.26; Ac 9,31; 10, 38; 12, 20; 15, 33; 24, 2; R1, 7; 2, 10; 3, 17; 5, 1; 8, 6; 12, 18; 14, 17.19; 15, 13.33; 16, 20; 1 Co 1, 3; 7, 15; 14, 33; 16, 11; 2 Co 1, 2; 13, 11a.b; Ga 1, 3; 5, 7; 6, 16; Ep 1, 2; 2, 14.17; 4, 3; 6, 16.23; Ph 1, 2; 4, 7.9; Col 1, 2.20; 3, 15; 1 Th 1, 1; 5, 3.13.23; 2 Th 1, 2; 3, 16; 1 Tm 1, 2; 2 Tm 1, 2; 2, 22; Tit 1, 4; Phm 3; He 7, 2; 12, 11.14; 13, 20; Jc 2, 16; 3, 18a.b; 1 p. 1, 2; 3, 11; 2 p. 1, 2; 3, 14; 2 Jn 3; 3 Jn 15; Jd 2; Ap 1, 4; 6, 4.

"chef": 475 fous nan lansyin Téstaman, 48 fous nan Nouvo Téstaman.

"roi": 2.976 fous nan lansyin Téstaman, 120 fous nan Nouvo Téstaman.

*

* *

Fin du deuxième volume / 24 octobre 1989

LÉKTI LIV KI SIN YO NAN ÉKARISTI-A AK Lòt SAKRÉMAN YO

POU DIFÉРАН SÉZON ANÉ LITIJI-A

TAN AVAN

Jou dimanch ak jou kèk gran fèt solanèl, lékti nan sélébrasion Ékaristi-a chanjé dapré yon sik toua zan, yo bay non lèt A, B épi C. Ané C yo sé sa ou ka divizé chif milié a pa 3, san rès, pa égzanp: 2001, 2004, 2007, 2010, 2013, etc. Min pa bliyé ané litiji Égliz la kòmansé ak prémié dimanch tan Avan an, dépi nan fin novanm oubyin kòmansman désanm.

1é DIMANCH AVAN-AN

Ané A

Izayi 2,1-5

Psòm 121, 1-2,3-4b,4c-5,6-7,8-9

Romin 13,11-14

Matié 24,37-44

Ané B

Izayi 63,16b-17.19b; 64,2b-7

Psòm 79, 2.3bc,15-16,18-19

1 Korintyin 1,3-9

Mark 13,33-37

Ané C

Jérémi 33,14-16

Psòm 24, 4-5b,8-9,10.14

1 Tésalonisyin 3,12—4,2

Luk 21,25-28. 34-36

1é lindi Avan

Izayi 2,1-5 (oubyin 4,2-6 nan Ané A)

Psòm 121, 1-2,3-4b,4c-5,6-7,8-9

Matié 8,5-11

1é madi Avan

Izayi 11,1-10

Psòm 71, 1-2,7-8,12-13,17

Luk 10,21-24

1é mèkrédi Avan

Izayi 25,6-10a

Psòm 22, 1-2,3-4,5-6

Matié 15,29-37

1é jédi Avan

Izayi 26,1-6

Psòm 117, 1,8,19-20,21,25

Matié 7,21. 24-27

1é vandrédi Avan

Izayi 29,17-24

Psòm 26, 1,4abcd,13-14

Matié 9,27-31

1é samdi Avan

Izayi 30,19-21. 23-26

Psòm 146, 1-2,3-4,5-6

Matié 9,35—10,1. 6-8.

2èm DIMANCH AVAN-AN

A.- Izayi 11,1-10

Psòm 71, 1-2,7-8,12-13,17

Romin 15,4-9

Matié 3,1-12

B.- Izayi 40,1-5. 9-11

Psòm 84, 9ac-10,11-12,13-14

2 Piè 3,8-14

Mark 1,1-8

C.- Baruk 5,1-9

Psòm 125, 1-2b,2c-3,4-5,6

Filipyin 1,4-6. 8-11

Luk 3,1-6

2èm lindi Avan

Izayi 35,1-10

Psòm 84, 9ab,10,11-12,13-14

Luk 5,17-26

2èm madi Avan

Izayi 40,1-11

Psòm 95, 1-2a, 3.10ac, 11-12a, 12b. 13ab

Matié 18,12-14

2èm mèkrédi Avan

Izayi 40,25-31

Psòm 102, 1-2,3-4,8,10

Matié 11,28-30

2èm jédi Avan

Izayi 41,13-20

Psòm 144, 1.9,10-11,12-13ab

Matié 11,11-15

2èm vandrédi Avan

Izayi 48, 17-19

Psòm 1, 1abc.2,3,4.6

Matié 11,16-19

2èm samdi Avan

Sirasid 48,1-4. 9-11

Psòm 79, 2ac.3b, 15-16a, 18-19

Matié 17,10-13

3èm DIMANCH AVAN-AN

A.- Izayi 35,1-6a.10

Psòm 145, 7,8,9ab.10a

Jak 5,7-10

Matié 11,2-22

B.- Izayi 61,1-2a.10-11

Luk 1, 46b-48,49-50,53-54

1 Tésalonisyin 5,16-24

Jan 1,6-8.19-28

C.- Sofoni 3,14-18a

Izayi 12, 2,4a-d,4 e-5,6

Filipyin 4,4-7

Luk 3,10-18

3èm SEMEN AVAN-AN

jous 16 désanm; apati 17 désanm, chak jou gin pròp lékti pa-l

3èm lindi Avan

Nonb 24,2-7.15-17a

Psòm 24, 4-5ab,6-7,8-9,10.14

Matié 21,23-27

3èm madi Avan

Sofoni 3,1-2.9-13

Psòm 33, 2-3,6-7,16.18,19.23

Matié 21,28-32

3èm mèkrédi Avan

Izayi 45,6b-8.18.21b-25

Psòm 84, 9ab.10,11-12,13-14

Luk 7,18b-23

3èm jédi Avan

Izayi 54, 1-10

Psòm 29, 2a.3-4,5-6,9

Luk 7, 24-30

3èm vandrédi Avan

Izayi 56,1-3a.6-8

Psòm 29, 2a.3-4,5-6,9

Jan 5,33-36

Sot 17 désanm rivé 24 désanm

Lè yo pa sèvi ak yon lékti poutèt 4èm dimanch Avan-an, yo ka fè lékti sa yo yon lòt jou, sitou nan plas sa yo té li jou dimanch la.

17 désanm

Jénèz 49,2.8-10

Psòm 71, 1-2,3-4,7-8,17

Matié 1,1-17

18 désanm

Jérémi 23,5-8

Psòm 71, 1-2,12-13,18-19

Matié 1,18-24

19 désanm

Jij 13,2-7.24-25a

Psòm 70, 1-2,3,5a.6,16-17

Luk 1,5-25

20 désanm

Izayi 7,10-14

Psòm 23, 1-2,3-4ab,5-6

Luk 1,26-38

21 désanm

Kantik 2,8-14

(oubyin Sofoni 3,14-18a)

Psòm 32, 2-3,11-22,20-21

Luk 1,39-45

22 désanm

1 Samuèl 1,24-28

1 Samuèl 2,1,4-5,6-7,8abcd

Luk 1,45-56

23 désanm
Malachi 3,1-4.23-24
Psòm 24, 4-5ab,6-7,8-9,10,14
Luk 1,57-66

24 désanm nan matin
2 Samuèl 7,1-5.8b-11.16
Psòm 88, 2-3,4-5,27.29
Luk 1,67-79

4èm DIMANCH AVAN-AN

A.- Izayi 7,10-14
Psòm 23, 1-2,3-4ab,5-6

Romin 1,1-7
Matié 1,18-24

B.- 2 Samuèl 7,1-5.8b-11.16
Psòm 88, 4-5,27-28,29-30
Romin 16,25-27
Luk 1,26-38

C.- Miché 5,1-4a
Psòm 79, 2-3bc,15-16,18-19
Ébré 10,5-10
Luk 1,39-45

TAN NOËL

24 désanm nan asouè
Izayi 62,1-5
Psòm 88, 20ab.21,27-28,29-30
Travay Apot yo 13,16-17.22-25
Matié 1,1-25 (oubyin 18-25)

NESANS GRANMET LA

Mès nan nuit la
Izayi 9,1-6
Psòm 95, 1-2a,2b-3,11-12a,12b-13a.c
Tit 2,11-14
Luk 2,1-14

Mès nan matin
Izayi 62,11-12
Psòm 96, 1-2,6,9,11-12
Tit 3,4-7
Luk 2,15-20

Mès nan jounen an
Izayi 52,7-10
Psòm 97, 1,2-3ab,3c-4,5-6
Ébré 1,1-6
Jan 1,1-18 (oubyin 1-5. 9-14)

Dimanch anndan oktav Noèl la
FANMI KI SIN-AN
A.- Sirasid 3,3-7.14-17a
Psòm 127, 1-2,3,4-5bc
Kolosyin 3,12-21
Matié 2,13-15.19-23

B.- Jénèz 15, 1-6 ; 21, 1-3
Psòm 104, 1-2,3-4,5-6,8-9
Luk 2,22-40 (oubyin 22.39-40)

C.- 1 Samuèl 1, 20-22.24-28
Psòm 83, 3,4,5-6,9-10
Luk 2,41-52

Pou 26, 27 ak 28 désanm, al gadé nan lékti pou fèt Sin yo.

29 désanm
1 Jan 2,3-11
Psòm 95, 1-2a,2b-3,5b-6
Luk 2,22-35

30 désanm
1 Jan 2,12-17
Psòm 95, 7-8a,8b-9,10
Luk 2,36-40

31 désanm
1 Jan 2,18-21
Psòm 95, 1-2a,11-12a,12b-13a
Jan 1,1-18

1é janvié : MARI, MANMAN BONDIE

Nonb 6,22-27
Psòm 66, 2b-3,5abd,7.8b
Galat 4,4-7
Luk 2,16-21

JOU ANVAN ÉPIFANI

2 janvié

1 Jan 2,22-28

Psòm 97, 1,2-3ab,3c-4

Jan 1,19-28

3 janvié

1 Jan 2,29—3,6

Psòm 97, 1,3c-4,5-6

Jan 1,29-34

4 janvié

1 Jan 3,7-10

Psòm 97, 1,7-8,9-10

Jan 1,35-42

5 janvié

1 Jan 3,11-21

Psòm 99, 1-2,3,4,5

Jan 1,43-51

6 janvié

1 Jan 5,5-13 (dapré tèks grèk la)

Psòm 147, 12-13,14-15,19-20

Mark 1,6b-11

7 janvié

1 Jan 5,14-21

Psòm 149, 1-2,3-4,5-6a.9b

Jan 2,1-12

6 janvié

oubyin dimanch apré premié janvié :

ÉPIFANI GRANMET LA

Izayi 60,1-6

Psòm 71, 1-2,7-8,10ab-11,12-13

Éfézyin 3,2-3a.5-6

Matié 2,1-12

Jou apré Épifani-an

1é jou-a (lindi oubyin 7 janvié)

1 Jan 3,22—4,6

Psòm 2, 7bc-8,10-11

Matié 4,12-17.23-25

2èm jou-a (madi oubyin 8 janvié)

1 Jan 4,7-10

Psòm 71, 1-2,3-4,7-8

Mark 6,34-44

3èm jou-a (mèkrédi oubyin 9 janvié)

1 Jan 4,11-18

Psòm 71, 1-2,10-11,12-13

Mark 6,45-52

4èm jou-a (jédi oubyin 10 janvié)

1 Jan 4,19—5,4

Psòm 71, 1-2,14.15bc,17

Luk 4,14-22a

5èm jou-a (vandrédi oubyin 11 janvié)

1 Jan 5,5-13 (dapré tèks grèk la)

Psòm 147, 12-13,14-15,19-20

Luk 5,12-16

6èm jou-a (samdi oubyin 12 janvié)

1 Jan 5,14-21

Psòm 149, 1-2,3-4,5-6a.9b

Jan 3,22-30

Dimanch apré Épifani

BATEM GRANMET LA

(Yo pa fè fèt sa-a si sé apré 6 janvié yo fété Épifani)

A.- Izayi 42,1-4.6-7

Psòm 28, 1-2,3ac-4,3b.9c-10

Travay Apot yo 10,34-38

Matié 3,13-17

B.- Izayi 55, 1-11

Izayi 12, 4b-e,5b-6

Mark 1,6-11

C.- Izayi 40, 1-11

Psòm 103,1c-3b,3c-4,24a.c-25,27-28,29-30

Tit 2, 11-14

Luk 3,15-16.21-22

TAN KARÈM

Mèkrédi sann

Joèl 2,12-18

Psòm 50, 3-4,5-6ab,12-13,14.17

2 Korintyin 5,20—6,2

Matié 6,1-6.16-18

Jédi apré sann yo

Détéronòm 30,15-20

Psòm 1, 1-2,3-4a,4b-6

Luk 9,22-25

Vandrédi apré sann yo
Izayi 58,1-9a
Psòm 50, 3-4,5-6a,18-19
Matié 9,14-15

Samdi apré sann yo
Izayi 58,9b-14
Psòm 85, 1-2,3-4,5-6
Luk 5,27-32

1é DIMANCH KAREM

A.- Jénèz 2, 7-9 ; 3, 1-7a
Psòm 50, 3-4,5-6ab,12-13,14.17
Romin 5,12-19 (oubyin 12.17-19)
Matié 4,1-11

B.- Jénèz 9,8-15
Psòm 24, 4-5b,6-7,8-9
1 Piè 3,18-22
Mark 1,12-15

C.- Détéronòm 26,4-10
Psòm 90, 1-2,10-11,12-13,14-15b
Romin 10,8-13
Luk 4,1-13

1é lindi Karèm
Lévitik 19,1-2.11-18
Psòm 18, 8,9,10,15
Matié 25,31-46

1é madi Karèm
Izayi 55,10-11
Psòm 33, 4-5,6-7,16-17,18-19
Matié 6,7-15

1é mèkrédi Karèm
Jonas 3,1-10
Psòm 50, 3-4,12-13,18-19
Luk 11,29-32

1é jédi Karèm
Éstè 14,1.3-5.12-14 (Vulgar)
(= 4,17 k-m. r-t)
Psòm 137, 1-2a,2bc-3,7c-8
Matié 7,7-12

1é vandrédi Karèm
Ézékièl 18,21-28
Psòm 129, 1-2,3-4,5ac.6ab,7bc-8
Matié 5,20-26

1é samdi Karèm
Détéronòm 26,16-19
Psòm 118, 1-2,4-5,7-8
Matié 5,43-48

2èm DIMANCH KAREM

A.- Jénèz 12,1-4a
Psòm 32, 4-5,18-19,20.22
2 Timoté 1,8-10
Matié 17,1-9

B.- Jénèz 22,1-2.9a.10-13.15-18
Psòm 115, 10.15,16ac-17,18-19
Romin 8,31b-34
Mark 9,2-10

C.- Jénèz 15,5-12.17-18
Filipyin 3,17—4,1 (oubyin 3,20—4,1)
Psòm 26, 1,7-8,9a-d,13-14
Luk 9,28b-36

2èm lindi Karèm
Danièl 9,4b-10
Psòm 78, 5a.8,9,11.13ab
Luk 6,36-38

2èm madi Karèm
Izayi 1,10.16-20
Psòm 49, 7ab.8, 13-14, 16bc-17, 21abc.23ab
Matié 23,1-12

2èm mèkrédi Karèm
Jérémi 18,18-20
Psòm 30, 5-6,14,15-16
Matié 20,17-28

2èm jédi Karèm
Jérémi 17,5-20
Psòm 1,1-2,3-4a,4b-6
Luk 16,19-31

2èm vandrédi Karèm
Jénèz 37,3-4.12-13a.17b-28
Psòm 104, 4a.5a.6,16-17,18-19,20-21
Matié 21,33-43.45-46

2èm samdi Karèm

Miché 7,14-15.18-20

Psòm 102, 1-2,3-4,9-10,11-12

Luk 15,1-3.11-32

3èm DIMANCH KAREM

A.- Égzòd 17,3-7

Psòm 94, 1-2,6-7b,7d-8a.9

Romin 5,1-2.5-8

Jan 4,5-42

(oubyin 5-15.19b-26.39a.40-42)

Yo ka li tèks sa yo chak ané

B.- Égzòd 20,1-17

(oubyin 1-3.7-8.12-19)

Psòm 18, 8,9,10,11

1 Korintyin 1,22-25

Jan 2,13-25

C.- Égzòd 3,1-8.13-15

1 Korintyin 10,1-6.10-12

Psòm 102, 1-2,3-4,6-7,8.11

Luk 13,1-9

Lòt lékti yo ka chouazi pou 3èm dimanch

Karèm, sitou nan ané B ak C

Égzòd 17,1-7

Psòm 94, 1-2,6-7,8-9a

Jan 4,5-42

3èm lindi Karèm

2 Roua 5,1-5a

Psòm 41 ak 42 : 41, 2,3 ; 42, 3,4

Luk 4,24-30

3èm madi Karèm

Danièl 3, 25.34-43

Psòm 24, 4-5ab,6-7,8-9,10.14

Matié 18, 21-35

3èm mèkredi Karèm

Détéronòm 4, 1.5-9

Psòm 147, 12-13,15-16,19-20

Matié 5, 17-19

3èm jédi Karèm

Jérémi 7, 23-28

Psòm 94, 1-2,6-7,8-9a

Luk 11, 14-23

3èm vandrédi Karèm

Ozé 14, 2-10

Psòm 80, 12a.7-8a, 8bc-9,10-11ab, 14.17

Mark 12, 28b-34

3èm samdi Karèm

Ozé 6, 1-6

Psòm 50, 3-4,18-19,20-21ab

Luk 18, 9-14

4èm DIMANCH KAREM

A.- 1 Samuèl 16, 1b.6-7.10-13a

Psòm 22, 1-2ab,2cd-3,4,5,6

Éfézyin 5, 8-11

Jan 9, 1-41

(oubyin 1.6-9.13-17.34-38)

Yo ka li tèks sa yo chak ané

B.- 2 Kronik 36, 14-16.19-23

Psòm 136, 1-2,3,4-5,6

Éfézyin 2, 4-10

Jan 3, 14-21

C.- Jozué 5, 9a. 10-12

Psòm 33, 2-3,4-5,6-7

2 Korintyin 5, 17-21

Luk 15, 1-3.11-32

Lòt lékti yo ka chouazi pou 3èm dimanch

Karèm, sitou nan ané B ak C

Miché 7, 7-9

Psòm 26, 1,7-8a,8b-9abcd,13-14

Jan 9, 1-41

4èm lindi Karèm

Izayi 65, 17-21

Psòm 29, 2a.3-4,5-6,9.12a.13b

Jan 4, 43-54

4èm madi Karèm

Ézékièl 47, 1-9.12

Psòm 45, 2-3,5-6,8-9a.10a

Jan 5, 1-3a.5-16

4èm mèkredi Karèm

Izayi 49, 8-15

Psòm 144, 8-9,13cd-14,17-18

Jan 5, 17-30

4èm jédi Karèm

Égzòd 32, 7-14

Psòm 105, 4ab.6,19-20,21-22,23

Jan 5, 31-47

4èm vandrédi Karèm

Sajès 2, la.12-22

Psòm 33, 17-18,19-20,21.23

Jan 7, 1-2.10.25-30

4èm samdi Karèm

Jérémi 11, 18-20

Psòm 7, 2-3,9bc-10, 11-12a.18b

Jan 7, 40-53

5èm DIMANCH KAREM

A.- Ézékièl 37, 12-14

Psòm 129, 1-2,3-4,5-6ab,7bc-8

Romin 8, 8-11

Jan 11, 1-45 (oubyin 3-7.17.20-27.34-45)

Yo ka li tèks sa yo chak ané

B.- Jérémi 31, 31-34

Psòm 50, 3-4,12-13,14-15

Ébré 5, 7-9

Jan 12, 20-33

C.- Izayi 43, 16-21

Psòm 125, 1-2b,2c-3,4-5,6

Filipyin 3, 8-14

Jan 8, 1-11

Lòt lékti yo ka chouazi pou 3èm dimanch

Karèm, sitou nan ané B ak C

2 Roua 4, 18b-21.32-37

Psòm 16, 1,6-7a,8a.15

Jan 11, 1-45

5èm lindi Karèm

Danièl 13, 1-9.15-17.19-30.33-62

(oubyin 41c-62)

Psòm 22, 1-2a,2b-3,4,5,6

Jan 8, 1-11

5èm madi Karèm

Nonb 21,4-9

Psòm 101, 2-3,16-18,19-21

Jan 8, 21-30

5èm mèkrédi Karèm

Danièl 3, 14-20.91-92.95

Danièl 3, 52,53,54,55,56

Jan 8, 31-42

5èm jédi Karèm

Jénèz 17, 3-9

Psòm 104, 4-5,6-7,8-9

Jan 8, 51-59

5èm vandrédi Karèm

Jérémi 20, 10-13

Psòm 17, 2-3,5-6,7

Jan 10, 31-42

5èm samdi Karèm

Ézékièl 37, 21-28

Jérémi 31, 10,11-12ab,13

Jan 11,45-56

DIMANCH PASSION-AN

Nan prosésion Ramo yo:

A.- Matié 21, 1-11

B.- Mark 11, 1-10 oubyin Jan 12, 12-16

C.- Luk 19, 28-40

Nan Mès la

Izayi 50, 4-7

Psòm 21, 8-9,17-18a,19-20,22c-24a

Filipyin 2, 6-11

A.- Matié 26, 14 — 27,66

(oubyin 27, 11-54)

B.- Mark 14, 1 — 15, 47

(oubyin 15, 1-39)

C.- Luk 22, 14 — 23, 56

(oubyin 23, 1-49)

SEMEN-SINT LA

Lindi

Izayi 42, 1-7

Psòm 26, 1,2,3,13-14

Jan 12, 1-11

Madi

Izayi 49,1-6

Psòm 70, 1-2,3.5a-6, 15.17

Jan 13,21-33.36-38

Mèkrédi

Izayi 50,4-9a

Psòm 68, 8-10,21-22,31.33-34

Matié 26,14-25

FÈT PAK AK TAN PASKAL LA

JÉDI-SIN

Nan Mès krismal

Izayi 61, 1-3a.6a.8b-9

Psòm 88, 20ab.21,22.25,27.29

Apokalips 1, 5-8

Luk 4, 16-21

Nan Mès dènié Soupé Grammèt la

Égzòd 12, 1-8.11-14

Psòm 115, 12-13,15-16a.c,17-18

1 Korintyin 11,23-26

Jan 13, 1-15

VANDRÉDI PASION-AN

Izayi 52, 13 — 53, 12

Psòm 30, 2,6,12,13-14ac,15-16,17.25

Ébré 4, 14-16; 5, 7-9

Jan 18, 1 — 19, 42

VÉYÉ FÈT PAK LA

1. Jènèz 1, 1— 2, 2

(oubyin 1, 1.26-31a)

Psòm 103, 1-2,5-6,10.12,13-14,24.35c

Psòm 32, 4-5,6-7,18-19,20.22

2. Jènèz 22, 1-18

(oubyin 1-2.9a.10-13.15-18)

Psòm 15, 5,8,9-10,1b.11

3. Égzòd 14, 15—15, la

Égzòd 15, 2-3,4-5,11-12,17

Psòm 135, 1.11-12, 13-15, 16.21-22, 23-24.26

4. Izayi 54, 5-14

Psòm 29, 3-4,5-6b,6cd.12,13

5. Izayi 55, 1-11

Izayi 12, 2,4ab,4c-5,6

Baruk 3, 9-15.32 — 4, 4

Psòm 18,8,9,10-11

6. Ézékièl 36, 16-28

Si gin batèm : *Izayi 12, 2,4ab,4c-5,6*

Psòm 50, 12-13, 14-15, 18-19

Si pa gin batèm :

Psòm 41, 2,5bcd ; 42, 3,4

Romin 6, 3-11

Psòm 117, 1,4,16-17,22-23

A.- Matié 28, 1-10

B.- Mark 16, 1-8

C.- Luk 24, 1-12

JOU FÈT PAK LA

Travay Apot yo 10, 34a.37-43

Psòm 117, 1,4,16-17,22-23

Chouazi ant:

Kolosyin 3, 1-4

oubyin: 1 Korintyin 5, 6b-8

Évanjil la tankou nan Vyéy-a

oubyin :

Jan 20, 1-9

Oubyin nan Mès asouè-a :

Luk 24, 13-35

Lindi Pak

Travay Apot yo 2, 14.22-32

Psòm 15, 1-2a.5,7-8,9-10,2b.11

Matié 28,8-15

Madi Pak

Travay Apot yo 2, 36-41

Psòm 32, 4-5,18-19,20.22

Jan 20, 11-18

Mèkrédi Pak

Travay Apot yo 3, 1-10

Psòm 104, 1-2,3-4,6-7,8-9

Luk 24, 13-35

Jédi Pak

Travay Apot yo 3, 11-26

Psòm 8, 4-5,6-7,8-9

Luk 24, 35-48

Vandrédi Pak

Travay Apot yo 4, 1-12

Psòm 117, 1-2,4,22-24,25-26

Jan 21, 1-14

Samdi Pak

Travay Apot yo 4, 13-21

Psòm 117, 1,14-15,16-18,19-21

Mark 16, 9-15

2èm DIMANCH PAK

A.- Travay Apot yo 2, 42-47
Psòm 117, 1,4,13-14,19,21,22-23,24-25
 1 Piè 1,3-9
 Jan 20, 19-31 (A B C)

B.-Travay Apot yo 4, 32-35
Psòm tankou ané A
 1 Jan 5, 1-6
 Évanjil la tankou nan ané A

C.-Travay Apot yo 5, 12-16
Psòm tankou ané A
 Apokalips 1, 9-1 la.12-13.17-19
 Évanjil la tankou nan ané A

2èm lindi Pak
 Travay Apot yo 4, 23-31
Psòm 2,1-3,4-6,7bc-9
 Jan 3, 1-8

2èm madi Pak
 Travay Apot yo 4, 32-37
Psòm 92, 1ab,1c-2,5
 Jan 3, 7-15

2èm mèkrédi Pak
 Travay Apot yo 5, 17-26
Psòm 33, 2-3,4-5,6-7,8-9
 Jan 3, 16-21

2èm jédi Pak
 Travay Apot yo 5, 27-33
Psòm 33, 2,9,17-18,19-20
 Jan 3, 31-36

2èm vandrédi Pak
 Travay Apot yo 5, 34-42
Psòm 26, 1,4,13-14
 Jan 6, 1-15

2èm samdi Pak
 Travay Apot yo 6, 1-7
Psòm 32, 1-2,4-5,18-19
 Jan 6, 16-21

3èm DIMANCH PAK

A.- Travay Apot yo 2, 14.22-28
Psòm 15, 1-2a.5,7-8,9-10,2b.11
 1 Piè 1, 17-21

Luk 24, 13-35

B.- Travay Apot yo 3, 13-15.17-19
Psòm 4, 2,7,9
 1 Jan 2, 1-5a
 Luk 24, 35-48
 C.- Travay Apot yo 5, 27b-32.40b-41
Psòm 29, 3-4,5-6b,6cd.12,13
 Apokalips 5, 11-14
 Jan 21, 1-19 (oubyin 1-14)

3èm lindi Pak
 Travay Apot yo 6, 8-15
Psòm 118, 23-24,26-27,29-30
 Jan 6, 22-29

3èm madi Pak
 Travay Apot yo 7, 51 — 8, 1a
Psòm 30, 3bc-4,6ab.7b.8a,17.21ab
 Jan 6, 30-35

3èm mèkrédi Pak
 Travay Apot yo 8, 1b-8
Psòm 65, 1-3a,4-5,6-7a
 Jan 6, 35-40

3èm jédi Pak
 Travay Apot yo 8, 26-40
Psòm 65, 8-9,16-17.5a.20
 Jan 6, 44-51

3èm vandrédi Pak
 Travay Apot yo 9, 1-20
Psòm 116, 1,2
 Jan 6, 52-59

3èm samdi Pak
 Travay Apot yo 9, 31-42
Psòm 115, 12-13,14-15,16ac-17
 Jan 6, 60-69

4èm DIMANCH PAK

A.- Travay Apot yo 2, 14a. 36-41
Psòm 22, 1-2b,2c-3,4,5,6
 1 Piè 2, 20-25
 Jan 10, 1-10

B.- Travay Apot yo 4, 8-12
Psòm 117, 1,4,8-9,22-23,28-29
 1 Jan 3, 1-2
 Jan 10, 11-18

C.- Travay Apot yo 13, 14.43-52

Psòm 99, 1-2,3,5

Apokalips 7, 9.14b-17

Jan 10, 27-30

4èm lindi Pak

Travay Apot yo 11, 1-18

Psòm 41 ak 42 : 41, 2-3 ; 42, 3,4

B, C. Jan 10, 1-10

Ané A: Jan 10, 11-18

4èm madi Pak

Travay Apot yo 11, 19-26

Psòm 86, 1.5c.2,3.5ab,6-7

Jan 10, 22-30

4èm mèkrédi Pak

Travay Apot yo 12, 24—13, 5a

Psòm 66, 2-3,5,6,8

Jan 12, 44-50

4èm jédi Pak

Travay Apot yo 13, 13-25

Psòm 88, 2-3,21-22,25,27

Jan 13, 16-20

4èm vandrédi Pak

Travay Apot yo 13, 26-33

Psòm 2,1,7bc,8-9,10-11

Jan 14, 1-6

4èm samdi Pak

Travay Apot yo 13, 44-52

Psòm 97, 1,2-3ab,3cd-4

Jan 14, 7-14

5èm DIMANCH PAK

A.- Travay Apot yo 6, 1-7

Psòm 32, 1.2b-3a,4-5,18-19

1 Piè 2, 4-9

Jan 14, 1-12

B.- Travay Apot yo 9, 26-31

Psòm 21, 26-27b,28-29,31-32

1 Jan 3, 18-24

Jan 15, 1-8

C.- Travay Apot yo 14, 21-27

Psòm 144, 8-9,10-11, 12-13b

Apokalips 21, 1-5a

Jan 13, 31-35

5èm lindi Pak

Travay Apot yo 14, 5-18

Psòm 113b, 1ab-2,3-4,15-16

Jan 14, 21-26

5èm madi Pak

Travay Apot yo 14, 19-28

Psòm 144, 10-11,12-13ab,3a.21

Jan 14, 27-31a

5èm mèkrédi Pak

Travay Apot yo 15, 1-6

Psòm 121, 1-2,3-4a,4b-5

Jan 15, 1-8

5èm jédi Pak

Travay Apot yo 15, 7-21

Psòm 95, 1-2a,2b-3,10

Jan 15,9-11

5èm vandrédi Pak

Travay Apot yo 15, 22-31

Psòm 56, 8,9,10-11,12

Jan 15, 12-17

5èm samdi Pak

Travay Apot yo 16, 1-10

Psòm 99, 1-2,3,5

Jan 15, 18-21

6èm DIMANCH PAK

Si sé nan 7èm dimanch la yo fété Asansion, jodi-a yo ka pran dézièm lékti ak Évanjil 7èm dimanch la.

A.- Travay Apot yo 8, 5-8.14-17

Psòm 65, 1-3a,4-5,6-7a,16.20

1 Piè 3, 15-18

Jan 14, 15-21

B.- Travay Apot yo 10, 25-26.34-35.44-48

Psòm 97, 1,2-3ab,3c-4a.6b

1 Jan 4, 7-10

Jan 15,9-17

C.- Travay Apot yo 15, 1-2.22-29

Psòm 66, 2b-3,5abd,7b-8

Apokalips 21, 10-14.22-23

Jan 14, 23-29

Gèm lindi Pak

Travay Apot yo 16, 11-15
Psòm 149, 1-2,3-4,5-6a,9b
 Jan 15, 26—16, 4a

Gèm madi Pak

Travay Apot yo 16, 22-34
Psòm 137, 1-2a,2bc-3,7c-8
 Jan 16, 5-11

Gèm mèkrédi Pak

Travay Apot yo 17, 15.22— 18, 1
Psòm 148, 1-2,11-12,13,14b
 Jan 16, 12-15

ASANSION GRANMÈT LA

Travay Apot yo 1, 1-11

Psòm 46, 2-3,6-7,8-9

A.- Èfézyin 1, 17-23

B.- Tankou nan ané A

Oubyin : Èfézyin 4,1-13

(oubyin 4,1-7.11-13)

C.- Tankou nan ané A

Oubyin Èbré 9,24-28 ; 10,19-23

A.- Matié 28, 16-20

B.- Mark 16, 15-20

C.- Luk 24, 46-53

Nan péyi koté pa gin konjé pou Fèt Asansion-an, yo fété li 7èm dimanch Pak la épi nan jédi-a yo li tèks sa yo :

Travay Apot yo 18, 1-8

Psòm 97, 1,2-3ab,3cd-4

Jan 16, 16-20

Gèm vandrédi Pak

Travay Apot yo 18, 9-18

Psòm 46,2-3,4-5,6-7

Jan 16, 20-23a

Gèm samdi Pak

Travay Apot yo 18, 23-28

Psòm 46, 2-3,8-9,10

Jan 16, 23b-28

A.- Travay Apot yo 1, 12-14

Psòm 26,1,4a-d,7-8

1 Piè 4, 13-16

Jan 17, 1-1 la

B.- Travay Apot yo 1, 15-17.20-26

Psòm 102, 1-2,11-12,19,22

1 Jan 4, 11-16

Jan 7, 11b-19

C.- Travay Apot yo 7, 55-60

Psòm 96, 1-2b,6,7c,9

Apokalips 22, 12-14.16-17.20

Jan 17, 20-26

7èm lindi Pak

Travay Apot yo 19, 1-8

Psòm 67, 2-3,4-5,6-7ab,36cd

Jan 16, 29-33

7èm madi Pak

Travay Apot yo 20, 17-27

Psòm 67, 10-11,20-21

Jan 17, 1-11a

7èm mèkrédi Pak

Travay Apot yo 20, 28-38

Psòm 67, 29-30,33,34c-35a,36

Jan 17, 11b-19

7èm jédi Pak

Travay Apot yo 22, 30; 23, 6-11

Psòm 15, 1-2a,5,7-8,9-10,2b,11

Jan 17, 20-26

7èm vandrédi Pak

Travay Apot yo 25, 13-21

Psòm 102, 1-2,11-12,19-20

Jan 21, 15-19

7èm samdi, nan matin

Travay Apot yo 28, 16-20.30-31

Psòm 10, 4,5a,7

Jan 21, 20-25

DIMANCH PANTKOT

7EM DIMANCH PAK

Nan véyé-a

Prémié lékti o choua:

Jénèz 11, 1-9

oubyin: Égzòd 19, 3-8a 16-20b

oubyin: Ézékièl 37, 1-14

oubyin: Joèl 3, 1-5

Psòm 103, 1-2,27-28,29bc-30

Romin 8, 22-27

Jan 7, 37-39

Nan Mès jou-a

Travay Apot yo 2, 1-11

Psòm 103, 1-2,27-28,29bc-30

1Korintyin 12, 3b-7.12-13

A.- Jan 20, 19-23

B.- Jan 15,26-27 ; 16,12-15

C.- Jan 14, 15-17a,23b-26

FET SOLANEL APRE PANTKOT LA

Prémié dimanch

LA SINT TRINITÉ

A.- Égzòd 35, 4b-6.8-9

Danièl 3, 52,53,54,55,56

Korintyin 13, 11-13

Jan 3, 16-18

B.- Détéronòm 4, 32-34.39-40

Psòm 32, 4-5,6.9,18.20,21-22

Romin 8, 14-17

Matié 28, 16-20

C.- Proverbes 8, 22-31

Psòm 8, 4-5,6-7,8-9

Romin 5, 1-5

Jan 16, 12-15

Nan jédi

Prémié dimanch la yo fété Batèm Granmèt la.

Nan sémèn nan, pou prémié lékti-a, yo prévoua dé lign : prémié-a yo suiv li lè ané a no, chif inpè (I), dézièm nan lè chif ané-a pè (II)

1é lindi

(oubyin 2èm dimanch la)

FÈT SAKRÈMAN

KÒ AK SAN JÉZU

A.- Détéronòm 8, 2-3.14b-16a

Psòm 147, 12-13,14-15,19-20

1 Korintyin 10, 16-17

Jan 6, 51-58

B.- Égzòd 24, 3-8

Psòm 115, 12-13,15-16ac,17-18

Ébré 9, 11-15

Mark 14, 12-16.22-26

C.- Jénèz 14, 18-20

Psòm 109, 1,2,3,4

1 Korintyin 11,23-26

Luk 9, 11b-17

Nan 3èm vandrédi

SAKRÉ-KÈ JÉZU

A.- Détéronòm 7, 6-11

Psòm 102, 1-2,3-4,6-7,8.13

1 Jan 4, 7-16

Matié 11,25-30

B.- Ozé 11, 1.3-4. 8c-9

Izayi 12, 2,4b-5a,5b-6

Éfézyin 3, 8-12.14-19

Jan 19, 31-37

C.- Ezékièl 34, 11-16

Psòm 22, 1-2b,2c-3,4,5,6

Romin 5, 5-11

Luk 15, 3-7

TAN ÒDINÈ

I. Ébré 1, 1-6

Psòm 96, 1.2b,6-7,8bc-9

II. 1 Samuèl 1, 1-8

Psòm 115, 12-13,14.17,18-19

Mark 1, 14-20

1é madi

I. Ébré 2, 5-12

Psòm 8, 4-5,6-7,8-9

II. 1 Samuèl 1,9-20

1 Samuèl 2,1,4-5ab,6-7

Mark 1,21-28

1é mèkrédi

I. Ébré 2, 14-18

Psòm 104, 1-2,3-4,6-7,8-9

II. 1 Samuèl 3, 1-10.19-20

Psòm 39, 2abc.5ab,7-8a,8b-9,10

Mark 1, 29-39

1é jédi

I. Ébré 3, 7-14

Psòm 94, 6-7abc,7d-8-9,10-11

II. 1 Samuèl 4, 1-11

Psòm 43, 10-11,14-15,24-25

Mark 1,40-45

1é vandrédi

I. Ébré 4, 1-5.11

Psòm 77, 3.4cd,6ab.7bac,8

II. 1 Samuèl 8, 4-7.10-22a

Psòm 88, 16-17,18-19

Mark 2, 1-12

1é samdi

I. Ébré 4, 12-16

Psòm 18, 8,9,10-15

II. 1 Samuèl 9, 1-4.17-19; 10, 1a

Psòm 20, 2-3,4-5,6-7

Mark 2, 13-17

2èm DIMANCH ÒDINÈ

A.- Izayi 49, 3,5-6

Psòm 39, 2abc.4ab, 7-8a, 8b-9, 10cd.11cd

1 Korintyin 1, 1-3

Jan 1,29-34

B.-1 Samuèl 3, 3b-10.19

Psòm 39, 2abc.4ab, 7-8a, 8b-9, 10cd.11cd

1 Korintyin 6, 13b-15a.17-20

Jan 1, 35-42

C.- Izayi 62, 1-5

Psòm 95, 1-2a,2b-3,7-8a,9a

1 Korintyin 12, 4-11

Jan 2, 1-12

2èm lindi

I.Ébré 5, 1-10

Psòm 109, 1,2,3,4

II 1 Samuèl 15, 16-23

Psòm 49, 7ac-8,16bc-17,21,23

Mark 2, 18-22

2èm madi

I.Ébré 6, 10-20

Psòm 110, 1-2,4-5,9.10c

II. 1 Samuèl 16, 1-13

Psòm 88, 21-25,27,28-29

Mark 2, 23-28

2èm mèkrédi

I. Ébré 7, 1-3.15-17

Psòm 109, 1,2,3,4

II. 1 Samuèl 17, 32-33.37.40-51

Psòm 143, 1-2a,1a.2bcd,9-10

Mark 3, 1-6

2èm jédi

I. Ébré 7, 25 — 8, 6

Psòm 39, 7-8a,8b-9,10,17

II. 1 Samuèl 18,6-9; 19, 1-7

Psòm 55, 2-3.7a,9-10,11-12,14

Mark 3, 7-12

2èm vandrédi

I. Ébré 8, 6-13

Psòm 84, 8,10,11-12,13-14

II. 1 Samuèl 24, 3-21

Psòm 56, 2,3-4ac,6.11

Mark 3, 13-19

2èm samdi

I. Ébré 9, 2-3.11-14

Psòm 46, 2-3,6-7,8-9

II. 2 Samuèl 1, 1-4.11-12.19.23-27

Psòm 79, 2-3,5-7

Mark 3, 20-21

3èm DIMANCH ÒDINÈ

A.- Izayi 8, 23b — 9, 3

Psòm 26, 1,4a-d,13-14

1 Korintyin 1, 10-13.17

Matié 4, 12-23 (oubyin 12-17)

B.- Jonas 3, 1-5.10

Psòm 24, 4-5b,6-7,8-9

1 Korintyin 7, 29-31

Mark 1, 14-20

C.- Néémi 8, 1-4a.5-6.8-10

Psòm 18, 8,9,10,15

1 Korintyin 12, 12-30

(oubyin 12-14.17)

Luk 1, 1-4; 4, 14-21

3èm lindi

I. Ébré 9, 15.24-28

Psòm 97, 1,2-3ab,3cd,4,5-6

II. 2 Samuèl 5, 1-7.10

Psòm 88, 20,21-22,25-26

Mark 3, 22-30

3èm madi

I. Ébré 10, 1-10

Psòm 39, 2abc,4ab,7-8a,10,11

II. 2 Samuèl 6, 12b-15.17-19

Psòm 23, 7,8,9,10

Mark 3, 31-35

3èm mèkrédi

I. Ébré 10, 11-18

Psòm 109, 1,2,3,4

II. 2 Samuèl 7, 4-17

Psòm 88, 4-5,27-28,29-30

Mark 4, 1-20

3èm jédi

I. Ébré 10, 19-25

Psòm 23, 1-2,3-4b,5-6

II. 2 Samuèl 7, 18-19.24-29

Psòm 131, 1-2,3a,4a.5,11,12,13-14

Mark 4, 21-25

3èm vandrédi

I. Ébré 10, 32-39

Psòm 36, 3-4,5-6,23-24,39-40ac

II. 2 Samuèl 11, 1-4a.5-10a.13-17

Psòm 50, 3-4,5-6ab,6c-7,10-11

Mark 4, 26-34

3èm samdi

I. Ébré 11, 1-2.8-19

Luk 1,69-70,71-72,73-71

II. 2 Samuèl 12, 1-7a. 10-17

Psòm 50, 12-13,14-15,16-17

Mark 4, 35-41

4èm DIMANCHÒDINÈ

A.- Sofoni 2, 3; 3, 12-13

Psòm 145, 7,8,9ab,10b

1 Korintyin 1, 26-31

Matié 5, 1-12a

B.- Détéronòm 18, 15-20

Psòm 94, 1-2,6-7b,7d-8a,9

1 Korintyin 7, 32-35

Mark 1,21-28

C.- Jérémi 1,4-5.17-19

Psòm 70, 5-6b,7-8,15ab,17,19,6c

1 Korintyin 12, 31 — 13, 13

(oubyin 13, 4-13)

Luk 4, 21-30

4èm lindi

I. Ébré 11, 32-40

Psòm 30, 20,21,22,23cd,24ab

II. 2 Sam. 15, 13-14.30; 16, 5-13a

Psòm 3, 2-3,4-5,6-7

Mark 5, 1-20

4èm madi

I. Ébré 12, 1-4

Psòm 21,26-27,28,30,31-32

II. 1 Samuèl 18, 9-10.14b.24-25a.

Psòm 85, 1-2,3-4,5-6

Mark 5, 21-43

4èm mèkrédi

I. Ébré 12, 4-7.11-15

Pòm 102, 1-2,13-14,17-18a

II. 2 Samuèl 24, 2.9-17

Psòm 31, 1-2,5bc,6,7

Mark 6, 1-6

4èm jédi

I. Ébré 12, 18-19.21-24

Psòm 47, 2-3a,3b-4,9,10-11

II. 1 Roua 2, 1-4.10-12

1 Kronik 29,10,11abc,11d-12a,12bcd

Mark 6, 7-13

4èm vandrédi

I. Ébré 13, 1-8

Psòm 26, 1,3,5,9a-d

II. Sirasid 47, 2-13

Psòm 17,31,33a,47,50,32a.51

Mark 6,14-29

4èm samdi

I. Ébré 13, 15-17.20-21

Psòm 22, 1-2a,2b-3,4,5,6

II. 1 Roua 3, 4-13

Psòm 118, 9-10,11-12,13-14

Mark 6, 30-34

5èm DIMANCH ÒDINÈ

A.- Izayi 58, 7-10

Psòm 111, 1a.4,5a.6,7-8a,9

1 Korintyin 2, 1-5

Matié 5, 13-16

B.- Jòb 7, 1-4.6-7

Psòm 146, 1,3,4-5,6-7

1 Korintyin 9, 16-19.22-23

Mark 1, 29-39

C.- Izayi 6, 1-2a.3-8

Psòm 137, 1-2a,2b-3,4-5,7c-8

1 Korintyin 15, 1-11 (oubyin 3-8.11)

Luk 5, 1-11

5èm lindi

I. Jénèz 1, 1-19

Psòm 103, 1-2,5-6,10,12,24.35c

II.1 Roua 8, 1-7.9-13

Psòm 131, 1a.2b.4a.5a,7-8,9-10

Mark 6, 53-56

5èm madi

I. Jénèz 1,20 —2, 4a

Psòm 8, 4-5,6-7,8-9

II. 1 Roua 8, 22-23.27-30

Psòm 83, 3,4,5,10,11abc

Mark 7, 1-13

5èm mèkrédi

I. Jénèz 2, 4b-9.15-17

Psòm 103, 1-2,27-28,29bc-30

II. 1 Roua 10, 1-10

Psòm 36, 5-6,30-31,39-40ac

Mark 7, 14-23

5èm jédi

I. Jénèz 2, 18-25

Psòm 127, 1-2,3,4-5b

II. 1 Roua 11,4-13

Psòm 105, 3-4ab,6.35,36-37,39-40

Mark 7, 24-30

5èm vandrédi

I. Jénèz 3, 1-8

Psòm 31, 1-2,5bc,6,7

II. 1 Roua 11,29-32; 12, 19

Psòm 80, 10-11ab,12-13,14-15

Mark 7, 31-37

5èm samdi

I. Jénèz 3, 9-24

Psòm 89, 2,3-4,5-6,12-13

II 1 Roua 12, 26-32; 13, 33-34

Psòm 105, 6-7a.b,19-20,21-22

Mark 8, 1-10

6èm DIMANCH ÒDINÈ

A.- Sirasid 15, 15-20

Psòm 118, 1-2,4-5,17-18,33-34

1 Korintyin 2, 6-10

Matié 5, 17-37

(oubyin 20-22a. 27-28.33-34a. 37)

B.- Lévitik 13, 1-2.45-46

Psòm 101, 2-3ab,4-5,6,13,20-21

1 Korintyin 10, 31 — 11, 1

Mark 1, 40-45

C.- Jérèmi 17, 5-8

Psòm 1, 1a.c-2,3,4.6a

1 Korintyin 15, 12.16-20

Luk 6, 17.20-26

6èm lindi

I. Jénèz 4, 1-15.25

Psòm 49, 1.5a,7ac-8, 16bc-17, 20-21abc

II. Jak 1, 1-11

Psòm 118, 67-68,71-72,75-76

Mark 8, 11-13

6èm madi

I. Jénèz 6, 5-8; 7, 1-5.10

Psòm 28, 1-2,3ac-4,3b.9b-10

II. Jak 1, 12-18

Psòm 93, 12-13,14-15,18-19

Mark 8, 14-21

6èm mèkrédi

I. Jénèz 8, 6-13.20-22

Psòm 115, 12-13,15-16,18-19

II. Jak 1, 19-27

Psòm 14, 1a,2,3bc-4ab,4d.5

Mark 8, 22-26

6èm jédi

I. Jénèz 9, 1-13

Psòm 101, 16-18,19-21,22-23.29

II. Jak 2, 1-9

Psòm 33, 2-3,4-5,6-7

Mark 8, 27-33

6èm vandrédi

I. Jénèz 11, 1-9

Psòm 32,10-11,12-13,14-15

II. Jak 2, 14-24.26

Psòm 111, 1-2,3-4,5-6

Mark 8, 34 — 9, 1

6èm samdi

I.Ébré 11, 1-7

Psòm 144, 2-3,4-5,10-11

II. Jak 3, 1-10

Psòm 11, 2-3,4-5,7-8

Mark 9, 2-13

7èm DIMANCHÒDINÈ

A.- Lévitik 19, 1-2.17-18

Psòm 102, 1-2,3-4,8.10,12-13

1 Korintyin 3, 16-23

Matié 5, 38-48

B.- Izayi 43, 18-19.21-22.24b-25

Psòm 40, 2-3a,4a,5-6,11a.12a.13

Korintyin 1, 18-22

Mark 2, 1-12

C.- 1 Samuèl 26,2.7-9.12-13.22-23

Psòm 102, 1-2,3-4,8.10,12-13

1 Korintyin 15, 45-49

Luk 6, 27-38

7èm lindi

I. Sirasid 1, 1-10

Psòm 92, 1ab,1c-2,5

II. Jak 3, 13-18

Psòm 18, 8,9,10,15

Mark 9, 14-29

7èm madi

I. Sirasid 2, 1-13

Psòm 36, 3-4,18-19,27-18,30-40ac

II. Jak 4, 1-10

Psòm 54, 7-8,9-10a,10b-11a

Mark 9, 30-37

7èm mèkrédi

I. Sirasid4, 12-22

Psòm 118, 165.168,171-172,174-175

II. Jak 4, 13-17

Psòm 48, 2-3,6-7,8-9,10-11ab

Mark 9, 38-40

7èm jédi

I. Sirasid 5, 1-10

Psòm 1, 1-2,3-4a,4b-6

II. Jak 5, 1-6

Psòm 48, 17-18,19-20,14-15a,15cd-16

Mark 9, 41-50

7èm vandrédi

I. Sirasid 6, 5-17

Psòm 118, 12.16,18.27,34-35

II. Jak 5, 9-12

Psòm 102, 1-2,3-4,8-9,11-12

Mark 10, 1-12

7èm samdi

I. Sirasid 17, 1-13

Psòm 102, 13-14,15-16,17-18a

II. Jak 5, 13-20

Psòm 140, 1-2,3.8

Mark 10, 13-16

8èm DIMANCHÒDINÈ

A.- Izayi 49, 14-15

Psòm 61, 2-3,8,9

1 Korintyin 4, 1-5

Matié 6, 24-34

B.- Ozé 2, 16b. 17b. 21-22

Psòm 102, 1-2,3-4,8.10,12-13

2 Korintyin 3, 1b-6

Mark 2, 18-22

C.- Sirasid 27, 5-8

Psòm 91, 2-3,13-14,15-16

1 Korintyin 15, 54-58

Luk 6, 39-45

8èm lindi

I. Sirasid 17, 20-28

Psòm 31,1-2,5,6,7

II. 1 Piè 1, 3-9

Psòm 110, 1-2,5-6,9.10c

Mark 10, 17-27

8èm madi

I. Sirasid 35, 1-15

Psòm 49, 4.7ac, 8.12,14.23ab

II. 1 Piè 1, 10-16

Psòm 97, 1,2-3ab,3c-4

Mark 10, 28-31

8èm mèkrédi

I. Sirasid 36, 1.5-6.13-19

Psòm 78, 8,9,11,13

II. 1 Piè 1, 18-25

Psòm 147b, 12-13,14-15,19-20

Mark 10, 32-45

8èm jédi

I. Sirasid 42, 15-26

Psòm 32, 2-3,4-5,6-7,8-9

II. 1 Piè 2, 2-5.9-12

Psòm 99, 1-2,3,4,5

Mark 10, 46-52

8èm vandrédi

I. Sirasid 44, 1.9-13

Psòm 149, 1-2,3-4,5-6a.9b

II. 1 Piè 4, 7-13

Psòm 95, 10,11-12a,12b-13ab,13bcd

Mark 11, 11-16

8èm samdi

I. Sirasid 51, 17-27

Psòm 18, 8,9,10,11

II. Jud 17.20b-25

Psòm 62, 2,3-4,5-6

Mark 11, 27-33

9èm DIMANCH ÒDINÈ

A.- Détéronòm 11, 18.26-28

Psòm 30, 3bc-4,17.20cd,24ab.25

Rom 3, 21-25a.28

Matié 7, 21-27

B.- Détéronòm 5, 12-15

Psòm 80, 3-4,5-6ab,6c-8b,10-11ab

Korintyin 4, 6-11

Mark 2, 23 — 3, 6 (oubyin 2, 23-28)

C.- 1 Roua 8, 41-43

Psòm 116, 1,2

Galat 1, 1-2.6-10

Luk 7, 1-10

9èm lindi

I. Tob 1, 1a-2; 2, 1-9 (Vg)

Psòm 111, 1-2,3-4,5-6

II. 2 Piè 1, 2-7

Psòm 90, 1-2,14-15ab,15bc-16

Mark 12, 1-12

9èm madi

I. Tob 2, 10-13 (Vg)

Psòm 111,1-2,7b-8,5a.9

II. 2 Piè 3, 12-15a. 17-18

Psòm 89, 2,3-4,10,14.16

Mark 12, 13-17

9èm mèkrédi

I. Tob 3, 1-11.24-25 (Vg)

Psòm 24, 2-3,4-5ab,6-7,8-9

II. 2 Timoté 1, 1-3.6-12

Psòm 122, 1-2a,2bc

Mark 12, 18-27

9èm jédi

I. Tob 6, 10-1 la; 7, 1.9-17;

8, 4-10 (Vg)

Psòm 127, 1-2,3,4-5b

II. 2 Timoté 2, 8-15

Psòm 24, 4-5ab,8-9,10.14

Mark 12, 28b-34

9èm vandrédi

I. Tob 11, 5-17 (Vg)

Psòm 145, 2.5,6c-7,8-9a,9bc-10

II. 2 Timoté 3, 10-17

Psòm 118, 157,160,161,165,166.168

Mark 12, 35-37

9èm samdi

I. Tob 12, 1.5-15.20 (Vg)

Tob 13,2a.cde,7,4c.8ab,8cde

II. 2 Timoté 4, 1-8

Psòm 70, 8-9,14-15ab,16-17,22

Mark 12, 38-44

10èm DIMANCH ÒDINÈ

A.- Ozé 6, 3-6

Psòm 49, 1ab.4b.8,12-13,14-15

Romin 4, 18-25

Matié 9, 9-13

B.- Jénèz 3, 9-15

Psòm 129, 1-2,3-4,5-6ab,7bc-8

2 Korintyin 4, 13 — 5, 1

Mark 3, 20-35

C.- 1 Roua 17, 17-24

Psòm 29, 3-4,5-6ab,6cd-12,13

Galat 1, 11-19

Luk 7, 11-17

10èm lindi

I. 2 Korintyin 1, 1-7

Psòm 33, 2-3,4-5,6-7,8-9

II. 1 Roua 17, 1-6

Psòm 120, 1-2,3-4,5-6,7-8

Matié 5, 1-12

10èm madi

I. 2 Korintyin 1, 18-22

Psòm 118, 129-130,131-132,133.135

II. 1 Roua 17,7-16

Psòm 4, 2,3,4-5a,7,8-9b

Matié 5, 13-16

10èm mèkrédi

I. 2 Korintyin 3,4-11

Psòm 98, 5,6,7,8,9

II. 1 Roua 18, 20-39

Psòm 15, 1-2,3ac.4,5,8,9a.11

Matié 5, 17-19

10èm jédi

I. 2 Korintyin 3, 15 — 4, 1.3-6

Psòm 84,9ab-10,11-12,13-14

II. 1 Roua 18, 41-46

Psòm 64, 10,11,12-13

Matié 5, 20-26

10èm vandrédi

I. 2 Korintyin 4, 7-15

Psòm 115, 10-11,15-16ac,17-18

II. 1 Roua 19, 9a. 11-16

Psòm 26,7-8,9abcd,13-14

Matié 5, 27-32

10èm samdi

I. 2 Korintyin 5, 14-21

Psòm 102,1-2,3-4,8-9,11-12

II. 1 Roua 19, 19-21

Psòm 15, 1-2a.5,7-8,9-10

Matié 5, 33-37

11èm DIMANCH ÒDINÈ

A.- Égzòd 19, 2-6a

Psòm 99, 1-2,3,5

Romin 5, 6-11

Matié 9, 36 — 10, 8

B.- Ézékièl 17, 22-24

Psòm 91, 2-3,13-14,15-16

2 Korintyin 5, 6-10

Mark 4, 26-34

C.- 2 Samuèl 12, 7-10.13

Psòm 31, 1-2,5abcd,5ef.7,10bc-11

Galat 2, 16.19-21

Luk 7, 36 — 8, 3 (oubyin 7, 36-50)

11èm lindi

I. 2 Korintyin 6, 1-10

Psòm 91, 1,2-3ab,3cd-4

II. 1 Roua 21, 1-16

Psòm 5,2-3,5-6ab,6c-7

Matié 5, 38-42

11èm madi

I. 2 Korintyin 8, 1-9

Psòm 145, 2.10,5-6ab,6c-7,8-9a

II. 1 Roua 21, 17-29

Psòm 50, 3-4,5-6a,11.16

Matié 5, 43-48

11èm mèkrédi

I. 2 Korintyin 9, 6-11

Psòm 111, 1-2,3-4,5a.9

II. 2 Roua 2, 1.6-14

Psòm 30, 20,21,24ab.25

Matié 6, 1-6.16-18

11èm jédi

I. 2 Korintyin 11, 1-11

Psòm 110, 1-2,3-4,7-8

II. Sirasid 48, 1-15

Psòm 96, 1-2,3-4,5-6,7.10ab

Matié 6, 7-15

11èm vandrédi

I. 2 Korintyin 11, 18.21b-30

Psòm 33, 2-3,4-5,6-7

II. 2 Roua 11, 1-4.9-18.20

Psòm 131, 11,12,13-14,17-18

Matié 6, 19-23

11èm samdi

I. 2 Korintyin 12, 1-10

Psòm 33, 8-9,10-11,12-13

II. 2 Kronik 24, 17-25

Psòm 88, 4-5, 9-30, 1-32a,33a, 2b,33b-34

Matié 6, 24-34

12èm DIMANCH ÒDINÈ

A.- Jérèmi 20, 10-13

Psòm 68, 8-10,14,17,33-35

Romin 5, 12-15

Matié 10, 26-33

B.- Jòb 38, 1,8-11

Psòm 106,21a,22a,24, 25-26a, 27b,28-29, 30-31

Korintyin 5, 14-17

Mark 4, 35-41

C.- Zacharie 12, 10-11

Psòm 62, 2,3-4,5-6,8-9

Galat 3, 26-29

Luk 9, 18-24

12èm lindi

I. Jénèz 12, 1-9

Psòm 32, 12-13,18-19,20,22

II.2 Roua 17, 5-8,13-15a,18

Psòm 59, 3-4,5-6,13-14

Matié 7, 1-5

12èm madi

I. Jénèz 13, 2,5-18

Psòm 14, 1a,2,3bc-4ab,4d,5

II. 2 Roua 19, 9b-11,14-21,31-35a,36

Psòm 47, 2-3a,3b-4,10-11

Matié 7, 6,12-14

12èm mèkrédi

I. Jénèz 15, 1-12,17-18

Psòm 104, 1-2,3-4,6-7,8-9

II. 2 Roua 22, 8-13; 23, 1-3

Psòm 118, 33-34,35-36,37,40

Matié 7, 15-20

12èm jédi

I. Jénèz 16, 1-12,15-16

(oubyin 6b-12, 15-16)

Psòm 105, 1-2,3-4b,4c-5

II. 2 Roua 24, 8-17

Psòm 78, 1,2,3,4a,5,8,9

Matié 7, 21-29

12èm vandrédi

I. Jénèz 17, 1,9-10,15-22

Psòm 127, 1-2,3,4-5b

II. 2 Roua 25, 1-12

Psòm 136, 1-2,3,4-5,6

Matié 8, 1-4

12èm samdi

I. Jénèz 18, 1-15

Luk 1,46b-47,48-49,50,53,54-55

II. Lam. 2,2,10-14,18-19

Psòm 73, 1-2,3-4,5-7,19b-10,22a

Matié 8, 5-17

13èm DIMANCH ÒDINÈ

A.- 2 Roua 4, 8-11,14-16a

Psòm 88, 2-3,16-17,18-19

Romin 6, 3-4,8-11

Matié 10, 37-42

B.- Sajès 1, 13-15; 2, 23-24

Psòm 29, 3-4,5-6ab,6cd,12,13

2 Korintyin 8, 7,9,13-15

Mark 5, 21-43 (oubyin 21-24,35b-43)

C.- 1 Roua 19, 16b, 19-21

Psòm 15, 1,2a,5,7-8,9-10,2b,11

Galat 5, 1,13-18

Luk 9, 51-62

13èm lindi

I. Jénèz 18, 16-33

Psòm 102, 1-2,3-4,8-9,10-11

II. Amòs 2, 6-10,13-16

Psòm 49, 16bc-17, 18-19, 20-21abc, 22-23ab

Matié 8, 18-22

13èm madi

I. Jénèz 19, 15-29

Psòm 25, 2-3,9-10,11-12

II. Amòs 3, 1-8; 4, 11-12

Psòm 5, 2-3,5-6ab,6c-7

Matié 8, 23-27

13èm mèkrédi

I. Jénèz 21, 5,8-20

Psòm 33, 7-8,10-11,12-13

II. Amòs 5, 14-15,21-24

Psòm 49, 7ac-8,9-10,12-13,16bc-17

Matié 8, 28-34

13èm jédi

I. Jénèz 22, 1-19

Psòm 114, 1-2,3ac-4,5-6,7b-8

II. Amòs 7, 10-17

Psòm 18, 8,9,10,11

Matié 9, 1-8

13èm vandrédi

I. Jénèz 23, 1-4,19; 24, 1-8,62-67

Psòm 105, 1-2,3-4ab,4c-5

II. Amòs 8, 4-6,9-12

Psòm 118, 2,10,20,30,40,131

Matié 9, 9-13

13èm samdi

I. Jénèz 27, 1-5,15-29

Psòm 134, 1-2,3-4,5-6

II. Amòs 9, 11-15

Psòm 84, 9-11-12,13-14

Matié 9, 14-17

14èm DIMANCH ÒDINÈ

A.- Zakari 9, 9-10

Psòm 144, 1-2,8-9,10-11,13c-14

Romin 8, 9,11-13

Matié 11, 25-30

B.- Ézékièl 2, 2-5

Psòm 122, 1-2a,2bcd,3-4

2 Korintyin 12, 7-10

Mark 6, 1-6

C.- Izayi 66, 10-14c

Psòm 65, 1-3a,4-5,6-7a,16.20

Galat 6, 14-18

Luk 10, 1-12,17-20 (oubyin 1-9)

14èm lindi

I. Jénèz 28, 10-22 a

Psòm 90, 1-2,3a,4,14-15ab

II. Ozé 2, 16,17b-18,21-22

Psòm 144, 2-3,4-5,6-7,8-9

Matié 9, 18-26

14èm madi

I. Jénèz 32, 23-33

Psòm 16, 1a,2,4b-5,7,8b-15

II. Ozé 8, 4-7,11-13

Psòm 113b, 3-4,5-6,7-8ab,9,11

Matié 9, 32-38

14èm mèkrédi

I. Jénèz 41, 55-57; 42, 5-7a; 17-24a

Psòm 32, 2-3,10-11,18-19

II. Ozé 10, 1-3,7-8,12

Psòm 104, 2-3,4,6,5,7

Matié 10, 1-7

14èm jédi

I. Jénèz 44, 18-21,23b-29; 45, 1-5

Psòm 104, 16-17,18-19,20-21

II. Ozé 11, 1,3-4,8c-9

Psòm 79, 2ac,3b,15b-16,19-20

Matié 10, 7-15

14èm vandrédi

I. Jénèz 46, 1-7,28-30

Psòm 36, 3-4,18-19,27-18,39-40ac

II. Ozé 14, 2-10

Psòm 50, 3-4,8-9,12-13,14,17

Matié 10, 16-23

14èm samdi

I. Jénèz 49, 29-33; 50, 15-24

Psòm 104, 1-2,3-4,6-7

II. Izayi 6, 1-8

Psòm 92, 1ab,1c-2,5

Matié 10,24-33

15èm DIMANCH ÒDINÈ

A.- Izayi 55, 10-11

Psòm 64, 10a-d,10^f-11,12-13,12b,14

Romin 8, 18-23

Matié 13, 1-25 (oubyin 1-9)

B.- Amòs 7, 12-15

Psòm 84, 9ab-10,11-12,13-14

Éfèzyin 1, 3-14 (oubyin 3-10)

Mark 6, 7-13

C.- Détéronòm 30, 10-14

Psòm 18, 8,9,10,11

Kolosyin 1, 15-20

Luk 10, 25-37

15èm lindi

I. Égzòd 1, 8-14,22

Psòm 123, 2-3,4-5,7

II. Izayi 1, 11-17

Psòm 49, 7ac-8,16bc-17,21,23

Matié 10, 34—11, 1

15èm madi

I. Égzòd 2, 1-15a

Psòm 68, 3,14,30-31,33-34

II. Izayi 7, 1-9

Psòm 47, 2-3a,3b-4,5-6,7-8

Matié 11,20-24

15èm mèkrédi

I. Égzòd 3, 1-6,9-12

Psòm 102, 1-2,3-4,6-7

II. Izayi 10, 5-7,13-16

Psòm 93, 5-6,7-8,9,11,14-15

Matié 11,25-27

15èm jédi

I. Égzòd 3, 13-20

Psòm 104, 1,5,8-8,24-25,26-27

II. Izayi 26, 7-9,12,16-19

Psòm 101, 13-15, 16-18,19-21

Matié 11,28-30

15èm vandrédi

I. Égzòd 11, 10—12, 14

Psòm 115, 12-13,15-16ac,17-18

II. Izayi 38, 1-6,21-22,7-8

Izayi 38, 10,11,12ab, 14b,17ab

Matié 12, 1-8

15èm samdi

I. Égzòd 12, 37-42

Psòm 135, 1,23-24,10-12,13-15

II. Miché 2, 1-5

Psòm 9b, 1-2,3,4,7-8,14

Matié 12, 14-21

16èm DIMANCH ÒDINÈ

A.- Sajès 12, 13,16-19

Psòm 85, 5-6,9ab,10,15-16ab

Romin 8, 26-27

Matié 13, 24-43 (oubyin 24-30)

B.- Jérèmi 23, 1-6

Psòm 22, 1-2a,2b-3,4,5,6

Éfèzyin 2, 13-18

Mark 6, 30-34

C.- Jénèz 18, 1-10a

Psòm 14, 1a,2,3b-4b,5

Kolosyin 1, 24-28

Luk 10, 38-42

16èm lindi

I. Égzòd 14, 5-18

Egzòd 15, 1,2-3,4,5

II. Miché 6, 1-4,6-8

Psòm 49, 5,7ac,8-9,16bc-17

Matié 12, 38-42

16èm madi

I. Égzòd 14, 21 — 15, 1

Égzòd 15, 8,6b,10,13,17b

II. Miché 7, 14-15,18-20

Psòm 84, 2-3,5-6,7-8

Matié 12, 46-50

16èm mèkrédi

I. Égzòd 16, 1-5,9-15

Psòm 77, 17-18,19,22,24-25,27,29

II. Jérèmi 1, 1,4-10

Psòm 70, 1-2,3,5a-6,15ab,17

Matié 13, 1-9

16èm jédi

I. Égzòd 19, 1-2,9-11,16-20b

Danièl 3,52,53,54,55,56

II. Jérèmi 2, 1-3,7-8,12-13

Psòm 35, 6-7ab,8-9,10-11

Matié 13, 10-17

16èm vandrédi

I. Égzòd 20, 1-17

Psòm 18, 8,9,10,11

II. Jérémi 3, 14-17

Jérémi 31, 10,11-12ab,13

Matié 13, 18-23

16èm samdi

I. Égzòd 24, 3-8

Psòm 49, 1-2,5,7ac,14-15

II. Jérémi 7, 1-11

Psòm 83, 2-3,4,5-6,11abc

Matié 13, 24-30

17èm DIMANCH ÒDINÈ

A.- 1 Roua 3, 5.7-12

Psòm 118, 57,72,76-77,127-128,129-130

Romin 8, 28-30

Matié 13, 44-52 (oubyin 44-46)

B.- 2 Roua 4, 42-44

Psòm 144, 10-11,15-16,17-18

Éfézyin 4, 1-6

Jan 6, 1-15

C. Jénèz 18, 20-32

Psòm 137, 1-2a,2b-3,6-7b,7c-8

Kolosyin 2, 12-14

Luk 11, 1-13

17èm lindi

I. Égzòd 32, 15-24.30-34

Psòm 105, 19-20,21-22,23

II. Jérémi 13, 1-11

Détéronòm 32, 6bc.18,19-20ab,21

Matié 13, 31-35

17èm madi

I. Égzòd 33, 7-11 ; 34, 5b-9.28

Psòm 102, 6-7,8-9,10-11,12-13

II. Jérémi 14, 17-22

Psòm 78, 5a,8,9,11.13ab

Matié 13, 36-43

17èm mèkrédi

I. Égzòd 34, 29-35

Psòm 98, 5,6,7,9

II. Jérémi 15, 10.16-21

Psòm 58, 2-3,4-5a,10-11,17.18

Matié 13, 44-46

17èm jédi

I. Égzòd 40, 16-21.34-38

Psòm 83, 3,4,5-6,11

II. Jérémi 18, 1-6

Psòm 145, 1-2.10a,3-4,5-6ab

Matié 13, 47-53

17èm vandrédi

I. Lévitik 23, 1.4-11.15-16.27.34b-37

Psòm 80, 3-4,5-6ab,10-11ab

II. Jérémi 26, 1-9

Psòm 68,2.5ab,5cd.8,10,14

Matié 13, 54-58

17èm samdi

I. Lévitik 25, 1.8-17

Psòm 66, 2-3,5,7-8

II. Jérémi 26, 11-16.24

Psòm 68, 15a-16,30-31,33-34

Matié 14, 1-12

18èm DIMANCH ÒDINÈ

A.- Izayi 55, 1-3

Psòm 144, 8-9,15-16,17-18

Romin 8, 35.37-39

Matié 14, 13-21

B.- Égzòd 16, 2-4.12-15

Psòm 77, 3.4a.c,23-24,25.52a.54a

Éfézyin 4, 17.20-24

Jan 6, 24-35

C.- Koèlèt 1,2; 2, 21-23

Psòm 89, 3-4,5-6,12-13,14.17abc

Kolosyin 3, 1-5.9-11

Luk 12, 13-21

18èm lindi

I. Nonb 11,4b-15

Psòm 80, 12-13,14-15,16-17

II. Jérémi 28, 1-17

Psòm 118, 29,43,79-80,95.102

Matié 14, 13-21

(nan Ané A, pran Évanjil madi-a)

18èm madi

I. Nonb 12, 1-13

Psòm 50, 3-4,5-6ab,12-13

II. Jérèmi 30, 1-2.12-15.18-22

Psòm 101, 16-18,19-21,29.22-23

Matié 14, 22-36

Oubyin nan Ané A: 15, 1-2.10-14

18èm mèkrédi

I. Nonb 13,1-2a.26-14,1.26-29. 34-35

Psòm 105, 6-7ab,13-14,21-22,23

II. Jérèmi 31, 1-7

Jérèmi 31, 10,11-12ab,13

Matié 15, 21-28

18èm jédi

I. Nonb 20, 1-13

Psòm 94, 1-2,6-7ab,7c.8-9a

II. Jérèmi 31, 31-34

Psòm 50, 12-13,14-15,18-19

Matié 16, 13-23

18èm vandrédi

I. Détéronòm 4, 32-40

Psòm 76, 12-13,14-15,16,21

II. Naoum 2, 1-3; 3, 1-3.6-7

Détéronòm 32,36,39,41

Matié 16, 24-28

18èm samdi

I. Détéronòm 6, 4-13

Psòm 17, 2-3,4.47,32a.51

II. Habakuk 1, 12 — 2, 4

Psòm 9a, 8-9,10-11,12-13

Matié 17, 14-20

19èm DIMANCHÒDINÈ

A.- 1 Roua 19, 9a. 11-13a

Psòm 84, 9ab-10,11-12,13-14

Romin 9, 1-5

Matié 14, 22-33

B.- 1 Roua 19, 4-8

Psòm 33,2-3,4-5,6-7,8-9

Éfézyin 4, 30 — 5, 2

Jan 6, 41-51

C.- Sajès 18, 6-9

Psòm 32, 1.12,18-19,20.22

Ébré 11, 1-2.8-19

(oubyin 1-2. 8-12)

Luk 12, 32-48 (oubyin 35-40)

19èm lindi

I. Détéronòm 10, 12-22

Psòm 147b, 12-13,14-15,19-20

II. Ézékièl 1, 2-5.24-28c

Psòm 148, 1-2,11-12,13-14b

Matié 17, 22-27

19èm madi

I. Détéronòm 31, 1-8

Détéronòm 32, 3-4b,7,8,9.12

II. Ézékièl 2, 8 — 3, 4

Psòm 118, 14,24,72.103,111.131

Matié 18, 1-5.10.12-14

19èm mèkrédi

I. Détéronòm 34, 1-12

Psòm 65, 1-3a,5,8,16-17

II. Ézékièl 9, 1-7; 10, 18-22

Psòm 112, 1-2,3-4,5-6

Matié 18, 15-20

19èm jédi

I. Jozué 3, 7-10a.1 1.13-17

Psòm 113a, 1-2,3-4,5-6

II. Ézékièl 12, 1-2

Psòm 77, 56-57,58-59,61-62

Matié 18,21 — 19,1

19èm vandrédi

I. Jozué 24, 1-13

Psòm 135, 1-3,16-18,21-22.24

II. (chouazi ant :) Éz. 16, 1-15.60.63

oubyin: Ézékièl 16, 59-63

Izayi 12, 2,4b-5a,5b-6

Matié 19, 3-12

19èm samdi

I. Jozué 24, 14-29

Psòm 15, 1-2a.5,7-8,2b-11

II. Ézékièl 18, 1-10.13b.30-32

Psòm 50, 12-13,14-15,18-19

Matié 19, 13-15

20èm DIMANCHÒDINÈ

A.- Izayi 56, 1.6-7

Psòm 66, 2b-3,5abd,7b-8

Romin 11, 13-15.29-32

Matié 15, 21-28

B.- Provèb 9, 1-6

Psòm 33, 2-3,10-11,12-13,14-15

Éfézyin 5, 15-20

Jan 6, 51-58

C.- Jérémi 38, 4-6.8-10

Psòm 39, 2,3,4,18

Ébré 12, 1-4

Luk 12, 49-53

20èm lindi

I. Jij 2, 11-19

Psòm 105, 2,4,6,35,36-37

II. Ézékièl 24, 15-24

Détéronòm 32, 6bc,18,19-20ab,21

Matié 19, 16-22

20èm madi

I. Jij 6, 11-24a

Psòm 84, 9,11-12,13-14

II. Ézékièl 28, 1-10

Détéronòm 32, 26-27b, 27cd,29, 30, 35c-36b

Matié 19, 23-30

20èm mèkrédi

I. Jij 9, 6-15

Psòm 20, 2-3,4-5,6-7

II. Ézékièl 34, 1-11

Psòm 22, 1-2a,2b-3,4,5,6

Matié 20, 1-16a

20èm jédi

I. Jij 11, 29-39a

Psòm 39, 5,7-8a,8b-9,10

II. Ézékièl 36, 23-28

Psòm 50, 12-13,14-15,18-19

Matié 22, 1-14

20èm vandrédi

I. Rut 1,1,3-6,14b-16,22

Psòm 145, 5-6ab,6c-7,8-9a,9bc-10

II. Ézékièl 37,1-14

Psòm 106, 2-3,4-5,6-7,8-9

Matié 22,34-40

20èm samdi

I. Rut 2,1-3.8-11 ; 4,13-17

Psòm 127, 1-2,3,4-5b

II. Ézékièl 43, 1-7a

Psòm 84, 9ab-10,11-12,13-14

Matié 23,1-12

21èm DIMANCH ÒDINÈ

A.- Izayi 22, 19-23

Psòm 137, 1-2a,2b-3,6a-8

Romin 11,33-36

Matié 16,13-20

B.- Jozué 24, 1-2a,14-17,18b

Psòm 33, 2-3,16-17,20-21,22-23

Éfézyin 5, 21-32

Jan 6, 60-69

C.- Izayi 66, 18-21

Psòm 116, 1,2

Ébré 12, 5-7,11-13

Luk 13, 22-30

21èm lindi

I. 1 Tésalonisyin 1,2b-5.8b-10

Psòm 149, 1-2,3-4,5-6a,9b

II. 2 Tésalonisyin 1, 1-5,11b-12

Psòm 95, 1-2a,2b-3,4-5a

Matié 23, 13-22

21èm madi

I. 1 Tésalonisyin 2,1-8

Psòm 138, 1-2,5a,3-4

II. 2 Tésalonisyin 2,1-3a,14-17

Psòm 95, 10,11-12a,12b-13a,9a,13cd

Matié 23, 23-26

21èm mèkrédi

I. 1 Tésalonisyin 2,9-13

Psòm 138, 7-8,9-10,11-12

II. 2 Tésalonisyin 3,6-10,16-18

Psòm 127, 1-2,4-5b

Matié 23, 27-32

21èm jédi

I. 1 Tésalonisyin 3, 7-13

Psòm 89, 3-4,12-13,14,17

II. 1 Korintyin 1,1-9

Psòm 144, 2-3,4-5,6-7

Matié 24,42-51

21èm vandrédi

I. 1 Tésalonisyin 4,1-8

Psòm 96, 1,2b,5-6,10ab,12

II. 1 Korintyin 1, 17-25

Psòm 32, 1-2,4-5,10-11

Matié 25, 1-13

21èm samdi

I. 1 Tésalonisyin 4, 9-12

Psòm 97, 1,7-8,9-10

II. 1 Korintyin 1, 26-31

Psòm 32, 12-13,18-19,20-21

Matié 25, 14-30

22èm DIMANCH ÒDINÈ

A.- Jérèmi 20,7-9

Psòm 62, 2,3-4,5-6,8-9

Romin 12,1-2

Matié 16, 21-27

B.- Détéronòm 4, 1-2.6-8

Psòm 14, 1a,2,3b-4b,5

Jak 1,17-18.21b-22.27

Mark 7, 1-8.14-15.21-23

C.- Sirasid 3, 19-21.30-31

Psòm 67, 4-5a.c,6-7ab,10-11

Ébré 12, 18-19.22-24a

Luk 14, 1.7-14

22èm lindi

I. 1 Tésalonisyin 4, 13-18

Psòm 95, 1-2a,4-5a,11-12a,12b-13b

II. 1 Korintyin 2, 1-5

Psòm 118, 97-98,99-100,101-102

Luk 4, 16-30

22èm madi

I. 1 Tésalonisyin 5, 1-6.9-11

Psòm 26, 1,4,13-14

II. 1 Korintyin 2, 10b-16

Psòm 144, 8-9, 10-11, 12-13ab, 13cd-14

Luk 4, 31-37

22èm mèkrédi

I. Kolosyin 1, 1-8

Psòm 51, 10,11

II. 1 Korintyin 3, 1-9

Psòm 32, 12-13,14-15,2-21

Luk 4, 38-44

22èm jédi

I. Kolosyin 1,9-14

Psòm 97, 2-3ab,3cd-4,5-6

II. 1 Korintyin 3,18-23

Psòm 23, 1-2,3-4ab,5-6

Luk 5, 1-11

22èm vandrédi

I. Kolosyin 1, 15-20

Psòm 99, 1-2,3,4,5

II. 1 Korintyin 4, 1-5

Psòm 36, 3-4,5-6,27-28,39-40ac

Luk 5, 33-39

22èm samdi

I. Kolosyin 1, 21-23

Psòm 53, 3-4,6.8

II. 1 Korintyin 4, 9-15

Psòm 144, 17-18,19-20,10a.21

Luk 6, 1-5

23èm DIMANCH ÒDINÈ

A.- Ézékièl 33, 7-9

Psòm 94, 1-2,6-7b,7d-8a.9

Romin 13, 8-10

Matié 18, 15-20

B.- Izayi 35, 4-7a

Psòm 145, 7,8,9ab.10b

Jak 2, 1-5

Mark 7, 31-37

C.- Sajès 9, 13-19

Psòm 89, 3-4,5-6,12-13,14.17abc

Filémon 9b-10.12-17

Luk 14, 25-33

23èm lindi

I. Kolosyin 1, 24—2,3

Psòm 61, 6-7,9

II. 1 Korintyin 5, 1-8

Psòm 5,2-3,5-6ab,6c-7

Luk 6, 6-11

23èm madi

I. Kolosyin 2, 6-15

Psòm 144, 1-2,8-9,10-11

II. 1 Korintyin 6, 1-11

Psòm 149, 1-2,3-4,5-6a.9b

Luk 6,12-19

23èm mèkrédi

I. Kolosyin 3, 1-11

Psòm 144, 2-3,10-11,12-13ab

II. 1 Korintyin 7,25-31

Psòm 44, 11a-12, 14-15a, 15b-16, 17a.18

Luk 6, 20-26

23èm jédi

I. Kolosyin 3,12-17

Psòm 150, 1-2,3-4,5-6

II. 1 Korintyin 8, 1b-7.11-13

Psòm 138, 1-2,3b,13-14ab,23-24

Luk 6, 27-38

23èm vandrédi

I. 1 Timoté 1, 1-2.12-14

Psòm 15, 1-2a.5,7-8,2b.11

II. 1 Korintyin 9, 16-19.22b-27

Psòm 83, 2-3,4,5-6,12

Luk 6, 39-42

23èm samdi

I. 1 Timoté 1, 15-17

Psòm 112, 1-2,3-4,5a.6-7

II. 1 Korintyin 10, 14-22

Psòm 83, 2-3,4,5-6,12

Luk 6, 43-49

24èm DIMANCH ÒDINÈ

A.- Sirasid 27, 33—28,9

Psòm 102, 1-2,3-4,9-10,11-12

Romin 14, 7-9

Matié 18, 21-35

B.- Izayi 50, 5-9a

Jak 2, 14-18

Psòm 114, 1-2,3ac-4,5-6,8ac-9

Mark 8, 27-35

C.- Égzòd 32, 7-11.13-14

Psòm 50, 3-4,12-13,17.19

1 Timoté 1, 12-17

Luk 15, 1-32 (oubyin 1-10)

24èm lindi

I. 1 Timoté 2, 1-8

Psòm 27, 1a.2,7,8-9

II. 1 Korintyin 11, 17-26.33

Psòm 39, 7-8a,8b-9,10,17

Luk 7, 1-10

24èm madi

I. 1 Timoté 3, 1-13

Psòm 100, 1-2ab,2cd-3ab,5,6

II. 1 Korintyin 12, 12-14.27-31a

Psòm 99, 1-2,3,4,5

Luk 7, 11-17

24èm mèkrédi

I. 1 Timoté 3, 14-16

Psòm 110, 1-2,3-4,5,6

II. 1 Korintyin 12, 31 — 13, 13

Psòm 32, 2-3,4-5,12.22

Luk 7, 31-35

24èm jédi

I. 1 Timoté 4, 12-16

Psòm 110, 7-8a,9,10

II. 1 Korintyin 15, 1-11

Psòm 117, 1-2,16-17,28.21

Luk 7, 36-50

24èm vandrédi

I. 1 Timoté 6, 2c-12

Psòm 48, 6-7,8-9,17-18,19-20

II. 1 Korintyin 15, 12-20

Psòm 16, 1,6-7a,8a.15

Luk 8, 1-3

24èm samdi

I. 1 Timoté 6, 13-16

Psòm 99, 1-2,3,4,5

II. 1 Korintyin 15, 35-37.42-49

Psòm 55, 4,5b.10,11a.12,13-14ab

Luk 8, 4-15

25èm DIMANCH ÒDINÈ

A.- Izayi 55, 6-9

Psòm 144, 2-3,8-9,17-18

Filipiyin 1, 20c-24.27

Matié 20, 1-16a

B.- Sajès 2, 12.17-20

Psòm 53, 3-4.7b,6.8

Jak 3, 16 — 4, 3

Mark 9, 30-37

C.- Amos 8, 4-7

Psòm 112,1-2,5-6,7-8

1 Timoté 2, 1-8
Luk 16, 1-13 (oubyin 10-13)

25èm lindi
I. Esdras 1, 1-6
Psòm 125, 1-2ab,2cd-3,4-5,6
II. Provèb 3,27-34
Psòm 14, 1a,2,3bc-4ab,4d-5
Luk 8, 16-18

25èm madi
I. Esdras 6, 7-8.12b.14-20
Psòm 121, 1-2,3-4a,4b-5
II. Provèb 21, 1-6.10-13
Psòm 118, 1.27,30.34,35.44
Luk 8, 19-21

25èm mèkrédi
I. Esdras 9, 5-9
Tobi 13, 1b-2,3-4ab,5,7
II. Provèb 30, 5-9
Psòm 118, 29,72,89.101,104,163
Luk 9, 1-6

25èm jédi
I. Ajé 1,1-8
Psòm 149, 1-2,3-4,5-6a.9b
II. Koèlèt 1,2-11
Psòm 89, 3-4,5-6,12-13,14.17
Luk 9, 7-9

25èm vandrédi
I. Ajé 2, 1-9
Psòm 42, 1,2,3,4
II. Koèlèt 3, 1-11
Psòm 143, 1a.2abc,3-4
Luk 9, 18-22

25èm samdi
I. Zakari 2, 5-9a.14-15a
Jérémi 31, 10,11-12ab,13
II. Koèlèt 11, 9 —12, 8
Psòm 89, 3-4,5-6,12-13,14.17
Luk 9, 43b-45

26èm DIMANCH ÒDINÈ

A.- Ézékièl 18, 25-28
Psòm 24, 4-5b,6-7,8-9
Filipyin 2, 1-11 (oubyin 1-5)
Matié 21, 28-32
B.- Nonb 11, 25-29
Psòm 18,8,10-12-13,14

Jak 5, 1-6
Mark 9, 38-43.45.47-48

C.- Amòs 6, 1a.4-7
Psòm 145, 5a.6c.7ab,7c-8,9-10a
1 Timoté 6, 11-16
Luk 16, 19-31

26èm lindi
I. Zakari 8, 1-8
Psòm 101, 16-18,19-21,29.22-23
II. Jòb 1,6-22
Psòm 16, 1,3,4b,5,7
Luk 9, 46-50

26èm madi
I. Zakari 8, 20-23
Psòm 86, 2.1,3.4cd,5,6-7
II. Jòb 3, 1-3.11-17.20-23
Psòm 87, 2-3,4-5,6,7-8
Luk 9, 51-56

26èm mèkrédi
I. Néémi 2, 1-8
Psòm 136, 1-2,4,5,6
II. Jòb 9, 1-12.14-16
Psòm 87, 10bc-11,12-13,14-15
Luk 9, 57-62

26èm jédi
I. Néémi 8, 1-4a.5-6.7b-12
Psòm 18b, 8,9,10,11
II. Jòb 19, 21-27
Psòm 26, 7-8,9a-d,13-14
Luk 10, 1-12

26èm vandrédi
I. Baruk 1, 15-22
Psòm 78, 1,2,3,4a.5,8,9
II. Job 38, 1.12-21; 40, 3-5
Psòm 138, 1-2,5a.7-8,9-10,13-14ab
Luk 10, 13-16

26èm samdi
I. Baruk 4, 5-12.27-29
Psòm 68, 33-34,36.37b
II. Jòb 42, 1-3.5-6.12-17
Psòm 118, 66.71,75.91,125
Luk 10, 17-24

27èm DIMANCHÒDINÈ

A.- Izayi 5, 1-7

Psòm 79, 9-10,13-14,15-16a,19a.20

Filipyin 4, 6-9

Matié 21, 33-43

B.- Jénèz 2, 18-24

Psòm 127, 1-2,3,4.5c.6a

Ébré 2, 9-11

Mark 10, 2-16 (oubyin 2-12)

C.- Habakuk 1, 2-3; 2, 2-4

Psòm 94, 1-2,6-7b,7d-8a.9

Timoté 1, 4-8.13-14

Luk 17, 5-10

27èm lindi

I. Jonas 1, 1 —2, 1.11

Jonas 2, 3,4,5,8

II Galat 1, 6-12

Psòm 110, 1-2,7-8,9.10c

Luk 10, 25-37

27èm madi

I. Jonas 4, 1-10

Psòm 129, 1-2,3-4,7b.8

II. Galat 1, 13-24

Psòm 138, 1-2.3b,13-14ab

Luk 10, 38-42

27èm mèkrédi

I. Jonas 4, 1-11

Psòm 85, 3-4,5-6,9ab-10

II. Galat 2, 1-2.7-14

Psòm 116, 1,2

Luk 11, 1-4

27èm jédi

I. Malachi 3, 13-20a

Psòm 1, 1-2,3-4a,4b-6

II. Galat 3, 1-5

Luk 1,69-10,71-72,73-75

Luk 11, 5-13

27èm vandrédi

I. Joèl 1, 13-15; 2, 1-2

Psòm 9, 2-3,6,16,8-9

II. Galat 3, 7-14

Psòm 110, 1-2,3-4,5-6

Luk 11, 15-26

27èm samdi

I. Joèl 4, 12-21

Psòm 96, 1-2,5-6,11-12

II. Galat 3, 22-29

Psòm 104, 2-3,4,6,5.7

Luk 11, 27-28

28èm DIMANCHÒDINÈ

A.- Izayi 25, 6-10a

Psòm 22, 1-2b,2c-3,4,5,6

Filipyin 4, 12-14.19-20

Matié 22, 1 -14 (oubyin 1 -10)

B.- Sajès 7, 7-11

Psòm 89, 12-13,14-15,16-17

Ébré 4, 12-13

Mark 10, 17-30 (oubyin 17-27)

C.- 2 Roua 5, 14-17

Psòm 97, 1,2-3ab,3c-4a.6b

Timoté 2, 8-13

Luk 17, 11-19

28èm lindi

I. Romìn 1, 1-7

Psòm 97, 1,2-3ab,3cd-4

II. Gal. 4, 22-24.26-27.31 — 5, 1

Psòm 112, 1-2,3-4,5a.6-7

Luk 11, 29-32

28èm madi

I. Romìn 1, 16-25

Psòm 18, 2-3,4-5

II. Galat 5, 1-6

Psòm 118, 41,43,44-45,47-48

Luk 11, 37-41

28èm mèkrédi

I. Romìn 2, 1-11

Psòm 61, 6-7,8,9

II. Galat 5, 18-25

Psòm 1, 1-2,3-4a,4b-6

Luk 11, 42-46

28èm jédi

I. Romin 3, 21-29

Psòm 129, 1-2,3-4,5-6ab

II. Éfézyin 1, 3-10

Psòm 97, 1,2-3ab,3cd-4,5-6

Luk 11,47-54

28èm vandrédi

I. Romin 4, 1-8

Psòm 31, 1-2,5ab,7b.11

II. Éfézyin 1, 11-14

Psòm 32, 1-2,4-5,12-13

Luk 12, 1-7

28èm samdi

I. Romin 4, 13.16-18

Psòm 104, 4a.6a.7,8-9,42-43

II. Éfézyin 1, 15-23

Psòm 8, 2-3a,4-5,6-7

Luk 12, 8-12

29èm DIMANCH ÒDINÈ

A.- Izayi 45, 1.4-6

Psòm 95, 1a.3,4.5b,7-8a,9a.10ac

1 Tésalonisyin 1, 1-5b

Matié 22, 15-21

B.- Izayi 53, 10-11

Psòm 32, 4-5,18-19,20.22

Ébré 4, 14-16

Mark 10, 35-45 (oubyin 42-45)

C.- Égzòd 17, 8-13

Psòm 120, 1-2,3-4,5-6,7-8

Timoté 3, 14 — 4, 2

Luk 18, 1-8

29èm lindi

I. Romin 4, 20-25

Luk 1, 69-70,71-72,73-75

II.Éfézyin 2, 1-10

Psòm 99, 1-2,3,4,5

Luk 12, 13-21

29èm madi

I. Romin 5, 12.15b.17-19. 20b-21

Psòm 39, 7-8a,8b-9,10,17

II. Éfézyin 2, 12-22

Psòm 84, 9ab-10,11-12,13-14

Luk 12, 35-38

29èm mèkrédi

I. Romin 6, 12-18

Psòm 123, 2-3,4-5,7

II. Éfézyin 3, 2-12

Izayi 12,2,4b-5a,5b-6

Luk 12, 39-48

29èm jédi

I. Romin 6, 19-23

Psòm 1, 1-2,3-4a,4b-6

II. Éfézyin 3, 14-21

Psòm 32, 1-2,4-5,11-12,18-19

Luk 12, 49-53

29èm vandrédi

I. Romin 7, 18-25a

Psòm 118, 66,68,76-77,93-94

II. Éfézyin 4, 1-6

Psòm 23, 1-2,3-4ab,5-6

Luk 12, 54-59

29èm samdi

I. Romin 8, 1-11

Psòm 23, 1-2,3-4ab,5-6

II. Éfézyin 4, 7-16

Psòm 121, 1-2,3-4a,4b-5

Luk 13, 1-9

30èm DIMANCH ÒDINÈ

A.- Égzòd 22, 20-26

Psòm 17, 2-3,4.20,47.51ab

1 Tésalonisyin 1, 5c-10

Matié 22, 34-40

B.- Jérèmi 31, 7-9

Psòm 125, 1-2b,2c-3,4-5,6

Ébré 5, 1-6

Mark 10, 46-52

C.- Sirasid 35, 15b-17.20-22a

Psòm 33, 2-3,16.18,19.23

2 Timoté 4, 6-8.16-18

Luk 18, 9-14

30èm lindi

I. Romin 8, 12-17

Psòm 67, 2,4,6-7ab,20-21

II. Èfézyin 4, 32 — 5, 8

Psòm 1, 1-2,3-4a,4b-6

Luk 13, 10-17

30èm madi

I. Romin 8, 18-25

Psòm 125, 1-2ab,2cd-3,4-5,6

II. Èfézyin 5, 21-33

Psòm 127, 1-2,3,4-5b

Luk 13, 18-21

30èm mèkrédi

I. Romin 8, 26-30

Psòm 12, 4-5a,5b-6

II. Èfézyin 6, 1-9

Psòm 144, 10-11,12-13ab,13cd-14

Luk 13, 22-30

30èm jédi

I. Romin 8, 31b-39

Psòm 108, 21-22,26-27,30-31

II. Èfézyin 6, 10-20

Psòm 143, 1-2a,1a.2bcd,9-10

Luk 13, 31-35

30èm vandrédi

I. Romin 9, 1-5

Psòm 147, 12-13,14-15,19-20

II. Filipyin 1, 1-11

Psòm 110, 1-2,3-4,5-6

Luk 14, 1-6

30èm samdi

I. Rom. 11, 1-2a. 11-12.25-29 1.479

Psòm 94, 12-13,14-15,17-18

II. Filipyin 1, 18b-26

Psòm 41, 2,3,5ab,5cd

Luk 14, 1.7-11

31èm DIMANCH ÒDINÈ

A.- Malachi 1, 14b — 2, 2b.8-10

Psòm 130, 1,2,3

1 Tésalonisyin 2, 7b-9.13

Matié 23, 1-12

B.- Détéronòm 6, 2-6

Psòm 118, 97.99, 101-102, 103-104, 105-106

Ébré 7, 23-28

Mark 12, 28b-34

C.- Sajès 11, 23—12, 2

Psòm 144, 1-2,8-9,10-11,13c-14

2 Tésalonisyin 1, 11 — 2, 2

Luk 19, 1-10

31èm lindi

I. Romin 11, 29-36

Psòm 68, 30-31,33-34,36.37b

II. Filipyin 2, 1-4

Psòm 130, 1,2,3

Luk 14, 12-14

31èm madi

I. Romin 12, 5-16a

Psòm 130, 1,2,3

II. Filipyin 2, 5-11

Psòm 21, 26-27ab,28-29,31-32

Luk 14, 15-24

31èm mèkrédi

I. Romin 13, 8-10

Psòm 111, 1-2,4-5,8a.9

II. Filipyin 2, 12-18

Psòm 26, 1,4,13-14

Luk 14, 25-33

31èm jédi

I. Romin 14, 7-12

Psòm 26, 1,4,13-14

II. Filipyin 3, 3-8a

Psòm 104, 2-3,4,6,5,7

Luk 15, 1-10

31èm vandrédi

I. Romin 15, 14-21

Psòm 97, 1,2-3ab,3c-4

II. Filipyin 3, 17 — 4, 1

Psòm 121, 1-2,3-4a,4b-5

Luk 16, 1-8

31èm samdi

I. Rom. 16, 3-9.16.22-27

Psòm 144, 2-3,4-5,10-11

II. Filipyin 4, 10-19

Psòm 111, 1-2,5-6,8a.9

Luk 16, 9-15

32èm DIMANCH ÒDINÈ

A.- Sajès 6, 12-16

Psòm 62, 2-3,4,5-6,7-8

1Tésalonisyin 4, 13-18

(oubyin 13-14)

Matié 25, 1-13

B.- 1 Roua 17, 10-16

Psòm 145, 5-6a,6c-7b,8b-9a,9b-10

Ébré 9, 24-28

Mark 12, 38-44 (oubyin 41-44)

C.- 2 Makabé 7, 1-2.9-14

Psòm 16, 1.3ab,5-6,8,15

Tésalonisyin 2, 16 — 3, 5

Luk 20, 27-38 (oubyin 27.34-38)

32èm lindi

I. Sajès 1,1-7

Psòm 138, 1-2.5a,3-4,7-8

II. Tit 1, 1-9

Psòm 23, 1-2,3-4ab,5-6

Luk 17, 1-6

32èm madi

I. Sajès 2, 23 — 3, 9

Psòm 33, 2-3,16-17,18-19

II. Tit 2, 1-8.11-14

Psòm 36, 3-4,18,23,27,29

Luk 17, 7-10

32èm mèkrédi

I. Sajès 6, 1-11

Psòm 81, 3-4,6-7

II. Tit 3, 1-7

Psòm 22, 1-2a,2b-3,4,5,6

Luk 17, 11-19

32èm jédi

I. Sajès 7, 22 — 8, 1

Psòm 118, 89090,91.130,135.175

II. Filémon 7-20

Psòm 145, 6c-7,8-9a,9bc-10

Luk 17, 20-25

32èm vandrédi

I. Sajès 13, 1-9

Psòm 18, 2-3,4-5

II. 2 Jan 4-9

Psòm 118, 1-2,10-11,17-18

Luk 17, 26-37

32èm samdi

I. Sajès 18, 14-16; 19, 6-9

Psòm 104, 2-3,36-37,42-43

II. 3 Jan 5-8

Psòm 111, 1-2,3-4,5-6

Luk 18, 1-8

33èm DIMANCH ÒDINÈ

A.- Prov. 31, 10-13.19-20.30-31

Psòm 127, 1-2,3,4,5c,6a

1Tésalonisyin 5, 1-6

Matié 25, 14-30 (oubyin 14-15.19-20)

B.- Danièl 12, 1-3

Psòm 15, 5,8,9-10,1b-11

Ébré 10, 11-14.18

Mark 13,24-32

C.- Malachi 3, 19-20a

Psòm 97, 5-6,7,8,9-10

Tésalonisyin 3, 7-12

Luk 21, 5-19

33èm lindi

I 1 Makabé 1,10-15.41-43.54-57.62-64

Psòm 118, 53,61,134.150,155

II. Apokalips 1, 1-4; 2, 1-5a

Psòm 1, 1-2,3-4a,4b-6

Luk 18, 35-43

33èm madi

I. 2 Makabé 6, 18-31

Psòm 3, 2-3,4-5,6-7

II. Apokalips 3, 1-6.14-22

Psòm 14, 1a,2,3bc-4ab,4d.5

Luk 19, 1-10

33èm mèkrédi

I. 2 Makabé 7, 1.20-31

Psòm 16, 1.2b,5-6,8,15

II. Apokalips 4, 1-11

Psòm 150, 1-2,3-4,5-6

Luk 19, 11-28

33èm jédi

I. 1 Makabé 2, 15-29

Psòm 49, 1-2,5,7ac,14-15

II. Apokalips 5, 1-10

Psòm 149, 1-2,3-4,5-6a,9b

Luk 19, 41-44

33èm vandrédi

I. 1 Makabé 4, 36-37,52-59

1 Kronik 29,10,11abc,11d-12a,12bcd

II. Apokalips 10, 8-11

Psòm 118, 14,24,72,103,111

Luk 19, 45-47

33èm samdi

I. 1 Makabé 6, 1-13

Psòm 9a, 2-3,4,6,16,19

II. Apokalips 11,4-12

Psòm 143, 1-2a,1a,2bcd,9-10

Luk 20, 27-40

Dènié dimanch

FÈT SOLANÈL KRIS-ROUA

A.- Ézékièl 34, 11-12,15-17

Psòm 22, 1-2b,2c-3,4,5,6

1 Korintyin 15, 20-26,28

Matié 25, 31-46

B.- Danièl 7, 13-14

Psòm 92, 1abc,1d-2,5

Apokalips 1, 5-8

Jan 18, 33b-37

C.- 2 Samuèl 5, 1-3

Psòm 121, 1-2,3-4,5-6a,7a

Kolosyin 1, 12-20

Luk 23, 35-43

Dènié lindi

I. Danièl 1, 1-6,8-20

Danièl 3, 52,53,54,55,56

II. Apokalips 14, 1-3,4b-5

Psòm 23, 1-2,3-4ab,5-6

Luk 21, 1-4

Dènié madi

I. Danièl 2, 31-45

Danièl 3, 57-58,59-61

II. Apokalips 14, 14-19

Psòm 95, 10,11-12a,12b-13ab,13bcd

Luk 21, 5-11

Dènié mèkredi

I. Dan. 5, 1-6,13-14,16-17,23-28

Danièl 3, 62-64,65-67

II. Apokalips 15, 1-4

Psòm 97, 1,2-3ab,7-8,9

Luk 21, 12-19

Dènié jédi

I. Danièl 6, 12-28

Danièl 3, 68-70, 71-73,74

II. Apokalips 18, 1-2,21-23; 19, 1-3,9a

Psòm 99, 1-2,3,4,5

Luk 21, 20-28

Dènié vandrédi

I. Danièl 7, 2-14

Danièl 3, 75-77,78,81

II. Apokalips 20,1-4,11—21,2

Psòm 83, 2,3,4,5-6,11

Luk 21, 29-33

Dènié samdi

I. Danièl 7, 15-27

Danièl 3,82-84,85-87

II. Apokalips 22, 1-7

Psòm 94, 1-2,3-5,6-7

Luk 21, 34-36

PRÒP LÉKTI SIN YO

Fèt SOLANEL yo ak fèt yo gin pròp lékti pa yo. Nan Mès Sin yo koté sé mémoua sèlman yo fè, yo ka chouazi soua lékti jou nan sémèn nan, soua lékti Komin yo, ak indikasion spésial ki prezanté isit la.

JANVIÉ

1é: ouè nan Tan Noèl

2 S. Bazil légran ak S. Grégoua Na- zianz (pastè yo)

1 Korintyin 2,10b-16

Psòm 144, 8-9,10-11,12-13ab,13cd-14

Luk 14,25-33

7 S. Rémon (pastè yo). Yo ka pran épit 7 la

13 S. Ilè (pastè yo oubyin doktè yo)

oubyin 1 Jan 2, 18-25

Psòm 109, 1,2-3,4

Jan 10,22-30

17 S. Antoua-n (sin, relijié)

oubyin Matié 19, 16-26

24 Sin Fransoua d-Sal

(pastè yo oubyin doktè yo)

Efézyin 3,14-19

Psòm 33,2-3,4-5,6,9,10-11

25 Fèt Konvèsion Sin Pòl

Travay Apot yo 22, 3-16

oubyin Travay Apot yo 9, 1-22

Psòm 116, 1,2

Mark 16, 15-18

(Minm lékti sa yo pou Mès votiv Sin Pòl la)

26 Sin Timoté ak Tit (pastè yo), sof:

2 Timoté 1, 1-8

oubyin Tit 1, 1-5

Psòm 95, 1-2a,2b-3,7-8a,9-10a

28 Sin Toma d-Akin (pastè yo, doktè yo,

oubyin sin yo, relijié)

Sajès 7,7-10.15-16

Psòm 18b, 8,9,10,11

Matié 23, 8-12

31 Sin Jan Bosko (pastè yo, sin yo, édikaté)

Filipyin 4,4-9

Psòm 33, 2-3,4-5,6,9,10-11

Mark 10, 13-16

FÉVRIYÉ

2 Fèt PREZANTASION GRANMET LA

Malachi 3, 1-4

Psòm 23,7,8,9,10

Ébré 2, 14-18

Luk 2, 22-40 (oubyin 22-32)

6 S. Pòl Miki (mati yo)

oubyin Gal. 2, 19-20 (sin, 2e lekt. 5) épi Mt.

28, 16-20 (past. évanj. 3)

11 Notre-Dam de Lourd (ouè Mari)

oubyin Izayi 66, 10-14c

22 Fèt Sièj Apostolik S. Piè-a

1 Piè 5, 1-4

Psòm 22, 1-2b,2c-3,4,5,6

Matié 16, 13-19

(Minm lékti pou Mès votiv S. Piè)

23 S. Polikarp (mati oubyin pastè)

oubyin Apokalips 2, 8-11

MAS

8 S. Jan de Dié (sin yo).

Yo ka pran Évanjil 10 la

19 S. JOZEF, ÉPOU LA VIEJ MARI

2 Samuèl 7, 4-5a. 12-14a.16

Psòm 88, 2-3,4-5,27,29

Romin 4, 13.16-18.22

Matié 1, 16.18-21.24a

oubyin Luk 2, 41-51a

25 ANONSIASION GRANMET LA

Izayi 7, 10-14

Psòm 39, 7-8a,8b-9,10,11

Ébré 10, 4-10

Luk 1, 26-38

AVRIL

25 Fèt sin Mark

1 Piè 5, 5b-14

Mark 16, 15-20

29 Sint Katri-n de Sièn (vièj yo)
oubyin 1 Jan 1, 5 —2, 2

MÉ

1é S. Jozèf, travayè

Jénèz 1,26—2,3

oubyin Kol. 3, 14-15.17.23-24

Psòm 89, 2,4.12,14.16,17

Matié 13, 54-58

2 S. Atanaz (pastè oubyin doktè yo)

oubyin épit 10 mati yo

oubyin Matié 10, 22-25a

3 Fèt sin Filip ak sin Jak

Luk 1, 57-66.80

1 Korintyin 15, 1-8

Jan 14, 6-14

14 Fèt de sin Matias

Travay Apot yo 1, 15-17.20-26

Jan 15,9-17

20 S. Bèrnardin de Sièn (pastè yo, misionè)

oubyin Travay Apot yo 4, 8-12 (4èm dim. Pak B)

31 Fèt Vizitasion

Sofoni 3, 14-18a

Izayi 12, 2,4b-5a,5b-6

oubyin Romin 12, 9-16b

Luk 1, 39-56

3èm samdi apré Pantkot:

KE IMAKILE MARI (ouè Mari),

Izayi 61, 9-11

1 Samuèl 2, 1,4-5ab,6-7,8abcd

Luk 2, 41-51

JUIN

1é S. Justin (mati yo)

oubyin épit 2 pastè yo)

11 S. Barnabé

Travay Apot yo 11, 21b-26; 13, 1-3

Matié 10, 7-13

22 S. Polin de Nòl (pastè yo) oubyin 2

Korintyin 8, 9-15

24 NESANS S. JAN BATIS

Mès lavèy la :

Jérémi 1, 4-10

Psòm 70, 5-6b,7-8,15ab.17,19.6c

1 Piè 1, 8-12

Luk 1, 5-17

Mès jou-a :

Izayi 49, 1-6

Psòm 138, 1-2.3b,13-14b,14c-15b

Travay Apot yo 13, 22-26

28 S. Irénée (mati yo oubyin doktè yo) oubyin

2 Timoté 2, 22b-26

29 SIN PIE AK SIN POL

Mès la vèy la :

Travay Apot yo 3, 1-10

Psòm 18, 2-3,4-5ab

Galat 1, 11-20

Jan 21, 15-19

Mès jou-a :

Travay Apot yo 12, 1-11

Psòm 33, 2-3,4-5,6-7,8-9

Timoté 4, 6-8.17-18. 1545

Matié 16, 13-19

Pou mès votiv S. Piè, ouè 28 févriyé ; pou S.

Pòl, ouè 25 janvié.

30 Prèmié Mati Ròm yo (mati yo)

Romin 8, 31b-39

Psòm 45, 2-3,5-6,7-8

Matié 24, 4-13

JUIYÈ

3 Fèt sin Toma

Éfézyin 2, 19-22

Jan 20, 24-29

6 S. Maria Goreti (mati yo oubyin vièj yo)

oubyin 1 Korintyin 6, 13b... 20 (2e dim. B)

11 S. Benoua (sin yo, relijié)

oubyin Provèb 2, 1-9

22 S. Mari Madlèn

Kantik 3, 1-4a

oubyin 2 Korintyin 5, 14-17 (12èm dimanch B)

Jan 20, 1-2.11-18

25 Fèt sin Jak

2 Korintyin 4, 7-15

Matié 20, 20-28

26 Sin Joachin ak sint A-n
Sirasid 44, 1.10-15
Matié 13, 16-17

29 S. Mart (sint yo), sof
Jan 11, 19-27
oubyin Luk 10, 38-42

31 S. Ignas de Loyola
(pastè yo oubyin relijié yo)
oubyin 1 Korintyin 10, 31 —11, 1

OUT

1é S. Alfons (pastè oubyin doktè yo)
oubyin Romin 8, 1-4

4 S. Jan-Mari Vianéy (pastè yo)
Yo ka pran prémié lekti 8 la épi Matié 9, 35 —
10, 1

6 TRANSFIGIRASION GRANMET LA
Danièl 7, 9-10.13-14
Psòm 96, 1-2,4-5ac,6.9
Piè 1, 16-19

Évanjil la tankou nan 2èm dim. Karèm

10 Fèt sin Lorán
2 Korintyin 9, 6-10
Jan 12, 24-26

15 ASOMPSION LA VIEJ MARI
Mès lavèy la :
1 Kronik 15, 3-4.15-16; 16, 1-2
Psòm 131, 7-8,9-10,13-14
1 Korintyin 15, 54-57
Luk 11, 27-28

Mès jou-a
Apokalips 11, 19a; 12, 1-6a.10ab
Psòm 44, 11-12a,12b-13,14-15a,15b-16
1 Korintyin 15, 20-26
Luk 1, 39-56

19 S. Jan Eud (pastè oubyin sin yo)
Yo ka pran épit 7 sin yo.

21 S. Pi X (pastè yo, pap)
Yo ka pran épit 10 la

22 Mari, rèn (ouè Mari) Yo ka pran prémié
lekti 8 la ak évanjil 4 la

24 Fèt sin Bartèlmi

Apokalips 21, 9b-14
Jan 1, 45-51

27 S. Monik (Sint yo)
Yo ka pran prémié lékti 14 la
oubyin Luk 7, 11-17

28 S. Ogustin
Épit sin yo 16
Évanjil doktè yo 2

29 Mati S. Jan Batis
Jérémi 1, 17-19
Mark 6, 17-29

SEPTANM

2 Byinnéré Jak Jul Bono ak konpagnon-l yo
(mati yo)
1 Piè 3,14-17
Psòm 125, 1-2ab,2cd-3,4-5,6
Jan 15,18-21

8 Fèt Nésans lavièj Mari
Miché 5, 1-4a
oubyin Romin 8, 28-30
Matié 1, 1-16.18-23 (oubyin 18-23)

14 Fèt EGZALTASION LA SINT KOUA
Nonb 21, 4-9
Psòm 77,3-4ac,34-35,36-37,38ab-39
Filipyin 2, 6-11
Jan 3, 13-17

15 Mari Notre-Dam doulè yo
Ébré 5, 7-9
Psòm 30, 2-3a,3bc-4,5-6,15-16,20
Jan 19, 25-27
oubyin Luk 2, 33-35

21 Fèt sin Matié
Éfézyin 4, 1-7.11-13
Matié 9, 9-13

27 S. Vinsan d-Pòl (pastè yo, misionè oubyin
sin aktif)
Yo ka pran épit 2 sin yo

29 Fèt Arkanj yo ki sin
Danièl 7, 9-10.13-14
oubyin Apokalips 12, 7-12a
Jan 1, 47-51

30 S. Jéròm (dokte oubyin pastè yo)
oubyin 2 Timoté 3, 14-17

OKTÒB

1é S. Térèz de l'anfan Jézu
(vièj yo, oubyin Sint yo, rélijjié)
oubyin premié lékti 11 févriyé
Évanjil 6 Sint yo

2 Sin Anj Gadyin yo
Égzòd 23, 20-23
Matié 18, 1-5.10

4 S. Fransoua d'Asiz (sin yo, rélijjié)
oubyin Galat 6, 14-18
Évanjil 3 sin yo

7 Notre-Dam Rozè-a (ouè Mari) Yo ka pran
Évanjil 3 a

15 S. Térèz d'Avila (vièj oubyin Sint yo,
rélijjiéz)
oubyin Romin 8, 22-27

16 S. Margérit (vièj oubyin sint yo, rélijjiéz) Yo
ka pran épit 7 la

17 S. Ignas d'Antiòch
(mati yo oubyin pastè yo)
oubyin Filipyin 3, 17 — 4, 1
Évanjil 5 mati yo

18 Fèt sin Luk
2 Timoté 4, 9-17a
Luk 10, 1-9

19 S. Pòl de la Koua (pastè yo, sitou épit 2 a,
oubyin sin yo, rélijjié)

28 Fèt sin Simon ak sin Jud
Éfézyin 2, 19-22
Luk 6, 12-16
Minm lékti pou Mès votiv Apot yo.

NOVANM

1é TOUT SIN YO
Apokalips 7, 2-4.9-14
Psòm 23, 1-2,3-4ab,5-6
1 Jan 3, 1-3
Matié 5, 1-12a

2 Tout fidèl défin yo
Ouè lékti pou Défin yo

9 Dédikas Bazilik Latran-an
Égzòd 47,1-2.8-9.12
Psòm 45, 2-3,5-6,8-9a.10a
1 Korintyin 3,9b-11,16-17
Jan 2,13-22

11 S. Martin (pastè yo, oubyin sin yo, rélijjié)
oubyin Évanjil 10 sin yo

18 Dédikas bazilik sin Piè ak sin Pòl
Travay Apot yo 28, 11-16.30-31
Matié 14, 22-33

21 Prézantasion la Trè Sint Vièj
Zakari 2,14-17
Psòm 44,11-12a,12b-13,14-15a,15b-16
Matié 12,46-50

30 Fèt sin André
Romin 10, 9-18
Matié 4, 18-22

DÉSANM

3 S. Fransoua Xavié
(pastè yo, misionè)
Yo ka pran épit 4 la ak Évanjil 5 la

4 S. Jan de Damas
(pastè yo oubyin dokte yo)
Yo ka pran épit 11 pastè yo

8 IMAKILE KONSEPSION MARI
Jénèz 3, 9-15.20
Psòm 97, 1,2-3ab,3c-4
Éfézyin 1, 3-6.11-12
Luk 1, 26-38

15 S. Jan de la Koua
(pastè yo oubyin dokte yo)
Yo ka pran épit 2 dokte yo

26 Fèt sint Étièn
Travay Apot yo 6, 8-10; 7, 54-59
Psòm 30, 3bc.4b,6.8a.9b,17.20cd
Matié 10, 17-22

27 Fèt sin Jan
1 Jan 1, 1-4
Psòm 96, 1-2,5-6,11-12
Jan 20, 2-8 oubyin Jan 21,20-24

28 Fèt sin Inosan yo
1 Jan 1, 5 — 2, 2

Psòm 123, 2-3,4-5,6a,7b-8
Matié 2, 13-18

* * *

LEKTI KOMIN YO

DÉDIKAS YON ÉGLIZ

Prémié lékti an déyò Tan Pak

1. Jénèz 28, 11-18
2. 1 Roua 8, 22-23.27-30
3. 2 Kronik 5, 6-10.13 — 6, 2 447
4. 1 Makabé 4, 52-59
5. Izayi 56, 1,6-7
6. Ézékièl 43, 1-2.4-7a

Prémié lékti nan Tan Pak

1. Travay Apot yo 7, 44-50
2. Apokalips 8, 3-4
3. Apokalips 21, 1-5a
4. Apokalips 21, 9b-14

Psòm 45, 2-3,5-6,7-8

Psòm 83, 3,4,5-6a,8a,11cd

Psòm 94, 1-2,3-5,6-7

Psòm 121, 1-2,3-4a,4b-5,6-7,8-9

1 Kronik 29, 10, 11abc, 11d-12a, 12bcd

Dézièm lékti

1. 1 Korintyin 3, 9b-13.16-17
2. Éfézyin 2, 19-22
3. Ébré 12, 18-19.22-24
4. 1 Piè 2, 4-9

Évanjil

1. Matié 5, 23-24
2. Luk 19, 1-10
3. Jan 2, 13-22
4. Jan 4, 19-24

MARI KI VIÈJ

Prémié lékti an déyò Tan Pak

1. Jénèz 3, 9-15.20
2. Jénèz 12, 1-7
3. 2 Samuèl 7, 1-5.8b-11.16
4. 1 Chron. 15, 3-4.15-16; 16, 1-2

5. Proverbes 8, 22-31
6. Sirasid 24, 1-2.5-7.12-16.26-30
7. Izayi 7, 10-14
8. Izayi 9, 1-6
9. Izayi 61, 9-11
10. Miché 5, 1-4a
11. Zakari 2, 14-17

Prémié lékti nan Tan Pak

1. Travay Apot yo 1, 12-14
2. Apoc. 11, 19a; 12, 1-6.10ab
3. Apokalips 21, 1-5a

Psòm 44, 11-12a,12b-13,14-15a,15b-16

Psòm 112, 1-2,3-4,5-6,7-8

1 Samuèl 2, 1,4-5b,6-7,8abcd

Luk 1, 46-47,4849,50-51,52-53,54-55

Judit 13, 18bcd,19,20

Dézièm lékti

1. Rom 5, 12.17-19
2. Rom 8, 28-30
3. Galat 4, 4-7
4. Éfézyin 1, 3-6.11-12

Évanjil

1. Mt. 1, 1-16.18-23 (oubyin 18-23)
2. Matié 2, 13-15.19-23
3. Luk 1, 26-38
4. Luk 1, 39-47
5. Luk 2, 1-14
6. Luk 2, 15b-19
7. Luk 2, 27-35
8. Luk 2, 41-52
9. Luk 11,27-28
10. Jan 2, 1-11
11. Jan 19, 25-27

MATI YO

Prémié lékti an déyò Tan Pak

1. 2 Kronik 24, 18-22
2. 2 Makabé 6, 18.21.24-31
3. 2 Makabé 7, 1-2.9-14
4. 2 Makabé 7, 1.20-23.27b-29
5. Sajès 3, 1-9
6. Sirasid 51, 1-12

Prémié lékti nan Tan Pak

1. Travay Apot yo 7, 55-60
2. Apokalips 7, 9-17
3. Apokalips 12, 10-12a
4. Apokalips 21, 5-7

*Psòm 30, 3bc-5,6,8,16-17**Psòm 33, 2-3,4-5,6-7,8-9,10-11**Psòm 123, 2-3,4-5,6a,7b-8**Psòm 125, 1-2ab,2cd-3,4-5,6*

Dézièm lékti

1. Romin 5, 1-5
2. Romin 8, 31b-39
3. 2 Korintyin 4, 7-15
4. Korintyin 6, 4-10
5. 2 Timoté 2, 8-13; 3, 10-12
6. Ébré 10, 32-36
7. Jak 1, 2-4.12
8. 1 Piè 3, 14-17
9. 1 Piè 4, 12-19
10. 1 Jan 5, 1-5

Évanjil

1. Matié 10, 17-22
2. Matié 10, 28-33
3. Matié 10, 34-39
4. Luk 9, 23-26
5. Jan 12, 24-26
6. Jan 15, 18-21
7. Jan 17, 11b-19

PASTÈ YO

Prémié lékti an déyò Tan Pak

1. Égzòd 32, 7-14
2. Détéronòm 10, 8-9

3. 1 Samuèl 16, 1b.6-13a

3. Izayi 6, 1-8

4. Izayi 52, 7-10 (misionè yo)

5. Izayi 61, 1-3a

6. Jérémi 1, 4-9

7. Ézékièl 3, 16-21

8. Ézékièl 34, 11-16

Prémié lékti nan Tan Pak

1. Travay Apot yo 13,46-49 (misionè yo)
2. Travay Apot yo 20, 17-18a.28-32.36
3. Travay Apot yo 26,19-23 (misionè yo)

*Psòm 15, 1-2,7-8,5a-11**Psòm 22, 1-2b,2c-3,4,5,6**Psòm 39, 2-4b,7-8a,8b-9,10**Psòm 88, 2-3,6-7,16-17**Psòm 95, 1-2a,2b-3,7-8,10**Psòm 109, 1,2,3,4**Psòm 116, 1,2*

Dézièm lékti

1. Romin 12, 3-13
2. 1 Korintyin 1, 18-25 (misionè yo)
3. 1 Korintyin 4, 1-5
4. 1 Korintyin 9, 16-19.22-23
5. 2 Korintyin 3, 1-6a
6. 2 Korintyin 4, 1-2.5-7
7. 2 Korintyin 5, 14-20
8. Éfézyin 4, 1-7.11-13
9. Kolosyin 1, 24-29
10. 1 Tésalonisyin 2, 2b-8
11. 2 Timoté 1, 13-14; 2, 1-3
12. 2 Timoté 4, 1-5
13. 1 Piè 5, 1-4

Évanjil

1. Matié 16, 13-19 (Pap)
2. Matié 23, 8-12
3. Matié. 28, 16-20 (misionè yo)
4. Mark 1, 14-20
5. Mark 16,15-20 (misionè yo)
6. Luk 5, 1-11 (misionè yo)
7. Luk 10, 1-9
8. Luk 22, 24-30
9. Jan 10, 11-16

10. Jan 15, 9-17
11. Jan 21, 15-17 (Pap)

DOKTÈ YO

Prémié lékti an déyò Tan Pak

- 1 Roua 3, 11-14
- 2 Sajès 7, 7-10.15-16
- 3 Sirasid 15, 1-6
- 4 Sirasid 39, 8-14

Prémié lékti nan Tan Pak

- 1 Trav. Apot yo 2, 14a. 22-24.32-36
- 2 Travay Apot yo 13, 26-33

Psòm 18, 8,9,10,11

Psòm 36, 3-4,5-6,30-31

Psòm 118, 9-10,11-12,13-14

Dézièm lékti

- 1 1 Korintyin 1, 18-25
- 2 1 Korintyin 2, 1-10a
- 3 1 Korintyin 2, 10b-16
- 4 Éfézyin 3, 8-12
- 5, 6 ak 7: ouè Pastè yo 8, 11 ak 12

Évanjil

1. Matié 5, 13-16
2. Matié 23, 8-12
3. Mark 4, 1-10.13-20 (oubyin 1-9)

VIÈJ YO

Prémié lékti an déyò Tan Pak

1. Kantik 8, 6-7
2. Ozé 2, 16b. 17b. 21-22

Prémié lékti nan Tan Pak

1. Apokalips 19, 1.5-9a
2. Apokalips 21, 1-5a

Psòm 44, 11-12,14-15a,15b-16,17

Psòm 148, 1-2,7a.11a.12,13-14a

Dézièm lékti

1. 1 Korintyin 7, 25-35
2. 2 Korintyin 10, 17 — 11, 2

Évanjil tankou pou Sint yo 7, 8 ak 16

SIN YO AK SINT YO

Prémié lékti an déyò Tan Pak

1. Jénèz 12, 1-4a
2. Lévitik 19, 1-2.17-18
3. Détéronòm 6, 3-9
4. Détéronòm 10, 8-9 (rèlijyé yo)
5. 1 Roua 19, 4-9a.11-15a (rèlijyé yo)
6. 1 Roua 19, 16b.19-21 (rèlijyé yo)
7. Tobi 8, 5-10 (Vulgat)
8. Tobi 12, 6-13 (Vg) (vi aktif yo)
9. Judith 8, 2-8 (vèy yo)
10. Éstè 13, 8-14.17 (= 4, 17a-e.h)
11. Prov. 31, 10-13.19-20.30-31
12. Sirasid 2, 7-13
13. Sirasid 3, 19-26
14. Sirasid 26, 1-4.16-21
15. Izayi 58, 6-11 (vi aktif yo)
16. Jérémi 20, 7-9
17. Miché 6, 6-8
18. Sofoni 2, 3; 3, 12-13

Prémié lékti nan Tan Pak

1. Travay Apot yo 4, 32-35 (rèlijyé yo)
2. Apokalips 3, 14b.20-22
3. Apokalips 19, 1.5-9a
4. Apokalips 21, 5-7

Psòm 1, 1-2,3-4a,4b-6

Psòm 14, 2-3,4bcd,5

Psòm 15, 1-2,7-8,5a,11

Psòm 22, 1-2b,2c-3,4,5,6

Psòm 33, 2-3,4-5,6,9,10-11

Psòm 102, 1-2,3-4,8-9,13-1717-18a

Psòm 111, 1.2b,3b-4,5-6a,7-8a,9

Psòm 127, 1-2,3,5-6a

Psòm 130, 1,2,3

Dézièm lékti

1. Romin 8, 26-30
2. 1 Korintyin 1, 26-31
3. 1 Korintyin 12, 31 — 13, 13 (oubyin 13, 4-13)
4. 2 Korintyin 10, 17 — 11, 2
5. Galat 2, 19-20
6. Galat 6, 14-16
- 7.Éfézyin 3, 14-19

8. Éfézyin 6, 10-13.18
9. Filipyin 3, 8-14
10. Filipyin 4, 4-9
11. 1 Timoté 5, 3-10 (vèy yo)
12. Jak 2, 14-17
13. 1 Piè 3, 1-9
14. 1 Piè 4, 7b-11
15. 1 Jan 3, 14-18 (vi aktif yo)
16. 1 Jan 4, 7-16
17. 1 Jan 5, 1-5

Évanjil

1. Matié 5, 1-12a
2. Matié 5, 13-16
3. Matié 11, 25-30
4. Matié 13, 44-46
5. Matié 16, 24-27
6. Matié 18, 1-4

7. Matié 19, 3-12 (rélizé yo)
8. Matié 25, 1-13
9. Matié 25, 14-30 (oubyin 14-23)
10. Matié 25, 31-46 (oubyin 31-40) (vi aktif yo)
11. Mark 3, 31-35
12. Mark 9, 34-37 (édikatè yo)
13. Mark 10, 13-16 (édikatè yo)
14. Mark 10, 17-30 (oubyin 17-27) (rélizé yo)
15. Luk 9, 57-62 (rélizé yo)
16. Luk 10, 38-42
17. Luk 12, 32-34 (rélizé yo)
18. Luk 12, 35-40
19. Luk 14, 25-33 (rélizé yo)
20. Jan 15, 1-8
21. Jan 15, 9-17
22. Jan 17, 20-26

* * *

LÉKTI NAN MÈS POU SAKRÉMAN YO

KATÉKIMÉNA

POU ADMISION YON KATEKIMEN

Prémié lékti: Sin yo an déyò Tan Pak, 1.
Évanjil: 2èm dimanch B

NAN DIFERAN ETAP PREPARASION

POU BATEM NAN

Lékti dimanch Karèm yo, Ané A

LE Y-AP RINMET SINBOL LAFOUA-A

(« CREDO »-A)

Détéronòm 6, 1-7

Dézièm lékti ochoua:

1é dimanch Karèm C

oubyin 1 Korintyin 15, 1-8a

(oubyin 1-4)

Évanjil ochoua: Matié. 16, 13-18

oubyin Jn. 12, 44-50 (4èm mèkrédi Pak)

LE Y-AP RINMET PRIYE GRANMET LA

(« PAPA NOU »-AN)

Prémié lékti: Ozé 11 (Sakré-Kè B)

Ochoua: Romin 8, 14-17.26-27

oubyin Galat 4, 4-7 (ouè Mari 3)
Luk 11, 1-2a; Mt. 6,9b-13

POU DENIE PREPARASION-AN

Mark 7, 31-37 (23èm dimanch B)

BATEM GRANMOUN

PANDAN VEYE FET PAK LA, an plis lékti Égzòd
(3) la, chouazi Izayi (5) ak Ézékièl (7).

AN DEYO VEYE FET PAK LA

Lékti Ansyin Téstaman Vyéy-a oubyin :

1. Jénèz 15, 1-6.18a

2. Jénèz 17, 1-8

3. Jénèz 35, 1-4.6-7a

4. Deut. 30, 15-20 (jédi apré Sann yo)

5. Jozué 24, 1-2a.15-17.18b-25a

6. 2 Roua 5, 9-15a

7. Izayi 44, 1-3

8. Jér. 31, 31-34 (5e dim. Karèm B)

9. Ézékièl 36, 24-28

Psòm 8,2-3, 4-5,6-7,8-9

Psòm 22, 1-2a,2b-3,4,5,6

Psòm 26, 1,4,8-9,13-14

Psòm 31, 1-2,5,6-7,10-11

Psòm 33, 2-3,4-5,6-7,8-9,10-11

Psòm 41, 2,3 ak 42, 3,4

Psòm 50, 3-4,8-9,12-13,14,17

Psòm 62, 2,3-4,5-6,7,9

Psòm 65, 1-3,5-6,8-9,16,17

Psòm 88, 2-3, 16-17,20-21,25,27

Psòm 125, 1-2a,2b-3,4-5,6

Lékti Nouvo Tèstaman-an

1. Trav. Apot yo 2, 14a.36-40a.41-42
2. Travay Apot yo 8, 26-38
3. Rom. 6, 3-11 (oubyin 3-4.8-11)
4. Romin, 8, 28-32.35.37-39
5. 1 Korintyin 12, 12-13
6. Galat 3, 26-28
7. Éfézyin 1, 3-10.13-14
8. Éfézyin 4, 1-6 (17èm dimanch B)
9. Kolosyin 3, 9b-17
10. Tit 3, 4-7 (matin Noèl)
11. Ébré 10, 22-25
12. 1 Piè 2, 4-5.9-10
13. Apok. 19, 1.5-9a (Sin yo TP 3)

Évanjil

1. Mt. 16, 24-27 (Sin yo 5)
2. Matié 28, 18-20
3. Mark 1,9-11
4. Mark 10, 13-16 (Sin yo 13)
5. Mark 16, 15-16.19-20
6. Luk 24, 44-53
7. Jan 1, 1-5.9-14.16-18
8. Jan 1, 29-34 (2èm dimanch A)
9. Jan 3, 1-6
10. Jan 3, 16-21 (3èm mèkrédi Pak)
11. Jan 12, 44-50 (4èm mèkrédi Pak)
12. Jan 15, 1-11

BATEM TIMOUN

Lékti Ansyin Tèstaman-an

1. Égzòd. 17, 3-7 (3èm dim. Kar. A)
2. Ézékièl. 36, 24-28 (granmoun 9)
3. Ézékièl 47, 1-9.12 (madi 4èm sémèn Karèm)

Lékti Nouvo Tèstaman-an

1. Romin 6, 3-5

2. Romin 8, 28-32

Yo ka pran lékti 5,6, 8 ak 12 pou batèm granmoun yo tou.

Évanjil

1. Matié 22, 35-40
- 2,3 ak 4 tankou pou granmoun yo
- 5.Mark 12, 28b-34 (oubyin 28b-31)
6. Jan 3, 1-6 (granmoun yo 9)
7. Jan 4, 5-14
8. Jan 6, 44-47
9. Jan 7, 37b-39a
10. Jan 9, 1-7
11. Jan 15, 1-11 (granmoun yo 12)
12. Jan 19, 31-35

Pou résévoua moun ki batizé déjà nan lòt kominoté eklézial yo pou vi-n antré nan kominion an plin avèk Égliz la :
Chouazi pami lékti Mès jou-a oubyin Mès pou Krétyin yo fè youn nan, oubyin pou Batèm Granmoun yo.

Pou premié Kominion :

Chouazi pami lékti Mès jou-a, Mès Batèm Granmoun yo oubyin Mès votiv Sin-Sakrèman-an.

POU KONFIMASION

Lékti Ansyin Tèstaman-an

1. Izayi 11, 1-4a
2. Izayi 42, 1-3
3. Izayi 61, 1-3a.6a.8b-9
4. Éz. 36, 24-28 (batèm granmoun 9)
5. Joèl 2, 23a; 3, 1-3a

Psòm 21, 23-24,26-27,28-29,31-32

Psòm 22, 1-2a,2b-3,4,5,6

Psòm 95, 1-2a,2b-3,9-10a

Psòm 103, 1.24ac,27-28,30-31

Psòm 116, 1,2

Psòm 144, 2-3, 4-5, 8-9, 10-11, 15-16, 21

Lékti Nouvo Tèstaman-an

1. Travay Apot yo 1, 3-8
2. Travay Apot yo 2, 1-6.14.22b-23.32-33
3. Travay Apot yo 8, 1.4.14-17

4. Travay Apot yo 10, 1.33-34a.37-40
5. Travay Apot yo 19, lb-6a
6. Rom. 5, 1-2.5-8 (3èm dim. Kar. A)
7. Rom. 8, 14-17 (S. Trinité B)
8. Rom. 8, 26-27 (16èm dimanch A)
9. 1 Korintyin 12, 4-13
10. Galat 5, 16-17.22-23a.24-25
11. Éfézyin 1, 3a.4a. 13-19a
12. Éph. 4, 1-6 (17èm dimanch B)

Évanjil

- 1, 2 ak 3: ouè Sin yo 1, 5 ak 9
4. Mark 1, 9-11 (Batèm granmoun 3)
5. Luk 4, 16-22a
6. Luk 8, 4-10a.11b-15
7. Luk 10, 21-24 (1é madi Avan)
8. Jan 7, 37b-39
9. Jan 14, 15-17
10. Jan 14, 23-26
- II. Jan 15, 18-21.22-27
12. Jan 16, 5-7.12-13a

POU ÒDINASON YO

Lékti Ansyin Téstaman-an

1. Nonb 3, 5-9 (diak yo)
2. Nonb 11, 11b-12.14-17.24-25a (pou pè yo)
3. Izayi. 61, 1-3a (Pastè yo 6) (pou prèt yo ak évèk yo)
4. Jérémi 1, 4-9 (Pastè yo 7)

Psòm 18, 8,9,10,11

Psòm 118, 1,9,10-11,12-13,15-16

Psòm 147, 12,14,15-16,17-18,19-20

Lékti Nouvo Téstaman-an

- 1.Travay Apot yo 6, 1-7a (diak yo)
2. Trav. Apot yo 8, 26-40 (diak) (3èm jédi Tan Pak)
3. Travay Apot yo 10, 37-43
4. Travay Apot yo 20 (évèk yo ak prèt yo) (Pastè yo Tan Pak 2)
5. Romin 12, 4-8
6. 7 ak 8 tankou pou Pastè yo
9. 1 Timoté 3, 8-13 (diak yo)

10. 1 Timoté 4, 12-16 (oubyin 12b-16, pou évèk yo)
11. 2 Timoté 1, 6-14 (évèk yo)
12. Ébré 5, 1-10 (2èm lindi I)
13. 1 Piè 4, 7b-11 (Sin yo 14)
14. 1 Piè 5, 1-4 (Pastè yo 13)

Évanjil

1. Mt. 5, 13-16 (Sin yo 2)
2. Matié 9, 35-38
3. Matié 10, 1-5a
4. Matié 20, 25-28
5. Luk 10, 1-9 (Pastè yo 7)
6. Luk 12, 35-44
7. Luk 22, 14-20.24-30
8. Jan 10, 11-16 (Pastè yo 9)
9. Jan 12, 24-26 (Mati yo 5)
10. Jan 15, 9-17 (Pastè yo 10)
11. Jan 17, 6.14-19
12. Jan 20, 19-23 (Pantkot, jou)
13. Jan 21, 15-17 (Pastè yo 11)

POU MARIAJ

Lékti Ansyin Téstaman-an

1. Jénèz 1, 26-28.31a
2. Jénèz 2, 18-24 (27èm dimanch B)
3. Jénèz 24, 48-51.58-67
4. Tobi 7, 9c-10.11e-17 (Vulgat)
5. Tob. 8, 5-10 Vg. (Sin yo an déyò Tan Pak 7)
6. Kantik 2, 8-10.14.16a; 8, 6-7a
7. Sirasid 26, 1-4.16-21 (Sin yo 14)
8. Jérémi 31, 31-32a.33-34a

Psòm 32, 12-13,18,20,21-22

Psòm 33, 2-3,4-5,6-7,8-9

Psòm 102, 1-2,8,13,27-28

Psòm 127, 1-2,3,4-5

Psòm 144, 8-9,10-11,17-18

Psòm 148, 1-2,3-4,11-12,13-14

Lékti Nouvo Téstaman-an

1. Romin 8, 31b-35.37-39
2. Romin 12, 1-2.9-18 (1-2.9-13)

3. 1 Korintyin 6, 13b-15a. 17-20 (2èm dimanch B)
4. 1 Korintyin 12, 31 — 13, 8a
5. Éph. 5, 2a.21-33 (2a.25-32)
6. Kolosyin 3, 12-17 (23èm jédi I)
7. 1 Piè 3, 1-9 (Sin yo 13)
8. 1 Jan 3, 18-24 (5èm dim. Pak B)
9. 1 Jan 4, 7-12
10. Apok. 19, 1.5-9a (Sin yo T.Pak 3)

Évanjil

- 1 ak 2 Matié.5 (Sin yo 1 ak 2)
3. Mt. 7, 21.24-29 (21.24-25)
4. Matié 19, 3-6
5. Mt. 22, 35-40 (Batèm timoun 1)
6. Mark 10, 6-9
7. Jan 2, 1-11 (ouè Mari 10)
8. Jan 15, 9-12
9. Jan 15, 12-16
10. Jan 17, 20-26 (oubyin 20-23)

POU BENEDIKSION
ABE YON MONASTE

Lékti Ansyin Téstaman-an

1. Provèb 2, 1-9 (11 juiyè S. Bénoua)
2. Provèb 4, 7-13

Lékti Nouvo Téstaman-an

1. Travay Apot yo 2, 42-47 (2èm dimanch Pak A)
2. Éfézyin 4, 1-6 (17èm dimanch B)
3. Kolosyin 3, 12-17 (23èm jédi I)
4. Ébré 13, 1-2.7-8.17-18
5. 1 Piè 5, 1-4 (Pastè yo 13)

Évanjil

1. Matié 23, 8-12 (Pastè 2)
2. Luk 12, 35-44 (Ôdinasion 6)
3. Luk 22, 24-27

KONSEKRASION VIEJ YO

PROFESION RELIJE (ANGAJMAN VE YO)

Lékti Ansyin Téstaman-an

1. Jénèz 12, 1-4a (Sin yo 1)
2. 1 Samuèl 3, 1-10
- 3 ak 4. 1 Roua 19 (Sin yo 5 ak 6)

5. Kantik 2, 8-14 (21 désanm)
6. Kantik 8, 6-7 (Vièj yo 1)
7. Izayi 61, 9-11 (ouè Mari 9)
8. Ozé 2, 16.21-22

*Psòm 23, 1-2,3-4ab,5-6**Psòm 26, 4,5,8b-9c,9d.11**Psòm 32, 2-3, 4-5, 11-12, 13-14, 18-19, 20-21**Psòm 33, 2-3,4-5,6-7,8-9**Psòm 33, 10-11,12-13,14-15,17-19**Psòm 39, 2,4ab, 7-8a, 8b-9,10,12**Psòm 44, 11-12,14-15, 16-17**Psòm 62, 2,3-4,5-6,8-9**Psòm 83, 3,4,5-6a,11,12**Psòm 99, 2,3,4,5*

Lékti Nouvo Téstaman-an

1. Travay Apot yo 2, 42-47 (2èm dimanch Pak A)
2. Travay Apot yo. 4, 32-35 (Sin yo nan Tan Pak 1)
3. Romin 6, 3-11 (Veyé Fèt Pak la)
4. Romin 12, 1-13
5. 1 Korintyin 1, 22-31
6. 1 Korintyin 7, 25-35 (Vièj yo 1)
7. Éfézyin 1, 3-14 (15èm dimanch B)
8. Filipyin 2, 1-4 (31èm lindi II)
9. Phil. 3, 8-14 (5e dim. karèm C)
10. Kolosyin 3, 1-4 (Jou Pak)
11. Kolosyin 3, 12-17 (23èm jédi I)
12. 1 Tésalonisyin 4, 1-3a.7-12
13. 1 Piè 1, 3-9 (2èm dim. Pak A)
14. 1 Jan 4, 7-16 (Sakré-Kè A)
15. Apokalips 3, 14b.20-22 (Sin yo Tan Pak 2)
16. Apokalips 22 (7èm dim. Pak C)

Évanjil

- 1, 2 ak 3: ouè Sin yo 3, 5 ak 7
4. Matié 19, 16-26 (17 janviè)
- 5 ak 6: ouè Sin yo 8 ak 11
7. Mark 10, 24b-30
- 8 ak 9: ouè Sin yo 15 ak 16
10. Luk 11, 27-28 (ouè Mari 9)
11. Jan 12, 24-26 (Maté yo 5)
- 12, 13 ak 14: ouè Sin yo 20, 21 ak 22

POU DEFIN YO

Lékti Ansyin Téstaman-an

1. Job 19, 1.23-27a
2. Sajès 3, 1-9 (oubyin 1-6.9)
3. Sajès 4, 7-15
4. Izayi 25, 6a.7-9
5. Lamantasyon 3, 17-26
6. Danièl 12, 1-3 (33èm dimanch B)
7. 2 Makabé 12, 43-46

Psòm 4, 2,7,9

Psòm 15, 1-2,5-6,9-10,11

Psòm 22, 1-2a,2b-3,4,5,6

Psòm 24, 6-7bc,17-18,20-21

Psòm 26, 1,4,7,9,13bc-14bc

Psòm 30, 2ac.3ab,4,6,17-18,23,24

Psòm 33, 5-6,18-19,20,23

Psòm 41, 2,3,6

Psòm 62, 2,3-4,5,9

Psòm 85, 1-2bc,5-6,3,7,15bd-16

Psòm 102, 8,10,13-14,15-16,17ab.18

Psòm 115, 10-11,15-16ac

Psòm 121, 1-2,4,6-7,8-9

Psòm 129, 1-2,3-4,5,6-7,8

Psòm 142, 1-2,5-6a, 7ab.8ab,10

Lékti Nouvo Téstaman-an

1. Travay Apot yo 10, 34-43 (oubyin 34-36.42-43)
2. Romin 5, 5-11
3. Romin 5, 17-21
4. Romin 6, 3-9 (oubyin 3-4.8-9)
5. Romin 8, 14-23
6. Romin 8, 31b-35.37-39
7. Romin 14, 7-9.10b-12
8. 1 Korintyin 15, 20-24a.25-28 (oubyin 20-23)
9. 1 Korintyin 15, 51-57
10. 2 Korintyin 5, 1.6-10
11. Filipyin 3, 20-21
12. 1 Tésalonisyin 4, 13-18 (32èm dimanch A)
13. 2 Timoté 8-13 (28èm dimanch C)
14. 1 Jan 3, 1-2 (4èm dim. Pak B)
15. 1 Jan 3, 14-16
16. Apokalips 14, 13
17. Apokalips 20, 11 — 21, 1
18. Apokalips 21, 1-5a.6b-7

Évanjil

- 1, 2, 3 ak 4: ouè Sin yo 1, 3, 8 et 10
5. Mark 15, 33-39; 16, 1-6 (oubyin 15, 33-39)
6. Luk 7, 11-17 (10èm dimanch C)
7. Luk 12, 35-40 (Sin yo 18)
8. Luk 23, 33.39-43
9. Luk 23, 44-49; 24, 1-6a (oubyin 23, 44-49)
10. Luk 24, 13-35 (13-16.28-35)
11. Jan 6, 37-40
12. Jan 6, 51-58 (20èm dimanch B)
13. Jan 11, 17-27 (oubyin 21-27)
14. Jan 11, 32-45
15. Jan 12, 23-28 (oubyin 23-26)
16. Jan 14, 1-6
17. Jan 17, 24-26

POU ANTÈMAN

YON TIMOUN KI BATIZÈ

Nan Ansyin Téstaman-an yo va chouazi lékti 4 oubyin 5 pi ro-a.

Psòm 22, 1-2a,2b-3,4,5,6

Psòm 24, 4-5,6-7,17.20

(oubyin 20-21)

Psòm 41, 2,3,6 ; 42, 3,4

Psòm 148, 1-2,12-13ab,13c-14

Lékti Nouvo Téstaman-an

1. Romin 6, 3-4.8-9 (pi ro 4)
2. Romin 14, 7-9 (pi ro, kòmansman 7)
3. 1 Korintyin 15, 20-23 (pi ro 8)
4. Éfézyin 1, 3-5
5. 1 Tésalonisyin 4, 13-14.18
6. Apokalips 7, 9-10.15-17
7. Apokalips 21, 1a.3-5a

Évanjil

1. Matié 11, 25-30 (Sin yo 3)
2. Jan 6, 37-40 (oubyin 37-39)
3. Jan 6, 51-58 (20èm dimanch B) (pou yon timoun ki té déjà résevoua Ékaristi-a)
4. Jan 11, 32-38.40

POU YON TIMOUN KI POT KO BATIZE

Prémié lékti Ansyin Téstaman-an tankou pi ro-a.
Mark 15, 33-46

POU DIVÈS SIKONSTANS

POU ELEKSION PAP LA

Psòm 122, 1-2a,2bcd

Izayi 61, 1-3a (Pastè yo 6)
Éfézyin 4, 11-16
oubyin: Ébré 5, 1-10 (2èm lindi I)
Jan 15, 9-17 (Pastè yo 10)
oubyin: Jan 17, 11b. 17-23

Évanjil

1. Matié 16, 13-19
2. Matié 18, 15-20
3. Matié 28, 16-20
4. Jan 15, 1-8
5. Jan 17, 11b-17-23
6. Jan 21, 15-17

POU PAP LA OUBYIN YON ÉVEK

Chouazi nan Komin Pastè yo

POU VOKASION YO

POU ÉGLIZ LA

Lékti Ansyin Téstaman-an

Lékti Ansyin Téstaman-an
1. Izayi 56, 1.6-7
2. Izayi 60, 1-6
3. Ézékièl 34, 11-16
4. Ozé 2, 16b.17b.21-22
5. Sofoni 3, 14-18a

1. Jénèz 12, 1-4a (Sin yo 1)
2. Égzòd 3, 1-6.9-12 (15èm mèkredi I)
3. 1 Samuèl 3, 1-10 (Profèsion 2)
4. 1 Roua 19, 16b. 19-21 (Sin yo 6)
5. Izayi 6, 6-8
6. Jérèmi 1, 4-9 (Pastè yo 7)
7. Jérèmi 20, 7-9 (Sin yo 16)

Lékti Nouvo Téstaman-an

1. Travay Apot yo 2,42-47
2. 1 Korintyin 3,9b-11
3. Éfézyin 1,3-14
4. Éfézyin 2, 19-22
5. 1 Piè 2,4-9
6. Apokalips 7,2-4.9-14
7. Apokalips 21, 1-5a
8. Apokalips 21, 9b-14

*Psòm 15, 1-2,7-8,5a,11**Psòm 26, 1,2,3**Psòm 39, 2,4ab,7-8a,8b-9,10**Psòm 83, 2-3,5,8,11cdef,12*

Lékti Nouvo Téstaman-an

1. 2 Korintyin 5, 14-20 (Pastè yo 7)
2. Filipyin 3, 8-14 (Sin yo 9)
3. Ébré 5, 1-10 (2èm lindi I)

Évanjil

Psòm 18, 2-3,4-5ab
Psòm 24, 4-5ab,6-7,8-9,10,14
Psòm 26, 1,2,3,4,5
Psòm 66, 2-3,5,7-8
Psòm 95, 1-2a,2b-3,7-8a,9-10a
Psòm 97, 1,2-3b,3c-4,5-6
Psòm 109, 1,2,3,4
Psòm 116, 1,2

1. Matié 9, 35-38 (Òdinasion 2)
2. Mark 10, 17-27 (8èm lindi)
3. Mark 10, 28-30
4. Luk 5, 1-11 (5èm dimanch C)
5. Luk 9, 57-62 (Sin yo 15)
6. Luk 14, 25-33 (Sin yo 19)
7. Jan 1, 35-51 (oubyin 35-42)
8. Jan 15, 9-17 (Pastè yo 10)

POU KRETYIN YO KA TOUNIN FE YOUN

Lékti Ansyin Téstaman-an

1. Détéronòm 30, 1-4
2. Ézékièl 36, 23-28 (20èm jédi II)
3. Ézékièl 37, 15-19.21b-22.26-28
4. Sofoni 3, 16-20

Psòm 22, 1-2b,2c-3,4,5,6

Psòm 99, 1,2,3,4,5

Psòm 117, 22-23,25-26,28-29

Psòm 121, 1-2,3-4a,4b-5,6-7,8-9

Jérémi 31, 10,11-12b,13

Lékti Nouvo Téstaman-an

1. 1 Korintyin 1, 10-13
2. Éfézyin 2, 19-22 (Dédikas 2)
3. Éfézyin 4, 1-6 (18èm dimanch B)
4. Éfézyin 4, 30 — 5, 2 (19èm dimanch B)
5. Filipyin 2, 1-13
6. Kolosyin 3, 9b-17 (Batèm granmoun 9)
7. 1 Timoté 2, 5-8
8. 1 Jan 4, 9-15

Évanjil

1. Matié 18, 19-22
2. Luk 9, 49-55 (final dapré Vulgat la)
3. Jan 10, 11-16 (Pastè yo 9)
4. Jan 11,45-52
5. Jan 13, 1-15 (Jédi-Sin, Soupé Granmèt la)
6. 7 ak 8, tankou 7èm dimanch Pak ABC

POU EVANJELIZASION PEP YO

Lékti Ansyin Téstaman-an

1. Izayi 2, 1-5 (1é dimanch Avan A)
2. Izayi 56, 1.6-7 (Dédikas 5)
3. Izayi 60, 1-6 (Epifani)
4. Jonas 3, 10 — 4, 11
5. Zakari 8, 20-23 (26èm madi I)

Psòm 18, 2-3,4-5ab

Psòm 66, 2-3,5,7-8

Psòm 95, 1-2a,2b-3,7-8a,9-10a

Psòm 97, 1,2-3ab,3cd-4,5-6

Psòm 116, 1,2

Lékti Nouvo Téstaman-an

1. Travay Apot yo 1, 3-8 (Konfirmasion 1)
2. Travay Apot yo 11, 19-26 (4èm madi Pak)
3. Travay Apot yo 13, 46-49 (Pastè Tan Pak 1)
4. Romin 10, 9-18 (30 nov. S. André)
5. Éfézyin 3, 2-12 (29èm mèkredi II)
6. 1 Timoté 2, 1-8 (25èm dimanch C)

Évanjil

1. Mt. 28, 16-20 (Pastè yo 3)
2. Mark 16, 15-20 (Pastè yo 5)
3. Luk 24, 44-53 (Batèm granmoun yo 6)
4. Jan 11, 45-52 (pou krétyin yo fè youn 4)
5. Jan 17, 11b. 17-23

POU KRETYIN Y-AP PESEKITE YO

Lékti Ansyin Téstaman-an

1. Éstè 13, 8-11.15-17 (= 4, 17a-d.f-h)
2. 1 Makabé 2, 49-52.57-64
3. Izayi 41, 8-10.13-14
4. Danièl 3, 25.34-43 (3èm madi Karèm)

Lékti Nouvo Téstaman-an

1. Travay Apot yo 4, 1-5.18-21
2. Travay Apot yo 4, 23-31 (2èm lindi Pak)
3. Travay Apot yo 5, 27b-32.40b-42
4. Filipyin 1, 27-30
5. Ébré 12, 2-13
6. 1 Piè 1, 3-9 (2èm dim. Pak A)
7. Apokalips 7, 9-10.14b-17

Évanjil

1. Matié 5, 1-12a (Sin yo 1)
2. Matié 10, 17-22 (Mati yo 1)
3. Matié 10, 26-33 (12èm dimanch A)
4. Jan 15, 18-21.26 — 16, 4

POU YON REYINION PASTORAL

- A.T. Détéronòm 30, 10-14 (15èm dimanch C)
- N.T. Filipyin 2, 1-4 (31èm lindi II)

Évanjil

1. Matié 18, 15-20 (23èm dim. A)

2. Mark 6, 30-34 (16èm dimanch B)
3. Jan 14, 23-29 (6èm dim. Pak C)

POU LAPE AK JISTS

Lékti Ansyin Téstaman-an

1. Izayi 9, 1-6 (ouè Mari 8)
2. Izayi 32, 15-20
3. Izayi 57, 15-19

*Psòm 71, 1-2,3-4,7-8,12-13,17**Psòm 84, 9-10,11,12,13-14**Psòm 121, 1-2,3-4a,4b-5,6-7,8-9*

Lékti Nouvo Téstaman-an

1. Filipyin 4, 6-9 (27èm dimanch A)
2. Kolosyin 3, 12-15
3. Jak 3, 13-18 (7èm lindi II)

Évanjil

1. Mt. 5, 1-12a (Sin yo 1)
2. Mt. 5, 38-48 (7èm dimanch A)
3. Jan 14, 23-29 (6èm dim. Pak C)
4. Jan 20, 19-23 (Pantkot, jou)

NANTAN LAGE

Lékti Ansyin Téstaman-an

1. Jènèz 4, 3-10
2. Miché 4, 1-4
3. Zakari 9, 9-10 (14èm dimanch A)

*Psòm 71, 1-2,3-4,7-8,12-13,17**Psòm 84, 9-10,11-12,13-14*

Lékti Nouvo Téstaman-an

1. Galat 5, 17-26
2. Éfézyin 4, 30 — 5, 2 (19èm dimanch B)
3. Jak 4, 1-10 (7èm madi II)

Évanjil

1. Matié 5, 20-24
 2. Jan 15, 9-12 (Mariaj 8)
- Yo ka pran lékti Mès pou lapè a tou.

POU YON NOUVO ANE SIVIL

Lékti Ansyin Téstaman-an

1. Jènèz 1, 14-18
- Nonb 6, 22-27 (1é janvié)

Lékti Nouvo Téstaman-an

1. 1 Korintyin 7, 29-31 (3èm dimanch B)
2. Jak 4, 13-15

Évanjil

1. Matié 6, 31-34
2. Luk 12, 35-40 (Sin yo 18)

POU SANKTIFIKASION TRAVAY NOU

Lékti Ansyin Téstaman-an

1. Jènèz 1,26 — 2, 3 (1é mé, S. Jozèf)
2. Jènèz 2, 4b-9.15

N.T. : 2 Tésalonisyin 3, 6-12.16

Évanjil

1. Matié 6,31-34 (pi ro, nouvo ané-a)
2. Matié 25, 14-30 (Sin yo 9)

LE Y-AP SIMIN JADIN YO

A.T. Jènèz 1, 11-12
 N.T. 2 Korintyin 9, 8-11

Évanjil

1. Matié 13, 1-9 (16èm mèkrédi)
 2. Mark 4, 26-29
- Yo ka sèvi tou ak lékti Mès pou Sanktifikasion Travay nou-an.

APRE REKOLT

Lékti Ansyin Téstaman-an

1. Détéronòm 8, 7-18
2. Joèl 2, 21-24.26-27

N.T. 1 Timoté 6, 6-11. 17-19

Évanjil

1. Luk 12, 15-21
 2. Luk 17, 11-19 (28èm dimanch C)
- Yo ka sèvi tou ak lékti pou Mès aksion-d-gras la

POU MOUN KI NAN GRANGOU

Lékti Ansyin Téstaman-an

1. Détéronòm 24, 17-22
2. Jòb 31, 16-20.24-25.31-32

3. Izayi 58, 6-11 (Sin yo an déyò Tan Pak 15)

Lékti Nouvo Téstaman-an

1. Travay Apot yo 11,27-30
2. Korintyin 8, 1-5.9-15
3. 2 Korintyin 9, 6-15

Évanjil

1. Matié 25, 31-46 (Sin yo 10)
2. Mark 6, 34-44 (2èm jou apré Épipani)
3. Luk 14, 12-14 (31èm lindi)
4. Luk 16, 19-31 (26èm dimanch C)

POU REFUJIE YO AK EGZILE YO

Lékti Ansyin Téstaman-an

1. Détéronòm 10, 17-19
2. Détéronòm 24,17-22 (pi ro, Pou moun ki grangou)

Lékti Nouvo Téstaman-an

1. Romin 12, 9-16b (31 mé)
2. Ébré 11, 13-16
3. Ébré 13, 1-3.14-16

Évanjil

1. Matié 2, 13-15.19-23 (S. Fanmi A)
2. Luk 10, 25-37 (15èm dimanch C)

POU MALAD YO

Lékti Ansyin Téstaman-an

1. 2 Roua 20, 1-6
2. Izayi 53, 1-5.10-11

Psòm 101, 3,4-5,6.12,20-21

Izayi 38, 10,11,12ab,16-17

Lékti Nouvo Téstaman-an

1. Travay Apot yo 28, 7-10
2. 2 Korintyin 4, 10-18
3. 2 Korintyin 12, 7b-10
4. Jak 5, 13-16

Évanjil

1. Matié 8, 14-17
2. Mark 16, 15-20 (Pasté yo 5)
3. Luk 22, 39-43
4. Jan 15, 1-8 (Sin yo 20)

POU DIVES KALITE DETRES

Lékti Ansyin Téstaman-an

1. Éstè 13, 8-11.16-17 (= 4, 17a-d. g-h)
2. Lamantasion 3, 17-26 (Défin yo 5)
3. Danièl 3, 25.34-43 (3èm madi Karèm)

Psòm 79, 2.3bc,5-6,7.19

Psòm 84, 2-4,5-6,7-8

Psòm 122, 1-2a,2bcd

Lékti Nouvo Téstaman-an

1. Romin 8, 18-30
2. Romin 8, 31b-39 (30èm jédi I)
3. Jak 1, 2-4.12 (Mati yo 7)
4. Apokalips 21, 1-5a.6b-7 (Défin yo 18)

Évanjil

1. Matié 7,7-11
2. Mark 4,35-41 (12èm dimanch B)
3. Luk 18, 1-8 (29èm dimanch C)

POU AKSION-D-GRAS

Lékti Ansyin Téstaman-an

1. 1 Roua 8, 55-61
2. Sirasid 50, 24-26
3. Izayi 63, 7-9
4. Sofoni 3, 14-15

Psòm 112, 1-2,3-4,5-6,7-8

Psòm 137, 1-2a,2bc-3,4-5

Psòm 144, 2-3,4-5,6-7,8-9,10-11

1 Kronik 29, 10, 11abc, 11d-12a, 12bcd

Lékti Nouvo Téstaman-an

1. 1 Korintyin 1, 3-9 (1é dim. Avan B)
2. Éfézyin 1, 3-14 (15èm dimanch B)
3. Kolosyin 3, 12-17 (23èm jédi I)

Évanjil

1. Mark 5, 18-20
2. Luk 17, 11-19 (28èm dimanch C)

POU PADON PECHE YO

Lékti Ansyin Téstaman-an

1. Izayi 55, 6-9 (25èm dimanch A)
2. Ézékièl 18, 21-23.30-32

3. Joèl 2, 12-18 (mèkrédi Sann)
 4. Jonas 3, 1-10 (mèkrédi 1é sémèn Karèm)

Psòm 50, 3-4,5-6ab,12-13

Psòm 102, 1-2,3-4,8-9,11.13

Psòm 129, 1-2,3-4,5-6ab,7b-8

Lékti Nouvo Téstaman-an

1. Romin 6, 2-4.12-14
 1 Jan 1,5 — 2,2 (28 désanm, sin Inosan yo)

Évanjil

1. Matié 9, 1-8 (13èm jédi)
 2. Mark 1, 1-8.14-15
 1. Romin 8, 18-30

3. Luk 7, 36-50 (24èm jédi)
 4. Luk 15, 1-3.11-32 (4èm dimanch Karèm C)
 5. Luk 24, 46-48

POU NOU KA MOURI

NAN GRAS BONDIE

A.T. Izayi 25, 6-10a (28èm dimanch A)

Psòm 30, 2.6,809,15-16,17.20a

N.T. Romin 14, 7-9.10b-12 (Défin yo 7)

Évanjil

Luk 23, 39-46

* * *

MÈS VOTIV YO

Pou Trinité ki sin-an, ouè nan prémié dimanch apré Pantkot.

MISTE KOUA-A

Prémié lékti an déyò Tan Pak la

1. Égzòd 12, 1-8.11-14 (Jédi-Sin, Soupé Grammèt la)
2. Sajès 2, la. 12-22
(vandrédi 4èm semèn Karèm)
3. Izayi 50, 4-9a
(mèkrédi Sémèn Sint)
4. Izayi 52, 13 — 53, 12
(Vandrédi-Sin)
5. Zakari 12, 10-11 ; 13, 6-7

Prémié lékti nan Tan Pak la

1. Travay Apot yo 10, 34-43
(Défin yo 1)
2. Travay Apot yo 13, 26-33
(Doktè yo, Tan Pak 2)
3. Apokalips 1, 5-8 (Kris-Roua B)
4. Apokalips 5, 6-12

Psòm 21, 8-9,17-18a,19-20,22c,24a

Psòm 30, 2,6,12-13,15-16,17,25

Psòm 54, 5-6,13,14-15,17-18,23

Psòm 68, 2,8,9-10,15,16,17,18-19

Psòm 117, 4-5, 6-7, 10-11, 13-14, 15-16

Psòm 117, 14,16, 17-18, 19-20, 21-22, 23-24

Dézièm lékti

1. 1 Korintyin 1, 18-25 (Pastè yo 2)
2. Éfézyin 2, 13-18
(16èm dimanch B)
3. Filipyin 2, 6-11
(dimanch Pasion-an)
4. Filipyin 3, 8-14 (Sin yo 9)
5. Ébré. 5, 7-9 (5èm dim. Karèm B)

Évanjil

1. Mark 8, 31-34
2. Mark 12, 1-12 (9èm lindi)
3. Luk 24, 35-48 (3èm dim. Pak B)
4. Jan 12, 31-36a

Lékti Pasion Kris la

1. Mark 14, 32-41
2. Matié 26, 47-56
3. Mark 14, 55-65
4. Mark 15, 1-15
3. Mark 15, 16-20
5. Matié 27, 33-50
6. Luk 23, 33-34.39-46
8. Jan 19, 28-37
9. Mark 15, 33-39; 16, 1-6
(Défin yo 5)

EKARISTI-A

Prémié lékti, an déyò Tan Pak la

- 1, 3 ak 4 : Sakré-Kè C, B ak A
2. Égzòd 16, 2-4.12-15 (18èm dim. B)
5. 1 Roua 19, 4-8 (19èm dimanch B)
6. Provèb 9, 1-6 (20èm dimanch B)

Prémié lékti nan Tan Pak la

1. Travay Apot yo 2, 42-47 (2èm dimanch Pak A)
2. Travay Apot yo 10, 34a.37-43 (Pak)
- Psòm 22, 1-2b,2c-3,4,5,6*
- Psòm 33, 2-3,4-5,6-7,8-9,10-11*
- Psòm 39, 2.4b,7-8a,8b-9,10*
- Psòm 77, 3b-4acd,23-24,25.54*
- Psòm 109, 1,2,3,4*
- Psòm 115, 12-13,15-16ac,17-18*
- Psòm 144, 1-11,15-16,17-18*
- Psòm 147, 12-13,14-15,19-20*

Dézièm lékti

- 1, 2 ak 3: Sakré-Kè, A, C ak B

Évanjil

- 1, 2 ak 7: Sakré-Kè, B, C ak A
3. Luk 24, 13-35 (3èm dim. Pak A)
4. Jan 6, 1-15 (17èm dimanch B)
5. Jan 6, 24-35 (18èm dimanch B)
6. Jan 6, 41-51a (19èm dimanch B)
8. Jan 21, 1-14 (vandrédi Pak)

SAKRE-KE JEZU

Prémié lékti, an déyò Tan Pak la

1. Égzòd 34, 4b-6-8-9 (S. Trinité A)
2. 6 et 7: Sakré-Kè A, C ak B
3. Détéronòm 10, 12-22 (19èm lindi I)
4. Izayi 49, 13-15
5. Jérémi 31, 1-4

Prémié lékti nan Tan Pak la

1. Apokalips 3, 14b.20-22 (Sin yo, Tan Pak 2)
2. Apok. 5, 6-12 (Koua-a ki sin-an)

Psòm 22, 1-2b,2c-3,4,5,6

Psòm 24, 4-5ab,6-7,8-9,10,14

Psòm 32, 1-2,4-5,11-12,18-19,20-21

Psòm 33, 2-3, 4-5, 6-7, 8-9, 17-18, 19,23

Psòm 102, 1-2,3-4,6-7,8,10

Izayi 12, 2,4b-5a,5b-5

Dézièm lékti

- 1 et 6: Sakré-Kè C ak A
2. Éfézyin 1, 3-10 (28èm jédi II)
3. Éfézyin 3, 8-12 (Doktè 4)
4. Éfézyin 3, 14-19 (Sin yo 7)
5. Filipyin 1, 8-11

Évanjil

- 1 ak 8: Sakré-Kè A ak B
2. Luk 15, 1-10 (31èm jédi)
3. Luk 15,1-3.11-32 (4èm dim. Karèm C)
4. Jan 10, 11-18 (4èm dim. Pak B)
5. Jan 15, 1-8 (Sin yo 20)
6. Jan 15, 9-17 (Pastè yo 10)
7. Jan 17, 20-26 (7èm dim. Pak C)

SAN JEZU KI TELMAN SIN

Prémié lékti, an déyò Tan Pak la

1. Égzòd 12, 21-27
2. Égzòd 24, 3-8 (Sakré-Kè B)

Prémié lékti pou Tan Pak la

1. Apokalips 1, 5-8 (Kris-Roua B)
 2. Apokalips 7, 9-14
- Psòm 39, 2,4ab,7-8a,8b-9,10*
Psòm 115, 12-13,15-16ac,17-18

Dézièm lékti

1. Ébré 9, 11-15 (Sakré-Kè B)
2. Ébré 12, 18-19.22-24 (22èm dimanch C)
3. 1 Piè 1, 17-21 (3èm dim. Pak A)
4. 1 Jan 5, 4-8

Évanjil

1. Mark 14,12-16.22-26 (Sakré-Kè B)
2. Mark 5,16-20 (Koua, Pasion 5)
3. Luk 22, 39-44
4. Jan 19, 31-37 (Sakré-Kè B)

NON JEZU KI TELMAN SIN

Prémié lékti, an déyò Tan Pak la

1. Égzòd 3, 13-15
2. Sirasid 51, 11-17

Prémié lékti nan Tan Pak la

1. Travay Apot yo 3, 1-10 (mèkrédi Pak)
2. Travay Apot yo 4, 8-12 (4èm dimanch Pak B)
3. Travay Apot yo 5, 27b-32.40b-42 (Krétyin y-ap pèsékite yo)

Psòm 112, 1-2,3-4,5,6,7-8

Izayi 12, 2,4b-5a,5b-6

Dézièm lékti

1. 1 Korintyin 1,1-3 (2èm dim. A)
2. Filipyin 2, 6-11 (dim. Pasion-an)
3. Kolosyin 3, 12-17 (23èm jédi I)

Évanjil

1. Matié 1, 18-25
2. Luk 2, 16-21 (1é janvier)
3. Jan 14, 6-14 (3 mé)

Pou Mès votiv Éspri-Sin-an, chouazi lékti nan Mès Vèy Pantkot oubyin Jou Pantkot la, oubyin lékti Mès konfirmasion-an.

Pou Mès votiv tout Apot yo oubyin yon sèl Apot, yo pran lékti yo nan fèt Sin Simon ak Sin Jud, 28 oktòb.

MÈS KI SPÉSIAL AN AYITI

JANVIÉ

21 Notre-Dam Altagras
Sirasid 24,23-31
Luk 1,26-38

MAS

23 Sin Turib de Mogrovejo
2 Timoté 1,13-14 ; 2,1-3
Psòm 95, 1-2a,2b-3,7-8a,9-10a
Matié 9,35-38

AVRIL

28 Sin Loui-Mari Grignon Monfò
Travay Apot yo 1, 6-9.14 ; 2, 1-4.42
1 Korintyin 2, 1-13
Matié 28, 16-20

JUN

27 **Notre-Dam Pèpètuèl Sékou**
Zakari 2,10-13
Izayi 13
Galat 4,4-7
Jan 19,25-27

Samdi apré dézièm dimanch apré Pantkot :
Kè Imakilé Mari
Izayi 61, 9-11
Luk 2, 41-51

JIYÈ

4 Tout Pap ki sin yo
Ébré 13,7-17
Matié 16,13-23

OUT

23 Roz de Lima
Kantik 8, 6-7
2 Korintyin 10, 17-11, 2
Matié 13, 44-46

SÉPTANM

2 Byinnéré Jak-Jul Bono ak konpagnon-l
yo ki mati
1 Piè 3,14-17
Psòm 125, 1-2ab,2cd-3,4-5,6
Jan 15,18-21

9 Sin Piè Klavè
Izayi 58, 6-9a.10
Luk 10, 29-37

NOVANM

3 Sin Martin de Porès
Kolosyin 3,12-17
Matié 22,34-40

DÉSANM

12 Notre-Dam Gouadloup
Sirasid 24, 23-31
Luk 1,39-47

27 Notre-Dam Méday Mirak
Apokalips 11, 19 ; 12, 1-5. 14-17
Jan 2, 1-11

* * *

Gid tout liv la

PRÉMIÉ DIMANCH LAVAN A.....	5
PRÉMIÉ DIMANCH LAVAN B.....	11
PRÉMIÉ DIMANCH LAVAN C.....	15
DÉZIÈM DIMANCH LAVAN A.....	23
TOUAZIÈM DIMANCH LAVAN A.....	34
TOUAZIÈM DIMANCH LAVAN B.....	39
TOUAZIÈM DIMANCH LAVAN C.....	41
KATRIYÈM DIMANCH LAVAN A.....	49
KATRIYÈM DIMANCH LAVAN B.....	54
KATRIYÈM DIMANCH LAVAN C.....	58
NÉSANS GRANMÈT LA.....	65
FANMI JÉZU, MARI AK JOZÈF KI SIN-AN A.....	80
FANMI JÉZU, MARI AK JOZÈF KI SIN-AN B.....	86
FANMIY JÉZU, MARI AK JOZÈF KI SIN-AN C.....	88
ÉPIFANI GRANMÈT LA.....	93
BATÈM GRANMÈT LA A.....	106
BATÈM GRANMÈT LA B.....	108
BATÈM GRANMÈT LA C.....	109
DÉZIÈM DIMANCH ÒDINÈ A.....	115
DÉZIÈM DIMANCH ÒDINÈ B.....	121
DÉZIÈM DIMANCH ÒDINÈ C.....	125
TOUAZIÈM DIMANCH ÒDINÈ A.....	127
TOUAZIÈM DIMANCH ÒDINÈ B.....	130
TOUAZIÈM DIMANCH ÒDINÈ C.....	133
KATRIYÈM DIMANCH ÒDINÈ A.....	137
KATRIYÈM DIMANCH ÒDINÈ B.....	141
KATRIYÈM DIMANCH ÒDINÈ C.....	144
SINKIÈM DIMANCH ÒDINÈ A.....	147
SINKIÈM DIMANCH ÒDINÈ B.....	151
SINKIÈM DIMANCH ÒDINÈ C.....	155
SIZIÈM DIMANCH ÒDINÈ A.....	159
SIZIÈM DIMANCH ÒDINÈ B.....	164
SIZIÈM DIMANCH ÒDINÈ C.....	168
SÉTIÈM DIMANCH ÒDINÈ A.....	170
SÉTIÈM DIMANCH ÒDINÈ B.....	173
UITIÈM DIMANCH ÒDINÈ A.....	176
UITIÈM DIMANCH ÒDINÈ B.....	181
UITIÈM DIMANCH ÒDINÈ C.....	182
NÉVIÈM DIMANCH ÒDINÈ A.....	183
NÉVIÈM DIMANCH ÒDINÈ B.....	186
PRÉMIÉ DIMANCH KARÈM A.....	192

PRÉMIÉ DIMANCH KARÈM B.....	197
PRÈMIÉ DIMANCH KARÈM C.....	208
DÉZIÈM DIMANCH KARÈM A.....	218
DÉZIÈM DIMANCH KARÈM B.....	223
DÉZIÈM DIMANCH KARÈM C.....	230
TOUAZIÈM DIMANCH KARÈM A.....	242
TOUAZIÈM DIMANCH KARÈM B.....	247
TOUAZIÈM DIMANCH KARÈM C.....	253
KATRIYÈM DIMANCH KARÈM A.....	262
KATRIYÈM DIMANCH KARÈM B.....	268
KATRIYÈM DIMANCH KARÈM C.....	275
SINKIÈM DIMANCH KARÈM A.....	289
SINKIÈM DIMANCH KARÈM B.....	298
SINKIÈM DIMANCH KARÈM C.....	303
DIMANCH RAMO A.....	312
DIMANCH RAMO C.....	332
VANDRÉDI-SIN.....	337
DIMANCH PAK.....	348
DÉZIÈM DIMANCH PAK A (DIMANCH MIZÉRIKÒD).....	373
DÉZIÈM DIMANCH PAK B (DIMANCH MIZÉRIKÒD).....	376
DÉZIÈM DIMANCH PAK C (DIMANCH MIZÉRIKÒD).....	382
TOUAZIÈM DIMANCH PAK A.....	386
TOUAZIÈM DIMANCH PAK B.....	400
TOUAZIÈM DIMANCH PAK C.....	409
KATRIYÈM DIMANCH PAK A.....	421
KATRIYÈM DIMANCH PAK B.....	427
KATRIYÈM DIMANCH PAK C.....	436
SINKIÈM DIMANCH PAK A.....	447
SINKIÈM DIMANCH PAK B.....	452
SINKIÈM DIMANCH PAK C.....	458
SIZIÈM DIMANCH PAK A.....	464
SIZIÈM DIMANCH PAK B.....	467
SIZIÈM DIMANCH PAK C.....	472
ASANSION.....	484
SÉTIÈM DIMANCH PAK A.....	490
SÉTIÈM DIMANCH PAK B.....	492
SÉTIÈM DIMANCH PAK C.....	495
PANNKOT.....	503
TRINITÉ KI SIN ANPIL LA.....	517
KÒ AK SAN JÉZU-KRI KI SIN ANPIL LA.....	534
SAKRÉ-KÈ.....	541
DIZIÈM DIMANCH ODINÈ A.....	544
DIZIÈM DIMANCH ODINÈ B.....	545
DIZIÈM DIMANCH ÒDINÈ C.....	547

ONZIÈM DIMANCH ÒDINÈ A.....	551
ONZIÈM DIMANCH ÒDINÈ B.....	552
ONZIÈM DIMANCH ÒDINÈ C.....	554
DOUZIÈM DIMANCH ÒDINÈ A.....	555
DOUZIÈM DIMANCH ÒDINÈ B.....	556
DOUZIÈM DIMANCH ÒDINÈ C.....	559
TRÈZIÈM DIMANCH ÒDINÈ A.....	564
TRÈZIÈM DIMANCH ÒDINÈ B.....	568
TRÈZIÈM DIMANCH ÒDINÈ C.....	570
KATÒZIÈM DIMANCH ÒDINÈ A.....	572
KATÒZIÈM DIMANCH ÒDINÈ B.....	576
KATÒZIÈM DIMANCH ÒDINÈ C.....	578
KINZIÈM DIMANCH ÒDINÈ A.....	581
KINZIÈM DIMANCH ÒDINÈ B.....	587
KINZIÈM DIMANCH ÒDINÈ C.....	593
SÈZIÈM DIMANCH ÒDINÈ A.....	597
SÈZIÈM DIMANCH ÒDINÈ B.....	601
SÈZIÈM DIMANCH ÒDINÈ C.....	603
DISÉTIÈM DIMANCH ÒDINÈ A.....	607
DISÉTIÈM DIMANCH ÒDINÈ B.....	613
DISÉTIÈM DIMANCH ÒDINÈ C.....	615
DIZUITIÈM DIMANCH ÒDINÈ A.....	622
DIZUITIÈM DIMANCH ÒDINÈ B.....	630
DIZUITIÈM DIMANCH ÒDINÈ C.....	638
DIZNÉVIÈM DIMANCH ÒDINÈ A.....	642
DIZNÉVIÈM DIMANCH ÒDINÈ B.....	646
DIZNÉVIÈM DIMANCH C.....	648
VINTIÈM DIMANCH ÒDINÈ A.....	657
VINTIÈM DIMANCH ÒDINÈ B.....	661
VINTIÈM DIMANCH ÒDINÈ C.....	669
VINTÉINIÈM DIMANCH ÒDINÈ A.....	677
VINTÉINIÈM DIMANCH ÒDINÈ B.....	680
VINTÉINIÈM DIMANCH ÒDINÈ C.....	688
VINDÉZIÈM DIMANCH ÒDINÈ A.....	694
VINDÉZIÈM DIMANCH ÒDINÈ B.....	696
VINDÉZIÈM DIMANCH ÒDINÈ C.....	703
VINTOUAZIÈM DIMANCH ÒDINÈ A.....	708
VINTOUAZIÈM DIMANCH ÒDINÈ B.....	711
VINTOUAZIÈM DIMANCH ÒDINÈ C.....	719
VINKATRIYÈM DIMANCH ÒDINÈ A.....	725
VINKATRIYÈM DIMANCH ÒDINÈ B.....	728
VINKATRIYÈM DIMANCH ÒDINÈ C.....	735
VINSINKIÈM DIMANCH ÒDINÈ A.....	740
VINSINKIÈM DIMANCH ÒDINÈ B.....	743

VINSINKIÈM DIMANCH ÒDINÈ C.....	748
VINSIZIÈM DIMANCH ÒDINÈ A.....	751
VINSIZIÈM DIMANCH ÒDINÈ B.....	754
VINSIZIÈM DIMANCH ÒDINÈ C.....	756
VINSÉTIÈM DIMANCH ÒDINÈ A.....	759
VINSÉTIÈM DIMANCH ÒDINÈ B.....	763
VINSÉTIÈM DIMANCH ÒDINÈ C.....	769
VINTUITIÈM DIMANCH ÒDINÈ A.....	777
VINTUITIÈM DIMANCH ÒDINÈ B.....	779
VINTUITIÈM DIMANCH ÒDINÈ C.....	786
VINTNÉVIÈM DIMANCH ÒDINÈ A.....	790
VINTNÉVIÈM DIMANCH ÒDINÈ B.....	792
VINTNÉVIÈM DIMANCH ÒDINÈ C.....	799
TRANTIÈM DIMANCH ÒDINÈ A.....	804
TRANTIÈM DIMANCH ÒDINÈ B.....	806
TRANTIÈM DIMANCH ÒDINÈ C.....	812
TRANTÉINIÈM DIMANCH ÒDINÈ A.....	816
TRANTÉINIÈM DIMANCH ÒDINÈ B.....	818
TRANTÉINIÈM DIMANCH ÒDINÈ C.....	824
TRANDÉZIÈM DIMANCH ÒDINÈ A.....	828
TRANDÉZIÈM DIMANCH ÒDINÈ B.....	830
TRANDÉZIÈM DIMANCH ÒDINÈ C.....	836
TRANTOUAZIÈM DIMANCH ÒDINÈ A.....	841
TRANTOUAZIÈM DIMANCH ÒDINÈ B.....	842
TRANTOUAZIÈM DIMANCH ÒDINÈ C.....	848
TRANKATRIYÈM DIMANCH ÒDINÈ, KRIS-ROUA A.....	852
TRANKATRIYÈM DIMANCH ÒDINÈ, KRIS-ROUA B.....	853
TRANKATRIYÈM DIMANCH ÒDINÈ, KRIS-ROUA C.....	856
LÉKTI LIV KI SIN YO NAN ÉKARISTI-A AK LÒT SAKRÉMAN YO	863
Gid tout liv la.....	915

